


QARAAKYA QUA TIMWATORA



The New Testament in the Omwunra-Toqura (South Tairora)
Language of Papua New Guinea

QARAAKYA QUA TIMWATORA

**The New Testament in the Omwunra-Toqura (South Tairora)
Language of Papua New Guinea**

Nupela Testamen long tokples Omwurna-Toqura long Niugini
copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 28 Dec 2024 from source files dated 31 Aug 2023
73e2f29d-4ca4-50e6-a471-722ac8ab5666

Contents

FRT	1
Matiu	3
Maaki	86
Ruku	138
Ioni	223
Kyaiqa Varora	282
Romeni	359
1 Korinti	397
2 Korinti	436
Karesia	460
Epesaasi	474
Piripai	487
Korosi	496
1 Tesaronaika	505
2 Tesaronaika	513
1 Timoti	518
2 Timoti	529
Taitaasi	537
Pirimoni	542
Hivuru	545
Iemisi	576
1 Pitaa	586
2 Pitaa	597
1 Ioni	604
2 Ioni	613
3 Ioni	615
Iuti	617
Qovarama Kyora	620
Bible reading	662

Qaraakya Qua Timwatora

The New Testament in the Omwunra-Toqura (South Tairora) language of Papua New Guinea

Nupela Testamen long tokples Omwurna-Toqura long Niugini

Qaraakya Qua Timwatora

The New Testament in the Omwunra-Toqura (South Tairora) language of
Papua New Guinea
[omw]

Translation by Wycliffe Bible Translators

© 2000, Bible League International

Print publication, 2000 by Bible League International

Web version

© 2014, Wycliffe Bible Translators, Inc.
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manneri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://>

tokplesbaibel.org. Yu no ken kisim mani na salim dispela. **Yu mas givim nating.** Na tu, **yu no ken senism Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

Hini mpo mouku mwia nrutu

Omwunra-Toqura[tab]Pata nrutu

MATIU

Matiuva Iesusiva nrohurara tura

*Iesusi Karaisira okyara mwihua nyutu
(Ruku 3:23-28)*

- 1** Jesusi Karaisira okyara mwataamama vahiro. Evarahaamuavavata Ntevitivavata mwitanahua mwia haivaqahuatana varura.
- 2** Evarahaamuva Aisaakira qova varuvaro
Aisaakiva Iaikopura qova varuvaro
Iaikopuva Iutaaravata mwia qata
vakyaanrammwu sova varuvaro
- 3** Jutaava Peresikya Saraakyta sova varuvaro
mwitanahua nyova Temaava varura.
Peresiva Hesaroninra qova varuvaro
Hesaroniva Raminra qova varuvaro
- 4** Ramiva Aminantaapura qova varuvaro
Aminantaapuva Nasoninra qova varuvaro
Nasoniva Saramoninra qova varuvaro
- 5** Saramoniva Mpoasira qova varura.
Mpoasira mwia nrova Rehaapiva varura.
Mpoasiva Ompetira qova varura.
Ompetira mwia nrova Rutiva varura.
Ompetiva Iesira qova varuvaro
- 6** Iesiva Ntevitira qova varura.
Ntevitiva nronraqama viro vunyaa vaisivanto varura.
Ntevitiva Soromoninra qova varura.
Soromoninra nrova tauraaqama kyero
Iuraiaara nraatavanto varura.
- 7** Soromoniva Riampoaminra qova varuvaro
Riampoamiva Apaisaara qova varuvaro
Apaisaava Esara qova varuvaro
- 8** Esava Sihosapatira qova varuvaro
Sihsopativa Soraamínra qova varuvaro
Soraamiva Asaiaara qova varuvaro
- 9** Asaiaava Sotaaminra qova varuvaro
Sotaamiva Ehaasisra qova varuvaro
Ehaasiva Hesekaiiaara qova varuvaro
- 10** Hesekaiiaava Manasaara qova varuvaro
Manasaava Emosira qova varuvaro
Emosiva Sosaiaara qova varuvaro
- 11** Sosaiaava Sekonaiaaravata mwia
qatanrammwuvata sova varura.
Mwi entara mpo mwatanaahua
ekyaa Isarerri rupa kyeta sitaqita
mwatukya mpo Papiironini uro kyovaro
- 12** Sekonaiaava Siatierira qova varuvaro
Siatieriva Serapaperira qova varuvaro
- 13** Serapaperiva Apaiaatira qova varuvaro
Apaiaativta Eraiaakiminra qova varuvaro
Eraiaakimiva Esora qova varuvaro

14 Esova Setokira qova varuvaro
 Setokiva Ekiminra qova varuvaro
 Ekimiva Eraaatira qova varuvaro
15 Eraaativa Eriesaara qova varuvaro
 Eriesava Mataaninra qova varuvaro
 Maataniva Iaikopura qova varuvaro
16 Iaikopuva Iosepiva qova varuvaro
 Iosepiva Mariaara mwia vaativanto varura.
 Mariaava Iesusira mwata tora.

(Tirenramwu Iesusirara Karaisirave, Mesaiaave, Kotiva titai vaisirave tunanra.)

17 Iesusi Karaisira kuaa okyara vahirero Evarahaamunraqaatairo Ntevitiraqaa mwia haivaqahua 14 nramwu mwi okyarahua varura. Ntevitiraqaaatairo Papironini rupaqita uro kyo entaraqaa mwia haivaqahua 14 nramwu mwi okyarahua varura. Papironini rupaqita uro kyoraqaatairo Karaisiva qovara hu entaraqaa mwia haivaqahua 14 nramwu mwi okyarahua varura.

Iosepiva taqovaro Mariaava nraaqiara tuaqama vura

18 Iesusi Karaisira mwatato okyarava mwataamama vahiro. Mwia nronra Mariaara Iosepiva qati titovaro hia mwikyantiri nrohu vakya Mariaava taqovaro Kotira mwanaquravanto mwia nraaqiara mwuvuvaro mwiva nraaqiara tuaqama vura.

19 Mwiva nraaqiara tuaqama viro varuvaro mwia vaativanto Iosepiva kyuqe vaisi ntapihi kyero nrohi varu vaisiva variqarora tiro, mwiva tiqaro, Nte nraakyne qora suqaa Mariaara titaariro kyauruankyorave. Kyai mwia uqeta kyena titaariro quariate, tiro.

20 Iosepiva mwitaama riero vaitero ruvaata taqe varuvaro Kotiva tito vaisiva, nyaamwunyaava mpovanto qovarama viro tiqaro, Ntevitira mwaaquo, Iosepio, hia aatu hiqara Mariaara varaante. Kotirā mwanaqura mwiva nraahu mwia nraaqiara mwiharo mwiva nraaqiara tuaqama viho.

21 I nraatavanto qoraisi nraaqiara mwata tairara e mwia nrutu nteqarama Iesusirave qianta. Iesusiva nraakyne qora kyaahaqama nyatero mwihua uaquia hi kyaiqara uti quara nruka nyatero mwihua huvantu kyaaninranra tira, e mwia nrutu nteqara Iesusirave qianta, tura.

22 Haaru Kotiva nai poropeti vaisi nroqitairo timwa to quava quataa vahiarive tiro, Kotiva tito vaisiva qovarama viro mwitaamata tura. Haaru Kotira qua qovarama kye varuva, poropeti vaisivanto mwitaama tiro:

23 Nraakiara hia qoraisivatama kyero nrohiari nraakyeva nraaqiara tuaqama viro nraaqiara mwataaananrove. Mwihua mwianra Imaanuerivave tivarave, tura. (Aisaiaa 7:14)

Imaanuerirave tivarave, tura. Imaanuerirave tivarave, tura.

24 Iosepiva vaitoraqitairo siviro mwiva Kotiva tito vaisiva tu quara riero mwiva tunte hiro Mariaara uro varatero varurama.

25 Mwiva hia Mariaaravata nrohuvaro Mariaava qati variqiro viro uro qoraisi nraaqiara mwata tovaro Iosepiva mwia nrutu nteqaro, Iesusivave, tura.

2

Mpo okyara mpo okyara taqo vaisinramwuhua Iesusira uro tagora

1 Herotiva nronraqama viro varu entara Mariaava Vetarahemini Iutia mwataqaa variqaro Iesusira mwata tero. Mwiva mwia mwata tero

varuvata vaisi mponramwuvanto mpo okyara mpo okyara taqo vaisinramwuhua huari nri ntora vevasaita Ierusaremimi nri ntora.

² Mwinramwuhua nri nteta kyapara hita tiqata, Nraaqiara mpo Iuttaaqi ntaqikyiani vaisira tanave mwata tuiharo variho? Tirenramwu huari nri ntainani variqata mwia qovora taqeta mwia nrutu tuaahererera nruruahuave, tita.

³ Mwinramwuhua mwitaa tuvaro Herotiva mwivavata mwi quara riero nrihanrama viro mwiva mwianra airi nraato tiqaro varura. Ekyaa Ierusaremimi varuhuavata mwi quara rietu airi nraato tiqata varuvaro

⁴ Herotiva vaisi nronranramwuanra aakyara ntero. Kotira kyaiqa vara mwate varu vaisinramwuhua vunyahuave, mwaanra okyara ti varu vaisihuave, mwiva mwihuara aakyara ntovata nrita ntuaantuama varuvaro Herotiva mwihua kyapara hiro tiqaro, Tanave Kotiva titairaro tumuani nraaqiarara Karaisira mwia nrova mwia mwata taani mwatava vaiho? tiro.

⁵ Herotiva mwitaa tuvata mwihua tiqata, Vetarahemi Iutia mwataqaave. Haaru Kotira qua qovarama kye varu vaisiva mwaa quara qara ntumwa tero tiqaro:

⁶ Vetarahemi Iutia mwataqaa vahiaravave.

Nraakye qoravanto iara hia qumina mwatukyave tivarave.

Iqitairo nronra vaisivanto qovarama quaninranra tita, nraakye qoravanto iara nrutu vataa mwatukyave tivarave.

Iqitairo vunyaa vaisivanto qovarama viro mwiva Kotira nraakye qora Isareriqaa kyuqema kyero ntaqikyiqiro quaninrave, turave. (*Maikaa 5:2*)

Haaru poropeti vaisivanto mwitaa turara tita, tire.

Karaisirara Vetarahemipi mwata taananrove turo, tita.

⁷ Mwihua mwitaa tuvaro Herotiva tuqeta kyero mpo okyara mpo okyara taqo vaisinramwuhua nruthua nyaanrama kyero tiqaro, Taireve qovora mwiva qovarama viho? tiro.

⁸ Mwitaa tuvata mwinramwuhua Herotira timwa mwuvaro riero mwiva mwinramwuhua Vetarahemini sitero tiqaro, Nkyenramwu uqinrakye mwi nraaqiarara puua hirerata quate. Nkyenramwu mwia puaama kye taqetama vaakyama nivata nrumu timwa mpivaeq ntevata uro nraaqiara mwia nrutu tuaahera mwataankye, tiro.

⁹ Herotiva mwitaa tuvata mwihua aanraqaa vi varuvaro qovoravanto vaakya mwihua huarivanto nri ntonani variqata taqova mwihua vuni mwiva nraante vuva uro nraaqiara mwiva varuraqa ra kyero mwiaqua vahura.

¹⁰ Mwiaqaa vahuvata mwihua qovora mwia taqeta mpoqama kyeta qamwatora.

¹¹ Mwinramwuhua nraamwuqi vera nteta taqovaro nraaqiara mwiva nai nronra Mariaakyantiri varuvata mwihua taqetama mwatasata tori kyauru ravi variqata mwia nrutu tuaahereqatama mwia qamwata mwateta. Mwihua qamwata mwateta mwiaqaaataita mpo inraikya mpo inraikya tuaqitai ohi kyeta koriqo ututo inraikyarave, munra kyuqe mwunntu quani inraikyarave, vahamwenra kyuquerave, ohi kyeta mwatora.

¹² Mwia mwi kyeta varita vaite varuvaro Kotiva ruvaatakya mwihua timwa nyinro tiqaro, Hia Herotira uro timwa mwiate, tuvata mwihua sivita mpo aanraqamateta nkylari mwaatanianra nrumu ntanteta vurama.

Iesusira vitero Isipini aatu vurama

¹³ Mwihua vuvaro Iosepiva vaite varuvaro Kotiva tito vaisiva qovarama viro ruvaatakya mwia timwa mwinro tiqaro, Sivira ena nrahesi nraaqiaravata sitera Isipini aatu quante. Mwini uro variraqe nte qakyo uro

mponanre qianinra riaante. Herotiva i nraaqiara puaama kyero ru kyarero uti varaho, tiro.

¹⁴ Mwitaa tuvaro Iosepiva siviro entaqi nraahu nai nraaqiaravata nai nraatavata sita varero Isipinianra vuva uro mwini

¹⁵ variqiro vi varuvaro Herotiva qutu vurama. Herotiva qutu vuvuro mwiaqaatairo haaru Kotira qua qovarama kye varu vaisiva tu quava quttaa vahurama. Haaru mwiva Kotiva mwataama tihō tiro: Nte Isipisaina ntēna maaqu nraanraanrinro mwiva nriananrove, tura. *(Hosaiia 11:1)*

Herotiva nraaqiaranramwu ru kyora

¹⁶ Herotiva variqaro taqovata huarī vu nri ntonanyaa vaisinramwu mwia qua ntegakye hia mwia timwa mwinaraitit, vuvuro mwia mpoqama kyero raraqa tovaro variqaro uro mpo hu vaisihua sitero tiqaro, Ekyaa qoraisi nraaqiara taara ihi varaahuave, hia taara ihi varaahuave, Vetarahemini variahuavata, mwia vara ututu variahuavata, ekyaa ru taiqa kyaate, tiro. Mwiva qovoravanto qovarama vu entara huarī vu nri ntonanyaahua timwa mwito quara rieqaro taara ihi varehuavata, hia taara ihi varehuavata, ru taiqa kyaate, tura.

¹⁷ Mwihua ru taiqa kyaate tuvaro haaru Kotiva poropeti vaisi Ieremaiara nroqitairo tu quava mwivauma vahiro. Mwataama tiro:

¹⁸ Ramaa mwatukyaitairo nronraqama kyero ntate variani quara nraakyē qora rievarave.

Tiri taatova Reseriva nai nraisiara ntate variananrove.

Mwia nraisi ekyaa qutu virara tiro, mwia mwutukya qihakya hiariva hia variraro mwiva nronraqama kyero ntate variananrove, tura.

(Ieremaiaa 31:15)

Isipisairo nrunra

¹⁹ Herotiva variro qutu vuvuro Iosepiva Isipini varuvaro Kotiva titova qaiqaa qovarama viro Iosepira ruvaatakyaa

²⁰ timwa mwino tiqaro, Sivira nraaqiaravata, mwia nronravata, sita varera Isarerī mwata Iutiaani nrumu nitantera quante. I nraaqiara ru kyarera hiahua qutu quavo, tiro.

²¹ Mwitaa tuvaro Iosepiva siviro nraaqiaravata, mwia nronravata, sita varero Isarerinianra viro.

²² Mwiva mwiniaria viqaro rioraro Akerausiva nai qora Herotira mwaata varero Iutiaqaa ntaqikyi varuvaro Iosepiva mwini quaro tiro aatuma kyero varuvaro Kotiva ruvaatakyaa qaiqaa timwa mwuvuro mwiva hia Iutiaani virairo qaqlira kyero

²³ Karirini uro mwatukya mpo Nasaretini nai nrahesi nraaqiaravata varura.

Nasaretini uro varuvaro haaru Kotiva nai poropeti vaisinramwu nroqitairo tu quava quttaa vahiro. Mwi quava Iesusirārā mwataama tiro: Nraakyē qoravanto mwianra Nasaretinyaa vaisive tivarave, tura.

3

Ioninra nramanri nyi varu vaisirara tura

(Maaki 1:2-8; Ruku 3:1-18; Ioni 1:19-28)

¹ Mwi entara Ioniva nramanri nyi varu vaisiva nri ntero Iutiaani qumina mwataqa variqaro nraakyē qora timwa nyinro tiqaro,

² Nkye uaqia hi kyaiqara uti varira qaqlira kyaate. Kotiva nraakyē qoraqaa ntaqikyiari entava qaumatoma vaiho, tura.

³ Haaru Ioniva hia varu entara Aisaiaava poropeti vaisivanto variqaro mwi vaisiva qovarama quananrove tura. Aisaiaava Ioninranra mwataama tiro:

Mwiva qumina mwatani variro aakyara ntero tiqaro,
Nronravanto quani aanranra terama mwateta

mwia aanra avuqavuma mwataivarō mwiva mwivauma qio quarive qiananrove, tura. *(Aisaiaa 40:3)*

⁴ Ioniva tuavaaqa ututova vahirero kameri quara mwia kyaahi nraahu vara kyero ututero reti tavaarana rupa tora. Mwiva hia kyara vara tu kyero nranraitiro, mwiva kainyaaqavata, voravanto kuruto nramanrinravata, nraahu nreqanro varura.

⁵ Ioniva qua timwa nyi varuvata nraakye qora Ierusaremisaitave, ekyaa Iutiasaitave, Iotaani nramanri tokya hini hini varuhuave, mwihua hisai hisai ntuvaantuuma vita

⁶ nkysiari qora kyaqa varora timwa qovarama kyovaro Ioniva Iotaani nramanriqi variqaro nramanri nyi varura.

⁷ Ioniva variqaro taqovata Parisivantovata, Saitiusivantovata, nramanri vararerata mwiva hunani nruvaro mwiva mwihuara tiqaro, Nkye quaiha nraaqiaravantoma variavo. Kotiva nraakye qora rirera uti varihata tava nkysiara aatu ntugema kyeta quate titahave nkye mwaini nte hunani nriavo?

⁸ Nkye qutaaqama kyeta uaqia hi kyaiqara qaqlira kyarerata uti varivera, nkye kyuqe kyaiqa varavaqe tire taqaare.

⁹ Nkye hia nkjeta vaitutu hira qua tiqata, Evarahaamuva tiri tiqova vari-hataratita, tire qio varuro, qiate. Kotiva qiove tirera, ori mwaanramwuhua vaisi tuemwa vita Evarahaamuva nraisi varivarare.

¹⁰ Kotiva kyatari teqa kyarero kyaari okyaraqi terama taiho. Hia kyuqe tamwa riaaninra mwiva teqaaqama kyero kyairaro qiamma itamwa kyaananrove, tiro.

¹¹ Nkye uaqia hi aanranra qaqlira kyeta kyuqe hiani aanranraqaa nraahu virerata utuavana nte qumina nramanri nkyi nyi varuqo. Ni naakiara nrianriva Kotira mwanraqura nkyi nyiananrove. Mwiva qia itaaninra votihira nkyi nyiananrove. Mwiva nronravanto ni naatara kyaariva nriananrove. Nte qumina vaisi variqananra tina, nte hia qio mwia kyuqu nraamwu varaqina uro mwianinrave.

¹² Mwiva nai kyavoi kyauquqi tu varero kyakuma voti hira ntitata hirero uro ntero ntitatakyero nronra nraahu nai kyavoiqotairo vaqitaqiro uro nai nraamwuqi vatero qumina kyapivata mwanrevata vaqitaqiro uro hia qipa quani qiaraqi tuto kyairaro itamwa kyaananrove, tiro. Ioniva mwia quara turama.

Ioniva Iesusira nramanri mwunra (Maaki 1:9-11; Ruku 3:21-22)

¹³ Ioniva nramanri nyi varuvaro mwi entara Jesusiva Karirisairo Ioniva mwia nramanri mwianriva tiro, mwiva varura Iotaani nramanriqi viro.

¹⁴ Mwiva mwini uro ntoraro Ioniva Iesusirara tiqaro, Qaqao, e nramanri ni mpiataara vailharama e nianra nramanri ni mpiante ti variaro, tiro.

¹⁵ Ioniva mwitaa tuvaro Jesusiva nai timwa mwinro tiqaro, Mate qati kyera nramanri nraahu ni mpiante. Kotiva avuqavu hi quara timwa taira, mwi quara tiretana riemwaqita virerave, tiro. Mwitaa tuvaro Ioniva eo timwa kyero Jesusira nramanri mwinro.

¹⁶ Nramanri mwuvaro Jesusiva nramanriqitairo qatinani mwaanri ntoraro mate mwiqiara nyaamwuvanto qatua vuvaro Ioniva taqovaro Kotira

mwanraquravanto nyaamwa minrunra voti huva tuminro Iesusiraqaa varuvaro

¹⁷ nyaamwusairo quavanto tiqaro, Mwaa ni maaquve. Ni mutukyavanto mpoqama kyero mwianra vaiho. Nte mwianra qamwateqanama varuquo, tiro. Tura.

4

*Iesusiva uaquia hi kyaiqara utuarive tiro Saataaniva mwia mwataara hura
(Maaki 1:12-13; Ruku 4:1-13)*

¹ Iesusiva nramanri varovaro Saataaniva mwia mwataara hiarive tiro, Kotira mwanraquravanto Iesusira vitaqiro uro hia vaisivata varura quminasata kyora.

² Kyovaro Iesusiva mwini 40 entara variqaro hia kyaravata nrovaro kyara nraataa huvaro varura.

³ Kyara nraataa huvaro varuvaro Saataaniva nri ntero Iesusirara tiqaro, E qutaa Kotira mwaqaqvanto varirera, ori mwaanramwunranra tiraro mpereti tuemwa virara nraante, tiro.

⁴ Mwitaa tuvaro Iesusiva mwia nai timwa mwinro tiqaro, Qaqao, Kotira mpukuqi vahi quava tiqaro, Vaisivanto kyara nraaninranra nraahu riemwaqiro quariva hia qio qati variqiro quananrove. Mwiva ekyaa

Kotira nroqitairo qiani quara riemwaqiro viqaro qioma qati variqiro quananrove, turave, tiro. *(Lo 8:3)*

⁵ Iesusiva mwitaa tuvaro Saataaniva mwia vitaqiro Ierusaremimi Kotira nraamwu qita nai verani vahuraqa uro kyero mwiaqaa mwia mwaamwianrama tero

⁶ tiqaro, E qutaaqama kyera Kotira mwaqaqvanto varirera, mwaqaataira mpua mwatani hatohira quante. Kotira mpukuqi vahi quava tiqaro,

Kotiva iara riegaro mwiva tirata nyaamwunyaahua iqaa kyuqema kyeta ntaqikyivarave, turave.

E ena kyuqu oriqa ntuteqa kyerorave tita, nyaamwunyaahua nkyiari kyuququo i tu vareta vivarave, turave, tiro. *(Ihi 9:11-12)*

⁷ Saataaniva mwitaa tuvaro Iesusiva mwia nai timwa mwinro tiqaro, Qaqao, Kotira mpukuqi qua mpo vahiva tiqaro, Nronravanto i mwanriqavanto varirara tira, e hia mwia mwataara hiante, turave, tiro. *(Lo 6:16)*

⁸ Iesusiva mwitaa tuvaro Saataaniva mwia vitaqiro uro taaqi nritarora qiatagaqaa kyero ekyaa vunyaa vaisivanto nkyiari mwata mpoqaa mpoqaa ntaqikyura ekyaa mwi mwata maatara mwia kepukya inraikya rirante nraamwutero tiqaro,

⁹ E ni kyuqu tarani tumu ntira variqara ni nutu nraahu tuaahera matairera, nte ekyaa mwi inraikyara i mwianinrave, tiro.

¹⁰ Mwitaa tuvaro Iesusiva nai timwa mwinro tiqaro, Qaqao, Saataanio, hiante quante, Kotira mpukuqi vahi quava tiqaro, Mwanriqavanto Kotiva nronravanto varirara tira, e mwia nrutu nraahu tuaahereqara mwia kyaiqa nraahu varaqira quante turave, tiro. *(Lo 6:13)*

¹¹ Iesusiva mwitaa tuvaro Saataaniva mwia mwini kyero vuvata nyaamwunyaahua tumu Iesusira kyaahaqa hura.

*Iesusiva Karirini nai kyaiqa tohara tora
(Maaki 1:14-15; Ruku 4:14-15)*

12 Iesusiva riovata Ioninra ntavaaqavu kyeta karavuqi kyaavararo variho tuvaro riero, Iesusiva nrumu ntantero Karirini vura.

13 Mwiva mwini vuva hia uro Nasareti nai mwaatani variraitiro, uro Kapenaamini variqiro vura. Kapenaami mwiva Kariri kyaarerera tokyasataa vahura. Mwi mwatava vahirero Sepiuraaninravata, Napatarairavata mwata vahura.

14 Iesusiva mwini uro varuvaro haaru Aisaiaava Kotira qua qovarama kyo quava qutaa mwivau vahura. Aisaiaava haaru mwataama tiro:

15 Nte Sepiuraaninra mwataravata, Napataraira mwataravata, tirerave. Mwi mwatava kyaarerera tokyani vahirave.

Iotaani nramanri vaharo mwi mwatava uromwi vahata mwi mwataraqna Kariri mwataqa mpo mwatanaa mpo mwatanahua variarave.

16 Mwihua kyokiraqi variqita vita, mwiaqataita omwavanto nronraqama kyero itaaninra taqevarave.

Mwihua kyokiraqi variavaro
qutu qua okyarava mwihua ntumwaqu kyaihata variavaro mwiaqatairo
omwavanto ntuvahama nyatarero uti varirave, tura. *(Aisaiaa
9:1-2)*

17 Mwi entaraqaatairo Iesusiva nai kyaiqa toharama kyero nraakye qora timwa nyiqiro viro tiqaro, Kotiva nraakye qoraqa ntaqikyiariva qaumato vahirara titi, nkye uaqia hi aanranra qaqira kyaate, tiro. Turama.

*Iesusiva vaisi taaratana taaratana nyaanrama kyero sitora
(Maaki 1:16-20)*

18 Iesusiva Kariri kyaarerera tokyasataa viqaro taqovata qate vakye taaratana varura. Vakyaava Saimoniva mwia mpo nrutu Pitaava varuvaro mwia qatavanto Enturuva varura. Mwitanahua tavukya kyaiqa vare varuhua variqatara titi, mwitanahua nramanriqi vahe nte varura.

19 Mwitanahua vahe nte varuvaro Iesusiva mwitanahua riqaro, Nkyetana ni naakiara ni pataqita nriate. Nkye tavukya vahe ntamwa kyeta varaantema kyetama nkyetana ni pataqita nrivaqena nte nkyi nyaamwutaarita nkye vaisi sitevarave, tiro.

20 Mwitaa tuvata mate mwipiqa mwitanahua nkyiari vahe mwini kyeta Iesusira vataqita vurama.

21 Mwitanahua mwia vataqita vuvaro Iesusiva pataqia viqaro taqovata vaisi mpotana Sepetira mwaqaqtana Iemisivavata mwia qata Ionivavata varura. Mwitanahua mpotuqi variqata nkyiari sora Sepetiravatama kyeta vahe terahi varuvaro Iesusiva mwitanahua nyaanrama kyovata

22 mwitanahua mate mwipiqa nkyiari mpotuvata nkyiari soravata mwini kyeta Iesusira vataqita vurama.

*Iesusiva qua mwakyaakya timwa nyinro nriqa vuhua kyuqema nyatora
(Ruku 6:17-19)*

23 Iesusiva Karirini mpo mwatukya mpo mwatukya nrohiqaro mwaanra nraamwuqi vera ntero variqaro mwakyaakya timwa nyiqanro Kotiva nraakye qoraqa ntaqikyiani quara, kyuge qua timwa nyiqiro vi varuvata tauma rumpuara utuhuave, nriqa vuhuave, mwihua varuvaro Iesusiva mwihua kyuqema kyovata qio varura.

24 Iesusiva mwitaamaqiro vi varuvaro mwia quavanto ekyaa Siriaani uvata mwi mwatanahua nkyiari nraakye qoraqa mpo qara mpo qarama kyero nriqa vuhuave, tauma rumpuara utuhuave, nronraqama kyero nriqa vuhuave, vaana kyapata varuhuave, mwamwanta ntirintiri hi varuhuave, hini mwamwanta qutu vu vaisihuave, mwihua mwihua ekyaa sitaqita Iesusiva hunani uro kyovaro mwiva mwihua kyuqema kyovata qio varura.

25 Iesusiva aanrani vi varuvata nraakye qora airivanto mwia vataqita vi varara. Karirisairove, Ntekaporisi mwatukyanramwuqitairove, Ierusaremisairove, Iutiasairove, Iotaani nramanri qarahi hisataasairove, nraakye qoravanto hisaita ntuvaantuama vita mwia vataqita vura.

5

Iesusiva taaqiqaa variqaro mwakyaa kya timwa nyunra

1 Iesusiva variqaro taqovata airi nraakye qora ntuvaantuama vita varuvaro mwiva taaqiqaa uro mwatakya viro varuvata mwia nraaqiaranramwuwata mwiva varunani uro varuvaro

2 Iesusiva mwakyaa kya tohara tero mwiva nai nraaqiaranramwu timwa nyinro tiqaro,

3 Nte Kotiva hi inraikyarara vehiqamama varuquo ti vari nraakye qorahua mwihua varivaro Kotiva mwihuama kyugema nyataananrove. Kotiva mwihuqa ntaqikyiqiro vi varirata mwihua mwia nraakye qorama varivarave.

4 Mwutukya uaqia hirata ntate varihua, mwihua varivaro Kotiva mwihuama kyugema nyataananrove. Kotiva mwihua mwutukya qihakyma nyataananrove.

5 Tirema variqata hia nkyiarivata uaqiamma nyaterara riehua varivaro Kotiva mwihu ka yuqemma nyataananrove.

Kotiva mwaa mwataru mwihua kyaama tairara tita, mwihua mwia varevarave.

6 Ntapihi kye nrohi okyarara kyakya hiarihua, mwihua varivaro Kotiva mwihua kyugema nyatero mwi okyararaqo mwihua qioqama nyataananrove.

7 Mpohuara po kye ti nraakye qorahua, mwihua varivaro Kotiva mwihua kyugema nyatero mwihuara po kye timwa nyataananrove.

8 Quttaaqama kye Kotira nraahu vataqi vihua, mwihua varivaro Kotiva mwihuama kyugema nyataananrove.

Mwi nraakye qorahuama Kotira taqevarave.

9 Ntaqirera hivata vaitutu hi vari nraakye qorahua, mwihua varivaro Kotiva mwihu ka yuqemma nyataananrove.

Kotiva mwihuara ni nraaqiarave tiratama varivarave.

10 Kotirara rieqata ntapihi kye nrohi varivata mwia kyaara mwihua uaqiamma nyate vari nraakye qorahua, mwihua varivaro Kotiva mwihua kyugema nyataananrove.

Kotiva mwihuqa ntaqikyiqiro vi varirata mwihua mwia nraakye qorama varivarave.

11 Nkye ni pataqi vi varivata mwia kyaara nkyiara uaqia hi quara timwaqi vita, nkyi uaqiamma nyateta, nkyiara mpo qua mpo qua unra quave, uaqia hi quarave, nkyiara timwaqi vi varivata, nkye ni pataqi vi varivaro Kotiva nkyi kyugema nyataananrove.

12 Nkyi uaqiamma nyataantema kyeta haaruvata vaisi mpo uhua Kotira qua qovara hu vaisihua uaqiamma nyatorave. Nkyi mwitaama kyeta uaqiamma nyataivata nkye qamwateqa variate. Kotiva nkyi kyaiqa kyuqe kyaiqara rieqaro mwia qiaa nyaamwuni kyuqe inraikya nkyini terama fairave.

Nkye hore voti hiahuate tura

(Maaki 9:50; Ruku 14:34-35)

13 Mwaa mwataraqi nraakye qora variavata nkye mwihua utaqaa variqata nkye hore votima kyeta variavo. Horevanto uaqiamma viro hia qiakyaa hirera, hia qio qaiqaa utu kyairaro qiaqyaa hiananrove. Horevanto

uaqiamama virera, qio uaqiamama virave timwa kyeta mwia qaqlira kyaivata nraakye qoravanto mwiaqaa ntamwaqita vivarave.

*Nkye omwa voti hiahuate tura
(Maaki 4:21; Ruku 8:16, 11:33)*

¹⁴ Mwaa mwatararaqa nraakye qora variavata nkye omwavanto itaintema kyeta variavo. Mwatukya mpovanto taaqiqaa vahiariva hia uqeta vahiananrove.

¹⁵ Hia mpovanto omwa qupi kyero tave vara kyero mwia ntumwaqu tairave. Qaqao, nraamwuqi variahuavata ekyaa taqaate tiro, omwa qupi kyero virira nyaamwuni hiritairave.

¹⁶ Nkye mwia votima kyeta nraakye qora suqaa qoqaa nrohiqata omwavanto itaintema kyeta variqita vivata mwihua nkye kyuqe kyaiqa vare varira taqeta, nkyi sova nyaamwuni varira mwia nrutu tuaaheraqita quate.

Mosesiva qua mwaanra timwa torara tura

¹⁷ Nkye nianra tiqata, Mosesiva timwato quaravata, poropeti vaisinramwuvanto timwato quaravata, vara qaqlira kyarerero nrivave, tivorave. Nkye nianra mwitaama kyeta nraato rievora. Hia nte mwihua qua qaqlira taiqa kyarerave. Mwi quava qutaa mwivau vahiarive tina, ntevata nruvave.

¹⁸ Nte nkyi timwa nyianinra riaate. Nyaamwuvantovata mwatavantovata taiqa viraro ekyaa mwaanra qua mwiva qati nraahu vahiqiro quananrove. Mwi quaraqitairo ekyaa quave pata uapaa qua mwi quavavata vahiqiro viraro ekyaa inraikyavanto qovarama quananrove.

¹⁹ Mosesivavata poropeti vaisinramwuvantovata timwato quava vaharo mpovanto mwi quaraqitairo pata uaqia nteqa kyero mpohuaravata tiqaro, Nkye mwi quara pata uaqia vahira qiomia nteqa kyevarave, tirera, mwi vaisiva variro nyaamwuni Kotiva ntaqikyianinrani viraro Kotiva mwi vaisirara, E ni nraaqiara mwatumwi mpiato nraahu variaravama variaro, qiananrove. Vaisi mpovanto Mosesira quavata poropeti vaisi quavata riemwaqiro viqaro mpohuaravata mwi quara riemwaqita quate tirera, mwi vaisiva variro nyaamwuni Kotiva ntaqikyiani mwatukyarani viraro Kotiva mwianra, E ni nraaqiara nritarera virito variaravama variaro, qiananrove.

²⁰ Nte nkyi timwa nyinrenrave. Parisi vaisinramwuvata, mwaanra okyara qia vaisinramwuhuavata, mwihua nkyiari riemwa kyeta tiqata, Tire Kotira qua rieqata ntapihi kye nrohi varuro, ti variarave. Nkye hia mwihua nraatara kyeta kyuqe aanraqaa vivera, nkye Kotiva ntaqikyiani mwatukyarai hia qio vivarave.

*Mpohua ru kye okyarara tura
(Ruku 12:57-59)*

²¹ Haaru Mosesiva nkyi haivaqahuara timwato quara nkye mwi quara riaarave. Mwataama tiro: Hia mpora ru kyaante. Mpore ru kyaari vaisiva, mwiva quaqaa variananrove, turave.

²² Mwiva mwitaa tura kyai nte qaiqaa nkyi timwa nyianri. Nai qata vakyaara raraqa taariva, mwi vaisivavata mpore ru kyaiva quaqaa varintema kyero quaqaa variananrove. Nte qaiqaavata nkyi timwa nyinrenrave. Nai qata vakyaara mwaaqvantove qiani vaisira mwia vitaqira uro nronra kaanasorinramwuvanto varinani kyairaro mwiva qua varaarive. Nai qata vakyaara e uera vaisivavata hia vu nraatovata vahivave qiasi vaisiva, mwivavata mpore ru kyero qua varaintema kyero qua varairaro mwia uro qutu quahua vi mwatarara qiaqi tuto kyaananrove.

23 Mwi quara rieqarama e mwaanra nraamwu nronraqi variqara mpo inraikya Kotira mwinra mwia qamwata mwatarera hira taqairaro i qata vakyyaa mpovanto iqaa qua vataariva qati vahirera,

24 Kotira mwinrenra hina inraikyara mwiaqaa qati vatera, uro ena qata vakyyaa mwiaavata variqara mwi quara nraante timwa ntapihi kyera mwiaqaataira uro mwi inraikyara Kotira mwiqanra qamwata mwataante.

25 Mpovanto iqaa qua vatarero i vita varero ko nraamwuqiara virara mwikyantiri aanrani viqarama qamwanrama kyerama mwi quara ntapihi kyaante. E hia mwitaa hiraitira, ko nraamwuqi viraro ko rie vari vaisiva iqaa qua vatero pipi titairaro i vitaqiro uro karavuqi kyaananrove.

26 Nte qutaa qianinra riaante. E karavuqi variqira vira karavu kyoqaa hiqara hia ekya mwi munimanra kyairaro hia qio i qamwanrama titairara vinanrave, tiro. Iesusiva mwi quara turama.

Nraata vaati ntuqeeta hi okyarara tura

27 Iesusiva mwitaa timwa kyero mwiva mwihua timwa nyinro tiqaro, Haaru Mosesiva timwato quara mpo qua nkye riaarave. Mwi quava mwataama tiro: Hia mpora nraatavata mpora vaativata api nrohianti, turave.

28 Kyai nte qaiqaa nkyi timwa nyiankye. Vaisivanto nraakye taqero nai nraatoqitairo nraahu riero, Nte mwiaavata nrohina variataarave, qianinranra Kotiva tiqaro, E vaakyama nraata vaati ntuqema kyera hiaro, timwa kyero mwi vaisiraqaa qua vataananrove.

29 Mwianra rieqara e kyaatutanya vuqotaira taqe variqara uaqia hi kyaiqara uti varirera, qaiqaavata mwitaamaqina quankyo tira, mwia vauru kyera qaqira kyaante. E vu kuaiku nraahu vahirara hia uaqia hi kyaiqara utiraitira, nyaamwuni qiomma vinanrave. E vu taaratana vahiariva uaqia hi kyaiqara utuqira vira nraakiara qutu viraro i qia nronra itaaninraqi tuto kyaananrove.

30 E kyauqu kyaatutaqotaira uaqia hi kyaiqara uti varirera, e mwitaamaqina quankyo tira, mwia teqa kyera qaqira kyaante. E kyauqu kuaiku vahiarivá hia uaqia hi kyaiqara utiraitira, nyaamwuni qiomma vinanrave. E kyauqu taaratana vahiariva uaqia hi kyaiqara utuqira viraro i qia nronra itaaninraqi tuto kyaananrove.

Nai nraata ekyaara titaani okyarara tura

31 Haaru Mosesiva timwato quava mwataama tiro: Vaisivanto nai nraata qaqlira kyarerero hiqaro nai nraata qara mpo mwinro, Nte mwia qaqliram kyaquo, timwa kyero qara mwiananrove, turave.

32 Kyai nte qaiqaa nkyi timwa nyiankye. Mwia nraatavanto hia mpo vaisintiri api nrohiraitiro variraro mwia vaativanto mwia qaqira kyairaro mwia nraatavanto vaisi kyaata varairera, Kotiva mwitaama qiananro: Mwi nraakyeva qaraakya vaisintiri nrohiquaro nraata vaati ntuqema kyaihoma qiananrove. Mwia vaati hoqarenaava mwia qaqira kyaiharo mwia kyaara mwitaa iho. Mwitaa ihana nte mwia vaati i tauraanaanraqa qua vatena qaraakya vaati mwiaqaaavata qua vataaninrave, qiananrove, tiro. Iesusiva mwi quara turama.

Kyauqu nrinqiqa vate okyarara tura

33 Iesusiva mwitaa timwa kyero mwiva qua timwa nyiqiro viro tiqaro, Haaru Mosesiva qua mpo nkyi haivaqahuara timwato quara nkye mwi quaravata ntapihi kyaarave. Mwataama tiro: E kyauqu nrinqiqa vatera tiqara, Kotira vuqaa variqanama nte qutaama mwitaa hirerave, tina quara nteqa kyelerave. Kotira nrutu nteqara timwa tena quarara rieqara varaante, turave.

34 Kyai nte qaiqaa nkyi timwa nyiankye. Kyauqu nriqiqaa vateqata, tire qutaa mwitaa hirerave, tiqatama hia Kotira nrutu nteqata mwitaa qiate. Hia mpo inraikya mpo inraikya nrutu nteqata, Tire qutaa mwitaa hirerave, qiate. Kotiva nyaamwuni mwatakyaa viro varirara tita, mwianra rieqatama hia nyaamwu nrutu nteqatama, Tire qutaa mwitaa hirerave, qiate.

35 Kotiva nai kyuqu tutu kyero mwaa mwataraqaa mpiami vatero vari-rara tita, mwianra rieqatama hia mwaa mwatara nrutu nteqata, Tire qutaa mwitaa hirerave, qiate. Ierusaremvanto nronra vunyaa vaisivanto variari mwatukyava vahirara tita, mwianra rieqatama hia mwi mwatukyara nrutu nteqatama, Tire qutaa mwitaa hirerave, qiate.

36 Hia nkyeta qiata nrutu nteqata, Tire qutaa mwitaa hirerave, qiate. Nkye hia qio nkyeta qiata kyaahira, Eqara kyaahive, upi kyaahive, vahiante tivarave. Nkye hia qio mwitaa tirara tita, nkye qumina nkyeta qiata nrutu nteqata, Tire mwitaa hirerave, tivorave.

37 Nkye variqata mwitaa hirerave tivera, nkye qati eo nraahu tiqatama mwitaa hiata. Hia mwitaa hivera, qati hiave nraahu qiata. Hia mpo qua mpo quanti qiate. Mpo qua mpo quavanto Saataaninraqaatairo qovara hiananrove, tiro. Iesusiva mwitaa tura.

Ru vunti okyarara tura (Ruku 6:29-30)

38 Iesusiva mwitaa timwa kyero timwa nyiqiro viro tiqaro: Mosesiva qua mpo timwatora nkyevata riaarave. Mwataama tiro: Mpowanto i vu vauru kyairara, e nai uvata qiomma vauru kyenanrave. Mpowanto i vai ntuvihau kyairera, e nai vaivata qiomma ntuvihau kyenanrave, turave.

39 Mwi quara vahiana kyai nte nkyi qaiqaa timwa nyiankye. Uaqia hiari vaisiva mpovanto nkyi uaqiamma nyatairerata hiama nkye nai uaqiamma mwataate. Mpowanto i nraatokyai ntuteqa kyairera, hia nai ntuqutiraitira, mwia qaqira kyairaro hini nraatokyaivata ntuteqa kyaarive.

40 Mpowanto i sioti vararerо i vita varero ko nraamwuqi uro kyarero uti varirera, ena sioti mwiqanrama kyairaro i vaaqatuavata varaarive.

41 Mpowanto i antua kyero, Nte hu inraikyara quqira vaini mpona uro mataante, tirera, vara quqira uro nyianrani mwataante.

42 Mpowanto mpo inraikyara i kyapara hirera, mwia mwiante. Mpowanto iara mpo inraikya mpiraqe qakyo varaqina nrumu ina mwiankye tirera, eo tira mwia mwiante, tiro. Iesusiva turama.

Nkyeta nramwutaahuara mwutukya vahirata variate tura (Ruku 6:27-28, 32-36)

43 Iesusiva mwitaa timwa kyero timwa nyiqiro viro tiqaro: Haaru nkyi haivaqahua tu quara nkye riaarave. Mwihua mwataaa turave: Ina nramwunaanranra nraahu i mwutukyavanto vahiarive. Nramwutaara uaqiamma mwatena vu nraatova vahiarive, turave.

44 Kyai nte qaiqaa nkyi timwa nyiankye. Nkyeta nramwutaa mwihuara nkyi mwutukya vahirata variate. Nkyi uaqiamma nyatehuara Kotira kyapara hivaro mwiva mwihuara kyaahaqama nyataarive.

45 Nkye mwitaa hiqatama nkye nkyi sova nyaamwuni varira mwia nraaqiarama varivarave. Kotiva tiharo huarivanto kyuqe vaisiqaa itero uaqia hia vaisihuqaqaa itairave. Kotiva vati vara kyaiharo vativantō ntapihi kyeta nrohi varia vaisihuqaqaa tumihanro hia ntapihi kyeta nrohi varia vaisihuqaqvata tuminrave. (Nkyevata nkyeta sova hintema kyeta kyuqe vaisiaravata qora vaisiaravata kyuqemaqita quate.)

46 Nkyiara mwutukya vahiarihuara nraahu nkyi mwutukya vahirera, Kotiva nanra inraikyara rieqarove nkyi kyuqema nyataananro? Taakisi variahua mwihua hia kyuqe vaisi variqatavata mwihua nkyiari hena vaisiara mwutukya vahira variarave.

47 Nkye nkyeta nramwunaahua nraahu qua mwanteta kyauqu nyivera, nkye nanra kyuqe inraikyaqove Kotira qua hia riaahua nraatara kyevara? Nkye mwihua votima kyeta nraahuma varivarave.

48 Nkyi sova nyaamwuni variva, mwiva hia uaqia hi kyaiqara utiraitiro, avuqavuma kyero nrohi varivave. Nkye mwia votima kyefä avuqavuma kyeta nrohiqata variqita quate tuquo, tiro. Iesusiva mwitaa turama.

6

Vehi nraakyе qora kyaahaqama nyate quara tura

1 Iesusiva mwitaa timwa kyero mwihua timwa nyiqiro viro tiqaro, Nkye mpohuara kyuqe hirerata, uqeta kyeta mwihua kyaahaqama nyataate. Hia qoqaa tiri mwahuta qiate titi mpohua kyaahaqama nyataate. Nkye vaisi-vianto taqaate titi, mpohua kyaahaqama nyataivera, nkyi sova nyaamwuni variva mwiva hia mwianra rieqaro nkyi mpo inraikya nyiananrove.

2 E mpovanto mwi quara rieqara mpo inraikya vehi vaisi mwinrenra hiqara uqeta kyera mwiante. Hia nraakyе qora suqaa nronraqama kyera aakyaraqitaira nraanrama kyera mwiante. Mpo vaisinramwuvanto kumwaanriqama kyeqata kyuqe kyaiqa vare variahua, mwihua mwaanra nraamwuqi variqatave, aanranri viqatave, nraakyе qora suqaa nronraqama kyeta ntoma vuateqata nyaanrama kyeqata vehi nraakyе qora munima nyi variarave. Mwihua hia vehi nraakyе qora mwihua nronraqama kyeta rieqata mwitaa hiavo. Mwihua tiri mwahuta qiate tiqata mwitaa hiarave. Nte nkyi timwa nyugo. Mwihua nraakyе qoravanto mwahuta timwa nyataavata vaakyama nkyiari kyoqaa vara kyaavo.

3 E mpovanto munimave, mpo inraikyave, vehi vaisi mwinrenra hiqara uqeta kyera mwiante. I nraaqani variarivavata hia mwia mwianra taqaarive.

4 E mwitaa hiraro mwi inraikyava uqeta kyero vahiarive. Mwitaa hiraro i qova ekyaa uqeta vare varia kyaiqara taqe variva, mwiva mwianra rieqaro i kyuqema mwataananrove.

Mwataama kyeqata Kotiravata qua qiate tura

5 Nkye Kotiravata qua tirerata kumwaanriqama kyeta kyuqe kyaiqa vare variahua hia mwihua hiante hiate. Mwihua mwahuta tirara qamwateqata mwihua mwaanra nraamwuqive, nraakyе qora ntuvantuama vita varia aanranraqaave, variqata Kotirara aakyara nte variarave. Nte qianinra riaate. Mwihua nraakyе qoravanto mwahuta timwa nyataavata vaakyama nkyiari kyoqaa vara kyaavo.

6 E mpovanto ena qora Kotiravata qua tirera enanraa varirera ena nraamwuqi vera ntera qesa titi tera uqeta kyera i qova uqeta varira vatama kyera qua qianta. E mwitaa hiraro i qova ekyaa uqeta vare varia kyaiqara taqe variva, mwiva i kyuqema mwataananrove.

7 Nkye Kotiravata qua tiqata hia qumina airi qua ntikara qiate. Mpo mwatanaahua hia Kotira qua riaa nraakyе qorahua mwitaa ti variarave. Nkyevata mwihua hiante hivorave. Mwihua tiqata, Qaiqaavata qaiqaavata qumina qua qiararo tiri mwanriqavanto tiri qua qio riaananrove, qiarave.

8 Nkye hia mwihua nraantantaate. Nkye hia Kotirara ntumwa hiamwa hia entara Kotiva vaakya nkye ekyaa inraikyara aara ntaara ntapihi kyaiho.

9 Nkye qio mwataama kyeqata Kotiravata qua qiate:

Tiri tiqova, e nyaamwuni variaravave.

Tire kyuqema kyeta i nrutu kyuqera tuaaherauro.

10 E tiriqaa ntaqikyina entava qamwanrama nrianrive.

Nyaamwunyahua i kyakya hira vataqi quantema kyera e tiri kyaahaqa
hirage tire mwatanu variarahuavata i kyakya hira vataqi quare.

11 Tire mate kyara nraananra tiri timwiante.

12 Tiri apiqama timwa taavata tire mwi quara qaqlira kyaurantema kyera
tire i apiqama mwatauna quara nruka timwa taante.

13 Uaqia hi kyaiqava tiri mwataara hiankyo tira, e tiri tivita vare viraqe tire
kyuge hi aanranraqaa quare.

E tiri kyaahaqa hi variraro Saataaniva hia tiri uaqiamma timwataarive.

[E vunyaava kepukyaqama kyera ntaqikyi variaravave. I nrutu nraahu
tuaaheraqi quararo i nrutuvanto qati nraahu vahiqiro quananrove.
Qutaave.]

Mwitaa timwa kyeqata Kotiravata qua qiate, tiro. Jesusiva turama.

14 Mwitaa timwa kyero Jesusiva mwihua timwa nyinro tiqaro, Mpohua
nkyi uaqiamma nyataivata nkye qaqlira kyeta hia nkyiarivata uaqiamma
nyataivera, nkyi sova nyaamwuni variva, mwivavata nkyi uaqia hi quara
qaqliramma kyaananrove.

15 Nkye mwihua uaqia hi kyaiqara utirara qati nraahu riemwaqi vivera,
nkyi sovavata nkye uaqia hi kyaiqara uti quara qati nraahu riemwaqiro
quananrove, tiro.

Kotirara rieqata kyara aurama te quara tura

16 Mwitaa timwa kyero Jesusiva tiqaro, Nkye kyara aurama tarera hita,
hia unraqama kyeqata kyuqe kyaiqa vare varia vaisihua hiante hiate.
Nraakye qoravanto mwihua kyara aurama tera tageqata po qiate tita,
mwihua ua viri rateqata nrohi variarave. Nte qianinra riaate. Mwihua
nraakye qoravanto po timwa nyataavata vaakyama nkyiari kyoqaa vara
kyavao.

17-18 E mpovanto kyara aurama tarera hiqara uqeta kyera aurama taante.
Nraakye qoravanto iara qatima kyara nre variho qiate tira, ena viri hiqama
kyera qiatu qaahtumwa kyera nrohiante. Mwitaa hiraro i qova uqeta
variva ekyyaa uqeta vare varia kyaiqara taqe variva, mwivama i kyuqema
mwataananrove.

Nyaamwuni kyoqaa ntuvantua hirara tura

(Ruku 12:33-34)

19 Hia mwaa mwataraqaa variqata kyoqaa ntuvantua taate. Mwaa
mwataraqaa kyoqaa ntuvantua taavaroo uapaa tove hakuavantove,
puaataqataivave, mwi inraikyara nramwa kyero vara uaqiamma kye vari-
rave. Mpuara vaisivantovata ntukuraa kyeqata mwi inraikyara vare
variavave.

20 Mwata mwaaqa vatera egeta nyaamwuni uapaa tove hakuavantove,
puaataqataivave, mpuara vaisivantove, hia nkyi kyoqaa vara kyeta
uaqiamma kyenani vataate.

21 Nkye mwaa mwataraqaa kyoqaa ntuvantua taivera, nkye mwaa
mwataraqaa vahiani inraikyarakara nraahu mwutukya vahirata riemwaqita
vivarave. Nkyi kyoqaa nyaamwuni ntuvantua viro vahirera, nkye
nyaamwuni vahiani inraikyarakara nraahu mwutukya vahirata nronraqama
kyeta riemwaqita vivarave.

Vuvanto omwa votima kyero iteqaro mwamwanta ntuvahama mwatero

(Ruku 11:34-36)

22 Vuvanto omwa votima kyero iteqaro mwamwanta ntuvaaahama mwatero. I uvanto kyuqema vahirera, ekyaa i mwamwantaqi kyuqema kyero ntuvahaananrove.

23 I uvanto uaqia hirera, i mwamwantavanto kyokiraqima vahiananrove. I utaqivata hia ntuvaharaitiro kyokira rirera, qikye, i utaqi anoma kyero kyokira ruananrove.

*Kotiraravata munimanravata tura
(Ruku 16:13)*

24 Kyaiqa vaisi mpovanto hiama qio kuaa vakya nronra vaisi taaratanaaqaa kyaiqa varaanrove. Mwiva mwitaa hirera, mporara mwia mwutukya vahiraro mporara hia mwia mwutukya vahiananrove. Mwiva mpore qua riero mpore qua qoririma kyaananrove. E hiama qio Kotiravata munimavata kuaa vakya vataqira vinanrave.

*Hia mpo inraikyara uahivaro nkyi mwutukyavanto nronraqa hiarive tura
(Ruku 12:22-31)*

25 Mwi quara rieqanama nte nkyiara mwitaama tuqo, Nkye qati variqita virarave, kyara nrenranrave, nramanri nrenranrave, nkyeta nyamwantarave, tuavaaqa utirarave, hia mwi inraikyara mwi inraikyarara airi nraato tivarо nkyi mwutukyavanto nronraqa hiarive. Nkye qati variqi viva vuni vaharo kyara neva nraakiaranima vaiho. Nkyi mwamwantavanto vuni vaharo nkye tuavaaqa ututeva nraakiaranima vaiho.

26 Nyaamwa hiteta nrohi variahua taqaate. Mwihua hia kyara vara tu kyeta vantuqita uro nraamwuqi vate variarave. Nyaamwavanto variavaro nkyi sova nyaamwuni variva mwihua kyara ruara hirave. Nyaamwa qumina inraikyaaqavata Kotiva ntaqikyi variva nkyi nraakye qoraqaa hiave Kotiva kyuqema kyero ntaqikyiananro?

27 Nkyiqitairo ta vaisivave nte qamwanrama qutu quankyo tiro, qati variavo? Maunra paira mwukyauqi vahirara riegata variate. Mwi inraikyava hia kyaanta huvu kyero tuavaaqa haqire varirave.

28 Nkye nanraqamave nkyeta tuavaaqa utirara nronraqama kyeta rie variavo? Maunra paira mwukyauqi vahirara riegata variate. Mwi inraikyava hia kyaanta huvu kyero tuavaaqa haqire varirave.

29 Nte nkyi timwa nyuquo. Haaru Soromoniva kyuqema kyero mwunruqama tova hia maunra pairavanto iteru ntuvahaairaa nraatara kyairave.

30 Kotiva mwivama uakukyaqi vahi maunranra mwunruqama mwatairave. Mwi maunrava mate vahirata hura qia qura kyaivarо itamwa kyaananrove. Qio Kotiva qumina uakukyaqi pataqia vahi maunranravata mwunruqama mwataivara tiro, mwiva hiave nkyiyata kyuqema kyero tuavaaqa utu nyataaananrove? Qikye, Kotiva nkyi kyaahaqama nyate varivarihata nkye hia mwianra kepukyaqama kyeta riaavo.

31 Kotiva nkyi kyaahaqama nyate varirara tita, hia nkye nronraqama kye vu nraato tuqi viqata, Nanra kyarave nraananrave? Nanra nramanrive nraananrave? Nanra tuavaaqaqave utuananrave? timwaqita quata.

32 Kotira qua hia riaa nraakye qorahua, mwihua mwitaa timwaqita vi variarave. Nkye hia mwihua nraantantaate. Nkyi sova nyaamwuni variva nkye ekyaa mwi inraikyarara aara ntaara ntapihi kyeroma variho.

33 Nkye Kotiva nkyiqa ntaqikyianinranravata, mwiva nkyiara avuqavuma kye nrohiate qianinranravata, nronraqama kye riemwaqita quate. Nkye mwitaa hivaro Kotiva nkye aara nte inraikyavavata hini mwi inraikyavavata nkyi nyiananrove.

34 Hura qovara hiani inraikyara hia nronraqama kyeta riaate. (Nkye mate mwaai iherara variahauve.) Hura vari nraakye qorahua hura qovara

hiani inraikyarara qio riemwaqita vivarave. Kuaa enta kuaa enta mwiva nanrianra muaanravata nraahu vahivave, tiro. Iesusiva turama.

7

Nkye hia mpore kyaiqa pupiteqata mwia kyaiqa tukya hiate tura (Ruku 6:37-38, 41-42)

¹ Iesusiva mwitaa timwa kyero mwiva timwa nyiqiro viro tiqaro, Kotiva nkyita kyaiqavata tukya hiankyo titi, nkye hia uaqama vu nraato tiqata mpore kyaiqa tukyama kye mwiva mwitaa mwataaa hivave qiate.

² Nkye mpore kyaiqa tukyama kyeta mwitaa mwataama vahirave tivarо Kotiva nkyita kyaiqavata tukyama kyero mwitaa mwataama vahiravema qiananrove. Nkye mpohua kyaiqa tukya hira kuaa mwivauma Kotiva nkyitavata tukya hiananrove.

³ E nanraqamave mwata mwumwuvanto ena qata vakyaa vuqi viqetaira taqearama hia ena vuqi kyatari aka nronravanto viqetaira taqera hiarо?

⁴ Kyatari aka nronravanto i vuqi viqetero vaihara nanraqamave ena qata vakyara kyaiqe i vuqitaina mwata mwumwu qatinani venta kyaankye ti variaro? Hia mwitaa qiantе.

⁵ E kyuge kyaiqa varauqo tigara unraqanraa hi variaravave. Tau-raaqama kyera ena vuqitaira kyatari aka venta kyera mwiaqaataira kyuqema kyera taqearama ena qata vakyaa vuqitairavata qio mwata mwumwu venta kyen'anrave.

⁶ (Mpo hia vaishua quara vairi votima kyeta variarave.) Nkye Kotirani kyuqema kyero kyotataqama vahiani inraikyara hia vairi mwiantе. Nkye kyukyukyakyaara hia quara hianani kyaate. Nkye mwitaa hivarо mwи inraikyara ntamwa ntautiqama kyero mwiaqaatairo tuqasaa viro nkyita kutuananrove.

Iesusiva Kotira kyapara hiate tura (Ruku 11:9-13)

⁷ Nkye Kotira kyapara hivarо mwи inraikyara nkyi nyianrive. Nkye puaamaqi vitama qio mwи inraikyara puaama kyevarave. Nkye qesa ntuquтиваро Kotiva qatuа nyataarive.

⁸ Kotira mpo inraikyara kyapara hiariva qiomа varaananrove. Mpo inraikyara puaamaqiro quariva qiomа taqaananrove. Qesa ntukuakua hiani vaisira qatuama mwataaananrove.

⁹ Nkyi nraaqiara sohuaqitairo tavave mwia mwaqvanto qamaanra nyaanru tiraro mwia qova ori mwiananro? Mwia qova hiama mwitaa hiananro.

¹⁰ Mwia mwaqvanto tavukyara nyaanru tiraro mwia qarurave mwiananro? Mwiavata hiama mwitaa hiananro.

¹¹ Nkye hia kyuqe hia nraakye gorahua variqatavata nkye nkyeta nraaqiara kyuqe inraikya nraahu nyi variarave. Nkyi sova Kotiva mpo? Nkyi sova nyaamwuni variva nkyi nraatara kyero mpo inraikyara nyaanru qiani vaisira kyuqe inraikya nraahu mantaquma kyeroma mwiananrove.

¹² Nkye mpohuara tiri mwitaa mwataama kyeta kyuqema timwataate tintema kyeta nkye mwihua mwitaama nyataate. Mosesivavata poropeti vaisinramwuvata timwato quava mwia okyara mwitaamama vahiro.

Aanra taaratana tura (Ruku 13:24)

¹³ Qesa taaratana vahirave. Mpo pata vaiharо mpo nronra vahirave. Nkye qesa pata mwina nraahu quate. Nraakye qora ekyara taiqa

vinaniara qua aanrava, aanra nronra qihakya hiva vaiharo mwi aanranraqaanaa gesavantovata nronra vahata nraakyne qora airivanto qesa mwina vi variarave.

¹⁴ Nraakyne qora ekyaa enta kyuqema kyeta qati nraahu variqita quanannanra, vi gesava pataqia vaiharo mwinamate qua aanravavata pataqia mwukyaari tukye qua aanrava vahata kuaiqia kuaiqiatavato nraahu mwi aanranra puaama kyeta vi variarave.

Unra qua timwa nyi vari vaisihuara tura
(Ruku 6:43-44, 13:25-27)

¹⁵ Vaisi imponramwuvanto tiqata, Tire Kotira qua nkyi timwa nyi varuro, tiqata unra ti variahua mwihua nyaatu rauriqata variate. Mwihua sipisipi nraantantamwa kyeta nrohiqatavata mwihua mwaatira utaqi qaakyau vairima variarave.

¹⁶ Nkye mwihua nrohi varira taqetama mwihua qora okyara ntapihi kyevarave. Vaisivanto uaini tamwa hiqirero mwiva hia auqururoraqaatairo hiqirave. Mwiva fiki tamwa hiqirero hia uvi auqu vataa kyatariqaatairo hiqirave.

¹⁷ Mwia votima kyero kyuqe kyatarivanto kyuqe tamwa nraahu rie variharo qora kyatarivanto qora tamwa nraahu rie varirave.

¹⁸ Kyuqe kyatarivanto hiama qora tamwa riaananrove. Qora kyatarivanto hiama kyuqe tamwa riaananrove.

¹⁹ Kyatari hia kyuqe tamwa riaira mwia teqa kyeta qiaqi tuto kye variarave.

²⁰ Nte qaiqaa nkyi timwa nyuqo. (Unraqama kye tiqata, Tire Kotira qua timwa nyi varurahuave, qiahua nkye mwihua nrohi varira taqetama mwihua qora okyara ntapihi kyevarave, tiro.) Qio nkye mwi vaisihua varaqita vi kyaiqara taqetama nkye ntapihi kyeta mwihua qora kyaiqa taqevrave tuquo.

²¹ Hia ekyaa nraakyne qora nianra tiri nronravantove ti varihua Kotiva ntaqlkyiani mwatukyaraqi vivarave. Ni kova nyaamwuni varira mwia qua riemwaqiro quariva, mwiva nraahuma mwia mwatukyayaqi quananrove.

²² Nraakiara ekyaa entaqaa nraakyne qora airivanto nianra tiqata, Po, nronrao, nronrao, i nrutu nteqata Kotira qua ti variavanarolve. I nrutu nteqata tire vaisiqitai vaana airi siteta i nrutu nteqata nronra kyaiqa varaavanarolve, tivarave.

²³ Mwihua mwitaa tivaqena nte, Qaqao, hia nkyi taqauhuave. Nkye qora kyaiqa vare variahuate. Niqaataita nyianrani quate, qianinrave.

Nraamwu taaratananra tura
(Ruku 6:47-49)

²⁴ Ni qua riero nte tuntema kyero vare variani vaisira okyara nkyi timwa nyinrenrave. Mwi vaisiva vu nraato vataava kepukya nraamwu hoqa taani vaisira votima kyeroma variananrove.

²⁵ Mwi vaisiva oriqa nai nraamwu hoqa tairara tiro, vativantove, humwunravantove, toqa vaururuvantove, nronraqama kyero nteqaro mwia venta kyaaninrave tiharovata mwi nraamwuvā hia tuma ntiraiiro, kepukyaqama vahirave.

²⁶ Ni qua riero qaqira kyero hia nte tuntema kyero variani vaisira okyara nkyi timwa nyinrenrave. Mwi vaisiva hia vu nraatovata vahiva nai nraamwu nruqasata hoqa taani vaisira votima kyero variananrove.

²⁷ Mwi vaisiva nai nraamwu nruqasata hoqa tairara tiro, vativantove, humwunravantove, toqa vaururuvantove, nronraqama kyero nteqaro

mwia nraamwu venta kyaiharo nraamwuvanto tuto ntiharo humwunravanto raaqu kyairarama tuqo, tiro.

²⁸ Iesusiva mwi quara mwi quara mwihua timwa nyi taiqa kyovata nraakye qora mwini ntuaantuama vuhua tiqata, Qikye, mwiva nraahumwa mpō qarama kyero qua ti variho.

²⁹ Mwiva hia mwaanra okyara ti varia vaisihua timwa timwiantema kyero timwa timwiho. Mwiva nronra vaisivanto qiantema kyeroma ti variho, tita tura.

8

Tauma rumpuaravanto uaqiamma kyo vaisira Iesusiva kyuqema kyora (Maaki 1:40-44; Ruku 5:12-14)

¹ Iesusiva mwakyaakya timwa nyi taiqa kyero taaqi mwia mwini kyero tumi varuvata nraakye qora airivanto mwia nraakiara mwia vataaqi vi varura.

² Vi varuvaro vaisi mpovanto tauma rumpuaravanto uaqiamma kyova uro Iesusira vuqaa tori kyauru raviro variro tiqaro, Nronrao, e ni kyaahaqa hiataa hirera, e qiomia ni rumpuara kyuqema matenanrave, tiro.

³ Mwitaa tuvaro Iesusiva nai kyauqu mpiami mwia mwamwantaaqa vatero tiqaro, Nte kyaahaqa hiataa ihana nte i mwitaama mwatarerave. Nte i rumpuara tavanta quarive tuqo, tuvaro mwia rumpuaravanto mwia mwamwanta vauruqiro vuva qamwanrama kyero tavanta vuvaro mwiva qio varura.

⁴ Mwiva qio varuvaro Iesusiva mwia timwa mwinro tiqaro, Hia mpohua timwa nyinraitira, viraro Kotira kyaiqa vara mwate variari vaisiva i mwamwanta taqaarive. Mwiaqataira e Mosesira mwaanra qua rieqarama munra quani qiaro qurafarata nraakye qoravanto iara tiqata, Qutaama mwia mwamwantavanto kyuqema viho, qiate, tiro.

Iesusiva ntaqi varu vaisira mwia kyaiqa vaisi kyuqema mwatora (Ruku 7:1-10)

⁵ Iesusiva mwitaa timwa kyero Kapenaamini vuvaro Romeni vaisivanto 100 ntaqu vaisihuaqaa ntaqikyi varuva Iesusira uro qintorama kyero po kye tiro tiqaro,

⁶ Nronrao, ni kyaiqa vaisi mwamwantavanto hia qakyaa iharo nronraqama kyero nriqa viharo variho, tiro.

⁷ Mwitaa tuvaro Iesusiva tiqaro, Qio nrinraqetana mwiva hinani quarhua nte uro mwia kyuqema kyaankye, tiro.

⁸ Mwitaa tuvaro nronra vaisi mwiva qaqao tiro, Nte kyuqe vaisi variariravauma e ni nraamwuqi qio vinanrave. E mwaini variqara mwianra kyuqema quante tiraro mwiva kyuqema quarive.

⁹ Nte i votima kyena vaisiqa ntaqikyi varuvave. Nte ntaqi vaisira mpore quante tuqaro mwiva virave. Nte mpore nriante tuqaro mwiva nrinrave. Nte ntena kyaiqa vaisiara mwitaa hiante tuqaro mwiva mwitaa hirave, tiro.

¹⁰ Vaisi mwiva mwitaa tuvaro Iesusiva qikye timwa kyero tuqasaa viro nraakye qora mwia vataqita nrhuuara tiqaro, Nte nkyi timwa nyianinra riaate. Mwi vaisiva mpo mwatanaava variqaro nronraqama kyero nianra rieqaro nianra mwiva qiomia ni kyaahaqama mataananrove tirave. Hia nte mwiva tintema kyero qua ti vaisira Isareris vaisiqitaina mpo puaama kyauquo.

¹¹ Mwaa quara riaate. Nraakiara nyianra mponasai mponasaita nraakye qora airivanto Kotira mwatukyaqi nrumu variqata mwihua nkyi haivaqara

Evarahaamunravata, Aisaakiravata, Iaikopuravata variqata kyara nrevarave.

¹² Mwihua varivata mwaa mwatanaahua tire Kotira nraakyе qorama varuro ti variahua, mwihua mwi kyarara uro nraanre tivaro mwihua ntavaaqavu kyero mwaaqani mwaati tuto kyairata mwihua kyokira ruaninraqi varita ntateqata nkyiari aanrai teti nreqata varivarave, tiro.

¹³ Iesusiva mwitaa timwa kyero nronra vaisi mwianra tiqaro, Ena mwaatani quante. E nianra ni kyaahaqama materavave qiananranra tiro, i quavanto mwivauma vahiananrove, tiro. Mwitaa tuvaro mate mwiqiara mwia nrotuavata mwia kyaiqa vaisi nriqa vuva taiqa vuvaro qio varura.

Pitaara nrinraatarara kyuqema kyora

(Maaki 1:29-31; Ruku 4:38-39)

¹⁴ Iesusiva Pitaara nraamwuqi uro ntero taqovaro Pitaara nrinraatarara mwia mwamwanta qjara utovaro vaite varuvaro

¹⁵ Iesusiva uro mwia kyauquqaa tu varovaro mwia nriqa vuva taiqa vuvaro mwi nraakyeva siviro mwihua kyara uta nyinrenro uti varura.

Nraakyе qora airintikara kyuqema nyatora

(Maaki 1:32-34; Ruku 4:40-41)

¹⁶ Iesusiva mwini varuvaro entama vuvata mwi mwatanaahua vaanavanto utaqi varuhua sitaqita Iesusiva varunani uro kyovaro Iesusiva quaqotairo vaana titamwa kyovata nritareta vuvaro Iesusiva nriqa vuhuvata kyuqema kyovata qio varura.

¹⁷ Iesusiva mwitaamaqiro vuvaro Aisaiaava poropeti vaisivanto haaru timwato quava qutaa mwivau vahura. Aisaiaava Iesusira okyarara mwitaama tiro:

Mwi vaisiva tiri nriqa quaninra taiqa kyaananrove.

Mwiva tiri nriqa quaninra kyuqema kyaananrove, tura.

(Aisaiaa 53:4)

Iesusira vataqi virerata uti varuhua

(Ruku 9:57-60)

¹⁸ Iesusiva taqovata nraakyе qora airivanto ntuvantuama vita mwia vara ututu varuvaro Iesusiva tiqaro, Kyai kyaareraga qareta vutura hini tokyani uro variare, tura.

¹⁹ Qakyo mwini virera huvaro vaisi mpovanto mwaanra okyara ti varu vaisiva uro ntero Iesusirara tiqaro, Mwaanra ti variarao, nte i nraaqiara varirerave. E mpona mpona vinanra nte ivatama kyena nraahu virera teramama varuquo, tiro.

²⁰ Mwitaa tuvaro Iesusiva mwia timwa mwinro tiqaro, (E ni pataqira virera hiqara paparuqa hirorave.) Qaakyau vairivanto nkyiari nruaunrutaaraqi vaite variarave. Nyaamwavanto nkyiari nraamwuqi vaite variarave. Nte mwatani mwatatai nraaqiarava vaitaani nraamwuva hia vaiho, tiro.

²¹ Iesusiva mwitaa tuvaro mwia vataqi nrohi varu vaisiva mpovanto tiqaro, Nronrao, kyai nte ntena kora nraante uro quntamwa kyena nritarena i vataqi quankye, tuvaro

²² Iesusiva qaqao tiro, E ni pataqira nriante. Qutu qua vaisihua votima kye variahua qjoma qutu quani vaisira quntamwa tevarave, tiro.

Iesusiva toqa vaururuara qao tuvaro tirema vahura

(Maaki 4:36-41; Ruku 8:22-25)

²³ Iesusiva mwitaa timwa kyero mpotuqi mwaanri ntovata mwia nraaqiaranramwuvanto mwiavatama kyeta vurama.

24 Mwihua kyaarerera mwiaqaa vi varuvaro mate mwiqiara toqa vauruvantu kyaarereraqaa nronraqama kyero tiqaro nramanri ventaqiro nri vi varuvaro nramanrivanto mpotuqi mwaanri ntero mpotu rauru kyarerero uti varura. Mwihua rauru kyaaqara hi varuvaro Iesusiva mwiqi vaite varuvata.

25 mwia nraaqiaranramwu Iesusiva vaitonani uro mwia vaurama kyeta tiqata, Nronrao, sivira tiri kyaahaqa hiante. Tire nramanri nreta qutuarava pataqia vaiho, tita.

26 Mwihua mwitaa tuvaro Iesusiva tiqaro, Nkye nanraqamave aatu hiavo? Nkye nianra kepukyaqama kyeta riaataara vaihata hia mwitaa hiavo, tiro. Mwitaa timwa kyero Iesusiva siviro toqa vaururuaravata, nramanrianravata tiqaro, Qio eqaante, tuvaro nramanrivanto itomwi viro tirema vahurama.

27 Tirema vahuvata mwia nraaqiaranramwuvanto nro qaqaama teta kyauqu ntukikinraaqata kyeta tiqata, Qikye, mwiva nataa hi vaisivave variho? Toqa vaururuvantovata nramanrivantovata mwia qua rie variho, tura.

Iesusiva vaisi taaratana utaqitairo vaana titamwa kyora

(Maaki 5:1-17; Ruku 8:26-37)

28 Mwihua mwitaa timwa kyetama mpotuqi vuhuama vutura qarahi hini Kataraani uro ntovata vaisi taaratanaavanto mwihua uro qintorama kyora. Mwitanahua vaana kyapata varutanahua vaisi quntamwa tora ori ataamwuqi variqata mwitanahua mpoqama kyeta vaisi ntuqutirerata uti varuvata nraakye goravantua mwitanahua nyaatu aatu hiqata hia mwitanahua varu aanranra mwini vi varura.

29 Mwitanahua ori ataamwuqitaita uro Iesusira qintorama kyeta aakyara nteta tiqata, E Kotira mwaaquvantove. Tiritana nataa hirerarave nrianro? Tiritana ruari entava hia nrihanra e qamwanrama kyera tiritana rirerave nrianro? tita.

30 Mwitanahua mwitaa tuvaro vutura mposata quara airivanto uhiqa nre varuvata

31 vaisi taaratana utaqi varu vaanahua Iesusirara po tita tiqata, E tiri titairera e tiri titairaqe tire quaraqi uro variare, tita.

32 Mwitaa tuvaro Iesusiva qio quate tuvata mwihua nritareta uro quaraqi varuvata quara mwihua hianteta okai qoraqhuraqi tutontita nramanriqi ntumwa vita nramai nreta qutu vura.

33 Mwitaa huvata quaraqa ntaqikyi varuhua taqeta hianteta uro mwatukya nronraqi quara qutu vuhuara timwa nyita vaana utaqi varu vaisitananravata timwa nyuvata

34 mwi mwatukyaraqinaahua ekyaa mwihua Iesusira huntu kyarerata vuhua uro nteta mwianra tiqata, Po, e hia tiri mwaata mwaini variante. Sivira mwaaqaataira quante, tita.

9

Iesusiva hini mwamwanta qutu vu vaisira kyuqema kyora

(Maaki 2:1-12; Ruku 5:17-26)

1 Mwihua mwitaa tuvaro Iesusiva mpotuqi mwaanri ntero nrumu ntantero nramanriqama tero nai mwaatani uro ntora.

2 Uro ntovata vaisi mponramwuvanto vaisi mpo hini mwamwanta qutu vura taintamaqita Iesusiva varunani uro kyovaro Iesusiva ntapihi kyovata mwi vaisinramwuhua nkyiari nraahu tiqata, Qutaama mwi vaisira kyuqema kyaananrove, tu vaisihua varuvaro mwiva hini mwamwanta

qutu vu vaisirara tiqaro, Ni maaquo, kepukyaqama kyera variante. E Kotira qua nteqa kyaanana nte nrukama mwatauqo, tiro.

3 Iesusiva mwitaa tuvata mwaanra okyara ti varu vaisinramwuhua qaqao timwa kyeta nai timwa mwi nai timwa mwi hita tiqata, Mwaa vaisiva mwitaa tiqaroma Kotirara uaqia hi quarama ti variho, tita.

4 Mwihua mwitaa tuvaro Iesusiva mwihua su nyaatoqi vahu quara ntapihi kyero mwihuara tiqaro, Nanraqamave nkye uaqia hi quara nkyeta su nyaatoqi mwitaama kyeta riaavo?

5 Nkye nianra tiqata, Mwiva qumina vaisi variqarora tiro, hiama qio nai hena vaisivanto Kotira qua nteqa kyaaninra nruka mwataananrove, qiarave. Qio mpo kyaiqa mpo? Qiove nte mwaa vaisira kyuqema kyaaninrave? Nkye ni timwa mpivaque riaankye, tiro.

6 Iesusiva mwitaama kyero ntum wahiamwama nyatero mwihuara tiqaro, Nte mwatani mwatatai nraaqiaravama varuqaro ni nronraqama kyaishana nte qioma mwatani variqana vaisivanto Kotira qua nteqa kyaaninra nruka mwataaninrave. Nkye ni quara qutaa quave ciate tina, nte mwaa vaisirara mwataa tirerave, tiro. Mwitaa timwa kyero Iesusiva hini mwamwanta qutu vu vaisira mwianra tiqaro, Sivira ena taintavata tu varera ena mwaatani quante, tiro.

7-8 Mwitaa tuvaro mwi vaisiva siviro nai mwaatani uvata mwini ntuvantuama vuhua mwi kyaiqara taqeta aatu hita Kotira nrutu tuaahereta tiqata, Kotiva mwi vaisira kepukyaqama kyaiharo mwi kyaiqara varaiho, tita turama.

Iesusiva Matiura nraanrama kyero vitora (Maaki 2:13-17; Ruku 5:27-32)

9 Iesusiva mwiaqatairo vuva viqaro taqovaro vaisi mpovanto Matiuba taakisi vareqaro haraara nraamwuqi varuvaro mwiva mwianra tiqaro, Ni pataqira nriante, tuvaro Matiuba siviro mwia vataqiro vurama.

10 Mwia vataqiro vuvaro Iesusiva nai nraaqiaranramwu kyapata uro Matiura nraamwuqi kyara nre varuvata airi vaisi taakisi vare varuhuavata, uaqia hi kyaiqara uti varuhuavata, Jesusira vatama kyeta kyara nre varura.

11 Nre varuvata Parisi vaisinramwuvanto mwihua taqeta Jesusira nraaqiaranramwuanra qaqao tita, Nanraqamave nkyi nronravanto taakisi vare variahuvata, uaqia hi kyaiqara uti variahuvata, kuaaqi kyara nre varaho? tita.

12 Mwinramwuhua mwitaa tuvaro Iesusiva tiqaro, Qati variahua hia totaava hinani vi variarave. Nyiqa vihua nraahu totaava hinani vi variarave.

13 Tire ntapihi kyeta nrohi varurahuave qiahua hia nte mwihua nyaanranrenra tumuvave. Nte uaqia hi kyaiqara uti varia nraakyeh qorahua nyaanranrenrana tumuvave. Kotira mpukuqi qara ntumwato quava Kotirara mwitaama tiho:

Vaisivanto quara rukyero mpianinranra
hia nte mwianra qamwataaninrave.

Vaisivanto mporara po kye timwa mwateqaro kyaahaqama mwataaninra nte mwianrama qamwataaninrave, turave. **(Hosaiia 6:6)**

Nkye mwi quara okyarara nraato tita uro puaama kyeta taqeta riemwaqa ita, tiro.

Kyara aurama terara Jesusira kyapara hura (Maaki 2:18-22; Ruku 5:33-39)

14 Iesusiva mwitaa tuvata Ioninra nraaqiaranramwuvanto Iesusiva huanani uro nteta mwia kyapara hita tiqata, Tirevata, Parisi vaisinramwuvantovata, kyara aurama te varuro. Nanragamave i nraaqiaranramwuvantovata hia kyara aurama taraitita, qati kyara nre variavo? tita.

15 Mwitaa tuvaro Iesusiva mwihua timwa nyinro tiqaro, Nraakye varaari vaisiva nai vataahuavata varirera, tavave mwia vataahua mwihuara kyara aurama taate qiananro? Qaqao, hia mpovanto mwitaa qiananrove. Mpo enta nri ntairata mwihuaqtai nraakye varaani vaisira vara qatinani kyairata mwi entaraqaataitama mwia vataahua ntateqata kyara aurama tevarave, tiro.

Hia haaruua okyaravata qaraakyaa okyaravata kuaaqi tutaae tura

16 Mwitaa timwa kyero Iesusiva mpo quaqaa ntumwa kyeqaro timwa nyinro tiqaro, Mpovanto tuavaaqa nrihi ntupema vira haqirarero hiro hiama qaraakyaa tavuna toqa kyero mwiaqaa taaqau tero haqiraananrove. Nraakiara tuavaaqa mwia higairaro qaraakyaa tavuna haqirama taariva viro qiquqama viraro nrihi tuavaaqa mwivavata nronraqama kyero ntupe hiankyo tiro, hia mwitaa hirave.

17 Qaiqaa tirerave. Hia mpovanto qaraakyaa uaini tati kyero memenra pahiqo ututai taqura haaruua taquqi qaiqaa vara kyero raurirave. Mpovanto mwitaa hirera qaraakyaa uainivanto tapitero taqu mwia takuma viraro qatinani ntamwa viraro taqu mwivavata uaqjama quananrove. Mwitaa hiankyo tiro vaisivanto memenra pahiqo ututai taqura qaraakyaa taqu vara kyero qaraakyaa uaini rauri variharo uainivantovata taquvantovata qio vahirave, tiro.

Mwaanra nraamwuqaa ntaqikyi varu vaisira nraamwunranravata nraakye mporavata tura

(Maaki 5:22-43; Ruku 8:41-56)

18 Iesusiva mwitaa ti varuvaro mwaanra nraamwuqaa ntaqikyi varu vaisiva mpovanto uro Iesusira vuqaa tori kyauru raviro tiqaro, Ni naamwunravanto qutuma viho. E nrinra ena kyauqu mwiaqaa vatairaro qati siviro variarive, tiro.

19 Mwitaa tuvaro Iesusiva siviro nai nraaqiaranramwu kyapata mwi vaisira vataqiro viro.

20 Aanraqaa vi varuvaro nraakye mpovanto nriqa vuvaro 12 ihiara qati nraahu tora taqamwaqiro vu nraakyeva Iesusira mwoqani uro variqaro Iesusira vaqa viti kyaatu kyero.

21 Mwi nraakyeva nai riero tiqaro, Nte mwia vaqa viti kyaatu kyaariro ni nriqa viva taiqa viraqe qiomaa varianinrave, timwa kyero Iesusira vaqa viti kyaatu kyora.

22 Kyaatu kyovaro Iesusiva tuqasaa viro mwia taqero tiqaro, Ni naamwunrao, kepukyaqama kyera variante. E nianra ni kyaahaqa hiariwave qiararoma i mwamwantavanto kyuqema viho tuvaro mate mwiqiara mwi nraakyeva kyuqema viro varura.

23 Iesusiva vuva uro mwaanra nraamwuqaa ntaqikyi varura mwia nraamwuqi vera ntero taqovata mpo uhua po kye tiqata ntate ntoma vaarara vuate varuvata mpo uhua nronraqama kyeta ntate varuvaro

24 Iesusiva tiqaro, Nkye tumitareta quate. Mwi qiaatarava hia qutu viho. Qati vaitema variho, tuvata mwihua nai mwianra nraahu raima mwatora.

25 Iesusiva mwihua sitovata veva ntovaro mwi qiaatarara vatoraqi vera ntero mwia kyauquqa tu varovaro mwi qiaatarava qati sivura.

26 Iesusiva mwitaa hu quava ekyaa mwi mwataraqi viro nrinro huvata ekyaa riemwa ntora.

Iesusiva vaisi taaratana su qipa vuhua ntapairi kyora

²⁷ Iesusiva mwiaqaatairo aanraqaa vuvata vaisi taaratatanavanto vu qipa vu tanahua mwia vataqi vita mwia nraanramaqita vita tiqata, Ntevitira mwaaquo, gati tiritanaria po kye timwa timwataante, tita.

²⁸ Mwitanahua mwitaa timwaqita vuvaro Iesusiva nraamwuqi vera ntero varuvata mwitanahua mwiva varunani uro ntovaro Iesusiva mwitanahua kyapara hiro tiqaro, Nkyetana nianra qutaave mwiva tiritan tivu ntapairi timwataananroveve qiaovo? Tivagena riaankye, tuvata mwitanahua, Nronrao, eo, tita.

²⁹ Mwitanahua mwitaa tuvaro Iesusiva mwitanahua suqaa nai kyauqu vatero tiqaro, Nkyetana nianra qutaa mwitaa hiananrove qiavenama nkyitana su ntapairi nyatauquo, tuvaro

³⁰ mwitanahua suvanto ntapairi vuvata qio taqeta. Mwitanahua qio taqe varuvaro Iesusiva kepukyaqama kyero timwa nyinro tiqaro, Hia mwi quara mpohuavata timwa nyiate, tiro.

³¹ Iesusiva qao tu quara mwitanahua qaqlira kyeta uro mwi quara mpohua mpohua timwa nyiqi vi varuvaro mwi quava mwi mwataraqi viro nrinroma vura.

Iesusiva hia qua tu vaisira kyuqema kyora

³² Mwitanahua vuvata vaisi mponramwuvanto nkyiari hena vaisi mpo vitaqita uro Iesusiva varunani kyora. Vaanavanto mwi vaisirraqi varuvarora tiro, mwiva hia qua tuvata mwia vitaqita Iesusiva varunani uro kyovaro

³³ Iesusiva vaana mwia titovaro nritarovaro mwi vaisiva qua tuvata nraakye qora mwini ntuvaantuama vuhua, Qikye, tire Isarerivanto haaruvata hia mwataata hi kyaqira taqaunannrave, tita.

³⁴ Mwihua mwitaa tuvata Parisi vaisinramwuvanto qaqlao, tita. Vaana vunyaava mwia kyaahaqa hi variharoma Iesusiva vaana site variho, tura.

Iesusiva nraakye qorara po timwa nyatora

³⁵ Iesusiva mpo mwatukya mpo mwatukya nronra mwatukyaqvata pata mwatukyaqvata nrohiqaro mwaanra nraamwuqi vera ntero variqaro Kotiva nraakye qoraqaa ntaqikyiani quara kyuqe qua timwa nyiqiro viqaro mpo qara mpo qarama kyero nriqa vuhuavata kyuqemaqiro vura.

³⁶ Mwiva mwitaamaqiro vi varuvata nraakye qora airivanto mwiva hunani ntuvaantuama hita vita nrira hi varuvaro Iesusira mwutukyavanto mwihuara ua huvaro mwiva tiqaro, Po, vaisivanto hia ntaqikyi varihata sipisipinramwu nkyiariara api nrohitia hia qio nkyiari kyaahaqa hiraitita, pupohaihata varia sipisipihua votima kyetama mwaa nraakye qorahua nrohi variavo, timwa kyero mwihuara po kye timwa nyatero.

³⁷ Iesusiva nraakye qorara po kye timwa nyatero nai nraaqiaranramwuanra tiqaro, Taqaate, kyara airivanto keko tihata mwia vantu vareta nrihua hia airivanto variavo.

³⁸ Nkye aakyo qora kyapara hivarо mwiva kyaiga vaisi mponramwuvata sitairata uro kyara vantuate, tiro. (Iesusiva kyara keko tiho tura mwiaqaa ntumwa kyero nraakye qorara tura.)

10

Iesusira nraaqiara 12 nramwu nyutu (Maaki 3:13-19; Ruku 6:12-16)

¹ Iesusiva nai nraaqiara 12 nramwu nyaanrama kyero sita vatero mwinramwuhua nraakye qoraqitaita vaana siteta nataa nataama nriqa

quarihuave kyuqema nyataate tiro, mwiva mwinramwuhua nronraqama kyora.

² Mwiva nronraqama kyo vaisihua nyutu vahirero:

Vuni Saimoninra, mwia nrutu mpo Pitaara,

mwia qata Enturura,

Sepetira mwaquo Iemisira,

Iemisira qata Ioninra,

³ Piripira, Pataromiunra, Tomaasira,

Matiura taakisi vare varu vaisira, Arapiaasira mwaquo Iemisira,

Tatiaasira,

⁴ Saimoninra, mwia nrutu mpo Serotira,

Iutaasi Isikeriotira, mwiva Iesusira nramwutaahua

suqaa qovarama kyo vaisira.

Iesusiva nai nraaqiara 12 nramwu kyaiqa nyinro sitovata vura

(Maaki 6:7-13; Ruku 9:1-5)

⁵ Iesusiva nai nraaqiara 12 nramwu sitero qua timwa nyinro tiqaro, Nkye vihuama hia mpo mwatanaa mwaatani quate. Hia Sameriaa nraakyе qora mwatukyaqivata quate.

⁶ Nkye hia mwini viraitita nkye sipisipivanto raupirima viva apiqama vintema kyeta variahua Isarerri nraakyе qoraqi nraahu quate.

⁷ Nkye uro variqata mwitaamama timwa nyiate. Kotiva nkyiqa ntaqikyiariava nkyi qaumatomata nri ntaiho, qiate.

⁸ Nkye nriqa vihua kyuqema nyataate. Nkye qutu vihua sivuma kyaate. Nkye mwamwanta vauruqiro quani tauma rumpuarava vaisiqaa vahianira nruka nyataate. Nkye vaanavanto vaisi uteqи variahua sitaivata nritaraate. Nte hia nkyiara munimanra nyaanru tiraitina qati nkyi nronraqama kyaurara titi, nkyevata nraakyе qora qatima kyuqema nyataate.

⁹ Hia nronra munimave, pata ori munimave, ntumwa vareta quate.

¹⁰ Nkye virera hita hia kyara tuaqi ntita, tuavaaqave, kyuqu nraamwuve, kyauruve, mwi inraikyara hia vararaitita, qatima quate. Nkye kyaahaqama nyatarera ihua mwihuama nkyiqa ntaqikyiante.

¹¹ Nkye nronra mwatukyaqive, pata mwatukyaqive, uro ntetama nkyi qamwata nyataani vaisira puama kyetama mwia nraamwuqi nraahu variqita vita mwi mwatukyara kyetama quate.

¹² Nkye nraamwuqi vera ntarera hita, mwiqi varihua qua mwantematama, Nkyi mwutukyavanto qihakaya hirata variate, qiate.

¹³ Nkye mwitaa tivata mwiqi varihua nkyi kyuqema kyeta sita vataivera, Kotiva mwihuua mwutukya qihakayama nyataananrove. Mwihuua hia nkyi kyuqema kyeta sita vataivera, Kotiva mwihuqaqitairo mwutukya qihakaya hira mwia vara kyaananrove.

¹⁴ Mpo nraamwuqinaahuave, mpo mwatukyaqinaahuave, hia nkyi qamwata nyateta hia nkyi quavata riaivera, nkye nkyetaqaatai ntuvenerauma kyeta mwi mwatukyaraqi tuto kyeta quate.

¹⁵ Nte quataaqama kyena nkyi timwa nyianinra riaate. Nkyi qua hia rie nraakyе qorahuqa Kotiva nronra muuanra vataaananrove. Haaru Sotomiqi varuhuavata, Komoraaqi varuhuavata, uaqia hi kyaiqara nraahu uti varurave. Nraakiara ekyaaara entaaqaa Kotiva ko tiqaroma mwi vaisihuqaata pataqia qua vatero nkyi qua hia rie nraakyе qorahua mwihuqaata nronraqama kyerooma qua vataaananrove, tiro. Iesusiva nai nraaqiaranramwu timwa nyunrama.

Iesusira nraaqiaranramwu uaqama nyaterara tura

¹⁶ Iesusiva mwitaa timwa kyeru timwa nyiqiro viro tiqaro, Nkye mwaanra quara riaate. Nte nkyi sitaarita nkye sipisipi votima kyeta vivata mpo ihua qaakyau vairi votima kyeta nkyi uaqiamma nyatarerata uti varivarave. Mwianra rieqatama nkye qaruravanto rauru kyeqaro nrohaintema kyeta nrohiate. Nyaamwa mpohiva hia nai henan yaamwawata ntaqintema kyeta nkyevata hia mpohua uaqiamqa quate.

¹⁷ Nkye vaisi mponramwuanra rauriqata variate. Mwihua nkyi ntavaaqavuqita uro nkyiari kaanasori nraamwuqi kyeta nkyiqa qua vatavarave. Nkye mwaanra nraamwuqi varivata nkyi ntuqutu kyeta vatevarave.

¹⁸ Nkye ni kyaiqa vare varivata mwia kyaara nkyi ntavaaqavuqita uro nronra vaisi suqaavata, vunyaa vaisi suqaavata, kyevarave. Nkyi uro kyaivata nkye mwihuvata mpo mwatanaa mpo mwatanaavata ni qua nraahu timwa nyiate.

¹⁹⁻²⁰ Mwi entara nkyi ntavaaqavuqita uro kyaivata hia nkyi mwutukyavanto nronraqa hirata, Nanra quave qiananrave? qiate. Mwi entara hia nkye nkyeta nraato tu kyeta tiraitita varivaro nkyi sora mwanraquravanto nkyiara mwitaa qiate tiqaro nkyi nroqitairo qua qiananrove.

²¹ Nraakiara mpo hihua nkyiari qatave nkyiari vakyaarave qovarama kyaivata ru kyevarave. Mwihua qohua nkyiari nraaqiara qovarama kyaivata ru kyevarave. Mwihua nraaqiaranramwuvanto nkyiari nyohua sohua qua hia riaraitita, mwihua ru kyaate tivata ru kyevarave.

²² Nkye ni kyaiqa vare varivata mwia kyaara nkyi qoririma nyatevarave. Mwitaamaqita vivaro hia qamwanrama pupohairaro mpo enta mpo enta kepukyaqama kyero variqo vi variari vaisiva, mwiva qio variraro ekyaa entaqaas Kotiva mwiva vitaananrove.

²³ Nkye mwi mwatukyaraqi varivata nkyi qoragama nyateqata nkyi ru kyarera utivera, nkye aatu ntuquema kyeta mpo mwatukyqa quate. Nte qianinra riaate. Nkye Isareriqi nrohiqata ni qua hia ekyaa mwatukyqa timwa nyi taiqa kyaivaqena nte mwatani mwatatai nraaqiarava qaiqaa tumuaninrave.

²⁴ Qumwanraa vaisivanto nai qua mwaanra timwa mwi vari vaiseira hia nraatara kyairave. Kyaiqa vaisivantovata hia nai nronra vaisi nraatara kyairave.

²⁵ Qumwanraa vaisivanto variqi viro nai qua mwaanra timwa mwi vari vaiseira nraantantamwa viro mwiaqatairo mwiva nte qioma kuaa qarama varuquo qiananrove. Kyaiqa vaisivanto variqi viro nai nronra vaisi nraantantamwa viro mwiaqatairo mwiva nte qioma kuaa qarama varuquo qiananrove. Mwihua nianra e vaana vunyava Pierisepuriva variaro qiarave. Mwihua vaakya uaquia hi nrutura mwia ni mpiahuara tita, mwihua nraakiara nkyi ni nraaqiaranramwuvata anoma kyeta uaquia hi nrutura nyivarave.

Kotirara nraahu aatu hiqata variate tura (Ruku 12:2-7)

²⁶ Nkye mwi quara rieqatama hia vaiseira nraatu aatu hiqata variate. Mpovanto taqaankyo tiro ntumwaqu taani inraikyara, nraakiara ekyaa mwi inraikyara qoqaa nraahu qovarama kyaananrove. Mate ugeta taani inraikyara nraakiara qovarama kyairaro qoqama vahiananrove.

²⁷ Mate nte kyokiraqi variqana nkyi timwa nyi varu quara nkye nraakiara ntuvahaaninraqa variqata timwa nyiate. Mate nte tirema kyena nkyi timwa nyi varuqata riaa quara nraakiara mwatukyqa variqata aakyara ntamwa kyeta qiate.

28 Nkyi mwanraqura hia rukyaratitita mwamwanta nraahu rukye vaisi-hua hia mwihua nyaatu aatu hiate. Nkye Kotira nraatu aatu hiqata variate. Vaisivanto qutu viro qutu vihua qiaqi vinani viraro Kotiva mwia mwamwantavata mwia mwanraquravata qio ru taiqa kyaarivama varaho.

29 Qio quutaave vaisivanto pata munima kuaaru kyero uapaa nyaamwa varairave? Nkye uapaa nyaamwave qiara Kotiva mwiaqaaavata ntaqikyima varaho. Kotiva hia qiove tirera, uapaa nyaamwa mwiva hiama qio tumu ntuananrove.

30 Kotiva nkyiqa ntaqikyiqaroma nkyi okyara ekyaa taqe variva, mwiva nkyi qiata kyaahivata ekyaa kyaara ntumwa tairave.

31 Nkye uapaa nyaamwa nraatara kyaahuave. Kotiva uapaa nyaamwaqaa ntaqikyiqaro nkyiqaavata nritarero kyuqema kyero ntaqikyi varirara tita, hia aatu hiqata variqita quate, tiro.

*Hia aatu hiraitiro nte Iesusira nraaqarama varuqo qiani vaisirara tura
(Ruku 12:8-9)*

32 Iesusiva mwitaa timwa kyero timwa nyiqiro viro tiqaro, Vaisi mpov-anto nraakye qora suqaa variqaro nianra vutu kyero timwa nyinro tiqaro, Nte mwia nraaqarama varuqo, tirera, ntevata ni kova nyaamwuni varira vuqaa variqana vutu kyena tiqana, Nai mwi vaisivavata ni nraaqarama varaho, qianinrave.

33 Mpovanto nraakye qora suqaa variqaro nianra tiqaro, Qaqao, hia nte mwia nraaqarama varuqo, tirera, ntevata ntena kova nyaamwuni varira vuqaa variqana nai mwi vaisirara tiqana, Qaqao, mwiva hia ni nraaqarama varaho qianinrave.

*Nraakye qora ntainra kyarera tumuvave tura
(Ruku 12:51-53, 14:26-27)*

34 Nkye nianra tiqatama, Mwiva tumu varihatara tita, nraakye qora mwatani varihua mwaateraqama kyeqata variqita vivarave, qiavo. Nkye mwitaave qiavo? Qaqao, nte mwatani tumu varurara tita, mwatani varihua ni nramwutaaqa hiqata varivaro nronraqama kyeta ntaqiva qovara hiananrove.

35 Ni kyaara qovavata mwaaqvantovata nramwutaaqa hiqata varivar-ave. Ni kyaara nrovavata nraamwunrantovata nramwutaaqa hiqata varivarave. Ni kyaara mwia nraaqutuvanto nai nraaqutuntiri nramwu-taaqa hiqata varivarave.

36 Vaisi mpovanto varirata mwia vataahua mwia nraamwuqi varihua mwihuama mwia nramwutaaqa hivarave.

37 Mpovanto nianra mwutukya vahianinravata nraatara kyero nai nron-ranrave, nai qorarave, mpooqavata mwutukya vahiariva mwi vaisiva hiama qio ni nraaqiara variananrove. Mpovanto nianra mwutukya vahianinravata nraatara kyero nai mwaaquarave, nai nraamwunranrave, mpooqavata mwutukya vahiariva mwi vaisiva hiama qio ni nraaqiara variananrove.

38 Mpovanto hia nai rukye hirite kyatarira vara qu varero ni naakiara nrianriva, mwiva hiama qio ni nraaqiara variananrove.

39 Vaisivanto nai mwatani qati varianinranra nraahu nronraqama kyero riaariva, mwi vaisiva ekyarama qutu quananrove. Vaisi mpovanto nianra riemwaqiro viqaro uro qutu quariva, mwi vaisiva ekyaa entama qati variqiro quananrove.

*Mwia qiata kyuqe kyoqaa varerara tura
(Maaki 9:41)*

40 Nte nkyi sitaarita vivaro vaisi mpovanto nkyi qamwata nyateqaro mwiva nivatama qamwata mataananrove. Mwiva ni qamwata mwateqaro ni kova ni titairavatama qamwata mwataananrove.

41 Kotira qua qovarama kyero timwa nyi variari vaisiva, poropeti vaisivanto nri ntairaro vaisi mpovanto mwia qua riarera qamwata mwatairera, Kotiva poropeti vaisi mwia kyugema mwataintema kyero mwi vaisiravata kyugema mwataananrove. Avuqavuma kyero nrohi variari vaisiva nri ntairaro vaisi mpovanto mwianra avuqavuma kyero nrohi vari vaisirave kyaiqe mwia qamwata mwataankye tirera, Kotiva avuqavuma kyero nrohi vari vaisira kyugema mwataintema kyero mwi vaisiravata kyugema mwataananrove.

42 Vaisi mpovanto ni nraaqiara pata mporu taqero mwiva Iesusira nraaqiarae timwa kyero qamwata mwafeqaro antaani nramanrinra kyaqa kyero mwia mwinrenra, Kotiva hia mwi vaisira qaqlira kyaraitiro, mwia kyoqaa kyugema kyero mwataananrove, tiro. Iesusiva turama.

11

Ioniva nramanri nyi varuva nai nraaqiara mponramwu sitovata Iesusira kyapara hirerata vura
(Ruku 7:18-35)

1 Iesusiva mwi quara nai nraaqiaranramwu timwa nyitero mwiva mwini kyero mwakyaakya nraakye qora timwa nyinrenro Karirini mpo mwatukya mpo mwatukyaqiera vura.

2 Iesusiva mwini vuvaro Ioniva karavuqi variqaro riovaro Kotiva tito vaisiva nronra kyaiqa vare varuvaro mwiva nai nraaqiaranramwu sitovata mwinramwuhua uro Iesusira ntumwahiamwa hita tiqata,

3 Kotiva titairaro nraakiara nrianriva qutaa e mwaa mwivave? Tire vaisi mpo vekyave variananrave? tita.

4 Mwinramwuhua mwitaa tuvaro Iesusiva mwihua timwa nyinro tiqaro, Nkyenramwu mwaini nrumu variqata taqaarave, riaarave, nrumu ntanteta uro Ioninra timwa mwiate.

5 Vu qipa quahua qatima taqe variavo. Kyuqu uaqlama vihua qatima nrohi variavo. Rumpuara taumavanto mwamwantà nre vari nraakye qorahua mwamwanta tavanta vihatama variavo. Nraato titi vihua qaiqaa qiomia riaavo. Qutu quahua sivita qatima variavo. Vehi nraakye qora Kotira qua kyuqe qua nrumu rie variavo. Mwi quara mwi quara uro Ioninra timwa mwiate.

6 Nianan hia taara nraato tiraitiro kepukyaqama kyero kuua vu nraato nraahu riemwaqiro vi variariva, mwivama qamwateqaro variananrove, tiro.

7 Iesusiva mwitaa tuvata Ioninra nraaqiaranramwuvanto nrumu ntante vi varuvaro Iesusiva nraakye qora ntuaantuama vuhua Ioninranra timwa nyinro tiqaro, Nkye haaru nanra inraikya taqarerata qumina mwatanu vurave? Toqavanto omwa ahikya tiharo hini viro hini nrinro hira taqarerata vurave?

8 Nkye hia mwia taqarerata viraitita, mpo nanra inraikya taqarerata vurave? Kyuqe tuavaaqa ututo vaisira taqarerata vurave? Qaqlira, kyuqe tuavaaqa utute varia vaisihua hia qumina mwataqa variarave. Mwi vaisihua vunyaa vaisi nraamwuqi nraahu variarave.

9 Nkye nanra inraikya taqarerata vurave? Kotira qua qovarama kyaani vaisira poropeti vaisi taqarerata vurave? Eo, mwiae. Qio kyai nte nkyi timwa nyianrita riaate. Nkye mwi entara poropeti vaisi nraatara kyai vaisira taqorave.

10 Kotira mpukuqi Kotiva Ioninranra mwataama tiro:
Taqaante, ni qua timwa nyiani vaisira nte titaairo mwiva nraante i vuni
viqaro i aanra terama mwataananrove turave, tiro. (*Marakai 3:1*)

11 Iesusiva mwitaa timwa kyero mwihuara tiqaro, Kyai nte nkyi timwa
nyianrita riaate. Mwatani mwatataa nraakyey qorahua variavaro Ioniva
nramanri nyi vari vaisiva ekyaa mwihua nraatara kyaivama varaho. Ioniva
mwitaama variharo nraakiara Kotiva ntaqikyiani nraakyey qorahuaqitairo
nai vara mwataniqa hiariva nraahuma Ioninra nraatara kyaananrove.

12 Ioniva nramanri nyi varu vaisiva qovarama vu entaraqaatairo ntaqiy
varia vaisihua Kotiva ntaqikyiani quara ntumwaqu kyarerata Ioninra
ntavaaqavu kyaahua mwaa entara nivata ntavaaqavu kyarerata uti vari-
arave.

13 Haaru poropeti vaisinramwuvantovata, Mosesivavata, Kotiva
ntaqikyiani quara timwa qovarama vi varuvaro Ioniva qovarama
vurave.

14 Ioniva varirero mwiva nkyi haivaqava Iraisaava qaiqaa mwatani
govarama quari vaisivama varaho. Nkye mwi quarara quitaavé tivera, nkye
Ioninranra mwiva Iraisaavavema tivarave.

15 Nkyi nyaato vahirera, nkye mwi quarara nraato titi mwia okyara
ntapihiate, tiro.

16 Iesusiva mwitaa timwa kyero tiqaro, Mwaa entara varia nraakyey
qorahua, mwihua nanra inraikya votima kyetave variavo? Nte nanra
quaqa ntumwa kyena qiaritave nkye mwi quara ntapihi kyeta rievarave?
Kyaiqe nkyi timwa nyiankye. Mwihua nraaqiara uapaahua mwatukyaaqaa
ntuvaantuuma vita ntarerata variante hiavo. Nkyiari hena nraaqiara mpo
hiahua nyaanrama kyeta tiqata,

17 Tire ntoma vaara vuaurata nkye ihi ntaataara vahatama nkye hia
hih ntaavo. Tire nteqatama ntate ihira turata nkye ntataataara vahatama
hia ntataavo qiarave. Mwaa entara varia nraakyey qorahua mwihua votima
kyeta variarave.

18 Ioniva nri ntero kyara aurama tero hia uainivata nrovata mwihua
mwianra tiqata, Vaana kyapata varivave, turave.

19 Nte mwatani mwatatai nraaqiarava nri ntene kyaravata nramanrivata
nrauqata mwihua nianra tiqata, Mwia taqaate. Mwiva mpoqama kyero
kyara nre varivave. Mwiva uaini nreqanro uera nte varivave. Mwiva
taakisi vare variahuvata, uaqia hia vaisihuavata, totiqa hi varivave,
qiarave. Mwihua nianra mwitaa ti variarave. Qio quavanto kyuqe qua
ahirera, mwi quara riemwaqira virava taqairaro kyuqe qua nraahu
vahiananrove, tiro.

Mpo mwatukyanramwuanra po kye timwa nyatora (Ruku 10:13-15)

20 Iesusiva mwatukya mwinramwunraqi airi kyaiqa nronra kyaiqa vara
nyatovata mwi mwatanaahua hia uaqia hu aanraanra qaqa kyaraitita
varuvaro Iesusiva po kye timwa nyatero mwi mwatanaahua tiqaro,

21 Po, nkye Korasinvantovata Vetasaitaavantovata nkye taqevavarave. Nte
nkyi suqaa nronra kyaiqa varauqata kyero haaru mpoqamo nronra
kyaiqa Taiaa mwatanaahuave Saitoni mwatanaahuave vara nyatarerave
tutirio, mwi mwatanaahua mpo mwatanaahuara titi, vaakyama qainaama
tuavaaqa ututeta nkyiari mwamwantaqa qaupa quteta uaqia hi aanranra
qaqirama kyotirio.

22 Nte nkyi suqa nronra kyaiqa varauqata nkye hia uaqia hi aan-
ranra qaqa kyera mwia kyaara ekyaara entaqa Kotiva ko tiqaro Taiaa

mwatanaahuqaavata Saitoni mwatanaahuqaavata qua nronra vatero nkyiqa qua nronra mpoqiavatama vataananrove.

²³ Po, nkye Kapenaamiqi variahua nkye tiqata, Kotiva tiri nronraqama kyarraigeta nyaamwuni quananrave, qiavo. Qaqao, hiave. Kotiva nkyi vara kyero qaqlira kyairata nkye qutu vihua varira qiaqima uro varivarave. Nte nkyi suqa nronra kyaiqa varautema kyero haaru mpovanto Sotomi mwatukyaqi variqaro mwi mwatanaahua nronra kyaiqa vara nyataankye tutirio, mwi mwatanaahua uaqia hi aanranra qaqlira kyovaro Kotiva hia mwi mwatukyara taiqa kyovaro mwaa entara mwi mwatukyava qatima vahitirio.

²⁴ Nte nkyi suqa nronra kyaiqa varauqata nkye hia uaqia hi aanranra qaqlira kyera mwia kyaara nraakiara ekyara entaqaa Kotiva ko tigaroma Sotomi mwatanaahuqaqua qua nronra vatero nkyi Kapenaamiqinaahuqaqua qua nronra mpoqiavatama vataananrove, tiro.

Iesusiva nai qorara aakyara ntora (Ruku 10:21-22)

²⁵ Iesusiva mwitaa timwa kyero mwi entara Kotirara aakyara ntero tiqaro, Ko, e nyaamwuqaavata mwataqaavata ntakikyi variaravave. E mwi inraikyara mwi inraikyara uqeta tera nronra vaisi ekyaa okyara taqaa vaisihua hia nyaamwutaratiria, qumina nraakyee qora nyaamwute variananranra tina, nte i nrutu tuaaherauquo.

²⁶ Eo, ko, qio e ena kyakya hiraqa mwitaa hiataa iharara tira, mwitaa hiaro, tiro.

²⁷ Iesusiva mwitaa timwa kyero tiqaro, Ni kova nianra ekyaa inraikyaa ena ntakikyante tirave. Hia qumina vaisivanto ni mwia mwaagu okyara ntapihirave. Ni kova nai nraahu ni okyara ntapihi kyairave. Hia qumina vaisivanto ni kora okyara ntapihirave. Nte mwia mwaqvavanto nraahu mwia okyara ntapihi kyaurave. Nte tahuave timwa nyiataa hiraqena timwa nyianrihua mwihuavata ni kora okyara ntapihi rievarave, tiro.

Niqaatai nrumu tekya hira varaate tura

²⁸ Iesusiva mwitaa timwa kyero tiqaro, Nkye nronra muaanra ntai inraikyara ventaqua vaantaqua ihata vare variavaro pupohaihata variahua nte nkyiara tirerave. Nkye nte hiarinani nrivaqena nte nkyi qati varira nyianrita nkye tekya hiate, tuquo.

²⁹ (Purimakauvanto qua riaarive tiro kyatari kohi kyero vaataariqaa rupatairaqaa ntumwa kyena tirerave.) Nkye kyatari nte nyianinra vara kyeta nkyeta qumwuqa vataivaqe nte ntene kyaiqa nkyi nyaamwu taankye. Hia nte ntene nutu tuaheraraiti, nte qihakyma kye varurara tita, nkye qiomia tekya hivarave.

³⁰ Nte nkyi qumwuqa kyatari qu nyataariva kyugema kyero vahiananrove. Nte nkyiqa muaanra vataariva vuvua taananrove, tiro. Iesusiva turama.

12

Mwaanra entara tura (Maaki 2:23-28; Ruku 6:1-5)

¹ Mwi entara Iesusiva mwaanraqa aakyo utaqi kyakuma voti hura uiti tutoraqi nrohi varuvata mwia nraaqiaranramwu nraataa huvata uiti tamwa nteqa kyeta uru mwia nre varura.

² Nre varuvata Parisi vaisinramwuvanto mwihua taqeta Iesusirara tigata, Ena nraaqiaranramwu taqaante. Mwaanra entaqaa hia mwitaa hiate qarama mwihua mwitaa hi variavo, tita.

³ Mwihua mwitaa tuvaro Jesusiva nkyiari timwa nyinro tiqaro, Haaru nkyi haivaqava Ntevitivavata, mwia vatama kyeta nruhuavata, nraataa huvata varuvaro Ntevitiva mwi entara mwitaa hora mwi quara nkye hia quaraqi kyaara ntumwa kyeta riaarave iho?

⁴ Mwi entara Ntevitiva Kotira nraamwuqi vera ntero mpereti Kotirani vatora vara kyero nreqanro nteqa kyero nai mwiaiatama kyeta nruhuavata hini nyuvata nronrave. Kotira kyaiqa vara mwate varu vaisihua nraahu nraataara vahuvare qumina väisivanto hia qio nraananrove tu quara Ntevitiva qumina väisivanto mwi kyarara nreqanronra tiro, mwi quara nteqa kyorave.

⁵ Nkye Mosesira qua mpo hia kyaara ntumwa kyeta riaarave iho? Kotira kyaiqa vara mwate varia vaisihua mwaanra entaqaa Kotira nraamwuqi mpo kyaiqa mpo kyaiqa vare variarave. Mwihua mwaanra entaqaa mwi kyaiqara varaqita viqata qao timwa taa quara nteqakye variavaro quavanto hia mwihuaqaa vahirave.

⁶ Nkye Kotira nraamwuanra nronraqama kyeta rie variarara nte nkyi timwa nyinrenrave. Kotira nraamwu nraatara kyauva nte mwainima varuquo.

⁷ Kotira mpukuqi mwitaama tiro:

Vaisivanto quara rukyeqaro mpi kyaiqara
hia mwi kyaiqarara ni mutukya ntihana varuquo.
Vaisivanto mporara po kye timwa mwateqaro
kyahaqama mwataaira, nte mwi kyaiqararama
ni mutukya ntihana varuquo, turave.

(Hosaiia 6:6)

Nkye mwi quara okyara ntapihi kyeta rieqata nrohiatirio, nkye hiama qati varia vaisihuqaqua qua vate variatirio.

⁸ Ni mwatani mwatatai nraaqiarara nronraqama kyaihana variqana nte mwaanra entaqaa ntaqikiyiqana qioma ntena kyakya hiani kyaiqara varaaninrave, tiro. Jesusiva turama.

Jesusiva viasi mpo kyauqu kyuqema kyora

(Maaki 3:1-6; Ruku 6:6-11)

⁹ Iesusiva mwini kyero vuva uro mwihua mwaanra nraamwu mpoqi varura.

¹⁰ Varuvaro viasi mpovanto mwia kyauqu tapanra vuva varuvata mwipi varuhua Iesusiraqaa qua vatarera uti variqata mwia ntumwahiamwa hita tiqata, Vaisivanto mwaanra entaqaa henä viasi mwamwanta kyuqema mwatairera, mwiva mwitaa hiqaro tiri mwaanra qua nteqave kyaananro, hiave nteqa kyaananrove? tita.

¹¹ Mwihua mwitaa tuvaro Jesusiva nkyiari timwa nyinro tiqaro, Nkyiqitairo viasi mpo sipisipivanto mwaanraqa mwata quvuteraqi ntumwa virera, mwi vaisiva nai sipisipi pati mwaanri qatinani kyaananrove iho, hiave pati mwaanri kyaananrove? (Mwiva mwaanra entaqaa nai quara pati mwaanri kyaananrove.)

¹² Vaisivanto sipisipi nraatara kyairara tiro, vaisivanto mwaanra entaqaa viasi mpo kyuqema mwatairera, hiama Mosesira mwaanra qua nteqa kyaananrove. Mwitaa hiqaro mwiva kyuqe kyaiqa varaananrove, tiro.

¹³ Mwitaa timwa kyero Jesusiva viasi mwianra tiqaro, Ena kyauqu tutuante, tuvaro nai kyauqu tutuvaro mwia kyauquvanto kyuqema viro hini kyauqu votima viro vahura.

¹⁴ Mwaanra entaqaa mwia kyauqu kyuqema kyovata Parisi vaisinramwu veva nteta viqata Iesusira ru kye quara nai timwa mwi nai timwa mwi hi varura.

Kotiva Iesusirara ni kyaiqa vaisima variho timwa tora

¹⁵ Mwihua mwia ru kyarerata qua ti varura Iesusiva riero mwi mwatukyara kyero vuvata nraakye qora airivanto mwia vataqita vuvaro Iesusiva mwihuaqitai nriqa vuhua ekyaa kyugema kyero

¹⁶ mwihuarara tiqaro, Hia nte kyaiqa varaaninranra mpohua timwa nyiate, tiro.

¹⁷ Iesusiva mwitaat timwa kyero mwitaamaqiro vuvaro haaru Aisaiaava vetato entaqaa tu quava mwivauvahura. Aisalaava Kotiva mwitaama tiho, tiro:

¹⁸ Ni kyaiqa vaisi taqaate.

Nte mwia vara mwaamwianra taurave.

Ni mutukyavanto mwianra vahana

nte mwianra qamwateqana varuquo.

Nte ntena mwanraqura mwiaqaa vataariro

mwiva avuqavu hiani okyarara

mpo mwatanaa mpo mwatanaahua ekyaa timwa nyiananrove.

¹⁹ Mwiva hia antua qua tiraitiro,

hia aakyara ntamwa kyero timwaqiro virata

aanraqaataitavata nraakye qoravanto

hia mwia qua rievarave.

²⁰ Omwave quntove ntavaka viro vahianinra

mwiva hia mwini ekyaaara nteqa kyaananrove.

Omwa qipa virera uti varianinra

hia mwiva ekyaaara qipa kyaananrove.

Mwiva mwitaa hiqaro qihakyma kyero variqiro viraro

avuqavu hiani okyarava nritarero vahiananrove.

²¹ Ekyaa mpo mwatanaa mpo mwatanaahua mwia nrutu

rieqatama mwiva nraahu tiri kyaahaqa hiarivave

tivarave, tura.

(Aisaiaa 42:1-4)

Kotiva mwitaa tiho timwa kyero haaru Aisaiaava mwitaa tura.

Vaana mwihua vunyaava Iesusira kyaahaqa hi variho tura

(Maaki 3:20-30; Ruku 11:14-23, 12:10)

²² Iesusiva varuvata mpo uhua vaisi mpo vita vareta nrunra. Vaanavanto mwia utaqi varuvarora tiro, mwi vaisiva vu qipa vuva variqaro hia quavata tiraitiro varuvaro Iesusiva mwia kyugemä kyovaro mwi vaisiva qio taqevaro qio quavata ti varvara.

²³ Mwitaa huvata nraakye qora mwini varuhua mwi kyaiqara taqeta nrihanrama vita Iesusirara tiqata, Qikye, Ntevitira mwaaquvanto qovara hiariva mwaa mwi vaisivave iho? tita.

²⁴ Mwihua mwitaa tuvata Parisi vaisinramwuyanto mwi quara rieta qaqaqo tita, Pierisepuriva vaana vunyaava Iesusira kyaahaqa hi variharora tiro, mwiva qio vaana site varihata nritareta vi variavo, tita.

²⁵ Parisi vaisinramwuyanto mwitaa ti varuvaro Iesusiva mwihua su nyaato tura ntapihi kyero mwihuarara tiqaro, Kuua mwatanaa variqaro tuyakyma viro nai ri nai ri hi variariva qamwanramama taiqa quananrove. Ta mwatanaavave, ta mwatukyaraqinaavave, ta nraamwunraqi varihuave mwitaa hivera, mwihua qamwanrama taiqa vivarave.

²⁶ Saataaniva ntaqikyi variari vaanahua utaqa ntainra vita nai ri nai ri hivera, nataama kyeroive Saataaniva mwihuaqaa ntaqikyiqiro vi variraro kepukyaqama vahiananrove.

²⁷ Nkye nianra tiqata, Pierisepuriva mwia kepukyaqama kyaiharora tiro, mwiva vaana site varivave. Nianra mwi quava quataa vahirera, mpo tava nkyl vaisi mponramwu kyaahaqa hi varihatave mwihuaavata vaana site

variavo? Nkye nianra qia quarara nkyi sataqita nrohi varia vaisihuama unra quave tivarave. Nkyi sataqita nrohi varia vaisihua ti quava nkyi tu varaananrove.

²⁸ Kotira mwanraquravanto ni kepukyaqama kyaihana nte vaana site varuquo. Mwi quava qutaa qua vahirara tita, nkye mwianra rieqatama Kotiva tiriqaa ntaqikyiyari entava nri ntaiho qiate.

²⁹ Qaiqaavata nkyi timwa nyinrenrave. Nraamwu qova kepukya vaisivanto variraro mpuara vaisivanto hia mwia rupataraitiro, mwia nraamwuqtairo hia qio mpuara varaananrove.

³⁰ Hia nivatama kyero variariva, mwi vaisiva ni nramwutaama variananrove. Mpovanto ni sipisipi hia nyaanrama kuaaqa mataariva varirera, mwi vaisiva ni sipisipi sataqiro uro mpona mpona raupirima kyaarivama variananrove.

³¹ Mwianra rieqanama nte nkyi timwa nyuqo. Nraakye qoravanto uaqia hi kyaiqara mpo qara mpo qara hianinra utirave, uaqia hi quara mpo qara mpo qarama kye mpohuara tirave, Kotiva ekyaa mwi quara nruka nyaterovata vaisivanto Kotira mwanraqurara uaqia hi quara qianinra hiama nruka mwataananrove.

³² Vaisi mpovanto ni mwatani mwatatai nraaqiarara uaqia hi quara tirera, Kotiva mwi vaisira qua nruka mwataananrove. Vaisi mpovanto Kotira mwanraqurara uaqia hi quara tirera, Kotiva mwaa entaravata, nraakiaravata, hia mwi vaisira qua nruka mwataananrove.

*Uaqia hi kyatariva uaqia hi tamwanra nraahu riairave, tura
(Ruku 6:43-45)*

³³ Kyatarivanto kyuqe kyatari vahirera, kyuqe tamwa riaananrove. Uaqia hiari kyatariva vahirera, uaqia hi tamwanra riaananrove. Vaisivanto kyatari tamwa mwia taqeqaro mwi kyatarirara kyuqe kyatarive, uaqia hi kyatarirave, qiananrove.

³⁴ Nkye quaiha uaqia hira nraaqarama variavo. Nkye uaqia hia vaisihua variqata nkye nataama kyetave kyuqe qua tivarave? Mwia mwutukyavive mwia nraatoqive mpo inraikya varaariva vaiharo nrovanto timwa qovara Hirave.

³⁵ Vaisi kyuqeva nai qiataqitairove vu nraatoqitairove kyuqe kyaiqa varaariva vaiharora tiro, mwiva kyuqe kyaiqa nraahu vare varirave. Uaqia hi vaisiva nai qiataqitairove vu nraatoqitairove uaqia hi kyaiqara utuariva vaiharora tiro, mwiva uaqia hi kyaiqara uti varirave.

³⁶ Nte qianinra riaate. Nraakiara ekyara entaqa Kotiva ko tigaroma mwaa entara nkye mpo qua mpo qua qumina qua ti varirara rieqaroma Kotiva nkyiara nkye nanraqamave mwi quara mwatani varu entara turave, qiananrove.

³⁷ Nkye mwaa entara kyuqe qua nraahu timwaqita vivera, mwi entara nkyita quavanto nkyi huvantu nyataananrove. Nkye mwaa entara uaqia hi quara timwaqita vivera, mwi entara nkyita quavanto nkyita rupaananrove, tiro. Iesusiva turama.

*Nronra kyaiqa tinraamwutaante tura
(Maaki 8:11-12; Ruku 11:29-32)*

³⁸ Iesusiva mwitaa timwa kyero varuvata Parisi vaisi hininramwuwata, mwaanra okyara ti varu vaisihuavata, Iesusirara tigata, Mwaanra ti variara vaisio, nronra kyaiqa tirinramwu tivuqaa varairaqtama tire i okyara taqetama quitaama e Kotiva titaihara tumuanra vaisiva variaro qiae, tita.

³⁹ Mwinramwuhua mwitaa tuvaro Iesusiva tigaro, Uaqia hi kyaiqara nraahu uti variahuate, Kotirara qumimaqama kyeqata nrohi variahuate,

mwitaa hiahuama nronra kyaiqa tinraamwutairaqeta quataave qiare ti variarave. Hia nte nkyi suqaa nronra kyaiqa vararerave. Kotiva haaru nkyi haivaqara poropeti vaisi Ionaanra mwitaama kyontema kyero Kotiva nivata mwitaa hiananrove. Mwianra rieqatama nkye nianra Kotiva tittaivave tivarave.

⁴⁰ Tavukya nronravanto mwia atahu kyovaro Ionaava taarampo enta entaqivata iheravata tavukya vikyokyaqi varurave. Kuua qarama kyena ntevata mwatani mwatatai nraaqiarava taarampo enta mwata utaqi variqina quaninrave.

⁴¹ Ionaava taarampo enta tavukya vikyokyaqi variro mwiaqatairo uro Niniveqi varuhua Kotira qua timwa nyuvata mwi mwatanaahua qamwanrama kyeta mwia qua rieta uaquia hu aanranra qaqlira kyeta varurave. Nraakiara ekyara entaqaa mwi mwatanaahua Kotiravatama kyeta variqata nkyiqa qua vateqata mwitaama tivarave, Tire Ionaanra qua rieqatama uaquia hi aanranra qaqlira kyaavanaranrave. Ionaanra nraatara kyo vaisiva nkye varunani uro ntovata nkye hia mwia qua riorave, tivarave.

⁴² Haaru vetato entaqaa nkyi haivaqava Soromoniva mpo okyara mpo okyara taqe varuva varuvaro vunyaa nraakye mpovanto mwia qua riarerovevara nai nyianra taisairo uro Soromoninra qua riorave. Mwi nraakyeva mwitaa hurara tiro, mwivavata nraakiara ekyara entaqaa nkyiqa qua vateqaro mwitaama qiananrove. Nte nyianrasaina Soromoninra qua riarerana nriavarave. Nkye haaru varuvaro Soromoninra nraatara kyo vaisiva varuvata nkye hia mwia qua riorave, qiananrove, tiro. Jesusiva turama.

Vaana okyarara tura

(Ruku 11:24-26)

⁴³ Jesusiva mwitaa timwa kyero tiqaro, Vaanavanto vaisi utaqitairo nritarero quariva aahara mwataqaa viqaro kyai nte ho hiankye timwa kyero taqairaro hia ho hiariva vahiraro

⁴⁴ mwiva nai tiqaro, Kyai nte nrumu ntantena vaakya qaqlira kyau nraamwunra vaisi utaqi uro qaiqaa variqinye, timwa kyero uro taqaiharo mwi nraamwuvu qumina valharo ntupi kyero hiqama kyero avuqavuma taiva vahirave.

⁴⁵ Mwiaqatairo vaana mwiva uro nai hena vaana 7 nramwu nai mwiavata nraatara kyeta uaquia hi kyaiqara uti variahua nyaanrama kyero sita varero uro mwi vaisira utaqi varirave. Nraakiara mwi vaisiva vaana airi kyapata variqaro anomia kyero uaqiamma viro varirarama tuqo. Mwaa entaravata uaquia hi kyaiqara uti varihua, mwihuavata uaqiamma vita variravare, tiro.

Iesusira nrovavata mwia qatanramwuvata mwia taqarerata nrunra

(Maaki 3:31-35; Ruku 8:19-21)

⁴⁶ Jesusiva mwi quara nraakye qora timwa nyi varuvata mwia nrovavata mwia qatanramwuvata nri nteta mwia qua timwa mwinrenrata mwaatani sivita varuvaro

⁴⁷ mpovanto Jesusira uro timwa mwinro tiqaro, I nrohua qata i qua timwa mwinrenrata nrumu mwaataqa variavo, tiro.

⁴⁸ Mwiva mwitaa tuvaro Jesusiva tiqaro, Tahuave ni nrohua kata pakyyaa variavo? tiro.

⁴⁹ Mwitaa timwa kyero Jesusiva nai nraaqiara mwinramwuhuaqa kyaqu tutiro tiqaro, Mwaahuama ni nrohua kata pakyyaa variavo.

⁵⁰ Ni kova nyaamwuni varirava mwia qua rieqata nrohi variahua, mwihuama ni kata pakyyaa, ni nunra nakyaa, ni nrohua variavo, tiro.

13

Kyara humwu isaqiro vuraqa ntumwa kyero tura

(Maaki 4:1-9; Ruku 8:4-8)

1 Kuua mwi entara Iesusiva nraamwu mwiqitairo veva ntero uro kyaar-era tokyasataa mwatakyaa viro mwini variankye tuvata

2 nraakyе qora airivanto ntuvantuama vita mwia ututuma tovarora tiro, mwiva qaqira kyero uro mpotuqi mwaanri ntero mwipi mwatakyaa viro nramanriqa varuvata nraakyе qoravanto nramanri tokyasataa varuvaro

3 Iesusiva mpo qua mpo quaqua ntumwa kyeqaro timwa nyunra. Mwiva mwitaama tiro:

Vaisi mpovanto kyara humwu isarero vurave.

4 Mwiva kyara humwu isaqiro vuvaro mpo huva aanra tokyani tumu ntuvarto nyaamwavanto nrumu nramwa kyorave.

5 Mpo huva ori mwataqaa tumu ntuvoro mwatavanto hia vevatoqama vahu mwatava vahuvorа tiro, tumu ntiro qamwanrama qupiqa vuваро

6 huarivanto nri ntero iteqaro aaharama kyovaro mwia tuqvavento hia mwataqи vevato vuvara tiro, aaharama vurave.

7 Mwitaa huvaro mpo huva uakukya uvi auquqahuva qupiqoraqи tumu ntiro uakukyavatama kyero qupiqa vuvaro uakukyavanto ntumwaqu kyovaro hia tamwa riorave.

8 Mwitaa huvaro kyara humwu hinivanto kyuqe hu mwataqaa tumu ntiro kyuqema kyero qupiqeqaro uro kyuqe tamwa airi riemwa torave. Airi riemwa tovaro mpo huva mwiavata nraatara kyero mpoqiaavata riemwa tovaro qaiqaa mpo huva mwiavata nai nraatara kyero nronraqama kyero riemwa torave.

9 Nkyi nyaato vahirera, mwi quara okyara ntapihi kyeta riaate, tiro.

Mpo quaqua ntumwa kyeqaro timwa nyunra mwia okyara tura

(Maaki 4:10-12; Ruku 8:9-10)

10 Iesusiva mwi quaraqaa ntumwa kyero timwa nyuvata mwia nraaqiaranramwuvanto mwiva hunani nri nteta mwia ntumwahiamwa hita tiqata, E nanraqamave nraakyе qora hia qua vutu kye timwa nyinraitira, mpo quaqua ntumwa kyeqara timwa nyi variaro? tita.

11 Mwihua mwitaa tuvaro Iesusiva timwa nyinro tiqaro, Kotiva nraakyе qoraqaa ntaqikyiani quara uqetatai quara, mwi quara nkyiara mwihua qati kyairata mwi quara okyara riaate timwa kyero, qumina nraakyе qorara hia mwi quara riaate turave. Mwitaa turara tina, nte mpo quaqua ntumwa kyeqana mwihua timwa nyi varuqo.

12 Kotira qua riaariva variqiro viraro Kotiva mwia kyaahaga hiraro mwia qua mpoqiaavata riaarive. Mwiva mwitaamaqiro viqaro Kotira qua mpoqiaavata riaananrove. Kotira qua hia riaariva variqiro viraro mwiaqatairo pataqia tutaaninra mwia ntavihikye varairaro mwiva qumina variananrove.

13 Nraakyе qoravanto taqeqatavata hia ntapihi kyeta taqe variarave.

Mwihua qua rieqatavata hia ntapihi kyeta riaarave.

Mwihua mwitaa hiarara tina, nte mpo quaqua ntumwa kyeqana mwihua timwa nyi varurave.

14 Nraakyе qoravanto mwitaa hi variarara tiro, haaru vetato entaqaa Aisaiaava Kotira qua qovarama kyo quava mwaa entara mwivauma vahiro. Mwiva mwataama tiro:

Mwaa mwatanaahua su nyaatovanto qumimaqama vihatara tita, mwihua qua riemwaqita viqatavata hia qua ntapihi riaarave. Mwihua taqamwaqita viqatavata

hia ntapihi kyeta taqaarave.

15 Mwihua su nyaato mwutukyavanto kepukaqama vihata mwihua nkyiari nyaato titateta nkyiari su qipateta variarave. Mwihua hia mwitaa hiraita, mwihua nkyiari suqotaita taqeqlata nkyiari nyaatoqotaita rieqata ni qua ntapihi kyeta rieqata uaqia hi aanranra qaqlira kyaivaqenavauma nte mwihua kyugema kyaaninrave, turave.

(Aisaiiaa 6:9-10)

Aisaiaava Kotiva mwitaama tiho, turave.

16 Qio, nkyenramwu vuqotaita kyugema kyeta taqe variqata nraatoqo kyugema kye rie variarara tita, nkye qamwateqatama varivarave.

17 Haaru vetato entaqaa poropeti vaisivantove, kyugema kyeta nraahu kyuge aanraqaa nrohi varu vaisihuave, mwihua nkye mate taqaa inraikyara taqaare tura hia taqorave. Mwihua nkye mate riaa quara riaare tura hia riorave, tiro.

Kyara humwu isaqiro vura mwia okyara tura

(Maaki 4:13-20; Ruku 8:11-15)

18 Mwitaa timwa kyero Jesusiva nai nraaqiaranramwu timwa nyinro tiqaro, Nkyenramwu rie varivaqena nte kyara humwu isaqiro vu vaisir-aqaa ntumwa kyena timwa nyu quara, mwi quara okyara nkyi timwa nyankye.

19 Kotiva nraakye qoraqaa ntaqikyiani quara, vaisi mpovanto mwi quara hia ntapihi kyero riariaitiro variharo Saataaniva nri ntero mwia mwutukya vu nraatoqitairo mwi quara ntavihi kyero varairave. Mwi vaisiva kyara humwuvanto aanra tokyani tumu ntira votima kyeroma variho.

20 Kyara humwu mpo huva ori mwataqaa tumu ntu okyarava vahirero mwataamama vahiro. Vaisi mpo hiahua Kotira qua rieta, mwi quarara qamwata kyeta variavaro

21 quavanto hia mwihua mwutukyagi tuqa tuta kyero vahata mwihua hia mpuahaama variqata mwi quara rieta. Mwi quara kyaara mwihua uaqiamma nyatarera uti variavata mwihua tiri rivorave timwa kyeta Kotira qua qamwanrama kyeta qaqlira kyaarave.

22 Kyara humwu mponramwuvanto uakukya uvi auqu vahuraqi tumu ntova mwia okyaravanto vahirero mwataamama vahiro: Mpo hiahua Kotira qua rieta mwiaqaataita mwihua mwatanya inraikyara nron-raqama kyeta rieqata munimanrave mpo inraikya mpo inraikyara qamwateqata mwia varerara nraahu nronraqama kyeta riemwaqita viqata Kotira qua qaqlira kyaavarao Kotira quavanto hia mwihuaqi vahiqiro virave.

23 Kyara humwu mponramwuvanto kyuge hu mwatararaqua tumu ntura okyaravanto vahirero mwataamama vahiro: Mpo hiahua Kotira qua ntapihi kyeta rieta mwiaqaataita mwihua Kotira qua riemwaqita viqata kyuge kyaiqa Kotirani varaqita vi variavata mpohua Kotira qua riemwaqita viqata mwihuaavata nraatara kyeta mpohua Kotira qua riemwaqita viqata mwihuaavata nraatara kyeta Kotira kyaiqa varaarave, tiro. Jesusiva mwitaa turama.

Uaqia hi humwunravata uiti humwu hisatoraqi hisorara tura

24 Jesusiva variqaro mpo quaqaa ntumwa kyero nraakye qora timwa nyinro tiqaro, Kotiva nraakye qoraqaa ntaqikyiariva vahirero mwaa quara votima kyero vaiho. Vaisi mpovanto kyuge humwu uiti humwu nai utaqi isorave.

25 Isatovata ekyahua entaqi vaita vita hia taqovaro mwia nramwutaa mpovanto nri ntero uiti isatoraqi uakukyavata isatorave. (Mwi uakukyava

vahirero mwia vekyavata mwanrevata uiti voti iharo mwia tamwa nraahu hia kuua qara hirave.) Mwia nramwutaavanto uaqia hi humwunra isatero vuvaro

26 uitivanto uakukya vatama kyero kuaaqi quipigero qauma tamwa riarero utuvata mwia kyaiqa vaisinramwuvanto taqovaro mwi uakukyava uiti vatama kyero quipigero vahurave.

27 Taqeta mwia kyaiqa vaisinramwuvanto uro aakyo qora kyapara hita tiqata, Nronrao, e kyuge humwu isataananrave iho? Taisairove mwi uakukyava qovarama viho? tita.

28 Mwitaa tuvaro aakyo qova tiqaro, Qikye, ni nramwutaa mpovanto uakukya ni utaqi isataiho, tuvata mwia kyaiqa vaisinramwuvanto mwia kyapara hita tiqata, Qiove tire uro mwi uakukyara ntaru kyaananrave? tuvaro

29 mwiva qaqao tiro, Hia uakukya mwia ntaru kyaate. Nkye uakukya ntariqata uiti vatama kyeta ntaru kyevorave.

30 Qati kyaivarо uitivantovata uakukyavantovata kuaaqi quipigaarive. Utivant pеqаqama viraqe nte ni kyara vantu vareqata nria vaisihuara mwitaama qianinrave, Nkye mwi uakukyara nraante teqa kye rupa kyeta varaqi uro qia quara tetama mwiaqaaataitama uiti teqa kyeta varaqita ni kyara nraamwuqi uro mataate, qianinrave, turave, tiro. Iesusiva mwi quaraqaa ntumwa kyero timwa nyunra.

Maasiteti uruqaa ntumwa kyero timwa nyu quara

(Maaki 4:30-32; Ruku 13:18-19)

31 Iesusiva variqaro nraakye qora mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiani quava mwaa quara votima kyeroma vaiho. Mwiva maasiteti uru votima kyeroma vaiho. Vaisivanta maasiteti uru varaqiro uro nai utaqi vara tutorave.

32 Mwia uru mwiva pata uapaaqiani vahirave. Mwia vara tutaiharo quipigero kyatari nronraqama viro hini kyaravata nraatara kyero kyatari nronra vaiharo nyaamwavanto mwia kyaaraqi nraamwu hoqateta variarave, tura. Iesusiva mwi quaraqaa ntumwa kyero timwa nyunra.

Taupatairaqaa ntumwa kyero timwa nyu quara

(Ruku 13:20-21)

33 Iesusiva variqaro nraakye qora mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiari quava mwaa quara votima kyeroma vaiho. Mwiva taupataira votima hirave. Nraakyevanto mpereti utarerа hiqaro uiti parauaa vara kyero mwia kyotaarive tiro taupataira vara kyero parauaa vatama kyero tuqasaa kyaiharo taupataiva utaqi vaiharo mperetivanto uqenra viro kyota virave, tiro. Iesusiva mwi quaraqaa ntumwa kyero timwa nyunra.

Iesusiva nraakye qora mpo quaqaa ntumwa kyeqaro timwa nyu quara okyarara tura

(Maaki 4:33-34)

34 Iesusiva nraakye qora mpo qua mpo qua timwa nyinrenro mwiva hia vutu kyero timwa nyinraitiro, mwiva mpo quaqaa ntumwa kyeqaro nraahu timwa nyiqiro vura.

35 Mwiva mwitaa timwaqiro vuvaro haaru vetato entaqaa poropetivanto tu quava quataa mwivau vahura. Mwi quava mwataama tiro:
Nte nraakye qora qua timwa nyinrenra hina
hia vutu kyena timwa nyinraitina,
mpo quaqaa ntumwa kyeqana timwa nyinrenrave.
Mwaa mwatara ututo entaraqatairo qua uqeta kyero

vataqiro vi quara hia riaara nte mwi quara okyara
nkyi timwa nyinrenrave, tura.

(Ihi 78:2)

Uaqia hi humwunra uiti isatoraqi hisora okyarara tura

36 Iesusiva mpo quaqaa mpo quaqaa ntumwa kyero timwa nyiqiro viro mwiaqaatairo mwiva nraakye qora mwini kyero nraamwuqi vuvata mwia nraaqiaranramwuvanto mwiva varuraqi uro nteta Iesusirara tiqata, Vaakya qiana quara mwia nramwutaavanto uakukya mwia utaqi ísato quara mwi quara okyara tiri timwa timwinraqe riaare, tita.

37 Mwia nraaqiaranramwuvanto mwitaa tuvaro Iesusiva mwinramwuhua timwa nyinro tiqaro, Vaisi mpovanto kyuqe humwu isai vaisirara tura nte mwatani mwatatai nraaqiarava nte mwaa mwivave.

38 Vaisi mwia aakyo okyaravanto vahirero ekyaa mwaa mwatavama vaiho. Kyuqe humwu mwia okyaravanto vahirero Kotira qua riaa nraakye qorahuama variavo. Uakukya mwia okyaravanto vahirero hia Kotira qua riaa nraakye qorahua Saataaninra nraaqiarama variavo.

39 Mwia nramwutaavanto uakukya humwu isato vaisira okyaravanto vahirero mwiva Saataanivave. Kyara vantu vareta nru entara okyaravanto vahirero nraakiara mwaa mwatava taiqaani entavama vaiho. Kyara vantu vareta nru vaisihua okyaravanto vahirero mwihua nyaamwunyaayaaisinramwuve.

40 Mwia kyaiqa vaisinramwuvanto uakukya teqa kye rupa kyeta varaqi uro qiaqi quará tontema kyero, nraakiara mwaa mwatava taiqaani entaraqaa mwitaa hiananrove.

41 Nte mwatani mwatatai nraaqiarava variqi vina mwaa mwatava taiqaani entaraqaa nte nyaamwunyaahua sitaarita mwihua uto nte ntaqikyu mwataraqataita hia kyuqe nraakye qora ni nraaqiaranramwu uaqiamma nyate varihuavata, ekyaa uaqia hi kyaiqara uti varihuavata, rupaqita

42 qia nronra itaaninraqi tuto kyaivata mwihua qiaqi variqa atura ntiqata ntataqi viqata nkyiari anrai teti nreqata varivarave.

43 Mwihua mwini uro tuto kyaivata avuqavuma kyeta nrohi vari nraakye qorahua huarivanto itaintema kyeta itamwaqi vivaro Kotiva mwihua sova mwihuaqaa ntaqikyiqiro virata variqi vivarave. Nkyi nyaato vahirera, mwi quara okyara ntapihi kyeta riaate, tiro. Iesusiva mwitaa turama.

Nronra munima vahu inraikyara mwataqi tuqetato quaraqaa ntumwa kyero tura

44 Iesusiva mpo quaqaa ntumwa kyero nraakye qora timwa nyinro tiqaro, Kotiva nraakye qoraqaa ntaqikyiariva mwaa quara votima kyeroma vaiho. Mwiva nronra munima vahi inraikyara uqeta taira votima kyeroma vaiho. Mwataqi mwi inraikyara uqeta taiva vaharo vaisi mpovanto mwia puaama kye taqero, mwiaqaatairo mwiva qamwata kyero mwi inraikyara qaiqaa uqeta tero uro mwi mwatara kyoqaa hiankye timwa kyero mwiva ekyaa nai vatai inraikyara nyinro munima vara kyero uro mwi mwatara kyoqama kyero varero uro nronra munima vahi inraikyara uqeta taira mwiaavata varairave, tiro.

Kyau mwukyaari voti hiraqaa ntumwa kyero timwa nyu quara

45 Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kotiva nraakye qoraqaa ntaqikyiariva mwaa quara votima kyeroma vaiho. Vaisi mpovanto kyau mwukyaari voti hira kyoqaa hirero mpo mwatukya mpo mwatukya puaahi vari vaisira votima kyeroma vaiho.

46 Mwi vaisiva nronra munima vahira mwi inraikyara puaama kyero uro nai vatai inraikyara mpohua nyinro munima varaqiro uro mwia vatai vaisira mwinro kyau mwukyaari voti hira nronra munima vahira mwia varairave, tiro.

Vaheqaa ntumwa kyero timwa nyu quara

47 Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kotiva nraakye qoraqaa ntaqikylariva mwaa quara votima kyeroma vaiho. Vaisivanto vahe nramanri nronraqi mpiami kyaavata tavukya airi mpo qara mpo qara hiahua mwipi viqetaa quara votima kyeroma vaiho. Vahe nramanri nronraqi mpiami kyaavata tavukya airivanto mwipi viqeteta

48 piqavita variavata vaisivanto vahe mwia ntanrauqita uro nramanri tokyani kyeta mwipitai tukyama kyeta tavukya kyuqe hiahua vara kyeta mpo tuaqi ntumwa teta uaquia hiahua vara kyeta qaqira kyaarave.

49 Nraakiara ekyaara entaqaa mwia votima kyero vahiananrove. Mwi entara nyaamwunyaahua tumu nteta nraakye qora tukyama kyeta ntapihi kyeta nrohi varihua qati kyeta, uaquia hi kyaiqara uti vari nraakye qorahua

50 sitaqita uro qia nronra itaaninraqi tuto kyaivata mwihua mwipi variqata atura ntita ntateqata nkyiari aanrai kutiqata varivarave, tiro.

51 Iesusiva mwitaa timwa kyero nai nraaqiaranramwu kyapara hiro tiqaro, Nkye mwi quara mwi quara nkyi timwa nyunra ntapihi kyetave riaavo? tuvata mwinramwuhua eo tuvaro

52 mwiva mwinramwuhua timwa nyinro tiqaro, Kotira haaruua qua okyara timwa nyi vari vaisihuaitairo mpovanto Kotiva nraakye qoraqaa ntaqikyiani quararavata quitaave timwa kyero Kotira nraaqiaraqama quariva, mwi vaisiva nraamwu mpo qova votima kyeroma variro. Mwi vaisiva nai nraamwuqi mpo inraikya mpo inraikya vatairaqitairo haaruua inraikya kyuqe inraikyavata, qaraakya inraikya kyuqe inraikyavata, vare varirave, tiro.

Nasaretinaahua Jesusira qoririma mwatora

(Maaki 6:1-6; Ruku 4:16-30)

53 Iesusiva nraakye qora mpo qua mpo quaqaa ntumwa kyeqaro timwa nyi taiqa kyero mwiva mwi mwatukyara kyero

54 nai mwaatani nrumu ntantero uro mwaanra nraamwuqi variqaro mpo qua mpo qua timwa nyuvata nraakye qoravanto nrihanrama vita tiqata, Qikye, mwi vaisiva taisairove mwi quara mwi quara kyuqe qua raiho? Tava mwia kepukya mwihanrove mwiva nronra kyaiqa vare variho? tita.

55 Mwihua mwitaa timwa kyeta qaqao tita, Mwi vaisiva nraamwu hoqe vari vaisira mwaqvantomava variho. Mariaava mwia nrovama variho. Lemisivavata, Iosepivavata, Saimonivavata, Iutaasivavata, mwinramwuhua mwia qatanramwuma variavo.

56 Mwia nrurranramwu mwaini tirivata variavo. Taisairo mwiva mwi kyaiqara mwi kyaiqara okyara taqairave? tita.

57 Mwitaa timwa kyeta mwihua Iesusirara tiqata, Mwiva hia nronra vaisive. Mwiva qumina mwaa mwatanaava nraahuma variho, timwa kyeta mwia qoririma mwatora.

Mwihua mwitaa tuvaro Iesusiva mwihua timwa nyinro tiqaro, Poropeti vaisivanto mpo mwatani iro variraro mwi mwatanaava mwianra nronra vaisive tiroma mwianra qamwata mwataananrove. Mwi vaisiva nai mwaatani uro nai nramwunaahua vatama kyero varirata mwia nramwunaahua mwianra qumina vaisima tiri votima kyero nraahuma variho tivarave, tiro.

58 Jesusiva mwitaa timwa kyero mwi mwatanaahua mwianra qumina vaisivanto hia tiri qio kyaahaqa hiarivave turara tiro, Jesusiva mwini variqaro nronra kyaiqa pataqiatana nraahu vara nyatora.

14

Ioninra nramanri nyi varu vaisira ru kyora (Maaki 6:14-29; Ruku 3:19-20, 9:7-9)

1 Mwi entara Herotiva vunyaa vaisivanto Kaririqaa ntaqikyi variqaro nraakye qoravanto Iesusirara ti varu quara riora.

2 Riero Herotiva nai kyaiqa vaisiara tiqaro, Qikye, mwi vaisiva Ionivave. Ioniva nramanri nyi varu vaisiva qutu vuraqitairo qaiqaa qati siviro nrohi variho. Mwiva qaiqaa qati siviro nrohiqarora tiro, mwiva nronra kyaiqa qio vare variho, tiro.

3-4 Tauraaqama Herotiva nai qata Piripira nraata Herotinamainra varero varuvaro Ioniva Herotira timwa mwinro tiqaro, E ena qata nraata hia varaataara vaharama varaaro, tuvaro mwi quara kyaara Herotiva vaisi mpo titovaro Ioninra ntavaaqavu kyero mwia rupaqiro nrumu karavuqi kyora.

5 Herotiva Ioninra ru kyaataa huvaro nraakyе qora nraatu aatu hiqaro hia mwia ru kyora. Nraakyе qora Ioninranra poropeti vaisivantove tuvarora tiro, Herotiva nte mwia rukyaarita ni inronra hivorave timwa kyero varura.

6 Mwitaamaqi viro Herotiva nai mwato entava qovara huvaro mwi entaraqaa vaisi mponramwuanra aakyara ntovata nrita ntuvantua ma vuvaro Herotinamainra nraamwunravanto mwihua ihi ntamwa nyatovaro Herotiva mwia taqero mpoqama kyero qamwata mwatero

7 nai kyauqu nriqiqaa vatero tiqaro, Nanra inraikyarave i mwutukya vahianinra ni timwa mpiraqe i mwiankye, tiro.

8 Mwitaa tuvaro mwi mwanraatava nai nronra kyapara huvaro mwia nrova mwi quara qianta tuvaro mwi mwanraatava Herotirara tiqaro, Ioniva nramanri nyi vari vaisira mwia qiata taanuqa vatera varaqira nrumu ni mpiante, tiro.

9 Mwitaa tuvaro Herotiva vunyavaa varuvaro mwia mwutukyavanto uaqia huvaro variqaro mwiva vaakya kyauqu nriqiqaa vateqaro kyara nranrenrata nrumu varu vaisihua suqaa timwa to quarara rieqaro mwiva vaisi mpo titero mwi mwanraatava tintema kyera mwitaa hiante tuvaro

10 mwi vaisiva uro karavuqitairo Ioninra nrunta pehi kyero

11 Ioninra qiata taanuqa vatero varaqiro uro mwi mwanraatara mwuvaro mwiva nai nronra uro mwunrama.

12 Ioninra vataqi nrohu vaisihua nrumu Ioninra mwamwanta varaqita uto quntamwa teta mwiaqaataita mwihua uro Iesusira timwa mwunra.

Iesusiva kyara airiqama kyero 5,000 vaisi nyunra (Maaki 6:31-44; Ruku 9:10-17; Ioni 6:1-13)

13 Ioninranra Iesusira uro timwa mwuvaro Iesusiva mwi quara riero mwini kyero mpotuqi mwaanri ntero nai nraaqiaranramwu kyapata nkyiariaraa varirerata hia vaisi varunani uvata nraakyе qora airivanto mwihua vu quara rieta mpo mwatukya mpo mwatukyaitaita mwihua mwatantuna Iesusira vataqita vura.

14 Vuvaro Iesusiva mpotuqi nramanriqaa vuva uro ntero taqovata nraakyе qora airivanto ntuvantua vita varuvaro mwiva mwihua po kye timwa nyatero mwihuaqitairo nriqa vu nraakyе qorahua kyuqema nyatora.

15 Iesusiva mwini varuvaro huarivanto tumi vuvata mwia nraaqiaranramwuvanto mwiva hunani uro nteta tiqata, Mwaini quminasatave. Enta hiankyorave. Nraakte qora mwaahua sitairata uro mwatukya vahianin-raqitaita kyara kyoqama kyeta nraate, tita.

16 Mwia nraaqiaranramwuvanto mwitaa tuvaro Iesusiva qaqao tiro, Hia mwihua sitaivata quate. Nkyetavanto mwihua kyara nyivata nraate, tiro.

17 Iesusiva mwitaa tuvata mwinramwuha qaqao tita. Tire taqauraro mwaini mpereti kyauquruvata tavukya taaratanaavata nraahuma vaiho, tita.

18 Mwihua mwitaa tuvaro Iesusiva mwi kyarara mwaini vara ni mpiae timwa kyero

19 nraakte qorara mwukyausata mwatakyaa vita variate timwa kyero mwiva mpereti kyauquruvata tavukya taaratanaavata vara kyero nyaamwuni taqebaro Kotirara kyuqeve timwa kyero mpereti nteqa kyero miwi kyarara nai nraaqiaranramwu nyuvata mwihua nraakte qora ekyaa tukyama kyeta nyuvata

20 mwihua ekyaa qio nronra. Ekyaa nraakte qoravanto qio nrovata mwiaqaataita mwia nraaqiaranramwuvanto ntutantuto tuara tua nronra vareta mwihua nreqata viti vaati kyo kyarara utu kyeta tua 12 nramwu piqa kyora.

21 Mwi entara vaisi nraahu 5,000 vanto nrovata nraakte nraaqiara airivantovata mwi kyarara nronra.

Iesusiva kyaareraqa kyuquqo ntamwaqiro vura

(Maaki 6:45-52; Ioni 6:16-21)

22 Iesusiva kyara nyitero mwiaqaatairo nai nraaqiaranramwu sitero tiqaro, Nkye mpotuqi mwaanri nteta kyaareraqaama teta hini tokyani nkye nraante vi varivaeq nte nraakte qora sitaarita nkyiari mwaatani mwaatani quate, tiro.

23 Mwitaa timwa kyero mwiva nraakte qora nkyiari mwaatani sitamwa kyero mwiaqaatairo Kotiravata qua tirero verara taaqiqaa vuvaro entama vuvaro mwiva mwini nanrianraa varura.

24 Varuvaro mpotuvanto nramanri utaqaa vuvaro toqavanto mwihua virera hunasairo nruvarora tiro, nramanrivanto mpotu ventaqiro vi varura.

25 Toqa ti varuvaro nramanrivanto mpotu ventaqiro vi varuvaro qaumakyaa qaataqarero huvaro Iesusiva kyaarerera mwutuqaa kyuquqo ntamwaqiro viro mwihua hunani vuvata

26 mwia nraaqiaranramwuvanto taqovaro mwiva kyaarerera mwutuqaa kyuquqo ntamwaqiro nruvata mwihua mpooqama kyero nyaatuqa tovata vaanave tiqata nronraqama kyeta aatu hi variqata qua aakyara nte varuvaro

27 Iesusiva qamwanrama kyero mwihuara tiqaro, Kepukyaqama kyeta qati variate. Ntema nruqo. Hia aatu hiate, tiro.

28 Iesusiva mwitaa tuvaro Pitaava tiqaro, Nronrao, qutaa e varirera, tiraqe ntevata kyaarerera mwutuqaa kyuqu ntamwaqina e hiananrani quankye, tiro.

29 Pitaava mwitaa tuvaro Iesusiva tiqaro, Qio nriante, tiro. Mwitaa tuvaro Pitaava mpotuqitairo mwaamwi ntero kyaarerera mwutuqaa kyuquqo ntamwaqiro Iesusiva hunani viro.

30 Mwiva mwini viqaroma qio quaninrave timwa kyero taqovaro toqavanto nronraqama kyero tuvaro mwianra rieqaro mwiva aatu hi varuvaro mwia kyuquvanto nramanriqi mwatanianra vi varuvaro mwiva Jesusirara aakyara ntero tiqaro, Nronrao, ni tu varante, tuvaro

³¹ Iesusiva qamwanrama nai kyauquqo viti kyero mwia tu varero tiqaro, E toqavanto tirara nraahu rieqara hiama nianra kepukyaqama kyera riaaro. Nanraqamave e taara nraato tutaaro? tiro.

³² Iesusiva mwitaa timwa kyero mwikyantiri mpotuqi mwaanri ntovaro toqavanto qamwanrama taiqa vura.

³³ Mwitaa huvata mwia nraaqiaranramwu mpotuqi varuhua Iesusirara qamwateqata mwahuta timwa mwateta tiqata, E quitaama Kotira mwaaquvanto variaro, tura.

*Kenesaretiqinaahua nriqa vuahua Iesusiva kyuqema nyatora
(Maaki 6:53-56)*

³⁴ Mwinramwuhua mwitaa timwa kyeta mpotuqi nramanriqaamateta Kenesaretini uro ntora.

³⁵ Uro ntovata mwi mwatanaahua Iesusira ntapihi kyeta taqeta qua vara kyovaro ekyaa mwia nraaqani vahu mwataraqi viro nrinro huvata ekyaa mwi mwatanaahua nriqa vu nraakyе qorahua sitaqita nrumu Iesusiva varunani kyetama

³⁶ Iesusirara po tita tiqata, Kyairata mwihua i vaaqa vitiqa kyaatu kyaivarao mwihua nyamwanta kyuqema quarive, tuvata Iesusira vaaqa vitiqa tu varohua kyuqema nraahu vura.

15

Kotiva timwa tai quava nraaquhua taatohua quavata nraatara kyairave tura

(Maaki 7:1-13)

¹ Parisi vaisinramwuvata, mwaanra okyara ti varu vaisihuavata, Iesusira taqarerata Ierusaremisa nri nteta Iesusira kyapara hita tiqata,

² Nanraqamave i nraaqiaranramwuvanto tiri haivaqahua timwa to quara nteqa kye variavo? I nraaqiaranramwuvanto hia kyauqu hiqaraitita, kyara nre variarave, tita.

³ Mwihua mwitaa tuvaro Iesusiva nkyiari timwa nyinro tiqaro, Nkye mpo, nanraqamave Kotiva vatai quara hia riaraitita, nkyeta qua nraahu riemwaqita vi variavo?

⁴ Kotiva mwitaama tiro: Ena nrohua qohua nrutu tuaahera nyataante, timwa kyero Kotiva qaiqaa tiqaro, Nai nronra qorara uaqia hi quara ti variani vaisira ru kyaate, turave.

⁵ Kotiva mwitaa timwa to quava vahata nkye mwi quara hia riaraitita, nkyeta riemwa kyeta nkye tiqata, Vaisi mpovanto nai nrohua qohuara tiqaro, Nte nkyitana kyaahaqaa hiqana nyinrenra hiani munimanra hia nkyitana nyinraitina, Kotira mwinrenrave, tirera,

⁶ mwi vaisiva qiomaa nai nrohua qohua qaqlira kyero hia mwitanahuqaqa ntaqikyiqiro quananrove, qiarave. Nkye unra qua timwa kyeqatama nkyi haivaqahua timwa to quara nraakyе qora timwa nyiqata nkye Kotira qua ru kyeta hiavo.

⁷ Nkye unraqama kyeqata kyuqe kyaiqa vare variahuate. Aisaiaava haaru variqaro nkyiara ntapihi kyero qua qara ntumwa torave. Aisaiaava Kotira qua qovarama kyeqaro Kotiva mwitaama tiho, tiro:

⁸ Mwaa mwatanaahua nroqitaita nraahu ni nutu tuaahere variavaro mwihua mwutukyavanto hia nianra vahata variarave.

⁹ Mwihua mwaanra tiqatama nkyiari nraaquhua qua nraahu timwa nyiqatara tita, mwihua quminama ni nutu tuaahere variavo, turave. *(Aisaia 29:13)* Aisaiaava haaru nkyiara mwitaa turave, tiro.

*Nanra inraikyavantove vaisi uaqlama kyaiharo hia kyotataqama viro varirave tura
(Maaki 7:14-23)*

10 Iesusiva mwitaa timwa kyero nraakye qora nyaanrama kyero mwi-huara tiqaro, Mwaa quara rieqatama ntapihi kyeta nraato tuate.

11 Vaisi nroqi viqete vari inraikyava hia mwia vara uaqlama kyairave. Mwia nroqitairo nrinte vari inraikyava mwi inraikyava mwia vara uaqlama kye varirave, tiro.

12 Iesusiva mwi quara timwa kyero varuvata mwia nraaqiaravanto mwiva humani uro nteta tiqata, E hiave ntapihi kyera hiaro? Parisi vainsinramwuvanto e vaakya timwa nyiana quara rieta uaquia hi quarave timwa kyeta hia mwianra qamwataavo, tita.

13 Mwihua mwitaa tuvaro Iesusiva tiqaro, Ni kova nyaamwuni variva taqairaro mwiva hia vara tuani inraikyava upiqairaro mwiva mwi inraikyara tuqa vatama kyero ntaru kyaananrove, tiro.

14 Mwitaa timwa kyero mwiva Parisi vainsiara tiqaro, Hia mwihuara nron-raqama kyeta riaate. Mwihua vu qipa vihata variahua hia aanra taqaraitita variqata vu qipa quahua kyaata mponramwuvata aanra nyaamwutarerata uti variahua've. Vu qipa quari vaisiva nai hena vu qipa quani vaisira aanra nraamwutankye qarinra mwitanahuaqama ontiqi ntuqutu vivarave, tiro.

15 Iesusiva mwitaa tuvaro Pitaava tiqaro, Vaakya nraakye qora mpo quaqaa ntumwa kyera timwa nyiana quara tiri timwa timwinraqe tire mwi quara okyara ntapihi kyeta riaare, tuvaro

16 Iesusiva tiqaro, Qikye, nkyevata mwinramwuhua votima kyeta hiave ntapihi riaavo?

17 Nkye hia ntapihiarave iho? Kyaravanto nroqima tero viva mwiaqatairo raraqi viro mwiqitairo qatinani tumi tarairave.

18 Vaisi mwutukyaqi vahi inraikyava nroqatairo qatinani nrintaiva, mwi inraikyava vaisi vara uaqlama kyairave.

19 Vaisi vu nraato mwutukyaqitairo uaquia hi inraikyarara riaiva nri varirave. Vaisi rukyaarivave, mpora nraatara nrohiarivave, api qaraqiro nrohiarivave, mpuara varaarivave, unra qiarivave, mpora nrutu mwatanai tumi quarive tiro unra qua qiarivave, mwiqitairo nri varirave.

20 Mwi inraikyava mwi inraikyava vu nraato mwutukyaqitairo nri ntero vaisi vara uaqlama kyaiharo Kotiva mwi vaisirara uaquia hi vaisirave tirave. Vaisivanto hia kyauqu hiqama kyero kyara nraanriva hia mwia vara uaqlama kyairaro Kotiva mwianra uaquia hi vaisirave qiananrove, tiro.

*Iesusiva mpo mwatanaa nraakye kyaahaqama mwatora
(Maaki 7:24-30)*

21 Iesusiva mwitaa timwa kyero mwi mwatarara kyero uro mpo mwataqaa mwatukya taaratana Taiaavata vahu mwataraqaa varura.

22 Mwini uro varuvaro mwi mwataraqanaa nraakye mpovanto Kenaani nraakyevanto Iesusiva varunani uro ntero Iesusirara nronraqama kyero aakyara ntero tiqaro, Nronrao, Ntevitira mwaquo, nianra po timwa mataante. Vaanavanto ni naamwunra utaqi variharo mwiva uaqlama kyero variho, tiro.

23 Mwi nraakyeva mwitaa tuvaro Iesusiva hia qua tiraitiro varuvata mwia nraaqiaranramwuvanto mwiva hunani uro vuavi raavira tita, tiqata, Mwi nraakyera kyaahaqama kyairaro quarive. Mwiva tiri tivataqiro nriqanro aakyara ntamwaqiro nrihanro tiri pupohama timwiho, tita.

24 Mwihua mwitaa tuvaro Jesusiva qaqao tiro, Isareri vaisivanto sipisipi votima kyeta raupirima quavaroo Kotiva ni titaihana nte mwi mwatanaahua nraahu kyaahaqama nyatarerana tumuvave, tiro.

25 Jesusiva mwitaa tuvaro mwi nraakyeva nrumu Jesusira vuqaa tumu ntiro variro tiqaro, Nronrao, qati ni kyaahaqama mataante, tuvaro

26 Jesusiva qaqao tiro, Nte nraaqiara kyara vara kyena vairivanto hinani kyaankyorave, tiro.

27 Jesusiva mpo quaqaa ntumwa kyero mwitaa tuvaro mwi nraakyeva tiqaro, Nronrao, vaisivanto kyara nreqanro viti vaati kyaira qati vairivanto nrainrave, tiro.

28 Nraakye mwiva mwitaa tuvaro Jesusiva tiqaro, E nraakye nianra kepukyaqama kyera riaaro. Nanra inraikyara i mwutukya vahiariva quataa qovara hiananrove, tiro. Jesusiva mwitaa tuvaro mate mwiqiara mwia nraamwunravanto kyuqema viro varura.

Jesusiva airi nraakye qora kyuqema nyatora

29 Jesusiva mwi mwatara kyero Karirini kyaarerera tokyasataa vuva uro taaqiqaan mwaanri ntero mwatakyaa viro varuvata

30 nraakye qora airivanto mwiva hunani vita. Mwihua kyuqu uaqjama vuhuave, vu qipa vuhuave, mwukyaari ntanrenra vuhuave, nro tita vuhuave, mpo qara mpo qarama kyero nriqa vuhuave, ekyaa mwihua sitaqita uro Jesusira kyuqutarasata kyovaro mwiva mwihua kyuqema nyatora.

31 Jesusiva mwihua kyuqema kyovata nraakye qoravanto taqovata nro tita vuhua qio qua tuvata, mwukyaari ntanrenra vuhua ntapihi varuvata, kyuqu uaqjama vuhua qati varuvata, vu qipa vuhua qati taqe varuvata, nraakye qoravanto mwihua taqeta vaimwateta kyuqu ntukikinraaqateta Kotira nrutu tuaahereta tiqata, Qikye, Kotiva kyuqema kyero Isareri vaisiqaan ntaqikyi variho, tura.

Jesusiva 4,000 vaisi kyara nyunra

(Maaki 8:1-10)

32 Jesusiva nai nraaqiaranramwu nyaanrama kyero tiqaro, Nte nraakye qora ntuvantuuma vita variahua nronraqama kyena po tuqo. Mwihua taarampo enta ni vatama kyeta variqi viqatama mwihua nkysiari kyara nramwa taiqa kyaavo. Nte mwihua nkysiari mwaatani sitaarita vivaro kyara nraataa hirata tantu vaantuantakyaan vivorave, tiro.

33 Jesusiva mwitaa tuvata mwia nraaqiaranramwuvanto tiqata, Mwaa qumina mwataqaave. Taisaita kyara vara kyetave mwihua nyiananrave? Nraakye qora airintima mwaini variavo, tita.

34 Mwihua mwitaa tuvaro Jesusiva mwihua kyapara hiro tiqaro, Nataama mperetive ntumwa taavo? tuvata mwihua tiqata, Mpereti 7 nramwu vahata tavukya pata mponramwuvata ntumwa tauro, tita.

35 Mwitaa tuvaro Jesusiva nraakye qorara mwatasata mwatakyaa quate timwa kyero

36 mpereti 7 nramwuvata tavukyavata vara kyero Kotirara kyuqeve timwa kyero mwi kyarara nteqa kyero tukyama kyero nai nraaqiaranramwu nyuvata mwihua vara kyeta nraakye qora nyuvata

37 ekyaa mwihua mwi kyarara qio nronra. Mwihua qio nrovata mwia nraaqiaranramwuvanto mwihua nretra viti vaati kyora utu kyeta ntutantu tuara 7 nramwu piqa kyora.

38 Mwi kyarara 4,000 vaisivanto nrovata nraakye nraaqiara airivantovata nronra.

39 Mwihua kyara nramwa kyovaro Jesusiva mwihua nkyiari mwaatani sitovata vuvaro mwiva mpotuqi mwaanri ntero Makataaninianra kyaaraqamaa tero vura.

16

*Nronra kyaiqa mpo tiri tinraamwutaante tura
(Maaki 8:11-13; Ruku 12:54-56)*

1 Jesusiva mwini vuwata Parisi vaisinramwuvantovata, Saitiusi vaisinramwuvantovata, Jesusiva varunani uro nteta kyai mwia mwataara hiqata taqaare timwa kyeta Jesusirara tiqata, E tiri tivuqaa nronra kyaiqa mpo tinraamwutairaqeta tire mwia taqetama tire iara tiqata quataama Kotiva mwia titaiharo tumivave qiare, tita.

2 Mwihua mwitaa tuvaro Jesusiva mwihua timwa nyinro tiqaro, Nkye taqaavararo enraihanro vuhero vehohaara utihata nkye tiqata hura vuhaananrove qiarave.

3 Nkye toqaqi taqaavararo nyaamwuqi kyokira rutaihata mate vati ntuananrove qiarave. Nkye nyaamwuqi taqegetama huari itaani okyararave, vati ntuanii okyararave, ntapihi taqegetama nkye nanraqamave mwaa entara qovara hiani okyarara hia ntapihiavo?

4 Uaqia hi kyaiqara nraahu uti varia vaisihua Kotirara qumimaqama kyeta api nrohi variahuama nronra kyaiqa tinraamwutairaqeta i okyarara quataave qiare ti variavo. Hia nte ntena okyara mwihua nyaamwutena nronra kyaiqa varaaninrave. Kotiva haaru nkyi haivaqara Ionaanra utunteema kyero nivata mwitaa hiananrove. Mwianra nraahu rieqatama nkye ni okyara taqetama nkye nianra Kotiva titai vaisivave tivarave, tiro.

Jesusiva mwitaa timwa kyero mwi vaisinramwuhua mwini kyero vuroma.

Nkye Parisi vaisinramwuanravata Saitiusi vaisinramwuanravata rau-riqata variate tura

(Maaki 8:14-21)

5 Jesusira nraaqiaranramwuvanto taunru kyeta hia mpereti vararaitita, qati kyaareraqaa qareta vura.

6 Jesusiva tiqaro, (Taupavanto utaqi viro mpereti vara ugenra kyaiharo kyotairave.) Parisi vaisivata Saitiusi vaisivata mwihua taupa mwia votima kyeta variavo. Nkyenramwu mwihuara rauriqata variate, tiro.

7 Jesusiva mwitaa tuvata mwinramwuhua Jesusiva mpo quaqaa ntumwa kyero timwa nyu quara hia ntapihiraitita, nai timwa mwi nai timwa mwi hita tiqata, Nanra quave tiho? Mpereti hia vareta nrunganra mwianrave mwitaa tiho? tita.

8 Mwitaa ti varuvaro Jesusiva mwihua ti varu quara ntapihi kyero tiqaro, Qikye, nianra kepukyaqama kyeta riaataara vahata nkye nianra hia kepukyaqama kyeta rie variavo. Nkye nanraqamave mpereti hia vare nianra kyaara airi qua ti variavo?

9 Nkye hia ntapihi kyeta riaraitita, nkye taunruve kyaavo? Nte mpereti kyauquru vara kyena vaisi airi 5,000 vaisi nteqa kyena nyiavara nkye mwihua nreta kyora viti vaati utu kyeta nataama tua piqa kyorave? Hiave nkye mwianra riaavo?

10 Nte 4,000 vaisi mpereti 7 nramwu nteqa kyena nyiavara mwihua nreqata viti vaati kyo kyarara nkye utu kyeta nataama tua piqa kyorave? Nkye hiave mwianravata riaavo?

11 Nte vaakya tu quara nkye nanraqamave hia ntapihi kyeta riaavo? Nte mpo quaqaa ntumwa kyena hia mperetiara tuqo. Nte nkyiara tiqana, Parisi

vaisinramwuvata Saitiusi vaisinramwuvata mwihua taupa votima kyeta variarara tita, nkye mwihuara rauriqata variate tuquo, tiro.

¹² Iesusiva mwitaa tuvaro mwinramwuhua su nyaatovanto ntapihi vuvata ri ovaro Iesusiva hia mperetivatama kyeta utaara taupara tiraitiro, mwiva mpo quaqaa ntumwa kyero timwa nyiqanro Parisi vaisinramwuvata Saitiusi vaisinramwuvata timwa taa quara mwianrama rauriqata variate tiho, tita.

Pitaava Iesusira okyarara tura

(Maaki 8:27-30; Ruku 9:18-21)

¹³ Iesusiva mwatukya mpo Sisariaa Piripai nraaqani uro ntero nai nraaqiaranramwu kyapara hiro tiqaro, Ni mwatani mwatatai nraaqiarara nraakye qoravanto ta vaisivave tiqatave variavo? tiro.

¹⁴ Mwitaa tuvata mwinramwuhua tiqata, Mpo hiahua iara mwiva Ioniva nramanri nyi varuvave ti variavata, mpo hiahua iara mwiva tiri haivaqava Iraisaavave ti variavata, mpo hiahua iara tiri haivaqava Ieremaiaavave, nraahumwa mpo poropetivanto qaiqaa qovarama viro variho ti variavo, tita.

¹⁵ Mwinramwuhua mwitaa tuvaro Iesusiva mwihua kyapara hiro tiqaro, Qio nkyenramwu mpo? Nkyenramwu nianra ta vaisivave tiqatave variavo? tiro.

¹⁶ Iesusiva mwitaa tuvaro Saimoni Pitaava Iesusira timwa mwinro tiqaro, E Kotiva titai vaisiva Mesaiaavantove. Kotiva qati variqiro vi varira e mwia mwaaqvantoma varira hiaro, tiro.

¹⁷ Pitaava mwitaa tuvaro Iesusiva Pitaarara tiqaro, E Ioninra mwaauq Saimonivave. E nianra mwitaa qiararo Kotiva iara qamwate variho. Hia qumina vaisivanto ni okyarara i vu nraato mwihanra ntapihiananrave. Ni kova nyaamwuni variva, mwivama mwi quara i timwa mwihanra e ntapihiananrave.

¹⁸ Nte iara mwitaa tireranave, I nrutu Pitaavave. Orivave. Nte ori nronraqa ntena nraamwu hoqa tarerave. Mwi nraamwuva Kotira nraakye qoravantomma varivarave. Qutira inraikyavantovata hia qio mwi nraamwunra nraatara kyaananrove.

¹⁹ Nte i kiqa mwianrinra e nraante qesa qatua nyatairata nraakye qoravanto Kotiva ntaiqkyianinraqi qio vivarave. E mwatani variqara mpo inraikyara qao timwa tairaro Kotivavata nyaamwuni variqaro i qua kuaa qua mwia vataqiro viqaro qao timwa taananrove. E mwatani variqara mpo inraikyara hia qao timwa tairaro Kotivavata nyaamwuni variqaro i qua kuaa qua mwia vataqiro viqaro hia mwi inraikyara qao qiananrove, tiro.

²⁰ Iesusiva mwitaa timwa kyero nai nraaqiaranramwu kepukyaqama kyero timwa nyinro tiqaro, Hia mpohua timwa nyita nianra mwiva Kotiva titai vaisiva, Mesaiaavanto variho qiate, tiro.

Iesusiva nai qutu quaninranra timwa nyunra

(Maaki 8:31-9:1; Ruku 9:22-27)

²¹ Mwi entaraqaatairo Iesusiva nai qutu quaninranra nai nraaqiaranramwu vutu kyero timwa nyinro tiqaro, Nte Ierusaremini quarita mwini nronra vaisinramwuvata, Kotira kyaiqa vara mwate varia vaisihua vunyaa vaisinramwuvata, mwaanra okyara ti varia vaisinramwuhuvata, mwihua ni uaqiamaqita vi varivaqena nte nriqa quani inraikyara varaqina quarita ni ru kyaivaqena nte qutu vina taarampo enta varina qaiqaa qati siquainrave, tiro.

²² Iesusiva mwitaa tuvaro Pitaava mwia vita uhini kyero mwianra qaqao tiro, Nronrao, haunri Kotiva mwihua kyairata i mwitaama mwatevorave, tiro.

²³ Pitaava mwitaa tuvaro Iesusiva tuqasaa viro Pitaara inronra hiro tiqaro, Saataanio, nyianrani quante. Hia ni aanra antuaante. E hia Kotiva raintema kyera rie variaro. E qati vaisivanto rie variantema kyerama rie variaro, tiro.

²⁴ Mwitaa timwa kyero Iesusiva nai nraaqiaranramwu timwa nyinro tiqaro, Ni pataqiro nrianri vaisiva, mwiva nai mwutukya vahianinra qaqira kyero, nai ru kyeta hirite kyatarira vara qu varero ni naakiara nrianrive.

²⁵ Nai mwatani qati varianinranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwajiro viqaro uro qutu quariva, mwi vaisiva ekyaa enta qati variqiro quananrove.

²⁶ Vaisivanto mwatani variqiro viqaro ekyaa inraikya ntuvantuuma kyero vatero mwiaqaatairo qutu viraro mwiva ntuvantuuma taani inraikyava mwia qiove kyaahaqa hiananro? Hia qiove. Mwiva hia kyoqaa utu kyero qaiqaa qati variqiro quananrove.

²⁷ Nte mwatani mwatatai nraaqiarava nraakiara qaiqaa nyaamwusaina kepukyavanto uro ntantena tuminrenrave. Mwi entara ni kora okyara kyuqe hiariva niqaatairo itero ntuvaahe varirage nte nyaamwunyaahua kyapata tumu variqana ekyaa nraakye qoravanto kyaiqa varerara rieqanama nkyiari kyoqaa nyianinrave.

²⁸ Nte qutaa qua qianinra riaate. Vaisi mponramwuvanto mate mwaa mwaini sivita variahua, mwihua hia vaakya qutu vivarave. Mwihua qati varivaqena nte mwatani mwatatai nraaqiarava nronraqama vina nte vunyaa vaisiqama vina variarita mwihua qutu vivarave tuqo, tiro.

17

Iesusira mwamwantavanto nai nraahumwa mpo mwamwanta kyuqe mwamwanta kyuqu vura

(Maaki 9:2-13; Ruku 9:28-36)

¹ Iesusiva mwitaa tuvaro 6 enta nritarovaro mwiva Pitaaravata, Iemisiravata, Iemisira mwia qata Ioninravata, mwinramwuhua sita varero taaqiqaa nkyiariaraa varirerata vura.

² Mwini uro varuvaro Iesusira mwamwantavanto nraahumwa mpo mwamwanta kyuqu vuvaro mwia virivanto huarivanto itaintema kyero ntuvaahe varuvaro mwia tuavaaqavata mpoqama kyero takyuqiro ntuvaahe varura.

³ Mwia mwamwantavanto mwitaama kyero kyuqu vuvaro varuvata mwia nraaqiara taaramponramwuvanto variqata taqovata Iraisaakya Mosesikya mwihua haivaqahuatana qovarama vita variqata Iesusiravatama kyeta qua ti varura.

⁴ Mwitanahua Iesusiravatama kyeta qua ti varuvaro Pitaava Iesusirara tiqaro, Nronrao, kyuqemama tirenramwu i vatama kyeta mwaini varur. E qiove tirera, tire haraara nraamwu taaramponramwu iara mpo, Mosesirara mpo, Iraisaarara mpo, hoqa nyataare, tiro.

⁵ Pitaava mwi quara qati nraahu ti varuvaro tonamwu takyuqiro ntuvahova mwihua ntumwaqu kyovaro quavanto tonamwuqitairo tiqaro, Mwaa ni maaqu, ni mutukyavanto mwianra mpoqama kyero nti vari nraaqiaravama variho. Nte mwianra qamwateqanama varuqo. Nkyenramwu mwia qua riaate, tiro.

⁶ Quavanto mwitaa tuvata mwia nraaqiara taaramponramwu mpoqama kyero nyaatuqa tovata virianasaita mwataqaa tumu ntita varuvaro

⁷ Jesusiva uro ntero nai kyauquqo mwihuaqa tu varero tiqaro, Mwaahua, siquate. Hia aatu hiqata variate, tuvata

⁸ mwinramwuhua tuahera kyeta taqovaro Jesusiva nanrianraa varuvaro vaisi mpo mwitanahua hia varura.

⁹ Taaqi mwiaqaataita tumi varuvaro Jesusiva mwinramwuhua timwa nyinro tiqaro, Mateqa taqaa inraikyara hia mpohuavata timwa nyiate. Nte mwatani mwatatai nraaqiarava nraakiara nte qutu quaninraqitaina qaiqaa qati sivina varianinra mwi entaraqaataitama timwa nyiqita quate, tiro.

¹⁰ Jesusiva mwitaa tuvata mwinramwuhua mwia kyapara hita tiqata, Mwaanra okyara ti varia vaisihua mwitaama timwa nyita tiqata, Iraisaava tire haivaqava nraante qovarama viro nri ntaananrove, ti variarave. Mwihua nanraqamave mwitaa ti variavo? tita.

¹¹ Mwitaa tuvaro Jesusiva tiqaro, Qio mwihua cutaa ti variarave. Iraisaava nraante nrumu ekya inraiky ntapihi kyero terama tarero nrianrivama variho.

¹² Qio nte nkyiara tiqana Iraisaava vaakya nrumu varurarama tuqo. Mwiva nrumu varuvata vaisi mpo uhua hia mwia ntapihi kyeta taqaraitita, Iraisaara nkyiari kyakya huntema kyeta mwia qoraqama mwatorave. Mwi vaisihua ni mwatani mwatatai nraaqiararavata qoraqama matevarave, tiro.

¹³ Jesusiva mwitaa tuvaro mwihua nyaato ntutoraa vuvata riovoro Jesusiva Iraisaaraqaa ntumwa kyero Ioniva nramanri nyi varu vaisirara tura.

*Jesusiva nyaako mpoqitairo vaana titamwa kyora
(Maaki 9:14-29; Ruku 9:37-42)*

¹⁴ Mwinramwuhua taaqiata tumu nte taqovata airi nraaky e qora ntuvantua vita varuvaro vaisi mpovanto uro Jesusira vuqaa tori kyauru raviro tiqaro, Nronrao, ni maaquara po kye timwa mwataante.

¹⁵ Mwiva ueraqama viro anomia kyero uaqima viro variho. Airi enta mwiva qiaqi ntumwa viro nramanriq ntumwa viro hi variho.

¹⁶ Nte mwia vitaqina nrumu i nraaqiaranramwuvanto varianani kyauqata mwihua mwia kyuqema mwataare tita taqaavar hia qioqahirave, tiro.

¹⁷ Vaisi mwiva mwitaa tuvaro Jesusiva tiqaro, Nkye mwaa entara varia nraaky qorahua api nrohi variahuave. Nkye hia Kotirara qutaaqama kyeta rie variavo. Qikye, nkye ni qio pupohair uti variavana nte nataa nataama entave nkyi kyapata variqina quaninrave? Nte nataa nataama entave variqana nkyi kyaahaqa hianinrave? Qio nraaqiara mwia viteta nte varura mwaaqaa nriate, tiro.

¹⁸ Timwa kyero Jesusiva vaana titamwa kyovaro nraaqiara mwia utaqitairo nritarero vuvuro mwiaqaatairo mwia mwamwantavanto kyuqema vuvuro qio varura.

¹⁹ Qio varuvata mwia nraakiara mwia nraaqiaranramwuvanto Jesusiva varunani uro nteta mwia kyapara hita tiqata, Tire vaana mwia titauraro nanraqamave hia nritarero viho? tita.

²⁰ Mwinramwuhua mwitaa tuvaro Jesusiva tiqaro, Nkyenramwu hia Kotirara kepukyaqama kyeta rie variahuara tita, vaana titaavar hia nritaraiho. Maasiteti uruve hovante pata uru qiani vahirave. Nkyenramwu Kotirara riemwaqita viva mwi urura votima kyero vahirera, nkyenramwu qiomia mwaa taaqirara mwaqaatairaq sivira vutuni quante tivarao taqivanto quananrove. Nkye mwitaama kyeta Kotirara kepukyaqama kyeta riemwaqita vivera, nkye ekya kyaiqa qiomia varevarave.

21 [Nkye hia Kotirara aakyara nteta kyaravata aurama teqata nkye hia qio mwi vaanahua sitevarave, tiro.] Mwitaa turama.

Iesusiva qaiqaa nai qutu viro qati siquaninranra vutu kyero timwa nyunra (Maaki 9:30-32; Ruku 9:43-45)

22 Iesusira nraaqiaranramwuvanto Karirini ntuvantuama vita varuvaro Iesusiva mwihua timwa nyinro tiqaro, Mpovanto ni mwatani mwatatai nraaqiarara qovarama kyairata ni ntavaaqavuqita

23 uro vaisi kyauquqi kyaivata ni ru kyaivaqena qutu vina taarampo enta vari kyena qaiqaa qati siquaninrave, tiro.

Mwitaa tuvata mwia nraaqiaranramwu mwutukyavanto uaquia huvata varura.

Taakisi kyorara tura

24 Iesusiva nai nraaqiaranramwu kyapata Kapenaamini uro ntovata Kotira nraamwuqaa ntaqikyiqata taakisi vare varuhua nri nteta Pitaara kyapara hita tiqata, Inronra vaisivantovata mwi taakisira kye varirave iho? tita.

25 Tuvaro Pitaava eo tiro, Mwivavata kye varirave, tiro.

Mwitaa timwa kyero Pitaaya nraamwuqi vuvaro Iesusiva nraante Pitaara ntumwahiamwa hiro tiqaro, Saimonio, Mwatani variahua mwihua vunyahua ta mwatanaahuqaqitaita taakisi vare variarave? Nkyiari mwatanaahuqaqitaitave vare variavo? Mpo mwatanaahuqaqitaitave vare variavo? Tiraqena riaankye, tiro.

26 Iesusiva mwitaa tuvaro Pitaava tiqaro, Mwihua mpo mwatanaahuqaqitaita taakisi vare variarave, tiro.

Tuvaro Iesusiva tiqaro, Tire hia mpo mwatanaahuha variraitita, tire Kotira nramwunaavanto variqataro tita, tire taakisi kyaarava hiama vahirove.

27 Oio mwihua tiriara tivorave. Mwianra rieqarama uro kyaareraqi huku tuto kyairaro tauraqaqama kyero tavukya nrianriva nrumu ruvirara pati kyera mwia nro ntapahu kyera mwiqitaira munima vara kyera nianravata enanravata taakisiqa hiante, tiro. Mwitaa turama.

18

Tavave tirinramwuqitairo nronraqama viro vunyaa vaisivanto variananrove tura

(Maaki 9:33-37; Ruku 9:46-48)

1 Mwi entara Iesusira nraaqiaranramwuvanto Iesusiva varunani uro nteta tiqata, Kotiva ntaqikyiraqi tavave nronraqama viro vunyaa vaisivanto variho? tita.

2 Mwihua mwitaa tuvaro Iesusiva nraaqiara pataru nraanrama kyero mwihua suqaa vatero

3 tiqaro, Nte qianinra riaate. Nkye hia nraaqiara mwaa votima vita varivera, nkye hiama qio Kotiva ntaqikyiani mwatukyaraqi vivarave.

4 Kotiva ntaqikyianinraqi vunyaa vaisivanto varirero hirera, mwiva nai nrutu vara mwataniqama kyero nraaqiara mwaa votima kyeroma variarive. Mwi nraaqiarara voti hiarivama vunyaa vaisivanto variananrove.

5 Vaisi mpovanto nraaqiara mwaa voti hianinra qamwata mwateqaro nivatama qamwata mataaananrove.

Mpohua uaquia hi aanranra nyaamwutevorave tura

(Maaki 9:42-48; Ruku 17:1-2)

6 Nraaqiara pata mwaa voti hiariva ni qua riaariva variraro vaisi mpovanto nri ntero uaquia hi aanranra nraamwutairera, mwi vaisiraqaa

qua nronraqama kyero vahiananrove. Mwi vaisiva hia nraaqiara mwia uaqia hi aanranra nraamwutaraaitiro variraro mwia nruntaqi ori nronra kyaantaru kyero kyaareraqi tuto kyairaro ntaqutu viraqe huviqarave qitaarave.

⁷ Po, mwatani vari nraakye qorahua uaqia hi kyaiqara utuate tiro, mpo inraikya mpo inraikyavanto mwihua mwataara hiananrove. Uaqia hi kyaiqara qovarama kyaani vaisirara po timwa mwatauqo. (Nraakiara mwi vaisiva taqaananrove.)

⁸ I kyauquvantove, i kyauquvantove, uaqia hi kyaiqara uti varirera, mwia teqa kyera qaqlira kyaante. Mwiaqaataira kyauqu kuaiku vahiarivave, kyauqu kuaiku vahiarivave, nyaamwuni vira qioma qati variqira vinanrave. Uaqia hi kyaiqara utiqarama kyauqu taaratana, kyauqu taaratana, vahiariva variraro hia qipaani qiaraqi i tuto kyaankyorave.

⁹ E vu hiniqotaira taqe variqara uaqia hi kyaiqara uti varirera, qaiqaata mwitaamaqira quankyorare tira, ena vu hini vauru kyera qaqlira kyaante. E vu kuaiku nraahu vahirara hia uaqia hi kyaiqara utiraitira, qioma nyaamwuni vinanrave. E vu taaratana vahiariva uaqia hi kyaiqara utuqira virava nraakiara qutu viraro i qia nronraqi tuto kyaananrove.

¹⁰ Nkye taqe qata variate. Nraakiara pata mwaahua varivata nkye mwihuaqitaita pata mporuara uaqua titi mwianra qumina nraaqiararuve tivorave. Nyaamwunyaahua mwihuaqaa ntaqikyi variahua hia mwihuara qumina nraaqiarave tiraitita, mwihuara rieqata ni kova nyaamwuni varira nraaqani variarave, tiro.

Sipisipi raupirima vuraqa ntumwa kyero tura (Ruku 15:3-7)

¹¹ Jesusiva mwitaa timwa kyero mwiva tiqaro, [Nte mwatani mwatatai nraaqiarava nte raupirima qua nraakye qorahua sitarera tumuvave.]

¹² Nte mwaa quara qianinra nkye nataamave riaavo? Vaisi mpovanto sipisipi 100 vataariva taqairaro sipisipi mpovanto raupirima virera, mwiva hiave 99 sipisipi hini mwinramwuhua qati varihua taaqiqaa kyero raupirima quani sipisipira puua hirero quananrove?

¹³ Mwiva mwianra puaamaqiro viro uro mwia puaama kyairera, mwiva tiqaro, Raupirima kyaurama ntena puaama kyena vitaqo, timwa kyero mpoqama kyero mwianra qamwateqaro sipisipi 99 hia raupirima quahuara hia nronraqama qamwataananrove.

¹⁴ Mwia votima kyero ni kova nyaamwuni variva mwaa nraaqiaranramwuhuaqitairo mpovanto raupirima quankyo timwa kyeqaro varirave, tiro.

I qata vakyaavanto i uaqiamma mwataaninranra tura

¹⁵ I qata vakyaavanto i mpo inraikya uaqiamma mwatairara e mwianra tirera hiqarama uro mwia vita kyera nkyetaraatana nraahu variqata mwii quara avuqavu hiate. Mwiva i qua riairera, mwia vita varera mwiaqaataitata nkye kyuqema kyeta kuaaqi qioma variqita vivarave.

¹⁶ Mwiva hia i qua riairera, uro vaisi kuaikuve taaratana sitaqira nrinrata mwitanahuavata nrumu variqata i qua rieqatama qio qutaama tira hiaroma tivarave.

¹⁷ Mwitaamaqita vivaro mwi vaisiva nkyinramwu qua hia nraahu riairera, mwiaqaataira ekyaa Kotira nraakye qora ntuvantuuma kyera ena qua mwia ekyaa mwihuavata timwa nyiante. Mwi vaisiva Kotira nraakye qora ntuvantuuma tehuara hia riairera, ekyara mwiaqaataita nkye mwi vaisira titeqatama tiqata. E mpo mwatanaa votima kyerama variaro. E taakisi vare varia vaisihua votima kyerama variaro, qiate.

18 Nte qianinra riaate. Nkye mwatani variqata mpo inraikya mpo inraikya uaqia hiani inraikyarara qao timwa taivaro Kotivavata nyaamwuni variqaro mwianra qao timwa taananrove. Nkye mwatani variqata mpo inraikya mpo inraikyarave hia qao timwa taivaro Kotivavata nyaamwuni variqaro hia mwi inraikyarara qao timwa taananrove, tiro.

19 Iesusiva mwitaa timwa kyero tiqaro, Nte qaiqaa qianinra riaate. Nkyigitai vaisi taaratanavanto kuaa vu nraato vateta Kotirara kyapara hivaroni kova nyaamwuni variva mwitanahua tintema kyero nyiananrove.

20 Taaratanave, taarampotanavantove, ni kyaiqarave titi ntuvantua hivera, qio nte mwinramwuhua utaqaa varianinrave, tiro.

Nai hena vaisiqaa qua vahura hia qaqlira kyo vaisiraqa ntumwa kyero tura

21 Iesusiva mwitaa tuvaro Pitaava uro Iesusira kyapara hiro tiqaro, Nronra, ni kata pakyaa mpovanto ni uaqlama matairera, nte nataama nanive mwianra hia iqaa qua vatena qaqlira kyarerave qianinrave? Kyauquru hisai taara nanive mwitaa hianinrave?

22 Pitaava mwitaa tuvaro Iesusiva tiqaro, Hia nte iara kyauquru hisai taaranani mwia qua qaqlira kyaante tuqo. Nte iara mwia qua 500 nani qaqlira kyaantema tuqo, tiro.

23 Kotiva nraakye qoraqaa ntaqikyiariva mwaa quara votima kyeroma vaiho. Nronra vaisi mpovanto nai kyaiqa vaisinramwu nyito munimanra ntene vararerave turave.

24 Timwa kyero tohara kyero vare varuvata mwia kyaiqa vaisi mpo vitaqita mwiva huraga kyovaro mwi vaisiva nronra munima 1,000,000 kinaa vara kyero nramwa kyova vahuvaro

25 mwiva mwi munimanra nai mwianrava hia qioqama kyero vahuvaro mwia nronra vaisivanto tiqaro, Mwi vaisiravata mwia nraata nraaqiaravata, mwiva ekyaa inraikya vataaninravata, mpohua nyita munima varaqita nrumu ni mpivaqena nte mwiva vara nramwa kyai munimanra hiniqama ntene varaankeye, tiro.

26 Mwiva mwitaa tuvaro mwia kyaiqa vaisivanto tumu ntiro tori kyaauru raviro po kye tiro tiqaro, E variraqena nte qakyoma kye mwi munimanra puaamaqina vina uro ekyaa puaama kyena ina mwiankeye, tiro.

27 Mwitaa tuvaro mwia nronra vaisivanto mwianra po kye timwa mwatato tiqaro, Qio nte iara po kye timwa mwateqanama mwi munimanra qaqlira kyauquo. Hia nina mpiante. Qaqira kyera quante, tiro.

28 Mwitaa tuvaro mwi vaisiva veva ntero vuva uro taqovaro kyaiqa vaisi mpovanto nai mwia henava mwia munima 10 kinnaa vara nramwa kyova nruravo mwiva mwia uro nruntana tutero ntaquti variro mwianra tiqaro, Ni munima nramwa kyaananra qamwanrama kyera nina mpiante, tiro.

29 Mwitaa tuvaro mwia henava mwiva tumu ntiro tori kyaauru raviro po kye tiro tiqaro, E variraqena nte mwi munimanra qakyo puaama kyena i mwiankeye, tuvaro

30 mwi vaisiva hia mwia qua riaraitiro, nai hena vaisi mwia karavuqi kyero tiqaro, Ni munima nramwa kyaananra ekyaa nina mpiraqenama i huvantu kyaaninrave, tiro.

31 Mwitaa timwa kyero nai hena vaisi mwia karavuqi kyovata kyaiqa vaisi mponramwuvanto mwia taqovaro uaqia huvata e uaqlama hira hiaro timwa kyeta uro nronra vaisi timwa mwuvaro

32 mwia nronra vaisivanto nai kyaiqa vaisi nraanrama kyero timwa mwinro tiqaro, E uaqia hi kyaiqara uti variara vaisivama variaro. E nianra

po kye timwa mataante qiarana nte e nramwa kyaana munimanra nronra munima ekyaa qaqlira kyena hia nina mpiante turave.

³³ Nte iara po tuntema kyera evata ena henanranra po timwa mwataataara vahara hia mwitaa hiaro, tiro.

³⁴ Mwitaa timwa kyero mwia nronra vaisi mwia mpoqama kyero raraqa tovaro nai kyaiqa vaisi karavuqi kyero tiqaro, Mwiva karavuqi variqaro nai nramwa kyai munimanra ekyaa nina mpiarive, tiro.

³⁵ Iesusiva mwitaa timwa kyero nai nraaqiaranramwu timwa nyinro tiqaro, Nkye nkyeta mwutukyacitaita nkyeta sata sakyahua nkyi uaqjama nyate quara hia qaqlira kyaraitita qati nraahu riemwaqita vivera, nkyi sova nyaamwuni variva nkyeta uaquia hi kyaiqara utua quaravata qati nraahu riemwaqiro quananrove, tiro. Iesusiva turama.

19

Vaisivanto nai nraata qaqlira kyaaninranra tura

(Maaki 10:1-12; Ruku 16:18)

¹ Iesusiva mwi quara timwa nyi taiqa kyero Karirisairo Iutia mwata Iotaani nramanri qarahini vuvata

² nraakyeh qora airivanto mwia vataqita vuvaro mwiva mwini variqaro mwihua nriqa vuhua kyuqema nyatora.

³ Iesusiva mwini varuvata Parisi vaisinramwuvanto mwiva hunani uro nteta Iesusirara api qua qiarive titi mpo qua mwia kyapara hita tiqata, Qiove vaisivanto mpo qua mpo qua vahiraro mwi quara kyaara nai nraata qaqlira kyaanenrove? Mwiva mwitaa hirera, mwiva tiri mwaanra qua neqave kyaanenrove? Tiraqe riaare, titi.

⁴ Mwitaa tuvaro Iesusiva tiqaro, Nkyenramwu hiave Mosesiva qara ntumwa to quara kyaara ntumwa kyeta riaavo? Mwi quava mwataamama vahiro. Nyaamwuvata mwatavata ututova, Kotiva tauraqama kyero vaisivata nraakyevata utu kyero tiqaro,

⁵ Vaisivata nraakyevata ututaurara tiro, vaisivanto nai nrohua qohua kyero nai nraatantiri kuaaqi variqi vita mwitanahua kuaa mwamwanta varivarave turave.

⁶ Mwitanahua hia mpo mwamwanta mpo mwamwanta variraitita, kuaa mwamwanta nraahu variarave. Qio Kotiva mwitanahua kuaaqta taaqau tairara tiro, mpovanto mwitanahua ntainra kyaankyorave, tiro.

⁷ Iesusiva mwitaa tuvata mwintaramwuhua tiqata, Qutaa Kotiva mwitaa turave. Qio nanraqama Mosesiva mpo qua turave? Mosesiva timwa to quava mwataama tiho, Vaisivanto nai nraata qaqlira kyaariva qaravata mwintro qiomia qaqlira kyaanenrove turave, Mosesiva nanraqama mwitaama kyero qua timwa torave? titi.

⁸ Mwihua mwitaa tuvaro Iesusiva mwihua nkyiari timwa nyinro tiqaro, Mosesiva variqaro taqovaro nkyi haivaqahua mwutukyavanto kepukyaqa huvata hia Kotirara riorave. Mwitaa hi varuvarora tiro, Mosesiva qihaaqyama kyero qio mwitaa hiate, timwa kyero mwi quara timwa torave. Haaru tauraqama kyero mwata ututo entara hia mwitaama vahurave.

⁹ Nte nkyiara mwitaama tuqo, Nraakyevanto hia vaisi mpovatama kyero nrohiraitiro variraro mwia vaativanto mpo qua kyaara mwia qaqlira kyero mpo nraakyeh varairera, mwi vaisiva qaraakya nraakyentiri nrohiqaroma mwiva nraata vaati ntugqema kyeroma mwiavata mpuaraqama kyeroma nrohianenrove tuqo, tiro.

10 Iesusiva mwitaa timwa kyero varuvata mwia nraaqiaranramwuvanto Iesusirara tiqata, Qikye, vaisivanto mwitaama kyero nraata varaariva vahirera, vaisivanto hia nraata vararaitiro qati variarive, tita.

11 Mwia nraaqiaranramwuvanto mwitaa tuvaro Iesusiva tiqaro, Hia ekyaa vaisivanto nkye qiantre hita hia nraata vararaitita qati varivarave. Kotiva kepukyaqama mwataari vaisiva mwiva nraahu qati variananrove.

12 Mpo qara mpo qara hi okyara qaara mpohia vaisihua hia nraata varaarave. Mpohia vaisihua mwata kyaavaro mwihua mwamwanta hia kyugema vahatara tita, hia nraata varaarave. Mpohia vaisihua mwamwanta uaqiana kyaavatara tita, mwihua hia nraata varaarave. Mpohia vaisihua Kotiva nraakye qoraqaa ntakikyirara rieqata tire Kotira kyaiqa vararerave timwa kyeta hia nraata varaarave. Mwi quara ntapihi kyero rie variariva, mwi vaisiva mwi quara riemwaqiro quananrove, tiro. Iesusiva turama.

*Iesusiva nraaqiaraqaa kyauqu vatero mwihua kyuqema nyatora
(Maaki 10:13-16; Ruku 18:15-17)*

13 Iesusiva varuvata nraakye qoravanto nkyiari nraaqiara sita vareta Iesusiva mwihuaqaa nai kyauqu vateqaro Kotirara aakyara tiraro mwihua kyuqema nyataarive timwa kyeta Iesusiva varunani sitaqita uro kyarerera utuvata Iesusira nraaqiaranramwuvanto mwihua inronra hi varura.

14 Mwitaa tuvaro Iesusiva qaqao tiro, Qati kyaivata mwihua nte hunani nriate. Hia mwihua aanra antuuae. Kotiva ntakikyari mwutukyava mwi nraaqiaraahua voti hiahua mwihua mwatukyama vahiananrove, tiro.

15 Iesusiva mwitaa timwa kyero nai kyauqu nraaqiara mwihuaqaa vatero mwihua kyuqema nyatero vura.

*Qaraakya vaisivanto airi inraikya vatorara tura
(Maaki 10:17-31; Ruku 18:18-30)*

16 Mpo enta vaisi mpovanto Iesusiva varunani uro ntero tiqaro, Mwaanra ti variara vaisio, nte kyuqe kyaiqa nataa hianinra Kotira vara mwataanin-rraqataainave nte ekyaa enta qati variqina quaninrave? tiro.

17 Mwitaa tuvaro Iesusiva tiqaro, E nanraqamave kyuqe kyaiqara ni kyapara hira hiaro? Kotiva kuaikvanto kyuqema varivave. I ekyaa enta qati variqira quataa hirara, e Kotiva timwa to quara ekyaa mwi quara riemwaqira quante, tiro.

18 Iesusiva mwitaa tuvaro mwi vaisiva kyapara hiro tiqaro, Qio nte nanra quave Kotiva timwa toraqitaina riemwaqina quaninrave? tuvaro Iesusiva timwa mwinro tiqaro, Mwaa quara timwa torave:

Hia vaisi ru kyaante. Hia mpore nraatavata nrohiante.

Hia mpuara varaante. Hia mpore unra qiantre.

19 Ena nrohua qohua nrutu tuaahera nyataante. *(Kyatura 20:12-16)*
E enanra i mwutukya vahintema kyera ena hena vaisiaravata
i mwutukya vahirara variante, turave. *(Wok Pris 19:18)*

Mwi quara timwa tora riemwaqira quante, tiro.

20 Iesusiva mwitaa tuvaro mwi vaisiva tiqaro, Nte ekyaa mwi quara qiananra riemwa ntapihi kyauvama varuquo. Nanra inraikyavantove qati vahiana nte hia qioqa huquo? tiro.

21 Mwitaa tuvaro Iesusiva tiqaro, E mpooqavata kyuqe vaisivanto varirera, uro ekyaa ena vatena inraikyara nyinra munima vara kyera hia mpo inraikya vate nraakye qorahua nyinranro nyaamwuni i kyoqaa vahiarive. Mwiaqataira e ni pataqira nriante, tiro.

²² Iesusiva mwitaa tuvaro vaisi mwi quara riero airi inraikya vatorava tiro, mwiia mwutukyavanto uaqia huvaro hia Iesusira qua riaraaitiro, qaqira kyero vurama.

²³ Vuvaro Iesusiva nai nraaqiaranramwuanra tiqaro, Nte qianinra, riaate. Airi inraikya vatehua Kotiva ntaqikyiani mwatukyaraqi mwukyaari tukyeqatama vivarave.

²⁴ Nte qaiqaa timwa nyianinra riaate. (Kameri quara nronravanto nataama kyerove vuqa uvintaqi/iriraqi ntuqiaraananrove? Hia qio mwitaa hiananrove.) Qio kamerivanto vuqâ uvintaqi/iriraqi qio ntuqiaraaninravauma, airi inraikya vataari vaisiva Kotiva ntaqikyiani mwatukyaraqi qio quananrove, tiro.

²⁵ Iesusiva mwitaa tuvata mwia nraaqiaranramwuvanto mwi quarara airi nraato tita tiqata, Qikye, airi inraikya vatehua Kotira mwatukyaraqi hia qio vivera, nai tavave qio mwini quananrove? tita.

²⁶ Mwitaa tuvaro Iesusiva mwihua taqero tiqaro, Mwatani varihua mwihua nkyiari nraahu variqata hiama qio vivarave. Kotiva kyaahaqa hirata mwihua qioma vivarave. Kotiva ekyaa kyaiqa qio nraahu vare varivave, tiro.

²⁷ Mwitaa tuvaro Pitaava tiqaro, Taqaante, tirenramwu i vataqita virera hita, ekyaa inraikya mwini kyeta qatima nrunko. Tire mwia qata nanra inraikyave varaananrave? tiro.

²⁸ Pitaava mwitaa tuvaro Iesusiva mwinramwuhuara tiqaro, Nte qianinra riaate. Hia nte nkye kyaiqa vare varirara taunru kyaaninrave. Ekyaa inraikya qaraakyaqama kyero vahiani entaraqaa nte mwatanri mwataatai nraaqiarava, nte mwi entara takyuqi variani inraikyara peqa inraikyavatama kyena nyaamwuni nronra taintaqaa mwatakyaa vina variarita nkye ni nraaqiara 12 nramwuvanto ni pataqita nrihua, nkyevata tainta 12 nramwuqaa mwatakyaa vita variqata Isarerri vaisi 12 okyara mwihuqaqa ntaqikyiqata mwihua qua avuqavu hivarave.

²⁹ Vaisi mpovanto nai mwaatave, nai qata vakyaave, nai nrunka nryakaave, nai nrohua qohuave, nai nraaqiarave, nai mwataave, qaqa kyero ni kyaiqarave tiro quariva, mwi vaisiva mwia qata nai kyogaa vareqaro hia kuaa nani varaananrove. Mwiva mpoqiyavata vareqaro 100 nani varairaro mwiia mwoqaga Kotiva mwianra e ekyaa enta ekyaa enta qati nraahu variqira quante qiananrove.

³⁰ Mate nraakye qora airivanto vuni variahua, qakyo mwihua tumitareta nraakiarani varivarave. Mate mwaa nraakiarani variahua, mwihua qakyo nritareta vunima varivarave, tiro.

20

Uaini vara tutoraqi varohuaqaa ntumwa kyero tura

¹ Kotiva ntaqikyiariva vahirero mwaa quaraqaa ntumwa kyena qiani quara votima kyero vaiho. Mwata airi vahu vaisiva vaakya toqa entaqi siviro nai uaini vara tutoraqi kyaiqa varaaate tiro, kyaiqa vaisiara puua hireru vurave.

² Vuva uro vaisi mponramwu puaama kyero tiqaro, Nkyenramwu mate ni kyaiqa vara mataivaqe nte mwi entarara rieqana nkyi kuaiqia kuaiqia munima kuaa kinaa kuâa kinaa nyiankye, tuvata eo tuvaro nai aakyoqi sitaqiro uro kyero.

³ Uro kyero varuvaro huarivanto nrinro viri sataqa huvaro mwiva maaketiqi vuva uro taqovata vaisi mponramwuvanto qumina varuvaro

⁴ mwiva mwihuara tiqaro, Nkyevata uro ni aakyoqi ni kyaiqa vara mataivaqe nte nkyita kyaiqara rieqana kyoqaa nyiankye, tiro.

5 Tuvata mwihuavata mwini vuvaro mwiva varuvaro huarivanto virini qiataqa nrinro ihera mwutukyaqa huvarovata, huarivanto tuminro viti-toja huvarovata, mwiva vaisi sitarero vaakya hunte hiro.

6 Aakyo qova kyaiqa vaisi qati nraahu sitaqiro vuvaro kyaiqa taiqeva gau-maqa huvaro qaiqa maaketiqi uro taqovata vaisi mponramwuvanto qati nraahu sivita varuvaro mwihua kyapara hiro tiqaro, Nkye nanraqamave mate qumina varita hiavo? tuvata

7 mwihua mwia timwa mwita tiqata, Hia vaisi mpovanto tiriara kyaiqa varaate tihatama tire qumina varuro, tuvaro mwihuara tiqaro, Qio nkyevata uro ni uaini aakyoqi kyaiqa varaate, tiro.

8 Mwitaa timwa kyero varuvaro enta hirero huvaro aakyo qova nai kyaiqaqaa ntaqikyu vaisirara tiqaro, Kyaiqa vaisi ekyaa nyaanrama kyera mwihua nkyiari kyoqaa nyiante. E nraakiara nria vaisihua nraante munima nyiqi vira uro vaakya vuni nria vaisihuaqaa taiqa kyaante, tiro.

9 Mwitaa tuvaro mwiva kyaiqa taiqarerera hunani nruhua nraante munima kuaa kinaa kuaa kinaa nyinro.

10 Nyiqiro viro vaakya toqaci nru vaisihua munima nyinrenro huvata mwihua tiqata, Tiri munimä mpoqiavata timwiananrove, tuvaro mwiva mwihuavata kuaa kinaa kuaa kinaa nraahu nyinro.

11 Kuua qarama kye nyuvata mwihua mwi munimanra vareta aakyo qorara nrutu nraunru/nrunru nraanru tita tiqata,

12 Qaqao, kyaiqa taiqaarava qaumaga ihata nria vaisihua kyaiqa pataqia nraahu vara kyetama kuua kinaa kuua kinaa varaavo. Tire vaakya toqaci nrunrahua hueri nronraqi kyaiqa varaqi vurarama e nraakiara nria vaisihua nyianrantema kyerama tirivata timwinra hiaro. Nanraqamave mwitaa hiaro? tita.

13 Mwihua mwitaa tuvaro aakyo qova vaisi mpora tiqaro, Ni vaisio, hia nte i uaqiamma mwatauqo. Qio qutaa nte vaakya toqaci iara ni kyaiqa varairaqe nte i kuua kinaa mwiankye tuqara e eo qiananrave?

14 Ena munimavata varera ena mwaatani quante. Nte ivata nraakiara sita tauhuavata kuua qarama kyena nyiataa ihana nyunrave.

15 Nte ntene munimanra tina, hiave nte ntene kyakya hianinraqa nkyi tukyama kyena nyianinrave? Nte qihakyma kyena ntene munima nyuqanra nanraqamave e kyaruntira hiaro? turave, tiro.

16 Iesusiva mwi quaraqaa ntumwa kyero timwa nyinro taiqa kyarerera hiro tiqaro, Mwia votima kyeta mwoqani varihua qakyo vuni utu vivarave. Vuni utu vihua qakyo mwoqani tumi vivarave, tiro.

Iesusiva taarampo nani nai qutu viro qati siquani quara vutu kyero timwa nyunra

(Maaki 10:32-34; Ruku 18:31-33)

17 Iesusiva Ierusareminianra aanrani viqaro nai nraaqiara 12 mwinramwuhua nraahu sita kyero tirema timwa nyinro tiqaro,

18 Taqaate, tirenramwu Ierusareminianrama vi varuro. Nte mwatani mwataatai nraaqiarava mwini uro ntaariro ni qovarama kyero uro Kotira kyaiqa vara mwate varia vaisihua vunyaa vaisinramwuvata, mwaanra okyara ti varia vaisihuavata, nyiananrove. Nyinrata mwihua nianra mwia ru kyaate timwa kyeta

19 ni pitaqita mpo mwatanaahua kyauquqi uro kyaivata mwihua nianra raima mateta kyaanta vara kyeta mwiaqotaita ni moqasata ntuteqaate-qama mateta mwiaqataita uro kyatariqaa ni rutaivaqena nte qutu vinama taarampo enta vari kyena qaiqa qati siquaniinrave, tiro. Iesusiva turama.

Iemisikya Ionikya nronra vaisi varirara mwihua nyova Iesusira kyapara hura

(Maaki 10:35-45)

²⁰ Mwi entara Sepetira mwaqaqtana nyova mwitanahua sita varero Iesusiva hunani vuva uro mwia vuqaa variqaro kakataama viro mwataaqi tumu ntiro variqaro nai kyaahaqama mwataaninranra Iesusira kyapara hura.

²¹ Iesusira kyapara huvaro mwiva mwia nai kyapara hiro tiqaro, Nanra inraikyarave qiaro? tiro.

Mwitaa tuvaro nraakye mwiva tiqaro, Qiove mate mwaa e eo timwa tairaro nraakiara e nronraqama virā vunyaa vaisivanto varinanraqa ni maaqtana nronraqama kyāirata mpovanto i kyauqu kyaatutani variraro mpovanto i kyauqu kyaantaaqani variarive, tiro.

²² Mwi nraakyeva mwitaa tuvaro Iesusiva mwinramwuhuara tiqaro, Nkyenramwu mwitaama kye ni kyapara hiqatama hia mwi quara okyara ntapihiraititama, mwitaa qavo. Nte nriqa quaninra nramanri voti hira nraaninra nkyetanavatave nrevarave? tuvata mwitanahua tiqata, Qioma nraananrave, tita.

²³ Mwitana mwitaa tuvaro Iesusiva tiqaro, Qutaama nkyetanavata mwi nramanrinra mwia nrevarave. Ni kyauqu kyaatutaniqvata, kyaantaaqaniqvata, mwata kyaavi varitana hia ni kyaiqa vahirave. Ni kova vaisi taaratana terama kyero vatai vaisitanama mwini mwata kyaavi varivarave, tiro.

²⁴ Iesusiva mwitaa tuvata mwia nraaqiara hini 10 mwinramwuhuara mwi quara rieta mwi qate vakyetana inronra hura.

²⁵ Mwinramwuhuara mwi vaisitana inronra hi varuvaro Iesusiva ekyaaw mwinro mwaanro mwinramwuhuara nyaanrama kyero qio eqaate tiro, Mpo mwatanaahua ntaqiqiyiqi qua okyarara nkye riaarave. Mwihua vunyaa vaisivanto nritare viritoqama variqata mwi kyaiqara mwaa kyaiqara tiriina varaae ti variarave. Mwihua nronra vaisinramwuvantu tiqata, Nte nronravanto varuqo. Ni qua nraahu riemwaqi quate, ti variarave.

²⁶ Nkye hia mwihua hiante hiate. Nkyiqitairo mpovanto nronraqa hirero hiqaro mwiva nkyi kyaiqa vara nyataarive.

²⁷ Nkyiqitairo mpovanto nritarero vuni varirero hiqaro mwiva karavu vaisi votima viro nkyi kyaiqa vara nyataarive.

²⁸ Nte mwatani mwatatai nraaqiaravama varuqo. Ntevata hia nraakye qorara ni kyaiqa vara mataate tina, tumuvave. Nte nraakye qora mwihua kyaaiqa varaqi vina, airi nraakye qora kyaahaqama nyatarera mwihua rieqanama qutu virerave timwa kyena tumuvave, tiro. Iesusiva turama.

Vu qipa vu vaisitana Iesusiva ntapairi kyora

(Maaki 10:46-52; Ruku 18:35-43)

²⁹ Iesusiva nai nraaqiaranramwuvata Ieriko kyeta vi varuvata nraakye qora airivanto Iesusira vataqita vi varuvata

³⁰ vaisi taaratana vantu vu qipa vu tanahua aanra tokyani variqata rioraro Iesusiva nritarero viqaro tuvata mwitanahua aakyara nteta tiqata, Nronrao, Ntevitira mwaaquo, qati tiritananra po kye timwa timwa taante, tita.

³¹ Mwitanaahua mwitaa tuvata nraakye qoravanto mwitanahua inronra hita tirema variate tuvatavata mwitanahua hia mwihua qua riaraitita, nronraqama kyeta aakyara nteta tiqata, Nronrao, Ntevitira mwaaquo, qati tiritananra po kye timwa timwa taante, tita.

³² Mwitanaahua mwitaa tuvaro Iesusiva nrumu siviro variro tiqaro, Nivanto nkyitana nataa hiarive titatanave nkyetana nianra aakyara nte variavo? tiro.

33 Mwitaa tuvata mwitanahua timwa mwita tiqata, Nronrao, tiritana tivu ntapairi timwa taanterama i nraanre varuro, tita.

34 Mwitaa tuvaro Jesusiva mwitanahuara po timwa nyatero mwitanahua sugaa nai kyauqu viti vatovaro mwitanahua suvanto qamwanrama ntapairi uvata qio taqeta mwiaqataita Jesusira vataqita vura.

21

Nraakyey qoravanto Iesusira qamwata mwate varuvaro Iesusiva Ierusalemiqi vura

(Maaki 11:1-11; Ruku 19:28-40; Ioni 12:12-19)

1 Iesusiva nai nraaqiaranramwu kyapata vuvaro Ierusalemqi qaumato huvavata mwihua Mpétapaasi Oripi taaqi mwemwaqi vahu mwatukyaraqi uro nteta Iesusiva nai nraaqiara mpotana sitero

2 tiqaro, Nkyetana viti mwatukyaraqi uro ntetama ntonki nraante taqevavarave. Ntonkivanto nai nraati vatama kyero kyaantaru taivaro varianinra uro mwitanahua huvantu kyeta sitaqita nrumu ni mpiae.

3 Vaisi mpovanto nkyitana kyapara hirata mwitaama qiate. Tiri nronravanto ntonki mwianra titatama nrurro qiate. Nkyetana mwitaa tivaro mwiva nkyitananra qio qamwanrama varaqita uro mwiatema qiananrove, tiro.

4 Haaru vetato entaqaa poropeti vaisivanto tu quava mwivauma vahiarive tiro, Iesusiva mwitaa tura. Haaru poropeti vaisivanto Kotira qua qovarama kyero mwataama tiro:

5 Nkye Ierusalemiqinaahua mwitaa timwa nyiate.
Nkyi vunyaa vaisivanto nkye hianani nri variho.

Mwiva qhaakya hivara tiro,
qhaakya kyero ntonki mwoqaaqaa nri variho.

Mwi ntonkiva qaraakya ntonkivantoma variho, tura. (Sekaraiaa 9:9)

6 Mwiva tu quava mwivauma vahiarive tiro, Iesusiva nai nraaqiara taaratana sitovata mwitanahua Iesusiva tuntema kyeta vuhua uro

7 ntonkivata mwia nraativata vitaqita nrumu kyeta mwia nraaqiaranramwuvanto nkyiari tuavaaqaa ntonkiqa vuti mwatovaro Iesusiva mwiaqaa mwaanri ntero mwatakyaa viro varura.

8 Varuvata nraakyey qoravanto nkyiari tuavaaqavata aanravau vuti mwatovata nraakyey qora mpo uhua kyatari mwanre teqeqlita nrumu aanravau vuti mwatora.

9 Vuti mwatovata Iesusira vuni vuhuavata mwoqani vi varuhuavata aakyara nteta tiqata,
Ntevitira mwaauqo nrutu tuaaheraate.

Nronravanto nai nrutuqa nri vari vaisira kyuqema mwataiho. (Ihi 118:26)
Ekyaa nyaamwunyaahua mwia nrutu tuaaheraate, tita.

10 Mwitaa timwaqita vi varuvaro Iesusiva Ierusalemiqi uvata ekyaa mwi mwatanaahua hianteta vitare nririte hi varita tiqata, Qikye, Ta vaisivave nriho? tuvata

11 nraakyey qora mpo uhua tiqata, Mwaa vaisiva Iesusivave. Mwiva poropeti vaisivanto Nasareti Karirisairo nrivave, tita.

Iesusiva Kotira nraamwuqitairo munima kyaiqa vare varuhua vara veva kyora

(Maaki 11:15-19; Ruku 19:45-48; Ioni 1:13-22)

12 Iesusiva uro Kotira nraamwu nronraqi vera ntero taqovata kyoqaa uti varu vaisihua mwipi kyoqaa uti varuvaro mwiva mwihua vara veva

mwaatani kyero, munima tuqasaaqi varu vaisira tainta vara rauru kyero, nyaamwa nyiqanro munima vare varu vaisira taintavata vara rauru kyora.

13 Mwitaama kyero mwihuara tiqaro, Kotira mpukuqi qara ntumwa to quava tiqaro,
Nraakye qoravanto ni nraamwuanra Kotirara aakyara nte varia
nraamwunrave tivarave, turave. *(Aisaiaa 56:7)*

Nkye mwaaqi variavaro mpuara vaisivanto uqetaa mwatukyara votima
kyeroma mwaa nraamwuva vaiho, tiro.

14 Iesusiva mwitaa timwa kyero mwipi varuvata vu qipa vu vaisihuavata,
kyuqu kyauqu ntanrenra vuhuavata, mwiva hunani' nruvaro Iesusiva
mwihua kyuqema nyatovata qio varara.

15 Iesusiva mwihua kyuqema nyatero nronra kyaiqa vare varuvata
nraaqiaravanto Kotira nraamwuqi varita tiqata, Ntevitira mwaاقu mwia
nrutu tuaaheraate, tita.

Mwitaa ti varuvata Kotira nraamwuqaa ntaqikyi varu vaisihuavata
mwaanra okyara ti varu vaishuavata, mwi inraikyara taqeta Iesusira
inronrama mwateta Iesusirara qaqao tita,

16 E hiave nraaqiaravanto qua ti variara riaaro? tita.

Mwitaa tuvaro Iesusiva tiqaro, Eo, nte nraaqiara qua riauqo. Nkyevata
mpo, nkye hia Kotira mpukuqi mwaa quara kyaara ntqata taqaarave?
Mwitaama tiro:

E nraaqiara nraamwa nraahuavata kyaahaqa hiarata mwihua i nrutu
kyugema kyeta tuaahere variavo, turave, tiro. *(Ihi 8:2)*

17 Iesusiva mwitaa timwa kyero mwiva mwihua mwipi kyero veva ntero
mwatukya mwiaavata kyero Mpetaanini enta mwipi varirero viro.

Iesusiva tuvaro qakyaakya voti hu kyatariva tamusa vura

(Maaki 11:12-14, 20-24)

18 Mwia qanranraa toqaqi Iesusiva uro ntantero Ierusareminianra vu-
varo kyara nraataa hura.

19 Nraataa huvaro taqovaro qakyaakya voti huva fikivanto aanra
tokyan vahuvaro mwiva uro mwia tamwa hiqo kyero nraankye tiro
taqovaro mwanrevanto nraahu vahuvaro mwiva mwi kyatarirara tiqaro,
E hia qaiqaavata tamwa rienanrave, tuvaro mwiaqaatairo mwi kyatariva
tamusa viro.

20 Mwi kyatariva tamusa uvata Iesusira nraaqiaranramwu mwia taqeta
qikye tita, Nataama kyero kyatari mwituava qamwanrama tamusa viho?
titia.

21 Mwihua mwitaa tuvaro Iesusiva tiqaro, Nte qianinra riaate. Nkyen-
ramwuvata hia taara vu nraato tiraitifa, nianra kuaa vu nraato tuteta
qioma nte mwaa kyatarirara tuntema kyeta tivarave. Nkye hia mwi
kyaiqara nraahu varevarave. Nkye nronra kyaiqa mpo kyaiqa mpo kyaiqa
qio varevarave. Nkye mwaa taaqiraravata tiqata, Nramanriqi kyavuhu
quante, tivarо qioma mwitaa hiananrove.

22 Qikye, nkye mpo inraikyara Kotirara kyapara hiqatama mwiva
qutaama mwi inraikyara timwianrone tiraqaataitama nkye qio varevar-
ave, tiro.

Iesusirara tava i mwi kepukyara mwihanrave e mwitaa hiaro tura

(Maaki 11:27-33; Ruku 20:1-8)

23 Iesusiva mwitaa timwa kyero uro ntantero Kotira nraamwuqi uro
variqaro nraakye qora qua timwa nyi varuvata Kotira nraamwuqi Kotira
kyaiqa vara mwate varuhua mwihua nronra vaisinramwuvata, Iutaa
nronra vaisinramwuvata, mwinramwuhua mwiva hunani uro nteta mwia

inronra hita tiqata, E ta vaisiva variqarave mwaa kyaiqara vare variaro? Tava i nronraqama kyaiharave e mwaa kyaiqara vare variaro? tita.

24 Mwihua mwitaa tuvaro Jesusiva nkyiari timwa nyinro tiqaro, Kyai nte nraante nkyi kyapara hiarita nkye nte qiani quara qio timwa mpivera, nte ntena nronraqama vina variqana mwaa kyaiqara varaurara nkyi timwa nyiankye.

25 Tava Ioninra nronraqama kyovaro Ioniva nraakye qora nramanri nyunrave? Kotivave, qumina vaisivantove, mwia nronra qama kyovaro mwi kyaiqara varorave? Nkye timwa mpivaqena riaankye, tiro.

Iesusiva mwitaa tuvata mwihua nai kyapara hita nai kyapara hita tiqata, Tire nanra quave qiananrave? Tire tiqata Kotiva mwia nronraqama kyorave qiarera, mwiva tiriara nkye nanraqamave Ioninra quara hia quataave qiao qiananrove.

26 Tire tiqata qumina vaisivanto mwia nronraqama kyorave qiarera, tire nraakye qora ntuvantuama vita variahura aatu hiananrave. Ekyaa nraakye qoravonto Ioniva poropeti vaisivanto varurave ti variarave, tita.

27 Mwihua mwitaa timwa kyeta Jesusirara tiqata, Nai tava Ioninra nronraqama kyorave? Hia tire ntapihuro, tita.

Mwihua mwitaa tuvaro Jesusiva tiqaro, Nkye mwitaa qiyana nte nina nronraqama kyaihana mwaa kyaiqara vare varurara hia nkyitavata timwa nyianinrave, tiro.

Qoraisi nraaqiara taaratana vato vaisiraqaa ntumwa kyero timwa nyu quara

28 Iesusiva mwitaa timwa kyero tiqaro, Nte tirera hiani quara mwaanra nkye nataamave riaavo? Vaisi mpovanto qoraisi nraaqiara taaratana vatorave. Mwia qova nai mwaaku tauraarara tiqaro, Ni maquo, Mate uro uaini aakyooqi kyaiqa varaante, tuvaro

29 mwia mwaaku tauraava tiqaro, Qaqao, hia quataa ihana hia virerave, tiro. Mwitaa timwa kyero mwiva variqaro mpo vu nraato tu kyero nai qora uaini aakyooqi kyaiqa vararero vurave.

30 Mwiva vuvaro mwia qova nai nraaqiara nraakiaraara mwianravata uro kuaa qua mwia nraahu tuvaro mwiva qumina eo timwa kyerovata hia viraitiro qaqira kyero varurave, tiro.

31 Iesusiva mwi quara timwa kyero mwihua kyapara hiro tiqaro, Mwia nraaqiaratanaqitairo ta nraaqiaraava nai qora qua riorave? tuvata mwihua tiqata, Mwia vakyaava tauraava nai qora qua riorave, tita.

Mwihua mwitaa tuvaro Iesusiva timwa nyinro tiqaro, Qio mwi quara rieqatama nte tirera hiani quara ntapihi kye riaate. Taakisi vare variahuaavata, api nrohi varia nraakyehuavata, variavata nkye mwihuara uaquia hia nraakye qorahuave qiahua, mwihua nkyi nraatara kyeta Kotiva ntaqikyiraqi mwihua nraante vi variarave.

32 Haaru Ioniva nri ntero ntapihi kye vahi aanranra nkyi nyaamwutaankye tuvata nkye mwia quara hia quataa quave turave. Taakisi vare variahuaavata, api nrohi varia nraakyehuavata, Ioninra quara quataave turave. Nkye variqata taqovata mwihua Ioninra quara quataave tuvata nkye hia mwihua hunte hurave. Nkye mpo vu nraato tu kyeta uaquia hi aanranra qaqira kyeta Ioninra quara quataa quave qiyataara vahuvata nkye hia mwitaa hiraitita varurave, tiro.

Uaini tutoraqi hia kyuqema kyeta ntaqikyi varu vaisihuqaa ntumwa kyero tura

(Maaki 12:1-12; Ruku 20:9-19)

33 Jesusiva mwitaa timwa kyero tiqaro, Nkye rie varivaqena nte mpo quaqaa ntumwa kyena nkyi timwa nyiankye. Mwata airi vahu vaisiva uaini vara tuto, mwia vara ututu tutukya utu tero, mwata quvu kyero uaini tamwa tatianinra ututero, haraara nraamwu mpuahaantaq'i variq'a mpuara vaisiara taqeravata ututorave. Mwiaqaatairo mwiva nyianra mpo mwatani virera hiro, vaisi mponramwu timwa nyinro tiqaro, Nkye ni uaini aakyooqaa ntaqikyi mate varivae nte quankye, timwa kyero mwiva nyianra mpo mwatani vurave.

34 Mwini uro varuvaro uaini hiqi entava nri ntovaro mwiva nai kyaiqa vaisi mponramwu sitero tiqaro, Uro ni aakyooqaa ntaqikyi varihua tivata uaini ninanivata hiq'u nyivata vare nriate, tuvata mwihua mwini vurave.

35 Mwini vuvata mwia aakyooqaa ntaqikyi varuhua mwia kyaiqa vaisinramwu ntavaaqvavu kyeta mpo kyaamwuqo ntuqutu kyeta vateta, mpo ru kyeta, mpo origo ntuqutu kyeta vatorave.

36 Mwitaa huvaro aakyo qova qaiqaa vaisi kyaata airiqama sitovata mwihua tauraa mponramwu huntema kyeta mwihuavata kuaa qarama nyatorave.

37 Mwitaa huvaro aakyo qova nraakiara ekyara nai mwaاقu kuaiqia titero tiqaro, Mwihua mwia taqeta nianra mwia mwaاقuve tiqatama mwia kyuqema mwatevarave, tiro.

38 Mwitaa timwa kyero mwia titovaro vuyata mwia aakyooqaa ntaqikyi varuhua mwia taqeta nai timwa mwi nai timwa mwi hita tiqata, Mwaa vaisiva nai qova qutu viraro nai qora mwatavata ekyaa inraikyavata varaarivama variho. Nrivaqe mwia ru kyaararo mwiva vararerera hiari inraikyava tirini nraahu vahiarive, tita.

39 Mwihua mwitaa timwa kyeta mwia ntavaaqvavu kye aakyooqitaita mwaاقani mwaati kyeta mwia ru kyorave, tiro.

40 Jesusiva mwitaa timwa kyero mwihua kyapara hiro tiqaro, Mwitaa hurara tiro, aakyo qova nai mwaاقu rukyera kyaara nataave hiananrove? tiro.

41 Mwitaa tuvata mwihua Iesusirara tiqata, Aakyo qova uaqia hia vaisihaa mwihua ekyaa ru taiqa kyero mwiaqaatairo mwiva ni aakyooqaa ntaqikyiqata ninavata mpiate tiro, vaisi nraahumwa mponramwuma sita vataaanrove, tita.

42 Mwihua mwitaa tuvaro Iesusiva tiqaro, Nkye hia Kotira mpukuqi mwaa quara kyaara ntumwa kyeta riaarave? Mwataama tiro: Ori nraamwu hoqeqata ori mpora hia kyuqe orive timwa kyeta qaqlira kyaa oriva puhaqama viho. Kotiva mwi orira nronraqama kyairara tita, tire mwia taqeta kyuqe kyaiqave turo, turave. *(Ihi 118:22-23)*

43 Nte mwi quara rieqanama nkyiara mwataama tuqo. Nkye mwia mwaاقu uaqiamma mwatera kyaara Kotiva nkyiara hia ni nraakye gorave qiananrove. Mwiva nkyi qaqlira kyero mpo mwatanaahuara mwihua ni nraakye qora varivaqena nte mwihuaqaa ntaqikyi variarita mwihua kyuqe kyaiqa vara mataate, qiananrove.

44 [Mwi oriraqaa tuto ntuariva ntupepaa hiro pataqia pataqia utu quan Grove. Mwi oriva vaisiqa tumu ntirera, mwi vaisira ntuqutu kyero mwumwu ntamwa kyero kyaananrove, tiro.]

45 Jesusiva mwitaa tuvata Kotira nraamwuqaa ntaqikyi varuhuavata, Parisi vaisinramwuvata, variqata ntapihi kyovaro Iesusiva uaini aakyooqaa ntaqikyi varuhuaqaa ntumwa kyero mwihua tuvata

46 mwia ntavaaqvavuqita uro ko qiare timwa kyeta taqovata nraakye qora mwini ntuvantuuma vuhua Iesusirara poropeti vaisivantove tuvata mwihua nyaatu aatu hiqata hia mwia ntavaaqvavu kyora.

22

*Nraakyə varovata kyara nronraqaa ntumwa kyero tura
(Ruku 14:15-24)*

1 Iesusiva qaiqaa nraakyə qora qua timwa nyinrenro mpo qua mpo quaqaa ntumwa kyero timwa nyunra.

2 Mwiva mpo qua tiqaro, Kotiva nraakyə qoraqaa ntaqikyiani quara vahirero vunyaa vaisi mpovanto nai mwaaqvanto nraakyə varaaninranra rieqaro kyara tera taarama kye vatora votima kyero vaiho.

3 Vunyaa vaisivanto mwihua mwihua nyaanrama tero tiqaro, Nraakiara nkye nivatama kyeta kyara nraate, tiro. Timwa kyero variro kyara nrenra terama tero nai kyaiqa vaisi sitero tiqaro, Nkye uro mwihua timwa nyivata mwihua nrnumu kyara nraate, tuvata uro timwa nyuvata mwihua hia quataa hvutata hia vurave.

4 Hia vuvaro vunyaa vaisivanto nai kyaiqa vaisi mponramwu qaiqaa sitero tiqaro, Nte nyaanrama tau nraakyə qorahuara mwataama qiate. Nte kyara terama tauqo. Ntena kauvata mpo quara nraati kyugeravata rukye toqa uta vatauqo. Ni maaqvanto nraata varaaninra nrnumu taqeta mwi kyarara nraate, qiate, tiro.

5 Mwiva mwitaa tuvata mwiva nyaanrama to nraakyə qorahua hia mwia qua riaraita, mwihua nkyiari kyaiqa nraahu varaqita vurave. Mpovanto nai aakyogi vuvaro mpovanto nai kyoqaa kyaiqa varareru vuvata kyeta ntuqutu kye vateta ru kyorave.

7 Mwitaa huvaro vunyaa vaisi mwia nai mpoqama kyero raraqa tovaro nai ntaqu vaisihua sitovata mwihua uro nai kyaiqa vaisinramwu rukyo vaisihua nkyiari rukyeta mwihua mwatuqyave nraamwuve qia quara kyorave.

8 Mwiaqatairo vunyaa vaisi mwiva nai kyaiqa vaisi mponramwu nyaanrama kyero tiqaro, Ni maaqvanto nraata varaani kyarara nte terama tauqo. Nte nraakyə qora nyaanrama tena taqauqaro mwihua kyaiqavanto hia qioqa iharo mwihua ni kyara nrevavata hia qioqa iho.

9 Nkye mwihua qaqlira kyeta uro hisai hisai aanra ntuvantua hiraqa ta nraakyə qorahuave taqaivata varihua mwihua sita kyeta mwihuara tiqata, Vunyaa vaisivanto kyara nraaminra nkyevata uro nraate qiate, turave.

10 Mwitaa tuvata mwia kyaiqa vaisinramwuvanto aanrasaita ta nraakyə qorahuave taqohua kyuqehuave, uaqia uhuvare, ntuvantuuma kyeta sitaqita uro kyovata mwihua kyara nro nraamwunra piqa kyorave.

11 (Mwi entara nraata varaani kyarara nranrenrata nru vaisihua gesana nri ntovaro gesana ntaqikyuvu mwihua tavunaqotairo mwunrūqama tovata uro mwatakyaa vita varura. Vunyaa vaisi mwia tavuna rupa varo vaisiva nraahu qio mwipi mwatakyaa quarive tura.)

Mwihua nraamwuqi hvutai vuvaro vunyaa vaisivanto taqovaro qesanatairo hia tavuna varo vaisiva nraamwuqi varuvaro

12 mwiva mwi vaisirara tiqaro, Qikye, ni vaisio, e hia gesanataira ni tavuna ruparaitira, e tanama kyerave mwaaqi vera ntera hiaro? tuvaro mwi vaisiva hia qio qua turave.

13 Hia qua tuvaro vunyaa vaisivanto nai kyaiqa vaisinramwu timwa nyinro tiqaro, Nkye mwaa vaisira kyuqu kyauqu rūpa kyeta uto mwaatani upi hiraqi kyaate. Mwiva mwini variro ntateqaro nai aanrai kutiqaro variarive, turave, tiro.

14 Iesusiva mwi quara timwa kyero mwiva tiqaro, Kotiva airi nraakyə qora nyaanramatairaqitairo mpoqiatana nraahu sitaanrove, tiro.

*Taakisiqa hirara Jesusira kyapara hura
(Maaki 12:13-17; Ruku 20:20-26)*

¹⁵ Iesusiva mwitaa tuvata Parisi vaisinramwuvanto mwitai veva nteta uro ntuaantuuma vi varita tiqata, Nanra quave kyapara hiararo Iesusiva api qua qiananrove? Kyai mwaa quara kyapara hiare, timwa kyeta

¹⁶ mwihua nkyiari sataqi nrohu vaisihua mponramwu siteta Herotira nramwunaahua mponramwuvata sitovata mwihua Iesusiva varunani uro nteta tiqata,

Mwaanra ti variara vaisivao, e mwaanra okyara timwa timwianrata tire taqaurara e qutaa qua ti variaravave. E hia vaisi nraatu aatu hiraitira, vaisi nronranravata, qumina vaisiaravata, kuaa qua nraahu ti variaravave.

¹⁷ Tire mwaa quara qiananranra e nataamave riaaro? Tire Kotira qua rieqatama qiove tire Romeni mwihua vunyaa vaisi Sisaara taakisi mwiananrave? (Mwi mwatanaahua hia Kotira qua riaarave.)

¹⁸ Iesusirala api qua qiarive tu quara Iesusiva vaakya ntapihi kyero mwiva tiqaro, Nkye unraqama kyeqata kyuqe kyaiqa vare variahuve. Nkye nanraqamave nivanto api qua qiarive tita mwitaa ti variavo?

¹⁹ Taakisi munima kuaiqia ni naamutaiavaqe taqaankye, tiro.

Mwitaa tuvata mwi munimanra kuaaru mwuvuaro

²⁰ Iesusiva mwihua kyapara hiro tiqaro, Munima mwiaqaa tara virive vaiho? Tara nrutuve vaiho? tiro.

²¹ Mwitaa tuvata mwihua tiqata, Sisaarave, tuvaro Iesusiva mwihuara tiqaro, Mwianra rieqatama nkye Sisaava hianinra nai mwiate. Kotiva hianinra Kotira mwiate, tiro.

²² Iesusiva mwitaa tuvata mwihua mwia qua rieta tiqata, Qikye, mwiva tiri qua nraatara kyero kyuqe qua tiho, timwa kyeta kyauqu ntukikin-rraaqata kyeta Iesusira mwini kyeta burama.

*Qutu vita qaiqaa qati sivi okyarara Saitiusivanto Iesusira kyapara hura
(Maaki 12:18-27; Ruku 20:27-40)*

²³ Mwi entara Saitiusinramwuvanto Iesusiva varunani uro ntora. Mwi vaisihua nkyiari mwaanra qua rietama tiqata, Vaisivanto qutu quariva ekyara qutu viro hiama qaiqaavata siquananrove, ti varu vaisihua uro nteta Iesusira kyapara hita tiqata,

²⁴ Mwaanra ti variarao, tiri haivaqava Mosesiva mwaanra qua tiqaro mwitaa timwa torave. Vaisivanto hia nraaqiara mwataraitiro qutu viraro mwia qatavantove mwia vakyaavave mwia nraata varatero nraaqiara mwata humwuanrama mwataarive, turave.

²⁵ Tire qua qiananra riaante. Haaru mwaini qate vakye 7 nramwu varurave. Sakyava nraakye mpo varatero hia nraaqiaravata mwataraitiro qutu vuvaro mwia qata mwia nanaava mwia nraata varatero

²⁶ mwivavata qati variqiro viro uro qutu burave. Mwiva qutu vuvaro mpo mwia nanaava mwi nraakyera varatero hia nraaqiaravata mwataraitiro, qati variqiro viro qutu vuvaro qio mwitaamagi vita ekyaa mwi qate vakyenramwuhua mwi nraakyera varateta hia nraaqiara mwataraitita, qati qutita burave.

²⁷ Qutu vuvaro nraakye mwivavata variro qutu burave.

²⁸ Nraakiara nraakye qora qutiraqitaita qaiqaa qati sivi entaraqaa mwi nraakyeva tara nraatave variananrove? Mwiva qati varu entara qoraisi 7 nramwu varatorave, tita.

²⁹ Saitiusi vaisinramwuvanto mwitaa tuvaro Iesusiva mwihua nkyiari timwa nyinro tiqaro, Nkye Kotira qua qara ntumwa tora hiave ntapihi hiavo? Nkye Kotira kepukyara hia riaarave. Nkye hia ntapihiahuara tita, nkye api qua qiaovo.

30 Nraakiara nraakye qora qutu vihua qutu viraqitaita qaiqaa sivi qati variqvi vi entara hiama nraakye qora nai vare nai vare hivarave. Mwihsa nyaamwunyahaahua votima kyeta qati varivarave, tiro.

31 Iesusiva mwitaa timwa kyero mwiva tiqaro, Nraakye qora qaiqaa qati sivi vari okyarara nte nkyi kyapara hirerave. Nkye hia Kotira mpukuqi mwaa quara qara ntumwa tora kyaara ntumwa kyeta riaarave? Kotiva mwitaa turave:

32 Nte Kotiva nte i haivaqahua mwanriqavanto varuquo. Nte i haivaqahua Evarahaamunraqaave, Aisaakiraqaave, Iaikopuraqaave, ntaqikyi varuvave, turave. *(Kyatura 3:6)*

Qio riaate. Qutu viro taiqavi inraikyaraqaa hia Kotiva ntaqikyi varivave. Qutu viro qaiqaa siviro qati variqiro vi inraikyaraqaa Kotiva ntaqikyi varivama variho, tiro.

33 Iesusiva mwitaa tuvata nraakye qoravanto mwini ntuvaantuuma vuhua mwia qua rieta tiqata, Qikye, Iesusiva okyara quama timwa timwiho, tita.

Nanra quave Kotiva vuni vatai quava vaiho? tura

(Maaki 12:28-31; Ruku 10:25-28)

34 Parisi vaisinramwuvanto rioraro Iesusiva Saitiusi vaisinramwuvanto tu quara nraatara kyovata mwihua ntuvaantuuma vuraqitairo

35 vaisi mpovanto mwaanra okyara timwa nyi varu vaisiva Iesusirara api qua qiarive tiro, mpo qua Iesusira kyapara hiro tiqaro,

36 Mwaanra ti variarao, Kotiva qua timwa toraqitairo nanra quavantove nronraqama kyero vuni vahi quava vaiho? tiro.

37 Mwitaa tuvaro Iesusiva timwa mwino tiqaro, Iqaa ntaqikyira Kotirara ekyaa ena mwutukyajitairave, ekyaa ena mwanraquraqitairave, ekyaa ena vu nraatoqitairave, mwianra nraahu mwutukyä vahirara variante, turave. *(Lo 6:5)*

38 Qio mwi quava okyara qua vuni vahi quava vahirave.

39 Mwi quara nraakiara okyara qua mpo vaiho. Mwi quava vuni vahi quara votima kyeroma vaiho. Mwitaama tiro:

Inanra mwutukyä vahintema kyero ina nramwunaanranravata i mwutukyä vahiarive, turave. *(Wok Pris 19:18)*

40 Mwi quavavata okyara qua puha rataara votima kyero vahiaro ekyaa mpo qua Mosesiva timwa to quavave, poropeti vaisivanto timwa to quavave, mwi quatanaqaa hiriviro vahirave, tiro. Iesusiva turama.

Iesusiva Mesaiaara kyapara hora

(Maaki 12:35-37; Ruku 20:41-44)

41 Parisi vaisinramwu mwini ntuvaantuuma vita varuvaro Iesusiva mwihua kyapara hiro tiqaro,

42 Nkye Kotiva titai vaisira Mesaiaara nataamave riaavo? Mwiva tara okyaraqitairo mwatataarivave variananrove? tiro. Iesusiva mwitaa tuvata mwihua tiqata, Mwiva tiri haivaqara Ntevitira okyaraqitairo qovara hiananrove. Mwiva Ntevitira nraisima variananrove, tita.

43 Mwihua mwitaa tuvaro Iesusiva tiqaro, Nataama kyero Mesaiavanto Ntevitira nraisim variananrove? Haaru vetato entaqaa Ntevitiva varuvaro Kotira mwanraquravanto mwia kyaahaqa huvaro Ntevitiva Mesaiara tiqaro, Mwiva ni nronravavto turave. Ntevitiva mwataa turave:

44 Kotiva ni nronra vaisiara tiqaro,

E nritarera ni kyauqu kyaatutani mwatakyaa vira variraqena nte i nramwutaahua ru taiqa kyena nraatara kyaarira e mwihuaqaa kyuqu ntamwa tera variante, turave. *(Ihi 11:01)*

Ntevitiva mwitaa turave, tiro.

⁴⁵ Iesusiva mwitaa timwa kyero qaiqaa kyapara hiro tiqaro, Ntevitiva Mesaiaavanto qovara hianinranra tiqaro, Mwiva ni nronra vaisive, turave. Ntevitiva mwitaa turara tiro, nataama kyerove Mesaiaavanto Ntevitira nraisi variananrove? tiro.

⁴⁶ Iesusiva mwitaa tuvata mwihua nai timwa mwianre tita quara puua huvaro hia vahuvata mwihua mwi entaraqaataita aatu hiqata qaiqaavata mpo qua mwia kyapara hiarorave timwa kyeta varura.

23

*Parisi vaisiaravata mwaanra okyara ti varu vaisihuaravata tura
(Maaki 12:38-39; Ruku 11:43, 46, 20:45-46)*

¹ Iesusiva mwitaa timwa kyero nraakye qora mwini ntuaantuama vita varuhuaravata nai nraaqiaranramwuanravata tiqaro,

² Mwaanra okyara ti varia vaisihuaravata, Parisi vaisinramwuvata, Mosesiva timwa to quara kyuqe qua nkyi timwa nyiqi vi variara

³ nkye mwia riemwaqita quate. Nkye mwihua qua mwia nraahu rieqatama hia mwihua nrohiantema kyeta nrohiate. Mwihua mpohuara nkye mwitaa mwataa hiate timwa kyeqata nkyiari hia mwitaa hiraitita, mwihua uaqiamma kyeqata nrohi variarave.

⁴ Qikye, mwihua nronraqama kyero muaanra ntai quara rupa kyeta varaqita uro nraakye qoraqaa qu nyateta mwihuara qu varaate timwa kyeta mwihua hia nkyiari kyauqu tutu kyeta nraakye qora kyaahaqa hi variarave.

⁵ Nraakye qoravanto mwihua mwahuta qiate tita, Parisivanto Kotira kyaiqa vara mwate variarave. Mwihua Mosesiva tu quara qara ntumwa kyeta qapuqama kyeta nkyiari tiriqa quteta, kyaataaqivata rupateta, tavuna mpuahaa kyuqera rupa vareta nraakye qoravanto mwihua taqaate tita, mwatukyaaqaa nrohi variarave.

⁶ Mwihua omwata nraanraqaa uro variqata vaisi nronravanto mwatakyaa viqata varianani variare timwa kyeqata variarave. Mwihua mwaanra nraamwuqi uro variqata kyuqe taintaqaa nraahu mwatakyaa vita variarave.

⁷ Nraakye qoravanto mwihua kyuqema kye qua mwantegata mwaanra qua ti vari vaisivave qiate tiqata maaketiqi mwihua kyakyama kyeqata nrohi variarave.

⁸ Nkyevata kuua qara hivorave. Vaisi mpovanto nkyi qua mwantero nkyiari tiqaro, E vaisi nronra mwaanra qua ti variaravave, qiankyorave. Mpovanto mwitaa tirera, nkye mwianra, Hia qaiqaavata mwitaa qiate, qiate. Tire qata vakyaama varuro, qiate. Tiri mwaanra qua timwa timwi variva kuaikuvanto nraahuma variho qiate.

⁹ Nkyi sova kuaikuvanto nyaamwuni varirara tita, hia mwatani variani vaisira mpora tiri tiqovave qiate.

¹⁰ Nkye vaisi mpora tiri qiate vaisive tivorave. Nkye tiqata, Kotiva titava Mesaiaavanto, mwiva nraahuma tiri qiate vaisivanto variho, qiate.

¹¹ Nkyiqitairo mpovanto nronra vaisi varirera, mwi vaisiva nkyini kyaiqa vara nyataariva variarive.

¹² Nai nrutu tuaaheraariva variraro Kotiva mwia nrutu vara mwataniqama kyaananrove. Nai nrutu vara mwataniqama kyaariva variraro Kotiva mwia nrutu tuaahera kyaananrove, tiro.

Mwaanra okyara ti varu vaisihuavarata Parisi vaisiaravata po kye timwa nyatora

(Maaki 12:40; Ruku 11:39-52, 20:47)

¹³ Mwaanra okyara ti variahuavata, Parisi vaisivata, nkye unraqama kyeqata kyuqe kyaiqa vare variahuave. Nkye nraakiara uaqiamma virara rieqanama nte nkyiara po kye timwa nyatauqo. Nraakye qoravanto Kotiva ntaqikyiraqi virera uti variavata nkye qesa mwihua suqaa vahira vara mwatumwi tite variavo. Mwitaa hiqata nkye nkyeta mwihua hia Kotiva ntaqikyiraqi viraitita, mpohua mwipi virerata uti variavata nkye mwihua anra tite variavo.

¹⁴ [Mwaanra okyara ti varia vaisihuavata, Parisi vaisivata, nkye unraqama kyeqata kyuqe kyaiqa vare variahuave. Nkye vita raupirima virara nte po kye tuqo. Nkye tetooq nraakye mwihua nraamwu mpuara yare varifa tiqata, Mpovanto tire uaqia hi kyaiqara utuananra taqero tiraria uaqia hia vaisihuave tivorave, tita nkye nraakye qora suqaa variqata Kotirara mpuahaaqama kyeta aakyara nte variarave. Po, mwia kyaara nkyiqa qua vahiariva nronraqama kyero vahiananrove.]

¹⁵ Mwaanra okyara ti varia vaisihuavata, Parisi vaisivata, nkye unraqama kyeqata kyuqe kyaiqa vare variahuave. Nte nkyiara po kye tuqo. Nkye airi väisi vara uaqiamma kyarerata uti variarave. Väisi mpovanto nkyi qua rieqaro nkyi vataqiro quarive tita, nkye mwia puua hirerata kyaarerera nronra teqa vareta nyianrani nrohiqata mwia puaama kyeta mwia nkyeta kyaiqa nraamwutavararo mwiaqaatairo mwi väisiva nkyiyata nraataro kyero mpoqiaavata uaqia hi väisiva varirave. Nkye utuaraqaara mwiaqaa qua nronravantoma vahiananrove.

¹⁶ Nkye mpohua anra nyaamwutarerata uti variavaro nkyita su qipa vihua variavo. Nkye nraakiara vita raupirima virara nte po kye tuqo. Nkye nraakye qora mwaanra okyara timwa nyiqata mwitaama tita, Vaisivanto Kotira nraamwu nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava hia mwia tutaananrove. Vaisivanto Kotira nraamwuqi vahira kori munima nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva hia mwi quara nteqa kyaarive, qiarave.

¹⁷ Nkye mwitaa tiqatama api quama qiaovo. Nkyi su qipa vihata variavo. Kotira nraamwuvanto vuni vahi inraikyavama vahira. Kori munimavanto Kotira nraamwuqi vahiarora tiro, Kotira nraamwuvanto mwi munimanra vara kyotataqama kyaarive.

¹⁸ Nkye mwaanra qua apiqama kyeta nraakye qora timwa nyita tiqata, Quara rukyeta Kotira mwi varia taintara vaisivanto mwi taintara nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava hia mwia tutaananrove. Vaisivanto mwi taintaraqaa rukyero vatai quarara nrutu nteqaro nai kyauqu nriqiqaa vatero tiqaro, Nte mwitaa mwitaa hirerave, tirera, mwiva qiaru quava mwia tutaananrove. Mwiva mwi quara hia nteqa kyaarive, qiarave.

¹⁹ Nkye mwitaa tiqatama api qua ti variavo. Nkyi su qipa vihata variavo. Tainta mwiaqaa rukyeta vataa quarava hia tainta mwia nraataro kyero vuni vahi inraikyava vahirave. Kotira nraamwuqi vahira taintava vuni vahivara tiro, quara mwia vara kyotataqama kyaarive.

²⁰ Vaisivanto kyauqu nriqiqaa vateqaro mwiva tainta mwia nrutu nteqaro mwiva hia nraamwu nrutu nraahuvauma ntero, mwiva nraamwu nrutuvata, nraamwuqi varira Kotira nrutuvatama, nterove.

²¹ Vaisivanto nai kyauqu nriqiqaa vatero Kotira nraamwu nrutu nteqaro mwiva hia nraamwu nrutu nraahuvauma ntero, mwiva nraamwu nrutuvata, nraamwuqi varira Kotira nrutuvatama, nterove.

²² Vaisivanto nai kyaqu nriqiqaa vatero nyaamwu nrutu nteqaro mwiva hia nyaamwu nrutu nraahuvama ntero, mwiva Kotiva mwatakyaa vi taintara nrutuvata nteqaro mwi taintaraqaa mwatakyaa viro varira Kotira nrutuvatama nterove.

²³ Mwaanra okyara ti varia vaisihuavata, Parisi vaisivata, nkye nraakiara raupirima virara rieqanama nte nkyiara po kye timwa nyatauqo. Nkye unraqama kyeqata kyuqe kyaqa vare variahuve. Nkye uapaa kyara haantave, honti mperu mwia nraahu Mosesira qua riemwaqita viqata ntainra kye Kotiranive, qiaro nai mwi variarave. Nkye mwi quara nraahu riemwaqita virerata uti variqata mwaanra qua mpovanto mwi quara nraatara kyero vhira, mwi quara nkye hia rie variarave. Ntapihi kye ko ti okyararave, po kye timwa nyate okyararave, Kotirara kepuqyagama kyeta rie okyararave, nkye mwi quara mwi quarara hia nronraqama kyeta rie variarave. Nkye pata qua rieqatama mwi quaravata, nronra quavata, riemwaqita quataarave.

²⁴ Nkye mpohua aanra nyaamwutarerera uti variavaro nkyita su qipa vihata variavo. Nkye nramanri nraanre titi taqaavaroo upauvanto mwipi vahata nkye mwia qatinani vara kyeta aasau nronravanto mwipi vahira mwiaavatama kyeta nrapitama kye variarave.

²⁵ Mwaanra okyara ti varia vaisihuavata, Parisi vaisivata, nkye raupirima virara nte nkyiara po kye timwa nyatauqo. Nkye unraqama kyeqata kyuqe kyaqa vare variahuve. Nkye kaapuvata tanuvata mwaaqani nraahu hiqe variahuve. Nkye nkyeta pahi nraahu hiqama kyaavaro nkyi utaqi vaisi rukyevave, mpuara varevave, nkyetara nraahu rieqata vare varivave, mwi inraikyava nraahu vahio.

²⁶ Nkye Parisi vaisi mwaahua, nkyi su qipa vihata variahuve. Nkye kaapuvata tanuvata utaqi nraante hiqama kyaivaro mwaaqanivata kyujema vahiarive.

²⁷ Mwaanra okyara ti varia vaisihuavata, Parisi vaisivata, nkye nraakiara vita raupiri hirara nte nkyiara po kye tuqo. Nkye unraqama kyeqata kyuqe kyaqa vare variahuve. Vaisi quntamwa tetu simenti ntamwa kyeta mwiaqaa penti egarori qutaara nkye mwia votima kyeta variarave. Simentiqaa penti egarori qutaara taqebaro mpovanto kyujema kyero vahio tiharovata mwataqi qutu vira mwukyaarivata tapitai inraikyava nraahuma vahio.

²⁸ Mwia votima kyeta nraakye qoravanto nkyi mwaaqani taqebaro yaisi kyuqe hiahuave qiavarovata nkyi utaqi unra qua ti variavavata, uaqia hi kyaqara uti variavavata, piqairave.

²⁹ Mwaanra okyara ti varia vaisihuavata, Parisi vaisivata, nkye nraakiara vita raupiri hirara nte nkyiara po kye tuqo. Nkye unraqama kyeqata kyuqe kyaqa vare variahuve. Nkyi haivaqahua haaru variqata poropeti vaisi Kotira qua qovarama kye varu vaisihua rukyeta quntamwa torave. Mwihua quntamwa toraqaa nkye kyujema kyeta haraara nraamwu hoqa nyate variarave. Nkyi haivaqahua variqata avuqavuma kyeta nrohu vaisihua rukyeta quntamwa toraqaa nkye ntupi kyeta kyuqe hi variarave.

³⁰ Nkye mwihua nyaisivanto tiqata, Tire haaru mwi vakya variavaratiri, hiama tire tetu haivaqahua nraantanteta poropeti vaisi mwihua ruavaratirio, qiarave.

³¹ Nkye tiqata, Tiri haivaqahua haaru poropeti rukyohua tire mwaa mwihua nyaisima varuro, qiarave. Nkye mwitaa qiavaro nkyeta qia quavama nkyita tutaiho.

³² Qio nkyeta haivaqahua uaqia hi kyaqara tohara taara varaqita uro taiqa kyaate.

33 Nkye quaihavanto variavo. Nkye quaiha nraaqiaravanto variavo. Kotiva nkyi ko timwa kyero qia nronraqi tuto kyaananrove. Hia qio nkye mwitqitaita ntugema kyeta vivarave.

34 Nte qianinra riaate. Nte poropeti vaisive, kyuqe vu nraato vataa vaisive, kyuqe qua timwa nyi vaisihuave, sitaarita nkye mwihua mponramwu ru kyeta mponramwu rukyeta kyatariqaa hiriteta mponramwu nkyeta mwaanra nraamwuqi sitaqita ntuqutu kyeta vateta mponramwu mpo mwatukya mpo mwatukyaqitaita ntuqutu sataqita nröhivärave.

35 Mwianravata rieqaro haaru mpo vaisinramwu ru kyo quavavata nkyiqama vahiananrove. Tauraqaama kyero Everira qumina rukyoraqaatai tohara kye mwihua ruqi nrira nrumu ekyaara Mperekiaara mwaaku Sekaraiaara rukyorave. Mwia rukyarerata Kotira nraamwuvanto hini vahuvaro, quara ruky qia quara mwate varu taintava hini vahuvaro, Sekaraiaava Kotira kyaiqa vareqaro utana varuvata mwia rukyorave. Ekyaa mwihua rukyo quavavata nkyiqama vahiananrove.

36 Nte qianinra riaate. Mpohua mpohua Kotira nraaqiara rukyo quava, ekyaas mwi quava mate mwaa entara varihuaqaama vahiananrove, tiro.

Iesusiva Ierusalem taqovaro mwia ua huvaro po tura (Ruku 13:34-35, 19:41-44)

37 Iesusiva mwitaa timwa kyero tiqaro, Po, Ierusalemqinaa nraakyee qora tuaavo, Ierusalemqinaa nraakyee qora tuaavo, nkye Kotira poropeti vaisinramwu ru kyaahuave. Kotiva sitai vaisihua variavata nkye ori pati kyeta mwihua ntuqutu kyaahuave. Kokoraaravanto nai nraatiqaa nraaoqya iri kyero qutaintema kyena nte airi nani nkyiara po timwa kyena nkyiqa ntaqikyiankye tuqata nkye ni qoririma kyeta ni qaqlira kyaavo.

38 Mwia kyaara Kotiva nkyi qaqlira kyairaro nkyi mwatukyaq hia vaisivata varivararo qumina mwata nraahuma vahiananrove.

39 Nte qianinra riaate. Nkye mwaa entaraqaataita hia ni taqaraitita varivaqena nte qaiqaa tumu variarita nkye mwi entara ntapihi kyeta ni taqeta nianra tiqata, Kotiva titai vaisiva tumiho. Mwia kyuqema mwataate tivarave, tiro.

24

Kotira nraamwu ntukuraakurama kye taiqa kyerara tura (Maaki 13:1-2; Ruku 21:5-6)

1 Iesusiva mwitaa timwa kyero Kotira nraamwu mwini kyero virera utuvata mwia nraaqiaranramwuvanto tiqata, Kotira nraamwu kyuqera mwaa taqaante, tuvaro

2 Iesusiva eo tiro, Nkye mate nraamwu mwaa mwiaavata kyuqe inraikya mwipi vahiravata taqaavararo vahirave. Nte qianinra riaate. Nraakiara ori taqaautaava mpoqivantovata hia nai mwoqaqa nai mwoqaqa vahiananrove. Nraamwu mwaa ntukuraakurama kyaivararo tumu ntiro orivanto mumuni utu quananrove, tiro.

Iesusiva nraakiara airi muaanravanto qovara hiananrove tura (Maaki 13:3-13; Ruku 21:7-19)

3 Iesusiva mwitaa timwa kyero uro Oripi taaqiqa mwatakyaa viro varuvata mwia nraaqiaranramwuvanto nkyiari nraahu mwiva varunani uro nteta mwia kyapara hita tiqata, Vaakya qiarava taireve qovara hiananrove? Nanra inraikyavanto qovara hiraqeta tire mwiaqaa vitama kye taqetave tire iara mwiva qaiqaa tuminranro mwaa mwatara taiqaani entava qaumatoma vaiho qiananrave? tita.

⁴ Mwihua mwitaa tuvaro Jesusiva tiqaro, Mpovanto nkyi unra qua timwa nyianinranra rauriqata variate.

⁵ Nraakiara vasis airivanto qovarama vita ni nutu nteqata Kotiva ni titaihana nruvave tivata airi nraakyae qoravanto mwihua unra quara qutaa quave tivarave.

⁶ Nkye varivata ntaqiqata qua vora ntaivata hia aatu hiate. Ntaqi quava aanrasairo nrinrata hia aatu hiate. Ntaqi variva nri ntairata nkye ekyara enta nri ntaaho tivorave. Mwi inraikyava nraante qovara hiananrove.

⁷ Mpo mwatanaava mpo mwatanaanravata ntaquananrove. Qiata vaisivanto qiata vaisivata ntaquananrove. Mpo mwataqi mpo mwataqi nronraqama kye aara nte entava vahiananrove. Mpoqi mpoqi mwatura tuananrove.

⁸ Ekyaa mwi inraikyava qovarama virata hia ekyara enta nri ntaaho qiate. Nraaqiara mwatarero qakyo atura ntuariva vahiaro vuni nriqa vi inraikyara pataqia tohara taintema kyero, muaanra vahiani entava qati tohara taiho, qiate.

⁹ Mwi entara nkyi ntavaaqavuqita uro kyaivata nkyi uaqjama nyateta nkyi ru kyeverarave. Mwi entara nkye ni nraakyae qora varivatara tita, mwia kyaara ekyaa mpo mwatanaaa mpo mwatanaahua hia nkyiara mwutukya vahirata varivarare.

¹⁰ Mwi entara nianra qutaa mwivave tihua airivanto qaqira kyeta nramwutaavanto nrivata nkyiari henahua qovarama kyeta vitira mwivave mwaa mwivave timwa kyeta mwihua nramwutaqa hivarare.

¹¹ Mwi entara airi vaisivanto qovarama vita variqata nte Kotira qua qovarama kye varuvave timwa kyeqata airi nraakyae qora unra aanra nyaamwutevarare.

¹² Mwi entara uaquia hiarai kyaiqava nronraqama kyero vahirata airi nraakyae qoravanto mpohuara mwutukya vahianinra qaqira kyeverarave.

¹³ Mwi entara hia pupohairaro kepukyajama kyero variqiro viqaro uro kyuqe aanra taiqa kyaani vaisira, mwiamma Kotiva vitairaro nyaamwuni uro variananrove.

¹⁴ Kotiva nraakyae qoraqaa ntaqikyiani quara timwa nyiqi vivata ekyaa mwata mwaaqaa varihua mwi quara riaivaro qio mwiaqatairo ekyara enta nri ntaananrove, tiro.

Anoma kyero qora inraikyavanto qovara hianinranra tura

(Maaki 13:14-23; Ruku 21:20-24)

¹⁵ Jesusiva mwitaa timwa kyero mwiva tiqaro, Nraakiara nkye taqaivaro uaquia hiarai inraikyava vaisi vehi utu kyaari inraikyava qovarama quanrove. Vetato entaqaa poropeti vaisi Ntanieriva mwi inraikyara qora inraikyara turave. Nkye taqaivaro mwi inraikyava Kotira nraamwu turuarani hia qumina vaisivanto vera nteta vari nraamwunraqi uro siviro variananrove. (Mwaa quara kyaara ntirava ntapihi kyera riaante.)

¹⁶ Mwiva mwini uro varirata Iutiaani varihua sivita hiantamwa teta verara taaqiqa quate.

¹⁷ Mwi entava nri ntairaro nraamwu aatareqani variariva hiantero virera hiro hiama nraamwuqitairo vera ntero mpo inraikyavata varaarive, qatima hiantero quarive.

¹⁸ Mpovanto aakyogi kyaiqa vare variariva hiama hiantero nai vaaqtua vararaitiro, qatima hiantero quarive.

¹⁹ Mwi entara nraaqiara tuaqama quari nraakyevave, nraamwa mwi variari nraakyevave, po, anomia kyero mwihuara hia kyuqe enta vahiananrove.

20 Hia kyuqema kyero huari itaani entaraqaave, mwaanraqaave, mwi entava nri ntairata nkye hianteta quare tira mwukyaari tukyevavarave. Mwianra rieta nkye Kotirara aakyara tivaro huari kyuqema kyero itaan-inraqa mwi entava nrinrata nkye qio aatu quate.

21 Po, nraakiara mwi entava nri ntairata muaanra nronra vareta atura ntqiqata varivarave. Nraakye qoravanto uaqiamma vita varivarave. Haaru mwata mwaa ututo entaraqaatairo hia mwitaa hi entavavata qovara hurave. Nraakiaravata hia mwi entara voti hiariva qaiqaavata qovara hiananrove.

22 Mwi entava mpuahaa enta vahiratavauma, ekyaa nraakye qora taiqa vivaro hia mpoqiatavata variananrove. Qio Kotiva nai kyaama tai nraakye qorahuara rieqaroma mwi entara qiquqama kyaananrove.

23 Mwi entara mpovanto nkylara Kotiva titaiva Mesaiaavanto mwainima variho, mwiniha variho, tirera, hia mwia qua riaate.

24 Mwi entara airi vaisivanto qovarama vivaro mpovanto unra tiro tiqaro, Nte Mesaiaave, tiraro mpovanto, Nte Kotira qua qovarama kye varuvave, tiraro mwitaamaqita viqata airi unra ti vaisihua qovarama vivarave. Mwihua qovarama vita unra kyaiqa varaqi viqata Kotiva nai kyaama tai nraakye qorahuara mwihua tiri quara quataa quave tiqata uaquia hi aanraqaa quate titi, nronra kyaiqa varaqita vivarave.

25 Qio nkye hia mwi vaisihua quara quataa quave qiate tina, nte mwaa entara variqana nraakiara qovara hianinranra mate nkyi timwa nyi varuqo. (Nte nraakiara tumu qoqaa variarita ekyaa nraakye qora ni taqevarave.)

26 Mwi quara riemwaqita vivaro nraakiara mpovanto nkyi timwa nyiqanro nianra mwiva qovarama viro qumina satama variho tirera, hia mwini ni taqarerata quate. Nkyi timwa nyiqanro nianra mwiva nraamwu mwipi uqeta viro variho tirera hia mwia quara quataave qiate.

27 Aaquakyaa tiharo ekyaa nyaamwuvanto ntuvahama vintema kyenama nte mwatani mwatatai nraaqiarava qoqama tumuaninrave.

28 Taraqaave qutu quari inraikyava vahianinra mwiaqama memonravanto ntuvantua hivarave, tiro.

*Iesusiva nai qaiqaa mwata mwaini tumuaninranra tura
(Maaki 13:24-27; Ruku 21:25-28)*

29 Iesusiva mwitaa timwa kyero tiqaro, Nraakiara muaanra nronra vareqata atura nti entava taiqa viraro mwi entaraqaatairo qamwanrama huari vuvanto entama viraro toravanto hia itairaro qovoravanto tumu nti tumu nti hiraro nyaamwuni kepukya inraikya vahiva ekyama qakyaa qakyaa hiananrove. **(Aisaiaa 13:10, 34:4)**

30 Mwi entara nraakye qoravanto nyaamwuqi mpo inraikya qovara hianinra taqeqtatama qio mwia nianra mwiva tuminrenro tera iho tivarave. Mwihua mwitaa timwa kyeta ekyaa mwata maata vahintema varihua kyora mwata hivarave. Mwihua kyora mwata hi variqata tage varivage nte mwatani mwatatai nraaqiarava nyaamwusaina tonamwuqi tumi variarita ni taqevarave.

Nte mwunruqama taari inraikyava mpoqama kyero itero ntuvahero ante anta hi variraqena nte kepukyavanto tumi

31 variqana nyaamwunyaahua sitaarita ntomavanto nronraqama kyero nruqua tirata mwihua uro mwata mpoqitai mpoqitaita Kotiva nai kyaama tai nraakye qorahuara ekyaa ntuvantua kyea sitevarave, tiro.

*Iesusiva fikiqaa vitama kye taqaate tura
(Maaki 13:28-31; Ruku 21:29-33)*

³² Iesusiva mwitaa timwa kyero tiqaro, Nkye fiki kyatari vitama kye taqeinqatama mpo qua ntapihi kyeta riaate. Kyatari mwiva tamwa riemwa taiqa kyero vahiro mwiaqatairo qaraakya mwunuri ntarero utihata nkye mwiaqaa vitama kye taqeta tiqata, Huari nronra itaari entava qaumatomavaaiho, qiarave.

³³ Mwia votima kyeta nraakiara qovara hiani inraikyarara tura, nkye mwia vitama kye taqeta nianra mwiva tumuani entava qaumatomavaaiho tivarave.

³⁴ Nte quitaama tuqo. Mwaa entara varihua hia ekyaa qutu vivaro mwi inraikyara mwi inraikyarara tuva qovara hiananrove.

³⁵ Nyaamwuvantovata mwatavantovata taiqa viraro ni quavanto nraahuma qati vahiqiro quananrove.

*Hia mpovanto nte tumuani entara ntapihi kyairave tura
(Maaki 13:32-37; Ruku 17:26-30)*

³⁶ Iesusiva mwitaa timwa kyero tiqaro, Ta iherarave, huari vuvanto taragaave, vahirage nte tumuaninrave? Hia vaisi mpovanto ntapihi kyairave. Hia nyaamwunyaahuavata mwianra ntapihiarave. Ntenavata mwatani mwatatai nraaqiarava variqana hia mwianra ntapihirave. Kotiva ni kova, mwiva nraahu mwi entarara ntapihirave.

³⁷ Noaava varu entara nraakyе qoravanto utuntema kyero nraakiara nte mwatani mwatatai nraaqiarava tumuani entaraqaa vahiananrove.

³⁸ Mwi entara hia vati nramanrive, humwunravanto ntumwaqu kyo entara nraakyе qoravanto kyara nreta, nramanri nreta, nraata vaati vareta, mwitaamaqi vi varuvaro Noaava nramanriqaanaa nraamwuqi viqetero varuvaro

³⁹ vati humwunravanto nrivi varuvaro mwihua su nyaatovanto ntapihi vuvata tiqata, Qikye, tire taiqa quara entava nri ntaiho, tuvaro nramanravanto mwihua ntaqutu taiqa kyorave. Nte mwatani mwatatai nraaqiaravama varuqo. Nte uro ntantena tumuani entaraqaaavata nraakyе qoravanto kuua qarama kyeta varivarave.

⁴⁰ Mwi entara vaisi taaratatanavanto aakyooqi kyaiqa vare varivaqena nte kuaku nraahu vitena mpo mwia kyaaninrave.

⁴¹ Mwi entara nraakyе taaratatanavanto kyara taiti nti varivaqena nte mpo vitena mpo mwia kyaaninrave.

⁴² Nkye nkyi nronravantotumuani entara hia ntapihiahura tita, nkye taqe variqata variate.

⁴³ Qio mwaa quara rieqata variate. Nraamwu qova variqaro mpuara vaisivanto nrianinra ntapihi kyero nai nraamwuqaa ntaqikyi varitiri, hiama mpuara vaisivanto nraamwuqi viqetero mpuara varaitiri.

⁴⁴ Mwi quara rieqatama nkyevata terama teta variqi viqatama ni pekya variate. Nte mwatani mwatatai nraaqiaravama varuqo. Nkye nianra hia tumuananrove ti entara, mwi entaraqaaama nte tumu ntaaninrave, tiro.

*Kyuqema kyero kyaiqa varai vaisiraqaavata uaqiamma kyero kyaiqa varai
vaisiraqaavata ntumwa kyero timwa nyunra
(Ruku 12:41-48)*

⁴⁵ Iesusiva mwitaa timwa kyero tiqaro, Kyaiqa vaisi kyuqeva nai nronra vaisiara rieqaro kyuqema kyero kyaiqa vare variari vaisiva, mwiva nataa hiarivave variananrove? Mwiva kyaiqa vaisi mwataa hiarivama variananrove. Mwia nronra vaisivanto nyianrani virera hiro mwi vaisira nronraqama kyero tiqaro, Ena kyaiqa vaisi hini mwihuqaavata ntaqikyiqara mwi entara mwi entara kyara tukyama kyera nyante, timwa kyero

46 quariva nrohiro uro ntantero nrumu taqairaro mwia kyaiqa vaisivanto mwiva tintema kyero kyaiqa vare varirera, nrumu taqero mwia kyuqema mwatairaro mwiva qamwataananrove.

47 Mwiva kyuqema mwatero mwii vaisirara tiqaro, Nte qaiqaa i nronraqama kyaarira e nte vataani inraikyaraqaa ekyama ntaqikyinanrave, qiananrove, tuquo.

48 Kyaiqa vaisi mwiva qaqlira kyero hia mwitaa hiraitiro, uaqama kyero kyaiqa vareqaro nai riemwa kyero tiqaro, Qaqao, ni nronravanto qakyoma kyeroma uro ntantero nriananrove, timwa kyero

49 mwiaqatairo nai hena kyaiqa vaisi mwihua ntuqutu kyero uro mpoqama kyeta uera nramanri nre variahua kyapata kyaravata nramanrivata nramwaqiro virera,

50 mpo enta, mwia nronra vaisivanto mwi entaraqaa hiama nriananrove qiani entaraqaa, nrihanrama mwatero mwia nronra vaisivanto uro ntantero nrumu mwia kyaiqa taqero

51 nai kyaiqa vaisi mwia ntuqutu kyero vatero mwia titero tiqaro, Unraqama kyeqata kyuqe kyaiqa vare vaisihua uaqia hi mwataro varenani evata quante, tiraro ntateqata vai kutinani mwiva quananrove, tiro. Iesusiva turama.

25

Mwanraata kyauqurutanaqaa ntumwa kyero tura

1 Iesusiva tiqaro, Ekyara entavanto nri ntairaro Kotiva nraakye qoraqaa ntaqikyiari vahirero mwataamama vahiananrove. Mwanraata kyauqurutanavanto nkyiari nraata vaati varovau viqata qaraakya nraakye varo vaisira uro entaqi vita varetta mwiavata kyara nranrenrata uti variqata mwihua nkyiari ramuvata varetta mwi vaisira vitarerata vurave.

2 Mwi mwanraatahuaqitaita kyauquruvanto hia kyuqe su nyaato vauhua vuvata hini kyauquruvanto kyuqe su nyaato vauhua vurave.

3 Hia kyuqe su nyaato vauhua kuaiqia kuaiqiyavanto nkyiari ramu nraahu varetta hia qia ito vahamwenranra vararaitita, qati vurave.

4 Qati vuvata kyuqe su nyaato vauhua kuaiqia kuaiqiyavanto nkyiari ramuvata varetta vahamwenra taquvata varetta vurave.

5 Nraakye varo vaisira hunta kyarerata vuvaro mwii vaisiva hia vaakya nri ntovata mwinramwuhua vuruara huvata vaita vurave.

6 Mwanraatanramwuvanto vaite varuvaro enta mwutukyaqi mpovanto aakyara ntero tiqaro, Nraakye varaari vaisiva nri variho. Nrivaqenramwu uro mwia hunta kyaare, tuvata

7 mwanraata kyauqurutanavanto sivita nkyiari ramu kuaiqia kuaiqia terama kye vateta varuvata

8 hia kyuqe su nyaato vahunramwuhua kyuqe su nyaato vauhuara tiqata, Qikye, tiri ramu ekyaa qipa viho. Nkye vahamwenra mponramwu timwivageqeteta ramuqi rauru taare, tuvata

9 mwihua qaqlira titaa, Nkyiyata vahamwenra nyianranro hia qioqa hiankyorave. Nkye hianteta vahamwenra kyoqaa hianasaita uro kyoqaa hiate, titaa.

10 Mwitaa tuvata mwihua vahamwenra kyoqaa hirerata vuvaro nraakye varo vaisiva nri ntovare. Mwiva nri ntovata mwanraata kyauquruvanto vaakya teramato nramwuhua mwia vatama kyeta nraamwuqi vera nteta kyara nre varuvaro qesa titaa tora.

11 Qesa titaa tuvata mwanraata mpo mwinramwuhua nraakiara nri nteta tiqata, Nronrao, nronrao, qesa qatua timwa taante, tuvaro

12 nraakye varo vaisiva mwiva qaqao tiro, Nte hia nkyi taqauhuave. Hia qesa qatua nyataaninrave, turave, tiro.

13 Iesusiva mwi quaraqaa ntumwa kyero timwa nyinro tiqaro, Nkye mwi quara rieqatama ekyara entavanto nrrianinra nkye hia ntapihiarara titi, nkyevata taqe variqata teramateta variate, tiro.

*Nai kyaiqa vaisi taaramponramwu munima nyunraqa ntuma kyero tura
(Ruku 19:11-27)*

14 Iesusiva mwitaa timwa kyero mpo quaqaa ntumwa kyero timwa nyinro tiqaro, Ekyara enta nri ntairaro Kotiva nraakye qoraaqaa ntaqikyiariva mwaa quara votima kyeroma vahiananrove. Vaisi nronra mpovanto nyianrani virera hiro nai kyaiqa vaisinramwu nyaanrama kyero ni munimaqaave, nte vatau inraikyaraqaave, ntaqikyi mataate timwa kyero vurave.

15 Virera hiro nai kyaiqa vaisi munima tukyama kye nyunrave. Mwiva nkyiari kyaiqa varora mwivau munima mwia tukyama kyero nyunrave. Mpora 5,000 kinaa mwirno, mpora 2,000 kinaa mwirno, mpora 1,000 kinaa mwunrave. Nyitero nyianrani vurave.

16 Nyianrani vuvaro 5,000 kinaa varo vaisiva mwiva veva ntero vuva uro mwi munimanraqotairo kyuqema kyero kyaiqa varaqiro viro uro mpo 5,000 kinaavata varorave.

17 Mwiva mwitaa huvaro 2,000 kinaa varo vaisivavata veva ntero vuva uro mwi munimanraqotairo kuaa qarama kyero kyaiqa vareqaro mpo 2,000 kinaavata varorave.

18 Mwitaa huvaro 1,000 kinaa varo vaisiva veva ntero hia mwiaqotairo kyaiqa utiraitiro uro mwata quvu kyero mwi munimanra uqeta kyero mwataqia quntamwa tero qumina varurave.

19 Mwitaa huvaro mwihua nronra vaisivanto mponani uro mpuahaama vari kyero uro ntantero nri ntero munima nyunra mwia ntapihirera hurave.

20 Ntapihirera huvaro 5,000 kinaa varo vaisiva nri ntero mwi munimanra vatama k yero 5,000 kinaa mpovatama kyero mwirno tiqaro, Nronrao, E nianra 5,000 kinaaqa ntaqikyi mataante qiaranama nte mwi munimanraqaa ntaqikyiqanama kyaiqa vara kyenama 5,000 mpoqiaavata varauqo, tiro.

21 Mwitaa tuvaro mwia nronra vaisivanto mwia timwa mwirno tiqaro, E nianra riemwaqira viqarama kyuqema kyera varaaro. E pata inraikyaaqaa kyuqema kyera ntaqikyi mataaananranra tina, nte i nronraqama kyaarira e nronra inraikyaaqaa ntaqikyinanrave. Qio nrinra ni vatama kyera qamwateqara variante, tiro.

22 Mwitaa tuvaro 2,000 kinaa varo vaisivavata nri ntero tiqaro, E ni 2,000 kinaa mpira mwiaqaa ntaqikyiyante qiarana nte mwiaqaa ntaqikyiqana kyaiqa utu kyena 2,000 kinää mpovata varauqo, timwa kyero mwi munimanra mwuvaro

23 mwia nronra vaisivanto tiqaro, E nianra riemwaqira viqarama kyuqema kyera varaaro. E pata inraikyaaqaa kyuqema kyera ntaqikyi mataaananranra tina, nte i nronraqama kyaarira e nronra inraikyaaqaa ntaqikyinanrave. Qio nrinra ni vatama kyera qamwateqara variante, tiro.

24 Mwitaa tuvaro mwia kyaiqa vaisi 1,000 kinaa varova nri ntero tiqaro, Nronrao, nte ntapihi kyauqara e kyaiqara vuavi raavira ti variara vaisivave. E hia ena vara tutaanana kyarara vantti variaravave. E hia kyara humwu isataaananraqataira uro kyara vare variaravave.

25 Nte mwianra rienama i nraatu aatu hiqanama hia i munimaqo kyaiqa utiraitina, mwata quvu kyena mwiqi quvu ntamwa kyena inani uqeta mwataurave. Qio mwaa taqaante. Ena munima mwaa ena varaante, tiro.

26 Mwitaa tuvaro mwia nronra vaisivanto mwianra tiqaro, E kyaiqa vaisi uaquia hiaravama variaro. Qumina aanra nrohinanranra nraahu rieqara hia kyugema kyera kyaiqa vare variaravama variaro. Qutaave nte mpohua vara tutaara vantina mpohua isataaraqaatairo qupiqaira vantuquo?

27 E mpo mwitaa hiqara nanraqamave hia ni munima varaqira uro mpenki nraamwuqi mataaro? E mpenkiqi vatairaqena nte uro ntantena nrianriva mwi munimanra varena mpoqiaavata mwiqitaina varaataarave, tiro.

28 Mwitaa timwa kyero mporara tiqaro, Mwi vaisiraqtaira 1,000 kinaa mwia vara kyera 10,000 kinaa vatai väisira mwiante.

29 Kyugema kyero airi inraikyaqaa ntaqikyi mate vari vaisira nte mpoqiaavata mwianrinro mwiva mantaquma kyeroma varaananrove. Hia mpo inraikyaqaa ntaqikyi mate variani vaisiraqaataina nte mwiva nanra inraikyaqiae vataaninra ekyama vara kyaaninrave, tiro.

30 Mwia nronra vaisivanto mwitaa timwa kyero tiqaro, Qio uaquia hi kyaiqa vaisira mwia vitaqita uro mwaqaani kyaivarao kyokiraqi ntateqaro nkyiari aanrai kutiqata variraqi variarive, turave, tiro. Iesusiva mwi quaraqaa ntumwa kyero timwa nyunra.

Ekyara entaqaa nraakyе qora tukya hianinranra tura

31 Iesusiva mwitaa timwa kyero tiqaro, Nte mwatani mwatatai nraaqiaravave. Nraakiara nte nronraqama vina vunyaa vaisivanto variqana nyaamwusaina tumuanrita nyaamwunyaahua ni vatama kyeta tumi variqae tumu ntena nronra vaisi taintaqa mwatakyaa vina varianinrave.

32 Variarita ekyaa mwata maata vahintema vari nraakyе qorahua ni puqaa ntuvantuuma vivage nte mwihiua ntainra kyena taaratanaqaa variate qianinrave. Sipisipi qova nai sipisipivata memenravata ntainra kyero

33 sipisipi nai kyauqu kyaatutani sita vatero memenra sita nai kyauqu kyaatutani sita vatero memenra sita nai kyauqu kyaatutani variqana nte mwihiua ntainra kyena, nte mwatani vari nraakyе qorahua taaratanaqaa ntainra kyaaninrave.

34 Nte mwitaama kyena taaratanaqaa ntainra kyena vatenama nte vunyaa vaisivanto variqana nte ni kyauqu kyaatutani varihuara tiqana, Nriate. Ni kova nkyi kyugema nyataihua variavo. Haaru mwaa mwatara ututo entaraqaatairo Kotiva nkyiara rieqaro nkyita kyaama tero terama tai mwatuqyaraqi nrira variate. Nkye ni kyugema mataahuave.

35 Ni kyara nraataa ihana varuqata nkye ni kyara mpiarave. Ni nramanri nraataa ihana varuqata nkye ni nramanri mpiarave. Nte mpo mwatanaa vaisivanto varuqata nkye nianra qamwateqata nkyeta nraamwuqi ni pitaqita uro kyaarave.

36 Nte hia tuavaaqa vatauqata nkye ni tuavaaqa mpiarave. Nte nriqa vihana varuqata nkye kyugema kyeta niqaa ntaqikyiarave. Nte karavuqi varuqata nkye nrumu ni taqaarave, qianinrave.

37 Nte mwitaa qiarita ntapihi kyeta nrohi vari nraakyе qorahua nianra mwitaama tivarave, Nronrao, taire tire i taqaurara kyara nraataa ihara variarata tire i kyara mwunanrave? Taire tire i taqaurara nramanri nraataa ihara variarata tire i nramanri mwunanrave?

38 Taire tire taqaurara e mpo mwatanaa hiarata tire i vitaqita tetraamwuqi kyaunanrave? Taire tire taqauraro i tuavaaqa hia vaihara variarata tire i tuavaaqa mwunanrave?

39 Taire tire taqaurara i nriqa vihara variananrave? Taire tire i taqarera karavuqi vunanrave? tivarave.

40 Mwihua mwitaa tivaqe nte vunyaa vaisivanto variqana mwihua nkyiari timwa nyina tiqana, Nte qianinra riaate. Nkye ni kata pakyaa hia nrutu vahianinra mpo kyaahaqa hiqatama nkye nivatama kyaahaqama mataarave, qianinrave.

41 Nte mwitaa timwa kyena ntena kyaauqu kyaantaaqani varihuara mwitaama qianinrave, Nkye nte varunasaita quate. Kotiva nkyiara uaqiamma quate tiro, tirave. Kotiva Saataaninravata, Saataaninra tovevaana mwihuaravata, riegaro qia nronra itaira terama kyero vataira nkye mwini quate.

42 Ni kyara nraataa ihana varuqata nkye hia kyara mpiarave. Ni nramanri nraataa ihana varuqata nkye hia ni nramanri mpiarave.

43 Nte mpo mwatanaa vaisivanto varuqata nkye hia nianra qamwateqata ni pitaqita nkyeta nraamwuqi kyaarave. Nte hia tuavaaqa vatauqata nkye hia ni tuavaaqa mpiaarave. Nte nriqa vihanave, karavuqive, varuqata nkye hia nrumu ni taqaarave, qianinrave.

44 Nte mwitaa qiarita mwihuata tivarave, Nronrao, taireve tire taqaurara i nraataa ihara variaro? Taireve i nramanri nraataa ihara variaro? Taireve e mpo mwatanaa vaisivanto variaro? Taireve e tuavaaqa hia vaihara variaro? Taireve i nriqa vihara variaro? Taireve e karavuqi variaro? Taireve e mwitaa mwitaama variarata tire hia i kyaahaqa hunanrave? tivarave.

45 Mwihua mwitaa tivaqe nte qianinrave, Nte qianinra riaate. Nkye hia nrutu vahianinra mpo hia kyaahaqa hiqatama nkye nivatama hia kyaahaqama mataarave, qianinrave.

46 Nte mwitaa qiarita mwia kyaara mwihua nkyiari kyoqaa vareta ekya enta atura ntigata variqi vivata ntapihi kyeta nrohi vari nraakye qorahua nkyiari kyoqaa vareta ekya enta kyuqema kyeta qati variqita vivarave, tiro. Iesusiva turama.

26

Iesusira ru kye quara ntuvaantua hita tura

(Maaki 14:1-2; Ruku 22:1-2; Ioni 11:45-53)

1 Iesusiva mwi quara mwi quara timwa nyi taiqa kyero nai nraaqiaranramwuanra tiqaro,

2 Nkye ntapihi kyaarave. Taara enta nritarairaro haaru nyaamwunyaava qati vekyahu nyatorara rieqata omwata nre entava nriananrove. Mwi entaraqaa ni ntavaaqavuqita uro kyaivata ni kyatariqaa rukyeta hiritevarave, tiro.

3 Iesusiva mwi quara nai nraaqiaranramwu timwa nyitero varuvata Kotira kyaiqa vara mwate varuhua mwihua nronranramwuvata, Iutaa nronranramwuvantovata, mwihua Kaiapaasira nraamwuqi uqeta kyeta ntuvaantuuma vita. Kaiapaasiva Kotira nraamwuqaa ntaqikyiqaro vunyaa vaisivanto varura

4 mwia nraamwuqi ntuaantuuma vita Iesusira ntavaaqavuqita uro rukyerara uqetakyne qua titi tiqata,

5 Omwata nraana entaraqaa mwia ntavaaqavu kyaarata nraakye qoravanto inronramaqita ntaqivorave, tura.

Nraakye mpovanto Iesusiraqaa vahamwenra qu mwatora

(Maaki 14:3-9; Ioni 12:1-8)

6 Iesusiva Mpetaanini Saimoninra nraamwuqi uro varura. Saimoniva tauraa varuvaro tauma rumpuaravanto mwamwanta nre varura.

7 Iesusiva mwi vaisira nraamwuqi uro varuvaro nraakyе mpovanto vera ntero Iesusira kyugema mwatarero vahamwenra kyuqe mwunta vura nronra munima kyora ori taquqi varero uro Iesusiva taintaqaa kyara nre varuvaro mwia qiataga rauru mwatero.

8 Mwia qiataga rauru mwatovata mwia nraaqiaranramwuvanto taqeta nraakyе mwia inronra hita tiqata, Nanraqamave mwitaama kyero vahamwenra mwia qumina taiqa kyaiho?

9 Vahamwenra mwia nyita nronra munima vara kyeta vehi nraakyе qora nyiataarave, tita.

10 Mwihua mwitaa ti varuvaro Iesusiva mwihua qua riero tiqaro, Nkyen-ramwu nanraqamave nraakyе mwia inronra hi variavo? Mwiva mwitaa higaroma ni kyugema mate variho.

11 Vehi nraakyе qora mwihua ekyaa enta nkyivata variqita vivarave. Nte nraahuma hia ekyaa enta nkyivata variqina quaninrave.

12 Nraakyе mwaava vahamwenra qu mateqaroma ni quntamwa terara tera hi variho.

13 Nte quttaa qianinra riaate. Nraakiara ni qua mwakyaakya nraakyе qora timwa nyiqatama mate nraakyе mwaava niqaa vahamwenra qu matairara rieqatama mpo mwatanaa mpo mwatanaahua timwa nyivata rievarave, tiro.

Iutaasiva Iesusira nramwutaa kyauquqi kyero munima varaani aanranra qua timwa kyero taaqau tora

(Maaki 14:10-11; Ruku 22:3-6)

14 Iesusiva mwitaa tuvaro Iesusira nraaqiara 12 nramwuqitairo mpovanto mwia nrutu Iutaasi Isikeriotiva veva ntero Kotira kyaiqa vara mwate varu vaisihuua mwihua nronra vaisinramwu varunani vuva

15 uro mwihua kyapara hiro tiqaro, Nte Iesusira qovarama kye nkyi kyauquqi nrumu kyaankyeru, nkye nanra kyoqaave ni mpivarave? tuvata mwihua ori munima 30 nramwu kyaara ntumwa kyeta mwuvaro Iutaasiva mwi munimanra varero

16 mwi entaraqaatairo mwihua kyauquqi Iesusira kyaani aanranra puamaqiro vura.

Iesusiva nai nraaqiara kyapata vekyahu nyato kyarara nronra

(Maaki 14:12-21; Ruku 22:7-14; Ioni 13:21-30)

17 Hia kyoto mperetira omwata nre iherava nri ntovata vuni nrinto entaraqaa mwia nraaqiaranramwuvanto Iesusiva hunani nri nteta kyapara hita tiqata, Taragine tire uro terama mwataarara e vekyahu nyato entarara rieqarama mwi kyarara nrenanrave? tita.

18 Mwihua mwitaa tuvaro Iesusiva tiqaro, Nkye Ierusaremini uro vaisi mpora mwitaama qiate, Mwaanra qua tiri timwa timwi vari vaisiva tiqaro, Mwaa entava ninima qovarama viho. Nte ntena nraaqiara kyapata i nraamwuqi vekyahu nyato kyarara nranrenrave tiho, qiate, tiro.

19 Iesusiva mwitaa tuvata mwia nraaqiaranramwuvanto Iesusiva tuntema kyeta mwi kyarara terama kyeta vatora.

20 Terama kyeta vatovaro enta huvaro Iesusiva nai nraaqiaranramwu kyapata uro kyara taintaqaa mwatakya variro kyara nre varura.

21 Kyara nreqaro mwihua timwa nyinro tiqaro, Nte qianinra riaate. Nkyigitairo mpovanto ni qovarama kyero nramwutaaahua kyauquqi kyaanarove, tiro.

22 Mwitaa tuvata mwia nraaqiaranramwu mwutukya uaquia huvata mwihua kuaiqia kuaiqivanto Iesusira kyapara hita tiqata, Nronrao, e nianrave qiaro? Hia nte mwivave, hia nte mwivave, timwaqita vita.

23 Mwitaa timwaqi vuvaro Iesusiva tiqaro, Mpereti vara kyeta tiretana kuaa vakya mwaati tanuqi ntaarava, mwi vaisivama ni qovarama kyaanarrove.

24 Ni mwatani mwatatai nraaqiarara mwitaama kye rukye quara haaru qara ntumwa torave. Qio mwi quava mwivauma vahiananrove. Ni mwatani mwatatai nraaqiarara qovarama kyaani vaisirara po timwa mwatauqo. Mwia nrova hia mwia mwata kyaataara mwia mwata torave, tiro.

25 Iesusiva mwitaa tuvaro Iutaasiva mwia qogama kyaariva Jesusira kyapara hiro tiqaro, Mwaanra ti variarao, e nianrave qiaro? tuvaro Iesusiva tiqaro, Eo, nte iarama tuqo, tiro.

Mperetiaravata uainianravata timwa tora

(Maaki 14:22-26; Ruku 22:15-20; 1 Korinti 11:23-25)

26 Iesusira nraaqiaranramwu kyara nre varuvaro Iesusiva mpereti vara kyero Kotirara kyuqeve timwa kyero nteqa kyero nai nraaqiaranramwu nyinro tiqaro, Mwaa vara kye nraate. Mwaa ni mamantama iho, tiro.

27 Mwitaa timwa kyero mwiva uaini kaapu vara kyero Kotirara kyuqeve timwa kyero mwinramwuhua viti nyinro tiqaro, Nkye ekyaaw mwhua mwaa nraate.

28 Mwaa ni nraanrema iho. Kotiva nraakye qoravata qaraakya qua vataari quava mwi quava kepuuyaqama quarive tiro, ni nraanrevanto mwia kepuuyaqama kyaanarrove. Ni ru kyaivarao ni nraanrevanto rauru-ariiva airi nraakye qora kyaahaqa hiqaro mwihua uaquia hiani quara nruka nyataananrove.

29 Nte qianinra riaate. Mwaa entaraqaataina nte hia uaini nranraitina qati variqi quarita, nkye ni kova ntaqikyianinraqi nivata uro varivaqe nte mwii entaraqaa nkyi kyapata qaraakya uaini nraaninrave, tiro.

30 Iesusiva mwitaa timwa kyero nai nraaqiaranramwu kyapata Kotirara ihi timwa kyero veva ntero Oripi taaqiqaraa vurama.

Pitaava nte hia Iesusira taqaurave qianinranra Iesusiva tura

(Maaki 14:27-31; Ruku 22:31-34; Ioni 13:36-38)

31 Mwihua mwini vuvaro Iesusiva mwihua timwa nyinro tiqaro, Nkye mate entaqi ni kyetama aatu ntueqaa hita vivarave. Kotira mpukuiq qara ntumwa to quava mate mwivauma vahiananrove. Mwataama tiro: Sipisipiqa ntaqikyiani vaisira Kotiva rukyairata sipisipi mwihua aatu ntueqaa hita nkyiariara nkyiariara api mpona mpona vivarave, turave. (Sekaraiaa 13:7)

32 Qio nraakiara ni vara qati sivuma kyairaque variqana nkyi vuni nte nraante Karirini quaninrave, tiro.

33 Iesusiva mwitaa tuvaro Pitaava qaqao tiro, Ekyaa mwaahua i kyeta aatu vivaqe nte nraahu ivatama kyena varianinrave, tiro.

34 Pitaava mwitaa tuvaro Iesusiva tiqaro, Nte qianinra riaante. Mate entaqi kokoraaravanto hia nruqua tirara e taarampo nani nianra tiqara, Hia nte mwi vaisira taqaurave tinanrave, tiro.

35 Iesusiva mwitaa tuvaro Pitaava qaqao tiro, Nte hia iara hia hia mwia taqaurave qianinrave. Ivatama kye ni ru kyaivaqenavata hia nte mwitaa qianinrave, tiro.

Pitaava mwitaa tuvata Iesusira nraaqiara hini mwinramwuhuvata mwi quara nraahu tura.

Iesusiva Kotirara uro aakyara ntora

(Maaki 14:32-42; Ruku 22:39-46)

³⁶ Mwiaqaatairo Iesusiva nai nraaqiaranramwuvatama kyero kyaqamwa ututoraqi mwia nrutu Kesemani mwiqi uro ntero nai nraaqiaranramwuanra tiqaro, Nkye mwaini mwatakyaa vi varivaque nte uro vuru-raqua Kotirara aakyara ntaankye, tiro.

³⁷ Timwa kyero Pitaaravata, Sepetira mwaqaqtanavata nraahu sita varero mwini vuvaro mwia hia kyakya huvaro mwia mwutukyavanto uaquia huvaro

³⁸ mwiva taarampo mwinramwuhuara tiqaro, Ni mutukyavanto mpo-qama kyero ua iharo ni ru kyaqaara ihana varuquo. Nkyenramwu mwaqaqa nivatama kye variqata vu ntapairi kyeta taqeqlatama variate, tiro.

³⁹ Mwitaa timwa kyero Iesusiva hia mpuahaqama viro uro virianasairo tumu ntiro Kotirara aakyara ntero tiqaro, Ko, e qiove tirera nte nriqa vi inraikyara nramanri votima kye nraaninra e qatinani vara kyaante. Qio hia ni kyakya hira vataqira quante. Ena kyakya hira vataqira quante, tiro.

⁴⁰ Iesusiva mwitaa timwa kyero nrumu ntantero nai nraaqiara taaramponramwu kyonani tumu taqovata mwinramwuhua vuruara huvata vaite varuvaro mwiva Pitaarara tiqaro, Nanraqamave nkye nivatama kyeta pataqiaqa variqata hia vu ntapairi kyeta viti viri taqeqlata variavo?

⁴¹ Saataaniva nkyi mwataara hiankyo titi nkye taqe variqata Kotirara aakyara nteqata variate. Nkyi mwanraquravanto mwitaa hiataa iharo nkyi mwamwantavanto nraahu hia qio kepukyqa ihata variavo, tiro.

⁴² Iesusiva mwitaa timwa kyero qaiqaa uro Kotirara aakyara ntero tiqaro, Ko, nte mwaa nramanrinra nraaninra hia e qatinani vara kyaraitira qati nraante tirera, nte i kyakya hira vataqina virerave, tiro.

⁴³ Mwitaa timwa kyero qaiqaa uro ntantero tumu taqovata mwia nraaqiara taaramponramwu vuruara huvata vaite varura.

⁴⁴ Vaite varuvaro Iesusiva qaiqaa mwinramwuhua kyero vuva uro Kotirara taarampo nani aakyara nteqaro vaakya tuntema kyero nraahu qaiqaavata tura.

⁴⁵ Kotirara aakyara ntamwa kyero Iesusiva uro ntantero tumu taarampo mwinramwuhuara tiqaro, Qikye, nkyenramwu qati nraahuve ho hiqata vaite variavo? Qio taqaate. Ni mwatani mwatatai nraaqiara ntaavaaqavuqita uro uaquia hi kyaiqara uti varihua kyauquqi tuta kye iheravama nri ntaiho.

⁴⁶ Sivivagenramwu quare. Ni qovarama kyero nramwutaa kyauquqi kyaari vaisivama mwaa nri variho, tiro.

Iutaasiva Iesusira qovarama kyovata mwia ntavaaqavu kyora (Maaki 14:43-50; Ruku 22:47-53; Ioni 18:3-12)

⁴⁷ Iesusiva mwi quara ti varuvaro mwia nraaqiara 12 nramwuqitairo Iutaasiva uro ntero. Iutaasiva uro ntovata mwia vatumma kyeta airi vaisivanto paipavata kyanta kyaamwuvata tu varetu uro ntora. Kotira nraamwuqi Kotira kyaiqa vara mwate varu vaisihua mwihua vunyahuavata, Iutaasiva nronra vaisinramwuvata, mwihua mwi vaisihua sitovata mwihua Iutaasira vatama kyeta nrunra.

⁴⁸ Iutaasiva Iesusira qovarama kyaaninranra vaakya mwihua timwa nyinro tiqaro, Nte uro mwia qua mwanteqana mwia mota kyaani vaisira mwia mwivave. Nkye mwia uro ntavaaqavu kyaate, tiro.

⁴⁹ Iutaasiva mwitaa timwa kyero mwiva mwihua kyapata uro ntero mwiva qamwanrama kyero Iesusira nraaqani uro ntero tiqaro, Mwaanra ti variarao, varirave, timwa kyero mwia mota kyero.

50 Iutaasiva mwia mota kyovaro Jesusiva tiqaro, Ni vaisio, mpo inraikyara nrinanra qamwanrama kyera utuante, tuvata Iutaasira vatama kyeta nruhua uro Jesusira ntavaaqavu kyeta tuqara tutovaro

51 mwiaqatairo Jesusira nraaqiara impovanto paipa nai tuaqitairo veva ntanrau kyero mwiaqotairo vaisi mpo nraato teqa kyora. Kotira nraamwuqi kyaiqa vare varu vaisihua mwihua vunyaa vaisi mwia kyaiqa vaisi nraato teqa kyora.

52 Teqa kyovaro Jesusiva qao tiro, Ena paipa veva nai tuaqi ntumwa taante. Paipaqtaita ntaquahua nkyiarivata paipaqtaita ru kyaarave.

53 E hia ntapihiananrave iho? Ni kyaahaqa ihua ni kora kyapara hiarilo mwiva qamwanrama kyero nyaamwusairo nyaamwunyaahua ntaqihuwa mwaanra 12 nramwu sitairata qioma tumivarare.

54 Nte mwitaa qiarita mwihua tumivera, nataama kyerove haaru qara ntumwa to quava qutaa mwivau vahiananrove? tiro.

55 Jesusiva mwitaa timwa kyero mwiaqatairo Iutaasira vatama kyeta nru vaisihua tigaro, Qikye, nkye kamaninra vatama kyero ntaqirero uti vari vaisira votima kyeta ni ntavaaqavirerata paipavata kyaamwuvata vare nriavo? Nte mpo enta mpo enta Kotira nraamwuqi variqana nraakye qora qua mwakyaakya timwa nyi varuqata nkye hia mwi entara ni ntavaaqavuarave.

56 Haaru poropeti vaisinramwuvanto mwaa inraikyava qovara hianinranra qara ntumwa to quava qutaa mwivau vahiarive tiro, mate mwaa inraikyava qovarama viho, tiro.

Jesusiva mwitaa tuvata mwia nraaqiaranramwuvanto mwia qaqla kyeta aatu ntugeqaa hita vurama.

Iutaa vaisi nronranramwu suqaa Jesusira uro kyora

(Maaki 14:53-65; Ruku 22:54-55, 63-71; Ioni 18:13-14, 19-24)

57 Jesusira ntavaaqavu kyeta tutohua mwia vitaqita uro Kotira nraamwuqi kyaiqa vare varuhua mwihua vunyaa vaisivanto varuraqi Kaiapaasira nraamwuqi kyovata nraamwu mwipi mwaanra okyara ti varu vaisihuavata, Iutaa vaisi nronranramwuvata, vaakya ntuvaantuuma vita varura.

58 Jesusira vitaqita uro kyeta varuvaro Pitaava nyianrasata viqaro mwihua sataqiro vuva uro Kaiapaasira nraamwu vahuvaro mwatukyaqaa uro ntero tutukyaqaa mwaati ntero utaqi viro mwi inraikyava qovara hianinra taqarerero nraamwu mwiaqaa ntaqikyi varu vaisihua vatama kyero varura.

59 Pitaava mwaatani varuvata nraamwuqi Kotira nraamwuqaa ntaqikyi varuhuavata, ekyaa mwipi ntuvaantuuma vita varuhuavata, Jesusira ruk-yarerata Jesusiraqaa unra qua vatarerata mpo quara puaa huvaro

60 hia vahuvata airi vaisivanto Jesusirara unra qua ntumwa kye tura. Api qua nraahu timwaqita vuvata vaisi taaratanavanto sivita

61 Jesusirara tiqata, Mwaa vaisiva mwitaa tihata tiretana riaunanrave. Mwiva tiqaro, Nte qioma Kotira nraamwu nronra ntapairi kyena taarampo enta variqana qaiqaa hoqa taiqa kyaaninrave tirave, tita.

62 Mwitanahua mwitaa tuvaro Kotira kyaiqa vara mwate varuhua mwihua vunyaa vaisivanto siviro Jesusirara tiqaro, Mwitanahua mwitaa tiqata iqaa qua vate variavo. E mpo nkyiaritananra nanra quave tinanrave? tuvaro

63 Jesusiva hia qua tiraitiro, tirema varuvaro qaiqaa vunyaa vaisivanto Jesusirara tiqaro, Nte Kotira vuqaa variqana mwia nrutu nteqanama iara qutaa qua qiantema tugoo. Qutaave Kotiva i titaihara e tiri kyaahaqa hirera Mesaiaavanto variaro? Qutaave e Kotira mwaaqavanto variaro? Tiri timwa timwinraque riaare, tiro.

64 Mwiva mwitaa tuvaro Jesusiva tiqaro, E qiananra nte mwaa mwivave. Nte qianinra nkye riaate. Nkye nraakiara taqe varivaque nte mwatanai mwatafai nraaqiarava nronraqama vina Kotiva kepukyavanto varianinra mwia kyaauqu kyaatutani mwatakyaa vina varina tonamwuqi tumuaninrave, tiro.

65 Jesusiva mwitaa tuvaro vunyaa vaisi mwiva nai tuavaaqa nrabhitu kyero tiqaro, Qikye, mwiva Kotirara uaqia hi quara tiho. Vaisi mpovanto mwiaqaa qua vataaninra qumina nraanrevorave. Taqaate. Nkye rie variavaroma mwiva Kotirara uaqia hi quara tiho.

66 Mwia kyaara nkye Jesusirara nanra quave tivarave? Tivaqe riaankye, tiro. Mwitaa tuvata mwihua tiqata, Mwia uaqia hi kyaiqava nritaraiho.

Mwia kyaara mwia ru kyaarava nraahuma vaiho, tita.

67 Mwihua mwitaa timwa kyeta uro Jesusira viriqi taara vihi kyeta kyaauququo mwia ntuqutu kyeta mwia vu nraato ntumwa kyeta vateta

68 vireragama kyeta tiqata, Mesaiaao, e qutaa qua qovarama kyera vaisiva varirera, hia taqaraitira i ntuqutuani vaisira nrutu ntaante, tita.

Pitaava Jesusira hia taqaurave tura

(Maaki 14:66-72; Ruku 22:56-62; Ioni 18:15-18, 25-27)

69 Nraamwuqi mwitaamaqita vi varuvaro Pitaava mwaatani mwatukyaga mwatakyaa viro varuvaro kyaiqa nraakye mpovanto Pitaara nraaqani uro ntero mwianra tiqaro, Evata Jesusira Karirinyaa vaisi mwikyantiri variaravave, tiro.

70 Mwiva mwitaa tuvaro Pitaava mwihua suqaa variqaro qaqaq tiro, E qiana quara nte hia ntapihurave, tiro.

71 Mwiva mwitaa timwa kyero uro nraihana varuvaro kyaiqa nraakye mpovanto mwia taqero mwini sivita varuhuara tiqaro, Vaisi mwaava Jesusira Nasaretinyaanra vatama kyero varivave, tiro.

72 Mwitaa tuvaro Pitaava kyaauqu nriqiqaa vatero tiqaro, Hia nte mwii vaisira taqaurave, tiro.

73 Mwitaa timwa kyero pataqia varuvata mwini sivita varu vaisihua Pitaava hunani uro nteta mwianra tiqata, Jesusira nraaqiaranramwu mwi mwatanaahua variavara qutaaqama kyera evata kuaa mwatanaa mwivama variaro. Mwihua mpo qarama kyeqata mwaa quara ti variantema kyera evata mwaa quara ti variaro. Qio e mwaa mwivave, tita.

74 Mwihua mwitaa tuvaro Pitaava kyaauqu nriqiqaa vatero tiqaro, Nte hia qutaa qua qiankyera, Kotiva qiomia ni ruananrove. Nte qutaama tuqo. Nkye ti varia vaisira hia nte taqaurave, tiro.

Pitaava mwitaa timwa kyovaro qamwanrama kyero kokoraaravanto nruqua tuvaro

75 Jesusiva Pitaara timwa mwu quava Pitaara nraatoqi ntumwa viro. Jesusiva Pitaara tiqaro, Kokoraaravanto hia nruqua tirara e taarampo nani nianra hia mwia taqaurave tinanrave, tura. Pitaava mwi quara riero mwiva mwaaqani mwaaati ntero vuvaro mwia mwutukyavanto uaqia huvaro nronraqama kyero ntatora.

27

Iesusira Paireativa hunani vitaqita uro kyora

(Maaki 15:1; Ruku 23:1-2; Ioni 18:28-32)

1 Mwia qanranraa toqa entaqi Kotira kyaiqa vara mwate varuhua mwihua nronra vaisinramwuvantovata, Iutaa nronra vaisinramwuvantovata, qua timwa kyeta Jesusira ru kyaananrave timwa kyeta

² mwiaqataita mwhihua Jesusira seniqotaita rupa kye vitaqita uro Paireativa horaqi kyora. Paireativa Romeni kirapava varura.

*Iutaasiva qutu vura
(Kyaiqa Varora 1:18-19)*

³ Iutaasiva Jesusira qovarama kyo vaisiva taqovata mwhihua ko timwa kyeta Jesusiraqua qua vatetama mwia ru kyarerata uti varuvaro mwiva po hia nte mwitaa hiataara vahana mwitaa hurave timwa kyero 30 munima mwunra varero uro ntantero Kotira kyaiqa vara mwate varu vaisihua mwhihua nronranramwuvata, Iutaa vaisi nronranramwuvata, mwhihua varuraqi uro ntero tiqaro,

⁴ Nte qumina vaisi hia uaqia hi kyaiqara uti vaisirama uro nkyi kyauquqi tutu kyauqatama nkye mwia ru kyarerata uti variavo. Nte qora inraikya utu kyauquo, tiro. Timwa kyero munima mwia mwhihua nyinrenro tuvata mwhihua qaqaq tita, Tire nataahe hiananrave? Hia tiri kyaiqave. Mwi inraikyava ina kyaiqama vaiho, tita.

⁵ Mwhihua mwitaa tuvaro Iutaasiva munima mwia varaqiro uro Kotira nraamwu mpoqi hia qumina vaisivantovata vera nte varuraqi tuto kyero vuva uro vaantā hiri vura.

⁶ Iutaasiva munima mwia tuto kyero uvvata Kotira nraamwuqaa ntaqikyu vaisihua mwi munimanra utu kye vateta tiqata, Mwaa munimanra qutaru munimave. Tire mwaa munimanra Kotira nraamwuqii vataana munimanra vatama kyeta kuaaqi vataarorave. Mwitaa hiqata tire mwaanra qua nteqa kyaarorave.

⁷ Tave utiqata aatapai mwata vare varia mwatava qatima vaiho. Nrivaqe mwaa munimanraqo mwi mwatara kyoqaama kyaare. Tire mwi mwatara kyoqaama kyeta vataararo mpo mwatanaavanto mwaini qutu vivaqe tire mwhihua mwi mwataraqaa quntamwa taare, tita.

Mwitaa timwa kyeta munima mwiaqotai

⁸ mwi mwatara kyoqaama kyorara tita, mate mwaa entara nraakye qoravanto mwi mwatarara Qutaru Mwatave ti variara.

⁹ Kotira nraamwuqaa ntaqikyu varuhua mwitaama kyeta mwi mwatara kyoqaa hurara tiro, haaru vetato entaqaa Ieremaiaava poropeti vaisivato qara ntumwa to quava qutaa mwivau vahura. Ieremaiaava mwitaama tiro: Isareri vaisi mpionramwuvanto qua timwa kyeta vateta 30 munima, mwianra qutaru munima vahiananrove ti vari munimanra,

¹⁰ mwi munimanra varaqita uro kyetama tave uti mwatara kyoqaa hivarave. Nronravanto ni qua timwa mpintema kyetama mwhihua mwi mwatara varevarave, tura.

(Sekaraiaa 10:11-12)

*Paireativa Jesusira ntumwahiamwama mwatora
(Maaki 15:2-5; Ruku 23:3-5; Ioni 18:33-38)*

¹¹ Mwhihua Jesusira vitaqita uro kirapava Paireativa varuraqi kyovaro Jesusiva mwia vuqaa siviro varuvaro Paireativa mwia ntumwahiamwama hiro tiqaro, Qutaave e Iutaa vunyaa vaisivanto variaro? tuvaro Jesusiva tiqaro, E qiananra nte mwaa mwivave, tiro.

¹² Jesusiva mwitaa tuvata Kotira kyaiqa vara mwate varu vaisihua mwhihua nronra vaisinramwuvata, Iutaa vaisi nronranramwuvata, mwhihua mpo qua mpo qua kyaara Jesusira inronra hi varuvaro mwiva hia mwhihua qua hiniqa hiraitiro, tirema varura.

¹³ Tirema varuvaro Paireativa qaiqaa Jesusira kyapara hiro tiqaro, Mwhihua airi qua iqaa vateta mwia kyaara i inronra hi variavara e hiave mwhihua ti varia quara riaaro? tuvaro

¹⁴ Jesusiva hia qua mpovata mwihuara tiraitiro, tirema kyero varuvaro mwiaqatairo nronra vaisi Paireativa mwianra airi nraato ti varura.

Jesusira kyatariqaa rutaate tura

(Maaki 15:6-15; Ruku 23:13-25; Ioni 18:39-19:16)

¹⁵ Mpo ihi mpo ihi vekyahu nyato kyarara nro entaraqaa kirapava vunyaa vaisivanto nraakye qora qamwata nyatarero karavu vaisi mpo huvantu kyero titovaro mwaatani vura. Nraakye qoravanto ta vaisirave huvantu kyaante tura mwi vaisira huvantu kye varura.

¹⁶ Mwi entara karavu vaisi mpo mwia nrutu Varavaasiva qora vaisivanto varuvatara tita, airi nraakye qoravanto mwi vaisira nrutu ntapihi kyora. Karavu vaisi mpo huvantu kyeta tite varu okyarava mwitaama vahuvata

¹⁷ mwi entaraqaa nraakye qoravanto mwianra rieqata ntuvantua hita varuvaro Paireativa mwihua kyapara hiro tiqaro, Ta karavu vaisirave huvantu kyaariro quananrove? Nte Varavaasirave huvantu kyaaninrave? Jesusira mwianra tiqata Mesaiaavantove ti variara, nte mwiave huvantu kyaaninrave? tiro.

¹⁸ Paireativa ntapihi kyovata nronra vaisinramwuvanto Jesusiva nron-raqama quankyorare tita mwianra raraqa tovata mwihua mwia vitaqita uru mwia kyauquqi kyora.

¹⁹ Paireativa ko nraamwuqi mwatakyaa viro varuvaro mwia nraatavanto qua vara kyero tiqaro, Po, mwi vaisiva hia mpo inraikya utu kyairaqaa qumina qua vaterorave. Mwia qati titairaro quarive. Nte entaqi mwiaqaa ruvaata taqauqaro ni uaquia ihana varuqo, tiro.

²⁰ Mwia nraatavanto mwitaa tuvata mwia qua riaankyorave timwa kyeta Kotira kyaiqa vare varu vaisihua mwihua nronra vaisinramwuvata, Iutaa mwihua nronra vaisinramwuvata, kepukyaqama kyeta qua nraakye qora timwa nyita tiqata, Varavaasira huvantu kyera timwinra Jesusira rukyaante qiate, tita.

²¹ Mwitaa kyeta rapateqata tuvaro Paireativa kyapara hiro tiqaro, Mwi vaisitanahuacitaina ta vaisirave huvantu kyaaninrave? tiro. Mwitaa tuvata mwihua tiqata, Varavaasirave, tita.

²² Mwihua mwitaa tuvaro Paireativa qaqao, tiro, Jesusira mwianra Mesaiaavantove qiarave. Mwia mpo nte nataave hianinrave? tiro. Mwitaa tuvata ekyaa mwihua tiqata, Mwia kyairata kyatariqaa rutaate, tita.

²³ Mwihua mwitaa tuvaro Paireativa mwihua kyapara hiro tiqaro, Nanra kyaarave nte mwia kyaarita kyatariqaa rutevarave? Nanra uaquia hi inraikyarave utu kyaiho? tiro. Mwitaa tuvata mwihua nronraqama kyeta aakyarnteta tiqata, Mwia kyairata kyatariqaa rutaate, tita.

²⁴ Nraakye qoravanto mwitaa ti varuvaro Paireativa taqovaro mwia quavanto hia qio vahuvaro mwiva tiqaro, Nraakye qora utagaatairo mpo inraikyavanto siquankyorave, timwa kyero nramanri tanuqi rauru kyero nraakye qora suqaa variqaro nai kyauqu hiqama kyero tiqaro, Qio taqaate. Mwia qutaru quavanto hiama niqaa vaiho. Mwi quava nkylitaqama vaiho, tiro.

²⁵ Mwitaa tuvata ekyaa nraakye qoravanto tiqata, Mwia qiove, mwi quava titaqi vahiqaro tire mwatataarahuaqavatama vahiananrove, tita.

²⁶ Mwihua mwitaa tuvaro Paireativa mwihuara rieqaro Varavaasira huvantu kyero nai ntaqu vaisihua Jesusira kyaantaqo ntuquutue tuvata mwia ntuquutu kyeta vatovaro mwiaqatairo mwia kyatariqaa rutaate tiro, Paireativa mwia nai ntaqu vaisihua kyauquqi tuta kyora.

*Ntaqu vaisihua Jesusira vireraqama mwateta mwia ntuquutura
(Maaki 15:16-20; Ioni 19:2-3)*

²⁷ Paireativa nai ntaqu vaisihua kyauquqi tuta kyovata mwihua mwia vitaqita uro kirapara nraamwuqi kyeta mwihua nkyiari hena ntaqu vaisihuavata ekyaa ntuvantuama kyeta Jesusira vara utaqi vateta mwia vara ututu variqata

²⁸ mwia tuavaaqa qatinani vara kyeta mwia vireraqa hiqata vunyaa vaisituavaaqa utu mwatarera nraanre tuavaaqa utu mwatora.

²⁹ Mwiaqaataita mwihua tauvera vara kyeta qiata vaisi tovaqa voti hura ququrama kyeta Jesusira qiataqaa qu mwateta mwia kyauqu kyaatutani kyaamwu tu mwateta. Mwihua mwitaa mwitaama kyeta mwia vireraarora hirerata Jesusira vuqaa tori kyauru ravita tiqata, Iutaa nraakye qora vunyaa vaisio, varirave? timwa kyeta

³⁰ mwiaqaa taara vihi kyeta vateta kyaamwu mwia kyauquqi tu mwatora mwia vara kyeta mwiaqotaita mwia qiataqa ntuqutura.

³¹ Mwitaamaqita vita vireraarora hita raima mwateta taiqa kyeta mwihua tuavaaqa utu mwatora vara kyeta nai tuavaaqa utu mwateta mwia kyatariqaa ru tarerata viteta vura.

Iesusira kyatariqaa ru kyeta hiritora

(Maaki 15:21-32; Ruku 23:26-43; Ioni 19:17-27)

³² Ntaqu vaisihua Jesusira kyatariqaa rukyeta hiritarerata mwatukyaqitaita mwaaganianra aanraqaa viqata vaisi mpovanto Sairininyaanra mwia nrutu Saimoninra qintorama kyeta mwianra kepukyaqama kyeta tiqata, E Jesusira rute kyatarira vara qqira uro mwiante, tura.

³³ Timwa kyeta Jesusira vitaqita uro quminasata Korokotaave tunani kyora. Korokotaa mwaa quaraqitai tirera Qiata Mwukyaarisatave tunani Jesusira uro kyeta

³⁴ uaini mwipi ukavu inraikyaratavata kyeta tuqasaa tora mwuvaro Jesusiva pataqia nreqaro taqero qaqira kyero hia nronra.

³⁵ Jesusiva hia nrovata mwihua mwia kyatariqaa ninriqotaita ruteta mwia tuavaaqa vara kyeta kaati ruantema kyeta ori tuto kyeqata mwia tuavaaqa ntainra kyeta vareta

³⁶ mwiaqaataita mwihua mwatakyaa vita variqata mwia taqe varura.

³⁷ Mwia qiatani qua mpo ko timwa mwato quara qara ntumwa kyeta kyatariqaa rutovaro mwi quava mwitaama tiro:

MWAA IESUSIVA IUTAA VUNYAA VAISIVE, tiro.

Mwi qarava mwitaama kyero vahura.

³⁸ Mwihua Jesusira vatama kyeta vaisi mpotana ru tora. Mwitanahua nkyiari hena vaisi ru kyeqata mpuara vare varu vaisitanahua varuvata mpo Jesusira kyauqu kyaatutani ruteta mpo mwia kyauqu kyaantaaqani rutora.

³⁹ Mwitaama kyeta rutovata nraakye qora vitare nritare hiqata nru ntumwa kyeta mwaunru miqi mwateta Jesusirara uaquia hi quara timwa mwateta tiqata,

⁴⁰ Qikye, e tiqarama, Kotira nraamwu ntapairi kyenama taarampo enta varina kyaiqa varaqi viqanama qaiqaa hoqa taiqa kyaaninrave qiananrave? Qio, e Kotira mwaquivanto varirera, ena kyaahaqa hiante. Enavanto kyatariqataira mpiami ntaante, tita.

⁴¹ Mwihua mwitaa ti varuvata kuua qarama kyeta Kotira kyaiqa vara mwate varuhua mwihua nronra vaisinramwuvata, mwaanra okyara ti varu vaisihuavata, mwianra raima mwateta tiqata,

⁴² Mwiva mpohua nraahu kyaahaqa hi variva hiave qio nai kyaahaqa hiananrove? Mwi vaisiva Isareru vunyaa vaisivanto variho. Kyai tire

variqata taqaararo mwiva nai kyatariqaatairo mpiami ntero tuminraqeta tire mwianra qutaave qiare.

⁴³ Mwiva nanrianra tiqaro, Nte Kotirara kepukyaqama kyena riemwaqina vuvave. Nte Kotira mwaaque tirave. Qio kyai variqata taqaararo Kotira kyakya hiraro mwia kyaahaqa hianinrä taqaare, tita.

⁴⁴ Mwihua mwitaa tuvata mpuara vaisitana mwia tataaqa ru tohuavata mwihua tuntema kye kuua qua mwia nraahu timwa mwatora.

Iesusiva qutu vura

(*Maaki 15:33-41; Ruku 23:44-49; Ioni 19:28-30*)

⁴⁵ Mwitaa huvaro huarivanto nrinro virira qiataqaa vahuvaro ekyaa mwi mwata maatara entama vuvaro qaiqaa huari vitira tavaarana tuminro vahuvaro enta huva yivura.

⁴⁶ Huarivanto tuminro vitito vahuvaro Iesusiva nai quaqitairo aakyara ntero tiqaro, *Eri, eri rama sapakitani. Kotio, Kotio, nanraqamave ni qaqla kyera hiaro?* tiro.

⁴⁷ Iesusiva mwitaa tuvata mpo uhua mwini sivita varuhua mwia qua rieta tiqata, Mwiva Iraisaara tiri haivaqarama nraanre variho, tuvaro

⁴⁸ mpovanto hiantero nramanri kyaqo inraikyara tavuna nrihi voti hora vara kyero uaini uka vuraqi mwaati ntamwa kyero herika mpontaqiaqa huairi kyero mwia nraanrive tiro mwia nroqi viri ntamwa tora.

⁴⁹ Mwitaa huvata mpo uhua tiqata, Kyaiqe variqata taqaararo Iraisaava mwia kyaahaqa hirero tumuaninra taqaare, tita.

⁵⁰ Mwihua mwitaa tuvaro Iesusiva qaiqaa paa tiro aakyara ntamwa kyero qutu vura.

⁵¹ Iesusiva qutu vuvaro Ierusaremini Kotira nraamwuqi tauha votima kyeta tavuna nronra hiritova virisairo utaqaa nrahitiqiro mpiani tumunra. Mwitaa huvaro mwatura tuvaro ori nronra airivanto ntuvuraavurama vuvaro

⁵² vaisi haaru quntamwa to mwatava qatua vuvata mwiqinaahua Kotira nraakye qoravanto qutu vuhua airivanto sivita varuhua

⁵³ Iesusira qaiqaa qati vara sivuma kyo entaraqaataita mwihua Ierusaremini qovarama vuvata airi nraakye qoravanto mwihua taqora.

⁵⁴ Ntaqu vaisihua vunyaa vaisivantova, mwivata nrumu ntaqu vaisihua mponramwuvata, varuvaro Iesusira kyatariqaa hiritovaro varuvata mwihua Iesusiraqaa ntaqikyi variqata mwatura turave, mpo inraikya mpo inraikya qovarahura taqeta, mwiaqaataita mwihua nronraqama kyeta aatu hita tiqata, Qikye, qutaa mwaava Kotira mwaaquvanto varivama qutu viho, tura.

⁵⁵ Iesusiva qutu vuvata nraakye mponramwuvanto nyianrasatatai variqata vutu taqe varura. Mwi nraakyehua Karirisaita Iesusira vataqiqi viqata mwia kyaiqa vara mwate varuhua varura.

⁵⁶ Mwihuaqitai mponramwu nyutu vahirero, Mariaava Makataranyaava mpo, Mariaava Iemisikya Ionikya nyova mpo, Sepetira mwaaqutana nyova mpo varura.

Iesusira quntamwa tora

(*Maaki 15:42-47; Ruku 23:50-55; Ioni 19:38-42*)

⁵⁷ Enta huvaro Arimatanyaava airi inraikya vato vaisiva uro ntora. Mwia nrutu Iosepiva, mwiva Iesusira vataqiro vi varu vaisiva varura.

⁵⁸ Mwi vaisiva Paireativa varuraqi uro ntero Iesusira mwamwanta mpiraqe varaqina quntamwa taankye tuvaro Paireativa nai ntaqu vaisihua sitero tiqaro, Uro Iesusira mwamwanta vara mwia mwiate, tuvaro

59 Iosepiva uro Jesusira mwamwanta kyatariqaatairo itu kyero qaraakya tavuna egarori tavuna vara kyero mwia qapuqama kyero

60 varaqiro uto nai nraakiara quntamwa terara rieqaro ori haqa kyero vatoraqi vera vatero ori nronra mpo ventaqiro mwia nrona tita tero vura.

61 Mariaava Makataranyaavavata, mwia qamwawa mpo Mariaavavata, mwitanahua vutura hini mwatakyaa vita variqata vutu mwia quntora taqe varura.

Iesusira quntamwa toraqi ntaqikyura

62 Mwia qanranraa Saarareqa Kotira nraamwuqaa ntaqikyuhuavata Parisi vaisinramwuvata uro Pairaatira vatama kyeta ntuvaantuama vita variqata

63 mwianra tiqata, Nronrao, tire riauraro unra ti vari vaisiva mwiva nai qati varu entara tiqaro, Nte taarampo enta vari kyena qaiqaa qati siquananrave turave. Mwiva mwitaa turara tira,

64 e ntaqua vaisihua sitairata mwihua mwia quntamwa taaraqaa taarampo enta variqata ntaqikyiqita quate. Mwia nraaqiaranramwuvanto uro mwia mwamwanta mwiqitaita mpuara varaqita mpona kyeta nraakyeyorara unra tiqata, Mwiva qati sivihio, tivorave. Mwihua mwi entara unrativa vaakya unra qua timwa tairavata nraatara kyaananrove, tita.

65 Mwihua mwitaa tuvaro Pairaattiva timwa nyinro tiqaro, Qio nkye ntaqua vaisihua sitaqita uro kyaavata mwihua mwia quntamwa taaraqaa kyuqemba kyeta ntaqikyiate, tiro.

66 Mwiva mwitaa tuvata mwihua uro tita tora ori mwiaqaa mwukuya rateta ntaqu vaisihuara tiqata, Mwaini variqatama kyuqemba kyetama ntaqikyiqi quate, turama.

28

Iesusiva qutu vuraqitairo sivura

(Maaki 16:1-10; Ruku 24:1-10; Ioni 20:1-18)

1 Saarare Iutaa mwaanra entavanto taiqovaro mwia qanranraa ntuvaahama vuvata Saanteqaa Mariaava Makataranyaavavata, mwia qamwawa Mariaavavata, Iesusira quntamwa toraqi taqarerata vurama.

2 Vuvaro qamwanrama kyero mwaturavanto nronraqama kyero tuvaro nyaamwunyaava mpovanto nyaamwusairo tumu origo qesa tita tora mwia rataa qatinani kyero ori mwiaqaa mwatakyaa viro varura.

3 Mwia virivanto vahirero aaquakyaa votima kyero vahuvaro mwia tuavaaqavanto vahirero tonamwu turomunra voti huva varuvata

4 mwiaqaa ntaqikyi varu vaisihua mwia taqeta nronraqama kyeta aatu hi varita kyuqu kyauqu ntuvata tumu ntita qutu quahua nraantantamwa kyeta varura.

5 Mwihua mwitaama vita varuvaro nyaamwunyaava nraakyeyewitanahura tiqaro, Hia aatu hiate. Nte ntapihi kyauqata nkyetana Iesusira kyatariqaa rutaa vaisira puua hirerata nriavo.

6 Mwiva hia mwaini variho. Mwiva nai nkyi timwa nyintema kyero qatima sivihio. Nrita mwia veta vataaraqi taqaate.

7 Mwiqi taqetama hianteta uro mwia nraaqiaranramwu timwa nyiate. Mwiva qutu viraqitairo siviro mwiva nraantema nkyi suni Karirini vi variho. Nkyenramwu mwini uro variqata mwia taqevarave. Qio nte mwi quaramba nkyi timwa nyuquo, tiro.

8 Mwiva mwitaa tuvata nraakyeyewitanahua mwia quntamwa to mwatara mwia mwini kyetatana hianteta vuvaro hini mwamwantavanto

aatu hi varuvata hini mwamwantavanto qamwate varuvata hianteta Iesusira nraaqiaranramwu timwa nyinrenrata vurama.

9 Mwitanahua hianteta vi varuvaro qamwanrama kyero Iesusiva mwitanahua qintorama kyero tiqaro, Varitatanave, tuvata mwitanahua qamwata kyeta uro tumu ntita variqata mwia kyuqu tu vareta mwianra qamwata kyeta mwia nrutu tuaahere varuvaro

10 Iesusiva mwitanahuara tiqaro, Hia aatu hiate. Uro ni kata pakyaan-ramwu timwa nyivata mwihua Karirini vihua mwini uro ni taqaate, tiro.

Iesusira quntamwa toraqaa ntaqikyuhua tu quara

11 Iesusiva mwitaa tuvata nraakye mwitanahua mwiva tunte hita aan-raqua qati vi varuvata Iesusira quntamwa toraqaa ntaqikyi varuhua ntaqu vaisihua mponramwuvanto Ierusaremini uro nteta ekyaa mwi inraikyaya qovara hurara Kotira kyaiqa vara mwate varuhua mwihua nronra vaisin-ramwu timwa nyunra.

12 Timwa nyuvata mwiaqaataita nronra vaisi mwihua uro mponramwuvata sita kyeta qua timwa kyeta kuaa qua vateta ntaqu vaisihua munima nronraqama kyeta nyita

13 tiqata, Nkyenramwu mwitaama qiate. Tire entaqi vaite varurata mwia nraaqiara nramwuvanto nrumu mwia mwamwanta mpuara vara kyaavo, qiate.

14 Paireativa mwi quara riairera, tire uro mwia qua timwa mwianrata nkye hia qua varevarare, tita.

15 Mwihua mwitaa tuvata ntaqu vaisihua mwihuaqitaita munima vareta mwihua tuntema kyeta mwi quara nraahu nraakye qora timwa nyiqi vita mate mwaa entaravata Iutaavanto Iesusirara mwi quara nraahu viti viri timwa nyiqita vi variara.

Iesusiva nai nraaqiaranramwu suqaa qovarama vura

(Maaki 16:14-18; Ruku 24:36-49; Ioni 20:19-23; Kyaiqa Varora 1:6-8)

16 Iesusira nraaqiara 11 nramwuvanto Karirini taaqi mwiaqaa uro variate tunani vuuhua

17 uro nteta taqovaro Iesusiva varuvata mwia qamwata mwateta mwia nrutu tuaahere varura. Mwia nrutu tuaahere varuvata mwia nraaqiara hinivanto mwianra taara nraato tita tiqata, Qutaa mwivave variho? ti varura.

18 Iesusiva mwihua nraaqani uro ntero tiqaro, Kotiva ni nronraqama kyaihana nte nyaamwunivata mwatanivata vahi inraikyara ekyaa mwi inraikyaraqaa ntaqikyi varuvave.

19 Nkye ekyaa mwata maata varihua uro timwa nyivata mwihua ni nraaqiaraqama quate. Mwihua ni nraaqiaraqama vivata nkye nramanri nyiqata ni kora nrutu nteqata, ni mwia mwaquo nrutu nteqata, Kotira mwianraqura nrutu nteqatama, nramanri nyiate.

20 Mwitaa hiqatama ekyaa nkyi timwa nyu qua mwakyaakyara mwihuvata timwa nyitama mwi quara riemwaqita quate, qiate. Qio riaate. Nte nkyivata variqina quariro mwaa mwatava taiqaananrove, tiro. Iesusiva mwi quara turama.

MAAKI Maakiva Iesusiva nrohurara tura

*Ioniva nramanri nyi varu vaisiva nraakye qora timwa nyu quara
(Matiu 3:1-12; Ruku 3:1-18; Ioni 1:19-28)*

¹ Iesusiva Kotira mwaaquvanto varura. Mwia qua kyuqe qua mwia okyara vahirero mwataamama vahiro.

² Haaru mpo enta Aisaiaava Kotira qua qovarama kyero qara ntumwa tero tiqaro,
Taqaante, ni qua nraakye qora timwa nyiani vaisira
nte titaariro mwiva i vuni viqaro
i aanra terama mwataananrove. *(Marakai 3:1)*

³ Mwi vaisiva qumina mwataqaa variqaro
aakyara ntero tiqaro,
Nronravanto quani aanranra terama mwateta
mwia aanra avuqavuma mwataivaro mwiva mwi
aanranraqaama qio quarive qiananrove, tura. *(Aisaiaa 40:3)*

⁴ Kotiva mwia kyaahaqa huvaro Aisaiaava tohare varu entara mwi quara qara ntumwa tovaro airi ihi vi vuvaro mpo enta Ioniva qumina mwataqaa qovarama vura. Qumina mwataqaa qovarama viro Ioniva nraakye qora nramanri nyiqanro mwihua timwa nyinro tiqaro, Nkyeta qora kyaiqa vare varira qaqira kyeta nramanri varaivaro Kotiva nkye qora kyaiqa vare vari quara nruka nyataarive, tiro.

⁵ Ioniva mwitaa ti varuvata Iutiasaitave, Ierusaremisaitave, ekyaa mwi mwatanaahua hisai hisai mwiva qua tunani vita uto variqata mwihua nkyiari qora kyaiqa vare varura timwa qovarama kyovaro Ioniva nramanri mwihua nyunra.

⁶ Ioninra tuavaaqava vahirero mpo quara kameri kyaahi vara kyero ututo tuavaaqava vahuvaro mwiva nraahu ututero reti tavaarana rupatero varura. Ioniva hia kyara vara tu kyero nranraitiro, mwiva kainyaaqa nrenro voravanto kuruto nramanrinra nreqanro mwi kyarara nraahu nre varura.

⁷ Ioniva nraakye qora timwa nyinro tiqaro, Ni naakiara nrianri vaisiva kepukyavanto ni naatara kyero nronra vaisivantoma variananrove. Mwiva nronra vaisivanto varihana nte qumina vaisi variqananra tina, hia nte qio kakataama vina nai kyuqu nraamwuma tai kyaantara huvantu mwataanirrave.

⁸ Nte qati nramanri nkyi nyi varuquo. Mwiva Kotira mwanraqura nkyi nyiananrove, tiro. Ioniva mwitaa turama.

*Ioniva Iesusira nramanri mwunra
(Matiu 3:13-17; Ruku 3:21-22)*

⁹ Mwi entara Iesusiva Nasareti mwatukya Karirisairo nri ntero Ioniva varunani utontero vuvaro Ioniva Iotaani nramanriqi variqaro Iesusira nramanri mwunra.

¹⁰ Nramanri mwia mwuvaro Iesusiva nramanriqitairo qatinani mwaanri ntero taqovaro nyaamwuvanto qatua vuvaro mwiqitairo Kotira mwanraquravanto nyaamwa minrunra voti huva tumu ntero Iesusiraqaa varura.

¹¹ Tumu Iesusiraqaa varuvaro quavanto nyaamwusairo mwitaama tiro:
E ni maaquvanto variararo
ni mutukyavanto iara mpoqiyavata vaiho.

Nte iara qamwateqanama varuqo, tiro.

*Saataaniva Iesusira mwataara hora
(Matiu 4:1-11; Ruku 4:1-13)*

¹² Quavanto nyaamwusairo mwitaa tuvaro qamwanrama kyero Kotira mwaanraquravanto Iesusira vita varero qumina mwataqaa hia vaisivata varu mwatararaqaa uro kyovaro varura.

¹³ Mwini uro kyovaro Iesusiva 40 entara variqiro vuvaro Saataaniva Iesusirara qora kyaiqa varaarive tiro, mwia mwataara hijaro taqovaro Iesusiva hia mwia qua riaraitiro, hia qora kyaiqa utura. Iesusiva mwitaamaqiro viqaro qaakyau vahikurivanto nrohi varunani varuwata nyaamwunyaa vaisinramwu tumu mwiaqaa kyuqema kyeta ntaqikyi varura.

*Iesusiva Karirini uro nai kyaiqa toharora
(Matiu 4:12-17; Ruku 4:14-15)*

¹⁴ Mwi entara mpo uhua Ioninra ntavaaqavu kyeta viteta karavuqi uro kyovaro Iesusiva Karirini uro variqaro Kotira mwakyaakya kyuqe mwakyaakya nraakye qora timwa nyinro tiqaro,

¹⁵ Mwi entava nri ntaih. Kotiva nkyiqa ntaqikyiari entava qaumaqa iho. Nkye qora kyaiqa uti varira qaqlira kyeta nte kyuqe mwakyaakya timwa nyianinra nkye mwi quarara qutaave timwa kyeta riemwaqi quate, tura.

*Iesusiva Saimonikya Enturukya nyaanronra
(Matiu 4:18-20)*

¹⁶ Iesusiva mwitaa timwa kyero vuva Kariri rumpua tokya sataa viqaro taqovaro Saimoniva nai qata Enturukyantiri variqaro vale nte varura. Mwitanahua tavukya kyaiqa vare varutanahua vale nte varuvaro

¹⁷ Iesusiva mwitanahua tiqaro, Nkyetana ni naakiara nriate. Nkyetana vale ntamwa kyeqata tavukya varaantema kyeta ni naakiara nriqata nraakye qora sitevarave, tiro.

¹⁸ Iesusiva mwitaa tuvata mwitanahua mate mwiqiara nkyiari vahe mwini kyeta Iesusira vatavare vurama.

*Iesusiva Iemisikya Ionikya nyaanronra
(Matiu 4:21-22)*

¹⁹ Mwitanahua mwia vatama kyeta vuvaro Iesusiva pataqiaqa viqaro taqovata Sepetira mwaaqutana Iemisivavata, mwia qata Ionivavata, mpo-tuqi variqata vale ntuke hi vura haqire varura.

²⁰ Mwitanahua vale haqire varuvaro qamwanrama kyero Iesusiva mwitanahua nraanrovata mwitanahua rieta nkyiari sora Sepetiravata, mwia kyaiqa varo vaisihuavata, mpotuqi kyeta Iesusira vatama kyeta vurama.

*Iesusiva vaana titovaro nritarero vura
(Ruku 4:31-37)*

²¹ Mwitanahua Iesusira vatama kyeta vuvaro Iesusiva vuva Kapenaamini uro variqaro mwaanra tu entaraqaa mwaanra nraamwuqi vera ntero variqaro mwipi varuhua mwakyaakya timwa nyinro.

²² Iesusiva nraakye qora timwa nyi varuvata mwihua mwia qua rieta tiqata, Qikye, mwiva nanra quave tiri timwa timwiho? Mwiva hia mwaanra okyara ti varia vaisinramwuhua qiantema kyero ti variho. Mwiva nronra vaisivanto qiantema kyero ti variho, tura.

²³ Mwitaa tuvaro Iesusiva mwaanra nraamwu mwipi varuvaro vaavan-vanto mwia utaqi varu vaisiva nraamwuqi vera ntero qua aakyara ntero tiqaro,

24 Iesusio, e Nasaretinyaavave. E tiri nataa hirerarave nrianro? E tiri ntutqu tuiga kyarererarave nrianro? Nte i okyara ntapihi kyaauva e nrianro. Kotiva i titahara e Kotira kyaiqa nraahu vare variarava variaro, tiro.

25 Mwitaa tuvaro Iesusiva vaana mwia inronra hiro tiqaro, Tirema variante. Mwi vaisiraqtaira nritarera quante, tiro.

26 Iesusiva mwitaa tuvaro vaana mwiva mpoqama kyero mwi vaisira tu varero qakyaa qakyama kyero qua aakyara timwa mwatero qatinani nritarero viro.

27 Vaanavanto nritarero vuvata mwipi ntuaantuama vita varuhua kyaauqu ntukikinraaqata kyeqata nai timwa mwi nai timwa mwi hita tiqata, Nanra inraikyavantove qovarama viho? Mwaa quara qaraakya quave. Mwi vaisiva kepukya qua tihatama vaanavantovata mwia qua riaavo, tura.

28 Mwihua mwitaa timwaqi vita nrita huvata ekyaa Karirini varuhuavata mwii quara riora.

***Iesusiva Saimoninra nrinraatarara kyaahaqama kyovaro qati sivura
(Matiu 8:14-15; Ruku 4:38-39)***

29 Iesusiva mwaanra nraamwuqitairo veva ntero Iemisikya Ionikya sita varero vuva uro Saimonikya Enturukya nraamwuqi vera ntero varura.

30 Saimoninra nrinraatarara mwamwanta tuoqqa huvaro taintaqaas vaite varuvata mwihua mwianra Iesusira timwa mwita.

31 Timwa mwuvaro Iesusiva mwia uro taqero mwia kyaauquqa tu varero mwia mwaamwianrama kyero. Mwitaama kyovaro mwia mwamwantavanto kyuqema viro naitarama vahuvaro mwii nraakyeva siviro kyara uta nyinrenro tera hora.

***Iesusiva nriqa vuhua kyaahaqama kyovata qati varura
(Matiu 8:16-17; Ruku 4:40-41)***

32 Iesusiva mwi mwatukyaraqi varuvaro huarivanto vikyovaro entama vuvata nraaky'e qora nriqa vuhuavata, vaanavanto utaqi varuhuavata, sita vareta Iesusiva varunani uro kyora.

33 Mwitaa huvata ekyaa mwi mwatukyaraqinaahuavata Iesusiva varu nraamwunra qesa mwina nrumu varita hvai kyora.

34 Huvai kyeta varuvaro Iesusiva nraaky'e qora airintikara mpo qara mpo qarama kyero nriqa vuhua kyuqema nyatovaro mwihua nriqa vuva taiga vuvata qio varura. Qio varuvaro vaanavantovata airi vaisiqi varuhua sitamwa kyovata nrirareta vura. Nritareqata vi varuvaro Iesusiva vaana mwihuara qao tiro tiqaro, Hiavata qua qiate, tiro. Vaanavanto Iesusira ntapihi kyovarora tiro, Iesusiva mwitaa tura.

***Iesusiva Karirini nrohiqaro qua mwakyaakya timwa nyunra
(Ruku 4:42-44)***

35 Mwia qanranraa hia qaatatovaro Iesusiva siviro veva ntero uro hia vaisivantovata varunani Kotiravata qua tirero vura.

36 Mwini vuvaro Saimoniva nai henahuavatama kyero mwia puua hirero viro.

37 Vuhua uro Iesusira puama kyeta mwinramwuhua mwianra tiqata, Quataara e mwaini variarata ekyaa mwaa mwatukyaraqinaahua iara puua hi variavo, tita.

38 Mwinramwuhua mwitaa tuvaro Iesusiva qaqao tiro, Varaivaqen-ramwu mpo mwatukya mpo mwatukyavata nrohiqata qua mwakyaakya nraaky'e qora timwa nyianre. Nte mwakyaakya mwihua timwa nyinrenra nrurvave, tiro.

39 Mwitaa timwa kyero mwinramwuhuavata sita varero Karirini nrohi variqaro mwaanra nraamwu mpoqi mpoqi vera ntero variqaro

mwakyaakya nraaky e qora timwa nyiqiro viqaro vaisi utaqitairo vaanavata sitamwa kyovata nritare vurama.

*Tauma rumpuara utu vaisira kyaahaqama kyora
(Matiu 8:1-4; Ruku 5:12-16)*

⁴⁰ Iesusiva mwakyaakya timwa nyiqiro vi varuvaro vaisi mpovanto tauma rumpuara utu vaisiva Iesusiva varunani uro ntero tori kyaauru raviro Iesusrara po kye tiqaro, E ni kyaahaqa hiataa hirera, e qiomaa ni tauma rumpuara nruka matenanrave, tiro.

⁴¹ Mwitaa tuvaro Iesusiva mwi vaisirara po kye timwa mwatero, nai kyauqu mpiami mwia mwamwantaqa vatero tiqaro, Nte mwitaa hiataa ihana i mwitaama mwatarerave. I mwamwantara kyuqema quarive tuqo, tuvaro

⁴² mwia tauma rumpuaravanto qamwanrama tavanta vuvaro mwiva qio varura.

⁴³ Mwiva qio varuvaro Iesusiva mwi vaisirara kepukyaqama kyero tiqaro,

⁴⁴ Hia mpohuavata timwa nyinraitira, viraro Kotira kyaiqa vara mwate vari vaisiva i mwamwanta taqaarive. Mwiaqaataira e Mosesiva mwaanra qua timwa tora rieqarama Kotira mpo inraikya mwinrata nraaky e qoravanto iara tiqata, Qutaama mwia mwamwanta kyuqema viho qiate, tiro.

⁴⁵ Iesusiva mwitaa tuvaro mwi vaisiva hia Iesusiva tunte hiraitiro, mwi quara viti timwa nyi viri timwa nyi hvutu ekyaa vaisi riovoro mwia kyaara Iesusiva mpo mwatukya mpo mwatukya qoqaa quariva hia vahuvoro mwiva qaqlira kyero hia mwatukyani viraitiro, qumina sata variqiro vuvata nraaky e qora hisai hisaita mwia taqarerata nrurrama.

2

*Iesusiva hini mwamwanta qutu vu vaisira kyuqema mwatora
(Matiu 9:1-8; Ruku 5:17-26)*

¹ Iesusiva Karirini nrohi ntero nrumu ntantero Kapenaamini uro varuvara mwi mwatanahaahua Iesusiva nrumu variho tu quara rieta

² mwihua airivanto uro Iesusiva varu nraamwunraqi ntuvantuuma vita nraamwu mwivata ru piqa kyeta qesanavata hvuaiqu kyovaro mpovanto mwiqi vera ntaariva hia qioqa hura. Mwitaa hvuvaro Iesusiva nraamwu mwiqi variqaro mwakyaakya timwa nyi varura.

³ Iesusiva timwa nyi varuvata vaisi mponramwuvanto nkyiari hena vaisi mpo mwia mwamwanta hini qutu vura taintama vare nrurrama. Erahiamuaantema vaisinramwu mwia taintama vareta nrurrama.

⁴ Mwinramwuhua nri nteta Iesusira nraaqani quananrave titi, taqovata nraaky e qora airivanto varuvata mwinramwuhua nraamwu utaqi vera nteva hia qioqa hura. Hia qioqa hvutu mwinramwuhua qaqlira kyeta nraamwu qjata tahiporaqaa mwaanri nteta mwi vaisira varaa mwaanri vateta, Iesusiva nraamwu utaqi varuvata mwinramwuhua Iesusiva varura mwina mpiami ntukuraa kyeta. Qio ntukuraa kyeta nriqa vu vaisira taintaqaa vatora qakyomakye kyaqi vuvaro mwi taintava nraaky e qora utaqaa uto vahura.

⁵ Vahuvoro Iesusiva riovata mwi vaisinramwuhua nkyiari nraahu tiqata, Qutaama mwaa vaisira Iesusiva qio kyuqema kyaananrove, tu vaisinramwuhua varuvaro Iesusiva hini mwamwanta qutu vu vaisirara tiqaro, Ni maaquo, e Kotira qua raaquta kyaananra nte mwi quara nrukama mwatauquo, tiro.

6 Iesusiva mwitaa tuvata mwaanra okyara ti varu vaisinramwuhua mwipi varuhua riemwaqi vita tiqata,

7 Qaqao, mwi vaisiva nanraqamave mwitaa tiho? Mwiva mwitaa tiqaroma Kotira uaqiamma mwate variho. Hiamma qumina vaisivanto variqaro nai hena vaisiara, E Kotira qua raaquta kyaananra nruka mwatauqo, qiananrove. Kotiva mwiva nraahuma qio mwitaa qiananrove, tita.

8 Mwihua mwitaama nraato riovaro Iesusivavata mwihua su nyaato tura ntapihi kyero tiqaro, Nkye nataamaqive mwitaama riaavo?

9 Nte mwaa vaisira hini mwamwanta qutu virara tiqanama, E Kotira qua nteqa kyaananra nte nrukama mwatauqo, tuqatama nkye nianra tiqata, Qaqao, i quavanto unra quave. Hia cutaa qovara hiananrove, qiarave. Qio mwaini riaate. Nte mwi vaisirara tiqana, Sivira ena tainta tu varera quante, qiariro qiove ni quara mwiva mwitaa hiananrove? Nkye timwa mpivaqena riaankye, tiro.

10 Iesusiva mwitaama kyero mwihua kyaparama nyatero mwiva mwihua qaiqaa tiqaro, Nte mwatani mwatatai nraaqiarava varuqaro ni nronraqama kyaihananra tina, nte qiomma mwatani variqana vaisivanto Kotira qua nteqa kyaani quara nruka kyaaninrave. Nkye ni quara cutaa quave qiate tina, nte mwate mwaa vaisirara mwitaa tirerave, tiro.

Mwitaa timwa kyero Iesusiva hini mwamwanta qutu vu vaisirara tiqaro,

11 Sivira ena tainta tu varera ena mwaatani quantema tuqo, tiro.

12 Mwitaa tuvata ekyaa nraakye qora mwia taqe varuvaro mwi vaisiva siviro mpiami nai tainta tu varero uvata mwihua nrihanrama vita kyauqu ntukikinraaquate varita Kotira nrutu tuaahereta tiqata, Mwaa kyaiqara nraahumwa mpo qara hi kyaiqara hia taqauna kyaiqarave, tura.

Iesusiva Rivaira nraanronra

(*Matiu 9:9-13; Ruku 5:27-32*)

(Mwi entara taakisi vare varu vaisihua mponramwuvanto taakisi vare-qata hini munima nkyiari tutetai hini munima nraahu nkyiari nronra vaisi nyunra. Mwitaa hvutava qumina nraakye qoravanto taakisi varo vaisihua ekyaa mwihua mpuara vaisi nraahuma variavo tura.)

13 Iesusiva Kapenaamini vari kyero mwiaqatairo nrumu ntantero Kariri nramanri tokyasataa uvata nraakye qora airivanto mwiva varunani ntuvantuuma vita varuvaro Iesusiva qua mwakyakya mwihua timwa nyinro.

14 Mwiaqatairo mwiva vuva uro variqaro taqovaro Rivaiva, Arapiaasira mwaaquvanto, opisi nraamwuqi taakisi vare varuvaro Iesusiva mwianra tiqaro, Ni naakiara nriante, tiro. Mwitaa tuvaro Rivaiva siviro Iesusira wataqiro vurama.

15 Iesusiva Rivaira nraamwuqi uro variqaro nai nraaqiaranramwuvata kyara nre varuvata airi vaisi taakisi vare varuhuavata, vaisi mponramwu mwihua uaqiahi kyaiqara uti variahuvé tuhua mwihuavata, nraamwu mwipi variqata kyara nre varura.

16 Iesusiva vaisi mwinramwuhua kyapata kyara nre varuvata Parisi vaisi mwaanra okyara ti varuhua taqovaro Iesusiva taakisi vare varuhuavata, uaqiahi kyaiqara uti variahuvé tuhua mwihuavata, kyara nre varuvata mwihua Iesusira nraaqiaranramwu kyapara hita tiqata, Nanraqamave Iesusiva uaqia hia vaisihua kyapata kyara nre variho? tita.

17 Parisi vaisinramwuvanto mwitaa tuvaro Iesusiva mwihua qua riero tiqaro, Qati vari vaisiva hia totaava hinani vi varirave. Nriqa vi vaisiva nraahu totaava hinani vi varirave. Ta vaisihuavate tiqata, Tire avuqavuma

kyeta nrohi varurahuave qiahua, nte hia mwihua nyaanranrenrana tumuvave. Nte uaqia hia nraakye qorahua nyaanranrenrana tumuvave, tiro.

Kyara auramaterara tura
(Matiu 9:14-17; Ruku 5:33-39)

18 Mwi entara Ioninra nraaqiaranramwuvantovata, Parisi vaisinramwuvantovata, kyara auramate varuvata vaisi mponramwuvanto Jesusira kypara hita tiqata, Ioninra nraaqiaranramwuvantovata, Parisi vaisinramwuvantovata, kyara auramate variavo. Qio nanraqamave i nraaqiaranramwuvantovata hia kyara aurama taraitita, qati kyara nre variavo? tita.

19 Mwihua mwitaa tuvaro Jesusiva tiqaro, Nraakye vararerera qari vaisiva nai vataahuavata qati varirera, qiove mpovanto mwia vataahuara kyara aurama taate qiananro? Qaqa, hiama qio mpovanto mwitaa qiananrove. Nraakye vararerera qari vaisiva qati varirata mwia vataahua hia kyara aurama taraitita, qatima kyara nrevarave.

20 Mpo enta nri ntairata mwihuaqitai nraakye vararerera qiani vaisira tu vareta qatinani vara kyaivata mwi entaraqaataita mwia vataahua ti atura ntqata kyara aurama tevarave, tiro.

21 Mwitaa timwa kyero Jesusiva mpo quaqaa ntumwa kyero timwa nyinro tiqaro, Mpovanto tuavaaqa nrihi nrabitu quaninra haqira hirero hiama tavuna qaraakya toqa kyero mwiaqaa taagautero haqiraananrove. Tavuna qaraakya mwia toqa kyaariro qiqi vahiraro tuavaaqa nrihi mwivavata nronraqama kyero nrabituankyo tiro, hia mwitaa hirave.

22 Qaiqaa tirerave. Uaini qaraakya tati kyero hia mpovanto memenra pahiqo ututaira haaruua taqu vara kyero qaraakya uaini mwia mwipi raurirave. Memenra pahi mwiva nraahaqama viraqa mwiva mwitaa hiraro uainivanto kepukya uaini utu viqaro memenra pahi nrabitu kyaananrove. Mwitaa hiraro uainivantovata memenra pahivantovata uaqjama quanarrove. Memenra pahiqotai ututaa taqura qaraakya taqu vara kyeta mwipi nraahu qaraakya uaini rauruarave, tiro.

(Jesusiva mwi quaraqaa ntumwa kyero tu quara okyaravanto mwataamama vahiro. Mwia votima kyeta hiama haaruua okyaravata qaraakya okyaravata kuaaqi kuairama kyeta tutaate, tura.)

Mwaanra tu entarara tura
(Matiu 12:1-8; Ruku 6:1-5)

23 Mpo enta mwaanra tu entaraqaa Jesusiva nai nraaqiaranramwuyapata aakyo utaqi kyakuma votihura uiti vara tutoraqi vi varuvata mwia nraaqiaranramwuvantovata viqatama uiti tamwa nteqa kyeqa nramwaqita vi varuvata

24 Parisi vaisivanto mwihua taqeta Jesusirara tiqatama, Mwataqi mwihua taqaante. Mwaanraqaa qao timwa tai inraikyarama mwihua vareta hiavo, tita.

25 Parisi vaisinramwuvantovata mwitaa tuvaro Jesusiva nkyiari timwa nyinro tiqaro, Haaru nkyi haivaqava Ntevitivavata, mwivavata nrhuua mwihuvata, kyara nraataa huvata varuvaro Ntevitiva kuaa qara hura mwia nkye hia mpukuqi kyaara ntumwa kyeta riaarave?

26 Apaiataava Kotira kyaiqa vara mwate varuva vunyaa vaisivanto varu entaraqaa Ntevitiva Kotira nraamwuqi vera ntero mpereti Kotirani vatora vara kyero nrenro nteqa kyero nai mwia vatama kyeta nrhuuavata hini nyuvata nronrave. Kotira kyaiqa vara mwate varu vaisihua nraahu mwi kyarara nraataara vahuvaro qumina vaisivanto mwi kyarara nrenro mwi quara nteqa kyorave, tiro.

²⁷ Iesusiva mwitaa timwa kyero tiqaro, Kotiva vaisiara rieqaro mwaanra enta vahiananrove turave. Kotiva hia mwaanra entara rieqaro vaisi utu tairave.

²⁸ Ni mwatani mwatatai nraaqiarara nronraqama kyaihana variqana nte mwaanra entaqaa ntaqikyiqanama ntina kyakya hiani kyaiqara qioma varaaninrave, tiro. Iesusiva turama.

3

Mwaanra tu entaraqaa Iesusiva vaisi kyauqu kyuqema kyora (Matiu 12:9-14; Ruku 6:6-11)

¹ Mpo enta Iesusiva mwaanra nraamwuqi vera ntero taqovaro vaisi mpovanto kyauqu hini kukokaqama vuva varuvata

² mwicqi varuhua mponramwuvanto tiqata, Kyai variqata taqaararo Iesusiva vaisi kyauqu kukoka mwia mate mwaanra tuna entaraqaa kyuqema kyarera, mwia kyaara mwiaqaa qua vataare, tita.

³ Mwihua mwitaa timwa kyeta Iesusira taqe varuvaro Iesusiva kyauqu hini kukoqama vu vaisirara tiqaro, E nrinra vaisi variara utaqaa sivira variante, tuvaro mwiva siviro varuvaro

⁴ Iesusiva mwihua kyapara hiro tiqaro, Tirenramwu teta mwaanra qua rieqatama mwaanra qiana entaraqaa nataa hiani kyaiqarave qio varaanarave? Tire mwi entaraqaa vaisi mpo kyaahaqamave mwataananrave? Mwia uaqiamave mwataananrave? Mwaanra qiana entaraqaa tire vaisi mpo kyaahaqa hiararo mwiva qative variananrove? Tire qaqlira kyeta mwi vaisira ruve kyaananrave? tiro.

Iesusiva mwitaa tuvata mwihua hia quavata tihua tirema varuvaro

⁵ Iesusiva taqovata mwihua hia mwi vaisirara po kye tiraitita, kapera viri rate varuvaro mwia kyaara Iesusira mwutukyavanto uaqia huvaro mwia raraqa tovaro mwi vaisirara tiqaro, Ena kyauqu ntatutaante, tuvaro mwiva nai kyauqu ntatuta kyovaro kyuqema vura.

⁶ Mwia kyauquvanto kyuqema vuvata Parisi vaisi mwinramwuhua mwaanra nraamwuqitai veva nteta uro Herotira vataqita nrohuhua kypata ntuvaantu hita variqata Iesusira nataama kyetave ru kyaananrave timwa kyeta nai timwa mwi nai timwa mwi hi varura.

Nraakyе qoravanto hisai hisaita uro Iesusira taqora

⁷ Iesusiva nai nraaqiaranramwu sita varero kyaarerera tokyasata uro varuvata nraakyе qora airivanto Karirinyaahuave, Iutianyaahuave,

⁸ Ierusaremiqinaahuave, Itumianyaahuave, Taiaaqinaahuave, Saitoniqinahuave, Iotaani nramanri vutura qarahi hini varuhuave, mwihua Iesusiva mpo kyaiqa mpo kyaiqa vare varurara rieta, mwihua Iesusiva varura nramanri tokyani ntuvaantuuma vita varurara.

⁹ Nraakyе qora airivanto ntuvaantuuma vita varuvarora tiro, Iesusiva nai nraaqiaranramwuanra tiqaro, Nraakyе qoravanto ni ntaqutivorave. Mpoto terama kyeta vataivaqena mwicqi mwaanrintena variankye, tiro.

¹⁰ Iesusiva nraakyе qora airi kyuqema kyovatara tita, nriqa vuhua mwia tu vararerata uti variqata nai ntaquti nai ntaquti hi varura.

¹¹ Mwihua mwitaa hi varuvata nraakyе qora mponramwu vaanavanto mwihua utaqi varuhua, mwihua Iesusira taqeta mwia vuni tumu ntita variqata aakyara nteta tiqata, E Kotira mwaaqvantove, tita. Vaanavanto mwihua utaqi varu vaisihua mwitaa tuvaro

¹² Iesusiva mwihuari kepukyaqama kyero tiqaro, Hia ni okyarara qiate. Tirema variate, turama.

*Iesusiva vaisi 12 nramwu sita vatora
(Matiu 10:1-4; Ruku 6:12-16)*

13 Iesusiva mwini vari kyero uro taaqi mporuqa variqaro nai mwutukya vahu vaisihua nraahu nyaanrovata mwihuara uro varuvaro

14 Iesusiva vaisi 12 nramwu kyaara ntumwa kyero mwihuara nte mwihu sitaarita ni qua vareta timwa nyiqi quate timwa kyero, mwihu nronraqama kyero mwihuara tiqaro, Nkyenramwu ni airuqama mateta ni qua timwa nyiate tinama, nte nkyi sita vatauqo.

15 Nkyenramwu vaana titaivaro nritarero quarive tina, nte nkyi kepukya nyinrenrave, tiro.

16 Iesusiva mwaa vaisinramwuhua sitora:
Saimoninra. Iesusiva mwia mpo nrutu ntamwatero
Pitaavave tiro.

17 Iemisikya Ionikya. Mwitanahua Sepetira mwaaqutana varura. Iesusiva mwitanahua mpo nrutu
Poanesisi-huatanave tura. (Poanesisi mwaa quaraqitai tirera, Nyaanruva Nruqua Ti Varirave, tita.)

18 Enturura, Piripira
Pataromiuunra
Matiura
Tomaasira
Iemisira. mwiva Arapiaasira mwaaqu
Tatiaasira
Saimoninra. mwia nrutu mpo Serotira
19 Iutaasira. mwi vaisiva Iesusira ntavaaqavu kyaate tiro,
mwia qovarama kyo vaisiva.
Iesusiva 12 vaisi mwi vaisinramwuhua sitora.

*Mpo uhua Iesusirara ueraqama vi vaisivama variho tura
(Matiu 12:24-32; Ruku 11:14-23)*

20 Iesusiva nai nraaqiaranramwu sita varero nraamwunianra nkyiari mwaatani vuvata qaiqaa nraakye qora airivanto mwia taqrerata ntuvantuuma vita varuvaro Iesusiva nai nraaqiaranramwu kyapata kyara nraanriva hia qioqa huvaro varuvata

21 Iesusira vataahua mwi quara rieta Iesusirara tiqata, Qikye, mwiva ueraqamama viho. Kyai uro mwia vitaare, timwa kyeta vurama.

22 Mwaanra okyara ti varu vaisihua mponramwuvanto Ierusaremisaita tumunte mwitaama tita, Vaana vunyaava Pierisepurivama Iesusira utaqi variho. Pierisepuriva mwia utaqi variqaro mwia kyaahaqa hi variharoma Iesusiva vaisiqitairo vaana tite variho, tita.

23 Mwihuara ueraqama viho. Kyai uro mwia vitaare, timwa kyeta vurama.

24 Kuua mwatanaavanto ntainravi variqata nkyiaritana nai ntaqi nai ntaqi ihua hia qio varivarave.

25 Kuua nraamwunaavanto ntainravi variqata nkyiaritana nai ntaqi nai ntaqi ihua, mwihuavata hia qio varivarave.

26 Saataaniva ntaqikyi vari vaanahua ntainra vita nai ntaqi nai ntaqi hi varivarave. Saataaniva hia mwihuqaqa ntaqikyiqiro viraro mwihu kepuvanta taiqaananrove.

27 Mpuara varaiva hia kepuvanta vaisi mpo nraamwuqi qumina vera ntero mpo inraikya varairave. Mpuara varaiva vuni kepuvanta vaisi mwia nraante rupa kyero vatero mwiaqaatairo vera ntero mpo inraikya mwiani mpuara varairave.

²⁸ Nte qutaa qua qianinra riaate. Nraakye qoravanto uaquia hiani kyaiqara mpo qara mpo qara hiani kyaiqara uti vari quarave, uaquia hi quara mpohuara ti vari quarave, Kotiva qiomaa ekyaa mwi quara mwi quara nraakye qora qati nruka kyero taunru nyataananrove.

²⁹ Vaisivanto Kotira mwanraqurara uaquia hi quara ti vari quara Kotiva mwaa entaravata nraakiaravata mwi quara hia nruka kyero taunru nyataananrove, tiro.

³⁰ Iesusirara vaanavanto mwia utaqi variho tuvarora tiro, mwiva mwitaa tura.

Iesusira vataahua mwia taqarerata nrunra

(Matiu 12:46-50; Ruku 8:19-21)

³¹ Iesusiva mwitaa tuvata mwia nrovavata, mwia qatanramwuvata, nri nteta mwaata qesaqa sivi varita tiqata, Iesusira tivarō tumuanrive, tuvata

³² nraakye qora airivanto Iesusira tataaqa mwatakyaa vita varuhua Iesusira timwa mwita tiqata, I nrovavata, i qatanramwuvata, mwaataqa variqata iara tumuanre qiao, tita.

³³ Mwihua mwitaa tuvoro Iesusiva mwihua kyapara hiro, Tavave ni ntova variho? Tahuave ni kata pakyaa variavo? tiro.

³⁴ Mwitaa timwa kyero mwia tataaqa vara ututu mwatakyaa vita varuhua taqero tiqaro, Mwahauma ni ntoiua ni kata pakyaa variavo.

³⁵ Ni kova nyaamwuni varira mwia qua rieqata nrohi variahua, mwihua ni kata pakyaa variavata, ni nunra nakyaa variavata, ni ntoiua variahiava, tura.

4

Uiti humwu iso quaraqaa ntumwa kyero tura

(Matiu 13:1-9; Ruku 8:4-8)

¹ Iesusiva kyaarerera tokyani uro variqaro nraakye qora qua mwakyaakya timwa nyankye tuvata nraakye qora airivanto ntuvantua vita mwia ututuma kyovarora tiro, Iesusiva qaqlira kyero mpotu mpogqi mwaanri ntero mwipi mwatakyaa viro nramanriqaa varuvata nraakye qoravanto nramanri tokya sata varura.

² Mwihua mwataqaa nramanri tokya sata varuvaro Iesusiva mpo qua mpo quaqaa ntumwa kyeqaro timwa nyunra.

³ Iesusiva tiqaro, Nte qianinra riaate. Vaisi mpovanto kyara vara tirero humwu isaqiro vurave.

⁴ Mwiva kyara humwu isaqiro vuvaro mpohuva aanra tokyani tumu ntuvarto nyaamwavanto nrumu nramwa kyorave.

⁵ Mwitaa huvaro humwu mponramwuvanto ori mwataqaa tumu ntuvarto mwatavanto hia vevatoqama vahuraqara tiro, qamwanrama upiqi vuvaro

⁶ mwia tuqavanto hia mwataqi vevato vuraqara tiro, huarivanto nri ntero itovaro aaharama vurave.

⁷ Mwitaa huvaro humwu mponramwuvanto uakukya upiqoraqi tumu ntiro uakukya vatama kyero upiqi vuvaro uakukyavanto ntumwaqu kyovaro hia tamwa riorave.

⁸ Mwitaa huvaro humwu mponramwuvanto kyuqe hu mwataraqaa tumu ntiro kyuqema kyero upiqeqaro kyuqe tamwa riorave. Mpo huva airi tamwa riemwa tovaro mpo huva uro mpooqavata riemwa tovaro mpo huva uro mwiavata nraatarero mpooqavata riemwa torave, tiro.

⁹ Iesusiva mwii quaraqaa ntumwa kyero timwa nyi taiqa kyero tiqaro, Nkyi nyaato vahirera, mwi quara okyara ntapihi kyeta riaate, tiro.

Iesusiva hia vutu kyero tiraitiro, mpo quaqaa ntumwa kyeqaro nraakye qora timwa nyu okyarara tura

(Matiu 13:10-17; Ruku 8:9-10)

¹⁰ Iesusiva qua timwa nyi taiqa kyovata nraakye qoravanto nkyiari mwaatani vita nrira huvaro Iesusiva nanrianraa varuvafa mwia nraaqiara 12 nramwuvantovata, mpo uhuavata, mwiva varunani nri nteta Iesusiva mwi quaraqaa ntumwa kyero tu okyarara hia ntapihiraitita, Iesusira kyapara huvaro

¹¹ Iesusiva mwihua timwa nyinro tiqaro, Kotiva nraakye qoraqaa ntaqikyiani quara uqetatai quara, mwi quara Kotiva nkyiara qati kyairata mwi quara okyara riaate tirave. Mwitaa timwa kyero mpo nraakye qora qatinani varihua mwi quara okyara hia ntapihi kyera timwa nyante thiananra tina, nte mwi quaraqaa ntumwa kyeqana mwihua timwa nyin-renrave.

¹² Nte mpo quaqaa ntumwa kyena qiarita nraakye qoravanto taqegetavata hiama ntapihi kyeta taqevarave.

Mwihua ni qua rietavata hiama ntapihi kyeta rievarave.

Mwihua ni qua rieqata

nkyiari uaqiahi kyaiqara qaqlira kyaivarovauma

Kotiva mwihua uaqiahi kyaiqara vare quara nruka

nyataananrove, tiro.

(Aisaiaa 6:9-10)

Uiti uru isaqiro vura mwia okyara ntapihi kyero Iesusiva nai nraaqiaran-ramwu timwa nyunra

(Matiu 13:18-23; Ruku 8:11-15)

¹³ Iesusiva mwitaa timwa kyero mwinramwuhara tiqaro, Nkye mpo? Nte mwi quaraqaa ntumwa kyena tu okyarara hiave nkye ntapihi ri-aavo? Nkye hia mwi quara okyara ntapihi kye riaivera, nte nraakiara mpo quaqaavata ntumwa kyena qiani quara, nkye nataama kyetave qio mwiavata ntapihi kyeta rievarave?

¹⁴ Nte vaakya mwi quaraqaa ntumwa kyena tu okyarara tirerave.

Vaisivanto humwu isatora mwi quara okyara vahirero Kotira quama vaiho.

¹⁵ Humwu aanraqaa tumuntu quara mwia okyara vahirero nraakye qora imponramwuvanto mwi humwunra votima kyeta variarave. Mwi nraakye qorahua Kotira qua riaavarao Saataaniva nri ntero mwihua su nyaato mwutukyaqitairo mwi quara ntavihi kyero varairave.

¹⁶ Mpohia nraakye qorahua ori mwataqaa tumu nti humwunra votima kyeta variarave. Mwinramwuhua Kotira mwakyaaqya rieta mwi quarara qamwata kyeta variavaro

¹⁷ quavanto hia mwihua mwutukyaqi vihata mwi nraakye qorahua hia mwi quara mpo enta mpo enta riaraita variavata mwi quara kyaara mpo hiahua mwihua uaqiamma nyatarerata uti variavata mwihua tiri rivorave tiqata Kotira qua qamwanrama qaqlira kyeta varia nraakye qorahua variarave.

¹⁸ Mpohia nraakye qorahua uakukya upiqairaqui isato humwunra votima kyeta variarave. Mwi nraakye qorahua Kotira qua rieta

¹⁹ mwiaqataita mwihua mwatanyaia inraikyara nronraqama kyeta riemwaqi viqata munimanrave, mpo inraikyavare, qamwata kyeqata mpo inraikya mpo inraikya vararerata riemwaqi vita Kotira qua qaqlira kyaavarao Kotira quavanto hia mwi nraakye qorahuaqi vahata variarave.

²⁰ Mwihua mwitaa hiavata mpohia nraakye qorahua kyuqe mwataqaa isato humwunra votima kye variarave. Mwi nraakye qorahua Kotira qua

rieta mwi quarara quataave timwa kyeta, mwi quara riemwaqi vita kyuqe kyaiqa Kotirani varaqita quarave. Mpohia nraakye gorahua mwi quara rieqata kyuqe kyaiqa Kotirani varaqi vi variavata, qaiqaa mpohia nraakye gorahua mwihua nraatara kyeta uro mpoqivata kyuqe kyaiqa Kotirani varaqi vi variavata, qaiqaa mpohia nraakye gorahua mwihua kyaiqvata nraatara kyeta uro nai mpoqivata kyuqe kyaiqa Kotirani varaqita vi variarave, tiro. Iesusiva turama.

*Iesusiva mpo quaqaa ntumwa kyero tura
(Ruku 8:16-18)*

²¹ Iesusiva mwitaa timwa kyero mpo quaqaa ntumwa kyero tigaro, Omwa cupi kyero taini uro vatairave? Tave vara kyero ntumwaqu tairave iho? Tainta mwemwaqi veta vatairave iho? Qaqao, hia mwitaa hiraitiro, omwa cupi kyero tuaahera kyero qoqaa mwaanri vatairave.

²² Nraakiara ekyaa ugeta taani inraikyara qoqama qovarama kyaananrove. Ntumwaqutaani inraikyara ekyaa qoqama qovarama kyaananrove.

²³ Nkyi nyaato vahirera, mwi quara okyara ntapihi kyeta riaate, tiro.

²⁴ Iesusiva mwitaa timwa kyero mwiva tigaro, Nkye qua riaara mwia ntapihi kyeqata riaate. Nkye nanra tukyaqaave mpohua nyitave mpohua vara nyatera mwi tukyaraqama Kotiva nkyitavata nyiqanro mwiaqaa mpoqivatama nyiananrove.

²⁵ Kotira qua riaariva variqiro viraro Kotiva mwia kyaahaqa hiraro mwiva mwia qua mpoqivatama riaananrove. Kotira qua hia riaariva variqiro viraro mwiva nanra inraikyave tutaaninra mwia vara kyairaro mwiva qatima variananrove, tiro.

Kyara humwukyanaa qupiqaaninranra mpo quaqaa ntumwa kyero tura

²⁶ Mwitaa timwa kyero Iesusiva mpo quaqaa ntumwa kyero timwa nyinro tigaro, Kotiva ntakikyiariwa mwaa quara votima kyeroma vaiho. Vaisivanto kyara humwu isatero

²⁷ mwiaqatairo mwiva uro vaitero siviro qaiqaa vaitero siviro mwitaa-maqiro vi variharo kyara humwuvanto nai ntukohiro qupiqa varirave. Vaisivanto kyara humwu mwiva qupiqaani okyarara hia ntapihiharo

²⁸ nai mwataqi vahiro naiqama kyero qupiqaarave. Tauraqama kyero uru mwiva ntukohiro turu vera kyero uro tamwa riemwa taiharo tamwa mwiva peqqa hirave.

²⁹ Peqqaqama vahiro vaisivanto paipa varero uro tamwa mwia teqa kyeqaro varairave, tiro.

Maasiteti uruqaa ntumwa kyero tura

(Matiu 13:31-32; Ruku 13:18-19)

³⁰ Iesusiva mwitaa timwa kyero qua timwa nyiqiro viro mwitaama tiro: Kotiva ntakikyiiva nanra inraiky votima kyerove vaiho? Mwianra rieqana nanra quaqaae ntumwa kyena qianinrave?

³¹ Qio mwia maasiteti kyatari mwia tamwa votima kyeroma vaiho. Uru mwiva nai pata qiani vahirarama tuqo. Vaisivanto uru mwia vara kyero mwataqi tutaiharo

³² qupiqaero kyatari nronraqama viro hini kyara tutaaravata nraatara kyero nrutarero kyatari nronra vaharo mwia kyaaravantovata nronra vaharo nyaamwavantovata mwia kyauquqaa nraamwu hoqatero mwia aamanaqi varirave, tiro.

³³ Mwitaa timwa kyero Iesusiva mwi quara voti hira mpo qua mpo quaqaaavata ntumwa kyeqaro timwa nyiqiro viro nraakye qoravanto ntapihi kyeta rie quara nraahu mwihua timwa nyunra.

34 Mwiva nraakye qora qua timwa nyinrenro hia vutu kyero tiraitiro, mpo quaqaa ntuma kyeqaro timwa nyiqiro vuvata nraakye qoravanto nkyiari mwaatani vita nrira huvaro Jesusiva nanrianraa nai nraaqiaranramwu kyapata variqaro mwi quara okyara ntapihi kyero mwinramwuhua timwa nyunra.

*Toqa vaururu utura Iesusiva inronra huvaro taiqora
(Matiu 8:23-27; Ruku 8:22-25)*

35 Mwi entara entama vuvaro Jesusiva nai nraaqiaranramwuanra tiqaro, Nrivaqenramwu nramanri nronra mwaa qara vare vutura hini tokyani quare, tiro.

36 Mwitaa tuvata mwia nraaqiaranramwuvanto nraakye qora ntuaantuama vuhua mwini kyeta Jesusiva varu mpoturaqi mwaanrinteta mwia vita vareta vuvata mpotu mponramwuvantö mwihua vatama kyeta vurrama.

37 Mwihua nramanri mwiaqaa vi varuvaro qamwanrama kyero toqa vaururuvanto nronraqama kyero tiqaro nramanri ventaqiro nrivi varuvaro nramanrivanto mpotuqi mwaanrintero piqa kyareru uti varuvaro

38 Jesusiva mpotu vitiqi turuma ntumwa kyero vaite varuvata mwia nraaqiaranramwuvanto mwia uro vaurama kyeta tiqata, Mwaanra ti variara vaisio, tirinramwu nramanrivanto ntaqutu kyaaninranra e hiave nronraqama kyera riaaro? tita.

39 Mwihua mwitaa tuvaro Jesusiva vaitorajitairo siviro toqa vaururu mwia inronra hiro kyaarera mwianra tiqaro, Qati tirema vahianta, tuvaro toqavanto taiqa vuvaro nramanrivanto utomwi tirema vahura.

40 Tirema vahuvaro Jesusiva nai nraaqiara mwihuara tiqaro, Nanra inraikya nraatue aatu hi variavo? Nkye hiave nianra kepukyäqama kyeta rieta hiavo? tiro.

41 Jesusiva mwitaa tuvata mwia nraaqiaranramwuvanto aatu hita kyauqu ntukikinraaqateta tiqata, Qikye, mwaa nai nataahi vaisivave? Toqa vaururuvantovata, nramanrivantovata, mwia qua riaaho, tita tura.

5

*Iesusiva vaisi mpoqitairo vaana titamwa kyora
(Matiu 8:28-34; Ruku 8:26-39)*

1 Mwia nraaqiaranramwu mwitaa timwa kyeta mpotuqi vuhua kyaareaqa qara vareta hini tokya Kekesaani uro ntovaro

2 Jesusiva mpotuqitairo mwaamwi ntovaro vaisi mpovanto ori ataamwuqitairo veva ntero uto Iesusira huntu kyora.

3-4 Mwi vaisiva vaisi qunte varura ori ataamwuqi variqiro vi varuvaro vaanavanto mwia utaqi varuvaro varuvata mpo uhua seni vara kyeta mwia rupa taare tita, rupa tovaro mwi vaisiva airi kyaanta kyuqu kyauqu rupa tora ntapihiqaro ntukekaama kyora. Qaiqaavata mwitaama kyeqata mwia rupa tora tuvaro mwiva seni ntukekaama nraahu kyorara tiro, mpovanto mwia rupaariva hia varura. Mwia nraataraariva hia varuvaro

5 mwi vaisiva entaqivata, iheravata, vaisi qunte varura ori ataamwuqi viro nrinro hiqaro qua aakyara timwaqiro viro taaqiqaavata nrohiqaro qua aakyara tiqaro oriqtairo nai mwamwanta toqaqamaqiro vi varura.

6 Mwi vaisiva variqaro nyianrasairo Iesusira taqero hiantero uro mwia kyuqutarani tumu ntiro variqaro

7 mpoqama kyero aakyara ntero tiqaro, Jesusio, Kotiva nai virini variva varihara e mwia mwaqvavento variaro. Ni nataa hirere nrianro? Kotirara rieqara hia ni ruantema tuqo, tiro.

8 Iesusiva vuni mwi vaisirara tiqaro, Uaqja hiara vaanavao, mwi vaisir-aqitaira nritarera quante, tuvarora tiro, mwi vaanava mwitaa tura.

9 Mwitaa tuvaro Iesusiva mwi vaananranra ena nrutu qiente tuvaro vaana mwiva nai nrutu ntero tiqaro, Ni nutu Airivave. Tire airivantoma mwaa vaisiraqi varuro, tiro.

10 Mwitaa timwa kyero mwi vaanava qaiqaavata airi nani Iesusirara po kye tiro tiqaro, Hia mwaa mwataraqaataira tiri titante, tiro.

11 Mwitaa timwa kyeta vuru taqovaro mwi entara quara airintivanto uhiqa nre varuvata

12 vaananramwuvvanto Iesusirara po kye titi tiqata, Qati tiri titairaqe quara mwihuaqi viqetaare, tuvaro

13 Iesusiva mwihua qati kyovata vaana airivanto mwi vaisiraqtai nritareta uro quara mwihuaqi viqeteta varuvata mwiaqaataita quara 2,000 nramwuvvanto hianteta okai veva vahuraqi ito ntamwanra nramanriqi kyavuhu vuvaro nramanrvanto ekyaa mwihua ntaquiti kyora.

14 Quaravanto nramanriqi ntumwa vita qutu vuvata quaraqa ntaqikyu vaisinramwuhua taqeta mwiaqaatai hiantamwa tetu mwatukya nronraqi uro mwi quara timwa nyita aanranivata viqata viti viri timwa nyiqi vuvata mwi mwatanaahua mwi inraikyara taqarerata nrumu

15 Iesusiva varunani taqovaro vaakya vaana airivanto mwia utaqi varu vaisiva qati mwatakya viro tuavaaqa utu tero mwia vu nraato ntapihi vuvaro varuvata mwihua mwia taqeta aatumta kyeta varura.

16 Mwihua mwi vaisira taqeta aatu hiqata varuvata vaisi mponramwu vaakya mwi inraikyara taqohua timwa nyita tiqata, Iesusiva mwitaama kyaiharoma mwi vaisiva kyuqema viho, timwa kyeta quaravata timwa nyuvata

17 mwi mwatanaahua mpqama kyeta aatu hita Iesusirara tiqata, E tiri mwataqaataira quante, ti varura.

18 Mwi mwatanaahua mwitaa tuvaro Iesusiva mpotuqi qaiqaa mwaanri nte varuvaro vaakya vaanavanto utaqi varu vaisiva Iesusirara po kye tiro tiqaro, Kyai ntevata ivata quankye, tiro.

19 Mwitaa tuvaro Iesusiva qaqao tiro, Hia mate nivatama kyera vinan-rave. E ena mwaatani uro variqarama Kotiva i kyuqema kyero kyaahqama mwatairara ena nramwunaahuavata timwa nyante. Kotiva iara po kye timwa mwatai quara uro ena nramwunaahuavata timwa nyante, tiro.

20 Iesusiva mwitaa tuvaro mwi vaisiva Iesusiva tunte hiro mwi mwatara kyero uro kyauqurutana mwatukya vahunani nrohiqaro Iesusiva nai kyuqema mwatorara nraakte qora timwa nyiqiro vuvata ekyaa mwia qua rihua mwi quara rieqata mwihua nkyiari kyauqu ntukikinraaqa teqata varura.

Iairaasiva Iesusira uro huntu kyora

(Matiu 9:18-26; Ruku 8:40-56)

21 Mwi mwatanaahua Iesusirara hia tiri mwaatani variante tuvaro Iesusiva mpotuqi qaiqaa mwaanri ntero nrumu ntantero kyaareraqa qara varero hini tokyani vuvata mwini nraakte qora airivanto ntuvantuma vita mwiva varunani ututuma vita varura.

22 Varuvaro vaisi mpovanto mwi mwatukyaraqi mwaanra nraamwuuqa ntaqikyu varuva, Iairaasiva nri ntero Iesusira taqero mwia kyuqutarani tumu ntiro Iesusirara

23 po kye tiro tiqaro, Ni naamwunravanto qaumama qutu quananrove. E nrinra ena kyauqu mwiaqaa vatairaro mwia nriqa quariva taiqa viraro qati variarive, tiro.

24 Mwi vaisiva mwitaa tuvaro Iesusiva mwikyantiri vurama.

Nraakye mpovanto Iesusira vaqa vitiga kyaatu kyora

Iesusiva Iairaasikyantiri vi varuvata nraakye qora airivanto mwia vataqita viqata hisai hisaita mwia rataaqi vi varuvaro

25 nraakye mpovanto ekyaa enta tora taqamwaqiro vuvavata mwihiuaqi varura. Mwi nraakyeva 12 ihiara tora taqamwaqiro viqaro nronraqama kyero nriqa vuvaro variqaro

26 mpo totaa mpo totaahuara ni kyaahaqa hiate timwa kyero, munima nyuvata mwihiua hia mwia kyaahaqa hiraita, mwia munima nraahu nramwa kye varuvaro mwia mwamwanta mpoqiaavata uaqiamma vuvaro varura.

27-28 Mwi nraakyeva nraakye qora utaqi variqaro Iesusiva kyaiqa varorara rieqaro Iesusira nraakiara nriqanro nai riero tiqaro, Nte mwia tuavaaqaqa kyaatu kyaariro ni nriqa viva qamwanrama taiqa quarive, tiro. Nraakye mwiva mwitaa timwa kyero Iesusira vaqaqa kyaatu kyovaro

29 qamwanrama kyero mwia nraanre ntova aaharama vuvaro mwiva taqovaro mwia mwamwantavanto qio vahura.

30 Mwia mwamwantavanto kyuqema vuvaro varuvaro Iesusiva qamwanrama kyero taqovaro mwia kepuqya hinivanto vivuvaro mwiva tuqasaa viro nraakye qora mwia vataqita nruhua kyapara hiro, Tavave niqa tu varaiho? tiro.

31 Iesusiva mwitaa tuvata mwia nraaqiaranramwu tiqatama, Nai tavave iqa tu varaiho? Ena taqaante, nraakye qora airivanto i nraaqani viqata i rataaqi vi variavo, tita.

32 Mwitaa tuvaro Iesusiva qati nraahu vaisi viri mwia puaama kyarero aitutu hi varuvaro

33 nraakye mwiva nai mwamwanta kyuqema vurara riero mwia nraatu hiqaro kyuqu kyuauq nti varuvaro uro Iesusira kyuqutarani tumu ntiro mwii quara ekyaa qoqaa timwa mwuvaro

34 Iesusiva nraakye mwianra tiqaro, Ni naamwunrao, e nianra mwiva ni kyaahaqa hiananrove qiararoma i mwamwantavanto kyuqema viho. Qioma i mwutukyavanto qihakya hirara quante, tiro.

Iairaasira nraamwunra sivuma kyora

35 Iesusiva mwi quara qati ti varuvata Iairaasira nraamwuqitaita vaisi mponramwu nri nteta Iairaasira hunta kyeta mwianra tiqata, I nraamwunravanto qutuma viho. Haunri mwaanra ti vari vaisira ntavaaqavu tero, tuvaro

36 Iesusivavata mwinramwuhua qua riero mwaanra nraamwuqaa ntatiqiyi varu vaisirara tiqaro, Hia aatu hiante. Nianra kepuqyaqama kyera rieqara variante, tiro.

37 Iesusiva mwitaa timwa kyero mwiva Pitaaravata, Iemisiravata, Iemisira qata Ioniinravata, mwinramwuhua nraahu sita varero

38 Iairaasira nraamwuqi uro ntero taqvata nraakye qora nronraqama kyeta ti atura ntatiqata ntate varuvaro

39 Iesusiva nraamwuqi vera ntero tiqaro, Nanranre nkye ntate variavo? Mwi qiaatarava hia qutu viho. Mwiva qati vaitema variho, tiro.

40 Iesusiva mwitaa tuvata mwihiua Iesusira quara raima mwateta varuvaro Iesusiva ekyaa nraakye qora vara veva mwaatani kyero qiaatara mwia nrohua qohuavata, taaramponramwu nai sita tohuavata, mwinramwuhua nraahu sita varero qiaatara mwiva qutuvata vatoraqi uro

41 mwia kyuauquqa tu varero nai quaqitairo tiqaro, *Tarita kumi*. mwaa qiaataruvao, nte iara siquantema tuquo, tiro.

⁴² Iesusiva mwitaa tuvaro mwi qiaatarava qamwanrama siviro nrohi varura. Mwiva 12 ihi vara kyo qiaatarava siviro nrohi varuvata mwinramwuhua mwia taqeta nrihanrama vita mpoqama kyeta kyauqu ntukik-inraaque varuvaro

⁴³ Iesusiva mwinramwuhuara kepukyaqama kyero tiqaro, Qio mwaa taqaarara hia mpohua timwa nyiate. Mwaa qiaatarara kyara nraahu mwiate, turama.

6

Nasaretiqinaahua Iesusira qoririma mwatora

(Matiu 13:53-58; Ruku 4:16-30)

¹ Iesusiva mwi mwatara kyero nai mwaatani vuvata mwia nraaqiaran-ramwuvanto mwia vatama kyeta vurama.

² Iesusiva nai mwaatani uro variqaro mwaanra entaqaa uro mwaanra nraamwuqi qua mwakyaakya timwa nyi varuvata nraamwu mwipi nraakyе qora airivanto varuhua mwia qua rieta kyauqu ntukikinraaqateta tiqata, Qikye, mwi vaisiva taisairove mwi quara mwi quara rialho? Mwiva kyuge okyara mpo vu nraato mpo vu nraato taisairo vara qirove tiho? Tava mwi kyaiqara okyara mwia nraamwute variharove mwiva nronra kyaiqa vare variho.

³ Mwiva taintave mwitaa inraikya uti varivama variho. Mwiva Mariaara mwaaque. Iemisivave Iosisisvave Iutaavave Saimonivave mwihuama mwia qatanramwu variarave. Mwia nrurranramwuvata mwaini variarave, tita. Mwitaa timwaqi viqata Iesusira nramwunaahua mwianra qumina vaisive timwa kyeta, mwia qoririma mwatora.

⁴ Mwihu mwitaa huvaro Iesusiva mwihuara tiqaro, Poropeti vaisi Kotira qua timwa nyi variariva mpo mwatani uro variraro mwi mwatanaavama mwianra qamwateqaroma mwia nrutu tuaaheraananrove. Mwi vaisiva nai mwaatani variqaro nai nrurra qata kyapata variraro mwia nramwunaava mwianra qumina mwaa mwatanaava nraahuma variho timwa kyero hiama mwia nrutu tuaaheraananrove, tiro.

⁵ Mwitaa timwa kyero nraakyе qoravanto Iesusirara qumina vaisive tura kyaara Iesusiva hia qio nai mwatukyaqi nronra kyaiqa varaariva vahuvaro mwiva nriqa vuhua pataqiatanaqaa nraahu nai kyauqu vatovata kyugema vura.

⁶ Mwia nramwunaahua mwianra hia qio tiri kyaahaqa hiarivave turara Iesusiva airi nraato tiqaro varura.

Iesusiva nai nraaqiara 12 nramwu mpo mwatukya mpo mwatukya sitovata vurara tura

(Matiu 10:5-15; Ruku 9:1-6)

Mwi mwatukyaqaitairo Iesusiva siviro vintante nrintante mpo mwatukya mpo mwatukya variqi viqaro nraakyе qora mwakyaakya timwa nyiqiro vura.

⁷ Iesusiva nai nraaqiara nyaanrama kyero taaratana taaratana sitovata 12 mwinramwuhua mpona mpona vura. Mwiva mwihu siteqaro vaisiqitaita vaana sitaivata qatinani nritareta quate tiro, mwiva mwihu kepukya nyiqanro qua mwitaama tiro:

⁸ Nkyenramwu virera hiqatama hiama mpo inraikya mpo inraikya vareta viraitita, aanraqaa kyaauru quru vare vira nraahuma vareta quate.

⁹ Hiama kyarave tuave munimave vareta quate. Kyuqu nraamwu mwia nraahuma vara ututaate. Hia soti taaratana ututaate. Kuaiqia nraahu utu vareta quate, tiro.

10 Iesusiva mwi quara timwa kyero mwaa quaravata tiqaro, Nkyenramwu vivaro ta mwatanaavave nkyiara qamwateqaro nkyi sitairera, nkye nraamwu kuaikuqi nraahu variqita vitama mwi mwatukyara kyeta quate.

11 Nkye vivaro ta mwatanaahuave hia nkyi qamwata nyateta nkyi qua hia riarera utivera, nkyetaqaatait ntuvendrauma kyeta qaqlira tuto kyetama mwihua timwa nyita tiqata, Nraakiara nkyetama taqevarave, qiate, tiro.

12 Iesusiva mwitaa timwa kyero sitovata mwia nraaqiaranramwuvanto uro viti viri timwa nyita tiqata, Uaqia hi aanranra qaqlira kyeta kyuqe hi aanranraqaa quate, tita.

13 Mwitaa timwaqti viqata vaisi utaqi vaana varuhua sitovata qatinani nritare vuvata airi vaisi nriqa vuhua, mwihua qitataqaa vahamwenra qu nyateqata kyuqema nyatovata qio varura.

Nramanri nyi varu vaisira Ioninra rukyora

(Matiu 14:1-12; Ruku 9:7-9)

14 Mwitaa huvaro ekyaa mwi mwatanaava Iesusirara nai timwa mwi nai timwa mwi hi varuvarora tiro, Herotiva vunyaa vaisivanto mwi mwataro Kariri mwataqaa ntaqikyi varuva, mwivavata Iesusira nrutu riora. Nraakyre qora hini uhua Iesusirara mwitaama tita, Mwi vaisiva Ionivave. Ioniva nramanri nyi varu vaisiva qutu vuva qaiqaa siviro nrohi variho. Mwiva qati siviro nrohi variqarora tiroma nronra kyaiqa qio vare variho, tita.

15 Hini uhua mwitaa tuvata hini uhua qaqlao tita, Mwi vaisiva tiri haivaqava Iraisaava qovarama viho, tita. Mwitaa tuvata mpo uhua Iesusirara tiqata, Haaru poropeti vaisi Kotira qua qovarama kye varuhua, Iesusiva mwihua votima kyeroma variho, tita.

16 Nraakyre qora Iesusirara mwitaa ti varuvaro Herotiva mwi quara riero tiqaro, Qikye, mwi vaisiva nramanri nyi varu vaisivama variho. Nte qiavaro mwia nruntu teqa kyova Ioniva, mwivama qutu viraqitairo qati siviro nrohi variho. Mwiva qutu viraqitairo qati siviro nrohi variqarora tiroma, mwiva nronra kyaiqa qio vare variho, tiro.

17-18 Tauraa Herotiva nai qata Piripira nraata Herotinamainra varatero varuvaro Ioniva nri ntero airi nani Herotirara tiqaro, E ena qata nraata hia varaataarama varera hiaro, tuvaro mwia kyaara Herotiva nai nraata Herotinamainranra tu quara rieqaro mwiva naivanto vaisi mpo titovaro Ioninra ntavaaqavu kyero rupaqiro uro karavuqi kyora.

19 Kyovaro Ioniva karavuqi varuvaro Herotira nraatavanto Herotinamaiava varuvaro Ioniva mwianra tu quava mwia raraqa tovaro Ioninra rukyarerera utuvaro hia mwia rukyaari aanrava vahura.

20 Ioniva vaisi kyugeva avuqavuma kyero nrohi varurara tiro, Herotiva mwianra rieqaro mwia nraatu aatu hiqaro hia mwia rukyaate tiro. Mwitaa timwa kyero Herotiva Ioniva ti varu quarara qamwateqarovata mwiva mwia quara taara nraato tura.

21 Mwitaamaqi vuvaro mpo enta Herotinamaiva Ioninra rukyaari aanrava qio vahura. Mwi quarä okyaravanto mwataamama vahiro. Herotiva nai mwato entava qovara huvaro mwii entaraqaa nronra vaisi kyara nyinrenro mwihua nyaanronra. Mwiva ntaqu vaisihuqa qtaqikyi varu vaisihuave, airi inraikya vato vaisihuave, mwiva mwihua nyaanrama kyero kyara nyinro.

22 Kyara nyuvata mwihua nre varuvaro Herotinamainra nraamwunravanto nrumu mwihua ihi ntamwa nyatero. Mwiva ihi nte varuvata Herotivavata mwiva kyara nyuhuavata mwii mwanaatara qamwata mwateta. Herotiva nai nraata nraamwunranra qamwatero mwianra tiqaro, Nanra inraikyarave i mwutukya vaiho? Ni timwa mpiraqe i mwiankye, tiro.

23 Mwitaa timwa kyero mwiva kyauqu nriqiqaa vatero tiqaro, Nte qutaama tuqo. E nanra inraikyarave tiraqena nte i mwianinrave. Mwata hini nte ntaqiqyianinranra tiraqena nte ntainra kyena i mwianinrave, tiro.

24 Herotiva mwitaa tuvaro mwanraata mwiva veva ntero uro nai nronra ntumwahiamwa hiro tiqaro, Nto, nte nanra inraikyarave qiariro ni mpiananrove? tiro. Mwitaa tuvaro mwia nrova tiqaro, Ioniva nramanri nyi vari vaisira mwia qiata mpiante qianta, tiro.

25 Mwia nrova mwitaa tuvaro mwia nraamwunravanto hiantero uro vunyaa vaisi Herotirara tiqaro, Qamwanrama kyera Ioniva nramanri nyi vari vaisira nrunta teqa kyera tanuqa varaqira nrumu mpiante, tiro.

26 Mwanraata mwiva mwitaa tuvaro Herotira mwutukyavanto uaqia huvarovata mwiva vaakya kyauqu nriqiqaa vatorara rieqaro, kyara nrannerata nru vaisihuvaravata rieqaro tiqaro, Nte mwanraata mwianra tu quara nteqa kyaankyorave, timwa kyero

27 mwiva karavu vaisiqaa ntaqiqyi varu vaisira mpo titero tiqaro, Ioninra qiata qamwanrama kyera varaqira nrumu mpiante, tuvaro mwiva uro karavuqitairo mwia nrunta teqa kyero

28 mwiaqaatairo mwia qiata tanuqa vatero varaqiro nrumu mwanraata mwia mwuvuvaro mwiva varero uro nai nronra mwunra.

29 Mwitaama kyovata Ioninra nraaqiaranramwuvanto mwi quara rieta mwihua nrumu Ioninra mwamwanta varaqita uro quntamwa kyora.

Iesusiva pata kyara airiqama kyero 5,000 vaisi nyunra

(Matiu 14:13-21; Ruku 9:10-17; Ioni 6:1-13)

30 Iesusiva nronraqama kyero sitovata vu vaisihua nrohita uro ntante nrumu ntuvantua ma vita Iesusira nraaqani variqata mwihua nkyiari kyaqi varoravata, nkyiari nraakyne qora timwa nyu quaravata, Iesusira timwa mwunra.

31 Mwi entara nraakyne qora airivanto Iesusira taqarerata vita nrita hi varuvarora tiro, Iesusivavata mwia nraaqiaranramwuhua hia kyuqema kye kyara nreva vahuvata varura. Mwitaa huvaro Iesusiva tiqaro, Vivaqenramwu uro qumina sata tetaraa variarata nkyenramwu ho hiate, tiro.

32 Iesusiva mwitaa timwa kyero mwinramwuhua sita varero mpotuqi mwaanri ntero kyaarerqaama tero qumina sata varirerata vurama.

33 Mwinramwuhua yuvata airi nraakyne qoravanto mwihua taqeta tiqata, Mwihua mate mwiniima vivarave, timwa kyeta mpo mwatukya mpo mwatukyaitaita mwihua hianteta kyaarerata tokyasataa mwataqaa vuhua uro Iesusiva mpotuqima tero virera hunani mwihua nraante uro ntora.

34 Mwihua nraante uro ntovaro Iesusiva nraakiara uro ntero mpotuqtairo mwatani mwaamwi ntero nraakyne qora airivanto ntuvantua vuhua taqero mwihua po kye timwa kyero tiqaro, Qikye, vaisivanto hia mwihuaqaa ntaqiqyi varihata sipisipivanto nkyiariaraa nrohi varia sipisipihua votima kyeta mwaa nraakyne qorahua api nrohi variavo, tiro. Mwitaa timwa kyero mwini variqaro Iesusiva qua mwakyakya mwihua timwa nyi varura.

35 Iesusiva timwaqiro vuvaro huari mpuani tumi vuvata Iesusira nraaqiaranramwuvanto mwiva varunani uro nteta tiqata, Huarivanto mpuani tumi viharo mwaini qumina satave.

36 E nraakyne qora mwaahua sitairata mwihua uro kyara vahiani mwatukyaraqi nrohiqata kyara kyoqama kye nraate. Mwihua hia kyara ntumwa vareta nriahuave, tita.

37 Mwia nraaqiaranramwu mwitaa tuvaro Iesusiva qaqao tiro, Nkyetama mwihua kyara nyiate, tiro. Tuvata mwihua Iesusira kyapara hita tiqata,

Tire nronra munima 200 kinaa mwia kyetave kyara vara kyeta mwihua nyiananrave? tita.

³⁸ Mwitaa tuvaro Jesusiva mwinramwuhua kyapara hiro tiqaro, Mpereti nnaamave ntumwa taavo? Nkye uro taqaate, tuvata mwihua uro faqeta nrumu timwa mwita tiqata, Mpereti kyauquruvata tavukya taaratanaavata nraahuma ntumwa taavo, tita.

³⁹ Mwia nraaqiaranramwu mwitaa tuvaro Jesusiva nraakye qora timwa nyinro tiqaro, Nkye mwukyau mwaa mpo sata mpo sata ekyamaa mwatakya vita variate, tiro.

⁴⁰ Mwitaa tuvata mwihua mpo sata 100 nramwu mwatakya vita varuvata mpo sata 50 nramwu mwatakya vita varuvata mwitaamaqi vita ekyaa nraakye qoravanto mwatakya vita varura.

⁴¹ Mwatakya vita varuvaro Jesusiva mpereti hini kyauqu mwinramwunravata, tavukya taara mwitanavata, vara kyero nyaamwuni taqeqaro Kotirara kyuemave timwa kyero, mpereti nteqa kyero nai nraaqiaranramwu nyinro tiqaro, Qio nkye varaqita uro nyivata mwihua nraate, timwa kyero tavukya taara mwitanavata tukyama kyero nraakye qora mwihua ekyaa nyuvata

⁴² ekyaa mwihua vikyokyama nronra.

⁴³ Vikyokyama nrovata Jesusira nraaqiaranramwu mwiaqaataita nraakye qoravanto mperetivata tavukyavata nreqata viti vaati kyora utu aatuma kyeta tua nronra ntutantuto tuara 12 nramwu piqa kyora.

⁴⁴ Mwi entara 5,000 vaisi airivanto mwi kyarara nronra.

Iesusiva kyaarerera mwutuqaa kyuqu ntamwaqiro vura

(Matiu 14:22-33; Ioni 6:15-21)

⁴⁵ Jesusiva mwihua kyara nyinro mwiaqaatairo qamwanrama kyero nai nraaqiaranramwu sitero tiqaro, Nkye nraante mpotuqi mwaanrinte kyaarerqaamate vutura qarahi hini Vetasaitaani vi varivaqenama nte nraakye qora sitaarita nkyiari mwaatanai quate, tiro.

⁴⁶ Mwitaa tuvata mwihua vuvaro Jesusiva verara taaqiqaa Kotirara aakyara tirero viro.

⁴⁷ Jesusiva Kotirara aakyara tirero vuvaro entama vuvata mpotuqi vuhua kyaarerera tavaara sata vi varuvaro Jesusiva nanrianraa qatinani variro.

⁴⁸ Jesusiva mwini variqaro taqovaro toqavanto mwihua virera hunasairo nriqanro mpotu vente varuvata mpotuqi varuhua mwukyaari tiqata nramanri ntainraqita vura. Mwitaamaqita vuvaro qauma qaataatarera huvaro Jesusiva mwihua huntu kyaarer kyaarer mwutuqaa nrinro.

⁴⁹⁻⁵⁰ Mwiva nriqanro mwihua nraatara kye quankye tiro, utuvata mwihua taqovaro Jesusiva kyaarerera mwutuqaa nri varuvata mwihua mpoqama kyero nraatuqa tovata vaanave timwa kyeta, aatu hiqata oi aai ti varura.

Mwihua oi aai ti varuvaro Jesusiva qamwanrama kyero mwihuara tiqaro, Kepukyaqama kyeta variate. Ntema nruqo. Hia aatu hiate, tiro.

⁵¹ Mwitaa timwa kyero Jesusiva mpotuqi mwaanri ntero mwihua kyapata varuvaro toqavanto taiqa viro tirema vahuvata mwihua qikye tita, kyauqu ntukikinraaqate variqata

⁵² Jesusiva mpereti taaraqia airiqama kyero nraakye qora nyunranra hia mwihua su nyaato ntapihuvata hia Jesusira okyarara ntapihi kyeta riora.

Iesusiva Kenesaretini uro variqaro nriqa vuhua kyuqema kyora

(Matiu 14:34-36)

⁵³ Mwihua vutura hini vantara Kenesaretini uro nte mwaamwi nteta mpotu rupate

54 mwataqaa virera huvata mwi mwatanaahua Iesusira ntapihi kyeta taqeta, Qio mwaa mwivave, tita.

55 Mwitaa timwa kyeta mwihua hianteta uro vutusai vurusaita nriqa vu nraakye qorahua sitaqata tumu Iesusiva variho tunani kyora.

56 Iesusiva mwi mwataraqaa variqaro mpo mwatukya mpo mwatukya pata mwatukyave, nronra mwatukyave, uta aakyogi vahu mwatukyarave, Iesusiva mwini nrohi varuvata mwi mwatanaahua nriqa vuhua sitaqita mwatukyaaqaa kyeta Iesusirara po kye tita tiqata, Qiove nriqa vi nraakye qorahua i fuavaaqa vitiqaa kyaativarave? tuvaro Iesusiva qiove tuvata ekyaa mwiaqa kyaatu kyo nraakye qorahua kyuqema nraahu vura.

7

Kotiva timwa tai quava vaisivanto timwa tai quaravata nraatara kyero vahira

(Matiu 15:1-9)

1 Parisi vaisinramwuvata mwaanra okyara ti varu vaisihuavata Iesusira taqerarter Ierusaremisaita nrumu Iesusiva varunani ntuvaantuama vita variqata

2 taqovata Iesusira nraaqiara mponramwuvanto variqata Parisi vaisi mwihua qua mwaanra okyara qaqla kyeta hia kyauqu hiqaraitita, kyara nre varura.

3 Mwi entara Parisi vaisinramwuvata ekyaa Iutia mwatanaahuavata nkyiari haivaqahua timwa to quara rieqata mwitaama kyeqata mwihua nkyiari kyauqu hiqe varura. Mwihua hia kyauqu hiqohua hia kyara nronra.

4 Mwihua uro maaketiqi nrohita uro ntanteta nrumu varita hia nkyiari kyauqu hiqama kyaraitita, hia kyara nronra. Mwihua haivaqahua kaapu hiqe okyararave, tanu hiqe okyararave, mpo okyara mpo okyara timwa nyuvata mwihua riemwaqi viqata nrohi varura.

5 Mwihua mwi quara riemwaqita nrohi varuhuara tita, Parisi vaisinramwuvata, mwaanra okyara ti varu vaisihuavata, Iesusira kyapara hita tiqata, Tiri haivaqahua qua timwa tora i nraaqiaranramwuvanto nteqa kyeta hia kyauqu hiqaraitita, kyara nre variavo. Nanraqamave mwihua mwitaa hi variavo? tita.

6 Mwitaa tuvaro Iesusiva mwihua nkyiari timwa nyinro tiqaro, Nkye unraqama kyeqata kyue kyaiqa vare variahuave. Aisaiava haaru variqaro nkyiara avuqavuma kyero qara ntumwa torave. Kotiva mwia kyaahaqa huvaro Aisaiava Kotiva mwitaama tiho tiro:
Mwaa mwatanaahua nroqitai nraahu ni nutu tuaahere
variavaroo mwihua mwutukyavanto hia nianra vaiho.

7 Mwihua mwaanra tiqatama mwihua nkyiari haivaqahua
qua nraahu timwa nyiqata mwihua quminama
ni nutu tuaahere variavo, tura.

(Aisaiava 29:13)

Aisaiava mwitaama kyero qara ntumwa torave.

8 Kotiva nkyiara mwitaa mwitaa hiate tu quara nkye mwi quara qaqla kyetama vaisivanto timwa taa quara nraahuma riemwaqita nrohi variarave, tiro.

9 Mwitaa timwa kyero Iesusiva mwihuara qaiqaa tiqaro, Qio kyuqema hiavo. Kotiva mwitaa mwitaa hiate tu quara nkye mwi quara qoririma kyeta nkyi haivaqahua timwa to quara nraahu riemwaqita vi variahuave.

10 Mosesiva Kotiva timwa to quara riero nkyiara tiqaro, Ena nrohua qohua nrutu tuaahera nyataante. Nai nrohua qohuara uaqia hiani quara ti variani vaisira rukyaate, turave.

11 Kotiya mwitaa timwa to quava vaihata nkye mwi quara hia riaraitita, nkyeta riemwa kye nkye tiqata, Vaisivanto nai nrohua qohuara tiqaro, Nte nkyitana kyaahaqa hirera tu munimanra hia nkyitana nyinraitina, Kotirani vatarerave, tirera,

12 mwi vaisiva qioma nai nrohua qohua qaqlira kyero hia mwitanahuqaan tqaqiyiqiro quananrove, qiarave.

13 Nkye unra qua mwitaa tiqatama Kotira qua nteqa kyetama nkyita haivaqahua timwa nyu quara mwia nraahumá nraakye qora timwa nyi variavo, tiro.

Nanra inraikyavanto vaisi uaqama mwataiharo Kotiva mwianra uaqia hi vaisirave tura

(Matiu 15:10-20)

14 Iesusiva nraakye qora ntuvantuama vuhua nyaanrama kyero mwi-hua timwa nyinro tiqaro, Nkye ekyaa nte tirera hiani quara kyuqema kyeta rieqatama variate.

15 Kyaravanto qatinasairo vaisi utaqi vi inraikyava hia vaisi uaqama mwataiharo Kotiva mwianra mwiva uaqia hi vaisirave qiananrove. Vaisi utaqitairo qovara hi inraikyava vaisi vara kyero uaqama kyairave.

16 Nkyi su nyaato kyuqe su nyaato vahirera, mwi quara okyara ntapihi kyeta riaate, tiro.

17 Iesusiva mwitaa timwa kyero nraakye qora ntuvantuama vuhua mwini kyero nraamwuqi uro varuvata mwia nraaqiaranramwuvanto Iesusiva vaakya tu quara okyarara mwia kyapara huvaro

18 Iesusiva tiqaro, Qikye, nkyi su nyaatovata mpo? Nkyi su nyaatovanto hiave ntapihi riaiho? Kyaravanto qatinasairo vaisi utaqi vi inraikyava hia qio vaisi uaqama mwataiharo Kotiva mwianra mwiva uaqia hi vaisivave, qiananro.

19 Vaisivanto kyara nraihanro hia mwi kyarava mwia vu nraatoqive mwutukyaqive viraitiro, qati vaisi raraqi ito vahiro qio mwiqitairo qatinani tumitarairave, tiro. Iesusiva mwi quara timwa nyiqanro mwi quaraqotairo nraakye qoravanto ekyaa kyara qio nraivaro Kotiva hiama nkyiara uaqia hia vaisihuave qiananrove, tura.

20 Iesusiva mwitaa timwa kyero qua mpo tiqaro, Vu nraatoqinaa inraikyavanto, mwutukyaqinaa inraikyavanto, mwi inraikyava mwi inraikyava vaisi uaqama kyaiharo Kotiva mwi vaisirara uaqia hi vaisirave tirave.

21 Vaisi vu nraato mwutukyaqitairo uaqia hi kyaiqara utuariva nriho. Vaisivanto nraakyevata api nrohiariva vu nraatoqitairo nriho. Mpuara varaarivavata mwiqitairo nriho. Vaisi ru kyaarivavata mwiqitairo nriho. Mpura nraata vaatiara nrohiarivavata mwiqitairo nriho.

22 Mpova hi inraikyaraara mwutukya ntiraro varaariva vu nraatoqitairo nriho. Airi munimave mpo inraikyave vaterovata qaiqaa kyaafavata nraahu vararerave ti variariva vu nraato tuaraqitairo nriho. Unra qua qiarivave, hia nai mwamwantaa qyuqema ntumwa quarivave, mpova hi inraikyaraara vairiqa hiarivave, mpura nrutu vara mwatanica hiqaro qiarivave, nte nronra vaisive qiarivave, api nrohianinranra nraahu riemwaq iiarivave,

23 ekyaa mwi inraikyava vaisi vu nraato mwutukyaqitairo nri ntero vaisi uaqama kyaiharo Kotiva mwia kyaara mwianra uaqia hi vaisirave qiananrove, tiro.

*Mpo mwatanaa nraakyevanto Iesusira kepukyara riovoro Iesusiva mwia kyaahaqama kyora
(Matiu 15:21-28)*

²⁴ Iesusiva mwitaa timwa kyero mwi mwatara kyero uro mpo mwatani Taiaavata Saitonivata vahu mwataraqaa varurama. Mwiva uro variro hia mpovanto ni taqaarive timwa kyero, nraamwu mpoqi varuvaro nraakyе mpovanto mwiva varura vaakya ntapihi kyora.

²⁵ Ntapihi kyero nraakyе mwia nraamwunraqi vaanavanto varu nraakyeva Iesusiva varuraqi uro ntero Iesusira nraaqani mwia kyuqusata tumu ntiro varura.

²⁶ Mwi nraakyeva nai mpo mwatanaava hia Iutaa mwatanaava, mwiva Siria mwata Ponisiaqi mwatatova varura. Mwi nraakyeva Iesusirara po kye tiro tiqaro, Ni naamwunraqitaira vaana titairaro qatinani nritaraarive, tiro.

²⁷ Nraakyе mwiva mwitaa tuvaro Iesusiva nai timwa mwinro mpo quaqaa ntumwa kyero tiqaro, Qaqao, nte nraaqiara nraante kyara mwinrenrave. Nte nraaqiara kyara vara kyena vairi nyiankyorave, tiro. (Mwi quara okyara mwataamama vahiro: Iesusiva tiqaro, Kyai nte Iutaa mwatanaahua nraante kyaahaqa hiankye. Nte mpo mwatanaahua nraante kyaahaqa hiankyorave, tiro.)

²⁸ Tuvaro nraakyе mwiva tiqaro, Nronrao, e qutaa qiararovata, vairavanto tainta mwemwaqi variqaro nraaqiaravanto kyara viti vaati nreqata kyaara rainrave, tiro.

²⁹ Nraakyе mwiva mwitaa tuvaro Iesusiva tiqaro, Kyuqema tira hiaro. E mwitaa qiarananra tina, nte vaana mwia titauqaro qatinani nritaraiho. I nraamwunravanto qio variho. Qio ena mwaatani quante, tiro.

³⁰ Iesusiva mwitaa tuvaro nraakyе mwiva nai mwaatani vuva uro ntero taqovaro vaanavanto mwia nraamwunraqitairo nritarero vuvaro mwi qiaatarava taintaqua kyuqema vaite varurama.

Nraato tita vuvaro quavata hia ntapihi kyero tu vaisira Iesusiva kyaahaqama kyora

³¹ Iesusiva Taiaani variro mwiaqatairo Saitoninivata uro variro mwisairo vintantero kyauqurutana mwatukya vahunanivata vintantero mwisairo kyaarerla nramanri Karirini tumu ntora.

³² Mwini tumu varuvata mpo uhua vaisi mpo vitaqita uro Iesusiva varunani kyora. Mwia nraato tita vuvaro quavata hia ntapihi kyero tu vaisira vitaqita uro Iesusiva varunani kyeta Iesusirara po kye tita tiqata, Ena kyauqu mwiaqaa vatairaro kyuqema quarive, tita.

³³ Mwihua mwitaa tuvaro Iesusiva nraakyе qoraqitairo vaisi mwia vitero uro nkyiariaraatana variqata Iesusiva nai kyauqu vukahiqo vaisi mwia nraatoqi veta vatero quaantu vihi kyero mwia mwaaqinriqa vatero

³⁴ nyaamwuni taqedaro mwia ua huvaro po timwa kyero nai quaqitairo tiqaro, *Epatave*. Qatua quante, tiro.

³⁵ Mwitaa tuvaro mwia nraato tita vuva qamwanrama qatua vuvaro qio riero varuvaro mwia mwaaqinrivantovata qio vahuvaro qua ntapihi kyero ti varura.

³⁶ Mwitaa huvaro Iesusiva mwia nramwunaahuara kepukyaqama kyero tiqaro, Mwaa inraikyara taqaara hia mpohua timwa nyiate, tiro. Iesusiva mwitaa tuvata mwihua Iesusira qua hia riaraitita, mwi quara viti viri timwa nyiqita vura.

³⁷ Mwihua viti viri mwi quara timwa nyiqi yuvata mwi quara riolahua qikye tita, kyauqu ntukikinraaqateta tiqata, Mwiva ekyaa kyaipa kyuqema kyero vare varivave. Mwiva nraato tita quahua kyuqema kyaihata qio

riaarave. Mwiva hia qua qiahua kyuqema kyaihata qio qua ti variarave, tura.

8

Iesusiva qaiqaa pata kyara airiqama kyero nyunra (Matiu 15:32-39)

¹ Mwi entara nraakye qora airi kyaatavanto Iesusira taqarerata nrumu ntuvantuuma vita varura. Mwihua hia kyara mpoqianivata ntumwa taraitita, qati varuvaro Iesusiva nai nraaqiaranramwu nyaanrama kyero tiqaro,

² Nte nraakye qora mwaa variahuara po tuqo. Mwihua taarampo enta ni vatama kyeta variqi viqata nkyiari kyara nramwa taiqa kyaavo.

³ Nte mwihua nkyiari mwaatani sitaarita mwihua nraataa hiro vuqitairo nrivu nrivuhirata aanraqaa tumu ntivorave. Mpo hiahua nyianrasaitavata nriahuave, tiro.

⁴ Iesusiva mwitaa tuvata mwia nraaqiara mwihua qaqao tita, Mwaa qumina mwukyauqaave. Taisitave kyara varaananrave, tita.

⁵ Tuvaro Iesusiva mwihua ntumwahiamwa hiro, Nkyenramwu nataama mperetive ntumwa taavo? tuvata mwihua tiqata, Mpereti 7 nramwu ntumwa tauro, tita.

⁶ Mwihua mwitaa tuvaro Iesusiva nraakye qora ntuvantua uhuardi tiqaro, Mwatasata mwatakyaa quate, timwa kyero mpereti 7 nramwu vara kyero Kotirara kyuqeve timwa kyero, mwi kyarara nteqa kyero nai nraaqiaranramwu nyinro nraakye qora nyiate, tiro. Tuvata mwihua nraakye qora ntuvantua uhua nyunra.

⁷ Nyuvaro Iesusiva tavukyavata vatora vara kyero Kotirara kyuqeve timwa kyero tiqaro, Tavukyavata tukyama kyeta nyiate, tiro.

⁸ Mwitaa tuvata mwihua nyuvata nraakye qoravanto qioqama kyeta nronra. Qio nreta viti vaati kyora mwia nraaqiaranramwuvanto utu kyeta ntutantuto tuara 7 nramwu piqa kyora.

⁹ Mwi entara 4,000 nraakye qora airivanto mwi kyarara qio nronra.

¹⁰ Qio mwiaqataairo Iesusiva nraakye qora sitero mwiva nai nraaqiaranramwu kyapata mpotuqi mwaanri ntero kyaarerera nramanri qara varero Ntamanutaa mwatani viro.

Parisivanto Iesusirara nronra kyaiqa tirivata tinraamwu taante tura (Matiu 16:1-4; Ruku 12:54-56)

¹¹ Iesusiva Ntamanutaa mwatani vuva uro ntovata Parisi vaisinramwu Iesusiva hunani nri nteta Iesusira inronrama mwatarerata mwia mwataara hiqata taqaare timwa kyeta tiqata, E nronra kyaiqa tiri tivuqaa varairaqaeta tire taqe iara quitaama Kotiva i titaiho qiare, tita.

¹² Mwihua mwitaa tuvaro Iesusira ua huvaro po tiro tiqaro, Mate mwaa varia nraakye qorahua nanraqamave tiqata nronra kyaiqa tinraamwu tairaqe tire i okyarara quitaave qiare ti variavo? Nte quataa qianinra riaate. Mate mwaa entara variahuva varivagena nte hia ntena okyara mwihua nyaamwu teqana nronra kyaiqa vararerave, tiro.

¹³ Iesusiva mwitaa timwa kyero qaqira mwihua mwini kyero mpotuqi mwaanrintero kyaarereraqaama tero vutura hini tokyanianra viro.

Parisi vaisi kyaiqa nraatu rauriqata variate tura (Matiu 16:5-12)

¹⁴ Kyaarereraqa vi varuvata Iesusira nraaqiaranramwuvanto mpereti taunru kyeta hia vararaitita, kuaiqia nraahu mpotuqi vatovaro

¹⁵ Iesusiva mpo quaqaa ntumwa kyero tiqaro, (Taupatai inraikyava mperetiqi viharo mperetivanto kyotairave.) Parisivantovata Herotivavata taupataira votima kyeta variavo. Nkye mwihua nyaatu aatu hiqata variate.

¹⁶ Mwitaa huvata mwia nraaqiaranramwuvanto Iesusiva mpo quaqaa ntumwa kyero tu quara hia ntapihiraitita, nai timwa mwi nai timwa mwi hita tiqata, Nanra quave tiho? Mpereti hia varauunanra mwianra rieqarove mwitaa tiho? tita.

¹⁷ Mwitaa ti varuvaro Iesusiva mwihua ti varu quara riero tiqaro, Nkye nanraqamave mpereti hia varara kyaara airi qua ti variavo? Hiave nkyi su nyaatovanto ntapihi vihata ntapihi kyeta riaavo? Nkyi nyaato titi vihatave nkye hia ntapihi kyeta riaavo?

¹⁸ Nkye su nyaato vataahua nkye hiave ntapihi kyeta rieta taqaavo? Nkye nte kyaiqa varaurara taunruve kyaavo?

¹⁹ Nte 5,000 nraakye qora mpereti kyaucuru nteqa kyena nyiavata nreta viti vaati kyora nataama tua nkye mwi entara piqa kyorave? tiro.

Iesusiva mwitaa tuvata mwihua tiqata, Qio tire mwi entara tua 12 nramwu piqa kyaavanranrave, tita.

²⁰ Mwihua mwitaa tuvaro Iesusiva qaiqaa tiqaro, Qio nte 4,000 nraakye qora mpereti 7 nramwu nyiavata nreta viti vaati kyora nataama tua nkye mwi entara piqa kyorave? tiro.

Tuvata mwihua tiqata, Qio tire tua 7 nramwu mwi entara piqa kyaavanranrave, tita.

²¹ Mwihua mwitaa tuvaro Iesusiva tiqaro, (Nkye nte mwi kyaiqara varaurara ntapihi kyeta riaataara vahata nkye taunru kyeta mpereti kuaiqia vare nrarianra airi qua ti variavo.) Nkyi su nyaato ntapihi virata ni okyarara riaataara vahata nkye nataamaqitave ni okyarara hia ntapihi riaavo? tiro.

Iesusiva vaisi mpo vu qipa vura ntapairi mwatora

²² Iesusiva nai nraaqiaranramwu kyapata vuhua Vetasaitaani uro nteta mwini varuvata mpo uhua vu qipavu vaisira vita vareta Iesusiva varunani uro kyeta Iesusirara po titi tiqata, Vaisi mwaaqaa ena kyauqu vatairaro qio taqaarive, tita.

²³ Mwitaa tuvaro Iesusiva vu qipavu vaisira kyauqu tu varero vitaqiro uro mwatukya mwaaqani kyero mwini variqaro mwia vuqaa taara vihi kyero nai kyauqu mwiaqaa vatero mwia kyapara hiro tiqaro, Mpo inraikya qiove taqera hiaro? tiro.

²⁴ Iesusiva mwitaa tuvaro vaisi mwia vu qauma ntapairi virera huvaro mwiva vutu taqero tiqaro, Nte vaisi taqe varuqata mwihua kyatari votima kyetama nrohi variavo, tiro.

²⁵ Mwitaa tuvaro Iesusiva qaiqaa nai kyauqu mwia vuqaa vatovaro mwia vuvanto ntapairi vuvaro mwiva kyuqema kyero ekyaa inraikya taqero.

²⁶ Vaisi mwiva ntapihi kyero taqovaro Iesusiva mwia titero tiqaro, Hia mwi mwatukyaraqi nrumu ntantera viraitira, ena mwaatani quante, tiro. Turama.

Pitaava Iesusira okyarara tura

(Matiu 16:13-20; Ruku 9:18-21)

²⁷ Mwiaqatairo Iesusiva nai nraaqiaranramwuvata uro Sisariaa Piripai qaumato vahu mwatukyaraqi viro. Aanraqaa viqaro nai nraaqiaranramwu kyapara hiro tiqaro, Nraakye qoravanto nianra tavave timwa kyeqatave ti variavo? tiro.

²⁸ Mwitaa tuvata mwihua tiqata, Mpo hiahua iara Ioniva nramanri nyi varivave qiyavata, mpo hiahua iara mwiva tiri haivaqava Iraisaavave ti

variavata, mpo hiahua iara mwiva tiri haivaqava poropeti vaisi mpovanto qaiqaa qovarama viro nrohi variho ti variavo, tita.

29 Mwihua mwitaa tuvaro Iesusiva mwihua ntumwahiamwa hiro tiqaro, Qio nkyenramwu mpo? Nkye nianra ta vaisiva varihove qiao? tiro. Mwitaa tuvaro Pitaava tiqaro, E Karaisiva, Mesaiaavantove. E Kotiva titai vaisiva variaro, timwa kyeqatama tire varuro, tiro.

30 Mwitaa tuvaro Iesusiva mwinramwuhuara kepukyaqama kyero tiqaro, Hiavatama mwi quara mpohua timwa nyiate, tiro.

*Iesusiva nraakiara nai qutuaninranra timwa nyunra
(Matiu 16:21-28; Ruku 9:22-27)*

31 Mwitaa timwa kyero Iesusiva qua tohara tero vutu kyero nai nraaqiaranramwu mwiva nraakiara nai qutuaninranra timwa nyinro tiqaro, Nte mwatani mwatatai nraaqiarava variqana nriqa quani inraikyara airi vararerave. Nronra vaisivantovata, Kotira kyaqqa vara mwate varia vaisihuva vunyaa vaisivantovata, nianra qumina vaisive timwa kyeta, ni qoririma matevarave. Mwihua mwitaa hiqatama ni ru kyaivaqena nte qutu vina taarampo enta varina qaiqaa qati siquainrave, tiro.

32 Iesusiva mwi quara vutu kyero qoqaa timwa nyuvaro Pitaava Iesusira vita uhini kyero qaqao tiro, Qora quama tira hiaro, tuvaro

33 Iesusiva tuqasaa viro nai nraaqiaranramwu taqero Pitaara inronra hiro tiqaro, Saataanio, nyianrasata quante. Hia ni puqaa variante. E hia Kotiva riaintema kyera riaaro. E qumina vaisivanto riaintema kyera rie variaro, tiro.

34 Iesusiva mwitaa timwa kyero nraakye qora ntuvaantua uhuavata nai nraaqiaranramwuvata nyaanrama kyero timwa nyinro tiqaro, Ni pataqiro nrianri vaisiva mwiva nai mwutukya vahianinra qaqira kyero vaisi rukyeta hirite kyatarira vara qu varero ni naakiara nriananrove.

35 Nai mwatani qati varianinranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwaqiro viqaro ni kyaqqa vararerero ni qua riemwaqiro viqaro uro qutu quariva, mwi vaisiva ekyaa enta qati variqiro quananrove.

36 Vaisivanto mwatani variqiro viqaro ekyaa inraikya ntuvaantuuma kyero mwiaqaatairo qutu viraro mwiva ntuvaantuuma taani inraikyaya nataama kyerove mwia kyaahaqa hiananrove? Hia mwi inraikyaya mwia qio kyaahaqa hiananrove.

37 Vaisivanto qutu viro nanra kyoqaave mwinro qaiqaa qati variqiro quananrove? Hia mwiva mwi entara qio kyoqaa utu kyero qaiqaa qati variqiro quananrove.

38 Mwaa entara mwatani varia nraakye qorahua uaqia hi kyaqira utiqatama Kotira qaqira kyaavo. Vaisi mpovanto nianravata ni quaravata mpoqama kyero kyauruari, mwi vaisiva variraqe nte mwatani mwatatai nraaqiarava variqana nraakiara nte tumuani entaraqaa naivata kyaurira inraikya vara mwianinrave. Mwi entara ni kora peqa okyaravat niqaatairo itero ntuvaahе variraqena nyaamwunyaahua vatama kyena tumuaninrave. Mwi entara nte mwi vaisira naivata kyaurira inraikya vara mwianinrave, tiro. Iesusiva turama.

9

1 Iesusiva mwitaa timwa kyero tiqaro, Nte qutaa qianinra riaate. Vaisi mponramwu mwaini mate mwaa sivita variahua hia qumina qutu vivarave. Kotiva nraakye qorahua kepukyaqama kyero ntaqikyiari entava nrianinra mwihua taqeta qutu vivarave, tiro.

Iesusira mwamwantavanto nai nraahumwa mpo mwamwanta kyuqe mwamwanta kyuqu vura

(*Matiu 17:1-13; Ruku 9:28-36*)

² Iesusiva mwitaa tuvaro 6 enta nritarovaro mwiva Pitaaravata, Iemisiravata, Ioninravata, mwinramwuhua nraahu sita varero taaqi nronraqa nkyiariaraa varirerata vita. Mwini uro varuvaro mwihua suqaa Iesusira mwamwantavanto kyuqu viro vahuvaro

³ mwia tuavaaqavantovata mpoqama kyero itero takyuqi varura. Hiama qio vaisi mpovanto hiqama tairaro mwitaama kyero takyu quananro.

⁴ Mwitaama kyero mwia mwamwantavanto kyuqu viro vahuvata mwia nraaqiara taaramponramwuvanto variqata taqovata Iraisaakya Mosesikya mwihua haivaqahuatana qovarama vita variqata Iesusira vatama kyeta qua ti varura.

⁵ Mwitanahua Iesusira vatama kyeta qua ti varuvaro Pitaava Iesusirara tiqaro, Mwaanra ti variara vaisio, kyuqemama tirenramwu i vatama kyeta mwaini nrunrahua varuro. E qiove tirera, tire haraara nraamwu taaramponramwu iara mpo, Mosesirara mpo, Iraisaarara mpoma kyeta hoqa nyataare, tiro.

⁶ Mwihua mpoqama kyero nyaatuqa tovata varuvarora tiro, Pitaava nanra quave qianinrave tiro, mwi quara turama.

⁷ Mwitaa tuvaro tonamwuvanto qovara hiro mwihuaqaa ntumwaqu kyovaro quavanto tonamwuqaitaro tiqaro, Mwaa ni maaqu mwianra ni mutukya nti variva variho. Nkyenramwu mwia qua riaate, tiro.

⁸ Mwitaa tuvata mwia nraaqiaranramwuvanto qamwanrama kye tuqasaaqasa hiqata taqovaro hia mpovantovata Iesusira nraaqani varuvaro Iesusiva nraahu nanrianraa varura.

⁹ Mwitaa huvata mwihua taaqi mwiaqataita tumi varuvaro Iesusiva mwinramwuhuara kepuqyagama kyero tiqaro, Mateqa taqaa inraikyarara hia mpohua qamwanrama kyeta timwa nyiate. Nte mwatani mwataatai nraaqiarava nte nraakiara qutu vina qaiqaa qati sivina varianinraqaataita nkye qiona timwa nyiqita vivarave, tiro.

¹⁰ Mwitaa tuvata Iesusiva tuntema kyeta hia mpohuavata timwa nyinraitita, nkyiari nraahu nai timwa mwi nai timwa mwi hita tiqata, Iesusiva nai qaiqaa siquarinranra tira nataa hi quarave tiho? tita.

¹¹ Mwitaa timwa kyeta mwihua Iesusira kyapara hita tiqata, Mwaanra okyara timwa nyi varia vaisihua tiri timwa timwita qiarave. Iraisaava tiri haivaqava mwiva nraante qovarama viro nri ntaaanrove, ti variarave. Nanraqama mwihua mwitaa ti variavo? tita.

¹² Mwihua mwitaa tuvaro Iesusiva timwa nyinro tiqaro, Qio mwihua qutaa ti variarave. Iraisaava nraante ekyaa inraikya ntapihi kyero terama tarero nrianrivama variho. Ni mwatani mwataatai nraaqiarara mpo? Nianra qua nianra qara ntumwa tova yahirave? Nianra mwiva airi nriqa quani inraikyara varaqiro virata mwiaqataita mwihua mwia qoririma mwatetama mwianra qumina vaisive tivarave tiro, qara ntumwa torave.

¹³ Qio nte nkyiara tiqana Iraisaava vaakya nrumu varurarama tuqo. Mwiva nrumu varuvata vaisi mponramwuvanto mwia nkyiari kyakya huntema kyeta mwia uaqiamma mwatorave. Kotira mpukuqi qara ntumwa tova tiqaro, Nraakiara mwia mwitaa hirave tura mwivau mwia mwitaa hurave, tiro.

Iesusiva nraaqiaraqitairo vaana titovaro nritarero vura

(*Matiu 17:14-21; Ruku 9:37-43*)

¹⁴ Mwitaa timwa kyero Iesusiva nai nraaqiara hininramwu kyonani tumu taqovata nraakyae qora airivanto ntuvaantuuma vita varuvata

mwaanra okyara ti varu vaisihua mwini variqata Jesusira nraaqiaranramwu kyapata inronra hi varura.

15 Mwihua tumu ntovata mwini ntuvantuama vita varuhua qamwanrama kyeta Jesusira taqeta nrighanrama vita hiante uro mwia qua mwiantavaro

16 Jesusiva nai nraaqiara hini mwinramwuhua kyapara hiro tiqaro, Nanra inraikya kyaarave nkye mwihua kyapata inronra hi variavo? tiro.

17 Mwitaa tuvaro nraakye qora utaqitairo vaise mpovanto mwia timwa mwinro tiqaro, Mwaanra ti variara vaisio, vaanavanto ni maaqu utaqi variharo mwiva hia qio qua tihanana tina, nte e hiananrani vitena nruquo.

18 Vaanavanto ni maaqu ntavaaqavu kyero mwia mwataqaa tuta kyaiharo mwia nroqitairo taaraparavanto nrighanro nai vai kutiharo ekyaa mwia mwamwantavanto ntapihi viro kepuqaqama vivihirave. Nte i nraaqiara vaana titivararo nritarero quarive tuqata mwihua mwitaa hiare qiavaro vaanavanto hia nritare virave, tiro.

19 Vaisi mwiva mwitaa tuvaro Jesusiva mwi quara riero tiqaro, Nkye mwaa entara varia nraakye qorahua Kotirara qumimaqama kyeta hia mwianra riaavo. Qikye, nkye ni pupohairu uti variavana nte nataama naniye nkyi kyapata varianinrave? Nte nataama entave variqana nkyi kyaahaqa hianinrave? Qio nraaqiara mwia vita varetia mwaini nriate,

20 tuvata vite nruvaro vaanavanto Jesusira taqero nraaqiara mwia vara mwataqaa tuta kyovaro tuqasaaqasa hi varuvaro mwia mwamwanta ntirintiri hi varuvaro taaraparavanto mwia nroqitairo mpo uti varura.

21 Mwitaa hi varuvaro Jesusiva mwia qora kyapara hiro tiqaro, Taire tohara kyerove mwitaa iho? tiro. Mwitaa tuvaro mwiva tiqaro, Nraaqiara pataru variharo mwitaamaqiro virave.

22 Vaanavanto mwia rukyaankye tiro, mwia vara qiaqive nramanriqive tuta kyairave. E tiri qio kyaahaqa hirava varirera, tiriara po tiqara tiri kyaahaqa hiante, tiro.

23 Mwitaa tuvaro Jesusiva qaqao tiro, E tiqara, E qio tiri kyaahaqa hiravave variaro qiananrave. E hiave ntapihira hiaro? Kotirara kepuqaqama kyero riaariva ekyaa kyaiqa qio varaanarrove, tiro.

24 Tuvaro nraaqiara mwia qova qamwanrama kyero tiqaro, Qio nte Kotirara riemwaqina vuva hiama qioqa iho. Evata ni kyaahaqa hiraqena nte Kotirara kepuqaqama kye riemwaqina quangye, tiro.

25 Mwitaa tuvaro Jesusiva taqvata nraakye qora ntuvantuama vuhua hisai hisai vaini nruvaro Jesusiva vaana inronra hiro tiqaro, E hia qua qiera vaanavave. E nraatora hiara vaanavave. E nraaqiara mwiqitaira nritarera quante. Hia qaiqaavata nraaqiara mwiaqi viqetera variante, tiro.

26 Mwitaa tuvaro vaana mwiva nronraqama kyero aakyara ntero nraaqiara mwia vara ntutuvaro ntirintirima eqero mwiva qutu vuhua nraantantamwa kyero ntumwa viro vahuvata nraakye qoravanto tiqatama, Mwiva qutuma viho, tita.

27 Tuvaro Jesusiva mwia kyauquqaa tu varero mwia vara mwaamwiana ram kyovaro qio qati siviro varura.

28 Nraaqiara mwiva qio qati siviro varuvaro Jesusiva mwiaqatairo uro nraamwuqi varuvata mwia nraaqiaranramwuvanto uro mwia tirema kye nanrianraa ntumwahiamwa hita tiqata, Tire vaana mwia titauraro hia nritarero virave. Nraaqamave tire hia qio mwitaa huro? tita.

29 Mwihua mwitaa tuvaro Jesusiva tiqaro, Mwitaa hiani vaananra hia qio qati titivararo nritarero quananrove. Kotirara aakyara nteqatama titivararo qio nritarero quananrove, tiro. Jesusiva turama.

*Jesusiva qaiqaa nai qutu viro qati siquaninranra vutu kyero timwa nyunra
(Matiu 17:22-23; Ruku 9:43-45)*

³⁰⁻³¹ Mwiaqaatairo Jesusiva nai nraaqiaranramwu kyapata mwi mwatara kyeta Karirini vura. Mwini viqaro qua ntapihi kyero nai nraaqiaranramwu timwa nyianriva vahuvarora tiro, mpovanto tire quananra puaama kyero taqaankyo tiro uqeta kye sitero vura. Jesusiva nai nraaqiaranramwu timwa nyinro tiqaro, Mpovanto ni mwatani mwatatai nraaqiarara qovarama kyairata ni ntavaaqavuqita uro vaisi kyaunuqi kyaivata ni ru kyaivaqena qutu vina taarampo enta vari kyenama qaiqaa qati siquaninrave, tiro.

³² Jesusiva mwitaa tuvata mwia nraaqiaranramwuvanto mwi quara okyara hia ntapihi riaraitita, mwiva qua tura nraatu aatu hiqata hia mwi quara okyarara kyapara hura.

Tavave tirinramwuqitairo nronraqama viro vunyaa vaisivanto variananrove tura

(Matiu 18:1-5; Ruku 9:46-48)

³³ Mwinramwuhua vuhua Kapenaamini uro ntovaro Jesusiva nraamwuqi uro variqaro nai nraaqiara mwihua kyapara hiro tiqaro, Nkyenramwu aanrani nriqata nanra qua timwa kyetave inronra hiavo? tiro.

³⁴ Mwitaa tuvata mwihua hia qua tiraitita, tirema varura. Mwinramwuhua aanrani nriqata mwitaama tita, Tavave tirinramwuqitairo nronraqama viro vunyaa vaisivanto variananrove? tura. Mwitaa turara titi, mwihua kyauriqata hia Jesusira timwa mwita.

³⁵ Mwinramwuhua hia qua tuvaro Jesusiva mwatakyaa viro mwihua nyaanrama kyero timwa nyinro tiqaro, Kyai nte nronraqama quataa hiani vaisira okyara nkyi timwa nyiankye. Vaisi mpovanto nronraqama quataa hiariva hiamma vuni uro variqaro nronraqama quananrove. Mwiva nronraqama quataa hiraro nraakiarani variqaro ekyaa nraakye qora kyaiqa vaisi variarivama nronraqama quananrove, tiro.

³⁶ Jesusiva mwitaa timwa kyero nraaqiara pataru vita kyero mwihua suqaa vatero mwia kyavuhu kyero tutero tiqaro,

³⁷ Vaisi mpovanto nianra rieqaro nraaqiara mwataa hianinranra qamwateqaro kyuqema mwataariva mwiva nivatama mwitaama mataaananrove. Mwiva mwitaa hiqaroma Kotiva ni titairavatama qamwata mwataaananrove, tiro. Jesusiva turama.

Vaisi mpovanto Jesusira nrutu nteqaro kyaiqa varora

(Ruku 9:49-50)

³⁸ Jesusiva mwi quara tuvaro Ioniva tiqaro, Mwaanra ti variara vaisio, tire taqaararo vaisi mpovanto i nrutu nteqaro vaana tite varirave. Mwi vaisiva hia tirivata i vataqiro nrohi variva mwitaa ihatara tita, tire mwianra eqaante timwa kyeta, mwia antua tauro, tiro.

³⁹ Mwitaa tuvaro Jesusiva qaqao tiro, Hia mwi vaisira antuaate. Mpovanto ni nutu nteqaro nronra kyaiqa varero mwiaqaatairo mwiva hia qamwanrama kyero nianra uaqia hi quara qiananrove.

⁴⁰ Mpovanto hia tiri nramwutaqa hiariva varirera, mwi vaisiva tiri nramwunaavama variananrove, tiro.

⁴¹ Nte qianinra riaate. Nkyi nramanri nraataa hirata varivaro mpovanto nkyiara Jesusira nraaqiarave timwa kyero, nramanri nkyi nyianri vaisiva variraro Kotiva hia mwia taunru kyaraitiro, mwia kyoqaa kyuqema kyero mwiananrove, tiro.

Mpora uaqia hi aanranra nraamwuterorave tura

(Matiu 18:6-9; Ruku 17:1-2)

42 Iesusiva mwitaa timwa kyero nraaqiara pataru vaakya kyavuhu kyero tutorara tiqaro, Nraaqiara mwaa voti hiariva ni qua riaariva variraro vaisi mpovanto nri ntero uaquia hi aanranra mwia nraamwutairera, mwia kyaara mwi vaisiraqaa qua nronraqama kyero yahiananrove. Vaisi mwia nruntaqi ori nronra kyaantaru kyero kyaareriqi tuto kyaivaro mwi vaisiva hia nraaqiara pata mwia uaquia hi aanranra nraamwutaataarave.

43 Mwi quara rieqarama i kyauqu hinivanto uaquia hi kyaiqara uti varirera, mwia teqa kyera kyaante. Mwiaqaataira kyauqu kuaiqia nraahu vahiariva qiomaa nyaamwuni vira qati varinanrave. E kyauqu taaratana vahiariva uaquia hi kyaiqara uti variraro i qia iteqaro hia qipaaninraqi tuta kyaankyorave.

44 [Mwi mwataraqi mwimwivanto
qutu quani mwamwantara qati nraahu
nramwaqiro vi variananrove.]

Qiavanto iteqaro hiama qipa quananrove.]

45 I kyuqu hinivanto uaquia hi kyaiqara uti varirera, mwia teqa kyera kyaante. Mwiaqaataira kyuqu kuaiqia nraahu vahiariva qiomaa nyaamwuni vira qati varinanrave. E kyuqu faaratana vahiariva variraro i qia nronraqama kyero itaaninraqi tuta kyaankyorave.

46 [Mwi mwataraqi mwimwivanto
qutu quani mwamwantara
qati nraahu nramwaqiro vi variananrove.
Qiavanto iteqaro hiama qipa quananrove.]

47 I vu hinivanto uaquia hi kyaiqara utirera, vauru kyaante. E vu kuaiqia nraahu vahiariva qiomaa Kotiva ntaqikyi mwatukyaraqi vira qati variqira vinanrave. I vu taaratana vahiariva uaquia hi kyaiqara utuqira viraro i qia nronraqi tuto kyaankyorave.

48 Mwi mwataraqi mwimwivanto
qutu quani mwamwantara
qati nraahu nramwaqiro vi variananrove.
Qiavanto iteqaro hiama qipa quananrove.]

(Aisaiaa 66:24)

49 Hore aatai ntema kyero qiaqotairo ekyaa nraakte qora aataananrove.

50 Hore kyuqe inraikyave. Horevanto uaqiamma viro hia qiaqyaa hirera, hiama qio qaiqaa utu kyairaro qiaqyaa hiananrove. Qio nkye hore kyuqera votima kyeta varivaro nkyi mwutukya qihakaaya hirata nanrianra nanrianra kyuqe hiqata variate, tiro. Iesusiva turama.

10

Nraakte qye okyarara Iesusiva timwa nyunra (Matiu 19:1-12; Ruku 16:18)

1 Qio Iesusiva mwi mwataro kyero Iutiaani vuva uro Iotaani nramanri qareror vutura hini tokyani vura. Iesusiva uro varuvata qaiqaa nraakte qora airivanto mwiva varunani ntuvantuuma vita varuvaro Iesusiva nauqaa hunte qaiqaa mwakyaakya mwihua timwa nyi varura.

2 Iesusiva mwini varuvata Parisi vaisinramwu mwiva varunani uro nteta Iesusiva api qua qiarive titi, mwihua mpo qua Iesusira kyapara hita tiqata, Qiove vaisivanto nai nraata qaqla kyaananrove? titi.

3 Tuvaro Iesusiva nkyiari kyapara hiro tiqaro, Haaru nkyi haivaqava Mosesiva nanra quave nkyiara mwitaa mwitaa hiate tiqaro timwa torave? tiro.

4 Iesusiva mwitaa tuvata mwinramwuhua tiqata, Mosesiva mwataa timwa torave: Vaisi mpovanto nai nraata qaqla kyarero hiqaro qara mpo

ntumwa kyero nai nraata mwinro tiqaro, Qio i qaqira kyauquo, timwa kyeroma titaananrove, turave. Mosesiva qua mwitaama kyero timwa torave, tita.

⁵ Mwitaa tuvaro Jesusiva tiqaro, Mosesiva variqaro taqovaro nkysi haivaqahuamwanra mwutukyavanto kepukyaqha huvata hia mwihua Kotirara riorave. Mwitaa hi varuvarora tiro, Mosesiva mwi quara timwa torave.

⁶⁻⁷ Tauraaqama kyero hia mwitaama vahurave. Taura Kotiva nyaamwuvata mwatavata utu kyero vatero tiqaro, Nte vaisivata nraakyevata utu kyena vataurara tiro, vaisivato nai nrohua qohua kyero nai nraatantiri taqaau vita mwitana kuaa mwamwanta votima kyeta varivarave.

⁸ Mwitana hia mpo mwamwanta mpo mwamwanta variraitita, mwitana kuaa mwamwanta nraahuma varivarave, turave.

⁹ Kotiva naivanto vaativata nraatavata vara kuaaqaa taaqau tairara tiro, hia mpovanto mwitanahua ntainra kyaarive, tiro.

¹⁰ Jesusiva mwitaa timwa kyero nraamwuqi uro varuvata mwia nraaqiaranramwu Jesusira mwi quara okyarara kyapara huvaro

¹¹ Jesusiva mwinramwuhua timwa nyinro tiqaro, Vaisi mpovanto nai nraata qaqira kyero mpo nraakyeye varaariva, mwi vaisiva qaraakya nraakyentiri nrohiqaroma mpuaraqama kyeroma mwikyantiri nrohiananrove.

¹² Mwia votima kyero nraakyevanto nai vaati qaqira kyero qaraakya vaisi varaariva, mwi nraakyevavata qaraakya qoraisi mwikyantiri nrohiqaroma mpuaraqama kyero nrohiananrove, tiro.

*Jesusiva nraaqiaranramwuqaa nai kyauqu vateqaro kyuqema nyatora
(Matiu 19:13-15; Ruku 18:15-17)*

¹³ Jesusiva varuvata nraakyeye qora mwihua nkyiari nraaqiara sita vareta Jesusiva nai kyauqu mwihuaqaa vataarive tita, Jesusiva varunani uro kyaare tuvata Jesusira nraaqiaranramwuvanto mwihua inronra hi varurava.

¹⁴ Mwitaa huvaro Jesusiva taqero nai nraaqiaranramwu nkyiari inronra hiro tiqaro, Qaqao, nkye nraaqiara mwihua qati kyaivata nte hunani nriate. Hia mwihua aanra antuaate. Kotiva ntaqikyiari mwatuukyava mwi nraaqiarahua voti hiahua mwihua mwatuukyama vahiananrove.

¹⁵ Mwaa quara riaate. Vaisivato hia nraaqiara votima kyero Kotira qua riaariva, mwi vaisiva hiama Kotiva ntaqikyiari mwatuukyaraqi quanarove, tiro.

¹⁶ Jesusiva mwitaa timwa kyero nraaqiara mwihua kyavuhu kyero tutero nai kyauqu mwihuaqaa vateqaro mwihua kyuqema nyatora.

*Airi inraikya vato vaisirara tura
(Matiu 19:16-30; Ruku 18:18-30)*

¹⁷ Jesusiva aanrani virera huvaro vaisi mpovanto hiantero nrumu Jesusira kyapara hiro tiqaro, E mwaanra ti variara vaisiva kyuqevave. Nte nataa hi kyaiqara mpo' kyaiqa mpo kyaiqa kyuqe kyaiqa Kotirani vara mwataaninraqaatainave nraakiara nte ekyaa enta qati variqina quaninrave? tiro.

¹⁸ Mwitaa tuvaro Jesusiva tiqaro, E nanraqamave nianra vaisi kyuqevave qiaro? Kotiva nraahuma kyuqeva variho.

¹⁹ E Kotiva timwa to quarara riaante. Mwia quavanto mwataama kyero vahirave:

Hia mpore rukyaante.

Hia mpore nraakyera nrohiante.

Hia mpuaara varaante.

Hia unra qua qiantre.

Hia unra utu kyeqara mpova hiani inraikyara varaante.

Ena nrohua qohua nyutu tuaahera nyataante,
turave.

(Kyatura 20:12-16)

Kotira quavanto mwitaama kyero vahirave, tiro.

20 Iesusiva mwitaa tuvaro mwi vaisiva tiqaro, Mwaanra ti variara vaisio, nte nraaqiarakyaa variqana nte mwi quara rieqana mwitaa mwitaamaqina nnrunrave, tiro.

21 Mwitaa tuvaro Iesusira mwutukyavanto mwi vaisirara vahuvaro mwia taqeqaro mwia timwu mwirro tiqaro, E kuaa inraikyara nraahu aara nttaaro. Uro ena vatena inraikyara mpohua nyinra munima vara kyera vehi nraakye qora ntainra kyera nyinranro nyaamwuni i kyoqaa vahiarive. Mwitaama kyera mwiaqaatfira ni pataqira nriante, tiro.

22 Iesusiva mwitaa tuvaro mwi vaisiva mwi quara riero inraanra viri ratero varura. Mwiva airi inraikya vatovara tiro, hia Iesusira qua riaraitiro, qaqlira kyero mwia mwutukyavanto uaqia huvaro vurama.

23 Vuvaro Iesusiva nai nraaqiaranramwu vara ututuma kyero taqero tiqaro, Airi inraikya vatehua Kotiva ntaqikyi mwatukyaraqi mwukyaari tu kyeta vivarave, tiro.

24 Mwitaa tuvata mwia nraaqiaranramwuvanto mwi quara rieta, Qikye titi, Iesusiva nataa hi quarave tiho, tuvaro Iesusiva qaiqaavata nraahu mwi quara tiqaro, Ni nraaqiaranramwu tuaavo, nraakye qoravanto Kotiva ntaqikyi mwatukyaraqi virerata mwukyaari tukyeqatama vivarave.

25 (Kameri quara nronravanto nataama kyero vuoq uvtintaqi/iriraqi ntuqiaraananrove? Hia qio mwitaa hiananrove.) Qio kamerivanto vuoq uvtintaqi/iriraqi ntuqiaraariva qio vahirarove, airi inraikya vataarivavata Kotiva ntaqikyi mwatukyaraqi qio quananrove, tiro.

26 Iesusiva mwitaa tuvata mwia nraaqiaranramwuvanto mwia quara airi nraato tiqata qikye titi, Airi inraikya vataariva Kotiva ntaqikyinani hia qio virera, nai tarave Kotiva vitaananrove? titi.

27 Mwitaa tuvaro Iesusiva mwihua itutuma kyero taqero tiqaro, Mwatani varihua nkyiari kepukyara hiama qio vivarave. Kotiva kyaahaqa hirata qio vivarave. Kotiva ekyaa kyaiqa vare varivave, tiro.

28 Mwitaa tuvaro Pitaava tiqaro, Taqaante. Tirenramwu i vataqita virera hiqata ekyaa inraikya mwini kyeta qatima nnunro, tiro.

29 Pitaava mwitaa tuvaro Iesusiva mwihua tiqaro, Nte qutaa qua qianinra riaate. Hia nte nkye kyaiqa varerara taunru kyaaninrave. Vaisi mpovanto nai nraamwu maatave, nai qata vakyaave, nai nnunra nrakyaave, nronra qorave, nai nraaqiarave, nai mwatave, mwini kyero nianra riero ni kyaiqara riero quariva,

30 mwi vaisiva mwia qiatu kyoqaa vareqaro hia kuaa nani varaananrove. Mwiva mate mwaa mwataraqaa kyoqaa vareqaro airi nani varaananrove. Mwiva nraamwuve, qata vakyaave, nnunra nrakyaave, nrohuave, nraaqiarave, mwatave, mwi inraikyara mwi inraikyara airi inraikya varaananrove. Ni qua varaari vaisiva varirata mwia kyaara mwia uaqiamma mwataivaro variananrove. Qio ni qua varaariva qutu viraro Kotiva mwianra ekyaa enta qati variqira quante qiananrove.

31 Mate nraakye qora airvantu vuni variahua qakyo tumitareta nraakiaranima varivarave. Mate nraakiarani varihua qakyo nritareta vunima varivarave, tiro.

Iesusiva taara mpo nani nai qutu viro qaiqaa siquaninranra nai nraaqiaranramwu yutu kyero timwa nyunra

(Matiu 20:17-19; Ruku 18:31-34)

³² Mwihua Ierusareminianra aanraqaa vi varuvaro Iesusiva nraante nanrianraa vuni vi varura. Mwiva vuni vi varuvata mwia nraaqiaranramwuvanto nraakiara nriqata airi vu nraato tuqita vi varuvata nraakyte qora mponramwuvanto Iesusira vataqita nruhuavata aatu hiqata nri varura. Mwitaamaqi vi varuvaro mwiaqaatairo Iesusiva nai nraakiara 12 nramwu nyaanrama kyero nkyiariaraa sita varero viqaro nraakiara naiqaa qovara hiani inraikyara qaiqaa timwa nyinro tiqaro,

³³ Riaate. Tire Ierusaremini uro variarata vaisi mponramwuvanto ni mwatani mwatatai nraaqiaraa ntavaaqavuqita uro kyaivata Kotira kyaiqa vara mwate vari vaisihua mwihua vunyaa vaisinramwuvantovata, mwaanra okyara ti varia vaisihuavata, mwihua nianra mwia ru kyaate timwa kyeta, ni pitaqita uro Romeni mwatanaahua kyauquqi tuta kyaivata ni ru kyeveravar.

³⁴ Mwi mwatanaahua nianra raima mateta, niqaa quaantu vihiteta, kyaantaqo ni ntutu kye vateta, ni rukyaivaqena qutu quaninrave. Nte qutu vina taarampo enta varina qaiqaa qati siquaninrave, tiro. Iesusiva turama.

*Iemisikya Ionikya nkyiaritana nronraqa hirara Iesusira kyapara hura
(Matiu 20:20-28)*

³⁵ Sepetira mwaaqutana Iemisikya Ionikya Iesusiva varunani uro nteta Iesusira kyapara hita tiqata, Mwaanra ti variara vaisio, e mpo inraiky tiritana quara eo timwa kyera mwitaama timwa taanterama nrunro, tita.

³⁶ Tuvaro Iesusiva tiqaro, Nte nkyitana nataave hianinrave? tiro.

³⁷ Tuvata mwitanahua tiqata, Nraakiara e kepukyavanto nraakyte qoraqaa ntaqikyiqara nronra vaisi taintaga mwatakyaa vira variqara e tiraro tiritanaqitairo mpovanto nronraqama viro i kyauqu kyaatutani mwatakyaa viro variraro mpovanto nronraqama viro i kyauqu kyaantaqani mwatakyaa viro variarive. Tiretana mwianra rieqatama i kyapara huro, tita.

³⁸ Mwita tuvaro Iesusiva qaqao tiro, Nkyetana hia ntapihi kyeta vu nraato tiraitita, apiqama kyeta ni kyapara hiavo. Kaapuqitai nramanri nraantema kyena nte nriqa quani nramanrinra nraaninra, qiove nkyetanavata nrevarare? Nte nriqa quani inraikyara nramanri varaantema kye varaaninra, qiove nkyetanavata varevarare? tiro.

³⁹ Tuvata mwitanahua tiqata, Tiretana qio ma mwitaa hiananrave, tuvaro Iesusiva mwitanahua timwa nyinro tiqaro, Qutaama nte nramanri nraaninra nkyetanavata nrevarare. Qutaama nte nramanri varaaninra nkyetanavata varevarare.

⁴⁰ Ni kyauqu kyaatutaniwata kyaantaaqanivata mwatakyaa vita vari vaisitanahuara hiama ni kyaiqa vaiho. Ni kova vaisi taaratana teramatayhua, mwitanahuama mwiaqaa mwatakyaa vita varivarare, tiro.

⁴¹ Mwitaa tuvata Iesusira nraaqiara hini 10 nramwuvanto mwi quara rieta mwia kyaara Iemisikya Ionikya inronra hura.

⁴² Mwinramwuhua mwitanahua inronra hi varuvaro Iesusiva mwinramwuhuavata mwitanahuavata nyaanrama kyero eqaate tiro, Mpo mwatanaahua ntaqikyiqi vi varia okyarara nkye ntapihiarave. Mwihua qiatu vaisivanto nrítareta virito variqata mwi kyaiqara mwaa kyaiqara vara timwataate ti variarave. Mwihua nronra vaisivanto tiqata, Tire nronravanto varuro. Tiri qua nraahu riemwaqita quate, ti variarave.

⁴³ Nkyenramwu hia mwihua nraantantaate. Nkyiqitairo mpovanto nronra varirero mwiva nkyi kyaiqa vaisi nraante variro nraakiara nronraqama quananrove.

⁴⁴ Nkyiqitairo mpovanto nritarero vuni varirero qiariva, mwiva rupa tai vaisira votima kyero nkyini kyaiqa vara nyataananrove.

⁴⁵ Nte mwatani mwatatai nraaqiaravama varuqo. Ntevata hia nraakye goravanto nini kyaiqa vara mataatera tumuvave. Nte nraakye qorani kyaiqa varaqina viqana airi nraakye qora kyaahagama nyatena mwihuara qutu virerave timwa kyena tumuvave, tiro. Iesusiva turama.

*Iesusiva Vatimiaasira vu ntapairi kyora
(Matiu 20:29-34; Ruku 18:35-43)*

⁴⁶ Iesusiva nai nraaqiaranramwuvata vuva Ierikoni uro ntero mwi mwatukyara nraatarero virero huvata nraakye qora airivanto mwia vataqita vi varuvaro vu qipa vu vaisiva Vatimiaasiva, Timiasira mwaaqvantu variqaro mpo inraikya mpiate timwa kyeqaro nyaanru ti varu vaisiva aanra tokyani mwatakyaa viro varura.

⁴⁷ Mwiva mwini variqaro riovata mpo uhua tiqata, Iesusiva Nasaretinyaava nritare vi variho, tuvaro riero mwiaqatairo mwiva paatiro Iesusirara aakyara ntero tiqaro, Iesusio, Ntevitira mwaquo, qati nianra po kye timwa mataante, tiro.

⁴⁸ Vu qipa vu vaisiva mwitaa tuvata airi nraakye goravanto mwia inronra hita tiqata, Tirema variante, tuvaro mwiva hia mwihua qua riaratiro, qaiqaa paatiro aakyara ntero tiqaro, Ntevitira mwaquo, qati nianra po kye timwa mataante, tiro.

⁴⁹ Mwitaa timwaqi vuvaro Iesusiva nrumu mwiaqaa siviro variro tiqaro, Nraanraivarо nrianrive, tuvata mwihua vu qipa vura nraanrama kyeta tiqata, Qio qamwateqara variante. Siquante. Mwiva ima nraanraihо, tita.

⁵⁰ Mwihua mwitaa tuvaro vaisi mwiva nai vaqaq qutora vara qatinani kyero siviro Iesusiva sivi varunani vuvaro

⁵¹ Iesusiva mwia kyapara hiro tiqaro, Nivanto i nataa hiarive tirave nrianro? tiro. Mwitaa tuvaro vu qipa vu vaisiva tiqaro, Mwaanra ti variara vasio, e ni pu ntapairi kyaanterama nruquo, tiro.

⁵² Mwitaa tuvaro Iesusiva mwia timwa mwino tiqaro, Qio quante. E nianra mwiva qio ni kyaahaga hiananrove qiararoma i vu ntapairi viho, tiro. Mwitaa tuvaro mwia vuvanto qamwanrama kyero ntapairi vuvaro mwiva qio taqero. Mwiva qio taqeqaro Iesusira vataqiro aanraqaa vurama.

11

*Nraakye qoravanto Iesusira qamwata mwate varuvaro mwiva
Ierusaremipi vura*

(Matiu 21:1-11; Ruku 19:28-40; Ioni 12:12-19)

¹ Iesusiva nai nraaqiaranramwu kyapata vuvaro Ierusaremipи qaumato vahuvata mwihua Mpetapaasivata Mpetaani, mwatukyanivata uro ntora. Mwatuksya mwitanava Oripi taaqi mwemwaqi vahura.

² Uro ntero Iesusiva nai nraaqiara taaratana sitero tiqaro, Nkyetana viti mwatukyaraq vivaro nkyi suvanto vaakyama ntonki mpo kyaantaru tera taqaananrove. Mwia qaraakya ntonki hia vaisi mpovanto mwia mwoqaga mwatakyaa viro varirave. Nkyetana uro mwia puaama kyeta mwia ntatu kyeta vitaqita nrumu ni mpiate.

³ Mpovanto nkyitananra nanrave uti variavo tirera, nkyetana mwitaama mwia timwa mwiate. Tiri nronravanto ntonki mwianra tihatama nrunro. Pataqia vari kyero qaiqaa vara kyairaro nriananrove, qiate, tiro.

⁴ Iesusiva mwitaa tuvata mwitanahua mwatukya mwiqи uro nte taqovaro ntonkivantо aanraqaa quesana kyaantarutova varuvata mwitana mwia hvantи varuvata

5 vaisi mponramwu mwini sivita varuhua tiqata, Nkyetana nanraqamave mwia huvanti variavo?

6 tuvata mwitanahua vaakya Iesusiva tu quara timwa nyuvata qio vitaate tita.

7 Tuvata mwitanahua qaraakya ntonki mwia vitaqita uro Iesusira mwunra. Uro mwita mwia nraaqiaranramwuvanto nkyiari vaaqa ntonki mwoqaqa vuti mwatovaro Iesusiva mwiaqaa mwaanrintero mwatakyaa viro variro aanraqaa vura.

8 Aanraqaa vi varuvata nraakye qoravanto Iesusirara qamwateqata nkyiari tuavaaqa aanravau vuti mwatovata hini uhua aakyoyqitaita kyatari mwanre teqaqita uro aanravau vuti mwatora.

9 Mwitaamaqi viqata Iesusira vuni vi varu nraakye qorahuavata, mwia mwoqani nri varu nraakye qorahuavata, aakyara nteta tiqata, Kyai mwia nrutu tuaaheraare.

Nronravanto nai nrutuqa nri vari vaisira
kyuqema mwataiho.

(Ihi 118:26)

10 Tiri haivaqaya Ntevitiva
kepukyaqama kyero ntaqikyintema kyero
mwivavata ntaqikyiqiro quaninranra tiro,
Kotiva mwia kyuqema mwataiho. Ekyaa nyaamwunyaahua mwia nrutu
tuaaheraate, tita.

11 Mwitaa timwaqita vuvaro Iesusiva Ierusaremimi uro ntora. Uro ntero Kotira nraamwu nronraqi verantero ekyaa inraikya mwipi vahura taqamwa ntero, veva ntero entama virera huvaro nai nraaqiara 12 nramwu kyapata nrumu ntantero Mpetaanini vura.

Fiki hia tamwa riora (Matiu 21:18-19)

12 Mwia qanranraa mwinramwuhua Mpetaanisaita uto ntanteta nri varuvaro Iesusira nraataa huvaro

13 mwiva taqovaro vutura mposata fiki, mwia tamwa nre varu kyatariva vahuvaro mwia mwanre airi vahura. Mwia tamwa vahirera hiqo kyena nraakye timwa kyero, Iesusiva taqovaro hia mwia tamwa rio entava vahuvarora tiro, mwanre nraahu ntora.

14 Mwanre nraahu ntovaro Iesusiva fiki mwia inronra hiro tiqaro, Qio, nraakiara hia mpovantovata iqaatairo hiqo kyero nraanrive, tiro. Mwitaa tuvata mwia nraaqiaranramwuvata mwi quara riora.

Iesusiva Kotira nraamwuqi vura (Matiu 21:12-17; Ruku 19:45-48; Ioni 2:13-22)

15 Iesusiva nai nraaqiaranramwuvata vuva Ierusaremimi uro ntero Iesusiva qaiqaa Kotira nraamwuqi vera ntero taqovato kyoqaa kyaiqa varo vaisihua mwipi variqata kyoqaa kyaiqa vare varura. Mwitaa hi varuvaro Iesusiva mwihua vara veva mwaatani kyero, munima mwukyaaari tuqasaaci varu vaisihua taintavata vara rauru kyero, nyaamwa nyiqata munima vare varu vaisihua taintavata vara rauru kyero.

16 Mwitaama kyero mwiva mwi nraamwunra aatareqanianra tiqaro, Mwaini hia aanravanto vaiho. Nkye kyoqaa mwitaa inraikya vareqata hia mwaini vitare nritare hiate, tiro.

17 Iesusiva mwitaa timwa kyero mwiva qua timwa nyinro tiqaro, Kotira mpukuqi mwitaama qua qara ntumwa tova vahirave.

Nraakye qora mpo mwatanaha mpo mwatanaha
ni nraamwuanra Kotirara aakyara nte varia
nraamwunrave tivarave, turave.

(Aisaiaa 56:7)

Nkye variavaro mwaa nraamwuva mpuara vaisivanto tuqeta kye ntuvantua hia nraamwunra votima kyeroma vaiho, tiro.

18 Jesusiva mwitaa tuvata Kotira nraamwuqi variqata Kotira kyaiqa varo vaisihuavata, mwihua Jesusira qua rieta mwia kyaara Jesusira rukye aanranra puua hi varura. Mwihua taqovata qati nraakye qoravanto Jesusiva tu quarara qamwateqata kyauqu ntukikinraaqate varuvata mwinramwuhua mwianra rieqata Jesusirara aatu hiqata varura.

19 Jesusiva Ierusalemini varuvaro enta hirera huvaro mwiva nai nraaqiaranramwuvata Ierusaremi kyero vurama.

*Fiki aaharama vura
(Matiu 21:20-22)*

20 Mwia qanranraa toqaqi mwinramwuhua uto ntanteta nriqatama mwia nraaqiaranramwuvanto taqovaro fiki mwia kyauqu kyaaravantovata tuqvavantovata aaharama viro vahuvoro

21 Pitaava Jesusiva mwi kyatarirara tu quara riemwa tero Jesusirara tiqaro, Qikye, mwaanra ti variara vaisio, taqaante. Fiki e inronrama taarava tamusama viho, tiro.

22 Mwitaa tuvaro Jesusiva mwinramwuhua timwa nyinro tiqaro, Nte qianinra riaate. Nkyenramwu Kotirara kepukyaqama kyeta riemwaqita nrohiate.

23 Nkyenramwu mwitaamaqi viqata mwaa taaqirara tiqata, Tumitarera kyaareragi ntumwa quante, tivarave. Mwitaa tiqata hia taara nraato tiraitia, qutaaqama mwitaa hiananrove tivera, Kotiva nkyenramwu kyaahqa hiraro taaqivantumitarero kyaareragi ntumwa quananrove.

24 Nte mwianra rieqanama nkyiara mwitaa tirerave. Nkye mpo inraikya vararerata Kotirara aakyara nteqata qutaama mwi inraikyara ni mpiananrove tiqatama nkye mwi inraikyara mpo inraikya mpo inraikya qio varevarave.

25 Nkye sivi variqata Kotirara aakyara nteqatama mpovanto nkyi uaqiamma nyataani quava vahirera, nkye mwi quara hia riemwaqti viraitita, mwi vaisira qua taunru kye qaqlira kyeta Kotirara aakyara qiate. Nkye mwitaa hivaro nkyi sova nyaamwuni variva nkye uaqla hi kyaiqara uti quaravata qaqlira kyero taunru nyataaananrove.

26 [Nkye hia mphouqa qua vahiria qaqlira kye taunru kyaivera, nkyi sova nyaamwuni variva hiama nkyitaqaavata qua vahianinra qaqlira kyero taunru kyaananrove], tiro.

Iesusirara tava i nronraqama kyaiharave e mwi kyaiqara varaqira vi variaro tura

(Matiu 21:23-27; Ruku 20:1-8)

27 Jesusiva mwitaa timwa kyero nai nraaqiaranramwuvata uto ntero Ierusalemini uro varura. Jesusiva qaiqaa Kotira nraamwu nronraqi vera ntero nrohi varuvata Kotira nraamwuqi variqata Kotira kyaiqa vara mwate varu vaisihuua mwihua nronra vaisinramwuvata, mwaanra okyara ti varu vaisihuavata, Iutaa nronra vaisivata, mwihua Jesusiva hunani uro nteta

28 Jesusira mwia inronra hita tiqata, E ta vaisiva variqarave mwaa kyaiqara vare variaro? Tava i nronraqama kyaiharave e mwaa kyaiqara vare variaro? tita.

29 Mwihua mwitaa tuvaro Jesusiva nkyiari timwa nyinro tiqaro, Kyai nte nraante nkyi kyaparama nyataarita nkye nte qianí quara qio timwa mpivera nte ntene nronraqama vina variqana mwaa kyaiqara varaaninranra nkyi timwa nyiankye.

³⁰ Tava Ioninra nronraqama kyovarove mwiva nraakye qora nramanri nyunrave? Kotivave iho, qati vaisivantove iho? Nkye ni timwa mpivaqena riaakye, tiro.

³¹ Iesusiva mwitaa tuvata mwihua nkyiari kyapara hita tiqata, Tire nanra quave qiananrave? Mate tire tiqata, Kotiva Ioninra nronraqama kyorave, qiarera, Iesusiva tiriara, Nkye nanraqamave Ioninra quara hia quataave qiaovo? qiananrove.

³² Qaiqaa mate tire tiqata, Vaisivanto nraahu Ioninra nronraqama kyorave, qiarera, mwi quavavata hia qioqa hiananrove, tura. Qati nraakye qoravanto Ioninranra Kotira qua qovarama kyo vaisivave turara tita, mwihua qati nraakye qora nyaatu aatu hiqata hia mwitaa tita.

³³ Mwihua mwitaa timwa kyeta mwiaqatai Iesusirara tiqata, Nai tava Ioninra nronraqama kyorave? Hia tire ntapihuanrave, tita.

Mwihua mwitaa tuvaro Iesusiva mwihua tigaro, Nkye mwitaa qavana nte nina nronraqama kyaihana mwaa kyaiqara vare varurara hia nkyitavata timwa nyianinrave, tiro. Iesusiva turama.

12

Uaini vara tutoraqi hia kyuqema kyeta ntaqikyu vaisihuara tura (Matiu 21:33-46; Ruku 20:9-19)

¹ Iesusiva mwitaa timwa kyero mpo quaqaa ntumwa kyero mwihua timwa nyinro tigaro, Vaisi mpovanto uaini vara tutero mwia vara ututu tutukya ratero mwata quvu kyero uaini tatianinra ututero haraara nraamwu mponta vaimwanraanra nraamwu hoqa kyero vatorave. Mwiaqatairo nyianra mpo mwatani virero hiqaro mpo uhua timwa nyinro tigaro, Nkye ni uaini aakyoqaa ntaqikyi mate varivaqe nte quankye, timwa kyero mwiva nyianra mpo mwatani vurave.

² Mwini uro varuvaro uaini hiqo entava nri ntovaro mwiva nai kyaiqa vaise mpo titero tigaro, E uro ni aakyoqaa ntaqikyi mate varihua tiratama uaini nianivata hiqo kye mataate, turave.

³ Mwitaa tuvaro mwini vuvata mwia aakyoqaa ntaqikyi mwate varu vaisihuua mwia kyaiqa vaise mwia ntavaaqavu kyeta kyaamwuqotaita ntuqutu kyeta vateta, hia uaini hiqo kye mwia mwinraitita, qati titovaro nrumu ntantero vurave.

⁴ Qati nrumu ntantero vuvare aakyo qova nai kyaiqa vaise mpo titovaro vuvata mwia aakyoqaa ntaqikyi mwate varuhua mwia qiaata raarahitima kyeta kyaurira inraikya mwunrave.

⁵ Mwitaa huvaro aakyo qova nai kyaiqa vaise mpo qaiqaa titovaro vuvata mwia rukyorave. Qio mwitaamaqi vita, hini nai kyaiqa vaise titohua kyaamwuqotaita ntuqutu kyeta, hini rukyorara tuqo.

⁶ Mwia kyaiqa vaise taiqa kyovaro vaise kuaiqia nraahu varura. Mwi vaisiva aakyo qora mwaqaqvanto varuvaro mwia qora mwutukyavanto mwianra mpoqiaqvata vahu vaisiva varuvaro mwia qova mwiavata nraakiara ekyara titero tigaro, Mwihua ni mwaqaqu taqeta nianra mwia mwaqaqve tiqatama mwia kyuqema mwatevarave, tiro.

⁷ Mwitaa timwa kyero mwia titovaro mwini vuvata mwia aakyoqaa ntaqikyi varu vaisihuua mwia mwaqaqu taqeta, nai timwa mwi nai timwa mwi hita tiqata, Mwia qova qutu viraro mwaa vaisiva nai qora mwatavata, mwitaa inraikyavata, varaarivama variho. Nrivage tire mwia rukyaararo mwiva vararerо hiani inraikyava tirini nraahu vahiarive, turave.

⁸ Mwihua mwitaa timwa kyeta mwia mwaqaqu ntavaaqavu kye rukyeta mwaqaqani mwaati qaqlira kyorave, tiro.

9 Iesusiva mwitaa timwa kyero mwihua kyaparama nyatero tiqaro, Mwihua mwitaa hurara tiro, aakyo qova nai mwaquo rukyera kyaara nataave hiananrove? Aakyo qova nri ntero nai aakyooqaa ntakikyi vaisihua ru taiqa kyero kyaata mpo vaisinramwuanra tiqaro, Nkyema ni aakyooqaa ntakikyi mataate, qiananrove, tiro.

10 Iesusiva mwitaa timwa kyero mwiva mwihuara tiqaro, Nkye hiave Kotira mpukuqi mwaa quara kyaara ntumwa kyeta riaavo? Mwi quava mwataama tiro:

Ori nraamwu hoqeqata
ori mpo hia kyuquerave timwa kye qaqlira kyaava,
mwi oriva puhaqama viho.

11 Kotiva mwi orira vara kyero nronraqama kyaihata tire mwia kyaiqa taqeta kyuquerave tunanrave, turave. *(Ihi 118:22-23)*

Kotira mpukuqi mwitaama kye qara ntumwa torave. Nkye hiave mwi quara kyaara ntumwa kyeta riaavo? tiro.

12 Iesusiva mwitaa tuvata Iutaa nronra vaisinramwuvanto ntapihi ri-varo Iesusiva uaini utaqaa ntakikyi mwato vaisihuara tiqaroma mwihuaqaa ntumwa kyero tuvata mwihua Iesusira ntavaaqavu kyeta ko qiarer tura. Mwitaa timwa kyeta nraakye qoravanto mwipi ntuvaantuuma vuhua tiri inronra hivorave tita, mwihua nraatu hiqata Iesusira kyeta vorama.

Taakisiga hirara Iesusira kyapara hora

(Matiu 22:15-22; Ruku 20:20-26)

13 Iutaa vaisi nronranramwuvanto vari kyeta mwiaqatai mwihua Parisi vaisi mponramwuvata, Herotira nramwunaahua mponramwuvata, siteta tiqata, Nkye Iesusira kyapara hivaro mwiva api qua tirage mwiaqa qua vataare, tita.

14 Tuvata mwihua Iesusiva hunani uro nteta mwia kyapara hita tiqata, Mwaanra ti variara vaisio, tire taqaurara e kyuqe qua nraahu ti variaravave. E hia vaisi nraatu aatu hiraitira, nronra vaisiaravata, qumina vaisiaravata, kuaa qua nraahu ti variaravave. E vaisivanto Kotira vataqita vi aanranra ntapihi kyera timwa nyi variaro. Qio mwaa quara timwa timwinraqe riaare. Tire Kotira qua rieqata qiove tire Romeni mwatanaahua vunyaa vaisi Sisaara taakisi mwianranrave? (Mwi mwatanaahua hia Kotira qua riaahuave.) Mwia taakisi mwianranrave hiave mwianranrave? tita.

15 Mwihua mwitaa tuvaro Iesusiva taqovata mwihua nroqataita kyuqe kyuqe ti variqata mwihua su nyaatoqitaita Iesusira uaqiamá mwatarerata uti varuvaro Iesusiva tiqaro, Nanraqamave nkyenramwu nivanto api qui qiarive tita mwitaa qiao? Qio munima mpoku vara kyaivaqe nte taqaankye, tiro.

16 Mwitaa tuvata munima mwia kuaaru mwuvaro mwiva mwihua kyapara hiro tiqaro, Munima mwiaqaa tara virivata tara nrutuvatave vaiho? tiro.

17 Mwitaa tuvata mwihua Sisaarave tuvaro Iesusiva mwihuara tiqaro, Mwianra rieqatama nkye Sisaava hianinra nai mwita, Kotiva hianinra nai mwiate, tiro. Iesusiva mwitaa tuvata mwihua mwi quara rieta tiqata, Qikye, mwiva tiri qua nraatara kyero kyuqe qua tiho, timwa kyeta kyaiku ntukikinraaqate varura.

Saitiusi vaisinramwuvanto qutu vita qaiqaa qati sivirara Iesusira kyapara hora

(Matiu 22:23-33; Ruku 20:27-40)

18 Saitiusi vaisivanto Iesusiva varunani uro ntora. Saitiusi mwihua nkyiari mwaanra qua rieqatama mwihua tiqata, Vaisivanto qutu viro

qio mwiva ekyarama qutu viro hiama qaiqaavata siquananrove, ti varu vaisihua uro nteta

¹⁹ Iesusira kyapara hita tiqata, Mwaanra ti variara vaisio, tiri haivaqava Mosesiva mwaanra qua timwa timwiqanro mwitaa turave. Vaisivanto hia nraaqiara mwataraitiro, qutu viraro mwia qatavantove vakyaavave mwia nraata varatero nraaqiara mwata humwuanrama mwataananrove, turave.

²⁰ Tire qiarara e riaante. Haaru qate vakye 7 nramwu varurave. Mwihiua sakyaava toharenaava nraakyе varatero hia nraaqiara mwataraitiro, qutu vuvaro

²¹ mwia qata mwia nanaava mwia nraata varatero mwivavata hia nraaqiara mwataraitiro, qati variqiro viro qutu vurave. Mwiva qutu vuvaro mwia qata mwia nanaava nraakyе mwia varatero hia nraaqfaravata mwataraitiro, qutu vuvarave.

²² Qio mwitaamaqi vita ekyaa mwinramwuhua nraakyе mwia varateta hia nraaqiaravata mwataraitita, ekyaa qati nraahu qutu vurave. Qutu vuvaro nraakiara nraakyе mwivavata variro qutu vurave.

²³ Nraakiara nraakyе qora qaiqaa qati sivita vari entaraqaa mwi nraakyeva tara nraatave variananrove? Mwiva qati varu entara qoraisi 7 nramwu vara torave, tita.

²⁴ Saitiusi vaisinramwuvanto mwitaa tuvaro Iesusiva nkyiari timwa nyinro tiqaro, Nkye Kotira qua qara ntumwa tora hia ntapihi kyaahuave. Nkye Kotira kepukyavata hia ntapihi kyaahuave. Qutaara hia ntapihi kyaahuara titi nkye api qua ti variavo.

²⁵ Nraakiara nraakyе qora qutu vihua qutu viraqitaita qaiqaa sivita qati variqita vi entara hiama nraata vaati vare okyarava vahiananrove. Mwihiua nyaamwunyaahua votima kyetama varivarave, tiro.

²⁶ Iesusiva mwitaa timwa kyero mwiva tiqaro, Nraakyе qora qutu vihua qati sivirara nte nkyi kyapara hirerave. Nkye hiave Kotira mpukui Mosesiva mwaa quara qara ntumwa tora kyaara ntumwa kyeta ntapihi riaavo? Kotiva mwitaa turave. Nte mwanriqa Kotivave. Nte i haivaqara Evarahaamunraqaa ntaqikyina, Aisaakiraqaa ntaqikyina, Iaikopuraqaa ntaqikyuvave, turave.

²⁷ Qio riaate, Kotiva mwanriqvanto hia qutu viro taiqavi inraikyaraqaa ntaqikyи varivama variho. Nraakyе qoravanto qaiqaa qati sivi okyarara nkyi su nyaatovanto hia ntapihi vihata api rieqata ti variarave, tiro.

Nanra quave Kotiva vuni vatai quava vaiho tura

(Matiu 22:34-40)

²⁸ Iesusiva Saitiusi vaisi kyapata qua ti varuvaro mwaanra okyara ti varu vaisiva uro variqaro ri ovaro Iesusiva Saitiusi vaisi qua nraatara kyeqaro kyuqe qua nraahu ti varuvaro mwi vaisiva Iesusira kyapara tiro tiqaro, Kotiva qui timwa taiva nanra quavantove vuni vahi quava vaiho? tiro.

²⁹ Tuvaro Iesusiva mwia timwa mwinro tiqaro, Mwaa quava vuni vahi quavama vaiho. Mwataama qara ntumwa torave:
Nkye Isareri mwatanahua riaate.

Tiriqaa ntaqikyи variva Kotiva
mwanriqa kuaiqiyavanto variho.

³⁰ Ekyaa ena mwutukyaqitairave,
ekyaa ena mwanraquraqitairave,
ekyaa ena vu nraatoqitairave,
ekyaa ena kepukyaqotairave,
Kotirara nraahu mwutukya vahirara variante,
turave.

(Lo 6:5)

³¹ Mwi quava vaiharo mwia nraakiara okyara qua mpo vaiho. Mwitaama tiro:

Enanra mwutukya vataarantema kyera
ena henanranravata

mwutukya vahirara variante. (*Wok Pris 19:18*) Qio mwi quatanava vuni
vahi quatanavama vaiho. Hia mpo quavanto mwi quatana nraatara
kyairave, tiro.

³² Iesusiva mwitaa tuvaro mwaanra okyara ti varu vaisiva tiqaro,
Mwaanra ti variara vaisio, e kyugema kyera ntapihima qiaro. E qutaama
tiqara, Mwanriqa Kotiva kuaiqilavanto nraahu variho qiaro. Hia mwanriqa
mpovantovato variho, qiaro.

³³ E qutaama tiqara, Vaisivanta mwutukyaqitairove, kepuuyaqotairove,
Kotirara mpoqama kyero mwutukya ntiraro variananrove. Vaisivanto nai
henanranra nanrianra mwutukya vahintema kyero mwianravata mwu-
tukya vahiarive, qiananrave. Mwi quatanava vuni vahiqaro hini qua
nraatara kyairave. Mpo qua Kotira kyaiqa vara mwateqata quara rukyeta
qia quara mwate varia quaravata, mwi quatanava nraatara kyairave, tiro.

³⁴ Mwitaa tuvaro Iesusiva taqovaro vaisi mwiva kyugema kyero tuvaro
Iesusiva mwia timwa mwinro tiqaro, Kotiva iqaa ntaqikyiariva i qau-
matoma vaiho, tiro. Iesusiva mwitaa tuvata vaisi kyaatavantovata Iesusiva
tiri qua nraatara kyaankyo tita, hia Iesusira qaiqaavata nrumu mpo qua
mpo qua kyapara hura.

Iesusiva Mesaiaara kyapara hora

(*Matiu 22:41-46; Ruku 20:41-44*)

³⁵ Iesusiva Kotira nraamwuqi variqaro qua timwa nyiqiro viro tiqaro,
Mwaanra okyara ti varia vaishua tigatama, Kotiva titaariya Mesaiaavanto
Ntevitira okyara kuaa okyara mwiqinnaa vaisivantoma variananrove, qiar-
ave. Mwihiua nataama kyeta mwi quara ntapihi kyetave mwitaa tivarave?

³⁶ Haaru Kotira mwanraquravanto kyaahaqa huvaro Ntevitiva nai
mwitaa turave:

Kotiva ni nronra vaisiara tiqaro,
E nritareru ni kyauqu kyaatutani
mwatakyaa vira variraqena
nte i nramwutaahua ru taiqa mwataarira
mwihuqaqa kyuqu ntamwa tera variante, turave. (Sng 110:1)

Ntevitiva mwitaa turave.

³⁷ Ntevitiva Mesaiaavanto qovara hianinranra tiqaro, Mwiva ni nronra
vaisive, turave. Ntevitiva mwitaa turara tiro, nataama kyero Mesaa-
vanto Ntevitira nraisi qio variananrove? tiro. Iesusiva mwitaa tuvata
qumina nraakye qora airivanto ntuvantuuma vita varuhua mwia qua
rieqatama qamwateqata varura.

Mwaanra okyara ti varu vaisihuara tura

(*Matiu 23:1-36; Ruku 11:37-54, 20:45-47*)

³⁸ Iesusiva qua timwa nyiqiro viro tiqaro, Vaisi mponramwu mwaanra
okyara ti variahua, nkye mwihuara rauriqata variate. Nraakye qoravanto
mwihu tiri taqeta qua mwanteqata qamwata timwataate tita, mwihu
mpuahaa tuavaaqa kyuqera utu vareta nraakye qora suqaa maaketiqi
nrohi variarave.

³⁹ Mwihiua mwaanra nraamwuqi vera nteta uaquia hi taintara qaqira
kyeta, kyuqe taintaqaa nraahu mwatakyaa vita variarave. Mwihiua
omwata nraanraqaa variqata mwihuara nronra vaisive qiate tita, uro
vaisi nronravanto mwatakyaa vita variaraqaa mwihuavata mwatakyaa
vita variarave.

40 Mwihua tetoqa varia nraakyehua nraamwuve mpo inraikyave vataara mpuara vareta tiqata, Mpohua tire qora inraikya utunranra taqeta tiriaruaqia hia vaisihuâve tivorave, tita mwihua nraakyehua qora suqaa variqata Kotirara mpuahaama kyeta aakyara ti variarave. Qikye, mwia kyaara mwihuaqaa qua nronraqama kyero vahiananrove, tiro.

*Vehi nraakyevanto munima pataqia Kotira mwunra
(Ruku 21:1-4)*

41 Kotira nraamwuqi taqu mpo vahuvata mwipi nraakyehua qoravanto Kotirara kyaiqara rieqata munima kye varura.

Qio Iesusiva qua taiqa kyero uro taqu mwia tataaqa mwatakyaa viro variqaro nraakyehua qoravanto munima taqu mwipi kyeqata vi varuvaro Iesusiva taqe varura. Mwiva taqovata airi inraikya vatoehua munima airi mwipi kyora.

42 Kye varuvaro vehi tetoqa nraakyevantovata nri ntero munima patarutana nraahu taquqi kyora.

43 Munima pataqiarutana mwipi kyovaro Iesusiva nai nraaqiaranramwu nyaanrama kyero timwa nyinro tiqaro, Taqaate, Vehi nraakyehua tetoqavanto kyai munimava airi inraikya vataahua airi munima kyaaravata nraatara kyaaho.

44 Airi inraikya vataahua nkyiari munima hini nraahuma taquqi kyaavo. Nraakyehua mwiva vehi variqaro nai vatai munimanra ekyama kyaaho, tiro. Iesusiva turama.

13

*Kotira nraamwu akukyaaraqama kyeta ntapairi kyerara tura
(Matiu 24:1-2; Ruku 21:5-6)*

1 Iesusiva Kotira nraamwuqitairo veva ntovaro mwia nraa qira mpov-anto tiqaro, Qikye, mwaanra ti variara vaisio, taqaante. Mwaa nraamwuve kyuqe hi nraamwunrave. Mpo ori mpo ori nronraqotaita vara kyeta hoqataa nraamwuve kyuqe nraamwuma vaiho, tiro.

2 Mwitaa tuvaro Iesusiva timwa mwiru tiqaro, Mate e nronra nraamwu taqe variaro. Nraakiara ori naiqaa naiqaa taqaautaava hia mwitaama kyero vahiananrove. Mwaa nraamwunra ntapairiqata mwia venta kyaivaro tumu ntiraro orivantu ntuvuraa vura hiro api mpona mpona vahiananrove, tiro.

*Iesusiva nraakiara airi muaanra qovara hiananrove tura
(Matiu 24:3-14; Ruku 21:7-19)*

3 Mwitaa timwa kyero Iesusiva uro Oripi taaqiqaa mwatakyaa viro varura. Oripi taaqivanto mwaa hini vahuvare Kotira nraamwuvanto vutura qarahi hini vahura. Mwitama vahuvata Pitaavavata, Iemisivavata, Ionivavata, Enturuvavatama kyeta mwiru nraamwuhua nraahu vuhua Iesusiva varunani uro nteta mwia kyapara hita tiqata,

4 E vaakya Kotira nraamwuanra qiananra taireve qovara hiananrove? Nanra nanra inraikya qovara hiraqeve tirenramwu mwi inraikyaraqaa apeqama kyeta taqeqata mwi entava nrianriva qaumatoqa iho qiananrave? E tiri timwa timwinraje riaare, tita.

5 Mwihua mwitaa tuvaro Iesusiva tiqaro, Mpovanto mwi quara nkyi api timwa nyiankyo tita, rauriqatama variate.

6 Nraakiara airi vaisivanto nri nteta ni nutu nteta tiqata, Kotiva ni titaihana nruvave. Nte mwaa mwivave, tivata airi nraakyehua qoravanto mwihua unra quara qutaa quave tivarave.

⁷ Nkye varivaro nronraqama kye ntaqi quava nraaqasairove mponasairove nrinrata hia aatu hiate. Ntaqi inraikyava qovara hiananrove. Mwitaa hirata nkye mwianra rieqata mwi entava ekyaaara enta nri ntaiho tivorave.

⁸ Mpo mwatanaavanto mpo mwatanaanravata ntaquananrove. Qiata vaisi mpovanto nai hena qiaita vaisi mpovata ntaquananrove. Mpo mwata mpo mwata mwaturavanto tuananrove. Mpo mwata mpo mwata kyarara aarantevarave. Mwi inraikyava mwi inraikyava qovarama virata hia ekyaaara enta nri ntaiho qiate. Qakyo atura ntumwa kyero nraaqiara mwataariva vaharo vuni pataqia toharaintema kyero, muaanra ntani entava qati toharama taiho, qiate.

⁹ Mwi entara aitutumaqi vita rauriqata variate. Mpo hi vaisihua nkyi ntavaaqavuqita uro nkyiari kaanasoriqa kyeta, nkyiqa qua vatevarave. Nkye mwaanra nraamwuqi varivata nkyi kyaamwuqo ntuqutu kyeta vatavarave. Nkye ni kyaiqa vare varivata mwia kyaara nkyi ntavaaqavuqita uro kamaninra nronra vaisi suqaave, vunyaa vaisinramwu suqaave, kyavata mwi entara nkye ni qua ntapihi kye timwa qovarama kyevarave.

¹⁰ Ni qua kyuqe qua ekyaa mpo mwatanaa mpo mwatanaahua timwa nyiqa vivata ekyama riemwa ntevarave.

¹¹ Nraakiara mwihua nkyi ntavaaqavuqita uro ko tirera hivar, hia nkyi kyuqu kyauqu ntirata nanra quave qiananrave qiate. Mwi entara hia nkyeta su nyaatoqitaita riemwa kyeta tiraitita varivaro Kotira mwanaraquravanto nkyi kyaahaqa hiqaro mwi quara qiate tirata mwi quara nraahu qiate.

¹² Nraakiara vaisivanto nai qatave nai vakyaarave qovarama kyairata ru kyevarave. Mwia qova nai nraaqiara qovarama kyairata ru kyevarave. Nraaqiaravanto nkyiari nyohua sohua nramwutaqa hiqata ru kyaate tivata mwihua ru kyevarave.

¹³ Mwi entara nkye ni nraakyre qoravanto varivatara titi, mwia kyaara ekyaa qati nraakyre qoravanto hia nkyiara mwutukya vahirata varivarave. Mwitaa mwtaiarovata hia qoriri hiraitiro, kepukyaqama kyero variqi viro uro taiqa kyaani vaisira, mwiama Kotiva vitaananrove.

Anoma kyero qora inraikyavanto nraakiara qovara hianinranra tura (Matiu 24:15-28; Ruku 21:20-24)

¹⁴ Nraakiara nkye taqaivaro anom kyero qora inraikyavanto qovarama viro hia mwianra variante qianinra mwinimā mwiva siviro variananrove. Mwaa quara kyaara ntirava ntapihi kyera nraato tuante. Nraakiara mwi entara mwi inraikyava qovarama virata nraakyre qora Iutiaani varihua sivita hianteta verara taaqiqaa quate.

¹⁵ Mwi entara nraamwu gesana variariva hiama nraamwuqi vera ntero mpo inraikyavata vararaitiro, mwiva mpo inraiky mpo inraiky qaqa kyero qatima hiantero quarive.

¹⁶ Mpovanto aakyooqi kyaiqa vare variariva hia nai vaqa varareror nrumu ntantero viraitiro, mwiva mwia qaqa kyero qatima hianta quarive.

¹⁷ Mwi entara nraaqiara tuaqahi nraakyehuavata, nraamwa nyi vari nraakyehuavata, hia kyuqema varivarave. Nte mwi nraakyehuara po tuqo.

¹⁸ Hia huari itaani entaraqaa aatu quaro titi nkye Kotirara aakyara tivarohuari itaani entara nyianrive.

¹⁹ Po, nraakiara mwi entara muaanra vahiariva nronraqama kyero vitarero vahirata nraakyre qora hia kyuqema kyeta varivarave. Haaru Kotiva mwaa mwatara utu toraqaatairo mwitaa hi muaanrava hia qovara

hurave. Nraakiaravata hia mwitaa hiani muaanrava qaiqaavata qovara hiananrove.

²⁰ Mwi entara mpuahaa enta vahiratavauma ekyaa nraakye goravanto taiqa vivaro hia kuaiqavantovata qati variananrove. Qio Kotiva nai kyaama tai nraakye qorahuara rieqaroma mwi entara vara qiquqama kyaananrove.

²¹ Mwi entaraqaa nkyiara Kotiva titai vaisiva Mesaiaavanto mwainima variho, mwiniimā variho, tivera, hia mwihua quara qutaave qiate. Mwi entaraqaa vaisi mpovanto qovarama viro unra tiqaro, Nte Mesaiaavantove, tiraro mpo vaisivanto tiqaro, Nte Kotira qua qoqama kye varu vaisivave, qiananrove. Mwihua mwitaa timwaqi viqata airi unra vaisivanto qovarama vivarave.

²² Mwihua qovarama vita unra kyaiqa varaqi viqata Kotiva nai kyaama tai nraakye qorhua mwihua tirinramwu quara qutaave tiqata api aanra quate titi, nronra kyaiqa varaqi vivarave.

²³ Mwi quara rieqatama mwi entaraqaa nkye rauriqata variate. Nkye hia mwi vaisihua quara qutaave qiate tina, nte mwaa entaraqaa variqana nraakiara qovarama quani inraikyara nkyi timwa nyi varuquo, tiro.

Iesusiva nai qaiqaa mwata mwaini tumuaninranra tura

(Matiu 24:29-31; Ruku 21:25-28)

²⁴ Iesusiva mwitaa timwa kyero tiqaro,
Nraakiara muaanra vahiani entava taiqa viraro
mwi entaraqatairo huarivanto qipa viraro
toravantovata hia itairaro

²⁵ aahoquravantove,
qovoravantove, tumu nti tumu nti hiraro
nyaamwuni kepukya inraikya vahiariva
ekyaa qakyaa qakyaa hiananrove.

(Aisaiaa 13:10, 34:4)

²⁶ Mwi inraikyava mwitaa hirata ekyaa mwata maata varihua taqe varivaqe nte mwatani mwatatai nraaqiarava nyaamwusaina tonamwuqi tumuanrita ni taqevarave. Nte mwunruqama taari inraikyava mpoqama kyero itero takyuqiro ante anta/atipetipa hi variraqe nte kepukyavanto tumuaninrave.

²⁷ Nte tumiqana nyaamwunyaahua sitaarita mwihua mwatani uto hisai hisaita Kotiva nai kyaama tai nraakye qorhua ekyaa ntuvantuama kyeta sitevarave, tiro.

Iesusiva qaampuakya voti hurara tura

(Matiu 24:32-35; Ruku 21:29-33)

²⁸ Iesusiva mwitaa timwa kyero tiqaro, Nkye qaampuakyara rieqatama mwaa quara okyara ntapihi kyeta riaate. Mwi kyatariva tamwa riemwa taiqa kyero vahiro mwiaqatairo qaraakya mwunri ntarero utihata nkye mwiaqaa apeqama kye taqeta tiqata, Huari nronra itaani entava qaumaqa iho, qiarave.

²⁹ Mwia votima kyeta, nraakiara qovara hiani inraikyara tura, nkye mwiaqaa apeqama kye taqeta nianra tiqata, Mwiva tumuani entava qaumatoqa iho, tivarave.

³⁰ Nte qutaama tuqo. Mwaa mwataraqaa vari nraakye qorhua hia taiqa vivaro mwi inraikyara mwi inraikyara tuva qovara hiananrove.

³¹ Nyaamwuvantovata mwatavantovata taiqa viraro ni quavanto qati nraahu vahiqiro quananrove, tiro.

Hia mpovanto nte tumuani entara ntapihirave tura

(Matiu 24:36-44)

32 Jesusiva mwitaa timwa kyero tiqaro, Nte taireve, nanra huari vuquaave, tumuaninra? Hia vaisi mpovanto mwi entara ntapihirave. Hia nyaamwunyaahuavata mwianra ntapihiarave. Ntenavata mwatani mwatafai nraaqiarava variqana mwi entarara hia ntapihi kyaurave. Kotiva ni kova mwiva nraahuma mwi entara ntapihirave.

33 Mwi entava nrianinra nkye hia ntapihiahuara tita, nkye taqe varita rauru kyeqa teramate variate.

34 Mwi entava nrianinranra tirera nanra quaqaa ntumwa kyenave qianinrave? Mwaa quaraqaa ntumwa kyena tirerave. Vaisi nronravanto nyianrani virera hiro nai kyaiqa vaisinramwuanra tiqaro, Nte quarita nkye mwi kyaiqara mwi kyaiqara vare varivage nte uro ntantena nriankye, timwa kyero mpo kyaiqa mpo kyaiqa mwihua nyinro vaisi mporetiqaro, E gesana variqara vaimwanraanra ntaqikyi variante, timwa kyero qio vorave, tiro.

35 (Jesusiva mwitaa timwa kyero nai nraaqiaranramwu timwa nyinro tiqaro), Mwi quara rieqatama nkyevata taqe qata variate. Taireve mwihua nronra vaisivanto nyianrasairo uro ntantero nriananrove? Enta hirera hinanranive? Enta mwutukyavive? Kokoraaravanto nruqua qianinrane? Qaatata viraro toqaqive nriananrove?

36 Mwiva qamwanrama nri ntero taqairata nkye vaite varivorave.

37 Nkye mwianra rieqatama nte nkyinramwuanravata ekyahuaravata mwitaama tina, Nkye taqe variqata variate tuqo, tiro.

14

*Nronra vaisinramwuvanto Jesusira rukye quara qaiqaa turama
(Matiu 26:1-5; Ruku 22:1-2; Ioni 11:45-53)*

1 Mpo ihi mpo ihi mwi mwatanaahua nyaamwunyaava vekyahu nyaatoraravata, hia kyoto imperetiraravata, rieqata mwi entaraqaa mwi kyarara nronra. Mwi entara mwi kyarara nreva taara enta qati vahuvata Kotira nraamwuqi Kotira kyaiqa vara mwate varu vaisihuua mwihua vunyaahuavata, mwaanra okyara ti varu vaisihuavata, mwihua ntuvantauma vita Jesusira ntavaaqavuqita uro rukyerara uqetakyne qua tiqata

2 mwitaama tita, Tirenramwu vekyahu nyato kyarara nraana entaraqaa Jesusira ntavaaqavu kyaararo nraakye qoraqitairo ntaqi inraikyava qovara hiankyorave, tura.

*Nraakye mpovanto vahamwenra Jesusira qiataqa qumwatora
(Matiu 26:6-13; Ioni 12:1-8)*

3 Mwi entara Jesusiva Mpetaanini Saimoninra nraamwuqi uro varura. Tauraa mwi vaisira tauma rumpuaravanto utuvaro varu vaisira. Jesusiva mwi vaisira nraamwuqi uro kyara nre varuvaro nraakye mpovanto vera ntero Jesusira kyuqema mwatarero vahamwenra kyuqe mwuntha vura, nronra munima kyora, ori taquqi varero uro taqu hiara kinta kyero Jesusira qiataqaa rauru kyero qumwatora.

4 Mwia qiataqaa rauru kyero qumwatovata hini uhua nraamwu mwipi varuhua mwi nraakyea *nununrama mwateta/nriqi humumuse* nai timwa mwi nai timwa mwi hita tiqata, Qaqao, nanraqamave mwitaama kyero vahamwenra mwia qumina taiqa kyaiho?

5 Mwiva vahamwenra mwia nyinro nronra munima 300 kinaa vara kyero vehi nraakye qora nyiataarave, tita. Mwitaa timwa kyeta mwia kyaara mwi nraakyea inronra hi varura.

6 Mwihua mwia inronra hi varuvaro Jesusiva tiqaro, Qati kyaivaro mwi nraakyeva variarive. Nanraqamave nkye mwia inronra hiavo? Mwiva mwitaa hiqaro ni kyuqema mataih.

7 Vehi nraakyeva qora mwihua mpo enta mpo enta nkyi kyapata variqi vivarave. Nkye mpo enta mwihua kyaahaqa hiataa hirata qiomä kyaahaqa hivarave. Nte nraahuma hia nkyi kyapata airi enta varianinrave.

8 Mwi nraakyeva taqaiharo mwi kyaiqava mwianra qioqa hirama varaiho. Nte qati variani entaraqaa mwiva nraante vahamwenra qumateqaroma ni quntamwa terara tera hi variho.

9 Nte qutaa qua qianinra riaate. Nraakiara ni qua mwakyaakya ekyaa mpo mwatanaaä mpo mwatanaahua timwa nyiqi viqata mwaa nraakyeva mate vahamwenra mwaa ni qu matai quaravatama timwa nyivata rievarave, tiro.

Iutaasiva Iesusira qovarama kyarero veva ntero vura

(Matiu 26:14-16; Ruku 22:3-6)

10 Iesusiva mwitaa tuvaro mwia nraaqiara 12 nramwuqitairo mpovanto Iutaasi Isikeriotiva mwiqitairo veva ntero Iesusira qovarama kyaani quara timwa nyinrenro vuva Kotira nraamwuqi Kotira kyaiqa vara mwate varuhua mwihua nronra vaisinramwu timwa nyuvata

11 mwihua mwia quara qamwata kyeta tiqata, E mwitaa qiarata tire quataaqama kyeta munima i mwirrenrave, tuvaro mwiaqatairo Iutaasiva Iesusira mwihua kyauquqi kyaani aanranra puua hi varura.

Iesusiva nai nraaqiaranramwuvata vekyahu nyato kyarara nronra

(Matiu 26:17-25; Ruku 22:7-14, 21-23; Ioni 13:21-30)

12 Mpereti hia kyotorara nro entanramwuva nruvata toharo entaraqaa sipisipi nraati rukyo entaraqaa mwia nraaqiaranramwuvanto Iesusira kyapara hita tiqata, Taraqive tire uro terama mwataarara e vekyahu nyato entarara rieqarama mwi kyarara nrenanrave? tita.

13 Tuvaro Iesusiva nai nraaqiara taaratana sitero tiqaro, Nkyetana Ierusaremi mwatukya nronraqi vivaro vaisi mpovanto nramanri taqu kyaqa varero nrianriva nkyitana qintorama kyairata mwia vataqita vivaro

14 mwiva nraamwuqi vera ntairata nkyetanavata mwiqi vera nteta nraamwu qorara mwitaama qiate, Mwaanra ti vari vaisiva iara tiqaro, Ta rumunraqive nte ntena nraaqiaranramwu kyapata vekyahu nyato kyarara nraaninrave tiho, qiate.

15 Nkyetana mwitaa tivaro mwiva nkyitana rumu nronra verato vahi rumunra taintavata mwiqi teramataiharo vahiraqi nyaamwutairata qio rumu mwiqi kyara terama taate, tiro.

16 Iesusiva mwitaa tuvata mwitanhua uro mwatukya nronraqi taqovaro ekyaa inraikyara tu quava avuqavuma kyero mwivau vahuvata mwitanhua vekyahu nyato kyarara terama kyeta mwatora.

17 Terama kyeta mwatovaro entama vuvaro Iesusiva nai nraaqiara kyapata nruva nraamwu

18 mwiqi kyara nre variro tiqaro, Nte qianinra riaate. Nkyiqitairo mpovanto nramwutaahua suqaa ni qovarama kyaananrove, tiro.

19 Mwitaa tuvaro mwia nraaqiaranramwu mwutukyavanto uaquia huvata mwihua kuaiqia kuaiqiyavanto Iesusira kyapara hita tiqata, Nianrave tira hiaro? Nte hia mwivave. Nte hia mwivave, timwaqita vita.

20 Mwitaa tuvaro Iesusiva timwa nyinro tiqaro, Nkyi 12 nramwuqitairo mpovanto nai mpereti vara kyero ni vatama kyero tanuqi mwaati ntamwa kyero nre variariva mwi vaisivama ni qovarama kyaananrove.

21 Ni mwatani mwatatai nraaqiarara mwitaama kyeta rukyerara haaru qara ntumwa torave. Mwi quava qutaa mwivauuma vahiananrove. Ni mwatani mwatatai nraaqiarara qovarama kyaani vaisirara nte po tuqo. Mwia nrova hia mwia mwata kyaataara mwia mwata kyairave, tiro.

Mperetiavarata uainianravata timwa tora

(Matiu 26:26-30; Ruku 22:15-20; 1 Korinti 11:23-25)

22 Mwitaa tuvata kyara nre varuvaro Iesusiva mpereti vara kyero Kotirara kyugeve timwa kyero, nteqa kyero nai nraaqiaranramwu nyinro tiqaro, Mwaa kyarara varaate. Mpereti mwaa ni mamantama iho, tiro.

23 Mwitaa timwa kyero mwiva uaini kaapu vara kyero Kotirara kyugeve timwa kyero, viti nyuvata ekyaahua kaapu mwiqitalta nronra.

24 Nreta varuvaro Iesusiva tiqaro, Nramanri mwaa ni nraanrema iho. Kotiva nraakye qora kyapata kuaaqi kuairama viro varirero qaraakya qua vatarerove. Mwi quava kepukyaqama quarive tiro, ni nraanrevanto mwi quara kepukyaqama kyaananrove. Ni ru kyaivaro ni nraanrevanto tuminro airi nraakye qora kyaahaqa hiananrove.

25 Nte qianinra riaate. Nte mate mwaa entaraqaataina tohara kyena hia uaini nranraitina, qati variqi vina nraakiara Kotiva ntaqikyianinraqi variqana mwi entaraqaa qaraakya uaini nraaninrave, tiro.

26 Iesusiva mwitaa timwa kyero nai nraaqiaranramwu kyapata Kotirara ihi timwa kyeta veva nteta Oripi taaqiqa vurama.

Pitaava nraakiara qiani quara Iesusiva nai timwa mwunra

(Matiu 26:31-35; Ruku 22:31-34; Ioni 13:36-38)

27 Mwinramwuhua mwini varuvaro Iesusiva timwa nyinro tiqaro, Nkyenramwu ni kyeta ntugeqaa hita vivarave. Kotira mpukuqi qara ntumwa to quava qutaa mwivauuma vahiananrove. Mwitaama tiro:
Sipisipiqa ntaqikyi vaisira Kotiva rukyairata
sipisipi mwihua nkyiariara nkyiariara
mpona mpona vivarave, turave.

(Sekariaaa 13:7)

28 Qio nraakiara ni qati vara sivuma kyairaqe variqana nkyi suni nte nraante Karirini virerave, tiro.

29 Mwitaa tuvaro Pitaava qaqao tiro, Ekyaa mwinramwuhua i kyeta aatu ntugema kyeta vivaqevata nte nraahu ivatama kyena mwaini varianinrave, tiro.

30 Pitaava mwitaa tuvaro Iesusiva tiqaro, Nte qianinra riaante. Mate entaqi kokoraaravanto hia taara nani nruqua tirara e taarampo nani nianra tiqara, Hia mwia ntapihurave, tinanrave, tiro.

31 Iesusiva mwitaa tuvaro Pitaava kepukyaqama kyero qaqao tiro, Hia iara tiqana, Nte hia ntapihurave, qianinrave. Ivatamakyne ni rukyaivage-navata nte hia mwitaa qianinrave, tiro. Pitaava mwitaa tuvata Iesusira nraaqiara hini mwihuavata kuaa qua mwia nraahu tura.

Kyaqamwa ututora Kesemaniqi Iesusiva vurama

(Matiu 26:36-46; Ruku 22:39-46)

32 Mwiaqaatairo Iesusiva nai nraaqiaranramwuvata vuva uro kyaqamwa ututora mwia nrutu Kesemaniqi uro ntero nai nraaqiaranramwuanra tiqaro, Nkyenramwu mwaana mwatakya vita varivaqe nte vuturaqi uro Kotiravata qua qiankye, timwa kyero

33 Pitaaravata, Ioninravata, Iemisiravata, mwinramwuhua nraahu sita varero viro.

Mwinramwuhua nraahu sita varero vuvaro mwia hia kyuge huvaro

34 taarampo mwinramwuhuara tiqaro, Ni mutukyavanto nronraqama kyero muaanra ntero niqa piqaro ni rukyaa qara ihanama varuqo. Nkyenramwu nivatama kyeta mwaqaqa variqatama vu ntapairi kyeta viti viri taqe variqata variate, tiro.

35 Mwitaa timwa kyero mwiva pataqia vututo viro uro mwataqaa tumu ntiro Kotira kyapara hiro tiqaro, Mpo aanra vahirera, nte hia muaanra vahi aanranraqaa quangye, tiro.

36 Mwitaa timwa kyero mwiva tigaro, Po hiave, ko, e ekyaa kyaiqa qio vare variaravave. Nte nriqa quani nramanrinra nraani kaapura e mwi kaapura vara qatinani kyaante. Nte mwitaa qiariravata hia ni mutukya vahira vataqira quante. Ena mwutukya vahira vataqira quante, tiro.

37 Iesusiva mwitaa timwa kyero uro ntantero nai nraaqiara taaramponramwu kyonani nrumu taqovata mwinramwuhua suvanto tautovata vaite varuvaro mwiva Pitaarara tiqaro, Saimonio, e vaiteve variaro? Nanraqamave nkyenramwu nivata pataqia variqata hia vu ntapairi kyeta viti viri taqe variqata variavo?

38 Nkyiara mwihua uaqia hi kyaiqara utuate tiro, Saataaniva nkyi mwataara hiankyora mwianra rieqata taqe varita Kotirara aakyara nteqata variate. Nkyi mwanraquravanto mwitaa hiataa iharo nkyi mwamwanta-vanto nraahu hia kepuuyaqa ihata variavo, tiro.

39 Mwitaa timwa kyero Iesusiva qaiqaa mwihua mwini kyero uro Kotiravata qua tirero mwiva vaakya tu quara mwi quara nraahu qaiqaa tiro timwa taiqa kyero

40 uro ntantero nrumu taqovata mwia nraaqiaranramwu vu tautovata qaiqaa vaite varura. Iesusiva nri ntovata mwihua sivita kyauriqata Iesusira timwa mwi quava hia vahuvata varuvaro

41 Iesusiva qaiqaavata uro Kotiravata qua timwa taiqa kyero uro ntantero nrumu taqovata mwihua qaiqaa vaite varuvaro Iesusiva tiqaro, Qikye, nkyenramwu tekya hiqatave vaite variavo? Qio taqaate. Ni tu vare entava nrima ntaiho. Ni mwatani mwatatai nraaqiara ni ntavaaqavuqita uro uaqia hi kyaiqara uti varihua kyauquqi tuta kyevarave.

42 Sivivaqenramwu quare. Ni qovarama kyaari vaisiva nrima variho, tiro.

Iutaasiva Iesusira qovarama kyora

(Matiu 26:47-56; Ruku 22:47-53; Ioni 18:3-12)

43 Iesusiva mwi quara ti varuvaro mwia nraaqiara 12 nramwuqitairo Iutaasiva uro ntero. Iutaasiva uro ntovata mwivavata vaisi airivant paipavata, kyaamwuvata, tu varetu vura. Kotira nraamwuqi Kotira kyaiqa vara mwate varu vaisihsua mwihua nronra vaisinramwuvata, mwaanra okyara ti varuhuavata, Iutaanronra vaisinramwuvantovata, mwihua mwi vaisihsua sitovata mwihua Iutaasira vatama kyeta nrunra.

44 Nruvaro Iutaasiva Iesusira qovarama kyaaninranra mwihua timwa nyinro mwitaama tiro: Nte mwia qua mwanteqana mota kyaani vaisira mwia mwivave. Nkye mwia ntavaaqavu kyeta mwiaqaa kyuqema kye ntaqikyiqi vita uro kyaate, tiro.

45 Iutaasiva mwitaa timwa kyero mwihua kyapata uro ntero mwiva qamwanrama kyero Iesusiva varunani uro ntero tiqaro, Mwaanra ti variara vaisio, timwa kyero mwia mota kyero.

46 Iutaasiva Iesusira uro mota kyovata Iutaasiravata nruhua uro Iesusira ntavaaqavu kyovaro

47 Iesusira nraaqasairo mwia nraaqiara mpovanto paipa nai tuaqitairo veva ntanrau kyero mwiaqotairo vaisi mpo nraato teqa kyovaro tumu

ntura. Kotira nraamwuqi kyaiqa vare varuhua mwihua vunyaa vaisi mwia kyaiqa vaisi nraato teqa kyora.

48 Mwitaama kyovaro Jesusiva Iutaasiravata nru vaisihuara tiqaro, Nkye, nkye kamaninravatama kyeta ntqua vaisihuara sitarerata nriantema kyeta ni pitarerata paipavata kyaamwuvata varetave nriavo?

49 Nte mpo enta mpo enta Kotira nraamwuqi variqana nraakye qora qua mwakyakya timwa nyi varuqata nkye mwi entara hia ni ntavaaqavuar-ave. Kotira mpukuqi mwitaa hirara qara ntumwa tova vaiho. Mate mwi quava mwivauma vahiananrove, tiro.

50 Jesusiva mwitaa tuvata mwihua mwia ntavaaqavu kyovata ekyaa mwia nraaqiaranramwuvanto mwia kyeta aatu ntueqaa hita vivura.

51 Qaraakya vaisi kuaikuvanto nraahu tavuna egaroritua rupatova Jesusira vataqiro virera utuvata mwihua mwia taqeta uro mwivavata ntavaaqavu kyaare titi,

52 tavuna mwi tuara nraahu tu varovaro mwi vaisiva tokyavanto hi- antero vura.

Iutaa nronra vaisi suqaa Jesusira uro kyora

(Matiu 26:57-68; Ruku 22:54-55, 63-71; Ioni 18:13-14, 19-24)

53 Mwia nraaqiaranramwuvanto aatu vuvata mwihua Jesusira vita vareta Kotira nraamwuqi kyaiqa vare varuhua mwihua vunyaa vaisivanto varuraqi uro kyovata Kotira nraamwuqaa ntakikyi varuhua ekyaa hinin- ramwu nronraqama vuhuavata, Iutaa nronra vaisinramwuvata, mwaanra okyara ti varu vaisihuavata, mwihua ekyaa nraamwu mwipi ntuvaantuama vita varura.

54 Jesusira vitaqita uro kyeta varuvaro Pitaava vutura nyianrasata viqaro mwihua sataqiro vuva vunyaa vaisi nraamwu maata vahunani uro ntero utaqi mwaati ntero mwatukya mwiaqaa ntakikyi varuhua kyapata mwatakyaa viro variqaro qia taare varura.

55 Pitaava mwaata mwini varuvata Kotira nraamwuqi kyaiqa varo- hua nronranramwuvant, ekyaa nronra vaisi mwipi ntuvaantuama vita varuhuavata, Jesusiraqaa qua vateta mwia rukyaare titi, mpo quara puua huvaro hia vahuvata qumina mwia rukye quarara puua hi varura.

56 Hia qua vahuvata vaisi airivanto apiqama kyeta Jesusiraqaa unra qua nraahu vateta ti varuvaro mwihua quavanto mpo qua mpo qua vahiro, hia kuua qua vahura.

57 Mwitaa timwaqita vuvata mpo uhua Jesusiraqaa unra qua vateta tiqata,

58 Jesusiva mwitaa tihata tire riaunanrave. Mwiva tiqaro, Nte Kotira nraamwu vaisivanto nkyiari kyauquqo hoqataara ntapairi kyena nte taarampo enta variqana hia kyauquqo vareqana qaiqaa nraamwu mwia hoqa kyaaninrave, tirave, titi.

59 Mwi vaisihuua mwi quaravata tiqata hia ntapihi kyeta kuua qua turama.

60 Mwitaa tuvaro Kotira kyaiqa vara mwate varuhua mwihua vunyaa vaisivanto mwihua suqaa siviro Jesusira kyapara hiro tiqaro, Mwihua mwitaama kyeta iqaa qua vateta ti variavo. E mpo? Mwihua mwi quara iara qiera e nanra quave nkyiari timwa nyinanrave? tiro.

61 Tuvaro Jesusiva hia qua tiraitiro, tirema varuvaro qaiqaa mwiva mwia kyapara hiro tiqaro, Qutaave Kotiva i titihara e tiri kyaahaqa hirava Mesaiaavanto variaro? Qutaave e Kotira mwaquivavato variaro? Tiri timwa timwinraqe riaare, tiro.

62 Mwiva mwitaa tuvaro Jesusiva tiqaro, Nte mwaa mwivave. Nkye nraakiara taqaivaqe nte mwatani mwatatai nraaqiarava nronraqama

vina Kotiva kepukyavanto varianinra mwia kyauqu kyaatutani varina tonamwuqi tumuaninrave, tiro.

63 Iesusiva mwitaa tuvaro Kotira kyaiqa vara mwate varuhua vunyaa vaisivanto nai tuavaaqaa nrahitu kyero tiqaro, Qikye, qumina vaisi kyaata-vanto mwiaqaa qua vatehua nyaanrevorave.

64 Riaate. Nkye airivanto variavaro mwiva Kotira vuqaa variqaro uaquia hi quara tiho. Mwia kyaara nkye nanreve Iesusirara tivarave? Tivaqe riaankye, tiro. Mwitaa tuvata mwihua tiqata, Mwia qora kyaiqavanto nritaraiho. Mwia kyaara mwia rukyaarava nraahuma vaiho, tita.

65 Mwitaa timwa kyeta hini uhua uro Iesusiraqaa taara vihikye mwiaqataita Iesusiva hia qio taqaarive tita, mwia vuqaa tavunaqo ru-pateta vireraqama kyeta mwia ntuqutu kyeta tiqata, Tavave i ntuquthiho? Hia taqaraitira, i ruani vaisira nrutu tiraqe riaare, tita. Mwitaamaqi vita Iesusira uaqiamma mwatovata piponramwuvantovata mwia vita kyeta kyauquqo ntuqutuqita surama.

Pitaava Iesusirara hia taqau vaisirave tura

(Matiu 26:69-75; Ruku 22:56-62; Ioni 18:15-18, 25-27)

66 Nraamwuqi Iesusira uaqiamaqita vi varuvaro Pitaava mwaatani mwatukyaaqaa mwatakyaa viro varuvaro vunyaa vaisi mwia kyaiqa nraakye mpovanto nrirareqaro taqovaro

67 Pitaava qia taare varuvaro mwia ntapihi kyero taqero tiqaro, E Iesusira Nasaretinyaa vaisintiri variaravave, tiro.

68 Tuvaro Pitaava qaqaqo tiro, E nanra quave qiaro? E qiana quara nte hiama ntapihuqo, tiro. Pitaava mwitaa timwa kyero uro uro nronraanrana varuvaro kokoraaravanto nruqua tiro.

69 Pitaava mwini varuvaro kyaiqa nraakye mwiva qaiqaa mwia taqero mwini sivita varuhuara tiqaro, Vaisi mwiva mwia nramwunaave, tuvaro

70 Pitaava qaqaqo hiave nraahu tiro.

Mwitaa timwa kyero pataqia varuvata qaiqaa mwini sivita varuhua Pitaaraa tiqata, Iesusira nraaqiaranramwu Karirinyaahua variavara quitaama evata mwinyaavama variaro, tita.

71 Mwihua mwitaa tuvaro Pitaava kyauqu nriqiqaa vatero tiqaro, Nte unra qiankyera Kotiva qiomaa ni ruananrove. Nte qutaama tuqo. Nkye ti varia vaisira nte hia mwia taqaurave, tiro.

72 Mwitaa tuvaro qamwanrama kyero kokoraaravanto qaiqaa nruqua tuvaro Pitaava mwiaqatairo Iesusiva timwa mwia quara mwianra riero. Iesusiva Pitaara timwa mwiqanro mwitaama tiro: Mate entaqi kokoraaravanto hia taara nani nruqua tirara e taarampo nanima nianra tiqara, Nte hia mwia taqaurave tinanrave, tu quara mwianra riovoro mwia mwutukyavanto uaquia huvaro Pitaava ntatora.

15

Iesusira Paireativa hunani vitaqita uro kyora

(Matiu 27:1-2, 11-14; Ruku 23:1-5; Ioni 18:18-38)

1 Mwia qanranraa toqaqi Kotira kyaiqa vara mwate varu vaisihua mwihua nronra vaisinramwuvata, Iutaa nronra vaisinramwuvata, mwaanra okyara ti varu vaisihuavata, ekyaa kaanasorinramwuvata, mwihua ntuaantuama vita variqata mwihua qua ti okyaraara timwa avuqavuma kyeta Iesusira seniqotaita mwia rupa vareta Paireativa kamaninra nronra vaisivanto varuraqi uro kyora.

² Uro kyovaro Paireativa Jesusira kyapara hiro tiqaro, Qutaave e Iutaa vunyaa vaisivanto variaro? tuvaro Jesusiva tiqaro, E qiananra nte mwaa mwivama iho, tiro.

³ Mwitaa tuvata Kotira kyaiqa vara mwate varu vaisihua mwihua nronra vaisinramwuvanto mpo qua mpo qua kyaara Jesusira inronra hi varuvaro

⁴ Paireativa mwihua qua riegaro qaiqaa Jesusira kyapara hiro tiqaro, E hiave mwia hiniqama nkyiariara tinanrave? Mwihua airi qua kyaara i inronra hi variavo, tiro.

⁵ Mwitaa tuvaro Jesusiva qaiqaa hia qua tiraitiro, kepukyaqama kyero varuvaro Paireativa airi nraato ti varura.

Jesusira kyatariqaa rutaate tura

(Matiu 27:15-26; Ruku 23:13-25; Ioni 18:39-19:16)

⁶ Mpo ihi mpo ihi vekeyahu nyato kyarara nro entaraqaa kamaninra vunyaa vaisivanto nraakye qora qamwata nyatarero karavu vaisi mpo huvantu kyero titovaro mwaatani vura. Nraakye qoravanto mwi vaisira huvantu timwa taante tuvaro mwi vaisira huvantu nyate varura.

⁷ Mwi entara vaisi mponramwuvanto kamaninravata ntaqura kyaara karavuqi varuvaro mwi vaisinramwuhaqitairo mpovanto mwia nrutu Varavaasiva mwiva vaisi rukyora kyaara karavuqi varura.

⁸ Qio mwi entaraqaa nraakye qoravanto ntuvantuama vita variqata karavu vaisi huvantu kyaaninra mwianra rieqata ntuvantuama vita varuvaro

⁹ Paireativa mwihua kyapara hiro tiqaro, Nte karavuqitaina ta vaisirave huvantu nyataaninrave? Iutaa mwatanaa vunyaa vaisi mwiave nte huvantu nyataaninrave? Nkye timwa mpivae riaankye, tiro.

¹⁰ Paireativa ntapihi kyovata nronra vaisinramwuvanto Jesusiva nronraqama quankyorave tita, Jesusira inronrama mwateta mwihua mwia vitaqita uro Paireatira kyauquqi tutu kyora.

¹¹ Paireativa karavu vaisi tarave huvantu nyataaninrave timwa kyero, nraakye qora kyapara huvata Kotira kyaiqa vara mwate varu vaisihua mwihua nronra vaisinramwuvanto uro nraakye qora utaqaa variqata kepukyu qua mwihua timwa nyita tiqata, Hia Jesusira huvantu timwa taante. Varavaasira huvantu timwa taante qiate, tita.

¹² Mwi nraakye qorahua rapateqa tuvata mwihua Varavaasira huvantu timwa taante tuvaro Paireativa qaiqaa nraakye qora kyapara hiro tiqaro, Nkye Jesusirara tiqatama, Iutaa vunyaa vaisivantove, qiarave. Nte mwi vaisira nataave hianinrave? tiro.

¹³ Mwitaa tuvata mwihua aakyara nteta tiqata, Mwia kyatariqaa rutaate, tita.

¹⁴ Mwitaa tuvaro Paireativa qaiqaa mwihua kyapara hiro tiqaro, Mwiva nanra uaqia hi kyaiqara utu kyaihatave mwitaa qiavo? tuvata mwihua qati nraahu paatita aakyara nteta tiqata, Mwia kyatariqaa rutaate, tita.

¹⁵ Mwihua mwitaa tuvaro Paireativa nraakye qora qamwata nyatarero Varavaasira huvantu nyatero mwiaqatairo nai ntaqu vaisihuara Jesusira kyaamwugo ntuvutuate tuvata mwihua mwia kyaamwugo ntuvutu kyovaro mwiaqatairo mwia kyatariqaa rutaate tiro, Paireativa Jesusira nai ntaqu vaisihua kyauquqi tutu kyora.

Ntaqu vaisihua Jesusirara raivuvuma mwateta mwia ntuquutura

(Matiu 27:27-31; Ioni 19:2-3)

¹⁶ Paireativa nai ntaqu vaisihua kyauquqi Jesusira tutu kyovata mwihua mwia vitaqita uro kamaninra nraamuqi kyeta mwihua nkyiari hena ntaqu vaisihua ekyaa nyaanrama ntuvantuama kyeta

¹⁷ mwia vireraqa hiqata vunyaa vaisi tavuna nraanre tavuna rupa mwateta mwiaqaataita tauvera vara kyeta qiai vasisi tovaqa voti hora ququrama kyeta Jesusira qiaqaa qumwaa tora.

¹⁸ Mwitaama kyeta nkyiari kyauqu tiriqa vateqata kumwaanri mwitaa tita tiqata, lutaan vunyaa vaisio, variqarave? tita.

¹⁹ Mwitaa timwa kyeta mwihua kyaamwugotaita mwia qiai ntukamu kyeta, mwiaqaa taara vihi kyeta, mwia vuqaa tori kyauru ravi variqata qati vireraqama kyeta mwia qamwata mwateqata varura.

²⁰ Mwitaamaqi vigata vireraqama kye raima mwateta mwiaqaataita mwihua nraanre tavuna rupa mwatora huvantu kyeta nai tuavaaqa utu mwateta mwia kyatariqaa ninri rukyeta hiritarerata Jesusira vita vareta vurama.

Jesusira kyatariqaa ninri ru kyeta hiritora

(Matiu 27:32-44; Ruku 23:26-43; Ioni 19:17-27)

²¹ Ntaqu vaisinramwuhua Jesusira kyatariqaa ninri ru kyeta hiritaare tita, mwia vita vareta mwatukya mwaqani aanraqaa vi varuvaro vaisi mpovanto mwia nrutu Saimoniva mwatukya nronraqi virera huvata mwihua mwia antua kye kepukyaqama kyeta tiqata, Jesusira ru kyeta hirite kyatarira vara quqira uro mwataante, tuvaro Saimoniva vara quqiro uro mwatora. Saimoniva mwata Sairininyaava mwiva Arekisantaakya Rupukya sova varura.

²² Mwihua Jesusira vitaqita uro qumina mwata Korokotaave tunani kyora. *Korokotaa* mwaa quaraqitai tirera, *Qiata Mwukyaariqaave*, tunani Jesusira uro kyora.

²³ Uro kyeta uaini mwipi ukavu inraikyara tuqasaa kye vato nramanrinra mwia mwinrenra huvaro Jesusiva hia nrenro.

²⁴ Hia nrovata mwihua mwia kyatariqaa ninriqotai rukyeta mwia tuavaaqa vara kyeta tahuua tahuave qio varevarave timwa kyeta, kaati ruantema kyeta ori tuto kyeqata mwia tuavaaqa ntainra kyeta varora.

²⁵ Toqaqi huarivanto nrinro virisataqa huvata Jesusira kyatariqaa rutora.

²⁶ Mwia kyatariqaa ruteta Jesusira qiatani qua mpo, mwia ko timwa mwato quara qara ntumwa tetu kyatariqaa rutora. Mwi quava mwitaama tiro:

IUTAA VUNYAA VAISIVE, tiro.

Mwi qarava mwitaama kyero vahura.

²⁷ Mwihua Jesusira kyatariqaa ruteta Jesusira vatama kyeta vaisi taaratana rutora. Mwitanahua mpuara vare varutanahua varuvata mpo Jesusira kyauqu kyaatutani ninri ruteta mpo Jesusira kyauqu kyaantaaqani ninri rutora.

²⁸ [Jesusira vatama kyeta mwitaama rutorara tiro, Kotira mpukuqi qua mpo qara ntumwa tova mwivau vahura. Mwitaama tiro: Mwiva uaqia hi vaisihua vatama kyero variananrove, tura.]

²⁹ Mwitaama kye rutovata nraaky e qoravanto vitare nritare hiqata viri taqeta nkyiari mwaunru miqi kyeqata Jesusirara uaqia hu quara timwa mwateta tiqata, Qikye, e tiqarama, Kotira nraamwu ntapairi kyenama taarampo entaqaa kyaiqa vareqanama qaiqaa hoqa taiqa kyaaninrave, qiaravave?

³⁰ Qio ena kyaahaqa hiante. E kyatariqataira mpiami ntaante, tita.

³¹ Mwihua mwitaa ti varuvata mwihua tuntema kyeta Kotira kyaiqa vara mwate varuhua mwihua nronraqi vaisinramwuhuvata, mwaanra okyara ti varu vaisihuavata, mwihua Jesusirara raima mwateta tiqata, Mwiva mpohua nraahu kyaahaqa hi variva hiama qio nai kyaahaqa hirove.

32 Mwiva Kotiva titai vaisiva Mesaiaavantove, Isareri vunyaa vaisivantove, qiaavata riaunanrave. Kyai tire variqata taqaararo mwiva kyatariqataairo mpiami ntero tuminrenra, tire mwianra quitaave qiaare, tita.

Mwihua mwitaa tuvata mwilhua nraantanteta mpuara vaisitana Jesusira vatama kyeta rutotanahua, mwitanahuavata mwia uaquia hu quara timwa mwate varura.

Jesusiva qutu vura

(*Matiu 27:45-56; Ruku 23:44-49; Ioni 19:28-30*)

33 Mwitaa huvaro ihera mwutukya tavaara ekyaa mwi mwataraqaa entama tero vahiqi vuvaro huarivanto vitira tavaarana tumi vuvaro qaiqaa ntuvahama vura.

34 Qaiqaa ntuvahama vuvaro Jesusiva nai quaqitairo aakyara ntero tiqaro, *Eroi, Eroi, rama sapakitani*. Kotio, Kotio, nanraqamave ni qaqa kyera hiarao? tiro.

35 Jesusiva mwitaa tuvata mpo uhua mwini sivita varuhua mwia qua rieta tiqata, Mwiva Iraisaara tiri haivaqara nraanraih, tuvaro

36 mpovanto hiantero ukavu uaininra kyaqa kyero kyaamwu kati kyero mwiaqaa huairi kyero viri Jesusira nrona vatero tiqaro, Kyai variqata taqaararo Iraisaava mwia kyaahaqa hirero tumuaninra taqaare, tiro.

37 Mwitaa tuvaro Jesusiva nronraqama kyero aakyara ntamwa kyero qutu vura.

38 Jesusiva qutu vuvaro Ierusaremini Kotira nraamwuqi tauha voti huratavuna nronra hiritova virisairo utaqaa nrabituqiro tuminro mpiani tumu kyora.

39 Ntaqu vaisihua vunyaava Jesusira ruto kyatarira nraaqani varuva taqovaro Jesusiva nronraqama kyero aakyara ntamwa kyero qutu vuvaro mwiva tiqaro, Qikye, quitaama vaisi mwaava Kotira mwaaqu variva qutu viho, tiro.

40 Jesusiva qutu vuvata nraakye mponramwuvanto nyianrasata variqata taqe varura. Mwinramwuhuaqitairo hininramwu nyutu vahirero. Mariaava Makataranyaava mpo, Mariaava Iemisiya nraakiaraa vaisi mwivavata Iosisiravata nyova mpo, Saromeva mpo, mwihua mwini varura.

41 Nraakye mwinramwuhua Jesusiva Karirini nrohu entara mwia vataqita nrohiqata mwia kyaqa kyaahaqama mwato nraakyenramwuhua varuvata nraakye mponramwuvata mwini varura. Mwihua Jesusiravatama kyeta nruhua Ierusaremini varura.

Jesusira quntamwa tora

(*Matiu 27:57-61; Ruku 23:50-55; Ioni 19:38-42*)

42-43 Entama virera huvaro Iosepiva Arimatianyaava nri ntora. Mwi vaisiva vaisi kyueva kaanasorivanto variqaro Kotiva ntaqikyiani entava nrianinranra taqevaro mwia vekya varuva nri ntero, huru lutaan mwaanra enta vahianinranra riero hia aatu hiraitiro, uro Paireatirara Jesusira mwamwantara kyapara hiro tiqaro, Mwia mpiraqe varaqina uro quantaakte, tiro.

44 Mwitaa tuvaro Paireatativa Jesusiva qamwanrama qutu vurara airi nraato tiro ntaqu vaisira mpo nraanrama kyero kyapara huvaro mwi vaisiva tiqaro,

45 Qio quitaama qutu viho, tuvaro Paireatativa Iosepirara tiqaro, Qioma mwia mwamwanta varaqira uro quntamwa tenanrave, tiro.

46 Mwitaa tuvaro Iosepiva egarori tavuna kyoqaama kyero Jesusira mwamwanta kyatariqaatairo itu kyero egarori tavuna mwiaqotairo qapugama kyero uro vaisi quntarera ori vaurutoraqi vera vatero ori nronra mpo ventaqiro uro mwia nrona tita tora.

47 Mariaava Makataranyaavavata, Mariaava Iosisira nrovavata, taqe varuvata Jesusira oriqi vera vatora.

16

Iesusiva qutu vuraqitairo sivura

(Matiu 28:1-8; Ruku 24:1-12; Ioni 20:1-10)

1 Saarareqa Iutaavanto mwaanra tu entava taiqovata Mariaava Makataranya nraakyevantovata, mwia qamwawa Iemisira nrovavata, Saromevavata, mwi nraakyenramwuhua munima kyeta kyugema kyero mwunta vu inraikyara vareta Jesusira mwamwantaqa qumwatarerata vura.

2 Saante toqaqi huarivanto mate nrintoraqi mwinramwuhua Jesusira quntamwa toraqiara vura.

3 Aanrani viqata mwinramwuhua nai kyapara hi nai kyapara hi tiqata, Tire mwini uro ntaararo tavave ori nronra qesana titataara vara kyaanarove. Ori mwia nronra nrusi ntamwa taarave, tita.

4 Mwitaa timwa kyeta mwinramwuhua nri nteta taqovaro ori nronra mwia nrusi venta kyovaro qatinani vahura.

5 Orivantu mwitaama vahuvata taqeta mwinramwuhua oriqi vera nteta taqovaro vaisi mpo qaraakya vaisivanto egarori tuavaaqa ututo vaisiva mwipi hini kyaataaqi mwatakyaa viro varura. Mwiva mwipi varuvata mwia taqeta aatu huvaro

6 mwiva mwihuara tiqaro, Hia aatu hiate. Jesusira Nasaretinyaanra kyatariqaa rutaa vaisira, nkyenramwu mwianrave puua hi variavo? Mwiva hia mwaaqi variho. Mwiva qatima sivihio. Nkyenramwu mwaini taqaate. Mwaaqi mwia vataaraqi hiama variho.

7 Qio mwaa quara vareta uro mwia nraaqiaranramwuvata, Pitaaravata, timwa nyiate. Mwitaama timwa nyiate. Mwiva nraante nkyl suni Karirinima viho. Nkyenramwuvata mwini vita uro mwia taqeverarave. Taura qati variqaro mwianra nkyl timwa nyunra mate mwivauva vaiho. Mwi quara timwa nyiate, tiro.

8 Mwiva mwitaa tuvata aatu hiqatara tita, mwinramwuhua Jesusira quntamwa toraqitaita veva nteta hiantamwa tetu aanrani viqata hia mpohuavata timwa nyinraitita, vura.

Iesusiva Mariaara Makataranyaanra vuqaa qovarama vura

(Ioni 20:11-18)

9 [Iesusiva Saante toqaqi qutu vuraqitairo siviro vuni mwiva Mariaara Makataranyaanra vuqaa nraante qovarama vura. Haaru Iesusiva nraakte mwia utaqitairo vaana 7 nramwu sitovata nritare vu nraakyera vuqaa qovarama vuvaro

10 Mariaava uro Jesusira nraaqiaranramwu timwa nyinrenro vuva uro taqovata mwihua Iesusirara ntate varura.

11 Ntate varuvaro mwiva mwihua timwa nyinro tiqaro, Iesusiva qatima siviro variho. Nte ntene puqtaina mwia taqauqo, tuvata mwihua hia mwia quara qutaave tura.

Iesusiva nai nraaqiara mpotana suqaa qovarama vura

(Ruku 24:13-35)

12 Mwi entara Iesusiva nraahumwa mpo qarama kyero nai nraaqiara taaratanu suqaa qovarama vura.

13 Mwitanahua aanraqaa vi varuvaro Iesusiva qovarama vuvata mwihua mwia taqeta uro ntanteta nrumbu hini mwihua timwa nyuvata mwihua hia mwitanahua quara quitaave tura.

*Iesusiva nai nraaqiara 11 nramwu suqaa qovarama vura
(Matiu 28:16-20; Ruku 24:36-49; Ioni 20:19-23)*

14 Qio nraakiara ekyara Iesusira nraaqiara 11 nramwuvanto kyara nre varuvaro Iesusiva mwihua suqaa qovarama vura. Iesusiva qati siviro varuvata mpo uhua mwia taqeta uro Iesusira nraaqiaranramwu timwa nyuvata mwihua mwi quarara unra quave timwa kyeta varuvarora tiro, Iesusiva nkysiari suqaa qovarama viro mwia kyaara mwihua inronra hiro tiqaro, Nkye mwi quarara quitaave qjataara vahatama nkye kepukyaqama kyeta variqata hia quitaave qjavo, tiro.

15 Mwitaa timwa kyero mwihua timwa nyinro tiqaro, Nkye ekyaa mwata maata nrohiqata ekyaa nraakye qora kyuge qua mwaa timwa nyiate.

16 Timwa nyivaro ni quara quitaave timwa kyero, nramanri varaani vaisira, mwiamma Kotiva qio vitaananrove. Ni quara hia quitaave qiani vaisira Kotiva hia mwia vitaraitiro, mwiaqaa qua vataaananrove.

17 Ni quara quitaave tihua, mwihuuma nronra kyaiqa mwataaa hianinra qio varevarare. Mwihua ni nutu nteqatama vaana titavata vivarare. Mwihua nraahumwa mpo mwataanaa quavata qio tivarave.

18 Mwihua quaiha tu varaivaro mwi inraikyava hia mwihua ruananrove. Mwihua tuhi nramanri nraivaro tuhi nramanrivanto hia mwihua ruananrove. Mwihua nriqa vihuaqa kyaquu vataivata mwihua kyuqema vivarave, tiro. Turama.

*Kotiva Iesusira vitovaro nyaamwuni vura
(Ruku 24:50-53; Kyaiqa Varora 1:9-11)*

19 Nronravanto Iesusiva nai nraaqiaranramwu kyapata qua timwa nyi taiqa kyovaro Kotiva mwia nyaamwuni vitero vuvaro mwiva mwini nronraqama viro Kotira kyaquu kyaatutani mwatakyaa virero vurama.

20 Iesusiva nyaamwuni vuvata mwia nraaqiaranramwuvanto mwata maata vahuntema nrohiqata Iesusirara timwa nyi varuvaro nronravanto Iesusiva mwihua kyaahaqa hi varuvaro mwihua kyaiqvavento kepukyaqama viro nrutarero vahuvatara tita, nraakye qoravanto taqovaro mwihua quavanto quitaave qua nraahu vahura.]

RUKU

Rukuva Iesusiva nrohurara tura

¹ Nronra vaisi Tiopiraasio, Iesusiva tiri utaqaa variqaro mpo kyaiqa mpo kyaiqa varorara airi vaisivanto mwi quara qara ntumwa torave.

² Tauraaqama kye vaisi mponramwuvanto nkyiari suqotaita mwi inraik-yara taqeta, mwiaqatai tiri timwa timwuvata vaisi airivanto mwi quara qara ntumwa torave.

³ Nronra vaisio, ntevata mwi quara okyaraqaataina ntapihi riarerave timwa kyena, airi enta kyaparamaqi vina mwi quara qio ntapihi kyena riena, evata ntapihi kyera riaante tina, mwaa quara okyaravata, tavaar-avata, mwutuvata, qara ntumwa tena.

⁴ Vaisi mponramwuvanto i timwa mwu quara ntapihi kyera riaante tina, ntevata mwaa quara ntapihi kyena i timwa mwinrenrave.

Sekaraiaakya Irisavetikya

⁵ Herotiva vunyaa vaisivanto Iutaa mwataqaa ntaqikyi varu entara vaisi mponvanto Sekaraiaava mwaanra kyaiqa vareqaro nraakyie qorara rieqaro Kotira kyaiqa vara mwate varu vaisiva varurama. Mwiva Avaisaara kuua okyaravanto varura. Mwia nraata mwia nrutu Irisavetiva mwivavata Eroninra kuua okyaravanto Kotira kyaiqa vare varu okyarahua varurama.

⁶ Sekaraiaakya Irisavetikya mwitanahua Kotira vuqaa avuqavuma variqata Kotira qua ekyaa qua riemwaqi vi varurama.

⁷ Mwitaamagi viqata hia nraaqiarayata mwatorama. Irisavetiva ehaaraqa huva hia nraaqiara mwataraitiro, qatitana variqi vita kyonta nyaapaiqa hurama.

⁸⁻⁹ Mpo enta Kotira kyaiqa vara mwate varu vaisihua mponramwuvanto kyaiqa vara taiqa kyeta uro mwaatani varuvaro Sekaraiaava varaari iherava nruvata mwia vataahuavata mwia kyaahaqa hiqata Kotira nraamwuqi kyaiqa vararerata nrunrama. Mwihua kyaiqa vararerata hiqata santi vera kyeqata kyaiqa *ntuqaqama/puhama* kyeta Sekaraiaarara, E Kotira nraamwuqi variqara Kotirani kyuge munra quarive tira, qia quara mwataante, tuvaro Sekaraiaava nronravanto hu nraamwunraqi nanrian-raa vera ntero mwunta vu inraikyara vara kyero qiaqaa quararerero viro.

¹⁰ Mwiva mwipi variqaro mwi kyaiqara vare varuvata qati nraakyie qoravanto mwaatasata ntuvaantua hita Kotirara aakyara nte varura.

¹¹ Mwihua Kotirara aakyara nte varuvaro Sekaraiaava nraamwuqi varuvaro qamwanrama Kotiva titova nyaamwunyaa vaisivanto mwiaqatairo qovarama viro munra quani taintara tataaqa mwia kyauqu kyaatutani siviro varuvaro

¹² Sekaraiaava mwia taqero nrihanrama viro aatu hiro.

¹³ Aatu hi varuvaro Kotiva titova tiqaro, Sekaraiaao, hia aatu hiante. E Kotirara aakyara nteqara ntumwahiamwa hiananra Kotiva riaiho. I nraatavanto Irisavetiva qoraisi nraaqiara mwata taananrove. Mwi nraaqiarara nrutu nteqara Ioninrave qianta.

¹⁴ Mwia mwata taaninranra evata nraakyie qora airivantovata mwianra qamwatevarave.

¹⁵ Mwiva Kotira vuqaa vaisi nronravanto varianinrave. Mwiva uainivata mwi nramanrinra voti hianinravata hia nraanrive. Mwia mwata taani entaraqaatairo Kotira mwanraquravanto kepukyaqama kyero mwiaqaa ntaqikyiraro variqiro quananrove.

16 Isareri mwatanaa mwaahua airivanto mwia qua rieqata uaqia hi aanranra qaqira kyeta uro ntante Kotirara tiri nronravantove timwa kyeta Kotira aanraqaan vivarave.

17 Kotiva i nraaqiara titairaro mwiva nraante urontero nkyi haivaqava Iraisaava kepuqyaqama kyero varontema kyero mwiva airi nraakye qora kyaahaqa hianinrave. Ioninra qua rieqatama vaisivanto antua qua qaqrakey nkyiari nyaaqumwanravata qamwateqa varivarave. Ioniva qua timwa nyinrata Kotira qua raaqu kyehua qaiqaa ntapihi kye riemwaqi viqata varivarave. Ioniva nraakye qora terama tairata mwihua nronra vaisi vekya variate, tiro.

18 Mwitaa tuvaro Sekaraiaava Kotiya titorara tiqaro, Qaqao, e tinanranra nte nataama kyenave quataave qianinrave? Nte nyaapaiqama vuqaro ni naatavantovata kyontaqama viho, tiro.

19 Tuvaro Kotiva titova mwia timwa mwinro tiqaro, Nte Keviriarivave. Nte Kotira vuqaa sivi varuvave. Kotiva ni titihana nte kyuqe mwakyaakya tumu i timwa mwuquo.

20 Qio riaante. E ni quara hia quataave tinanra mwia kyaara i nrovanto tita virara hia qio qua tinanrave. Mwitaaama variqira viraro i nraatavanto nraaqiara mwata tairarama qaiqaa qua tinanrave. Nte iara qianinra quataama qovara hiananrove, tiro.

21 Kotiva titova nyaamwunyaa vaisivanto mwitaa ti varuvata mwaatani varu nraakye qorahua Sekaraiaara vekya variqata taqovaro nraamwuqi mpuwaahama varuvata mwihua airi nraato tita tiqata, Nataa hiqarove mwiva hia vaakya veva ntaiho? timwa kyeta taqe varuvaro

22 Sekaraiaava veva ntovata mwihua taqovaro qua qiankye tura hia qio qua tura.

Mwiva hia qua tuvata mwihua tiqata, Sekaraiaava mwipi variharo mpo inraikyavanto mwia vuqaa qovara iharoma mwia nrovanto tita viharo hia qio qua tiho, tita. Tuvaro Sekaraiaava qua qiankye tura hia qua tiraitiro, kyaququo nraahu piaateqaro varurama.

23 Mwiva kyaiqa varo iherava taiqa vuvaro mwiva nrumu ntantero nai mwaatani uro varurama.

24 Uro varuvaro mwia nraatavanto Irisavetiva nraaqiara tuaqa hurama. Irisavetiva nraaqiara tuaqa hiro mwiva tora hini kyauquruara nraamwuqi nraahu tuqeta kyero varurama.

25 Mwiva tiqaro, Kotiva nianra po tirave. Tauraqama hia nraaqiara mwataraitina, kyauriqa varurave. Mate mwaa entara nte nraaqiara tuaqa hina hia kyauriqa varuquo, tiro. Mwitaa turama.

Keviriariva nyaamwusairo tumu Mariaara timwa mwunra

26 Irisavetiva nraaqiara tuaqa huvaro 6 tora nritarovaro Kotiva qaiqaa Keviriarira titovaro mwiva Nasareti mwatukya Karirini tumu ntora.

27 Keviriariva Iosepira tito nraakyera qaraakya nraakye mwakyaakya timwa mwinrenro tumunrama. Iosepira okyara varirerata Ntevitira nai haivaqara kuaa okyara varurama. Iosepira tito nraakyera nrutu Mariaava.

28 Kotiva titova tumu ntero verante Mariaarara tiqaro, Varirave hiaro? I kyuqema mwatai nraakyeva variaro. Nronravanto ivata variho, tiro.

29 Mwitaa tuvaro Mariaava mwia qua riero nronra nraato riero tiqaro, Nataa iharove nianra mwitaa tiho? tiro.

30 Mwitaa tuvaro Kotiva titova tiqaro, Mariaao, hia aatu hiante. Kotiva iara qamwateqaro variho.

31 E riaante. E nraaqiara tuaqa hira qoraisi nraaqiara mwata tera mwia nrutu nteqara Iesusirave qianté.

³² Mwiva nronra tuero nronra vaisima variananrove. Mwianrama Kotiva nai virini nyaamwuni varira mwia mwaaque tivarave. Nronravanto Kotiva Ntevitiva nai haivaqava ntaqikyiani kyaiqara mwia mwianinrave.

³³ I nraaqiaravanto Iaikopura okyaraqaama ekyaa enta ekyaa enta ntaqikyianinrave. Mwiva ntaqikyiani kyaiqava hia taiqaaninrave, tiro.

³⁴ Keviriariva mwitaa tuvaro Mariaava mwia kyapara hiro tiqaro, Nataama kyeroove mwitaa hiananrove? Hia nte qoraisi varauvave, tiro.

³⁵ Mariaava mwitaa tuvaro Kotiva titova timwa mwinro tiqaro, Kotira mwanraquravanto ivata variraro Kotira peqavanto i ntumwaqu taaninrave. E mwata terava Kotira kyaiqa nraahu varaari vaisivä varirata mwianra Kotira mwaaque tivarave, tiro.

³⁶ Mwitaa timwa kyero mwiva tiqaro, I vataava Irisavetiva kyontaqama vivavata mwiva nraaqiara mwataaninrave. Mwi nraakyerara ehaaraqa hivava qiarovo mwiva nraaqiara tuaqa iharo 6 tora nritaraiho.

³⁷ Kotiva ekyaa kyaiqa qio nraahu vare varivama variho, tiro.

³⁸ Kotiva titova mwitaa tuvaro Mariaava tiqaro, Nte Kotira kyaiqa nraahu varaarivama varuquo. Qio e tinantema kyero Kotiva ni mwitaa hiarive, tiro. Mwitaa tuvaro Kotiva titova tumu ntantero vurama.

Mariaava Irisavetira uro timwa mwunra

³⁹ Kotiva tito vaisiva tumu ntantero vuvaro Mariaava qamwanrama kyero siviro Iutiaani mwatukya mpo taaqiqi vahuraqi Irisavetira timwa mwinrenro vurama.

⁴⁰ Vuva uro Sekaraiaara nraamwuqi vera ntero Irisavetira qua mwan-tora.

⁴¹ Qua mwante varuvaro Irisavetira vikyokyaqitairo nraaqiaravanto qakyaas huvaro Kotira mwanraquravanto Irisavetira kepukyqaama kyero kyaahaqa huvaro

⁴² Irisavetira aakyara ntero tiqaro, Airi nraakte variavaro Kotiva i nraahuma kyugema mwataiho. E mwata tena nraaqiararavata Kotiva kyugema mwataarive.

⁴³ I nraaqiara vunyaa vaisi kepukyavanto variqaro niqaa ntaqikyiariva varihara e mwia nrova variqarama e ni qumina nraakte nrumu taqarerera nrianro.

⁴⁴ E vaakya ni qua mwantaarana nte i qua rie varuqaro nraaqiaravanto ni pikyokyaqitairo qakyaas iho.

⁴⁵ Nronravanto mwi mwakyaakyara timwa mwihanra e mwia quara qutaa mwitaa hiananrove qiananranra tiro, Kotiva i kyugema mwataihara qamwateqara variaro, tiro.

Mariaava ihi tiqaro Kotira nrutu tuaaherora

⁴⁶ Irisavetiva mwitaa tuvaro Mariaava Kotira nrutu tuaaheroro tiqaro,

⁴⁷ Nte ntena mwutukyaqitaina Kotira nrutu tuaherauquo. Kotiva ni kyaahaqa hiariva variharora tiro, ni mwanraquravanto qamwateqaro variho.

⁴⁸⁻⁴⁹ Nte Kotira kyaiqa nraakte qumina nraakte varuqaro Kotiva ni nraahu kyugema matairave.

Kotiva kepukyavanto variqaro nronra inraikya ni mwitaama matairara tita, mate varihuavata, nraakiara varihuavata, nianra Kotiva nronraqama kyero mwi nraakyera kyugema mwatairave tivarave. Kotira okyaravanto vahirero

nai avuqavuma kyero vahirave.

⁵⁰ Haaruvata, matevata, qakyovata,
ta nraakye qorahuave, Kotira qua riaahua
mwihua Kotiva po tiro kyuqema nyatairave.

⁵¹ Mwihua nkyiari nyutu tuaahera kyeta ntuaantuama vita
uaqia hi kyaiqara vararerata uti variavaro
Kotiva nai kyauqu kepukyaqo mwihua raaputa
mpona mpona kyairave.

⁵² Kotiva nronra vaisi vara mwatumwi qumina
vaisiqama tero qumina vaisi vara nronraqama taiharo
nronraqama virave.

⁵³ Nraataa hi vaisihua Kotiva kyara nyihata
nreta qio variarave.

Airi inraikya vataira Kotiva titaiharo
hia mpo inraikyavata vararaitiro, qati virave.

⁵⁴⁻⁵⁵ Kotiva nai kyauqu nriqiqa vatero timwa tai quara
vataqiro viqaro tiri Isarerri nraaqiara kyaahaqa hirave.
Mwiva haaru Evarahaamunranra tiqaro,
Nte iaravata, i nraisi mwihuaravata,
ekyaa enta ekyaa enta po tina kyuqemajina virerave,
tu quara hia taunru kyairave, tiro.

⁵⁶ Mariaava mwitaa timwa kyero Irisavetikya variqiro viro taarampo
tora vara kyero nrumu ntantero nai mwaatani vurama.

Irisavetiva Ioninra mwatora

⁵⁷ Irisavetiva nraaqiara mwataari entava nri ntovaro mwiva mwi entara
qoraisi nraaqiara mwata kyora.

⁵⁸ Mwata kyovata mwia nramwunaahuavata, mwi mwatanaahuavata,
riovaro Kotiva Irisavetirara kyuqe huvata mwihua uro Irisavetiravata
variqata nraaqiara mwianra qamwatarerata nrunra.

⁵⁹ Mwihua nri ntovaro 8 enta nritarovaro mwi nraaqiara kora
nraaqiara varuvatara tita, mwia mwamwanta toqarerata ntuaantuama
vita. Ntuvaantuama vita variqata mwihua mwia nrutu nteqata mwia qora
nrutu Sekaraiaavave qiare tuvaro

⁶⁰ mwia nrova qaqqo tiro, Nte mwia nrutu Ionivave tirerave, tiro.

⁶¹ Mwiva mwitaa tuvata mwihua tiqata, Hia i okyaraqi mwi nrutura
vahirama e mwi nrutura ntaaro, tita.

⁶² Mwitaa timwa kyeta mwihua Sekaraiaaraqaa kyauqu piaateqa mwia
kyapara hita, E ena mwaaqu nanra nrutuve mwinanrave? tuvaro

⁶³ Sekaraiaava kyauqu piaateqaro pepaa vara mpiae tuvata pepaa vara
mwuvaro Sekaraiaava mwataama kyero qara ntiro, Mwia nrutu Ionivave,
tiro.

Mwitaama qara ntumwa tovata mwihua nrihanrama vita.

⁶⁴ Nrihanrama vuvaro qamwanrama Sekaraiaara nrovanto qatua vuvaro
mwiva qio qua tiro. Mwiva qio qua tiqaroma Kotira nrutu tuaaherero.

⁶⁵ Mwitaa ti varuvata mwia nramwunaahuha mpoqama kyeta aatu hi
varurama. Mwi quava ekyaa Iutiaani vuvata

⁶⁶ nai timwa mwi nai timwa mwi hita tiqata, Mwi nraaqiara kora
hiari vaisivave variananrove? tita. Mwihua taqovaro Kotiva kyaahaqa hi
varuvaro mwi nraaqiara kora varurama.

Kotira mwanraquravanto mwia kyaahaqa huvaro Sekaraiaava ihi tura

⁶⁷ Kotira mwanraquravanto mwia qora Sekaraiaara kepukyaqama

kyero kyaahaqa huvaro mwiva Kotira qua mwataama tiro:

68 Kotiva nronravanto tiri Isareriqaa ntinqikyi varivave.

Nrivaqe mwia nrutu tuaaheraare.

Mwiva tiri nai nraakye qora kyaahaqa hiro
huvantu kyarero nriho.

69 Kotiva tiri haivaqara Ntevitira nraisi mpo vara
mwaamwianrama taiharo mwi vaisiva kepukyavanto
variqaro tiri huvantu kyairaqe qio variare.

70 Haaru Kotiva kyaahaqa huvata
mwia kyaiqa vaisinramwu mwia qua qovarama kyeta
nraakye qora timwa nyiqata

71 Kotiva mwitaa tiho tura,
Nkyi nramwutaahua nkyi ru kyevorave tinama,
nte nkyi kyaahaqa hirerave.

Nkyi uaqjama nyate varihua nkyiqa ntinqikyiqi vivorave
tinama, nte nkyi huvantu kyarerave turave.

72 Kotiva tiri haivaqahuara tiqaro,
nte nkyiara po timwa nyatena nte nkyivata variqana
qua vataura hia taunru kyarerave, turave.

73-74 Kotiva nai kyauqu nriqiqaa vatero
tiri haivaqara Evarahaamunranra tiqaro,
Nraakiara e mwatara terahua mwihua nramwutaahua
mwihua ru kyevorave tina,
mwihua nte vaitutuma nyataaninrave.
Nte mwihua vaitutuma nyataarita
mwihua hia nramwutaahua nraatu aatu hiraitita,
75 mwihua qati variqi viqata ni puqaa variqata
ni kyaiqa nraahu kyugema kyeta vareqata
avuqavuma kyeta nrohivarave, tiro.

76 Sekaraiaava mwitaa timwa kyero mwiva nai nraaqiarara tiqaro,
Ni maaquo, nraakiara nraakye qoravanto iara tiqata,
Kotiva nyaamwuni variva vaisi mwia kyaahaqa hi variharo
mwiva Kotira qua ti variho tivarave.

Nronravanto nrinrenra hirara e nraante viqara mwia aanra
terama mwatenanrave.

77 Kotiva nraakye qora uaqia hi kyaiqara uti quara nruka
nyatero mwihua huvantu nyataani quara,
e nraante timwa nyinanrave.

78 Kotiva tiriara nronraqama kyero po tigarora tiro, mwiva
ntuvaahaani vaisira titairaro mwiva tire variananrani
tuminro

79 tire quturahua kyokiraqi variananra
ntuvaahama timwa taananrove.

Mwiva tiri tivitairaqtire mwaateraqama kyeta kyugema
variare, tiro.

Sekaraiaava mwitaa turama.

80 Mwitaa tuvaro mwia mwaaquvanto nronra tuemwa vuvaro mwia
mwanraqravantovata kepukyaqama vura. Mwiva qumina mwataqa
variqiro viro vaisiqama viro mwiaqaatairo mwiva Isarerri mwatanaahua
suqaa nri ntora.

2

*Mariaava Iesusira mwatora
(Matiu 1:18-25)*

1 Mwi entara Romeni mwatanaahua vunyaa vaisivanto Sisa Okasitaasiva taakisi vararerera hiro tiqaro, Ekyaa mpo mwatanaaa mpo mwatanaaa nrutu vataate, tiro.

2-3 Mwitaa tuvata ekyaa nraakyе qora nkyiari mwaatani nrutu vatarerata nrumu ntateqata vurama. Sairiniaasiva Siriaa mwataqaa ntaqikyu entara mwihua nrutu vatorama. Nrutu varo okyarara mwi entara tohara kyeta varora.

4-5 Nraakyе qora nkyiari nyutu vatarerata vuvaro Iosepivavata Nasareti-sairo siviro nai tito nraakyera Mariaaravata vita varero Kariri mwata kyero uro Ntevitira mwatukya Vetarahemini Iutaa mwatani nrutu vatarero vurama. Iosepiva nai haivaqara Ntevitira okyaravantora tiro, mwini vurama.

Iosepiva Mariaara vita varero vuvaro Mariaava nraaqiara tuaqama vuva airi tora nraatara kyero mwiva nraaqiara mwataari entava qaumaqa huvaro

6-7 mwiva Iosepikyantiri Vetarahemini uro ntora. Uro nte taqovata airi nraakyе qora nrutu vatarerata nrumu variqatama ekyaa nraamwu piqa kyovaro Mariaava purimakauvanto kyara nro nraamwunraqi variqaro qoraisi nraaqiara mwia nraamwu nraaqiara mwata kyero, mwia qapuqama kyero purimakauvanto kyara nro tanunraqi mwaati mwata tora.

Sipisipiqa ntaqikyu vaisihua uro nraaqiara mwia taqora

8 Mariaava nraaqiara mwata tovata entaqi vaisi mponramwu mwi mwataraqaa mwukyau vahunani variqata mwihua sipisipiqa ntaqikyi varura.

9 Mwiqi varuvaro Kotiva nyaamwunyaa vaisi titova mpovanto qamwan-rama mwihua sugaa qovarama vuvaro Kotira kepukya inraikyavanto nron-raqama kyero iteqaro ntuvaahe varuvata sipisipiqa ntaqikyi varuhua taqeta nronraqama kyeta aatu hi varura.

10 Aatu hi varuvaro Kotiva tito vaisiva mwihua timwa nyinro tiqaro, Hia aatu hiate. Nte nkyi kyuqe mwakyaakya timwa nyinrenrana tumuqo. Mwi mwakyaakya ekyaa nraakyе qora rieta qamwateqatama varivarave.

11 Mate nkyi haivaqara Ntevitira mwatukyaqi nraaqiara mpo mwata taiho. Mwiva nkyi kyaahaqa hiarivave. Mwiva nronravanto Kotiva titai nraaqiaravave.

12 Ni quara quataave tirerata nkye vita uro taqaivarao mwi nraaqiarara mwata kyero qapuqama kyero purimakauvanto kyara nre vari tanunraqi mwaati mwata tairaro vaite varianinrama taqevarave, tiro.

13 Kotiva titova mwitaa tuvata qamwanrama nyaamwunyaa ntaqi varuhua airivanto qovarama vita variqata Kotira nrutu tuaahereta tiqata,

14 Kotiva nai virini varivave.

Tire mwia nrutu tuaahere varuro.

Mwatani Kotiva qamwata nyate vari vaisihua mwaateraqama variate, tita.

15 Mwihua mwitaa timwa kyetama nyaamwuni tumu ntanteta vuvata sipisipiqa ntaqikyu vaisihua nai timwa mwi nai timwa mwi hita tiqata, Nrivaqenramwu Vetarahemini nronravanto qua timwa timwinra uro taqaare, tita.

16 Mwitaa timwa kyeta mwihua hianteta vura.

Nrumu taqovaro Iosepiva Mariaakyantiri varuvaro nraaqiaravanto purimakauvanto kyara nro tanunraqi vaite varura.

¹⁷ Sipisipiqa ntaqikyu vaisihua uro mwia taqeta tiqatama, Kotiva nyaamwunyaa vaisi titaiva mwaa nraaqiarara mwitaa mwitaamama timwa timwiho, tita.

¹⁸ Sipisipiqa ntaqikyu vaisihua mwitaa tuvata mwi quara riohua qikye timwa kyeta airi vu nraato tiqata varura.

¹⁹ Mariaava mwi quara nraatoqi vatero nrohiqarovata mwianra rie varura.

²⁰ Sipisipiqa ntaqikyu vaisihua nrumer ntanteta mwihua nyaamwunyaa vaisivanto tu quarara quataave timwa kyeta, mwihua vaakyta taqeta rieta hurara rieqata Kotira nrutu tuaaheraqi vorama.

Jesusira ntamuwa tora

²¹ Jesusira mwata tovaro 8 enta nritarovaro qoraisi nraaqiara varuvatara tita, mwia mwamwanta toqa kye entava nrintovata mwi entaraqaa mwia nrutu nteqatama, Jesusivave, turama. Haaru qumina enta, Mariaava hia nraaqiara tuaqa hu entara Kotiva nyaamwunyaa vaisi titova mwi nrutura mwiate tura rieqata mwi nrutura ntamuwa tora.

Kotira nraamwuqi vura

²² Mariaava nraaqiara mwata tero Mosesiva mwaanra timwa to quara rieqaroma mpo entanramwu vari kyero mwiva kyotataqama quari entava nri ntovata mwivavata, Iosepivavata, Jesusira vita vareta Kotira mwinrenrata Ierusaremini vorama.

²³ Nronravanto mwaanra tu quara qara ntumwa tova mwitaama tiro: Ekyaa qoraisi nraaqiara nraamwuqama kyera mwata tenanra Kotira mwinranro mwiani variarive.

²⁴ Mwi entara e Kotira nraamwuqi uro ntera nyaamwa taaratana minrunra voti hira mwinranro Kotirani qiaqaa kyairaro itamwa taiqa kyaarive, tura. *(Wok Pris 12:1-8)*

Mariaakya Iosepikya mwi quara rieqatama Ierusaremini vura.

²⁵ Ierusaremini uro varuvaro mwini vaisi mpo Simioniva varura. Mwi vaisiva avuqvavuma kyero nrohiqaro Kotira nrutu tuaahere varuva variqaro mwiva Isarerri mwatanaahuaqa ntaqikyiani vaisirara taqe varura. Taqe varuvaro Kotira mwanraquravanto mwiaavata variqaro

²⁶ vuni mwia timwa mwinro tigaro, E hia qati qutu vinanrave. E nronravanto titaanai vaisira, Mesaiia mwia taqera qutu vinanrave, tura.

²⁷ Kotira mwanraquravanto mwitaa tuvaro Simioniva varuvaro mwi entara Kotira mwanraquravanto mwia vitero Kotira nraamwuqi vuvata Jesusira nrohua qohua nkyiari mwaanra qua rieqatama Jesusira vita vareta Kotira nraamwuqi vuvu

²⁸ Simioniva nraaqiara mwia taqero mwia kyavuhu kye tutero Kotira nrutu tuaaherero tigaro,

²⁹ Nronrao, e haaru turava mate quataama qovarama viho. E qiomia ni ena kyaiqa vaisi titairaro ni mutukyaqitairo kyuqe hiraqe quankye.

³⁰⁻³¹ Ekyaa mpo mwatanaa mpo mwatanaahua taqaate tira, e tiri kyaahaqa hianinra mwia titaarana nte mate ntene puqotaina mwia taqauqo.

³² Mwiva omwa votima kyero itamwaqiro vi varirata nkyiariara qumina mpo mwatanaa mpo mwatanaahua i okyara ntapihi kyeta taqevarave. Mwi vaisiva i nraakte qora Isarerri kyaahaqa hiraro mwihua nrutuvanto nronraqa hiarive, tiro.

³³ Simioniva mwitaa tuvata Iesusira nrohua qohua airi nraato tita tiqata, Qikye, nanra quave mwiva Iesusirara tiho? tuvaro

³⁴ Simioniva Kotirara aakyara ntero tiqaro, E mwitanahuavata mwihua nraaqiara mwivavata kyuqema nyataante, tiro. Timwa kyero mwiva mwia nronra Mariaara timwa mwinro tiqaro, Riaante. Kotiva titai nraaqiarava mwaava varirata Isarerai vaisi mpo nramwuvanto mwiaqatai tumu ntita uaqlama vi varivata mponramwuvanto mwia qamwata mwateta mwihua sivita kyuqema varivarave.

Kotiva nai okyara nraakye qoravanto taqaate tiro, nraaqiara mwia titava varirata nraakye qora airvanto mwia qoririma mwatevarare.

³⁵ Nraakye qora airvanto vu nraato tutera mwiva qovarama kyaananrove.

E variraro nraamwunruqa taari inraikyava paipa voti hiariva i mwutukya ruananrove, tiro.

³⁶ Simioniva Mariaarara mwitaa tuvaro poropeti nraakye Kotira qua qovarama kyeqaro timwa nyi varu nraakyeva Anaavavata varura. Mwia qova Panueriva Asara okyaravanto varura. Anaava qoraisi varatero 7 ihi vara kyovaro

³⁷ mwia vaativanto qutu vuvaro mwiva mwiaqatairo tetooqama kyero variqiro viro kyontaqama viro airi ihi 84 ihi vara kyero, mwiva mpo enta mpo enta Kotira nraamwuqi uro nteqaro entaqivata, iheravata, Kotira nrutu tuaahereqaro kyara aurama tero Kotirara aakyara ntamwaqiro vi varura.

³⁸ Mwitaa huvara tiro, mwi entara Anaava Kotira nraamwuqi vera ntero Iesusira taqero nraaqiara mwianra rieqaro Kotirara kyuqeve tura. Mwitaa tuvata mpo uhua mwini varita Kotiva mwihua kaahaqa hirata Ierusaremipi kyuqema varirara vekya varura. Mwi nraakye qorahua varuvaro Anaava Iesusira okyarara mpo qua mpo qua mwihua timwa nyunra.

Nasaretini tumu ntanteta vura

³⁹ Anaava mwitaa tuvata Iosepikya Mariaakya nronravanto mwaanra qua tura rieqata ekyaa mwi kyaiqara vara taiqa kyeta, mwitanhua nraaqiara mwivavata viteta tumu ntanteta nkyiari mwaata Kariri mwata Nasaretini vurama.

⁴⁰ Mwini varuvaro nraaqiara mwiva nronra tuero kepukyaqama viro varuvaro mwia vu nraatovanto kyuqema vahuvaro Kotira kyuqe huva mwivavata vahura.

Iesusiva 12 ihi vara kyero Kotira nraamwuqi vura

⁴¹ Iesusira nrohua qohua mpo ihi mpo ihiqi Ierusaremimi uro variqata vekyahu nyato entaraqaa kyara nreta tumu ntanteqata nkyiari mwaatani vivi hurama.

⁴² Iesusiva 12 ihi vara kyovaro vekyahu nyato kyarara nre entava nri ntovata Mariaakya Iosepikya Jesusiravata viteta nauqaa hunte Ierusaremimi mwi kyarara nranrenrata vurama.

⁴³ Uro mwini mpo entanramwu variqata mwi kyarara nramwa kyeta tiqata, Kyai teta mwaatani tumu ntante quare, timwa kyeta vuvaro Iesusiva nraahu Ierusaremimi varuvata mwia nrohua qohua hia mwianra riaraitita vita.

⁴⁴ Mwitanhua tiqata, Mwiva vaakyama mpo hiahua kyapata viho, timwa kyeta aanraqaa kuaa enta uro vaiteta tiqata, Kyaiqe mwia puaama

kyeta taqaare, timwa kyeta nkyiari nramwunaahuaqi puaama kyeta taqovaro

⁴⁵ hia mwihua utaqi huvata Mariaakya Iosepikya nrumu ntanteta Ierusaremini mwianra puaa hirerata vurama.

⁴⁶ Ierusaremini nrumu ntanteta uro taarampo enta mwianra puaamaqi vita taqovaro mwiva nraamwu nronra Kotira nraamwuqi variqaro nronra vaisi Iutaa mwaanra okyara timwa nyi varu vaisihuua utaqaa mwatakyaa viro variqaro vaisi nronra mwihua qua rieqaro mwihua kyapara hi varura.

⁴⁷ Iesusiva nronra vaisinramwu utaqaa mwatakyaa viro varuvata nronra vaisinramwu qua tuvaro Iesusiva mwihua qua rieqaro mwiva nkyiari timwa nyuvata mwihua tiqata, Qikye, nronra tuaahua qiantema kyero mwaa nraaqiarava qua ti variho, tita.

⁴⁸ Mwihua mwitaa ti varuvata mwia nrohua qohua nri nteta taqovaro Iesusiva vaisi nronranramwu utaqaa mwatakyaa viro varuvata mwitanhua tiqata, Qikye, mwiva vaisi nronra utaqaa variqaroma qua ti variho, timwa kyeta mwia nrova tiqaro, Ni maaquo, nanraqamave tiritana mwitaama timwa taaro? Tiretana i nrohua qohua iara nronra vu nraato titi i puaa hirerata nrunro, tiro.

⁴⁹ Mwia nrova mwitaa tuvaro Iesusiva qaqao tiro, Nkyetana nanraqamave nianra puaa hi variavo? Nkyetana hiave ntapihiavo? Nte ntena kora kyaiqa vare variarivama varuquo, tiro.

⁵⁰ Iesusiva mwitaa tuvata mwitanhua hia mwi quara okyara ntapihura.

⁵¹ Hia ntapihuvaro Iesusiva mwiaqaatairo siviro nai nrohua qohua vatama kyero nrumu ntantero Nasaretini uro variqaro mwitanhua qua riemwaqiro viqaro hia mwitanhua qua raaqiraitiro varura. Mwia nrova Iesusiva tu qua qianinra nai nraatoqi vatero nrohiqaro riemwaqiro vura.

⁵² Iesusiva nronra tuemwa vuvaro mwia vu nraatovanto ntapihi vuvaro kyuqe vu nraato vahuvaro Kotira mwutukyavantovata nraakyey qora mwutukyavantovata mwianra vahurama.

3

*Ioniva nraakyey qora mwakyaakya timwa nyunra
(Matiu 3:1-12; Maaki 1:2-8; Ioni 1:19-28)*

¹ Romeni mwatanahua vunyaa vaisi Taiperiaasi Sisaava ntaqikyiqi viqaroma 15 ihi vara kyovaro mwi entara Pontiaasi Paireatiya kirapava vunyavaa Iutia mwataqaa ntaqikyi varuvaro Herotiva Kariri mwataqaa ntaqikyi varuvaro Herotira qatavanto Piripiva Ituriaa mwataqaavata Terekonaitisi mwataqaavata ntaqikyi varuvaro Raiseniaasiva Apirini mwataqaa ntaqikyi varura.

² Mwitaa huvaro Anaasivavata Kaiapaasivavata nronraqama vita Kotira nraamwuqi variqata Kotira kyaiqa vare varu vaisihuuaqaa ntaqikyi varura. Mwi entara Sekaraiaara mwaqaq Ioniva qumina mwata, hia vaisivanto varunani varuvaro Kotiva mwianra ni qua timwa nyante tuvaro

³ Kotiva tuntema kyero Ioniva Iotaani nramanrivanto tumunani viro nrinro hiqaro qua mwakyaakya nraakyey qora timwa nyinro tiqaro, Uaqia hi aanranra qaqla kyeta nramanri varaivaro Kotiva nkye uaqia hi inraikyara utua quara nruka nyataarive, tiro. Ioniva mwitaa ti varura.

⁴ Haaru qumina vakya Kotiva kyaahaqa huvaro poropeti vaisi Aisaiaava mwitaama tiro:

Mpovanto qumina mwatani variqaro aakyara ntero tiqaro,
Nronravanto quaninra aanra terama mwateta
mwia aanra ntapihi mwataivaro

mwiva mwivauma qio quarive.

⁵ Nkye nrunro aakuntu vahianinraqi quvu ntahirama kye, taaqi nronrave, taaqi patave, nkye mwia teqa kyaivaro aanravanto ntapihi vahiarive.

Aanra vi nteqe nri nteqe hianinra teqa kyaivaro kuaavau ntapihi kyero vahiarive.

Aanra uaqia hiro ori uvi auquqa hiariva vahianinra teqa kyeta kyuqema taivaro vahiarive.

⁶ Ekyaa mwata maata vahintema varihua Kotiva mwitaama kyero nraakyе qora huvantu nyat ero sitaaninra mwia okyara taqeverarave, tura. *(Aisaiaa 40:3-5)*

Asajaava haaru qumina vakya mwi quara tuvaro Ioniva nri ntero qutaa mwii quara turama.

⁷ Ioniva mwitaa ti varuvata nraakyе qora airivanto nramanri vararerata nruvaro Ioniva mwihua timwa nyinro tiqaro, Nkye quaiha uaqia hira nraaqiarama variavo. Kotira raraqa taiharo nraakyе qora rirero uti varihua. Tava nkysiara tiqaro, Nkyivata ruarivaarave. Hiante aatu quate, tihatave nkye mwaini nte hunani nriavo?

⁸ Nkye qutaaqama kyeta uaqia hi kyaiqara qaqlira kyaivera, nkye mpo kyuqe kyaiqa nraahu varaivage taqaare. Nkye nkyeta tiqata, Evarahaamuvu tiri haivaqavave, tiri tiqvave, varurara titi, tire mwia nraaqiavanto variqata tire qio varuro, tivorave. Kotiva mwitaa hiataa hiraro mwiva qiomma nkyi qaqlira kyero ori mwaahua tuqasaa kyairata vaisi varita Evarahaamunra nraaqiara varivarave.

⁹ Kotiva kyatari tucirero kyaari kyatari okyaraqi terama taiho. Hia tamwa kyuerera riaaninra teqa kyero qiaqi kyairaro itamwa kyaananrove, tiro.

¹⁰ Ioniva mwitaa tuvata mwihua mwia kyapara hita tiqata, Qikye, mwi quara rieta tire nataave hiananrave?

¹¹ tuvaro mwiva mwihua timwa nyinro tiqaro, Vaisi mpovanto sioti taaratana vaterava hia vataaninravata mpoku mwiante. Kyara vaterava hia vataaninravata ntainra kyera mwiante, tiro.

¹² Mwitaa tuvata taakisi vare varuhua nramanri vararerata nruhua mwia kyapara hita tiqata, Mwaanra ti variarao, mpo tire? Nataave hiananrave?

¹³ tuvaro Ioniva mwihua timwa nyinro tiqaro, Nkye taakisi vareqata kirapara qua rieqata ntapihi kyeta taakisi varaate. Hia nkyeta riemwa kyeta mpooqivata varaate, tiro.

¹⁴ Ioniva mwitaa tuvata qaami vaisivanto mwia kyapara hita tiqata, Mpo tire? Tire nataave hiananrave? tuvaro Ioniva mwihua timwa nyinro tiqaro, Hia uro mporara i ntuqutu kyaarorave munima timwiante qiate. Hia unra timwa kyeta mporaqaa qua vataate. Nkye qaami kyaiqa vareqata munima varera mwianra qiove qiate, tiro.

¹⁵ Ioniva mwitaa tuvata nraakyе qora mwihua Kotiva titaani vaisira Mesaiaa mwia vekyaqa hiqata varuhuara titi, mwihua nkyiari rieta tiqata, Mwaa vaisivave Mesaiaavanto tiri kyaahaqa hiariva variananrove? titi.

¹⁶ Mwihua mwitaa ti varuvoro Ioniva riero mwihua nkyiari timwa nyinro tiqaro, Nte qumina nramanri nkyi nyi varuqo. Nronravanto ni nraataraariva ni naakiara nri variho. Nte qumina vaisivantora tina, nte mwiva kyuqu nraamwu rupa tai kyaantara hiama qio huvantu mwataaninrave. Nkye nramanri varaantema kyero mwiva Kotira mwanraquravata, quavata, nkyi nyiananrove.

¹⁷ Mwiva nai kyavoi kyauquqi tu varero kyakuma voti hira ntitatama kyero nronra mwia vaqitaqiro uro nai kyara nraamwuqi vatero kyapivata

mwanrevata vaqitaqiro uro hia qipa quani qiaraqi tuto kyairaro itamwa kyaananrove, tiro.

¹⁸ Mwitaa timwa kyero nraakye qoravanto ntapihi kyeta mwia qua riaate tiro, Ioniva mpo qua mpo qua mwihiua timwa nyinro. Iesusiva nriani quara kyuqe qua mwihiua timwa nyunra.

Herotiva Ioninra karavuqi kyora

¹⁹ Herotiva Kariri mwataqaa ntaqikyi varuvaro Ioniva Herotira inronra hiro tiqaro, Herotiva hia nai qata nraata Herotinamainra varaataarave. Mwiva mwi kyaiqaravata uaqia hi kyaiqara kyaatavata uti varivave, tiro.

²⁰ Ioniva mwitaa tuvaro Herotiva mwia kyaara Ioninra karavuqi kyora. Mwitaa hiqaro Herotiva uaqia hi kyaiqara mpoqiaavata utura.

Ioniva Jesusira nramanri mwunra

(Matiu 3:13-17; Maaki 1:9-11)

²¹ Ioniva nramanri nyi varu entara mwiva Iesusiravata nramanri mwunra. Iesusiva nramanri varero Kotirara aakyara nte varuvaro nyaamwuvanto qatua vuvaro

²² Kotira mwanraqravamoto nyaamwusairo nyaamwa minrunra votihuva tuminro Iesusiraqaa tumu vahuvaro quavanto nyaamwusairo mwitaama tiro:

E ni maaqvanto variaro.

Ni mutukyavanto iara vaiho.

Nte iara qamwateqana varuquo, tiro. Tura.

Iesusira haivaqahua nyutu

(Matiu 1:1-17)

²³ Iesusiva 30 ihi vara kyero mwiaqaatairo nai kyaiqa toharama kyero varaqiro vuvata nraakye qoravanto mwianra Iosepira mwaaquve tura.

Iosepiva Hiraira mwaaquvanto varuvaro

²⁴ Hiraiva Mataatira mwaaquvanto varuvaro

Mataativa Rivaira mwaaquvanto varuvaro

Rivava Merakaira mwaaquvanto varuvaro

Merakaiva Ianainra mwaaquvanto varuvaro

Ianaiva Iosepira mwaaquvanto varuvaro

²⁵ Iosepiva Matataiaasira mwaaquvanto varuvaro

Matataiaasiva Emosira mwaaquvanto varuvaro

Emosiva Neaminra mwaaquvanto varuvaro

Neamiva Esaraira mwaaquvanto varuvaro

Esaraiva Nakaira mwaaquvanto varuvaro

²⁶ Nakaiva Meatira mwaaquvanto varuvaro

Meativa Matataiaasira mwaaquvanto varuvaro

Matataitaasiva Semeninra mwaaquvanto varuvaro

Semeniva Iosekira mwaaquvanto varuvaro

Iosekiva Iotaara mwaaquvanto varuvaro

²⁷ Iotaava Ioanaaninra mwaaquvanto varuvaro

Ioanaaniva Resaara mwaaquvanto varuvaro

Resava Serapaperira mwaaquvanto varuvaro

Serapaperira Siaritierira mwaaquvanto varuvaro

Siaritieriva Neraira mwaaquvanto varuvaro

²⁸ Neraiva Merakaira mwaaquvanto varuvaro

Merakaiva Etaira mwaaquvanto varuvaro

Etaiva Kosaaminra mwaaquvanto varuvaro

Kosaamiva Erametaaminra mwaaqvanto varuvaro
 Erametaamiva Eaara mwaaqvanto varuvaro
29 Eaava Iosuaara mwaaqvanto varuvaro
 Iosuaava Eriesaara mwaaqvanto varuvaro
 Eriesaava Ioriminra mwaaqvanto varuvaro
 Iorimiva Mataatira mwaaqvanto varuvaro
 Mataatativa Rivaira mwaaqvanto varuvaro
30 Rivaiava Simioninra mwaaqvanto varuvaro
 Simioniva Iutaara mwaaqvanto varuvaro
 Iutaava Iosepira mwaaqvanto varuvaro
 Iosepiva Ionaaminra mwaaqvanto varuvaro
 Ionaamiva Eraikiminra mwaaqvanto varuvaro
31 Eraiakimiva Meriaara mwaaqvanto varuvaro
 Meriaava Menaanra mwaaqvanto varuvaro
 Menaava Matataara mwaaqvanto varuvaro
 Matataava Netaaninra mwaaqvanto varuvaro
 Netaaniva Ntevitira mwaaqvanto varuvaro
32 Ntevitiva Iesira mwaaqvanto varuvaro
 Iesiva Ompetira mwaaqvanto varuvaro
 Ompetiva Mpoaasira mwaaqvanto varuvaro
 Mpoaasiva Saramoninra mwaaqvanto varuvaro
 Saramoniva Nasoninra mwaaqvanto varuvaro
33 Nasoniva Aminantaapira mwaaqvanto varuvaro
 Aminantaapiva Atimininra mwaaqvanto varuvaro
 Atiminiva Anainra mwaaqvanto varuvaro
 Anaiva Hesaroninra mwaaqvanto varuvaro
 Hesaroniva Peresira mwaaqvanto varuvaro
 Peresiva Iutaara mwaaqvanto varuvaro
34 Iutaava Iaikopura mwaaqvanto varuvaro
 Iaikopuva Aisaakira mwaaqvanto varuvaro
 Aisaakiva Evarahaamunra mwaaqvanto varuvaro
 Evarahaamuva Teraara mwaaqvanto varuvaro
 Teraava Nehora mwaaqvanto varuvaro
35 Nehova Seraakira mwaaqvanto varuvaro
 Seraakiva Riura mwaaqvanto varuvaro
 Riuba Perekira mwaaqvanto varuvaro
 Perekiva Ipaara mwaaqvanto varuvaro
 Ipaava Siraara mwaaqvanto varuvaro
36 Siraava Kenaaninra mwaaqvanto varuvaro
 Kenaaniva Apaakisatira mwaaqvanto varuvaro
 Apaakisativa Seminra mwaaqvanto varuvaro
 Semiva Noaanra mwaaqvanto varuvaro
 Noaava Remekira mwaaqvanto varuvaro
37 Remekiva Metusaraara mwaaqvanto varuvaro
 Metusaraava Inokura mwaaqvanto varuvaro
 Inokuva Ieretira mwaaqvanto varuvaro
 Ieretiva Mahararira mwaaqvanto varuvaro
 Maharariva Kenaaninra mwaaqvanto varuvaro
 Kenaaniva Inosira mwaaqvanto varuvaro
38 Inosiva Setira mwaaqvanto varuvaro
 Setiva Ataamunra mwaaqvanto varuvaro
 Ataamuva Kotira mwaaqvanto varura.

4

*Saataaniva Iesusira mwataara hura
(Matiu 4:1-11; Maaki 1:12-13)*

¹ (Ioniva Iesusira nramanri mwi kyovaro mwiaqaatairo) Kotira mwanaraquravanto Iesusiragi piqa kyovaro Iotaani nramanri kyero nrnumu ntantero vuvaro Kotira mwanaraquravanto mwia vitero hia vaisivata varura qumina mwataaqaa uro kyora.

² Uro kyovaro Iesusiva 40 enta mwini varuvaro Saataaniva Iesusiva mwia quara eo tiro mwia vataqiro quarive tiro, Iesusira mwataara hura. Iesusiva mwii entara variqiro viqaro hia kyara nrovaro nraataa huvaro varura.

³ Iesusira nraataa huvaro varuvaro Saataaniva nri ntero tiqaro, E quataa Kotira mwaaquvanto varirera, ori mwaahuara tirata mpereti tuemwa vivara nraante, tiro.

⁴ Tuvaro Iesusiva nai timwa mwinro tiqaro, Qaqao, Kotira mpukuqi qara ntumwa tova mwitaama tiho:

Vaisivanto hiama kyara nraahu nramwaqiro viqaro
qati variqiro quananrove, turave, tiro. *(Lo 8:3)*

⁵ Iesusiva mwitaa tuvaro Saataaniva mwia vitaqiro uro veraraqaa vatero qamwanrama kyero vaisivanto ekyaa mwata maataqa ntaqikyi varura, ekyaa mwi mwataara mwia nraamwutero tiqaro,

⁶ Mwaa inraikyara ekyaa ni mpiharo nini nraahuma vaiho. Nte mwaa inraikyara vaisi mpo mwitaa hiraqe qioma mwianinrave. Nte qioma mwaa inraikyara i mwianrinro i nrutuvanto nronraqama virara e mwi inraikyaraqaa ntaqikyiqira vinanrave.

⁷ E ni nutu nraahu tuaahera matairera, nte qioma ekyaa mwaa inraikyara i mwianinrave, tiro.

⁸ Mwitaa tuvaro Iesusiva nai timwa mwinro tiqaro, Qaqao, Kotira mpukuqi qara ntumwa tova mwitaama tiho:

Kotiva nronravanto varirara tira,
e mwia kyaiqa nraahu vara mwatera
mwia nrutu nraahu tuaaheraante, turave, tiro. *(Lo 6:13)*

⁹ Mwitaa tuvaro Saataaniva mwia vita varero Ierusaremini vuva uro Kotira nraamwu qitaaqaa nai nyaamwuni vahuraqa kyero tiqaro, E quataa Kotira mwaaquvanto varirera, mwaaqaataira kyavuhu vira mwatasata mpuamu ntaante.

¹⁰ Kotira mpukuqi qara ntumwa tova mwitaama tiho:
Kotiva tirata nyaamwunyaahua iqaa kyuqema
ntaqikyivarave, turave.

¹¹ Qaiqaavata tiqaro,
E ena kyuqu oriqa ntuteqa kyerorave tita,
nyaamwunyaahua nkyiari kyauquqotaita i tu vareta
vivarave, turave, tiro. *(Ihi 91:11-12)*

¹² Saataaniva mwitaa tuvaro Iesusiva nai timwa mwinro tiqaro,
Qaqao, Kotira mpukuqi vahi quava tiqaro,
Nronra Kotiva i mwaniqavamoto varirara tira, e hia mwia
mwataara hiante, turave, tiro. *(Lo 6:16)*

¹³ Mwitaa tuvaro Saataaniva Iesusira qumina mwataara hi taqero, kyai
qaiqaa mpo enta mwia mwataara hiankye timwa kyero, Iesusira qaqlira
mwini kyero vrurama.

*Iesusiva Karirini nai kyaiqa toharora
(Matiu 4:12-17; Maaki 1:14-15)*

14 Saataaniva vuvaro Kotira mwanraquravanto Iesusira kepukya mwu-varo mwiva nrumu ntantero Karirini uro varura. Mwini uro varu quara ekyaa mwi mwataraqaa varu nraakye qorahua riemwa ntora.

15 Iesusiva mwihua mwaanra nraamwu mpoqi mpoqi vera ntero variqaro qua timwa nyi varuvata nraakye qoravanto mwia nrutu tuaa-hereta mwia qamwata mwatora.

*Nasaretinyaahua mwia qorrima mwatora
(Matiu 13:53-58; Maaki 6:1-6)*

16 Iesusiva Karirini uro nrohiqaro nai tauraa nraaqiarakyaa varu mwatukyara Nasaretini uro ntero mwaanra tu entaraqaa mwaanra nraamwuqi nauqaa huntema kyero mwipi viro. Mwipi variqaro mwiva Kotira mpuku kyaara ntirero sivuvaro

17 Aisaiaava qara ntumwa to mpukura mwuvaro Iesusiva mpuku ququrama tora huvantu kyero mwaa quara qara ntumwa tora puaama kyero kyaara ntiro tiqaro,

18 Nte kyuqe mwakyaakya vehi nraakye qora
timwa nyinrenra hugaro nronravanto ni qiataqaa
vahamwenra qu mateqaro ni nronraqama kyero
mwaa mwi vaisivave timwa kyero ni mwatama taihana
nruqanro mwia mwanraquravanto nivata variqaro
ni kyaahaqa hi variho.

Mwiva ni ttero mwitaama nraakye qora timwa nyiante turave.

Rupataa nraakye qorahua qioma qati vivarave, qianta.
Vu qipa vihua vu ntapairi kyeta taqaate, qianta.
Uaqiama nyataavata muaanraqi variahua
qioma qati vivarave, qianta.

19 Nronravanto nraakye qora kyaahaqa hiqaro
qamwata nyataari entava nri ntaaninra
mwianra nraakye qora timwa nyiante.

Mwitaama kyera timwa nyiante, turave, tiro.

(Aisaiaa 61:1-2)

20 Aisaiaava qara ntumwa to quara Iesusiva kyaara ntumwa kyero mwiaqaatairo mpuku ququrama kyero vaisi viti mwinro uro mwatakyaa viro. Iesusiva mwatakyaa viro varuvata mwaanra nraamwuqi varuhua mwia nraahu taqe varuvaro

21 Iesusiva mwihua timwa nyinro tiqaro, Vaakya kyaara ntuqata riaa quava mate qutaa mwivama vaiho, tiro.

22 Iesusiva mwitaa tuyata mwihua mwianra tiqata, Iesusiva vaisi kyuqvave. Qikye, mwia nroqitairo kyuqe qua nriho, tita. Mwitaa timwa kyetavata qaiqaa mwianra tita, Qaqao, mwiva Iosepira mwaqvantoma variho, tita.

23 Mwihua mwitaa tuvaro Iesusiva mwihuara tiqaro, Nraakye qora mpo quaqaa ntumwa kyeqata qia quaraitaita nkye nanra quave nianra tivarave? Mwihua mpo qua tiqata, E totaavanto hirera, enavanto ena mwamwanta kyaahaqa hiante, qia quarave nianra tivarave? Nkye qaiqaa mwaa quarave nianra tivarave? Kapenaamini variqara nronra kyaiqa varaaro qiaavata riaunana e mwaaqi ena mwatukyaqvata variqara mwi kyaiqara varaanteve, tivarave. Nkye nianra mwitaave tivarave? tiro.

24 Mwitaa timwa kyero Iesusiva mwihua timwa nyinro tiqaro, Poropeti vaisivanto nai mwaatani varirata mwia nramwunaahua hia mwia qua rievarave.

25 Riaivage nte nkyi timwa nyiankye. Haaru nkyi haivaqava Iraisaava qati varu entara mwaini Isareri mwatani huari nronraqama kyero

itamwaqiro vuvaro taarampo ihi 6 torara hia vati ntuvuvaro hia mwi mwataraqaa kyaravata vahuvata mwi entara tetoqa nraakyehua airinramwantu varurave.

²⁶ Mwihua varuvaro Kotiva hia Iraisaara mwi nraakyehua varunani titaraitiro, mwiva Iraisaara titovaro mwiva mpo mwatanaa nraakyehua tetqvanto Sarepaati mwatukya Saitoni mwaatani varura kyaahaqa hirero vurave.

²⁷ Haaru nkyi haivaqava mpo, Iraisaava poropeti vaisivanto varu entara Isareri mwatani vaisi airinramwu rumpuaravanto mwamwanta nramwaqiro vuhua varuvaro Iraisaava hia mwihuaqitairo vaisi mpo kyaahaqa hiraitiro, mwiva mpo mwatanaa vaisi, Neamaaninra nraahu Siriaa mwatanyaanra, kyaahaqa huvaro mwia rumpuaravanto tavanta vurave, tiro.

²⁸ Iesusiva mwitaa tuvata mwaanra nraamwuqi varuhua mwi quara riovoro mwihua raraqa tovata

²⁹ sivita Iesusira ntavaaqavu kyora. Nasareti mwatukya mwiva taaqiqaa vahuvatara tita, mwihua mwia ntanrauqita uro okaiqi tuto kyarera huvaro

³⁰ Iesusiva nraakyehua qora uta mwiaqaa vitarero qati vivura.

Vaanavanto utaqi varu vaisira qua (Maaki 1:21-28)

³¹ Iesusiva vuva Karirini vau mwatukyara Kapenaamini uto ntero mwini variqaro mwaanraqaa nraakyehua qora qua mwakyaakya timwa nyi varuvata mwihua Iesusira qua rieta

³² qikye tita, Mwiva nronra vaisi votima kyero kepuuya qua timwa timwi variho, tita.

³³ Mwitaa ti varuvaro vaana uaquia hu inraikyaya mwia utaqi varu vaisiva paatiro aakyara ntamwa kyero tiqaro,

³⁴ Iesusio, e Nasaretinyaavave. E tiri nataa hirerarave nrianro? E tiri uaqiamma timwa tarerarave nrianro? Nte i ntapihi kyauquo. Kotiva i titaihara e Kotira kyaiqa nraahu vare variarave, tiro.

³⁵ Mwitaa tuvaro Iesusiva vaana mwia inronra hiro tiqaro, Tirema variante. Mwi vaisiraqtaira nritarera quante, tiro.

Mwitaa tuvaro vaana mwiva nraakyehua qora suqaa mwi vaisira vara kyero tuto kyovaro mwiva mwatasata tumu ntuvuvaro vaana mwiva hia vaisi mwia riraitiro, mwiaqitairo nritarero qatinani viro.

³⁶ Vaanavanto nritarero qatinani vuvata mwipi varuhua nrihanrama vita kyauqu ntukikinraaqa tetu nai timwa mwi nai timwa mwi hita tiqata, Mwiva nataama kyero mwitaa tiharove nritaraiho? Mwiva nronra vaisi votima kyero kepuuya qua ti varihata vaanavanto mwia qua rieta mwihua nritareta vi variarave, tita.

³⁷ Mwihua mwitaa timwaqita vita nrira huvata ekya mwi mwatarava vara ututu varuhua mwi quara riemwa ntora.

Pitaara nrinraatarara kyaahaqama kyora (Matiu 8:14-15; Maaki 1:29-31)

³⁸ Iesusiva mwaanra nraamwuqitairo veva ntero Saimoninra nraamwuqi uro varuvaro Saimoninra nrinraatarara nriqa vuvaro mwia mwamwanta qiera utovaro varuvata mwihua uro Iesusirara mwia kyaahaqa hiante tuvaro

³⁹ Iesusiva uro nraakyehua mwia nraaqani siviro variqaro nriqa vu inraikyara mwia titovaro mwiva taiqa vuvaro nraakyehua mwiva siviro qamwanrama kyero kyara mwihua nyuñra.

*Iesusiva nriqavu nraakye qorahua airi kyuqema nyatora
(Matiu 8:16-17; Maaki 1:32-34)*

⁴⁰ Mwitaa huvaro huarivanto mpuani qio vi varuvata mwi mwatanaahua nkyiari nrwmwunaahua mpo qara mpo qarama kyero nriqa vuhua sita vareta Iesusiva varunani uro kyovaro mwiva nai kyaquq kuaa kuaa mwihuaqaa vatovata ekyaa mwihua kyuqema vura.

⁴¹ Vaanavantovata airi nraakye qora utaqitaita nritare viqata aakyara nteta tiqata, E Kotira mwaaquvanto variaro, tita. Mwihua mwitaa tiqata Iesusiva Mesaiaavanto varura mwia okyara ntapihi kyovarora tiro, Iesu-siva mwihua inronra hiro tiqaro, Tirema variate, tiro. Tura.

*Iesusiva Iutaa mwatanaahua qua mwakyaakya timwa nyunra
(Maaki 1:35-39)*

⁴² Mwia qanranraa qaata tovaro Iesusiva mwi mwatukyara kyero qumina mwatani vuyata nraakye qoravanto mwia puua hirera vuhua uro mwia puaama kyeta Iesusiva hia mponani quarive tita mwia antuovaro

⁴³ Iesusiva qaqao tiro, Nte Kotiva ntakikyiani mwakyaakya kyuqera mpo mwatukya mpo mwatukya nrohiqana timwa nyinrenrave. Kotiva mwi kyaiqarara ni titaihana nte tumuvave, tiro.

⁴⁴ Mwitaa timwa kyero Iesusiva vuva uro Iutiaani nrohiqaro mwaanra nraamwu mpoqi mpoqi uro variqaro mwakyaakya timwa nyi varura.

5

*Iesusiva tuvaro Saimoni Pitaava tavukya airi varora
(Matiu 4:18-22; Maaki 1:16-20)*

¹ Mpo enta Iesusiva Kenesareti rumpua tokyasataa siviro varuvata nraakye qora airivanto Kotira qua riarerata nai rataaqi nai rataaqi hi varuvaro

² Iesusiva taqovaro mpotu taaratana nramanriqitai ventaqi nrumu tokyani vatova vahura. Tavukya kyaiqa vare varuhua mpotu mwia mwini kyeta vahe haqirarerata vuvaro mpotuvanto mwini vahuvaro

³ Iesusiva vuva uro Saimoninra mputuqi mwaanri ntero variro Saimon-inranra tiqaro, Venta kyairaro pataqia nramanriqi uromwi vahiarive, tiro. Mwitaa tuvaro venta kyovaro Iesusiva mputuqi mwatakya viro variqaro nraakye qora mwakyaakya timwa nyinro.

⁴ Iesusiva mwakyaakya timwa nyi taiqa kyero mwiva Saimoninranra tiqaro, Nkyenramwu mputu ventaqita rumpua utani uro kyetama vahe ntamwa kyetama tavukya varaate, tiro.

⁵ Mwitaa tuvaro Saimoniva qaqao tiro, Nronrao, tirenramwu entaqi qumina kepuqyaqama kye kyaiqa utuqi vita hia tavukya mpokuvata varauunanrave. Qio e mwitaa qiarata tire vahe vara kyeta tuto kyarerave, tiro.

⁶ Saimoniva mwitaa timwa kyero mwivavata mpo uhuavata vahe nramanriqi kyovaro tavukya airivanto vaheqi vijetovaro muaanra ntovaro vahevanto ntupema virera utuvata

⁷ mwihua nkyiari henahua mputu mpoqi varuhuara kyaqukyaakyaamwu huvata nrumu mwihua kyaahaqa hita tavukya mwia pati mwaanri mputu taara mwitana piqa kyovaro mpututana muaanra nteqaro nramanriqi vi quaqara hi varura.

⁸ Saimoni Pitaava taqovaro mwitaama yahuvaro mwiva uro Iesusira vuqaa tumu ntiro tiqaro, Nronrao, nte uaqia hi kyaiqara uti varuvave. E ni kyera quante, tiro.

9 Mwitaa timwa kyero mwivavata mwiavata varuhua tavukya airi varo-rara rieqata airi nraato ti varura.

10 Sepetira mwaaqutana Iemisikya Ionikya Saimoninravata kuaa kyaiga mwia vare varutana tavukya airi varora mwianra kyauqu ntukikinraaqta teta airi nraato ti varura. Mwitaa huvaro Iesusiva Saimoninra timwa mwinro tiqaro, Hia atuu hiante. Mate mwaa iheraraqaataira e tavukya varaarantema kyera nraakye qoravata sitenanrave, tiro.

11 Iesusiva mwitaa tuvata mwihua mpotu ntanrauqita uro nramanri tokyani vateta ekyaa inraikya qaqlira kyeta Iesusira vataqita vura.

*Iesusiva tauma rumpuaravanto uaqama kyo vaisira kyuqema kyora
(Matiu 8:1-4; Maaki 1:40-45)*

12 Mpo enta Iesusiva mwatukya mpoqi uro varuvaro tauma rumpuaravanto uaqama kyo vaisiva mwini varuva Iesusira taqero uro mwia vuqa tumu ntiro nai viri mpiami mwataqiqi vatero po tiro tiqaro, Nronrao, e ni kyaahaqa hiataa hirera, e qiomaa ni mamanta kyuqema matenanrave, tiro.

13 Mwitaa tuvaro Iesusiva nai kyauqu mpiami mwia mwamwantaa vatero tiqaro, Nte mwitaa hiataa ihana mwitaama mwatarerave. Nte iara kyuqema quante tuqo, tuvaro tauma rumpuaravanto mwia mwamwanta nre varuva qamwanrama tavanta vuvaro mwiva qio varura.

14 Qio varuvaro Iesusiva mwianra kepukyaqama kyero tiqaro, Hia mpohua timwa nyinraitira, viraro Kotira kyaiga vara mwate variari vaisiva i mwamwanta taqaarive. Mwiaqaataira e Mosesira mwaanra qua rieqarama munra quani qiera qurairata nraakye qoravanto iara tiqata, Qutaama mwia mwamwantavanto kyuqema viho, qiate, tiro.

15 Iesusiva qao tuvarovata mwi quava viro nrinro huvata nraakye qora airivanto mwi quara rieta tiqata, Kyai tirevata Iesusiva varinani uro mwia qua riaararo mwiva tirivata kyuqema timwataarive, timwa kyeta mwiva hunani nrumu ntuvantua hura.

16 Mwitaa huvaro Iesusiva mwihua kyero Kotiravata qua tirero mpo nani hia vaisivata varunani uro varurama.

*Mwamwanta hia qakyaa hu vaisira Iesusiva kyuqema kyora
(Matiu 9:1-8; Maaki 2:1-12)*

17 Mpo enta Iesusiva mwakyaakya timwa nyi varuvata Parisinramwvata, mwaanra okyara tuhuavata, mwia qua riarerata ntuvantua vita varura. Mwihua ekyaa Kariri mwata hini hini vahu mwatukyaraqinaahuave, Jerusareminyaahuave, hisai hisaita nrumu mwatakyaa vita varuvaro Kotiva Iesusira kepukyaqama kyovaro mwiva nraakye qora nriqa vuhua kyuqema nyataariva varura.

18 Varuvata vaisi mponramwuvanto nkyiari hena vaisi mpo mwia mwamwanta hia qakyaa hura taintamaqita nri nteta tiqata, Kyai nraamwuqi vera nteta Iesusira vuqaa kyaare, timwa kyeta taqovata

19 nraakye qora airivanto varuvata mwihua nraamwu utaqi vera nteva hia qioqa hura. Hia qioqa huvata mwihua qaqlira kyeta nraamwu qiataga mwii vaisira vara mwaanri vateta nraamwu qiataga mwia mpona ntapairi kyeta vaisi mwia taintaqaa vateta kyaantaqo rupa kyeta qakyoma kye kyaqi vuvaro Iesusira nraaqani uto vahura.

20 Mwia viteta nru vaisihua kepukyaqama kye rieta tiqata, Qioma Iesusiva mwi vaisira kyuqema kyaananrove, tura Iesusiva ntapihi kyero mwiva mwamwanta hia qakyaa hu vaisira mwianra tiqaro, Ni maquo, e Kotira qua nteqa kyaananra nte i nrukama mwatauqo, tiro.

21 Mwitaa tuvata mwaanra okyara tu vaisihuavata, Parisi vaisinramwvata, qaqlira titi nkyiari nai timwa mwi nai timwa mwi hita tiqata, Mwaa

ta vaisivave? Mwiva mwitaa tiqaro mwiva Kotira uaqiamma mwate variho. Hiama qumina vaisi mpovanto nai hena vaisiara tiqaro, E Kotira qua nteqa kyaanaanra nrukama mwatauqo, qiananrove. Kotiva nraahuma qio mwitaa qiananrove, tita.

22 Mwihua mwitaa tuvaro Iesusiva mwihua su nyaatoqi mwi quava vhaura taqero mwihua kyapara hiro tiqaro, Nanraqamave nkye mwitaama kyeta riaavo?

23 Nkye nianra tiqata, Mwiva qumina vaisi variqarora tiro, hiama qio nai hena vaisivanto Kotira qua nteqa kyaaninra nruka mwataananrove, qiarave. Qio mpo kyaiqa mpo? Qiove nte mwaa vaisira kyugema kyaaninrave? Nkye ni timwa mpivake riaankye, tiro.

24 Iesusiva mwitaama kyero mwihua kyaparama nyatero mwihuara tiqaro, Nte mwatani mwatatai nraaqiarava varuqaro ni nronraqama kyaihana nte qiomma mwatani variqana vaisivanto Kotira qua nteqa kyaaninra nruka mwataaninrave. Nkye ni quara qutaa quave qiate tina, nte vaisi mwaanra mwaa quara tirerave, tiro. Mwitaa timwa kyero mwamwanta hia qakyaa hu vaisirara tiqaro, Sivira ena taintavata varera ena mwaatani quantema tuqo, tiro.

25 Mwitaa tuvaro mwi vaisiva mwihua su mwiaqaa siviro nai taintavata tu varero Kotira nrutu tuaaheraqiro viqaro nai mwaatani vura.

26 Mwiva vuvata mwipi varuhua nrihanrama vita kyauqu ntukikinraaga teta mwihua aatu hita Kotira nrutu tuaahereta tiqata, Qikye, nataa hi kyaiqarave? Tire mate nraahumwa mpo qara hi kyaiqara taqauro, tita. Mwitaa turama.

Iesusiva Rivaira nraanronra (Matiu 9:9-13; Maaki 2:13-17)

27 Iesusiva veva ntero taqovaro taakisi vare varu vaisiva mwia nrutu Rivaiva taakisi vare varu nraamwunraqi mwatakyaa viro varuvaro Iesusiva mwia timwa mwinro tiqaro, E ni naakiara nriante, tiro.

28 Mwitaa tuvaro Rivaiva siviro ekyaa nai kyaiqa varo inraikyara kyero Iesusira nraakiara vurama.

29 Rivaiva nai nraamwuqi Iesusirani kyara uta mwatovata airi vaisi taakisi vare varuhuavata, mpo vaisinramwuvata, ntuvantuama vita mwia nraamwuqi mwatakyaa vi variqata kyara nre varura.

30 Mwipi varuvata Parisi vaisinramwuvata, mwaanra okyara tu vaisinramwuhua Parisi qua riohuavata, mwihua uro nteta Iesusira nraaqiaranramwuanra nrutu nraunru/ nrurru nraanru tita tiqata, Qaqao, nkye nataamaqive taakisi vare varia vaisihuavata, Kotira qua raaqute varia vaisihuavata, kyara nre variavo? tita.

31 Mwitaa tuvaro Iesusiva mwihua nkyiari timwa nyinro tiqaro, Qati vari vaisiva hia totaava hinani virave. Nriqa vi vaisiva nraahu totaava hinani virave.

32 Tire avuqavuma kye nrohi varurahuave qia nraakye qorahua. hia nte mwihuara qora aanra qaqlira kyaate tirera tumuvavauma iho. Nte uaqia hia nraakye qorahua nyaanranrenra tumuvave, tiro.

Kyara aurama terara tura

33 Mwitaa tuvata mwihua Iesusirara tiqata, Ioninra vataqi nrohi varuhuavata, Parisi vaisi qua rie variahuvata, kyara aurama tegata Kotirara aakyara nte variavo. I vataqi nrohi variahua hia mwitaa hiraitita, qatima kyaravata nramanrivata nre variavo, tuvaro

34 Iesusiva mwihua timwa nyinro tiqaro, Nraakye vararerai hiari vaisiva nai vataahauvata varirata qiove nkye mwihuara kyara auramate variate tivarave? Hiama qio mwitaa tivarave.

35 Mpo enta nri ntairaro nraakye varaani vaisira nai vataahuaqaataita qatinani vara kyaivata mwi entaraqaataitama mwia vataahua ntateqata kyara aurama tevarave, tiro.

36 Mwitaa timwa kyero Iesusiva mpo quaqaa ntumwa kyero mwihua timwa nyinro tiqaro, Mpowanto tuavaaqaa nrihi nrabitu quanirna haqira hirero hiama tavuna qaraakya toqa kyero mwiaqaa taqaautero haqiraananrove. Mpowanto mwitaa hirera, mwiva qaraakya tavuna uaqjama kyaananrove. Qaraakya tavuna toqa taarivavata haaruanaa tavunavantovata hia kuaa garama vahiananrove.

37 Nte qaiqaa tirerave. Uaini qaraakya tati kyero hia mpovanto memenra pahiyo ututaira haaruua taqu vara kyero qaraakya uaini mwia mwipi raurirave. Memenra pahi mwiva nraahqama viraqa mwiva mwitaa hiraro uainivanto kepukya uaini utu viqaro memenra pahi nrabitu kyaananrove. Mwitaa hiraro uainivanto qumina rauru viraro memenra pahivantovata uaqjama quananrove.

38 Hia mwitaa hiraitita, qaraakya uaini qaraakya taquqi rauruarave.

39 Haaruua uaini nranra hiva hiama qaraakya uainianra mwia mwutukya vahiananrove. Mwiva tiqaro, Haaruua uaini mwiva qiove, tirave, tiro. Iesusiva mwitaa turama.

6

Iesusiva mwaanra tu entara okyarara tura

(Matiu 12:1-8; Maaki 2:23-28)

1 Mpo enta mwaanraqaa Iesusiva nai nraaqiaranramwuvata aakyo utaqi kyakuma voti hira uiti tutoraqi nrohi varura. Nrohiqatama mwia nraaqiaranramwu uiti tamwa nteqa kyeta kyauquqi ntautiqama kyeta mwia uru nre varura.

2 Nre varuvata Parisi vaisinramwuvanto mwihua taqeta qaqqao tita, Mwaanra entaqaa qao timwa tai inraikyarama mwinramwuhua uti variavo, tita.

3 Mwihua mwitaa tuvaro Iesusiva mwihua timwa nyinro tiqaro, Haaru nkyi haivaqava Ntevitivavata, nai mwia vatama kye nruhuavata, kyara nraataaa huvata mwihua mwitaa hu quara nkye hiave qaraqi kyaara ntumwa kyeta riaavo?

4 Mwi entara Ntevitiva Kotira nraamwuqi vera ntero mpereti Kotiran vatora vara kyero nreqanro nteqa kyero mwiaqavata nruhuu hini nyuvata nronrave. Kotira kyaiqa vara mwate varia vaisihua nraahu mwi kyarara nraataara vahuvaro Ntevitiva qumina vaisivanto nreqaro mwi quara nteqa kyorave, tiro.

5 Iesusiva mwitaa timwa kyero mwiva mwihua timwa nyinro tiqaro, Ni mwatanu mwataatai nraaqiara nronraqama kyaihana variqana nte mwaanra entaqaa ntaqikyiqana ntena kyakya hiani kyaiqara qiomava varaaninrave, tiro. Iesusiva mwitaa turama.

Mwaanra entaqaa Iesusiva vaisi mpo kyauqu kyuqema kyora

(Matiu 12:9-14; Maaki 3:1-6)

6 Mpo enta mwaanraqaa Iesusiva mwaanra nraamwuqi uro variqaro mwakyaakya timwa nyi varuvaro vaisi mpovanto mwia kyauqu kyaatuta kukokaqama vu vaisiva varura.

7 Mwi vaisiva varuvata mwaanra okyara tu vaisinramwuhuavata, Parisi vaisinramwuwata, variqata Jesusiraqua qua vatarerata uti variqata qua puua hita tiqata, Kyai variqata taqaararo Jesusiva mate mwaanra entaqaa vaisi kyauqu kukoka mwia kyuqema kyarera, mwia kyaara mwiaqaa qua vataare, timwa kyeta mwihua Jesusira apeqa hi varura.

8 Apeqa hi varuvaro Jesusiva mwihua nkyiari su nyaatoqi riemwa to quara ntapihi kyero kyauqu kukoka mwianra tiqaro, Sivira mwaini vaisi utaqaa nrumu variante, tuvaro mwi vaisiva siviro vaisi utaqaa varuvaro

9 Jesusiva mwihuara tiqaro, Nte nkyi kyapara hiarita nkye mwia hiniqama ni timwa mpiae. Tire tetu mwaanra qua rieqatama mwaanra entaqaa nanra nanra kyaiqave qio varaananrave? Tire mwi entaraqaa vaisi mpo kyaahaqave hiananrave, mwia uaqiamave mwataananrave? Mwaanra entaqaa tire vaisi mpo kyaahaqave hiararo mwiva qative variananrove, tire mwia ruve kyaananrave? tiro.

10 Mwitaa timwa kyero Jesusiva ekyaa vaisi mwipi varuhua itutuma kyero taqero mwi vaisirara tiqaro, Ena kyauqu tutuante, tiro. Mwitaa tuvaro nai kyauqu tutu kyovaro mwia kyauqvanto qamwanrama kyero naitarama vahura.

11 Mwia kyauqu naitarama vahuvata mwihua mpoqama kyero raraqa tovata mwihua nai timwa mwi nai timwa mwi hita tiqata, Tire Jesusira nataamave kyaananrave? tita. Mwitaa turama.

*Jesusiva nai nraaqiara 12 nramwu mwatama kyero sitora
(Matiu 10:1-4; Maaki 3:13-19)*

12 Mwi entara Jesusiva Kotiravata qua tirero taaqiqaa mwaanri ntero mwiaqaa uro variqaro entaqi Kotiravata qua timwaqiro vi varuvaro

13 qaataat vuvaro mwiva mwiavata nrohu vaisihuuya nyaanrama kyero mwihuaqitairo vaisi 12 nramwu sita kyero mwihua nronraqama kyero mwihuara tiqaro, Nkye *apositive*. nkye ni qua uro timwa nyi vaisihuuma varivarare, tiro.

14 Jesusiva mwaa vaisinramwuhua sitero:
Saimoninra. Jesusiva mwia mpo nrutu nteqaro
Pitaavave tura,
Enturura. mwiva Saimoninra qata,
Iemisikya Ionikya,
Piripira,
Patoromiunra,
15 Matiura,
Tomaasira,
Iemisira. mwia Arapiasira mwaaqau,
Saimoninra. mwia nrutu mpo Seriotira,
16 Iutaasira. mwia qora nrutu Iemisira,
Iutaasi Isikeriotira. mwiva nraakiara Jesusira qovarama kyaariva varura.

*Jesusiva airi nraakye qora kyaahaqama nyatora
(Matiu 4:24-25; Maaki 3:7-12)*

17 Jesusiva mwi vaisinramwuhuavata sitero taaqiqatairo uro ntantero tumu tunrenra sata siviro varura. Varuvata mwia vataqi nrohuhua airivanto mwini varuvata airi nraakye qora Iutia mwata mpo mwatukya mpo mwatukyaqitaitave, Ierusaremisaive, vevara nampisini Taiaa mwatukyave, Saitoni mwatukyave, mponatai mponatai mwihua ntuaantuama vita

18 Jesusira qua rieta Jesusiva mwihua nriqa quani inraikyaravata taiqa kyaarive titi mwihua nrumu ntuaantuua hita varura. Vaanavantovata

varu vaisihua mwihuavata nri ntovaro Iesusiva vaana titamwa kyero mwihua kyugema kyora.

19 Iesusiva mwihua kyaahaqa huvaro mwia kepukyavanto airi nraakye qora kyaahaqama nraahu kyovatara tita, ekyaa nraakye qoravanto mwia kyaatu kyarerata uti varura.

*Iesusiva qamwateta ntateta hirara timwa nyunra
(Matiu 5:1-12)*

20 Iesusiva nai vataqita nrohuhua taqero mwihuara tiqaro, Nkye vehi nraakye qora variahua nkye qamwataate.

Kotiva nkyiqa ntaqikyi varirata

nkye mwia nraakye qora varivarave.

21 Mate kyara nraataa ihata varia nraakye qorahua nkye qamwateqata variate.

Nkye nraakiara kyara vikyokyama nrevarave.

Mate ntate varia nraakye qorahua

nkye qamwateqata variate.

Nkye nraakiara raihiqata varivarave.

22 Nkye ni mwatani mwatatai nraaqiarara ni pataqita vi varivata mwihua mwia kyaara nkyi nramwutaqa hivarave, nkyi qorrima nyatevarave, nkyiara uaquia hi quara tivarave, nkyiara uaquia hi kyaiqara vare variavo tivarave. Nkyiara mwitaa mwitaa tivata nkye qamwateqata nraahu variate.

23 Mwihua nkyi mwitaa hiara mwianra nkyini nronraqama kyero nyaamwuni kyoqaa vahirara rieqatama mate nkyi mwutukyavanto kyuqe hirata nronraqama kye qamwataate. Haaru mwihua haivaqahuavata poropeti vaisinramwu kuua qarama kyeta uaqima nyatorave.

24 Nkye airi inraikya mate mwaa vateta mwianra qamwataahua nkyiara po kye tuqo.

Nkye ekyarama qamwataavo.

25 Nkye mate mwaa entara kyara nraavarao vikyokya ihata variahuate.

Po, nraakiara nkyi kyara nraataa hiananrove.

Nkye raihiqata variahuate.

Po, nkye nraakiara nkyi mwutukyaqitairo uaquia hirata ntateqata varivarave.

26 Mate mwaa entara nraakye qora

nkyi qamwata nyateqata nkyi nyutu tuaaheraahua,

nte nkyiara po tuqo. Nraakiara nkye taqevarave.

Haaru mwihua haivaqahuua unra qua tu poropetihua kuua qarama nyatorave.

*Nkyeta nramwutaahuara mwutukya vahirata variate tura
(Matiu 5:38-48)*

27 Mate nkye ni qua rie variahua nte nkyi timwa nyinrenrave. Nkye nkyeta nramwutaahuara mwutukya vahirata variate. Nkyi uaqima nyaterara nraahu rie vaisihua varivata nkye mwihuama kyugema nyataate.

28 Nkyiara qoraqama quate tiqata nkyiara uaquia hi quara ti vaisihua, nkye mwihuara rieqata Kotirara aakyara nteqata, Kotio, mwihua kyugema nyataante, qiate. Nkyi qoraqama nyatehuara rieqatama Kotira nraanraivaro mwiva mwihua kyaahaqa hiarive.

29 Mpovanto nkyi nraatokyai ntuteqa kyairera, tuqasaa kyaivaro hini nraatokyavata ntuteqa kyaarive. Mpovanto nkyi vaaqatua varero mwiva nkyi tuapakyaaravata vararerera hirata hia qao qiate.

30 Mpowanto mpo inraikyara nyaanru tirata qati nraahu mwiate. Mpov-
anto nkye vate inraikyara varairera, hia qaiqaa tita timwiante qiate.

31 Nkye mpohuara tiri mwitaa mwitaama timwataata tiqata vu nraato
tintemta kyeta kuaa qarama kye nkyiarivata mwitaa mwitaama nyataate.

32 Nkyiara mwutukya vahiarihua hia mwihuara nraahu nkyi mwutukya
vahiarive. Nkyiara mwutukya vahiarihuara nraahu nkyi mwutukya vahir-
era, nanra kyuqe inraikyave Kotiraqaatai varevara? Hiama mpo inraikya
varevararave. Nkye ntapihiarave. Uaqia hi kyaiqara uti variahua mwihuua
variqata nkyiariara mwutukya vahi vaisihua mwihuara nraahu mwutukya
vaihata variarave.

33 Nkye nkyita kyuqema nyataahuara nraahu kyuqema nyataivera,
nanra kyuqe inraikyave Kotiraqaatai varevara? Hiama mpo inraikya
varevararave. Nkye ntapihiarave. Uaqia hi kyaiqara uti variahuaavata
mwitaa hiarave.

34 Nkye tiqata, Ina mwinrenrave timwa kyero iqitai quaahaqa varero
qamwanrama ina varaqi nrumu mwiani vaisira mwia nraahu mwivorave.
Nkye mwitaa hivera, nanra kyuqe inraikyave Kotiraqaatai varevara?
Hiama mpo inraikya varevararave. Nkye ntapihiarave. Uaqia hi kyaiqara
uti variahuaavata nkyiari hena vaisi nyita tiqata, Mwihuua kuaa qarama kye
tita timwivararave, qiarave.

35 Hia nkye mwihuua hiantre hiate. Nkye nkyeta nramwutaahuara mwu-
tukya vahirata mwihuua kyuqema nyataate. Mpohua nkyiara munimave,
mwitaa inraikyave, timwivage nraakiara nkyita nyianre, tivera, nkye
apiara votima kye nyiate. Nkye mwitaamaqi vivaro Kotiva mwia qita
kyuqema kyero nkyi kyoqaa nyianrone. Hia mpo vaisiara kyuqeve ti
variahuaavata, uaqia hi kyaiqara uti variahuaavata, mwinro mwaanro mwita-
nahu Kotiva kyuqemá nyáte varirave. Kotiva kyuqe kyaiqa mwitaama
kyero vare varirara tita, nkyevata mwitaa hivera, nkye qutaa Kotiva
nyamwuni varira mwia nraaqiarama varivararave.

36 Nkyi sova Kotiva po kye timwa nyate varintema kyeta nkyevata po kye
timwa nyateqata variate.

Nkye ko riaa vaisihua variantema kyeta varivorave tura (Matiu 7:1-5)

37 Nkye hia mpohua kyaiqara pupiteqata hia kyuqe hi kyaiqarave qiate.
Nkye mwitaa tivaro Kotiva nkyita kyaiqaravata hia kyuqe kyaiqavema
qiananrove. Nkye hia ko riaa vaisihua votima kye variqata mporara
tiqata, Iqaa qua nronra vahiananrove, qiate. Nkye mwitaa tivaro Kotiva
nkyitaravata tiqaro, Nkyiqa qua nronra vahiananrove, qiananrove. Nkye
mpohuara tiqata, Nkye tiri uaqiamma timwataata quara qaqa kye hia
mwianra riemwaqi virerare, tivera, Kotivavata nkyitara tiqaro, Nkye ni
qua nteqa kyaas quara qaqa kyea taunru nyataaninrave, qiananrove.

38 Nkye mpohua nyivaro Kotiva nkyitavata nyianrive. Mwiva rauru
kyero raturu kyairaro itomwi viraro mpocqavata kyoku kyairaro
musaaqiro qatinani rauruananrove. Nkye nataama tukya mpohua nyinra
mwi tukyaraqaama Kotiva nkyitavata nyiananrove, tiro.

39 Iesusiva mwitaa timwa kyero mwiva mpo quaqaa ntumwa kyero
tiqaro, Vu qipa quari vaisiva hiama qio nai henanra vu qipa quaninra
kyauqu tuvare viqaro aanra nraamwu taananrove. Mwiva mwitaa hirera,
mwitanahuaqama ontiqi tumu ntivararave.

40 Qua riemwaqiro vi vaisiva hiama nai mwia qua timwa mwia
nraatarero. Qua riemwaqiro vi vaisiva riemwaqiro viro ekyaa okyara
taqero mwiaqaatairo mwitanahua kuaa qarama varivararave.

⁴¹ E nanraqamave mwata mwumwuvanto ena qata vakyaan vuqi viqe taira taqeqara ina vuqi kyatari aka nronravanto viqe taira hia taqera hiaro?

⁴² Kyatari aka nronravanto i vuqi viqetero vailhara nanraqamave ena qata vakyaara tiqara, Ni katao, kyai i vuqitaina mwata mwumwu venta kyaanke, ti variaro? E kyuqe kyaipa varauqo tiqara unra uti variaravave. Ena vuqitaira kyatari aka nraanta venta kyera, mwiaqataira kyuqema kyera taqegarama ena qata vakyaan vuqitairavata qio mwata mwumwu venta kyenarave.

Uaqia hi kyatariva uaquia hi tamwanra nraahu riairave tura

(Matiu 7:16-20, 12:33-35)

⁴³ Kyuqe kyatarivanto hia uaquia hi tamwanra riairave. Uaqia hi kyatariva hia kyuqe tamwa riairave.

⁴⁴ Vaisivanto kyatari tamwa taqeqaro mwi kyatarira ntapihi kyero nrutu ntairave. Vaisivanto fiki hiqirero mwiva hia augu vataa kyataripaatairo hiqirave. Mwiva uaini kyuqera hiqirero mwiva hia mwaahipaatairo hiqirave.

⁴⁵ Kyuqe vaisivanto mwia mwutukyaci kyuqe kyaipa varaariva piqai-harora tiro, mwi vaisiva kyuqe kyaipa nraahu vare varirave. Uaqia hi vaisiva mwia mwutukyaci uaquia hi kyaiqara utuariva piqaiharora tiro, mwiva uaquia hi kyaiqara nraahu uti varirave. Nrovanto mwaatira mwutukyaci piqai inraikyara mwia nraahu timwa qoqa hirave.

Nraamwu taaratanaqaa qua ntumwa kyero tura

(Matiu 7:24-27)

⁴⁶ Nkye nanraqamave nianra nronrao, nronrao, tiqatavata hia ni qua riaavo?

⁴⁷ Nte hunani nrinro ni qua riero nte tunte tunte hiani vaisira okyara nkyi timwa nyinrenrave.

⁴⁸ Mwi vaisiva nraamwu kepuqyaqama kyero hoqa tai vaisira votima kyeroma variananrove. Mwiva nraamwu hoqarera hiro mwata quvuqiro viro uto oriqa nraamwu tura ratero nraamwu hoqa tairave. Mpo enta vati humwunravanto nraamwu vara kyarerera utiharo nraamwu mwia kyuqema kyero hoqa taivara tiro, kepuqyaqama kyero vahirave.

⁴⁹ Ni qua riero qaqlira kyero hia nte tunte tunte hiari vaisiva, mwiva nraamwu uaqlama kyero hoqa taira votima kyeroma variananrove. Mwi vaisiva mwata quvu kyero hia ori mwataqaa nraamwu tura rataraitiro, verasata rakyero hoqa taiharo vati humwunravanto nraamwu mwia vara kyaialo ntaputama viro uaqlama virarama tuqo, tiro. Iesusiva mwi quara turama.

7

Iesusiva qaami vaisi kyaahaqa hura

(Matiu 8:5-13)

¹ Iesusiva mwi qua mwakyaakyara timwa nyi taiqa kyero mwiva mwihua kyero Kapenaamini vura.

² Mwini vuvaro Romeni vaisi ntaqu vaisihua 100 nramwuqaa ntaqikyi varura mwia kyaiqa vaisi nriqa vuvaro mwiva qutuariva qaumaqa hura. Mwitaa huvaro nronra vaisi mwia mwutukyavanto nai kyaiqa vaisiara mpoqiyavata vahuvavarovariqaro

³ mwiva Iesusirara riero lntaa nronra vaisinramwu sitero tiqaro, Nkye uro Iesusirara nrinra ni kyaiqa vaisi kyuqema mwataante qiate, tutvata

⁴ mwinramwuhua Iesusiva varunani uro ntetama po kye titi tiqata, Romeni vaisi mwiva kyuqe vaisivantove. E mwia uro kyaahaqa hiante.

5 Mwi vaisiva tiri Iutaa nraakyе qorara mwutukya vaharo variqaro mwiva naivanto mwaanra nraamwu mpovata hoqa timwa tairave, tita.

6 Mwihua mwitaa tuvaro Jesusiva mwihuavata vuva nraamwu qaumato uro intovaro Romeni vaisi mwiva nai vatahua sitero tiqaro, Nkye uro Jesusira timwa mwiqata mwitaa qiate, Nronra vaisio, e qumina mwaini toqaamwu tu kyera nrinronrave. Nte kyuqe vaisi variariravauma e ni nraamwuqi qio nrinanrave.

7 Nte kyuqe vaisi variganavauma e hinanrani qio quaninrave. E mwini variqara qua nraahu tiqara, E kyuqema quante, tiraro ni kyaiqa vaisivanto kyuqema quarive.

8 Nte qaami vaisi variqana nte niqaa ntaqikyi varia vaisihua qua rie varurave. Ntevata ntaqua vaisihua mponramwuqaa ntaqikyi varurave. Nte mwihuqitaina vaisi mpora quante tuqaro mwiva virave. Nte vaisi mpora nriante tuqaro mwiva nrinrave. Nte ntena kyaiqa vaisiaravata mwitaa mwitaa hiante tuqaro mwiva ni qua riero mwitaa hirave, timwa kyero mwihua sitovata vita.

9 Vuhua uro Jesusira mwi quara timwa mwuvaro Jesusiva nrihanrama viro tuqasaa viro nraakyе qora mwia vataqita nrhuuara tiqaro, Nte nkyi timwa nyuqo. Mwi vaisiva mpo mwatanaava ejero nronraqama kyero nianra mwiva ni kyaahaqa hiananrove tihana faqauqo. Hia nte nkyi Isareriqitairovata mpovanto mwitaama kyero qua ti vari vaisira taqaurave, tiro.

10 Mwitaa tuvata Romeni vaisi mwiva sitohua nrumu ntanteta uro taqovaro mwia kyaiqa vaisivanto kyuqema viro nraamwuqi varura.

Tetoqa nraakyе mwaaqara tura

11 Mwia nraakiara pataqia vari kyero Jesusiva mpo mwatukya mwia nrutu Nenini vuvata mwia nraaqiaranramwuvata airi nraakyе qoravantovata mwia vataqita vura.

12 Jesusiva uro mwi mwatukyara nronraanrana taqovata mwi mwatukyaraqitaita nraakyе qoravanto qutu vu vaisira quntarerave timwa kye varetu nrunrama. Tetoqa nraakyе mwaqqau kuaqiqavanto varuva qutu vuvata airi nraakyе qoravanto mwi nraakyera vatamatu kyeta nruvaro

13 nronravanto Jesusiva mwi nraakyera taqovaro mwia mwutukyavanto mwianra ua huvaro mwianra tiqaro, Hia ntataante, tiro.

14 Mwitaa timwa kyero uro kikera/tainta tu varovata vaisi mwia varohua mwiaqaa ra kyeta varuvaro Jesusiva tiqaro, Qaraakya vaisi mwaavao, nte iara siquante tuqo, tuvaro

15 qutu vu vaisiva siviro mwaamwianra viro quavata tuvaro Jesusiva mwi vaisira nai nronra mwinro.

16 Mwitaa huvata mwihua ekyaa mpoqama kyero nyaatuqa tovata Kotira nrutu tuaahereta tiqata, Poropeti vaisi nronravanto tiri utaqaa qovarama viho. Kotiva hia tiri nai nraaqiaranramwuanra taunru kyaiho, tita.

17 Mwihua mwitaa tuvaro Jesusira mwakyaakya mwiva ekyaa Iutaa mwatanivata, Iutaa vara ututu vahu mwatukyaranivata, mwi quava viro nrinro huvata ekyaa riemwa ntora.

Nramanri nyi varu vaisiva Ioniva nai nraaqiara taaratana sitovata uro Jesusira kyapara hora

(Matiu 11:2-19)

18 Jesusiva mwitaamaqiro viqaro mpo kyaiqa mpo kyaiqa vare varuvata Ioninra nraaqiaranramwuvanto uro Ioninra timwa mwuvaro mwiva nai nraaqiara taaratana nyaanrama kyero tiqaro,

19 Nkyetana uro nronra vaisi mwia kyapara hiqata mwitaama qiate, Nraakiara nrinrenra hiarava qutaa e mwivave hiaro? Tire qati nraahuve vaisi mpo vecka variananrave? qiate, tiro.

Mwitaa timwa kyero mwitana sitovata

20 mwitanahua vuhua Iesusiva varunani uro nteta tiqata, Ioniva nramanri nyi variva tiritana titero tiqaro, Iara mwia mwitaama kye uro ntumwa hiamwa hiate, tiho, Nraakiara nrinrenra hiarava qutaa e mwaa mwivave? Tire qati nraahuve vaisi mpo vecka variananrave? qiate, tihata nrnruno, tita.

21 Mwitanahua mwitaa tuvaro mwi entara Iesusiva nraakye qora airi nriqa vuhuave, vaanavanto utaqi varuhuave, mwihua kyugema nyatero vu qipa vuhua airi mwiva ntapairi kyova varura.

22 Mwiva variqaro Ioniva sito vaisitana timwa nyinro tiqaro, Nkyetana mwaini nrumu variqata taqaarave, riaarave, nrumu ntanteta uro Ioninra timwa mwiate. Vu qipa vihua qaiqaa taqe variavo. Kyuqu uaqiamma vihua qati nrohi variavo. Tauma rumpuaravanto utihua tavanta vihata qati variavo. Nraato tita vihua qaiqaa qua qatima riaavo. Qutu quahua sivita qatima variavo. Vehi nraakye qorayanto Kotira qua mwaanra kyuge qua mwaanra nrumu riaavo. Ekyaa mwi quara uro Ioninra timwa mwiate.

23 Nianra hia taara vu nraato tiraitiro, kepukyaqama kyero kuaa vu nraato nraahu tuqiro vi variariva, mwivama qamwateqaro variananrove, tiro.

24 Iesusiva mwitaa tuvata Ioniva sitotanahua nrumu ntanteta vuvuro Iesusiva nraakye qora ntuvantuama vita varuhua Ioninranra timwa nyinro tiqaro, Nkye haaru nanra inraikya taqarerata qumina mwataqaa vurave? Toqavanto tiharo omwa ahikyavanto hini viro hini nrinro hira taqarerata vurave iho?

25 Nkye hia mwia taqarerera vurave. Nkye nanra inraaikya taqarerata vurave? Tuavaaqa kyugera ututo vaisira taqarerata vurave iho? Qaqao, tuavaaqa kyugera uti varia vaisihua hia quminasata variarave. Mwi vaisihua nronra vaisi vuni variahua nraamwuqi nraahu variarave.

26 Nkye nanra inraikya taqarerata vurave? Kotira qua qovarama kyora poropeti vaisi taqarerata vurave? Qutaave, mwia taqarerata vurave. Qio kyai nte nkyl timwa nyianrita riaate. Nkye mwi entara poropeti vaisi nraatara kyai vaisira taqorave.

27 Kotira mpukuqi Kotiva Ioninranra mwitaama tiro:

Taqante, ni qua timwa nyiani vaisira nte titaairo

mwiva nraante i vuni viqaro i aanra

terama mwataananrove, turave, tiro.

(*Marakai 3:1*)

28 Iesusiva mwitaa timwa kyero mwiva mwiuhara tiqaro, Kyai nkyl timwa nyianrita riaate. Mwatani mwataataa nraakye qorahua variavaro Ioniva ekyaa mwihua nraatara kyaivama variho. Ioniva mwitaama variharo nraakiara Kotiva ntajikyiani nraakye qorahuaqitairo pataqia variariva mwiva nraahuma Ioninra nraatara kyaananrove, tiro.

29 Iesusiva mwitaa tuvata qumina nraakye qoravata, taakisi vare varuhuavata, mwihua Ioniva nramanri nyuhuara tita, mwihua Iesusira qua rieta tiqata, Quttaaqama kyero Kotiva avuqavu hi varivave, tita.

30 Mwihua mwitaa tuvata Parisinramwuvata mwaanra okyara ti varuhuavata, mwihua hia Ioniva tiri nramanri timwianrive tuhuara tita, mwihua Kotiva hinani vi aanranra mwoqa mwunra.

31 Mwihua mwitaama varuvaro Iesusiva tiqaro, Mate mwaa entara varia nraakye qorahua nanra inraikya votima kyetave variavo? Kyai nkyl timwa nyankye.

32 Mwihua nraaqiaranramwuvanto mwatukyaqaa tutiqarerata mwatakyaa vita variantema kyeta variavo. Nraaqiara mwihua tutiqueqata nkyiari henahuara tiqata, Tíre ntoma vaara vuate varurata nkye ihi ntataara vahatama nkye hia ihi ntavao. Tire tutiqueqata nkye ntate ihira turata nkye ntataataara vahatama nkye hia ntataavo, qiarave. Mate mwaa entara variahua mwihua votima kyeta variavo.

33 Ioniva nramanri nyinrenro nri ntero mwiva kyara aurama tero uainivata hia nrovata nkye mwianra vaana kyapata varivave qiarave.

34 Nte mwatanai mwata taiva nri ntene, nte kyaravata nramanrivata nrena nruqatama nkye tiqata, Mwi vaisira taqaate. Mwiva inraanrama kyero kyara nre varivave. Mwiva uaini nreqanro ueraqama vi varivave. Mwiva taakisi vare variahuvata, uaqia hia vaishuavata, totiqa hi vari-vave, qiarave.

35 Qio quavanto kyuqe qua vahirera, mwi quara riemwaqiro quariva taqairaro kyuqe qua nraahu vahiananrove, tiro. Mwitaa turama.

Iesusiva Parisi vaisi nraamwuqi vuvaro nraakyе mpovanto Iesusiraqaa vahamwenra qu mwatora

36 Mpo enta Parisi vaisi mpovanto Iesusirara tiqaro, Nrinra ni nraamwuqi kyara nraante, tuvaro Iesusiva mwia nraamwuqi kyara nranrenro vuva uro mwia nraamwuqi mwatakyaa viro kyara nre varura.

37 Mwipi nre varuvaro mwi mwatukyaraqi nraakyе mpovanto airi vaisivata api nrohi varu nraakyeva Iesusiva Parisi vaisi mwia nraamwuqi kyara nre varurara riora. Riero mwiva ori taqu vahamwenra kyuqe mwunta vura varero uro

38 Iesusiva kyuqu tututero kyara nre varura mwia kyuqu tarani variqaro ntate varuvaro mwia nruqunruvanto Iesusira kyuquqaa tumu ntuvaro nai qiata kyaahiqo nruka kyero mwia kyuqu mota kyero vatero vahamwenra kyuqe mwunta vura mwia Iesusira kyuquqaa qu mwaterno.

39 Qu mwate varuvaro Parisi vaisi mwiva Iesusirara nrinra ni nraamwuqi kyara nraante tuva taqero nai riero tiqaro, Iesusiva poropeti vaisivanto varitirio, mwiva mwia tu varai nraakyera okyara ntapihiro mwiva uaqia hi kyaiqara utiravata ntapihitirio, tiro.

40 Parisi vaisi mwiva mwitaama riovoro Iesusiva mwianra tiqaro, Saimonio, nte qua mpo i timwa mwinrenrave, tuvaro Saimoniva tiqaro, Mwaanra ti variara vaisio, qio timwa mpiraqe riaankye, tiro.

41 Tuvaro Iesusiva timwa mwinro tiqaro, Vaisi taaratatanavanto kuua vaisi mwiaqataita munima vararerera huvaro mwiva vaisi mpo 100 kinaa mwinro vaisi mpo mwia 10 kinaa mwunrave.

42 Nyuvata mwitanahua mwi munimanra nramwa kyeta nai mwiva hia qioqa hvata varuvaro mwiva mwitanahuara tiqaro, Hia nkyitana nyitau munimanra nina mpiate qianinrave. Qaqirama kyaquo, turave, tiro.

Iesusiva mwitaa timwa kyero mwiva Saimoninra kyapara hiro tiqaro, Mwitanahuqaqitairo tavave munima nyi vaisira mwianra nronraqama kyero qamwataananrove? tiro.

43 Iesusiva mwitaa tuvaro Saimoniya tiqaro, Qio munima nronraqama kyero varai vaisivama nronraqama kyero mwianra qamwataananrove, tiro. Tuvaro Iesusiva tiqaro, Ntapihi kyerama tira hiaro, tiro.

44 Iesusiva mwitaa timwa kyero mwiva tuqasaa viro Saimoninranra tiqaro, Mwaa nraakyera taqaante. Nte i nraamwuqi nrumu varuqara e hia nramanriqotaira ni kyuqu hiqama mataararo mwaa nraakyeva nai nruqunruqotairo ni kyuqu hiqama materoma nai qiata kyaahiqotairo ni kyuqu nruka mataiho.

45 Ni qua mwanteqarama e hia ni motaararo mwaa nraakyeva nte nri ntauraqaatairo ni kyuqu motaqiro vi variho.

46 E vahamwenra hia ni qiataga qu mataararo mwaa nraakyeva vahamwenra mwunta vira ni kyuquqa qu mate variho.

47 Mwianra rieqanama nte iara mwataama tina. Nraakyе mwaava Kotira qua airi qua nteqa kyaikhana nte ekyaa mwi quara nruka mwataurara tiro, mwiva nronraqama kyero ni qamwata mate variho. Nte vaisi mpo qora qua pataqia nruka mwataariva mwiva ni pataqia qamwata mataananrove, tiro.

48 Iesusiva mwitaa timwa kyero mwiva nraakyе mwia timwa mwinro tiqaro, E Kotira qua nteqa kyaananra nrukama mwatauqo, tiro.

49 Iesusiva mwitaa tuvata nraamwu mwipi kyara nranrenrata nrumu varuhua nkyiari nai timwa mwi nai timwa mwi hita tiqata, Mwaa ta vaisiva variqarove Kotira qua nteqa kyaananra nruka mwatauqo tihо? tita.

50 Mwihuа mwitaa ti varuvaro Iesusiva nraakyе mwianra tiqaro, E nianra quutaqaqama kye rieqara ni kyaahaqa hiarivave qiararoma Kotiva i vitaiho. Imwutukya qihakayama vahirara quante, tiro. Iesusiva turama.

8

Nraakyе mponramwuvanto Iesusira vataqi vura

1 Mwia nraakiara mpo enta Iesusiva mwatukya mpoqi mpoqi nrohiqaro Kotiva nraakyе qoraqaa ntaqikyiani quara kyuqe qua timwa nyiqiro vura. Mwia nraaqiara 12 nramwuvanto mwia vata vuvata

2 nraakyе mponramwuvantovata mwia vata vurama. Nraakyе mwinramwuhua tauraa vaanavanto mwihuavata varuhuave, nriqa vuuhuave, varuvaro Iesusiva mwihua kyuqema nyatovata mwihua Iesusira vataqita vurama. Mariaava mwianra Makataranyaavave tura tauraa Iesusiva mwiaqitairo vaana 7 nramwu titovata nritare vu nraakyeva varuvaro

3 nraakyе mpo Iohaanaanra mwia vaativanto Kusaava vaisi nronravanto variqaro Herötira opisi nraamwuqi kyaiqa vare varura. Nraakyе mpo Susaanaavavata, airi nraakyevata, Iesusira vataqi viqata nkyiari munima kyeqata Iesusiravata mwia nraaqiaranramwuvata kyaahaqamaqita vurama.

Kyara humwu iso quaraqaa ntumwa kyero tura

(Matiu 13:1-9; Maaki 4:1-9)

4 Mwatukya mpoqi mpoqitaita nraakyе qora Iesusiva hunani nrumu ntuvantauma vita varuvaro Iesusiva mpo quaqaa ntumwa kyero timwa nyinro tiqaro,

5 Vaisi mpovanto kyara vara tirero humwu isaqiro vurave. Mwiva isaqiro vuraro mpohuva aanraqa tumu ntuvata vaisivanto vita nrita hiqata kyuqu nte kyovaro nyaamwavanto nrumu nramwa kyorave.

6 Humwu mponramwuvanto ori mwataqaa tumu ntuvu qamwanrama quiqa viro aahara mwataqaara tiro, aaharama vurave.

7 Humwu mponramwuvanto uakukya uvi auqu vahuraqi tumu ntuvu uakukya kyapata qupiqovaro uvi auqu vahu uakukyava ntumwaqu kyovaro hia qupiqovare.

8 Humwu mponramwuvanto mwata kyuqeraqi tumu ntuvu kyuqema kyero qapigero uro tamwa airi riemwa torave, tiro. Iesusiva mwitaa timwa kyero mwihua timwa nyinro tiqaro, Nkyi nyaato vahirera, mwaa quara okyara ntapihi kyeta riaate, tiro.

9 Iesusiva mwitaa timwa kyero varuvata mwia nraaqiaranramwuvanto mwia kyapara hita tiqata, Vaakya mpo quaqaa ntumwa kyera qiananra mwia okyara tiri timwa timwinraqe tire riaare, tuvaro

10 Iesusiva mwihua timwa nyinro tiqaro, Kotiva nraakyae qoraqaa ntaqikyiani quara uqeta taira, mwi quara Kotiva nkyiara mwihua qati kyairata mwi quara okyara riaate timwa kyero, qumina nraakyae qorara mwi quara okyara hia vutu kyera timwa nyiante tirara tina, nte mpo quaqaa ntumwa kyena mwihua timwa nyunrave.

Nte mpo quaqaa ntumwa kyeqana
mwihua timwa nyianrita mwihua taqequatavata
hia ntapihi kyeta taqevarave.
Mwihua mwi quara rieqatavata
hia mwia okyara ntapihivarave.

(Aisaiaa 6:9)

11 Iesusiva mwitaa timwa kyero mwiva nai nraaqiaranramwu timwa nyinro tiqaro, Vaakya mpo quaqaa ntumwa kyena timwa nyunra mwia okyara timwa nyinrenrave. Humwukyanaa mwia Kotira quama vaiho.

12 Humwu aanraqaa tumu ntu quara mwia okyara vahirero vaisi mponramwuvanto Kotira qua riaavarao Saataaniva nri ntero tiqaro, Mwihua huvantu kyero sitaankyorave, timwa kyero mwihua su nyaato mwutuqaqitairo mwi quara ntavihi kyero varairave.

13 Humwuvantori mwataqaa tumu ntiro vahura, mwia okyara vahirero nraakyae qoravanto Kotira qua rieta mwi quarara pataqia qamwata kyeta variavarao quavanto hia mwihua utaqi tuqa tuta kyero vahata mwihua Kotira qua riemwaqita quavarao mpovanto tiqaro, Nrivaqe uaqia hi kyaiqara utuare, tihata mwihua mwia qua rieta Kotira qua qaqa ryaarave.

14 Humwu mponramwuvanto uakukya uvi auqu vahuraqi tumu ntu quara, mwia okyara vahirero nraakyae qoravanto Kotira qua rieta mwiaqaataita mwihua nkyiari vataa inraikyararave, kyaiqarave, nkyiari mwatani variqata qamwaterarave, mwi inraikyarara nraahu nronraqama kye riegata, mwihua Kotira qua qaqa ryaet hia kyuqe tamwa riaintema kyeta riaarave.

15 Humwu mponramwuvanto mwata kyuqe hiraqi tumu ntiro vahura, mwia okyaravanto vahirero nraakyae qoravanto Kotira qua rieta nkyiari su nyaato mwutuqyaqitai mwi quarara riemwaqita vita kepuqyaqama kyeta variqi viqata kyuqe tamwa riaintema kyeta riemwataarave, tiro.

Iesusiva omwaqaa qua ntumwa kyero tura

(Maaki 4:21-25)

16 Iesusiva mwitaa timwa kyero mwaa quara timwa nyinro tiqaro, Hia mpovanto omwa qupi kyero tave vara kyero mwiaqaa ntumwaqu tairave. Hia mpovanto omwa qupi kyero tainta mwemwaqi veta vatairave. Vaisivanto omwa qupi kyero mpohuavata omwa mwia taqaate tiro, nyaamwuni viri vatairave.

17 Mate mwaa entara uqeta taaninra nraakiara vara qovarama kyero qoqaa nraahuma vataananrove. Mate ntumwaqu taaninra nraakiara puaama kyero omwa itaaninraqaa uro vataananrove.

18 Vaisivanto mpo inraikya vataaninra Kotiva mpoqiavata mwiananrove. Vaisivanto hia mpo inraikya vataariva tiqaro, Nte pata inraikya nraahu vatauqo, qianinra mwiaavata Kotiva ekyaa vara kyaananrove. Kotiva mwitaa hirara tita, nkye raurukyeqa mpo qua mpo qua rieqata variate, tiro.

Jesusira vataahua mwia taqarerata nrunra

(Matiu 12:46-50; Maaki 3:31-35)

19 Iesusiva mwini varuvata mwia nrovavata mwia qatanramwuvata mwia taqarerata nrhuua nrumu taqovata nraakyee qora airivanto Iesusira vara ututu varuvatara tita, hia qio Iesusira nraaqani vura.

20 Mwihua varuvaro mpovanto Iesusira timwa mwinro tiqaro, I nrovalta i qatanramwuvata mwaataqa i taqarerata nrumu variavo, tuvaro

21 Iesusiva mwipi ntuvantauama vita varuhua timwa nyinro tiqaro, Kotira qua rieqata nrohi variahua mwihuuma ni ntovave, ni kata pakyaahuave, variavo, tiro. Mwitaa turama.

Jesusiva toqa vaururuara qao tuvaro tirema vhura

(Matiu 8:23-27; Maaki 4:35-41)

22 Mpo enta Iesusiva nai nraaqiaranramwuanra tiqaro, Nrivaqe kyaareranronra mwaa qareta vutura hini quare, timwa kyero mpotuqi mwaanri ntero mwihua kyapata viro.

23 Mwihua nramanriqaa vi varuvaro Iesusiva mpotuqi vaite varuvaro nronraqama kyero toqa vaururu utiqaro nramanri ventaqiro viro mpotuqi mwaanri ntero piqa kyovata mwihua nramanriqi rauru viva qaumaqa hvata

24 Iesusira nraaqiaranramwuvanto mwiva vaitonani uro mwia vaurama kye tiqata, Nronrao, nronrao, tire qaumama nramanriqi ntumwa quanarrave, tuvaro Iesusiva siviro toqa vaururuaravata nramanrianravata qio eqaante tuvaro toqa vaururuvanto taiqa vuvaro nramanrivanto tuminro tirema naitarama vhura.

25 Tirema vahuvaro Iesusiva nai nraaqiaranramwuanra tiqaro, Tanave nkye nianra kepukyaqama kyeta riaava vaiho? tuvata mwihua aatu hiqata kyauqu ntukikinraaqa teta tiqata, Qikye, mwaa nai ta vaisivave iho? Mwiva qua tiharo toqa vaururuvantovata nramanrivantovata mwia qua rie variho, tita. Mwihua mwitaa turama.

Jesusiva vaana kyapata variqiro nrohi varu vaisira kyuqema kyora

(Matiu 8:28-34; Maaki 5:1-20)

26 Mwihua mpotuqi vuhua vutura Kekesaa mwatani uro ntora. Kariri rumpua vutura qarahi hini Kekesaa mwata vahura.

27 Mwihua mwini uro ntovaro Iesusiva mpotuqitairo mwaamwi ntovaro vaisi mpo mwi mwatukyaraqinaava vaana kyapata variqiro nrohi varuva uro Iesusira qintorama kyora. Vaisi mwiva hia tuavaaqavata utuva, hia nraamwuqvavata vaitova, mwiva vaisi qutuvata varaqita uro ori ataamwuqi vate varuraqi vaitaqiro vi varura.

28 Mwiva Iesusira taqero paa tiro kye vu tiro Iesusira vuqaa nrumu tumu ntiro aakyara ntero tiqaro, Iesusio, Kotiva nrornaravanto nyaamwuni varihare e mwia mwaaquvanto variaro. E ni nataa hirerarave nrianro? Po, nte iara hia ni ruantemta tuquo, tiro.

29 Iesusiva vaananra vaisi mwiaqitaira nritarera quante turara tiro, vaana mwiva mwitaa tura. Mwi mwatanaahua vaisi mwiva aatu quankyo tita, mwia seni vara kyeta kyauqu rupa tovaro vaanavanto airi nani mwia vaisira tuqara tutovaro mwiva seni mwia ntupe paama kyovaro vaanavanto mwia vara kyovaro vaisi mwiva qumina mwatani vi varura.

30 Mwitaa huvaro Iesusiva vaana mwia kyapara hiro tiqaro, Ena nrutu qianta, tuvaro mwiva Iesusira timwa mwinro tiqaro, ni nutu Airivave, tiro. Vaana airivanto mwia vaisiraqi varuvvara tiro, mwiva mwitaa tura.

31 Vaana mwihua Iesusirara po kye tita tiqata, Hia tiri mupi vaanavanto variaraqi titante.

32 Mwitaa timwa kyeta taqovaro quara airivanto vaini taaqiqaa uhiqa nre varuvata vaana mwihua tiqata, Tiri titairaqe tire quara utaqi uro variare, tuvaro Iesusiva qiove tuvata

33 vaana mwihua vaisi mwia kyeta quara mwihua utaqi vuvata ekyaa quara mwihua okaiqi hianteta vuhua utontamwanra kyaareraqi ntumwa vita nramanri nreta qutu taiqa vura.

34 Quaranramwu nramanri nreta qutu vuvata mwihuaqaa ntaqikyuhua mwia taqeta hiante vuhua uro mwatukyaqi varuhua ekyaa viti viri timwa nyuvata

35 mwi mwatanaahua mwia taqarerata vuhua Iesusiva varunani uro nteta taqovaro vaanavanto mwia utaqi varuvaro titamwa kyo vaisiva tuavaaqa ututero Iesusira nraaqani mwatukyaq viro mwia vu nraatovanto naitarama vuvaro varuvata mwihua aatu hita.

36 Mwihua aatu huvata vaisi mpo uhua vaakya mwia taqohua nraakyne qora mwihua timwa nyita tiqata, Iesusiva mwitaa mwitaama kyaiharo vaisi mwiva kyuqema viho tita.

37 Mwitaa tuvata Kekesaa mwatanaa mwihua mpoqama kye aatu hita Iesusirara tiqata, Tiri mwaata mwaisaira quante, tuvaro Iesusiva mpotuqi mwaanri ntero vurama.

38 Mwiva virera huvaro vaanavanto nritarovaro varu vaisiva Iesusirara po tiro tiqaro, Kyai nte ivatama kyena quankye, tuvaro

39 Iesusiva qaqao tiro, E ena mwaatani uro variqarama Kotiva i kyugema mwatairara nraakyne qora timwa nyianta, tiro. Timwa kyero Iesusiva mwia titovaro mwiva nai mwatukyan uro ntero Iesusiva mwia kyuqema mwatorara timwa nyiqiro vurama.

Iairaasiva Iesusira hunta kyero vura (Matiu 9:18-26; Maaki 5:21-43)

40 Iesusiva nrumu ntantero kyaarerera nronra vutura hini tokyani uro ntovata mwia vekya ntuaantuama vita varu nraakyne qorahua mwia qamwata mwatora.

41 Mwitaa huvaro vaisi mpovanto mwia nrutu Iairaasiva, mwiva mwaanra nraamwuqaa ntaqikyi varuva uro ntero Iesusira kyuqusata tumu ntiro po kye tiro tiqaro, Qati ni nraamwuqi nriante.

42 Ni naamwunra kuaiku 12 ihi varaiva qutu quariva pataqia vaiho, tiro.

Nraakyne mpovanto Iesusira tuavaaqa kyaatu kyora Mwitaa tuvaro Iesusiva Iairaasiravata vuvata nraakyne qora airivanto Iesusira vataqita viqata nai rataakye nai rataakye hi varura.

43 Mwitaa huraqinaanra nraakyne mpovanto nriqa vuva 12 ihiara tora taqamwaqiro viqaro mpo totaa mpo totaahua uro taqero munima nraahu taiqa kyovaro hia mpovanto mwia kyaahaqa huvaro mwia ruva qati nraahu vahuvuvaro

44 mwi nraakyeva nraakyne qora utaqi variro Iesusira mwogani viqaro Iesusira tuavaaqa vitiqaa kyaatu kyovaro mwia nriqa vuva taiqa vura.

45 Mwitaa huvaro Iesusiva kyapara hiro tiqaro, Tavave niqaa tu varaiho? tuvata mwihua tire hiave tuvaro Pitaava tiqaro, Nronrao, nraakyne qora airivantoma i tataaqa nriqata nai rataakye nai rataakye hi variqata ivata qakyaa hiavo, tuvaro

46 Iesusiva qaqao tiro, Mpovanto ni tu varaiho. Nte ntapihi kyauqaro ni kepukya hinivanto niqitairo viho, tiro.

47 Iesusiva mwitaa tuvaro nraakyne mwiva nai riero tiqaro, Qikye, vaakyama Iesusiva ni ntapihi kyaiho, timwa kyero kyuqu kyauqu nti varuvaro uro Iesusira kyuqusata tumu ntiro nraakyne qora suqaa variqaro

Iesusira timwa mwinro tiqaro, Ni mamanta kyuqema quarive tinama, nte i tuavaaqqa kyaatu kyauqo. Nte mwitaa huqaro ni nriqa viva qamwanrama kyero taiqa viho, tiro.

⁴⁸ Mwitaa tuvaro Iesusiva mwia timwa mwinro tiqaro, Qio ni naamwunrao, e nianra ni kyaahaqa hianinrave qiararoma i nriqa viva taiqa viho. Qioma i mwutukyavanto qihaakya hirara quante, tiro.

Iairaasira nraamwunra kyuqema kyora

⁴⁹ Iesusiva mwitaa ti varuvaro Iairaasira nraamwuqitairo vaisi mpo titova nri ntero Iairaasira timwa mwinro tiqaro, I nraamwunravanto qutuma viho. Mwaanra ti vari vaisira hia ntavaaqavu taante, tuvaro

⁵⁰ Iesusiva mwi quara riero Iairaasirara tiqaro, Hia aatu hiante. Nianra kepukyaqama kyera riemwaqira vi variraro i nraamwunravanto qio variarive, tiro.

⁵¹ Mwitaa timwa kyero Iesusiva mwia nraamwuqi uro ntero quminahua mwipi varuhua sitero uto mwaatani variate timwa kyero Pitaaravata, Ioninravata, Iemisiravata, nraaqiara mwia nrohua qohuavata, mwinramwuhua nraahu sita varero qiaatara mwia qutu vuvata vatoraqi viro.

⁵² Ekyaa nraakye qora mwihua nraaqiara mwianra ntate varuvaro Iesusiva tiqaro, Hia mwianra ntataate. Qiaatara mwiva hiama qutu viho, qati vaitema variho, tiro.

⁵³ Tuvata qiaatara mwiva qutu vurara tita, mwihua Iesusira quara raima mwatovaro Iesusiva qiaatara mwiva qutu vuraqi vera ntero

⁵⁴ qiaatara mwia kyaauquqaa tu varero mwianra vera kyero tiqaro, Mwaa qiaataravao, siquante, tiro.

⁵⁵ Mwitaa tuvaro nai mwanraqura naiqi nruvaro mwiva qamwanrama sivuvaro Iesusiva mwipi varuhuara kyara mwiate tiro.

⁵⁶ Mwitaa tuvata mwia nrohua qohua nrihanrama vita kyauqu ntukik-inraaqate varuvaro Iesusiva mwitanahuara tiqaro, Mate mwaa taqaarara hia mpohua timwa nyiate, tiro. Mwitaa turama.

9

Iesusiva nai nraaqiara 12 nramwu sitovata vura

(Matiu 10:5-15; Maaki 6:7-13)

¹ Iesusiva nai nraaqiara 12 nramwu nyaanrama kyero mwihua vaisiqitaita vaana siteta nriqa vihua kyuqema nyataate tiro, mwihua nronraqama kyero kepukya nyinro tiqaro,

² Nkye uro Kotiva ntaqikyi quara nraakye qora timwa nyiqatama nriqa vihuavata kyuqema nyataate, tiro.

³ Mwitaa timwa kyero mwiva tiqaro, Nkye virera hita qatima quate. Hia kyauru quru terave, tuave, kyarave, munimave, tuavaaqqa kyaatave, vareta quate.

⁴ Nkye vivaro ta mwatukyaraqitairove nkyiara qamwateqaro nkyi sitairera, nkye nraamwu kuaaqi nraahu variqi vitama mwi mwatukyara kyetama quate.

⁵ Nkye vivaro ta mwatukyaraqitairove hia nkyiara qamwateqaro hia nkyi sitairera, mwi mwatukyara qaqira kyeta nkyetaqaatai ntuvenrauma kyeta qaqira tuto kyetama mwihua timwa nyita tiqata, Nraakiara nkye taqevarave, qiate, tiro.

⁶ Iesusiva mwitaa tuvata mwia nraaqiaranramwu mpo mwatukya mpo mwatukya nrohiqata Kotira qua kyuqe qua timwa nyiqi viqata nriqa vuhuavata kyuqema nyatora.

*Herotiva Iesusira okyarara airi nraato tura
(Matiu 14:1-2; Maaki 6:14-16)*

7 Jesusivavata, mwia nraaqiaranramwuvata, mpo kyaiqa mpo kyaiqa varuvaro mwi quava viro nrinro huvaro Herotiva Kariri mwataqaa ntaqikyi varuva, mwivavata mwi quara riero Iesusira okyarara airi nraato ti varuvata vaisi mpovramwuvanto tiqata, Ioniva nramanri nyi varuva qutu vuva qaiqaa siviro nrohi variho, tuvata

8 mpo uhua tiqata, Qaqao, tiri haivaqava Iraisaava qovarama viho, tuvata mpo uhua qaqao tita, Tiri haivaqava haaruua poropeti vaisi mpovanto qati siviro nrohi variho, tura.

9 Mwihua mwitaa tuvaro Herotiva nai tiqaro, Nte Ioninra nrunta teqa kyaavarave. Mwihua mpo qua mpo qua ti varia vaisiva mwiva ta vaisivave? tiro. Mwitaa timwa kyero mwiva Iesusira taqarero uti varura.

*Iesusiva kyara airiqama kyero 5,000 vaisi nyunra
(Matiu 14:13-21; Maaki 6:30-44; Ioni 6:1-13)*

10 Jesusiva nai nraaqiaranramwu sitovata vuhua uro ntanteta nrumu mwihua nkyiari nrohu mwakyakyara Iesusira timwa mwuvare mwivavata riero, mwiaqatairo Jesusiva hini nraakye qora mwihua mwini kyero nai nraaqiaranramwu nraahu sitero Vetasaitaanu vuvata

11 mwini kyo nraakye qorahua mwihua rioraro Jesusiva Vetasaitaanu viera hvata mwihuavata mwia vataqita vuvaro Jesusiva mwihua qamwata nyatero Kotiva ntaqikyiani quara timwa nyinro nriqa vuhuavata kyuqema nyatora.

12 Jesusiva mwitaamaqiro vuvaro huari vuvanto tumi vuvata Jesusira nraaqiara 12 nramwuvanto Jesusiva hunani nri nteta tiqata, Nraakye qora titairata mpo mwatukya mpo mwatukya vaisi varinani uro vaiteqata kyara vara nraate. Mwaini qumina satave, tita.

13 Mwitaa tuvaro Jesusiva qaqao tiro, Nkyetama mwihua kyara nyiate, tiro. Tuvata mwihua Iesusira timwa mwita tiqata, Tire mpereti hini kyaququruvata, tavukya taaratatanavata nraahuma vatauro. Nraakye qora airivanto variavo. Tire munima nronraqama kyetave mwihua kyara vara nyiananrave? tita.

14 Vaisi kyaara ntirerata 5,000 vaisi airivanto varuvaro Jesusiva nai nraaqiaranramwanra tiqaro, Nkye nraakye qorara tivata ntainra vita mposata 50 nramwu varivata mposata 50 nramwu varita mwitaamaqi vitama ekyaa mwatakyaa vita variate, tiro.

15 Tuvata mwia nraaqiaranramwuvanto mwihua ntainra kyovata ekyaa mwatakyaa vita varuvaro

16 Jesusiva mpereti hini kyaququruvata, tavukya taaratatanavata, vara kyero nyaamwuni taqebaro Kotirara kyuqeve timwa kyero mpereti nteqa kyero tavukya tukyama kyero nai nraaqiaranramwu nyinro tiqaro, tukyama kyeta mwihua nyiate, tiro.

17 Nyuvata ekyaa mwihua vikyokyama nreta viti vaati kyovaro qati vahura, Iesusira nraaqiaranramwuvanto utu kyeta ntutantuto tuara 12 nramwu piqa kyora.

*Pitaava Iesusira okyarara tura
(Matiu 16:13-19; Maaki 8:27-29)*

18 Mpo enta Jesusiva nanrianraa variqaro Kotiravata qua ti varuvata mwia nraaqiaranramwuvanto mwiva hunani nri ntovaro Jesusiva mwiramwuhua kyapara hiro tiqaro, Qati nraakye qoravanto nianra ta vaisirave tiqatave ti variavo? tuvata

19 mwinramwuhua tiqatama, Mponramwuvanto iara mwiva Ioniva nramanri nyi varu vaisivave ti variavata mponramwuvanto iara mwiva Iraisaavave ti variavata mponramwuvanto iara mwiva haaruua poropeti vaisivanto qati siviro nrohi varivave ti variarave, tita.

20 Mwinramwuhua mwitaa tuvaro Iesusiva mwinramwuhuara tiqaro, Mpo nkyenramwuve? Nkye nianra ta vaisivave tiqatave variavo? tuvaro Pitaava mwia timwa mwinro tiqaro, E Kotiva titava, Mesaiaavanto variaro, tiro.

21 Pitaava mwitaa tuvaro Iesusiva kepukyaqama kyero qao timwa tero mwinramwuhua timwa nyinro tiqaro, Nkye mwi quara mpohuavata hia timwa nyiate, tiro.

Iesusiva nai qutu quaninranra tura

(Matiu 16:20-28; Maaki 8:30-9:1)

22 Iesusiva mwitaa timwa kyero nai nraaqiaranramwu qaiqaa timwa nyinro tiqaro, Nte mwatani mwatatai nraaqiaravave. Nte nriqa quani inraikyara varaqina quarita Iutta nronra vaisinramwuvata, Kotira kyaipa vara mwate varia vaisihua mwihua nronra vaisinramwuvata, mwaanra okyara ti varia vaisihuavata, mwihua ni qorirma matevarave. Ni rukyaivage nte taarampo enta varina qaiqaa qati siquaninrave, tiro.

23 Mwitaa timwa kyero Iesusiva ekyaa mwinramwuhua timwa nyinro tiqaro, Ni pataqiro nr'ianri vaisiva, mwiva nai mwutukya vahiani inraikyara qaqira kyero vaisi rukyeta hiritaa kyatarira mwia mpo enta mpo enta varia qui varero ni naakiara nriananrove.

24 Mwaa mwataraqaa nai qati variqiro quaninranra nraahu nronraqama kyero riaariva, mwi vaisiva ekyarama qutu quananrove. Vaisivanto nianra riemwaqiro viqaro uro qutu quariva, mwi vaisiva ekyaa enta qati variqiro quananrove.

25 Vaisivanto qati variqiro viqaro ekyaa mwata mwaqaanaa inraikya ntuvantuuma kyero vatero mwiva nai qutiro viro raupirima virera, nataama kyeroove mwi inraikyava mwia qio kyaahaqa hiananrove. Hia qio mwia kyaahaqa hiananrove.

26 Vaisi mpovanto nianravata ni quaravata kyauruariva, mwi vaisiva varirage nte mwatani mwatatai nraaqiarava variqana nte nraakiara tmuani entaraqaa nai mwi vaisiraravata kyauruahnirave. Mwi entara ni kora peqa okyaravanto niqatairo ntuvaahe varirage nte nyaamwunyahauavata tuminrenrave. Mwi entara nte nai mwi vaisiraravata kyauru-anirave.

27 Nte qutaama tuqqo. Vaisi mponramwuvanto mate mwaa mwaini sivita variahua, mwinramwuhua hia qumina qutu vivarave. Mwinramwuhua Kotiva ntaqkyianinra taqetama qutu vivarave, tiro.

Iesusira mwamwanta kyuqe mwamwanta kyuqu vura

(Matiu 17:1-13; Maaki 9:2-13)

28 Iesusiva mwi quara timwa nyi taiqa kyero kuaa uiki vara kyero mwiva Pitaaravata, Ioninravata, Iemisiravata, mwinramwuhua nraahu sita varero Kotiravata qua tirero taaqqaara vura.

29 Iesusiva Kotiravata qua ti varuvaro mwia virivanto kyuqu viro mpo qarama vuvaro mwia tuavaaqavanto egarori tuavaaqa itero takyuqi varuvata

30 qamwanrama kye vaisi mpotanavanto qovarama vita Iesusira vatama kyeta qua ti varura. Mwitana nyutu Mosesivavata Iraisaavavata.

³¹ Mwitanqaatairo nyaamwuni Kotiva hu inraikyava itero takyuqi varuvata mwitanahua Iesusiravata variqata Iesusiva Kotiva tuntema kyero Ierusalemini qutu quani quara timwaqi vura.

³² Mwihua ti varuvata Pitaaravata, mwia henahua mwitanahuavata, suruara huvata vaita kyeta sivita taqovaro Iesusiraqaatairo nyaamwunyaa inraikyavanto itero takyuqi varuvaro varuvata vaisi taaratanavanto Iesusira vatama kyeta sivita varura.

³³ Iesusiravata varu vaisitanahua virera huvaro Pitaava Iesusirara tiqaro, Nronra vaisio, kyugemama tirenramwu ivatama kyeta varuro. E qiove tirera, tirenramwu haraara nraamwu taaramponramwu hoqa taare. Iara mpo, Mosesirara mpo, Iraisaarara mpoma kyeta hoqa nyataare, tiro. Pitaava hia nai tu quara ntapihiraitiro, apiqama kyero mwi quara tura.

³⁴ Pitaava mwitaa ti varuvaro tonamwuvanto qovarama viro mwihua ntumwaqu kyovata Iesusira nraaqiaranramwuvanto mwi inraikyara taqorara aatu hi varurua.

³⁵ Mwitaa huvaro quavanto tonamwuqitairo tiqaro, Mwaa ni maaque. Nte mwaa mwi vaisirave timwa kyena mwia mwatama taurave. Nkye mwia qua nraahu riaate, tiro.

³⁶ Mwi quara timwa nyi taiqa kyovata mwinramwuhua taqovaro Iesusiva nanrianraa varuvata mwihua tirema variqata mwi entara mwi inraikyara taqorara hia mpohuavata timwa nyunra.

Iesusiva nyaako mpoqitairo vaana titovaro vura

(Matiu 17:14-21; Maaki 9:14-29)

³⁷ Mwia qanranraa mwinramwuhua taaqi mwiaqaatai utonte vuvata nraakye qora airivanto nrumu Iesusira huntu kyora.

³⁸ Huntu kyovaro vaisi mpovanto nraakye qora utaqitairo aakyara ntero tiqaro, Mwaanra ti variara vaisio, po, qati e nrinra nrumu ni maaqu taqaante. Mwia ni nraaqiara kuaiqia mwata taurave.

³⁹ Vaanavanto taura ni maaqu tuqara tutaiharo mwiva qua aakyara timwa kyeqaro mwiva kyuqu kyaquq tuto/ato ato hi variharo taara-paravanto nraahu mwia nroqitairo nri varirave. Mwitaamaqi viqaro vaanavanto hia qamwanrama mwia tuta kyaraitiro, qati nraahu mwia tutero variqaro mwia mpoqama kyero ntukutu kyarero uti variho.

⁴⁰ Nte i nraaqiaranramwuanra tiqana, Po, qati vaana mwia titaaite, tuqata mwihua mwia titavarovata hia nrirarero virave, tiro.

⁴¹ Vaisi mwiva mwitaa tuvaro Iesusiva tiqaro, Nkye mwaa entara varia nraakye qorahua nkye kyuqe aanraqaa nraahu nrrohiataara vahata nkye hia avuqavu hi aanranraqaa nrrohi variavo. Nkye Kotirara qumimaqama kyeqatama hia mwianra riaavo. Qikye, nkye ni popohaira uti variavanä nte nataama entave nkyi kyapata variqi viqanave nkyi kyaahaqa hianinrave? tiro.

Iesusiva mwitaa timwa kyero mwiva vaisi mwianra tiqaro, Ena mwaqa vita varera nriante, tuvaro

⁴² mwiva nai mwaqa vita varero nri varuvaro vaanavanto mwia mwaaqu ntutahaa kyovaro mwiva mwatasata tumu ntuvaro kyuqu kyaquq tuto/ato ato hi varuvaro Iesusiva vaana mwia inronrama kye titamwa kyero, nyaako mwia vara qioqama kyero mwia vitaqiro iro nai qora mwunra.

⁴³ Mwia mwuvata ekyaa nraakye qoravanto kyuqu ntukikinraaqata kyeta tiqata, Qikye, Kotiva kepukyavanto variho, tita tura.

Iesusiva nai qutuaninranra qaiqaa vutu kyero timwa nyunra

(Matiu 17:22-23; Maaki 9:30-32)

Nraakye qoravanto Jesusiva mpo kyaiqa mpo kyaiqa varorara kyauqu ntukikinraaqate varuvaro

⁴⁴ Jesusiva nai nraaqiaranramwuanra tiqaro, Nte nkyi timwa nyiani quara hia taunru kyaate. Mpowanto ni mwatani mwatatai nraaqiaranramwuanra qovarama kyairata ni ntavaaqaqvujita uro vaisi kyauquqi kyevaravé, tiro.

⁴⁵ Jesusiva mwitaa tuvata mwia nraaqiaranramwu mwi quara okyara hia ntapihi kyeta riora. Jesusira nraaqiaranramwuvanto mwia quara hia ntapihi kyeta riaate tiro, mwia quara okyavaranto ugeta vahuvata mwihua aatu hiqata hia mwia quara okyarara Jesusiva kyapara hura.

Tiriqitairo tavave vunyaa vaisivanto variananrove tura

(Matiu 18:1-5; Maaki 9:33-37)

⁴⁶ Jesusira nraaqiaranramwuvanto tavave tiriqitairo vunyaa vaisivanto variananrove timwa kyeta inronra hi varuvaro

⁴⁷ Jesusira mwihua su nyaatoqi vahu quara ntapihi kyero Jesusiva nraaqiara pata mporu vita kyero nai nraaqani vatero

⁴⁸ mwihua timwa nyinro tiqaro, Vaisi mpovanto nianra rieqaro nraaqiara pata mwataata hianinra qamwata mwateqaro mwiva nivatama qamwata mataananrove. Mwiva nianra qamwateqaro mwiva Kotiva ni titairaravatama qamwata mwataananrove. Tavave nkyiqitairo pataqiaru utu quariva, mwivama nkyi vuni variqaro nrutu nronra vataava variananrove, tiro.

Vaisi mpovanto Jesusira nrutu nteqaro kyaiqa varora

(Maaki 9:38-40)

⁴⁹ Jesusiva mwitaa tuvaro Ioniva tiqaro, Nronrao, tire taqauraro vaisi mpovanto i nrutu nteqaro vaana tite varirave. Mwiva hia tirivatama kyero i vataqiro nrohi variva mwitaa ihatara tita, tire mwianra eqaante timwa kyeta mwia antua kyauro, tiro.

⁵⁰ Mwitaa tuvaro Jesusiva Ioninravata, hini mwihuavata, timwa nyinro tiqaro, Nkye hia mwitaa hiataarave. Hia mwia antua kyaate. Mpowanto hia nkyi uaqiamma nyataariva, mwiva nkyi kyaahaqa hiarivama variho, tiro. Jesusiva turama.

Sameriaavanto hia Jesusira qamwata mwatora

⁵¹ Jesusira vitero nyaamwuni quariva qaumato vahuvato Iesusiva Ierusaremini quari vu nraatova nraahu vahuvato mwiva aanraqaa viro.

⁵² Aanraqaa viqaro Jesusiva nai nraaqiaranramwu sitovata mwihua nraante vuhua uro Sameriaani mwatukya mpoqi uro nteta Jesusiva vaitaaninra tera hirera huvata mwi mwatanaahua qaqao tita,

⁵³ Jesusiva Ierusareminianra nrinrenra hiama qio mwaini vaitaananrove, tura.

⁵⁴ Mwitaa tuvata Jesusira nraaqiaratana Iemisikya Ionikyatana mwi quara riovoro raraqa tovatatana mwihua Jesusirara tiqata, Nronrao, e qiove tiraqe tiretana nyaamwunianra aakyara qiararo qiyavanto tumu mwi mwatanaahua itamwa taiqa kyaarive, tita.

⁵⁵ Mwitanaahua mwitaa tuvaro Jesusiva tuqasaaviro mwitanaahua inronra hiro tiqaro, Hia mwitaa hiate, tiro.

⁵⁶ Mwitaa timwa kyero Jesusiva nai nraaqiaranramwu kyapata mpo mwatukyaqira kurama.

Jesusira vataqita virera uti varuhua

(Matiu 8:19-22)

57 Mwihua aanraqaa vi varuvaro vaisi mpovanto uro ntero Iesusirara tiqaro, Nte i nraaqiara varirerave. E taini tainive vinanrani nte i vataqina virerave, tiro.

58 Mwitaa tuvaro Iesusiva mwianra tiqaro, Haunri e paparuqa hiro-re. Qaakyau vairivanto nai nraamwu nruaunru tairaqi vaite varirave. Nyaamwavanto nai nraamwuqi vaite varirave. Nte mwatani mwatatai nraaqiarava vaitaari nraamwuva hia vaiho, tiro.

59 Mwitaa timwa kyero mwiva vaisi mpore ni pataqira nriante tuvaro mwi vaisiva tiqaro, Kyai nte ntene kora nraante uro quntamwa tena nrumu i vataqina quankye, tuvaro

60 Iesusiva qaqao tiro, Qutu qua vaisihua votima kye varihua mwihua qioma qutu quaninra mwia quentevarave. E uro Kotiva ntaqikyiani quara nraakye qora timwa nyianta, tiro.

61 Iesusiva mwitaa tuvaro vaisi mpovanto tiqaro, Nte i vataqina vireranave. E giove tiraqe nte quariva uro ntene nramwunaahua kyauqu nyina vuqo timwa kyena nriantye, tiro.

62 Mwitaa tuvaro Iesusiva mwianra tiqaro, Qaqao, ni kyaiqa tohara tero mwiaqatairo mpo inraikyara rieqaro ni kyaiqa qaqlira kyero quari vaisiva hia qio Kotiva ntaqikyi mwatukyaraqi quananrove, tiro.

10

Iesusiva vaisi 72 nramwu sitovata vura

1 Nronravanto mwitaa timwa kyero mwiva vaisi 72 nramwu nronraqama kyero mwihua sitero tiqaro, Nkye taaratana taaratana viqata nte virera hiani mwatukyara mpo mwatukyara mpo mwatukyara nkye nraante ni puni quate, tiro.

2 Iesusiva mwitaa timwa kyero mpo quaqaa ntumwa kyero timwa nyinro tiqaro, Kyara airivanto keko tihata mwia vantu vareta nrihua hia airivanto variavo. Nkye aakyo qora kyapara hivarо mwiva kyaiqa vaisi mponramwuvata sitairata uro kyara vantuate.

3 Qio nkye quate. Nte nkyi sitaarita nkye sipisipi nraati votima kyeta qaakyau vairi varinani vivarave.

4 Nkye viqatama hiama munimave, tuave, kyuqu nraamwumate inraikyarave, vareta quate. Aanraqaa viqatama hia nkyi antueqata qua tihua qua mwantaate.

5 Nkye nraamwuqi uro nteta nraamwuqi varihua qua mwanteqata mwataama qiate, Kotiva nkyi qamwata nyatairaro nkyi mwutukyavanto qibaakyama vahirata variate, qiate.

6 Nkye mwitaa timwa kyeta taqaivaro vaisi mpovanto mwi quarara qamwata kyero varirera, Kotirara aakyara nteqata mwi vaisira qamwata mwataante qiate. Taqaivaro mpovanto mwi quarara hia qamwata kyero varirera, hia mwi quara mwia mwiate.

7 Kyaiqa vaisivanto nai kyogaa varairara tita, nkye mwatukyara mpoqi uro variqata nraamwu kuaaqi variqi vivata mwihua nkyi kyarave nramnive nyinra mwia nraahu nreqata variate. Hiama mpo nraamwu mpo nraamwuqi nrohiqata kyara vara nraate.

8 Nkye mwatukyara mpoqi uro ntaivata mwi mwatanaahua nkyi qamwata nyateta tirivata variate tivera, mwihua nkyi nyi kyarara mwi nraahu nreqata

9 mwi mwatukyaraqi nriqa virata varihua kyuqema nyateta mwi mwatanaahua tiraqata, Kotiva ntaqikyiariva qaumatoma vaiho, qiate.

¹⁰ Nkye mwatukya mpoqi uro ntaivata mwi mwatanaahua hia nkyi qamwata nyateta hia tirivata variate tivera, qaqlira kyeta aanraqaa nrumu variqata

¹¹ nkyetaqaaatai ntuvrenrauma kyeta mwitaama timwa nyiate, Kotiva nraakye qoraqaa ntaqikyiari entava qaumato vahata tire mwi quara nkyi timwa nyinrenrata nrurahuave. Nrurata nkye tiri qoririma timwataavata, hia qaqliraavata uro ntanteta nriananrave, qiate.

¹² Nraakiara Kotiva ekyara entaqaa ko qiani entara Sotomi mwatanaahua qua nronra varaivata nkye mate ni qua rieta qoririma kye varihua nkyema qua nronra mpoqiaavata varevarave.

Nraakye qora Iesusira qoririma mwatohuara po tura

(Matiu 11:20-24)

¹³ Po, nkye Korasini mwatukyani variahuate. Po, nkye Vetasaitea mwatukyani variahuate. Nkye taqevarave. Nte nkyi suqaa nronra kyaqa varauntema kyero mpovanto Taiaa mwatanaahuaqvata Sotomi mwatanaahuaqvata vara nyatotirio, mwi mwatanaahua qamwanrama kyetama tuvaaqa nrihi kyaama vara utu varetu hora vara qu varetu qora aanra qaqliram kytotirio.

¹⁴ Ekyara entaqaa Kotiva mwi mwatanaahuaqaa qua nronra vatero nkyiqa qua nronra mpoqiavatama vataananrove.

¹⁵ Po, nkye Kapenaami mwatanaahua nkye tiqata, Tire nronraqama vita nyaamwuni quananrave, qiaivo. Qaqao hiave. Nkye hia ni qua riaara kyaara Kotiva nkyi vara kyero qiaqi kyaananrove, tiro.

¹⁶ Iesusiva mwitaa timwa kyero nai nraaqiaranramwu timwa nyinro tiqaro, Nkyi qua riaari vaisiva ni quavata riaananrove. Nkyi qoririma nyataariva nivata qoririma mataananrove. Ni qoririma mataari vaisiva Kotiva ni titairavatama qoririma mwataananrove, tiro.

Iesusiva 72 vaisinramwu sitohua uro ntanteta nrurua

¹⁷ Iesusiva mwitaa timwa kyero vaisi 72 nramwu sitohua uro nrohitia qaiqaa uro ntanteta mwihua qamwata kyeta nrumu Iesusirara tiqata, Qikye, nronrao, tire i nrutu nteqata vaanavata sitaurata nritare quavo, tita.

¹⁸ Mwihua mwitaa tuvaro Iesusiva nkyiari timwa nyinro tiqaro, Nte taqe varuqaro Saataaniva nyaamwusairo aaquakyaavanto tintema kyero tumu ntaho.

¹⁹ Nkye riaate. Nte nkyi nronraqama kyaugata nkye varivaro quaihave, vaisi ruani tovesivave, varirata nkye mwivau qatima kyuqu ntamwaqi vivarave. Nkye qiomia nkyeta nramwutaa Saataaninra nraatara kyaivarohia nkyi ruananrove.

²⁰ Nkye vaanavanto nkyi qua riaira, mwianra hia qamwataate. Nkyi nyutu nyaamwuni qara ntumwa taira, mwianra rieqatama nkye qamwataate, tiro.

Iesusiva qamwatora

(Matiu 11:25-27, 13:16-17)

²¹ Iesusiva mwitaa tuvaro Kotira mwanraquravanto mwia kepukyaqama kyovaro mwiva qamwata kyero variqaro Kofirara tiqaro, Ko, e nronravanto nyaamwuvata mwatavata ntaqikyi variaravave. E mwi inraikyara mwi inraikyara tugeta tera hia nronra vaisi ekyaa okyara taqaa vaisihua nyaamwutaraaitira, mwi inraikyara qumina vaisi nyaamwute varianranra tina, nte i nrutu tuaaherauquo. Eo ko, e ena mwutukya vahira mwitaa hiataa iharara tirama, mwitaa hiaro, tiro.

²² Iesusiva mwitaa timwa kyero mwiva tiqaro, Ni kova nianra ekyaa inraikyaa ntaqikyiante tirave. Hia qumina vaisivanto ni mwia mwaqaqu

okyara ntapihiarave. Ni kova nai nraahu ni okyara ntapihi kyairave. Hia qumina vaisivanto ni kora okyara ntapihiarave. Nte mwia mwaaquvanto nraahu mwia okyara ntapihi kyaurave. Nte tahuave timwa nyiataa hiraqe timwa nyianrihua, mwihuavatama ni kora okyarara ntapihi kyeta riemwaqita vivarave, tiro.

23 Jesusiva mwitaa timwa kyero tuqasaa viro nai nraaqiaranramwu nkyiariaraa timwa nyinro tiqaro,

24 Nkye mate mwaa entara taqaarara qamwataate. Haaru nronra vaisive, poropeti vaisive, vunyaa vaisive, mwihuavata mate nkye taqaa inraikyara taqaare tura, hia taqorave. Nkye mate mwaa entara rie varia quara, mwihuavata riaare tura hia riorave, tiro. Mwitaa turama.

Nai nramwutaa kyaahaqa hu vaisirara tura

25 Mwaanra okyara ti varuva mpovanto nri ntero Jesusiva api qua qiarive tiro Jesusirara tiqaro, Mwaanra ti variara vaisio, nte nataa hiani kyaigara varaqina quaninraqatainave ekyaa enta qati variqina quaninrave? tiro.

26 Tuvaro Jesusiva mwia kyapara hiro tiqaro, Kotira qua mwaanra qara ntumwa tova nanreve tiho? Mwia okyaravanto nataamave vaiho? tiro.

27 Tuvaro vaisi mwiva tiqaro, Mwia qara ntumwa tova mwataama tiho: Iqaa ntaqikyira Kotirara ekyaa mwutukyaqitairave, vu nraatoqitairave, mwanraquraqotairave, ena kepukyaqotairave, Kotirara nraahu i mwutukya vahiarive. Inanra mwutukya vahintema kyero ina nramwunaanranravata i mwutukya vahiarive, turave, tiro. (Lo 6:5)

28 Mwitaa tuvaro Jesusiva tiqaro, Qio e mwitaamaqira viqarama ekyaa enta qati variqira vinanrave, tiro.

29 Jesusiva mwitaa tuvaro mwaanra okyara ti varuva Jesusira qua nraataara kyaankye tiro tiqaro, Qaqao, tavave ni nramwunaan mwiva variho? tiro.

30 Tuvaro Jesusiva mwaa quaraqaa ntumwa kyero timwa mwinro tiqaro, Vaisi mpovanto Ierusaremisairo mwatukya mpo Ierikonianra uto ntero vuvare. Mwiva aanraqaa vi varuvata mpuara vaisi mponramwuvanto mwia ntavaaqavu kyeta mwia tuavaaqa ntupema kye vareta, mwia ntuqutu kyeta vate vuvaro aavata ntumwa viro aanraqaa vahurave.

31 Mwiva aanra mwiaqaa vahuvaro Kotira kyaiqa vara mwate varu vaisiva mwia nramwunaan kuaa mwatanaavanto tumiqaro aanra mwiaqaa taqovaro mwi vaisira ntuqutu kyeta kyova vahuvaro mwiva vitira aanra tokya hisataa tumitarero vuvare.

32 Vaisi mwiva qati tumitarero vuvaro vaisi mpovanto mwia kuaa mwatanaa Rivaira okyarakavento, mwivavata Kotira kyaiqa vara mwate varuva tumu ntero mwia aitutuma kyero tagero, qaqira kyero nai heanaanra mwia nraantantero vitira aanra tokya hisataa tumitarero vuvare.

33 Vaisi mwivavata qati vuvaro Sameriaa vaisi mpovanto hia mwia nramwunaava, nanrianra mpo mwatanaa vaisivanto aanra mwiaqaa viqaro vaisi mwia tagero mwianra po kye timwa mwatero

34 mwia nraaqani uro variqaro vahamwenraqovata, uainiqovata, mwia mwamwanta teqa tora hiqama kyero rupa mwatero mwia kyavuhu kyero nai ntonkiqa mwaanri vatero, mwia vitaqiro uro munima kyeqata vaite varu nraamwunraqi kyero mwiaqaa ntaqikyi varurave.

35 Mwia qanranraa mwiva virera hiro 2 kinaa nraamwu qora mwinro tiqaro, Vaisi mwiaqaa kyugema kyera ntaqikyi variraqe nte quariva

(Wok Pris 19:18)

nrohina uro ntantena nrianriva nrumu nataama munimave mwiaqaa kyenanra ina mwiankye, turave, tiro.

³⁶ Iesusiva mwitaa timwa kyero mwiva mwaanra okyara ti varu vaisira kyapara hiro tiqaro, Mpura vaisivanto vaisi mwia aavata ntuqutu kyeta vate vuvaro mwiva varuvata vaisi taarampotanavanto mwia tumu taqorave. Taarampo mwitanaqitairo tavave mwia nramwunaa votima kyero variho? tuvaro

³⁷ mwaanra okyara ti varu vaisiva tiqaro, Mwianra po kye tiqaro kyaahaqa hu vaisivave, tuvaro Iesusiva mwia timwa mwinro tiqaro, Evata uro vaisi mwiva hunte hiante, tiro. Iesusiva turama.

Iesusiva Mataakya Mariaakya uro taqora

³⁸ Iesusiva nai nraaqiara kyapata Ierusareminianra aanra vuraqaa vuva mwatukya mpoqi uro ntovaro nraakyе mpo, mwia nrutu Mataava Iesusira qamwata mwatero nai nraamwuqi vitaqiro uro kyora.

³⁹ Iesusiva mwipi variqaro qua okyara timwa nyiqinro vuvaro Mataara nrunravanto mwia nrutu Mariaava Iesusira nraaqani mwatakyaa viro variqaro mwia qua rie varvara.

⁴⁰ Mariaava rie varuvaro Mataava kyara tera hiqaro airi kyaiqa nai nraahu varovaro mwia uaqia huvaro mwiva Iesusirara tiqaro, Nronrao, ni nunravanto hia ni kyaahaga ihana nte ntena nraahuma kyara tera hi varuqo. E hiave mwia taqaaro? E mwianra tiraro mwiva nrumu ni kyaahaqa hiarive, tiro.

⁴¹ Mwitaa tuvaro nronravanto nai timwa mwinro tiqaro, Mataao, Mataao, e mpo inraikya mpo inraikyara nronraqama kyera rie variaravave.

⁴² E kuua inraikya vuni vahi inraikyara nronraqama kyera riaataarave. Mariaava ntapihi kyeroma nrumu variqaro mwi inraikyara riaiho. Hia mpo inraikyavanto mwia antua kyaarive, tiro. Iesusiva turama.

11

Mwataama kyeta Kotiravata qua qiate tura

(Matiu 6:9-15, 7:7-11)

¹ Mpo enta Iesusiva mpoqi uro variqaro Kotiravata qua ti varura. Mwiva Kotiravata qua timwa faiqa kyovaro mwia nraaqiara mpovanto tiqaro, Nronrao, Ioniva nai nraaqiaranramwu timwa nyinro mwataama kyeta Kotiravata qua qiate turave. Evata tiri timwa timwinraqe tire ntapihi kyeta Kotiravata qua qiare, tiro.

² Mwitaa tuvaro Iesusiva mwihsa timwa nyinro tiqaro, Mwataama kyeta Kotiravata qua qiate:

Ko,

I nrutu kyotata nrutu kyugera tire tuaherauro.

E tiriqaa ntajikiyiqira vina entava qamwanrama nrianrive.

³ Tire ekya enta kyara nraananra tiri timwiante.

⁴ Mpohua tiri uaqjama timwa taavata

tire qaqira kyaunantema kyera evata

tire i qua nteqa kyaana quara nruka timwa taante.

E tiri tivita vare vi variraqe

tire hia uaqia hi kyaiqara utuare, qiate. Mwitaa timwa kyeqata Kotiravata qua qiate.

⁵ Iesusiva mwitaa timwa kyero nai nraaqiaranramwuanra tiqaro, Nte qati qua mpo tirerave. Nkyiqtairo mpovanto enta mwutukya nai qata vakyyaa nraamwu qesaqaa uro ntero tiqaro, Ni vaisio, qamaa taarampoqia ni mpiante.

6 Ni toti mpovanto nyianrasairo nriva ni nraamwuqi nri ntaiharo kyara hia vahianave, tiraro mwia qata vakyaa mwiva tiqaro, Qaqira kyera quante.

7 Nte qesa tita tena ntene nraaqiararavata vaitema varuqo. Hia nte sivina kyara i mwinrenrave, qiananrove.

8 Mwitaa tiraro mwiaqaatairo mwiva raaquta kyero nyaanru timwaqi viraro haunri mwiva mwitaa timwaqiro quankyorave tiro, kyara mwia mwiananrove. Hia mwiva mwianra mwiva ni kata pakyaave timwa kyero mwianra rieqaro mwia kyara mwiananrove. Mwiva nai qata vakyaa mwiva pupohama kyero nyaanru timwaqiro quaninra, mwianra riero mwiva siviro mwia mwiananrove tuqo.

9 Mwianra rieqatama nte nkyi timwa nyianinra riaate. Nkye Kotirara nyaanru tivararo mwiva mwi inraikyara nkyi nyianrive. Nkye puaamaqi vita uro puaama kyaate. Nkye qesa ntutivararo Kotiva qesa qatua nyataarive.

10 Kotirara nyaanru qiariva qioma varaananrove. Mpo inraikyara puamaqiro quariva qioma puaama kyaananrove. Qesa ntututuanu vaisira qatuama mwataananrove.

11 Nkye nraaqiara sohuaqitai tavave mwia mwaqvavato tavukya mpiante tirara e mwia qarura mwinanra? Hia mwitaa hinanrave.

12 I nraaqiaravanto kokoraara uru mpiante tirara e uapaa tovesivanto vaisi kutuaninrave mwia mwianrave? Hia mwitaa hinanrave.

13 Nkye uaqia hia vaisilua variqatavata nkye kyuqe inraikya nraahu nkyeta nraaqiara nyi variarave. Nkyi sova Kotiva mpo? Mwiva nkyi nraatara kyero qihakyma kyero nyi varivama variho. Mwiva nkyi sova nyaamwuni variva variraro mpovanto mwia mwanraqurara nyaanru tiraro Kotiva qihakyma kyero nai mwanraqura mwiananrove, tiro. Turama.

Pierisepuriva Jesusira kyaahaqa hi variho tura

(Matiu 12:22-30; Maaki 3:20-27)

14 Vaana hia qua tuva vaisi utaqi varuvaro vaisi mwivavata hia qua tuvaro mpo enta Jesusiva vaana mwia titovaro nritarero vuvaro mwiaqaatairo mwi vaisiva qio qua tuvata nraakyne qora ntuvantuama vuhua qikye timwa kyeta kyauqu ntukikinraaqate varura.

15 Mwitaa huvata hini uhua qaqao tita, Pierisepuriva vaana vunyavaa Jesusira kyaahaqa hi variharo Jesusiva vaana site variho, tita.

16 Mwihua mwitaa tuvata vaisi mponramwuvantovata Jesusira mwataara hiare tita Jesusirara tiqata, E nronra kyaiqa mpo tiri tivuqaa varairaque tire taqeta iara qutaama Kotiva i titaiho qiare, tita.

17 Mwitaa tuvaro Jesusiva mwihua nraato tuto quara ntapihi kyero, mwihua timwa nyinro tiqaro, Kuua mwatanaavanto ntainra vita nai ri nai ri hivera, mwihua qamwanrama taiqa vivarave. Nraamwu kuaaqi varihua ntainra vita nai ntaqi nai ntaqi hivera, mwihua kyatita nkyiariara nkyiariara mpona mpona uro varivarave.

18 Saataaniva ntaqikyi variarihua ntainra vita nai ntaqi nai ntaqi hi varivera, qiove mwiva kepukyaqama kyero vahiananro? Hia qiove. Nkye nianra tiqata, Pierisepuriva mwia kepukya mwihanro mwiva vaana site variho, qia quava

19 qutaa qua vahitiri, tava nkyi sataqi nriahua mwihua kyaahaqa ihatave vaana tite variavo? Nkye nianra qia quara nkyi sataqita nrohi vaisilua unra quave tivarave. Nkyi sataqita nrohi vaisilua ti quava nkyi tu varaananrove.

20 Kotiva ni kepukyia mpirhana nte yaana site varuqo. Mwi quava qutaa qua vahirara tita, nkye mwianra rieqatama Kotiva tiriqaa ntaqikyiar entava nri ntaiho qiate.

21 Vaisi kepukyavanto huru kyaamwu terama kyero nai nraamwuqaa ntaqikyiqiro viharo mwiva vatai inraikyava qio vahirave.

22 Mwiva variraro vaisi kepukyia mpovanto mwia nraataraariva nri ntero mwivata ntaqiro mwia nraatara kyero mwiva nraamwu qova huru kyaamwu tutero qio ntaqirerave qiani inraikyara mwiaqaatairo ntavihi kyero varero, mwiva vataani inraikyara vara kyero mpohua nkyiariara nkyiariara nyiananrove.

23 Mpovanto hia ni kyaahaqa hiariva varirera, mwiva ni uaqjama mataarivama variananrove. Mpovanto hia ni kyaahaqa hiqaro ni quara ntuvantua hiariva, mwi vaisiva ni quara sataqiro mpona mpona uro kyaarivama variho.

Vaana okyarara tura

(Matiu 12:43-45)

24 Vaanavanto vaisi utaqitairo nritarero uro aahara mwataqaa nrohiqaro kyai nte tekyia hiankye timwa kyero taqairaro hia tekyia hiariva vahiraro mwiva nai tiqaro, Kyai nte nrumu ntantena vaakya qaqira kyau nraamwunra vaisi mwia utaqi uro qaiqaa variankye, timwa kyero

25 uro taqairaro nraamwu mwia ntupi kyero hiqama kye avuqavuma taiva vahiraro

26 vaana mwiva uro nai hena vaana 7 nramwu, mwia nraatara kyeta qora kyaiqa uti variahua, mwihua nyaanrama kyero sitero uro vaisi mwia utaqi variananrove. Vuni vaisi mwiva vaana kuaiqiatama kyero variqaro mwiva uaqjama viro varirave. Nraakiara mwiva vaana airi kyapata variqaro anomia kyero uaqjama viro varirarama tuqo, tiro.

Qamwate okyarara tura

27 Iesusiva mwitaa tuvaro nraakyie qora ntuvantua vita varuraqitairo nraakyie mpovanto vera kyero tiqaro, Qikye, i mwata kyero nraamwa mwi nraakyeva, mwiva mpoqama kyero qamwateqaroma variho, tiro.

28 Mwitaa tuvaro Iesusiva qaqao tiro, Kotira qua rieqata nrohiahua, mwihuama qamwateqata varivarave, tiro.

Nronra kyaiqa tiri tinraamwutaante tura

(Matiu 12:38-42; Maaki 8:12)

29 Iesusiva mwitaa tuvata nraakyie qora airivanto mwia qua riarerata mwia vara ututu hi varuvaro Iesusiva mwihua timwa nyinro tiqaro, Mwaa entara varia nraakyie qorahua anomia kye uaqia hi kyaiqara uti variqata Kotirara hia riariqata nrohi variarave. Mwihua nronra kyaiqa tinraamwu tairaqe taqeta tire qutaave qiare ti variarave. Hia nte mwihua suqaa ntena okyara nyaamwu tena nronra kyaiqa varaaninrave. Kotiva haaru nkyi haivaqara Ionaanra utu kyontema nivata mwitaa hiananrove. Mwianra nraahu rieqatama nkye nianra Kotiva mwia kyaahaqa hi varivave tivarave.

30 Ionaava mwitaa mwitaa hvutva Niniveqinaahua mwianra ntapihi kyeta tiqata, Kotiva mwia kyaahaqa hi variho, turave. Nte mwatatai mwatatai nraaqiaravama varuqo. Nkye mwaa entara varia nraakyie qorahua ni okyarara ntapihi riaate tina, nte Ionaava hinte hianinrave.

31 Haaru nkyi haivaqava Soromoniva kyuqe vu nraato vahuvaro mpo okyara mpo okyara taqe varuva varuvaro nraakyie mpo vunyavaa mwia qua riarerato nai vevara nyianrasairo nrumu Soromoninra qua riorave. Mwi nraakyeva mwitaa hurara tiro, mwiva nraakiara ekyara entaqaa variqaro nkyiqa qua vateqaro mwitaama qiananrove. Nte nyianrasaina

Soromoninra qua riarerana quavarave. Nkye haaru varuvaro Soromoninra nraatara kyo vaisiva nkyi nraaqani varuvata nkye hia mwia qua riorave, qiananrove.

32 Haaru Ionaava Kotira qua timwa nyuvata Niniveqinaahua uaqia hu aanranra qaqlira kyorave. Mwi mwatanaahua mwitaa hurara tita, mwihua nraakiara ekyara entaqaa nkyiqa qua vatevarave. Mwihua mwitaama tivarave. Tire Ionaanra qua rieta uaqia hi aanranra qaqlira kyaavananrave. Nkye varuvaro Ionaanra nraatara kyo vaisiva Kotira qua nkyi timwa nyuvata nkye hia mwia qua riorave, tivarave.

Vuvanto mwamwanta omwave tura

(Matiu 5:15; 6:22-23)

33 Hia mpovanto omwa cupi kyero amaatainani vatairave. Mwiva hia tave vara kyero mwiaqaa ntumwaqu tairave. Nraakyae qoravanto vera ntehua ntapihikye taqaate tiro, mwiva omwa cupi kyero virira nyaamwuni vatairave.

34 I vuvanto omwa votima kyero ite variho. I vuvanto kyuqema vahiraro i mwamwantavanto ntuvahaahananrove. I vuvanto uaqia hirera, i mwamwantavanto ekyaa enta hiraqi vahiananrove.

35 Qio rauri variqara variante. I mwamwantaqi ntuvahaani inraikyava hia vahiraro enta hiani inraikyava vahiankyorave.

36 I mwamwantaqi ntuvahaani inraikyava nraahu vahiraro hia enta hiani inraikyava mpooqavata vahirera, i mwamwanta ekyama omwa votima kyero kyuqema kyero itaanarove, tiro.

Parisi vaisinramwuanra tura

(Matiu 23:1-36; Maaki 12:38-40; Ruku 20:45-47)

37 Iesusiva mwitaa timwa kyero qua timwa nyi taiqa kyovaro Parisi vaisi mpovanto ni nraamwuqi nrinra kyara nraante tuvaro Iesusiva mwikyantiri uro mwia nraamwuqi variqaro kyara nranrenro mwatakyaa viro varura.

38 Varuvaro Parisi vaisi mwiva taqovaro Iesusiva hia kyauqu higaraitiro, kyara nranrenra uti varuvaro mwiva nrighrama viro airi nraato tuvaro

39 Iesusiva nronravanto mwia timwa mwinro tiqaro, Nkye Parisi vaisinramwuvanto kaapuvata tanuvata mwaqaqani nraahu hiqe variarave. Nkyi mwaatira utaqi mpuara varevavata, uaqia hi kyaiqara utivavata nraahuma vaiho.

40 Nkye ueraqa hiahuave. Kotiva nkyi mwaqaqani pahi ututaiva mwiva nkyi mwaatira utaqivata ututairave.

41 Nkye mwaatira utaqi vahi inraikyara vehi vaisi kyaahaqamaqi vivaro nkyi mwamwantavanto qiomata takyuuvi viro vahiananrove.

42 Nkye Parisi vaisinramwu nraakiara raupirima vira mwianra rieqanama nte nkyiara po tuqo. Nkye Kotira qua hini pata quaqia nraahu rieqatama nkye avuqavuma kyeta nanra inraikya aqkyoqi tutara ntainra kyeta 9 nramwu nkyeta vareta kuaiqia Kotira mwi variarave. Nkye mwi quara pata quaqia nraahu rieqatama Kotira qua nronra qua vahira nkye hia rie variarave. Ntapihi kyeta ko ti okyararave, Kotirara mwutukya vahiany okyararave, nkye mwi quara qaqlira kyeta hia nronraqama kyeta riaarave. Nkye Kotira qua pata qua nraahu rieqatama mwia qua nronra quavata riaataara vahata hia riaarave.

43 Nkye Parisi vaisinramwu nraakiara raupirima vira mwianra rieqanama nte nkyiara po tuqo. Nkye mwaanra nraamwuqi nronra vaisivanto varia taintaraqaara nraahu uti variarave. Nraakyae qoravanto nkyiara nronra vaisive timwa kyeta kyakyma kye qua mwantaate titi, nkye maaketiqi qumina qumina nrohi variarave.

⁴⁴ Nkye nraakiara raupirima vira mwianra rieqanama nte nkyiara po tuqo. Nkye nanra inraikya votima kyetave variavo? Vaisi quntamwa taaraqa hia taqaraitita, nraakye qoravanto mwiaqaa nrohiqata qumina mwataqaave qiao. Nkye mwitaama kyeta variavata nraakye qoravanto nkyi taqeqlata hia nkyi uaqia hi kyaiqara taqaraitita, nkyiara vaisi kyuqe hiahuave ti variavo.

⁴⁵ Iesusiva Parisi vaisiara mwitaa tuvaro mwaanra okyara ti varu vaisiva mpovanto qaqa tiro, Mwaanra ti variara vaisio, e Parisi vaisiara tiqarama tiriavata uaqia hi quara qiaro, tiro.

⁴⁶ Mwitaa tuvaro Iesusiva mwitaa timwa mwinro tiqaro, Nkye mwaanra okyara ti variahua, nkyevata nraakiara raupirima vira mwianra rieqanama nte nkyiara po tuqo. Nkye qumina nraakye orara ekyaa mwi quara mwi quara riemwaqi quate ti variavata mwihua nkye muaanra ntai quara mwihuaqaa vataara toqaamwu tu kyeta vara qu vare variavata nkye hia nkyeta kyauqu mpoqiaavata tutu kyeta mwihua kyaahaqa hi variarave.

⁴⁷ Nkye nraakiara raupiri hira mwianra rieqanama nte nkyiara po tuqo. Nkyi haivaqahua Kotira qua ti varu vaisihua poropetinramwu rukyeta quntamwa taaraqaa nkye ori ntamwa kyeta mwunruqa hi variarave.

⁴⁸ Nkye mwitaa hiqata nkyeta haivaqahuara kyuqe hiavo qiarave. Nkyi haivaqahua Kotira qua tu vaisihua poropetinramwu rukyorave. Mwihua mwitaa hiavata qaiqaa nkye variqatama mwihua quntamwa taaraqaa mwunruqa hi variarave.

⁴⁹ Nkye mwitaa hiarara tiro, Kotiva ekyaa inraikya ntapihi kyaiva tiqaro, Ni qua ti varihua poropeti vaisinramwu sitaarita vivata mwihua mwinramwuhua mponramwu rukyeta mponramwu sataqita viqata uaqama nyatevarave, tirave.

⁵⁰ Mwaa mwatara ututo entaraqaatai Kotira poropeti vaisi ruqi nrata mate mwaa rua quava, ekyaa mwi quava nkyi mate mwaa varihuaqaa ma vahiananrove.

⁵¹ Tohara kyero Everira rukyovata mwiaqataita poropeti vaisi ruqita vita uro Sekaraiaaravata rukyorave. Sekaraiaara rukyarerera hita qia munra quaninra quaro taintara vahuvaro Kotira nraamwu kyotata vahuvoro mwia utana mwia rukyovaro mwia nraanre raururave. Qio nai poropeti ekyaa rukyora kyaara Kotira mwaa entara vari nraakye qorahuqaa qua vataananrove.

⁵² Nkye mwaanra okyara ti varia vaisihua, nkye nraakiara raupiri hira mwianra rieqanama nte nkyiara po tuqo. Kotira okyara quavanto vaihata nkye kiqa tutetama hia qesa mwia qatua kye vigeteta mwi okyarara taqaavo. Nkye nkyeta qesa mwia hia qatua kyeta viraitita, nkye mpohuavata virera hiavata mwihua antue variarave, tiro.

⁵³ Iesusiva mwitaa timwa kyero nraamwuqitairo veva ntovata mwaanra okyara tuhuavata, Parisi vaisinramwuvata, raraqa tovata Iesusirara uaqia hi quarama tiho timwa kyeta nrivaqe tire qaiqaavata riaararo uaqia hi quara tirera, koqi vitaqita vataare tita.

⁵⁴ Mwitaa timwa kyeta mwihua Iesusiva api qua qiarive tita, mpo qua mpo qua Iesusira kyapara hura.

12

*Parisi vaisi unra kyaiqara rauriqata variate, tura
(Matiu 10:26-27)*

¹ Mwitaa huvata airi tauseni nraakye qoravanto Iesusira taqarerata nrumu variqata nai rataakye nai rataakye hi variqata nai kyuqu nai kyuqu ntatami varuvaro Iesusiva nai nraaqiaranramwu nraante qua timwa

nyinro tiqaro, Qamaa pataqia taupatairaqaatairo ekyaa viro ntera vintema kyeta Parisi vaisivato nkyivata vara uaqiamma kyevorave. Mwihua kyuqe kyaiga varauro timwa kyeqata vaisi suqaa kumwaanri hi variararama tuqo. Nkye mwihua nraantantevorave.

2 Mpovanto taqaankyo tiro mate ntumwaqu taani inraikyara, nraakiara vara qosata kyaananrove. Mate uqeta taani inraikyara nraakiara qovarama kyairaro qoqama vahiananrove.

3 Nkye kyokiraqi variqata ti quara nraakiara qaata taaninraqaama rievarave. Nkye qesa titi teta mwaanrinra nraamwuqi variqata tirema kyeta qua tira, nraakiara mwi quara qesaqaatairo aakyara ntamwa kyero qiananrove.

Kotirara nraahu aatu hiqata variate tura (Matiu 10:28-31)

4 Ni mwatanaa tuaavo, nte qianinra riaate. Nkyi nyamwanta nraahu rukyehua hia mwihua nraatu aatu hiate. Mwihua nkyi rukyeta hia nkyi mwanraquravata qio rukyeverave.

5 Nkye tara nraatuve aatu hiqata varivarave? Kyai nte nkyi timwa nyiankye. Nkye Kotira nraatu aatu hiqata variate. Mwiva kepukyavanto variqaro vaisi rukyero mwiaqaatairo qioma mwia qutu vihua vinani tuto kyaarivama variho. Eo, nte nkyiarama tuqo, Nkye Kotira nraatu aatu hiqatama variate.

6 Qutaa vaisivanto munima taararu kyeqaro pata nyaamwa hini kyauquru vararave? Nkye riaate. Kotiva pata nyaamwa mpoqiaru hia taunru kyaratiro, mwiaqaavata kyuqema kyero ntaqikyi varirave.

7 Kotiva nkyiqa ntaqikyiqaroma nkyi okyara, ekyaa taqe variva, mwiva nkyi qiata kyaahivata ekyaa kyaara ntumwa tairave. Nkye qumina nyaamwa nraatara kyaarave. Kotiva qumina nyaamwaqaavata ntaqikyivara tiro, nkyiqaavata nritarero kyuqema kyero ntaqikyi varirara tita, hia aatu hiqata variqita quate.

Iesusira nrutu timwa qovara hirara tura (Matiu 10:19-20, 32-33, 12:32)

8 Nte qianinra riaante. Vaisi mpovanto nraakye qora suqaa variro timwa qovarama kyero nianra tiqaro, Nte mwia nraaqiarama varuqo, tirera, nte mwatani mwatatai nraaqiarama variqana nraakiara ntevata nyaamwunyaahua suqaa variqana timwa qovarama kyena tiqana, Nai mwi vaisivama ni nraaqiarama variho, qianinrave.

9 Mpo vaisivanto nraakye qora suqaa variro tiqaro, Hia nte Iesusira nraaqiarama varuqo, tirera, nte mwatani mwatatai nraaqiarama variqana nraakiara ntevata nyaamwunyaahua suqaa mwia vaisirara tiqana, Mwiva hia ni nraaqiarama variho, qianinrave.

10 Vaisi mpovanto ni mwatani mwatatai nraaqiarama qora qua tirera, Kotiva mwia vaisira qora qua qioma nraka mwataananrove. Vaisi mpovanto Kotira mwanraqurara qora qua tirera, Kotiva hia mwia qora qua nraka mwataananrove.

11 Nraakiara ni kyaara nkyi rupaqita uro mwaanra nraamwuqive, kamaninra vuqaave, vunyaa vaisi suqaave, uro kyaivata mwia entara hia aatu hiqatama nanra quave qiananrave qiate.

12 Mwi entara Kotira mwanraquravanto nkyi kyaahaqa hiqaro mwitaa mwitaa qiate tirata nkye mwia quara timwa nyiate, tiro.

Airi inraikya vato vaisiraqaa qua ntumwa kyero tura

¹³ Nraakye qora ntuvantua huragaatairo vaisi mpovanto Iesusirara tiqaro, Mwaanra ti variara vaisio, ni kova qutu virero hiro nianravata ni pakyaararavata nai hi inraikyarara ntainra kye varaae tirave. Mwitaa tiharo ni pakyaava nai nraahu varero hia nivata ntainra kyero mpiho. Evata tiraro mwiva nivata ntainra kyero mpiarive, tiro.

¹⁴ Mwitaa tuvaro Iesusiva mwia timwa mwinro tiqaro, Qaqao, mwaa vaisivao, Tava ni nronraqama kyaihanave nte mwi quara mwi quara qio avuqavu hianinrave? tiro.

¹⁵ Mwitaa timwa kyero Iesusiva ekyaa nraakye qora timwa nyinro tiqaro, Nkye rauriqata variate. Nkye airi inraikyave airi munimave varera mwianra nraahu nronraqama kyeta rieqata variqi vivorave. Nkye tiqata, Airi inraikya vategata qiomaa variqi quananrave, tivorave. Hia airi inraikyavanto nkyi kyaahaqa hirata nkye kyuqema kyeta variqi vivarave, tiro.

¹⁶ Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Vaisi mpovanto airi inraikya vatova kyara vara tu kyero vatovaro inraanrama vahuvoro vantiqiro vatero

¹⁷ nai timwa kyero riero tiqaro, Nte mwaa kyarara ta nraamwunraqive vataaninrave? Ekyaa ni nraamwuqi kyaravanto piqama viho, tiro.

¹⁸ Mwitaa timwa kyero mwiva tiqaro, Kyaiqe nte ekyaa nraamwu ntapairi kyena, qaiqaa nraamwu nronra airi hoqa kyena mwipi kyaravata hini mpo inraikyavata vataankye.

¹⁹ Nte mwi kyaiqara vara taiqa kyena mwitaama qianinrave, Nte kyuqemama varuqo. Airi kyara airi inraikya vahana nte airi ihi qati variqi viqana mwaa kyararavata nramanrivata nramwaqi viqana kyuqema kyena varianinrave, tiro.

²⁰ Mwi vaisiva mwitaa tuvaro Kotiva mwia timwa mwinro tiqaro, Hia i vu nraatovata vahivave. Mate entaqi e qutu vinanrave. E qutu viraro e ninive tina inraikyara mpovanto varaanarove turave, tiro.

²¹ Iesusiva mwitaa timwa nyinro qua taiqa kyero mwiva tiqaro, Vaisivanto mpo inraikya mpo inraikya ntuvantua hianinranra nraahu riemwaqiro vi variraro Kotiva mwi vaisirara tiqaro, E vatera inraikyava qumina inraikyave. Nte taquaqara e vehi vaisi nraahuma variaro. E qumina qutu vinanrave, qiananrove, tiro. Iesusiva mwitaa turama.

Hia mpo inraikya mpo inraikyara ua hiate tura

(Matiu 6:25-34)

²² Mwitaa timwa kyero Iesusiva nai nraaqiaranramwuanra tiqaro, Mwi quara rieqanama nte nkyiara mwitaama tuqo, Nkye qati variqi virarave, nkye kyara nrenranrave, nkye tuavaaqa utirarave, hia mwi inraikyara mwi inraikyarara airi nraato tuate.

²³ Nkye qati variqi viva vahirero tauraanaa inraikya vaharo nkye kyara nreva mwiva vahirero nraakiaraanaa inraikyama vaiho. Nkyi mwamwantavento tauraanaa inraikya vaharo nkye tuavaaqa ututeva nraakiaraanaa inraikyama vaiho.

²⁴ Nkye nyaamwanra nraato tuate. Nyaamwavanto hia kyara vara tu kyero vantuqiro nai nraamwuqi vate varirave. Nyaamwavanto variavaro Kotiva mwihaqaa ntaqikyiqiro viqaro kyara nyinrave. Qio nkye nraakye qoravanto nyaamwa nraatara kyaahuara tiro, Kotiva nkyiqa kyuqema kyero ntaqikyianarove.

²⁵ Nkyiqtairo tavave nte mwata mwaqa mpuahaama variankye timwa kyero mwianra airi nraato tiqaro mpo entanramwu tomaqa kyaananrove? Hiamma qio mpovanto mwitaa hiananrove.

26 Nkye pata kyaiqa mwia hia qio vare variahua tita, nkye nanraqa-mave mpo inraikya mpo inraikyara airi nraato ti variavo?

27 Uakukyaqi qupiqai maunranra rieqata variate. Mwi maunrava hia kyaanta huvu kyero nai tuapakyaara hutairave. Haaru vunyaa vaisivanto Soromoniva kyūqema kyero mwunruqama torave. Maunra pairavantiteqaro Soromoniva mwunruqama toravata nraatara kyairarama tuqo.

28 Kotiva mwivama uakukyaqi vahi maunranra mwunruqama mwatairave. Mwi maunrava mate vahirata hora qia qura kyaivaritamwa kyaananrove. Qio Kotiva qumina uakukyaqi pataqia vahi maunranravata mwunruqama mwataivara tiro, mwiva nkyi nraakye qoraqaa ntinqikyi qaro mwiva hiave nkyiyata tuavaaqa utu nyataananrove? Qikye, nkye Kotirara tiqata, Mwiva hiama qio tiri kyaahaqa hiananrove, timwa kyeqata hia mwianra kepukyaqama kye rie variavo.

29 Kotiva nkyi kyaahaqama nyate varirara tita, nkye hia nronra nraato tiqata, Nanra kyarave nraananrave? Nanra nramanrive nraananrave? timwaqi quate.

30 Mwatani variahua hia Kotirara riaa nraakye qorahua mwihua mwitaamaqi viqata mwi inraikyara mwi inraikyara puāa hirerata uti variarave. Nkye hia mwihua hiante hiate. Nkyi sova nkye ekyaa mwi inraikyara varerara ntapihi kyeroma variho.

31 Kotiva nkyiqa ntinqikyianinra nkye mwianra nraante nronraqama kyeta riemwaqi viqata Kotira kyaiqa vare varivarot Kotiva kyara mwivata, tuavaaqa mwivata, nkyi nyiananrove, tiro.

Nyaamwuni kyoqaa ntuvantua hirara tura (Matiu 6:19-21)

32 Iesusiva mwitaa timwa kyero qaiqaa tiqaro, Nkyenramwu varirerata nkye ni sipisipinramwu variavo. Hia aatu hiate. Kotiva nkyi sova nkyiara qamwateqaro varivara tiro, mwiva nraakiara nkyiqa ntinqikyi varirata nkyi mwiva ntinqikyiani mwatukyaraqi variravare.

33 Nkyeta vate inraikyara mpohua munimanra nyivata mwihua vareta nkyi munima nyivata nkye uro mwi munimanra vehi nraakye qora nyiate. Hia munima pausi mwatani taiqaaninraqi nkyeta kyoqaa vataate. Nkye munima pausi nyaamwuni ekyaa enta qati vahianinraqi nkyeta kyoqaa vataate. Mwini vate inraikyara hia mpuara varairaro hia uapaa tovesi-vanto nraananrove.

34 Nkye mwaa mwataraqaa kyoqaa ntuvantuumaqi vivera, nkye mwaa mwataraqaa vahiani inraikyara nraahu riemwaqi vivarave. Nkyi kyoqaa nyaamwuni ntuvantuuma viro vahirera, nkye nyaamwunianra nraahu nronraqama kyeta riemwaqi vivarave.

Teramate taqe variqata variate tura (Matiu 24:42-44)

35 Nkye sivita tuavaaqa tuqara kye ututeta omwa qupi kyeta terama teqata variate.

36 Nkye kyaiqa vaisi mwaanramwuhua hiante hiate. Kyaiqa vaisinramwuvanto variavarot mwihua nronra vaisivanto nraakye ntumwuanani viva urontante nrumu qesa ntukuakua hiqaro taqaihatama mwia kyaiqa vaisinramwuvanto qamwanrama qesa qatua mwataarave. Nkyevata qesa qatuararerata terama teqata variate.

37 Mwihua nronra vaisivanto nri ntero taqairata mwia kyaiqa vaisinramwuvanto hia vaite variraitita, qati sivita teramate varihua mwihua qamwataate. Mwihua mwitama varivarot mwihua nronra vaisivanto mwihua kyara nyiani tuavaaqara vara kyuqinra kyero ututero nai kyaiqa

vaisiara tiqaro, Mwatakyaa vi varivaqe nte nkyi kyara nyiankye, timwa kyero kyara nyiananrove.

38 Enta mwutukyaqive, kokoraara nruqua qianinraqaave, nronravanto uro ntantero nrumu taqairata mwia kyaiqa vaisinramwuvanto hia vaite variraitita, qati sivita teramate varihua, mwihua qamwateqata variate.

39 Qio nkye mwaa quara rieqata variate. Nraamwu gova variqaro mpuara vaisivanto mwi entarama nriananrove timwa kyero mwiva nai nraamwuqaa ntaqikyi varitirio, mpuara vaisivanto hiama qio mwia nraamwuqi vera ntero mpuara vararaitirio.

40 Mwi quara rieqatama nkyevata teramate variqata ni pekya variqi quate. Nkye ni mwatani mwatatai nraaqiarara hiama tumuananrove ti entara, mwi entaraqaa nte tumuaninrave, tiro. Iesusiva turama.

*Kyaiqa vaisi taaratanaqaa ntumwa kyero tura
(Matiu 24:45-51)*

41 Iesusiva mwitaa tuvaro Pitaava tiqaro, Nronrao, tiriara nraahu rieqarave mwi quaragaan ntumwa kyera timwa timwianro? Ekyaa huara rieqarave mwi quara tira hiaro? tiro.

42 Tuvaro Iesusiva tiqaro, Kyaiqa vaisi kyuqeva nai nronra vaisiara rieqaro kyugema kyero kyaiqa vare vari vaisiva, mwiva ta vaisira votima kyero variananrove? Mwiva kyaiqa vaisi mwataa hiarivama variananrove. Mwia nronravanto nyianran virera hiro vaisi mwia nronraqama kyero tiqaro, Ema kyaiqa vaisi hini mwihuaqaa ntaqikyiqarama mwi entaraqaa mwi entaraqaa kyara tukyama kyera nyiante, timwa kyero

43 quariva uro nyianra mponani nrohiro nrumu taqairaro mwia kyaiqa vaisivanto mwiva tintema kyero kyaiqa vare varirera, mwiva mpoqama kyero qamwataananrove.

44 Mwianra rieqana nte nkyi timwa nyuquo, Mwia nronra vaisivanto mwi vaisirara tiqaro, Nte qaiqaa i nronraqama kyaarira e ekyaa nte hu inraikyaraqaa ntaqinkyinanrave, qiananrove.

45 Mwia kyaiqa vaisivanto qaqlira kyero hia mwitaa hiraitiro, nai riemwa kyero tiqaro, Qaqao, ni nronravanto hiama qamwanrama nriananrove, timwa kyero mwiaqatairo nai henahua kyaiqa nraakye qora mwihua ntuqutu kyero vatero kyara airi nramwaqiro viro uainivata nrenro uera ntero mwitaamaqiro vi varirera,

46 mpo enta mwia nronravanto hiama mwi entaraqaa nriananrove qiani entaraqaa uro ntantero nrumu mwia kyaiqa taqero nai kyaiqa vaisi mwia ntuqutu kyero vatero mwia titero tiqaro, E ni qua hia riaahua varianani quante, qiananrove.

47 Kyaiqa vaisi mpovanto variraro mwia nronravanto mwi kyaiqara varaante tiraro mwi quara riero qaqlira kyero hia mwi kyaiqara vararero tera hiraitiro, qati variraro mwia kyaara mwia nronravanto mwia nronraqama kyero kyaamwuqo ntuqutu mwataananrove.

48 Kyaiqa vaisi mpovanto variqaro mwiva hia nai nronra vaisi kyakya hira ntapihiraitiro, mwivavata uaqia hi kyaiqara uti variraro mwia kyaara mwia nronravanto mwia pataqia ntuqutuuananrove.

Airi inraikya varehua variraro Kotiva mwihua airi inraikyara nina mpiate qiananrove. Airi inraikya mpoqiatava varaari vaisiva variraro Kotiva mwianra airi inraikya mpoqiatava nina mpiante qiananrove. Kotiva vaisi mpo pata kyaiqa nraahu mwianinra mwianra tiqaro, E mwiqiara nraahu varairaqe nte qiove qianinrave, qiananrove. Kotiva vaisi mpo nronra kyaiqa mwianinra mwianra tiqaro, E mwia nraahu varairaqe nte qiove qianinrave, qiananrove.

*Nraakye qora ntainra kyarera tumuvave tura
(Matiu 10:34-36)*

⁴⁹ Nte qia tuta kyaariro itaarive tina, mwaa mwataraqaa tumuvave. Qikye, mwi qjava vaakya ite varirage qiove qiataarave.

⁵⁰ Nte nramanri mpo varaaninra hiama varauqo. Nte mate mwia vekya varuqaro ni anoma kyero muaanra ntaihana varuqo. Nte mwitaama kye variqi vina mwiaqaatai mwi nramanrinra varena nte qio varianinrave. (Iesusiva mwi quara mwitaa tiqaro mpo quaqaa ntumwa kyero nai qoririma kyeta ru kyaivaro qutu quaninranra tura.)

⁵¹ Nkye nianra tiqatama, Nraakye qoravanto mwaateraqama vita variate tiro, mwiva tuminrave, qiarave? Qaqao, hia nte mwitaama variate tina, tumuvave. Nraakye qoravanto ntainra vita variate tina, nte tumuvave.

⁵² Mwaa entaraqaataita hini kyaucuruvanto kuaa nraamwuqi variahua ntainra vita taarampoqavanto nramwutaaqa hiqata taara mwitanahua vatama kyeta ntaqivarave.

⁵³ Qova nai mwaaquntiri ntaqiraro mwaqvavanto nai qokyantiri ntiquananrove. Nrova nai nraamwunrantiri ntaqiraro nraamwunravanto nai nrokyantiri ntiquananrove. Nraakye mpovanto nai nraaqutuntiri ntaqiraro mwiva naivata ntiquananrove, tiro.

*Mate mwaa entara okyara hia vitama kye taqaavo tura
(Matiu 16:2-3)*

⁵⁴ Iesusiva mwitaa timwa kyero nraakye qora ntuaantuama vuha timwa nyinro tiqaro, Nkye taqaavararo tonamwuvanto vutusairo nriqanro kyokira rutaihatu nkye tiqata, Vati ntirerove, qiararo vati ntirave.

⁵⁵ Nkye taqaavararo toqa vaururuvanto nrihata nkye tiqata qio vuhaanarove qiararo vuhairave.

⁵⁶ Qikye, nkye unraqanraama kyeqata kyuqe kyaiqa vare variahuate. Nkye mwi inraikyara mwi inraikyaraqaa qio vitama kye taqeta, nanraqamave nkye mwaa entara qovara hiani okyarara hia vitama kyeta taqaavo?

*I ko tirera hirara vaakya avuqavuma kyaante
(Matiu 5:25-26)*

⁵⁷ Nkye nraato tu kyeta kyuqe kyaiqa nraahu varaare qjataara vahata nkye nataamaqive hia mwi kyaqjara varavao?

⁵⁸ Mpovanto iqaa qua vatero ko nraamwuqi i vita varero virero hirera, e mwikyantiri aanrani viqarama mwi quara avuqavu hiante. Mwiya i vita varero ko riaani vaisiva hinani uro kyairaro mwiva i vita porisi mwinranro porisivanto i karavuqi uro kyaankyorave.

⁵⁹ Nte qianinra riaante. E hia karavuqitaira qamwanrama taiqenanrave. Ekyaa munima hia nai mwinraitira, hia qio vinanrave, tiro. Iesusiva turama.

13

Uaqia hi aanranra qaqlira kyaate tura

¹ Mwi entara vaisi imponramwuvanto nri nteta Iesusira timwa mwita tiqata, Karirinyaa vaisinramwuvanto quara ru kyeta Kotira qamwata mwataare tuvaro kamaniva mpo, mwia nrutu Paireativa nri ntero mwi vaisinramwuhua ru kyovaro mwihua nraanrevanto quara vaakya rukyora mwia nraanre vatama kyero vahurave, tita.

² Mwita tuvaro Iesusiva tiqaro, Karirinyaa vaisinramwu mwitaama kye qutu vurara tita, nkye nataamave riaavo? Nkye tiqata, Mwihua qora

kyaiqavanto Karirinya vaisi hini mwihua qora kyaiqa nraatara kyaihove, qia?

³ Hiave. Nte qianinra riaate. Nkyevata hia qora aanra qaqlira kyaivera, nkyevata mwinramwuhua qutu vuntema kyetama qutu vivarave.

⁴ Haaru Siroamini ori nraamwu mpuahaa nraamwuvantu ntuvuraa viro tumu ntiro vaisi 18 nramwu rukyorave. Mwi vaisinramwuhua mpo? Nkye mwinramwuhuara nanra quave qia? Nkye tiqata mwinramwuhua qora kyaiqavanto Ierusaremyahua qora kyaiqa nraatara kyovaro mwia kyaara nraamwu mwiva ntuvuraa viro mwihua ntutu tuiqa kyorave. Nkye mwitaamave qia?

⁵ Qaqao, hiave. Nte qianinra riaate. Nkyevata hia qora aanra qaqlira kyaivera, nkyevata mwinramwuhua votima kyetama qutu vivarave, tiro.

Qaampuakya voti huru fikiqaa ntumwa kyero tura

⁶ Iesusiva mwitaa timwa kyero mwiva mpo quaqaa ntumwa kyero mwihua timwa nyinro tiqaro. Vaisi mpovanto nai utaqi fiki kyatari mpo vara tutorave. Mwi vaisivara tutero vari kyero mpo enta kyai uro mwia tamwa hiq kye nraankye timwa kyero uro taqovaro hia tamwa riorave.

⁷ Hia riovoro nai kyaiqaaqaa ntaqikyi varu vaisirara tiqaro, Taqaante. Nte taarampo ihira vina nrina hiqana mwaa kyatariva tamwa riaaninra vekya varuqaro hia tamwa riairave. E mwaa teqa kyera qaqlira kyaante. Mwi kyatariva qati vahiqaro kyuqe mwata tuiqa kyaankyorave, tuvaro

⁸ mwia kyaiqa vaisivanto qaqlira tiro. Kuua ihira mwia qati kyairage nte mwia okyaraqi ontu quvu kyena tapitaani mwatara varaqina mwipi vaten quvu ntamwa taariro tamwa riaarive.

⁹ Mpo ihiqi taqairaro mwia kyatariva tamwa riairera, e mwia qati kyaante. Hia tamwa riairera, e qioma teqa kyera qaqlira kyenanrave turave, tiro. Iesusiva mwi quara turama.

Iesusiva mwaanraqaa mwoqa ntavako nraakyera kyuqema kyora

¹⁰ Mpo enta mwaanraqaa Iesusiva mwaanra nraamwu mpoqi qua timwa nyi varuvaro

¹¹ nraakyre mpovanto mwipi varura. Vaanavanto nraakyre mwiaqavata varuva mwia nriqa vu inraikyara mwuvaro nraakyre mwiva 18 ihira nriqa vuvaro variqiro vura. Mwia mwoqavanto ntavaka vuvaro mwiva hia ntutata variraitiro, kakataama viro nraahu varura.

¹² Iesusiva mwia taqero mwia nraanrama kyero tiqaro, Mwaa nraakyre, i nriqa viva tuiqama viho,

¹³ timwa kyero nai kyauqu mwiaqaa viti vatovaro nraakyre mwiva qamwanrama kyero mwaamwianra viro variqaro Kotira nrutu tuaahereqaro varura.

¹⁴ Kotira nrutu tuaahere varuvaro Iesusiva mwaanra entaqaa mwia nraakyre kyuqema kyorara tiro, mwia kyaara mwaanra nraamwuuqaa ntaqikyi varu vaisira raraqa tovaro nraakyre qorara tiqaro, Kyaiqa enta 6 nramwuma vaiho. Mpovanto nkyi nyamwanta kyuqema kyaarive titi, mwi entaraqaa nraahuma nriate. Hia mwaanra entaqaa nkyi mwamwanta kyuqema kyaarive titi nriate, tiro.

¹⁵ Vaisi mwiva mwitaa tuvaro nronravanto Iesusiva nai timwa mwinro tiqaro, Nkye unraqama kyeqata kyuqe kyaiqa vare variahuave. Nkye ekya mwihua mwaanra entaqaa nkyeta purimakauve, ntonkive, nraamwuuqitai ntatu kyeta sitaqita tumu nramanri nyi variarave.

16 Nraakye mwaava nkyi haivaqara Evarahaamunra nraisivanto variharo Saataaniva 18 ihiara mwii nraakyera rupa tairave. Qioma mwaanra entaqaa kyaahaqa hiqana huvantu kyaaninrave, tiro.

17 Iesusiva mwitaa tuvata mwia nramwutaahua mwii quara rieta kyaaurita varuvuta qumina nraakye qora mwihua Iesusiva kyaiqa varorara rieqata Iesusira qamwata mwatora.

Maasiteti uruqaa ntumwa kyero tura

(*Matiu 13:31-32; Maaki 4:30-32*)

18 Iesusiva tiqaro, Kotiva ntaqikyiariva nanra inraikya votima kyerove vahiro iho? Nkye mwianra ntapihi kyeta riaate tina, nte nanra inraikyaqaa ntumwa kyenave qianinrave?

19 Qio nte maasiteti uruqaa ntumwa kyena tirerave. Vaisivanto maasiteti uru aakyogi isa taiharo mwia uru pata mwiqiava ntukohiro qupiqero kyatari nronra vahata nyaamwavanto kyauqu kyaara mwipi nrumu vari vaite hiarave, tiro.

Mpereti nrakyo tairaqaa ntumwa kyero tura

(*Matiu 13:33*)

20 Mwitaa timwa kyero Iesusiva qaiqaa tiro, Kotiva ntaqikyiariva nanra inraikya votima kyerove vahiro iho?

21 Mwiva taupataira votima kyeroma vaiho. Nraakyevanto mpereti utarera hiro parauaa vara kyero mwiva nrakyo taarive timwa kyero, taupataira vara kyero paraua vatama kyero tuqasaa kyaiharo taupataiva ekyaa viro nrinro hiro mpereti uqenra kyaiharo nrakyo tairave, tiro.

Qesa patara tura

(*Matiu 7:13-14, 21-23*)

22 Iesusiva mwitaa timwa kyero Ierusareminianra viqaro mwatukya nronraqivata, pataqivata, kyuqe qua mwakyaakya timwa nyinro.

23 Mwitaamaqiro vuvaro vaisi mpovanto tiqaro, Nronrao, nraakiara Kotiva tiriqitairo pataqiatanave tivitaananrove? tiro. Mwitaa tuvaro Iesusiva mwihua timwa nyinro tiqaro,

24 Nyaamwunianra quava qesa pataqiaeve. Nkye mwukyaari mwata kyeta qesa mwina quate. Nte nkyi qutaa timwa nyuqo. Nraakye qora airivanto quare tiravata hia qio vivarave.

25 Nraamwu qova qesa tita tairata nkye mwaatani varivorave. Nkye mwaatani varita qesa ntuqutita tiqata, Nronrao, qesa qatua timwa taante, tivarо mwiva, Qaqao nkye tainyaahuave. Nte hia nkyi taqauhuave, qiananrove.

26 Mwiva mwitaa tirata nkye tiqata, Qaqao, tire ivatama kyeta kyara nraunruahuave. E tiri mwatukyaqi variqara qua timwa timwianruahuave, tivarо mwiva qaiqaa tiqaro,

27 Nkye tainyaahuave? Nkye uaqia hi kyaiqara uti variahuave. Hiante mwaisaita quatemba, qiananrove, tiro.

28 Iesusiva mwitaa timwa kyero tiqaro, Nkye nraakiara taqaivata nkyi haivaqahua Evarahaamuvavata, Aisaakivavata Iaikopuvavata, ekyaa poropeti vaisinramwuvavata Kotira mwatukyaqi varivata nkye mwaaqani varita ntateqata nkyeta aanrai teti nreqata varivarave.

29 Nraakiara huari vu nri ntainanyaahuave, huari vu vinanyaahuave, mwaa hini tokyanyaahuave, vitira hini tokyanyaahuave, mwihua nrira ntuaantua hita Kotira mwatukyaqi kyara nrevarave.

30 Mate mwoqani varihua nritareta vunima varivarave. Mate vuni varihua tumitareta mwoqanima varivarave, tiro.

*Iesusiva Ierusaremiqinaahuara mpo kye tura
(Matiu 23:37-39)*

³¹ Iesusiva mwitaa tuvata Parisi vaisinramwu nri nteta Jesusirara tiqata, Sivira nritarera mpo mwatukyani quante. Herotiva vunyaa vaisivanto' i ru kyarero uti variho. E mwaini variraro mwiva i ru kyaankyorave, tita.

³² Mwihua mwitaa tuvaro Iesusiva timwa nyinro tiqaro, Nkye uro qaakyau vairi mwia timwa mwiate. Nte matevata huravata vaana siteqana nraakye qora kyuqema nyatarerave. Mwitaamaqi vina mpore taarampo enta mwiqiaraqaa ntene kyaiqa taiqa kyarerave. Nkye mwia mwitaama timwa mwiate.

³³ Nte matevata huravata mporavata Ierusaremini virerave. Hia qumina mwataqaa poropeti vaisi ru kyevarave. Ierusareminima ru kyevarave.

³⁴ Po, Ierusaremiqinaa nraakye qora tuaavo. Po, Ierusaremiqinaa nraakye qora tuaavo. Nkye Kotira poropeti rukyaahuave. Kotiva titai vaisihua variavata nkye ori pati kyeta mwihua ntuqutu kyaahuave. Kokoraaravanto nai nraatiqaa nraaokya iri kyero ntumwaqu taintema kyena nte qaiqaavata qaiqaavata nkyiara po timwa kyena nkyiqa ntaqikyrera huqata nkye ni qoririma mataavo.

³⁵ Mwia kyaara Kotiva nkyi qaqlira kyairaro nkyi mwatukyagi hia vaisivata varivarо qumina mwata nraahuma vahiananrove. Nte qianinra riaate. Nkye mwaa entaraqaatait hia ni taqaratita, variqi vivaqe nte qaiqaa tumu variarita nkye mwi entara ni ntapihi kyeta taqeqata nianra tiqata, Kotiva titai vaisiva tumiho. Mwia kyuqema mwataare tivarave, tiro. Iesusiva mwitaa turama.

14

Kyuqu kyauqu kyoto vaisira kyuqema kyora

¹ Mpo enta mwaanraqaa Iesusiva Parisi mwihua nronra vaisi nraamwuqi kyara nranrenro vuvata mwipi varuhua mwiaqaa vu vate varura.

² Mwitaa huvaro Iesusira tataaqa vaisi mpo mwia kyuqu kyauqu kyota vuva varuvaro Iesusiva mwi vaisira taqero

³ mwaanra okyara tuhuavata, Parisivata, kyapara hiro tiqaro, Tire mwaanraqaa vaisi kyaahaqa hiqata mwia mwamwanta kyuqema mwataarer, tire tetu mwaanra qua nteqave kyaananrave, hiave nteq kyaananrave? Nkye tivaqe riaankye, tiro.

⁴ Iesusiva mwitaa tuvata mwihua hia qua mpoqiaavata tuvaro Iesusiva vaisi mwia vita kyero mwia mwamwanta kyuqema kyero titovaro vura.

⁵ Vuvaro Iesusiva mwipi varuhua tiqaro, Nkyiqitairo mwia mwaaquvantove, mwia kauvantove, mwata quvu teraqi ntumwa virata nkye hiave mwi entaraqaa mwia ntanrau mwaanri kyevarave? tiro.

⁶ Iesusiva mwitaa tuvata mwihua nai timwa mwi quava hia vahuvata tirema varura.

Nkyiari vara mwataniqa hi quara tura

⁷ Iesusiva nraamwu mwipi variqaro taqvata kyara nranrenra nruhua mponramwuvanto tainta kyuqeraqaa nraahu mwata kyaavirerata uti varuvaro Iesusiva mpo quaqaa ntumwa kyero timwa nyinro tiqaro,

⁸ Vaisi mpovanto nraakye ntumwinrenra hiro iara nrinra kyara nraante tirara hia enanasaira uro tainta nronra kyuqeraqaa mwatakyaa vira variante. E mwiaqaa variraro nraamwu qova nronra vaisi mpo nraanrama kyero

⁹ iara tiqaro, Tumitarera e uto mpuani variraro nronra vaisi mwaava tainta mwiaqaa mwatakyaa quarive, qiankyorave. Mwiva mwitaa tirera,

e mwipi nronraqama kyera kyauriqarama uro nraakye qora mwoqani mwatakyaa vira varinanrave.

10 Hia mwitaa hiratira, mwataas hiante. Kyara nranrenra hiro i nraanrainranra virava uro nraakye qora mwoqani mwatakyaa vira variante. E mwitaa hiraro nraamwu qova nri ntero iara tiqaro, Ni totio, hia mwini variante. Nrumu mwaini tainta kyuqeraqaa mwatakyaa quante, tirar e nraakye qora suqaa uro tainta nronraqa mwatakyaa vira variqara e nrutu nronra varenanrave.

11 Nai nrutu nraahu tuaaheraariva variraro nraakiara mwia nrutu vara mwataniqa hiananrove. Nai nrutu vara mwataniqama kye variariva variraro nraakiara mwia nrutu tuaahera kyaananrove, tiro.

12 Iesusiva mwitaa timwa kyero vaisi mpovanto mwianra nrinra ni nraamwuqi kyara nraante turara tiqaro, Nraakye qora kyara nyinrenra hira hia ena toti vaative, ena qata vakyaave, ena vataahuave, i nraamwunaahua airi inraikya vatehuave, hia mwihua nyaanraante. E mwihua nyaanrama kyera nyinrenra mwihua mwia hiniqama kyeta inavata mwivarave.

13 Nraakye qora kyara nyinrenra hira vehi nraakye qorave, kyuqu kyuauquara ihuave, vu qipaarihuave, mwihua nyaanraante.

14 E mwitaama varihua nyaanrama kyera aaqaa nraahu nyinranro Kotiva mwianra riero i qamwata mwatero i kyuqema mwataananrove. Nraakiara Kotiva kyuqe nraakye qora qati vara sivuma kyaaninraqaa Kotiva ina kyoqaa mwiananrove, tiro.

*Nronraqama kyero kyara nyiani vaisiraqaa ntumwa kyero tura
(Matiu 22:1-10)*

15 Iesusiva mwitaa tuvaro vaisi mpovanto mwipi kyara nre varuva Iesusirara tiqaro, Qikye, Kotira mwatukyaqi kyara nrehua qamwateqata varivarare, tuvaro

16 Iesusiva mpo quaqaa ntumwa kyero mwia timwa mwino tiqaro, Vaisi mpovanto kyara nronraqama kyero tera taarama kyero vatero nraakye qora nyaanranrenra tuhua timwa nyitero tiqaro, Mwi entara kyara nraan-inraqi nriate, tiro. Mwitaa timwa kyero varuvaro

17 mwi entava nri ntovaro mwiva nai kyaiqa vaisi titero tiqaro, Uro tirata nriate. Ekyaa inraikya terama taiho, qante, turave.

Tuvaro mwia kyaiqa vaisivanto uro timwa nyuvata

18 mwihua kuaiqia kuaiqiyavanto tiqata, Po, mpo inraikyavanto ni antua kyahana nte hia quaninrave, titi. Vuniqama kyero mpovanto mwia kyaiqa vaisiara tiqaro, Nte mwata mpo kyoqama kyena varauqo. Nte mwia uro taqarerave. Po, hia qio ivatama kyena quaninrave,

19 tuvaro mpovanto tiqaro, Nte kyaiqa vare varia purimakauhua kyauqu-rutana kyoqama tauqo. Nte kyaiqa vareqana mwihua mwataara hirerana vuqo. Po, hia qio ivatama kyena quaninrave, tuvaro

20 mpovanto tiqaro, Nte mateqa nraata varauqo. Po, hia qio quaninrave, tiro.

21 Ekyaa mwihua mwitaa nraahu tuvaro kyaiqa vaisi mwiva nrumu ntantero uro mwihua tu quara nai nronra vaisi timwa mwuvardo mwia raraqa tovaro nai kyaiqa vaisiara tiqaro, Hiantera mwatukyaqi virava uro aanra nronraqataairave, aanra patagaatairave, vehi vaisivata, kyuqu kyuauquara ihuavata, su qipa quarihuavata, kyuqu are aremaqita nrohihuavata, sita varera nriante, turave.

22 Tuvaro mwiva tuntema kyero uro sitaqiro nrumu kyero tiqaro, E qiarantema kyena sitaqina nrumu kyuquqaro tainta hini qati nraahu vaiho tuvaro

²³ mwia nronravanto tiqaro, Mwatukya mwiqi qaqlira kyera virava uro aanraqaatairave, aakyocqitairave, api nraakye qora taqerahua mwihua vuavi raavira tirata nrumu ni nraamwu piqa kyaate.

²⁴ Nte i timwa mwuqo. Tauraaqama kyena nyaanrama tau nraakye qorahua hiama qio ni kyara nrevarave, turave, tiro. Iesusiva mwitaa turama.

*Iesusira vataqiro virera hu vaisirara tura
(Matiu 10:37-38)*

²⁵ Nraakye qora airivanto Iesusira vataqita vi varuvaro Iesusiva tuqasaa viro mwihua timwa nyinro tiqaro,

²⁶ Vaisi mpovanto ni nraaqiara varirero nte hunani nrinrenra hiro mwiva nai nrohua qohuave, nraata nraaqiarave, nai qata vakyaahuave, nai mwata mwaqa qati variqiro quaninranrave, nronraqama kyero riemwaqiro viqaro nianra hia nronraqama kyero riaariva hiama qio ni nraaqiara variananrove.

²⁷ Mpovanto hia nai rukye kyatarira vara qu varero ni pataqiro nrinrenra, mwiva hiama qio ni nraaqiara variananrove.

²⁸ Nkyiqitairo vaisi mpovanto nraamwu nronra hoqarera hiro mwiva tauraaqama kyero mwatakyaa viro nraato tuqiro viro kyatariarave, mpo inraikyarave, qioma munima kyaaninrave timwa kyero, nraamwu hoqairave.

²⁹ Mwiva hia mwitaa hirera, mwiva nraamwu hoqebaro nraamwu tura nraahu ratairaro munima taiqa viraro hia hoqa taiqa kyairata nraamwu mwia taqehua raima mwateta tiqata,

³⁰ Qikye, vitira taqaate. Mwi vaisiva nraamwu tohara tero hia qio taiqa kyaaho, tivarave.

³¹ Mpo quavata tirerave. Vunyaa vaisi mpovanto nai henanra mpovata ntaqirera hiro, mwiva tauraaqama kyero mwatakyaa viro variqaro nai ntapaqta kyaara ntumwa kyero taqero tiqaro, Nte qiove mwia nraataara kyaaninrave, hiave qio mwia nraataara kyaaninrave? tirave. Mwiva taqairaro mwia ntaqi vaisihua 10,000 nraahu varivaro mwia nramwutaara ntaqi vaisihua 20,000 varivera, mwiva ni nraatara kyaankyo tiro tiqaro,

³² Kyai ni nramwutaa mwiva nyianrani variraqe nte vaisi mpo titaairo mwiva uro mwianra qao tiro mwaateraqama variare qiananrove, tiro.

³³ Iesusiva mwitaa timwa kyero mwiva tiqaro, Mwia votima kyeta nkye hia mpo inraikya mpo inraikya tutara qaqlira kyaivera, nkye hiama qio ni nraaqiara varivarave.

*Iesusiva horeqaa ntumwa kyero tura
(Matiu 5:13; Maaki 9:50)*

³⁴ Hore kyuqe inraikyave. Horevanto uaqlama viro hia qiakyaa hirera, tire hia qio qaiqaa utu kyaararo qiakyaa hiananrove. Tire mwia qaqlira kyaananaarave.

³⁵ Mwitaama quani horera hia qio kyara kyaahaqa hiraro kyaravanto kyuqema kyero qupiqaananrove. Kyaravanto kyuqema kyero qupiqaarive titia hia mwi horera purimakau raha kyapata qio vatevarave. Nkyi nyaato vahiarhua hivera, nkye mwi quara ntaphi kyeta riaate, tiro.

¹ Mpo enta taakisi vare varuhuavata, qora kyaiqa vare varuhuavata, Iesusira qua riarerata nri nteta varuvata

² Parisi vaisinramwuvantovata, mwaanra okyara ti varu vaisihuavata, nrutu nraunru/nrunru nraanru tita tiqata, Qaqao, mwaa vaisiva qora kyaiqa uti varia vaisihua qamwata nyatero mwihua kyapata kyara nre variho, tita.

³ Mwitaa tuvaro Iesusiva mwaa quaraqa ntumwa kyero mwihua timwa nyinro tiqaro,

⁴ Nkyiqitairo vaisi mpovanto 100 sipisipi vataariva taqairaro sipisipi mpovanto raupirima virera, mwi vaisiva nataave hiananrove? Mwiva 99 sipisipi mwihua utaqi kyero mpo sipisipi raupirima quaninra puua hirero quananrove. Mwiva puaamaqiro viro uro mwia puaama kyero taqaananrove.

⁵ Mwiva mwia puaama kyero qamwata kyero vara nai qumwuqa qu varero

⁶ uro mwaatani mwia kyero mwiavata variahua nyaanrama kyero tiqaro, Nkye nrumu nivatama kye qamwataate. Ni sipisipi raupirima vihana nte mwia puaama kyauquo, qiananrove.

⁷ Nte qianinra nkye ntapihi kyeta riaate. Mwia votima kyeta 99 nraakyе qora hia qora aanra nrohhua varivata nyaamwuni varihua mwihua qamwate variqata taqaivarо qora kyaiqa varaari vaisiva kuaiqavanto qora aanra qaqira kyairera, mwianra rieqata nyaamwuni varihua mpoqama kyeta qamwatevarave.

Munima raupirima vuraqaa ntumwa kyero tura

⁸ Nte qaiqaa mpo quaqaa ntumwa kyena tirerave. Nraakyе mpovanto ori munima kyauqurutana vataiva taqaiharo munima kuaiqia raupirima vive. Mwitaa hiraro mwiva nataave hiananrove? Mwiva omwa upi kyero nraamwuqi ntupi kyero mpoqi mpoqi puaamaqiro viro taqaananrove.

⁹ Mwiva puaama kyero varero nai totivaativata, mwiavata variahua vata, nyaanrama kyero timwa nyinro tiqaro, Nkye ni vatama kyeta qamwataate. Nte munima raupirima kyaura puaama kyena varauquo, qiananrove.

¹⁰ Nte qianinra riaate. Mwia votima kyero qora kyaiqa varaari vaisiva qora aanra qaqira kyairera, mwianra rieqata nyaamwuni varihua qamwate varivarave, tiro.

Mwia mwaaqvanto raupirima vuraqaa ntumwa kyero tura

¹¹ Iesusiva mwitaa timwa kyero mwiva tiqaro, Vaisi mpovanto qoraisi nraaqiara taaratana mwata tovaroma

¹² mwia mwaqq mraakiaraava siviro nai qorara tiqaro, Ena vataana inraikyara nraakiara ntainra kyera ni mpirerave tinanra mate nraahu ni mpiante, tiro. Mwitaa tuvaro mwia qova nai vato inraikyara ntainra kyero nai mwaqqutana nyunrave.

¹³ Nyuvaro mwia mwaqq mraakiaraava pataqia variro nai hu inraikyara mpohua nyiqanro munima varero nyianra mpo mwatani vuva uro mwini variqaro qora vaisi kyapata qora kyaiqaa munima vare vura taiqa tuto kyorave.

¹⁴ Taiqa tuto kyovaro mwiaqatairo nronraqama kye aara nto entava nri ntovaro mwiva vehi vaisi variqaro

¹⁵ uro mwi mwataragaanaa vaisi mpoqaa kyaiqa vararero viro. Vuvaro mwi vaisiva tiqaro, Uro ni quaraqa ntaqiqiyqara mwihua kyara nyianta, turave.

¹⁶ Tuvaro mwiva quara kyara nyi variro tiqaro, Qikye, quara kyara nyiqana viti vaati ntenavata nraataarave, tuvaro mwia kyara mwianri vaisiva hia varura.

¹⁷ Mwia nraataa huvaro varuvaro mwia vu nraato ntutoraa vuvaro mwiva riero tiqaro, Ni kora kyaiqa vaisi airinramwuvanto variavaro airi kyara vahata mwihua nreqata variavana nte mwaini variqana kyarara huго.

¹⁸ Kyai nte sivina ntena kova hinani nrumu ntantena quankye. Nte urontena ntena korara mwitaama qianinrave. Ko, nte Kotiravata ivata uaqia hi kyaiqara utu nyatauqo.

¹⁹ Mwia kyaara nte hia qio i nraaqiara kyugeva varianinrave. E ni vara mwataniqama kyairage nfe i kyaiqa vaisi nraahu variankye. Nte quariva uro mwitaa tirerave, tiro.

²⁰ Mwitaa timwa kyero mwiva siviro nai qova hunani nrunra. Nai qora nraamu qaumato nruvaro mwia qova nyianrasairo vutu mwia taqero qamwata kyero hiantero uro nai mwaaqu ntavaaqavu kyero mwia kyuquqama mwatero varuvaro

²¹ mwia mwaaquvanto tiqaro, Ko, nte Kotiravata ivata uaqia hi kyaiqarama utu nyatauqo. Mwia kyaara nte hia qio i nraaqiara kyugeva varianinrave, tiro.

²² Mwitaa tuvaro mwia qova nai kyaiqa vaisi timwa nyinro tiqaro, Hianteta nkye uro tuavaaqa kyugera varaqita nrumu mwiate. Kyaatamwata inranravata varaqi nrumu humwataate.

²³ Purimakau nraati kyugera rukyeta utaate. Mate tire mwia qamwata mwataaananrave.

²⁴ Ni maaquvanto qutu viho tuqaroma qati nri ntaiho. Ni maaquvanto raupirima viho tuqaroma qati nrihana vitaqo, tiro. Mwitaa timwa kyero nai mwaaqu qamwata mwatero kyara vara kyero mwia vaahaqama mwatorave.

²⁵ Mwia vaahaqama mwate varuvaro mwia vakyaava kyaiqa varonasaиро nri ntero riovata

²⁶ ihi nte variqa tuvaro mwiva nai qora kyaiqa vaisi mpo kyapara huvaro mwiva mwia timwa mwinqro tiqaro,

²⁷ I qatavanto vevasairo nri ntaiharo i qova mwianra qamwateqaro purimakau nraati kyugera ru kyero uta mwataiho. I qata kyugema nai vitero qamwateqaroma mwitaa lho, tiro.

²⁸ Mwitaa tuvaro mwia vakyaara raraqa tovaro kyaru ntumwa kyero tiqaro, Hia nte nraamwuqi virerave, timwa kyero mwaatani varuvaro mwia qova veva ntero mwianra po qati nraamwuqi nriante tuvaro mwiva mwitaama tiro:

²⁹ Nte airi ihiara i kyaiqa vaisi votima kyena i kyaiqa vareqana hia nte mpo entavata i qua raaquta kyaurave. Nte ntena toti qamwata nyataankye tuqara e hiama memenra nraati mpoku ntuqutu ni mpiaro.

³⁰ I nraaqiara mwaava api qaraqita nrohia nraakyehuavata e hiana inraikyara varaqiro mwihuaqaa uto taiqa kyero nrihanrama e purimakau nraati kyugera qumina ntuqutu kyera mwinra hiaro, tiro.

³¹ Mwitaa tuvaro mwia qova qaqao tiro, Ni maaquo, e mpo enta mpo enta ni vatama kyera variaravave. Nte hu inraikyara ekyaa inraikya mwia tetatana humanrave.

³² I qatavanto qutu viho tuqaroma qati nri ntaiho. Mwiva raupirima viho tuqaroma qati nrihana vitaqo. Mwitaa ihataro tita, tire mate mwia qamwata mwatarerave, turave, tiro. Iesusiva mwi quara turama.

¹ Iesusiva nai nraaqiaranramwu timwa nyinro tiqaro, Haaru vaisi mpovanto munima airi vatova varuvaro vaisi mpovanto mwia kyaiqa vareqaro mwiva vato inraikyaraqaas ntaqikyurave. Mwiva hu inraikyaraqaas ntaqikyri varuvaro mpovanto nri ntero tiqaro, E hiana inraikyaraqaas ntaqikyi variva e hiananra hini nramwa kye variho, tuvaro

² munima vato vaisiya mwiva mwia nraanrama kyero tiqaro, E nanra varaaana quarave nte riauqo? Nte hu inraikyara ntaqikyiqara varenanra qara ntumwa tairage taqaankye. E hia nte hu inraikyaraqaas ntaqikyinanrave. E taiqenanrave, tiro.

³ Mwitaa tuvaro kyaqiqa vaisi mwiva riero tiqaro, Po, ni nronravanto nte kyaiqa varauraqaatairo ni taiqama kyaananrove. Nte nataave hianinrave? Hia nte kepuqaqama kyena ontu quvuaninrave. Nte mpohuara nianra po tiqata munima mpiae qianinra kyauruaninrave, tiro.

⁴ Mwitaa timwa kyero mwiva kyai nte mate mwitaa mwitaa hiarilo nraakiari ni titairata nraakye qora nianra qamwateqata ni pitaqita uro nkyiari nraamwuqi kyaate, tiro.

⁵ Mwitaa timwa kyero nai nronra vaisiqitaita munima vareta qakyo mwianre tu vaisihua nyaanrama kyero vuni nru vaisira mwia kyapara hiro, Ni nronravanto iqilu vataiva nataamave qati vaiho? tuvaro

⁶ mwiva tiqaro, Mwiva niqi vataiva vahamwenra 100 taqu vaiho, tuvaro mwia munimaqaa ntaqikyuva tiketi mwinro 100 qaqlira kyera 50 nraahu tiketiqaas qara ntumwa taante, tiro.

⁷ Mwitaa timwa kyero vaisi mpore tiqaro, Mpo e, iqilu vataiva nataamave qati vaiho? tuvaro mwiva tiqaro, Uiti tua 100 tuama qati vaiho, tuvaro mwiva tiketi mwinro 100 qaqlira kyera 80 nraahu tiketiqaas qara ntumwa taante, tiro.

⁸ Mwiva vato inraikyaraqaas ntaqikyiqaro mpuara vare varu vaisiva mwitaamaqiro vuvaro mwia nronravanto taqero tiqaro, Qikye, vaisi mwihua mwia toti variate tiro, mwiva vu nraato tuqiro viro mwiva mwitaa hi variho turave. Mwatani varia vaisihua nkyiari hena vaisi kyoqaa nai mwi nai mwi hiqata nkyiari riemwa kyeta kyoqaa kyaiqa varaqi quarave. Mwihua kyoqaa kyaiqa vareqata omwa itainani nria vaisihua nraatara kye variarave, tiro.

⁹ Iesusiva mwitaa timwa kyero mwiva tiqaro, Nte qianinra riaate. Mwatani variahua apiqama kyeta tuto kye varia munimanra nkye mwi munimanra vara kyetama avuqavuma kyeta totiqa hiqata nyiate. Mwitaa maqita vivaro munima taiqa virata nkye ekya enta qati variqi vi nraamwunraqi vivaro nkye munima nyi vaisiva nkyi qamwata nyataaanarove.

¹⁰ Vaisi mpovanto pata kyaiqaqia vareqaro mwiva mwi kyaiqara avuqavuma kyero varairera, mwi vaisiva nronra kyaiqavata avuqavuma kyero varaanarove. Vaisi mpovanto pata kyaiqa vareror mpuara utiqaro varairera, nronra kyaiqavata mpuara utiqaro varaanarove.

¹¹ Nkye mwata mwaaga variahua apiqama kyeta kye varia munimanra hia kyuqinra kyeta ntaqikyivera, Kotiva hia nkyiara, Nkye ni kyoqaa qutaa kyoqaaqaa ntaqikyivarave, qiananrove.

¹² Nkye mpova hiani inraikyaraqaas hia kyuqema kyeta ntaqikyivera, Kotiva nkyiara, Nkye nkyeta vate inraikyaraqaavata hia kyuqema kyeta ntaqikyivarave, timwa kyero hiama nyiananrove.

¹³ Hia kyaiqa vaisi mpovanto vaisi nronra taaratanaqaa kyaiqa varaanarove. Mwiva mwitaa hiqaro nronra vaisi mpore mwia mwutukya vahiraro mporara hia mwia mwutukya vahianarove. Mwiva nronra vaisi mpore kyuquerave timwa kyero mpore uaqia hiravema qiananrove.

Airi inraikya vatevave, munimavantove, nronra vaisi votima kyero nkyiqa ntaqikyi varirera, nkye munima varerara nraahu riemwaqì viqata hia Kotira kyaiqavata qio varaqi vivarave, tiro.

Iesusiva qua mwaanra mponramwu tura

¹⁴ Iesusiva mwitaa tuvata Parisi vaisinramwuvanto mwi quara riovoro mwihua mwutukyavanto munimanra nraahu vahuvatara tita, mwihua Iesusiva qua turara raima mwatora.

¹⁵ Raima mwatovaro Iesusiva mwihua timwa nyinro tiqaro, Mwihua nkyiara avuqavu nrohi varia vaisihuave qiate tita, nkye nraakye qora suqaa avuqavuma kyeta nrohi variarave. Nkye mwitaa hiavar Kotiva nkyi mwutukyaqi uaqia hi kyaqara taqe varirave. Mwatani variahua tiqata, Kyuqe inraikyave, ti variaria mwi inraikyarara Kotiva tiqaro, Uaquia hi inraikyara qumina inraikyave, ti varirave.

¹⁶ Haaru hia Ioniva varu entara Mosesira qua mwaanravantovata poropeti vaisi qua mwaanravantovata vahurave. Mwiaqatairo Ioniva nramanri nyi varuva nri ntero qaraakya qua kyuqe qua Kotiva nkyiqa ntaqikyiani quara timwaqiro vuvata mwiaqataita ekyaa nraakye qora nkyiarianasai kepukyaqama kyeta Kotira mwatukyaqi virerata uti variarave.

¹⁷ Qio nkye riaate, Haaruua mwaanra qua qatima vaiho. Nyaamwuvantovata mwatavantovata taiqa viraro Kotira qua nronravantovata patavantovata qatima vahiananrove.

Nraakye qaqlira kye okyarara tura

(*Matiu 5:31-32, 19:9; Maaki 10:11-12*)

¹⁸ Vaisivato nai nraata qaqlira kyero mpo nraakye varaiva, mwi vaisiva Kotira qua mwaanra nteqa kyaqarave. Mpovanto qaqlira kyai nraakyera varai vaisiva, mwivavata Kotira qua mwaanra nteqa kyaqarave, tiro.

Rasarusirara tura

¹⁹ Iesusiva nai nraaqiaranramwu timwa nyinro tiqaro, Vaisi mpovanto airi inraikya vatova kyuqe tuavaaqa nraahu ututero mpo enta mpo enta qiaqyaa hu kyarara nraahu nreqanro varurave.

²⁰ Mwiva mwii kyarara nraahu nreqanro varuvata vaisi mpo mwia nrutu Rasarusira vitaqita uro airi inraikya vato vaisira nraamwu gesana kyovaro varura. Mwi vaisiva hia mpo inraikyavata vatova vehi vaisivanto varuvaro rumpuaravanto nraahu ekyaa mwia mwamwantaqi vahuvaro

²¹ variqaro mwiva airi inraikya vato vaisiva kyara nreqanro viti vaati qaqlira kyora mwia nraahu utu kyeqaro nranrenro varura. Rasarusiva mwini varuvaro vairinramwuvanto vitare nritare hiqata mwia rumpuara pohi varurave.

²² Hia mpo inraikyavata vato vaisiva qutu vuvata nyaamwunyaaahua mwia vitaqita uro Evarahaamuva nai haivaqava varunani kyorave. Uro kyovaro airi inraikya vato vaisiva mwivavata variro qutu vuvata mwataqì quntamwa torave.

²³ Quntamwa tovaro mwiva qutu vuhua varunani variqaro atura nti varurave. Atura ntigaro mwiva vuru taqovaro Rasarusiva Evarahaamukyantiri qamwateqaro nyianrani varurave.

²⁴ Mwini varuvaro mwiva Evarahaamunranra aakyara ntero tiqaro, Evarahaamu, ko, e qati nianra po kye timwa mataante. E Rasarusira titairaro mwiva nai kyauqu uro nramanriqi mwaaamwi ntamwa kyero tumu ni maaqinriqaa vatairaro tututaarive. Nte qia nronraqi variqana atura ntigana varuqo, tiro.

25 Mwiva mwitaa tuvaro Evarahaamuva qaqao tiro, Ni maaquo, e riaante. E tauraa qati varuna entara e kyuqe inraikya vatoraro Rasarusiva qora inraikya nraahu vatorave. Mate mwiva mwaini variqaro qamwateqaro varihara e mwini atura ntiqara variaro.

26 E qaiqaavata rie variraqe nte qua mpoqiavata i timwa mwiankye. Nte varuqara e variararo tiri utaqaa okai nronrama vaiho. Mwaisaita mwini vivorave, mwisaita mwaini nrivorave tiro, okai nronra utaqaa vatairave, tiro.

27 Evarahaamuva mwitaa tuvaro mwi vaisiva tiqaro, Po, ko, nte iara qati ni qua riaante tuqo. E Rasarusira titairaro mwiva ni kora nraamwuqi uro ntero.

28 ni kata pakyaa kyauquru variahua timwa nyianrive. Mwihuavata mwaini nriqa vinani nrivorave, tiro.

29 Mwitaa tuvaro Evarahaamuva qaqao tiro, Mosesivavata, poropeti vaisinramwuvata, qara ntumwa to quava vahirave. Mwihua mwi quara qiomia rievarave, tiro.

30 Tuvaro qati varu entara airi inraikya vato vaisiva tiqaro, Hiave, Ko, Evarahaamuuo, qutu quarive nrumu ntantero uro timwa nyinrata mwihua mwia qua rieqatama qora aanra qaqlira kyevarave, tiro.

31 Mwitaa tuvaro Evarahaamuva qaqao tiro, Mwihua Mosesira quavata poropeti vaisi quavata hia riaivera, mwihua qutu quariva nrumu ntantero uro qiani quaravata hiama qio rievarave, turave, tiro. Iesusiva mwitaa turama.

17

Uaqia hi kyaiqarara tura (Matiu 18:6-7, 21-22; Maaki 9:42)

1 Iesusiva nai nraaqiaranramwu timwa nyinro tiqaro, Nraakye qoravanto Kotira qua nteqa kyeqata uaquia hi kyaiqara utuate tiro, mpo inraikya mpo inraikyavanto qovara hiananrove. Uaqia hi kyaiqara qovarama kyaani vaisirara po kye timwa mwatauqo. Nraakiara mwi vaisiva taqaananrove.

2 Nraaqiara mpo uaquia hi aanranra nraamwutaani vaisiva variraro nraakiara Kotiva mwi vaisira uaqiamma kyeroma ntuqutu mwataananrove. Kotiva mwi vaisira mwitaa hianinranra rieqaro mwi vaisiva mwataama qari. Qikye, eqaataara qumina nte mwi nraaqiara uaquia hi aanranra nraamwutaurave. Haaru hia mwitaa hiava entara ni nuntaqi ori nronra sutukye ni rumpua nronraqi tuto kyaataarave, qiananrove.

3 Nkye uaquia hi kyaiqara utuaro titi rauru kyeqata variate.

E taqairaro i qata vakyaavanto Kotira qua nteqa kyairera, mwianra hia qaiqaavata mwitaa hiante qianta. Mwiva tiqaro, Nte po tuqo. Hia qaiqaavata mwitaa hirerave, tirera, e tiqara, Mwi quara matema qaqlira kyaquo, qianta.

4 E taqairaro mwiva kuaa enta 7 nani i uaqiamma mwatero nrumu iara po hia mwianra riera taunru mataante tirera, e eo timwa kyera 7 nani mwianra tiqara, Nte mwi quara qaqlira kyena hia iqaa qua vataaninrave, qianta, tiro.

Kepukyaqama kyeta Kotirara riemwaqita virara tura

5 Iesusiva mwitaa tuvata mwia nraaqiara 12 nramwuvanto tiqatama, E tiri kyaahaqa hiraro tire Kotirara riemwaqita quarava nronraqa hiarive, titi.

⁶ Mwitaa tuvaro nronravanto mwihua timwa nyinro tiqaro, Nkye Kotirara riemwaqi viva masiteti uru pataqia votima kyero vahirera, nkye kyatari vitirara tiqata, E tuqa rirante ntarira uro kyaareragi qupiqaante, tivaro kyatari mwiva nkyi qua riaananrove, tiro. Iesusiva turama.

Kyaiqa vaisivanto nai kyaiqa varaaninranra tura

⁷ Iesusiva tiqaro, Nkyiqitairo mpovanto variraro mwia kyaiqa vaisivanto kyaiqa varaaninranra qati quaqama kyena tirerave. I kyaiqa vaisivanto i kyaiqa vareqaro uro kyatu quvu tero uro sipisipiqa ntaqikyi tero nrinranra e nanreve mwianra tinanrave?

⁸ E hiama mwianra tiqara, Hiante ena kyara nrumu nraante, tinanrave. Mwi vaisiva qumina kyaiqa vaisivanto variharara tira, e mwianra tiqara, Nruru nini kyara nraante terama kye matera kyara utaa tavunana rupa varera kyara varaqira nrumu mpiraqe nramwa kyaarira nraakiara ena kyara nraante, tinanrave.

⁹ Kyaiqa vaisi mwiva i kyaiqa taiqa kyairara e mwianra kyuqeveve tinanrave? Qaiao, e hiama mwitaa tinanrave. Mwianra tiqara, Mwia ena kyaqama varera hiaroma, tinanrave.

¹⁰ Mwia votima kyeta nkycavata Kotira kyaiqa uro taiqa kyeta hia mwianra rieqata Kotirara qamwata timwa taante qiate. Nkye mwataama qiate. Tire qumina kyaiqa vaisi nraahuma varuro. Tire mwi kyaiqara vareqata tire teta kyaiqa vaisi kyaiqa nraahuma varauro, qiate, tiro. Iesiva turama.

Rumpuara taumavanto mwamwanta nre varuhua kyuqema kyora

¹¹ Iesusiva Jerusareminianra viqaro Sameriaa mwata hini vahuaro Kariri mwata hini vahura mwia utaqaa vuva

¹² mwatukya mpoqi uro ntovata vaisi kyauqurutanavanto Iesusira uro qintorama kyeta. Rumpuara uaqia huva mwihua mwamwanta nre varuhua vutura nyianrasatataita aakyara nteta tiqata,

¹³ Iesus, e nronravantove. Qati tirinramwuanra po kye timwa timwa taata, tita.

¹⁴ Mwitaa tuvaro Iesusiva mwihua timwa nyinro tiqaro, Kotira kyaiqa vare varia vaisihua hianani vivata nkyi mwamwanta itutuma kye taqaate, tuvata mwihua Iesusiva tuntema kyeta aanraqaa viqata taqovaro mwihua rumpuaravanto tavanta vuvaro mwihua nyamwantavantò kyuqema vuvata mwihua qio varura.

¹⁵ Mwihua qio varuvaro mwihuaqitairo kuaiqavanto nraahu nai rumpuara tavanta vura taqero nrumu ntantero aakyara ntamwa kyero Kotira nrutu tuaaheraqiro vura.

¹⁶ Vuva uro Iesusira kyuqusata tumu ntiro variqaro Iesusira qamwata mwate varura.

Vaisi mwiva Sameriaa nyaava varuvaro Iesusiva mwianra tiqaro,

¹⁷ Nte vaisi kyauqurutana kyuqema nyataurave. Vaisi 9 nramwu tainive quavo?

¹⁸ Nanraqamave mpo mwatanaa vaisi mwaava nraahu Kotira nrutu tuaaherarero nriho? tiro.

¹⁹ Mwitaa timwa kyero Iesusiva vaisi mwianra tiqaro, Qioma sivira quante. E nianra ni kyaahaqa hianinrave qiararoma i mwamwanta kyuqema viho, tiro. Iesusiva turama.

Kotiva ntaqikyaninranra tura

(Matiu 24:23-28, 37-41)

20 Parisi vaisinramwuvanto uro Iesusira kyapara hita tiqata, Kotiva nraakye qoraqaa ntaqikyiariva taireve qovara hiananrove? tuvaro Iesu-siva mwihua timwa nyinro tiqaro, Mwiva qovara hianinra nkye hia vuqtatai qio taqevarave.

21 Hiama mpovanto Kotiva ntaqikyianinra taqero mwinima vaiho mwainima vaiho qiananrove. Kotiva nraakye qora mwihua utaqi variqaro mwihuaqaa ntaqikyiananrove, tiro.

22 Mwitaa timwa kyero Iesusiva nai nraaqiaranramwuanra tiqaro, Mpo enta nri ntairata nkye mwi entaraqaa ni mwatani mwatatai nraaqiara-tiqata, Qikye, Iesusiva kuaa enta nraahu tirivata variraqe tire qiove qiatatarave, tiqatama hia qio ni taqevarave.

23 Mwi entaraqaa vaisei mponramwuvanto nkyiara tiqata, Iesusiva mwinima variho. Mwainima variho, tivata nkye hia mwihua qua rieqata mwihua vataqa quate.

24 Aaquakyaa tiqaro ekyaa nyaamwu ntuvahama kyaintema kyenama nte mwatani mwatatai nraaqiaraava qoqaa tumuaninrave.

25 Qakyo qoqaa tuminrenra hiarita mate mwaa entara vari nraakye qorahua nronra muaanra nraante mpivaque varaarita mwihua ni qoririma matevarave.

26 Noaava varu entara nraakye qoravanto mpoqia mpoqia utuntema kyeta nte mwatani mwatatai nraaqiaraava tumuan entaraqaa nraakye qoravanto mpoqia mpoqia utivarave.

27 Noaava varu entara nraakye qoravanto kyarave nramanrive nramwaqita vita nraata vaati varaqita vuvaro Noaava nramanriqaa quani nraamwunraqi vietovaro humwunravanto nronraqama kyero ntero mwihua ekyaa ru taiqa kyorave.

28 Nte tumuan entava Rotiva qati varu entara votima kyero vahiananrove. Rotiva qati varu entara nraakye qoravanto kyarave nramanrive nramwaqi vita, nkyiari kyoqaa kyaiqa varaqi vita, nraata vaati varaqita vita, kyara vara tuqi vita, nraamwu hoqaqi vita mwitaamaqita vuvaro

29 Rotiva Sotomi mwatuqyaqitairo vuvaro nyaamwusairo qia-vanto vati votima kyero ntqaro mwi mwatanahua ekyaa itamwa taiqa kyorave.

30 Nte qovarama quani entara nraakye qoravanto mwitaamaqi viqata nkyiari kyaiqa nraahu varaqi vivarave.

31 Mwi entara vaisivanto nraamwu aatareqani variariva nai vataani inraikyara vararero nraamwuqi hiama vera ntaarive. Vaisei mpovanto kyaiqa varaariva nrnumu ntantero nraamwuqi hiama quarive.

32 Rotira nraatavanto apiqama viro taiqa vurara nkye riaate.

33 Nte qutu quankyo tiro qati varianinranra nronraqama kye riaariva qutu quananrove. Hia nai qutuaninranra nronraqama kye riemwaqiro quariva, (mwiva qutu viro mwiaqaatairo) ekyaa enta qati variqiro quananrove.

34 Mwi entara entaqi vaisei taaratanavanto taariqaa vaite varivaro kuaiku nraahu nyaamwuni vita varero viro mpo mwia mwinima kyairaro vari-ananrove.

35 Mwi entara nraakye taaratanavanto kyara taiti ti varivaro kuaiqia nraahu nyaamwuni vita varero viro mpo mwia mwinima kyairaro vari-ananrove.

36 [Vaisei taaratanavanto utaqi kyaiqa vare varivaro kuaiqia nraahu nyaamwuni vita varero viro mpo mwia mwinima kyairaro variananrove], tiro.

³⁷ Iesusiva mwitaa tuvata mwia nraaqiaranramwuvanto mwia kyapara hita tiqata, Tainive mwi inraikyava mwi inraikyava qovara hiananrove? tuvaro Iesusiva mpo quaqaa ntumwa kyero mwihua timwa nyinro tiqaro, Qutu quani inraikyava vähianinra mwiaqama memonravanto ntuvaantua hivarave, tiro.

18

Hia kyuqema kyero ko rio vaisiraqaa ntumwa kyero tura

¹ Iesusiva nai nraaqiaranramwuanra mwihua Kotirara aakyara ntamwaqi vivaro hia pupohairata qaqlira kyaate tiro, mwaa quarqaa ntumwa kyero timwa nyinro tiqaro,

² Haaru qua avuqavu hi varu vaisiva iaasiva mpo mwatukyaraqaa variqaro mwiva hia Kotira nraatu aatu hu vaisiva hia nai hena vaisiaravata nronraqama kyero rie varu vaisiva varurave.

³ Mwiva varuvaro tetoga nraakyevantovata mwi mwatukyaraqaa varurave. Mwi nraakyeva ekyaa enta ko rio vaisiva varunani nri ntero tiqaro, Vaisi mpovanto ni qoraqama matairara rieqara e ni qua avuqavuma mataante, turave.

⁴ Mwitaa timwaqiro vuvaro airi enta ko rio vaisiva hia mwia kyaahaqa hiataa huvaro hia mwia kyaahaqa hurave. Mwitaaqiro viro ekyara mwianra tiqaro, Nte Kotiraravata vaisiaravata hia nronraqama kyena riauva

⁵ tetoga nraakyeye mwaavata hia kyaahaqa hiataa ihana varuqaro mwiva airi nani nte hunani nri variqaro ni antue variho. Kyai nte mwia qua riena avuqavuma mwataariro mwiva hia mpo enta mpo enta qaiqaavata nte hunani nriqanro ni pupohama mataarive, turave, tiro.

⁶ Mwitaa timwa kyero Iesusiva nronravanto tiqaro, Riaante. Hia kyuqe iaasiva hia mwi nraakyera kyaahaqa hiataa huvarovata mwia kyaahaqa hurave.

⁷ Kotira nraakyeye qoravanto entaqivata, iheravata, mwianra aakyara ntamwaqi vivaro Kotira hiave mwihua qua riero kyaahaqama nyataananrove? Kotira qakyoma kyerove mwihua kyaahaqa hiananrove?

⁸ Qaqao, nte qianinra riaate. Kotira mwihua qua riero qamwanrama kyero mwihua kyaahaqama nyataananrove. Nte mwatanai mwatatai nraaqiarava qaiqaa tumuanri entaraqaa Kotira qua rieqata mwianra aak-yara ntamwaqi vihua mpoqiani varivarave iho, hiave varivarave? tura.

Parisi vaisiqaavata taakisi varo vaisiraqaaavata ntumwa kyero tura

⁹ Iesusiva mwitaa timwa kyero tiqaro, Vaisi mponramwuvanto tiqata, Tire nraahuma kyuqe hurahua variqata avuqavumakye nrohi varurata mpohua hia kyuqe hia huama variavo qiarave. Kyai nte mwitaa qia vaisihuara mwaa quarqaa ntumwa kyena qiankye, timwa kyero tiqaro,

¹⁰ Vaisi taaratatanavanto Kotira nraamwuqi Kotirara aakyara ntarerata vurave. Mpo Parisi vaisivanto vuvaro mpo taakisi vare varu vaisiva vurave.

¹¹ Mwitanahua Kotira nraamwuqi vera ntovaro Parisi vaisi mwiva uro nanrianra mposata variqaro Kotirara aakyara nteqaro mwitaama tiro: Kotio, Hia nte mpohua votima kyena varuvvara tina, nte iara kyuqema tuqo. Hia nte mpohua nraantantena munima mpuara vare varuvave. Hia nte api qora kyaiqa utuqina nrohi varuvave, Hia nte mpore nraatavata mpuaraqama kyena nrohuvarave. Hia nte viti vaisiva taakisi vare vari vaisira votima kyena varuvave.

¹² Nte kuaa uiki mwipi variqana i kyaiqara rieqana taara enta kyara aurama teqana varuvave. Nte ntena hu inraikyaraqatai munima vara

kyena kyaucurutanaqitaina avuqavuma tukyama kyena kuaiqia ina mwi varurave, turave.

¹³ Parisi vaisivanto mwitaa ti varuvaro taakisi vare varu vaisiva vutura nyianra sata siviro variro kyauriqaro hia tuaahera kyero nyaamwunivata taqaraitiro, nai mwetokya ntugutiro tiqaro, Kotio, po nte hia kyuqe huvama varuqo. E nianra po kye timwa mataante, turave, tiro.

¹⁴ Mwitaa timwa kyero Iesusiva timwa nyinro tiqaro, Nte qianinra riaate. Kotiva Parisi vaisivanto tu quara hia riaraiftiro, taakisi vare varu vaisira qua nraahu riero mwiva uaqia hi kyaicqara utura nruka mwatovaro mwi vaisiva nrumu ntantero nai nraamwuni vurave. Nai nrutu nraahua tuaaheraaninra Kotiva mwia nrutu vara mwataniqama kyaananrove. Nai nrutu vara mwataniqa hianinra Kotiva mwia nrutu tuaaherama mwataananrove, tiro. Iesusiva turama.

*Iesusiva nraaqiarara qamwateqaro kyuqema nyatora
(Matiu 19:13-15; Maaki 10:13-16)*

¹⁵ Nraakye qoravanto nkyiari nraaqiara sitaqita Iesusiva mwihuaqaa kyauqu vatero kyuqema nyataarive tifa nri ntovata Iesusira nraaqiaran-ramwuvanto tiqata, Siteta mwihuaqvata quate, tura.

¹⁶ Mwitaa tuvaro Iesusiva nraaqiara mwihua nyaanrama kyero tiqaro, Nraaqiara mwihua qati kyaivata nte hunani nriate. Hia mwihua aanra antuaate. Kotiva ntaqikyiari mwatukyaya mwi nraaqiaraqua voti hiahua mwihua mwatukyama vahiananrove.

¹⁷ Nkye mwaa quara riaate. Vaisivanto hia nraaqiara nraantantamwa kyero variqaro Kotira qua riaariva hiama qio Kotiva ntaqikyi mwatukyaraapi quananrove, tiro.

*Airi inraikya vato vaisiva Iesusiravata qua tura
(Matiu 19:16-30; Maaki 10:17-31)*

¹⁸ Iesusiva varuvaro Iutaa vaisi nronravanto mwia ntumwahiamwa hiro tiqaro, E mwaanra ti variara vaisiva kyuqevave. Nte nataa hiani kyaicqara Kotira vara mwataaninraqaatainave nte nraakiara ekyaa enta qati variqina quaninrave? tiro.

¹⁹ Mwitaa tuvaro Iesusiva tiqaro, E nanraqamave nianra vaisi kyuqevave qiaro? Kotiva nraahuma kyuqeva variho.

²⁰ E Kotiva timwa to quara riaananrave. Mwia quavanto mwataa tirave: E hia mpura nraatantiri api nrohiante.

E hia mpura ru kyaante.

E hia mpuara varaante.

E hia unra qua mporaqaa vataante.

E ena nrohua qohua nyutu tuaahera nyataante, turave. (*Kyatura 20:12-16*)

E mwi quara timwa tova vahira riemwaqira quante, tiro.

²¹ Iesusiva mwitaa tuvaro mwi vaisiva tiqaro, Nte nraaqiara patakyaa mwi quara riemwaqina nruvama mate mwaa varuqo, tiro.

²² Mwitaa tuvaro Iesusiva mwia qua riero mwia timwa mwirro tiqaro, Mwitaa hirera, e kuaa inraikya nraahu hia utuaro. E ekyaa ena vataana inraikyara mpohua nyinra munima vara kyera ntainra kyera vehi nraakye qora nyinranro nyaamwuni ini mpo inraikya vahiarive. Mwitaama kyera mwiaqataira ni pataqira nriante, tiro.

²³ Mwitaa tuvaro mwi vaisiva airi inraikya vatovara tiro, mwia mwutukyavanto uaqia huvaro varura.

²⁴ Mwia mwutukyavanto uaqia huvaro varuvaro Iesusiva mwia taqero tiqaro, Airi inraikya vate vari vaisihua mwukyaari tu kyeta Kotira mwatukyagi vivarave.

25 (Kameri quara nronravanto nataama kyerove vuqa uvintaqi/iriraqi ntutqiaraanarove? Hia qiove.) Qio nte qianinra riaate. Kamerivanto vuqa uvintaqi/iriraqi qio ntutqiarairarove, airi inraikya vataarivavata Kotira mwatutkyaqi qio quananrove, tiro.

26 Mwitaa tuvata nraakye qoravanto mwi quara rietama Iesusira kyapara hita tiqata, Airi inraikya vataariva Kotiva ntaqikyianinraqi hia qio virera, nai ta vaisivave qio variraro Kotiva mwia vitaananrove? titi.

27 Mwitaa tuvaro Iesusiva mwihua timwa nyinro tiqaro, Mwatani varihua mwihua nkyiari nraahu variqata hiama qio vivarave. Kotiva mwihua kyaahqa hiratama mwihua qio vivarave. Kotiva ekyaa kyaiqa vare varivave, tiro.

28 Mwitaa tuvaro Pitaava tiqaro, Taqaante. Tirenramwu i vataqi virera hita, teta hunanra ekyaa inraikya mwini kyeta qatima nrurro, tiro.

29 Mwitaa tuvaro Iesusiva tiqaro, Eo, qutaama tira hiaro. Nte qianinra riaate. Vaisivanto Kotiva ntaqikyiani kyaigarara rieqaro nai mwaatave, nai nraatave, nai qata vakyaahuave, nai nrohua qohuave, nai nraaqiarave, mwiva mwihua mwihua mwini kyero Kotiva kyaiqa vararero viraro

30 Kotiva hiama eqaanarove. Kotiva mwi vaisira mate mwaa entaravata mwia qiaa airiqamä kyero mpo inraikya mwianarove. Mwinro nraakiaravata mwinranro mwi vaisiva ekyaa enta qati variqiro quananrove, tiro.

Iesusiva nai qutu quaninranra qaiqaa tura

(Matiu 20:17-19; Maaki 10:32-34)

31 Iesusiva nai nraaqiara 12 nramwu nraahu sita mpo sata kyero timwa nyinro tiqaro, Riaate. Nte mwatani mwatatai nraaqiaravama varuqo. Tirenramwu Ierusaremini quararo haaru poropeti vaisinramwuvanto ni-anra ekyaa qua qara ntumwa to quava qutaa mwivauma vahianarove.

32 Ni ntavaaqavuqita uro mpo mwatanaahua kyaunuqi kyaivata mwi mwatanaahua nianra raima mateta, nianra uaquia hi quara timwa mateta, niqaa taara vihivarave.

33 Mwitaamaqi viqata mwihua ni kyaamwuqo ntutqutu mateta, ni pitaqita ru kyaivage nte taarampo enta variariro (Kotiva ni vara qati sivuma kyairate) nte qati variqi quaninrave, tiro.

34 Iesusiva mwitaa tuvata mwia nraaqiaranramwuvanto hia mwia qua ntapihi kye riora. Mwi quara okyaravanto ugeta viro vahuvata mwihua tiqata, Iesusiva nanra quave tiho? Hia tirenramwu mwia qua ntapihuro, titi. Turama.

Iesusiva vu qipavu vaisira ntapairi kyora

(Matiu 20:29-34; Maaki 10:46-52)

35 Iesusiva Ieriko qaumato vuvaro vaisi mpovanto vu qipa vuva aanra tokyani variqaro mpo inrakya mpo inraikyara nyaanru tiqaro mpiate ti varu vaisiva variqaro riovata

36 nraakye qora airivanto mwisaita nritareqata vi varuvaro mwiva mwihua kyapara hiro tiqaro, Taqaate. Nanra inraikyave uti variavo? tuvata

37 mwihua mwia timwa mwita tiqata, Iesusiva Nasaretinyaava nritare vi variho, tura.

38 Tuvaro mwiva aakyara ntamwa kyero tiqaro, Iesusio, Ntevitira mwaaquo, qati nianra po kye timwa mataante, tiro.

39 Mwitaa tuvata nraakye qoravanto mwia vuni varuhua mwia inronra hita tiqata, Egera tirema variante, tuvaro mwiva hia mwihua qua riaraitiro, qaiqaa nraahu aakyara ntero tiqaro, Ntevitira mwaaquo, qati e nianra po kye timwa mataante, tiro.

40 Mwitaa tuvaro Iesusiva uro mwiaqaa siviro variqaro vu qipa vu vaisira mwia viteta nte hunani nriate tuvata mwia vitaqita nrumu mwiva hunani kyovaro Iesusiva mwia kyapara hiro tiqaro,

41 Nivanto i nataa hiarive tirave e nianra aakyara nte variaro? tiro. Tuvaro mwiva tiqaro, Nronrao, e ni pu ntapairi kyaanterama nte iara aakyara tuqo, tiro.

42 Mwitaa tuvaro Iesusiva mwia timwa mwinro tiqaro, Vu ntapairi kyera tagaante. E nianra mwiva ni kyaahaqa hianinrave qiararoma i vu ntapairi viho, tiro.

43 Mwitaa tuvaro qamwanrama kyero mwia vuvanto ntapairi vuvaro qio taqevaro mwiaqatairo mwiva Kotira nrutu tuaahereqaro Iesusira vataqiro vuvata nraakye qora ntuvantuama vita varuhua mwihuavata mwia taqeta Kotira nrutu tuaahere varura.

19

Sakiaasira qua

1 Iesusiva Ierikoqi urontero mwatukya mwiqi vi varuvaro

2 taakisi vare varuva nronra vaisi Sakiaasiva airi inraikya vatova mwini varura.

3 Mwi vaisiva tiqaro, Iesusiva nai nataa hi vaisivave iho? timwa kyero mwia taqaankye tuvata airi nraakye qora ututuma vita varuvaro mwiva qiqu vaisiruvantora tiro, hia qio Iesusira taqaaqara hura.

4 Mwitaa huvaro mwiva hiantero Iesusiva quani aanranraqaa mwiva nraante uro ntero Iesusira taqarero kyatariqi nriviro varura.

5 Mwiqi varuvaro Iesusiva nri ntero tuaahera kyero viri mwia taqero Sakiaasirara tiqaro, Sakiaasio, qamwanrama mpiami ntaante. Mate nte i nraamwuqi uro varianinrave, tiro.

6 Mwitaa tuvaro Sakiaasiva qamwanrama mpiami ntero mpoqama kyero qamwata kyero Iesusira vitero uro nai nraamwuqi kyovata

7 nraakye qoravanto taqetama nrutu nraunru titi tiqatama, Mwi vaisiva qora vaisi mpuara vaisi nraamwuqima viho, tura.

8 Mwitaa tuvaro Sakiaasiva siviro nronra vaisi Iesusira timwa mwinro tiqaro, Nronrao, riaante. Nte iara rieqanama ntena hu inraikyara utaqaa ntainra kyena hini vehi nraakye qora nyinrenrave. Nte taakisi vareqana mpore munima unra timwa kyena mpoqivata varaankyera, hia nai kuaa nani mwinrenrave. Nte erahiamuaantema nani mwinrenrave, tiro.

9 Mwitaa tuvaro Iesusiva mwihua timwa nyinro tiqaro, Nte mate mwaa nraamwunraqi vera ntena taqauqata nkye uaqia hi aanranra qaqira kyeta Kotira aanraqaa virerata uti variavo. Mwaa vaisiva Evarahaamunra kuaa okyaravantomaa variho.

10 Nte mwatani mwatatai nraaqiarava variqana nte raupirima vi vaisi-hua puaama kyaariro Kotiva sitaarive tina nruvave, tiro. Iesusiva mwitaa turama.

*Nai kyaiqa vaisi 10 nramwu munima nyunraqa ntumwa kyero tura
(Matiu 25:14-30)*

11 Iesusiva qua timwa nyuvata nraakye qoravanto mwi quara rieta nkyiari rieta tiqata, Iesusiva Ierusaremi qaumatoma nrumu variho. Kotiva mwia kepukya mwinranro mwiva nronraqama viro tiriqaa ntaqikyiar entava qaumato vaiho, titi.

Mwihua nkyiari riemwa kyeta mwitaa ti varuvaro

12 Iesusiva mwaa quaraqaa ntumwa kyero timwa nyinro, Nronra vaisi mpovanto tiqaro, Nte nyianra mpo mwatani uro variarita ni nronraqama kyavagena nte vunyaa vaisiqama vina uro ntantena nrinrenrave, turave.

13 Timwa kyero mwiva virera hiro nai kyaiqa vaisi kyauqurutana nyaanrama kyero mwihua munima 20 kinaa 20 kinaa nyinro tiqaro, Mwaa munimanraqotaita uro kyoqaa kyaiqa vare varivagename nte uro ntantena nriangkye, turave.

14 Mwitaa timwa kyero vuvata mwi mwataraqi varuhua hia mwi vaisirara kyakya huvata mwihua vaisi mponramwu siteta tiqatama, Nkye mwia nraakiara viqatama mwitaama qiate. Mwi vaisiva uro nronraqama viro vunyaa vaisi vari viro uro ntantero hiama nrumu tiriqaa ntaqikyiananrove qiate, turave.

15 Mwi mwatanaahua mwitaa timwa kyeta varuvaro nronra vaisi mwiva mpo mwatani uro varuvata mwia nronraqama kyovaro mwiva mwini variro uro ntantero nrumu nai kyaiqa vaisi haaru munima nyuhua nyaanrama kyero tiqaro, Nte munima nyunraqo kyaiqa utu kyeta nataamave varaavo? tiro.

16 Tuvaro mwia kyaiqa vaisi mpovanto nri ntero tiqaro, Nronrao, Munima 20 kinaa mpiarana nte mwiaqo kyaiqa utu kyena 200 kinaa varauquo, turave.

17 Mwitaa tuvaro nronra vaisi mwiva tiqaro, E kyugema kyerama kyaiqa varaaro. E pata kyaiqa kyugema kyera varaananra nte mwianra rieqana nronra kyaiqa i mwirrenrave. Nte i nronraqama kyaarira e mwatukya kyauqurutanaqaaama ntaqikyinanrave, turave.

18 Mwitaa tuvaro mwia kyaiqa vaisi mpovanto nri ntero tiqaro, Nronrao, munima 20 kinaa mpiananraqo nte kyaiqa utu kyena 100 kinaa varauquo tuvaro

19 mwi vaisirara tiqaro, Nte i nronraqama kyaarira e mwatukya hini kyauquruqaa ntaqikyinanrave, turave.

20 Mwitaa tuvaro mwia kyaiqa vaisi mpovanto nri ntero tiqaro, Nronrao, munima 20 kinaa mpiananra mwaa ena qati varaante. Nte mwi munimanra tavunaqo qapuqama kyena uqeta taurave.

21 E kyaiqara vuaviraavira ti variarava variarana nte i nraatu aatu hiqana varuquo. E mpohua hia inraikyara api varaaravave. E mpohua vara tutaara uro api vanti variaravave, turave.

22 Mwitaa tuvaro nronravanto tiqaro, E kyaiqa vaisi uaquia hiaravama variaro. Nte ina qua mwianra rieqana nte iqaa qua vatarerave. E nianra tiqara, E kyaiqara vuaviraavira ti variaravave. E mpohua hia inraikyara api varaaravave. E mpohua vara tutaara api vanti variaravave, qiananrave.

23 E mpo, mwitaa timwa kyera nanraqamave hia mwi munimanra mpenki nraamuqi uro vatera hiaro? Mwitaa hiaratiri, nte vuva uro ntantena nrumu variqana mwi munimanravata, mwipi vataaananranra rieqana munima pata mpoqiatanavatama varautirio, turave.

24 Mwitaa timwa kyero mwiva mwini sivi varuhuara tiqaro, Mwi vaisira munima mwia ntavihi kyeta munima 200 kinaa vatai vaisira mwiate, tuvata

25 mwihua qaqao tita, Mwi vaisiva munima 200 kinaa vaakya vataivave, tuvaro

26 mwiva tiqaro, Nte qianinra riaate. Mpo inraikya vaakya vataari vaisiva mpoqiatavataanrove. Hia mpo inraikya vataari vaisiva variraro mwiva hiani inraikyara pata mwipivara kyaananrove, turave.

27 Mwitaa timwa kyero mwiva tiqaro, Vaisi mponramwuvanto nianra hia mwutukya ntihata hia tiriqa ntaqikyiananrove qia vaisihua, mwihua sitaqia nrumu ni puqaa kyeta ru taiqa kyaate, turave, tiro. Iesusiva turama.

Nraakye qoravanto Iesusira qamwata mwate varuvaro mwiva Ierusalemiqi vura

(Matiu 21:1-11; Maaki 11:1-11; Ioni 12:12-19)

28 Iesusiva mwitaa timwa kyero Ierusalemianra mwiva nraante viro.

29 Mwiva vuva Mpetaapaasivata, Mpetaanivata, Oripi taaqi nrunkroqi vahu mwatukyatana qaumato nrintero Iesusiva nai nraaqiara taaratana sitero tiqaro,

30 Nkyetana yutu mwatukyaraqi quate. Nkyetana vihua uro taqaivarо mwi mwatukyaraqi ntonki qaraakya kyaantaru taariva variananrove. Mwi ntonkira hia vaisivanto mwia mwoqaqa mwatakyaa viro nrohi ntonkirave. Nkyetana uro mwia puaama kyetama ntatu kyeta mwaini vitaqita nrumu mpiate.

31 Mpovanto nkyitananra nanraqamave nkyetana mwia ntati variavo tiera, nkyetana mwitaamama timwa mwiate, Tiritana nronravanto mwianra tihata nrunro qiate, tiro.

32 Iesusiva mwitaa timwa kyero mwitanahua sitovata vuhua uro taqavarо Iesusiva tuntema kyero vahura.

33 Mwitanahua ntonki ntati varuvata ntonki mwia qohua mwitanahuara tiqatama, Nkyetana nanraqamave mwia ntati variavo? tuvata

34 mwitanahua tiqata, Tiritana nronravanto mwianra tihatama nrunro, tita.

35 Mwitanahua mwitaa timwa kyeta ntonki mwia vitaqita Iesusira uro mwita.

Uro mwita mwihua nkyiari vaqa ntonki mwia mwoqaqa vuti mwateta Iesusira kyaahaqa huvaro Iesusiva mwiaqaa mwaanri ntero mwatakyaa viro varara.

36 Iesusiva mwatakyaa viro aanraqaa vi varuvata nraakye qoravanto Iesusira qamwata mwatarerata nkyiari vaqa aanravau vuti tovaro

37 Iesusiva Ierusalem qumato Oripi taaqiqaatairo vu aanranraqaa uro ntovata mwia vataqi nrhuua airivanto ntuvaantuuma vita aakyara ntamwaqi viqata Iesusirara kyuqeve tiqata mwia kyaiqa taqorara rieqata Kotira nrutu tuaaheraqita vurama.

38 Mwihua tiqata,

Nronravanto nai nrutuqa nri vari vaisira
kyugema mwataiho.

(Ihi 118:26)

Kotiva nyaamwusairo

tiri mwaateraqama timwa taananrove.

Kotiva nyaamwu virini varihata

tire mwia nrutu nronraqama kyauro, tita.

39 Nraakye qoravanto mwitaa timwaqita vi varuvata Parisi vaisinramwuvanto mwini varuhua Iesusirara qaqao tita, Mwaanra ti variara vaisivao, ena nraaqiaranramwuanra tirema variate qiente, tuvaro

40 Iesusiva mwihua nkyiari timwa nyinro tiqaro, Mwihua tirema varivera, aanraqaa vahi oriva, mwivama aakyara nteqaro ni nutu tuaaheraananrove, tiro.

Iesusiva Ierusalemiqinaahuara ntatora

41 Iesusiva mwitaa timwa kyero Ierusalemini qaumato nri ntero mwatukya nronra mwia taqero mwianra ntatero tiqaro,

⁴² Po, e mwaateraqama vi vari aanranra taqaataara vahara hia taqaananrave. Mwi aanrava tuqeta vaharara tira, hia taqaaro.

⁴³ Mpo enta nri ntairata i nramwutaahua i rirerata i vara ututuma teta vasaamwunra tokyasataa mwata quvukye ntamwa teta mwiaqatai ivata ntaqivarave. Mwitaa hiqata ena kyaahaqa hina aanranravata titaa titama kyeta i antua tevarave.

⁴⁴ Mwihua i nraatara kyeta ivata, i utaqi vari nraakye qorahuavata, ru taiqa kyevarave. Kotiva i kyaahaqa hiari entava vahara e hia mwianra riaaro. Mwia kyaara i taiqa kyeta ekyaa ori nraamwu taaqau vahianinra ekyaa ntuvuraavurama kyaivaro hiama kuaiqavantovata qati vahiananrove, tiro.

*Iesusiva Kotira nraamwuqitairo nraakye qora vara veva kyora
(Matiu 21:12-17; Maaki 11:15-19; Ioni 2:13-22)*

⁴⁵ Iesusiva mwitaa timwa kyero uro Kotira nraamwuqi vera ntero taqvata kyoqaa uti varu vaisihua mwipi variqata kyoqaa kyaiqa vare varuvaro Iesusiva mwihua sata veva mwaatani kyero tiqaro,

⁴⁶ Kotira mpukuqi Kotiva mwitaama turave:
Nraakye qoravanto ni nraamwuanra Kotirara aakyara
nte nraamwunrave tivarave, turave. *(Aisaiaa 56:7)*

Nkye variavaro mwaanra nraamwuva mpuara vaisivanto ugeta vita variqata mpuara vare varia nraamwunra votima kyero vaiho, tiro.

⁴⁷ Mwitaa timwa kyero Iesusiva mwiaqatairo mpo enta mpo enta uro Kotira nraamwuqi variqaro nraakye qora qua mwakyaakya timwa nyiqiro viro.

Mwitaamaqiro vuvata Kotira nraamwuqi Kotira kyaiqa vare varu vaisihua mwihua nronra vaisinramwuvata, mwaanra okyara ti varu vaisihuvata, nronra vaisi mponramwuvantovata, mwihua Iesusira rukyaare titi taqvata

⁴⁸ nraakye qora airivanto Iesusira qua nraahu riaataa huvata rie varuvata nronra vaisinramwuvanto mwia rukye aanranra puua huvaro hia vahura.

20

*Iesusirara tava i nronraqama kyaiharave e mwitaamaqira vi variaro tura
(Matiu 21:23-27; Maaki 11:27-33)*

¹ Mpo enta Iesusiva Kotira nraamwuqi mwakyaakya kyuqe mwakyaakya nraakye qora timwa nyiqiro vuvata Kotira nraamwuqi Kotira kyaiqa vare varuhua mwihua nronra vaisinramwuvata, mwaanra okyara ti varuhuvata, nronra vaisi mponramwuvantovata, mwihua nri nteta

² Iesusira inronra hita tiqata, E ta vaisiva variqarave e mwaanra kyaiqara vare variaro? Tava i nronraqama kyaiharave e mwaanra kyaiqara vare variaro? Tiraqe riaare, titi.

³ Mwihua mwitaa tuvaro Iesusiva tiqaro, Kyai nte nkyi nraante kyapara hiankye.

⁴ Tava Ioninra nronraqama kyovaro Ioniva nraakye qora nramanri nyunrave? Kotivave iho? Qumina nraakye qoravantove iho? Nkye timwa mpivaque riaankye, tiro.

⁵ Iesusiva mwitaa tuvata mwihua nkyiari kyapara hita tiqata, Tire nataave qiananrave? Tire tiqata, Kotiva mwia nronraqama kyovare, qiararo mwiva tiriara nkye nanraqamave Ioninra quara hia quataave qiaovo qiankyorave.

6 Tire tiqata, Qumina vaisivanto mwia nronraqama kyorave, qiarata nraakye qora mwaqaq ntuvaantuama vita variahua oriqo tiri aavata ntutuqtu kyevorave. Qumina nraakye qora mwaahua Ioninranra mwiva poropeti vaisivanto Kotira qua ti varuvave ti variarave, tita.

7 Mwihua mwitaa timwa kyeta Iesusira timwa mwita tiqata, Nai tava Ioninra nronraqama kyorave? Hia tire ntapihuro, tita.

8 Mwitaa tuvaro Iesusiva mwihua timwa nyinro tiqaro, Nkye hia ni timwa mpiavana ntevata ni nronraqama kyaihana mwaq kyaqara varaura okyara hia nkayitavata timwa nyianinrave, tiro.

*Uaini aakyo vara tutoraqaa ntumwa kyero tura
(Matiu 21:33-46; Maaki 12:1-12)*

9 Mwitaa timwa kyero Iesusiva mwaq quaraqaa ntumwa kyero timwa nyinro tiqaro, Vaisi mpovanto uaini aakyoqi vara tutoero mwiaqatairo nyianranri virera hiro vaisi mpo uhuara tiqaro, Nkye ni aakyoqaa ntaqikyi mate varivaqe nte nyianranri quankye, timwa kyero nai mwaata mwini kyero mpo mwatani mpuahaama varirero vurave.

10 Mwini uro varuvaro uaini hiq uentava nri ntovaro mwiva nai kyaiqa vaisi mpo titero tiqaro, Uro ni aakyoqaa ntaqikyiahua tirata ninanivata uaini hiqukye mataate, tuvaro mwini uvata mwia kyaiqa vaisi mwia ntutuqtu kyeta vatovaro mwiva hia uainivata vararaitiro, qati uro ntantero nrurunrave.

11 Nruvaro mwiva nai kyaiqa vaisi mpo titovaro uvata mwivavata ntuqtu kye vateta kyaurira inraikya mwuvaro mwivavata qati uro ntantero nrurunrave.

12 Mwitaa huvaro aakyo qova nai kyaiqa vaisi mpo titovaro uvata aakyoqaa ntaqikyi varuhua mwivavata ntuqtu kye teqaaqama kye vateta vitaqita mwaqaqani mwaati tuto kyorave.

13 Mwitaa huvaro aakyo qova tiqaro, Nte nataave hianinrave? Kyai nte ntenga maaqu mwianra mpooqavata ni mutukya vahira titaarita mwianra mwia mwaqaqvantove timwa kyetama mwia kyugema mwatevarave, turave.

14 Mwitaa tuvaro mwia mwaqaqvantove uvata mwia aakyoqaa ntaqikyuhua mwia taqeta tiqata, Mwaa mwia mwaqaqvantove nriho. Nrivaqe mwia ru kyaararo mwia aakyovanto tirini vahiarive, turave.

15 Mwitaa timwa kyeta mwihua aakyoqitaita mwia vara mwaati mwaqaqani kyeta ru kyorave, tiro. Iesusiva mwitaa timwa kyero mwihua kyapara hiro tiqaro, Mwihua mwitaa hurara tiro, aakyo qova nai mwaqaq rukyera kyaara nataave hiananrove?

16 Aakyo qova nri ntero aakyoqaa ntaqikyi vaisihua ru taiqa kyero mpohuarama ni utaqaa ntaqikyi mataate qiananrove, tiro.

Iesusiva mwitaa tuvata nraakye qora mwipi ntuvaantuama vita varuhua qaaoq tita, Hiama mwiva mwitaa hiananrove, tuvaro

17 Iesusiva mwihua taqero mwihua kyapara hiro tiqaro, Mwaa quava Kotira mpukuqi qara ntumwa tova nanreve tiho? Mwi quara okyara ni timwa mpivave riaankye. Mwitaama tiho:

Ori nraamwu hoqeqaro ori mpo,
hia kyuqe hirave timwa kyero qaqlira kyaiva,
mwi oriva puhaqama viho, turave.

(Ihi 118:22)

18 Ori mwiaqaa tuto ntuaninra toqa ntupepaama pataqia pataqiamma kyaananrove. Mwi oriva vaisi mpooqaa tumu ntirera, vaisi mwia rukyero munumi utu kyaananrove, tiro.

19 Mwitaa tuvata mwaanra okyara ti varu vaisihuavata, Kotira kyaiqa vara mwate varuhua mwihua nronranramwuvantovata, mwihua tiqata,

Mwiva mwi quara tiriqaat ntumwa kyero tiho, timwa kyeta Jesusira mwigi tu varaaare tuvata nraakye qora airivanto varuvata mwihuara aatu hita hia mwia tu varora.

Taakisiqa hirara Jesusira kyapara hora

(Matiu 22:15-22; Maaki 12:13-17)

20 Mwihuara nraakye qora nraatu aatu hiqata hia Jesusira tuvararaitita, qatinasaita mwia aitutuhi variqata vaisi mponramwu siteta tiqata, Nkye qumina vaisi nraantantamwa kyeta uro variqata mwia qua riemwaqita vivaro mwiva api qua tirata nrumu tirivata huntu kyaivaqe uro kamanira nronra vaisi timwa mwianranro mwiva nrumu Jesusira tu vararive, tita.

21 Mwitaa tuvata vaisi mwinramwuhua uro Jesusirara mwitaama tita, Mwaanra ti variarao, tire taqaurara e nraakye qora ntapihi kyeqara qua mwakyayka timwa nyi variaravave. E nronra vaisiaravata, pata vaisiaravata, kuua qarama kyera nraahu qua qiaravave. E vaisivanto Kotira aanraqaa virara ntapihi kyera timwa nyi variaro.

22 E mwaa quara tiri timwa timwinrage riaare. Tire Kotira qua rieqata qiove tire Romeni mwihuara nronra vunyaa vaisi Sisaara taakisi mwiananrave? tita.

23 Mwitaa tuvaro mwiva api qua qiarive tita tu quara Jesusiva ntapihi kyero, mwiva mwihuara tiqaro,

24 Munima mpoqia vara kyaivaqe taqaankye, tiro. Tuvata mwihuara munima mporu vara kyovaro taqero tiqaro, Munima mwiaqaa tara virivata tara nrutuvatave valho? tiro. Tuvata mwihuara tiqata, Sisaarave, tura.

25 Tuvaro Jesusiva mwihuara timwa nyinro tiqaro, Mwianra rieqatama nkye Sisaava hianinra nai mwiate. Nkye Kotiva hianinra nai mwiate, tiro.

26 Jesusiva mwitaa tuvata mwihuara Jesusiva nraakye qora suqaa api qua tiraqe mwia tuvaraare tita taqovarovata mwiva hia api qua tuvata mwihuara Jesusiva qua tura rieta qikye tita, Mwiva tiri quavata nraatara kyero kyuqe quama tiho, timwa kyeta mwihuara kyauqu ntukikinraaqata kyeta tirema varura.

Saitiusi vaisinramwuvanto qutu vita qaiqaa qati sivirara Jesusira kyapara hora

(Matiu 22:23-33; Maaki 12:18-27)

27 Vaisi mponramwu Saitiusi vaisinramwuvanto tiqata, Vaisivanto qutu viro ekyarama taiqa viro hiama qaiqaa siquananrove, ti varuhua uro Jesusira kyapara hita tiqata,

28 Mwaanra ti variara vaisio, tiri haivaqava Mosesiva mwaanra qua tiri timwa timwiqanro mwitaama qua vatorave. Vaisi impovanto hia nraaqiara mwataraitiro, qutu viraro mwia qatavantove mwia vakyaavave mwia nraata varatero nraaqiara mwata kyero nai qora mwaatana vataarive, turave.

29 Tire qiananra riaante. Haaru qate vakye 7 nramwu varurave. Mwinramwuhua sakyaava nraakye varatero hia nraaqiara mwataraitiro, qutu vuvaro

30 mwia nanaava mwia nraata varatero mwivavata hia nraaqiara mwataraitiro, qati qutu vurave.

31 Mwiva qutu vuvaro mwia nanaava nraakye mwia varatero mwivavata hia nraaqiara mwataraitiro, qutu vuvaro mwiaqataita hini mwihuavata mwitaamaqi vita uro ekyaa qutu vurave.

32 Mwihuara ekyaa qutu vuvaro nraakye mwivavata nraakiara variqi viro qutu vurave.

³³ Nraakiara nraakye qoravanto qaiqaa qati sivita vari entaraqaa mwi nraakyeva tara nraatave variananrove? Mwiva qati varu entara qoraissi 7 nramwu varatorave, tita.

³⁴ Saitiusi vaisinramwuvanto mwitaa tuvaro Jesusiva mwihua nkyiari timwa nyinro tiqaro, Mate mwaama mwatani varia nraakye qorahua nai vare nai vare hiavo.

³⁵ Nraakiara Kotiva taqairata nyaamwuni virara qioqa ihua mwihua qati vara sivuma kyairata mwihua mwini uro qati variqi viqata hiama nraata vaati varevararave.

³⁶ Mwihua nyaamwunyaahua votima kyeta variqata hia qaiqaa qutu vivarave. Kotiva mwihua nkyiari quntamwa teraqitairo qati vara qaiqaa sivuma kyaaninranra tita, mwihua Kotira nraaqiarama varivararave.

³⁷ Vaisivanto qutu viro qaiqaa qati siquaninranra nkyi haivaqava Mosesiva mwi quara qara ntumwa torave. Kotiva qia ite varu kyatariraqitairo Mosesirara qua tu entara Mosesiva Kotirara mwitaama kyero qara ntumwa tero tiqaro, Kotiva Evarahaamunraqaavata, Aisaakiraqaavata, Iaikopuraqaavata, ntaqikyi varivave, turave.

³⁸ Qio riaate, ekyaa enta variva, Kotiva hia qutu viro taiqavi inraikyaraqaa ntaqikyi varivama varirave. Mwiva qati variqi vi inraikyaraqaa ntaqikyi varivama varirave. Vaisivanto qutu viharo Kotiva qati variahuqaa ntaqikyintema kyero mwiva mwanraquraqaa ntaqikyi varirave, tiro.

³⁹ Jesusiva mwitaa tuvata mwaanra okyara tuhua hinivanto tiqata, Mwaanra ti variara vaisio, e kyuqe quama nkyiari hiniqama kyera timwa nyianro, tita.

⁴⁰ Mwihua aatu hiqata hia qaiqaavata Jesusira kyapara hiare timwa kye mwitaa tura.

Jesusiva Mesaiaara mwihua kyapara hura

(Matiu 22:41-46; Maaki 12:35-37)

⁴¹ Jesusiva mwihua kyaparama nyateqaro mwitaama tiro: Mpo hia vaisihua tiqata, Kotiva titaariva Mesaiaavanto Ntevitiva mwatataanira mwi naaquntaraqaanaavama variananrove, ti variarave. Nanraqamave mwihua mwitaa ti variavo?

⁴² Ntevitiva nai qara ntumwa to mpukuraqi nai tiqaro,
Kotiva ni nronra vaisiara tiqaro,
E nritarera ni kyaauqu kyaatutani
mwatakyaa vira variraqe

⁴³ nte i nrwmwutaahua nraatara kye ru taiqa kyaarira
e mwihuaqaa kyuqu ntamwa taante, turave.

(Ihi 110:1)

⁴⁴ Ntevitiva haaru mwitaama kyero qara ntumwa torave. Ntevitiva Mesaiaavanto qovara hianianranra tiqaro, Ni nronra vaisive, turave. Ntevitiva mwitaa turara tiro, nataama kyerove Mesaiaavanto Ntevitira nraisi variananrove? tiro.

Mwaanra okyara tu vaisihu qora kyaqara rauriqata variate tura

(Matiu 23:1-36; Maaki 12:38-40; Ruku 11:37-54)

⁴⁵ Jesusiva mwihua kyaparama nyatovata nraakye qora mwipi varuhua mwia qua rie varuvaro Jesusiva nai nraaqiaranramwuanra tiqaro,

⁴⁶ Mwaanra okyara ti varia vaisihuara rauriqata variate. Nraakye qoravanto mwihua taqeta qua mwanteqata qamwataate tita, mwihua tavuna mpuahaa kyuqera rupa vareta maaketiqi nraakye qora suqaa nraahu nrohi variarave. Mwihua mwaanra nraamwuqi vera nteta tainta uaquia hiraqa eqeta kyuqeraqaa nraahu mwatakyaa vita variarave. Mwihua

omwata nraanraqaa variqata mwihuara nronra vaisive qiate tita, vaisi nrutu vahiananrove variaraguaa mwihuavata mwatakyaa vita variarave.

⁴⁷ Mwihuara tetona nraakye nraamwuvata, mpo inraikya mpo inraikyavata, mpuara vareta tiqata, Mpohua tiri uaqia hi kyaiqara taqeta tiriaruaqia hia vaisihuave tivo, tita, mwihuara nraakye qora suqaa Kotirara mpuahaama kyeta aakyara nte variarave. Qikye, mwia kyaara mwihuauqaa nronraqama kyero qua vahiananrove, tiro. Jesusiva turama.

21

*Vehi nraakyevanto munima pataqia Kotirani taquqi kyora
(Maaki 12:41-44)*

¹ Jesusiva Kotira nraamwuqi variqaro taqvata airi inraikya vato vaisi-hua nri nteta Kotira kyaiqara rieqatama munima nronraqama kye taquqi mwaati kye varura.

² Jesusiva taqe varuvaro tetona nraakye hia mpo inraikyavata vatova vehi nraakyevanto nri ntero mwivavata taquqi munima uapaara taararu mwaati kyora.

³ Mwipi mwaati kyovaro Jesusiva tiqaro, Taqaate. Vehi tetona nraakyevanto kyai munimava ekyaa inraikya vataahua kyaa munimanravata nraattara kyaiho.

⁴ Airi inraikya vate variahua mwihuara nkyiari munima hini nraahu taquqi mwaati kyaavo. Mwi nraakyeva vehi variqaro nai vatai munimanra ekyaa kyaiharo hia kyaravata vara nraanriva vaiho, tiro. Jesusiva turama.

*Kotira nraamwu ntuarakuraakurama kye taiqa kyerara tura
(Matiu 24:1-2; Maaki 13:1-2)*

⁵ Vaisi imponramwuvanto Kotira nraamwuanra tiqata, Nraamwu kyuqera mwia taqaate. Nraakye qoravanto Kotirara rieqata munima kyaavata ori kyuqera vara kyeta nraamwu kyuqera hoqa taarave, tita.

⁶ Mwitaa tuvaro Jesusiva tiqaro, Nkye mate nraamwu mwaa taqe variarave. Nraakiara ori nai mwoqaqa nai mwoqaqaa taaqau kye vataava hia mwitaama vahiananrove. Nraamwu mwaa ntuarakuraakurama kyeta kyaivarohia ori mpoqiatantovata nai mwoqaqa nai mwoqaqaa vahiananrove, tiro.

*Muaanra airivanto qovara hianinranra tura
(Matiu 24:3-14; Maaki 13:3-13)*

⁷ Jesusiva mwitaa tuvata mwihuara tiqata, Mwaanra ti variarao, taireve mwitaa hiananrove? Nanra inraikyavanto qovara hirage tire mwiaaqaa vitama kye taqetave mwi entava nrianriva qaumato vaiho qiananrave? Tiri timwa timwinraqe riaare, tita.

⁸ Mwitaa tuvaro Jesusiva tiqaro, Mpowanto mwi quara nkyi api timwa nyiayko titaa rauriqata variate. Nraakiara vaisi airivanto hrinte ni nuta nteta tiqata, Kotiva ni titaihana nruva, nte mwaa mwivavata varuquo. Qio mwi entava nri ntaiho, tivarave. Mwihuara mwitaa tivata hia mwihuara sataqita quate.

⁹ Nkye variqata riaivarohia mpo mwatanaava mpo mwatanaanravata ntaqirata nkye hia aatu hiate. Kamaniva nai henanra mpovatama kyero ntaquqiro virata nkye hia aatu hiate. Mwi inraikyaya nraante qovara hiananrove. Mwitaa mwitaa hirata hia ekyaara enta nri ntaiho qiate, tiro.

¹⁰ Jesusiva mwitaa timwa kyero mwiva qaiqaavata timwa nyinro tiqaro, Mpo mwatanaava mpo mwatanaanravatama kyero ntaquananrove. Vunyaa vaisi mpovantovata qaiqaavata timwa nyinro tiqaro, Mpo mwatanaava mpo mwatanaanravatama kyero ntaquananrove. Vunyaa vaisi mpovantovata qaiqaavata timwa nyinro tiqaro, Mpo mwatanaava mpo mwatanaanravatama kyero ntaquananrove.

11 Nraakiara ekyaa mwata vahiarintema nronraqama kyero mwatura tuananrove. Kyaravanto hia vahirata aara nte entava mpoqi mpoqi vahiananrove. Nyiqa quari entava vahiananrove. Nyaamwuqi nraatuqa taani inraikyara mpo inraikya mpo inraikya taqeta tiqata, Qikye, mwaa nanra inraikyave taqauro, tivarave.

12 Qakyo mwi inraikyava mwi inraikyava qovara hirata nkyi nraante ntavaaqavu kyeta uaqiamma nyatevarave. Mwihua nkyi sitaqita uro mwaanra nraamwuqi nkyi ko timwa kyeta nkyi karavuqi sitaqita uro kyevarave. Nkye ni kyaiqa vare varivatara titi, nkyi ntavaaqavuqita uro nronra vaisi vunyaahua suqaa kyevarave.

13 Nkyi sitaqita uro kyera mwi entara nkye ni qua mwihua timwa nyiva nkyiara kyuqe entama vahiananrove.

14 Mwihua nkyi ko tirera hivata hia nkyeta nraato tu kyeta mwi quara mwi quara tirerave qiate.

15 Nte mwi entara nkyi kyaahaga hiarita nkye kyuqe qua kepuuya qua tivarave. Nkye mwitaa tivata nkyi uaqiamma nyatehua hia nkyi qua qio nraatara kyevarave.

16 Nraakiara nkyiqa qua vataate titi, nkyi nyohua sohuave, nkyi sata sakyahauve, nkyi kuaa nraanrevantove, nkyi totivantove, mwihuuma nkyi qovarama kyaivata nkyi ntavaaqavu kye sitevarave. Nkyi ntavaaqavu kyeta nkyi mponramwu ru kyevarave.

17 Ekyahua nkyiara Iesusira nraaqiarave tiqatama mwia kyaara mwihua hia nkyiara mwutukya vahirata varivarave.

18 Mwihua mwitaa hivata nkye hia aatu hiate. Nkye qioma varivarave. Hia nkyi qiaata kyaahi kuaiqiqavantovata raupiri hiananrove.

19 Nkye kepuuyaqama kyeta varivera, nkye ekyaa enta qioma qati variqi vivarave, tiro.

Ierusaremi ntamwa kyaivaro taiqa quani entarara tura (Matiu 24:15-21; Maaki 13:14-19)

20 Mwitaa timwa kyero Iesusiva tiqaro, Nkye mpo enta taqaivata ntaqi vaisihua Ierusaremi mwatukya vara ututuma taqvata nkye mwitaama qiate, Ierusaremi ntamwa kyaivaro taiqaari entava nrintaiho, qiate.

21 Mwi entara Iutiaani varihua aatu ntuqema kye hiantamwa tetuverara ora tatari taaqini quate. Mwi entara Ierusaremiqi varihua mwigqitai sivita hiante aatu ntuqema kyeta verara taaqiqaa quate. Mwi entara Ierusaremi mwia tokya vaikya varihua mwatukya mwipi hia quate.

22 Mwi entara Ierusaremini varihua nkyiari uaquia hi kyaiqara utira kyaara Kotiva mwihua ruananrove. Haaru Kotira mpukuqi qara ntumwa to quava quataa mwivau vahiarive tiro, mwi entara mwi inraikyava qovara vahiananrove.

23 Mwi entara nraaqiara tuaqa hitave, nraamwa nyi vari nraakyehuara po tuqo. Mwi entara mwihuara hia kyuqe enta vahiananrove. Mwi entara mwaa mwataraqaa varihua tiqata, Qio matema raupirimma quananrave, tivarave. Mwi entara Kotira raraqa tairaro mwaa mwatanaahua ntuquutananrove.

24 Mwi entara mpo mwatanaahua nri nteta paipa mpuahaqaotaita mwaa mwatanaahua mponramwu rukyeta hini mwihua ntavaaqavu varetu mpo mwata mpo mwatani uro kyevarave. Mwi mwatanaahua hia Kotira qua riehua Ierusaremiqi nrohiqata mwi mwatukyara ntamwa ntautiqaatiqama kyevarave. Mwihua Ierusaremini variqi vivaro Kotiva qiove timwa taari entava taiqa virata vivarave.

*Iesusiva nai qaiqaa tumuaninranra tura
(Matiu 24:29-31; Maaki 13:24-27)*

25 Nraakiara nyaamwuqi huaripaave, toraqaave, qovoragaave, vitama kye taqetama nraakye qoravanto tiqata, Qikye, po, nanra inraikyavanto qovarama virera uti variharove mwitaa iho? tivarave. Nraakiara vevara kyaarerar nramanri nronravanto nronraqama kyero nteqaro taku takaa hi varirata mpo mwatanaa mpo mwatanaahua kyuqu kyauqu ntirata aatu hiqata varivarave.

26 Nraakiara nyaamwuqi vahiari inraikyava apiqama kyero vahiqaro qakyaa qakyaa hi varirata nraakye qoravanto mwia taqeta mpo inraikyavanto qovara hianinra vekya variqata nataave hiananrove timwa kyeta nraatuqa tero vuqitairo nrivu nrivu hirata tumu ntivarare.

27 Mwitaa hi varirata mwihua taqe varivaqena nte mwatani mwatatai nraaqiarava nyaamwusaina tonamwuqi tumi variarita ni taqevarave. Nte mwunruqama taari inraikyava mpoqama kyero itero takyuqi variraqe nte kepukyavanto tumuaninrave.

28 Nraakiara mwi inraikyava mwi inraikyava mwitaama kye tohara tairata nkye mwaamwianrama vita qiata tuaahera kyeta vateqata tiri kyaahaqa hiariva qio vainima vaiho qiate, tiro.

*Iesusiva fikiqa ntumwa kyero tura
(Matiu 24:32-35; Maaki 13:28-31)*

29 Iesusiva mwitaa timwa kyero mwiva mpo quaqaa ntumwa kyero timwa nyinro tiqaro, Kyatari qaampuakya tamwa voti hiraravata mpo kyatariaravata riaate.

30 Nkye taqaivaro mwiva mwunri ntairata nkye mwiaqaa vitama kye taqeta tiqata, Huari nronraqama kyero itaari entava qaumaqa iho, tivarave.

31 Mwia votima kyeta nkye taqaivaro mpo inraikya mpo inraikyavanto qovara hirata nkye mwiaqaa vitama kye taqeta tiqata, Kotiva tiriqaa ntaqikyiari entava qaumatoma vaiho, qiate.

32 Nte quataama tuqo, Mwaa mwataraqaa varihua hia taiqa vivaro mwi inraikyara mwi inraikyarara tuva qovara hiananrove.

33 Nyaamwuvantovata mwatavantovata taiqa viraro ni quavanto qati nraahū vahiqiro quananrove.

Nkye rauriqata variate tura

34 Nkye rauriqata variate. Nkye kyara airi nreta uera nramanri nreqata mwata mwaqaanaa inraikyara nronraqama kyeta riemwaqita vivorave. Nkye mwitaamaqita vivaro mwi entava nrihanrama nyatero nri ntairata nkye hia terama teta varivorave.

35 Mwi entava mwaanra tita taintema kyero ekyaa mwata mwaqaqa varihuaqa qovara hiananrove.

36 Nkye rauru kyeqa variqi vigatama Kotirara aakyara ntaivaro mwiva nkyi kepukyaqama nyatairata nkye nraakiara nriani inraikyara nraatara kyetama ni mwatani' mwatatai nraaqiarara vuqaa qio sivita varivarave, tiro.

37 Iesusiva mwitaa timwa kyero mwiva mpo entanramwu variqaro Kotira nraamwuqi ihera nraakye qora mwakyaakya timwa nyiqanro entaqi uro Oripi taaqiqaa vaitata hura.

38 Mwiva mwitaamaqiro vuvata nraakye qoravanto nai vaaota toqaqi nrumu Kotira nraamwuqi variqata Iesusira qua riora.

22

Mwihua Jesusira ru kyarerata uti varura

(*Matiu 26:1-5, 14-16; Maaki 14:1-2, 10-11; Ioni 11:45-53*)

¹ Hia kyoto mperetirara nro entara mwia nrutu vekyahu nyato entarave tuva nri ntovata

² Kotira kyaiqa vare varuhua nronranramwuvata, mwaanra okyara ti varuhuavata, tiqata, Tire qumina Jesusira ru kyaarata nraakye qoravanto tiriar tivorave. Nataama kyetave tire mwia ru kyaananrave? titā.

³ Mwitaa ti varuvaro Iutaasi Isikeriotiva, mwiva Jesusira nraaqiara 12 nramwuqitairo varuvaro Saataaniva mwia mwutukyaqi viqetero kyaahqa huvaro

⁴ Iutaasiva siviro Jesusira qovarama kyarero uti variqaro Kotira kyaiqa vare varuhua mwihua nronra vaisivata, Kotira nraamwuqaa ntaqikyi varu pipohuavata, mwiva mwihua timwa nyinro tiqaro, Nte mwitaa mwitaa haritama nkye Jesusira ntavaaqavu kyaate, tiro.

⁵ Mwitaa tuvata mwihua qamwata kyeta tiqata, Tire i munimave mwiananrave? tuvaro Iutaasiva eo timwa kyero

⁶ mwiaqatairo variro tiqaro, Kyai nte taqaarita hia airi nraakye qoravanto mwiaavata varivaqena mwi entara nte mwia uqeta kyena qovarama kyaankye, tiro.

Iesusiva tuvata vekyahu nyato kyarara tera hora

(*Matiu 26:17-25; Maaki 14:12-21; Ioni 13:21-30*)

⁷ Iutaasiva mwitaa timwa kyero varuvaro hia kyoto mperetira nro entava nri ntovaro (mwi entaraqaa haaru nyaamwunyaava hia mwihua haivaqahua ru kyaratiro), mwihua vekyahu nyatero (nritarero uro Isipi nraaqiara ru kyo) entarara rieqatama mwi mwatanaahua sipisipi nraati rukye entava nri ntora.

⁸ Nri ntovaro Iesusiva Pitaakya Ionikya sitero tiqaro, Nkyetana uro vekyahu nyato kyarara terama taivaqe tire nraanre, tuvata

⁹ mwitanahua mwia kyapara hita tiqata, Taraqive mwi kyarara terama taananrave? tuvaro

¹⁰ Iesusiva tiqaro, Qio mwaini riaate. Nkyetana mwatukyaqi uro nteta vivaro vaisi mpovanto nramanri taqu kyaqa kyero varero aaraqaa nrianriva nrnumu nkyitana qintorama kyairata nkyetana mwia vataqita vivaro mwiva nai nraamwuqi viqetairata nkyetanavata mwiqi vera nteta

¹¹ nraamwu gorara mwitaama qiate, Mwaanra ti vari vaisiva iara tiqaro, Taraqive nte ntena nraaqiara kyapata vekyahu nyato kyarara nraaninrave? tiho, qiate.

¹² Nkyetana mwitaa tivarо mwiva nraamwu nronra mpo mwaanrini mwoqaga vahira nkyitana nyaamwu tairata nkye mwiqima kyara terama taate, tiro.

¹³ Iesusiva mwitaa tuvata mwitanahua vuhua uro taqovaro ekyaa inraikyavanto Iesusiva tunte tuntema kyero vahuvata mwitanahua vekyahu nyato kyarara terama tora.

Iesusiva nai nraaqiaranramwu kyapata kyara nronra

(*Matiu 26:26-30; Maaki 14:22-26; 1 Korinti 11:23-25*)

¹⁴ Mwitanahua kyara terama tovaro kyara nrenraqaa vahuvato Iesuviva nai nronraqama kyo vaisinramwuuhuavata taintaqaa mwatakya viro varura.

¹⁵ Mwiva mwihua timwa nyinro tiqaro, Qakyo nte nriqavi inraikyara vararera hiqanama nte mwaa vekyahu nyato kyarara nkivata variqana

nraaninranra vuni nronraqama kye rieqana varura mwia mate nkyivata nranrenrave.

¹⁶ Mwaa entaraqaataina hia qaiqaa vekyahu nyato kyarara nraaninrave. Nraakiara ekyaa Kotiva ntaqikyiari inraikyava qovarama virata nkye ntapihivage nte mwi entaraqaa qaiqaa nraaninrave, tiro.

¹⁷ Iesusiva mwitaa timwa kyero mwiva uaini kaapu vara kyero Kotirara kyugeve timwa kyero tiqaro, Mwaa kaapura vara kyeta nkye ekyahua mwiqitai nraate.

¹⁸ Mate mwaa entaraqaataina nte hia uaini nraanriva qati variqina quariro nraakiara Kotiva ntaqikyiari entava nri ntairaqlena nranrenrave, tiro.

¹⁹ Mwitaa timwa kyero mwiva mpereti vara kyero Kotirara kyugeve timwa kyero nteqa kyero nai nraaqifaranramwu nyinro tiqaro, Mwaa ni mamantama iho. Nte nkyiara rieqanama mwia nkyi nyuqo. Nte mate mwaa utuntema kyeta nkyevata mwitaamaqi viqatama nianra rieqata variate, tiro.

²⁰ Mwihua kyara nramwa kyovaro Iesusiva nramanri kaapuvata vara kyero kuua qarama kyero nyinro tiqaro, Nkyiara rieqanamà nte mwaa nramanrinra rauru nyatauqo. Kotiva nkyivata kuaaqi taaqau vi varirero qaraakya qua vataira mwi quava kepukyaqama quarive tiro, ni nraanrevanto mwi quara kepukyaqama kyaananrove, tiro.

²¹ Mwitaa timwa kyero Iesusiva tiqaro, Qio taqaate, ni qovarama kyaari vaisiva mwaini variqao ni vatama kyero kyara nre variho.

²² Ni mwatani mwataatai nraaqiarara ni ru kylerara qio Kotiva nianra mwi aanranraqaa quante tirave. Kotiva qiove tirata ni rukyaate tiro, ni qovarama kyaani vaisirara nte po kye tuqo. Mwiva viro raupirma quananrove, tiro.

²³ Iesusiva mwitaa tuvata mwia nraaqiaranramwuvanto nai kyapara hi nai kyapara hita tiqata, Qaqao, nai tavave tiriqitairo mwi kyaiqara mwitaama kyero varaan Grove? tura.

Tavave tirinramwuqitairo nronravanto variananrove tura

²⁴ Iesusira nraaqiaranramwuvanto varita tiqata, Tavave tirinramwuqitairo nronraqama viro nronra vaisivanto variananrove? timwa kyeqata inronra hi varuvaro

²⁵ Iesusiva tiqaro, Mwaa mwataraqaa variahua vunyahua nkyiari nraakyne qoraqaa ntaqikyiqtama tiqata, Nte nronravanto varurara tita, nkye ni qua rieta nkye nianra vaisi kyuquerave qiate, qiarave.

²⁶ Nkye hia mwihua nraantantaate. Nkyiqtairo mpovanto vaisi nronra varirero hiariva, mwiva uapaa vaisi nraantantamwa kyero variananrove. Nkyiqtairo mpovanto henahuqa ntaqikyirero hiariva, mwiva nai hena vaisinramwuni kyaiqa vara nyataarive.

²⁷ Tava nronra vaisi varirave? Vaisivanto mwatakyaa viro variqaro kyara nre variva, mwivave nronra vaisi variho? Mwia kyaiqa vaisivanto kyara varaqiro nrumu mwi variva, mwivave nronra vaisi variho? Qio, vaisivanto mwatakyaa viro variqaro kyara nre variva, mwivama nronra vaisi variho. Qio nte nkyi kyapata variqana hia nte nkyiara kyaiqa vara mataate tiraitina, nte nkyi kyaiqa vara nyatauvave, tiro.

²⁸ Vaisi mpo hiahuave mpo inraikyavantove ni uaqiamma matarera utuavata nkye ni vatama kyeta variqi vi variarave.

²⁹ Ni kova ni nronraqama kyaihana nte nraakyne qoraqaa ntaqikyiqina virerave. Nte ntena kora nraantantamwa kyena nkyivata nronraqama kyaarita

30 nkye nraakiara ni mwatukyaqi variqata nivatama kye kyaravata nramanrivata nramwaqi viqatama taintaqaa mwatakyaa vi variqata nkye Isareri nraakyе qora 12 okyara mwihuaqaa ntaqikyivarave, tiro.

Iesusiva Pitaarara tura

(Matiu 26:31-35; Maaki 14:27-31; Ioni 13:36-38)

31 Iesusiva mwitaa timwa kyero Pitaarara tiqaro, Saimonio, Saimonio, riaante. Saataaniva nkyi mwataarama kye nkyi ntainra kyaankye tiharo Kotiva qio mwitaa hiante tirave.

32 Nte Kotirara aakyara nteqanama iara mwia kyaahaqa hiraro mwiva iara kepukyaqama kyero riemwaqiro quarive turave. Nraakiara qaiqaa nianra riemwaqira viqarama ena qata vakya kepukyaqama nyataante, tiro.

33 Iesusiva mwitaa tuvaro Pitaava tiqaro, Qaqao, nronrao, nte ivatama kyena karavuqi vina ivatama kyena qutu quaninranra terama varuqo, tiro.

34 Mwitaa tuvaro Iesusiva timwa mwinro tiqaro, Pitaa, nte i timwa mwianinra riaante. E taarampo nani nianra hia mwia taqaurave tiraro kokoraaravanto nruqua qiananrove, tiro.

35 Mwitaa timwa kyero Iesusiva nai nraaqiaranramwu timwa nyinro tiqaro, Tauraaqama kyena nte nkyi sitauqata nkye munimavata, tuavata, kyuuq nraamwu hiravata, hia vararaitita, qati vurave. Nkye mwi entara mpo inraikyara aara ntorave iho? tuvata mwihua, Hiave, tifa.

36 Hiave tuvaro Iesusiva tiqaro, Mate mwaa tavave tua vataariva qiomia tuavata varero quananrove. Hia paipa mpuahaa vataariva nai tuavaaqaqo paipa kyoqama kyero varaarive.

37 Nte timwa nyianinra riaate. Haaru nianra qara ntumwa to quava mwivauma vahiananrove. Nianra mwitaama tiro: Nraakyе qoravanto mwianra uaquia hi kyaiqara uti varivave turave. Mwi quara haaru qara ntumwa tova mwivauma vahiananrove, tiro.

38 Iesusiva mwitaa tuvata mwia nraaqiaranramwuvanto tiqata, Nronrao, mwaini taqaante. Paipa mpuahaa taaratanaama vatauro, tuvaro Iesusiva qiove tiro.

Iesusiva uro Oripi taaqiqa variqaro Kotirara aakyara ntora

(Matiu 26:36-46; Maaki 14:32-42)

39 Iesusiva mwitaa timwa kyero mwiva nraamwuqitairo veva ntero nai nraaqiaranramwu kyapata Oripi taaqiqa nai vi varuraqaa qaiqaa viro.

40 Mwini uro ntero nai nraaqiaranramwu timwa nyinro tiqaro, Nkye Saataaninra qua rieqata uaquia hi kyaiqara utuarorave tita, Kotirara aak-yara nteqata variate, tiro.

41 Mwitaa timwa kyero Iesusiva mwihua mwini kyero pataqia vututo viro uro tori kyauru raviro Kotirara aakyara ntero tiqaro,

42 Ko, nte nriqa quani nramanrinra nraaninra voti hira e qatinani vara kyaante. Qio hia ni kyakya hira vataqira quante. Ena kyakya hira vataqira quante, tiro.

43 Mwitaa tuvaro nyaamwunyaava tumu ntero Iesusira kepukyaqama mwatovaro

44 Iesusiva varuvaro mwia mwutukyavanto anomia kyero uaquia huvare Iesusiva kepukyaqama kyero aakyara ntamwaqiro vuvaro Iesusr-aqaatairo toqaamwuvanto nraanre votima kyero mwataqi tumu ntura.

45 Qio Iesusiva Kotirara aakyara ntamwa taiqa kyero siviro nrumu ntantero uro nai nraaqiaranramwu taqvata mwihua mwutukyavanto uaquia huvata vaite varura.

46 Jesusiva mwihuara tiqaro, Nkye nanraqamave vaite variavo? Sivita Kotirara aakyara tivarо mwiva nkyi kyaahaqa hirata hia uaqia hi kyaiqara utuate, tiro.

Jesusira ntavaaqavu kyora

(*Matiu 26:47-56; Maaki 14:43-50; Ioni 18:3-11*)

47 Jesusiva mwini variqaro qati nraahu qua ti varuvata airi vaisivanto nri ntora. Jesusira nraaqiara 12 nramwuqitairo Iutaasiva airi vaisi sita varero mwiva nraante mwihua suni nruva Jesusiva varunani nri ntero Jesusira mota kyarero uti varuvaro

48 Jesusiva tiqaro, Iutaasio, qio e mwitaama kyera ni motenanra mwiaqove ni mwatani mwatatai nraaqiarara nramwutaahua suqaa qovarama kyenanrave? tiro.

49 Jesusiva mwitaa tuvata mwia nraaqiaranramwu mwiavata varuhua taqvata mwihua Jesusira ntavaaqavu kyarerata uti varuvata mwinramwuhua Jesusirara tiqata, Nronrao, tire qiove paipaqa mwihua teqa kyaananrave? titi.

50 Mwitaa timwa kyeta varuvaro mwinramwuhuaqitairo mpovanto Kotira kyaiqa vara mwate varu vaisihua mwihua vunyaa vaisi kyaiqa vaisi mpo kyaatutanyaa nraato teqa kyovaro tumu ntura.

51 Tumu ntuvaro Jesusiva qaqa hia qaiqaavata mwitaa hiate tiro. Mwitaa timwa kyero mwi vaisira nraatoqa na'i kyauquqo vatovaro qaiqaa naitarama vahura.

52 Kotira kyaiqa vara mwate varu vaisihua mwihua nronranramwuvata, Kotira nraamwuqaa ntaqikyi varu pipohuavata, nronra vaisi mponramwuvata, mwihua Jesusira ntavaaqavu kyarerata nruhuara Jesusiva tiqaro, Nkye kamaninravata ntaqi vaisira ntavaaqavu kyareratave paipavata kyaamwuvata vareta nriavo?

53 Nte nkyivata mpo enta mpo enta Kotira nraamwuqi variqi vi varuqata nkye hia ni ntavaaqavu kyaarave. Qio mate mwaa entava nkyinima vaiho. Mate enta hi inraikyava Kepukyaqama kyero ntaqikyi variho, tiro.

Pitaava Jesusira hia taqaurave tura

(*Matiu 26:57-58, 69-75; Maaki 14:53-54, 66-72; Ioni 18:12-18, 25-27*)

54 Jesusiva mwitaa tuvata mwihua mwia ntavaaqavu kyeta vitaqita uro Kotira kyaiqa vare varuhua mwihua vunyaa vaisi nraamwuqi kyovaro Pitaava nyianrasata viqaro mwihua sataqiro vuva uro taqvata

55 mwatukya utasata qia quara teta varuvaro Pitaavavata mwihua kyapata qia taare varurua.

56 Mwiaqaa varuvaro kyaiqa nraakye mpovanto taqovaro Pitaava qia taare varuvaro mwiva mwia aitutuma kyero taqero tiqaro, Mwaavavata Jesusikyantiri varivave, tuvaro

57 Pitaava qaqa tiro, Mwaa nraakyevao, nte hia mwia taqaurave, tiro.

58 Mwitaa timwa kyero mwini variqiro vuvaro qaiqaa vaisi mpovanto Pitaara taqero tiqaro, Evata mwia nraaqiaravanto variaro, tiro. Tuvaro Pitaava tiqaro, Mwaa vaisivao, hia nte mwivave, tiro.

59 Timwa kyero hia mpuahaama varuvaro vaisi mpovanto qaiqaa kepukyaqama kyero tiqaro, Mwi vaisiva Karirinyaaisavantora tiro, mwikyantiri varivave, tiro.

60 Tuvaro Pitaava qaqa tiro, Mwaa vaisivao, e qiana quara nte hia ntapihi kyauquo, tiro. Mwitaa ti varuvaro qamwanrama kyero kokoraaravanto nruqua tura.

61 Nruqua tuvaro nronravanto tuqasaa viro Pitaara vuqi taqovaro vaakya nronravanto Pitaarara tu quava mwia vu nraatoqi ntura. Vuni nronravanto tiqaro, E taarampo nani nianra mwia hia taqaurave tiraroma kokoraaravanto nruqua qiananrove, tura.

62 Mwi quava Pitaara nraatoqi ntumwa vuvaro mwiva ntapihi kyero riero mwiaqaatairo mwaaqani mwaati ntovaro mwia mwutukyavanto uaquia huvaro nronraqama kyero ntatero.

Iesusira uaqiana mwatora

(Matiu 26:67-68; Maaki 14:65)

63 Mwitaa huvata Iesusira ntavaaqavu vaisihua Iesusirara raima mwataeta Iesusira ntuquтиqata

64 Iesusiva hia taqaarive titi, mwihua tavuna vara kyeta vuvata qiatavata rupateta Iesusira ntuquтиqata mwia kyapara hita tiqata, Poropeti vaisi maavao, tavave i raho? Hia taqaraitira, tiraqeta riaare, timwa kyeta

65 mwihua uaquia hu quara mpo qua mpo qua timwa mwate varura.

Kaanasori suqaa uro kyora

(Matiu 26:59-66; Maaki 14:55-64; Ioni 18:19-24)

66 Mwitaamaqita vuvaro qaatata vuvata Kotira kyaiqa vare varuhua mwihua nronranramwuvata, mwaanra okyara ti varuhuavata, mwihua ntuvaantuama vita Iesusira vita vareta nkyiari kaanasori varunani uro kyovata

67 mwihua tiqata, Qutaaqama kyerave e Mesaiaavanto Kotiva titai vaisiva variaro? Tiri timwa timwinraqe riaare, titi. Mwihua mwitaa tuvaro Iesusiva tiqaro, Nte nkyi timwa nyianrita nkye hia ni quara qutaave tivarave.

68 Nte nkyi kyapara hiarita nkye hia mpo qua ni timwa mpivarave.

69 Qio mwaa entaraqaataina nte mwatani mwatatai nraaqiarava variqana Kotiva kepukyavanto varinani uro mwia kyauqu kyaatutani mwatakyaa vina varirare, tiro.

70 Iesusiva mwitaa tuvata mwihua tiqata, Qio mwitaa hirera e Kotira mwaaqvantove variaro? tuvaro Iesusiva nkyiari timwa nyinro tiqaro, Nkye qiera nte mwaa mwivave, tiro.

71 Iesusiva mwitaa tuvata mwihua tiqata, Qumina mwiaqaa qua vatehua nyaanraanronrave. Qaqira kyaare. Mwiama nai nroqitairo uaquia hi quara thihata riauro, titi. Tura.

23

Paireativa hunani Iesusira vitaqita uro kyora

(Matiu 27:1-2, 11-14; Maaki 15:1-5; Ioni 18:28-38)

1 Mwitaa timwa kyeta ekyaa mwihua sivita Iesusira vita vareta Paireativa varunani uro kyeta

2 Iesusiraqaa qua vateqata mwitaama titi, Tire taqauraro mwaa vaisiva nraakye qora uaquia hi aanranra nyaamwuteqaro mwihuara hia nronra vaisi vunyaanra Sisaara taakisi mwiate ti varirave. Mwiva nanrianra nte nronravanto nte nraakye qoraqaa ntaqikyiariva Mesaiaavanto varuqo ti variho, titi.

3 Mwihua mwitaa tuvaro Paireativa Iesusira kyapara hiro, Qutaave e Iutaa vunyaaisivantvari? tuvaro Iesusiva tiqaro, E qiananra nte mwaa mwivama iho, tuvaro

⁴ Paireativa Kotira kyaiqa varohua mwihua nronranramwuanravata, nraakye qora ntuvantuama vuhuaravata, tiqaro, Nte taquaqaro mwaa vaisiva hia kamaninra qua ntega kyaiho, tiro.

⁵ Mwitaa tuvata mwihua nronraqama kyeta kepuuya qua Jesusiraga vateta tiqata, Nraakye qoravanto kamaninravata ntaquate tiro, mwiva antua qua timwa nyi varivave. Mwiva tohara kyero vevara Karirisairo mwi quara timwa nyiqiro nrinro mwaini nri ntaiho, tita.

Herotiva hunani uro kyora

⁶ Mwihua mwitaa tuvaro Paireativa mwi quara riero mwiva tiqaro, Qutaa mwaa vaisiva Karirinyaavave? tiro.

⁷ Mwitaa timwa kyero mwiya ntapihi kyovaro Jesusiva Karirinyaava Herotiva mwi mwatanaahuaqaa ntaqikyunanyaava varuvaro mwiaqaatairo Paireativa Jesusira titovata Herotiva varunani Jesusira vitaqita uro kyora. Mwi entara Herotiva Ierusaremini uro varura.

⁸ Jesusira Herotiva varunani uro kyovaro Herotiva qamwatero. Herotiva Jesusira kyaiqara rieqaro airi enta mwia taqarero variqaro Jesusiva ni puqaa variqaro nronra kyaiqa varairaque taqarerave timwa kyero qamwata kyero

⁹ uro Jesusira airi qua kyapara huvaro Jesusiva hia qua mpoqiavata nai timwa mwirnraitiro varura.

¹⁰ Kotira kyaiqa vare varuhua nronranramwuvata, mwaanra okyara ti varuhuavata, mwihua sivita uro kepuuyaqama kyeta Jesusiraqaa qua vatovata

¹¹ mwiaqaatai Herotivavata, mwia ntaqu vaisihuavata, Jesusirara raima mwateta tiqata, E nronra vaisi variarava nronra vaisi tavuna utu taante, timwa kyeta tuavaaqa kyuqera utumwate ua qua timwa mwateta titovaro Paireativa varunani nrnumu ntantero vura.

¹² Haaru Herotivavata Paireativavata nramwutaatanavanto varurama. Mwi entaraqaataita mwitanahua totiqama vita kyuqema vi nanrianra nanrianra qamwateqatatana varura.

Iesusira qio ru kyaate tura

(Matiu 27:15-26; Maaki 15:6-15; Ioni 18:39-19:16)

¹³ Paireativa Kotira kyaiqa vare varuhua mwihua nronranramwuvata, nronra vaisi mponramwuvata, qumina nraakye qoravata, nyaanrama ntuvantuama kyero

¹⁴ mwihua timwa nyinro tiqaro, Nkye mwaa vaisira vitaqita nte hunani nrnumu kyeta tiqata, Mwaava nraakye qora uaqia hi aanranra nyaamwute variho, qiarave. Nkye mwitaa qiavana nte nkyl suqa variqana mwi quara avuqavu hiqana taquaqaro mwaa vaisiva hiama nkye uaqia hi kyaiqarara qiaro utiho.

¹⁵ Herotivavata mwitaa hiqaro taqero qati titaiharo nte hunani qaiqaa nriho. Riaate. Mwi vaisiva uaqia hi kyaiqara utuaninravauma tire mwia ru kyaararo qutu quananrove.

¹⁶ Kyaiqe nte qiarita mwia kyaamwuqo ntuqutu kyeta vataivaro qati quarive, tiro.

¹⁷ [Mpo ihi mpo ihi vekyahu nyato entaraqaa Paireativa nraakye qorara rieqaro karavu vaisi kuaiqia qati huvantu kyovaro mwaatani vura.] Paireativa Jesusirara kyaamwuqo ntuqutu kye vateta titaiharo qati quarive tuvata

¹⁸ ekyaa ntuvantuama vuhua qaqao tita, Mwia ru kyaante. Tiriara rieqarama Varavaasira huvantu kyairaro mwaatani quarive, tura.

¹⁹ [Varavaasira kamaninra vatama kyero mwi mwatukyaraqi ntaqura kyaaravata, vaisi ru kyora kyaaravata, karavu rupa kyovaro varuvaro]

20 Paireativa Iesusira huvantu kyarero uti variqaro qaiqaa nraakye qora kyapara hiro.

21 Kyapara huvata mwihua hia mwia qua riaraitita, nronraqama kye aayara nteta tiqata, Mwia kyatariqaa rutaante. Mwia kyatariqaa rutaante, tita.

22 Mwihua mwitaa tuvaro Paireativa taarampo nani kyapara hiro tiqaro, Mwaa vaisiva nanra quave nteqa kyaiho? Nanra uaqia hi kyaiqarave utiho? Nte mwia qua avuqavu hiqana taqauqaro hia mwiaqa qua vaiho. Hia tire qumina quaqaara vaisi mpo ru kyaananrave. Kyai nte qiarita mwia kyaamwuqo ntutqu tu kye vataivaro qati quarive, tiro.

23 Mwitaa tuvata mwihua kepukyaqama kyeta aakyara ntamwaqi viqata kyatariqaa rutaante nraahu tita. Mwitaa tiqatama Paireativa quavata rukyeta mwihua quavanto nraahu kepukyaqa huvaro

24 Paireativa mwihua qua nraahu riero qiove tiro.

25 Mwitaa timwa kyero mwihuara rieqaro mwiva kamaninravata ntaqura kyaaravata, vaisi ru kyora kyaaravata, karavuqi kyo vaisira huvantu kyero, mwiaqatairo nraakye qora kyakya hurara rieqaro naivanto Iesusira ntaqu vaisihua sita kyero nyinro.

Iesusira kyatariqaa rutora

(Matiu 27:32-44; Maaki 15:21-32; Ioni 19:17-27)

26 Iesusira nyuvata mwihua Iesusira vite viqatama aanraqaa vaisi mpo mwia nrutu Salmoniva mwiva Sairininyaava mwiva tokyasairo mwatukya nronra mwiqiara vuvata mwia qintorama kye vuaviraavira tita mwianra tiqata, Iesusiva qu tai kyatarira vara quqira mwia nraakiara virava uro mwataante, tita.

27 Mwitaa huvata nraakye qora airivanto mwia vataqita vurama. Mwihua utaqitata nraakye mpontramwuvanto Iesusirara ti atura ntqata ntataqita vuvaro

28 Iesusiva mwihua hunani tuqasaa viro timwa nyinro tiqaro, Ierusalemiqinaa nraakye tuaavo, Hia nianra ntataate. Nkyetaravata nkyeta nraaqiararavata ntataate.

29-30 Mpo entanramwu nri ntairata mwi entaraqaa nraakye qoravanto tiqata,

Ehaara nraakye hia nraaqiara mwatehuave
hia nraaqiara nraamwa nyihuave,
qora tatari taaqiara tiqata,
Tiriqaa nteqeta tumu ntumwaqu kyaate, tivarave.

Mwihua pata taaqiara tiqata,

Tiriqaa tumu ntita ntumwaqu kyaate, tivarave.

(Hosaiia 10:8)

31 Nte kyatari karaaha votima kyena varuqata mwihua mwitaama kyeqata ni uaqiana mate variavo. Nkye kyatari aahara votima kyeta variavata po, nraakiara mwihua nkyi nataa nataama kyetave nkyi uaqiana nyatevarave, tiro.

32 Mwitaa tuvata mwihua karavu vaisi taaratanaavata Iesusiravata rirerata siteta vurama.

33 Mwihua vuhua qumina mwatukya mwi mwatukyara nrutu Qiata Mwukyaarive tu mwatukyaraqaa uro nteta Iesusira kyatariqaa ninriqotai ruteta mwata quvu kyeta mwipi mwaamwi utaqaa rateta hini hini uaqia hu vaisihua mwitana rutora.

34 Rutovaro Iesusiva Kotirara aakyara ntero tiqaro, Ko, hia mwihua uaqia hi kyaiqara utuarara riaante. Mwihua mwitaa hiqata hia mwia utuara mwia okyara ntapihiavo, tiro. Mwitaa tuvata mwihua kaati ruantema kye ori tuto kyeqata Iesusira tuavaaqa ntainra kyeta varora.

35 Mwia tuavaaqa ntainra kyeta varovata qumina nraakye qora mwini sivita variqa taqe varuvata lutaai vaisi nronranramwuvanto Iesusirara raima mwateta tiqata, Mwiva airi vaisi kyaahaqa hi varivave. Kotiva mwiva titaiharo mwiva Mesaiaavanto varirera, mwiva qiomaa nai kyaahaqa hiananrove, tita.

36 Mwihua mwitaa tuvata ntaqu vaisihuavata Iesusirara raima mwateta uro uaini uka vura mwita nraante timwa kyeta mwianra tiqata,

37 E qutaa Iuttaaqaa ntaqikyirava hirera, e ena kyaahaqa hiante, tura.

38 Mwihua qua mpo Iesusira qiatani kyatariqaa qara ntumwa kyeta vatova mwitaama tiro:

MWAA VAISIVA IUTAA VUNYAA VAISIVE, tura.

39 Uaqia hu vaisiva mpovanto hini rutova mwivavata Iesusirara qora qua tiro tiqaro, Qutaave e Mesaiaavanto variaro? Qio mwitaa hirera, enavata tiritanavata kyaahaqa hiante, tiro.

40 Mwitaa tuvaro uaqia hu vaisiva mpovanto hiniqaa rutova eqaante tiro, Hiave e Kotirara aatu hiaro? Mwihua tiritana votima kyeta mwiavata rutaavo.

41 Mwihua tiritana qio rutaavo. Titatana uaqia hi kyaiqara kyaara tiritana rutaavo. Mwi vaisiva hia uaqia hi kyaiqara utivave, tiro.

42 Mwitaa timwa kyero mwiva Iesusirara tiqaro, Iesusio, i nronraqama kyaani entara nianravata riaante, tiro.

43 Mwitaa tuvaro Iesusiva tiqaro, Nte i timwa mwianinra riaante. Mate e mwatukya kyugeraqi ni vatama kyera varinanrave, tiro.

Iesusiva qutu vura

(Matiu 27:45-56; Maaki 15:33-41; Ioni 19:28-30)

44 Mwitaa tuvaro huari nrinro qiataqa vahuvaro mwiaqatairo upima vuvaro hia huari itovaro kyokira nráahu rutovaro huári tumiviro 3 kirokiqa hvuvaro qaiqaa ntuvaahama vura.

45 Ierusalemini Kotira nraamwuqi tavuna tauha votima kye hiritova utaqaa nai nrähitu vuvaro

46 Iesusiva kyatariqaa variqaro paatiro aakyara ntero tiqaro, Ko, ni manraqura tu varaante, tiro. Mwitaa timwa kyero mwiva qutu vura.

47 Iesusiva qutu vuvaro ntaqu vaisihua qjata vaisivanto Iesusiva mwitaa hura taqero Kotira nrutu tuaaherero tiqaro, Qutaama mwaa vaisiva avuqavu nrohi vari vaisivave, tiro.

48 Mwitaa tuyata mpo uhua mwi inraikyava qovara hora taqarerata ntuvaantuuma vuhua, mwihua variqata mwi inraikyara taqeta, mwiaqataita mwihua nkyiari mwaatani nrumu ntanteta viqata mwutukya uaqia huvata nkyiari *mwekuraata/mwetokya* ntuqutu kyeqata surama.

49 Mwihua vuvata Iesusira vataqi nrohu nraakye qorahuavata, nraakye mponramwu Karirisaita mwia vataqita nruhuavata, mwihua nyianra sata variqata mwi inraikyava qovara hora taqe varura.

Iesusira quntamwa tora

(Matiu 27:57-61; Maaki 15:42-47; Ioni 19:38-42)

50-51 Vaisi mpovanto mwia nrutu Iosepiva Arimatisa mwatukya Iutianyaava, mwiva vaisi kyuqevo avuqavuma kyero nrohi varu vaisiva, mwiva Kotiva ntaqikyiani entarara taqevaro mwiva vekya varura. Mwiva kaanasorivanto variqaro mwiva hia mpo kaanasorivanto tu quarara eo tiraitiro, mwihua kyaiqaravata hia qamwateqaro varura.

52 Mwi vaisiva Pairaativa varunani uro ntero tiqaro, Iesusira mwamwanta mpiraqe varaqina quintaankye, tiro.

53 Mwitaa timwa kyero mwiva uro Jesusira mwamwanta itu kyero vara mwatumu vatero egarori tavuna vara kyero mwia qapuqama kyero uto ori qaraakya vauru kye hia vaisi mpo quntoraqi uro quntamwa tora.

54 Mwi entara nraakye qoravanto hora Saarareqa tiri mwaanra enta mwi entara kyaiqa varaarorave timwa kyeqata mwi entarara rieqata mpo inraikya mpo inraikya tera taarama kye vate varu entava vhura.

55 Mwitaa hvata nraakye mpone ramwuvanto tauraa Karirisaita Jesusira vataqita nrohi varu nraakyehua Iosepiravata uro Jesusira quntarera hu-raqi vuhua uro taqovaro Iosepiva Jesusira mwamwanta vatovata mwihua taqeta

56 mwiaqatai nrumu ntante nkyiari nraamwuqi uro variqata hamwenra kyugema kyero mwunta vuravata, mpo inraikya mwia mwamwantaqaa qumwa teravata, tera hora. Mwihua nkyiari mwaanra qua rieqata Saarareqaa qati varura.

24

Iesusiva quntamwa toraqitairo sivura (Matiu 28:1-10; Maaki 16:1-8; Ioni 20:1-10)

1 Nraakye mwihua kyugema kyero mwuntavi varu inraikyara terama kye vateta mwihua Saarareqa vari kyeta Saanteqa vaakya toqa entaqi sivita mwi inraikyara vareta Jesusira quntamwa toraqi vuhua uro taqovaro

2 qesaqaa ori nronra tita tora ventaqita uro tokyani vatova vhura.

3 Vahuvata mwihua oriqi vera nte taqovaro nronra vaisi Jesusira mwamwanta hia vhura.

4 Hia mwipi vahuvata mwihua mwipi qati apiqama vita airi nraato ti varuvata qamwanrama vaisi taaratana qovarama vita takyuqu tuavaaqara ututeta mwihua nraaqani sivita varura.

5 Varuvata nraakye mwinramwuhua nronraqama kye aatu hita nkyiari siri mwataqiqi vateta varuvata vaisi mwitanahua tiqata, Nanraqamave nkye qati vari vaisirara qutu quahua mwaataqiqi puua hi variavo?

6 Mwiva hia mwaini variho. Mwiva qati sivoho. Tauraa mwiva Karirini variqaro nkyi timwa nyu quara nkye qative riemwa taavo?

7 Mwiva mwi entara tiqaro, Nte mwatanai mwatatai nraaqiarava variarita uaqia hi vaisihua ni ntavaaqavu kyaate tiro, ni qovarama kyaairata mwihua ni pitaqita kyatariqaa ru taivaqena nte taarampo enta varina qaiqaa qati siquaniinrave tirave, tita.

8 Mwitanahua mwitaa tuvata nraakye mwinramwuhua nyaatoqi Jesusiva tu quava ntuvata

9 mwia quntamwato mwatara mwini kyeta nrumu ntante uro Jesusira nraaqiara 11 nramwuvata mpo hahuavata timwa nyunra.

10 Nraakye mwinramwuhua nyutu vahirero Mariaava Makataranyaava, Iohaanaava, Iemisira nrova Mariaava, mwinramwuhua mwi inraikyara taqeta uro Jesusira nraaqiaranramwu timwa nyuvata

11 mwihua tiqata, Qaqao, nkye unrama qiao. Hia mwianra qutaave qiananrave, tita.

12 Mwitaa tuvoro Pitaava siviro hiantero mwia quntamwa toraqi vuva uro kakataama viro vera taqovaro tavuna nraahu vahuvaro Jesusira mwamwanta hia vhura. Hia vahuvaro mwiva nrumu ntantero uro mwaatani variqaro nai uro taqo inraikyara airi nraato tiqaro varura.

Mwatukya Emiasinianra vu vaisitanahuara tura (Maaki 16:12-13)

¹³ Kuua mwi entaraqaa Jesusira nraaqiara taaratanavanto mwatukya mpo Emeasinianra vura. (Kyuvaira vaiharo Omwunra vahira mwia votima Ierusaremi vahuvaro Emeasi mwatukya vahura.)

¹⁴ Mwitanahua aanraqaa mwinianra viqata Jesusira ru kyo quara timwaqtita vita.

¹⁵ Mwitanahua timwaqi vuvaro Jesusiva nai nri ntero mwitanahua vatama kyero vuvata

¹⁶ mwitanahua mwia taqeta hia mwia ntapihi taqaraitita, mpo vaisivantove tuvaro

¹⁷ Jesusiva mwitanahuara tiqaro, Nkyetana aanrani nriqatama nanra quave timwaqita nriavo? tiro.

Mwitaa tuvata mwitana uro mwiaqaa ra kyeta mwitana mwutukyavanto uaquia huvatatana

¹⁸ mpovanto Kiropaa sirave tuva Jesusira kyapara hiro tiqaro, Mate airivanto Ierusaremiqi variaraqitaira e kuaikuvantove enta nanau qovara hi quara hia riaaro? tiro.

¹⁹ Mwitaa tuvaro Jesusiva tiqaro, Nanra quave? tuvata mwitanahua tiqata, Jesusiva Nasaretinyaanra quave. Mwi vaisiva poropeti vaisivanto variqaro Kotira vuqaavata, nraakye qora suqaavata, nronra kyaiqa vareqaro kyuqe qua nraahu tirave.

²⁰ Mwiva mwitaa hi varihata Kotira kyaiqa vara mwate varia vaisihua mwihua nronra vaisinramwuvata, tiriqaa ntaqikyi variahuavata, mwihua kamaninra mwiavarso mwiva mwia rukyaate thata mwia ninriqotaita kyatariqa rutaavo.

²¹ Tire tauraa mwi vaisirara Kotiva mwia titaiharo mwiva mpo mwatanaahua nraatara kyero tiri Isarenqaa ntaqikyiariavave tunanrave. Qua mpovatama vaiho. Mwia rukyaavaro mate taarampo enta nriraiho.

²² Mate tiretana nraakyenramwuvanto qia quara rieta nrihanramama vuro. Mwinramwuhua vaayka toqaqi mwia quntamwa taaraqi uro nteta hia mwia mwamwanta taqaavo.

²³ Mwinramwuhua uro ntanteta nrumu tiri timwa timwita tiqata, Nyaaamwunyaahua tirinramwuanra mwiva qatima variho qiaovo, qiarave.

²⁴ Nraakyenramwuvanto mwitaa qiaavata tirinramwuqitaita mpo hiahua mwia quntamwa taaraqi quahua uro taqaavaro nraakyenramwuvanto qia quava gutaa vahata mwinramwuhuavata mwia mwamwanta hia taqaarave, titaa.

²⁵ Mwitana mwitaa tuvaro Jesusiva mwitanahua timwa nyinro tiqaro, Hiave nkyetana su nyaato vaiho? Haaru poropeti vaisinramwuvanto timwa to quara, mwianra nkyetana qamwanrama kye qutaave qiataara vahata nkyetana qakyoma kyaavo.

²⁶ Nkyetana hia ntapihiaraye iho? Kotiva titaari vaisiva Mesaiaavanto nriqa vi inraikyara varaqiro viro mwiaqaaatairo nronraqama viro kepukya vaisivanto variananrove, tiro.

²⁷ Mwitaa timwa kyero Jesusiva Mesaiaara Kotira mpukuqi qara ntumwa to quara mwitana timwa nyinrenro tohareqaro Mosesira mpukuqitairo timwa nyiqiro viro, poropetinramwu mpukuqitairovata timwa nyiqiro vura.

²⁸ Mwitaa timwaqi vi varuvaro mwitanahua virera tu mwatukyava qaumato vahuvaro Jesusiva rieqarovata aanra mwiaqaa qati nraahu vi varuvata

²⁹ mwitanahua hiave titaa, Mateqama enta hiananrove. Qaqira kyera tiritanavata vaitaante, tuvaro mwihuavata varirero nraamwuqi vura.

³⁰ Iesusiva nraamwu mwipi variqaro kyara taintaqaa mwitana vatama kyero mwatakyaa viro Kotirara kyuqeve timwa kyero mpereti nteqa kyero tukyama kyero nyuvata

³¹ mwitana su ntapairi vuvata ntapihi rieta mwitana mwia ntapihi taqeta. Mwitana mwia ntapihi kyeta taqovaro Iesusiva mwitana suqaatairo uvaarama vura.

³² Iesusiva uvaarama vuvata mwitana nai timwa mwi nai timwa mwi hita tiqata, Qikye, mwiva aanraqaa nriqanro Kotira mpukuqinaara qua okyara ntapihi kyero tiritana timwa timwiharo qutaa tiritana mwutukyaqitairo kyuqe hirave, tita.

³³ Mwitaa timwa kyeta mwitanahua qamwanrama sivitatana nrumu ntanteta Ierusalemini uro Iesusira nraaqiara 11 nramwu puaama kyeta taqovata mwinramwuhua mpo vaisinramwu kyapata ntuvantauma vita varita tiqata,

³⁴ Nronravanto qutaama qaiqaa qati siviho. Saimoniva mwivama mwia taqaiho, tuvata

³⁵ mwitanavata aanrani vita taqorara mwihua timwa nyita. Mwitanaahua tiqata, Mwiva mpereti nteqa kyaihata mwiaqataita tretana nronra vaisi ntapihi taqauro, tita.

Iesusiva nai nraaqiara suqaa qovarama vura

(Matiu 28:16-20; Maaki 16:14-18; Ioni 20:19-23)

³⁶ Mwitana qua mwihua timwa nyi varuvaro mate mwipiqa ronravanto nai qovarama viro mwihua nraaqani siviro variro tiqaro, Nkyi mwutukyavanto qibaakyama vahiarive, tiro.

³⁷ Mwitaa tuvata mwihua ronraqama kyeta aatu hita tiqata, Vaanavanto qovarama viho, tuvaro

³⁸ Iesusiva mwihuara tiqaro, Nkye nanraqamave aatu hiavarao taara vu nraato tuava nkyi su nyaatoqi vaiho?

³⁹ Ni kyuqu kyauqu taqaate. Nte mwivama huqo. Ni mamantaqa tiqata taqaate. Nte vaisima varuqo. Vaana mwia hia ni votima kyero mwativata mwukyaarivata vahirave, tiro.

⁴⁰ Mwitaa timwa kyero mwiva nai kyuquvata kyauquvata nyaamwutowata

⁴¹ mwihua mpinqama kyeta qamwateta kyauqu ntukikinraaqateta hia qamwanrama qutaave tuvaro Iesusiva mwihua kyapara hiro tiqaro, Kyara nraanriva vahirove? tuvata

⁴² mwihua tavukya uta tora pataqia mwuvaro

⁴³ mwiva mwihua suqaa variqaro vara kyero nronra.

⁴⁴ Iesusiva tavukya nramwa kyero mwihua timwa nyinro tiqaro, Tauraa nte nkyivata variqana nte mwaa quara nkyi timwa nyiavarave. Nianra haaru Mosesiva mpukuqi qara ntumwa to quarave, poropeti vaisinramwuhanto qara ntumwa to quarave, Saami mpukuqi qara ntumwa to quarave, nte nkyi timwa nyiqana mwi quara mwivau ma vahiananrove qiavarave, tiro.

⁴⁵ Mwitaa timwa kyero mwihua Kotira mpukuqi qara ntumwa to quara ntapihi kyeta riaate tiro, Iesusiva mwi quara mwihua timwa nyinro tiqaro,

⁴⁶ Mwaa quara qara ntumwa torave. Mesaiaarara mwiva nriqa quani inraikyara varero uro qutu viro taarampo enta variro qaiqaa qati siquananrove.

⁴⁷ Mwiaqataita nkye ni kyaicqara ni nutuara rieqatama nraakye qora timwa nyiqi viqata uaqia hi aanranra qaqlira kyaicqaro Kotiva nkye uaqia

hi kyaiqara uti quara nruka nyataarive qiate. Mwi quara timwa nyiqi viqata Ierusaremini nraante mwi quara timwa nyiqi vita mwiaqaataita mpo mwatanaa mpo mwatanaa timwa nyiqi quate.

⁴⁸ Nkyenramwu nkyeta suqotaita mwi kyaiqaravata mwi inraikyaravata taqaarave.

⁴⁹ Ni kova nai kyauqu nriqiqaa vatero ntene nkyi nyinrenrave qianinra ntema mwia titaariro tumuananrove. Nkye mwaa mwatukyaraqi variqi vivaro nyaamwusairo mwiva tuminro nkyiqi variqaroma nkyi kepukyaqama nyataaananrove, tiro.

Iesusira vitero nyaamwuni vura

(Maaki 16:19-20; Kyaiqa Varora 1:9-11)

⁵⁰ Iesusiva mwitaa timwa kyero mwiva mwihua sita varero Ierusaremi kyero Mpetaanini uro ntero nai kyauqutana tuaahera kyero mwihua kyuqema nyatero.

⁵¹ Mwiva mwihua kyuqema nyate varuvaro Kotiva mwia nyaamwuni vitero vuvaro mwiva nai nraaqiara mwihua kyero vura.

⁵² Iesusiva nyaamwuni vuvata mwia nraaqiaranramwuvanto mwia nrutu tuaahera kyeta nrumu ntanteta Ierusaremini vura.

⁵³ Mwini uro variqata Kotira nraamwuqi mpo enta mpo enta Kotira nrutu tuaaheraqita vi varura.

IONI Ioniva Iesusiva nrohurara tura

Iesusira okyarara tura

¹ Haaru toharero quavanto varura. Mwi quava Kotikyantiri varura. Mwi quava nai Kotiva varura.

² Tauraa toharero mwi quava Kotikyantiri variqiro vura.

³ Mwiva Kotikyantiri variqi viqaro mpo inraikya mpo inraikya ekyaa inraikya utu kyero vatora. Mpovantovata mpo inraikya utuariva hia varuvoro qua mwiva nraahu ekyaa inraikya utu kyero vatora.

⁴ Mwi quava qati variqi vi variara tuqavantomma variro. Mwi quava omwa votima kyero itamwaqiro viqaroma nraakye qora kyuqema kyero ntuvahama nyatero.

⁵ Omwavanto upi hiraqi itamwaqiro viharo hiama enta hi inraikyava mwia qipa kyaariva vahiro.

Nramanri nyi varuva, Ioniva Iesusirara timwa nyunra

⁶ Kotiva vaisi mpo titora mwia nrutu Ioniva.

⁷ Nraakye qoravanto Iesusirara mwiva qutaa omwabantove qiate tiro, Ioniva mwianra timwa nyinrenro nri ntora.

⁸ Ioniva nai hia mwi omwava variraitiro, mwiva omwa mwianra timwa nyinrenro nrunra.

⁹ Mwiva nri ntovaro mwia nraakiara quavanto nri ntero omwa votima kyero itamwaqiro viqaroma ekyaa mwaa mwataraqaa nraakye qora ntuvahama nyatero.

Iesusira qoririma mwatora

¹⁰ Iesusiva nai mwaa mwatara utu kyero vatova mwatani tumuvata mwaa mwatanaahua hia mwia ntapilhi kye taqaraitita, mwianra hia mwivave tita.

¹¹ Mwiva nai nramwunaahua hunani nri ntovata mwia nramwunaahua hia mwia kyakyama mwataraitita, mwia qoririma mwatora.

¹² Mwitaahuvatavata mpo uhua mwia kyakyama mwateta mwianra qutaa mwivave tura. Mwitaa tuhua mwihua mwiva nronraqama kyovata mwihua Kotira nraaqiaraqama vita varura.

¹³ Hia nraakyevanto nraaqiara mwataintema kyero mwihua mwata taihata Kotira nraaqiaraqama vita variara. Hia qumina vaisi kyakya hiraqa Kotira nraaqiaraqama vita variara. Nai Kotira kyakya hiraqa mwihua Kotira nraaqiaraqama vita variara.

Iesusiva vaisi tuora

¹⁴ Kotira quavanto vaisi tuero tirivata varirero tuminro. Mwiva tuminro mwaa mwataraqaa varuvata tire mwia peqa okyara taqaavananra. Tire taqaavararo mwi vaisiva kyuqe hiro vaisiara mpoqama kyero po kye timwa nyateqaro qutaa qua nraahu ti varuva varura.

¹⁵ Ioniva nraakye qora timwa nyinro tiqaro, Nte haaru nkyi timwa nyina tiqana, Vaisi mpovanto ni naakiara nrianriva ni naataraaanrove, tuva qio mwaa mwi vaisivave. Nte hia qovara hiava entara mwiva haaru qati variqiro vurave. Mpovantovata mpo inraikya utuariva hia varuvoro qua nraahu ekyaa inraikya utu kyero vatora. Mwitaama variqarora tiro, mwi vaisiva ni naatara kyero mwiva nronrvantovata variho, tiro. Ioniva mwitaa tura.

¹⁶ Iesusiva mpoqama kyero tiriara nraamwunruqa taiharo mwiva tiriara po kye timwa timwatero airi nani tiri kyugema timwate varira.

¹⁷ Haaru Kotiva nai qua mwaanra nraakye qoravanto hia nteqa kyaraitita, gati nraahu riemwaqita quate tiro, Mosesira mwunra. Mate mwaa entara Iesusi Karaisiva Kotiva hinasaairo tumu Kotiva po kye timwa timwatai okyarara, qutaa okyara tiri timwinra.

¹⁸ Hia qumina vaisi mpovanto Kotira taqairave. Mwia mwaqvanto nai qora nraaqani variva, mwiva nraahu nai qora okyara qovarama kyaihata tire taqeta ntapihunana.

*Ioniva hia nte mesaiaavantove tura
(Matiu 3:1-12; Maaki 1:1-8; Ruku 3:1-18)*

¹⁹ Ioniva Iesusirara timwa nyu quava mwataamama vahiro. Ioniva nri ntovata Iutaa vaisi nronranramwuvanto Ierusaremini varuhua vaisi mponramwu sitovata Kotira nraamwuqi Kotira kyaiqa vara mwate varuhuavata, Rivaira kuua okyara mponramwuvantovata, mwihua uro nteta Ioninra kyapara hita tiqata, E ta vaisivave? (E qutaa tiri mesaiaavantove variaro?) tita.

²⁰ Mwihua mwitaa tuvaro Ioniva hia qua tugetaraaitiro, vutu kyero timwa nyinro tiqaro, Qaqao, hia nte Kotiva titai vaisiva mesaiaavanto varuqo, tiro.

²¹ Tuvata mwihua mwia qaiqaa kyapara hita tiqata, E hia mwivave tiqara, e mpo tavave hiaro? E tiri haivaqava, Iraisaavave variaro? tita.

Tuvaro Ioniva qaqao, Nte hia mwivave, tiro. Tuvata mwihua qaiqaa mwia kyapara hita tiqata, E ta vaisivave? Tire poropeti vaisi mpo mwia vekeyama varuro. E mwivave hiaro? tuvaro Ioniva qaqao nraahu tiro.

²² Mwitaa tuvata mwihua tiqata, E tavave hiaro? Timwa timwinraqe tire nrumu ntanteta tiri titaa vaisihua iara uro timwa nyianre. E enanra tavaveve tira hiaro? tita.

²³ Mwihua mwitaa tuvaro Ioniva timwa nyinro tiqaro,
Nte qumina sata variqana aakyara ntena tiqana,
Aanra ntapihi taivaro nronravanto nrianrive,
ti varuvama varuqo, tiro.

(Aisaiaa 40:3)

Haaru poropeti vaisi Aisaiaava tu quara Ionivavata tura.

²⁴ Ioniva mwitaa tuvata Parisi vaisinramwuvanto sitohua tiqata,

²⁵ E tiriara nte hia mesaiaavanto varuqo qiaro. Hia nte Iraisaavave qiaro. Hia nte poropeti mwivave qiaro. Qio nanraqamave qumina vaisi varuqo qiarava nramanri nyi variaro? tita.

²⁶ Tuvaro Ioniva mwinramwuhua timwa nyinro tiqaro, Nte qumina nramanri nraahuma nraakye qora nyi varuqo. Mpovanto nkyi utagaav varira nkye hia mwia taqaarave.

²⁷ Mwiva ni naakiara nrivave. Nte pata vaisi varuqaro mwiva nronra vaisi varihananra tina, nte hiama qio mwiva kyuqu nraamwu rupa tai kyantara huvantu mwataaninrave, tura.

²⁸ Ioniva Mpetaani mwaata Iotaani nramanri qarahi hini variqaro nramanri nyi varu entara mwi quara tura.

Ioniva Iesusirara Kotira sipisipi nraative tura

²⁹ Mwia qanranraa Ioniva variqaro taqovaro Iesusiva mwisairo nri varuvaro mwiva tiqaro, Qio taqaate. Mwiva Kotira sipisipi nraative. Mwiaqama Kotiva mwatani varihua uaquia hi kyaiqara utira taiqa nyataaananrove.

³⁰ Nte haaru tiqana, Vaisi mpovanto ni naakiara nrianriva ni naataraananrove. Nte hia qovara hiava entara mwiva haaru qati variqiro

vuvave. Mwitaama variqarora tiro, mwiva ni naatara kyero nronravanto variananrove, tu vaisiva, mwaa mwivave.

31 Tauraa hia nte mwia ntapihi taqaurave. Nkye Isareri nraakyе qoravanto mwia ntapihi kye taqaate tina, nte mwaini nrumu variqana nramanri nkyi nyi varurave, tiro.

32 Mwitaa timwa kyero Ioniva Jesusirara mwihua yutukye timwa nyinro tiqaro, Nte taqauqaro Kotira mwanraquravanto minrunra voti hiva hit-mwaqiro tuminro tumu mwiaqaa varirave.

33 Tauraa nte hia Jesusira ntapihi taqe varuqaro Kotiva ni titaihana nte nramanri nkyi nyi varuqaro Kotiva ni timwa mpiro tiqaro, E taqairaro ni mwanraquravanto quariva uto mwiaqaa variāni vaisira qio mwianra mwivave qianta. Mwiva hia qati nramanri nyiananrove. Mwiva nraakyе qora ni mwanraqura nyianrivave, tirave.

34 Kotiva ni mwi quara timwa mpihana nte mwi inraikyara kyuqema kyena taqena nte mwianra mwaavama Kotira mwaaquve túqo, tiro.

Iesusiva vuniqama kyero erahiamuaantema vaisi sitora

35 Mwia qanranraa Ioniva nai nraaqiara taaratana mwia vataqita nro-hutanavata siviro varuvaro

36 Iesusiva nritarero vuvaro Ioniva mwia vutu taqero, mwitana timwa nyinro tiqaro, Taqaate. Mwiva Kotira sipisipi nraative, tiro.

37 Mwitaa tuvata Ioniinra vataqita nrohutana Ioniva tu quara rieta, mwiaqataa tuqasaa vita Ioniinra mwini kyeta Jesusira vataqita vura.

38 Vuvaro Iesusiva tuqasaa viro taqvata mwitana mwia vataqita nruvaro mwiva tiqaro, Nkyetana naanrave nriavo? tuvata mwitanahua tiqata, *Rapai*. mwaanra ti variara vaisio, e taraqi variaravave? tuvaro

39 Iesusiva tiqaro, Qio nrita taqaate, tiro. Mwitaa tuvata mwitanahua mwia vatama kyeta uro mwiva varuraqi varita. Mwitanahua Iesusira vatama kyeta variqi vita enrovata nrumu ntanteta vura.

40 Mwitanahua Ioniva Jesusirara tu quara rieta Iesusira vataqi vuraqitairo mpo Enturuva, Saimoni Pitaara qatavanto varura.

41 Mwitana Iesusira mwini kyetata Enturuva nai vakyaara puaama kyero mwia timwa mwino tiqaro, Tiretana, Kotiva titai vaisira, mesaiaa mwia puaama kyauro, tiro. (*Mesaiaave, Karaisivave*, kuaa nrutuma vahiro.)

42 Mwi vaisira puaama kyeta taqauro, timwa kyero Enturuva nai vakyaara vita varero Iesusiva hunani uro kyovaro Iesusiva mwia taqero tiqaro, E Ioninra mwaaqu Saimonivave. Nte qaraakya nrutu nteqana iara Sipaasirave tirerave, tiro. *Sipaasirave, Pitaarave*, kuaa nrutuma vahiro. (Mwaa quaraqitai mwi nrutura tirerata *Orivave* tita.)

Iesusiva Piripikya Nataanierikya nyaanronra

43 Mwia qanranraa Iesusiva Karirini virerave timwa kyero, uro Piripira puaama kyero mwianra tiqaro, Ni naakiara nriante, tiro.

44 Piripiva Vetasaitanyaavama variro. Enturukya Pitaakyavata kuaa mwatukya mwiqinaahua varura.

45 Iesusiva Piripirara ni pataqira nriante tuvaro Piripiva Nataanierira puaama kyero mwia timwa mwino tiqaro, Haaru tiri haivaqava Mosesiva mwaanra qua qara ntqaro mwi vaisirara timwatovata, poropeti vaisin-ramwuvata, mwi vaisiva nraakiara qovara hiananrove timwa kyeta qara ntumwato vaisira, qio mate mwi vaisirama taqauqo. Mwiva Iesusiva Iosepira mwaaqvantu Nasaretiqinaavave, tiro.

⁴⁶ Tuvaro Nataanieriva tiqaro, Qaqao, qiove kyuqe vaisivanto mwi mwatukyaraqitairo qovara hiananrove? tiro. Tuvaro Piripiva tiqaro, Enavanto nrumu taqaante, tiro.

⁴⁷ Mwitaa timwa kyero vuvaro Jesusiva taqovata mwitanahua nri varuvaro tiqaro, Taqaante. Qutaama mwi vaisiva Isareri vaisivanto variho. Hia mwi vaisiraiqunra qua vahivave, tiro.

⁴⁸ Mwitaa tuvaro Nataanieriva Jesusira kyapara hiro tiqaro, Nataama kyerave e ni okyara ntapihira hiaro? tuvaro Jesusiva tiqaro, Piripiva hia i uro nraanrai vakya e fiki okyarani variarana nte i taqaurave, tiro.

⁴⁹ Mwitaa tuvaro Nataanieriva tiqaro, Mwaanra ti variara vaisio, e Kotira mwaaquve. E Isareriqaa ntaqikyiravave, tiro.

⁵⁰ Mwitaa tuvaro Jesusiva tiqaro, E fiki okyarani variarana nte i taqaurave, turqaatairave nianra qutaa mwivave qiaro? Nraakiara nronra inraikya, mpo inraikya mpo inraikya mwia nraataraaninrama taqenanrave.

⁵¹ E qutaama taqairaro nyaamwuvanto qatua viraqe nte mwatani mwatatai nraaqiarava variarita niqaanra nyaamwunyaahua vita tumita hi varivaqe varianinrave, tiro. Jesusiva mwitaa turama.

2

Mwatukya mpo Kenaaqi nraakye ntumwunra

¹ Taara enta nritarovata mwatukya mpo Kena, Karirini mwi mwatanaahua nraakye ntumwinrenra hura.

² Mwitaa huvaro Jesusira nrovavata mwini varuvata mwi mwatanaahua Jesusiravata, mwia nraaqiaranramwuvata, nyaanrovata mwinramwuhuvata mwini vita.

³ Mwinramwuhua uro variqata kyara nre varuvaro uainivanto taiqa vuvaro Jesusira nrova Jesusira timwa mwinro tiqaro, Uaini taiqama viho, tiro.

⁴ Tuvaro Jesusiva qaqao tiro, Mwaa nraakyevao, i kyaiqa mpo kyaiqa vaiharo ni kyaiqa mpo kyaiqama vaiho. Nte kyaiqa varaani entava hiama nri ntaiho, tiro.

⁵ Mwitaa tuvaro Jesusira nrova mwi mwatanaahua kyaiqa vaisinramwu timwa nyinro tiqaro, Mwiva nanra quave nkyiara tirata mwiva qiarinte qiarinte hiate, tiro.

⁶ Iutaavanto nkyiari mwaanra qua rieqata mwitaa mwitaama kyeqata nkyiari mwamwanta hiqama kyora. Qio mwianra rieqaro nramanri taqu 6 nramwu nronra tave voti huva mwi nraamwunraqi vatovaro vahura. (Tave nronra kuua mwipi qiomma nramanri taqu qataara 10 vanto quananro.)

⁷ Vahuvaro Jesusiva kyaiqa vaisinramwu timwa nyinro tiqaro, Ekyaa mwi taqura qati nramanriqotaita piqa kyaate, tuvata qati nramanri kyaqaqifa uro tave nronra mwinramwunra piqa kyovaro vaiqaara hura.

⁸ Piqa kyovaro Jesusiva qaiqaa tiqaro, Qio mwiqitai kyaqaqita uro kyaraqaa ntaqikyira mwivaro nreqanro taqaarive, tiro.

⁹ Mwitaa tuvata mwiqitai mwi nramanrinra kyaqaqita uro mwuvavar mwi vaisiva qati nramanrivanto uaini utu vura nreqanro taqovaro kyuqe huvaro mwiva hia qati nramanri kyaqora mwianra ntapihuvata kyaqaqta uro tave nronra mwinramwuhua nraahu mwianra ntapihura. Mwitaa huvaro kyaraqaa ntaqikyiva nreqanro taqovaro kyuqe uaini vahuvaro qamwata kyero nraakye varo vaisira nraanrama kyero

¹⁰ mwia timwa mwinro tiqaro, Qikye, mpo hiahua kyuqe uaini nraante nraakye qora nyiavata nramwa taiqa kyaavata nraakiara uaqia hi uaininra

nyi variarave. E hia mwitaa hiaro. Nte taqauqara e mpo uaini vuni nyinra kyuqe uaini mwia nraakiarama nyinra hiaro, tiro. Mwitaa turama.

11 Iesusiva Kenaa mwatukya Karirini variqaro qati nramanri vara kyero uaini utu kyero nyununa. Mwiva mwi kyaqara nraante toharama tero mwiaqaatairo mpo kyaiqa mpo kyaiqa nronra kyaiqa varaqiro vura. Iesusiva mwi kyaiqara varovata mwia nraaqiaranramwuvanto mwia kyaiqa taqetama Iesusira kepukya okyarara ntapihita mwianra qio qutaa mwivave tura.

12 Mwiaqaatai mwivavata, mwia nrovavata, mwia qatanramwuvata, mwia qua riohuavata, mwini kyeta vuahua Kapenaamini uro mpo entanramwu varura.

Iesusiva Kotira nraamwu nronraqi vura

(Matiu 21:12-13; Maaki 11:15-17; Ruku 19:45-46)

13 Vekyahu nyato kyarara nro entava qaumatoqa huvaro Iesusiva Ierusaremini vuva

14 uro Kotira nraamwu nronraqi vera ntero taqovata mpo uhua kyooqaa kyaiqa vare variqata munima vareqata purimakauve sipisipive nyaamwave nyi varuvata mpo vaisinramwu tainta nraaqani variqata kamaninra munima vareqata Kotira nraamwuqinaa munima nyi varura.

15 Mwitaamaqita viqata kyooqaa kyaiqa vare varuvaro Iesusiva mwihua taqero kyapipi vara kyero mwiaqotairo purimakauvata, sipisipivata, sataqiro veva Kotira nraamwuqitairo mwaatani kyero munima tuqasaaqi varu vaisihuua tainta tu varero vara rauru kyero mwi munimanravata rauru kyero,

16 nyaamwa nyiqata munima vare varu vaisihuara tiqaro, Nkye mwi inraikyara mwi inraikyara mwaaqitai vare quate. Nkye hia ni kora nraamwu maaketi nraamwuqama taate.

17 Iesusiva mwitaa tuvaro mpo qua Kotira mpukuqi qara ntumwato quava mwia nraaqiaranramwu nyaatoqi ntumwa vuvata riora. Mwi quava mwitaama tiro:

Nte i nraamwuanra nronraqama kyena riemwaqi quariva qia itaintema kyero niqi ite vaiho, tura. (Ihi 69:9)

Mwi quara mwitaama kyero qara ntumwa tora.

18 Iesusiva mwitaa huvata Iutaa vaisi nronranramwuvanto tiqata, Qaqao, tava iara tiharave e mwitaa hiaro? E nanra nronra kyaiqa mpo tiri tivuqaa utiraqe tire mwia taqetave iara mwiva qio mwitaa hiananrove qiananrave? titaa.

19 Mwihua mwitaa tuvaro Iesusiva tiqaro, Nkye mwaa nraamwunra ntapairi kyaivaqe nte taarampo entara qaiqaa hoqa kyaaninrave, tiro.

20 Mwitaa tuvata Iutaa vaisi nronranramwuvanto tiqata, Qaqao, mwaa nraamwunra hoqeqlata 46 ihi airi ihi hoqaqi vita uro hoqa taiqa kyaarave. Qiove e taarampo entara nraahu mwi nraamwunra hoqa taiqa kyenarave? titaa.

21 Mwitaa tuvaro Iesusiva hia vutu kyero qati nraamwuanra tiraitiro, mwiva nai mwamwantaaqaa ntumwa kyero tiro. (Nkye ni rukyaivaqe nte taarampo enta vari kyena qati siquaninrave, tiro.)

22 Iesusiva mwi quaraqaa ntumwa kyero tuvata nraakiara Iesusiva qati sivi varu entaraqaa mwia nraaqiaranramwuvanto variqata Iesusiva nraamwuanra tu quava mwihua nyaatoqi ntumwa vura. Kotira mpukuqi qara ntumwato quaravata rieqata, Iesusiva mwi entara tu quaravata rieqata mwihua Iesusirara quataave tura.

Iesusiva ekyaa vaisi ntapihi kyaira

23 Vekyahu nyato kyarara nro entaraqaa Iesusiva Ierusaremini varuvata nraakye qora airivanto mwia kyaiqa nronra kyaiqa taqeqlata Iesusirara qio quataa mwivave tita.

24 Nraakye qoravanto mwianra qamwateqlata mwitaa ti varuvaro Iesusiva nraakye qora okyarara ntapihi kyero rieqarora tiro, mwiva hia mwihua turara quataave tura.

25 Iesusiva nai vaakya nraakye qora su nyaatoqi vahu inraikyara ntapihi kyorara tiro, hia qumina mpovanto mwihua okyarara mwia timwa mwianriva varura.

3

Nikotimaasiva Iesusira uro taqora

1 Parisi vaisi mpovanto mwia nrutu Nikotimaasiva varura. Mwiva Iutaa vunyaa vaisi mpovanto varura.

2 Mpo enta mwiva entaqi uro Iesusira taqero tiqaro, Mwaanra ti variarao, tire taqauraro Kotiva i titaiharara tira, e mwaanra qua ti variaravama nrinra hiaro. Hia Kotiva i kyaahaqa hiankye titiri, e hiama qio nronra kyaiqa varaaratirio, tiro.

3 Mwiva mwitaa tuvaro Iesusiva mwia timwa mwinro tiqaro, Nte quataa qua qianinra riaante. Vaisi nronra tuemwa quaninra hia qaiqaa mwata tairaro mwiva hiama qio Kotiva ntakiyi mwatukyara taqaananrove, tiro.

4 Tuvaro Nikotimaasiva kyapara hiro tiqaro, Nataama kyerove nronra tuemwa quani vaisira qaiqaa mwata kyaananrove? Qiove mwiva nai nronra vikyokyaqi qaiqaa viqe tairaro mwia nrova qaiqaa mwata kyaananrove? tiro.

5 Mwitaa tuvaro Iesusiva nai timwa mwinro tiqaro, Nte quataama tuqo. Nramanrivata mwata taariva variraro hia Kotira mwanraquravanto mwia qaiqaa mwata kyairaro mwiva hiama qio Kotiva ntakiyi mwatukyaraqi quananrove.

6 Mwamwanta vataava nai mwamwanta vahira nraahu mwatairave. Mwanraquravanto nai mwanraqura nraahu mwatairave.

7 Nte nkyi qaiqaa qaraakyaqama kyero mwata kyaarive tu quarara hia e mwi quarara nrihanrama quante.

8 Nte mpo quaqaa ntumwa kyena i timwa mwinrenrave. Toqavanto tiqaro nai quataa hiraqa virave. Toqavanto nrihanra e hia mwia taqaraitira, e mwia nruqua nraahu riaananrave. E mwiva viro nrinro hi okyarara hia ntaphiananrave. Qio Kotira mwanraquravanto mwatai okyarava kuua qarama kyeroma vaiho, tiro.

9 Iesusiva mwitaa tuvaro Nikotimaasiva mwia kyapara hiro tiqaro, Nataama kyerove mwitaa hiananrove? tuvaro

10 Iesusiva tiqaro, E Isareru nraakye qora mwaanra timwa nyi variarava e hiave ntapihiaro?

11 Nte quataama tuqo. Tire ntapihi kyeta rie taqe hunanra nkyi timwa nyi varurata nkye hia tiri qua riaarave.

12 Nte mwatanyaa inraikyara nkyi timwa nyuqata nkye mwianra hia ntapihiita quataave qiarave. Nkye mwitaa hiavana nte nyaamwunyaa inraikyara qiarita nataama kyetave nkye mwi quara qio ntapihi rievarave?

13 Hia vaisi mpovanto Kotiva varira nyaamwuni virave. Nte mwatani mwatatai nraaqiarava nte nraahu nyaamwuni variavava mwisaina tumunrave.

14 Haaru nkyi haivaqava Mosesiva qumina mwataqaa variqaro ori vara kyero qarura utu kyero mwia kyatariqaa rupa kyero tuaahera kyorave.

(Nraakye qoravanto mwia taqeta hia qutu quate tiro, Mosesiva mwitaa hurave. (Namba 21:6-9)) Qio nte mwatani mwatatai nraaqiarava variarita haaru Mosesiva qarura utu kyero tuaahera kyontema kyeta nivata kyatariqaa vateta tuaahera kyevarave.

15 Mwitaa hirata nraakye qora nianra qutaa mwivave tihua hia qutu viraitita, ekyaa enta ekyaa enta qati variqi vivarave, tiro. Iesusiva turama.

16 Kotiva mwatani variahura mpoqama kyero mwutukya ntiharora tiro, mwiva nai mwaaqu kuaiquia vataira tiri timwinra. Mwitaa hirara tita, nraakye qoravanto mwia mwaaquara qutaa mwivave tihua hia qutu viraitita, mwihua ekyaa enta ekyaa enta qati variqi vivara.

17 Kotiva hia nai mwaaqu ko riaa vaisihuva votima kyero variqaro nraakye qora tukya hiarive tiro mwatani titaiharo tuminrave. Mwiva nraakye qora sitaarie tiro, Kotiva mwia titaiharo tuminrave.

18 Mpovanto mwia mwaaquara qutaa mwivave qiariva, mwiva hiama qua varaananro. Mpovanto hia mwia mwaaquara qutaa mwivave qiariva, mwiva vaakyama qua varero. Mwiva Kotira mwaaqu kuaiqiera hia qutaa mwivave tira kyaarama, Kotiva mwianra qutaa iqaa qua vaiho timwa kyero, mwiaqaa qua vatero.

19 Mwaa inraikyara kyaara qua vahiananro. Omwavanto mwatani tumihata nraakye qoravanto hia mwia qamwata mwataraitita, mwihua kyokira rirara nraahu qamwateqata variara. Mwihua kyaiqvantato qora kyaiqa vahatara tita, mwihua hia mwi omwanra qamwata mwateta.

20 Qora kyaiqa uti variva nramwutaaqa hiqaroma hia omwavanto vari-nani viro. Omwavanto iteqaro ni uaqia hi kyaiqara qovarama kyaankyo tiro, hia omwavanto varinani viro.

21 Mwiva mwitaama variharo qutaa kyaiqa vare vari vaisiva hia aatu hiraitiro, omwavanto varinani viro. Mwiva viharo omwavanto itero mwia kyaiqa qovarama kyaihata nraakye qora taqaavarro mwi vaisiva Kotira qua rieqaro Kotira kyaiqa vare varira.

Nramanri nyi varuva Ioniva ekyara qua Iesusirara timwa nyunra

22 Mwiaqaataita Iesusivavata mwia nraaqiaranramwuvata (Ierusaremi kyeta) Iutaa mwata mpo qumina mwatani vura. Iesusiva nai nraaqiaranramwu kyapata variqaro nraakye qora nramanri nyunra.

23 Nyuvaro Ionivavata mwatukya mpo Serimi tataaqa Ainonini variqaro nramanri nyi varura. Ioniva nramanri nronra vahunani variqaro nraakye qora mwini ntuvantuuma vuhsa nramanri nyunra.

24 Mwi entara hia Ioninra karavuqi vitaqita uro kyo entara varura.

25 Mwi entara Iutaa vaisi mpovanto Ioninra qua riohua kyapata nramanri vare okyarara inronra huvata mwihua Ioniva hunani uro nteta tiqata,

26 Mwaanra ti variarao, tauraa e Iotaani qarahi vutura hini vaisi mpovata variqarama e mwianra mwivave tunanrave. Qio taqaante. Mwi vaisiva mwivavata nramanri nyi varihata airavanto mwiva hinani vi variavo, tita.

27 Mwitaa tuvaro Ioniva tiqaro, Qio Kotiva nyaamwuni variva vaisi mpo hia mpo inraikya mwinrenra, mwi vaisiva hiama mwi inraikyara varaananro.

28 Nkyevata vuni nte tura riaarave. Nte tiqana, Hiama nte nkyi kyaahaqa hiariva varuqo. Ni titahana nte nraante mwia vuni nruvave, turave.

29 Nraakye vararerera hi vaisiya nraakye varairave. Mwi vaisira totivanto qati sivi variqaro mwia qua rieqaro qamwata kyero varirave. Qio mwia totivanto qamwataintema kyena nte Iesusirara qamwatauqqo.

30 Iesusira nrutu virini nriviraro ni nutu mwatani tumi quarive. (Ari-vanto mwia vataqita vivarave. Hiama ni pataqita vivarave. Mwihua

Iesusira vataqita virara hiama nte Iesusira kyaru ntumwa mwataaninrave. Nte mwia qamwata mwataaninrave), tiro. Ioniva turama.

Iesusiva nyaamwusairo tuminranra tura

³¹ Iesusiva virisairo tumivara tiro, ekyahua nraatara kyaivama variro. Mwatanyaava mwatasairo nrivara tiro, mwiva mwatanyaaa inraikyara nraahu ti varira. Iesusiva nyaamwusairo tumivara tiro, ekyahua nraatara kyaivama variro.

³² Mwiva nai taqero riero hi inraikyara qoqaa timwa nyi varihata nraakye qoravanto mwia quara hia quataave tiraitita, mwia qua qoririma mwate variara.

³³ Qio vaisi mpovanto hia Iesusira qua qoririma mwataraitiro, mwia quara quataave ti vari vaisiva, mwiva mwitaa tiqaroma Kotira quaravata quataa qua vailho tiro.

³⁴ Kotiva Iesusira titaiharo mwiva Kotira qua nraahu ti varira. Kotiva mwia titarerera hiro hia nai mwanraqura pataqia pataqia mwinraitiro, mwia nronraqama kyero mwihanronra tiro, qio Kotira qua nraahu ti varira.

³⁵ Mwia qova nai mwaqaquara mpogama kyero mwutukya ntiharo ekyaa inraikya nai mwaqaqu mwihanro mwiva mwí inraikyaraqaa ntaqikyiqiro vi variro.

³⁶ Mpovanto mwia mwaqaquara quataave qiariva hia ekyara qutu vitaitiro, mwiva qati variqiro quananro. Mpovanto hia mwia quara quataave qiariva variraro Kotira raraqa tairaro mwia inronra hiraro quavanto mwiaqaa vahiananro.

4

Iesusiva Sameriaa nraakyevata qua tura

¹ Mwi entara Parisi vaisinramwuvanto riovoro Iesusiva airi nraakye qora nai hunani sita kyero vateqaro mwihua nramanri nyiqanroma Ioninra nraatara kyora.

² Iesusiva hia naivanto mwihua nramanri nyunra. Mwia nraaqiaran-ramwuvanto nraakye qora nramanri nyunra.

³ Parisi vaisinramwuvanto mwi quara riovorora tiro, Iesusiva mwiaqatairo Iutia mwini kyero Karirini viro.

⁴ Karirini virero mwiva Sameriaa mwata utaqamaa tero quariva vahura.

⁵ Mwiva viqaroma mwatukya pata mpo mwia nrutu Saikaa mwini uro ntora. Mwata mpo haaru Iaikopuva nai mwaqaqu Iosepira mwu mwatara mwia tataqaq vahura.

⁶ Iaikopuva haaru nramanrianra quvutova mwini vahuvoro Iesusiva nyianra aanaa nri kyovaro pupohovaro mwiva nramanrianra quvutora tataqaq mwatakyaa viro varura. Varuvaro huarivanto nrinro virira qataqaq vahuvoro

⁷ Sameriaa nraakye mpovanto nramanri kyaqarero nruvaro Iesusira nramanri nraataa huvaro mwi nraakyerara tiqaro, Nramanri kyaqa kyera ni mpiraqe nraankye, tiro.

⁸ Iesusira nraaqiaranramwu vaakya kyara vararerata mwatukyani vuvoro

⁹ Iesusiva mwiaqaa variqaro mwitaa tuvaro Sameriaa nraakye mwiva qaqao tiro, E Iutaavanto variarana nte Sameriaavanto varuqo. Nataa-maqirave nianra nramanri kyaqa mpiraqe nraankye tira hiaro? tiro. Iutaavantovata Sameriaavantovata nai nununrama mwate nai nununrama mwate hi varuhuara tiro, mwi nraakyeva mwitaa tura.

10 Mwitaa tuvaro Iesusiva nai timwa mwinro tiqaro, E Kotiva qati nyiani inraikyarara e riera ni okyararavata ntapihiaratiro, e ni kyapara hiarana nte qati variqi vi nramanrinra i mwutirio, tiro. (Mwi mwatanaahua nrumwuqinaa nramanrianra tiqata, Qati variqi vi nramanrinrave), tura.

11 Iesusiva nte qati variqi vi nramanrinra i mwinrenrave tuvaro mwi nraakyeva hia ntapihi kyero riaraitiro, mwiva rumwu nramanrianra tiho tiro. Mwiva tiqaro, Nronrao, nramanrivanto vevato vahara e hiama nramanri taqu vatera hiaro. Taraqitairave qati variqi vi nramanrinra kyaqenanrave?

12 Tiri haivaqava Iaikopuva nronra vaisivanto varurave. E mpo? E mwia nraatara kyaaravave iho? Mwiva nramanri varaaninra mwata quvu kyero naivata nai nraaqiaravata nai quaravatama kyero mwaa nramanrinra kyaqa kyero nronrave, tiro.

13 Mwitaa tuvaro Iesusiva tiqaro, Mpovanto mwaa nramanrinra nrainranro qaiqaa nraahu nraataa hiraro nrumu nreqanro variananrove.

14 Nte mwiani nramanrinra mpovanto nrainranro mwia hiama qaiqavata nraataa hiananrove. Nte nramanri mwianrinro mwi nramanriva vaisi utaqitairo rumwuqitairo tumi nramanrinra votima kyero vi variraro mwi vaisiva hia qutu viraitiro, qati nraahu variqiro quananrove, tiro.

15 Mwitaa tuvaro mwi nraakyeva tiqaro, Nronrao, qio mwi nramanrinra ni mpiraqe nte nraanrinro hia qaiqaa ni nraataa hiraqe qaiqaavata nrumu mwaqaqitaina kyaqa kyeqana nraankye, tiro.

16 Mwitaa tuvaro Iesusiva tiqaro, Qio, uro ena vaativata nraanrama kye vita varera uro ntantera mwaini nriante, tiro.

17 Tuvaro mwi nraakyeva tiqaro, Qaqao, hia ni paati varivave, tiro. Tuvaro Iesusiva tiqaro, E qutaama tiqara hia ni paati variho qiaro.

18 E kyaauquru nani vaati varaaravave. Mate e vaisi mpovata variarava, mwiva hia qutaa i vaativanto variho. E qutaama tira hiaro, tiro.

19 Mwitaa tuvaro nraakyeva mwiva tiqaro, Nronrao, nte taqauqara e poropeti vaisima varira hiaro. Kotiva i kyaahaqa iharama e mwitaam tira hiaro.

20 Qio Sameriaa tiri haivaqahua Kotira nrutu tuaaherarerata mwaa taaqiraqaa variqata Kotirara aakyara nte varurave. Mwitaa turata nkye Iutaavanto tiriara tiqata, Qaqao nkye Ierusaremini nraahu variqata Kotira nrutu tuaaheraataarave, qiarave. Nkye tiriara mwitaam tira variarave, tiro.

21 Mwitaa tuvaro Iesusiva tiqaro, Ni quara e qutaave qianta. Mpo enta nri ntairata nkye mwi entaraqaa ni kora nrutu tuaaherarerera hiqata, hiama mwaa taaqiraqaa variqata aakyara ntevarare. Hiama Ierusaremini variqata Kotirara aakyara ntevarare.

22 Nkye Sameriaavanto hia Kotira okyarara ntapihiraitita, apiqama kyeqata aakyara nte variarave. Tiri Iutaqaqitairo nraakyeva qora huvantu nyafaariva qovara hianinranra tita, tire ntapihi kye Kotira okyarara rieqata mwia nrutu tuaahereqata mwianra aakyara nte varunanrave.

23 Mpo enta nrianriva qaumaqa iho. Mwi entava mate qovarama viho. Mwi entaraqaa Kotira mwanraquravanto nraakyeva qora kyaahaqa hirata mwihua ntapihi kye Kotira okyarara rieqatama mwihua qutaaqama kyeta Kotira nrutu tuaaherevarave. Mwitaama kye Kotira nrutu tuaaherehuara Kotiva puua hi variho.

24 Kotiva mwanraquravanto varirave. Mwitaama varirara tita, mwia mwanraquravanto kyaahaqa hi nraakyeva qorahua mwihua nraahuma Kotira okyara ntapihi qutaaqama kyeta Kotira nrutu tuaaherevarave, tiro.

²⁵ Mwitaa tuvaro nraakyе mwiva tiqaro, Kotiva titaaninra, mesaiaa mwianra nte ntapihi kyauqо. Nraakiara mpo enta mwi vaisiva nri ntero ekyaa inraikyara tiri timwa timwiananrove, tiro.

²⁶ Mwitaa tuvaro Jesusiva mwianra tiqaro, Qio ivata qua ti varuva nte mwaa mwivave, tiro.

²⁷ Jesusiva mwitaa ti varuqiaraqi Jesusira nraaqiaranramwuvanto uro ntanteta nrumu taqovaro Jesusiva Sameriaa nraakyevata qua ti varuva mwihua nrihanrama vita. Mwihua nrihanrama vitavata hia mwi nraakyerara tiqata, Nanra inraikyaratve mwivavata qua ti variaro? tiraitita, hia Jesusiraravata tiqata, Nanra inraikyaratve nraakyе mwivavata qua ti variaro? tura.

²⁸ Tirema varuvaro nraakyе mwiva nai nramanri taqu mwini kyero siviro nrumu ntantero mwatukyaqi nraakyе qora uro timwa nyinrenro vuva uro ntero tiqaro,

²⁹ Nkye vaisi mpo nrita taqaate. Mwiya nte utu inraikyara ekyaa ni timwa mphiho. Qutaa mwiva Kotiva titarera hiva, mwivave iho? tiro.

³⁰ Mwitaa tuvata mwihua mwatukya mwia kyeta Jesusiva varunanianra vura.

³¹ Mwi nraakyeva vuvata Jesusira nraaqiaranramwuvanto Jesusirara tiqata, Mwaanra ti variarao, qati kyara mwaa vara kyera nraante, tuvaro

³² mwiva mwihua tiqaro, Nte kyara nraaninra vatauqо. Nkye mwi kyarara hiama ntapihi kyaavo, tuvata

³³ mwia nraaqiaranramwu nai timwa mwi nai timwa mwi hita tiqata, Vaakya mpovanto kyara mwihanro nrenrove mwitaa tiho? tuvaro

³⁴ Jesusiva mwinramwuhua timwa nyinro tiqaro, Ni titaira mwutukya vahi kyaiqara vareqana mwiva kyaiqa mpitairavata varaqina uro taiqa kyaariva qio mwi kyaiqava ni kyarama iho, tiro.

³⁵ Jesusiva mwitaa timwa kyero tiqaro, Nkye mpo quaqaa ntumwa kye tigata qiarave. Tora taaratana taaratana vara kyaariro kyara peqaqama virage vantuaninrave, qiarave. Qio kyara vara tutaraqi aitutu hiqata taqaate. Mate kyaravanto naitarama viho. Nkye qioma vantivarave.

³⁶ Kyara vantiva nai kyaiqa varairara kyoqaa varairave. Mwiva kyara vantu tairaro mwi kyarava ekyaa enta ekyaa enta qati vahiqiro quanrove. Mwitaa hirata kyara vara tuarivavata, kyara vantuarivavata, mwitanahuqama qamwateqata varivarave.

³⁷ Mpo quavata qiaava qutaa quama vaiho. Vaisi mpovanto kyara vara tutaira mpovanto mwi kyarara vantirave.

³⁸ Nte nkyi sitena tiqana, Mpovanto kyaiqa vareqaro vara tutai kyarara uro vantuate, tuqо. Mpo hiahua toqaamwu tukyeta kyaiqa vara kyeta kyara vara tutaarā, nkye mwihua kyara vantivarave, tiro.

Sameriaa airivanto Jesusirara qutaave tura

³⁹ Jesusiva mwitaa ti varuvaro mwi nraakyeva uro nai nramwunaahuara tiqaro, Mwiva nte utu inraikyara ekyaa timwa mphiho, tuvata Sameriaa nraakyе qora mwi mwatukyaraqinaahua airivanto Jesusirara qio qutaa mwivave, tita.

⁴⁰ Mwitaa timwa kyeta Sameriaa qinaahua Jesusiva varunani nri nteta Jesusirara po tita tiqata, Qio hia qamwanrama quante. E tirivata vari kyera quante, tuvaro Jesusiva mwihuavata taara enta vaitero vurama.

⁴¹ Kyaatavanto nraahu Jesusira qua rieqata qio qutaa mwivave tita.

⁴² Mwihua mwi nraakyerara tiqata, Hia vaakya e qiananraqaataitavauma tire mwianra qutaa mwivave, turo. Mate tetavanto nai nroqitaita rietama mwianra qutaa mwivave turo. Tire taqauraro Kotiva

mwia titaiharo mwiva tiri mwaa mwataraqaa varurahua kyaahaqama timwa tero huvantu timwa taarivama variho, tita. Mwitaa turama.

Iesusiva nronra vaisi mpo nraaqiara kyaahaqama kyora

⁴³ Iesusiva mwini taara enta vaitero mwiaqatairo nai mwaata Karirini viro.

⁴⁴ Iesusiva nai tiqaro, Poropeti vaisivanto nai mwaatani variharo mwia nrutuvanto hia virito vahirave, tura.

⁴⁵ Iesusiva Karirini vuvata mwi mwatanaahua mwianra qamwateqata varura. Mwi mwatanaahuavata vekyahu nyato kyarara nro entara Ierusaremimi uro variqata Iesusiva nronra kyaiqa varovata taqorara tita, mwihua mwianra qamwatora.

⁴⁶ Mwi qamwata mwatovaro Iesusiva qaiqaa Kenaani tauraa mwini variqaro qati nramanri vara kyero uaini nramanriqama kyonani nrunra. Nruvaro kamaninra kyaiqa vaisi mpovanto varuvaro mwia mwaaquvanto nronraqama kyero nriqa vuvaro Kapenaamini varura.

⁴⁷ Iesusiva Iutiasairo Karirini nriho tuvaro riero, mwi vaisiva Iesusiva varunani uro ntero tiqaro, Qiove e nrinra ni maaqu nriqa vira kyaahaqama kyairaro qati variananrove, tiro. Mwi vaisira nraaqiaravanto qutu quariva qaumaqa huvaro mwiva mwitaa tuvaro

⁴⁸ Iesusiva mwianra tiqaro, Nkye hia nronra kyaiqa kyuqe hira taqaraitita, hiama nkye quitaave tivarave, tiro.

⁴⁹ Tuvaro nronra vaisi mwiva tiqaro, Nronrao, ni maaquvanto qutu quankyorave. Qamwanrama nriante, tuvaro

⁵⁰ Iesusiva tiqaro, Qio ena mwaatani quante. I mwaquvanto qati variananrove, tiro. Mwitaa tuvaro mwi vaisiva Iesusiva qua timwa mwunranra quutaa quave timwa kyero, nai mwaatani viro.

⁵¹ Mwi vaisiva aanrani vi varuvata mwia kyaiqa vaisinramwuvanto uro hunta kyeta mwia timwa mwita tiqata, I nraaqiaravanto kyuqema viho, tita.

⁵² Tuvaro mwiva mwinramwuhua kyapara hiro tiqaro, Nanra huari vuqaave mwia nriqa viva taiqa viharo mwiva kyuqema viho? tuvata mwihua tiqata, Enta huari vu vitini tumi viro 1 kirokiqa iharo mwia nriqa viva taiqa virave, tura.

⁵³ Mwitaa tuvaro mwia qova ntapihi kyovaro huari vu mwiqiaraqaa Iesusiva mwia timwa mwinro tiqaro, I mwaquvanto qiona variananrove, tura. Mwitaa turara tiro, mwi vaisivavata mwia nramwunaahuavata Iesusirara quutaa mwivave turama.

⁵⁴ Iesusiva Iutiasairo nruru Karirini variqaro mwi kyaiqara varova tauraa varova kuaiqia vahuraga mwiva viro taaraqiaqa hora.

5

Iesusiva mwaanraqaa vaisi mpo kyaahaqama kyora

¹ Mwiaqatairo Iutaavanto omwata nro entava mpo nri ntovaro Iesusiva Ierusaremimi viro.

² Ierusaremimi vasaamwunra qesa mpo sipisipi qesa vahura. Mwia tataaqa nramanri rumpua mwia nrutu Vetasaitaave tuva vahura. Nramanri tokyasataa haraara nraamwu kyauquru vahuvata

³ haraara mwipi nriqa vuhua airinti varura. Vu qipa vuhuave, kyuqu uaqiamma vuhuave, kyuqu kyauqu tapanra vuhuave, mwihua variqata nramanrivanto qakyyaa hianinra mwia vekya varura.

4 [Kuaa enta kuaa enta nyaamwunyaava mpovanto tumu nramanri qakyaa huvaro mwihuaqitairo mpovanto nraante nramanriqi vuvaro mwia nanra mwamwantave nriqa vuva kyuqema vura.]

5 Qio mwihua nramanri qakyaa hianinra vecka varuvavaraisi mpovanto airi ihi 38 ihiara nriqa vuvaro varuvavata mwiqi variro.

6 Varuvaro Iesusiva mwia taqero ntapihi kyovaro mwi vaisiva airi ihi nriqa vuvaro varura mwia kyapara hiro tiqaro, I nriqa quariva taiqa quarive tira, e mwianra qamwaterave hiaro? tiro.

7 Mwitaa tuvaro nriqa vu vaisiva tiqaro, Nronrao, nramanrivanto qakyaa iharo mpovanto ni kyaahaqamaqiro uto nramanriqi kyaariva hia varihana nte nraante virera huqata mpohua nraante quavo. Mwitaamaqi vi variqana varuqo, tiro.

8 Nriqa vu vaisiva mwitaa tuvaro Iesusiva mwia timwa mwinro tiqaro, Sivira ena taarivata tu varera nrohiante, tuvaro qamwanrama mwia mwamwantavanto kyuqema vuvaro

9 mwi vaisiva siviro nai taarivata tu varero qio nrohura. Mwi entara mwaanraqaas mwitaama kyora.

10 Mwaanraqaas mwitaama kyorara tita, mwia kyaara Iutaa vaisi nronranramwuvanto vaisi kyuqema vura mwia inronra hita tiqata, Mate mwaanraqaave. Ena taari tu vare vinanranra tiri mwaanra quavanto qao tirave, tita.

11 Tuvaro mwi vaisiva tiqaro, Qaqao, vaisi mpovanto ni kyuqema kyaiva nianra ena taari tu varera nrohiante tihanama nte mwitaa huqo, tiro.

12 Tuvata Iutaa vaisi nronranramwuvanto tiqata, Ta vaisivave iara sivira ena taari tu varera nrohiante tiho?

13 tuvaro mwia mwamwantavanto kyuqema vu vaisiva hia mwia nrutu ntapihura. Mwini nraakye qora airivanto varuvavar Iesusiva qamwanrama vi vuvaro mwi vaisiva hia Iesusira nrutu ntapihura.

14 Mwia nrutu hia ntapihiraitiro varuvavar Iesusiva nraakiara variqaro taqovaro mwi vaisiva nraamwu nronra Kotira nraamwuqi varuvavar Iesusiva mwia timwa mwinro tiqaro, Qio taqaante, i mwamwantavanto kyuqema viho. Mpo inraikyavanto mwia nraataraariva i ru kyaankyo tira, hiama qaiqaa uaqia hi kyaiqara utuqira quante, tiro.

15 Mwitaa tuvaro mwi vaisiva mwigitaro veva ntero uro Iutaa vaisi nronranramwu timwa nyinro tiqaro, Mwia nrutu Iesusiva mwivama ni mamanta kyuqema kyaiho, tiro.

16 Tuvata mwihua riovavar Iesusiva mwaanraqaas mwia kyuqema kyorara tita, mwihua mwia kyaara mwi entaraqaataita Iesusira qoraqama mwate varura.

17 Mwitaa huvaro Iesusiva mwihua timwa nyinro tiqaro, Ni kova ekyaas enta kyaiqa vare varihanama ntevata kyaiqa vare varuqo, tiro.

18 Tuvata mwi quara kyaara Iutaa vaisi nronranramwuvanto mpogama kyetra Iesusira ru kyarerata uti varita tiqata, Tauraa Iesusiva tire mwaanra entarta tuna quara nteqaa kyaiho. Mwia nraakiara mwiva Kotirara ni korave tiho. Mwiva qumina vaisivanto variqaro mwiva Kotira votima kyero Kotikyantiri kuaaqaa varirero uti variho, tita.

Ni kova varai kyaiqarama ntevata varauqo tura

19 Iutaa vaisinramwuvanto mwitaa tuvaro Iesusiva mwihua timwa nyinro tiqaro, Nte qutaa qua qianinra riaate. Nte mwia mwaaquvanto variqana hiama ntena nraato tukyena mwi inraikyara varaaninrave. Ni kova kyaiqa varaihana nte taqaura mwi kyaiqara nraahuma vare varuqo.

Ni kova mwitaa mwitaa ihana nte mwia mwaaquvavata mwitaa mwitaa hi varuqo.

20 Ni kora mwutukyavanto ni nai mwaaquara vaharora tiro, mwiva nai vare vari kyaiqara ekyaa kyaiqa ni naamutaiho. Nraakiara ni kova naamutairage nte mwaa kyaiqara nraatara kyaani kyaiqarama varaaninrave. Nte mwi kyaiqara mwi kyaiqara varaarita nkye mwia taqetama mpoqama kyeta nrihanrama vivarave.

21 Ni kova qutu quahua qaiqaa vara sivuma kye varivave. Ni kova mwitaa hintema kyena nte mwia mwaaquvavata variqana ni mutukya vahiani nraakye qorahua qati vara sivuma kyaarita mwihua qati variqita vivarave.

22 Ni kova nai hiama nraakye qora ko qiananrove. Mwiva mwi kyaiqara ni mpitaihana nte mwia mwaaquvavato variqana qio ko qianinrave.

23 Mwiaqaataita nraakye qoravanto ni kora nrutu tuaaheraantema kyeta mwihua ni mwia mwaaqu nrutuvata tuaaherevarave. Mpowanto hia ni mwia mwaaqu nrutu tuaaheraariva hiama ni kova ni titaira nrutuvata tuaaheraananrove.

24 Nte qutaa qua qianinra riaate. Mpowanto ni qua riero qutaama Kotiva mwia titavave qiariva, mwivama ekyaa enta ekyaa enta qati variqiro quananrove. Mwi vaisiva hiama qua varaanarove. Mwiva mwaa entara hia ekyara qutu viraitiro, mwiva ekyaa enta qati variqiro quarivama variho.

25 Nte qutaa qua qianinra riaate. Mpo enta nrianriva qaumaqa iho. Mwi entaraqaa qutu virera utihua, mwihua Kotira mwaaqu ni qua rievarave. Ni qua riehua qiomaa qati variqita vivarave.

26 Qati variqita qua okyarava ni koraqi vaharo ni kova nai mwaaqu ni nronraqama kyaiharo mwiaqi vahintemaa kyero qati variqita qua okyarava niqivata vaharo.

27 Ni mwatani mwatatai nraaqiarara tiro, ni kova ni nronraqama kyaihana nte mwatani vari nraakye qorahua qio ko qianinrave.

28 Nkye hia nte qua qianinranra nrihanrama quate. Mpo enta nri ntairaqe nte mwihua nyaanraanrita mwataqi quntamwa te nraakye qorahua ni qua rieta,

29 mwihua quntamwa teraqitaita sivivarave. Hini hihua kyuqe kyaiqa varehua sivita qati variqita vivarave. Hini hihua uaqia hi kyaiqara utihua sivita nronra quama varevarave.

Vaisi mpo uhuavata Iesusira okyarara tura

30 Nte variqana hiama ntena nraato tukyena mpo inraikya varaaninrave. Kotiva timwa mpi varihana mwia qua rieqanama nte nraakye qora qio ko qianinrave. Hiama nte ntena mwutukya nti kyaiqara vare varuqo. Nte ni kora mwutukya nti kyaiqarama vare varuqo. Mwitaamaqi vi varuvara tina, nte nraakye qora qua ntapihi kyena ko qianinrave.

31 Nte ntenavanto ntena okyarara qiariro mpovanto ni quara hia qutaa quave qiankyorave.

32 Qio mpovanto variqaro ni okyarara timwa nyi variho. Nte ntapihi kyauqaro mwiva nianra timwa nyi quava qutaa quama vaiho.

33 Nkye taqraa vaisi mponramwu sitovata mwihua uto Ioninra kyapara huvaro Ioniva ni okyarara ntapihi mwihua timwa nyunrave.

34 Vaisivanto ni okyarara qianinra hia nte mwianra nronraqama kyena riuquo. Kotiva nkyi sitaarive tina, nte mwi quara timwa nyuquo.

35 Ioniva variqaro omwa votima kyero ite varuvata nkye variqata mwiva itorara hia mpuahaama kyeta qamwata mwatorave.

36 Qio ni okyarara qiariva Ioininra nraataraarivama variho. Ni kyaiaqavento nianra timwa nyi variho. Ni kova kyaiqa ni mpitaira nte mwi kyaiqara vare varuva, qio mwi kyaiqava ni okyarara timwa nyi variho. Nraakye qoravanto ni kyaiqa taqeqtama qiomia ni kova ni titairave tivarave.

37 Ni kova ni titava, mwivama ni okyarara timwa nyi variho. Nkye hia mwia qua rieta, hia mwia viri taqaarave.

38 Mwiva ni titahana tumuqata nkye hia nianra qutaa mwivave qjavo. Nkye hia mwitaa qiavarora tiro, Kotira quavanto hia nkyi su nyaatoqi vaihata variavo.

39 Nkye tiqata, Kyaiqe Kotira mpukuqi aitutuma kyeta taqeta ekyaa enta ekyaa enta qati variqita quare, ti variarave. Qio mwi mpukuraqi vahi quava ni okyarara ti varihata

40 nkye hia nte varunani nriavana nte qati variqi vi inraikyara nkyi nunrave. Nte hunani nriataara vaihata nkye hia nrianrave.

41 Hiama nte vaisiqaataina nronra nrutu varaaninrave.

42 Nte nkyi ntapihi kyauqo. Nkyi mwutukyavanto hia Kotirara vaihata variavo.

43 Kotiva ni kova ni titahana nte ntena kora nrutu varena nrugatavata nkye hia ni qamwata kyeta pitaarave. Mpovanto nai riemwa kyero nai nrutu tuahererero hirata nkye qamwanrama kyeta mwia qamwata mwatevarave.

44 Nkye nai nrutu nai nrutu tuahererara nronraqama kyeta rieqata hia Kotiva nkyi nyutu tuaaheraaninranra nronraqama kyeta riaavo. Mwitaa hi variqata nkye nataama kyetave nianra qutaa mwivave tivarave?

45 Nraakiara ntena kora vuqaa variqana hia ntevanto nkyiga qua vataan-inrave. Mosesiva nkyita haivaqava, mwivama nkyiqa qua vataaananrove. Nkye Mosesirara mwiva tiri kyaaahqa hiananrove qiarave. Qio nraakiara mwivama nkyiqa qua vataaananrove. Mosesiva qara ntumwa to quava nianra tihata nkye mwia quara hia qutaa quave qiarave.

46 Nkye Mosesiva tu quarara qutaa quave qiatirio, nkye ni quaravata qutaa quavame qiatiri.

47 Nkye mwia quara hia qutaa quave tiqata nataama kyetave nkye ni quaravata qutaa quave tivarave? Nkye hia qio mwitaa hivarave, tiro. (Jesusiva mwi quara Iutaa nronra vaisinramwu timwa nyunra.)

6

*Iesusiva kyara airiqama kyero tukyama nyunra
(Matiu 14:13-21; Maaki 6:30-44; Ruku 9:10-17)*

1 Mwiaqaatairo Iesusiva uro Kariri kyaarerera, mwia nrutu mpo Taipiriaasi kyaarerera vara mwaini kyero mpotuqi kyaarerera mwiaqaa qarero hini tokyani uro variro.

2 Uro varuvata nraakye qora airivanto taqovaro Iesusiva nriqa vuhua kyugema kyovatara tita, mwihua Iesusira vataqita vita.

3 Mwia vataqita vuvaro Iesusiva nai nraaqiaranramwu kyapata uro taaqisataa mwatakyaa viro varura.

4 Mwi entara Iutaaavanto vekyahu nyato kyarara omwata nro entava qaumaqa hora.

5 Iesusiva nai nraaqiaranramwu kyapata mwatakyaa viro variqaro taqvata nraakye qora airivanto mwia vataqita nrughua nrumu ntuvaantua ma vita varuvaro Iesusiva Piripira kyapara hiro tiqaro, Tire taisaitave kyara kyoqama kyeta mwi nraakye qorahua nyianrata nrevarave? tiro.

6 Jesusiva nai mwihua kyara nyiani okyarara vaakya ntapihiro mwiva Piripira qati mwataara hiqaro mwitaa tura.

7 Tuvaro Piripira tiqaro, Qaqao, kyarara 200 kinaa nronra munima kyeta varaa ntainra nyianrata mwihua pataqia pataqia nraahu varevarave. Airi nraakyae qoravanto variavo, tiro.

8 Tuvaro Jesusira nraaqiara mpovanto Enturuva Saimoni Pitaara qatavanto tiqaro,

9 Nyaako mpovanto mwaini variho. Mwiva mpereti hini kyauquruvata tavukya taaratanavata nraahu vataiva variho. Nataama kyeroove mwipi-atanava airi nraakyae qoraqi qio vhaliananrove? tiro.

10 Mwitaa tuvaro Jesusiva nai nraaqiaranramwu timwa nyinro tiqaro, Nraakyae qorara tivata mwatakyaa vita variate, tiro. Jesusiva mwitaa tuvaro mwini mwulkyauvanto vahuvata vaisi 5,000 nramwu airivanto mwatakyaa vita varuvata (nraakyevata airivanto mwatakyaa vita varura).

11 Mwihua mwatakyaa vita varuvaro Jesusiva mpereti mwia vara kyero Kotirara kyuqeve timwa kyero, nraakyae qora mwatakyaa vita varuhua tukyama kyero nyinro. Tukyama nyinro tavukyavata vara kyero kuaa qarama kyero mwatakyaa vita varuhua tukyama kyero nyuvata mwihua vara kyeta qio nronra. Mwihua nkyiari nraataa huntema mwi kyarara qio nronra.

12 Mwihua qio nrovaro Jesusiva nai nraaqiaranramwuanra tiqaro, Mwihua nreqata viti vaati kye kyarara utu ntuvantua hiate. Kyaravanto qumina viro raupiri hiankyorave, tuvata

13 mwia nraaqiaranramwuvantu nraakyae qoravanto kyauquru mpereti nretta viti vaati kyora utu kyeta ntutantuto tuara 12 nramwu piqa kyora.

14 Piqa kyovata qio nraakyae qora mwini varuhua taqovaro Jesusiva nronra kyaiqa vara kyovata mwihua tiqata, Poropeti vaisivanto mwatani tumuanriva qio qutaa mwaa mwi vaisivave, tita.

15 Mwitaa ti varuvaro Jesusiva ntapihi kyovata nraakyae qoravanto kyai mwia nronraqama kyaararo tiri vunyaa vaisi nronravanto variarive tiqata Jesusira tu vararerera uti varuvaro Jesusiva mwia ntapihi kyero mwihua mwitaa hivorave timwa kyero, qaqla kyero tumu ntantero taaqiqaa nanrianraa uro varirero vura.

Jesusiva kyaarerera mwutuqaa kyuqu ntamwaqiro vura

(Matiu 14:22-33; Maaki 6:45-52)

16 Jesusiva taaqiqaa uro varuvaro enta hirero huvata mwia nraaqiaranramwuvantu kyaarerera tokyasata tumu nteta

17 mpotuqi mwaanri nteta nrumu ntanteta Kapenaaminianra vita. Mwihua mwiniianra vuvaro anomta entama vuvaro

18 Jesusiva hia tumuvata mwihua kyaarereraqaa vi varuvaro toqa vauruvantu nronraqama kyero tiqaroma kyaarerera nramanri ventaqiro nri varura.

19 Mwitaa huvata mwia nraaqiaranramwuvantu kyaarereraqaa kyatariqo mpotu ventaqita viqata 5 kiromitave iho 6 kiromitave mwihua vara kyeta kyaarerera utaqaaa nrita taqovaro Jesusiva nramanri mwutuqaa kyuqu ntamwaqiro viqaroma mpotu qaumato nruvata mwihua mwia nraatu mpoqama kyeta aatu hi varura.

20 Aatu hi varuvaro Jesusiva mwihua timwa nyinro tiqaro, Hia aatu hiate. Ntema nruqo, tiro.

21 Tuvata mwihua qio mpotuqi mwaanri ntaante tuvaro mwaanri nto-varo mpotuvanto qamwanrama mwihua virera hunani uro ntora.

Nraakyae qoravanto Jesusirara puua hi varura

²² Mwia qanranraa nraakye qora kyaarera tokya hini varuhua taqo-varo mpotu kuaiqiavanto vahuvata mwihua ntapihi kyovaro Iesusiva hia mwisairo nai nraaqiaranramwu kyapata mwaanri ntero vuvata mwihua nkyiariaraa mpotuqi mwaari nteta vura.

²³ Mwihua mwitaama rieta varuvata Taipiriaasisaita mpotu mpon-ramwuvanto nruru tauraa Iesusiva kyarara kyuqeve timwa kyero, tukyama nyuvata nraakye qoravanto nro mwatara qaumato nruvata

²⁴ mpo nraakye qora mwini varuhua taqovaro Iesusiva hia mwini varuvata mwia nraaqiaranramwuvata hia varuvata mwihua mpotuqi mwaanri nteta Kapenaamini Iesusirara puua hirerata vura.

Iesusiva nyaamwunyaa mperetiara tura

²⁵ Mwihua Jesusira puua hirerata vuhua uro kyaarera tokya hini Jesusira puamaa kyeta mwianra tiqata, Mwaanra ti variara vaisio, taireve e mwaini nrinra hiaro? tuvaro

²⁶ Iesusiva tiqaro, Nte qutaa qua qianinra riaate. Nkye mpereti airiqama nraanranra rieqatama nianra puua hi variavo. Nkye hia ni kyaiqa okyara ntapihi paahima kye rieqatavauma nianra puua hi variavo.

²⁷ Qio hiama qati kyara tapitaani kyarara vararerata kyaiqa varaate. Nkye mwitaa hira qaqira kyeta ekyaa enta qati variqi quani kyarara vararerata kyaiqa varaate. Mwi kyarara nte mwatani mwatatai nraaqiarava variqana qiomta nte nkyi nyianinrave. Kotiva ni kova mwivama ni nronraqama kyaihana nte qio mwitaa hianinrave, tiro.

²⁸ Iesusiva mwitaa tuvata mwihua mwia kyapara hita tiqata, Tire Kotira kyaiqa vararerata hiqata, nataa nataave hiananrave? tita.

²⁹ Tuvaro Iesusiva timwa nyinro tiqaro, Kotiva nkyiara mwaa kyaiqara varaate ti variho. Mwiva titai vaisirara nkye qutaa mwivave qiate tiho, tiro.

³⁰ Mwitaa tuvata mwihua tiqata, Qio nanra kyaiqave tiri tinraamwutairae tire mwia taqeta i okyara qutaave qiananrave?

³¹ E nanra kyaiqa nronra kyaiqave varenanrave? Tiri haivaqahua haaru qumina mwatani variqata nyaamwunyaa kyara nronrave. Mwihua manaa nronrave. Mwianra Kotira mpukuqi qara ntumwa tova mwitaama tiro: Mwiva nyaamwunyaa kyara nyunrave, turave, tita.

³² Mwihua mwitaa tuvaro Iesusiva tiqaro, Nte qutaa qua qianinra riaate. Haaru mwi entara Mosesiva nkyi haivaqahua kyara nyiganro hia qutaa nyaamwunyaa kyara mwihua nyunrave. Ni kova, mwivama nyaamwunyaa kyara qutaa kyara nyianrivama variho.

³³ Mwatani variahua mwihua qati variqi quate tiro, nyaamwusairo tumu vari vaisiva, mwi vaisivama Kotira kyaravanto variho, tiro.

³⁴ Mwitaa tuvata mwihua tiqata, Nronrao, qio e mwi kyarara tiri timwiqira quante, tita.

³⁵ Tuvaro Iesusiva timwa nyinro tiqaro, Qio nte qati variqi vi kyarava mwaa mwivama varuqo. Nte hunani nrianriva hiama kyara nraataa hiananrove. Nianra qutaa mwivave qiariva hiama mwia nramanri nraataa hiananrove.

³⁶ Nte vaakya nkyiara tiqana, Nkye ni taqetavata hia nianra qutaa mwivave qiaivo, turave.

³⁷ Ni kova ni mpiari nraakye qorahua, mwihua nte hiarinani nrivarave. Mwihua nte hiarinani nrivaqena nte hiama mwihua qorrima nyataaninrave.

³⁸ Nte nyaamwusaina hia ntenu vu nraato tukyena kyaiqa vararerata tumuvave. Nte ni titaira mwutukya vahi kyaiqara vararerata tumuvave. Ni titaira Kotira mwutukya vahiva mwitaamama vahirove.

39 Mwiva nraakye qora ni mpihua nte mpoku raupirima kyaankyorave. Nte mwihuaqaa ntaqikyiqi vina ekyaara entaqaa vara sivuma kyaarita qati variqita vivarave.

40 Qaiqaa ni titaira mwia mwutukya vahiva mwitaamama vahirove. Ekyaa nraakye qora ni mwia mwaqaq taqeta quttaa mwivave tihua, mwihua qati variqita vivarave. Nte ekyaara entaqaa variqana mwihua sivuma kyaarita qati variqi vivarave. Qio ni kora mwutukya vahiva mwitaamama vaiho, tiro.

41 Iesusiva tiqaro, Nte nyaamwusaina tumu mperetivave, turara tita, Iuttaa nronranramwuvanto nrutu nraunru/nrunru nraanru tita tiqata,

42 Qaqao, mwi vaisiva Iesusiva Iosepira mwaqvantove. Mwia nrohua qohua tire taquaananrave. Qio nanraqamave mwiva nte nyaamwusaina tumuvave tih? tita.

43 Mwihua mwitaa ti varuvaro Iesusiva tiqaro, Eqaate. Nkye hia nrutu nraunru qiate.

44 Ni kova ni titaira hia vaisi mpo vitairera, mwi vaisiva hiama nte hunani qio nriananrove. Ni kova vitaarihua mwihua nraahuma nte hunani nrivarave. Qio mwihua nrivage nte ekyaara entaqaa mwihua vara sivuma kyaarita mwihua qati variqi vivarave.

45 Haaru poropeti vaisi mpovanto mwitaama qara ntumwa tero tiqaro, Nraakiara Kotiva ekyaas nraakye qora nyaamwute varirata mwia kyaiqa ntaphihivarave, turave. *(Aisaiaa 54:13)*

Ni kova kyaiqa nyaamwutairata mwihua ni kora qua riehua mwihua nraahuma nte hunani nrivarave.

46 Qio hia vaisi mpovanto ni kora taqaiva varirave. Nte Kotiva hinasaina tumuva, nte nraahu mwia taqaurave.

47 Nte qutaama tuqo. Nianra quttaa mwivave qiariva qati variqiro quananrove.

48 Nraakye qoravanto kyara nreta qati variqi viva nte mwaa mwi kyaravama varuquo.

49 Nkyi haivaqahua qumina mwatani variqata nyaamwunyaa kyara, mwia nrutu *manaa* mwi kyarara nramwaqi viqatavata uro qutu vurave.

50 Qio mpo kyaravanto nyaamwusairo tuminrave. Mwi kyarara nraanriva hiama ekyaara qutu quananrove.

51 Qio nte qati variqi vi kyarava mwiva nyaamwusaina tumuvave. Mpovanto mwi kyarara nraanriva, mwiva qati variqiro quananrove. Nte kyara mwintrenra ntena mwativata ntena mwamwantavata mwianinrave. Mwatani varihua qati variqita quate tina, nte mwia nyianinrave, tiro.

52 Tuvaro Iesusiva mwitaa tutva Iuttaa vaisi nronranramwuvanto nkyiari nraahu inronra hita tiqata, Mwiva nataama kyeroove nai mwamwanta tiri timwinraqe nraananrave? tita.

53 Iesusiva mwihua timwa nyinro tiqaro, Outaama nte tuqo. Nte mwatani mwatatai nraaqiarava nte variarita nkye hia ni mwativata nraanrevata nraivera, nkye hiama qati variqita vivarave.

54 Ni mwativata ni nraanrevata nraanriva qati variqiro viraqe nte ekyaara entaqaa mwia qati vara sivuma kyaaninrave.

55 Ni mwativanto kyara tuananra vaiharo ni nraanrevantovata nramanri tuananra vaiho.

56 Ni mwativata ni nraanrevata nraanriva niqi variraqena nte mwiaqima varianinrave.

57 Ni kova mwiva qati variqiro viva variqaro mwiva ni titaihanama nte mwiva qati variqiro viraqaatala ntevata mwaini tumu qati variqina vuquo.

Qio mwia votima kyero vaisi mpovanto ni nramwaqiro quariva niqaatairo qati variqiro quananrove.

⁵⁸ Qio nte mwi kyarava nyaamwusaina tumuvave. Nkyi haivaqahua haaru mpo kyara manaa nramwaqita vita uro qutu vurave. Qio hia nte mwii kyarara voti huvama varuqo. Ni kyara mwaa nraanriva ékyaa enta qati variqiro quananrove, tiro.

⁵⁹ Iesusiva Kapenaamini mwaanra nraamwuqi variqaro mwi quara tura.

Iesusira vataqita vuhua mponramwuvanto mwia qaqlira kyeta vura

⁶⁰ Iesusiva mwi quara tuvata mwia vataqita nrohuhua mponramwu variqata mwi quara rieti qaqlira tita, Mwi quava muaanra ntai quarama tiho, Tavave mwi quara qio ntapihiananrove? Hia tire qio ntapihiananrave, tita.

⁶¹ Mwihua tirema kyeta mwitaa ti varuvaro Iesusiva ntapihuvata mwia vataqita nrohu vaisihua mwianra nrutu nraunru tiqata mwia inronra hi varuvaro Iesusiva tiqaro, Mwi quara kyaarave nianra nrutu nraunru ti variavo?

⁶² Qio nte mwatani mwatatai nraaqiarava varuqo. Nte nraakiara tumu ntantena ntena variavara qoqaraanani uro variarita nkye mwia taqeta nataave hivarave?

⁶³ Vaisivanto mwanraqura vataava variharo mwia mwanraquravanto mwiaq variharora tiro, mwi vaisiva qati varirave. Mwia mwanraquravanto mwi vaisiraq hia varirera, hia mwia mwamwantavanto mwia qio kyaahaqa hiraro mwiva qati variqiro quananrove. Qio nte vaakya turara hia nte qumina mwamwantara turave. Nte qati variqi vi mwanraqura okyarara nkyi timwa nyunrave.

⁶⁴ Nte qati variqi vi okyarara nkyi timwa nyunrave. Nte mwitaa tuqata nkye hininramwuvanto hia ni quara qutaa quave qiaivo, tiro.

Iesusiva haaru toharo entaraqatairo vaisi mponramwuvanto nraakiara mwianra hia qutaa mwivave thua ntapihi kyora. Vaisi mpovanto mwia nramwutaahua uro timwa nyinro mwia qovarama kyaaninravata ntapihi kyora.

⁶⁵ Mwihua mwitaa mwitaa hirara ntapihi kyero Iesusiva mwihua timwa nyinro tiqaro, Mwianra rieqanama nte vuni tiqana, Hia ni kova qiove tirera, hia mpovanto nte hianinrani qio nriananrove, turave, tiro.

⁶⁶ Mwitaa tuvata mwia kyaara Iesusira vataqita vuhua airivanto mwia ekyara qaqlira kyeta nrumu ntanteta vura.

⁶⁷ Mwitaa huvaro Iesusiva nai nraaqiara 12 nramwu kyapara hiro tiqaro, Nkyevata mpo? Nkye ni qaqlira kyeta vireratave hiavo? tiro.

⁶⁸ Tuvaro Saimoni Pitaava mwia timwa mwinro tiqaro, Nronrao, tirenramwu ta vaisiva hinanive quananrave? Ema qati variqi qua okyarara qiaravama variaro.

⁶⁹ Tirenramwu iara qutaama mwivave tiqatama ntapihi kye taqaurara e nraahuma Kotira kyotata vaisivanto Kotiva hinasaira tumuanravave, tiro.

⁷⁰ Mwitaa tuvaro Iesusiva mwihua timwa nyinro tiqaro, Qio nte nkyi 12 nramwu nyaanrama kyena sitaurave. Nte 12 nramwu nkyi nyaanrama tauraqitairovata mpokuvanto uaqia hi vaanavama variho, tiro.

⁷¹ Iesusira nraaqiara 12 nramwuqitairo Iutaasiva Saimoni Isikeriotira mwaaquvanto nraakiara Iesusira qovarama kyaaninranra rieqaro Iesusiva mwitaa tura.

¹ Mwiaqaataita Iutaa vaisi nronranramwuvanto mwia ru kyarerata uti varuvorara tiro, Iesusiva hia Iutiaani nrohiraitiro, qaqira kyero Kariri mwatani variqaro mwini nraahu nrohi varura.

² Mwi entara omwata nro entava mpo qaumatoqa hura. Mwia nrutu *Haraara Nraamwu* omwata. (Haaru mwihua haivaqahua qumina mwatani variqata haraara nraamwuqi varu entarara rieqatama omwata nronra.) Omwata nro entava qaumato vahuvata

³ Jesusira qatanramwuvanto tiqata, Qio mwaini kyera vetara Iutiaani virata i vataqita vihua i kyaiqa taqaate.

⁴ Nai nrutu viriniqa hiarive tiro, mpovanto hia nai kyaiqa ugeta kyakya hirave. E qutaa mwi kyaiqara mwi kyaiqara vare varirera, qio uro ntera qoqaa variqara mwi kyaiqara mwi kyaiqara varairata ekyaa mwihua i taqaate, tita.

⁵ Mwia qatanramwuvanto Iesusirara hia qutaa mwivave tiqatara tita, mwihua mwitaa turama.

⁶ Mwitaa tuvaro Iesusiva timwa nyinro tiqaro, Nte mwini quari entava hiama nri ntaiho. Nkye qiomma api enta vivarave.

⁷ Mwatani variahua hia nkyi nramwutaaqa hivarave. Nte mwihua kyaiqara uaqia hi kyaiqarave timwa kyeqanaa ntapihi timwa nyunrave. Mwitaama vutu kyeqana timwa nyuqata mwihua ni nramwutaaqa hi variavo.

⁸ Nkyenramwu omwata nranrenra hianani quate. Nte mwini quari entava hia nri ntaihana nte mate hia quaninrave, tiro.

⁹⁻¹⁰ Iesusiva mwitaa timwa kyero Karirini varuvata mwia qatanramwuvanto omwata nranrenra hunani vuvaro Iesusiva vari kyero nraakiara mwivavata mwini viro. Mwiva hia qoqaa viraitiro, ugeta kyero mwini vura.

¹¹ Vuvata Ierusaremini omwata nronraqi Iutaa vaisi nronranramwuvanto mwianra aitutu hi varita tiqata, Mwiva tanave variho? ti varura.

¹² Mwitaa ti varuvata qati nraakyе qoravanto Iesusirara tirema kyeta mpo qua mpo qua tura. Hini uhua mwianra tiqata, Mwiva kyuqe vaisivantove, tuvata hini uhua mwianra tiqata, Qaqao, mwiva nraakyе qora api aanra nraahu nyaamwute vari vaisivave, tita.

¹³ Iutaa nronra vaisinramwu nyaatu aatu hiqata mwihua hia Iesusirara vutu kyeta mwitaa tura. Mwihuaqitairo hia mpovanto vutu kyerovata tura.

¹⁴ Mwitaamaqita vuvaro omwata nro entava hininramwu taiqa vuvaro Iesusiva uro ntero Kotira nraamwu nronraqi variqaro Kotira qua nraakyе qora timwa nyi varura.

¹⁵ Mwiva timwa nyi varuvata Iutaa vaisi nronranramwuvanto mwia qua rieta nrihanrama vita tiqata, Qikye, mwiva hia tirivata sikuru tivave. Nataama kyerove mwiva mpo qua mpo qua okyara qio ti variho? tita.

¹⁶ Mwitaa tuvaro Iesusiva tiqaro, Hiama nte ntenga qua mwakyaakyaa nkyi timwa nyi varuqo. Kotiva ni titaihana nte mwia qua mwakyaakyama nkyi timwa nyi varuqo, tiro.

¹⁷ Iesusiva mwitaa timwa kyero mwiva tiqaro, Kotira mwutukya vahirara rieqaro mwia kyaiqa varaataa hiariva, mwivama ni qua tukyama kyero tiqaro, Mwiva Kotira quama ti variho, mwiva nai quama ti variho, qiananrove.

¹⁸ Mpovanto nai vu nraato tukyero qua ti vari vaisiva, mwi vaisiva nai nrutuara nraahu rieqaro varirave. Mpovanto nai titaira nrutuara nraahu riemwaqiro vi vari vaisiva, mwi vaisiva qutaa qua nraahuma tiharo hiama unra qua mwiaqi vahirove.

¹⁹ Qio qutaa nkyi haivaqava Mosesiva qua mwaanra Kotiva mwitaa mwitaa hiate tu quara nkyi timwa nyunrave? Qio hia nkyiqitairo mpovanto mwi quara vataqiro vi varirave. Mwitaa hiqata nkye nanraqamave ni ru kyarerata uti variavo? tiro.

²⁰ Iesusiva mwitaa tuvata mwini ntuvantuama vita varuhua tiqata, E ueraqama quaro. Tavave i ru kyarerata uti variho? tita.

²¹ Tuvaro Iesusiva tiqaro, Nte (mwaanra entaqaa) nronra kyaiqa kuaiqia varauqata nkye mwianra nrihanrama quavaroma hia nkyi kyakya iho.

²² Nkyi haivaqava Mosesiva mwaanra qua tiqaroma qoraisi nraaqiara mwia mwamwanta toqa kyaate. (Qoraisi nraaqiara mwatataivata 8 enta nritarairata mwia mwamwanta toqa kyaate,) turave. Qio hia Mosesiva tauraaqama mwi quara turave. Mosesira haivaqahuamwanra mwi quara vuniqama kye turave. Qio nkye mwi quara rieqatama 8 enta nritarairata qati entaqaaave, mwaanra entaqaaave, nkye qoraisi nraaqiara mwamwanta toqa nyate variarave.

²³ Mosesira qua nteqa kyaarorave tiqatama nkye mwaanra entaqaa qoraisi nraaqiara mwamwanta toqa nyate variarave. Mwitaa hi variavana nte mwaanra entaqaa nriqa vi vaisira kyuqema kyauqata nkye nanraqamave mwia kyaara ni inronra hi variavo?

²⁴ Nkye niqaa qua vatarera hiqatama, haunri qumina nkyeta su nyaato tiraqa niqaa qua vatevorave. Nkye qutaa vahiani inraikyaraqaara niqaa qua vataate, tiro.

Iesusiva mwiva Kotiva titai vaisivave? tura

²⁵ Iesusiva mwitaa ti varuvata Ierusaremiginaahua mponramwuvanto Iesusirara mpo vaisinramwu kyapara hita tiqata, Mwi vaisirave mwihua ru kyarerata uti variavo?

²⁶ Qio taqaate. Mwiva qoqaa variqaro qua ti varihata mwihua hia nrumu mwiaqaa mwianra mpo qua qiao. Qutaave mwihua Iesusirara mwiva mesaiaavantove qiao?

²⁷ Qio tire Iesusiva mwisairo nri okyarara ntapihuro. Mwiva mwi mwatukyaraqitairo nrivave. Mesaiaavanto qovarama viraro hiama tiriqitairo mpokuvanto mwiva mwisairo nriani okyarara qio ntapihiananrove, tita.

²⁸ Mwitaa ti varuvaro Iesusiva Kotira nraamwu nronraqi mwakyaakya timwa nyi variqaro aakyara ntamwa kyero mwihua kyaparama nyatero tiqaro, Qutaa nkye ni ntapihi kyaarave? Qutaa nkye nte mwisaina nru okyarara ntapihi kyaarave? Qio hia nte ntena vu nraato tukyeny nruvave. Ni titava mwiva qutaa kyaiqa vare varivave. Nkye hia mwia ntapihiarave.

²⁹ Nte mwia ntapihurave. Mwivama ni titaihana nte mwiva hinasaina tumuvave, tiro.

³⁰ Iesusiva mwitaa tuvata mwi quara kyaara mwia ntavaaqavu kyaare tiqatavata hia qio mwia tu varora. Iesusirara rukye entava hia nri ntovatara titi, mwihua hia qio mwia tu varora.

³¹ Mwitaa huvata nraakye qora mwihuaqitaita airivanto Iesusirara qutaa mwivave titi. Mwihua mwataama titi, Iesusiva nronra kyaiqa vare variho. Mesaiaavanto nrianriva mwiva Iesusira kyaiqa qiove nraatara kyaananrove? Hia qio mwia nraatara kyaananrove. Iesusiva mwivama mesaiaavanto variho, titi.

³² Parisi vaisinramwuvanto variqata riovata nraakye qoravanto ntuaantuama vita Iesusirara tirema kyeta mwitaa ti varuvata Parisi vaisinramwuvata, Kotira kyaiqa vara mwate varu vaisihua mwihua nronranramwuvata, mwihua nkyiari porisi sitovata mwihua Jesusira ntavaaqavu kyeta karavuqi kyarerata vita.

³³ Mwihua vuvaro Iesusiva tiqaro, Nte nkyi kyapata pataqia vari kyenama mwata mwaqaataina ni titava hinani virerave.

³⁴ Mwi entara nkye ni puaama kyaare tira, hiama qio ni puaama kyevarave. Nkye hia qioqamakyne virera hinani nte virerave, tiro.

³⁵ Mwitaa tuvata Iutaa vaisi nronranramwuvanto nai kyapara hi nai kyapara hita tiqata, Mwiva taini viraqeve tire hia qio mwia puaama kyaananrave? Mwiva Kiriki mwatukya mponramwuqi Iutaa mponramwuvanto variananive uro qua timwa nyinrenro virerove?

³⁶ Mwiva nanrianra tiqaro, Nkye ni puaama kyaare tira hiama qio ni puaama kyevarave, tiho. Nkye hia qioqamakyne virera hinani nte virerave, tiho. Mwiva mwitaa tiqaro nanra quave tiho? Hiama tire mwia qua ntapihita huro, tita.

Nkyi mwutukyaqitairo qati variqi quani nramanriva ntamwaqiro qua-nanrove tura

³⁷ Mwitaa tuvaro omwata nro entava ekyara enta nri ntora. Mwi entarara nronra entave tura. Ekyara enta nri ntovaro Iesusiva mwi entaraqaa siviro paatiro tiqaro, Nramanri nraataa hiariva nte hunasairo qiona nrumu nraananrove.

³⁸ Kotira mpukuqi qara ntumwa to quava nianra mwitaama tiro: Nianra qutaa mwivave qiariva variraro mwia mwutukyaqitairo rumwu votima kyero qati variqi quani nramanriva ntamwaqiro quananrove, turave, tiro. *(Aisaiaa 44:3)*

³⁹ Iesusiva siviro variqaro mwi quaraqaa ntumwa kyero Kotira mwanraqura nyianinranra tiro. Nraakye qoravanto Iesusirara qutaa mwivave thhua Kotira mwanraqura varerara tura. Mwi entara Iesusiva hia qutu viro qaiqaa qati siviro nyaamwuni vurara tiro, hia Kotira mwanraqura nyu entava vahura.

Nraakye qoravanto nkyiari tukyama vura

⁴⁰ Iesusiva mwitaa tuvata nraakye qora ntuaantuama vuhua airivanto tiqata, Qio qutaama Iesusiva poropetivanto variho. Kotiva mwia kyaahaqa hi variharo mwiva mwia qua ti variho, tita.

⁴¹ Tuvata mponramwuvanto tiqata, Mwiva mesaiaavantove. Mwiva Kotiva titai vaisiva tiri kyaahaqa hiarivave, tita. Tuvata mponramwuvanto qaqaqo tita, Mesaiaavanto hiam Kaririqitairo nriananrove.

⁴² Kotira mpukuqi mesaiaara qara ntumwa tova mwitaama tiro: Mesaiaavanto Ntevitira kuaa okyarama variraro Vetarahemi Ntevitiva varu mwatukyaraqi mwia mwata taananrove, turave, tita. *(Maikaa 5:2)*

⁴³ Mwitaa tiqata nraakye qora ntuaaquama vita varuhua hininramwuvanto Iesusirara qamwateqata varuvata hininramwuvanto hia mwianra qamwateqata varura.

⁴⁴ Hininramwuvanto Iesusira karavuqi kyarerata uti varura. Qio mwi entara hia mwihuaqitairo mpokuvanto Iesusira tu varora.

Porisi vaisinramwuvanto qati uro ntanteta nrunga

⁴⁵ Porisi vaisinramwu vaakya sitohua nrumu ntanteta Kotira kyaiqa vara mwate varuhua mwihua nronranramwuvata, Parisi vaisinramwuvata,

mwihua hunani uro ntovata mwihua tiqata, Qaqao, nkye mwia vita vareta nriataara vahata nanraqamave qati nriavo? tuvata

46 porisinramwuvantu tiqata, Tire riauraro mwiva hia qumina vaisivanto qua tintema kyero qua ti varaho, tita.

47 Tuvata Parisi vaisinramwuvantu tiqata, Qio nkyevata mwia unra quara quataa quaveve tita hiavo?

48 Nkye ntapihitave hiavo? Tavave tiri nronra vaisinramwuqitairove, Parisi vaisinramwuqitairove, Iesusirara qutaa mwiva mesaiaavanto varaho tiho? Hiama tirinramwuqitairo mpovantovata mwitaa tiho.

49 Qati qumina nraakye qora ntuvantuama vita variahua hia Mosesira qua mwaanra qio ntapihi riaarara tiro, mwiva kyaara Kotiva mwihua qoraqama nyataananrove, tita.

50 Parisi vaisinramwuvantu mwitaa tuvaro Parisi vaisi mpokuvanto Nikotimaasiva mwiva entaqi Iesusira uro taqova, mwiva qaqao tiro,

51 Tire teta qua mwaanra rieqatama hia ko tiraitita, vaisiqaa qumina qua vataarorave. Tire ko nraanteta qjataarave, tiro.

52 Mwitaa tuvata mwihua tiqata, E mpo? E Karirisaira nrianravave? E Kotira mpukuqi taqaante. E mwiqi taqairaro hiama Karirisairo poropeti vaisivanto qovara hiananrove, tita.

53 [Mwitaa timwa kyeta nkyiari nraamwuni nkyiari nraamwuni vuvaro Iesusiva Oripi taaqiqa uro varura.

8

Api nrohu nraakyerara tura

1-2 Mwia qanranraa toqa entaqi Iesusiva uro ntantero Kotira nraamwu nronraqi vuvata nraakye qora airivantu ntuvaantuama vita varuvaro Iesusiva mwatakyaa viro variqaro qua timwa nyi varura.

3 Timwa nyi varuvata mwaanra okyara ti varu vaisihuavata, Parisi vaisinramwuvata, mwihua nraakye mpo vita vareta nrunra. Mwi nraakyeva vaati vataava mpo qoraisivata nrohi varuvata mwihua taqamwa kyeta mwia viteta Iesusiva hunani uro nraakye qora suqaa mwia kyovaro siviro varuvata mwihua Iesusirara tiqata,

4 Mwaanra ti variarao, mwaanra nraakyeva vaati vataava mpo qoraisi vatama kyero nrohi varihata tire mwia taqeta tu vareta nrunro.

5 Mosesira mwaanra quavanto mwitaama tiro: Nrahesivanto mwitaa hirera, origotataa ntuquetu kyaivarо qutu quarive, turave. Qio e mpo? Nanra quave mwianra tinanrave? tita.

6 Iesusirara api qua tirage tire mwiaqaa qua vataare tiqata mwihua mwitaa tuvaro Iesusiva hia qua tiraitiro, kakataama viro nai vukahiyo mwataqaa qara nti varura.

7 Qara nti varuvata mwihua sivita variqata mpo qua mpo qua Iesusira kyapara hi varuvaro Iesusiva mwaamwianra viro mwihiara tiqaro, Nkyiqitairo mpovanto hia uaqia hi kyaiqara utuariva, mwiva nraante ori vara kyero mwia ntuqutarive, tiro.

8 Iesusiva mwitaa timwa kyero mwiva qaiqaa kakataama viro mwataqaa qara nti varuvata

9 mwihua mwi quara rieta kuaiqia kuaiqiavantu mwiqitaita qaqira kyeta veva nteqata vura. Nyaapainramwu nraante veva nteta vuni vuvata qaraakya vaisinramwu mwihua nraakiara veva nteta vita mwihua Iesusira mwini kyeta vuvaro Iesusiva nanrianraa variro.

10 Iesusiva mwaamwianra viro taqovaro mwi nraakyeva vaakya siviro varunani nanrianraa varuvaro Iesusiva tiqaro, Mwihua tainive variavo? Hiave mpovanto iqaa qua vataariva variho? tuvaro nraakyeva mwiva tiqaro,

11 Nronrao, hia mpovanto mwitaa iho, tuvaro Iesusiva mwia timwa mwinro tiqaro, Qio ntevata hia iqaa qua vatarerave. Qio ena quante. Vi-rava hiama nraakiara qaiqaavata uaqia hi kyaiqara utuante, tiro. Turama.]

Iesusiva nte mwatanyaa omwavantove tura

12 Iesusiva qaiqaa nraakyev qora timwa nyinro tiqaro, Nte mwatanyaa omwavanto varuquo. Ni pataqiro nrianriva hiama kyokiraqi nrohianan-rove. Mwiva ntuvahaaninraqa nrohiqaro qati variqiro quananrove, tiro.

13 Iesusiva mwita tuvata Parisi vaisinramwuvanto tiqata, Qio e enanra variqara ena nrutu tuaahere variananranra tiro, i quavanto qumina quama vaiho, tita.

14 Mwitaa tuvaro Iesusiva qaqao tiro, Nte variqana ntene kyaiqara tiqana hiama qumina qua tuqo. Nte ntene mwisaina nru okyarara ntapihi kyaurave. Nte ntene quani okyarara ntapihi kyaurave. Mwitaa hurara tiro, ni qua quataa quama vaiho. Nte mwisaina nru okyararave, nte quani okyararave, nkye hia ntapihivarave.

15 Nkye ko tiqatama nkye vaisi su nyaato vahiraqa ko ti variarave. Mate nte hia vaisi mpo ko timwa kyena mwiaqaa qua vatauquo.

16 Nte ko qiataa hiraqena qioma nte ko avuqavuma kyena qianinrave. Nte ko tiqana hiama ntenanraa ko qianinrave. Nte ko qiariro ni kova ni titaita variqaro ni kyaahaqa hiraqe nte avuqavuma kyena ko qianinrave.

17 Nkyi mwaanra qua qara ntumwa tova mwitaama tiro: Vaisi taaratana-vantoo qua tiqatama kuaa qua nraahu tivera, qio mwitana quavanto quataa quama vahiananrove, turave.

18 Qio nte ntene quara quataa quave qiariro ni titaita ni kova, mwivavata ni quara quataa quave nraahuma qiananrove, tiro.

19 Iesusiva mwitaa tuvata mwihua tiqata, I qova tana variharave ti variaro? tuvaro Iesusiva tiqaro, Nkye hia ni ntapihi kyaahuara tita, nkye ni koravata hiama ntapihiavo. Nkye ni ntapihi kyaatirio, nkye qioma ni koravata ntapihiatirio, tiro.

20 Iesusiva Kotira nraamwuqi munima kye varuraqi variqaro mwi quara tiro. Tuvaro mwia rukye entava hia nri ntovarora tiro, hia mpovanto mwia ntavaaqavuqiro karavuqi kyora.

Iesusiva nai qorara tura

21 Iesusiva qaigaa timwa nyinro tiqaro, Qio nte quarita nkye qumina nianra puamaqiqi vita uro nkyeta qora kyaiqa rirante qati qutu vivarave. Mwitaa hiqata nte quaninrani nkye hiama qio vivarave, tiro.

22 Mwitaa tuvata Iutaa vaisi nronra nramwuvanto tiqata, Mwiva nanra quave tih? Mwiva nai tiqaro, Nte quaninrani nkye hia qio vivarave, tih. Mwiva naivanto nai ru kyarerero uti variqarove mwitaa ti variho? tita.

23 Mwitaa tuvaro Iesusiva tiqaro, Nte virisaina tumugata nkye mpiasaita nriahuave. Nkye mwaa mwataraqataita nriahuave. Nte hia mwaa mwataraqataita nruvave.

24 Nte vaakya nkyiara tiqana, Nkye nkyeta qora kyaiqa rirante variqi vita qutu vivarave, turave. Nte qati nraahu variqi vuuvave tuqo. Nkye hia mwi quarara quataa quave tivera, quataa nkye nkyeta qora kyaiqa mwia rirante qutu vivarave, tiro.

25 Mwitaa tuvata mwihua mwia kyapara hita tiqata, Qio e ta vaisivave hiaro? Tuvaro Jesusiva mwihua timwa nyinro tiqaro, Nte vuni nkyi timwa nyuva nte mwivama huqo.

26 Nte nkyiqua qua vataari quava, mpo qua mpo qua vahana mate hia nte mwi quara tiverave. Ni titava ni timwa mpi quara, nte mwi quara nraahu mwatani varihuavata timwa nyinrenrave. Ni titava quataa qua nraahu ti varivave, tiro.

27 Jesusiva mwitaa tuvata mwihua hia ntapihi kyeta Jesusiva nai qorara tu quara riora.

28 Mwihua hia ntapihuvaro Jesusiva qaiqaa tiqaro, Nte mwatani mwatatai nraaqiaravama varuqo. Nte variarita nkye ni tuaahera kyaivarso mwiaqatairo nkyi su nyaato ntapihirata nkye ni okyarara ntapihi rietama nianra qio mwiva qati nraahu variqiro vivave tivarave. Nkye mwi entarama nte hia ntenaqama kye mpo kyaiqa varaura ntapihita ni kova timwa mpi quara mwi quara nraahu timwa nyunravata ntapihivarave.

29 Ni titava ni vatama kyero variqaro mwiva hia ni qaqlira kyaananrove. Ni titava ni vatama kyero varihana nte mwia mwutukya vahi kyaiqara vare varuqaro mwiva nianra qamwateqaroma hia ni qaqlira kyaiho, tiro.

30 Jesusiva mwi quara ti varuvata airivanto mwi quara riohua mwianra quataave tita.

Quataa quavanto nkyi huvantu kyaananrove tura

31 Iuttaa mponramwuvanto mwianra quataa mwivave tuvaro Jesusiva mwihua tiqaro, Qio nkye ni qua riemwaqita vivera, nkye quataama ni pataqita nrihua varivarare.

32 Nkye quataa qua ntapihi kye riaivaro quataa quavanto nkyi huvantu kyairata nkye qati varivarave, tiro.

33 Mwitaa tuvata mwihua qaqlira tita, Tire tetu haivaqara Evarahaamunra nraaqarama varuro. Hia mpovanto tiri rupa taihata tire mwia kyaiqa vare varuro. Qio nanraqamave e tiriara nkyi huvantu kyairata nkye qati varivarave qiaro? tita.

34 Mwihua mwitaa tuvaro Jesusiva tiqaro, Nte quataa quama tuqo, Nkye uaqla hi kyaiqara uti variavaro nkyi uaqla hi kyaiqava rupa taihatara tita, nkye mwia kyaiqa nraahu vare variavo.

35 Nraamwu qova variraro rupataari vaisiva hiama ekyaa enta mwivavata variqiro quananrove. Nai mwia mwaaquvantoma mwivavata mwaakyota variqiro quananrove.

36 Nte mwia mwaaquvanto nkyi huvantu kyaarita nkye quataaqama kyeta qati varivarare.

37 Nkye Evarahaamunra nraaqiara variara mwia nte ntapihi kyaurvave. Mwitaa variqatavata nkye ni quara qumina quave timwa kyeta, ni ru kyarerata uti variavo.

38 Nte ntena kokyantiri variqana mwi inraikyara taqaurara nkyi timwa nyi varuqo. Nkye nkyceta sora vatama kyeta variqata taqaa kyaiqara nkye mwi kyaiqarama vare variavo, tiro.

39 Jesusiva mwitaa tuvata mwihua tiqata, Tiri tiqova Evarahaamuvave, tita. Tuvaro Jesusiva tiqaro, Nkye quataa Evarahaamunra nraaqiara variatirio, nkye mwiva varo kyaiqarama nkyevata varaatirio.

40 Kotiva quataa qua tihana nte mwi quara riaura nkyi timwa nyuqata nkye ni ru kyarerata uti variavo. Evarahaamuvave hia nkye hiante hurave.

41 Nkye nkyceta sova varai kyaiqara nraahuma vare variavo, tiro. Mwitaa tuvata mwihua tiqata, Hia tire kyapa nraative. Tiri tiqova mwiva Kotivave, tita.

42 Tuvaro Jesusiva tiqaro, Kotiva nkyi sova varitirio, nte mwiva hinasaina tumu nkyiyata mate mwaa varura nianra nkyi mwutukya ntihata variatirio. Hia nte ntena vu nraato tukyena ntena kyaiqa vararerana tumuvave. Kotiva ni titahana tumuvave.

43 Nte mwitaas tuqata nkye nanraqamave ni qua hia ntapihiavo? Kyaivage nte nkyi timwa nyiankye. Nkye nte tu quara hia riaahuama variavo.

44 Saataaniva nkyi sova varihata nkye mwia mwutukya vahira nraahu utuqita vi variarave. Haaru vuniqama kyero Saataaniva variqaro vaisi rukye varuva nraahu varurave. Quttaaqama vahi inraikyavave, quttaa kyaiqvantove, hia mwiaqi vahiarora tiro, mwiva hia quttaa qua ti variarave. Mwiva unra tiqaro unra qiera mwia qova variqarora tiro, unra qua mwia nai qua tuananra tirave.

45 Mwia kyaiqa mwitaama vahiana nte quttaa qua tuqata nkye ni quara hia quttaa quave ti variavo.

46 Nkyiqitairo tavave nianra uaqiahi kyaiqara varaiho qiananro? Nkye hiama qio niqaa qua vatevarave. Nte quttaa qua ti varuqata nanraqamave nkye ni quara hia quttaa quvave ti variavo? Kyai nte nkyi timwa nyiankye.

47 Kotira nraaqiaravanto Kotira qua rie varirave. Nkye hia mwia qua riaahuara tita, nkye hia mwia nraaqarama variavo, tiro.

Evarahaamuva hia varuvana nte variavarave tura

48 Jesusiva mwitaas tuvata Iutaa nronranramwuvanto tiqata, Tire iara Sameriaanyaava ueraqama viho turava, mwi quava quttaa quama vaiho, tita.

49 Tuvaro Jesusiva qaqao tiro, Hiama nte ueraqama vuquo. Nte ntena kora nrutu tuaahere varuqafama nkye ni nutu qoraqama mateta hiavo.

50 Qio hia nte ntena nrutuara nronraqama kyena riauquo. Ni nutu tuaaheraiva variho. Mwiva ntapihi kyero ko ti varivave.

51 Nte quttaa qua qianinra riaate. Ni qua riemwaqiro quariva hiama qutu quananrove, tiro.

52 Jesusiva mwitaas tuvata Iutaa nronranramwuvanto tiqata, Mwitaas qiarata tire i taqaurara e ueraqama quaro. Tiri haivaqava Evarahaamuva variqiro viro uro qutu vurave. Poropeti vaisi mpohua mpohua variqita vita ekyyaa qutu vurave. Mwihua ekyyaa qutu quavara e tiqara, Ni qua riemwaqiro nrohiariwa hiama qutu quananrove, qiaro.

53 Tiri tiqova Evarahaamuva nronra vaisivanto variqiro viro uro qutu vurave. E hia qio Evarahaamunranra tiqara, Nte mwia nraatara kyaarivave, tinanrave. Poropeti vaisinramwuvata nronra vaisi variqita vita uro qutu vurave. E nataa hira vaisiva varirera higarave mwitaas ti variaro? tita.

54 Mwitaas tuvaro Jesusiva tiqaro, Nte ntena nrutu tuaahere variariovauma ni nutuvanto qumina vahiananrove. Ni nutu tuaahera kye variva, mwiva ni kovave. Nkye mwianrama Kotiva tiri mwanriqavanto variho qiarave.

55 Nkye hia mwia ntapihiarave. Nte mwia ntapihurave. Nte tiqana, Nte hia mwia ntapihi kyaurave, qiarirovauma ni quavanto nkyi qua votima kyero unra qua vahiananrove. Qio nte Kotira ntapihina mwia qua riemwaqina vuvave.

56 Nte mwatani tuminrenra hiava entara nkyi haivaqava Evarahaamuva ni qamwata matorave. Nte mwatani tumuavaro mwiva ni taqovaro mwia mwutukyavanto kyuqe huvaro varurave, tiro.

57 Jesusiva mwitaas tuvata Iutaa nronranramwuvanto tiqata, Qaqao, e hia 50 ihi vara kyaratira, qaraakya vaisivanto variqarama nte nkyi haivaqara Evarahaamunra taqaurave tira hiaro, tita.

58 Tuvaro Iesusiva tiqaro, Haaru nkyi haivaqava Evarahaamuva hia varu entara nte qati variqina quavavave, tiro.

59 Iesusiva mwitaa tuvata mwihua ori vara kyeta mwia ntuqutirerata huvaro Iesusiva tuqeta kyero Kotira nraamwuqitairo veva ntero vorama.

9

Vu qipa vu vaisira Iesusiva ntapairi mwatora

1 Iesusiva viqaro taqovaro vaisi mpovanto nai nronra vikyokyaqitairo vu qipa vuva varura.

2 Mwia taqeta Iesusira nraaqiaranramwuvanto Iesusira kyapara hita tiqata, Mwaanra ti variarao, tava Kotira qua nteqa kyairaqaarave mwi vaisira vu nai nronra vikyokyaqitairo qipa viho? Naive iho, mwia nrohua qohuave iho? tita.

3 Mwitaa tuvaro Iesusiva qaqaq tiro, Hiama nai Kotira qua nteqa kyairaqaarave, mwia nrohua qohua Kotira qua nteqa kyaaraqaarave, mwia vu qipa viho. Nkye mwi vaisiraqaataita Kotira kepukyavantó kyaiqa varaaninra taqaate tiro, mwia vu qipa virave.

4 Kotiva ni titaira kyaiqa tire qaatataaniraqa varaqita virerave. Entama viraro hia mpovanto qio kyaiqa varaananrove.

5 Nte mwatani variqana nte omwavanto itaintema kyena itamwaqina quarita mwatani varihua qio taqevarave, tiro.

6 Mwitaa timwa kyero Iesusiva mwataqaa taara vihi kyero horaqama kyero viti vu qipa vu vaisira vuqaa taaqau mwatero tiqaro,

7 Uto *Siromi Rumpuaqi*. *Titai Nramanrinraqi* ena viri hiqaante, tiro. Mwitaa tuvaro mwi vaisiva Iesusiva tuntema kyero uro nai viri hiqama kyovaro mwiua vu ntapairi vuvaro mwiva mwisairo uro ntantero qio taqamwaqiro nrinro.

8 Mwiva qio taqamwaqiro nri varuvata mwia nraaqani varuhua taqovaro aanra tokyani variqaro mwitaa inraikya mpiate ti varu vaisiva qati nruvata mwihua mwia taqeta tiqata, Mwaa ta vaisivave iho? Mwiva aanra tokyani mwatakyaa viro variqaro mwitaa inraikya mpiate ti vari vaisiva, mwaa mwivave iho? tita.

9 Tuvata mpo uhua tiqata, Qio mwia mwivave, tita. Tuvata mpo uhua qaqaq nai mpo vaisi mwia viri voti hivama nriho tita. Tuvaro mwi vaisiva nri ntero nai tiqaro, Nte mwaa mwivama iho, tiro.

10 Mwitaa tuvata mwihua mwia kyapara hita tiqata, Nataama kyaararo i vu ntapairi viharave e taqaaro? tita.

11 Tuvaro mwiva mwihua timwa nyinro tiqaro, Vaisi mpo mwia nrutu Iesusiva taara vihi kyero horaqama kyero ni puqaa taaqau matero nianra tiqaro, Siromi rumpuaqi uto ena viri hiqaante, tihana nte uto hiqama kyaauqaro ni pu ntapairi vihanama nte qio taqamwaqina nruquo, tiro.

12 Mwitaa tuvata mwihua mwia kyapara hita tiqata, Mwiva taini viharave nrianro? tita. Tuvaro mwiva tiqaro, Nai tainive viho? Hia nte mwia taqauquo, tiro.

13 Tuvata mwihua haaru vu qipa vu vaisira mwia vitaqita uro Parisi vaisinramwuvanto varunani kyora.

14 Iesusiva mwaanra entaqaa hora taaqau kyero mwi vaisira vu ntapairi kyora.

15 Mwihua Parisi vaisinramwu varunani mwia uro kyovata Parisi vaisinramwuvanto mwi vaisira kyapara hita tiqata, Nataama kyaiharove i vuvanto ntapairi viho? tuvaro mwiva tiqaro, Mwiva hora vara kyero ni

puqaa taaqau taihana nte uto ntena piri hiqama kyauqaro ni pu ntapairi vihana nte qio taqauqo, tiro.

16 Mwiva mwitaa tuvata Parisi vaisi hini uhua tiqatama, Mwi kyaiqara varaiwa mwaanraqa qua nteqevaro varaivara tiro, mwiva hia Kotiva hinasairo tumivave, tita.

Tuvata hini uhua tiqata, Qaqao, nataama kyerove uaquia hi vaisiva nronra kyaiqa mwia qio varaanarove? tita. Mwitaa timwa kyeta mwihua nkyiari utaqaa ntainra vita taara qua ti varura.

17 Qaiqaa Parisi vaisinramwuvanto mwia kyapara hita tiqata, E tiqara mwiva ni pu ntapairi kyaiho qiananrave. Mwi vaisirara e nanreve tinanrave? tuvaro mwi vaisiva tiqaro, Kotiva mwia kyaahaqa hi variharo mwiva mwi kyaiqara vare variho, tiro.

18 Mwitaa tuvata Iutaa vaisinramwuvanto hia mwia quara qutaave tiraitita, mwi vaisirara tiqata, E unra tiqarama ni pu ntapairi viho tira hiaro. Haaru hia i vuvanto qipa vurave, tita. Mwitaa timwa kyeta mwi vaisira nrohua qohua nyaanronra.

19 Nyaanrovata nruvata mwitanahua kyapara hita tiqata, Mwaa vaisiva nkyitana nyaaqueve iho? Qutaa mwia nai nronra vikyokyaqitairo vu qipa vurave? Nataama kyaiharove mwia vuvanto ntapairi viharo qio taqaiho? tita.

20 Tuvata mwia nrohua qohua tiqatama, Mwaa vaisiva tiritana timwaaquve. Mwia vuvanto haaru vikyokyaqitairo qipa vurave.

21 Nai nataama kyaiharove mwia vu ntapairi viho? Nai tavave mwia vu ntapairi kyaiho? Mwiva nronra tuaivama iho. Nkye nkyeta mwia kyapara hiqata taqaivarao mwiva qioma nkyita timwa nyiananrove, tita.

22 Mwitanahua Iutaa vaisi nronranramwu nyaatu aatu hiqata mwitaa tura. Iutaa vaisi nronranramwuvanto vaakya qua timwa tetu tiqatama, Vaisi mpovanto Jesusirara mesaiaavanto tiri kyaahaqa hiariva nrivave tirera, mwia kyaara tire mwia inronra hiqatama mwaanra nraamwuqitaita titamwa kyaararo veva ntero ekyaara quarive, tita.

23 Mwitaa timwa kyeta qua timwa torara tita, mwia nrohua qohua Iutaa vaisi nronranramwu nyaatu aatu hita tiqata, Mwiva nronra tuairave. Nkyeta mwia kyapara hiqata taqaate, tura.

24 Tuvata mwihua qaiqaa haaru vu qipa vu vaisira nraanrama kyeta tiqata, E Kotira vuqaa variqara qutaa qua nraahu qianta. Tire taqauraro Jesusiva Kotira qua nteqa kyai vaisivave, tita.

25 Tuvaro mwi vaisiva tiqaro, Jesusiva Kotira qua nteqa kyai vaisivave iho kyuqe vaisive iho nte hia mwia okyara ntapihi kyauqo. Ni pu qipa vura ntapairi kyaira mwia nraahuma ntapihuqo, tiro. Tuvata mwihua mwia kyapara hita tiqata,

26 Mwiva i nataave iho? Mwiva nataama kyerove i vu ntapairi kyaiho? tita. Tuvaro mwiva tiqaro,

27 Nte mwi quara vaakya nkyi timwa nyuqata nkye hiave ntapihiavo? Nanraqamave nkye mwi quara qaiqaa kyapara hiavo? Nkyevata mpo? Nkyevata mwia nraaqiara varireratave qaiqaa mwi quara ni kyapara hiavo? tiro.

28 Tuvata mwihua mwia nronraqama kyeta inronra hita tiqata, Enama mwia nraaqiara variqara mwia qua riaaravave. Tire tetu haivaqara Mosesira qua riemwaqita vurahuave.

29 Kotiva Mosesirara qua timwa tora tire riemwaqita vunanrave. Jesusiva mwi vaisiva qumina vaisivantove. Tire hiama mwiva mwisairo nri okyarara ntapihuro, tita.

30 Mwihua mwitaa tuvaro mwiva kyauqu ntukikinraaqata kyero tiqaro, Qikye, ni pu ntapairi matai vaisiva, mwiva mwisairo nri okyarara nkye hiave ntapihiavo?

31 Tire ntapipi kyauraro Kotiva hia uaquia hi vaisira qua rie varirave. Kotiva nai qua rieqata nrohi varia vaisihua mwihua qua nraahu rie varirave. Mwia nrutu tuaahere variahua mwihua qua nraahu Kotiva rie varirave.

32 Haaru mwaa mwatara toharato entaraqaatairo hia vaisi mpovanto nai nronra vikyokyaqitairo vu qipa vura ntapairi kyorave.

33 Iesusiva hia Kotiva hinasairo tumiva hitirio, mwiva hiama qio ni pu ntapairi mataitirio, tiro.

34 Mwi vaisiva mwitaa tuvata mwihua tiqatama, I mwatatoraqaataira e uaquia hiara vaisivama variqira nrianro. E mpo? E tirivata mwaanra qua timwa timwinrenrave hiaro? tita. Mwitaa timwa kyeta mwihua vaisi mwia ntanrauqita mwaanra nraamwuqitaita veva mwaatani tuto kyora.

Kotirara hia quataave qiahua vu qipa vihua votima kyetama varita

35 Mwia tuto kyo quara riero Iesusiva mwi vaisira puaama kyero mwianra tiqaro, Mwatani mwatatai nraaqiarara e quataa mwivaveve tira hiaro? tiro.

36 Tuvaro mwi vaisiva kyapara hiro tiqaro, Nronrao, mwiva ta vaisivave iho? E ni timwa mpiraqena nte mwianra quataave qiankye, tiro.

37 Tuvaro Iesusiva mwia timwa mwinro tiqaro, E taqe variara vaisiva, nte mwaa mwivama iara ti varuqo, tiro.

38 Mwitaa tuvaro mwiva tiqaro, Nronrao, quataama e mwivave, tiro. Timwa kyero mwiva Iesusira vuqaa tori kyauru raviro mwia qamwata mwatero varura.

39 Mwitaa huvaro Iesusiva tiqaro, Nte nraakye qora tukya hirera mwatani tumuvave. Vu qipa vihua qaiqaa taqaate tina, tumuvave. Qati taqe varihua su qipa quarive tina, tumuvave, tiro.

40 Mwitaa tuvata Parisi vaisinramwuvento mwi quara rieta Iesusira kyapara hita tiqata, Tiri tivuvatave qipa viho? tita.

41 Tuvaro Iesusiva mwihua timwa nyinro tiqaro, Nkyi su qipa vihata varihua varivarovauma hia nkyiqa quavanto vahiananrove. Nkye ni okyara hia ntapihi kye taqaraitita, nkye tiqata, Tire Kotira okyara taqaunananrave, ti variarave. Mwitaa ti variarara tiro, mwia kyaara nkyiqa qua vahirove, tiro. Iesusiva mwitaa turama.

10

Iesusiva sipisipiqa ntumwa kyero tura

1 Iesusiva mpo quaqaa ntumwa kyero timwa nyinro tiqaro, Nte quataa qua qianinra riaate. Vaisi mpovanto sipisipi vataa tutukyaraqi virero hia gesana vera ntaraitiro, tutukya mpona mwaati ntero vi vari vaisiva mwi vaisiva mpuara uti vaisivave, mpohua riqaro mwihuani mpuara vare vari vaisivama variho.

2 Vaisi mpovanto sipisipi gesana vera nteqaro vi variva, mwi vaisiva quataa sipisipi qovama variho.

3 Qesaqaa vaimwanraanra ntaqikyi vari vaisiva mwia taqero qio qesa quataa mwataiharo mwiva nai sipisipiara aakyara nteqaro nai sipisipi nrutu ntamwaqiro vihata mwia sipisipinramwuvento mwia qua ntapihi riaavaro mwihua sitero mwaqqani virave.

4 Mwiva mwaaqani nai sipisipi uro kyero mwiva nraante vuni vi varihata mwia sipisipinramwuvanto nkyiari sora qua ntapihi kyeta rieqatarara tita, mwia vataqita vi variarave.

5 Mwia sipisipinramwuvanto hia mpo vaisi vataqita vivarave. Mwihua mpo vaisi qua hia ntapihi kyeta rieqatarara tita, mwihua mwia nraatu aatu hiqata aatu vivarave, tiro.

6 Iesusiva mwitaa timwa kyero sipisipiqa ntumwa kyero timwa nyuvata mwihua mwi quara okyara hia ntapihiraitita varura.

Iesusiva nte kyuqema kyena sipisipiqa ntaqikyuvave tura

7 Hia ntapihuvaro Iesusiva qaiqaa timwa nyinro tiqaro, Nte quitaama tugo. Nte sipisipi mwihua quesavantoma varuqo.

8 Ni puni nria vaisihua mwihua mpuara utuahuave, mpohua riqata mwihuani mpuara vare variahua variavata sipisipivanto hia mwihua qua riaarave.

9 Utaqi qua gesava ntema mwi gesava varuqo. Niqaamatero nritaraani vaisira ni kova mwia vitaananrove. Niqaamatero tumitare nritare hiariva qiomia kyara puaama kyero nraananrove.

10 Mpuara varai vaisiva mpuara vareqaro sipisipi ru taiqa kyarerero nrinrave. Nte sipisipiara rieqanama sipisipi mwihua qati variqita viqatama kyuqema kyeta variate tina, nte nruvave.

11 Nte sipisipi qova kyuqevave. Sipisipi qova kyuqeva variqaro nai sipisipi rukyevorave tiqaro antuaqiro viro kyai'nte mwihuara rieqana qutu quankye timwa kyero qutirave.

12 Mpowanto hia sipisipi qova, mwiva qati kyaiqa vaisivanto variqaro taqaiharo qaakyau vairivanto nrihanro mwiva aatu hiqaro qaqira kyero hiantero viharo qaakyau vairivanto sipisipi rukyero hini ru sata kyaihata mwihua nkyiariara nkyiariara mpona mpona quarave.

13 Mwia kyaiqa vaisivanto qati kyaiqa vaisivanto variqarora tiro, mwiva hia sipisipiara nronraqama kyero riaraitiro, aatu virave.

14 Nte sipisipi qova kyuqeva variqana nte ntena sipisipi ntapihi kyauqata ni sipisipinramwuvanto nivata ntapihi kyeta taqaarave.

15 Mwia votima kyero ni kova ni ntapihi kyaihana ntevata mwia ntapihi kyaurave. Qio ni sipisipi rukyevorave tina, nte mwihuara rieqana qutu virerave.

16 Sipisipi mponramwu mwihua hia mwaa utaraqi varihua mwihuavata ni sipisipiive. Mwihua ni qua riaivage nte mwihua sitaqina uro kyaarita ni sipisipi hini mwihuavata kuaaqi varivarave. Mwihua kuaaqi varivage nte mwihua sova kuaiqiavanto nraahu varianinrave.

17 Nte mwihuara rieqana qutu vina qaiqaa qati siquainrave. Nte mwitaa hianinranra tiro, ni kora mwutukyavanto nianra vaiho.

18 Nte hia qiove qiariro mpovanto hiama qio ni rukyaananrove. Nte ntena qutu quataa hiraqena qutu quaninrave. Nte qutu quani okyararare, nte qaiqaa qati siquani okyararare, nina kyaiqa nraahuma vaiho. Ni kova nianra mwitaa mwitaa hiante ti quara, nte mwi quara vararerave, tiro.

19 Mwitaa tuvata Iutaa vaisi nronranramwuvanto mwi quara rieta utaqaan tainra vita hininramwu mpo qua tuvata hininramwuvanto mpo qua tura.

20 Airivanto tiqata, Ueravanto mwiaqi variharo mwitaa tiho, Mwiva ueraqama viho. Nanraqamave nkye mwia qua riaavo? Hia mwia qua riaate, tuvata

²¹ mponramwuvanto tiqata, Qaqao, ueraqa hiari vaisiva hiama qio mwi quara qiananrove. Ueravanto hiama qio vu qipa quani vaisira ntapaira kyaananrove, tita. Mwitaa tura.

Iutaa vaisi nronranramwuvanto qaiqaa Iesusira ru kyarerata uti varura

²² Ierusaremini omwata mpo nro entava nri ntora. Kotira nraamwu qamwata mwato omwatava vahuvaro huarivanto hia nronraqama kyero ite varu entaraqaa mwi omwatara nronra.

²³ Mwi entaraqaa Iesusiva Kotira nraamwu nronraqi variqaro mpo rumuqi mwia nrutu Soromoninra rumuqi nrohi varuvata

²⁴ Iutaa vaisi nronranramwuvanto mwipi ntuvantuama vita Iesusirara tiqatama, E mpo qua vaakya tiri timwa timwiataarave. Taireve tiri timwa timwinanrave? E mesaiavanto varirera, vutu kyera timwa timwinraqe tire riaare, tita.

²⁵ Tuvaro Iesusiva tiqaro, Nte vaakya nkyi timwa nyugata nkye hia ni quara quataa quave qiao. Ni kova ni nronraqama kyaihana nte mwia kyaiqa vare varurave. Qio nte varau kyaiqava ni okyarara ntapihima ti variho. Nkye ni kyaiqa taqaarara rieqata ni okyarara ntapihiaataarave.

²⁶ Nkye hia ni sipisipi variqatara tita, nkye hia ni quara quataave tivarave.

²⁷ Nte ntena sipisipi ntapihi kyaurave. Mwihua ni qua rieqatama ni pataqita nrohi varivarave.

²⁸ Nte ekya enta qati variqi vira nyianrita mwihua hia qutu vivarave. Hiama mpovanto ni kyauquqitairo ni sipisipi ntavihi kyero varaananrove.

²⁹ Ni kova ni sipisipi mpitaiva, mwiva peqavanto ekya inraikya nraataraira variqaro ni sipisipiqa ntaqikyi variharora tiro, hia mpovanto mwia kyauquqitairo qio ntavihi kye varaananrove.

³⁰ Ntevata ni kovavata kuaikvantoma varuro, tiro.

³¹ Iesusiva mwitaa tuvata Iutaa vaisi nronranramwuvanto mwia ru kyaare tita, ori tu varovaro

³² Iesusiva tiqaro, Nte ni kora kyuqe kyaiqa, mpo kyaiqa mpo kyaiqa nkyi nyaamwutauqata nanra kyaiqa varaura kyaarave nkye niqaa ori tuto kyarerata uti variavo? tiro.

³³ Tuvata Iutaa vaisi nronranramwuvanto tiqata, Tire hia i kyaiqa kyuqera kyaara i ru kyarerave. E Kotirara qora qua qiaro. E qati vaisivanto variqarama Kotikyantiri kuaaqaa varirera uti variaro. Mwia kyaarama tire ori vara kyeta i ru kyarerave, tita.

³⁴ Mwihua mwitaa tuvaro Iesusiva tiqaro, Nkye Kotira mpuku vataaraqi qua mpo qara ntumwa tova vaiho. Nkye hiave mwi quara taqaavo? Kotiva vaisi mpo uhuara mwitaama tiro: Nkye mwanriqvantove, turave.

³⁵ Tire ntapihi kyauraro Kotira qua hia unra qua vahirave. Kotiva nai qua tu vaisihua qati qumina vaisiara mwanriqvantove turave.

³⁶ Qio Kotiva ni mwatama kyero ni titaihana nte mwatanu tumu variqanama nkyiara nte mwanriqa Kotira mwaqquve tugata nkye tiqata, Kotirara qora qua qiaro, qiao.

³⁷ Nte hia ntena kora kyaiqa varaaritavauma nkye hia nianra qutaa mwivave tivarave. Nte ntena kora kyaiqama vare varuquo.

³⁸ Nkye hia nianra nronraqama kyeta riaivera, nkye nte kyaiqa vare varianinranra nronraqama kyeta rieqatama nianra qutaa mwivave qiate. Nkye mwitaa tivaro nkyi su nyaato ntapihirata nkye ni kova niqii varirara ntapihivarave. Nte mwiaqi varianinranra nkye ntapihivarave, tiro.

³⁹ Mwitaa tuvata mwihua qaiqaa mwia karavu hirera uti varuvoro Iesusiva veva ntero viro.

40 Veva ntero vuva uro Iotaani nramanri hini tokyani Ioniva tauraa variqaro nramanri nyunani uro varura.

41 Varuvata airi nraakye qoravanto mwiva varunani nri nteta tiqata, Ioniva hia nronra kyaika varova variqaro Iesusirara tiri timwa timwunrave. Qio tire taqauraro Ioniva quataa quā mwaa vaisirara timwa timwunrave, tita.

42 Mwitaa timwa kyeta mwini varuhua airivanto Iesusirara quataa mwivave tura.

11

Rasarusiva qutu vura

1 Vaisi mpovanto mwia nrutu Rasarusiva Vetaaninyaava nronraqama kyero nriqa vuvaro varuvata mwia nrunratana Mariaavavata Mataavavata mwini varura.

2 Mariaava vahamwenra kyuqera Iesusiraqaa qu mwatero nai qiata kyaahiqotairo mwia kyuqu nruka mwataariva varura.

Mwi nrunre nrakyetana variqata taqovaro mwihua sakaava nriqa vuvaro varuvata

3 mwitanahua vaisi mpo titeta Iesusirara uro mwitaama qianta tita, Nronrao, i mwutukya nti vaisiva nronraqama kyero nriqa viharo variho qianta, tita.

4 Mwitanahua mwitaa timwa kyeta titovaro vevani uto timwa mwuvaro Iesusiva mwi quara riero tiqaro, Rasarusiva nronraqama kyero nriqa viharo variho. Qio mwiva hiama qutu quananrove. Nkye Kotira kepukya taqaate tiro, mwia nriqa viharo variho. Ni Kotira mwaau ni peqa okyara taqaate tiro, mwia nriqa viho, tiro.

5 Iesusiva Mataararavata mwia nrunranravata Rasarusiraravata mpo-qama kyero mwutukya ntua variqaro

6 mwi quara rierovata hia qamwanrama viraitiro, qaqlira kyero taara entavata mwini varura.

7 Vari kyero mwiaqaatairo nai nraaqiaranramwuanra tiqaro, Qio varavaqenramwu tumu ntante Iutiaani quare, tiro.

8 Tuvata mwia nraaqiaranramwuvanto qaqlira tita, Mwaanra ti variarao, nanauma Iutaa vaisi nronranramwuvanto ori vara kyeta i ru kyarerata uturave. E qaiqaa mwini tumu ntantera virerarave hiaro? tita.

9 Tuvaro Iesusiva tiqaro, Mpo enta mpo enta huarivanto ihera qio itairave. Vaisivanto qaataqaraqaa nrohi variva huarivanto itairaqaa nrohiqaro aanra qio taqeqaro hia huntavaivaimaqiro kyaamwu ntirave.

10 Huarivanto hia itaiharo entaqi nrohi variva huntavaivaimaqiro kyaamwu nti varirave, tiro.

11 Mwitaa timwa kyero Iesusiva qaiqaa tiqaro, Tiri toti Rasarusiva vaitama viho. Nte uro mwia vaurama kyarerave, tiro.

12 Mwitaa tuvata mwia nraaqiaranramwu tiqata, Nronrao, mwiva qati vaite varirera, mwiva qioqa hiananrove, tita.

13 Mwitaa timwa kyeta mwihua hia ntapihuvaro Iesusiva mwi quaraqa ntumwa kyero Rasarusiva qutu vurara tura. Mwihua tiqata, Iesusiva Rasarusirara qati vaitairarama tiho, tita.

14 Mwitaa rieqata varuvaro Iesusiva vutu kyero timwa nyinro tiqaro, Rasarusiva quputuma viho.

15 Qio nte nkyiara rieqanama nkye nianra quataa mwivave qiate tina, nte Rasarusira hia qamwanrama uro taqaurara qamwateqama varuqo. Qio varavaqenramwu mwiva qutu vinani quare, tiro.

16 Tuvaro mwia nraaqiara mpovanto Tomaasiva, mwia mpo nrutu Kaapiva, mwiva nai hena vaisinramwuanra tiqaro, Qio varavaqenramwu mwaanra ti vari vaisiravata quare. Iutaa nronranramwuvanto mwia ru kyaivaqe tirenramwuvata mwia vatama kyeta qutu quare, tiro.

Nraakye qora qutu quahua qati vara sivuma kye varuva nte mwaa mwivave, tura

17 Tuvaro Iesusiva vuva uro ntero riovata Rasarusira quntamwa tovaro erahiamuaantema enta nritarora.

18 Vetaani Ierusaremi qaumato 3 kiromitaa votima mwiaqaatairo vahu-varo

19 Ierusaremisaita mwi mwatanaahua airivanto Mariaaravata Mataaravata mwutukya qihakyama nyateqata Rasarusirara ntatarerata nrunra.

20 Nri varuvaro Mataava riovoro Iesusivavata mwisairo aanrani nri varuvaro mwiva Iesusira huntu kyarero viqaro Mariaara nraamwuqi kyero vuva uro ntero

21 Iesusirara tiqaro, Nronrao, e mwaini variaratiri, ni pakyaava hiama qutu vitirio.

22 Qio mate e Kotirara mpo inraikya mpo inraikyara nyaanru tiraro Kotiva mwi inraikyara qioma i mwiananrove. Nte mwia ntapihi kyauquo, tiro.

23 Tuvaro Iesusiva mwia timwa mwinro tiqaro, I vakyaava qatima siquananrove, tiro.

24 Tuvaro Mataava tiqaro, Qio ekyaara entaqaa mwiva ekyaa nraakye qora kyapata siquananrove. Nte mwia ntapihi kyauquo, tiro.

25 Tuvaro Iesusiva tiqaro, Nraakye qora qutu quahua qati vara sivuma kye varuva, nte mwaa mwivave. Nraakye qora qati variqi vi varia inraikyara nyi varuva nte mwaa mwivave. Nianra qutaa mwivave qiariva qutu viro mwigitairo qati variqiro quananrove.

26 Qati variqiro viqaro nianra qutaa mwivave qiariva hiama qutu quananrove. E mwianra qutaaveve tira hiaro? tiro.

27 Tuvaro Mataava tiqaro, Qutaama tira hiaro. Mesaiaa Kotira maaqvanto mwatani tuminrenra hiarava, e qutaa mwivama hiaro, tiro.

Iesusiva Rasarusirara ntatora

28 Mwitaa timwa kyero Mataava nrumu ntantero uro nai nrunra tirema kyero timwa mwinro tiqaro, Mwaanra ti vari vaisiva nri ntaiho. Mwiva iara kyapara iho, tiro.

29 Tuvaro Mariaava mwi quara riero siviro hiantero uro Iesusira huntu kyarero viro.

30 Iesusiva vaakya Mataava uro qua mwantonani variqaro hia mwatukyani nri ntovaro

31 Mariaava mwia huntarero uvvata Iutaa nraakye qora mwia mwutukya qihakyama mwatarerata nrhuua taqovaro Mariaava nraamwuqitairo hiantero uvvata mwihuua tiqata, Qio mwia quntamwa taanani ntatareraro virerove, timwa kyeta mwihuavata sivita Mariaara vata vareta vura.

32 Mwihuua Mariaara vata vareta uvvaro Mariaava vuva Iesusiva hunani uro ntero Iesusira taqero uro mwia vuqaa tumu ntiro variro tiqaro, Nronrao, e variaratiri, hiama ni pakyaava qutu vitirio, tiro.

33 Tuvaro Iesusiva taqovaro mwiva ntate varuvata Iutaa nraakye qora Mariaaravata nrhuua mwihuavata ntate varuvaro Iesusira mwutukyavanto qoraqama kyero nraamwunruqa tovaro mwiva po kye tiro tiqaro,

34 Mwia taraqive quntamwa teta hiavo? tuvata mwihuua tiqata, E nrinra uro taqaante, tuvaro

35 Iesusiva ntate varura.

36 Ntate varuvata Iutaa nraakye qoravanto tiqata, Qio taqaate. Mwiva mpogama kyero Rasarusirara mwutukya ntiharo variho, tita.

37 Tuvata mponramwuvanto tiqata, Mwiva vu qipa vi vaisiravata qio ntapairi kye varivave. Iesusiva mwaini varitirio, Rasarusiva qutuve vitirio, hiave qutu vitirio? tita.

Iesusiva Rasarusira sivuma kyora

38 Tuvaro Iesusira qaiqaa ua huvaro mwiva mwia quntamwa tonani vura. Mwihsua ori vaurutoraqi Rasarusira veta vateta ori mpo vara kyeta quesana tita torara tiro, Iesusiva tiqaro,

39 Ori mwia qatinani vara kyaate, tuvaro Mataava qutu vu vaisira nnunravanto qaqqao tiro, Mwia quntamwa taavarero erahiamuaantema enta nritaraiharo nteria viva mwuntama quananrove, tiro.

40 Tuvaro Iesusiva Mataarara tiqaro, Nte vaakya i timwa mwu quarara riaante. E nianra qutaa mwivave tirera, e Kotira peqa taqenannerave turave. Hiave nte vaakya fara mwitaa tina huqo? tiro.

41 Tuvata mwihua ori qatinani venta kyovaro Iesusiva virini taqero tiqaro, Ko, e nte tu quara rie variananra nte mwianra kyuqeve tuqo.

42 E ekyaa enta ni qua rie variananra nte ntapihi kyaaurave. E ni titaanranra nraakye qoravanto ntapihiate tina, nte mwihua rieqanama iara aakyara tuqo, tiro.

43 Iesusiva mwitaa timwa kyero mwiva aakyara ntero tiqaro, Rasarusio, sivira veva ntaante, tuvaro

44 Rasarusiva qutu vuva qati siviro mwia kyuqu kyauqu ququtama tetu mwia qiatavata tavunaqo qapuqamatova mwiqitairo veva ntero. Veva ntovaro Iesusiva mwihua timwa nyinro tiqaro, Mwia huvantu kyaivarо qati quariate, tura.

Iutaa nronranramwuvanto Jesusira ru kye quara tura

(Matiu 26:1-5; Maaki 14:1-2; Ruku 22:1-2)

45 Tuvata Iutaa nraakye qora airivanto Mariaara taqarerata nruhua mwi kyaiqara taqeta Iesusiva qio qutaa mwivave, tita.

46 Tuvata mponramwuvanto qaqlira kyeta Iesusiva mwi kyaiqara varorara uro Parisi vaisinramwu timwa nyuvata

47 Parisi vaisinramwuvata, Kotira kyaiqa vara mwate varu vaisihua mwihua nronra vaisinramwuvata, mwihua nkyiari kaanasori vaisi kyapata ntuyaantuama vita tiqata, Mwi vaisiva mpo kyaiqa mpo kyaiqa nronra kyaiqa vare variho. Qikye, tire mwia nataamave kyaananrave?

48 Tire mwia qati kyaarerera, mwiva mwitaamaqiro virata ekyaa nraakye qora mwianra qutaa mwivave tivarave. Mwihua mwitaa tivata tiriqa ntaqikyi variahua Romenivanto tiri ntaqiqata Kotira nraamwu ntapairi kyeta tiri nraakye qora ekyaa ru taiqa kyevorave, tita.

49 Tuvaro mwi vaisinramwuhuaqitairo mpovanto mwia nrutu Kaiapaasiva siviro. Kaiapaasira mwia nronraqama kyovaro mwi ihiraqi Kotira kyaiqa vara mwate varu vaisihuaqaa ntaqikyiqaro vunyaa vaisivanto varuva, mwiva siviro tiqaro, Hia nkye vu nraatovata vahihuave.

50 Romeni mwatanaahua tiri ekyaa ru taiqa kyevorave. Tiri kyaahaqa hirero vaisi kuaiqiyavanto nraahu qutu viraro kyuqe hiananrove, tiro.

51 Kaiapaasiva mwi quara tiqaro nte ntena nraato tukyena tuqo, tiro. Mwiva hia ntapihi kyovaro Kotiva mwia kyaahaqa huvaro mwiva Iesusiva Iutaa nraakye qorara rieqaro qutu quaninranra tura.

⁵² Iesusiva hia Iutaa mwatanaahuara nraahu rieqaro qutu quariva varura. Kotira nraaqiara ekyaa mpoqi mpoqi apiqama varihua mwihuvata sita kyero uro kuaaqi ntuvantuama tarero Iesusiva qutu quariva varura.

⁵³ (Kaiapaasiva tiqaro, Vaisi kuaiqiyanto tiri Iutaa kyaahaqa hirero qutu viraro kyuqe hiarive, tuvata) mwi entaraqaataita Iutaa nronra vaisinramwuvanto Iesusira rukyerara timwaqita vura.

⁵⁴ Mwitaa ti varuvarora tiro, Iesusiva Iutaa mwatani hia qoqaa nrohi-raitiro, qaqlira kyero uro Eparaimi mwatukya qumina mwata tokyani uro nai nraaqiaranramwu kyapata varura.

⁵⁵ Mwini varuvaro Iutaavanto vekyahu nyato kyarara omwata nro entava qaumaqa hvutu hisaita nraakye qora verara nronra mwatukya Ierusalemini nraahu vura. Mwini uro variqata nronra enta mwia vekeya variqata mwihua nkiyari mwaanra qua rieqata nramanri ntumwa kyeta tuapakaara hiqama kyeta varura.

⁵⁶ Mwihua mwini variqata Iesusirara aitutumaqita nrohiqata uro Kotira nraamwu nronra nraamwuqi ntuvantuama vita nai kyapara hi nai kyapara hita tiqata, Iesusiva qiove nrumu omwata nraananrove? Mwiva aatu hiqaro hiave nriananrove? tita.

⁵⁷ Mwitaa ti varuvata Parisi vaisinramwuvantovata, Kotira kyaiqa vara mwate varu vaisihua mwihua nronranramwuvantovata, mwihua nraakye qora timwa nyita tiqata, Nkye taqaivarao Iesusiva nrinrenra nkye nrumu tiri timwa timwivaqé tire mwia rupaqi karavuqi kyaare, tura.

12

*Mariaava Iesusiraqaa mwunta vu vahamwenranra qu mwatora
(Matiu 26:6-13; Maaki 14:3-9)*

¹ Vekyahu nyato kyarara omwata nro entava qaumaqa hvutu 6 entaramwu qati vahuvare Iesusiva qaiqaa Vetaani mwini Rasarusiva varunani vura. Rasarusira mwia haaru qutu vura Iesusiva qaiqaa qati sivuma kyo vaisiva varura.

² Mwini vuvata mwi mwatanaahua Iesusirani kyara uta mwatovaro Mataava mwi kyarara varaqiwaro uro nyuvaro Rasarusiva Iesusikyantiri kyara tainta mwia tataaqa mwatakyaa viro varura.

³ Varuvaro Mariaava taqu mpo varero nrunra. Mwi taquraqi nronra munima kyo vahamwenranra mwia nrutu *naanti* vahuvare Mariaava mwi taqura varero mwi vahamwenranra Iesusira kyuquqaa qu mwatero mwiaqaatairo nai qita kyaahiqotairo Iesusira kyuqu nruka mwatovaro vahamwenra kyuqe hu mwuntava nraamwu mwia piqa kyora.

⁴ Piqa kyovaro Iesusira nraaqiaranramwuqitairo mpovanto Iutaasi Isikeriotiva Iesusira qovarama kyaariva, mwiva qaqao tiro,

⁵ Mwi vahamwenranra mpohua nyinro munima 300 kinaa vara kyero mwi munimanra vehi nraakye qora nyiataara vaiharoma, qumina i kyuquqaa qu mwatero iho, tiro.

⁶ Iutaasiva hia vehi nraakye gorara riaraitiro, mwiva mpuara vaisivanto variqarora tiro, mwitaa tura. Mwiva Iesusira nraaqiaranramwu munima tuaqa ntaqikyiqaro mwi tuaraqitairo tuqeta kyeqaro mwinramwuhua munima mpuara vare varura.

⁷ Iutaasiva tiqaro, Munima mwia vehi nraakye qora nyiataara vaiharoma qumina i kyuquqaa qu mwataiho, tuvaro Iesusiva tiqaro, Hia mwi nraakyera antuaante. Mwiva vahamwenra niqaa qu mateqaro ni quntamwa te entarara ni mamanta terama mate variho.

8 Vehi nraakye qora mwihua ekyaa entama nkyivata variqita vivarave. Nkye qati entaqaa mwihua qio kyaahaqa hivarave. Nte hiama nkyivata ekyaa enta variqina quaninrave, tiro.

Nronra vaisinramwuvanto Rasarusiravata ru kyarerata uti varura

9 Iesusiva mwitaa timwa kyero varuvata Iutaa airivanto riovoro Iesusiva Vetaani mwini varuvata mwihua Jesusiravata Iesusiva qati sivuma kyo vaisira Rasarusiravata taqarerata uto Vetaanini kuaira hita varura.

10-11 Iutaa airivanto Rasarusira qati sivuma kyorara rieqatama nkyiari nronra vaisinramwu qaqlira kyeta uto Jesusirara qutaa mwivave ti varuvata mwia kyaara Kotira kyaqiqa vara mwate varu vaisihua mwihua nronranramwuvanto Rasarusiravata rukye quara ti varura.

Iesusiva ntonki mwoqaqa mwaari ntero Ierusaremiqi vura

(Matiu 21:1-11; Maaki 11:1-11; Ruku 19:28-40)

12 Mwia qanranraa nraakye qora airivanto vekyahu nyato kyarara nranrenrata nrhuua riovoro Iesusiva Ierusareminianra aanrani nri varura.

13 Nri varuvata mwihua mwia qamwata mwatarerata qatokya mwanre voti hora teqa vareta Jesusira huntu kyarerata viqatama mwihua aakyara nteta tiqata,

Kyai mwia nrutu tuaaheraare.

Nronravanto nai nrutuqa nri vari vaisira

kyuqema mwataiho.

(Ihi 118:26)

Tiri Isareriqaa ntaqikyti vaisira

Kotiva kyuqema mwataiho, tita.

14 Mwihua mwitaa timwaqita vuvaro Iesusiva qaraakya ntonki puaama kyero Kotira mpukuqi tuntema kyero mwia mwoqaqa mwatakyaa viro variro Ierusaremiqiara viro.

Haaru Kotira mpukuqi mwianra mwitaama tiro:

15 Saioniqinaahua (Ierusaremiqinaahua),

nkye hia aatu hiate.

Taqaate, nkyiqa ntaqikyiariva nriqanroma mwiva

qaraakya ntonki mwoqaqa nri variho, tura.

(Sekaraiaa 9:9)

16 Mwi quava mpukuqi vahuvata mwi entara Jesusira nraaqiaranramwuvanto hia mwi quara okyara ntapihura. Nraakiara Jesusiva qutu viro qaiqaa sivu entaraqaa mwi quava mwihua nyaatoqi ntumwa vuvata mwihua tiqata, Mwi quava Iesusiva ntonki mwoqaqa Ierusaremini vurara turave, tura.

17 Iesusiva Rasarusira oriqi quntamwa toraqitairo nraanrama kyero mwia qati vara sivuma kyovata nraakye qora mwini Jesusiravata varuhua mwi kyaiqara taqeta mpohua mpohua timwa nyuvata

18 mwiaqataita nraakye qora airivanto Iesusiva nronra kyaiqa mwia varorara rieqata Iesusira uto huntu kyora.

19 Mwihua Jesusira qamwata mwatarerata vuvata Parisi vaisinramwu nai timwa mwi nai timwa mwi hita tiqata, Qio taqaate. Tire hiama qio mpo qara hiara aanrava vaiho. Ekyahua mwia nraahuma vataqita vi variavo, tura.

Kirikiqinaahua mponramwuvanto Jesusira uro taqora

20 Kiriki mponramwuvanto (mwihua Iutaa mwaanra qua riohua) mwihuavata mwi omwatarara nreqatama Kotira nrutu tuaaherarerata Ierusaremini uro varura.

²¹ Uro variqata mwihua Iesusira nraaqiara mpo Piripira Vetasaitaa mwatukya Karirinyaanranra tiqata, Tiri vaisio, tire Iesusira taqarererave, tuvoro.

²² Piripiva uro Entururavata timwa mwinro mwiva vatama kyero uro Iesusira timwa mwunra.

²³ Timwa mwuvuaro Iesusiva tiqaro, Nte mwatani mwatatai nraaqiaravave. Ni nutu nronraqama quari entava nri ntaiho.

²⁴ Nte qua qianinra riaate. Uiti uru hia mwataqi vara tutairaro uiti uru mwiqiyava nanrianraa vahiananrove. Uiti uru mwataqi vara tutairaro ntuko hiro turu vera kyairaro mwiaqaatairo uru mwiva taiqa quananrove. Uru mwiva taiqa viraro uiti mwiva cupiqeqaro airi tamwa riaananrove.

²⁵ Qio vaisi mpovanto mwaa mwataraqaa nai qati variqiro quaninranra nraahu nronraqama kyero riemwaqiro quariva, mwiva ekyarama qutu quananrove. Vaisi mpovanto hia nai mwaa mwataraqaa qati variqiro quaninranra nronraqama kyero riemwaqiro quariva, mwi vaisiva ekyaa enta qatima variqiro quananrove.

²⁶ Tahuave ni kyaiga varaataa hiarihua, mwihua qati varivorave. Mwi vaisihua ni pataqita nriate. Mwihua mwitaa hiqata nte varianinrani mwihuavata varivarave. Mwihua mwitaama kyeta ni kyaiga vara mate varivaro ni kova mwihua nyutu nronraqama kyaananrove.

Iesusiva nai qutu quaninranra tura

²⁷ Qio mwaa entara ni mutukya uaquia ihana varuqo. Ntena korara nanra quave qianinrave? Ko, mwi entava nri ntaankyora mwi entara qaqlira kyaante. Mwitaave Kotirara qianinrave? Qaqao, nte hia mwitaa tirerave. Nte mwi entarara rieqana tumuvave. Mwi entaraqaa nte atura ntumwaqina quangye timwa kyena tumuvave.

²⁸ Ko, e ena nrutu nronraqama kyaante, tiro. Iesusiva mwitaa tuvaro nyaamwusairo quavanto tiqaro, Nte ntenu nutu nronraqama kyauqo. Qaqavata nronraqama kyarerave, tiro.

²⁹ Tuvata nraakye qora ntuvaaantuama vita mwini sivita varuhua mwi quara rieta tiqata, Nyaanruva nruqua tiho, tuvata hini uhua tiqata, Qaqao, nyaamwunyaa vaisivato mwiavata qua tiho, tita.

³⁰ Tuvaro Iesusiva tiqaro, Hia mwiva nianra rieqarovauma qua tiho. Mwiva nkyiara rieqaroma qua tiho.

³¹ Qio mwaa entara mwatani varihua ko qiani entarave. Mwaa entara mwatani varihuaqaa ntaqikyi varira Saataaninra peqa ntuvuraa kyaani entarave.

³² Mwatasaita ni tuaahera kyaivaqe nte variqana ekyaa nraakye qora ntanrau kyaarita mwihua nte hianinranri nraahu nrivarave, tiro.

³³ Iesusiva mwi quara tiqaro nai qutu quaninranra timwa nyunra.

³⁴ Mwitaave tuvata mwini ntuvaaantuama vuhua qaqao tita, Kotira mpukuqi qara ntumwa tova tiqaro, Kotira kepukya vaisi mesaaavanto ekyaa enta qati variqiro quananrove, turave. Nraaqamaye e tiqara, Ni mwatani mwatatai nraaqiarara tuaahera kyevarave, qiaro? (E ena qutu vinanranra qiana quara hia ntapihuro.) E tiqara, Ni mwatani mwatatai nraaqiaravave, quananrave. E ta vaisivave hiaro? tita.

³⁵ Tuvaro Iesusiva tiqaro, Pataqia omwavanto nkyi kyapata variqaro ita-mwiqiro quananrove. Kyokiraq'i nrohiva hia nai vi aanranra ntapihirara tita, nkye kyokira ruquankyo tita omwavanto qati ite variani entaraqaa nrohiqata variate.

³⁶ Omwavanto qati vahiani entaraqaa nkye mwi omwanranra qutaa mwivave timwa kyeta, mwianra riemwaqi viqatama nrohiate. Mwitaa

tiqatama nkye omwa nraaqiara variqatama nkyevata omwavanto itain-tema kyeta itamwaqita vivarave, tiro.

Iesusiva mwi quara timwa kyero mwiaqaatairo uro hia mwihua suqaa variraitiro, uqeta varura.

Iutaavanto Iesusirara hia quutaave tura

³⁷ Iesusiva mwihua suqaa variqaro nronra kyaiqa varovata mwihua taqetavata mwihua qaqira kyeta hia mwianra quataa mwivave tuvarora tiro,

³⁸ mwi entara Aisaiava haaru tu quava quataa vahura. Haaru Kotiva vaisi mpo Aisaiava kyaahaqa huvaro Aisaiava poropeti vaisivanto variqaro qumina vakya mwaa quara vutu kyero tiqaro, Nronrao, tavave tiri quara quataave tihoo?

Hia mpovantovata quataave tirave.

Nronravanto nronra kyaiqa vara kyaiharo tavave mwia kyaiqa ntapihi taqaiho?

Hia mpovantovata ntapihi kyero taqaiho, tura.

(Aisaiava 53:1)

³⁹ Aisaiava mwitaa turara tita, mwihua hia Iesusirara quataa mwivave tura. Aisaiava qaiqaa mesaia mwianari tigaro,

⁴⁰ Mwi vaisihua uaquia hi aanranra qaqira kyeta nianra tiri kyaahaqa hiante tivorave timwa kyero, Kotiva mwihua su nyaato tita kyaihata mwihua hia vuqotaita qio taqeta, mwihua hia nraatoqotaita qio riaavo, tura.

(Aisaiava 6:10)

⁴¹ Aisaiava haaru variqaro Iesusira peqa okyara taqebarora tiro, mwiva mwianra qua timwa nyunra.

⁴² Mwi entara Iutaa nronra vaisinramwuqitaita mponramwuvanto tiqata, Qutaama Iesusiva mwivave, tita. Mwihua mwitaa tiqata mwihua Parisi vaisi nyaatu aatu hita qaqira kyeta hia qoqaa variqata mwi quara tita. Mwaanra nraamwuqitaita veva nteta quate tivorave tita, hia mwihua qoqaa variqata mwi quara tura.

⁴³ Qati vaisivanto qamwata nyaterara nraahu mwihua nronraqama kyeta rieqatama hia Kotiva qamwata nyataaninranra nronraqama kyeta riora. Mwihua mwianra nraahu riuohuara tita, mwihua hia qoqaa Iesusirara quataa mwivave tura.

Iesusiva tu quava vaisi ko qiananrove tura

⁴⁴ Iesusiva paatiro timwa nyinro tiqaro, Nianra quataa mwivave qiariva hiama nianra nraahu quataave qiananrove. Mwiva ni titairaravatama quataave qiananrove.

⁴⁵ Vaisivanto ni taqebaro ni titairavatama taqaananrove.

⁴⁶ Nianra quataa mwivave qiariva kyokiraqi nrohiankyo tina, nte omwa votima kyena itamwaqina virera mwatani tumuvave.

⁴⁷ Nte hia mwatani varihuaqua qua vatarerana tumuvave. Mwatani varihua kyuqema variate tina, nte tumuvave. Ni qua riero nteqa kyaariva variraqe hia ntevauma mwiaqaa qua vataaaninrave.

⁴⁸ Ni qoririma mataani vaisiraqaaave, ni qua nteqa kyaani vaisiraqaaave, hiama nte qua vataaninrave. Nte timwa taani quava, mwivama ekyaara entaqa variqaro mwiaqaa qua vataaaninrave.

⁴⁹ Nte hia ntene nraato tukyenavauma qua nkyi timwa nyuqo. Ni kova mwitaa mwitaa qiantem timwa kyero ni titahana nte mwia qua nkyi timwa nyuqo.

50 Nte ntapihi kyauqaro ni kora qua riaariva ekyaa enta qati variqiro quananrove. Qio ni kova mwitaa mwitaa qianti quara, nte mwi quara nkyi timwa nyuquo, tiro. Iesusiva mwitaa tura.

13

Iesusiva nai nraaqiaranramwu kyuqu hiqama nyatora

1 Vekyahu nyato kyarara omwata nro entava kuaa enta nraahu qati valuhuvaro Iesusiva variqaro ntapihi kyovaro nai mwata mwaini kyero tumu ntantero nai qova varinani quarri entava qaumato vahura. Mwitaa huvaro Iesusiva variqaro nai huhua mwatani varuhuara mpoqama kyero mwutukya vahuvuaro mwihuara rieqaro varura. Mwiva mwihuara mwutukya vahuvu qati nraahu vahiqiro vuvaro uro qutu vura.

2 Entama vuvaro Iesusiva nai nraaqiaranramwu kyapata kyara nre varuvaro mwia nraaqiara mpovanto Iutaasi Isikeriotiva Saimoninra mwaaquvanto varuvaro Saataaniva Iesusira qovarama kyaante tiro, Iutaasira mwia nraatoqi qora qua vatovaro Iutaasiva Saataaninra qua riiora.

3 Riero varuvaro Kotiva ekyaa inraikya Iesusira kyauquqi vatora Iesusira vu nraatoqi vahuvuaro mwianra ntapihi kyero. Iesusiva Kotiva hunasairo tumuva qaiqaa Kotiva hunani quaninra mwianravata mwiva ntapihi kyora.

4 Mwiaqaatairo mwiva kyara nro taintaraqaatairo siviro verato ututo tuavaaqara ntahuku kyero vatero tauri tavaarana rupatero uro

5 tanuqi nramanri rauru kyero varero uro nai nraaqiaranramwu kyuqu hiqama nyatero tauri tavaarana rupatoraqotairo aahara tu nyatero.

6 Mwitaamaqiro viro Saimoni Pitaava hunani nri ntovaro Pitaava qaqao tiro, Nronrao, e ni kyuquvatave hiqama matarera uti variaro? tuvaro

7 Iesusiva tiqaro, Mate nte mwaa kyaiqara varaura e hia ntapihiaro. Nraakiara mwianra qio ntapihinanrave, tiro.

8 Tuvaro Pitaava tiqaro, Qaqao, e nronra vaisivanto variqara haunri mwitaa hi kyaiqara ni vara materavaare. E hiama ni kyuqu qio hiqenarave, tiro.

Tuvaro Iesusiva tiqaro, Hia nte i kyuqu hiqama mwataankyer, e hiama ni nraaqiara varinanrave, tiro

9 Mwitaa tuvaro Saimoni Pitaava tiqaro, Nronrao, mwitaa hirara e hia ni kyuqu nraahu hiqama mataante. Ni kyauquvata ni qiatavata hiqama mataante, tiro.

10 Tuvaro Iesusiva tiqaro, Nramanri ntumwa taariva hiama qumina qaiqaa ntuananrove. Mwiva nai kyuqu nraahuma hiqaananrove, tiro. Nkye ekyaa nramanri ntumwa kye kyuqema variavaro kuaikuvanto nraahu hia kyuqema variho, tiro.

11 Iesusiva nai nraaqiara mpovanto mwia qovarama kyaaninra ntapihi kyerora tiro, mwiva tiqaro, Nkye ekyaa kyuqema variavaro kuaikuvanto nraahu hia kyuqema variho, tiro.

12 Mwitaa timwa kyero mwihua kyuqu hiqama nyatero Iesusiva qaiqaa uro nai tuavaaqaa ntahuku kye vatora vara utu varero uro nai varura qoqaraaraqaa mwatakyaa viro variro timwa nyinro tiqaro, Nte mwataa hi kyaiqara nkyi vara nyataura nkye qio mwianra ntapihitave hiavo?

13 Nkye nianra nronra vaisi mwaanra ti variaravave qiarave. Nte mwitaama varurara titi, nkye qiomia nianra mwitaa tivaravave.

14 Qio nte nkyi nronra vaisi mwaanra ti varuva variqanama nte nkyi mwataa kyaiqa vara nyateqanama nkyi kyuqu hiqama nyatauqo. Nkyevata variqata nte huntema kyeta nai kyuqu nai kyuqu hiqama nyateqata variate.

15 Nkye nte hunte hiate tina, nte nkyi mwi kyaiqara nyaamwu tauqo.

16 Nte qutaa qianinra nkye riaate. Kyaiqa vaisivanto hia nai nronra vaisi nraatara kyarave. Mpo inrakyara titaiharo vi vaisiva hia nai titaira mwia nraatara kyarave.

17 Nkye mwi quara okyara ntapihi kyeta rieta mwi kyaiqara mwitaama kye varaqi vivera, nkye qamwateqatama variqi vivarave.

18 Qio hia nte nkyi ekyaahuara tuqo. Nte ntena mwatama tau nraaqiarahua qio ntapihi taqaurave. Nte mwihua okyara ntapihi kyaurave. Haaru Kotira mpukuqi qua mpo qara ntumwa tova mate qutaa mwivauma vahiananrove. Mwi quava mwitaama tiro:
Vaisi mpovanto nivatama kyero variqaro
ni kyara nrenro mwiaqatairo tuqasaa viro
ni qoraqama mataananrove, turave.

(*Ihi 41:9*)

19 Nkyiqitairo vaisi mpovanto ni qoraqama mataaninranra nte mate nkyi timwa nyi varuqo. Mwiva nraakiara ni qoraqama matairata nkye variqata mate nte timwa nyunranra rieqatama qio nianra mwiva qutaama qati nraahu variqi vivave tivarave.

20 Nte qutaa qianinra nkye riaate. Vaisi mpovanto nte titaani vaisira qamwata mwateqaro mwiva nivata qamwata mataananrove. Mwiva ni qamwata mateqaro Kotiva ni titairavata qamwata mwataananrove, tiro.

Mpowanto Iesusira nramwutaa kyauquqi kyaaninranra tura

(*Matiu 26:20-25; Maaki 14:17-21; Ruku 22:21-23*)

21 Iesusiva mwitaa timwa kyero varuvaro mwia mwutukyavanto uaquia huvaro mwiva vutu kyero mwihua timwa nyinro tiqaro, Nte qutaa qianinra riaate. Nkyiqitairo mpovanto ni rukyaate tiro, uro timwa nyiananrove, tiro.

22 Mwitaa tuvata mwia nraaqiaranramwuvanto nai taqe nai taqe hita airi nraato tita tiqata, Iesusiva ta vaisirarave tiho? tita.

23 Mwitaa ti varuvaro mpovanto Iesusira mwutukyavanto mwianra mpoqiaavata vahu vaisiva Iesusira nraaqani varuvaro

24 Saimoni Pitaava mwianra nru nraata kyero tiqaro, E Iesusira ta vaisiva mwitaa hianinra kyapara hiqara taqaante, tuvaro

25 mwi vaisiva Iesusiraqaa umerwi vuntuvi variro Iesusira kyapara hiro tiqaro, Nronrao, mwiva ta vaisivave iho? tiro.

26 Tuvaro Iesusiva mwia timwa mwinro tiqaro, Nte mpereti viti nramanri tanuqi vahiraqi mwaati ntamwa kyena vaisi mpo mwianriva qio mwia mwi vaisivave, tiro. Timwa kyero mpereti viti vara kyero nramanriqi ntamwa kyero Iutaasira viti mwunra.

27 Mpereti viti mwia mwuvaro Iutaasiva mwia varovaro Saataaniva Iutaasira utaqi viqetero varuvaro Iesusiva Iutaasirara tiqaro, Qio hiantera ena vararerera tina kyaiqara varaante, tiro.

28 Mwitaa tuvata mwia nraaqiara kyara taintaqa varuhuaqitairo hia mpovanto mwi quara okyara ntapihura.

29 Mwihua tiqata, Iutaasiva munimaqaa ntaqikyi vari vaisiva variharo Iesusiva huru omwata nraana kyarara varaanteve tiho, mwiva vehi vaisi munima uro nyantewe tiho? tita.

30 Mwihua mwitaa ti varuvaro Iutaasiva Iesusiva mpereti viti mwunra varero mwiaqatairo veva ntero viro. Entaqi mwiva vurama.

Iesusiva qaraakya qua mwaanra timwa nyunra

31 Iutaasiva veva ntero vuvaro Iesusiva tiqaro, Nte mwatani mwatatai nraaqiaravave. Mate ni peqa okyaravanto qovarama viho. Nte Kotira peqa okyara mate qovarama kyauqo.

³² Nte Kotira peqa okyara qovarama kyaankyeria, Kotiva mwiva ni peqa okyaravata qovarama kyaananrove. Mwiva qamwanrama mwitaa hiananrove.

³³ Qikye, ni nraaqiaranramwu tuaavo, nte nkyivata pataqia varikyena quarita nkye nraakiara qumina nianra puua hivarave. Nte Iutaa vaisi nronranramwu timwa nyuntema kyena nkyivata timwa nyuqo. Nte virera hianinrani nkye hia qio vivarave, tuquo.

³⁴ Nte mate qaraakya qua mwaanra nkyi timwa nyianrita nkye riaate. Nkye mpogama kyeta nanrianra nanrianra mwutukya vahirata variate. Ni mutukyavanto nkyiara vahintema kyeta nkyevata nanrianra nanrianra mwutukya vahirata variate.

³⁵ Nkye nanrianra nanrianra mwutukya vahirata varivata nraakye qora nkyi taqeta mwihua nkye Jesusira nraaqiarama variavo tivarave, tiro.

*Pitaava nte hia Jesusira taqaurave qianinranra Jesusiva tura
(Matiu 26:31-35; Maaki 14:27-31; Ruku 22:31-34)*

³⁶ Jesusiva mwitaa tuvaro Saimoni Pitaava mwia kyapara hiro tiqaro, Nronrao, e taini virerarave qiaro? tiro. Tuvaro Jesusiva tiqaro, Nte virera hianinrani e hiama qio ni pataqira vinanrave. E nraakiarama ni pataqira vinanrave, tuvaro Pitaava tiqaro,

³⁷ Nronrao, nanraqamave nte hia qio mate i vataqina quaninrave? Nte iara rieqana qiomia qutu quaninrave, tiro.

³⁸ Tuvaro Jesusiva tiqaro, Qutaave e nianra rieqara qutu vinanrave? Nte qutaa qianinra riaante. Kokoraaravanto hia nruqua tirara e taarampo nani nianra nte hia mwia taqaurave tinanrave, tiro.

14

Kotiva hinani qua aanrava Jesusivama

¹ Jesusiva nai nraaqiaranramwu timwa nyinro tiqaro, Hia nianra riaivaro nkyi mwutukyavanto uaquia hiarive. Nkye Kotirara kepuqyaqama kye riemwaqita quantema kyeta nianravata kepuqyaqama kye riemwaqita quate.

² Ni kora mwaatani airi mpo nraamwu mpo nraamwu vahana nte nkyiara rieqana uro terama nyatarerana vuqo. Hia mwitaama vahitiri, nte hiama nkyi timwa nyutiri.

³ Nte uro nkyini teramatena uro ntantena tumu nkyi sitaqina uro ntena varianinrani kyaarita, nkye nivata varivarave.

⁴ Nte virera hu aanranra nkye ntapihi kyaarave, tiro.

⁵ Tuvaro Tomaasiva qaqao tiro, Nronrao, tire e virera hiananra hia ntapihi kyauro. Nataama kyetave tire mwi aanranra ntapihi kyaananrave? tiro.

⁶ Tomaasiva mwitaa tuvaro Jesusiva mwia timwa mwinro tiqaro, Nte Kotiva hinani qua aanrava mwaa mwivama varuqo. Nte qutaa okyara mwaa mwivama varuqo. Nte qutaa okyara mwaa mwivama varuqo. Hia mpo aanranraqaama tero ni kova hinani quariva vaiho. Qio nte mwaa aanra mwivama varuqo.

⁷ Nkye ni ntapihi kyeta taqaahuara tita, nkye ni koravata ntapihi kyeta taqevarave. Mate mwaa entaraqaataita nkye ni kora ntapihi kyetama nkye mwivama taqaahuama variavo, tiro.

⁸ Mwitaa tuvaro Piripiva tiqaro, Nronrao, qio ena qora tiri tinraamwu tairaqe tire mwia taqeta qiove qiare, tuvaro

9 Iesusiva mwia timwa mwinro tiqaro, Piripio, nte nkyi kyapata mpuahaama varuqara e hiave ni ntapihi kyera taqaaro? Ni taqaiva ni kora-vatama taqaaho. E nanraqamave nianra tiqara ena qora tiri tinraamwu taante qiaro?

10 Piripio, nte ntena koraqi varuqaro ni kova niqima variho. E hiave mwi quarara quutaave qiaro? Nte nkyi timwa nyu quara hia nte ntena riemwa kyeqanavauma nkyi timwa nyuqo. Ni kova niqi variva, mwiva variqaro nai kyaiqa vare variho.

11 Nte ntena koraqi varuqaro ni kova niqima variho. Mwi quarara quutaave qiate. Nkye hia nianra riaivera, nkye nte kyaiqa varaurara rieqata nianra qutaa mwivave qiate.

12 Nte qutaa qianinra riaate. Nianra qutaa mwivave timwa kyero riemwaqiro quariva, mwiva variqaro nte kyaiqa varauntema kyero kyaiqa varaananorove. Nte ntena kova hinani quaninranra tiro, mwia kyaiqvavanto ni kyaiqa nraatara kyaananrove.

13 Nkye ni kyaiqara rieqata qioma nkye mpo inraikyararave, mpo kyaiqarave, ni kyapara hivaqe nte nkyi nyianinrave. Nkye ni kora peqa okyara taqaate tina, nte mwia mwaaquvanto mwitaa hirerave.

14 Nkye ni kyaiqara rieqata qio nkye mpo inraikya mpo inraikyara ni kyapara hivera, nte nkyi nyianinrave.

Kotira mwanraqura vara kyaariro tumuaninrave tura

15 Nkyi mwutukyavanto nianra vahirera, nkye ni qua nraahu riemwaqita vivarave.

16 Nte ntena kora kyapara hiaro mwiva nkyi kyaahaqa hianinra Kotira mwanraqura qutaa qua nraahu ti varianinra titairaro nkyi airiqa hirero tumu ekyaa enta nkyivata variananrove.

17 Qati nraakye qora mwatani variahua hia Kotira mwanraqura taqeta mwihua hia mwia ntapihi kyaarara tita, mwihua hia mwia qio varevarave. Nkye mwia taqaavaro mwaa entara mwiva nkyivatama variho. Nraakiara mwiva nkyiqima variananrove.

18 Hia nte nkyi mwaini kyena quarita nkye nrainranra nraaqiara votima kyeta varivarave. Nte nkyi kyaarinani uro ntantena tumuaninrave.

19 Pata iheraqia mwatani varihua hia ni taqaivata nkye nraahu ni taqevarave. Nte qati variqina quariva varurara tita, nkyevata qati variqita vivarave.

20 Mwi entara nte ntena koraqi varurave, nkye niqi variarave, nte nkyiqi varurave, nkye ntapihi kyevarare.

21 Ni qua varakte tutoero mwi quara vataqiro quaninra mwia mwutukyavanto nianra vahiananrove. Nianra mwutukya vahiariva variraro ni kora mwutukyavanto mwianra vahiananrove. Ni mutukyavantovata mwi vaisirara vahiananrove. Nte variqana mwi vaisira ntena okyara qoqaa nraamwu taaninrave, tiro.

22 Tuvaro Iutaasiva hia Iutaasi Isikeriotiva mpo Iutaasiva tiqaro, Nanraqamave e ena okyara tiri nraahu tinraamwu teqara hia mwatani variahua nyaamwu tenanrave? tiro.

23 Iutaasiva mwitaa tuvaro Iesusiva tiqaro, (Mwatani variahua hiama nianra mwutukya ntihata variavo). Vaisivanto nianra mwutukya vahiariva, mwiva ni qua riemwaqiro viraro ni kora mwutukyavanto mwianra vahiananrove. Ntevata ni kovavata mwi vaisiraqi uro variananrave.

24 Vaisi mpovanto hia nianra mwutukya vahiariva, mwi vaisiva ni quavata hia vataqiro quananrove. Nte nkyi timwa nyu quara hia ntena

nraato tukyena nkyi timwa nyunrave. Nte ni koraqaataina mwi quara varena tumu nkyi timwa nyunrave.

²⁵ Nte mate nkyivata varu entara mwaa quara nkyi timwa nyuqo.

²⁶ Nte quariro ni kova nkyi kyaahaqa hianinra nai mwanraqura titairaro mwiva ni kyaigara rieqaro tumu variqaro ekyaa inraikya nkyi nyaamwu teqaro nkyi su nyaatovata kyaahaqa hirata nkye nte tu quara ntapihi riemwa tevarave.

²⁷ Nte virera hiqanama nkyiara mwaateraqama varivaro nkyi mwutukyavanto qihakya hirata variate, tuqo. Mwaa mwatanaahua nkyiari nanrianra nanrianra qua mwanteta tiqata, Mwaateraqama kyera variante, ti variarave. Nkyiari mwitaa tiqata qumina qua nraahu ti variarave. Nte nkyiari mwaateraqama kyeta variate tu quava hiama qumina quave. Nkye ni qua riemwaqita vivaro nkyi mwutukyajitairo qihakya vahirata hia aatu hivaro nkyi mwutukyavanto hiama uaqia hiananrove.

²⁸ Nkyi kyena quariva uro ntantena tumuaninrave tu quara nkye vaakya riaarave. Ni kova ni naatara kyero nronravanto varirara tita, nkyi mwutukyavanto nianra qutaaqama vahirera, nte ntena kova hinani quaninranra nkye qamwateqata varivarave.

²⁹ Mwi inraikyava mwi inraikyava nraakiara mwitaa hianinranra nte mate nkyi timwa nyuqo. Qio nraakiara nkye taqaivaro mwi inraikyava qovaramaqiro virata nkye nianra tiqata mwiva tu quava mate quataa mwivauuma vailio tivarave.

³⁰ Qio mwaa entara mwatani variahuaqaa ntaqikyi variva, Saataaniva, nruru varihananra tina, mwia kyaara nte hia nkyl kyapata mpuahaa qua qianinrave. Mwia kepukeyavanto hia ni qio naatara kyaananrove.

³¹ Ni mutukyavanto ni korara vahira mwatani varihua taqaate tina, nte ni kora qua vataqina virerave. Qio varaivagenramwu mwaaqitaita vevante quare, tiro. Iesusiva turama.

15

Iesusiva uaini kyaantaqa ntumwa kyero timwa nyunra

¹ Iesusiva mpo quaqa ntumwa kyero nai nraaqiaranramwu timwa nyinro tiqaro. Nte uaini apa kyuqeva varuqaro ni kova uainiqaa ntaqikyi varivama varihata nkye uaini mwanre kyaarama variavo.

² Ni kova taqaiharo kyaara mpovanto hia tamwa riaiharo mwiva mwia teqa qaqlira kyero uro taqaiharo mpo kyaaravanto kyuqema kyero tamwa riemwa taiharo mwiva kyuqema vahiqaro mpoqiaavata riaarive tiro, mwia rapatu kyero vatairave.

³ Nte tu quava nkyi vaakya rapatu kyero vataihatara tita, nkye qiomava variavo.

⁴ Nkye niqi varivage nte nkyiqi variankye. Kyaara mpovanto nanrianraqama vahiariva hiama qio tamwa riaananrove. Kyaara mwiva apaqaa taaqau varihira qio tamwa riaananrove. Mwia votima kyeta nkye hia nivatama kyeta taaqauvi varivera, nkye hiama qio tamwa rievarave.

⁵ Nte uaini apa varuqata nkye kyauqu kyaarama variavo. Ni vatama kyero variraqe nte mwia vatama kyena variariva, mwivama tamwa airi riaananrove. Nkye hia nivata taaqauvi variraitita nkye nkyetaraa varivera, nkye hiama qio mpo kyaiqavata varevarave.

⁶ Kyauqu kyaara qaqlira kyairaro aaharama quarintema kyero hia nivata taaqauvi variani vaisira ni koya qaqlira kyaananrove. Qaqlira kyaani kyaarara mwia nraakiara ntupi kyero varaqiro qiaqi tuto kyairaro itamwa taiqa kyaananrove.

7 Nkye ni vatama kyeta taaqau vita varivaro ni quavanto nkyiqi vahirera, nkye Kotirara nkyeta mwutukya vahiani inraikyarara kyapara hivarero nkyi nyiananrove.

8 Nkye ni qua riemwaqi viqata uaini kyaanta votima kyeta airi tamwa riaivarero ni kora nrutuvanto nronraqa hiarive. Nkye mwitaamaqi viqata nkye quataaqama kyeta ni nraaqiara varivarave.

9 Ni kora mwutukyavanto nianra vahintema kyero ni mutukyavantovata nkyiara vaiho. Ni mutukyavanto nkyiara vahira mwipi variate.

10 Nte ni kora qua riemwaqina vi varuqaro mwia mwutukyavanto nianra vahirave. Mwitaa huntema kyeta nkyevata ni qua riemwaqita vivera, nkye ni mutukyavanto nkyiara vahiraqi varivarave.

11 Ni mutukyayi kyuge hintema kyero nkyi mwutukyayivata kyuge hirata nronraqama kye qamwateqata variate tina, nte mwaa quara nkyi timwa nyuquo.

12 Nte mpo qua qianinra nkye mwi quara riemwaqita quate. Ni mutukyavanto nkyiara vahintema kyeta nkyevata nanrianra nanrianra mwutukyavahirare variate.

13 Vaisivanto nai nramwunaahuara mwutukya vaharo mwihuara rieqaro qutu virave. Mwitaa kyero nai hena huara mwutukya vahiariva mpohuara mwutukya vahi okyarara ekyaa nraatara kyero nritarero vahiananrove.

14 Nkye ni qua riemwaqita vivera, nkye ni nramwunaahuama varivarave.

15 Kyaiqa vaisivanto hia nai nronra vaisivanto mwitaa mwitaa hiani okyarara ntapihirara tina, nte hiama nkyiara ni kyaiqa vaisive timwaqina quaninrave. Nte nkyiara ni nramwunaahuave timwaqina virerave. Nte ni kora qua riaura ekyaa nkyi timwa nyunranra tina, nte mwitaa tirerave.

16 Hia nkye ni naanraanrave. Nte nkyi nyaanraunrave. Nte nkyi nyaanrama kye sita kyena nkyiara uro kyatarivanto tamwa riaintema kyeta kyuge tamwa mpuahaama vahiani tamwanra riemwataate turave. Nkye mwitaa hivera, nkye ni nutuarave, ni kyaiqarave rieqata nanra inraikyarave ni kora kyapara hivarero mwiva nkyi nyiananrove.

17 Nte mwaa quara nkyiara mwitaa hiatema tuqo. Nkye nanrianra nanrianra mwutukya vahirata variqita quate.

Mwatani varihua nkyi nramwutaqa hivarave tura

18 Mwatani varihua nkyi nramwutaqa hivera, nkye ntapihiate, mwihuara ni nraante nramwutaqa taahuara titama, nkyivata nramwutaqa hivarave.

19 Nkye mwata mwainyaahua varivatavauma mwihua nkyiara tiri nramwunaahuave tiqata nkyiara mwutukya vahirata varivarave. Nte mwatani varihuaqitaina nkyi nyaanrama kyauqata nkye hia mwihuaniqama variavo. Nkye hia mihuaniqama variarara titama, mwihua nkyi nramwutaqa hi variavo.

20 Nte vaakya timwa nyunranra riaate. Hia kyaiqa vaisivanto nai nronra vaisi nraatara kyairave. Mwatani varihua ni uaqiplina matehuara tita, mwihua nkyivata uaqiplina nyatevarave. Mwihua ni qua riehuavauma nkyi quavata rievarave.

21 Nkye ni nraaqiara variavatara tita, mwihua mwia kyaara nkyiyata qoraqama nyatevarave. Ni titaira hia ntapihiahuara tita, mwihua mwitaa hivarave.

22 Nte hia tumu mwihua timwa nyutirio, mwihua qora kyaiqa uturara hiama qua vahitirio. Nte tumu mwihua timwa nyunranra tiro,

mwiaqaatairo mwihua qaqao hia mwia riaunanrave ti quava hiama hiananrove.

²³ Vaisivanto ni nramwutaaqa hiqaro ni koravata nramwutaaqa hiananrove.

²⁴ Mpo kyaiqa mpo kyaiqa hia mwihua qio varaa kyaiqara nte mwi kyaiqara mwihua sugaa variqana vare varuvave. Hia nte mwitaam hutirio, hiama mwihuaqaa qua vahitirio. Mwihua ni kyaiqa taqeta ni qaqlira kyeta nivata ni koravata nramwutaaqa hiavo.

²⁵ Mwihua mwitaama variavaro qua mpo haaru qumina vakya qara ntumwa tova mate ntapihi kyero mwivauma viho. Mwi quava mwitaama tiro:

Hia mpo quavata vahirata quminaqama kyeta
mwihua ni nramwutaaqa hivarave, turave.

(Ihi 35:19)

²⁶ Qio nkyi kyaahaga hiariva mpovanto tumuananrove. Mwiva Kotira mwanaraquravanto quttaa qua nraahu ti variva, mwiva Kotiva hinasairo tumuananrove. Nte mwia ntena korqaataina titariro mwiva tumu variqaro nianra ntapihi kyero nkyi timwa nyiananrove.

²⁷ Nkyevata vuni nivatama kyeta variqi quahuara tita, nkye qioma ni kyaiqa okyarara mpo mwatanaa mpo mwatanaahua timwa nyivarave.

16

¹ Nkye nraakiara pupohairata ni qua qaqlira kyeve tina, nte mwi quara mwi quara nkyi timwa nyuquo.

² Nraakiara mwihua nkyi inronra hiqata mwaanra nraamwuqitaita nkyi raquo kyeverave. Mpo enta nrintairata mwihua nkyi ru kyeta tiqata, Tire Kotira kyaiqama vare varuro, tivarave.

³ Mwihua nianravata ni koraravata hia ntapihi kyeta riaahuara tita, mwihua mwitaam hivarave.

⁴ Nte mwaa entara nraakiara nkyi uaqama nyaterara timwa nyuquo. Nraakiara mwihua mwitaam mwitaam hivata nkye mwi entara nte mate mwaa quara turara nraato tuate. Tauraa nte nkyivata variqananra tina, hia nte mwi quara mwi quara nkyi timwa nyunrave.

Kotira mwanaraqura kyaiqara Iesusiva tura

⁵ Qio nte pataqia vari kyena ni titava hinani virerave. Qio nte mwini virerana uti varuqaro hiama nkyiqitairo mpovanto tiqaro, E taini virerarave hiaro? tiho.

⁶ Nte vaakya turara nkye rie variavaro nkyi mwutukyavanto uaquia ihata variavo.

⁷ Qio nte qutaama tuqo. Nte hia quariro nkyi kyaahaga hiariva hia qio tumuananrove. Nte quariva qioma uro mwia titariro nkye hinani tumuananrove.

⁸ Kotira mwanaraquravanto tumu variqaro mwiva mwatani varihua taarampo inraikyara nyaamwutaaan Grove:

- (1) mwihua uaquia hi kyaiqarave
- (2) kyuqe kyaiqa okyararave
- (3) Kotiva ko qiani okyararave

⁹ (1) Mwihua uaquia hi kyaiqara:

Mwatani varihua hia nianra quttaa mwivave tihuara tita, mwihua uaquia hi kyaiqara utira mwiva nyaamwu taananrove.

¹⁰ (2) Kyuqe kyaiqa okyara:

Nte ntena kova hinani quarita nkye hia qaiqaa ni taquerara tiro, mwiva variqaro kyuqe kyaiqa okyara nkyi nyaamwu taananrove.

11 (3) Kotiva ko qiani okyarara:

Mwaa mwataraqaa ntaqikyi variva Saataaniva ko hia nraatara kyairara tiro, mwiva Kotiva ko qiani okyarara mwatani varihua nyaamwu taananrove.

(Kotira mwanraquravanto mwitaama timwa nyiananrove.)

12 Nte mpo qua mpo qua nkyi timwa nyianriva vahata nkye hia ekyaa mwi quarara qioqa hiavanarrä tina, mate nte hia mwi quara nkyi timwa nyinrenrave.

13 Qutaa qua nraahu ti variari mwanraqurava tumu ntero, mwiva variqaro nkyi sita varero nkyi kyuqe aanra nyaamwu tegaro qutaa qua okyara ekyaa mwi okyarara nkyi timwa nyiananrove. Mwiva hia nai vu nraato tuani quarara tiraitiro, mwiva riaani quara nraahuma timwa nyiananrove. Nraakiara mwi inraikyava mwitaama qovara hiani inraikyarara mwiva nkyi timwa nyiananrove.

14 Mwiva nte qua qianinra mwi quara nkyi timwa nyianinranra tiro, ni nutuvanto nronraqa hiananrove.

15 Ekyaa ni kova hi inraikyava nini vahirara tina, nte vaakya tiqana, Kotira mwanraqura mwiva nte hu inraikyarara riero vara kyero nkyi timwa nyiananrove, turave.

16 Qio pataqia nkye varita hia ni taqevarave. Mwiaqaataita pataqia nkye varita qaiqaa ni taqevarave, tiro.

Nkyi mwutukyavanto uaqia hirata variqita vivaro mwiaqaatairo nkyi mwutukyavanto kyuqema vahirata varivarave, tura

17 Iesusiva mwitaa tuvata mwia nraaqiara mponramwuvanto nai timwa mwi nai timwa mwi hita tiqata, Mwiva nanra quave tiho? Mwiva tiqaro, Pataqia nkye varita hia ni taqevarave, timwa kyero qaiqaa tiqaro, Nkye vari kyeta ni qaiqaa taqevarave, tiho. Mwiva mwitaa timwa kyero nai qova hinani quaninranravata tiho.

18 Mwiva nkye pataqia vari kyetave ti quara, hia tire mwi quara ntapihi riauro, tita.

19 Mwitaa ti varuvaro Iesusiva ntapihi kyovata mwihua mwi quarara mwia kyapara hirerata uti varuvaro Iesusiva tiqaro, Nte vaakya turara nkye pataqia varita hia ni taqevarave mwiaqaataita pataqia varita qaiqaa ni taqevarave turave. Nkye mwi quararave nai kyapara hi nai kyapara hi variavo?

20 Qio nte qutaa qianinra riaate. Nkye ntateqata atura ntiqa variqi vivata mwatani varihua qamwateqata varivarave. Nkyi mwutukyavanto uaqia hirata variqita vivaro mwiaqaatairo nkyi mwutukyavanto kyuqema vahirata varivarave.

21 Nraakyevanto nraaqiara mwataariva qaumato vahirora tiro, mwiva atura ntirave. Qio mwi nraakyeva nraaqiara mwata kyero mwiaqaatairo tiqaro, Nte nraaqiara mwata kyauquo, timwa kyero qamwateqaro nai atura ntirara taunru kyairave.

22 Nkyevata mwitaa hivarave. Mwaa entara nkyi mwutukyavanto uaqia hirata varivarave. Qio nraakiara nte nkyi uro taqaariro nkyi mwutukyavanto kyuqe hirata qio varivarave. Varivaro mpovanto hia qio nkyi qoraqama nyatairaro nkyi mwutukyavanto uaqia hiananrove.

23 Mwitaa hirata mwi entara nkye mpo inraikyara ni kyapara hiva hiama vahiananrove. Nte qutaa tuqo. Mwi entara nkye ni korara mpo inraikya mpo inraikyara mwia kyapara hivaro mwiva ni kyaiqarave, ni nutuarave, rieqaroma nkyi nyiananrove.

24 Tauraa nkye variqata hia ni kyaiqarave ni nutuarave rieqata ni kora kyapara hiarave. Mwaa entaraqaataita nkye ni kora kyapara hivaro nkyi mwutukya kyuqe hiarive tiro, nkyi nyiananrove.

Iesusiva mwata mwaqaanaa okyara nraatara kyairave tura

25 Nte mpo quaqaa ntumwa kyeqana mpo qua mpo qua nkyi timwa nyunrave. Qio mpo enta nri ntairaqe nte hia mpo quaqaa ntumwa kyna nkyi timwa nyinraitina, mwi entara nte ntena korara nkyi timwa nyinrenra nte vutu kyenama nkyi timwa nyianinrave.

26 Mwi entava nri ntairata qiomma nkye ni nutu nteqata ni korara kyapara hivaro nkyi nyiananrove. Hia nte nkyiara rieqana ntena kora kyapara hianinrave. (Nkyetavanto qio mwia kyapara hivarave.)

27 Ni kova nkyiara mwutukya ntiharo varirara tita, nkyetavanto qiomma mwia kyapara hivaro nkyi nyiananrove. Nkye nianra tiqata, E Kotiva hinasaira tumuanravave, qiaro nkyi mwutukyavantov nianra vahata variarara tiro, ni kora mwutukyavantov nkyiara vaharo variho.

28 Nte ntena kova hinasaina mwatani tumuvave. Nte qaumama mwaa mwataro mwaini kyena ntena kova hira qoqaraanani quaninrave, tiro.

29 Mwitaa tuvata mwia nraaqiaranramwuvanto qiove tita, Mate e hia mpo quaqaa ntumwa kyera tiraitira, e vutu kyerama tiri timwa timwi variaro.

30 Mate tire ntapihi kyaurara e ekyaa inraikya ntapihi kyaarava variarata tire hiama i qaiqaa kyapara hiananrave. Mate tire tiqata, Qutaama e Kotiva hinasaira tumuanravave turo, tita.

31 Mwitaa tuvaro Iesusiva tiqaro, Qio mateve nkye ni okyarara ntapihi-avo?

32 Mpo enta nrianriva qaumatomava vaho. Mwi entaraqaa nkyi vara aanraupima kyaivata nkye mponamate nkyeta mwaatani vivu kyaavuma vivarave. Ni kova nivatama kyero varirara tina, nte mwi entaraqaa hiama ntenanraa varianinrave.

33 Nkye nivata varivaro nkyi mwutukya qihakyama vahiarive tina, nte mwaa quara nkyi timwa nyuquo. Nkye mwatani varivata mwihua nkyi uaqiamma nyatevarave. Qio kepuqyaqama kyeta variate. Nte mwatanyaaa okyara nraatara kyaurave, tiro. Iesusiva turama.

17

Iesusiva Kotirara aakyara nteqaro tura

1 Iesusiva mwi quara timwa kyero mwiva nyaamwuni taqebaro Kotirara aakyara ntero tiqaro, Ko, mate mwaa ni iherama nri ntaiho. Qio e ni peqa okyara qovarama matairaqe nte i mwaaquvanto variqana nte ina peqa okyara nyaamwutaankye.

2 E nraakye qora ni mpiarahua nte mwihua kyaahaqamaqina quarita mwihua ekyaa enta qati variqita quate tira, e ni nronraqama kyaarana nte ekyaa nraakye qoraqaa ntaqikyi variqana nte mwihua nronravanto varuquo.

3 Nraakye qora ekyaa enta qati variqi vi okyarava mwataamama vahiro: Nraakye qora iara ntapihi kye rieta tiqata, Kotiva nraahuma qutaa mwaniqia kuaiqiavant variqaro Iesusi Karaisira titairave, tihua, mwihua mwi okyara varevara.

4 Nte mwatani variqti vina i peqa okyara nraakye qora nyaamwuteqana e kyaiqa mpiananra vara taiqa kyauquo.

5 Qio ko, haaru hia mwaa mwatavavata vahu entara nte ivata variqi quavaroo ni peqa okyaravanto vahurave. Qio mate e ni peqa okyara mwia nyaamwutairata mwihua taqate.

6 Mwatanyaa vaisinramwu ni mpiarahuwa nte mwihua i okyara nyaamwutaurave. Mwi vaisihua ena hiarahuwa ena mwihua ni mpiarata mwihua variqata i qua riemwaqita quavo.

7-8 E qua ni timwa mpiananra nte mwihua timwa nyuqata mwihua mwi quara varaarave. Mwihua ntapihi kyaavana nte qutaa e hiananrasaina tumuqata mwihua nianra qutaa Kotiva mwia titairave qiarave. Mwitaa tiqatarata tita, mwihua ntapihi kyeta riaavaro e ekyaan inraikya ni mpiarava mwi inraikyava e hiananrasairo tuminrave.

9 Qio nte mwihuara rieqanama iara aakyara nte varuquo. Hiama nte ekyaan nraakye qora mwatani variahura aakyara nte varuquo. E nraakye qora ni mpiarata mwihua ini variarara tinama, nte mwihuara rieqanama iara aakyara nte varuquo.

10 Nte uhua e hiarahuama variavo. E hiarahuwa nte uhuaama variavo. Mwihua variqata ni peqa okyara mpo hiahua nyaamwute variavo.

11 Nte hia mwaa mwataraqaa variarita mwihuama mwaa mwataraqaa varivarave. Nte e hiananrani virerave. Qio ko, e kytatataqama kyera variaravave. E ena kepukya nrutu ni mpiananra mwi kepukyaraqotaira mwihua antuaraqira virata mwihua tiretana kuaaqi varurantema kyeta mwihuavata variate.

12 Nte mwihua kyapata variqana e ena kepukya nrutu ni mpiananra mwi kepukyaraqotaina mwihua antuaraqina vuqata hia mwihuajitairo mpoqivantovata raupirima viho. Vaisi kuaiqiyavanto nraahu raupirima viho. Mwiva raupirima quaninranra haaru qati vakya mpovanto mwianra qara ntumwa tero mwitaa hiananrove turagaara tiro, mwate mwitaama viho.

13 Qio nte ivata varirerana virera uti varuquo. Ni mutukyavanto qamwato kyuqe hintema kyero mwihua mwutukyavantovata qamwatero kyuqe hiariee tina, nte mwata mwaini variqana mwaa quara mwitaa tuquo.

14 Nte i qua mwihua timwa nyuqata mwihua mwatani variahua nrohia aanranra qaqa kyeta mwihua nte hia mwata mwaqaanaavaa varuntema kyeta mwihuavata hiama mwata mwaqaanaahua variavo. Mwitaa ma variavatara tita, mwatani variahua mwihua nramwutaaqa hi variavo.

15 Qio nte hia mwata mwaqaataira mwihua sitaantera i kyapara huquo. Qaqao, nte iara tiqana, E mwihuqaa ntaqikyiqira viraro uaqia hi vaisiva hia mwihua uaqama nyataarive, tuquo.

16 Nte hia mwata mwaqaanaava varuntema kyeta mwihuavata hiama mwata mwaqaanaahua variavo.

17 E qutaa quagotaira mwihua kyaahaqa hirata mwihua i aanraqaa nraahu nrohiate. I qua qutaa quama vaiho.

18 E ni mwata mwaini titaaranra tumuntema kyena, ntevata mwihua mpo mwata mpo mwatani sitarerave.

19 Qio nte mwihuara rieqana kuaa kyaiqa nraahu vararerana varuvave. (Nte mwihuara rieqana qutu quataa hirage qutu virerana varuquo.) Nte mwitaa hiarita mwihua qutaaqama i nraaqiara variqata i aanraqaa nraahu vivarave.

20 Hia nte mwihuara nraahu rieqana iara aakyara ntauquo. Nraakiara mpo ihua mwihua qua rieqatama nianra qutaa mwivave thua, nte mwihuavata rieqanama iara aakyara ntauquo.

21 Mwihua kuaaqi variate tina, nte iara aakyara ntauquo. E niqi variarana nte iqi varuquo. Ko, mwihua tiritana votima kyeta variate tira, e mwihua

kyaahaqa hirata mwihuavata tiritanaqi variate. Mwatani varihua nianra qutaa Kotiva mwia titavave qiate tira, e ni nraaqiaranramwu kyaahaqa hirata mwihuua kuaaqi variate.

22 E ni nutu nronraqama kyaarana nte kuaaqarama kyena mwihuua nutu nronraqama kyaquo. Mwihua tiretana kuaaqi varurantema kye mwihuavata kuaaqi variate tina, nte mwihuua nyutu nronraqama kyaquo.

23 E niqi variraqe nte mwihuuaqi variarita mwihuua kuaaqi variqatama mpoqiaavata kyaakueqa hivarave. Mwihua mwitaama varivata gati nraakyae qora mwatani varihua e ni titaananranra ntapihita i mwutukyavanto nianra vahintema kyero i mwutukyavanto ni nraaqiaranramwuan-ravata vahianinravata taqevarave.

24 Ko, haaru hia mwaa mwatava vahu entara e nianra mwutukya vahuvarara tira, e ni nronraqama kyoraro e ni nronraqama kyoraro ni okyara kepukya okyaravanto vahuvana variavarave. E nraakyae qora ni mpiarahuua mwihuavata ni peqa okyara taqaate tina, nte tiqana, Nte varianinrani mwihuavata varivarave, tuquo.

25 Ko, e avuqavuma kyera variaravave. Qati nraakyae qora mwatani variahua hia i ntapihi kyaavana nte nraahu i ntapihi kyaaurave. E ni titaananra mwaa nraaqiaranramwuhua nraahu mwia ntapihi kyaarave.

26 Nte iara mwihuua timwa nyuqata mwihuua i ntapihi kyaarave. I mwutukyavanto nianra vahintema kyeta mwihuavata mpoohuara mwutukya vahirata varivaqe nte mwihuavata kuaaqi variqina quankye tina, nte mwihuua iara mpoqiaavata timwa nyiqi quarita mwihuua ntapihi rievarave, tiro. Iesusiva nai qorara aakyara nteqaro mwitaa tura.

18

Iesusira ntavaaqavu kyora

(Matiu 26:47-56; Maaki 14:43-50; Ruku 22:47-53)

1 Iesusiva mwitaama kyero Kotirara aakyara timwa taiqa kyero mwiva nai nraaqiaranramwu vatama kyero vuva uro Kitaroni pata nramanriqiaru qareror oripi kyatari kyaqamwa tutoraqi vura.

2 Iesusiva airi enta nai nraaqiaranramwu kyapata mwipi uro varurara tiro, Iutaasiva Iesusira nramwutahua kyaquoquqi kyaariva mwia ntapihi kyora.

3 Iutaasiva ntapihi kyero uro Kotira kyaiqa vara mwate varu vaisihua mwihuua nronra vaisinramwuvata, Parisi vaisinramwuvata, timwa nyuvata mwihuua kamaninra porisinramwu Iutaasira mwita kyaiqa vaisinramwuvata mwia mwuvaro Iutaasiva mwihuua sita varero vura. Mwihua omwata ramuvata qupi kye vareta ntaqi inraikyaravata vareta vuhua uro Iesusiva humani uro ntora.

4 Mwini uro ntovaro Iesusiva vaakya mwihuua uti inraikyara ntapihi kyero mwiva vutu ntero mwihuua kyapara hiro tiqaro, Nkye tararave puua hi variavo? tiro.

5 Mwitaa tuvata mwihuua tiqata, Tire Iesusira Nasaretinyaanranra puua hi varuro, tuvaro Iesusiva mwihuua timwa nyinro tiqaro, Nte mwaa mwivama varuquo, tiro. Mwitaa tuvaro Iutaasiva Iesusira nramwutaa kyaquoquqi kyaari vaisiva, mwiva Iesusira rukyehua kyapata siviro varura.

6 Iesusiva nte mwaa mwivave tuvata mwihuua nrihanrama vita uro ntanteta aatuma kyeta mwatasata tuto ntita varura.

7 Mwitaa huvaro Iesusiva qaiqaa mwihuua kyapara hiro tiqaro, Nkye tararave puua hi variavo? tuvata mwihuua qaiqaa tiqata, Iesusira Nasaretinyaanranrave, tuvaro

⁸ Iesusiva tiqaro, Nte vaakya nkyi timwa nyunrave. Nte mwaa mwivama varuqo. Nkye nianra puua hirerata nrivera, mwaa vaisinramwuhua qati kyaivata quate, tiro.

⁹ Vuni Iesusiva nai qorara mwitaama tiro: Vaisi mponramwu ni mpiarahuia hia nte mpoku raupirima kyaupo, tura. Mwi quava qutaa mwivau vahiarive tiro, Iesusiva tiqaro, Mwi vaisinramwuhua qati kyaivata quate, tiro.

¹⁰ Mwitaa tuvaro Pitaava nai paipanta varero nrunra veva ntanrau kyero mwiaqotairo Kotira kyaiqa vara mwate varu vaisihua mwihua vunyaa vaisi, mwia kyaiqa vaisi nraato kyaatutani vahura teqa kyora. Kyaiqa vaisi mwia nrutu Marakusira.

¹¹ Pitaava mwia nraato teqa kyovaro Iesusiva Pitaarara tiqaro, Ena paipa vara veva nai tuaqi hu taante. Ni kova nramanri ni mpianinra hia nivant nraanrive tirave mwitaa hiaro? tiro. (Iesusiva nramanriqaa ntumwa kyero nai ntuquтиваро nriqa quani inraikyara varero uro qutu quaninranra tura.)

Iesusira vitaqita uro Anaasiva hunani kyora

¹² Iesusiva mwitaa tuvata Romeninyaahua ntaqu vaisihua nkyiari qita vaisi vatama kyeta nruvata Iutaa porisinramwuvantovata nri nteta Iesusira ntavaaqavu kyeta mwia rupa kyeta

¹³ mwia vitaqita Anaasiva hunani nraante kyora. Anaasiva mwiva Kaiapaasira nrinraamwiva varuvaro Kaiapaasiva nronraqama vuva mwi ihiragi Kotira nraamwuqi Kotira kyaiqa vara mwate varu vaisihuaqaa ntaqikyiqaro qita vaisivanto varura.

¹⁴ Tauraa Kaiapaasiva nai Iutaa kaanasori vaisi timwa nyinro tiqaro, Tiri kyaahaqa hirero vaisi kuaikuvanto qutu viraro kyuqe hiananrove, tu vaisiva varurama.

Pitaava Iesusirara hia nte mwia taqaurave tura

(Matiu 26:69-70; Maaki 14:66-68; Ruku 22:55-57)

¹⁵ Iesusira Anaasiva hunani vitaqita uro kyovata Saimoni Pitaavavata Iesusira nraaqiara mpovantovata Iesusira vataqita vura. Anaasiva Pitaara vatama kyero nru vaisira ntapihi kyovara tiro, mwiva Iesusira vataqiro viqaro Anaasira mwaata mwatukya utaqi vijetora.

¹⁶ Pitaava mwaaqani varuvaro Iesusira nraaqiara Anaasiva ntapihi kyo vaisiva mwatukya utaqi vuva uro ntantero nrumu quesana ntaqikyi varu nraakyera timwa mwitero uro Pitaara vitaqiro nrumu utaqi vera kyora.

¹⁷ Utaqi kyovaro Pitaava varuvaro nraakye qesaqaa ntaqikyi varuva mwiva tiqaro, Evata mwi vaisira nraaqiarave variaro? tuvaro Pitaava qaao, Nte hiave, tiro.

¹⁸ Timwa kyero varuvata porisinramwuvantovata Anaasira kyaiqa vais-inramwuvantovata varuvaro antovata mwihua qia quarateta qia taare varuvaro Pitaavavata mwini uro variqaro qia taare varura.

Anaasiva Iesusira kyaparama mwatora

(Matiu 26:59-66; Maaki 14:55-64; Ruku 22:66-71)

¹⁹ Mwiaqaatai Iesusira vitaqita mpoqi uro kyovaro Kotira kyaiqa vara mwate varu vaisihua mwihua vunyaa vaisivanto Iesusira nai nraaqiarara kyapara hiro Iesusiva nraakye qora timwa nyu quararavata kyapara huvaro

²⁰ Iesusiva nai timwa mwinro tiqaro, Nte qoqaa variqana nraakye qora qua timwa nyunrave. Nte ekyaa enta nraakye qora timwa nyinrenrana Iutaavanto ntuvantua vita variaraqive, mwaanra nraamwuqive, Kotira nraamwu nronraqive, variqana nte mwihua qua timwa nyunrave. Hia nte uqeta kyena variqana mwihua qua timwa nyunrave.

21 Qio nanraqamave e ni kyapara hi variaro? E ni qua riaahua kyapara hiataarave. Nte qua timwa nyuhua kyapara hiante. Mwihua nte tu quara riaahuave, tiro.

22 Iesusiva mwitaa tuvaro porisi vaisi mpovanto mwiqi varuva Jesusira nraatokyai ntuteqa kyero tiqaro, E hia mwitaama kyera tiri nronra vaisiara qua qianta, tiro.

23 Mwitaa tuvaro Jesusiva mwia timwa mwinro tiqaro, Ni quavanto api qua vahiraravauma e ekyaa nraakye qora mwianra timwa nyinrata rievarave. Ni quavanto qio vahara e nanraqamave ni qumina ntutuqira hiaro? tiro.

24 Iesusiva mwitaa timwa kyero mwia kyaantaqtaita rupatova varuvaro Anaasiva mwia titovaro Kotira nraamwuqaa ntaqikyi varu vaisira Kaiapaa-siva hunani viro.

Pitaava qaiqaa hia Jesusira taqaurave tura

(Matiu 26:71-75; Maaki 14:69-72; Ruku 22:58-62)

25 Iesusiva mwini vuvaro Pitaava mpoqi variqaro qia taare varuvata mwini varuhua mwia kyapara hita tiqata, Evata mwia nraaqiarave variaro? tuvaro Pitaava qaqqao, Nte hiave, tiro.

26 Mwitaa tuvaro vaisi mpo qiaqta vaisi kyaiqa vaisivanto Pitaava mwia nraato teqa kyora mwia henä vaisivanto Pitaarara tiqaro, Qutaa eve nte taqauqara mwikyantiri kyatari kyaqamwaqi variaro? tiro.

27 Tuvaro Pitaava qaiqaa qaqqao nraahu tiro. Mwitaa timwa kyero riovoro qamwanrama kyero kokoraaravanto nruqua tura.

Iesusira Paireativa hunani vitaqita uro kyora

(Matiu 27:1-2, 11-14; Maaki 15:1-5; Ruku 23:1-5)

28 Mwihua Kaiapaasira mwini kyeta Jesusira vita vare uro nronra vaisi kamaninra nraamwuqi kyora. Mwihua vaakya toqaqi mwini uro nteta mwihua Iutaavantora tita, hia mwia nraamwuqi vera ntaraitan, mwaatani varura. Mwihua nkyiari tiqata, Tire mwia mpo mwatanaanra nraamwu hia kytotataqi vera nteta uaqiamma vita mwia kyara tire hiama vekeyahu nyato entaraqaa omwata qio nraananrave, tita.

29 Mwitaa timwa kyeta mwihua mwaatani varuvaro Paireativa kamaninra qiaqta vaisivanto mwihua taqarerero veva ntero mwihuara tiqaro, Nanra qua mwaa vaisiraqaa vaihatave qiao? tiro.

30 Paireativa mwitaa tuvata mwihua tiqata, Mwi vaisiva hia uaqia hi kyaiqara utitirio, tire hiama qio e hiananranri mwia vite nruratirio, tita.

31 Mwihua mwitaa tuvaro Paireativa qaqqao tiro, Nkyeta mwaa mwi vaisira viteta nkyeta Iutaa ko quaqqaa rieqatama mwia ko qiate, tiro. Paireativa mwitaa tuvata Iutaa mwihua tiqata, Qaqao, tire qumina vaisi variqata vaisi ru kyaananranra qua varaarorave. (Ena kamaniva variqara qiomia tirata mwia ru kyevarave), tita.

32 Mwihua mwitaa tuvaro Jesusiva mwihua mwitaama kyeta ni ru kyevarave tu quava qutaa mwivau vahura.

33 Iutaa vaisi nronranramwuvanto mwitaa tuvaro Paireativa nai nraamwu kamaninra nraamwuqi vera ntero Jesusira nraanrama kyovaro mwiqi vuvaro mwia kyapara hiro tiqaro, Qutaa e Iutaqqaa ntaqikyi variaravave? tiro.

34 Tuvaro Jesusiva tiqaro, Ena nraato tukyerave mwi quara qiaro? Vaisi mpovanto nianra i timwa mwihanrave e mwitaa qiaro? tiro.

35 Iesusiva mwitaa tuvaro Paireativa tiqaro, Nte Iutaa vaisive huqo? Nte hia Iutaa vaisive. Ina nramwunaa Iutaavantovata, Kotira kyaiqa vara

mwate varia vaisihua mwihua nronra vaisinramwuvata, mwihiama i viteta mwaini nriavo. E nataama kyaaratave i viteta nriavo? tiro.

36 Mwitaa tuvaro Iesusiva tiqaro, Nte ntaqikyiariva hiama mwaa mwataraqaa vaiho. Mwiva mwaa mwataraqaa vahitirio, Iutaavanto ni rupevo tifa ni kyaara ni pataqi nrihua mwihuavata ntaquatirio. Qio nte ntaqikyiariva hiama mwatani vaiho, tiro.

37 Iesusiva mwitaa tuvaro Paireativa tiqaro, Qio qutaa e nraakye qoraqaa ntaqikyi variaravave? tiro. Tuvaro Iesusiva tiqaro, Qutaa nte nraakye qoraqaa ntaqikyi varuvave. Mwianra rieqaro ni mwatani mwatataihana nruvave. Qutaa qua okyara nraakye qora timwa nyinrenrana nte mwatani tumuvave. Qutaa quara riaariva ni quama riaananrove, tiro.

38 Iesusiva mwitaa tuvaro Paireativa tiqaro, Qutaa qua vahirero mwia nanra quave iho? tiro.

*Paireativa Iesusira kyatariqaa rutaate tura
(Matiu 27:15-31; Maaki 15:6-20; Ruku 23:13-25)*

Paireativa mwitaa timwa kyero veva ntero Iutaa ntuvantuama vita varuhua timwa nyinro tiqaro, Nte taquaqaro hia mwia rukyaarava mpo okyara mwiaqi vaiho, tiro.

39 Mwitaa timwa kyero mwiva tiqaro, Qio nkye mpo inraikya utuava mwitaamama vaiho. Nkye vekyahu nyato kyarara omwata nraa entaraqaa nte karavu vaisi kuaiku nkyiara rieqanama mwia huvantu nyataurave. Qiove nte mwianra rieqana nkyi Iutaaqaa ntaqikyi vari vaisira huvantu nyataaninrave? tiro.

40 Mwitaa tuvata mwihua aakyara ntamwakte nai timwa mwita tiqata, Qaqao, hia mwi vaisira huvantu kyaante. Vaisi mpo mwia nrutu Varavaasira mwia huvantu timwataante, tura. Qio Varavaasiva vaisi ru kyeqaro mwihua munima vare varu vaisiva varura.

19

1 Mwihua mwitaa tuvaro qaiqaa Paireativa tiqaro, Iesusira viteta uro kyaantaqo mwia ntuteqaate, tuvata mwia kyaantaqo ntuteqaateqama kye vatora.

2 Mwitaama kye vateta Paireatira ntaqu vaisihua uro tauvera vara kyeta qiata vaisi tovaqa voti hora ququrama kyeta mwia qiataqaa qu mwateta nraanre tavuna vara utu mwateta,

3 mwihua mwiva varunani uro nteta mwihua vireraqama kye Iesusirara tiqata, Iutaa vunyaa vaisi mwaavao, variqarave? timwa kyeta kyauquqo mwia viri ntuteqa kyora.

4 Mwihua mwia mwitaama kyovaro Paireativa qaiqaa veva ntero Iutaa ntuvantuama vita varuhuara tiqaro, Qio taqaate. Nte taquaqaro hia mwiva uaquia hi kyaiqara utihana nte mwiaqi qua vataariva hiama vahirove. Nkyevata mwia taqe ntapihi kyaate tina, nte mwia vara veva kyarerave, tiro.

5 Mwitaa tuvaro Iesusiva qiataqaa tauvera qu mwateta nraanre tavuna utu mwatora rirante veva ntovaro Paireativa tiqaro, Qio taqaate, mwaa mwii vaisivave, tiro.

6 Mwitaa tuvata Kotira nraamwuqi Kotira kyaiqa vara mwate varu vaisihua mwihua nronra vaisinramwuvata, porisinramwuvata, Iesusira taqeta mwihua aakyara nteta tiqata, Kyatariqaa mwia hiritaate. Kyatariqaa mwia hiritaate, tita.

Mwitaa tuvaro Paireativa tiqaro, Nkyeta mwia vitaqita uro kyatariqaa hiritaate. Nte taquaqaro hia mwiva uaquia hi kyaiqara utihana nte mwiaqi qua vataariva hiama vahirove.

⁷ Tuvata mwihua tiqata, Qaqao, mwiva tire qao timwa tauna quara mpo nteqa kyairave. Mwia kyaara mwiva qutu quarivama variho. Mwiva tiqaro, Nte Kotira mwwaaqvantove tirave, tita.

⁸ Mwitaa tuvaro Paireativa mwi quara riero mpoqiyavata aatu hiro

⁹ mwiva tumu ntantero nai nraamwuqi vera ntero Jesusira kyapara hiro tiqaro, E tainyaavave? tiro. Tuvaro Jesusiva hia qua tiraitiro, tirema varura.

¹⁰ Tirema varuvaro Paireativa tiqaro, E nive hia qua timwa mpirera utuaro? E riaante. Nte nronravanto nte qioma i huvantu kyena, nte qioma qiarita i kyatariqaa hiritevarave, tiro.

¹¹ Mwitaa tuvaro Jesusiva Paireativa timwa mwinro tiqaro, Kotiva nyaamwuni variva hia i kyaakue mwitirio, hiama qio e ni naatara kyaaratinio. Vaisi mpovanto ni pitaqiro nrumu i mwi vaisira kyaigavanto i uaqia hi kyaiqaravata nraatara kyaiho. Mwia kyaara mwi vaisiraqaa nronra quama vahiananrove, tiro.

¹² Jesusiva mwitaa tuvaro Paireativa mwiaqatairo Jesusira huvantu kyareru uti varuvata Iutaa vaisinramwu ntuvantuama vita varuhua aak-yara nteta tiqata, E mwia huvantu kyairaro qati virera, e hiama qiatu vaisi Sisaara toti varinanrave. Mpovanto nanrianra tiqaro nte qiatu vaisima varuqo qiariva, mwiva Sisaara nramwutaama variananrove, tita.

¹³ Tuvaro Paireativa mwi quara riero uro Jesusira vitaqiro veva ntero ko riaa vaisihua taintaqa uro mwatakyaa viro. Mwi taintava vahu mwatara nrutu ntegata, *Ori Ntamwatairave*, tura. Iutaa mwatanaahua quaqitai mwianra *Kapatave*, tura.

¹⁴ Vekyahu nyato kyarara nro entava mwia qanranraa vahuvaro huari vu nnirro virini qiatuqa vahuvaro Paireativa uro mwi taintaraqa mwatakyaa viro Iutaa ntuvantuama vita varuhua timwa nyinro tiqaro, Qio nkye nkyeta qiatu vaisi mwaa taqaate, tiro.

¹⁵ Tuvata mwihua aakyara nteta tiqata, Mwia ru kyaante. Mwia ru kyaante. Mwia kyatariqaa hiritaivar qutu quarive, tita.

Mwitaa tuvaro Paireativa mwihua kyapara hiro tiqaro, Nte qiarita nkyi qiatu vaisi kyatariqa ninriko ru terara nkyi mwutukya vahirove iho? Mwitaa tuvata Kotira kyaiqa vara mwate varu vaisihua mwihua nronra vaisinramwu tiqata, (Mwiva hia tiri qiatu vaisive.) I nronravanto Sisaava mwiva nraahuma tiri qiatu vaisive, tita.

¹⁶ Mwitaa tuvaro Paireativa Jesusira kyatariqa hiritaate tiro, mwihua kyauquqi kyora.

Jesusira ninriqotaita kyatariqaa rutora

(*Matiu 27:32-44; Maaki 15:21-32; Ruku 23:26-43*)

Paireativa Jesusira mwihua nyuvata mwihua mwia viteta vuvaro

¹⁷ Jesusiva nai hirite kyatarira vara qu varero vuvata mwihua Jesusira vita vareta mwaa quaraqitai *Qiata Mwukyaari* satave tunani vita. Iutaa mwatanaahua quaqitai *Korokotaave* tunani uro ntora.

¹⁸ Uro nteta Jesusira kyuqu kyauqu kyatariqaa ninriqotaita rukyeta vara mwaamwi mwataqiqi ratora. Mwia rateta vaisi mpotanavata kyatariqaa ru kyeta hini hini ratovaro Jesusiva mwitanahua utaqaa varura.

¹⁹ Jesusira kyatariqaa hiritovaro Paireativa qua qara ntumwa tora uro Jesusira qiatani kyatariqaa rutora. Mwataama kyero qara ntumwa tero:

IESUSIVA NASARETINYAAVA IUTAA VUNYAA VAISIVE, tura.

²⁰ Jesusira kyatariqaa hiritova Ierusalem nraaqani vahuvatara tita, mwi mwatanaahua airivanto nrumu Jesusira taqeta mwi quara kyaara ntumwa

kyeta taqora. Mwi quara taara mpo quaqitairo qara ntumwa tora. Iutaa quaqitaivata, Romeni quaqitaivata, Kiriki quaqitaivata, qara ntumwa tora.

21 Kotira nraamwuqa ntaqikyu vaisihua mwi quara taqeta Paireaatirara qaqao tita, E hia mwianra Iutaa qjata vaisive timwa kyera qara ntuataarave. E mwataama kyera qara ntuataarave. Mwi vaisiva nai tiqaro nte Iutaa qjata vaisive tirave. Mwitaa timwa kyera qara ntuante, tita.

22 Tuvaro Paireativa qaqao tiro, Nte qara ntumwa tauva qio mwitaama vahiarive, tura.

Iesusira tuavaaqa ntainra kyeta varora

23 Ntaqu vaisinramwuhua Iesusira kyatariqaa hiriteta mwiaqaataita mwia tuavaaqa vara kyeta erahiamuaantema ntainra kyeta ntaqu vaisihua nkyiari erahiamuaantema variqara tita, mpovanto mpoqaatairo varovaro mpovanto mpoqaatairo varero mwitama kyeta vareta mwia siotivata vara kyeta taqvaro mpuahaanta virisairo mpiani tumitarova vahuvata ntaqu vaisinramwuhua tiqata, Hia mwaa nrähiftuare.

24 Nrivaqe mwianra kaati voti hira santu ruararo tiriqitairo mpovanto mwia varaarive, tita. Mwitaa turara tiro, mpo quavanfo haaru qumina vakya qara ntumwa tova qutaa mwivau vahura. Mwataama tiro:
Ni tuavaaqa ntainra kyeta varevarave.

Ni sioti mpuahaanta vararerata kaati ruantema kyetama varevarave, tiro. Mwitaa tura.

(*Ihi 22:18*)

Ntaqu vaisinramwuhua mwitaama kyeta Iesusira tuavaaqa ntainra kyeta varora.

Iesusiva nai nronranra tura

25 Iesusira kyatariqaa hiritovata nraakyenramwuvanto nrumu mwi kyatarira tataaqa sivita varura. Iesusira nrovavata, mwia nronra nruravantovata, Kiropasira nraata Mariaavavata, Mariaava Makataranyaavavata, mwinramwuhua Iesusira hirito kyatarira tataaqa sivita varuvaro

26 Iesusiva taqovata mwia nrovavata mwia vataqiro nrohu vaisiva mpo Iesusiva mwianra mwutukya ntu vaisivavata varura. Mwitanahua varuvaro Iesusiva nai nronranra tiqaro,

27 Mwaa nraakyevao, e mwi vaisirara ni maaque qianta, tiro. Timwa kyero nai vataqiro nrohu vaisira Iesusiva mwianra mpoqama kyero mwutukya ntu vaisirara tiqaro, Mwaa nraakyerara ni ntorave qianta, tiro. Mwitaa tuvaro mwi entaraqaatairo mwia vataqiro nrohu vaisiva Iesusira nronra vitaqiro nai nraamwuqi kyero kyuqema kyero mwiaqaa ntaqikyiqiro vura.

Iesusiva qutu vura

(*Matiu 27:45-56; Maaki 15:33-41; Ruku 23:44-49*)

28 Iesusiva mwi quara timwa kyero mwiva ntapihi kyovaro qio mwia kyaiqvavanto taiqa vura. Mwiaqaatairo mpo qua haaru qumina vakya mpukuqi qara ntumwa tova qutaa mwivau vahiarive tiro, mwiva tiqaro, Ni nramanri nraataa iho, tiro.

29 Mwitaa tuvaro uaini ukavura tanuqi vahuvaro tavuna viti vara kyero nramanriqi ntamwa kyero kyaamwu viñqaa rupa kyero viri Iesusira nroqi ntawma tovaro

30 Iesusiva ukavu nramanrinra mwia nrenro mwiaqaatairo mwiva tiqaro, Qio taiqama viho, timwa kyero nru kinta tero nai mwanraqura titovaro vuvaro mwiva qutu viro.

Vaataaraqotairo Iesusira nraanterata sata ra varora

³¹ Mwiva qutu vuvaro mwia qanranraa mwaanra enta vekyahu nyato kyarara nro entava nronra enta vahianinranra tita, Iutaavanto tiqata, Hura vaisinramwu qutu quahua mwihua mwamwanta kyatariqaa vahianky-orave timwa kyeta, uro Paireatirara tiqata, E tirata mwinramwuhua kyuqu ntuvuraa kyaivata mwinramwuhua qamwanrama qutu vivata varaqita uro quintaate, tita.

³² Tuvaro Paireativa eo tuvata mwia ntaqu vaisinramwuhua nrumu Iesusira tataaqa hirito vaisira kyuqu ntuvuraa kyeta uro vaisi mpo hini hiritora kyuqu ntuvuraa kyeta

³³ uro Iesusira kyuquvata ntuvuraa kyaare tita, taqovaro mwiva vaakya qutu vuvata mwihua qaqlira kyeta hia mwia kyuqu ntuvuraaqua.

³⁴ Ntaqu vaisiva mpovanto uro vaataaraqotairo Iesusira nraantera sata ra varerò. Ra kyovaro qamwanrama kyero nraanrevata qati nramanrivata tumunra.

³⁵ Qio nte mwaa quara qara ntumwa tauva mwi entara variqana nte mwi inraikyara mwi inraikyara taqaavarave. Qutaaqama kyena nte mwi inraikyara mwi inraikyara taqaavarave. Nkye mwi quarara qutaave qiate tina, nte mwi inraikyara qutaaqama kyena taqaurara nkyivata timwa nyuquo.

³⁶ Ntaqu vaisiva mwitaa hurara tiro, haaru qati vakya qara ntumwa to quava qutaa mwivau vhura. Qara ntumwa tova mwataama tiro:
Mwihua hia mwia mwukyaari mpo ntuvuraa kyevarave,
tura.

(Ihi 34:20)

³⁷ Qaiqaa mpo quavata haaru qara ntumwa tova tiqaro:
Mwihua nkyiari vaataaraqotaita rute vaisira taqevarave,
tura.

(Sekaraiaa 12:10)

Iesusira quntamwa tora

(Matiu 27:57-61; Maaki 15:42-47; Ruku 23:50-56)

³⁸ Mwitaa huvaro vaisi mpovanto mwia nrutu Iosepiva mwiva Aritatiyanavaa mwiva tauraqama Iutaa vaisinramwu nyaatu aatu hijaro tuqeta kyeqaro Iesusira vataqiro nrohu vaisiva, mwiva uro ntero Paireatirara tiqaro, Iesusira mwamwanta mpiraqena varaqina quantaankye, tiro. Tuvaro Paireativa tiqaro, Qio uro vara kyera quantaante, tuvaro Iosepiva uro Iesusira mwamwanta itu kyero varora.

³⁹ Varovaro Nikotimaasiva, mwiva haaru entaqi Iesusira uro taqova, mwivavata kyuqe ueri kyuqe hu kyatariva mwunta vura kuaaqi tuqasaakye vatoravata varero. Mwia muaanravanto vahirero 30 kiro vhura varero Iosepikyantiri viro.

⁴⁰ Mwitanahua Iesusira mwamwanta vareta egarori tavuna vara kyeta kyuqe mwunta vura vatama kyeta mwia mwamwanta qapuqama kyora. Iutaa mwatanaahua vaisi quanto okyarava mwitaama vhurara tita, mwitanahua mwitaa hura.

⁴¹ Iesusira hiritonani kyaqamwa tutova vahuvare mwiqi qaraakya ori varuru tora vaisi quente varuva mpo vhura. Mwia qaraakya vahuvare tauraa hia vaisi mpo mwiqi quntora.

⁴² Qio mwia qanranraa Iutaa mwatanaahua mwaanra enta vahiananrove timwa kyeta, mwi oriva qaumato vahuvata mwiqi mwitanahua Iesusira uro quntamwa tora.

¹ Qio Saanteqa toqa entaqi qakyo qaataharera huvaro Mariaava Makataranyaava Iesusira oriqi quntamwa toraqi uro ntero taqovaro ori-vanto qesa titatova qatinani vara kyovaro vahiro.

² Ori qatinani vara kyova vahuvoro mwi nraakyeva uro ntante hiantero Iesusira nraaqiaratana Saimoni Pitaavavata, mpo vaisi Iesusiva mwianra mpogama kyero mwutukya ntu vaisivavata, varunani nri ntero mwitanhua timwa nyinro tiqaro, Mwihua oriqitaita Iesusira vara kyaavata tirenramwu hia mwia varaqita vataara taqauro, tiro.

³ Mwitaa tuvata Pitaavavata, vaisi mpo mwivavata, Iesusira oriqi vatora mwianra vita.

⁴ Mwitanhua hianteta vuvaro mpovanto Pitaara nraatara kyero mwiva nraante oriqi Iesusira quntamwa tonani uro ntero.

⁵ Mwiva nraante uro ntero hiama mwipi vietetaraitiro, qatinani variqaro kakataama viro vera taqovaro oriqi tavuna nraahu vahura.

⁶ Tavuna nraahu mwipi vahuvoro taqero varuvaro nraakiara Saimoni Pitaava nri ntero mwiva hia qatinani variraitiro, mwiva qamwanrama oriqi vera ntero taqovaro tavuna nraahu vahuvoro

⁷ mpo tavunavata, Iesusira qiata nraamwuma tova mwivavata, qumina vahiro. Iesusira ququfama to tavunava, mwi tavunava hia mpo tavunavata kuaaqaa vahiraiiro, nanrianra mposata vahura.

⁸ Mwitaama vahuvoro vaisi mpo vaakya nruva, mwivavata mwipi verantero mwi inraikyara taqamwa kyero mwiaqatairo mwia vu nraato ntapihi vuvaro Iesusira okyarara ntapihi kyero qio qutaa mwivave tiro.

⁹ Tauraa mwitanhua variqata mpukuqi Iesusiva qutu viro qaiqaa qati siquarinranra qara ntumwato quara hia ntapihi riora. Hia ntapihiraitita, variqi vita qio mwi entara mwitanhua mwi quara ntapihi kyora.

¹⁰ Mwi inraikyara taqeta mwitanhua nrumu ntanteta mwaatani vura.

Mariaava Makataranyaava Iesusira taqora

(Maaki 16:9-11)

¹¹ Mwitanhua mwaatani vuvaro Mariaava Iesusira quntamwa tonani nri ntero qatinani variqaro ntate variro. Mwiva ntate variqaro kakataama kyero oriqi vera taqovata

¹² nyaamwunyaahua taaratana mwipi varura. Mwitanhua egarori tu-avaqa ututona mpovanto tauraa Iesusira mwamwantavanto vahura qiatani mwatakyaa viro varuvaro mpovanto mwia kyuqutarani mwatakyaa viro varura.

¹³ Mwitanhua Mariaara kyapara hita tiqata, Mwaa nraakyevao, nanra inraikyarave e ntate variaro? tuvaro mwiva tiqaro, Mpohua ni nronra vaisi mwaaqitaita vara kyaavana nte mwihua uro mwia kyaanani hia taqaraitinama, mwianra ntate varuquo, tiro.

¹⁴ Mariaava mwitaa timwa kyero mwiva tuqasaa viro taqovaro Iesusiva mwia mwoqani siviro varuvaro mwiva hia mwia viri ntapihi taqaraitiro, mpo vaisivantove tiqaro varuvaro

¹⁵ Iesusiva mwia kyapara hiro tiqaro, Mwaa nraakyevao, nanraqamave e ntate variaro? E tararave puua hi variaro? tiro. Iesusiva mwitaa tuvaro Mariaava nai riero tiqaro, Mwi vaisiva kyaqamwa mwaaqi ntaqikyi vari vaisivave, tiro. Timwa kyero mwianra tiqaro, E mwia vitaqira uro kyerava varirera, mwipi vatauquo tiraqe nte uro varaaankye, tiro.

¹⁶ Mwitaa tuvaro Iesusiva mwianra tiqaro, Mariaao, tiro. Tuvaro Mariaava tuqasaa viro Iesusira ntapihi taqero Iesusirara nai Iutaa quaqitairo tiqaro, Raponao, tiro. Mwaa quaraqitai tirera, Mwaanra ti variara vaisio, tiro.

¹⁷ Mariaava mwitaa tuvaro Jesusiva tiqaro, Qio hia niqaa tu varaante. Nte hia ntena kova hinani tumu ntantena vuqo, tiro. Mwitaa timwa kyero mwiva mwia timwa mwinro tiqaro, E ni katamwanra uro timwa nyiant. Nianra mwitaa mwitaama kyera timwa nyiant. Nte virini ni kovavata nkyi sovavata hinanive, ni mwanriqvantovata nkyi mwanriqvantovata hinani tumu ntantena virerave, tiho qiant, tiro.

¹⁸ Mwitaa tuvaro Mariaava Makataranyaava nrumu ntantero uro Iesusira nraaqiaranramwu timwa nyinro tiqaro, Nte tiri nronra vaisi mwia taqauqo. Mwiva nianra mwitaa mwitaama kyera nkyi timwa nyiantihi, tiro.

Iesusiva nai nraaqiaranramwu suqaa qovarama vura

(Matiu 28:16-20; Maaki 16:14-18; Ruku 24:36-49)

¹⁹ Mwi Saanteraqaa enta huvata Iesusira nraaqiaranramwuvanto Iutaa nronra vaisinramwu nyaatu atatu hiqata nraamwu mpoqi qesanramwu vhaura ruteta varura. Mwihua mwipi varuvaro mate mwipivara Jesusiva mwihua utaqaa qovarama viro sivi variro mwihua qua mwantero tiqaro, Nkyi mwutukya qihakya hirata variate, tiro.

²⁰ Mwitaa timwa kyero mwiva nai kyauqu ninriqotaita ru ratonta kyora mwihua nyaamwutero nai nraanterasataa ratoravata nyaamwutora. Nyaamwutovata mwia nraaqiaranramwu mwia taqovaro mwihua kyuqe huvata mwihua mwianra qamwateqata varura.

²¹ Varuvaro Jesusiva qaiqaa mwihua qua mwantero tiqaro, Nkyi mwutukya qihakya hirata variate. Ni kova ni titaintema kyena nte nkyivata sitarerave, tiro.

²² Mwitaa timwa kyero mwiva mwihuqaa nai nraaiho vuata kyero tiqaro, Qio Kotira mwanraqura varaate.

²³ Nkye vaisi mpovanto Kotira qua nteqa kyaani quara qaqira kyaivera, mwi quava taiqama quananrove. Nkye mwi quava qati vahiarive tivera, mwi quava qatima vahiananrove, tiro. Mwitaa tura.

Tomaasiva Iesusira taqora

²⁴ Jesusiva nai nraaqiaranramwu hunani nri ntero mwipi varuvaro mwi entara mwia nraaqiara mpovanto 12 nramwuqitairo hia mwihuavata varura. Mwia nrutu Tomaasira mwia mpo nrutu Kaapirave tura.

²⁵ Jesusiva vuvaro Tomaasiva mwisairo nri ntovata Iesusira nraaqiara mpo uhua Tomaasira timwa mwita tiqata, Tire nronra vaisi Iesusira taqauro, tita.

Tuvaro Tomaasiva tiqaro, Qaqao, nte hia mwia kyauquqi ninri rutaara nrumwaanra taqena, nte hia ntena kyauqu mwipi veta kyena, mwia nraanterani rutaaraqivata hia ntena kyauqu veta kyaraitina, hia nkyi quara qtaave qianinrave, tiro.

²⁶ Tomaasiva mwitaa timwa kyero varuvaro kuaa uiki nritarovata Iesusira nraaqiaranramwuvanto varuvaro Tomaasivavata mwihua kyapata variqata ekyaa qesa ruteta mwipi varuvaro Jesusiva qaiqaa qovarama viro mwihua utaqaa siviro variro mwihua qua mwantero tiqaro, Nkyi mwutukya qihakya hirata variate, tiro.

²⁷ Timwa kyero mwiva Tomaasirara tiqaro, Qio ena kyauqu tutu kyera ni kyauquqi veta kyeqara taqaante. Ena kyauqu tutu kyera ni nraanterani rutaaraqi vera kyeqara taqaante. E nianra taara nraato tinara qaqira kyante. E nianra kepuuyaqama kyera riemwaqira quante, tiro.

²⁸ Mwitaa tuvaro Tomaasiva mwia timwa mwinro tiqaro, E ni nronravantove. E Kotiva ni mwanriqvantovata variaro, tiro.

29 Mwitaa tuvaro Iesusiva mwia timwa mwinro tiqaro, Tomaasio, e ni taqera mwiaqatairama e nianra quataave qiaro. Qio tahuave hia ni taqaraitita, nianra quataa mwivave tihua, mwihiua qamwateqata variate, tiro. Iesusiva mwitaa tura.

Mwaa mpukura okyarara tura

30 Iesusiva nai nraaqiaranramwu suqaa variqaro nai okyara nyaamwutarerero nronra kyaiqa, mpo kyaiqa mpo kyaiqa vare varura. Qio nte Ioniva mwi kyaiqara hini nraahu mwaa mpukuraqi qara ntumwa tena.

31 Nkye Iesusirara quataa mwiva tiri kyaahaqa hiariva variqaro quataama mwiva mwanriqa Kotira mwaqvavento variho timwa kyeta mwianra kepukyaqama kyeta riemwaqita vita ekyaa enta ekyaa enta qati variqi quate tina, nte Ioniva mwaa quara qara ntumwa taura.

21

Iesusira nraaqiara 7 nramwuvanto qaiqaa mwia taqora

1 Mpo enta Iesusira nraaqiaranramwuvanto Taipiriaasi kyaarereraqa Kariri mwatani varuvaro Iesusiva qaiqaa mwihiua suqaa qovarama vuvata mwia nraaqiaranramwuvanto mwia taqora. Mwataamama mwi quava vahiro.

2 Mwia nraaqiaranramwu Saimoni Pitaavave, Tomaasiva mwia mpo nrutu Kaapivave, Kena mwatukya Karirinyaaisi Nataanierivave, Sepetira mwaqutanave, Iesusira nraaqiara mpo taaratanave, mwinramwuhua mwini kuaaqi varura.

3 Saimoni Pitaava hini mwihiuara tiqaro, Qio nte tavukyara vahe ntarera virerave, tuvata mwinramwuhua tiqata, Tirevata virerave, tita. Mwitaa timwa kyeta uto mpotuqi mwaanri nteta mwiqi variqata entaqi tavukyara vahe ntamwaqi vita hia tavukya mpokuvata varura.

4 Mwitaamaqita vuvaro qaataqarera huvata mwihiua taqovaro Iesusiva kyaarerera tokyaqaa siviro varuvata mwihiua hia mwia ntapihi taqaraitita, mpo vaisive tuvaro

5 mwiva mwihiuara tiqaro, Ni vaisituaavo, hiave nkye tavukya vareta hiavo? tiro. Mwitaa tuvata mwihiua tiqata, Hia varauro, tuvaro mwiva tiqaro,

6 Qio nkye vahe kyaatutani kyeta tavukya varaate, tiro.

Mwitaa tuvata mwihiua vahe kyaatutani kyeqata taqovaro vahevanto piqa vuvaro tavukya airinti mwiqi vahuvuro anomá kyero muaanra ntovata mwihiua hia qio vahe pati mwaanri mpotuqi vataaqara huru.

7 Mwihiua hia vahe pati mwaanri mpotuqi vataaqara huvaro Iesusiva mpogama kyero mwutukya ntu vaisiva Pitaara timwa mwinro tiqaro, Mwi vaisiva tiri nronravantove, tiro. Mwitaa tuvaro Saimoni Pitaava mwi quara riero nai sioti qatinani vatora vara utu varero mpotuqitairo mwaamwi ntero nramanriqi kyavuhu viro nako ru varero Iesusiva hunanianra vuvata hini mwihiua mpotu mwiqi varura.

8 Kyaarerera tokya mwiva hia nyianrani vahuvatara tita mwihiua mpotuqi variqata tavukyavanto vahe piqa kyora ntanrauqi vita tokyani uro ntora.

9 Tokyani mpotu uro vateta mwihiua mwaamwi nteta taqovaro qia quaratero mwiaqaa tavukya utatova vahuvaro mperetivata vahura.

10 Vahuvaro Iesusiva mwihiuara tiqaro, Tavukya mateqa varataara kyaatavata vareta nriate, tiro.

11 Mwitaa tuvaro Saimoni Pitaava mpotuqi mwaanri ntero vahe mwia ntanrauqiro tokyani uro kyora. Tavukya airi 153 nramwu vaheqi vahuvaro vahenvato ntupema quataara hia ntupema vura.

12 Mwitaa huvaro Jesusiva tiqaro, Qio nrira kyara nraate, tuvata mwihua Jesusira vaakya ntapihi kyeta tire kyauruaro tita mwihuaqitairo hia mpo-vanto Jesusirara e tavave tura.

13 Qati varuvaro Jesusiva mperetivata tavukyavata mwihua nyuvata nronra.

14 Jesusiva nai qutu vuraqitairo siviro nai nraaqiaranramwu suqaa qovarama vuvata mwihua mwia taqora. Mwi entara taarampo nani mwihua suqaa qovara hura.

Jesusiva Pitaaravata qua tura

15 Mwihua kyara nramwa kyovaro Jesusiva Saimoni Pitaara kyapara hiro tiqaro, Salmonio, Ioninra mwaquo, quataave mwaa vaisihua mwutukyavanto nianra vahiravata nraatara kyero i mwutukyavanto nianra mpoqivata vaiho? tiro. Mwitaa tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro. Tuvaro Jesusiva tiqaro, Qio ni sipisipi nraati kyara nyiante, tiro.

16 Mwitaa timwa kyero Jesusiva qaiqaa mwia kyapara hiro tiqaro, Salmonio, Ioninra mwaquo, quataave i mwutukyavanto mpoqivata nianra vaiho? tiro.

Tuvaro Pitaava tiqaro, Nronrao, quataave. Ni mutukyavanto iara vahira mwia e ntapihi kyaananrave, tiro.

Mwitaa tuvaro Jesusiva tiqaro, Qio ni sipisipi qaa ntaqikyiyante, tiro.

17 Mwitaa timwa kyero Jesusiva qaiqaavata tiqaro, Salmonio, Ioninra mwaquo, quataave i mwutukyavanto mpoqivata nianra vaiho? tiro.

Jesusiva taarampo nani tiqaro, Qutaave i mwutukyavanto mpoqivata nianra vaiho, tuvarora tiro, Pitaara mwutukyavanto uaqia huvaro mwiva tiqaro, Nronrao, e ekyaa inraikya ntapihi kyaaravave, Ni mutukyavanto iara vahira mwia e ntapihi kyaananrave, tiro.

Mwitaa tuvaro Jesusiva Pitaarara tiqaro, Qio ni sipisipi kyara nyiante, tiro.

18 Jesusiva mwitaa timwa kyero Pitaara timwa mwinro tiqaro, Nte quataa qua qianinra riaante. Tauraa e qaraakya vaisi variqara e tuavaaqa utu varera ena virera hiananraqaa quananrave. Nraakiara e nyaapaiqama vira ena kyauqu tututairaro mpo-vanto i tuavaaqa utu mwatero i vita varero hia e virera tinanraqaa quananrove.

19 Jesusiva mwi quaraqaa ntumwa kyero Pitaava mwitaama kyero Kotira nrutu tuaahereqaro uro qutu quananrove, tura. Jesusiva mwi quara timwa kyero mwiva Pitaara qaiqaa timwa mwinro tiqaro, E ni pataqira nriante, tiro.

Jesusiva nai nraaqiara mpora mpo qua tura

20 Mwitaa tuvaro Pitaava tuqasaa viro taqovaro Jesusiva mpoqama kyero mwutukya ntu vaisiva mwitanahua nraakiara nrinro. Haaru mwihua entaqi kyara nre varuvaro mwi vaisiva Jesusiraaqaa uromwi vuntuvi variqara Jesusira kyapara hiro tiqaro, Ta vaisivave i nramwutaahua iara timwa nyiananrove, tu vaisiva nri ntovaro

21 Pitaava mwia taqero mwianra Jesusira kyapara hiro tiqaro, Nronrao, qio mwaa vaisiva mpo? Mwaa vaisiva nataave hiananrove? tiro.

22 Pitaava mwitaa tuvaro Jesusiva mwia timwa mwinro tiqaro, Nte mwianra tiqana, E qati variqira viraqena nte qaiqaa mwatani tumuankye, qiankyera, mwia hia i kyaiqama vahiananrove. E ni pataqira nriante, tiro.

²³ Jesusiva mwitaa tuvata mwia nraaqiaranramwuvanto mwi quara apiqama kyeta rieta mwihua mwitaama tita, Jesusiva tiqaro mwi vaisiva hiama qutu quananrove tiho, tura. Jesusiva hia mwitaa tiraitiro, mwiva tiqaro, Nte mwaa vaisirara tiqana e variqira viraqena nte mwatani tumankye qiankyera, nte mwianra mwitaa qiariva hiama i kyaiqa vahiananrove, tiro. Jesusiva mwitaa tura.

Ioniva taiqaani quara qara ntumwa tora

²⁴ Qio mwi entara Jesusiva qua timwa mpu vaisiva nte mwaa mwivave. Nte variqanama mwi inraikyara mwi inraikyara taqamwa kyena mwiaqaataina mwaa quara qara ntumwa taurave. Nte tu quava ekyaa mwi quava qutaa quama iho.

²⁵ Jesusiva varo kyaiqara nte hini vitiqia nraahu qara ntumwa taivera. Ekyaa mwia kyaiqa kuaiqia kuaiqia qara ntumwa taivera, airi mpuku vahiro mwaa mwataraa piqa kyaananrove. Qio nte mwiqiarama tuqo.

KYAIQA VARORA

Rukuva Iesusiva nronraqama kyo vaisinramwuhua kyaiqa varorara tura

¹ Tiopiraasio, Nte tauraaqama kyena ini qara ntumwa tauraqi Iesusiva kyaiqa varorave, Iesusiva qua timwa nyunrave, ekyaa mwi quara i timwa mwiavarave.

² Iesusiva kyaiqa toharama kyero varaqiro viro uro nai kyaiqa taiqa kyovaro mwiaqatairo Kotiva mwia nyaamwuni vita varorara i timwa mwiavarave.

Iesusiva nyaamwuni virera huvaro Kotira mwanraquravanto mwia kepukyaqama mwatovaro Iesusiva nai nronraqama kyo vaisinramwuhua mpo qua mpo qua timwa nyunra.

³ Iesusiva qutu vuraqaatairo 40 iherara mwaa mwataraqaa variqiro viqaro airi nani nai nraaqiaranramwu suqaa qovarama viro varuvatara tita, mwihua taqovaro Iesusiva hia qutu vuvará votima kyero variraitiro, mwiva qutaqama qati varu vaisiva varura. Mwihua mwia taqeta varuvare Iesusiva mwihua kyapata variqaro qua timwa nyiqiro viqaro Kotiva ntqaqkyianinranra mwihua timwa nyunra.

⁴ Mwia nraaqiaranramwu ntuvaantuuma vita varuvaro Iesusiva mwinramwuhua timwa nyinro tiqaro, Hia Ierusaremiqitaita quate. Ni kova mpo inraikya nkyi nyianinranra nkyi timwa nyunra mwia vekya variate.

⁵ Ioniva nraakyе qora qati nramanri nyunrave. Mpo iheraqiatana nritarairata nkye Kotira mwanraqura varevarave, tiro.

Iesusiva nyaamwuni vura (Maaki 16:19-20; Ruku 24:50-53)

⁶ Iesusiva nai nronraqama kyo vaisinramwuhua Iesusira vatama kyeta ntuvaantuuma vita variqata Iesusira kyapara hita tiqata, Nronrao, mwaa entarave e tiri kyaahaqa hiraqe tire ntaquqi viqata téta haivaqara mwata Isarerí mwata qaiqaa varaananrave? tita.

⁷ Mwihua mwitaa tuvaro Iesusiva mwihua timwa nyinro tiqaro, Qaqao, mwi inraikyara hiama nkyi kyaiqa vaiho. Ni kora kyaiqama vaiho. Nai nanra toraqaaave nanra entaqaaave mwi inraikyava mwi inraikyava mwitaa hiananrove? Ni kova mwiva nraahuma mwi kyaiqarara mwi okyarara qiananrove.

⁸ Nkye varivaro Kotira mwanraquravanto tumu nkyiqi variqaro nkyi kepukyaqama nyatairata nkye kepukya vareta mwaa kyaiqara varaqita quate. Nkye ni okyarave, ni kyaiqave, taqaahuara titi, nkye tauraqaqama kyeta Ierusaremipi nraante ni qua timwa nyita, mwiaqataita uro Iuitiaani timwa nyita, mwiaqataita vetara Sameriaani uro timwa nyita, mwiaqataita ekyaa mwata maata vahiarintema timwa nyiqi quate, tiro.

⁹ Iesusiva mwihua timwa nyi taiqa kyovaro mwia vitero nyaamwuni vuvata mwihua mwia taqe varuvaro tonamwuvanto mwia ntumwaqu kyovata mwihua hia mwia qaiqaa taqora.

¹⁰ Iesusiva mwihua kyero nyaamwuni vuvata mwihua nyaamwuqi aitutu hi varuvata qamwanrama kye vaisi taaratana egarori tuavaqa ututotanahua qovarama vita mwihua nraaqani sivita varura.

¹¹ Mwitanahua tiqata, Kaririqinaa vaisi nkyenramwuve, nanraqamave nkye nyaamwuni taqe variavo? Iesusira mateqa vitaiharo nyaamwuni

voho. Qio mateqa nkye taqe variavaro vintema kyero nraakiara Iesusiva mwisairo uro ntantero tumuananrove, tura.

Mpovanto Iutaasira kyaiqa varaarive titu nrutu vatora

12 Mwitanahua mwitaa tuvata Iesusiva nronraqama kyo vaisinramwuhua Oripi taaqiqaataita uro ntanteta Ierusareminianra vura. Oripi taaqi mwiva Ierusaremi nraaqani vahura.

13 Jesusira nraaqiaranramwuvanto uro ntanteta tumu Ierusaremini nauqaa nkyiari varu nraamwunra nyaamwuni vahu nraamwunraqi vera nteta varura. Pitaavave, Ionivave, Iemisikya Enturukyave, Piripikya Tomaasikyave, Pataromiukya Matiukyave, Arapiaasira mwaaqu Iemisivave, Saimoni Serotivave, Iemisira mwaaqu Iutaasivave,

14 mwinramwuhua nraamwu mwipi ntuvantuama vita variqata enrai qanranra huvata Kotirara aakyara ntawmaqita vi varuvata nraakyen-ramwuvata, Mariaava Jesusira nrovavata, Jesusira qatanramwuvata mwihua kyapata nraamwuqi variqata Kotirara aakyara nte varura.

15 Mwi entara Jesusira nraaqiara vatama kyeta 120 nramwuvanto mwi nraamwunraqi ntuvantuama vita varuvato Pitaava mwihua suqaa siviro variro tiqaro,

16 Ni kata pakyaa tuaavo, Iutaasiva Jesusira uaqjama mwatarero aanra nyaamwutovata mwihua Jesusira uro ntavaaqavu kyorave.

Haaru qumina vakya Kotira mwanraquravanto vaisi mpo Ntevitira, tiri haivaqara, kyaahaqa huvaro mwiva Iutaasirara qua qara ntumwatorave. Mwaa entara mwi quava qutaa mwivama viho.

17 Iutaasiva tauraa tiri Jesusira nraaqiara 12 nramwu kyapata variqaro mwivavata tiri kyaiqa varaqiro viro mwiaqatairo mwiva qaqira kyero Jesusira rukyaate tiro, mwia qovarama nyatovata

18 mwihua utaru munima utu kyeta mwia mwuvaro Iutaasiva mwi munimanra varero uro mwata kyoqama tero mwiaqatairo nanrianra nronraqama kyero riero vaanta hiriviro tumu ntuvato mwia utaqinna inraikyavanto ntuperero ntupepaa huvaro qutu vurave.

19 Ekyaa Ierusaremiqinaahua mwi quara rieta, mwiva mwata varorara Akeritamave. Nraanre Mwatave, ti variavo.

20 Saami mpukuqi Iutaasirara haaru poropetivanto tiri haivaqava qara ntumwatova mwataama tiro:

Mwia nraamwu qumina nraamwu vahiraro

hia mpovanto mwipi variananrove, turave.

(Ihi 69:25)

Mpo quavata qara ntumwatova mwataama tiro:

Mpovanto mwiva ntaqikyiani kyaiqara varaananrove,
turave.

(Ihi 109:8)

21-22 Nrivaqenramwu mwi quara rieqatama tire vaisi mpo mwatama kyaararo mwi vaisiva Iutaasira kyaiqa varaarive. Tavave Iutaasira kyaiqa qio varaananrove? Vaisi mpovanto mwiva tiri nraantantero Ioniva nramri nyunraqatairo tohara kyero ekyaa Jesusira kyaiqa taqaariva, mwi vaisiva mwia kyaiqa qio varaananrove. Mwiva tiri vatama kyero variqaro nraakte qora Iesusiva qaiqaa qati sivi quara timwa nyinrata riaate, tiro.

23 Pitaava mwitaa tuvata vaisi taaratana nrutu ntora. Vaisi mpo Iosepi Iasitaasira mwia vara nrutu mpo Vasapaasiravata, vaisi mpo Matafiasiravata, nrutu vatora.

24 Vateta mwihua Kotirara aakyara nteta tiqata, Nronrao, e vaisi okyarara ntapihi kyaaravave. Mwaa vaisitanaqitaira ta vaisira mwatama taananra tiri tinraamwutaante.

²⁵ E mwi vaisira tiri tinraamwutairaqe tire mwia nronraqama kyaararo mwiva Iutaasira kyaiqa varaarive. Iutaasiva mwi kyaiqara qaqira kyero nai mwaata uaqia hinani viho, tita.

²⁶ Mwihua mwitaa timwa kyeta mpovanto mpora nrutu vatovaro mpovanto mpora nrutu vatovaro mwitaamaqita vita taqovaro Mataiasira nrutuvanto nraatara kyovata mwia vara nronraqama kyovaro Mataiasira Iesusiva vara nronraqama kyo vaisihua kyapata kuaaqi kuairama viro variqaro mwihua kyapata kyaiqa varaqiro vura.

2

Kotira mwanraquravanto tumu nto iherara

¹ Mpo enta Pentikosi omwata nro entava nri ntovata Jesusira nraaqiaranramwuvanto nraamwu kuaaqi ntuvantuama vita varura.

² Mwiqi varuvaro qamwanrama kyero nyaamwusairo nrucuavanto toga vaururuvanto nruqua tintema kyero nruqua timwaqiro tuminro mwihua varu nraamwunra mwia piqa kyora.

³ Nraamwu mwia piqa kyovata taqovaro qia auru voti huva qovarama viro ntukohi kauhi hiro ekyaa nraakye qora mwiqi varuhua qiataqaa vahura.

⁴ Mwihua qiataqaa tumu vahuvaro Kotira mwanraquravanto ekyaa mwihua utaqi piqa kyero uro variqaro mwiva mwihua kyaahaqa huvata mwihua mpo qua mpo quaqitaita ti varura.

⁵ Mwitaa ti varuvata Iutaa vaisi mpo mwata mpo mwatasaita Ierusaremiqi nruhua mwihua Kotira qua riöhua

⁶ mwihua variqata nruqua nronraqama kyero tura rieta nanra inraikyavantove nruqua tiho timwa kyeta hisai hisaita nrumu ntuvantuama vita variqa taqovata Jesusira nraaqiaranramwu Kotiva mwaqqinri tuqasaa kyovata mpo qua mpo quaqitaita tiqata mpo mwatanaaa mpo mwatanaahua qua ti varuvata mwinramwuhua mwihua tu quarara nrihanrama vita.

⁷ Nrihanrama vita kyauqu ntukikinraaqate varita tiqata, Qikye, ekyaa mwi quara ti variahua mwihua Kaririqinaahua nraahuve.

⁸ Nataama kyetave mwihua tiri qua ekyaa riemwa vareta mpo qua mpo quaqitai ti variavo?

⁹ Tire mpo mwatasai mpo mwatasai nrunrahuave. Paatiaave, Mitaave, Iraamive, Mesopotemiaave, Iutiave, Kapatosiaave, Pontaasive, Esiaave,

¹⁰ Pirisiaavata Pampiriaavatave, Isipive, Ripiaa Sairini nraaqanive, Romive, tire mwisai mwisai nrunrahuave.

¹¹ Tire mponramwu Iutaa nraakye qora varuro. Tire mponramwuvanto mpo mwatanaa variqata teta mwaanra qua qaqira kyeta Iutaa mwaanra qua riemwaqita vurahuave. Kiritive, Arepiavate, mwisai mwisaita tire mwaini nrumu varuro. Tire mwaini variqata taqe varurata mwinramwuhua tiri qua, mpo qua mpo quaqitaita tiqatama Kotira kyaiqa kyuqe kyaiqara ti variavo, tita.

¹² Mwitaa timwa kyeta mwihua nrihanrama vita kyauqu ntukikinraaqate variqata mwihua nai kyapara hi nai kyapara hita tiqata, Qikye, nanra inraikyavanto vara mwitaama kyaihatave mwihua mwitaa ti variavo? tita.

¹³ Tuvata mpo uhua raima nyateta tiqata, Qaqao, mwihua qaraakya uaini nramwa kyeta uera nteqatama mwitaa ti variavo, tita.

Pitaava mwihua qua timwa nyunra

¹⁴ Mwihua mwitaa ti varuvaro Pitaava Iesusiva nronraqama kyo vaisihua 11 nramwu kyapata siviro variro paatiro vera kyero timwa nyinro tiqaro, Iutaa vaisituaavo, nkyevata, nkye Ierusaremini nrumu variahuvata, rie

varivaqe nte mwaa inraikyava qovara hirara ntapihi kyena nkyi timwa nyiankye.

15 Nkye tiqata, Mwihua uera nramanri nramwa kyeta mwitaa ti variavo, qia quava hia qutaave. Mate mwaa toqaqive. Toqaqi variqaro hia vaisivanto uera nramanri nre varirave.

16 Nkye mate taqe varia inraikyara haaru qumina vakya poropeti vaisivanto mwia nrutu Ioeiriva Kotira qua tiqaro mwi inraikyava qovara hiananrove turave. Mwiva haaru qua tuva mate qutaa mwivauma viho. Ioeiriva qara ntumwa tero tiqaro,

17 Kotiva mwitaama tiho.

Nraakiara ekyara enta qaumato vahiraqe
nte ntena mwanraqura nraakye qora nyianinrave.
Mwiaqaataita nkyi nyaamwunra mwaaquvantovata
ni mwakyaakya tivarave.

Nkyi qaraakya vaisivanto qati variqata
ruvaata voti hianinra taqevarave.

Nkyi nyaapavianto ruvaata taqequatama
ni okyarara tivarave.

18 Ni kyaiqa vare nraakye qorahua mwihua varivaqena
nte mwihua ntena mwanraqura nyianrita
mwihua ni qua mwakyaakya
nraakye qora timwa nyivarave.

19 Nte variqana nyaamwuqi nronra kyaiqa varaaninrave.
Nte mwatanivata nronra kyaiqa varaaninrave.

Ekyara enta qaumato vahiraro nraanrevantove,
qiavantove, qia munravantove, vahirata taqevarave.

20 Nronravanto tumuani entava qaumato vahiraro
huarivanto kyokira ruviraro
toravanto nraanre nrusi utu quananrove.

21 Mwi entara nronrao tiri kyaahaqa hiante tihua
nronravanto kyaahaqa hirata qatima varivarave,
turave.

(Ioeiri 2:28-32)

Ioeiriva Kotira qua tiqaro mwitaa turave.

22 Qio Isareri vasinramwu tuaavo. Nte qianinra riaate. Iesusiva Nasaretinyaava varuvaro Kotiva mwia kyaahaqamaqiro vi varuvaro mwiva nronra kyaiqa kepukya kyaiqa varovata nkye Kotiva mwia tito okyarara ntapihi kyorave. Mwiva mwi kyaiqara nkyita suqaa utuvatara titi, nkyetavanto mwi inraikyara taqorave.

23 Qio Kotiva nai mwitaa mwitaa hiani okyarara rieqaro Iesusira nkyi nyuvata nkye mwia ntavaaqavu kyeta kyatariqaa ninriqo ru torave. Nkye Romeni mpo mwatanahuara mwia kyatariqaa ru timwataate qiavata mwihua Iesusira ru kyaarave.

24 Qio qutu vi inraikyava Iesusira hia qio tutaaninranra tiro, Kotiva mwia vara qati sivuma kyorave.

25 Haaru Ntevitiva tiri haivaqava mwianra mwataa turave:
Nte taquaqaro nronravanto nivatama kyero variqaro
mwiva ni kyauqu kyaatutani variqaro
mwiva ni kyaahaqa hi variho.

26-27 Mwiva mwitaama variqiro vi varirara tiro,
vanto kyuqe iharo

ni novanto qamwateqaro qua ti variho.
E hia ni qutu quahua mwaatani ni kyenanranra tiro,
ni mwamwantavanto hiama aatu hiqaro variananrove.

E hiama ena kepukya vaisi qaqlira kyairaro
mwiva ntenraananrove.

²⁸ Qati variqina quani aanranra
mpo aanra mpo aanra ni naamutaaro.
E nivata varirage nte variariro

ni mutukyavanto kyuqe hiarive, turave.

(Ihi 16:8-11)

Haaru tiri haivaqava Ntevitiva mwi quara turave.

²⁹ Qio nkye ni kata pakyaa, riaivaqe nte Ntevitirara nkyi ntapihi kyena
timwa nyiiankye. Mwiva qutu vuvata quntamwa torave. Mwia quntamwa
to mwatapiva mwaa entara qatima vaiho.

³⁰ Kotiva Ntevitira kyaahaqa huvaro mwiva Kotira qua turave. Kotiva nai
kyauqu nrinqiqa vatero Ntevitirara tiqaro, Nraakira e vara mwataratera
huaqitairo mpovanto i nraantantero vunyaa vaisi kyaiqa varaananrove,
tuvaro Ntevitiva mwi quara riemwa torave.

³¹ Mwi quara riemwa teroma Ntevitiva mesaiaavanto qati siquani ok-
yarara tiqaro:

Kotiva hiama mwia qutu vihua vi mwataraqi kyaananrove.

Mwia mwamwanta hiama ntenraananrove,
turave.

(Ihi 16:10)

³² Qio Iesusiva qutu vuvaro Kotiva mwia qaiqaa qati vara sivuma kyovata
tirenramwu mwia taquaunrave.

³³ Haaru Kotiva nraakye qora kyaahaqa hiqaro nai mwanraqura nyin-
renrave turaqaa Iesusiva Kotiva hinani viharo Kotiva mwia nronraqama
kyaiharo Iesusiva mwia kyuauqu kyaatutani mwatakyaa viro variharo
mwiva nai mwanraqura Iesusira mwihahro Iesusiva Kotira mwanraqura
mwia rauriharo tiriqi tuminrama mateqa nkye taqeta rieta hiavo.

³⁴ Ntevitiva hia nai nyaamwuni vurave. Ntevitiva tiqaro:
Nronravanto Kotiva ni nronra vaisiara tiqaro,

Mwaini ni kyuauqu kyaatutani mwatakyaa vira variraqena

³⁵ nte i nramwutaahuavata ntaqina nraatara kyaarira
e ena kyuauqu mwihuaqaa ntamwa tenanrave,

turave.

(Ihi 11:1)

Ntevitiva mwitaa turave.

³⁶ Qio nkye Isareru vaisivantove, nkye riaate. Nkye Iesusira mwia
ninriqotaita kyatariqaa ru kyeta hiritaara, mwiamma Kotiva nronraqama
kyaiharo mesaiaavanto kepukya vaisi nronravanto variho. Nkye mwia ru
kyaarave, tiro.

³⁷ Pitaava mwitaa tuvata nraakye qora mwi quara rioraro mpoo-
qama kyero mwihua mwutukya ntuvata mwihua Pitaaravata Iesusira
nraaqiara hini mwinramwuhuavata kyapara hita tiqata, Qikye, tiri tiqata
vakyaahuanramwuve, tire nataave hiananrave? tita.

³⁸ Tuvaro Pitaava mwihua timwa nyinro tiqaro, Nkye ekyaa mwihua
uaqia hi kyaiqara uti varira qaqlira kyetama Iesusira nrutu nteqata nra-
manri varavararo Kotiva nkye uaqia hi kyaiqara uti vari quara nruka
kyaarive. Nkye mwitaa hivaro Kotiva nai mwanraqura nkyi nyinrata nkye
varevarave.

³⁹ Kotiva nai kyuauqu nrinqiqa vatero tiqaro, Ntena mwanraqura nraakye
qora nyinrenrave, turave. Kotiva mwi quara tiqaroma mwiva nkyiaravata,
nkyi nraaqiarravata, rieqaro turave. Nraakye qora nkye mwatarani vari-
ahuaravata rieqaro turave. Kotiva nai nyaanrama taari nraakye qorahua
ekyaa nai mwanraqura nyiananrove, tiro.

⁴⁰ Pitaava mwitaa timwa kyero mwiva mpo qua mpo qua timwa nyinro tiqaro, Nkye mwi quara mwi quara riaate. Nkyevata nkyeta nramwunaahua nraantanteta uaquia hiani aanranraqaa nrohiqata qua varevorave, tiro.

⁴¹ Mwitaa tuvata nraakye qora airivanto mwi quarara qamwata kyeta quataave timwa kyeta nramanri varora. Mwi entara airi 3,000 vanto Jesusira nraaqiarama vita kuaaqi varura.

Jesusira nraaqiaranramwu kuaaqi varura

⁴² Mwihua Jesusiva nronraqama kyo vaisihua kyapata variqi viqata mwihua qua riemwaqi vita, mwihua kuaaqi variqata nai kyaahaqa hi nai kyaahaqa hita, mwihua kuaaqi variqata kyara nreta, kuaaqi variqata Kotirara aakyara nte varura.

⁴³ Jesusiva nronraqama kyo vaisinramwuhua variqata nronra kyaiqa kepuuya kyaiqa vare varuvata nraakye qora mwinramwuhua kyaiqa taqeta kyauqu ntukikinraaqateqa varura.

⁴⁴ Jesusirara quataave timwa kye kepuuyaqama kye riemwaqi vi varuhua kuaaqi variqata nai kyaahaqa hi nai kyaahaqa hiqata nkyiari vato inraikyara nai mwi nai mwi hi varura.

⁴⁵ Mwihua nkyiari mwatave, nkyiari vato inraikyarave, mpohua nyiqata munima vara kyeta taqovata nkyiari henahua vehi varuhua mwi munimanra ntainra kyeqata nyunra.

⁴⁶ Mwihua mpo enta mpo enta Kotira nraamwuqi uro ntuvantua hita mwiaqataita uro mpo nraamwu mpo nraamwuqi ntuvantua vita variqata nkyiari kyara kyakyma kye nkyiari henahuavata nyiqata nronra.

⁴⁷ Mwitaamaqi viqata mwihua Kotira nrutu tuaahere varuvata nraakye qoravanto mwihuara qamwate varura. Mpo enta mpo enta nronravanto nraakye qora kyaata nraahu kyaahaqa huvata mwihua quataa Jesusiva mwivave timwa kyeta Jesusira nraaqiaraqama viqata kuaaqi variqi vi varura.

3

Vaisi kyuqu ntanrenra vura kyuqema kyora

¹ Mwi mwatanaahua mpo enta mpo enta Kotirara aakyara ntarerata enronani 3 kiroki Kotira nraamwu nronraqiara vi varura. Mwitaa huraqi mpo enta Pitaavavata Ionivavata Kotira nraamwuqiara vura.

² Mwitanahua Kotira nraamwuqiara viqata qesa mpo mwia nrutu *Mpo-qaraa Qesave* tunani uro nteta taqovaro vaisi mpovanto kyuqu ntanrenra vuva qesa mwina varura. Mwia kyuqu nai nrova mwata kyoraqatairo ntanrenra vuva varuvata mwia nramwunaahua mpo enta mpo enta mwia vitaqiqata mwi quesaraqaa uro kyovaro mwiva mpo enta mpo enta quesana variqaro Kotira nraamwuqiara vitare nnritare hi varuhuara munimanrave mwitaa inraikyarave nyaanru tiqaro varura.

³ Mwiva quesana variqaro taqovata Pitaakya Ionikya vera ntarerera huvaro mwitanahuara tiqaro, Po, qati mpo inraikya ni mpiate, tiro.

⁴ Tuvata mwitanahua mwia nraahu viti taqe kyeta mwiaqatairo Pitaava tiqaro, Qio, mwaini tiritana taqaante, tiro.

⁵ Mwitaa tuvaro mwi vaisiva mwitanahua mpo inraikyave ni mpivarave timwa kyero mwitanahua taqe varuvaro

⁶ Pitaava tiqaro, Hia nte munima vatauqo. Nte vatau inraikyara i mwinrenrave. Iesu Karaisira Nasaretinyaanra mwia nrutuara rieqanama nte iara sivira nrohiante tuqo, tiro.

⁷ Mwitaa timwa kyero Pitaava mwi vaisira kyaauqu kyaatutani tu varero kyaahaqa huvaro sivuvaro qamwanrama mwia kyuquvantovata aurokyavantovata kepukyaqama vura.

⁸ Kepukyaqama vuvaro mwiva siviro kyuqu ntamwaqiro viro nrinro hiqaro mwiaqatairo mwiva mwitanahuavata viqaro qamwatero veranta maqiro Kotira nrutu tuaaheraqiro Kotira nraamwuqiara vura.

⁹ Mwini vuvata nraakye qora ntuvantuama vuhua taqovaro mwiva nai nrohiqaro Kotira nrutu tuaahereqaro varuvata

¹⁰ mwihua mwia ntapihi kyeta taqeta tiqata, Qikye, mwaa taqaate. Mwi vaisiva Kotira nraamwu *Mpoqaraa Qesave* tunanrana variqaro mwitaa inraikya mpiate ti vari vaisiva qati naima nrohi variho, titä. Mwitaa timwa kyeta mwi vaisiva kyuqema vurara mpoqama kyeta nrihanrama vita kyaauqu ntukikinraaqtate varura.

Pitaava Kotira nraamwuqi variqaro mwakyaakya timwa nyunra

¹¹ Mwi vaisiva Pitaakya Ionikyaqaa tuqiro nrohuvata nraakye qora nrihanrama vita mwihua hianteta mwinramwuhua Kotira nraamwuqiara vera ntoraqaa Soromoninra aatareqaqaave tunani mwihua vunani vita.

¹² Mwiqiqi vuvaro Pitaava nraakye qora taqero tiqaro, Qio nkye Isareri vaisi tuaavo, nanraqamave nkye nrihanrama vita airi nraato ti variavo? Nanraqamave nkye tirinramwu itutu hi variavo? Nkye tiqata, Tiretana teta kepukyarave, teta kyuqe kyaiqa qaarave, mwi vaisira kyaahaqama kyaauraro mwiva nrohi varihove nkye qiao? Qaqao, hiave.

¹³ Qio mwanriqa Kotiva tiri haivaqahuanramwuqaa ntaqikyi varuva mwiva Evarahaamunraqaave, Aisaakiraqaave, Iaikopuraqaave, ntaqikyi varuva, mwiva Jesusira nai kepuky aiasi nronraqama kyovata nkye mwi vaisira ntavaaqavu kyeta uro Paireatira mwuvaro Paireatativa mwia huvantu kyarerave tuvatavata nkye tiqata, Hia mwia huvantu kyaante, turave.

¹⁴ Mwiva Kotira kyuqe vaisivanto kyotataqama kyero nrohi varu vaisiva varuvata nkye hia mwia huvantu kyaante turave. Nkye vaisi mpovanto vaisi rukyo vaisira mwia huvantu timwataante turave.

¹⁵ Nkye mwiaqataita qati variqi vi varia okyarara nyaamwute vari vaisira ru kyorave. Qio Kotiva mwi vaisira qutu viraqitairo qati vara sisuma kyaihata tirenramwu mwi inraikyara quitaqaqama kyeta taqaunarrave.

¹⁶ Mate tiretana mwia nrutuara rieqatama Jesusirara Kotira kepuky vaisivanto quitaama tiritana kyaahaqa hiananrove tiqatama mwaa vaisira nkye tage varia vaisira mwia kyuqu kyuqema kyauro. Quitaama tiretana turo. Tiretana Jesusirara quitaama mwiva tiritana kyaahaqa hiananrove tiqata mwaa vaisira nkyi suqaa kyuqema kyauro.

¹⁷ Ni kata pakyaahua nkyenramwuve, nte ntapihi kyaurave. Nkyevata, nkyiqa ntaqikyi vaisihuavata, hia Jesusira okyara ntapihiraitita, nkye Jesusira ru kyaarave.

¹⁸ Haaru Kotiva poropeti mpo nroqitairove qaiqaa mpo poropeti nroqitairove nkyi timwa nyinro tiqaro, Nai kepuky vaisivanto nriqa quani inraikyara varaqiro viro uro qutu quaninranra timwa nyu quava mate mwivauma vahirove.

¹⁹ Mwiaqataita Kotiva nkye uaqia hi kyaiqara uti vari quara nruka nyataarive titä, nkye uaqia hi aanranraqaataita tuqasaqaqita Kotirara aakyara qiate.

²⁰ Nkye mwitaa hivaro Kotiva nkyivata variqiro viqaro nkyi mwutukya kyuqema kyaananrove. Nkye mwitaa hivaro Kotiva qaiqaa Jesusira

titairaro mwiva qaiqaa tumuanrive. Kotiva Iesusiva nkyi kyaahaqa hiarive tiro, mwia nkyi kyaama tero mwia nronraqama tairave.

²¹ Iesusiva nyaamwuni variqiro viraro ekyaa inraikya qaraakyaqama kyero qaiqaa ututaari entava nri ntaarive. Haaru nai poropeti vaisi mpohuā mpohua kyaahaqa huvata mwi quara turave.

²² Mosesiva nkyi haivaqava mwitaa turave:
Ni titaintema kyero nkyi nronravanto Kotiva
poropeti vaisi mpo titaananrove.

Mwi vaisiva nkyi okyara kuaa okyara variananrove.
Mwiva nri ntairata nkye mwiva qiani quara
ekyaa quama riaate.

²³ Vaisi mpovanto hia mwia qua riaariva variraro Kotiva
nai nraakye qoraqitairo mwia teqa raaquta kyero
kyaananrove, tiro.

(Lo 18:15, 18-19)

Mosesiva turave.

²⁴ Qio ekyaa poropeti vaisinramwu Samuerivave, mwia nraakiara varuhuave, mwihua Kotira qua tiqatama mwaa entara qovara hiani inraikyarara turave.

²⁵ Qio nkye poropeti mwihua nraisima variavo. Mwihua nkyi kyaahaqa hirerata nkyiara rieqata mwi quara turave. Haaru Kotiva nkyi haivaqahauvata variqaro kyauqu nriqiqaa vatero tiqaro, Nte nkyi kyaahaqa hirera mwitaa mwitaama hianinrave, turave. Qio Kotiva nkyi haivaqahauvata tiqaro nkyivata kyaahaqa hirero mwi quara turave. Kotiva nkyi haivaqara Evarahaamunra timwa mwinro tiqaro,
E mwata humwuanrama tera nraakye qorahua
nraakiara variqata mwihua ni kyaiqa vareqata
ekyaa mwatani vari nraakye qorahua
kyahaqama nyatevarave, turave.

(Okyara 22:18)

²⁶ Mwianra rieqaro Kotiva nkyiara mwihua uaqia hi aanranra qaqaira kyaate tiro, nai kepukya vaisi nronraqama kyero nkye varianani titaiharo Iesusiva nkyi nraante kyaahaqa hirera tumunrave, tiro.

4

Pitaakya Ionikya karavuqi kyora

¹ Pitaakya Ionikya nraakye qora qati nraahu qua timwa nyi varuvata Kotira nraamwuqi Kotira kyaiqa vara mwate varuhuavata, mwihua piponramwuqaa ntaqikyi varu vaisivavata, Saitiusi vaisinramwuvantavata, mwihua mwitanahua qua ti varunani nrintora.

² Saitiusi mwaanra okyaravanto mwataamama vahiro. Mwihua tiqata, Qutu quari vaisiva hiama qio qaiqaa siquananrove, ti varura. Mwitaa ti varuhuara tita, mwihua Pitaakya Ionikya Iesusirara qutu viraqitairo qati sivilo tu quarara mwihua raraqa te varura.

³ Raraqa tovata mwihua uro nteta mwitanahua ntavaaqavu kyeta enrovatara tita, mwihua hora ko tirerave timwa kyeta karavuqi sitaqita uro kyora.

⁴ Karavuqi sitaqita kyovata nraakye qora mwihua vaakya Pitaakya Ionikya qua timwa nyunranra nronraqama kyeta rieta mwi quarara qutaa quave timwa kyeta Iesusira nraaqiaranramwuqi kuairama vita Iesusira nraaqiara varura. Iesusira nraaqiara airiqamaqifa vita 5,000 nraakye qora airi varura.

⁵ Mwia qanranraa lutaavunyaa vaisive, nronra vaisive, mwaanra okyara ti varu vaisihuave, mwihua Ierusaremimi ko tirerata ntuvantuama vita.

6 Mwihua mpo uhua kyapata ntuvantua hura. Mwihua nronra vaisinramwu varirerata, Anaasiva mwiva vunyaa vaisivanto varuvata, mwia nramwunaa Kaiapaasivavata, Ionivavata, Arekisantaavavata, varuvata mwihua nramwunaa mpo uhuavata varura. Mwihua ekyaa ntuvantua vita variqata ko tirera hita

7 mwihua Iesusiva nronraqama kyo vaisitanahua sitaqita nrumu tiri tivugaa kyaivata sivita variate tuvata sitaqita nruvata mwitanahua kypara hita tiqata, Qio nataama kyetave nkyetana mwi kyaiqara vare variavo? Nanra inraikyavanto nkyitana kepuqyaqama kyaihatave nkyetana mwitaa hiavo? Tara nrutu nteqatave nkyetana mwitaa hiavo? tita.

8 Mwihua mwitaa tuvaro Pitaava Kotira mwanraquravanto mwia utaqi varuvaro mwiva tiqaro, Nkye nraakyе qoraqaa ntaqikyi variahuave, Isareri vaisi nronra vaisinramwuvantove,

9 tiretana kyuqu uaqama vi vaisira kyuqema mwataunanza nkye mwia kyaara tiritana kyaparama timwatareratake uti variavo? Nataama kyetave tire mwia kyuqema kyaunanza, mwianrave nkye tiri kyapara hiavo?

10 Nkyevata ekyaa Isareri vaisivata riaate. Iesusi Karaisira Nasaretinyaanra nkye mwia kyatariqaa hiritaavaro qutu viharo Kotiva mwia qaiqaa vara qati sivuma kyai vaisira, tiretana mwi vaisira nrutu ntamwa kyaurraro mwivama tiritana kyaahaqa ihatama tiretana mwaa vaisira kyuqema mwatauraro mwiaqatairo mate mwiva nkyi suqaa qio siviro variho.

11 Kotira mpukuvanto mpo quaqaa ntumwa kyero Iesusirara mwataama taho:

Nkye nraamwu hoqeqlata ori mpo qaqlira kyaava,

mwi oriva puhaqamama viho, turave.

(Ihi 118:22)

12 Iesusiva mwi puhamama variho. Kotiva tiri tivitaarive tiro, Iesusiva mwiva nraahuma tiri qio kyaahaqa hiariva variho. Kotiva hiamma vaisi mpo nrutu tinraamwutairaro mwi vaisiva tiri kyaahaqa hiariva variananrove. Iesusiva mwiva nraahuma tire mwatani variarahu kyaahaqa hiqaro huvantu timwataarivama variho, tiro.

13 Pitaava mwitaa tuvata kaanasorinramwuvanto taqovata Pitaakya Ionikya mwihua suqaa variqata hia aatu hiraitita qua vutu kye tuvata mwihua ntapihi kyovata mwitanahua qumina vaisi hia sikuruqi vutanahua varuvata mwihua mwianra kyaauqaa ntukikinraaqate varura. Mwitanahua mwi quara tuvata mwihua ntapihi kyovata mwitanahua tauraa Iesusiravatama kyeta nrohi varutanahua varura.

14 Mwihua mwitanahuaqua qua vataare tita, taqovaro mwitanahua vaisi mwia kyuqema kyova Pitaakya Ionikya nraaqani'siviro varuvata mwihua hia qio qua mwitanahuaqua vatora.

15 Hia qio mwitanahuaqua qua vateva vahuvatara tita, mwihua mwitanahuar tiqata, Nkyetana uro mpoqj varivaqe tire mwi quara ntapihi kyaare, tuvata mwitanahua vuvata mwihua mwi quara nai timwa mwi nai timwa mwi hita tiqata,

16 Mwi vaisitanahua tire nataave hiananrave? Mwitanahua nronra kyaiqa varaaavata ekyaa Ierusaremiquinaahua mwitanahua kyaiqa taqaavata tire mwitanahua kyaiqa hia qio uqeta kyaananrave.

17 Haunri mwaa mwi quara timwaqita vivata ekyaa mpo mwatanaa mpo mwatanaa mwitanahua kyaiqa varaarara rievorave. Nrivaqenramwu qao timwa kyeta mwitanahuar hia Iesusirara mpohua mpohua timwa nyiate qiare, tita.

18 Mwitaa timwa kyeta mwihua qaiqaa mwitanahua nyaanrama kyeta tigata, Qio nkyetana hia qaiqaavata Iesusirara nraakye qora timwa nyiate. Tire mwi quara tirara qaoqama tauro, tita.

19 Mwihua mwitaa tuvata Pitaakya Ionikya tita, Tiretana nkyi qua rieta Kotira qua qaqira kyaararo Kotiva mwianra qioqave hiananrove? Nkye nkyetavanto tukyama kye tivaqeta tire riaare.

20 Tiretana variqata tetatana tivuqo taqeta nraatoqi riaunanranra hia qio uqeta taananrave. Tiretana mwi inraikyarara timwa nyiananrave, tita.

21 Mwitaa tuvata kaanasori mwihua mpoqiaavata kepukyaqama kye qaoqama teta mwitanahua huvantu kyeta sitovata vura.

Pitaakya Ionikya vaisi mwia kyugema mwatorara nraakye qoravanto Kotira nrutu tuaahere varurara tita, qumina mwitanahuaquaqua qua vataarorave tita, mwitanahua huvantu kyora.

22 Mwitanahua kyuqu ntanrenra vu vaisira kyugema kyo vaisiva hia qaraakya vaisi varura. Mwiva 40 ihi vara kyo vaisiva varura.

Iesusira nraaqiaranramwu Kotirara aakyara nte varura

23 Mwihua Pitaakya Ionikya huvantu kyovata mwitanahua uro ntanteta nkyiari nramwunaa varunani vuhua uro mwini variqata Kotira nraamwuqi Kotira kyaiqa vara mwate varu vaisihua mwihua nronranramwuvanto tu quaravata, mponramwuvanto tu quaravata mwihua timwa nyunra.

24 Timwa nyuvata mwihua mwi quara rieta, ekyaa mwihua Kotirara aakyara nteqata mwataama tita:

Nronrao, e ekyaa inraikya ututaaravave, Nyaamwuve, mwatave, kyaera era nronrave, ekyaa inraikya nyaamwunive, mwatanive, nramanriqive, vahi inraikyara e nraahu ututaaravave.

25 Haaru tiri haivaqava Ntevitiva i kyaiqa vaisivanto varuvaro i mwanaraquravanto mwia kyaahaqa huvaro mwataaa turave:

Nanraqamave mpo mwatanaahua mpo mwatanaahua

Kotirara raraqa te varihata variavo?

Nanraqamave mwaa mwatanaahua hia mpo okyaravata

vahiraqataita Kotiravata ntaqirerata uti variavo?

26 Mwatanyaaisi vuyaahua huru kyaamwu terama

teta mwihua sivita kuairama vita Kotira ntaqu mwateta

mwiva nronraqama kyai vaisiravata ntaqirerata

uti variavo, turave.

(Ihi 2:1-2)

27 Qio Kotio, mwi quara timwa toraqa mate mwivauma vaiho. E Iesusira nyaamwusaira titotoraro mwiva hia uaqia hi kyaiqara utiraitiro, i kyaiqa nraahu varaqiro vuvata nronra vaisi Herotivavata, Pontiaasi Pairaativavata, mwitanahua mwaa mwatukyara Ierusaremipi ntuvaantuuma vita mwitanahuaavata, mpo mwatanaavata, Isarerisaisivantovatama kyeta, Iesusira uaqiamma mwatarerata uti varurave.

28 Mwihua Iesusira uaqiamma mwatarerata ntuvaantua hiqata, haaru e nraante ena kepukyaqove, ena vu nraato tutonanraqaave, Iesusira mwitaama mwatarerata tunanranra mwihua hia ntapihurave.

29 Qio nronrao. Mwihua tiri uaqiamma timwatarerata qia quara riaante. E ena kyaiqa vaisi tiri kyaahaqa hiraqe tire hia aatu hiraitita, kepukyaqama kye i qua timwa nyianre.

30 Ena kyauqu tutu kyera tiri kyaahaqa hiraqeta tire nraakye qora nriqa vihua kyugema nyataare. E tiri kyaahaqa hiraqeta tire Iesusira i kyaiqa vaisi kyugera mwia nrutuara rieqatama nronra kyaiqa kepukya kyaiqa varaqita quare, tita.

³¹ Mwihua mwitaa timwa kyeta Kotirara aakyara ntamwa kyovaro qamwanrama kyero mwihua varu nraamwuva mwiva qakyaa qakyaa huvaro Kotira mwanraquravanto mwiqi varuhua kepukyaqama kyovata mwiaqataita mwihua hia vaisi nyaatu aatu hiraitita, Kotira qua vutu kye timwa nyiqi vi varura.

Mwihua kuaaqi varura

³² Qio mwi entara Iesusirara qutaa mwivave tuhua kuaaqi variqata mwihua kuaa vu nraato kuaa mwutukya vateta varura. Hia mpovanto nai vato inraikyara nai nraahu tuqara tutora. Mwihua nkyiari vato inraikyara ntainra kyeta nai mwi nai mwi hi varura.

³³ Mwitaa hi varuvata Iesusiva nronraqama kyo vaisinramwuhua kepukyaqama kyeta Iesusiva nronravanto qati sivu quara nraakyе qora timwa nyiqita vura. Timwa nyi varuvata Kotiva mwihua kyuqema nya-tovata

³⁴ mwihua variqata kyuqema kyeta nai kyaahaqa hi nai kyaahaqa hi varuvaro hia mpovanto vehi vaisi varura. Vaisivanto nraamwuve, mwatave, vato hua mwi inraikyara mpohua nyita munima vara kyeta varaqita uro Iesusiva nronraqama kyo vaisinramwuhua

³⁵ nyuvata mwinramwuhua mwi munimanra vara kyeta ntainra kyeqata nraakyе qora nyunra. Nyigata hia airi inraikya vatora vehi vaisi puaama kyeta munima mwita, airi inraikya vatora pataqia mwita mwitaamaqi vita ntainra kyeqata nkyiari nramwunaahua nyunra.

³⁶⁻³⁷ Mwitaamaqita vuvaro vaisi mpovanto mwia nrutu Iosepiva, mwiva Rivaira okyaraqinaanra Saiparaasini mwatatova, mwiva nai mwataqaatairo munima vara kyero varaqiro uro ekyaa mwi munimanra Iesusiva nronraqama kyonramwuhua nyunra. Iesusiva nronraqama kyo vaisinramwuhua mwi vaisira mpo nrutu ntamwa teta mwianra Vanavaasirave. Mpohua Kyaahaqa Hiani Vaisirave, tura.

5

Ananaiaasikya Sapairaakya qua

¹ Vaisi mpovanto mwia nrutu Ananaiaasiva nai nraata Sapairaakyantiri varura. Mwitanahua mwata mpo mpohua nyita munima varovaro Ananaiaasiva hini munima tetatana tutarerave

² tuvaro mwia nraatavantovata mwi quara rioraro Ananaiaasiva hini munima nraahu varero uro Iesusiva nronraqama kyo vaisinramwuhua kyuqutarani vatero tiqaro, Nte ntene naatantiri teta mwataqaataita munima varauanahua ekyaa mwi munimanra nkyi nyuqo, tiro.

³ Tuvaro Pitaava qaqao tiro, Ananaiaasio, nanraqamave e kyaararo Saataaniva iqaa ntaqikyi varihara e mwia qua rieqarama Kotira mwanraqura unra qiaro? E ena mwata nyinra munima vara kyera hini munima ena vatera e unra tiqarama, Nte ekyaa munima nkyi nraahu nyuqo, tira hiaro.

⁴ Tauraa hia mwi mwataraqataira kyoqaa varaana entara mwi mwatava i mwata vahurave. Mwiaqataira mwi mwataro mpohua nyinra munima varaararo mwi munimava i munima vahirave. Qio nanraqamave hini munima ena tutera hini munima nraahu tiri timwinra tiri unra tiqarama, Nte ekyaa mwi munimanra nkyi nraahu nyuqo, qiaro? E hia tiri qumina vaisi unra qiaro, E mwitaa tiqarama Kotirama unra tira hiaro, tiro.

⁵ Mwitaa tuvaro Ananaiaasiva mwi quara riemwa kyero qamwanrama tumu ntiro qutu viro. Qutu vuvata ekyaa mwi quara riorua mpoqama kyeta aatu hi varura.

6 Mwiva qutu vuvata qaraakya vaisinramwuvanto vera nteta mwia mwamwanta qapuqama kyeta vareta uro quntamwa tora.

7 Quntamwa tovaro pataqia vari kyero (huari vuvanto 3 aua vara kyovaro) mwia nraatavanto hia mwi quara riaraitiro, mwipi vera ntero.

8 Mwiva mwipi vera ntovaro Pitaava mwianra tiqaro, Qio nkyetana mwata nyita munima varaaara qio mwia ekyaa mwinramwunrave iho? tuvaro mwiva tiqaro, Eo, qio mwia ekyaa mwinramwunrave, tiro.

9 Mwitaa tuvaro Pitaava tiqaro, Qio nanraqamave nkyetana mwi quara unra qua tireraye timwa kyetatanu Kotira mwanraqura unra qiavo? Qio taqaante. I vaati uro quntamwa taahua quesana variavo. Mwihua ivata uro quntevarave, tiro.

10 Mwitaa tuvaro mwi nraakyeva qamwanrama tumu ntiro qutu viro. Mwitaa huvata qaraakya vaisinramwuvanto vera nteta taqovaro mwiva qutu vuvata mwiaavata varaqita uro nai vaati tataaqa quntamwa tora.

11 Quntamwa tovata ekyaa Jesusira nraakye qora mpoqama kyero nyaatu qatovata aatu hi varuvata ekyaa mwi quara riohuavata mpoqama kyeta aatu hi varura.

Nronra kyaiqa varorara tura

12 Mwitaa huvata Jesusiva nronraqama kyo vaisinramwuhua nraakye qora kyaahaqa hirerata nronra kyaiqa mpo kyaiqa mpo kyaiqa vare varura. Mpo enta mpo enta Jesusira qua riohua Kotira nraamwuqi vera ntosata Soromoninra nraamwuve tunani ntuvaantuuma viqata varura.

13 Mwihua mwini kuairama vita varuvata qati nraakye qoravanto mwihua kyuqe hiahuave timwa kyeqata aatumu kyeqata nyianrasata variqata hia mwihuaavata kuairama vita varura.

14 Mwi entara vaisivata nraakyevata airi kyaatavanto nraahu Jesusirara qutaave timwa kyeta Jesusira nraaqiaraqama vita kuaaqi varura.

15 Jesusiva nronraqama kyo vaisinramwuhua nronra kyaiqa varaqita vuvata mwi mwatanaahua nrira vuhua sitaqita uro aanrani taariqaave, taintaqaave, vateta tiqata, Pitaava nritareqaro mwiva hia nkyi tu varairera, mwia mamanaanruvanto nkyi mwamwanta kyugema kyaarive, timwa kyeqata aanraqaa sitaqiqata uro vatora.

16 Hisai hisai mpo mwatukya mpo mwatukyaqitaita vaisi airivanto nrira vu nraakye qorahuave, ueravanto utaqi varuhuave, sita vareta Ierusaremini uro kyovata Jesusiva nronraqama kyo vaisinramwuhua mwihua kyugema nyatora.

Iesusira nraaqiaranramwu uaqiana nyatorara tura

17 Mwihua mwitaamaqita vuvata Kotira nraamwuqi Kotira kyaiqa vara mwate varu vaisihua mwihua nronra vaisivantovata, mwihua nramwuhua Saitiusi vaisinramwuvata, mwihua variqata taqovata airi nraakye qoravanto Jesusiva nronraqama kyonramwuhua qua riovata mwihua tiri qua nraahu riaataarave tura.

18 Mwitaa timwa kyeta uro Jesusiva nronraqama kyo vaisinramwuhua ntavaaqavu kyeta karavuqai sitaqita uro kyora.

19 Mwipi uro kyovaro entaqi Kotiva titova nyaamwunyaava karavu nraamwu qesa qatua kyero Jesusiva nronraqama kyo vaisinramwuhua sitaqiro tumu mwaatani kyero timwa nyinro tiqaro,

20 Uro Kotira nraamwuqi sivita variqata qaraakyaqama kye qati variqi vi okyarara nraakye qora timwa nyiate, tiro.

²¹ Mwitaa tuvata mwinramwuhua mwia qua rieta mwia qanranraa ntuvahama vuvata uro Kotira nraamwuqi variqata nraakye qora mwi quara timwa nyunra.

Mwinramwuhua mwini uro varuvata Kotira nraamwuqi Kotira kyaiqa vara mwate varuhua mwihiua nronra vaisi mwivavata, mwia nramwuhauvata, mwihiua ntuvantuuma vita Iutaa vaisi nronra vaisi kaanasori mpqiani mpqiani nyaanrama kyeta tiqata, Nrivaqenramwu mwaaqi variqata qua avuqavu hiare, timwa kyeta ntuvantuuma vita variqata Iesusiva nronraqama kyo vaisinramwuhua uro sitaqita nriate tuvavata

²² uro sitaare tita, taqvata mwinramwuhua hia karavuqi varuvata mwihua uro ntanteta kaanasorinramwu uro timwa nyita tiqata,

²³ Tire karavuqi uro taqauraro qesa rutaavararo piponramwu mwaqaqani gesana ntaqikyi variavata tire qesa qatua kyeta taqauraro hia vaisi mpov- anto karavu nraamwu utaqi variho. Ekyama quavo, tita.

²⁴ Mwitaa tuvata karavuqaa ntaqikyi varuhua vunyaaavavata, Kotira nraamwuqi Kotira kyaiqa vara mwate varuhua mwihiua nronra vaisinramwuvata, mwihiua mwi quara rieta tiqata, Nataama kyetave mwi vaisinramwuhua quavo? tita.

²⁵ Mwitaa ti varuvaro vaisi mpovanto vera ntero timwa nyinro tiqaro, Riaate, nkye karavu rupa kyaahua, mwinramwuhua Kotira nraamwuqi variqata nraakye qora qua timwa nyi variavo, tiro.

²⁶ Mwitaa tuvata karavuqaa ntaqikyuhua nkyiari vunyaa vaisivatama kyeta uro Iesusiva nronraqama kyo vaisinramwuhua sita vareta nrunra. Nraakye qoravanto oriqotaita tiri ntuqutu kyevorave tita, mwihiua qati qihakayama kyeta sita vareta nrunra.

²⁷ Mwihiua mwinramwuhua sitaqita uro kaanasori suqaa kyovaro Kotira nraamwuqi Kotira kyaiqa vara mwate varu vaisihua mwihiua nronra vaisivanto mwinramwuhua kyaparama nyatero tiqaro,

²⁸ Tire nkyinramwuanrama hia Iesusirara nraakye qora timwa nyiate, turo. Mwianra tire nronraqama kyeta qao timwa taunanrave. Qio taqaate. Nkyenramwu ekyaa Ierusaremipi nrohiqata mwi quara timwa nyi variavo. Nkyenramwu Iesusira rukyaa quara tiriqaa ntumwa tarerata uti variavo, tiro.

²⁹ Mwitaa tuvaro Pitaavavata, Iesusiva nronraqama kyo vaisinramwuhua mpo uhuavata, tiqata, Kotiva mpo qua tiraro qumina vaisivanto nai riemwa kyero mpo qua tirera, tire Kotira qua nraahu riemwaqita virerave.

³⁰ Nkye Iesusira ninriqotaita kyatariqaa rukye hiritovaro mwiva qutu vuvaro mwiaqaatairo tiri haivaqahuaqaa ntaqikyi variva, Kotiva mwia qaiqaa qati vara sivuma kyorave.

³¹ Kotiva mwia qati vara sivuma kyero mwia nronraqama kyaiharo mwiva mate Kotira kyaquq kyaatutani kepukyavanto tiri kyaahaqa hiariva variho. Tire Isarerai vaisivanto variqata uaquia hi aanranra qaqa kyaararo mwiva tiri kyaahaqa hiananrove. Mwiva kepukyavanto variqaro qiomma tire uaquia hi kyaiqara varaana quara nruka timwa taananrove.

³² Tire teta tivuqotaita taqaunana tire mwi inraikyarara timwaqi vireratave. Tirevata, Kotira mwianraquravantovata, mwi quara nraahu timwaqita vireratave. Kotiva nai qua riemwaqita nrohiahua nraahu nai mwianraqura nyi varivave, tita.

³³ Mwitaa tuvata kaanasori mwihiua mwi quara riovoro mwihiua mpqama kyero raraqa tovata mwihiua mwinramwuhua ru kyaare tita utura.

³⁴ Ru kyarera uti varuvaro kaanasori mpovanto mwia nrutu Kamerieriva, mwiva Parisi vaisi mwaanra qua okyara ti varuva, nraakye

qora mwianra kyuqe vaisive ti varuva, mwiva kaanasori nraamwuqi siviro Iesusiva nronraqama kyo vaisinramwuhuara tiqaro, Mwaaqitaita mwihua varava veva kyaate, tiro.

35 Mwitaa timwa kyero mwiva kaanasori mwihua timwa nyinro tiqaro, Nkye Isarerri vaisinramwuvantove, hiama paparuqa hiqata mwi vaisinramwuhuara ruate. Nkyeta vararera hi kyaiqara qakyoma kyeta nraato riemwaqi viqata varaate.

36 Haaru vaisi mpovanto mwia nrutu Tiutaasiva qovarama vurave. Mwiva nte nronra vaisive tuvata airi vaisi 400 vanto mwia kyuquqaa vitinteta, kamaninravata ntaquare tuvaro kamaniva mwia ru kyovata mwia vataaqi vuhua aatu ntueqeqaa hita vivu kyaavuma vurave. Mwitaa huvaro mwi vaisira kyaiqavanto ekyaaaa taiqaa vurave.

37 Qio qaiqaa nrutu vare varu entara mpovanto mwia nrutu Iutaasiva mwiva Karirinyaava qovarama viro varuvata vaisi airivanto mwia vataqita vuvaro qio mwiavata ru kyovata aatu ntueqeqaa hita vivu kyaavuma vurave.

38 Mwianra rieqanama mwaa vaisinramwuhua hia mpo qara hiate. Qati kyaivata quate. Mwihua kyaiqavanto qati qumina vaisivanto nai riemwa kyero varai kyaiqava vahirera, mwihua kyaiqavanto qati quminavau quananrove.

39 Mwihua kyaiqavanto Kotiraqaatairo qovarama virera, hiama qio nkye mwi vaisinramwuhua nraatara kyevarave. Nkye haunri Kotiravatama kyeta ntaquqita vivorave, tiro.

40 Kamerieriva mwitaa tuvaro mwia quavanto kepukyaqqa huvata mwihua mwia qua riora. Mwiaqaataita Iesusiva nronraqama kyo vaisinramwuhua nyaanrama kyeta mwinramwuhua kyaamwuqotaita ntuquku kyeta vateta tiqata, Hia qaiqavata Iesusira nrutu nteqata mpohua mpohua timwa nyiate, timwa kyeta mwinramwuhua huvantu kyora.

41 Mwihua huvantu kyovata Iesusiva nronraqama kyo vaisinramwuhua veva nteta viqata Kotira nrutu tuaahereta tiqata, Kotiva tiriara mwihua Iesusira nrutuara rieqatama kyaurira inraikya vareqata kepukyaqamakye varivarave tihatara titama, tire mpoqama kye qamwateqata varuro, tita.

42 Mwiaqaataita mwinramwuhua mpo enta mpo enta Kotira nraamwuqive, qati vaisi nraamwuqive, mwiqi mwihua kyuqe qua Iesusiva tiri kyaahaqa hiarivave tu quara nraakye qora timwa nyiqi vi varura.

6

Kyaahaqa hi vaisihua 7 nramwu mwatama tora

1 Mwi entara Iesusira nraaqiara airiqamaqita vi varuvata mwihuaqitai mpo uhua inronra hi varura. Iutaanramwu Kiriki qua tuhua variqata lutaan nkyiari Hiruvu qua tuhuavata inronra hita tiqata, Mpo enta mpo enta nkye munima ntainra kyeta vehi nraakye qora nyiqata hiama tirivatama kyeta tetoka nraakye variahua nyiavo, tita.

2 Mwitaa tuvata Iesusiva nronraqama kyo vaisinramwuhua ekyaaa Iesusira nraaqiara mwihua ntuvantuama kyeta tiqata, Tire Kotira qua qiana kyaiqara qaqla kyeta munima ntainra kyeta nyiana kyaiqara nraahu varaqita quarorave.

3 Tiri tiqata vakyaahua nkye riaate. Vaisi 7 nramwu kyuqe su nyaato vataahua Kotira mwanraquravanto qiani quara kyuqema kyeta riemwaqita vi vaisihua sitaqita nrivaqeta tire mwihua mwi kyaiqaraqaa ntaqikyifaarata varaate.

⁴ Mwihua mwi kyaiqara vare variyaqeta tire Kotirara aakyara ntamwaqi viqatama Kotira qua nraakye qora timwa nyiqi quare, tita.

⁵ Mwitaa tuvata nraakye qora kuairama vuhua mwihua ekyaa mwinramwuhua quara qamwata kyeta mwi kyaiqara varehuela mwatama teta. Mwihua mwaa vaisinramwuhua mwatama tora:

Sitiveninra. Sitiveniva Iesusirara kepukyaqama kyero
riemwaqiro vuvaro Kotira mwanraquravanto mwia
utaqi varuvaro mwiva mwia qua ekyaa qua
riemwaqiro vura.

Piripira, Porokorasira, Naikenonra,
Taimoninra, Pamenasira,

Antiokinyaava Nikorasira. Nikorasiva mwiva
tauraaqama kyero mpo mwatanaava variqaro nai
nraaqihuua taatohua okyara qaqira kyero luta kyaiqa
varero qio mwiaqatairo Iesusira qua riero Iesusira
nraaqiaraqama vura.

⁶ Qio mwi vaisinramwuhua sitaqita uro Iesusiva nronraqama kyo vais-inramwuhua hunani kyovata mwihua nkyiari kyauqu mwihuaqaa vateta Kotirara aakyara ntora.

⁷ Qio Iesusira nraaqiaranramwuvanto Kotira qua timwa nyiqi vuvaro
mwii quava mpoqiyavata viro nrinro huvata airi vaisivanto mwi quara riora.
Ierusaremini Iesusira nraaqiara airiqama vuvata Kotira nraamwuqi Kotira
kyaiqa vara mwate varu vaisihuua airivantovata Iesusirara quataa mwivave
timwa kyeta Iesusira nraaqiaraqama vura.

Sitiveninra karavuqama kyora

⁸ Qio Sitiveniva Kotirara kepukyaqama kyero riemwaqiro vuvaro Kotira
kepukyavanto mwiaqi varu vaisiva variqaro nraakye qora suqaa variqaro
Kotira kyaiqa nronra kyaiqa, mpo kyaiqa mpo kyaiqa varaqiro vura.

⁹ Mwitaa huvata vaise mponramwuvanto Sitiveninravata inronra hirerata
nrunra. Mwi vaisihuua mpo qua riohua nkyiari mwaanra nraamwu
mwia *Huvantu Kyaa Vaisira Nramwuve* tura. Mwi vaisihuua Iutaa
mponramwuvanto Sairininyaahuavata, Arekisantirianyaahuavata, varu-
vata mponramwu Sirisianyaahuavata, Esiaanyahuavata varura.

Mwihua Sitiveninra inronra hirerata nruvoro

¹⁰ Kotira mwanraquravanto Sitiveninra kyaahaqa huvaro mwia quav-
anto kepukyaqqa huvatara tita, mwi vaisinramwuhua hia qioqama kye
mwia qua nraatara kyora.

¹¹ Mwihua hia qio mwia nraatara kyaaqara huvata mwihua vaise
mponramwu utaru munima nyita tiqata, Nkyenramwu Sitiveninraqa
unra qua ntumwa kyeta tiqata mwitaama qiate, Sitiveniva Mosesiraravata
Kotiraravata uaqia hi quarama ti varihata riaunanrave, qiate, tita.

¹² Qio mwihua mwitaama kyeta unra qua tuvata Iutaa nronra vaisive,
mwaanra okyara ti varu vaisihuave, mwihua mwi quara ri ovaro mwihua
raraqa tovata mwihua uro Sitiveninra ntavaaqavu kyeta vitaqita uro
kaanasorivanto ntuvaantuama vita varuraqi kyora.

¹³ Kyeta mwihua vaise mponramwu Sitiveninraqa unra qua vataate tita,
nyaanrovata mwihua nruru tiqata, Mwaa vaisiva ena ena iharo Kotira
nraamwuanra uaqia hi quara ti variho. Mwiva Mosesiva mwaanra qua
timwa torara uaqia hi quara ti variho.

¹⁴ Tire airivanto varuanraqa mwiva mwataama tiho. Iesusiva
Nasaretinyaava mwaa nraamwunra Kotira nraamwu ntapairi kyaanan-
rove, tiho. Iesusiva Mosesira mwaanra qua qaqira kyero qaraakya qua tiru

timwiananrove, tiho. Sitiveniva mwi quara mwi quara tihata riaunanrave, tita.

¹⁵ Mwitaa ti varuvata kaanasorinramwuvanto nraamwuqi varuhua variqata Sitiveninra taqovaro mwia viri kyuqe viri nyaamwunyaha siri voti huva vahura.

7

Sitiveniva nkyiari timwa nyu quara

¹ Mwihua unra qua mwitaa tiqata Sitiveninraqaa qua vate varuvaro Kotira nraamwuqi Kotira kyaiqa vara mwate varu vaisihua mwihua nronra vaisivanto Sitiveninra kyapara hiro tiqaro, Qio mwihua quataave titi hiavo? tuvuro

² Sitiveniva tiqaro, Ni kata pakyaahuavata ni kohuavata nkye nte qian-inra rie variate. Haaru Evarahaamuva tiri haivaqava mwiva hia Haraanini vu entara mwiva Mesopotemia mwatani varuvaro mwanriqa peqavanto Kotiva qovarama viro

³ Evarahaamuva timwa mwinro tiqaro, Ena nramwunaahuavata, ena mwaatavata, qaqlira mwaini kyera nte i nraamwutaani mwatarani quante, turave.

⁴ Mwitaa tuvaro Evarahaamuva Karatia mwatani varura mwini kyero kyatiro uro Haraanini varurave. Qio nai qova qutu vuvaro Kotiva qaiqaa tuvaro Evarahaamuva mwaa mwatarana nkye variara mwaini nrnunrave.

⁵ Mwi entara Kotiva hia Evarahaamuva mwata mwunrave. Evarahaamuva nai kyuqu ntamwa taani mwatarara mpoqivata hia mwunrave. Mwi entara Kotiva kyauqu nriqiqaa vatero Evarahaamuva timwa mwinro tiqaro, Qio mwaa mwatarara nraakiara nte i mwinrenrave. Mwaa mwatarara i mwatama vahiananrove. E nraaqiara mwataraterahua mwatama vahianarove, turave. Qio mwi entara Kotiva nriqiqaa kyauqu vateqaro tu entara hia Evarahaamuva nraaqiara mwato entara

⁶ Kotiva mwaa quara timwa mwinro tiqaro, Nraakiara e mwata humwuanramatera nraaqiarahua mpo mwatani uro varivata mwi mwataranaahua e mwataraterahua qoraqamaqita vi varivata mwihua airi ihi 400 ihiara mwi mwataraqi variqi vivarave.

⁷ Qio mwi entaraqaataina nte e mwataraterahuaqaa ntaqikiyihua mwihuaqaa qua vateqanama mwihua qoraqama nyataaninrave. Nte mwihua qoraqama nyataarita mwiaqataita e mwataraterahua mwi mwataraqataita kyatita nrumbu mwaa mwataraqaa variqata ni nutu tuaaheraqita vivarave, turave.

⁸ Kotiva mwitaa timwa kyero nai kyauqu nriqiqaa vato quarara Evarahaamuvarata, mwiva mwatarataihuavata, qati nraahu riemwa taate tiro, Kotiva qoraisi nraaqiara mwamwanta toqaani okyarara Evarahaamuva mwunrave. Mwiaqatairo Evarahaamuva nai nraaqiara Aisaakira mwatoraro 8 enta nritarovaro mwia mwamwanta toqa mwatorave. Aisaakiva laikopura qova varuvaro Iaikopuva tiri haivaqahua 12 nramwu sova varurave.

⁹ Qio tiri haivaqahuanramwu variqi vita, mwinramwuhua nkyiari sata Iosepira kyaru kyaaruma mwateta mwia uaqiamma mwatarerata mwia ntavaaqavu kyeta mpo mwataranaahua nyita munima varovata Iosepira rupaqita uro Isipini kyora. Mwini uro kyovaro Iosepiva mpo mwataranaahuaqaa quminaqama kyero kyaiqa vare varuvaro Kotiva mwivata varurave.

¹⁰ Kotiva mwiavata variqaro Iosepira mwia kyaahaqamaqiro vuvaro mwiva qio varurave. Perova Isipi mwataqaa ntaqikyuvu Iosepira nraan-rovaro mwiva mwia vuqaa uro varuvaro Kotiva mwia vu nraato kyaahaqa huvaro Perova mwianra kyuqe vaisivanto kyuqe vu nraato vataavave timwa kyero mwia nronraqama kyero tiqaro, Nte vunyaaava variarira e ni naakiara variqarama ni nraamwuqaavata ni mwataqaavata ntaqikyianta, turave.

¹¹ Qio mwi entara nronraqama kye aara nto entava Isipinivata Kenaaninivata vahuvata nraakye qora uaqlama kye varuvata tiri haivaqahuanramwuvata kyarara hurave.

¹² Mwitaa huvaro Iaikopuva rioraro kyara (raisi voti huva) Isipini vahuvo tuvaro riero mwiva tiri haivaqahuanramwu mwini sitovata vurave.

¹³ Mwihua mwini taara nani vuvaro Iosepiva qoqaa timwa nyinro tiqaro, Nte nkyl satavantove, tuvaro Perova Iosepira vataahuara riero qamwata nyatovaro

¹⁴ Iosepiva qua vara kyero nai qorara tiqaro, Evata, ena nraakye nraaqiararavata ekyama mwaini Isipini nriate, tuvata nraakye qora 74 nramwuvanto Isipini vurave.

¹⁵ Iaikopuva kyatiro uro Isipini variqiro viro qutu vuvata tiri haivaqahuanramwuvata mwini variqi vita qutu vurave.

¹⁶ Mwinramwuhua qutu vuvata mwihua mwamwanta mwia varaqita Sekemi mwatani uro Evarahaamuva munima nyuvata Hamonraa mwatanaavanto mwata mwunraqi quntamwa torave.

¹⁷ Qio airi ihi nritarovaro Kotiva haaru nai nriqiqaa kyaauqu vateqaro Evarahaamunranra e mwataraterahua kyaahaqa hirerave tu entava qau-mato vahuvata nraakye qoravanto kyatita Isipini vuhua airiqama vuvaro

¹⁸ vaisi mpo vunyaa vaisivanto hia Iosepira ntapihi kyova qovarama viro Isipiqa ntaqikyirero varurave.

¹⁹ Mwiva hia tiri haivaqahuaqaa ntapihi kyero ntaqikyiqiro viraitiro, mwiva mwihua uaqiamaqiro viro tiqaro, Nkye nraaqiara mwata kyeta qaqira kyaivata qutu quate, turave.

²⁰ Perova mwitaa tuvaro tiri haivaqava mpovanto Mosesira mwata-tovaro mwiva nraaqiara kyuqeva varuvaro mwia nrova hia mwia qaqira kyaraitiro, tora taaramponramwuanra nraamwuqi mwia ujeta kye ntaqikyiqiro viro

²¹ mwiaqaatairo vitaqiro nramanri tokyani uro ujeta tovaro Perora nraamwunravanto mwia puaama kyero, Nte mwia virirerave, timwa kyero mwiva nai nraaqiaraqaa ntaqikyuntema kyero mwiaqaa ntaqikyiqiro vurave.

²² Ntaqikyiqiro vuvata Mosesiva ekyaa Isipi mwatanaa okyarave kyaiqave nraamwutovaro Mosesira kyaiqavantovata quavantovata anomia kyero kyuqe hurave.

²³ Qio Mosesiva 40 ihi vara kyero mwiva tiqaro, Kyai nte ntena nramwunaahua Isareru uro taqaankye, timwa kyero

²⁴ uro taqovaro Isipi vaisi mpovanto Mosesira nramwunaa mpo uaqlama mwate varuvaro Mosesiva nai nramwunaa mwia kyaara Isipi vaisi mwia ru kyero kyorave. Mosesiva nai riero tiqaro,

²⁵ Ni nramwunaahua nianra mwitaama tivarave. Tiri kyaahaqa hiarive tiro Kotiva titaiharo nrivave. Mwihua nianra, Mwi vaisiva mwaa kyaiqara uaqia hi kyaiqaraqitairo tiri huvantu timwataarivave tivarave, tiro. Mosesiva mwihua mwitaave tivarave tuvatavata mwia nramwunaahua hia mwitaa turave.

26 Varuvaro mwia qanranraa Mosesiva taqovata mwia nramwunaa Isareritanavanto nkyiaritana nraahu ntaqi varuvaro Mosesiva uro mwitanahuara tiqaro, Eqaate. Nkyetana mwaini riaate. Nkyetana kuaa nramwunavae. Nanraqamave nkyetana ntaqi variavo? tuvaro

27 vaisi mpovanto nai hena vaisi ri varuva Mosesira rataa kyero tiqaro, Tava iara tiriqa nronraqa hira ntaqikyante tiharave nrianro?

28 E enta Isipi vaisi mpo ru kyaarantema kyera nivata ru kyarerarave uti variaro? tiro.

29 Tuvaro Mosesiva mwi quara riero Isipisairo aatu ntuqema kyero uro mwata mpo Mitiaanini varurave. Mwini variqaro mwiva qoraisi nraaqiara taaratana mwatatorave.

30 Mwini variqiro vuvaro 40 ihi nritarovaro Mosesiva qumina mwatani Sainai taaqi nraaqani nrohiqaro taqovaro kyatari mpo qia ite varuvaro mwiqitairo Kotiva titova nyaamwunyaava qovarama vurave.

31 Qovarama vuvaro Mosesiva nrihanrama viro vaisairo kyatari ite varura taqarerave timwa kyero riovaro Kotira quavanto mwiqitairo mwia timwa mwinro tiqaro. Nte mwanriqvantove.

32 Nte nkyi haivaqahua Evarahaamunrave, Aisaakirave, Iaikopurave, mwihuaqaa ntaqikyi varuvave, tuvaro Mosesira mpoqama kyero kyuqu kyauqu ntuvaro mwi inraikyara taqaankyorave tiro aatu hi varuvaro

33 Kotiva timwa mwinro tiqaro, E varihana mwatara mwia kyotataqaave. Ena kyuqu nraamwuma taananra qatinani vara kyera sivira variante.

34 Nte taqauqata Isipivanto ni nraakye qora uaqama nyate variavo. Ni nraakye qoravanto atura ntiqata qiara nte riena mwihua kyaahaqa hirerarama tumuqo. Qio nrinraqena nte i Isipini titaankye, turave.

35 Qio mwi vaisira Mosesira tauraa Isarerivanto mwia goririma kyeta tiqata, Tava i vara nronraqama kyero tiriqa ntaqikyante tiharave nrianro, tu vaisira, mwi vaisira Kotiva nronraqama kyero tiri haivaqahua kyaahaqa hirero mwihuaqaa ntaqikyiarive tiro, mwia titorave. Kotiva titova nyaamwunyaava qia ito kyatariraqi variqaro Mosesira Kotira qua timwa mwuvuro

36 Mosesiva vuva uro tiri haivaqahua Isipiqitairo sitarera hiro Isipiqivata kyaarerira Nraanre nramanriqiaavata qumina mwatanivata nronra kyaiqa varaqiro vurave. Qumina mwata mwiaqaa 40 ihiara nronra kyaiqa varaqiro viqaro tiri haivaqahua sitaqliro nrumu mwaini kyorave.

37 Qio mwi vaisiva Mosesiva Isarereri nraakye qora timwa nyinro tiqaro, Kotiva ni titaintema kyero vaisi mpo titairaro mwi vaisiva Kotira qua qiananrove. Mwi vaisiva nkyiqitairoma qovara hiananrove, turave.

38 Tiri haivaqahua mwihua hia vaisivantovata varu mwatara qumina mwataqaa variqi vuvaro Mosesiva mwihuaavata varurave. Mwiva tiri haivaqahuaavata varuvaro nyaamwunyaava Sainai taaqiqaa variqaro Mosesira timwa mwuvuro mwiva Kotira qua qati vahiqiro quani quara vareror tumu mwi quara tiri haivaqahua timwa nyunrave.

39 Mwiva Kotira qua varero tumu tiri haivaqahua timwa nyuvata mwihua hia mwi quara riarerave timwa kyeta Mosesira qua raaquta kyeta qaiqaa Isipini quataa huvata varurave.

40 Qio (Kotiva mwia nraanrovaro Mosesiva Sainai taaqiqaa mwaanri ntero uvata) mwihua Eroninra (Mosesiva tauraa varuvaro mwiva mwia nraakiara varurara) tiqata, E tirini mwanriqa mponramwu ututairata mwihua tiri tivuni viqata tiriqa ntaqikyiate. Mosesiva tiri Isipisairo tivitaqiro nriva nai tainive viho? turave.

41 Mwitaa timwa kyeta mwihua qati inraikyaqo purimakau nraati utu kyeta mwi inraikyarara mwanriqave timwa kyeta mwi inraikyara

qamwata mwatarerata nkyiari quara ru kyeta qia quara mwatorave. Mwihua mwitaa hiqata nkyiari kyauquqotaita ututo inraikyara nrutu tuaherarerata omwatavata nronrave.

42 Mwitaa huvaro Kotiva mwihua taqero mwoqa nyinro nkye uaqia hi kyaqira utuqita quate tuvata mwihua qumina nyaamwuqi vahi inraikyara huarive, torave qovorave, mwi inraikyarara mwanriqvantove timwa kyeqata qamwataqita vurave. Poropeti mpukuqi Kotiva mwitaama tiro: Isareri nraakye qora tuaavo,
nkye 40 ihiara qumina mwatani nrohiqatama
nkye hia nini sipisipive purimakauve
ru kyeta qia quara matorave.

43 Qaqao, nkye nkyeta mpo inraikya mpo inraikya ututo inraikyarara quara rukyeta qia quara mwate varurave. Nkye qumina mwatani nrohiqata mwanriqa mpo mwia nrutu Morokura nkye mwia seri nraamwu vara qu vareqata nrohi varurave.
Mpo inraikya nkye qovora mwia nrutu Repaninra nkye mwiavata vareqata nrohurave.
Mwi inraikyarara mwanriqave timwa kyeqata qamwata mwatarerata utu torave.
Qio mwia kyaara nte nkyi nyianra
Papironi mwia mwoqani vahi mwatarani
sitaarita vivarave, turave.

(Emosi 5:25-27)

Kotiva mwitaa turave.

44 Qio tiri haivaqahua qumina mwatani hia vaisivantovata varu mwataraqaa variqi viqata mwihua seri nraamwu Kotira nraamwu vareqata nrohurave. Mwi nraamwunranra Kotiva Mosesirara mwataa mwataama kyera ututaante tuvaro ututorave.

45 Mwia nraakiara tiri haivaqahua mwi nraamwunra nkyiari so-huamwanraqaataita vara kyeta varaqi viqata mwihua Iosuaara vatama kyeta vi varuvaro Kotiva mpo mwatanaaa mpo mwatanaahua qatinani vara kyovat tiri haivaqahua mwihua nraatara kyeta mwihua mwata varorave. Qio tiri haivaqahua seri nraamwu mwipi variqi vuvaro tiri haivaqava Ntevitiva varu entava nri ntorave.

46 Nri ntovaro Kotiva Ntevitirara qamwateqaro varuvaro Ntevitiva Kotirara tiqaro, E tiri haivaqara Iaikopuraqaa ntaqikyi variaravave. Qiove nte ini nraamwu hoqa mwataaninrave? tuvaro Kotiva qaqao tiro, I mwaaquvanto hoqa mataarive, tuvaro

47 mwia mwaaquvanto Soromoniva Kotira nraamwu hoqa mwatorave.

48 Qio riaate. Kotiva mwiva kepukyavanto nyaamwuni variva mwiva hiama qumina vaisivanto hoqataa nraamwunraqi variananrove. Kotiva nai poropeti vaisi timwa mwinro tiqaro:

49 Nyaamwuvanto nte mwata kyaavina variqana
ekyaa inraikyagaan ntaqikyiari taintavama vaiho.
Mwatavanto nte kyuqu mpiami vataarivama vaiho.
Nkye nanra nraamwuve hoqa matevarave?
Hiama nte variani nraamwunra nkye qio hoqa tevarave.
Hia nte qio nraamwuqi varianinrave.

50 Qutaave nte ntena kyauquqotaina ekyaa mwi
inraikyara utu kyena vataurave? turave.
Kotiva mwitaa turave.

(Aisaiaa 66:1-2)

51 Nkye Kotira qua hia riaataa ihata hia riaavo. Nkyi mwutukyave nkyi nyaatovanto unra mwanriqanra vaiho. Nkyi mwutukyavanto hiama Kotirara vaiho. Nkye nkyeta haivaqahua nraantanteta Kotira mwanraqurara hia kyakya ihatama variavo.

52 Nkyi haivaqahua Kotira qua tu vaisihua ekyaa mwihua uaqiana nyatorave. Kotira qua tu vaisihua takuravata hia uaqiana nyatorave, ekyaa mwihua uaqiana nyatorave. Kotira qua tu vaisihua haaru qumina vakya Kotira qua tiqata, Kotira kyaiqa vaisivanto ntapihi kyero nrohi variari vaisiva mwatanai tumuananrove, tuvata nkyi haivaqahua mwitaa tu vaisihua ru kyontema kyetama nkyevata ntapihi kyero nrohi vari vaisiva mwiva mwatanai tumihatama nkye mwivata uaqiana mwatetama mwia ru kyeta hiavo.

53 Nyaamwunyaahua Kotira qua mwaanra nkyi timwa nyi variavata nkye Kotira qua mwaanra riaataara vaihatama nkye hia mwi quara rieta hiavo, tiro.

Oriqotaita Sitiveninra ntuqutu kyora

54 Sitiveniva mwitaa tuvata kaanasori vaisinramwu mwii quara ri ovaro mwihua mpoqama kyero raraqa tovata nkyiari aanrai kuti varuvaro

55 Kotira mwanraquravanto Sitiveninra mwiaqaa ntaqikyiqaro kepukyaqama mwatovaro Sitiveniva nyaamwuni vuru taqovaro Kotiva hu inraikyava itero takyuqi varuvaro Iesusiva Kotira kyauqu kyaatutani siviro varuvaro

56 mwiva tiqaro, Qio taqaate, nyaamwuvanto qatua viharo nte taqe varuvaro Iesusiva mwatanai mwatatai nraaqiarava, mwiva Kotira kyauqu kyaatutani kepukyavanto siviro variho, tiro.

57 Sitiveniva mwitaa tuvata mwihua tiqata, Tire mwiva uaqia hi ququaarura tira riaarorave, timwa kyeta kyauqo nkyiari nyaato titateta qua aakyara ntamwaqi vita uro

58 Sitiveninra ntavaaqavu kyeta uro Ierusaremi mwaaqani kyeta ori vara kyeta mwia ntuqutuqi vita uro mwia aavata ntuqutu kyora.

Sitiveninranra vaakya unra qua tuhua oriqotaita mwia ntuqufirera hita mwihua nkyiari vaqa qatinani vara kyeta uro

59 qaraakya vaisi mpo mwia nrutu Sorura kyuqutarani vateta uro Sitiveninraaqaa ori kyarerata vuvaro Sitiveniva Kotirara aakyara ntero tiqaro, Qio nronrao, Iesusio, Ni manraqura vitaante, timwa kyero

60 mwiva tori kyauru raviro paatiro aakyara ntero tiqaro, Nronrao, hia mwihua uaqia hi inraikyara utuara kyaara mwihuaqaa qua vataante, tiro. Mwitaa timwa kyero mwiva qutu vura.

8

1 Qio Sitiveninra ntuquti varuvaro Soruva mwini variqaro mwia qiomar ukyeverave tura.

Soruva Iesusira nraaqiara ru taiqa kyarero uti varura

Qio mwihua Sitiveninra rukyeta mwi entaraqaataita mwihua Iesusira nraaqiaranramwu mpoqama kyeta uaqiamaqita vura. Uaqiamaqita vұvata Iesusira nraaqiara Ierusaremini varuhua tirivata rivorave timwa kyeta Ierusaremi mwini kyeta Iutia mwatanai mpo mwatukya mpo mwatukya vura.

Mponramwuvanto Sameriaani uro varuvata Iesusiva nronraqama kyo vaisinramwuhua nraahu Ierusaremini varura.

2 Vaisi mponramwu Kotira quara mwutukya ntuhua Sitiveninra mwamwanta varaqita ntataqi vita uro quntamwa kyora.

3 Mwia quntamwa tovaro Soruva Iesusira kyaiqavata, Iesusira quavata, taiqa kyarero uti variqaro mwiva uro mpo nraamwu mpo nramwuqitaiqaro Iesusira nraaqiaraqahuhua vaisivata, nrahesivata, ntavaaqavuqiqaro karavuqi kyora.

Sameriaani Iesusira qua uro timwa nyunra

4 Soruva mwitaamaqiro vuvata Iesusira nraaqiaranramwuvanto Ierusaremigita mpo mwatukya mpo mwatukya nrohiqata Iesusira mwakyaakyä timwa nyi varuvaro

5 Piripivavata vevara Sameriaani uto mpo mwatukyaqì variqaro mwi mwatanaahua timwa nyinro tiqaro, Iesusiva mwiva Kotiva titava mesaiaavantove,

6 tuvata nraakye qoravanto riovaro mwiva kyuqe qua timwa kyeqaro nronra kyaiqavata vare varuvatara tita, mwihua mwia qua nrumu tirema variqata kyuqema kyeta rie varura.

7 Rie varuvata vaana mpoohuavata qua aakyara nteqata mpo vaisinramwuqitaita nritarovalo Piripiva airi nriqa vuhuave, mwamwanta hia qakyaah uhuave, kyuqu uaqlama vuhuave, kyuqema nyatero.

8 Mwitaamaqiro vuvata mwi mwatukyaraqinaahua mpoqama kyeta qamwateqata varura.

9 Mwi mwatukyaraqinaa vaisi mpovanto mwia nrutu Saimonivave tuva varura. Mwi vaisiva vuhaa pahaave, quaha utua kyaiqarave, varaqiro vuvata Sameriaavanto mwia kyaiqara kyauqu ntukikinraaqate varuvaro mwiva tiqaro, Nte nronravantove,

10 tuvata mwi mwatanaahua nronra vaisivata, pata vaisivantovata, mwianra nronraqama kyeta riemwaqi viqata mwi vaisirara mwiva Kotira kepukyia inraikya varavave tuvaro

11 mwi vaisiva airi enta quahave mpo kyaiqa nronra kyaiqa varaqiro vuvata mwi mwatanaahua kyauqu ntukikinraaqate varura.

12 Mwitaa hi varuvaro Piripiva nri ntero kyuqe mwakyaakyä Kotiva ntaqikyianinranrave, Iesusiva Kotiva titava mesaiaavanto varianinranrave, timwa nyuvata mwihua mwi quarara quataave timwa kyeta mwihua nraakyevantovata vaisivantovata nramanri varora.

13 Saimoniva mwivavata mwi quara riero quataave timwa kyero mwiva nramanri varero mwiaqatairo mwiva Piripikyantiri variqaro Piripiva nronra kyaiqa varorara mwiva nai kyauqu ntukikinraaqate varura.

14 Qio Iesusiva nronraqama kyo vaisinramwuhua Ierusaremimi variqata riovata Sameriaavanto Kotira quara qamwateqata variavo tuvata mwihua Pitaakya Ionikya sitovata

15 mwitanahua uro nteta mwi mwatanaahuavata variqata mwihuavata Kotira mwanraqura varaate tita, Kotirara aakyara ntora.

16 Mwi entara mwi mwatanaahua tire Iesusira nraaqiara varirerave tuhua nramanri nraahu nyuhua variqata hia Kotira mwanraqura varovata

17 Pitaakya Ionikya Kotirara aakyara nteqata nkyiari kyauqu mwihuqaqaa vatovata mwihua Kotira mwanraqura varora.

18 Mwitaa huvaro Saimoniva taqovata Iesusiva nronraqama kyo vaisitanahua nkyiari kyauqu vaisiqaa vatovata mwi vaisihua Kotira mwanraqura varovaro Saimoniva taqovaro mwia mwutukya ntuvardo mwiva munima varaqiro mwitanahua nyinrenro hiro tiqaro,

19 Munima mwaa varetama nivata nronraqama kyaivaqenama ntevata ntena kyauqu vaisiqaa vataarita mwihua Kotira mwanraqura varaate, tiro.

20 Mwitaa tuvaro Pitaava mwia timwa mwinro tiqaro, I qua uaqia hi quarama vaiho. Ena qua kyaara ena munima mwia vatama kyera vira taiqa

quante. Kotira mwanraqura hiama munima kyera varenanrave. Kotiva nai mwanraqura nraakye qora qatima nyi variho.

21 Kotiva taqaiharo i mwutukyavantovata i vu nraatovantovata uaquia-mama vaiho. Mwitaa hirara tira, e hiama qio tire varaana kyaiqara evata varenanrave.

22 Qio ena uaquia hi kyaiqara utinanra qaqlira kyaante. Mwia qaqlira kyera Kotirara aakyara ntairaro mwiva qiove tirera, e uaquia hi kyaiqara utuana quava taiqa quananrove.

23 Nte taqauqara e mpovama kyera mwutukya ntihara vairiqahi variara vaisivave. Uaquia hi kyaiqava i ntavaaqavu kyaihara e uaquia hi kyaiqara uti variaro, tiro.

24 Pitaava mwitaa tuvaro Saimoniva Pitaakya Ionikyara tiqaro, Qiove nkyetana nianra rieqata Kotirara aakyara ntaivaro nkyetana nianra timwataa quava hia qovara hiarive? tiro. Saimoniva mwitanahuara mwitaa tura.

25 Pitaakya Ionikya nraakye qora Iesusira quave Iesusira okyararare timwa nyita mwiaqaataita mwitanahua tumu ntanteta verara Ierusarem-inianra vura. Mwitanahua mwianra viqata Sameriaani vahu mwatuk-yara mponramwuqi viqata Iesusira qua kyuqe qua timwa nyiqita vura.

Piripiva uro Itiopia nronra vaisi mpo timwa mwu quara

26 Qio Piripiva Sameriaani varuvaro nyaamwunyaava Kotira kyaiqa vaisi mpovanto Piripira timwa mwinro tiqaro, E sivira vevara Ierusaremisairo Kasaanianra vi aanranraqaa quante, tura. Mwi aanranraqaa hia airi vaisivanto vita nrita hu aanrava vahura.

27-28 Piripiva siviro vuva uro ntero taqovaro Itiopia vaisi mpovanto aanraqaa varura. Mwi vaisiva nronra vaisivanto variqaro mwiva nai vunyaa nraakye mwia nrutu Kantesira mwia kyaiqa varaqiro viqaro munimave taakisi kyaiqaqaa ntaqikyi varuva, mwiva uro Ierusaremini Kotira nrutu tuaahera kyero mwiaqaatairo uro ntantero vevara nai mwaatani virero aanrani viro.

Mwiva aanraqaa viqaro qosivanto ntanrau vare vuraqi mwatakyaa viro variqaro Aisaiaava poropetivanto qara ntumwa toraqi kyaara nti varura.

29 Mwi mpukuraqi kyaara nti varuvaro Kotira mwanraquravanto Piripira timwa mwinro tiqaro, Uro qosivanto ntanrau varero nrinra mwia hunta kyaante, tuvaro

30 Piripiva hiantero uro ri ovaro mwi vaisiva Aisaiaava poropetivanto qara ntumwa toraqi kyaara nti varuvaro Piripiva mwia kyapara hiro tiqaro, E kyaara ntiqara mwi quara okyara ntapihirave hiaro? tiro.

31 Mwitaa tuvaro mwiva tiqaro, Hia mpovanto ni kyaahaqa hirage nte nataama kyenave mwi quara okyara ntapihianinrave? E mwaaqi mwaanri ntera nivatama kyera variqarama ni kyaahaqa hiante, tiro.

32 Qio mwi vaisiva Aisaiaara mpukuqitairo mwaa quara kyaara nti variro:

Sipisipi quara ru kyareru utiharo sipisipivanto
hia qua tintema kyero mwivavata hia qua tiho.
Sipisipi nraati kyaahi teqe variavaro sipisipi nraativanto
hia qua tintema kyero mwivavata
(nai nramwutaahua suqaa variqaro) hia qua tiho.

33 Mwia uaqiamma mwateqata
hia mwia qua ntapihi kye riaarave.
Mwia ru kyaavarora tiro,
mwiva mwata humwuanrama taarihua hia varivar
hia mpovanto mwihuara qiarivavata variananrove,

tura.

³⁴ Qio mwi vaisiva mwi quara kyaara ntumwa kyero Piripira kyapara hiro tiqaro, Mwaa quara ta vaisirara turave? Aisaiaava nanrianra turave iho? Mporara turave iho? tiro.

³⁵ Tuvaro Piripiva timwa mwinro tiqaro, Mwi quara Iesusirara timwa tairave, timwa kyero mwiaqaatairo mwiva Iesusira okyara kyuqe qua mwia timwa mwinro.

³⁶ Aanraqaa vuhua nramanri rumpua mpotua vahunani uro ntovaro Itiopia vaisi mwiva tiqaro, Qio taqaante. Mwaa nramanrima vaiho. E qiove tirera, nte nramanri varaankye, tiro.

³⁷ [Mwitaa tuvaro Piripiva tiqaro, E ena mwutukyaqitairave vu nraato-qitairave quataave tirera, qiomia e nramanri varenanrave, tuvaro mwiva tiqaro, Qio nte qutaama Iesusirara mwiva Kotira mwaaqueve tuqo, tiro.]

³⁸ Mwitaa timwa kyero mwiva nai kyaiqa vaisiara tiqaro, Qosi mwia ntavaaqavu taivaro mwaato variarive, timwa kyero mwiva Piripika nramanriqi mwaamwi ntovaro Piripiva mwia nramanri mwunra.

³⁹ Nramanri mwi kyero mwitanahua nramanrigitai mwaanri ntovaro mwiaqaatairo Kotira mwanraquravanto Piripira vitero vuvaro Itiopia vaisivanto hia mwia qaiqaa taqaraitiro, mwiaqaatairo mwiva qamwataqiro qaiqaa nai mwaatiananra vurama.

⁴⁰ Mwiva vuvaro Kotira mwanraquravanto Piripira vitaqiro uro Asatoti mwatukyaqaa kyovaro Piripiva ntapihi kyora. Mwiaqaatairo mwiva mpo mwatukya mpo mwatukya variqiro viqaro Iesusira qua timwa nyiqiro viro Sisariaani uro ntora.

9

Soruva Iesusira nraaqiaraqama vu quara

(*Kyaiqa Varora 22:4-16, 26:9-18*)

¹ Qio Soruva Ierusaremini variqaro Jesusira nraaqiaraqama vuhua ru kyaani quara timwaqiro viro mwiaqaatairo uro Kotira nraamwuqi Kotira kyaiqa varu mwate varu vaisihua mwihua nronra vaisiara tiqaro,

² Qara ntumwa kyera ni mpiraqena nte Ntamaasikaasi mwatukya nronraqi uro mwaanra nraamwuqaa ntaqikyihua nyianrita mwihua taqaivata Jesusira nraaqiara Jesusira aanraqaa vihua varivera, nte mwihua vaisive, nraakyeve, rupa kyena sitaqina mwaini Ierusaremini nrumu karavuqi kyaaqkye, tiro.

³ Mwitaa timwa kyero Soruva qaravata varero Ntamaasikaasi mwinianra viro. Qio Ntamaasikaasi qaumato aanraqaa vi varuvaro qamwanrama kyero nyaamwusairo omwavanto aaquakyya voti huva Soruva vi varunani itovaro

⁴ Soruva mwatasata tumu ntiro variqaro riovoro qua mpovanto mwia nraanrenro tiqaro, Soruo, Soruo, nanra kyaarave e ni uaqiamma mate variaro? tiro.

⁵ Mwitaa tuvaro Soruva tiqaro, Nronrao, e tavave? tuvaro quavanto mwitaama tiro: Nte Iesusivave. Nte e uaqiamma mate variarava mwivama huqo, tiro.

⁶ Mwitaa timwa kyero tiqaro, Qio sivira mwatukyaq viraro mpovanto e mwitaa mwitaa hinanranra i timwa mwianrive, tiro.

⁷ Quavanto mwitaa tuvata Soruravatama kyeta nruhua qua nraahu rieta hia vaisi virivata taqaraitita, qio mwihua qati mwito varita aatu hi variqata hia quavata tura.

⁸ Mwihua hia quavata tuvaro Soruva mwataqaatairo siviro taqaankye tuvaro mwia vuvanto qipa vuvaro hia qio taqero. Hia qio taqovafa mwia

vatama kyeta nruhua mwia kyauqu tu vareta Ntamaasikaasini vitaqita uro kyora.

⁹ Mwini uro kyovaro Soruva taarampo entara vu qipa vuvaro variqaro kyaravata nramanrivata hia nronra.

¹⁰ Mwitaama varuvaro Jesusira nraaqiara mpovanto Ntamaasikaasini varura. Mwi vaisira nrutu Ananaiaasiva, mwiva variro ruvaata votima kye taqe varuvaro nronravanto mwia nraanrovoro mwiva tiqaro, Nronrao, nte mwaa varuqo, tuvaro

¹¹ nronravanto mwia timwa mwinro tiqaro, Mwatukyani aanra mpo mwia nrutu *Ntapihikye Vahi Aanranrave* qianani viravama Iutaasira nraamwu quesana uro ntera vaisi mpo mwia nrutu Soruva mwiva Tasaasinyaa vaisi qio mwianra uro kyapara hiante.

¹² Soruva nianra aakyara nte variqaro ruvaata votima kye taqaihara e Ananaiaasiva uro ntera mwiva qio taqaarive tira ena kyauqu mwiaqaa vataararo mwiva qio taqaiho, tiro.

¹³ Mwitaa tuvaro Ananaiaasiva tiqaro, Qaqao, airi vaisivantoma mwi vaisira okyara ni timwa mpiavana riaurave. Mwi vaisiva Ierusalemini variqaro i nraaqiara ntapihi kyeta nrohi variahua airi uaqlama nyate varivave.

¹⁴ Kotira nraamwuqi Kotira kyaiqa vara mwate varia vaisihua mwihua nronra vainsinramwuvanto mwia qara mwiavarro mwiva mwihuaqaatairo kepuuya varero mwaini Ntamaasikaasini i nrutu nte variahua ruparero nratvave, tiro.

¹⁵ Ananaiaasiva mwitaa tuvaro nronravanto mwia timwa mwinro tiqaro, Qio hia aatu hiraitira mwini quante. Ntenavanto mwi vaisira mwatama tauqaro mwiva nte mpo inraikyaqo kyaiqa varaani inraikyara kyugera voti hiarivama variananrove. Mwiva ni kyaiqa vaisi variqaroma mwiva mpo mwatanaa mpo mwatanaave, vunyaa vainsinramwuve, Isarerri nraakye qorave, mwiva mwihua ni nutu timwa nyiananrove.

¹⁶ Nraakiara mwiva nianra rieqaro ni kyaiqa varaqiro viro mwia kyaara nriqa quani inraikyara, mpo inraikya mpo inraikya varaananrove. Qio nte mwi okyarara ntenavanto mwia nraamwutarerave, tiro.

¹⁷ Mwitaa tuvaro Ananaiaasiva uro mwi nraamwunraqi vera ntero nai kyauqu Soruraqaa vatero mwia timwa mwinro tiqaro, Ni katao, Soruo, nronravanto Jesusiva e mwainianra nriqanra taqaarava mwivama ni titaiho. E qaiqaa qio taqairaro Kotira mwanraquravantovata i utaqi kepuuyaqa hiqaro variarive tiro, mwiva ni titaihanama nruqo, tiro.

¹⁸ Mwitaa tuvaro qamwanrama kyero Sorura vuqaatairo eqarori inraikya tonamwu voti huva vi vuvaro mwiva qio taqevaro siviro varuvaro Jesusira nrutuara nramanri mwunra.

¹⁹ Mwuvaro mwiaqatairo mwiva kyaravata nrenro qio mwiaqatairo kepuuya varero varura.

Soruva Ntamaasikaasiqi Kotira qua timwa nyunra

Mwiaqatairo Soruva Ntamaasikaasiqi mpo entanramwu Jesusira nraaqiaranramwu kyapata varura.

²⁰ Mwini variqaro qamwanrama kyero mwiva Iuttaa mwaanra nraamwu mpoqi mpoqi vera ntero Jesusirara timwa nyinro tiqaro, Qutaama mwiva Kotira mwaaqu variho, tiro.

²¹ Mwitaa tuvata mwihua mwia qua rieta nrihanrama vita nai kyapara hi nai kyapara hita tiqata, Qutaa mwi vaisivave Ierusalemini variqaro Jesusira nraaqiara uaqlama nyate varirave? Qutaa mwivave Jesusira nraaqiara rupa varero uro Kotira nraamwuqi Kotira kyaiqa vara mwate

varia vaisihua mwihua nronra vaisinramwu nyinrenro mwaini nrivave? tita.

²² Mwitaa ti varuvaro Sorura quavanto mpogama kyero kepukyaqa hi varuvaro Soruva tiqaro, Iesusiva mwivama mesaiaavantove, timwa kyero mpo qua mpo quaqitairo Iesusira mesaiaa okyarara nyaamwutovata Iutaa vaisinramwu Ntamaasikaasini varuhua mwia qua nraatara kyaare tita taqovarovata Sorura quavanto nraahu mwihua qua nraatara kyora.

²³⁻²⁴ Mwitaa ti varuvaro mpo entanramwu nritarovata Iutaa vaisinramwu ntuvantuama vita variqata Sorura ru kyerara qua timwa kyeta vateta mwia entaqivata, qaataatoraqaaavata, vasaamwunra quesana vaimwanraaana ntaqikyl varura. Mwitaama varuvaro Soruva nai ru kyerera hu quara vaakya riovata

²⁵ mwia wataqita nrohu vaisihua mwia kyaahaqa hiqata mwia tua nronraqi ntumwa kyeta ori vasaamwunraqitaita kyaantaqaama kye mwaati qatinani kyovaro vura.

Soruva Ierusaremimi vura

²⁶ Soruva Ierusaremimi vuva uro Iesusira nraaqiara mponramwu kypata kuairama quankye tuvata mwihua qaqao e hia Iesusira nraaqiara variaro timwa kyeta Sorura nraatu aatu hiqata varura.

²⁷ Mwia nraatu aatu hi varuvaro Vanavaasiva mwia kyaahaqa hirero nri ntero Sorura vita varero uro Iesusiva nronraqama kyonramwuhua varunani kyero Vanavaasiva Sorura okyarara mwihua timwa nyinro mwiva Soruva aanraqaa viqaro Iesusira taqo quara timwa nyinro Iesusiva Sorura qua timwa mwunranravata timwa nyinro. Mwiva Soruva Ntamaasikaasiqvata variqaro Iesusira nrutu nteqaro kepukyaqama kyeqaro Jesusirara mwi mwafanaahua timwa nyunrahavata mwihua timwa nyinro. Vanavaasiva Sorura okyarara mwihua ntapihi timwa nyuvata mwihua mwiaqataita qiove tita.

²⁸ Mwihua qiove tuvaro Soruva mwihua kyapata variqaro Ierusaremimi nrohiqaro hia aatu hiraitiro, Iesusira nrutu ntamwa kyeqaro Iesusira qua mwi mwatanaahua timwa nyunra.

²⁹ Mwitaamaqiro viqaro mwiva uro Kiriki mwataqaa Iutaa vaisi varuhua kyapata variqaro qua timwa nyinro kepukyaqama kyero ti varuvata mwihua rieta mwia ru kyarerata uti varura.

³⁰ Sorura ru kyarerata uti varuvata Iesusira nraaqiaranramwuvanto Sorura qata vakyaqa uhua mwi quara rieta, mwihua Sorura kyaahaqa hiqatama mwia vitaqita uro Sisariaani kyeta titovaro mwiva nai mwaata Tasaasini vura.

³¹ Soruva mwini uro varuvata Iesusira nraaqiaranramwuvanto Iutaaani varuhuave, Karirini varuhuave, Sameriaani varuhuave, mwihua qio mwaateraqama vita varuvaro mwi entara hia mpovantovata mwihua qoraqama nyate varuvata mwihua Iesusira kyaiqara kepukyaqamaqita viqata mwihua Kotirara nronraqama kyeta riemwaqita uvuro Kotira mwanraquravanto mwihua kyaahaqa hi varuvata airivanto nrita Iesusira nraakyе qoraqama vita varura.

Pitaava mpo mwatukya mpo mwatukya vura

³² Qio Pitaava Iesusira nraaqiara kyaahaqa hirero mpo mwatukya mpo mwatukya nrohiro. Nrohiqaroma mwiva Iesusira nraaqiara mponramwuvanto Rintaani varuhua uro taqarero vura.

³³ Pitaava mwini uro ntero taqovaro vaisi mpovanto mwia nrutu Iniasiva varura. Mwi vaisiva hia mwia mwamwantavanto qakyaa huvaro

variqaro mwiva 8 ihi vara kyero taintaqaa nraahu vaiteqaro varuvaro Pitaava uro ntero mwianra tiqaro,

³⁴ Iniaasio, Jesusi Karaisiva qjoma i kyuqema kyaananrove. E sivira ena tainta ntapihante, tuvaro mwí vaisiva qamwanrama kyero siviro.

³⁵ Sivuvata Rintaaqinaahuavata, Seroniqinaahuavata, taqovaro mwi vaisiva qati siviro varuvata mwiaqataita mwihua Iesusira nraaqiara varirerata Kotirara aakyara ntora.

³⁶ Mpo mwatukya Iopaani Jesusira nraaqiaraqitairo nraakye mpovanto mwia nrutu Tavitaava varura. Mwia nrutu mwia Kiriki quaqitaita tirerata Ntokaasivave tura. Ntokaasiva kyuqe nraakyevanto variqaro vehi nraakye qora kyaahaqa hirero kyaiqa vara nyate varu nraakyeva varura.

³⁷ Qio mwi entara mwi nraakyeva nriqa vu inraikyara varero qutu vuvata mwia nramwunaahua mwia varaqita mwia nramanri ntumwa kyeta qapugama kyeta nraamwu mpontuna mwaanrinra mwoqqaqah vahuraqi uro vatora.

³⁸ Iopaani varuhua rioraro Pitaava vainsi Rintaani varuvata mwihua vaisi taaratana mwini siteta tiqata, Nkyetana Pitaarara mwitaama qiate. Hiantera mwaini tire varunanrani nriante qiate, tuvata mwitanahua uro Pitaara timwa mwuvaro

³⁹ Pitaava siviro mwitanahua vata nrinro.

Pitaava nri ntovata mwihua mwia vita vareta verara nraakye vatoraqi vera ntovaro Pitaava taqovata airi nraakye tetogavanto Pitaara taqeta ntateqata Ntokaasiva qati varu entara mwihua haqirama nyu tuavaaqar-ave siotive, mpo inraikya mpo inraikyavata Pitaara nraamwute varura.

⁴⁰ Nraamwutovaro Pitaava ekyaa mwipi varuhua sita mwaatani veva kyero mwiva mwipi variqaro tori kyauru raviro Kotirara aakyara ntero. Kotirara aakyara ntamwa kyero mwiva tuqasaa viro qutu vurara tiqaro, Tavitaao, siquante, tuvaro mwi nraakyeva qutu vuraqitairo vu ntapairi kyero Pitaara taqero qio mwiaqatairo qati siviro mwaamwianrama viro varuvaro

⁴¹ Pitaava nai kyauqu tutu kyero mwia kyaahaqa huvaro mwiva qio siviro. Qio sivuvato Pitaava Iesusira nraaqiaranramwuvata, tetoga nraakyenramwuvata, nyaanrama kyero qutu vu nraakyera nyaamwutovata mwihua taqovaro mwi nraakyeva qati siviro varura.

⁴² Mwi nraakyeva qati siviro varuvata mwi quara timwaqita vuvata Iopaaqinaa nraakye qora airivanto mwi quara rieta qio mwiaqataita airi vaisivanto Iesusira quara quitaave tura.

⁴³ Qio Pitaava Iopaaqi airi enta variqaro Saimoninra nraamwuqi varura. Saimoniva purimakau pahiqa kyaiqa varo vaisiva varura.

10

Pitaakya Koniriaasikya

¹ Sisariaani vaisi mpovanto varura. Mwia nrutu Koniriaasiva (mwiva hia Juttaa vaisi variraiiro) mwiva Romeri ntaqu vaisihu vatova variqaro mwiva 100 ntaqi varu vaisihuqaa ntaqikyi varuvata mwi vaisinramwuhua Itarisaita nruvatara tita, mwihuara Itarinyaahua ntaqua vaisihuave tura.

² Koniriaasiva Kotirara aakyara nte varu vaisiva variqaro mwivavata, mwia nraamwuqi varuhua vata, Kotira nrutu tuaahere varura. Mwiva lutaai nraakye qora vehi varuhua kyaahaqa hiqaro variqiro viqaro Kotirara ekyaa enta aakyara nte varura.

³ Qio mpo enta enrenro 3 kirokiqa huvaro Koniriaasiva qati variqaro ruvaata voti hora taqero. Taqegaroma mwiva ntapihi kyero taqovaro

nyaamwunyaava Kotiva titova viqetero mwianra tiqaro, Koniriaasio, tuvaro mwiva nyaamwunyaanra mwianra aatu hiro

⁴ mwia aitutuma kyero tagero tiqaro, Nronrao, nanrave? tuvaro nyaamwunyaava mwiva tiqaro, E Kotirara aakyara ntaana quarave, e mpo-hua kyaahaqa hiananrave, Kotiva mwianra qamwateqaro iara rieqaroma variho.

⁵ Qio vaisi mponramwu sitairata mwihua Iopaaqitaita vaisi mpo mwia nrutu Saimoni Pitaara uro vitaate.

⁶ Pitaava vaisi mpo vatama kyero variho. Mwi vaisiva Saimoniva purimakau pahiqa kyaika vare variva, mwiva nai nraamwuqi verara kyaarerar tokyasataa variho, tiro.

⁷ Mwitaa timwa kyero nyaamwunyaava vuvaro Koniriaasiva mwiva tuntema kyero nai nraamwuqi kyaika varo vaisitanahua nyaanrama kyero ntaqu vaisira mpo, mwiva Kotirara aakyara nte varu vaisiva nai kyaahaqa hi varu vaisira mwiavata nraanrenro.

⁸ Koniriaasiva mwi vaisinramwuhua nyaanrama kyero vaakya taqorara mwihua timwa nyinro qio mwihua Iopaani sitero.

⁹ Sitovata mwia qanranraa aanraqaa Iopaa qaumato vi varuvaro Pitaava Iopaani variqaro huarivanto virira qiatqa vahuvaro mwiva nraamwu mwoqa tahiporaqa mwaanri ntero Kotirara aakyara ntarero viro.

¹⁰ Mwini mwaanri ntero nraamwuqaa variqaro kyara nraataa huvaro kyara tera hi varuvaro mwia vekya variqaro ruvaata voti hura taqero.

¹¹ Pitaava taqovaro nyaamwuvanto qatua vuvaro mwiqitairo taari voti hura ekyaa mwia vitiqaa rupatova tumuqata tumuqata tiro tumu ntora.

¹² Taari mwipi Pitaava taqovaro mpo vahi aasau, mpo vahi aasau vahura. Quarave, garurave, nyaamwave, mwi inraikyaya mwi inraikyaya mwipi vahuvaro

¹³ quavanto Pitaarara tiqaro, Qio sivira ru kyera nraante, tiro.

¹⁴ Tuvaro Pitaava qaqao tiro, Nronrao, hiave. Tire tetu mwaanra okyara rieqatama mwi inraikyarara uaqia hi inraikyarave timwa kyeta hia nraunanrave, tiro.

¹⁵ Mwitaa tuvaro quavanto qaiqaa tiqaro, Kotiva kyuqe inraikyave tirara e hia uaqia hi inraikyarave qianté, tiro.

¹⁶ Tuvaro Pitaava kuaa qarama kyero nraahu ruvaata mwia taarampo nani taqovaro mwiaqaatairo taari mwia varero tumu ntantero nyaamwuni vura.

¹⁷ Mwitaa huvaro Pitaava ruvaata voti hura mwia taqorara nraato ti varuvata Koniriaasiva sitonramwuhua mwi mwatukyaraqi nri nteta Saimoninra nraamwuanra kyaparama kyeta uro mwia nraamwunra quesana variha

¹⁸ aakyara nteta tiqata, Saimoniva mwia nrutu mpo Pitaavave qiaava, mwaa nraamwunraqive nrumu variho? tita.

¹⁹ Tuvaro Pitaava ruvaata voti hura taqorara qati nraahu nraato ti varuvato Kotira mwanraquravanto mwia timwa mwinro tiqaro, Taqaante, vaisi taarampotanavanto i puua hirerata nri ntaavo.

²⁰ Qio sivira uro mwihua huntu kyera hia aatu hiraitira, mwihuavata quante. Nte mwihua mwaini sitauqata i puua hirerata nriahuave, tiro.

²¹ Mwitaa tuvaro Pitaava mwi vaisihua nrumu varunani uro ntero tiqaro, Nkye tararave puua hi variavo? Nte mwaa mwivave. Nkye nanra inraikyarave nriavo? tiro.

²² Tuvata mwinramwuhua tiqata, Vaisi mpo Koniriaasiva, mwiva ntaqua vaisihua 100 nramwuqaa ntaqikyi variva, mwiva ntapihi kyero nrohi variqaro Kotira nrutu tuaahere varivave. Mwitaa ihata ekyaa Iuttaa

vaisivanto mwianra kyuqe vaisivantove ti variavave. Qio mwia vaisiva tiri mwaini titaiho. Koniriaasiva variharo nyaamwunyaava Kotiva titava timu ntero mwia timwa mwinro tiqaro, E Pitaara nraanrainranro mwiva i nraamwuqi nrumu varirara e mwia qua riaante, tiho. (Mwitaa tiharо Koniriaasiva tiri titahata nrnruno), tita.

23 Mwinramwuhua mwitaa tuvaro Pitaava tiqaro, Qio mwaaqi vaitaivagenramwu hora quare, tiro.

Timwa kyero vaitero mwia qanranraa Pitaava siviro mwinramwuhuvata vuvata Iesusira nraaqiara mponramwuvantovata Iopaaqinaahu Pitaara vatama kyeta vura.

24 Pitaava mwihuavata vuva uro aanrani vaitero mwia qanranraa mwiva Sisariaani uro ntero taqovaro Koniriaasiva nai nramwunaahuavata nai totinramwuvatama kyero Pitaara vekya varuvaro

25 Pitaava uro ntero nraamwuqi vera ntovaro Koniriaasiva uro mwia taqero mwia kyuqu tarani tumu ntiro variqaro Pitaara nrutu tuaahere varuvaro

26 Pitaava tiqaro, Oaqaо, hia ni nutu tuaaheraante, timwa kyero mwia vara mwaamwianrama kyero timwa mwinro tiqaro, Sivira variante. Hia nte mwanriqavantove. Nte qati vaisima varuqo, tiro.

27 Timwa kyero Koniriaasikya qua timwaqiro vuva uro taqovata airi nraakye qoravanto mwipi ntuvantuuma vita varuvaro

28 Pitaava mwihuara tiqaro, Nkye ntapihi kyaarave. Tire Iutaavanto varuraro tiri mwaanra quavanto mpo mwatanaahua kyapata variqi quananranra qao timwa taihata varunanrave. Hia mwihua nraamwuqi vera ntaunranrave. Tire tiqata, Tire mwitaa hiararo mwihua uaqia hi okyarava tiriqaavata vahiankyo tita, tire nraahumwaqa ntuqema vita varunranrave. Qio mwitaama kyena varuqaro Kotiva mpo okyara ruvaatakyaa ni naamutaiharо ni pu naatovantntapihi vihana ntapihi riaurave. Kotiva hia mpo mwatanaahua qora mwatanaave tihana nte mwihuara qora mwatanaave qiankyorave. Haunri nte tiqana, Nte mpo mwatanaahua kyapata varianinraqaatairo mpo inraikyavanto ni uaqama mataananrove, qiankyorave.

29 Kotiva mwitaama kyero timwa mpihana varuqata nkye mpo mwatanaahua variqata nkye ni naanraavana nte hia qao tiraitina, nte qamwanrama kyena nkye hianani nrugo. Qio nanraqamave nkye ni naanraavo? Nkye tivaqena nte riaankye, tiro.

30 Pitaava mwitaa tuvaro Koniriaasiva timwa mwinro tiqaro, Taarampo enta nritaraiharо mwaa mwia varurantema 3 kiroki enrovana nte ntena nraamwuqi variqana Kotirara aakyara nte variavaro qamwanrama kyero ni puqaa vaisi mpovanto qovarama vurave. Mwia tuavaaqavanto takyuuqua

31 nianra tiqaro, Koniriaasio, e Kotirara aakyara ntaana quarave, e mpohua kyaahaqa hiananrave, Kotiva mwianra qamwateqaroma iara rie variho.

32 Qio vaisi mponramwu Iopaani sitairata mwihua vaisi mpo mwia nrutu Saimoni Pitaara uro viteta nriate. Pitaava vaisi mpovatama kyero variharo mwia vaisiva Saimoniva purimakau pahiqa kyaiqa vare variva mwiva nai nraamwuqi kyaarerera tokyasataa varirave, turave.

33 Mwiva mwitaa tihana nte qamwanrama uro i vita vare nriate timwa kyena vaisi mponramwu sitaurave. Nte sitauqata mwihua uro ntaavara e nianrave tirama nrianro. Qio Kotiva taqe varihata tire mwaaqi ntuvantuuma vita varuro. Qio Kotiva i qua mwianinra timwa timwinraqeta tire riare. Tire i vekyama varuro, tiro.

Pitaava mwihua qua timwa nyunra

³⁴ Koniriaasiva mwitaa tuvaro Pitaava tiqaro, (Nte tuvana ruvaata taqaavaraqaatairo) mate ni pu naato ntapihi vihana nte riauqaro Kotiva hia mpo mwatanaanra nraahu nronraqama kyero riaiho.

³⁵ Qio ta mwatanaavave mwia qua riemwaqiro viqaro ntapihi kyero nro-hiariva variraro Kotiva mwianrama nronraqama kyero rieqaro mwianra qamwateqaro variananrove.

³⁶ Qutaa Kotiva Iesusi Karaisira titaiharo mwiva tiri Isareriqi kyuqe mwakyaakya nraakye qora mwaateraqama variate ti quara tiri timwa timwinrave. Tiri mwi quara timwa timwihanro Iesusi Karaisiva ekyaa nraakye qora vunyaa vaisivantomava variho.

³⁷ Nkye rieta ntapihi kyaarave. Tauraa Ioniva nramanri nyiqanro qua timwa nyuvaro mwiaqaatairo Iesusiva Karirini qovarama viro nraakye qora qua timwa nyiqiro viro Iutiaanivata timwa nyiqiro vuvata ekyaa lutaavanto mwi quara riorave.

³⁸ Nkye rieta ntapihi kyaarave. Kotiva nronraqama kyo vaisiva Iesusiva Nasaretinyaava varuvaro Kotira mwanraquravanto mwia kepukyaqama kyovaro mwiva viro nrinro hiqaro nraakye qora kyuqema kyorave. Kotiva mwia kyaahaqa hi varuvaro mwiva Saataaniva rupato vaisihua huvantu kyovata mwihua qio varurave.

³⁹ Tire mwiavata variqi viqata mwiva Iutiaani kyaiqa varoravata, Ierusaremini kyaiqa varoravata, taqaavananrave. Qio mwia ru kyeta kyatariqaa hiritovaro qutu vurave.

⁴⁰ Mwiva qutu viro taarampo enta vara kyovaro Kotiva mwia vara sivuma kyovaro mwiva qaiqaa qovarama vurave.

⁴¹ Mwiva qati siviro qaiqaa qovarama vuvata hia ekyaa Iutaa qumina vaisivanto mwia taqorave. Tire nraakye qora timwa nyianrahua varuraro Kotiva tiri nraanralhata varurahua tire nraahu mwia taqaavananrave. Iesusiva qutu vuraqitairo siviro varuvata tire mwiavata variqata kyarave nramanrive nramwaqita quavanranrave.

⁴² Qio Iesusiva tiri titeqaro quavata tiri timwa timwihata tire mwaa mwakyaakyara kyuqe mwakyaakya nraakye qora timwa nyi varuro. Kotiva Iesusira nronraqama kyaiharo mwiva nraahuma ekyaa mwatani variahua qati variahuate, qutu quahuave, mwihuaqaa ntaqikyiqaro ko qiananrove. Mwiva mwihuaqaa qua vataari vaisiva variananrove.

⁴³ Haaru poropeti vaisivanto ekyaa mwia okyarara tiqata mwitaama tita. Mwianra qutaa mwivave qiariva variraro Iesusiva nronravanto variqaro qioma mwiva uaquia hi kyaiqa varaani quara nruka mwataaananrove turave, tiro.

Mpo mwatanaahua Kotira mwanraqura varora

⁴⁴⁻⁴⁶ Pitaava mwihua timwa nyi varuvaro Kotira mwanraquravanto Pitaava qua riouhaqaa tumuvata mwiaqaataita mwihua mpo qua mpo quaqitaita timwaqii viqata Kotira nrutu tuaahere varura. Mwitaa hi varuvaro Jesusira nraaqiara mpontoramwuhu mwinramwuhu mwipi varigata taqovaro Kotiva nai mwanraqura mpo mwatanaa nyuvata mwihua nraahumwa mpo qua mpo quaqitaita Kotira nrutu tuaahere varuvata Iutaa vaisinramwuhu mwi inraikyara nrihanrama vuvaro mwiaqaatairo Pitaava tiqaro,

⁴⁷ Mwaa vaisinramwuhu tire varaurantema kyeta Kotira mwanraqura varavao. Tavave mwihua nramanri varerara qao qiananrove? Qioma mwihua nramanri varevarave, tiro.

48 Mwitaa timwa kyero mwiva tiqaro, Iesusi Karaisira nrutu nteqatama nramanri mwihua nyiate, tuvata nramanri mwihua nyunra.

Nramanri nyuvata mwi mwatanaahua Pitaarara mpo entanramwuvata vari kyera quante tuvaro Pitaava mpo entanramwuañra mwihua kyapata varura.

11

Pitaava uto ntantero Jerusaremimi vura

1 (Pitaava Sisariaani varuvata) Iesusiva nronraqama kyonramwuhua Iesusira nraaqiara Iutiaani varuhuavata riovata mpo mwatanaa nraakyey qoravanto Kotira quara qamwateqata varuvata (mwia kyaara Iesusira nraaqiara hininramwu inronra hi varura).

2 Pitaava uto ntantero Jerusaremimi uro ntovata mwihua hininramwuhu vanto mwamwanta toqo okyarara riohua Pitaara inronra hita tiqata,

3 Qaqao, e mwamwanta hia toqaa vaisihua nraamwuqi vera nterama mwihua kyapata kyara nrenra hiaro. E hia mwitaa hiatarave, tita.

4 Mwitaa tuvaro Pitaava mwi quara okyaraqaatairo timwa nyinrenra hiro tiqaro,

5 Nte Iopaani Kotirara aakyara nte variqana ruvaata voti hira taqaurave. Nte taqe variavaro taari voti huva mpo inraikyavanto nyaamwusairo tumunrave. Mwi inraikyara hini hini viñiqaa rupa kyero tuqiro tumuvaro tumuqata tiro nte hiavaraqaa tumu ntovana

6 nte mwipi taqaavaro quarave, aasauve, qarurave, nyaamwave, ekyaa mwi inraikyava mwi inraikyava mwipi vahuvaro

7 quavanto nianra tiqaro, Pitaao, sivira rukyera nraante, tuvana

8 nte tiqana, Qaqao nronrao, hia nte mwitaa hianinrave. Nte tetu mwaanra okyarara rieqana hia kyuqe inraikya vaihananra tina, hia nraaninrave,

9 qiavaro quavanto nyaamwusairo qaiqaa nianra tiqaro, Kotiva kyuqe inraikyave tirara e hia uaqia hi inraikyareve qiantre, turave.

10 Mwitaa tuvana nte mwini variqana kuaa inraikya mwi taarampo nani taqaavaro mwiaqaatairo mwi inraikyara nyaamwusairo tu ntanrau varovaro tumu ntantero qoqaraanani vurave.

11 Mwitaa huvana nte taqaavata vaisi taarampotanavanto mpo mwatanaa Sisariaasaairo sitonramwuhua ni pitarerata nte variavara gesana nrintovaro

12 Kotira mwanraquravanto nianra hia aatu hiraitira, mwihuavata quante tuvana nte mwihuavata quavata vaisi 6 nramwuvanto Iesusira nraaqiaraqa uhua Iopaanyaahua ni vatama kyeta vuvata tire quavarahua Koniriaasira nraamwuqi uro ntaavararo

13 Koniriaasiva mwitaamama tiri timwa timwinro tiqaro, Nyaamwuyaava impovanto ni nraamwuqi qovarama viro nianra e vaisi sitairata mwihua uro vaisi mpo mwi nrutu Saimoni Pitaara vita vare nrivarо

14 mwiva nrumu ivata i nramwunaahuvata mwakyaakyaya timwa nyinrata nkye mwi mwakyaakyaya riemwaqita vivaro Kotiva nkyi sitaarive, turave.

15 Mwitaa tuvana nte mwi nraamwuqi uro variqana mwakyaakyaya ti variavaro Kotira mwanraquravanto tauraa tiriqaa fumu ntema kyero mwihuaqaavata tumunrave.

16 Mwitaa huvana nte haaru Iesusiva nronravanto qua tiri timwa timwu quarara riaavarave. Iesusiva tiqaro, Ioniva nramanri nkyi nyi variho. Qio nraakiara Kotiva nai mwanraqura nkyi nyiananrove, turave.

¹⁷ Mwiaqaatai nte ntapihi kyauqaro tire Iutaavanto Jesusirara qutaa mwivave turaro Kotiva nai mwanraqura tiri timwintema kyero mwiva mpo mwatanaa mwihuavata kuaa qarama kyero nyiho. Kotiva mwitaama kyero nai mwanraqura mwihuavata nyinraqe nte ta vaisiva variqanave nte mwia antuaaninrave? tiro.

¹⁸ Pitaava mwi quara mwihua ntapihi kyero timwa nyuvata mwihua inronra qua qaqlira kyeta Kotira nrutu tuaahereta tiqata, Qikye, Kotiva hia tiriria nraahu riaraitiro, mpo mwatanaahuaravata tiqaro, Mwihuavatama nkyiari uaqia hi aanranra qaqlira kyeta ekyaa enta ekyaa enta qati variqi vivarave, taho, tura.

Iesusira nraaqiaranramwuvanto mpo mwata mpo mwatani vura

¹⁹ Qio Sitiveniru ru kyeta Iesusira nraaqiara uaqlama nyato entaraqaataita Iesusira nraaqiara airivanto tirivata rivorave timwa kyeta Ierusaremisaita kyatita mpo nani mpo nani vura. Mponramwuvanto Ponisia nyianrani vuvata mponramwuvanto mpo mwata Saiparaasini vuvata mponramwuvanto mwatukya mpo Antiokini vura. Mwini uro variqata nkyiari nramwunaa Iutaa mwini varuhua mwihua nraahu Iesusira mwakyaakya timwa nyi varura.

²⁰ Mwihua nkyiari Iutaa nraahu timwa nyi varuvata mpo uhua Saiparaasinyaahuvata, Sairinyaahuvata, uro Antiokini variqata nronra vaisi Iesusirara mpo mwatanaahuvata timwa nyi varuvaro

²¹ Kotiva kyaahaqa huvata airi vaisi Kirikivantovata nkyiari uaqia hi aanranra qaqlira kyeta tuqasaa vita nronranra qutaa mwivave tura.

²² Mwitaa huvata Iesusira nraaqiara Ierusaremimi varuhua riovata mpo mwatanaahua airivanto Iesusirara qutaa mwivave tuvata Ierusaremimi varuhua Vanavaasira titovaro mwiva mwihua kyaahaqa hirero verara Antiokini vura.

²³ Uro ntero taqovaro Kotiva mwi mwatanaahuara po kye timwa nyatero mwihua kyaahaqa huvaro Vanavaasiva qamwata kyero mwiva mwihua qaqlaaavata timwa nyinro tiqaro, Qio nkye nronra vaisi Iesusirara nraahu riemwaqiqi viqata nrohiate, tiro.

²⁴ Vanavaasiva kyue vaisivanto varuvaro Kotira mwanraquravanto mwia utaqi kepuqyaaqama kyero varuvaro Vanavaasiva mpoqiyavata Iesusira qua riemwaqiro viqaro mwiva airi vaisi kyaahaqa huvata mwihua Iesusira nraaqiaraqama vita varura.

²⁵ Mwitaa huvaro Vanavaasiva Antiokisairo uro Tasaasini Sorura puaa hirero vuva

²⁶ uro mwia puaama kyero vita varero Antiokini nrumu varura. Mwini kuaa ihiara variqata mwi mwatanaahua Iesusira nraaqiaraqama vuhua mwakyaakya timwa nyita mwaiqiaraqama Iesusira nraaqiaraqaa uhuavata kyaahaqama nyatora. Antiokini varu vaisihua nraante tohara kyeta Iesusira nraaqiaraqama vuhuara *Kirisitenive* tura.

²⁷ Qio mwi entara Ierusaremisaita poropeti vaisi mponramwuvanto Antiokini uto varuvaro

²⁸ mwihuaqitairo vaisi mpovanto mwia nrutu Akapaasiva siviro Kotira mwanraquravanto mwia kyaahaqa huvaro mwiva mpo qua timwa nyinro tiqaro, Ekyaa mwatani hia kyara qio vahiraro kyarara aarante entava nriananrove, tiro. Mwi vaisiva tu quava Kirontiaasiva nronra vunyaa vaisivanto ntaqikyi varu entara kyarara aaranto entava qutaa vahura.

²⁹ Akapaasiva hia kyara qio vahari entava nriananrove tuvata Iesusira nraaqiaranramwuvanto qua timwa kyeta tiqata, Varaivaqeta tire munima mponta mponta ntuvaantuuma kyeta vareta uro tetu tiqata vakyaa Iutiaani

variahua nyianre, tita. Mwitaa timwa kyeta munima airi vatohua airi kyovata, hia munima airi vatohua pataqia kyeta

³⁰ mwi munimanra ntuvantuama kyeta Soruravata Vanavaasiravata nyuvata mwitanhua varaqita uro Iesüsira nraaqiaraqaa ntaqikyi varu vaisihua nyunra.

12

Herotiva Iesusira nraaqiara uaqiana nyatora

¹ Mwi entara nronra vaisi vunyaava Herotiva Iesusira nraaqiara hininramwu uaqiana nyatarera utura.

² Ioninra vakyaara Iemisira ntavaaqavu kyero mwia nrunta teqa kyora.

³ Iemisira nrunta teqa kyero Herotiva taqovata Iutaa vaisivanto mwianra qamwate varuvaro mwiva uro Pitaaravata ntavaaqavu kyora. Mwi entara omwata mpo hia kyoto imperetira nro entava vahuvaro

⁴ Herotiva Pitaara ntavaaqavu kyero karavuqi vitaqiro uro kyero tiqaro, Pitaava karavuqitairo quankyo, timwa kyero, mwiva ntaqu vaisihua 16 nramwu ntainra kyero tiqaro, ⁴ nramwuvanto nraante mwiaqaa ntaqikyiqi vita tumitaraiavata ⁴ nramwuvanto qaiqaa mwiaqaa ntaqikyiqita quate. Mwitaamaqita quate, tiro. Herotiva tiqaro, Vekyahu nyato kyarara omwata nre entava taiqa viraqena nte Iutaa vaisi suqaa Pitaara qovarama kyena ko tirerave, tiro.

⁵ Mwitaa timwa kyero Pitaara karavuqi rupa tovaro varuvata Iesusira nraaqiaranramwuvanto nraamwu mpoqi ntuvantuama vita Kotiva Pitaara kyaahaqa hiarive tita, Kotirara kepukyaqama kye aakyara ntamwaqita vi varura.

Pitaara huvantu kyora

⁶ Pitaava karavuqi variqiro vuvaro Herotiva tiqaro, Hura nte mwia vitaqina uro vaisi suqaa qovarama kyena ko tirerave, tuvaro Pitaava entaqi vaite varuvata ntaqu vaisihua mpotana mwia hini hini varuvaro Pitaara seniqo rupa tovaro varuvata ntaqu vaisihua mpotana qesana ntaqikyi varura.

⁷ Mwitaa huvaro qamwanrama nronravanto titova nyaamwunyaava Pitaara vuqaa qovarama viro siviro varuvaro nraamwuqi ntuvaahe varuvaro nyaamwunyaava Pitaara qumwuqa tu varero mwia vaurama kyero tiqaro, Qamwanrama siquante, tuvaro senivanto Pitaara kyauquqitairo tumu ntuvuro

⁸ nyaamwunyaava tiqaro, Ena tuavaaqa utu varera kyuqu nraamwu utuante, tiro. Tuvaro Pitaava vara utu varovaro nyaamwunyaava tiqaro, Qio ena vaqaq utu varairaqaeta tiretana quare, tuvaro

⁹ Pitaava mwia vata varero karavuqitairo viro. Mwini viqaro nai riero tiqaro, Hia nte qutaa vuqo. Nte ruvaata taqe varuqaro ni mwanraquravanto nraahu vi variho, tiro.

¹⁰ Mwitaa timwa kyero Pitaava nyaamwunyaava vaisi mwia vataqiro viro, ntaqu vaisitana nraatara kyero uro mpo ntaqu vaisitanahuavatā varura mwihuavata nraatara kyero, uro qatinani quani quesara nronra qaini qesa tita tonani uro varuvaro mwi quesava nai qatua vuvata mwitanhua mwiqitai veva nteta aanraqaa vuvaro qamwanrama nyaamwunyaava Pitaara mwini kyero vura.

¹¹ Vuvaro Pitaara vu nraato ntapihi vuvaro mwiva tiqaro, Nte qutaama tumugo. Qutaama nronravanto nai kyaiqa vaisi titaiharo mwiva ni kyaahaqa hiqaro Herotiva ni rupatairaqitairo ni huvantu kyaiho. Iutaavant ni uaqiana matarerata uti variavaro mwiva ni kyaahaqa ihana tumuqo, tiro.

¹² Pitaava nai mwitaama riemwaqiro viro uro nraamwu mpo, Ioni Maakira mwia nronra Mariaara nraamwu, mwipi airi nraakyae qora ntuvantuama vita variqata Kotirara aakyara nte varuraqi uro ntero

¹³ qesa ntukuakua huvaro kyaiqa nraakyae mpovanto mwia nrutu Rontaava qesa vara kyarero nri ntero

¹⁴ Pitaara qua ntapihi kyero riero mwiaqatairo mwiva nronraqama kyero qamwateqaro qesa qatuaaninranravata hia riaraitiro, mwiva mwipi ntuvantuama vita varuhua uro timwa nyinro tiqaro, Pitaavama nrumu mwaatani qesaqaa variho, tiro.

¹⁵ Mwitaa tuvata mwihua tiqata, Eqaante, i vu nraatovanto apiqama viharama e mwi quara tira hiaro, tuvaro mwiva kepukyaqama kyero tiqaro, Qutaama mwiva nrumu qesana variho, tuvata mwihua qikye tita, Pitaara ru kyaavarso nyaamwunyaava mwiaqaa ntaqikyiva, mwivama qesana nrumu variho, tita.

¹⁶ Mwitaa tuvaro Pitaava qaiqaa qesa ntukuakua hi varuvata mwihua qesa vara kyeta taqovaro mwiva qutaa nrumu varuvata mwihua nrihanrama vita varuvaro

¹⁷ Pitaava kyauqu tuaahera kyero tiqaro, Mwaini riaate, tiro. Timwa kyero mwiva nronravanto karavuqitairo nai kyaahaqa hurara mwihua timwa nyinro. Timwa nyi kyero mwiva tiqaro, Qio Iemisiravata tiri tiqata vakyaahuanramwuvata mwi quara timwa nyiate, timwa kyero mwiva veva ntero mpo nraamwuqira viro.

¹⁸ Qio Pitaava vuvata mwia qanranraa qaataa vuvata ntaqu vaisihua Pitaaraqaa ntaqikyi varuhua taqovaro Pitaava hia karavuqí varuvata mwinramwuhua airi nraato tita tiqata, Pitaava nataama kyero ve viho? tita.

¹⁹ Timwaqita vuvaro Herotiva mwianra puua hiqata taqaate tuvata mwinramwuhua mwianra qumina puua hiqata taqovaro hia huvata varuvaro Herotiva ntaqu vaisihua mwihuaqaa qua vatero mwihua ko timwa kyero Pitaava ntugema kyero vura kyaara mwinramwuhua ekyaa ru kyora.

Mwinramwuhua ru kyero Herotiva Iutia kyero uro Sisariaani varirero viro.

Herotiva qutu vura

²⁰ Herotiva Sisariaani uro variqaro Taiaaqinaahuavata Saitoniqinaahuavata inronra hi varuvata mwi mwatanaahua mwi quara vara ntapihi kyaare tita Herotiva hunanianra nrunra. Vaisi mpo mwia nrutu Parasitaasiva Herotira kyaiqa vaisi nronravanto varuvata mwihua mwia totiqama tetu mwia timwa mwita tiqata, Tire mwaateraqama varirerave. Tire inronra hiqata Herotira mwataqaataita hia kyara varaororave, tuvaro Parasitaasiva Herotira mwi quara timwa mwunra.

²¹ Timwa mwuvaro Herotiva tiqaro, Mwi entara mwi quara avuqavu hirerave, timwa kyero mwiva mwi entaraqaa nronravanto variqaro nai tuavaaqa kyugera ututero uro nai tainta vunyaaahua varu taintaraqaa mwatakyaa viro variqaro mwi mwatanaahua aakyara ntamwa kyero mwihua qua timwa nyuvata (mwihua mwiva kyuqe inraikya ututora taqeta mwia qua rieta) mpooqama kyeta mwianra qamwateta nronraqama kyeta timwaqita vita Herotirara tiqata,

²² Mwiva hia qumina vaisivanto variqaro qua tiho, Mwiva mwanriqavantove, tuvaro

²³ Herotiva mwihua nkye qutaa qiaovo tiro mwiva hia qaqao Kotiva nraahuma mwanriqavanto variho tiraitiro varuvaro mwia kyaara qamwanrama kyero Kotiva titova mpovanto mwia ntuguqti kyovaro mwimwivanto mwia mwamwanta nramwa kyovaro mwiva qutu vura.

24 Herotiva qutu vuvata Jesusira nraaqiaranramwuvanto Kotira qua timwaqita vuvata airi nraakyе qora mwi quara riemwaqi viqata Jesusira nraaqiaraqama vita kuaaqi varura.

25 Vanavaasikya Sorukya munima nyunra vareta Jesusira nraaqiaranramwu Ierusaremini varuhua uro nyita mwiaqaataita mwitanahua vaisi mpo Ioninra mwia nrutu mpo Maakiravata vita kyeta uro ntanteta Anttokini vura.

13

Vanavaasiravata Soruravata nyianrani sitovata vura

1 Antiokini Jesusira nraaqiara mponramwu varura. Jesusira nraaqiara mponramwuvanto poropeti vaisi varuvata mponramwuvanto Kotira okyara mpo okyara mpo okyara timwa nyi varuhua varura. Vanavaasivave, Simioniva mwia vara nrutu Upivave, Rusiaasiva Sairininyaavave, vunyaa vaisi Herotira henava Maneaanivave, Soruvave, mwihua mwi kyaiqara vareqata Jesusira nraaqiaranramwu kyaahaqamaqita vi varura.

2 Mpo enta mwihua kuairama vita variqata kyara aurama teta Kotirara aakyara nte varuvaro Kotira mwanraquravanto mwihua timwa nyinro tiqaro, Vanavaasikya Sorukya mpo kyaiqa varaaate tina, mwitanahua nyaaraugqo. Qio mwitanahua ninive timwataate, tiro.

3 Kotira mwanraquravanto mwitaa tuvata mwihua qaiqaa kyara aurama teta Kotirara aakyara ntamwa kyeta mwiaqaataita mwihua mwitanahuaqaa nkyiari kyauqu vateta mpo mwatani sitovata vura.

Mpo mwata Saiparaasini vura

4 Mwitanahua sitovaro Kotira mwanraquravanto aanra nyaamwutovata Vanavaasikya Sorukya mwatukya mpo Serusiani uto nteta mwiaqaataita sipiqi mwaanri nteta kyaarerera nronraqa qara vareta kyaarerera utaqaa vahu mwatara Saiparaasini vura.

5 Mwi mwataraqaa uro nteta mwitanahua uro mwatukya mpo Saramisini Iutaa mwaanra nraamwugi variqata Kotira qua timwa nyunra. Ioni Maakiva mwitanahua kyaahaqqa hirero mwitanahua kyapata vurama.

6 Vanavaasikya Sorukya Saiparaasini mpo mwatukya mpo mwatukya nrohiqata Kotira qua timwa nyiqi vita vutura hini tokya mwatukya mpo Peposini uro nteta taqovaro quaha uti varu vaisiva mpovanto varura. Mwia nrutu Mpaa-Iesusiva mwiva Iutaa vaisivanto nai unra tiro tiqaro, Nte Kotira qua mwakyaakya qovarama kye varuqo, tiro.

7 Mwitaa tiqaro mwiva kamaninra totiqama tero varura. Kamaninra mwia nrutu Sesiaasi Poraasiva mwiva kyuqe vu nraato vataava, mwiva Kotira qua riarero Vanavaasiravata Soruravata nyaanronra.

8 Nyaanrovaro Mpaa-Iesusiva mwia vara nrutu Erimaasiva, mwivavata variqaro kamaninra mwianra e hia mwitanahua Jesusirara ti quara riaante tuvaro

9 Soruva mwia nrutu mpo Poruva Kotira mwanraquravanto mwia utaqi kepukyaqama kyero varuvaro mwiva quaha vaisi mwia taqero mwianra tiqaro,

10 E Tovesi nraaqiaravantove. Ekyaa kyuqe inraikyavanto vaihara e mwia nramwutaavama variaro. Unra quave, uaqia hi kyaiqavave, mwi inraikyava nraahuma i vu nraatoqi vaiho. E Kotira qua mpo okyara mpo okyara api ti variananrave. Api qua qaqira kyaataarama e qati nraahu mwi quara ti variaro.

11 Qio riaante. Mateqama nronravanto i ntututiraro i vuvanto qipa quananrove. Mwiaqaataira e huravata mporavata variqi viqara hia huari

qio taqenanrave, tiro. Mwitaa tuvaro Erimaasiva taqovaro mwia vuvanto entama vuvaro mwiaqaatairo mwiva aanrani viro tiqaro, Ni kyauqu tu vareta aanra naamutatae, ti varura.

12 Poruva mwitaa tuvaro Erimaasira vu qipa vuvaro kamaniva vunyava mwi inraikyara taqero mwiva Porukya Vanavaasikya tu quarara quataave tiro kyauqu ntukikinraaqa tero Iesusira quara kyuqe quave tura.

Mwata mpo Pisintiaani vura

13 Poruvavata mwia vatama kye nrhuuavata Peposi kyeta mpotuqi vuhua mwata mpo Pampiriaani uro mwatukya mpo Pekaani uro ntora. Mwini uro ntovaro mwihuaqitairo Ioni Maakiva mwihua kyero uro ntantero Ierusaremini vura.

14 Vuvata mwinramwuhua vuhua Pekaa kyeta Pisintiaani vuhua mwatukya mpo Antiokini uro nteta mwini variqata mwaanraaqaa mwinramwuhua uro Iutaa mwaanra nraamwuqi vera nteta mwatakyaa vita varura.

15 Mwi mwatanaahua Mosesiva qara ntumwato quara kyaara ntita poropetivant qara ntumwato quara kyaara ntumwa kyeta mwiaqaataita mwaanra nraamwuqaa ntaqikyuhua vaisi mpo titovaro mwiva mwinramwuhua kyapara hiro tiqaro, Tiri tiqata vakyaa tuaavo, tiri kepukya timwiani quava vahirera, nkye tiri timwa timwivaqeta tire riaare, tiro.

16 Mwitaa tuvaro Poruva siviro kyauqu tuaahera kyero mwiva mwihua timwa nyinro tiqaro, Nkye Isarerri vaisinramwuvata, nkye mpo mwatanaahua Kotira nrutu tuaahere variahua nkyevata, riaeate.

17 Isarerri nraakye qoraqaa ntaqikyi variva Kotiva, mwiva haaru tiri haivaqahuarave tiri tiqohuara tiqaro, Nkye ni nraakye qorama varivarave, turave. Mwiaqaatairo tiri haivaqahua Isipini varu entara Kotiva mwihua kyaahaqa hi varuvata mwihua airiqama vuvuro mwiaqaatairo Kotiva nai kepukyaqo mwi mwataraqatairo mwihua sita varero

18 nrumu kyovata mwihua 40 ihiara qumina mwatani variqi vuvuro Kotiva hia mwihua qaqla kyaraitiro, mwihuaqaa ntaqikyiqi vurave.

19 Mwitaamaqi viqaro mwihua kyaahaqa huvata mwihua Kenaanini nkyiari nramwutaa 7 mwatanaa ru taiqa kyovaro Kotiva Kenaani mwia tiri haivaqahua nyuvata

20 mwihua mwi mwataraqaa 450 ihi vara kyeta ntaqikyiqi vurave.

Mwiaqaatairo Kotiva tiri haivaqahuaqaa ntaqikyiqaro vaisi mpo uhua nronraqama kyero nraakye qora ni qua timwa nyiate tuvata mwihua Kotira qua timwa nyiqita vita mwitaamaqi vita qutu vuvuro mwiaqaatairo Kotiva Samuerira nronraqama kyovaro mwiva Kotira qua timwa nyi varura.

21 (Mwiaqaataita tiri haivaqahua pupohama nyuvata Samuerirara qaqaotita, Vaisi mpo mwatama tairaro mwiva nronra vunyava variqaro tiriqaa ntaqikyiarive, tuvaro) Kotiva mwi quarara eo timwa kyero Mpenisaminira okyara Kisira mwaaluu mwia nrutu Sorura nyuvaro Soruva 40 ihiara variqiro viqaro tiri haivaqahuaqaa ntaqikyiqiro vurave.

22 Mwiaqaatairo Kotiva mwia qoririma mwwatera Ntevitiva mwihua vunyaa vaisi variarive tiro, mwia nronraqama kyorave. Kotiva Ntevitirara qamwateqaro mwataama tiro, Ni mutukyavanto Iesira mwaaluu Ntevitirara vaiho. Mwiva nte vararera hiani kyaiqara qioma vara mataananrove, turave.

23 Qio Kotiva nai qua vatora mwivau viqaro Ntevitira okyaraqitairo Isarerri huvantu kyaani vaisira Iesusira vara kyovaro tumunrave.

24 Tumu variqaro Iesusiva hia nai kyaiqa toharo entara Ioniva aakyara ntamwa kyero Isarerri nraakye qora timwa nyinro tiqaro, Uaqia hi aanranra qaqla kyeta nramanri varaate, turave.

25 Mwitaa timwaqiro viro nai kyaiqa taiqa kyaani entava qaumato vahuvaro Ioniva tiqaro, Nkye nianra ta vaisivaveve qiao? Nkye Kotiva titaani vaisira vekeya variava hia nte mwaa mwivave. Qio taqaate. Mwiva ni naakiara nri variho. Nte qati qumina vaisi variqananra tina, hiama qio mwia kyuqu nraamwu ntahuku mwataaninrave, tiro. Ioniva Jesusirara mwitaa turave.

26 Qio nkye ni kata pakyaa Evarahaamunra nraisivantove, qumina mpo mwafanaa Kotira nrutu tuaahere variahuvatave, nkye ekyaa riaate. Tire huvantu vita kyuqema variananranra rieqaro Kotiva tiriara mwi quara vara kyaiharo nriho.

27 Ierusaremimi variahuvata, mwihuaqaa ntaqikyiahuvata, hia ntapihiavaro Iesusiva Kotiva titaiva varihata mwihua mpo mwaanraqaa mpo mwaanraqaa poropetivanto qara ntumwatora kyaara ntita hia ntapihiavaro mwi quava Iesusirara tihata mwihua poropeti qua hia ntapihi kye riaraitita, Iesusiraqaa qua vataavarora tiro, haaru poropeti vaisivanto qua tuva mwivau ma vaho.

28 Mwihua Iesusira ru kyarera uti variqata taqovaro hia mwiaqaa qua vahuvatavata mwihua kepukyaqama kyeta Paireatira rapateta mwia ru kyaante turave.

29 Mwiaqaataita mwihua Kotira mpukuqi Iesusira mwitaa mwitaa hivarave tu quara utu taiqa kyeta Iesusira kyatariqatai itu kyeta varaqi oriqi utu quntamwa torave.

30 Quntamwa tovaro Kotiva mwia qati vara sivuma kyovaro

31 Iesusiva airi enta mwatani nrohi varuvata Karirisaita Ierusaremimi-anra Iesusira vatama kyeta vuuhua mwia taqorave. Mwihua matevata nkyiari taqorara Isarerisira nraakye qora timwa nyi variavo.

32 Tire Vanavaasikyavata nkyi kyuqe mwakyaakya timwa nyinrenra nrunrahuave. Kotiva haaru tiri haivaqahua timwa nyinro tiqaro, Nraakiara nkyiara rieqana nte mwitaa mwitaa hirerave, tu quava mate mwivau ma vaho.

33 Tire teta haivaqahua nyaisinramwu varuraro Kotiva tiri kyaahaqa hirero Iesusira qati vara sivuma kyaiho. Haaru Kotiva Saami 2 mwipi Iesusirara mwataama tiro:

E ni maaqvantoma variaro.

Mate nte i qovama varuqo, turave.

(Ihi 2:7)

34 Iesusiva qutu viharo Kotiva mwia qati vara sivuma kyaiharo Iesusiva hia qaiqaa qutu viro ntenra quariva variho. Haaru Kotiva Iesusirara mwaa quara timwa torave:

Nte Ntevitirara i kyuqema mwatarerave qiao inraikyara, mwi inraikyara i mwinrenrave, turave.

(Aisaiaa 55:3)

35 Mpo Saami mpukuqi quavanto mwataamama vahiro:

E hia ena nraaqiara kyuqera qaqira kyairaro

qumina ntenraananrove, turave.

(Ihi 16:10)

36 Ntevitiva tiri haivaqava Kotira kyaiqa varaqiro viro uro qutu vuvata quntamwa tovaro ntenra vurave.

37 Qio Kotiva qutu vira qati vara sivuma kyaiva, Iesusiva hia qumina ntenra virave.

38-39 Ni kata pakyaa tuaavo, nkye riaate. Nkye uaquia hi kyaiqara uti quara Iesusiva nraahuma qio taiqa kyaananrove. Tiretana mwi mwakyaakya nkyi timwa nyinrenra nrunro. Nkye Mosesira qua riemwaqita vivaro hia mwi quava nkye uaquia hi kyaiqara uti quara nruka nyataaananrove. Nkyiqa qatima qua vahirata nkye rupa vita variqata hiama qio qati varivarave.

Iesusirara qutaa mwivave qiariva, mwiva nraahuma qio huvantu viro qati varianrove.

40 Qio nkye rauriqata variate. Haaru poropetivanto Kotira qua qara ntumwato quava nkyiqli qutaa vahiankyorave. Quavanto mwataama tiro:

41 Nkye ni quara raima mate vaisihua, nkye rauriqata variate.

Nkye nte vararerera hiani kyaiqarara nraato taramaqi vita uro qutu quate.

Nkye qati variqli vi entara ntena vararerera hiani kyaiqara varaarita nkye mwi kyaiqarara hia qutaave tivarave.

Mpovento mwi kyaiqara okyara vutu kyero nkyi timwa nyinratavata nkye hia qutaave tivarave.

Nkye nte kyaiqra varaaninra taqeta kyaauqu ntukikinraaqa teqata qutu quate, tura.

(Habakuk 1:5)

Kotiva mwitaa turave, tiro.

42 Poruva mwi quara timwa nyi taiqa kyero Vanavaasikyantiri mwaanra nraamwuqitairo virera huvata nraakyne qoravanto tiqata, Qio nkyetana mpo enta mwaanraqaa qaiqaa nrumu variqata mwi quara mpoqiyavata timwa timwiate, tita.

43 Mwitaa tuvaro mwihua qua timwaqiu vuva taiqa vuvata airi vaisi Iutaa vaisive, mpo mwatanaaa vaisi Iutaa mwaanra okyara riohuave, mwihua Porukya Vanavaasikya sataqiu vuvala mwitanahua mwihua qua timwa nyita tiqata, Kotiva nkyiara po timwa nyataani quara kepukyaqama kyeta riemwaqita quate, tita.

44 Mwitaa tuvata mpo mwaanraqaa mwi mwatukyaraqi varuhua airivanto Kotira qua riarerera ntuaantuama vita varura.

45 Ntuuaantuama vuvata Iutaa vaisinramwuvanto taqovata mpo mwatanaaa airivanto ntuaantuama vuvata Iutaa vaisinramwuvanto inronra hita tiqata, Mpo mwatanaavanto tirivata kuaaqi ntuaantuama vita varivorave, timwa kyeta Porura uaqiamma mwatarerata mwi quara unra quave tiqata mwianra qora qua tura.

46 Mwitaa ti varuvata Porukya Vanavaasikya hia aatu hiraitita, kepukyaqama kyeta tiqata, Tiretana nkyi Iutaa nraante qua timwa nyunro. Tire mwi qiomia mwitaa huro. Mwiaqaataita tire taqaurata nkye mwi mwakyaakyarara uaqia hi quarave qiaovo. Nkye ekyaa enta ekyaa enta qati variqli vi quarara hia nkyi kyakya ihata variavo. Mwia kyaara tiretana nkyi Iutaa qaqlira kyeta mpo mwatanaahua mwi quara timwa nyinrenrave.

47 Nronravanto tiritana titeqaro mwitaama tiho:

E mpo mwatanaaa mpo mwatanaaa kyaahaqa hirata mwihua kyuqe aanraqaa vivaro Kotiva mwihua sitaarive tina, nte i omwa votima kyena titauqo, turave.

(Aisaiaa 49:6)

Nronravanto mwitaa turave, tiro.

48 Porukya Vanavaasikya mwitaa tuvata mpo mwatanaaa mwihua mwi quara rieta qamwata kyeta nronravanto timwato quarara kyuqe quave tita. Nraakyne qora ekyaa enta qati variqli quate tiro, Kotiva sita varohua, mwihua Porukya Vanavaasikya qua rieta Iesusirara qutaave tura.

49 Qio Iesusira quavanto ekyaa mwi mwataraqi viro nrinro huvata ekyaa mwi quara riemwa ntora.

50 Mwitaa huvata Iutaaavanto mwitanahua inronra hita uro mwi mwatanaahua nraakyne nronranramwu Kotira nrutu tuaahere varuhuvata, nronra vaisivata, unra qua timwa nyuvata mwihua Poruravata Vanavaasiravata uaqiamma nyateta mwihua nkyiari mwataqaataita mwitanahua sitamwa kyora.

51 Mwitaa huvata Jesusiva nronraqama kyo vaisitanahua nkyiariqaatai ntuvanrauma kye qaqira tuto kyeta tiqata, Nkye taqevarave, timwa kyeta mwi mwatara kyeta uro mpo mwatukya Aikoniaamini vurama.

52 Qio Jesusira nraaqiaravanto qamwateqata varuvaro Kotira mwanaraquravanto mwihua mwutukyave su nyaato kepukyaqama kyovata varura.

14

Porukya Vanavaasikya Aikoniaamini varura

1 Porukya Vanavaasikya Aikoniaamini mwini uro nteta mwitanahua tauraa Antiokini huntema kyeta uro Iutaa mwaanra nraamwuqi nraante variqata qua kepukyaqama kyeta timwa nyuvata Iutaa nraakye qora airivantovata, mpo mwatanaa nraakye qora airivantovata, Jesusirara quataa mwivave timwa kyeta Jesusira nraaqiaraqama vita kuaaqi varura.

2 Mwitaa huvata Iutaa vaisi mponramwuvanto hia Jesusirara quataa mwivave tuhua uro unra quoq mpo mwatanaa mwihua su nyaato vara apiqama kyovata mwihua Porukya Vanavaasikyara ua vu nrato tura.

3 Mwitaa ti varuvata Porukya Vanavaasikya airi enta mwini variqata hia aatu hiraitita, Jesusira mwakyaakya timwa nyiqi vuvaro nronravanto Kotiva mwitanahua kyaahaqa huvata mwitana mwini variqata nronra kyaiqa hia taqo kyaiqara varaqita vura.

4 Mwi mwatukyaraqinaahua ntainra vita hinivanto Porukya Vanavaasikyaa ntumwa vuvata hinivanto Iutaqaa ntumwa vura.

5 Mwiaqaataita mpo mwatanaa mwihuavata, Iutaa mwihuavata, nkyiari nronra vaisi kyapata Porukya Vanavaasikya qorama nyateta oriqa mwitanahua ntutqutirerata uti varuvata

6 mwitanahua mwi quara vaakya riemwa kyeta, mwiaqaataita mwitanahua ntugema kyeta vetara mwata mpo Rikoniaani uro varura. Mwini variqata mwatukya taaratanaqi Risitaraanivata, Ntepinivata, mwi mwatukyaytana hini hini vahu mwatukyaraqivata,

7 nrohiqata Jesusira mwakyaakya timwa nyiqita vura.

Risitaraanivata Ntepinivata varura

8 Risitaraani vaisi impovanto kyuqu ntanrenra vuva mwatakyaa viro varura. Mwi vaisira mwia nrova mwata kyovaro mwia kyuqu ntanrenra vuva hia aanra nrohiraitiro varura.

9 Mwiva mwatakyaa viro variqaro Poruva Jesusirara qua tura rie varuvaro Poruva mwi vaisiva Jesusiva quataama ni kyuqu kyuqema mataananrove tura taqero Poruva mwia vuqi aitutu hiqaro

10 mwianra aakyara ntamwa kyero tiqaro, Sivira ena kyuqu ntatuta kyera mwaamwianra variante, tuvaro mwiva qamwanrama kyero siviro nrohi varura.

11 Nrohi varuvata nraakye qora ntuvantuama vuhua Poruva mwi kyaiqara varora tageta, mwihua nkyiari Rikoniaa quaqitaita aakyara nteta tiqata, Qikye, Nyaamwunyaa mwaniqatanavanto vaisi tueta mwaini tirivata varirerata tumu ntaavo, tita.

12 Mwitaa timwa kyeta mwihua Vanavaasirara nkyiari vunyaa mwaniqaa nrutu nteta Suaasirave tita. Poruva qua ti varu vaisiva varuvatara tita, mwianra mwaniqaa mpo nrutu Heminrave tura.

13 Suaasirara aakyara nte varu nraamwuva mwatukya nraaqani vahuvanra mwiaqaatairo Suaasira kyaiqa vara mwate varu vaisiva nronravanto purimakau qoranramwu nraahu sita varero maunra viti kye nruntaqi ntumwu nyateravata varero nri ntovata nraakye qora ntuvantuama

vuhua Porukya Vanavaasikya nrutu tuaahereqata purimakau ru kye nyinrenrata uti varura.

¹⁴ Mwitaa huvata mwitanahua mwihua mwitaa hirera uti varurara ntapihi kyeta, haunri mwihua mwitaa hivorave timwa kyeta, nkyiari tuavaaqa nrahitu kyeta nraakye qoravanto ntuvantuuma vita varura utaqaa hiantmwate viqata aakyara nteta tiqata,

¹⁵ Vaisituaavo, eqaate. Tiretana nkyi nraantante qumina vaisima varuro. Tiretana Iesusira mwakyaakya kyuqe mwakyaakya nkyi timwa nyinrenrata nrurro. Nkye unrā mwanriqa mwia utuara mwintira qaqlira kyeta quataa mwanriqa nrutu tuaaheraate tita, tiretana mwaini nrunanrave. Mwanriqa Kotiva mwiva nraahuma nyaamwuwvata, mwatavata, ekyaa inraikyavanto mwataqi vahiravata, nyaamwuni vahiravata, utu kyero vatairave.

¹⁶ Haaru Kotiva ekyaa nraakye qora qati kyovata nkyiari quataa hi aanranraqaa vurave.

¹⁷ Kotiva qati kyovata vuvarovata mwiva nai nronravanto varira ntapihiate tiro, mwiva nai nyaamwuteqaro kyuqe inraikya mpo inraikyago mwihua nyaamwutorave. Mwiva vati vara kyaiharo kyugema kyeqaro ntiharo kyara kyugema kyero qupiqeqaro keko tihatama nkye nreqatama qamwateqata variavo, tita.

¹⁸ Porukya Vanavaasikya mwitaa tuvatavata nraakye qora ntuvantuuma vuhua hia mwitanahua quara nronraqama kyeta riaraitita, mwitanra mwanriqavantove timwa kyeta, purimakau ru kyeta mwihua nyutu tuaahera nyatarera uti varuvata mwihua mwukyaari tu kyeta hia mwitaa hiate timwa kyeta mwihua antua kyora.

Origo Porura aavata ntuqutu kyora

¹⁹ Mwia nraakiara Iutaa mponramwuvanto Antiokisaitave, Aikoniamaisaitave, nri nteta nraakye qora ua vu nraato nyuvata mwihua qua riemwaqi vita ori vara kyeta Porura aavata ntuqutu kyeta qutu viho timwa kyeta mwia ntanrauqita uro mwatukya mwaaqani tuto kyora.

²⁰ Porura mwaaqani tuto kyeta vuvata Iesusira nraaqiaranramwuvanto nrumu Porura tataaqa ututuma vita varuvaro Poruva mwiaqatairo qati siviro qaiqaa mwatukya mwipi viro. Mwia qanranraa mwiva Vanavaasikyantiri mwatukya mpo Ntepini vura.

Mwitanahua uro ntanteta Antiokini nrurra

²¹ Mwitanahua Ntepini variqata Iesusira mwakyaakya timwa nyi varuvata airivanto Iesusira nraaqiaraqama vuvata mwitanahua mwiaqataita uro ntanteta Risitaraani mateta Aikoniamini vuhua Antioki Pisisiaa mwatani vura.

²² Mwini variqata Iesusira nraaqiara mwini varuhua mwihua kepukyagama nyateta tiqata, Iesusirara nraahu riemwaqita quate, tita. Tire Kotira mwatukyaqiqi virera hiarahua airi muaanra varaqi vitama mwini qio quananrave, tiro.

²³ Poruva mwitaa timwa kyero mwitanahua Vanavaasikya mpo mwatukya mpo mwatukya nrohiqata vaisi vara mwatama kyeta nronraqama kyeta tiqata, Nkye Iesusira nraaqiaraqaa ntaqikyiqita quate, timwa kyeta mwihua kyapata variqata kyara aurama teta Kotirara aakyara nteta tiqata, E mwaa Iesusirara qutaave qia vaisinramwuhuaqaa kyuqema kyera ntaqikyiqira quante, tita.

²⁴ Mwitaa timwa kyeta mwitanahua Pisisiaa vara kyeta mpo mwata Pampiriaani nri ntora.

²⁵ Mwi mwatara mwini variqata uro Pekaani Kotira qua timwa nyita, mwiaqaataita mwitanahua vevara Ateriaani uro nteta,

²⁶ mwiaqaataita sipiqi mwaanri nteta kyaarerera nronraqaama teta Antiokini qoqaraara mwini nrumbu ntanteta vura. Tauraa Iesusira nraakye goravantu Antiokini mwini variqata Kotirara aakyara nteta tiqata, Porukya Vanavaasikya po kye timwa nyatairata mwitanahua mpo mwatanaa mpo mwatanaa Iesusira kyaiqara timwa nyiate, tunani nkyiari kyaiqa taiqa kyeta vura.

²⁷ Mwitanahua mpo mwatanaa mpo mwatanaa mwatuqyaki nrohita Antiokini uro nteta Iesusira nraaqiara mwini varuhua ntuvantuama kyeta nkyiaritana nrohurara timwa nyita tiqata, Kotiva aanra qatua kyahata mpo mwatanaa nraakye goravantu Iesusirara quataave qiavo, tita.

²⁸ Mwitaa timwa kyeta mwitanahua Iesusira nraaqiaranramwu kyapata mpuaahaama mwini varura.

15

Porukya Vanavaasikya Ierusaremini vura

¹ Porukya Vanavaasikya Antiokini varuvata Iutiasaita vaisi mponramwuwanto nri nteta Iesusira nraaqiaranramwu timwa nyita tiqata, Nkye hia Mosesira tuntema kyeta nkyeta mwamwanta toqaivera, Kotiva hiama qio nkyi sitaanarrove, tita.

² Mwitaama kye timwa nyi varuvata Porukya Vanavaasikya mwi quarara qao timwa kyeta mwihua kyapata nronraqama kyeta inronra hi varura. Mwi quara kyaara inronra hi varuvata Antiokini varuhua kuua qua vateta Porukya Vanavaasikyavata, mpo uhuavata, siteta tiqata, Nkyenramwu uro Ierusaremini Iesusiva nronraqama kyai vaisinramwuhua kyapata variqatama mwi quara ntapihi kyaate, tita.

³ Timwa kye sitovata aanravau viqata mwinramwuhua mpo mwatanaahua Iesusirara quataa mwivave turara mwata mpo Ponisianivata, Sameriaanivata, timwa nyiqita vura. Timwa nyuvata Iesusira nraaqiara mwini varuhua mwihuavata mwi quara rieta mpoqama kyeta qamwateqata varura.

⁴ Mwinramwuhua timwa nyiqi vita Ierusaremini uro ntovata ekyaa Iesusira nraakye goravantu Iesusira nraaqiara nronranramwuvantu, Iesusira nraakye qoraqaa ntaqikyi varuhuavata, ekyaa mwihua mwinramwuhua qamwata nyatovata Porukya Vanavaasikya mpo mwatuqyaki mpo mwatuqyaki nrohiquata Kotiva kyaahaqa huvata mwitanahua nronra kyaiqa varaqita nrohi varurara timwa nyunra.

⁵ Mwinramwuhua mwitaa ti varuvata Iesusira nraaqiara mponramwuwanto mwihua Parisi mwaanra qua riohua sivita tiqata, Qaqao, tire Iutaa vaisi variqata Mosesira mwaanra qua rieqatama teta mwamwanta toqaana okyararave, Mosesiva timwato quarave, riemwaqita vurahuave. Mpo mwatanaavantu Iesusira qua riahua, mwihuavata hiama egevarave. Mwihuavata nkyiari mwamwanta toqa kyeta Mosesira quavata riemwaqitama vivarave, tita.

⁶ Mwitaa tuvata Iesusiva nronraqama kyo vaisinramwuhuavata, Iesusira nraakye qoraqaa ntaqikyi varuhuavata, mwi quara avuqavu hirerata ntuvantuama vita.

⁷ Ntuvantuama vita mwihua airi qua timwaqita vuvaro Pitaava siviro mwihua timwa nyinro tiqaro, Ni kata pakyaa tuaavo, nkyevata haaru taqorave. Hia Iutaa nraahu Iesusira qua rieqata quataave qiate tiro, Kotiva nkyiqitairo ni nronraqama kyero mwi quara mpo mwatanaahua vata timwa nyiante tiro, ni titorave.

8 Kotiva ekyaa nraakye qora mwutukyaqi taqe varivave. Mwiva nai mwanraqua tiri timwintema kyero mpo mwatanaahuavata nyi varirave. Mwitaa hirara tita, tire taqauraro Kotiva mpo mwatanaahuaravata qamwa-teqaro varirave.

9 Kotiva hiama tiri mpo qarama timwa tero mwihua mpo qarama nyataihoh. Mwihuavata tirivata kuaa qarama nraahu timwa taiho. Tiri nraantante mpo mwatanaahua Iesusirara qutaa mwivave qiarara tiro, Kotiva mwihua uaquia hi inraikyara nruka nyatairave.

10 Tiri haivaqahuavata, tire tetavata, Mosesira qua vara qu vareta nrohirera taqauraro muaanra ntairave. Qio nkye nanraqama mwi quara mpo mwatanaahuqaqu nyatarerata uti variavo? Nkye mwitaa hiqatama Kotira mwataara hirerata uti variavo. Hia nkye mwitaa hiate.

11 Tire taqauraro Iesusiva nronravanto tiriavarata po tiraqaatairo Kotiva tiri tivitairave. Qio tiri tivitaintema kyero Kotiva mpo mwatanaa mwihua-vata qioma siterove, tiro.

12 Pitaava mwitaa tuvata mwipi ntuvaantuama vuhua tirema variqata mwihua Vanavaasikya Porukya qua rie varuvata mwitanahua sivita nkyiari nrohurara timwa nyita. Mwitanahua mpo mwatanaavanto varunani nrohuvaro Kotiva kyaahaqa huvatatana nronra kyaiqa varaqita nrohurara mwihua timwa nyunra.

13 Mwitanahua timwa nyi taiqa kyovaro Iemisiva siviro tiqaro, Ni kata pakyyaa tuaavo, ni qua riaate.

14 Vuni Kotiva nraakye qora mponramwu nai nrutu tuaaheraate tiro, uro mpo mwatanaahuqaqitairo sito quara Saimoni Pitaava vaaky tiri timwa timwinrave.

15 Qio poropeti vaisinramwu haaru qara ntumwato quavavata, mwaa Pitaara quavantovata, ntapihi kyero kuaa mwiaqama vahirove. Haaru mwataa turave:

16 Nronravanto tiqaro, Nraakiara nte nrumu ntantena uro nkyi haivaqara Ntevitira nraamwu ntaputama vira qaiqaa hoqarerave.

Mwi inraikyara mwi inraikyara nraaparaqama vira qaraakyqama kyena vara qaiqaa mwaamwianra tarerave.

17 Nte mwitaa hiarita nraakye qora mpo mwatanaa mpo mwatanaahuqaqitaina nte ntena nraaqiaraqama tena nyaanrama taarihu nronra ni puaama kyevarave, tura.

18 Nai haaru nronravanto mwi quara qovarama kyorave, turave, tiro.

(Emosi 9:11-12)

19 Iemisiva mwitaa timwa kyero mwiva tiqaro, Qio nte mwataamama riauquo. Mpo mwatanaahua qora aanra qaqlira kyeta Kotira aanraqua quahuaqa hia tire mpo muaanra vataare.

20 Nrivaqe tire mwihuani qara nraahu ntumwa kyeta mwitaa mwitaama timwa nyianre:

Nkye hia qumina unra mwanriqani vate kyarara nraate.

Hia vaisivanto nraakyevata api nrohiate.

Hia nruntana tu vareta ntaqutu kye vahi aasaura nraate.

Hia nraanrevata nraate.

Mwi quara nraahu qara ntumwa taarata mwihua taqaate.

21 (Mpo mwatanaavanto mwi quara riemwaqita vivera, hiama Iuttaa mwini varihua mwihua kyapata inronra hivarave.) Iutaavanto mpo mwata mpo mwata quahua variqata mpo mwaanraqaa mpo mwaanraqaa

Mosesira qua kyaara ntumwaqita vi variarave. Mpo mwatukya mpo mwatukya Mosesira qua timwa nyiahua variavo, tiro.

Mpo mwatanaahuani qara vara kyora

22 Iemisiva mwitaa tuvata Iesusiva nronraqama kyonramwuhuavata, Iesusira nraakye qoraqaa ntaqikyi varuhuavata, ekyaa mwipi ntuvaantuama vita varuhuavata, kuua qua nraahu vateta tiqata, Nrivaqe tetagital vaise impotana sitaarata mwitanahua Porukya Vanavaasikya kyapata vihua tire mwaagi variqata timwa tauna quara vevara Antiokini varihua uro timwa nyiate, tita.

Mwitaa timwa kyeta mwihua vaise taaratana mwatama kyora. Vaisi mpo mwia nrutu Iutaasira mwia vara nrutu Vasavaasira, vaisi mpo mwia nrutu Sairaasira. Mwitanahua Iesusira nraakye qora hini mwihuaqitai viritoqama vita varutanahua varura.

23 Mwihua mwatama kyeta mpo mwatanaa mwihuani qara vara kyeta tiqata,

Tire Iesusiva nronraqama kyainramwuhuavata, Iesusira nraakye qoraqaa ntaqikyi variahuavata, tire nkyi qata vakyaahua variqatama nkye mpo mwatanaa Antiokini variahuave, Siriaani variahuave, Sirisiaani variahuave, nkye tiri tiqata vakyaahua variahuave tire nkyi qua mwantauro.

24 Tire riaurata tiriqitaita vaise imponramwuvanto uro api qua nkyi timwa nyiavata nkye mwi quara rieta qumimaqa hi variavo. Hia tire mwihua sitaurata mwihua nkyiari riemwa kyeta uro mwitaa qiao.

25 Mwiaqaataita tire ntuvaantuama vita kuua qua vateta mwataama tita, Nrivaqe vaisi imponramwu sitaarata mwihua tiri mwutukya vahi vaisitana Porukya Vanavaasikyavata quate, turo.

26 Porukya Vanavaasikya hia nkyiari ru kyerara nronraqama kye riaraitita, mwitanahua tiri nronra vaisi Iesusi Karaisira kyaiqa varaqita vi variatanahuave.

27 Mwaisaita tire Iutaasikya Sairaasikya sitaarata mwitanahua tire kuua qua vateta qara ntumwa tauna quara mwaa nkyiari nyocititavata nkyi timwa nyivarave.

28 Kotira mwanraquravantovata, tirevata, mwaa quara kuua quama vatauro. Tire hia qumina airi qua tiqata nkyiqa muaanra vatarerave.

29 Mwaa quara nraahu riemwaqita quate:
Unra mwanriqani kyara vatera hia nraate.

Hia nraanre nraate.

Hia nruntana tu vareta ntaqutu kye vahi aasaura nraate.

Hia vaisivanto nraakyevata api nrohiate.

Nkye mwi quara riemwaqi viqatama nkye kyugema kyeta nrohivarave. Qio mwipiarama tirenramwu turo, tita.

30 Mwitaa timwa kyeta mwihua sitovata mwihua vevara Antiokini uto Iesusira nraaqiaranramwu varuhua kuairama kyeta qara vare vura nyuvata

31 mwihua kyaara ntumwa kyeta ntapihi rieta mwi quarara qamwata kyeta kyuqe quama qaraqi vaiho. Mwi quava tiri kepukyaqama timwa taani quarave, tita.

32 Mwitaa tuvata Iutaasikya Sairaasikya Kotira qua tutanahua sivita mwihua timwa nyiqata kyuqe mwakyaakya mpuahaa qua tiqata mwihua kepukyaqama nyatora.

³³ Mwitaa timwa kyeta Ierusaremisaita tumu ntotana airi enta mwini Antikini varuvata mwiaqataita Jesusira nraaqiaranramwu mwini varuhua kyugema kyeta kyauqu nyita sitovata mwitanahua tumu ntanteta tauraa nkyiari tumunani vura.

³⁴ [Sairaasiva nraahu Antikini variataa huvaro mwini varura]

³⁵ Porukya Vanavaasikyavata airi enta Antikini varura. Mwitanahua-vata mpo uhuavata nronravanto timwato quara nraakye qora timwa nyiqata varura.

Porukya Vanavaasikyatana inronra hita ntainra vura

³⁶ Porukya Vanavaasikya Antikini variqita vuvaro mpo entanramwu nritarovo Poruva Vanavaasirara tiqaro, Varaiqetana qogaraananianra viqatatana mpo mwatukya mpo mwatukya viqata tetu tiqata vakyaahua taqaare. Haaru tiretana Kotira qua timwa nyiavana nraakye qorahua mwihua qiove variavo hiave qio variavo? tiro.

³⁷ Poruva mwitaa tuvaro Vanavaasiva Ioninravata vitero virero uti varura. Ioninra nrutu mpo Maakiva.

³⁸ Vanavaasiva mwivata vitero virera uti varuvaro Poruva qaqao tiro. Haaru tiretana mpo mwatukya mpo mwatukya nrohigata mwakyaakya timwa nyiqi vi variavararo mwi vaisiva tiritana Pampiriaaqitairo qaqira kyero pupohovaro nrumu ntantero vurave, tiro.

³⁹ Mwitaa timwa kyetatana mwitanahua nronraqama kye inronra hi kyeta ntainra vura. Ntainra vita Vanavaasiva Maakiravata vitero nkyiari-aratana mpoma sipiqi mwaanri nteta Saiparaasini vura.

⁴⁰ Vuvaro Poruva Sairaasiravata vitero virera huvata mwia qata vakyaahua Jesusira nraaqiaranramwuvanto kyauqu nyita tiqata, Kotiva nkyitananra po timwa nyate variratama nrohivarave, tita.

⁴¹ Mwitaa tuvaro Poruva Siriaanivata Sirisiaanivata viqaro mwiva Jesusira nraaqiaranramwu mwini varuhua kepukyaqama nyataqiro vurma.

16

Porukya Sairaasikya Timotiravata viteta vura

¹ Poruva vuva Ntepinivata Risitaraanivata uro ntora. Mwini Jesusira nraaqiara mpovanto mwia nrutu Timotiva varuvaro mwia nrovavata Jesusira nraaqiara variqaro mwiva Iuttaa nraakye varuvaro mwia qova mpo mwatanaa Kirikivanto varura.

² Jesusira nraaqiaranramwu Risitaraani varuhuavata Aikoniaamini varuhuavata Timotirara kyuqe vaisive tuvaro

³ Poruva mwivata vitero virera hiro taqovaro Timotira qova mpo mwatanaa Kirikivanto variqarora tiro, mwiva hia Timotira mwamwanta toqa mwatova varuvaro Poruva mwia mwamwanta toqa mwatero. Poruva tiqaro, Iuttaa mwaini variahua Timotira qova Kiriki vaisi varira ntapi-hiavare. (Mwihua Timotira mwamwanta hia toqa mwatairave tivorave timwa kyero Poruva Timotira mwamwanta toqa mwatero mwiaqatairo mwivavata vitero viro.)

⁴ Vitero vuhua mwiramwuhua mpo mwatukya mpo mwatukya nrohigata Jesusira nraaqiaranramwu tauraa Jesusiva nronraqama kyon-ramwuhuavata, nronra vaisinramwuvata, Ierusaremmini variqata (mpo mwatanaaavanto Jesusira nraaqiaraqama vihua mpo hi quara mwataa mwataama kye vataqi quate) tu quara timwa nyiqi vita tiqata, Nkye mwi quara nraahu riemwaqita quate, tura.

5 Mwitaa timwaqi viqata mwinramwuhua Iesusira nraaqiaranramwu kyaahaqa huvata mwihua Iesusira qua kepukyaqama kyeta riemwaqita vita airiqama vura.

Poruva ruvaata taqora

6 Poruvavata mwia vatama kyeta nrhuuavata uro vutura Karesiaa hini vahuvaro Pirisiaa hini vahuvaro Esiaa mwata mwiva utaqaa vahuvaro Kotira mwanraquravanto mwihuara hia Esiaa mwata mwiaqaa uro qua timwa nyiate tura.

7 Tuvata mwihua vuhua Misiaa mwatani vuvaro Pitiniaa mwata qaumato vahuvata mwini virera tuvaro Iesusira mwanraquravanto hia mwini quate tuvata

8 mwihua Misiaa mwata utaqamaa teta Toroasini uro ntora.

9 Mwini uro nteta varuvaro entaqi Poruva ruvaata voti hura qoqaa taqero. Taqe varuvaro Masentonaa vaisi mpovanto siviro variro Porura nraanrenro tiqaro, Po, qati kyaarerera nronra tegera nrinrava nrumu mwaini Masentonianivata variqara tiri kyaahaqa hiante, tiro.

10 Mwitaa tuvaro Poruva taqero mwiva siviro mwivavata, tire mpo hivarahuavata, (nte Rukuvavata,) mwitaama titi, Kotiva Masentonianivata uro ni qua mwakyaakya timwa nyiatema, tiho, titi. Mwitaa timwa kyeta tire mwini virerata tera hita.

Piripaini vura

11 Mwiaqatai tire sipiqi mwaanri nteta Toroasi kyeta kyaarerera nronraqama teta nramanri utaqaa vahu mwatara Samoteresini uro nteta. Mwia qanranraa tire qaiqaa sipiqima teta Niaporisini quavanana.

12 Mwiaqataita mwi mwatuukyara kyeta verara mwatuukyara mpo Piripainianra quavarahua mwini uro ntaavanana. Masentonia mwataqitairo mwatuukyara Piripaivanto vunyaa mwatuukyavanto vahuvata Romenivanto mwi mwatuukyara qovarama kyora. Tire Piripaini uro nteta mpo entaramwu mwini varita.

13 Mwini variqata mwaanraqaa tire mwatuukyaqitaita vasaamwunra gesana ntuqieta uro mwaaqani nramanri tokyasataa Iutaavanto Kotirara aakyara nte variava vahiananrove timwa kyeta nramanri tokyasataa mwatakyaa vita variqata mwini nraakyenramwu ntuvantuuma vuhua qua timwa nyi variavararo

14 nraakte mpovanto mwia nrutu Ritiaava mwiva Taiatairanyaava mwiva kyoqaa kyaiqa vareqaro nraanre tavuna nyiqanro munima vare varu nraakteyea varuva. Mwi nraakteyea mpo mwatanaava variqaro Iutaa qua mwaanra rieqaro Kotira nrutu tuaahere varu nraakteyea varuvaro nronravanto mwia vu nraato kyaahaqa huvaro mwiva Poruva tu quara ntapihi kyero riora.

15 Riero mwivavata mwia nraamwuqi varuhuavata nramanri varora. Nramanri varero mwiva tiriara tiqaro, Nte nkyi nronra vaisiara qutaa mwivave tuqo. Nkye nianra tiqata, E qutaama Iesusira nraaqiara variaro, tivera, nkye ni nraamwuqi nrita nivata variate, tiro. Mwitaa tuvaro mwia quavanto kepukyaqqa huvata tire mwia nraamwuqi uro variavanana.

Porukya Sairaasikya karavu rupa kyora

16 Mpo enta tire qaiqaa Iutaavanto Kotirara aakyara nte varunani virera hiavararo mwanraata mpovanto nrumu tiri qintorama kyero. Vaanavanto mwi mwanraataara utaqi variqaro mwia kyaahaqa huvaro mwiva nraakiara qovara hiani okyarara nraakte qora timwa nyi varura. Nraakte

goravonto nraakiara qovara hiani inraikyara riarerata hiqata airi munima mwi nraakyeraqaa ntaqikyu vaisihuua nyuvata mwihua airi munima varora.

¹⁷ Mwi nraakyeva nri ntero Poruravata, tirinramwuvata, tivataqiro viqaro aakyara ntero tiqaro, Mwaa vaisinramwuhua mwaniqqa Kotiva nyaamwuni varira kyaiqa vare varia vaisihuave. Nkye hia ekyaaaa qutu vivaro Kotiva nkyi qati sitaaninranra mwihua timwa nyinrenrata nriavo, tiro.

¹⁸ Mwi nraakyeva airi enta tiri tivataqiro viqaro mwi quara timwaqiro vuvaro Porura mpoqama kyero pupohovaro mwiaqatairo mwiva nraakyeva utaqi varu vaananranra tiqaro, Nte Iesusi Karaisira nrutu nteqanama iara mwi nraakyeraqitaira nritarera quante tuqo, tiro. Mwitaa tuvaro mwi nraakyeraqitairo vaana mwiva qamwanrama kyero nritarero viro.

¹⁹ Vuvata mwiaqaa ntaqikyi varuhua taqovaro mwihua munima varo aanrava taiqa vuvata mwihua tiqata. Qikye, hiama qaiqaa mwi nraakyeva qianinraqataita munima varaananrave, tita. Mwitaa timwa kyeta mwihua raraqa tovata mwihua Porukya Sairaasikya ntavaaqavu kyeta ntanraunru varetu ko tirerata nronra vaisinramwuvanto variqata qua tunani kyapaqama vahu mwatukyaraqaa vurama.

²⁰ Uro mwini kyeta Romeni vaisei qua ntapihi varu vaisihuua timwa nyita tiqata, Mwaa Iutaa vaisitanave. Mwihua tiri mwatukyqaqi nrumu variqata uaquia hi inraikyara nraakyevaa qora nyaamwute variavo.

²¹ Tire Romenivanto hia mwi quara riarerave timwa kyeta qao timwa tauna quara, mwihua timwa nyi variavo, tita.

²² Mwitaa tuvata nraakyevaa qora mwini ntuvaantuuma vita varuhua Porukya Sairaasikya ntuquuti varuvata mwihua vunyahua uro Porukya Sairaasikya tuavaaqa nraanrahituma kye qatinani vara kyeta tiqata, Mwaatanahua kyaamwuqtai ntuquutukye vataate, tita.

²³ Mwitaa tuvata mwitanahua ntuquuti kye ntupintirima kye vateta sitaqita uro karavuqi tuto kyeta karavuqaa ntaqikyi varu vaisirara tiqata, Mwitahanahua tuqara kyera rupataante, tita.

²⁴ Mwitaa tuvaro karavuqaa ntaqikyi varuva mwihua tuntema kyero karavu nraamwu mwia nai vetara utaqi vahura mpoqi sitaqiro uro kyero mwitanahua kyuqu kyatari vauru toraqui vatero vara mwatumwi tuqara kyero rupa tero.

²⁵ Mwitaa huvata mwitanahua mwipi variqata enta mwutukya Kotirara aakyara nteta ihi timwaqii viqata Kotira nrutu tuaahere varuvata karavu hini mwihua variqata mwitana tura rie varura.

²⁶ Rie varuvaro qamwanrama kyero mwaturavanto nronraqama kyero karavu nraamwu qakyaa hi varuvaro mwiaqatairo karavu nraamwu gesanramwu ekyaa qatua vuvaro ekyaa karavu vaisiqaatairo seni kyaanta huvantu viro tumu ntura.

²⁷ Mwitaa huvaro karavu nraamwuqaa ntaqikyi varu vaisiva vaitorraqitairo siviro taqovaro ekyaa qesa qatua viro vahuvuvaro mwiva qikye tiro. Ekyaa karavuvanto mwaaqitaita ntuquema kyeta quavo. (Mwia kyaara niqaa ntaqikyi vari vaisiva ni ru kyaankyorave), timwa kyero mwiva nai paipanta veva tuaqitairo ntanrau kyero mwiaqotairo naivanto nai ru kyarerero uti varuvaro

²⁸ Poruva aakyara ntero tiqaro, Hia enavanto ena ru kyaante. Tire ekyaa mwihua mwaaqii qatima varuro. Hia mpovanto aatu ntuquema kyero viho, tiro.

²⁹ Mwitaa tuvaro karavu nraamwuqaa ntaqikyi varuva tiqaro, Omwa qupiqita nriate, timwa kyero mwiva hiantero mwipi viqetero mpoqama

kyero aatu hiqaro uro Porukya Sairaasikya suqaa mwatasata ntumwa viro varuvaro kyuqu kyauqu nti varuvaro varura.

³⁰ Mwiaqatairo mwiva siviro mwitanahua sitaqiro uro mpoqi kyero mwitanahua kyapara hiro tiqaro, Nkyetana nronraqama quatanahuave. Nte nataa hiarirove Kotiva ni pitaananrove? tiro.

³¹ Mwitaa tuvata mwitanahua mwia timwa mwita tiqata, Iesusiva tiriqaa ntaqikyi varivave. E mwianrama quataa mwivave qianta. Mwitaa tiraroma Kotiva ivata i nraamwuqi varihuavata sitaanarove, tita.

³² Mwitaa timwa kyeta mwitanahua nronravanto tu quara mwia timwa mwitatana mwia nraamwuqi varuhuavata timwa nyunra.

³³ Mwitanahua mwihua timwa nyuvaro mate mwipiari karavuqaa ntaqikyi varuva mwitanahua sitaqiro uro vaisivanto ntuquuti tora hiqama nyatéro mwiaqatairo mwivavata mwia nraamwuqi varuhuavata nramanri varora.

³⁴ Nramanri vareta mwiaqatairo karavuqaa ntaqikyi varuva qaiqaa mwitanahua sitaqiro uro nai nraamwuqi kyero mwitanahua kyara nyinro. Kyara nyinro mwivavata, mwia nraamwuqi varuhuavata, Kotirara mwutukya ntuvata mwihua mpoqama kyeta qamwateqata varura.

³⁵ Mwia qanranraa toqaqi Romeni vunyaaahua nkyiari piponramwu siteta tiqata, Mwi vaisitanahua huvantu kyaivata quate,

³⁶ tuvata mwinramwuhua uro karavuqaa ntaqikyi varura timwa mwuvaro mwiva Porura timwa mwinro tiqaro, Vunyaa vaisivanto qua vara kyeta tiqata, Ivata Sairaasiravata karavuquitaira huvantu kyairata quatema, qiao. Qio nkyi mwutukyavanto qihakya hirata mwaaqitaita quate, tiro.

³⁷ Mwitaa tuvaro Poruya qaqa timwa kyero mwiva pipo mwihua timwa nyinro tiqaro. Mwihua enta hia ntapihi kye ko tiraitita, mwihua nraakyae qora suqaa tiritana kyaamwuqotaita ntuquuti kye vateta tiritana karavuqi kyaarave. Qio, tiretana hia qumina vaisitanavauma varuro. Tiretana Romeni nrutu varaurahuama varuro (haaru tiritana nronraqama kyaavata Romeniqama vita varurahuave). Qio mate, mwihua tiritana třemra ugeta kyeta titarerata uti variavo. Hiama tiretana qati ugeta kyeta quananrave. Romeni vunyaa vaisi mwihua nkyiarima nrumu tiritana huvantu kyeveravarre, tiro.

³⁸ Poruya mwitaa tuvata piponramwuvanto uro Romeni vunyaaahua timwa nyuvata mwihua Porukya Sairaasikya tire Romenivantove tu quara rieta mwihua aatu hita.

³⁹ Mwihua aatu hiqata uro mwitanahuara po kye timwa nyateta qihakya kyeta tiqata, Qikye, tire hia mwitaa hiataara qora utunanrave, timwa kyeta mwitanahua karavuquitaita siteta, Qio mwaa mwatuqyaraqitaitavata quate, tita.

⁴⁰ Mwitaa tuvata Porukya Sairaasikyatana karavu kyeta uro Ritiaara nraamwuqi Iesusira nraaqiaranramwu uro taqeta mwitanahua mwihua kepukyaqama nyataare tita kyuqe qua timwa nyita mwiaqataita mwitanahua mwi mwatuqyara kyeta vurama.

17

Tesaronaikaani vura

¹ Mwitanahua Piripai kyeta vuhua uro mwatuqya mpotana Ampiporisiva, Aparoniaavata, vara kyeta vutura Tesaronaikaani uro ntora. Mwi mwatuqyaraqi Iutaa mwaanra nraamwu mpo vahura.

²⁻³ Poruya nauqaa uturara rieqaro mwi nraamwunraqi vera ntero. Poruya taarampo mwaanraqaa mwipi variqaro mwakyaakya mwipi ntuvaantuuma vuhua timwa nyinro. Mwiva mesaaara mwihua hia ntapihura

timwa nyinrenra hiro hia mwihua mwia quara unra quave tintema kyero Poruva mwia okyara ntapihi kyero Kotira mpukuqitairo puaama kyeqaro timwa nyinro tiqaro, Mresaavanto nriqa vi inraikyara varero uro utu viro qaiqaa qati siquani quava Kotira mpukuqi mwataama vahirave. Jesusiva nte mate nkyl timwa nyu vaisiva qio mwivama mesaiaa mwiva variho, tiro.

⁴ Mwitaatuvata Iutaa nraakye qora mponramwuvanto qutaama qiaro timwa kyeta Porukya Sairaasikya vataqita vuvata, Kiriki vaisi airinramwuvanto Iutaa qua mwaanra riorhua mwihuavata qutaave timwa kyeta Porukya Sairaasikya sataqita vuvata, nrutu nronra vataa nraakyenramwuvata, mwitanahua sataqita vura.

⁵ Mwihua qutaave tuvata Iutaa vaisinramwuvanto taqovata mpo mwatanaha nraakye qoravantovata Porukya Sairaasikya sataqita vuvata mwihua mwia kyaara mwihua uaqia huvata uro aanraqaataita uaqia hu vaisihua sita ntuvaantuuma kyeta mwihuara vuavi tuvata mwi vaisihua uro ekyaa mwi mwatanaha rapatovata mwihua uro Iasoninra nraamwu gesa ntukuraa kyeta vijeteta nraamwuqi Porukya Sairaasikya puaama kye sitaqita nraakye qora suqaa kyarera utura.

⁶ Puaama kye taqovata hia huvata mwiaqataita mwihua Iasoninravata Iesusira nraaqiara mponramwuvata ntavaaqavu kyeta ntanrauqita uro mwi mwatukyaraqaa ntaqikyi varu vaisihua suqaa kyeta aakyara nteta tiqata, Ekyaa mwata maata vahintema mwaa vaisinramwuhua antua utuqita nrohiahuma mwaini tiri mwatukyanivata nrianrave.

⁷ Nriavaromwaa vaisiva Iasoniva mwinramwuhua qamwata nyatero nai nraamwuqi sitaqiro uro kyaiho. Tiri vunyaa vaisi Rominyaava varihata mwihua ekyaa mwia qua hia riaraitita, mwia qua nteqa kyeta tiqata, Tiri vunyaa mpovanto Iesusivama variho qjavo, tita.

⁸ Mwihua mwitaatuvata mwi mwatukyaraqaa ntaqikyi varuhuavata, nraakye qora mwini ntuvaantuuma vita varuhuavata, uaqia huvata nronraqama kye qua aakyara timwaqita vura.

⁹ Mwitaati varuvata mwi mwatukyaraqaa ntaqikyi varuhuavata, Iasonivata mpo vaisinramwuvata qio mwitaatuvata mwinramwuhua qamwanrama kyeta Porukya Sairaasikya Mperiaani sitovata mwitanahua mwini vurama. Mwitanahua Mperiaani uro nteta uro Iutaa mwaanra nraamwuqi vera nte variqata qua mwakyaakya timwa nyunra.

¹⁰ Mwihua huvantu kyovata vuvaro enta huvata Iesusira nraaqiaranramwuvanto mwi mwatukyaraqai varuhuavata qamwanrama kyeta Porukya Sairaasikya Mperiaani sitovata mwitanahua mwini vurama. Mwitanahua Mperiaani uro nteta uro Iutaa mwaanra nraamwuqi vera nte variqata qua mwakyaakya timwa nyunra.

¹¹ Mperiaaqinaahua hia Tesaronaikaqinaahua voti hiraitita, mwihua qaraakya qua Poruva tu quara riaataa nraahu huvata mwia qua rieqata mwihua mpo enta mpo enta Porura quavanto qutaa qua vahianinra nkyiari suqovata taqarerata Kotira mpukuqi mwi quara kyaara ntqata puua hi varura.

¹² Mwitaamaqita vita Iutaa airivanto Iesusirara qutaa mwivave tuvata Kiriki nraakye nrutu nronra vahuhuavata airivanto qutaave tuvata Kiriki vaisi airivantovata qutaave tura.

¹³ Airi nraakye qora Iesusira quara qutaave tuvata Iutaa vaisinramwu Tesaronaikaani varuhuavata riorvaro Poruva Mperiaani Kotira qua timwa nyi varuvata mwia kyaara mwihua nkyiari mwaata mwini kyeta Mperiaan mwini uro nteta antua qua tiqata uaqia hu vaisihua sita kyeta mwihua rapateqata tuvata Porura uaqijama mwatarerata uti varura.

Mperiaani vurama

¹⁰ Mwihua huvantu kyovata vuvaro enta huvata Iesusira nraaqiaranramwuvanto mwi mwatukyaraqai varuhuavata qamwanrama kyeta Porukya Sairaasikya Mperiaani sitovata mwitanahua mwini vurama. Mwitanahua Mperiaani uro nteta uro Iutaa mwaanra nraamwuqi vera nte variqata qua mwakyaakya timwa nyunra.

¹¹ Mperiaaqinaahua hia Tesaronaikaqinaahua voti hiraitita, mwihua qaraakya qua Poruva tu quara riaataa nraahu huvata mwia qua rieqata mwihua mpo enta mpo enta Porura quavanto qutaa qua vahianinra nkyiari suqovata taqarerata Kotira mpukuqi mwi quara kyaara ntqata puua hi varura.

¹² Mwitaamaqita vita Iutaa airivanto Iesusirara qutaa mwivave tuvata Kiriki nraakye nrutu nronra vahuhuavata airivanto qutaave tuvata Kiriki vaisi airivantovata qutaave tura.

¹³ Airi nraakye qora Iesusira quara qutaave tuvata Iutaa vaisinramwu Tesaronaikaani varuhuavata riorvaro Poruva Mperiaani Kotira qua timwa nyi varuvata mwia kyaara mwihua nkyiari mwaata mwini kyeta Mperiaan mwini uro nteta antua qua tiqata uaqia hu vaisihua sita kyeta mwihua rapateqata tuvata Porura uaqijama mwatarerata uti varura.

14 Mwitaa huvata Iesusira nraaqiaranramwu mwini varuhua Porura rivotare timwa kyeta qamwanrama Porura vita kyeta vevani titovaro vuvata Sairaasikya Timotikya nraahu Mperiaani varuvata

15 mpo vaisinramwuvanto Porura vitaqita uto mwatukya nronra Ateni mwini kyeta mwiaqataita mwinramwuhua uto ntanteta Mperiaani nrhuha nrumu Sairaasikya Timotikya timwa nyita tiqata, Poruva nkyitananra tiqaro, Nkye mpo kyaiqa taiqa kyeta qamwanramama mwaini nte hunani tumuate, taho, tita tura.

Poruva Atenini varura

16 Mwia kyeta vuvaro Poruva Ateni mwini nanrianraa variqaro mwiva mwatukya mwipi nrohiqaro taqvata mwi mwatanaahua airi inraikya viri kohi kyeta tiri mwanriqave timwa kyeqata vatova vahuvaro Porura mwutukyavanto uaqia huvaro varura.

17 Poruva mwi inraikyara mwi inraikyara taqero mwiaqatairo mwiva Iuttaa mwaanra nraamwuqi uro variqaro Iutaavata, mpo mwatanaa nraakye qoravanto Kotirara aakyara nte varuhuavata, mwakyaakya timwa nyinro mwiaqatairo mwiva mpo enta mpo enta maaketiqi uro variqaro mpo mwatanaa nraakye qora vitare nritare hi varuhua qua mwakyaakya timwa nyinro.

18 Poruva mwihua timwa nyi varuvata mpo qua Epikuriaaninra okyaravata, Sotoikira okyaravata, riohua nri nteta mwihua Poruravata qua tura. Mponramwuvanto nkyiari henahua kyapara hita tiqata, Mwamwaa api mpo qua mpo qua ti vari vaisiva, mwaava nanra qua tirerove ti variho? tita.

Tuvata qaiqaa mpo uhua tiqata, Mwiva mpo mwatanaahua mwanriqanramwu okyararave ti variho? tita. Poruva Iesusiva qutu viro qaiqaa qati sivurara timwa nyi varuvatara tita, mwihua mwitaa tura.

19 Mwihua mwitaa timwa kyeta Porura viteta Ariopakaasi kaanasorinramwu kuairama vita varunani uro kyeta Porurara tiqata, Qaraakya qua e nraakye qora timwa nyi variana quara tiri timwa timwiqe riaare.

20 Tire i qua riauraro mwi quava nraahumwa mpo qara ihata qaiqaavata mwi quara okyara ntapihi kyeta riarerave, tita.

21 Mwi mwatanaahuavata, mpo mwatanaahuavata mwipi varuhuavata, qua nraahu ti varu vaisihua variqata mwihua qaraakya qua timwaqi viqata qaraakya qua riemwaqita virara nraahu rieqata varura.

22 Mwihua mwi quara okyara riarerave tuvaro Poruva Ariopakaasi kaanasorinramwu kuairama vuhua suqaa siviro timwa nyinro tiqaro, Ateninyaa vaisi nkyenramwuve, nte taqauqata nkye mpoqama kyeta mwaanra okyara mpo okyara riemwaqita vi variahuvave.

23 Nte mwaini nkyi mwatukyaqi nrohiqana nkyeta mwanriqanramwu anra aakyara nteqata mpo inraikya mpo inraikya utu taara airi inraikyama taqauqo. Nte mpo taintavata taqauqo. Mwiaqaa mwaa quara qara ntumwa taarave: *MWAA TAINTARA TIRE HIA TAQETA RIETA HUNA MWANRIQANRANRA RIEQATA TAINTA UTU MWATAUNANRAVE*, qiarave. Nkye mwanriqa mwia hia taqeta rieta ntapihiara, mwianra qumina nkye aakyara nte variara, nte mate mwianra ntapihi kyena nkyi timwa nyinrenrave.

24 Mwanriqa mwia nrutu Kotivave. Kotiva mwatavata, ekyaa mwiaqaa vahi inraikyavavata, utu taivave. Mwiva nyaamwuqaavata, mwataqavata, ntaqikyi varivara tiro, mwiva hia vaisivanto hoqataa nraamwunraqi variqiro vi varivave.

²⁵ Kotiraqaatai ekyaa nraakye qoravanto nraaihovata ekyaa inraikyavata vare variarara tiro, hiama qio vaisivanto mpo inraikya Kotira kyaahaqa hiariva vahiananrove.

²⁶ Kotiva haaru vaisi kuaiqia tiri haivaqara utu tovaro mwikuraqaatairo ekyaa nraakye qora qovarama vuvaro Kotiva ekyaa mwata maata variate tiro, mwihua sitorave. Kotiva nraakye qora utu kyero tiqaro, Mwi mwatanaava mwi entara mwi mwataraqaa variananrove, mwi entara mwi mwatanaava mwi mwataraqaa variananrove, timwa kyero kyaihata variarave.

²⁷ Mwihua Kotirara puua hirerata tupupa hiantema kyeta puua hiate tiro, Kotiva nraakye qora qovarama kyaihata variarave. Qio Kotiva hia tiri nyianrato variho.

²⁸ Mwianra mpovanto mwitaama tiro:
Kotiva qati varirara tita, tire qati variqi vita, tire qakyaa hita, tire qati nraahu variqi quarahuama varuro, tirave.

Nkyi mpukuqi qara nti varia vaisihua mwitaama tita:
Tire mwia nraaqiarama varuro, qiarave.

²⁹ Qio tire Kotira nraaqiara variqatara tita, tire Kotirara mwiva vaisivanto korive, orive, munimave, vara kyeta kohi kyeta utu taa inraakyara votima kyero varirave qiarorave.

³⁰ Haaru nraakye qora hia Kotira ntapihi kyaraitita, qora kyaiqa vare varuvaro Kotiva qati vu taqe kyorave. Mwaa entara Kotiva ekyaa nraakye qorarua uaqia hi aanranra qaqlira kyaate ti varirave.

³¹ Kotiva qua vatero tiqaro, Mpo enta ko qari entavama vahiananrove, tirave. Mwi entaraqaama Kotiva nronraqama kyai vaisiva ntapihi kyero ko tiqaroma mwaa mwataraqaa vari nraakye qorahua qua riaananrove. Nkye ko qiani vaisira mwia ntapihi kyaate tiro, Kotiva mwia qutu vuraqitairo qati varia sivuma kyorave, tiro.

³² Poruva Iesusiva qutu vuvaro qaiqaa qati vara sivuma kyo quara tuvata hini uhua raima mwatovata hini uhua tiqata, Mpo entavata e mwi quara qaiqaavata tiraqeta tire riaare, tita.

³³ Mwitaa tuvaro Poruva mwihua kyero vura.

³⁴ Vuvata vaisi imponramwuvanto mwia vataqita vita Kotira nraaqiaraqama vura. Vaisi mpovanto Taionisiaasiva mwiva Ariopakaasi kaanasori vaisivanto varuvaro nraakye mpo mwia nrutu Ntamarisiva mwitanahuavata, mponramwuvantovata, Porura vataqita vura.

18

Poruva Korintini vura

¹ Mwiaqaatairo Poruva Ateni kyero Korintini vura.

² Mwini uro ntero mwiva Iutaa vaisi mwia nrutu Akuiaraara Pontasinyaanra puaama kyora. Haaru vunyaa vaisi Korontiaasiva ekyaa Iutaa mwihua hia Romini variate timwa kyero ekyaa sitamwa kyo entara, Akuiaraava nai nraata Pirisiraaravata vita varero Itari kyero mwi entara Korintini nrumu varura. Poruva mwitanahuua taqarerero vuva

³ uro mwitanahuavata varura. Mwivavata mwitanahuavata seri nraamwu toqa kyeqa haqiro kyaiqara varohuara tita, mwihua kuaaqi variqata mwi kyaiqara varora.

⁴ Poruva mwi kyaiqara vareqaro mwiva mpo mwaanraqaa mpo mwaanraqaa Iutaa mwaanra nraamwuqi vera ntero variqaro Iutaavata, Kirikivata, Iesusira quara qutaa quave qiate tiro, mwiva mwihua kyapata qua ti varura.

⁵ Poruva mwitaamaqi vi varuvata Sairaasikya Timotikya Masentonia-saita uro ntoraro mwiaqatairo Poruva mpo kyaqa varora qaqira kyero mpo enta mpo enta Iesusira mwakyaaakya nraakye qora timwa nyiqiro viro. Mwiva Iutaa timwa nyinro tiqaro, Nkye mesaaia veikya variara qio Iesusiva mwivave, tiro.

⁶ Tuvata mwihua mwi quara hia riaraitita, mwi quara kyaara Porura uaqiamma mwateqata uaqia hu quara tuvaro Poruva qaqao timwa kyero ntu-venrauma kyero tiqaro, Kotiva nkyi qaqira kyairata nkye raupirima vivera, hia niqavauma qua vahiananrove, nkyitaqqaama qua vahiananrove. Mate nte nkyi kyena mpo mwatanaahua hinani virerave, tiro.

⁷ Mwitaa timwa kyero Poruva mwiaqatairo mwihua kyero mpo mwatanaaa vaisi mwia nrutu Taitaasi Iasitaasira nraamwuqi uro varura. Taitaasi Iasitaasiva Kotirara aakyara nte varu vaisiva varuvaro mwia nraamwuvanto Iutaa mwaanra nraamwu qaumato vahura.

⁸ Vaisi mpovanto mwia nrutu Kirisipaasiva, mwiva mwaanra nraamwuqaa ntaqikyi varuva mwivavata, mwia nraamwuqi varuhuavata, nronra Iesusirara qutaa mwivave tura. Korintiqinaahua airivantovata Porura mwakyaaakya rieta qutaa quave timwa kyeta nramanri varora.

⁹⁻¹⁰ Mwitaamaqiro vuvaro mpo enta Poruva entaqi vaiteqaro ruvata taqovaro nronravanto mwia timwa mwinro tiqaro, Nte i vatama kyena varurara tira, e hia aatu hiqara mwakyaaakya timwa nyante. Hia tirema variante. Mwaa mwatanaahua airi nraakye qora ni nraaqiara variavanana tina, nte iqaa ntaqikyiqi vi variariro hia mpovanto qio i ruananrove, tiro.

¹¹ Mwitaa tuvarora tiro, Poruva kuaa ihi vara kyero mpo ihi hinivata mwini variqaro mwi mwatanaahua Kotira qua timwa nyiqiro vura.

¹² Poruva mwitaamaqiro vuvata Kariora nronraqama kyeta tiqata, E Romeni vunyaa vaisi mpo variqara Akaiaqaa ntaqikyiyante, tuvaro Kar-iovaa nronraqama viro varura. Mwiva varuvata Iutaa mponramwuvanto ntuaantuuma vita tiqata, Nrivaqe Porura uaqiamma mwataare, timwa kyeta uro Porura ntavaaqavuqita uro ko ti varu nraamwuva vahunani kyeta Kariorara tiqata,

¹³ Mwaa vaisiva nraakye qorara mwataama mwataama kyeqatama Kotira nruutu tuaaheraate tiqaroma tiri mwaanra qua nteqa kye variho, tita.

¹⁴ Mwihua mwitaa tuvaro Poruva qua qiankye tuvaro Kariova nraante Iutaa vaisinramwuana qaqao tiro, Mwaa vaisiva hia ruvi kyaiqarave, uaqia hi kyaiqarave, utiqaro kamaninra qua nteqa kyaitirio, nte qiomaa nkyi qua riautirio.

¹⁵ Nkye nkyeta quarave, nkyeta nyutuarave, nkyeta mwaanra okyarar-ave, nronraqama kye rieqata nte hunani nriavo. Mwi quava nkyitanai vahirara tina, nte hia mwi quara riarerave. Nkyeta mwini viqata qiate, tiro.

¹⁶ Kariova mwitaa timwa kyero mwiva mwihua mwiqitairo sitero tiqaro, Hianteta mwaaqitai vevante quate, tiro.

¹⁷ Mwihua sitovata vaisi mponramwuvanto uro Sositenisira Iutaa mwaanra nraamwuqaa ntaqikyura mwia ntavaaqavu kyeta ko nraamwu qesaaqaa variqata mwia ntutu kyeta vatovalo Kariova hia mwianra nronraqama kyero riora.

Poruva nrumu ntantero Antiokini vura

¹⁸ Poruva Korintini Iesusira nraaqiaranramwu kyapata airi enta vari kyero mwiaqatairo mwiva Pirisiraaravata, Akuirearavata, sitero Korinti kyero sipiqi mwaanri ntero Siriaanianra vura. Mwiva mwinianra viqaro

mwatukya mpo Senkariaani uro ntero Kotirara nai kyauqu nriqiqaa vateqaro mpo qua timwa torara rieqaro nai qiaa ekyaa toqa kyero viro.

¹⁹ Qio mwinramwuhua vuhua Epesaasini uro nteta Poruva Pirisiraakya Akuraakya mwini kyero uro Iutaa mwaanra nraamwuqi vera ntero Iutaa kyapata qua tiro.

²⁰ Mwihuavata qua tuvata mwihua Porurara tiqata, Tirivata mpuahaama variqira quante, tuvaro Poruva qaqao tiro, Nte mate hia nkyivata mpuaha varirerave, tiro.

²¹ Timwa kyero mwiva virera hiro mwihua timwa nyinro tiqaro, Nraakiara Kotiva qiove tirera, nkyivata qaiqaa nrumu varirerave, tiro. Timwa kyero mwiva sipiqa mwaanri ntero vura.

²² Vuva Sisariaani uro ntero mwiaqaatairo mwiva sipiqtairo mwaamwi ntero viviro uro verara Ierusaremini Jesusira nraaqiaranramwu qua mwantero mwiaqaatairo uro ntantero Antiokini uto varura.

²³ Mwiva mwini mpo entanramwu vari kyero mwiaqaatairo mwiva vuva uro mwata mpotana Pirisiaanivata, Karesiaanivata, nrohiqaro mwatukya mpoqi mpooq Iesusira nraaqiara varuhua kepukyaqama nyataqiro vura.

Aporosiva Epesaasiqvata Korintiqivata kyaiqa varora

²⁴ Poruva mwihua kepukyaqama nyate varuvaro Iutaa vaisi mpovanto mwia nrutu Aporosiva, mwiva Arekisantaanyaava, mwiva Epesaasini vura. Mwiva kyuqema kyeqaro nraakye qora qua mwakyaakya timwa nyi varuva. Mwiva Kotira qua qara ntumwa tora kyuqema kyero rio vaisiva.

²⁵ Mpovant nronra vataqi quani aanranra mwia nraamwutovaro mwiva ntapihiro mwiaqaatairo mwiva kepukyaqama kyero nraakye qora Jesusirara vutu kyero timwa nyiqiro vura. Mwitaa hiqaro mwiva haaru Ioniva nramanri nyu entarara nraahu mpoqiyavata ntapihura.

²⁶ Aporosiva Epesaasini uro ntero Iutaa mwaanra nraamwuqi vera ntero mwiva hia aatu hiraitiro Kotira qua timwa nyi varuvata Pirisiraakya Akuraakya mwia qua rieta mwia vitaqita nkyiaritana nraamwuqi uro kyeta Kotiva hinani vi aanranra Jesusira qua mpoqiyavata ntapihi kyeta timwa mwunra.

²⁷ Timwa mwuvaro riero mwiaqaatairo mwiva Kirikini virera huvata Jesusira nraaqiaranramwu Epesaasini varuhua mwia kyaahaqa hiqata qara ntumwa kyeta mwita Jesusira nraaqiaranramwu Kirikini varuhuara mwaa vaisira kyuqe hi vaisira qio mwia kyuqema kyeta vitaate timwa kyeta qara mwia mwia mwita. Mwuvaro Aporosiva varero uro nyinro mwini variqaro mwiva Kotiva kyuqema nyatovata Jesusira nraaqiaraqama vuhua kyaahaqa hiqaro varura.

²⁸ Mwiva nraakye qora suqaa variqaro Iutaa kyapata qua timwaqiro vuvuvaro mwia quavanto lutaa qua nraatara kyero. Mwiva Kotira mpukuqinaa qua timwa nyiqanro Jesusira mesaiaa okyararavata ntapihi kyero timwa nyunra.

19

Poruva Epesaasini varura

¹ Aporosiva Korintiqi varuvaro Poruva vuva mpo mwataqaama tero vuva Epesaasini uto ntero taqovata Jesusira vataqita nro uhua mwini varura.

² Varuvaro mwiva mwihua kyapara hiro tiqaro, Nkye haaru Jesusirara qutaave tu entara nkye Kotira mwanaraqura varorave iho? tiro. Tuvata mwihua tiqata, Hia tire Kotira mwanaraquravato variho qia okyarara riaunanrave, tita.

³ Tuvaro Porura mwihua kyapara hiro tiqaro, Mwitaa ihata nkye nanra nramanri varaarave? tuvata mwihua tiqata, Tire Ioninra nramanri varuananrave, tita.

⁴ Tuvaro Poruva mwihua timwa nyinro tiqaro, Nraakye qora uaquia hi aanranra qaqlira kyaata tiro, Ioniva mwihua nramanri nyunrave. Ioniva mwihua timwa nyinro tiqaro, Ni naakiara nriani vaisira mwianra qutaa mwiva mesaiaavanto variho qiate, turave, tiro.

⁵ Poruva mwitaa tuvata mwihua mwi quara rioraro Poruva Jesusira nrutu nteqaro nramanri nyinro mwiaqatairo

⁶ nai kyauqu mwihuaqaa vatovalo Kotira mwanraquravanto mwihuaqi tumu varuvata mwihua mwiaqataita mpo qua mpo quaqitai Kotira qua timwa nyi varura.

⁷ Mwi vaisinramwuhua 12 nramwu varura.

⁸ Poruva Iuttaa mwaanra nraamwuqi variqaro taarampo torara hia aatu hiraitiro, mwi quara ntapihi kye riatae tiro, Kotiva ntaqikyiani quara mwihuatama kyero ti varura.

⁹ Timwa nyuvata mponramwuvanto mwihua su nyaatovanto kepukyaqi huvata hia Porura qua riaraitita, mwiaqataita mwihua nraakye qora suqaa Porurara tiqata, Nronravanto hinanianra qua aanranra e qananra uaquia hi quarama iho, tita. Mwihua mwitaa tuvaro Poruva mwihua kyero Jesusira nraaqiaranramwu nraahu sita varero vuva uro mpo nraamwuqi Tiranaasira sikuru nraamwuqi variqaro qua mwakyaakya timwa nyi varura.

¹⁰ Mwiqi variqaro taara ihi mwianra Kotira qua mwakyaakya timwa nyuvata ekyaa Esiaani varuhua Iutaave, mpo mwatanaave, nronra Jesusira qua riora.

Sivaara mwaaqunramwu

¹¹ Kotiva Porura kyaahaqa huvaro mwiva nronra kyaiqa, mpo kyaiqa mpo kyaiqa vare varura.

¹² Mwitaa huvata Porura tuavaaqave, pata tavuna qainaamave nominra nrukorave, nrumu varaqita uro nriqa vuhuaqave, vaanavanto utaqi varuhua, viti mwihua nyamwantaqa vatovalo nriqa vuhua kyugema vuvata vaanavantovata vaisi utaqitairo nrutarero vuvata mwihua qio varura.

¹³⁻¹⁴ Mwitaa huvata Iuttaa vaisi mponramwuvanto mpo mwatukya mpo mwatukya nrohiqata vaana sitarera uti varuhua varura. Mwi vaisihua Sivaara mwaaqu ⁷ nramwu varuvalo mwihua sova Iuttaa mwaanra qua rieqaro Kotira kyaiqa vara mwate varu vaisiva nronravanto varuvata mwihua Porura kyaiqa taqeta, Porura nraantanteta mwiva varo kyaiqara mwihuatava vararerata uti varita tiqata, Nrivaqe tirevata Jesusira nrutu nteqata vaana sitaaratara nrirareta quate, tita. Mwitaa timwa kyeta mwihua uro mwataara hita vaananaa mwitaama tita, Tire Poruva ti vari vaisira nrutu, Jesusira nrutu nteqatama iara nrirerera quante turo, tita.

¹⁵ Mwihua mwitaa tuvaro vaanavanto mwihuara tiqaro, Nte Jesusira ntapihi kyena Poruravata ntapihi kyaurave. Nkye tahuave iho? tiro.

¹⁶ Mwitaa tuvaro vaanavanto mwia utaqi varu vaisiva mwiva mwihuara vi nraaqua nri nraaqua hiqaro mwihua ntuqutiqaro mwihua tuavaaqa nrabitu kyovata mwihua mwi vaisira nraamwuqitaita veva nteta nraanre mwamwantavata tokyo mwihua hiantamwa tetu vura.

¹⁷ Mwitaama kyovata ekyaa Iutaave, mpo mwatanaahuave, Epesaasiqi varuhua mwi quara rieta mpoqama kyeta aatu hita Jesusira nrutu tuaahere varura.

18 Jesusira nraakye qora airivanto airi suqaa variqata mwihua nkyiari uaqia hu kyaiqara varora timwa qovarama kyora.

19 Mwitaa huvata airi vaisivanto tauraa mwihua tovevaanavata kyaiqa utuhuave, quahave vuhaapahaah utuhuave, mwi kyaiqara qaqlira kyeta mwihua nkyiari mpukuve, mwitaa inraikyave, vareta nraakye qora suqaa uro qia quarateta. Nronra munima 50,000 kinaa kyeqata varato mpukura qia quara taiqa kyora.

20 Qio mwitaama kyeta mwi mwatanaahua uaqia hu kyaiqara qaqlira kyeta Kotira qua riemwaqita vuvaro Kotira quavanto mwi mwatanaahua kepukyaqama nyatora.

Epesaasiqi Porura qua kyaara nronraqama kyeta inronra hura

21 Mwiaqaatairo Poruva tiqaro, Kyaiqe nte Masentoniaanivata Kirikinivata vintantena Ierusaremni quankye. Nte mwini quarivama nronra mwatukya Rominivata quangye, tiro.

22 Mwitaa timwa kyero Poruva nai kyaahaqa hu vaisitana Timotikya Iraasatisikyatana sitovata mwitanahua Masentoniaani vuvaro Poruva nai Esiaani mpo entanramwu variro.

23 Mwini varuvaro mwi entara Epesaasini Kotiva hinani vi aanranra kyaara inronra hu inraikyava qovara hura.

24 Vaisi mpovanto mwia nrutu Ntimitiriaasiva, mwiva oriqtai kyaiqa varo vaisiva, mwiva nraakye mwanriqa mwia nrutu Atemisira nraamwu nronra vahuvoro mwiva mwianra rieqaro nraamwu pataqiani nai kyaiqa vaisi kyapata utu kyeqaro mwiaqaatairo munima airi vare varura.

25 Ntimitiriaasiva nai kyaiqa vaisinramwuvata mpo uhua mwi kyaiqara varohuavata ntuvaantuuma kyero mwihuara tiqaro, Mwaini riaate. Tire mwaa kyaiqara vareqata mwiaqaataita airi munima vare varunanrave.

26 Nkye Poruva vare vari kyaiqara ntapihi kyaarave. Poruva tiqaro, Nkye nkyeta kyauquqotai mwanriqa ututaava hia qutaa mwanriqvanto varaho, tiho. Mwitaa tirara tita, airi nraakye qora Epesaasiqinaahuave, ekyaa vara ututu Esiaaqinaahuave, mwia quara qutaa quave ti variarave.

27 Poruva qati nraahu mwitaa timwaqvi vi varirera, nraakye qoravanto tiri kyaiqara qumina kyaiqa unra kyaiqave tivarave. Hia tiri kyaiqa mwianra nraahu mwitaa tivarave. Mwihua nraakye mwanriqa Atemisira nraamwuanra qumina nraamwuye timwa kyeta Atemisira qaqlira kyevarave. Mwitaa tivera, Atemisiva hia tiri mwanriqa nronravanto variananrove. Mate ekyaa Esiaanyaahuavata, ekyaa mwata maata vahi ntema variahuavata, mwia nrutu tuaahere variarave, tiro.

28 Ntimitiriaasiva mwitaa tiqaro mwihua rapatama kyovata nraakye qora airivanto inronra hiqata nkyiari mwanriqanra aakyara ntamwaqi vita tiqata, Atemisiva Epesaasiqinaavama nronravantove, tita.

29 Mwitaa timwa kyeta mwi quara timwaqvi vuvata ekyaa mwi mwatanaahua antua aantua tita. Mwitaa timwaqvi vijata mwihua uro Kaaasikya Arisitakaasikya ntavaaqavu kyeta. Mwitanahua Masentoniaa vaisitana Poruravatama kyeta nrutanahua nrumu varuvata mwihua mwitanahua ntavaaqavu kyeta sitaqita uro nraakye qora ntuvaantu hunani kyora.

30 Mwitanahua site vuvaro Poruva naivata nraakye qora ntuvaantu hunani virera huvata Jesusira nraaqiara mponramwuvanto mwia ntavaaqavu teta tiqata, E hiama qio vinanrave, tuvata

31 nronra vaisi mponramwu Poruva totiqama tohuavata qua vara kyeta kepukyaqama kyeta tiqata, E hiavata mwaini ntuvaantu hianani nrumu ena viri nyaamwutaante, tita.

32 Mwitaa tuvata nraakye qora varuhua antua aantua tita. Airi nraakye qora ntuvantuama vita varura mwia okyara hia ntapihi kyaraaitita mwiaqataita nkyiariara mpohua aakyara ntamwa kyeta mpo qua tuvata mpohua aakyara ntamwa kyeta mpo qua tura.

33 Mwitaamaqi vuvata Iutaavanto nkyiari nramwunaanra mpo Arekisantaara rataa kyeta tiqata, Ema nraakye qora suqaa sivira variqara ntapihi kye qua timwa nyiante, tuvaro Arekisantaava siviro kyauqu tuaahereqaro qua qiankye tuvata

34 mwihua taqovaro mwiva Iutaa vaisivanto varuvata mwihua hia mwia quavata riaraitita, nkyiari mwanriqanra aakyara nteta tiqata, Atemisiva Epesaasiqinaavama nronravantove, tita. Mwi quara nraahu 2 auaara timwaqi vi varura.

35 Mwitaa timwaqita vi varuvaro mwiaqatairo kusikusivanto siviro nraakye qora antua kyovata tirema varuvaro mwiva tiqaro, Epesaasiqinaa vaisi tuaavo, Tire Epesaasiqinaahua tetu mwanriqa Atemisira kyuqema kye ntaqikyi varuna quara ekyahua ntapihi kyaarave. Nyaamwusairo orivanto mwaaqi tumu ntiro vahira mwivavata ekyaa ntapihi kyaarave.

36 Hia mpovanto mwi quarara unra quave qiananrove. Mwianra rieqatama nkye qati tirema variqatama hia paparuqa hiqata mpo inraikya mpo inraikya utuete.

37 Mwi vaisitanahua hiama tiri mwanriqa nraamwuqitaita mpo inraikya mpuara varaavo. Hia mwihua tiri nraakye mwanriqanra qora qua qiaovo. Mwitanahua hia uaqia hi kyaiqara utu kyaavata nkye quminama siteta mwaini nriavo.

38 Ntimitiriaasivavata, mwia kyaiqa vaisinramwuvantovata, vaisi mpo-qaa qua vatarera hivera, nronra vaisi ko riaahua varianani ko ti entaraqaa qiomia mwihua mwi vaisiraqaa qua vatevarave.

39 Nkyiqi mpo quavata vahirera, nkye ekyaa ntuvantuama vita variraqa ntapihi kyeta mwi quara qiomia tivarave.

40 Nkye qumina qua kyaara timwaqita ntaqirerata uti variavo. Nraakiara mwi quara okyarara kamaniva tirinramwu kyapara hirage tire hia qio mpo qua qiananrave. Nraakiara kamaniva tirinramwuanra tiqaro, Nkye qumina mwi entara ntaquarave, timwa kyero tirinramwuqaa qua vataankyorave, tiro.

41 Kusikusivanto mwitaa timwa kyero mwini ntuvantuama vita varuhua sitovata vita nrira hurama.

20

Masentoniaanivata Kirikinivata vura

1 Qio nronraqama kye inronra huva taiqa vuvaro Poruva Jesusirara quitaave tuhua nyaanrovata mwiva hunani nruvaro mwiva qua tiqaro mwihua kepukyaqama nyatero kyauqu nyinro mwihua kyero Masentoniaani viro.

2 Mwiva Masentoniaani vuva uro mpo mwatukya mpo mwatukya nro-hiqaro Jesusirara quitaave tuhua mwini varuhua mpo qua mpo qua timwa nyinro mwihua kepukyaqama nyatero mwiaqatairo mwiva Kirikini viro.

3 Mwiva taarampo torara Kirikini variro mwiaqatairo mwiva Siriaani sipiqi quankye tiro riovata Iutaa vaisinramwuvantovata mwia ru kyarerata uti varuvaro Poruva qaqlira kyero tumu ntantero Masentoniaani quankye tura.

⁴ Paireasira mwaqu Sopataava Mperianyaava Porura vatama kyero vuvata vaisi mponramwuvantovata Poruravata vura. Tesaronaikaa qinaahuatana Arisitakaasikya Sekantaasikyave, Ntepinyaava Kaiaasivave, Timotivave, Esiaanyaahuatana Titikaasikya Toropimaasikyave, mwinramwuhua Poruravatama kyeta vurama.

⁵ Mwihua nraante vuhua uro Toroasini tiri vekeya varuvata

⁶ tire Piripaini varita hia kyoto mperetira omwata nro entava taiqa vuvata mwiaqataita pipi vareta vita kyauquru enta vara kyeta Toroasini uro nteta mwini 7 entara variavanana.

Poruva Toroasini variqaro Iutikaasira vara sivuma kyora

⁷ Saanteqa tire kyara nranrenrata ntuvantuama vita variavararo Poruva nraakye qora ntuvantuama vuhua qua mwakyaakya timwa nyinro. Mwiva hora quarivara tiro, mwiva qua mpuahaa timwaqiro vuvaro enta mwutukyqa hiro.

⁸ Mwiva qua timwa nyiqiro vi varuvata tire nraamwu verato vahusata ntuvantuama vita variavarata omwa airi qupi kyeta mwipi vata tovaro

⁹ qaraakya vaisi mpovanto Iutikaasiva uintuaqa mwatakyaa viro varuvaro Poruva qua timwaqiro vuvaro Iutikaasira vuvanto taute varuvaro mwiva vaita aavata viro verara nraamwu nai mwoqqa nai mwoqqa hoqatora taarampo nraamwu mwia ekyaararaqaatairo vevvara mwataqiqi tutu ntiro. Tuto ntuvata mwihua uto vita kye taqovaro mwiva qutu viro.

¹⁰ Qutu vuvaro Poruva uto mwiaqaa nraaqu viro mwia tутero tiqaro, Nkye hia aatu hiate, mwiva qatima variho, tiro.

¹¹ (Mwitaa tuvaro qutu vuva qaraakya vaisivanto qaiqaa qati sivuvaro) Poruva tumu ntantero uro variqaro mpereti nteqa kyero mwihuavata nrenro nyinro mwiaqatairo mwiva mpuahaa qua mwipi varuhuavata timwaqiro vuvaro qaata vuvaro Poruva mwihua mwini kyero vura.

¹² Vuvata qaraakya vaisi mwiva qati varuvata mwia viteta mwaatani vuvaro mwihua mwutukyavanto kyuqe huvata varura.

Poruva mwatukya mpo Mairitaasini vura

¹³ Poruva varuvata tire nraante pipi vareta Asosini uro nteta mwini Porura vekeya variavanana. Poruva vuni tiqaro, Nkye mwini uro ni peky varivagena nte mwataqaa quariva uro nkyl huntu kyaankye, tura.

¹⁴ Poruva viro tirivata huntu kyovata tire uro mwatukya mpo Mitirinini uro ntaavanana.

¹⁵ Qio mwiaqataita tire quavarahua mwia qanranraa kyaarerera utaqaa vahu mwataro mpo Kiosi qaumato uro nteta vita mwia nraatara kyeta mwata mpo Samosivata vita nraatara kyeta mwia qanranraa mwatukya mpo Mairitaasini uro ntaavanana.

¹⁶ Poruva tiqaro, Nte Esiaani mpuahaama uro variantkyo, tiro Poruva nai nraahu riero tiqaro, Nte hia Epesaasini virerave. Nte qamwanrama quankyera nte Ierusaremini Pentikosi omwata nre entara uro taqarerave, tiro.

Poruva Epesaasiqinaa nronra vaisinramwu ekyaara qua timwa nyunra

¹⁷ Poruva mwitaa tuvata tire Mairitaasini uro ntaavararo Poruva qua vara kyovaro Epesaasini viro. Poruva tiqaro, Uro timwa nyivata Iesusira nraaqiaraqaa ntaqikyi varihua nrumu ni taqaate, tiro.

¹⁸ Qua vara kyovaro mwihua hunani vuvata mwihua mwiva hunani nri ntovaro Poruva mwihua timwa nyinro tiqaro, Nte vuni Esiaani variqana nkyl kyapata kyaiqa varaavara okyara nkye ntapihi kyaarave.

19 Hia nina nutu nronraqa hiarive tiqana nte kyaiqa varaavarave. Iutaavanto ntuvantua ma viqata ni uaqiamma matarerata uti variavana nte toqaawantu tukyena, nruqunru tuqi viqana, Jesusira kyaiqa vareqana qua mwakyaakya nkyi timwa nyunrave.

20 Nkye mwianra ntapihiarave. Nkye taqaavana nte hia mpo qua uqetatena mpo qua nraahu nkyi timwa nyiavarave. Nte ekyaa qua nkyi kyaahaqa hiani quara ekyaa nraakte qora suqaavata, nkyita suqaavata, nkyi timwa nyiavarave.

21 Nte Iutaa vaisiaravata, mpo mwatanaahuaravata, kepukyaqama kyena qua timwaqina viqana mwitaama qiavarave, Uaqia hi kyaiqarave uaqia hi aanranra qaqlira kyeta Kotiva hinani nriqata Jesusira tiri nronra vaisiara quutaave qiate, qiavarave.

22 Qio mate nte Kotira mwanraquravanto nianra mwini quante tintema kyena nte Ierusaremini virerave. Ierusaremini quariro nanra inraikyavantove niqaa qovara hiananrove? Hia nte ntapihuqo.

23 Mwaa inraikyara nraahuma nte ntapihuqo. Kotira mwanraquravanto nianra tigaro, Rauriqara variente. E mpo mwatukya mpo mwatukya vinanra i karavuqa hivavata muaanra vareravavatama i vekya variho, tirave.

24 Nte Jesusiva nronravanto mpi kyaiqara, mwi kyaiqara nraahu varaqina vina uro taiqa kyarerave. Mwiaqaataina nte hia mwaa mwafaraqaa qati variqi quaninranra nronraqama kyena riarerave. Nte Kotiva nraakte qorara po tiro kyuqema nyataani quara kyuqe mwakyaakya, mwi quara nraahu timwa nyiqi virerave.

25 Nte Kotiva ntaqikyiani quara nkye varianani nrohiqana timwa nyunrave. Nte mate ntapihi kyaquo, nkye nraakiara hiama qaiqaa ni piri taqeverave.

26-27 Hia nte mpo qua qati riemwa tena mpo qua nraahu nkyi timwa nyunrave. Nte ekyaa Kotira quave, kyaiqave, nkyi timwa nyunrave. Nte mate kepukya qua nkyi timwa nyianinra riaate. Nte Kotira qua ekyaa qua nkyi timwa nyianinra tiro, nraakiara nkyiqitairo mpovanto raupirima virera, hiama niqi qua vahiananrove.

28 Kotira mwanraquravanto nkyi nronraqama kyaihatara tita, nkye nkyetaqaavata, Kotira nraakte qoraaqavata, kyuqema kyeta ntaqikyiqi quate. Kotiva nai mwaaqu nraanreqo mwi nraakte qorahua kyoqama tairara tita, nkye sipisipi qohua kyuqehua votima kyeta variqata Kotira nraakte qoraaq ntaqikyiqita quate.

29 Nte ntapihi kyaquo. Nte quarita uaqia hi quara ti vari vaisihua qaakyau vairi nraantanteta nrumu nkyi uaqiamma nyatevarave.

30 Nraakiara nkyitaqitaita vaisi mponramwu qovarama vita, Jesusira nraakte qoravanto tiri vataqi quate tita, mwihua api qua unra qua mwihua timwa nyiqi vivarave.

31 Mwianra riegatama rauriqata variate. Hia taunru kyaate. Nte taarampo ihi variqana iheravata, entaqivata, nkyiara nronraqama kye reina nruqunru rauru kyeqana nkyi kuaa kuaa mwihua timwa nyiavarave.

32 Nte mate virera hiqanama Kotiva nkyiqa ntaqikyiarive tinama, mwianra aakyara ntauqo. Kotiva nkyiara po tiro kyuqema nyataani quara riemwaqita quate. Mwia quavanto nkyi kyaahaqamaqiro virata nkye nraakiara ekyaa Kotira nraakte qora kyapata variqata kyuqema kyeta varivarave.

33 Nte nkyiyata variqana hia nte mpora munimanrave, koriarave, tuaqaqrarave, vairiqa hiavarave.

³⁴ Nkye taqaarave. Hia nte nkyiara ni kyaahaqa hiate tiraitina, nte ntene kyauqu mwaatanaqotaina kyaiqa varaqi viqana ntene kyaravata, tuavaaqvavata, vara kyena ni vatama kyeta varuhuavata kyaahaqamaqi quavarave.

³⁵ Nte ekyaa kyaiqa vareqanama kyuqe aanra nkyi nyaamwutaurave. Tire mwitaama kye kepukyaqama kye kyaiqa vara kyetama vehi nraakye qoravata kyuqema kyeta kyaahaqa hiananrave. Tire mwitaa hiqatama nronravanto Iesusiva tu quarara nraato tuare. Iesusiva mwataama tiro: Mpowanto mpohua mpo inraikya nyinro qamwataariva mpovanto mpo inraikya varero qamwataaninravata nraatara kyaananrove, turave, tiro.

³⁶ Poruva mwitaa timwa taiqa kyero mwiva nronra vaisi kyapata tori kyataa ntaqantaa kyero Kotirara aakyara ntero.

³⁷ Kotirara aakyara ntamwa kyovata mwihua ntateqata mwia kyuquqama mwateta mwia mota kyeta qio quante tita.

³⁸ Poruva vaakya mwihuara tiqaro, Nte hiama nkyi siri qaiqaavata taqaaninrave, turara mwihua mwutukyavanto uaquia huvata mwihua Porura vitaqita sipiqi uro kyora.

21

Poruva Ierusaremini vura

¹ Mwihua Porura uro kyovata tire yuro timwa kyeta sipiqi quavanana. Tire sipi vareta kyaarerera utaqaa vahu mwatava Kosini tumu vari kyeta mwia qanranraa mwata mpo Rotesini uro nteta mwiaqataita Pataraani vita.

² Mwini uro nteta taqaavararo sipi mpovanto Ponisiani virera huvata tire mwipi mwaanri nteta vita.

³ Viqata taqaavararo kyaarerera utaqaa vahu mwatava Saiparaasi kyauqu kyaantaqaqani vahuvata vitareta Siriaani uro ntaavararo mwatukya mpo Tariaani sipivanto nai varato inraikya uro qatinani vara kyarero utuvata

⁴ tirevata mwini mwaamwi nteta uro Iesusirara quitaave tuhua puaama kyeta mwihua kyapata mwini kuua uikiara variavanana. Variavararo Kotira mwanraquravanto mwihua kyaahaqa huvata mwihua Porurara tiqata, Hia Ierusaremini quante, tita.

⁵ Tuvata tire mwini variavararo tire quana entava nri ntovata vita. Virera hiavarata Iesusirara quitaave tuhua nkyiari nraakye nraaqiararavata mwatukya kyeta tiri titivaqita uro nramanri tokyani kyovata tire ekyaa tori kyataa ntaqantaaqita Kotirara aakyara ntaavanana.

⁶ Mwiaqatai mwihua kyauqu tiri timwuvata tire nkyiari kyauqu nyita sipiqi quavarata mwihua tumu ntanteta nkyiari mwaatani vura.

⁷ Mwihua vuvata tire Taiaa kyeta sipi mwiqimate mwatukya mpo Toremesini uro nteta Iesusirara quitaave tuhua mwini varuhua qua mwanteta mwihua kyapata kuua enta mwini varita

⁸ mwia qanranraa sipiqi mwaanri nteta Sisariaani uronte mwini variqata Piripiva Kotira mwakyakya tu vaisira nraamwuqi uro variavanana. Taura Ierusaremini variqata vaisi 7 nramwu vara sivuma kyeta Kotira kyaika varaate tu vaisinramwuuaqitairo Piripiva mwiva mpovanto varura.

⁹ Piripira nraamwuua erahiamuaantemanramwuvanto variqata mwihua hia vaati vararaitita, qati variqata Kotira qua qovarama kye varura.

¹⁰ Tire mwihuvata Sisariaani mpo entanramwu variavararo Kotira qua qovarama kye varuva mpovanto mwia nrutu Akapaasiva Iutiasairo nri ntero.

11 Mwiva uro ntero Porura reti vara kyero mwiaqotairo nai kyuqu kyauqu rupatero tiqaro, Kotira mwanraquravanto mwitaama taho. Nraakiara Iutaavanto Ierusaremini varihua reti mwaa qora mwataama kyeta mwia kyuquivata rupa kyetama mpo mwatanaahua nyivarave, tiro.

12 Mwitaa tuvata tirevata, mwini varuhuavata, mwi quara rieta Porurara po tita tiqata, E hia Ierusaremini quante, tita.

13 Mwitaa qiavararo Poruva qaqao tiro. Nkye ntataqita vivaro ni mutukya uaqia hiankyorave. Hia nte karavuqi quaninranra nraahu nronraqama kyena riauqo. Nte Iesusirara rieqana Ierusaremiqi qutu quaninranravata tera huqo, tiro.

14 Mwitaa tuvata tire hia mwia qua qio nraatara kyaarava vahuvata mwitaama tita, Qio nronravanto nai kyakya hiani kyaiqara varaarive, tita.

15 Mwitaa timwa kyeta tire mpo entanramwu mwini vari kyeta mwitaa inraikya tera taarama kye vareta mwiaqataita verara Ierusaremini quavanana.

16 Iesusirara quataave tuhua mponramwuvantovata Sisariaasaita tiri tivitaqita nrumu tetu variana nraamwunra Nesoninra nraamwuqi kyora. Nesoniva Saiparaasinyaava mwiva haaru vakyaqama Iesusirara quataave tuva varura.

Poruva Iemisira uro taqora

17 Tire Ierusaremini uro ntaavarata tiri tiqata vakyaas Iesusira nraaqiaranramwu mwini varuhua tiriara qamwateqata tiri tivitora.

18 Mwihua tiriara qamwateqata tiri vitovaro mwia qanranraa Poruva tirivata tivitero Iemisira taqarerero viro. Vuvata Iesusira nraaqiara nronra vaisinramwuvantovata mwiqi varuvaro

19 Poruva mwihua qua nyantero Kotiva mwia kyaahaqa hi varuvaro nai mpo mwatanaa mpo mwatanaahuani nronra kyaiqa vara nyatorara mwihua timwa nyinro.

20 Poruva mwi quara ekyaa timwa nyuvata mwihua mwi quara rieqata Kotira nrutu tuaahera kyeta Porurara mwitaama tita, Qio tiri tiqata, taqaante. Airi Iutaa vaisi tausenivant Iesusira nraaqiaraqama vita mwihua Mosesira quavata nronraqama kyeta riemwaqita vi variavo.

21 Mpo hiahua unra qua timwa nyiqata iqaa ntumwa kyeta mwitaama ti variavo. Poruva Iutaa vaisi mponani mponani variahuara tiqaro, Nkye Mosesira qua qaqlira kyaate. Hia nkye nkyeta qoraisi nraaqiara mwamwanta toqaate. Hia Iutaa mwaanra okyara riemwaqita quate, tirave, qiaavo.

22 Iara mwi quara mwi quara ti varia vaisihua e Ierusaremini nri ntaananra ntapihi kyaavo. Mwitaa hirara e nataave hinanrave?

23 Kyai tire i timwa mwianranra e tire qiarante hiante. Vaisi erahiamuaantemanramwu Kotirara nkyiari kyuqu nriqiqaa vateta tiqata, Tire quataaqama kye mwitaa hirerave, qiarave.

24 E mwinramwuhua sita varera Kotiva mwamwantave mwutukya hiqama nyataani okyarara riemwaqira viqarama uro taiqa kyera e mwiaqataira mwinramwuhua kyaahaqa hiqarama munima kyairata mwinramwuhua qiata ekyaa toqa nyataate. E mwitaamaqira virata nraakye qora i taqeta, mpo hiahua iara timwa taa quava unra quama vaiho tivarave. E mwitaa mwitaa hirera, nraakye qoravanto taqaivara e Mosesira qua okyara ntapihi kyera riemwaqira vi variaravama varinanrave.

25 Mpo mwatanaa mpo mwatanaa Iesusira nraaqiaraqama quahua haaru tire mwaa quara qara ntumwa kyeta timwa nyiavananrave. Mwi entara

gara ntumwa tetu tire tiqata, Hia unra mwanriqani vate kyarara nraate. Hia nraanre nraate. Hia nruntana tuvareta ntaqutu kye vahi aasaura nraate. Hia vaisivanto nraakyevata api nrohiate, qiaavanranrave, tita.

26 Mwihua mwitaa tuvaro Poruva mwi vaisinramwuhua sita varero mwia ganranraa mwihua kyapata variqaro mwamwantavata mwutukyavata hiqaani okyarara riemwaqiro viro mwiaqatairo Kotira nraamwuqi verantero Kotira kyaiqa vara mwate varu vaisihua timwa nyinro tiqaro, Tirenramwu mwi entara mwi entara mwaaqi variqata mwamwantave mwutukyave hiqaana okyarara riemwaqti vita uro taiqa kyarerave. Mwiaqataita tire variarata nkye tiri kyaahaqa hiqatama Kotira kyaiqa vara timwataate, tiro.

Kotira nraamwuqitai Porura ntavaaqqavu kyora

27 Qio 7 enta mwiva qauma taiqa quariva vahuvata Iutaa vaisinramwu Esiaanyaahua taqovaro Poruva Kotira nraamwuqi varuvata mwiramwuhua mwia taqeta antua qua tiqata nraakyte qora nyaanrama kyeta uro Porura ntavaaqqavu kyeta aakyara nteta tiqata,

28 Isareri nraakyte qora tuaavo, tiri kyaahaqa hiate. Mwaa vaisiva mponani mponani nrohiqaro Isareriaravata, Mosesira qua okyararavata, tiri mwaanra nraamwu mwaanravata, api qua ti vari vaisiva varihata mwia ntavaaqqavu kyauro. Qio mate mwiva mpo mwatanaa vaisinramwu sita qiro Kotira nraamwuqi nrumu kyaihata mwihua mpo mwatanaa vaisi variqataara tita, mwihua Kotira nraamwu uaqiamama kyaavarohiama kyonotataqama vaiho, tita.

29 Tauraa mpo enta mwihua taqovaro mpo mwatanaa vaisi mpovanto Epesaasinyaava mwia nrutu Toropimaasiva Porukyantiri mwatukyayi nrohi varuvata mwihua tiqata, Poruva vaisi mwiaavata vitero uro Kotira nraamwuqi viho, tiqata mwitaa tura.

30 Mwihua nkyiari riemwa kyeta api qua Poruragaq vatovatara tita, Ierusaremini ekyaa nraakyte qora hisai hisaita hiante uro ntuaantuama vita Porura Kotira nraamwuqitaita ntavaaqqavu kyeta ntanrauqita mwaatani veva kyeta. Mwaatani kyovata Kotira nraamwuqaa ntaqikyi varuhua qamwanrama kyeta qesa tita tora.

31 Mwitaa huvata nraakyte qora ntuaantuama vuhua Porura ru kyarerata uti varuvaro vaisi mpovanto qua vara kyero tiqaro, Ekyaa Ierusaremini variahua uaqia hi okyarara qovaramama teta hiavo, tuvaro

32 ntaqi varuragaq nronraqa huva nai nronra vaisi mponramwuhata, ntaqu vaisihua mponramwuvata, sita kyero hiantero nraakyte qora kuaikama vita varunani viro.

Mwini vuvata nraakyte qoravanto mwi vaisiravata ntaqu vaisihuavata taqeta qamwanrama kyeta Porura ntuquiti varura qaqira kyora.

33 Qaqira kyovaro ntaquraqa nronraqa huva uro Poruva varunani variqaro Porura tutero ntaqu vaisihuaru tiqaro, Seni taratanaqotaita mwiarupataate, tiro. Mwitaa timwa kyero mwiva kyapara hiro tiqaro, Mwaa ta vaisivave iho? Mwiva nanra inraikya utu kyaihatave nkye mwia ntuquiti variavo? tiro.

34 Mwitaa tuvata mwipi ntuaantuama vuhua hia kuua qua tiraitita, mpo qua mpo qua ti varuvaro mwiva qua okyara hia ntapihi kyero riaraitiro, Porurara tiqaro, Mwia vita vareta ntaqua vaisihua nraamwuqi uro kyaate, tiro.

35 Tuvata mwihua mwia viteta nraamwu mwipi qara iriqaa uro nteta taqovata nraakyte qoravanto Porura ru kyarerata mpo uti varuvata ntaqu vaisihua mwia kyavuhu kyeta nyaamwuqaa tu vareta vuvata

36 nraakye qora Porura vataqi viqata aakyara ntamwa kyeta Porura ru kyaate nraahu tura.

Poruva naiqaatai vaitutu hiqaro qua tura

37 Mwitaamaqita vuvata ntaqu vaisihua Porura vitaqita uro nraamwuqi kyareru huvaro Poruva ntaqu vaisihua nronra vaisiara tiqaro, Qiove nte ivata qua qianinrave? tuvaro mwiva tiqaro, E Kiriki qua riaaravave iho?

38 Nte iara tiqana, E mpo mwatanaa Isipivantove turave. Mwi vaisiva haaru kamaniinra vatama kyero ntaqirero hiqaro 4,000 ntaqu vaisihuavata sitero qumina mwatani ntaqirera uti varurave, tiro.

39 Mwitaa tuvaro Poruva qaqao tiro, Nte Iutaa vaisima varuqo. Nte mwatukya Tasaasi Sirisiaani ni mwata taivave. Mwi mwatukyaya mwatukya nronra vaihana nte mwi mwatanaavama varuqo. Qiove nte nraakye qora qua timwa nyianinrave? tiro.

40 Tuvaro ntaquraqa ntaqikyi varu vaisisa qiove tuvaro Poruva nraamwu qesaqaa siviro variro kyauqu tuaahera kyero tirema variate tuvata nraakye qora tirema varuvaro Poruva mwihua nkyiari Hivuru quaqitairo timwa nyinro.

22

1 Poruva mwitaama tiro: Ni kata pakyaavata, ni kohuavata, nkye mwaini riaate. Nkye niqaa qua vataavana nte ntenaqaatai vaitutu hiqana qua tirerave, tiro.

2 Mwitaa tuvata mwihua riovoro Poruva mwihua nkyiari Iutaa qua Hivuru quaqitairo ti varuvata mwihua mpoqivata nai tirema kyeta varuvaro Poruva nai vaitutu hiani quara tiqaro mwitaama tiro:

3 Nte Iutaavanto varuqo. Ni mwatukya Tasaasi Sirisiaani mwatataivave. Nte Ierusaremi mwaaqi variqana nronra tuemwa vuyave. Kamariariva nronra vaisivanto ni timwa mpihana nte ekyaa tiri haivaqahua mwaanra okyara ntapihi kyaurave. Mwitaamaqina viqana nte kepukyaqama kyena Kotira vataqi vurave. Mate nkye Kotira vataqita quantema kyena ntelevata Kotira vataqina quavarave.

4 Mwi entara nte hia Iesusira vataqina quava entara nte Iesusira aanraqa nrohi varuhua uaqiamma nyateqana mwihua qati nraahu ru kyaavarave. Nte vaisivata nraakyevata ntavaaqavu kyeqana uro karavuqi kye variavarave.

5 Kotira nraamwuqi Kotira kyaiqa vara mwate varia vaisihua mwihua vunyaa vaisivantovata, mwia kaanasoriantovata, mwi quarara qutaave tivarave. Mwihua Ntamaasikaasini varu qata vakyaahuara qara ntumwa kyeta ni mpuvana nte mwi qarara varena nraakye qora seniqotaina uro rupaqina nrumu Ierusaremini kyaarita mwihua ruate timwa kyena quavarave.

Poruva nai Iesusira nraaqiaraqama vurara tura

(Kyaiqa Varora 9:1-19, 26:12-18)

6 Qio nte qara varena Ntamaasikaasi qaumato quavar o huarivanto virini qiataga vahuvaro qamwanrama kyero nyaamwusairo omwavanto aequakyaa voti huva niqaa tumuvana

7 nte mwataaqi tumu ntina mwiqitaina riaavaro quavanto nianra mwitaama tiro: Soruo, Soruo, nanraqamave e ni uaqiamma matera hiaro? turave.

8 Tuvana nte tiqana, Nronrao, e tavave? qiavaro mwiva tiqaro, Nte Nasaretinyaava Iesusivave. E ni uaqiamma mate variaravama varuqo, tiro.

⁹ Mwitaa tuvata ni vatama kyeta nruhua omwa nraahu taqeta hia mwi quara ntapihi riorave.

¹⁰ Mwitaa huvana nte nronra mwia kyapara hina tiqana, Nte nataave hianinrave? qiavaro nronravanto nianra mwitaama tiro: Sivira virava uro Ntamaasikaasini variraro vaisi mpovanto e Kotira kyaiqa varenanranra i timwa mwianrive, turave.

¹¹ Mwitaa tuvaro omwa nronravanto utu varora tiro, ni pu qipa vuvana hia qio tagaavata ni vatama kyeta nruhua ni kyauqu tu vareta pitaqita Ntamaasikaasini uro kyorave.

¹² Mwini kyovaro vaisi mpovanto mwia nrutu Ananaiaasiva mwiva Mosesira okyara qua kyuqema kyero rio vaisiva, ekyaa Iutaavanto Ntamaasikaasini varuhua mwianra kyuqe vaisive ti varuva,

¹³ mwiva nte variavanany nri ntero ni nraaqani siviro variro tiqaro, Ni kata Soruo, i vu qipa viharave? Qio qaiqaa taqaante, tuvaro ni puvanto qamwanrama kyero ntapairi vuvana nte qio taqeqlana mwia vaisiravata ntapihi taqaavarave.

¹⁴ Mwiagaa variavaro mwiva tiqaro, Tiri haivaqahua mwanriqa Kotiva e mwia kyakya hianinra ntapihi kyaante tiro, i mwatama tairave. Ntapihi kyero nrohi vari vaisira Kotira kyaiqa vaisi Jesusira e mwia taqeqlana mwia nroqitaira qua riaante tiro, Kotiva i mwatama tairave.

¹⁵ E Jesusira kyaiqa taqenanza Jesusira okyara rienanza ekyaa nraakyne qora timwa nyinanrave.

¹⁶ E nanra vekeye variaro? Sivira nramanri vareqlana Jesusira nrutu ntairaro mwiva i uaqia hi kyaiqlana nruka mwataarive, turave.

Kotiva Porurara mpo mwatanaahua ni qua timwa nyiante tura

¹⁷ Ananaiaasiva mwitaa tuvana nte mwiaqataina uro ntantena Ierusaremini nrumu Kotira nraamwuqi Kotirara aakyara nteqlana ruvaata voti hura taqaavarave.

¹⁸ Ruvaata taqe variavaro nronravanto nianra tiqaro, Qamwanrama kyera Ierusaremi kyera quante. E ni qua timwa nyinanra mwaa nraakyne qorahua hiama qio rievarave, turave.

¹⁹ Mwitaa tuvana nte tiqana, Nronrao, mwihua ni kyaiqa okyara taqore. Nte haaru mwaanra nraamwu mpoqi mpooqataina iara rio nraakyne qorahua ntanrauqina uro karavuqi nraahu kyena mwihua ruavarave.

²⁰ Haaru iara ti varu vaisira Sitiveninra mwihua ru kyovana ntevata mwi entara mwihua tua vaaqaaqaa ntaqikyi variqana qio mwia ru kyaate qiavarave.

²¹ Mwitaa qiavaro nronravanto nianra tiqaro, Qio quante. Nte mpo mwatanaahua varira nyianra mwutukyani i titarerave, turave, tiro.

²² Poruva mwitaa timwaqiro vuvata mwihua mwia qua riemwaqita vuvuro Poruva mpo mwatanaahuaqua qua tuvata mwiaqataita mwihua raraqa tovata mwihua aakyara nteta tiqata, Mwia vitaqita uro ru kyaate. Mwitaa qiaari vaisiva hiama qio qati variananrove, tita.

²³ Mwitaa timwa kyeta mwihua qua aakyara ntamwaqiqi viqata nkyiari tuavaaqa tuto tuto hita mwumwuvata varake tuto tuto hi varuvaro

²⁴ Romeninyaava ntaquhuqa nronraqa huva Porurara ntaqu vaisihua timwa nyinro tiqaro, Nraamwuqi vitaqita uro kyetama mwia kyaantaqataita ntuqutuate. Mwia ntuqutiqatama mwia kyapara hiate, E nanra utu kyaaratave nraakyne qoravanto qua aakyara ti variavo, tivaroma mwiva nai qua okyara qovarama kyairata riaate, tiro.

²⁵ Mwitaa tuvata mwihua Porura kyatarigaa rupateta mwia ntuqutuare tuvaro Poruva nronra vaisi mwiva mwia tataaqa siviro varura mwia

kyapara hiro tiqaro, E kamaninra okyara rieqarama e qiove hia ko tiraitira, Romeni vaisi ntuquutanrave? tiro.

²⁶ Poruva mwitaa tuvaro nronra vaisi mwiva mwi quara riero uro mwihuaqaa nronraqa hu vaisira timwa mwirno tiqaro, E nataave hinanrave? Mwi vaisiva Romeni vaisivantomava variho, tiro.

²⁷ Mwitaa tuvaro ekyaas mwihuaqaa nronraqa huva Poruva varunani nri ntero mwia kyapara hiro tiqaro, E qutaave Romeni vaisivanto variaro? E tiraqe riaankye, tiro. Mwitaa tuvaro Poruva eo tiro.

²⁸ Tuvaro nronra vaisi mwiva tiqaro, Nte munima nronraqama kyena Romeni vaisiqama vurave. E mpo, nataama kyerave Romeni vaisiqama quaro? tuvaro Poruva mwia timwa mwirno tiqaro, Ni nthoua kohua Romeni vaisiqama quarar tina, ntevata Romeni vaisima varuqo, tiro.

²⁹ Poruva mwitaa tuvata vaisi imponramwuvanto Poruva qua qiarive tita mwia kyapara hirera utuhua nrihanrama vita varuvaro nronra vaisi mwiva aatu hiro, Qikye tiro, Poruva Romeni vaisivanto varihata tire mwia seniqotaita rupa tauro. Tire hia mwitaa hiataarave, tiro.

Porura vitaqita uro Kaanasori suqaa kyora

³⁰ Nronra vaisi mwiva mwitaa timwa kyero mwiva Iutaa vaisinramwu Poruraqaa qua vatarera uti varu okyarara ntapihi kyero riarerero variqaro mwia qanranraa Porura seniqotaita rupa tora huvantu kyero qua vara kyovata nronra vaisi Kotira nraamwuqi Kotira kyaiqa vara mwate varuhua mwihua nronra vaisinramwuvata, ekyaas kaanasorivata, nrumu ntuvan-tuuma vuvaro mwiva Porura vitaqiro mwihua suqaa uro kyora.

23

¹ Poruva siviro kaanasori mwihua taqero mwiva mwihua timwa nyinro tiqaro, Ni kata pakyaa tuaavo, nte Kotira vuqaa nrohiqana hia unra kyaiqa varauqarora tiro, hia ni kyaurihana varuqo, tiro.

² Mwitaa tuvaro Kotira nraamwuqaa ntaqikyuuva Ananaiaasiva, mwiva vunyaava varuva Porura nraaqani varu vaisihua timwa nyinro tiqaro, Porura nro vaitua ntuteqa kyaate, tuvaro

³ Poruva tiqaro, Kotiva inavata ntuquutananrove. E uaqia hi kyatarira ecarori penti qutaara mwia voti hiaravama variaro. E Kotira qua mwaanra rieqara ntapihi kyera ko qiaataara vaiharama e Kotira qua nteqa kyeqarama ni ntuquutuate qiaro, tiro.

⁴ Poruva mwitaa tuvata vaisinramwu mwia nraaqani varuhua tiqata, E Kotira kyaiqa vaisi vunyanranrama uaqia hi quara ti variaro, tita.

⁵ Mwitaa tuvaro Poruva qaqao tiro, Ni kata pakyaa tuaavo, hia nte mwiva vunyaa vaisi varira mwia ntapihi kyaraitina tuqo. Kotira mpukuqi mwitaama tiro:

Hia nraakye qoraqaa ntaqikyiani vaisirara
uaqia hi quara qiate, turave.

(*Kyatura 22:28*)

Nte mwi quara ntapihi kyaurave, tiro.

⁶ Poruva mwitaa timwa kyero mwiva taqovata vaisi imponramwuvanto Saitiusi mwaanra okyara riohua varuvata imponramwuvanto Parisi mwaanra okyara riohua varuvaro Poruva Kaanasori timwa nyinro tiqaro, Ni kata pakyaa tuaavo, nte Parisi mwaanra okyara riauvave. Ni kovavata Parisi mwaanra okyara rie varurara tina, ntevata mwia mwaaquvanto mwitaa hi varuqo. Vaisi qutu vihua qaiqaa qati sivira nte mwianrama qutaa quave ti varuqo. Qio mwi quara kyarama mate nkye niqaa ko vateta hiavo, tiro.

⁷ Poruva mwitaa tuvata Parisivata, Saitiusivata, mwiaqaataita sivita ntainra vita nai inronra hia nai inronra hi varura.

8 Saitiusivanto ti varu okyarava mwataamama vahiro:
 Vaisivanto ekyara qutu viro hia qaiqaa siquananrove.
 Hiama Kotira kyaiqa vaisi nyaamwunyaahua variavo.
 Hiama mwanraqura inraikyavantovata variavo, tura.
 Saitiusivanto mwaanra ti varu okyarava mwitaama vahuvaro
 Parisivanto mwaanra ti varu okyarava mwataamama vahiro:
 Vaisivanto qutu viro qiomia qaiqaa qati siquananrove.
 Nyaamwunyaaisi variavo.
 Mwanraqura inraikyavantovata variavo, tura.
 Mwihiua ekyaa taarampo qua mwinramwunranra qutaa quave
 tura.

9 Inronra hi variqata mwihua qua nronra ti varuvata vaisi mponramwuvanto mwaanra okyara ti varu vaisihua Parisiqinaahua sivita
 kepukyaqama kye qao titi tiqata, Tire taqauraro hia mwaa mwi vaisiva
 uaqia hi kyaqara utu kyaiho. Qutaa haaru mwi entara mwanraqura
 mpovantove, nyaamwunyaava mpovantove, mwiva timwa mwurave iho?
 titi.

10 Mwihiua mwitaa timwa kyeta nronraqama kyeta inronra hi varuvaro
 Romeni vaisi ntaquhuqa nronraqa huva, mwiva aatu hiro tiqaro, Haunri
 mwihua hisai hisaita Porura nrumu tu vareta utaqi tu ntapema kyevorave
 tiro. Mwitaa timwa kyero mwiva nai ntaqi varu vaisihua sitero tiqaro, Uro
 Porura mwihuaqitaita vitaqita nrumu ntaqua vaisihua nraamwuqi kyaate,
 tiro.

11 Mwitaa tuvata mwia vitaqita nraamwuqi uro kyovaro entaqi Poruva
 varuvaro nronravanto qovarama viro mwia nraaqani siviro variro mwia
 timwa mwinro tiqaro, Hia aatu hiante. Kepukyaqama kyera variante. E
 mwaini Ierusaremini variqara ni okyarara timwa nyiananrave. Nraakiara
 e nyianra Rominivata uro variqarama ni okyarara mwitaama kyerama
 timwa nyinanrave, tiro. Nronravanto mwitaa tura.

Iutaavanto Porura ru kyerara tura

12 Mwia qanranraa toqaqi Iutaavanto ntuvaantuama vita kuaa qua
 timwa kyeta taaqau kye vateta. Mwihiua Kotirara kyauqu nriqiqaa vateta
 mwitaama titi, Mate tire nramanrivata kyaravata aurama tetu Porura ru
 kyeta mwiaqataita kyaravata nramanrivata nranrenrave, tura.

13 Mwihiua 40 vaisinramwuvanto mwitaa hirerata qua timwa kyeta
 taaqau tetu

14 mwiaqataita uro Kotira nraamwuqaa ntaqikyi varuhua nronra vais-
 inramwu uqeta kyeta timwa nyita tiqata, Tire qua taaqau kye vatetama
 kyauqu nriqiqaa vateta Porura ru kyeta mwiaqataita kyaravata nraman-
 rivata nranrenrave, turo.

15 Nkyevata, kaanasorivata, qua vara kyaivaro Romeni vaisi vunyaava
 varinani viraro Porura vara kyairaro tumuanrive. Nkye Romeni vaisi
 mwianra tiqata, Tire Porura kyaparama kye mwia qua okyara mpoqivavata
 riemwa ntapihirerave, qiate. Nkye kumwaanri mwitaa tivaqeta tire
 mwaanra utu taararo mwiva tuminraqeta mwia aanrani ru kyaare, titi.

16 Mwihiua uqeta kyeta mwitaa tuvaro Porura nrausivanto mwihua tu
 quara riero mwiva uro ntaqu vaisihua nraamwuqi Poruva varuraqi uro
 Porura timwa mwinro.

17 Timwa mwuvaro Poruva ntaqu vaisihuqaa ntaqikyi varura mpo
 nraanrama kyero timwa mwinro tiqaro, Nyaako mwaa vita varera vun-
 yaava varinani uro kyairaro mwiva qua mpo mwia timwa mwianrivate, tiro.

¹⁸ Tuvaro mwiva mwia vita varero vunyaaava varunani uro kyero tiqaro, Karavu vaisi Poruva nianra qumwanraa mwaa vita varera iara mwiva hinani uro kyairaro qua mpo iara mwia timwa mwianrive, tiro.

¹⁹ Mwitaa tuvaro vunyaa vaisi mwiva qumwanraa mwia kyauqu tu varero vitaqiro uro nanrianraa kyero mwia kyapara hiro tiqaro, E nanra qua ni timwa mpirerarave nriaro? tiro.

²⁰ Tuvaro qumwanraa mwiva mwia timwa mwinro tiqaro, Iutaa nronramwuvanto mwataa timwa kyeta qua taaqau taavo. Mwihua hora iara Porura vitera kaanasorivanto varinani viraqeta tire Porura qua ntapihi kyeta kyapara hiqata taqaare tivarave.

²¹ Mwihua mwitaa tivara hia mwihua qua riaante. Vaisi 40 nramwuvanto aanrani uqeta vita Porura ru kyarerata mwaanra utute variavo. Mwihua kyauqu nrinqaa vateta tiqata, Tire kyara auramate Porura ru kyeta mwiaqaataita kyaravata nramanrivata nranrenravema, qiaovo. Mwihua mwitaa timwa kyeta i vekyama variavo, tiro.

²² Qumwanraa mwiva mwitaa tuvaro vunyaa vaisi mwiva mwia timwa mwinro tiqaro, E ni timwa mpiana quara hia mpohua timwa nyiante, tiro. Timwa kyero qumwanraa mwiva titovaro viro.

Porura Pirikisiva hunani titora

²³ Qumwanraa mwiva titovaro vuvaro vunyaa vaisivanto nai ntaqi varu vaisihuqaqa ntaqikyti varu vaisihua taaratana nyaanrama kyero timwa nyinro tiqaro, Ntaqi vaisihua 200 nramwu sita vataate. Qosiqaa nrohiqata ntaqua vaisihua 70 nramwu sita vataate. Vaataara tutehua 200 nramwu sita vataate. Mwihua terama kyeta vatetama Sisariaani 9 kiroki entaqima quate.

²⁴ Poruranivata qosи mponramwu terama taivaro mwiva mwiaqaa mwatakyaa viro varirata vitaqita uro nronra kamaniva Pirikisiva hinani kyaivaro mwiva kyuqema kyero uro ntaarive, tiro.

²⁵ Vunyaa vaisivanto mwitaa timwa kyero qaravata ntumwa tero mwitaama tiro:

²⁶ Nte Karontiaasi Risiaasiva nte mwaa quara qara ntumwa kyena vara kyaariro e nronra kamaniva variananrani quarive. Nte i qua mwantauquo.

²⁷ Iutaavanto mwaa vaisira ntavaaqavu kyeta ru kyarerata uti variavana nte taqauqaro mwiva Romeni vaisivanto varihana nte ntaqua vaisihua sitaqina uro mwi vaisira mwihua kyauquqitai vara kyaunanrave.

²⁸ Mwihua mwi vaisiraqaa qua vataara okyara ntapihi kyena riaankye tina, nte mwia vitaqina uro mwihua kaanasori varianani kyena mwini variqana

²⁹ taqauqaro

hia mwia ru kyaani okyaravavata, karavuqama kyaani okyaravavata vahirave. Mwihua nkyiari mwaanra qua kyaara nraahu mwiaqaa qua vataarave.

³⁰ Mwiaqaatairo mpovanto timwa mapiro tiqaro, Iutaavanto uqeta kyeta Porura ru kye quara ti variavo tihana nte kyai e hiananrani titaariro quarive tuqo.

Mwitaa timwa kyena nte Poruragaqua qua vataa vaisihuara nkye iara mwiva hinani uto variqata mwi quara qiate tuqo, tiro.

³¹ Vunyaa vaisivanto mwitaama kyero qara ntumwa tovata ntagu vaisinramwuhua nkyiariqaa ntaqikyi varuhua tuntema kyeta Porura vita vareta entaqi uro mwatukya mpo Antipatirisini kyeta.

³² Mwia qanranraa qati mwataqaa vu vaisihua uro ntanteta nkyiari mwaatanani nruvata qosiqaa vuhua nraahu

³³ Poruravata qaravata vareta Sisariaani kamaniva nronravanto varunani uto kyora.

³⁴ Uto kyovaro mwiva gara mwia kyaara ntumwa kyero tagero Porura kyapara hiro tiqaro, E tainyaavave? tiro. Tuvaro Poruva tiqaro, Nte Sirisiaanyaavave, tiro.

³⁵ Mwitaa tuvaro mwiva tiqaro, Igaa qua vatarera ihua nrivaqena nte mwi quara riarerave, tiro. Mwitaa timwa kyero mwiva Herötira nraamwu nronraqi Porura vita vera kyero mwi vaisirajaa kyuqema kyeta ntaqikyiate tiro. Turama.

24

Iutaa vaisi nronranramwuvanto Poruraqaa qua vatora

¹ Kyauquru enta nritarovaro Kotira nraamwuqaa ntaqikyi varuva, Ananaiaasiva nronra vaisivata huntu kyero ekyaa ko okyara ntapihi paahima kyero rio vaisira Tetaraasiravata huntu varero Sisariaani Porura ko tirero vura.

² Vuvaro Tetaraasira nraanrovoro Tetaraasiva Poruraqaa qua vateqaro mwitaama tiro:

Nronra vaisi Piristikisio, e tiriqaa kyuqema kyera ntaqikyi variarata tire kyuqema kyeta varuro. Haaru tire api kyaiqa vare variarara e nri nterama tiri kyaiqa kyuqema kyera ntapihi kyera vara timwa taaro.

³ E mwitaa hiarata tire mpo mwatukya mpo mwatukyaqi varurahua i kyaqara nronraqama kyeta qamwateqata iara kyuqema hiaro turo.

⁴ Qio tire i mpuaahaama mwaaqi tutaarorave. E tiriara po tiraqeta tire pata quaqia qiare.

⁵ Tire taqauraro mwaa vaisiva airiqama kye ntaqira qua ti variara mwia okyaravantove. Mwiva mpo mwata mpo mwatani nrohiqaroma Iutaavanto ntaquate tiqaro mwihua rapate variho. Mwiva tiri mwaanra okyara mwia qaqlira kyero mpo okyara Nasaretinyaava ti vari okyarara mwiaqaa ntaqikylqaro vuniqama kyero vi varivama variho.

⁶ Mwiva tiri mwaanra nraamwu Kotira nraamwu nronraqi nrohiqaroma tiri nraamwu mwia uaqlama timwataiho. Mwiva Kotira nraamwu uaqlama mwatarero uti varihata tire mwia ntavaaqavu kyauro. Tire tetu mwaanra qua rieqata ko qiare turaro

⁷ Romeni vunyavaava Risiasiva nri ntero kepuqyqama kyero tiriqitairo mwia vitaiho.

⁸ Risiasiva tiqaro, Mwiaqaa qua vatarera tihua iara mwiva hinani quate tiho. (Mwitaa tihata tire mwaini tumunro). E Porura nai kyapara hiraro tire mwia ko tirera huna quara mwiva nai nroqitairo tirara e riaante, tiro.

⁹ Tetaraasiva mwitaa tuvata Iutaa vaisi ekyaa mwihua Poruraqaa qua vateqatama Tetaraasiva quataa quama tiho, tita.

Poruva naiqaatairo vaitutu hiqaro qua tura

¹⁰ Mwihua mwitaa tuvaro kamaniva nronravanto Poruva qua qiarive tiro, nruvaairama kyovaro Poruva siviro mwitaama tiro:

Nte ntapihi kyauqara e airi ihi variqara mwaa mwataraqaa ntaqikyiqarama ko ti variaravave. Mwianra rieqanama nte qamwateqana ntena qua i timwa mwinrenrave.

11 Hia nte Ierusaremini nri ntenga airi enta varuqo. Nte 12 entaramwuanra nraahuma mwini teta mwaanra qua tirerana nrumu varuqo. E mpo vaisivata kyapara hiraro mwiva nte qiani quarara quataave nraahuma qyaananrove.

12 Hia Iutaavanto taqaavana nte Kotira nraamwuqi variqana mpohia vaisihua kyapata antua quavata tuvave. Hia mwihua taqaavana nte mwaanra nraamwu mpoqi mpoqive, mwatukya mwipi mponave, variqana nraakye qoravanto ntaquate tina, mwihua rapataurave.

13 Mwihua niqaa quminama qua vataavo. Hia mpo aanra puaama kye mwihua nkyiarí qua mwianra quataave tiva vaiho.

14 Mwihua hini qua nianra timwa taa quava quataa quama vaiho. Qutaama nte tetu haivaqahua mwaniqqa nrutu tuaahererera hiqana nte mpo qua okyara rieqanama mwia nrutu tuaahere varuqo. Mwihua mwi aanranravata mwi okyararavata unra okyarave ti variavo. Qio nte mwi okyararava rieqanama hia nte tiri haivaqahua qua okyara qaqrira kyauquo. Nte Mosesira qua mwaanrave, poropeti vaisinramwuvanto qara ntumwa to quarave, mwi quarara quataa quave tuvave.

15 Viti vaisihua tiqatama, Nraakiara Kotiva ekyaa nraakye qora, uaqia hi kyaiqara vareqata qutu vihuave, kyuqe kyaiqa vareqata qutu vihuave, qaiqaa qati sivuma kyaananrove, qia quarara ntevata mwihua nraantantena mwi quarara quataa quave ti varurave.

16 Nte Kotira vuqaavata, nraakye qora suqaavata, hia api nrohiraitina ntapihi kyena nrohirerave timwa kyena, taqamwaqina vi varuvave. Nte nraakye qora suqaave, Kotira vuqaave, kyauruankyorave tina, taqamwaqina viqana ntapihi kyena nrohi varuvave.

17 Nte Ierusaremisaina mpo nani mpo ihinramwuanra varina mwiaqataina kyai mwini uro ntenga nramwunaahua Iutaa nraakye qora taqena, mwihuani munima vatera nyina, mwiaqataina Kotira qamwata mwataankye turave.

18-19 Mwitaa timwa kyena nte uro ntenga tiri mwaanra quavanto mwamwantave mwutukya hiqama kyaani okyarara riemwaqiqi viqana Kotira nraamwuqi variqana hia airi vaisi kyapata variqana hia nte mpo hiahua kyapata inronra hiraitina, hiqama kyaani okyarara nraahu riemwaqina vi varuqata Iutaa vaisinramwu Esiaanyaahua ni puaama kyaavo. Qio qua yahirera, mwi vaisinramwuhua i vuqaa nri ntéta mate qua niqaa vatera tivarave.

20 Mwihua hia tivera, mwaa vaisinramwuhua qioma tivarave. Nte tauraa kaanasori suqaa sivina variqana qora kyaiqa utu kyaarita taqera qioma tivarave.

21 Nte mwi entara kaanasori suqaa sivina variqana mwaa quara nraahu qiyavarave. Nraakiara Kotiva nraakye qora qutu vihua qaiqaa qati vara sivuma kyaananrove tuqata nkye mwia kyaarave niqaa qua vateta hiavo? tina qiyavarave, tiro.

22 Poruva mwitaa tuvaro Pirikisiva Iesusira nraaqiaranramwuvanto nrohu okyarara riero ntapihi kyovara tiro, tiqaro, Qio mate qioma riauquo. Ierusaremisairo vunyaava Risiasiva nai tuminraqena nte mwi quara mpoqivata riarerave, tiro.

23 Mwitaa timwa kyero mwiva nronra vaisi mpo timwa mwintro tiqaro, Porura ntaqikyiqira quante. Hia mwia kepukyaqama kyera rupa taante. Mwiva varirata mwia totivanto qioma mwia kyaahaqa hiqafa nrumu taqevarave, tiro.

24 Pirikisiva mwitaa timwa kyero mpo entanramwu variro mwiaqaatairo nai nraata Nturusiraakyantiri Porura taqarero nrnunra. Nturusiraava Iutaa nraakyevanto varuvaro mwikyantiri nri ntero tiqaro, Porura nraanraivarovo nrianrive, tuvaro Poruva nri ntero Jesusira qua okyara mwitanahua timwa nyuvaro Pirikisiva mwi quara rie varuvaro

25 Poruva Jesusira qua timwaqiro viqaro mwiva ntapihi kye nrohi okyarara timwa nyinro, hia qamwanrama raraqa taani okyarara timwa nyinro, Kotiva ko qiani entarara timwa nyuvaro Pirikisiva mwi quara riovoro nraatuqa tovaro tiqaro, Qioma riauqo. Qio ena qoqaraanani quante. Nraakiara hia kyalqa vahiani entara i nraanraanrinra qaiqaa nrinraque i taqaankye, tiro.

26 Pirikisiva mwitaa timwa kyero mwiva Poruva munima mpiraqena nte mwia titaariro nai mwaataani quarive, tiro. Nai nraatoqi mwitaama kyero riemwa tero mwiva mpo enta mpo enta Porura nraanrama kyero mwikyantiri qua ti varura.

27 Mwitaamaqiro viro taara ihi nritarovaro mpo vaisivanto Posiasi Pesitasiva Pirikisira mwaata varero mwi kyaiqara vararero nri ntovaro Pirikisiva vurama. Pirikisiva Porura qamwanrama titaataara vahuvaro mwiva Iutaavanto nianra kyuqe vaisive qiate tiro, Porura qati nraahu karavuqi kyovaro varura.

25

Poruva vunyaa vaisi nronravanto Romini varuva ni qua riaarive tura

1 Pesitaasiva nri ntero mwi mwataraqaa ntaqikyirero taarampo enta nrnum Sisariaani vari kyero mwiaqaatairo verara Ierusaremini viro.

2 Mwina uro ntovata Kotira nraamwuqaa ntaqikyuhuavata, nronra vaisivantovata, mwiva hunani uro nteta Poruraqaa qua vateqata kepukyaqama kyeta tiqata,

3 Po, e qati tiri kyaahaqa hiqarama tirata Porura vita vareta Ierusaremini nrivaqeta ko qiare, tita. Mwihua Porura ru kyarerata aanrani mwaanra utu teta mwitaa tura.

4 Mwihua mwitaa tuvaro Pesitaasiva mwihua timwa nyinro tiqaro, Poruva Sisariaani karavuqima variho. Nte pataqia vari kyena nrumu ntantena Sisariaani virerave.

5 Nkyeta nronra vaisiara tivata mwihua nivata vihuama mwi vaisiraqaa mpo qua vahirera, uro ko qiate, tiro.

6 Pesitaasiva mwitaa timwa kyero mwiva mwihuavata 8 entave 10 entave mwini vari kyero uro ntantero Sisariaani vuva mwia qanranraa mwiva ko ti varu nraamwunraqi uro variro tiqaro, Porura viteta nriate, tiro. Tuvata Porura vita vare uro ntovata

7 Iutaa vaisinramwu Ierusaremisai tumuhua Porura vara ututuma teta airi qua Poruraqaa vateta. Mwihua Poruraqaa qua vata tovaro hia mwihua quara quataa quave tiva vahura.

8 Mwihua mwitaa tuvaro Poruva naiqaatai vaitutu hira qua tiro tiqaro, Nte hia uaqia hi kyaiqaravata utuvave. Nte hia Iutaa mwaanra qua nteqa kyaurave. Nte hia Kotira nraamwu uaqiamma kyaurave. Nte hia Romeni vunyaanra Sisaara uaqiamma mwataurave, tiro.

9 Poruva mwitaa tuvaro Pesitaasiva Iutaa vaisinramwuvanto nianra kyuqe vaisive qiate tiro, Porura kyapara hiro tiqaro, E Ierusaremini virera hirera, e mwini viraqema nte mwini uro ntenama i qua avuqavu hiankye, tiro.

10 Mwitaas tuvaro Poruva qaqao tiro, Nte mate sivina varu nraamwunra mwaa kamaninra ko nraamwuqima varuqo. Nte mwaaqi variarira ko

qiataarave. E ntapihi kyaananrave. Hia nte Iutaa vaisi antua utu nyatauvave.

¹¹ Nte kamaninra qua nteqa kyaaritavauma ni qio ru kyevarave. Mwihua niqaa vate quava unra qua vahirera, hia e qio ni pita kyera mwihua niyinrata mwihua ni ru kyevarave. Nte nronra vunyaa vaisi Sisaava hinani quariro mwiva ni ko riaariverave, tiro.

¹² Mwitaa tuvaro Pesitaasiva nai kaanasori kyapata qua timwa kyero mwiaqaatairo Porurara tiqaro, E tiqara, Qioma Sisaava ni qua riaarive, qiananrave. Qio ena mwini viraro mwiva i qua riaarive, tura.

Pesitaasiva Akiripaaravata Porurara timwa mwunra

¹³ Mpo entanramwu nritarovaro Pesitaasiva qaraakyaqama kyero nrumu varuvarora tiro, vunyavaa Akiripaava nai nraata Mpenaisikyantiri Sisariaani Pesitaasira qua mwantarero tumu ntora.

¹⁴ Mwitanahua tumu nteta mpo entanramwu mwini varuvaro Pesitaasiva vunyaaanra Porurara qua timwa mwinro tiqaro, Tauraaqama kyero Pirikisiva variqaro mwiva vaisi mpo karavuqi kyaiva qati nraahu mwipi variho.

¹⁵ Nte Ierusaremini uro varuqata Iutaa vaisi mwaanra kyaiqaqaa ntaqikyiahuvata, nronra vaisinramwuvata, mwi vaisiraqaa qua vateqata mwi vaisira ru kyaante, qiarave.

¹⁶ Mwihua mwitaa qiavana nte mwihuara tiqana, Qaqao, Tire Romenivanto mpo qara hunanrave. Tire vaisi mpoqaa qua vatehua nrumu varivaqema mwi vaisira qio ko qiananrave. Mwi vaisiraqaa qua vataivaro mwivavata nai vaitutu hiqaro qioma qua qiananrove tunanrave.

¹⁷ Nte mwitaa tuqata mwihua mwaini nte hunani ko tirerata tumuavana nte hia qakyove tiraitina, nte hora mwi quara avuqavu hirerave timwa kyena mwia qanranraa nte ko tirera hina mwi vaisira viteta nriate tuqata viteta nriavana riauqata

¹⁸ hiama mwihua sivita tiqata, Mwi vaisiva mwitaa mwitaama kyero tiri antua utu timwa tairave, qiaovo.

¹⁹ Mwihua qumina nkyiari mwaanra qiera mwianra inronra hiqatama qumina mwi vaisiraqaa qua vataarave. Vaisi mpo Iesusiva qutu virara mwihua mwianra qutuma viho ti variavaro Poruva qaqao mwiva qatima variho tirave.

²⁰ Mwihua mwitaa qiavana nte variqana hia mwi quara okyara ntapihi kyena riauqo timwa kyena Porurara tiqana, E uro Ierusaremini variraqena nte mwini uro i qua okyara riaankye, tuqaro

²¹ Poruva qaqao, Romeni vunyavaa Sisaava ni qua riaananrove, tihana nte Porurara tiqana, Mwia karavuqi kyaivaqena nte mpo enta Sisaava hinani titaairo quarive turave, tiro.

²² Pesitaasiva mwitaa tuvaro Akiripaava tiqaro, Nte ntenavanto mwi vaisira qua riarerave, tiro. Tuvaro Pesitaasiva tiqaro, Qioma, hora mwi vaisira qua rienanrave, tiro.

²³ Mwitaa tuvata mwia qanranraa Akiripaasikya Mpenaisikya nruvata nraakye qoravanto mwitanahura nronra vaisitanama nriavo timwa kyeta qamwataqita uvata mwitanahua nriqata nronra vaisi Sisariaani varuhua kyapata vuhua uro qua rie varu nraamwunraqi vera ntovata Pesitaasiva tuvata Porura vita vareta nruvaro Pesitaasiva tiqaro,

²⁴ Vunyaa vaisi Akiripaao, evata mwaaqi varihuavata riaate. Mwaa vaisira taqaate. Ekyaa Iutaa mwihua mwaini variahuave, Ierusaremini variahuave, mwaa vaisiraqaa qua vateqata nte hunani mwi quara vareta

nrianrave. Mwihua nronraqama kye qua aakyara nteta tiqata, Mwi vaisiva mpuahaama qati variqiro quankyorave, qiarave.

25 Mwihua mwitaa qiavana nte ko tiqana taqauquaro mwi vaisiva hia uaqia hi kyaiqara utirara tina, mwia ru kyaari aanrava hia vahirave. Qio nai' mwiva tiqaro, Sisaava ni qua riaarive, tirave. Mwitaa tihana nte mwia Sisaava hinan titaankye timwa kye kyauquaro varirave.

26 Nte Porura qua qara ntumwa kyena Sisaara mwiankye tina taqauquaro mwi quava hia ntapihi viho. Nronra vaisi Akiripao, mwianra rieqanama nte mwi vaisira vitaqina iara mwiva mwia qua riaarive tina, nte mwia i vuqaavata, ekyaa mwaaqi variahua suqaavata, vitaqina nrumu kyauqo. Nkyevata mwi quara tivaqena nte Sisaarani mwi quara qara ntumwa tankye.

27 Hia nte mwi vaisira qua ntapihi kyena mwiva mwitaa mwitaama uaqia hi kyaiqara utiho tiraitina, qati titaankyerera, hiama kyuqe hiananrove, tiro.

26

Poruva Akiripaasira vuqaa nai vaitutu hiqaro qua tura

1 Pesitaasiva mwitaa tuvaro Akiripaava Porurara tiqaro, Ena qua qioma tinanrave, tiro. Mwitaa tuvaro Poruva nai kyauqu tuaahera kyero nai vaitutu hiqaro qua mwataama kyeroma tiro.

2-3 Nronra vaisi Akiripao, Iutaa vaisinramwuvanto niqaa qua vataara nte mate ntena qua tirerave. E tiri Iutaa okyarave, tire inronra hi varuna quarave, ntapihi kyaananranra tina, nte i vuqaa variqana qianinranra qamwateqana varuqo. Mwitaa ihanama nte mwi quara i timwa mwiqina quarirama e hiama pupohairara qoririma kyera riaante tuqo.

4 Nte haaru nraaqiarakyaan ntena mwaatani variqi vina, mwia nraakiara Ierusaremini uro ntapihikye variqi quavata ekyaa nraakye qora ni kyaiqa taqamwa kyorave.

5 Parisi vaisinramwuvanto nraahu nronraqama kyeta tiri mwaanra qua riaahuave. Qio haaru nte tetu mwaanra qua riarerana nte Parisi vaisinramwu ti varia okyarara riaavavave. Nte haaru mwitaama kyena riemwaqina quavata Iutaa vaisivanto ekyaa ni okyara taqorave. Mate mwi-hua nkyiarivanto ntapihi kyeta tivera, qioma mwihua i timwa mwivarave.

6-7 Tire Iutaavanto varirerata 12 okyara varunanrave. Qio tire ekyaa Kotiva timwa to quara mesaiaavanto tumuani quara nraahu riemwaqita viqata entaqivata, iheravata, mwi quara vekya variqata Kotira nrutu tuaaheraqi vi varuro. Nronrao, ntevata mwi quara vekya varuqata mwia kyaa Iutaavanto qumina niqaa qua vataarave.

8 Nkye nanraqamave Kotirara mwiva qutu vi vaisihua hia qio qati varasivuma kyaananrove qiao?

9 Nte vuniqama kyena Iesusirara uaqia hi vaisivave timwa kyena Nasaretinyaanra Iesusira nrutu uaqama kyarerana variavarave.

10 Nte Ierusaremini mwitaamaqina vi variavata mwaanra tu vaisihua nronranramwuvanto ni nronraqama kyovana nte Kotira nraaqiara airinti ntavaaqavuqina karavuqi uro kyena nte mpo uhua kyapata variqana kyauqu vera kyena tiqana, Qioma mwi nraakye qorahua rukyaate, qiaravarave.

11 Nte mwi entara airi nani mwaanra nraamwu mpoqi mpoqi vera nteqana mwihua ntuqutuqina vina tiqana, Nkye Iesusira qua qaqira kyaate, qiaravarave. Ni mpoqama kyero raraqa tovana nte Iesusira nraaqiara mponani varuhuavata ruanye tina uti variavarave.

*Poruva nai Jesusira nraaqiaraqama vurara tura
(Kyaiqa Varora 9:3-19, 22:6-16)*

12 Qio Jesusira nraaqiara ruangkye tina uti variavata mwaanra ti varu vaisihua nronranramwuvanto ni nronraqama kyeta qaravata mpuvana varena Ntamaasikaasinianra quavarave.

13 Qio nronrao, e rie variante. Nte aanrani vi variavaro huarivanto qiaqaaah vahuvana taqaavaroo omwavanto nyaamwusairo nronraqama kyero iteqaro huarivanto itairavata nraatara kyero iteqaro nte hiavaravata, nivata vuhua hunanivata, itorave.

14 Itovata tire ekyaa mwataaqi tumu ntita variqata riaavararo quavanto titi Hiyuru quaqitairo nianra mwataama tiro, Soruo, Soruo, nanraqamave ni uaqiamma matera hiaro? (Purimakauvanto hia ntapihi kyero viraitiro uro ntantero nrishanro nai qova kyaamwu viaruaara tutaiva mwia rirave.) E mwia votima kyera enavantomma ena ri variaro, tuvana nte tiqanama,

15 Nronrao, e tavave? qiavaro nronravanto tiqaro, Nte Jesusivave. E uaqiamma mate variaravama varuqo.

16 Qio e sivira mwaamwianra vira variante. E ni kyaiqa vaisi varianterama nte i vuqaa qovarama vuqo. E mate ni taqenanranrave, nraakiara nte mpo kyaiqara i timwa mwianinranrave, e mpohua timwa nyinanrave.

17 Ni nramwunaahua Iutaave, nraahumwa mpo mwatanaahuave, i ntutuqutu kyeve tina, nte i kyaahaqamaaqi quarira e qati vinanrave. Nte i titamwa kyaarira e mpo mwatanaaa nraakyee qora varinani vinanrave.

18 E mpo mwatanaaa nraakyee qora su ntapairi kyairata mwihua enta hiraqi kyaiqa varera qaqlira kyeta omwavanto itaaninrani nrumu kyuqe kyaiqa vareqata Saataaniva mwihuaqaa ntaqikyianinra qaqlira kyeta Kotirara tiriqaa ntaqikyianti qiate tina, nte i titauqo. E mwitaa hirata mwihua nianra riemwaqita vivaqena nte mwihua uaqia hi kyaiqara qaqlira kyaarita mwihuaavata Kotira nraaqiara mpo ihua kyapata kuaaqi variate, turave. Jesusiva nianra mwitaa turave.

Poruva nai kyaiqa varorara Akiripaara timwa mwunra

19 Nronra vaisi Akiripao, quavanto nianra mwitaa tuvana nte nyaamwuqitairo qovara hora mwia hia qaqlira kyaraitina, nte mwi quava tuntema kyena

20 vuni Ntamaasikaasini nraante uro ntena mwini variqana mwi quara timwa nyina, mwiaqataina Ierusaremini uro ntena mwi quara timwa nyina, mwiaqataina Iutiaani uro variqana mpo mwatukya mpo mwatukya nrohiqana ekyaa timwa nyina, mwiaqataina mpo mwatanaaa mpo mwatanaaa timwa nyiqina vurave. Nte mwihua mwataamama timwa nyina, Nkye qora aanra qaqlira kyeta tuqasaa vita Kotira aanraqaa quate. Kotirara aakyara ntamwaqita viqata Kotira kyaiqa nraahu varaqita quate, ti varurave.

21 Nte mwi quara nraahu tuqata mwia kyaara Iutaavanto nte Kotira nraamwuqi varuqata ni ntavaaqavu kyeta ni ru kyarerata uti variarave.

22 Mwihua mwitaa hiavaro Kotiva ni kyaahaqamaqiro vihana nte mate nkyi suqaa sivina variqana mwi quara nronra vaisive, pata vaisive, timwa nyi varuqo. Hia nte mpo quavauma ti varuqo. Poropetivantovata, Mosesisivavata, qua timwa tora kuaa qua mwiamma ntevata timwaqina vi varuqo.

23 Mwihua mwitaa turave, Nraakiara mesaaavanto nai mwamwantaqaa nriqa quani inraikyara varero uro qutu viro mwiva nraantema vunigama kyero qati siviro variananrove. Iutaavantove, mpo mwatanaavantove,

kyokiraqi varihua omwa itaaninra taqaate tiro, mwiva nraante qaiqaa siviar variananrove, turave tiro.

²⁴ Poruva mwitaa tuvaro Pesitaasiva Porurara aakyara ntamwa kyero tiqaro, Poruo, i vu nraatovanto apiqama viho. E mpo okyara mpo okyara sikuru tira nraatara kyaararo mwia kyaara i vu nraatoqitairo apiqama vihara e airi qua timwaqira quaro, tiro.

²⁵ Mwitaa tuvaro Poruva qaqao tiro, Nronra vaisi Pesitaasio, ni pu naatovanto apiqa hivenavauma nte mwi quara tuqo. Ni pu naatovanto qio vahana quataa quama nte tuqo.

²⁶ Nronra vaisi Akiripaa, e mwi quara okyara ntapihianranra tina, nte hia aatu hiqanavauma mwi quara i timwa mwuqo. Iesusira nraaqiaravanto hia uqeta vita variqata mwi quara qiao. Mwihua nraakye qora suqaa variqata mwi quara qiavara e riaananrave.

²⁷ Nronra vaisi Akiripaa, quataave e poropeti vaisinramwu quara quataa quave qiaro? Nte ntapihi kyauqara e mwihua quara quataavema qiaro, tiro.

²⁸ Poruva mwitaa tuvaro Akiripaava Porurara tiqaro, E pata qua qiananra mwiqiaraqaa nivanto Iesusira nraaqiaraqama quarive tirave qiaro? tiro.

²⁹ Tuvaro Poruva tiqaro, Nte qua pataqia qianinraqaave, airi enta qianinraqaave, nte evata, ekyaa mwaaqi variahuavata, ni votima kyeta variate tinama, nte Kotirara aakyara nte varuqo. Ni votima kyeta variate tura mwia hia nte mate ni rupa taantema kye variateravauma tuqo. Nte Iesusira nraaqiara varuntema kyeta nkyevata Iesusira nraaqiara variaterama tuqo, tiro.

³⁰ Poruva mwitaa tuvata nronra vaisi vunyavaa mwivavata, kamaninra vaisinramwuvantovata, Mpenaisivavata, mwivavata mwatakyaa vita varuhuavata, sivita

³¹ mwaatani veva nteta mwihua nai timwa mwi nai timwa mwi hita tiqata, Hia mwaas vaisiva uaqia hi kyaiqara utira tire qumina mwia karavuqi kyetave, mwia ru kyetave, mwitaa hiarorave, tita.

³² Mwitaa tuvaro Akiripaava Pesitaasirara tiqaro, Hia mwi vaisiva Sisaava ni ko riaarive titirio, qiomaa mwianra qati quante qiaratirio, tura.

27

Poruva Rominianra sipiqi vura

¹ Mwihua qua timwa kyeta tiriara Itarini quate tita, mwihua uro Poruravata karavu vaisi mponramwuvata sitaqita uro ntaqi varu vaisiva mpovanto mwihuqaqaa ntaqikyiariive tita, mwia mwunra. Ntaqi varu vaisiva mwiva nai henahua 100 nramwuqaa ntaqikyi varuva mwia nrutu Iuriaasiva, mwiva Sisaarani variqata ntaqi varu vaisihuqaqaa ntaqikyi varuva varuva.

² Mwi vaisiva karavu vaisinramwu sita varero mwivavata tirevata Ataramitiaminyaahua sipiqi mwaanri nteta variavararo sipivanto Esiaani virero varuvata tire mwipi variavararo tiri tivita varero viro. Tiri tivitero vuvaro vaisi mpovanto Arisitaakasiva mwia Masentoniaavanto Tesaron-aikaqinaava, mwivavata tirivata vuvata tire quavanana.

³ Mwia qanranraa Saitonini uro ntaavararo Iuriaasiva Porurara qamwathero mwianra tiqaro, Mwaini variqara qiomaa ena nramwunaahua uro taqairata mwihua i kyaahaqa hiqata mpo inraikyave, kyarave, i mwiate, tuvaro Poruva mwitaa hora.

⁴ Mwitaa huvata qio mwiqaataita tire Saitoni kyeta qaiqaa sipiqi vi variavararo sipivanto mwini virera huvaro toqavanto api ventaqiro vuvaro

qaqira kyero kyaarerera utaqaa vahu mwatara Saiparaasini hia toqavanto tusataama teta uvata tire

⁵ Sirisiaa kyaarerera vara mwini kyeta Pampiriaa kyaarereravata vara mwini kyeta Risiaan vahu mwatukyara mpo Mairani uro nteta.

⁶ Tire Mairani uro ntaavararo karavu vaisiqaa ntaqikyi varuva sipi mpo puamaa kyero. Mwi sipiva Arekisantarianyaa sipivanto Romini quankye tu sipiva vahuvaro mwia puaama kyero mwiaqatairo tiri tivitaqiro uro mwi sipiraqi kyero.

⁷ Mwi sipiraqi kyovata tire mwipi viqata qakyo qaakyoma kyeta vi variavararo mpo entanramwu nritarovata tire mwukyaari tuqita viqata Naitaasi qaumato uro nteta. Mwini uro nteta ntapihi kye quananrave qiavararo toqavanto kepukyaqa hvutara titi, vintanteta Kiriti mwata pataqia nrumanri utaqaa vahunani vintanteta mwi mwatara hini viti mwia nrutu Saamoni mwata vitive qiaara vara mwini kyeta

⁸ mwiaqataita mwukyaari tuqita vita mwata vahuvata mwia tokyasataa vita uro Kyuqema-Vahisatave qiaara mwatukyara mpo Resia qaumato uro variavananra.

⁹ Tire airi enta mwini variqi quavararo Iutaavanto kyara aurama to entava nritarovaro toqavanto nronraqama kyero tu entava nrintovarora tiro, ekyaa sipivanto qaqira kye varura. Vi entava nri ntovaro Poruva siviro mwihua timwa nyinro tiqaro,

¹⁰ Nkye vaisi mwaanramwuhua mwaini riaate. Tire mwaaqitaita quararo toqa vaururuvanto sipi ntuvuraa kyairaro mwipi mpo inraikya mpo inraikya vataaravata, tiri hini hiarahuavata, taiqa kyaananrove, tiro.

¹¹ Poruva mwitaa tuvata sipi mwia qovavata mwia nripi tuqiro nrohuvalta mwitanahua tiqata, Qioma tire quananrave, tuvaro ntäqai vaisehuaqaa ntäqikyuva mwitanahua qua nraahu riero hia Porura qua riaraitiro tiqaro, Qioma tire quananrave, tiro.

¹² Mwiva mwitaa tuvata hini vaisinramwuvantovata mwi quara nraahu mwitaama titi, Toga nronra tirera, sipivanto hiama mwaasata qio vahiananrove. Nrivage viqata mwataara hiqa taqeta mwatukyara mpo Pinikisiani quare. Pinikisiani uro variararo vuharaqeta quare, titi. Pinikisiani nrumanrivanto kyuqema kyero vahisata hia toqavanto tunanira titi, mwihua mwitaa tura.

Toqa vativanto utuvaro kyaarereravanto humwunra nte varura

¹³ Mwihua mwitaa tuvaro mpo enta toqa kyuqema kyero tuvata mwihua qio nrivage quare timwa kyeta ankaavanto sipi ntavaaqavu tora vara mwaanri sipiqi vateta Kiriti tokyasataa qakyoma kyeta vita.

¹⁴ Mwisataa qakyoma kyeta quare tuvaro toqa nronravanto mwi mwataraqatairo nrinro

¹⁵ sipi ventaqiro viro mwata vahunasairo api ventaqiro vuvata tire sipi tuqasaa kyeta ntapihi kye quare titi utuavararovata toqavanto kepukyaqama kyero sipi venta varero api viro.

¹⁶ Toqavanto apiqama kyero ventaqiro vuvaro tiri tivita varero vuvata tire mwata pata mpoqia kyaarerera utaqaa vahu mwatara Kotani uro ntaavararo mwata mwiva antua kyovaro toqa hia tunani uro vahiro. Tire toqa hia tunani variqata tire mwukyaari tiqatama mpotu pata sipi mwiva ntanrau vare nrnra

¹⁷ vara mwaanri sipiqi kyeta mwiaqataita kyaanta vara kyeta nronra sipi mwia kepukyama kyeta rupa teti. Sipivanto api viqaro Apirikaani nrumanri verato vahira nrugasata quankyorave titi, mwihua seri ntaputaa kyeta uromwi rupa tovaro sipivanto nai qakyoma kyero viro.

18 Mwitaa huvaro toqavanto qati nraahu nronraqama kyero tiqaro nramanri vente varuvaro mwia qanranraa sipivanto hupertu quankyorave tita, mwihua ontave mwitaa inraikya sipiqi vatora vara kyeta nramanriqi mwaamwi qaqira kyeta, viqata taqovaro sipivanto hia nraahu qio vahuvata.

19 mwia qanranraa nkyiari kyauquqotaita sipiqaq ntaqikyu inraikyara vatora vara kyeta nramanriqi qaqira vara mwaamwi kyora.

20 Mwitaa huvata tire airi enta viqata hia huarivata qovoravata taqaraitita quavararo toqa vauruvanto nraahu nronraqama kyero ti varuvata tire tiqata, Qio tire hia qati variarahuave. Tire taiqaarahuave, tita.

21 Tire airi enta mwitaamaqita vita hia kyaravata nranraitita variavararo Poruva vaisi mwihua utaqaa siviro variro tiqaro, Nkye mwaa vaisihuao, nkye ni qua rieta Kiritini variataarave. Nkye ni qua rieta mwini variatirio, hiama mpo inraikya uaquia hiraro nkye vataa inraikyava sipiqi qatima vahitirio.

22 Qio nte nkyiara kepukyaqama kyeta variatema tuqo. Hia tiriqitairo vaisi mpovanto raupiri hiananrove. Sipivanto nraahuma taiqa quananrove.

23 Nte Kotiva nronravanto virini varira mwia nraaqiara variqana nte mwia nrutu tuaahere varuvama varuqo. Entaqi Kotiva nyaamwunyaa vaisi mpo titaiharo ni puqaa siviro variro

24 mwataamama ni timwa mpiho, Poruo, hia aatu hiante. E nronra vaisi vunyaanra Sisaara vuqaa sivira varinannrave. Qio riaante. Kotiva iarave tiro mwiva i vatama kyeta sipiqi varihua kyaahaqa hirata nkye qioma varivarave, tiho. Kotiva mwitaama kyeroma ni timwa mpiho.

25 Qio vaisi tuaavo, mwianra rieqatama hia aatu hiqata variate. Kotiva ni timwa mpihana nte nkyi timwa nyuntema kyero Kotiva qutaaqama kyeroma nkyi kyaahaqa hiananrove.

26 Qio tire quararo sipivanto uro mwata pata mpoqiaqaa ntiro ntuvuraa quananrove, tiro.

27 Poruva mwitaa tuvaro 14 enta nritarovaro toqavanto Metitarenia kyaareracaqaa tiri qati nraahu ventaqiro vuvata enta tavaara sipiqi kyaiqa vare varu vaisihu tiqata, Mwata qaumatomia vahiananrove, tita.

28 Mwitaa timwa kyeta mwihua nramanri mwatama kyeta taqarerata kyaanta vara kyeta ori vitiqaas sutu kyeta nramanriqi mwaamwi tutu kyovaro mwataqaa uto vahuvata taqovaro mwatavantu qaumato 40 mitaa vahuvata uromwi mpoqiaqata vita qaiqaa mwateqata taqovaro mwatavanto 30 mitaa qaumato vahura.

29 Mwihua mwatama kyeta taqeta aatu hita tiqata, Tire mate mpoqiaqata quararo sipivanto oriqaaave mwataqaaave uro ntiro ntukuraa quankyorave, tita. Mwiaqaataita mwihua ankaa 4 nramwu sipi vitiqaataita nramanriqi mwaamwi kyeta tiqata, Qamwanrama kyera huari vara kyairaro itaarive, tita.

30 Sipiqi kyaiqa vare varu vaisihu tiqata, Nrivaqenramwu tirema kyeta, teta nraahu aatu quare, timwa kyeta mpotu mwipi vatora vara mwaamwi kyeta unra tita tiqata, Tire mpotu mwaaqi variqata sipi nriqini uro ankaa vatarerave, tita.

31 Mwihua mwitaa tuvaro Poruva mwihua taqero nronra vaisi mpovata, ntaqi varu vaisihuavata, timwa nyinro tiqaro, Sipiqi kyaiqa vare varia vaisihu hia mwaaqi ntaqikyiqata varivera, tire hia qio variananrave, tiro.

32 Poruva mwitaa tuvata ntaqi varu vaisinramwuhua uro mpotu mwia rupa to kyaantara teqa kyovaro mptouvanto nramanriqi tumu ntiro.

³³ Mwitaa huvaro qaata tarera huvaro Poruva mwihuara vuavi tiro tiqaro, Nkye kyara nraate. Nkye mwaaqi 14 entara variqi viqatama hia kyaravata nraavo.

³⁴ Mwianra rieqanama nte nkyiara kyara nraatema tuqo. Kyara nraivaro nkyi mwamwantavanto qio vahiarive. Hia nkyi qjata kyaahi mpoqiaqavento raupiri hiananrove. Nkye ekyaa mwihuara qarahini uro qatima varivarave, tiro.

³⁵ Poruva mwitaa timwa kyero mpereti vara kyero mwihuara suqaa variqaro Kotirara kyuqeve timwa kyero kyara nrenro.

³⁶ Poruva mwitaa huvata mwihuara taqovaro mwihuara mwutukyaqitaiovata kyuqe huvata mwihuavata kyara vara kyeta nronra.

³⁷ Tire sipi mwiqi varirerata 276 vaisi variavananra.

³⁸ Qio tire kyara qio nreta mwiaqataita sipi muaanra ntaankyo tita ekyaa kyara qati vahura mwia qaqira nramanriqi vara tuto kyaavananra.

Sipivanto ntuvuraa vura

³⁹ Qaatata uvata sipiqa kyaiga vare varu vaisihua yutuni yutu mpo mwata taqeta mwi mwatara hia taqaunanrave tita. Mwihuara taqovaro nruqa kyuqe huva tokyasataa vahuvata mwini sipi uro vataare tita,

⁴⁰ mwiaqataita ankaa kyaanta teqa kyeta ankaa mwinramwunra nramanriqi kyeta nriqi ti varu kyatarira mwia tuto kyaantarovata teqa kyeta toqavanto ventaqiro quarive tita seri mpo vara kyeta rupa teta nruqasata quare tita

⁴¹ quavararo sipivanto vuva uro nruqave orive mwemwani vahuraqa taqaau viro. Sipi nriqvanto kepuqyagama kyero taaqau vuvaro mwia viti nramanrivanto kepuqyagama kyero nteqaro mwia ntuvuraa vurama kyora.

⁴² Mwitaa huvata ntaqi varu vaisihua tiqata, Karavu vaisi hinivanto nako ruqita vita tokyani uro nteta ntugema kyeta vivorave. Nrivaqe tire karavu vaisi mwihuara ekyaa ru taiqa kyaare, tura.

⁴³ Tuvaro mwihuuaqaa ntaqiyi varuva Porurara rieqaro Poruravata ru kyevorave tiro, hia karavu vaisi mwihuara ru kyaate tiro. Timwa kyero mwihuara tiqaro, Nako riqata taqehua mwihuara nraantema qio nramanriqi kyavuhu vita nako ruqita qatinani uro ntaate.

⁴⁴ Hia nako riqata taqehua mwihuara nkye uro kyatarive, sipi qinaa inraikyavanto nteqaaninrave, mwia tu varefama nramanri turusata vita vutura tokyani uro ntaate, tiro. Mwihuara nronra vaisivanto mwitaa tuvata mwihuara tokyani ekyaa uro ntovaro Poruva vaakya qua timwa nyuva quutaa mwivau vahura.

28

Poruva kyaarerera utaqaa vahu mwatara Morotaaga varura

¹ Tire hia vaisi mpovata nrira raupirima kyaraita, tire ekyaa kyugema kyeta nramanri tokyani nri nteta. Tire mwini nrumu variavararo mpovanto tiri timwa timwinro tiqaro, Mwaa mwatara Morotaave, tura.

² Qio tire mwini nri ntaavarata mwi mwatanaahua tiri tivitaqita kyugema kyeta tiriqaa ntaqiykura. Vati ntuvuro antovata mwi mwatanaahua qia quara teta tiri tivitaqita qia quara tonani uro kyeta.

³ Mwitaa huvaro Poruvavata qia vaqitaqiro uro quaraankye tiro utuvaro qia nronraqama kyero iteqaro tutoqa huvarora tiro, qualhavanto qiaqi varuraqitairo vunu ntero Poruva kyauquqaa nrutero varura.

⁴ Mwi mwatanaahua taqovaro quaiha mwiva Porura kyauquqaa nrutero varuvata mwihuara tiqata, Qikye, mwi vaisiva vaisi ru kye vari vaisivama

variananrove. Mwiva kyaarerera nronraqi hia qutu viraitiro, nri ntaiharoma tiri mwanriqavanto mwi vaisiva vaisi ru kyaiva naivata qutu quarive tiroma quaiha vara kyaiharo uro mwiaqaa nrutaiho, tita.

⁵ Mwihua nkyiari riemwa kyeta mwitaa tuvaro Poruva nai kyauqu ntukikinraaqata kyovaro quaihavanto hia Porura uaqiamama mwataraitiro, qiaqi tumu ntuvata

⁶ mwi mwatanaahua Porurara tiqata, Mwia kyauqu kyota viraro qutuma quananrove. Kyai variqa taqaare, tita. Mwitaa timwa kyeta variqi viqata taqovaro hia Porura mwamwantavanto mpo qara huvaro Poruva qati varuvata mwihua mpo qua tita tiqata, Qaqao mwi vaisiva mwanriqa mpovantoma variho, tura.

⁷ Tire mwini variavararo vaisi mpovanto Papiriaasiva mwata mpo qaumato valuh mwatara qova varura. Mwi vaisiva nronra vaisi variqaro mwi mwataraqaa ntaqikyi varuvura tiro, tiri tivitaqiro uro nai nraamwuqi kyero tiriqaa kyugema kyero ntaqikyiqiro vuvaro taarampo enta nritarora.

⁸ Variavararo Papiriaasira mwia qora nriqa vuvaro taintaqa variro. Mwia mwamwanta qiara utovaro kanunu utiqaro varuvato Poruva mwiva varuraqi vera nterō Kotirara aakyara nteqaro mwi vaisira kyaahaqa hiante tiqaro nai kyauqu mwiaqaa vatero mwia kyugema kyovaro mwia mwamwantavanto kyugema vura.

⁹ Poruva mwitaa huvata mwia taqeta mwi mwataraqaa varu vaisihua nriqa vuhua ekyaa Poruva hunani nruvaro Poruva mwihua kyugema nyatora.

¹⁰ Qio Poruva mwitaa huvata tire virera hiavarata mwi mwatanaahua qamwateqata airi inraikya timwita sipiqi viqata nraananravata timwuvata vareta sipi mpoqi mwaanri nteta quavanana.

Poruva Romini uro ntora

¹¹ Tire mwi mwataraqaa variqi vita taarampo tora vara kyeta mwiaqataitaire mpo sipiqi mwaanri nteta vita. Mwi sipiva Arekisantariaanyaahua sipi mwia nrutu *Mwanriqa Vaisi Kaapitanave* tura. Toqa nronravanto tuvaro mwi sipiva mwi mwataraqaa variqaro vuhaani entara quangye tiro varuvata qio tire mwipi mwaanri nteta quavarahu.

¹² mwatukya mpo Sairakaasini uro nteta mwini taarampo enta varita.

¹³ Mwiaqataita qaiqaa sipiqi mwaanri nteta vintante nri ntantemaqita vita Rekiumini uro nteta. Mwia qanranraa taqaavararo toga kyugema kyero tuvata tire sipiqi taara enta vita mwatukya mpo Piuteorini uro nteta.

¹⁴ Mwini uro nteta taqaavarata Iesusirara qutaave tuhua mwi mwatukyaraqi varuhua tiriara kuaa uiki vari kyeta quate tuvata tire mwini vari kyeta qio mwataqaa nraahu vita Romini uro nteta.

¹⁵ Tire Romini uro ntaavarata tiri tiqata vakyaa Iesusira nraaqiaranramwuvanto tire uro ntaavana quara rieta mwihua tiri nrumu huntakyaare *tita Apiasi maaketivantovata, Taarampo Nraamwu Vaito nraamwuvata*, vahunani nri nteta tiriara puaa hita. Mwihua nruvaro Poruva mwihua taqero Kotirara kyugema hiaro timwa kyero mwiva qamwateqaro varura.

Poruva Romini uro ntero mwini varura

¹⁶ Qio tire Romini uro ntaavararo kamaniva Porura hia mwia kepuqyama kyero ruparaitiro, mwitaama tiro: E mpo nraamwuqi enanraa variraro ntaqi vaisiva mpovanto iqaa ntaqikyiarive, tiro tura.

¹⁷ Poruva taarampo enta vari kyero mwiaqatairo mwiva Iutaa vaisi nronranramwu nyaanrovata mwihua Poruva hunani nruvaro mwiva mwihua timwa nyinro tiqaro, Ni kata pakyaa tuaavo, nkye riaate. Hia nte ntena

nramwunaahua uaqiamma nyatauquo. Hia nte tiri haiqaqhahua tiri timwa timwito quara okyara nteqa kyaquo. Hia nte mwitaa hiraitina, Ierusalemini varuqata qumina ni karavuqama kyeta Romeni vaisi kyauquqi ni kyaavo.

18 Ni nrumeru kyaavata Romeni vaisi mwihua ni kyaparamaqi viqata riaavarohia nte uaquia hi kyaiqara utu quava vahatara tita, mwihua tiqata, uaquia hiani kyaiqara utuaninravauma mwia ru kyaananrave. Tire riauraro hia mwiva uaquia hi kyaiqara uti quara tiri timwa timwiho, tita. Romeni vaisi mwihua mwitaa timwa kyeta ni qati huvantu kyarerera uti variavata

19 Iutaavanto qaqao hia mwia huvantu kyaate tuvana nte tiqana, Sisaava ni qua ntapihi kyero riariive, qiararave. Hia nte ntene nramwunaahuaqaa qua vatarerana nte Sisaarara turave.

20 Nte mwi quaqira riemwa tenama mwiqiara nkyi timwa nyinrenrana nkyi nyaanrauquo. Tire Isareriraqiqiara variqatama Kotira kepukya vaisi vekeyama varuro. Qio mate mwi vaisira kyaara seniqotaita ni rupa taavo, tiro.

21 Poruva mwitaa tuvata Iutaa vaisi mwini ntuvaantuama yuhua tiqata, Hia tire Iutiasaita iara mpo qua qiaava nrighata riauro. Hia tiri qata vakyaai mpovanto nrintero iara uaquia hi quara tihata riauro. Tire qumimaqama varuro.

22 Tire mwaa quara nraahu riaunrave. Iutaa vaisi mpo nani mpo nani variahua tiqata, Iesusira nraaqiaranramwu hia kyuqe hia vaisihua variarave, tita qiarave. E tiqarama nte Iesusira nraaqiarave qiananrave. Tire ina nroqitaita qua tinanra riarerave, tita.

23 Mwitaa timwa kyeta mwihua tiqata, Kyaiqe mwi entara i qua riaare, tita. Timwa kyeta mwi entara timwa toraqaa Iutaa airivanto Porura qua riarerata Porura nraamwui nri nteta varuvaro Poruva toqaqi qua toharama kyero timwa nyiqiro vi varuvaro huarivanto vi kyovaro enta huvaro Poruva mwi quara nraahu timwaqiro viro. Kotiva mwihuaqaa ntaqiqiyani quara mwihua timwa nyinro. Mwiva tiqaro, Mosesivave, poropeti vaisinramwuvantove, Iesusira okyarara mwi quara mwi quara timwa torave. Nkye mwi quara rieqatama Iesusira okyarara qati nraahu riemwa taataarave. Nkye mwi quarara quitaave qiate, tiro.

24 Poruva mwitaa tuvata hini uhua quitaama qiaro tuvata hini uhua hia mwia quara quitaave tura.

25 Mwihua mpo qua mpo qua timwa kyeqata qaqira kyeta nkyiari mwaatani nkyiari mwaatani vura.

Mwihua virere huvaro Poruva timwa nyinro tiqaro, Haaru Kotira mwanraquravanto nkyi haivaqara poropeti vaisi mpo Aisaiaara kyaahaqa huvaro

26 mwiva mwataama kyero nkyi
okyarara ntapihi kye timwa torave:
Mwaa mwatanaahua qua mwataama kyera
uro timwa nyiante, turave.

Nkye mwaa quara riemwaqita viqatavata
hia ntapihi kyeta rievarave.
Nkye taqamwaqti viqatavata hia ntapihi kyeta taqevavarave.

27 Mwaa mwatanaahua su nyaato tita vihata
hia ni qua riaataa ihata variarave.

Mwihua ni qua riaaro tita, nkyiari nyaato tita taarave.
Mwihua ni okyara taqaaro tita, nkyiari su qipa taarave.
Mwihua su nyaatovanto ntapihirat ni qua kyuqema
kyeta rieqata nianra aakyara ntaivaqena nte Kotiva
mwihua kyaahaqa hiqana kyuqema nyataankyo tita

(Aisaiaa 6:9-10)

mwihua mwitaa hiarave, turave.

Aisaiaava Kotira qua mwitaa turave, tiro.

²⁸ Poruva mwitaa timwa kyero mwiva Iutaa vaisinramwu timwa nyinro tiqaro, (Kotiva nraakye qora sitaani quara nkyi timwa nyuqata nkye riaataara vahata nkye hia riaavo). Qio riaate. Kotiva tiqaro, Mwi quara mpo mwatanaahuavata timwa nyinrata mwihua mwi quara qio rievarave turave, tiro.

²⁹ [Poruva mwitaa tuvata Iutaa vaisinramwu mwi quara kyaara nkyiari qaakyuma inronaanronrama vareta vura.]

³⁰ Poruva taara ihiara nanrianraa mwi nraamwunraqi variqaro nraamwu qora kyoqaa mwiqanro mwipi variqaro mwiva ekyaa vaisi mwia taqarerata nruhuara qamwatora.

³¹ Mwipi variqaro mwiva Kotiva nraakye qoraaqaa ntaqikyiani quara timwa nyinro. Poruva hia aatu hiraitiro, timwa nyiqiro vi varuvaro hia vaisi mpovantovata mwia antuovaro Poruva nronra vaisi Iesusi Karaisira qua mwihua timwa nyiqiro vurama.

ROMENI

Poruva Romeni mwatanaahuani qara ntumwa tora

Iesusira sivuma kyovaro nyaamwuni uro varuvaro 25 ihive 30 ihive nritarovaro Poruva mwaa quara qara ntumwa tora. Mwiva Romenivanto Romini varuhua uro taqarerera hiro mwaa qarara nraante vara kyovaro vura. Romeni imponramwuvanto Iesusira nraaqiaraqama vuhua ntapihi kye Kotiva mwihua huvantu kyero sitaani okyārara riaate tiro, Poruva mwaa quara qara ntumwa tora.

1 Nte Poruva Iesusi Karaisira kyaiqa vaisi variqanama mwaa quara nkyini qara ntumwa nyate. Kotiva ni nai kyaama tero ni naanrama kyero Karaisira mwakyaakya kyuqe mwakyaakya nraakte qora timwa nyiqira quante tiro, ni nronraqama kyaира.

2 Haaru Kotiva nai kyaugu nriqiqaa vatero qutaa nte mwataama kyena nraakte qora kyaahaqa hirerave tuvata poropetinramwuvanto Kotira qua qovarama kye varuhua mwi quara kyuqe qua Kotira mpukuqi qara ntumwa torave.

3 Kotiva nraakte qora kyaahaqa hiani mwakyaakyara tiqaro nai mwaaquara turama. Mwia mwaaku mwia mwatanyaa okyaravanto vahirero mwiva vaisiqama viro nronra vaisi Ntevitira okyara kuaa okyaravanto varura.

4 Mwia mwaaku mwia nyaamwunya okyaravanto vahirero mwiva Kotira mwaauqvanto varura. Mwi okyara Kotiva tiri ntapihi kyero tinraamwutarero Kotiva nai kepuqyaqo Iesusira qutu vuraqitairo qati vara sivuma kyorara tita, tire taqauraro mwiva qutaaqama kye Kotira mwaauqvanto tiri nronravanto Iesusi Karaisiva varira.

5 Karaisiva ni kyugema matero ni nronraqama kyaihana nte mwia nrutuura rieqanama nte ekyaa mpo mwatanaa mpo mwatanaahua timwa nyianrita mwihua Karaisira quara qutaave timwa kye riemwaqi viqata nrohiata.

6 Nkyevata Iesusi Karaisira nraaqiara nraahu variate tiro, Kotiva nkyivata nyaanrama taira.

7 Mwianra rieqanama nte nkye Romini variahuanu mwaa quara qara ntumwa nyate. Kotira mwutukyavanto nkyiara vaiharo nkyiara ni nraakte qora variate tiro, nkyi nyaanrama taira.

Kotiva tiri tiqovavata, tiri vunyaa vaisivanto Iesusi Karaisivavata, nkyi kyugema nyatairata nkyi mwutukyaitairo qihakya hi varirata variata.

Poruva Kotirara qamwata mwateqaro kyuqeve tu quara

8 Iesusi Karaisiva ni kyaahaqa hi varihana nte vuni nkyiara mwataama tina. Ekyaa mpo mwatanaa mpo mwatanaavanto nkyiara mwihua kyugema kyeta Karaisira qua riemwaqi viqata nrohi variavo qiaavanra tina, nte mwianra rieqanama Kotirara kyuqeve ti varura.

9 Nte kyuqe mwakyaakya Kotira mwaquara nraakte qora timwa nyiqi vi varuqaroma ni mwanraquravantovata mwi kyaiqara varaataa hi varihana vare varura. Nte Kotira kyaiqa vare variariro Kotiva naima ni quara qutaa qya vaiho qiananro. Nte qutaaqama kye nkyiara rieqana airi enta Kotirara aakyara nte varura.

10 Nte Kotirara aakyara nteqana mwitaama tina: E qiove tirera, nini aanra utu tairaque nte mpo enta Romini uro nkyi taqaankye, tura.

11 Nte Kotira okyara mpo nkyi timwa nyianrita nkye kepukyaqama kyeta Kotira aanraqaa quate tina, nte mpoqama kyenama uro nkyi taqaankye tina, ua hi varina.

12 Nte uro nkyi taqaariro nkye Iesusirara kepukyaqama kye riemwaqi quava ni kyaahaqa hiraro nte Iesusirara kepukyaqama kye riemwaqi vuva nkyi kyaahaqa hiananro.

13 Ni kata pakyaa tuaavo, nte mwini quani okyarara nkye hia ntapi-hivorave. Nte airi enta nkyi uro taqarerera huqaro mpo inraikyavanto ni antua kyaihana nte hia uro nkyi taqaurave. Nte mpo mwatanaa mpo mwatanaahua Kotira aanra nyaamwu tauntema kyena nte nkyi kyapata uro variqana nkyivata timwa nyianrita nkye Kotira aanraqaa quate tina, nkyi taqarerera uti varina.

14 Kotiva ni titaihananra tina, nte mwatukya nronraqinaahuavata, mwatukya patacqinaahuavata, ekyaa okyara taquaahuavata, hia taquaahuavata, ekyaa mwihua nte Karaisira qua timwa nyianrivama varuqo.

15 Mwitaama kyena nte qamwateqana mwi quara nkyi timwa nyiataa ihana nkyi Romiqi variahuvata Karaisira kyuqe qua uro timwa nyinrare.

Karaisira qua kepukyu quama vaiho tura

16 Karaisira qua kyuqe mwakyaakya vaiharo Kotira kepukyavanto mwipi vайхананра тина, nte mwi quarara hiama kyaurina. Nraakyе qoravanto mwi quarara qutaa quave tivarо mwi kepukyava qiomа mwihua huvantu nyataananro. Tire mwi quara lutaа nraante timwa nyitama, nraakiara mpo mwatanaahuavata timwa nyiqi virerave.

17 Karaisira qua kyuqe mwakyaakya, mwi quava Kotiva tiri avuqavuma timwataani okyarara tiri timwa timwinro tiqaro, Tire Karaisirara qutaa ve timwa kyeta kepukyaqama kyeta riemwaqi quananra, Kotiva mwianra nraahu riegaroma tiriara mwihua avuqavuma kye nrohi variahuvave qiananro. Kotira mpukuqi qara ntumwa тóva tiqaro,
Kotirara kepukyaqama kyeta riemwaqi quahua variavaro
Kotiva mwihuara avuqavuma kye
nrohi variahuvave ti nraakyе qorahua,
mwihuama qati variqi vivarave, tura.

(Habakuk 2:4)

Ekyaa mwaa mwatanaahua Kotira mwoqa mwianranra tura

18 Kotiva nyaamwusairo mwaa quara qovarama kyero: Mwatani varihua Kotira mwoqa mwipqata uaqia hi kyaiqara utiqata qutaa qua riaa aanranra hvavai hi variarara tiro, mwia kyaara Kotira raraqa taiharo mwihuqaqa qua vatarero uti variro.

19 Kotiva hia nai okyara tuqeta kyaraitiro, mwiva nai okyara qoqaa qovarama kyaihata mwatani variahua qio mwia taqaara. Kotiva naivanto mwihua nyaamwu taira.

20 Tauraaqama kyero Kotiva mwaa mwatara utu kyovata mwi entaraqaataita nraakyе gora Kotiva ututo inraikyara qio taqamwaqi vi variara. Ekyaa mwi inraikyara taqeqtama nraakyе qoravanto mwia okyara mpo, hia qio taqe okyarara, Kotiva mwianriqavantо ekyaa enta ekyaa enta peqqa hi vari okyarara, mwianravata qio ntapihiara. Mwitaama qio ntapihiqara tita, mwihua hia ntapihunananrave tiqata nkyiari vaitutu hira qua tiva hiama vahiro.

21 Mwatani variahua Kotira okyara ntapihita, mwia qamwata mwateta mwianra mwanriqave qiataara vahata mwia qaqira kyeta qumina inraikyara nraahu vu nraatoqi vahata riemwaqi quavarso mwihua su nyaato qumimaqa ihata upi hiraqi variqi vi variara.

22 Mwihua Kotira qaqira kyeta tiqata, Tire qiomma mpo okyara mpo okyara ntapihi paahi huro, qiarovata mwihua su nyaatovanto apiqi ahata variarave.

23 Mwihua mwanriqa Kotiva ekyaa enta qati variqiro vira, mwia nrutu nraahu tuaaheraataara vahata mwihua mwia mwoqa mwita vaisivanto qutuaninranra rieqata mwia mwanraqurave, aasau mwanraqurave, nyaamwa mwanraqurave, qarura mwanraqurave, mwi inraikyara nraahu utu kyeta vataet mwia nrutu nraahu tuaahere variara.

24 Mwatani variahua mwitaa hiavarso Kotiva mwia kyaara mwihua qaqira kyero tiqaro, Qio nkyeta mwitaa hiate. Nkyeta varaataa hi kyaiqara uaqia hi kyaiqara mwia nraahu utuqi quate, tihata mwihua nkyiari henahuavata api nrohiqata nkyiari mwamwanta uaqiamma kyaara.

25 Mwihua Kotira qutaa qua qaqira kyeta uro unra quara qutaa quave ti variara. Mwihua Kotiva utu tai inraikyara nyutu nraahu tuaahereqata mwi inraikyara nraahu kyaiqa vara nyateqata Kotiva ekyaa mwi inraikyara utu taira nai mwia qaqira kyaavo.

Qio Kotiva mwiva nraahu ekyaa inraikyara ututaiva varihatara tita, tire mwia nrutu nraahu ekyaa enta tuaaheraqita quare. Qutaave.

26 Mwihua Kotira qaqira kyaavarora tiro, Kotiva mwihua nkyiarivata qaqira kyahata mwihua nkyiari varaataa hi kyaiqara vareqata kyaurira inraikya uti variara. Nraakyevanto qoraisi qaqira kyeta nkyiari hena nraakyevata api nrohi variavata

27 vaisivantovata nraakye qaqira kyeta nkyiari hena vaisivata nrohiataa ihata nkyiari hena vaisivata api nrohi variara. Mwitaamaqi viqata vaisivanto nai uaqiamma mwate nai uaqiamma mwateta kyaurira kyaiqa nraahu utuqita vi variavaro mwia kyaara Kotiva mwihua ntutu variqaro huviqarave ti variro.

28 Mwatani variahua tiqata, Hia tire Kotirara riarerave, qiarovo Kotiva mwia kyaara mwihua qaqira kyahata mwihua uaqia hi kyaiqara uitirara nraahu riemwaqi viqata mwihua mwi kyaiqara nraahu utuqi vi variara. Mwihua mwi kyaiqara hia varaataara vahata mwihua mwi kyaiqara vare variara.

29 Qora kyaiqa mpo kyaiqa mpo kyaiqvanto mwatani variahua su nyaato mwutukyaqi piqaro vahata mwihua variqi vi variara. Mwihua mpovanto vatai inraikyara vahata variqo hiqata variara. Mwihua mpo inraikya taqeta ninivata mwitaama vahataarave, nivata mpiataarave, ni nutuvata vahataarave, qiarovo mwihua mwutukyavantu uaqia hirave. Mwihua nai rukye nai rukye hi variara. Mwihua ntaqi variara. Mwihua unra qua timwaqi vi variara. Mwihua mpohuara mometa titi tahiananra nraahu ti variara. Mwihua mpohuara mwoqanyaa qua ti variara.

30 Mwihua mpohuara nyutu uaqiamma kyarerata mwihuaqaa ntumwa kye unra qua ti variara. Mwihua Kotira nramwutaaqa hi variara. Mwihua inronra quaqitai mpohuara mauqa ntamwa nyate variara. Mwihua nkyiari nyutu nraahu tuaahere variara. Mwihua tiqata, Nrivaqenramwu uaqia hi kyaiqara mpo qaraakyaqama kye puaama kye varaare ti variara. Mwihua nkyiari nyohua sohua qua raaqute variara.

31 Hia mwihua su nyaato vahata variara. Mwihua kyaqu nriqiqaa vataa quara nteqa kye variara. Mwihua hia mpohuara mwutukya vahata variara. Hia mwihua mpohuara po kye timwa nyate variara.

³² Kotiva qua vatero tigaro, Mwi kyaiqara varehua qutuma vivarave, tura mwihua riemwa ntapihi kyetavata mwihua hia mwi quarara nronraqama kye riaraitita, mwihua uaquia hi kyaiqara nraahu varaqi viqata nkyiari henahua uaquia hi kyaiqara uti variahuaravata tiqata, Nkyevata kyuqe nraahuma hi variavo, ti variara.

2

Kotiva Iutaqaavata qua vataananrove tura

¹ E vaisi mpovanto ena henanra kyaipa taqera uaquia hi kyaiqara uti variaro timwa kyera mwiaqaa qua vatenanra nte inanravata tirerama. E hiama qio ena vaitutu hiqara mpo qua tinanrave. Evata mwiva kyaiqa varaintema kyera qora kyaiqa uti variananranra tiro, iqaavata kuaa qarama kyeroma qua vahiro.

² Tire ntapihi kyauraro Kotiva mwitaama kye qora kyaiqa uti varihuaqaa ntapihi kyero qua vatero.

³ E ena henanranra mwiva uaquia hi kyaiqara uti varivave tiqarama evata mwia votima kyera uaquia hi kyaiqara utira. E mwitaa hiqara haunri Kotiva hia niqaa qua vataananrove tirava.

⁴ E uaquia hi kyaiqara uti variararo Kotiva hia vaakya iqaa qua vataraitiro, mwiva iara po kye timwa mwate varira mwianra e hiave nronraqama kyera riaaro? E hiave ntapihi riaaro? Iara uaquia hi kyaiqara qaqlira kyero kyuqe aanraqaa quarive tiro, Kotiva iara po kye timwa mwate varira.

⁵ Kotiva mwitaa ti variharo i vu nraato uaquia hi vu nraatova vaiharara tirama, e hia uaquia hi kyaiqara qaqlira kyaaro. Mate e uaquia hi kyaiqara utiqarama enavanto enaqaa qua mpoqavata vate variaro. E mwitaa hiraro nraakiara ekyara entaqaa Kotira raraqa tairaro qua avuqavu hiani entaraqaa iqaa qua nronrama vahiananro.

⁶ Mwi entaraqaa Kotiva nraakye qoravanto kyaiqa varera nkyiari kyaiqa mwiaqaa tukyama kyeroma mwihua kyoqaa nyiananrove.

⁷ Mpo hiahua kyuqe kyaiqa nraahu varaqi vita tiqata, Kotivama tiri nronraqama kyero tiri nrutu tuaahera kyero tiri kyaahaqa hiraqe qati variqi quananrave, tihua varivaro Kotiva mwihua qamwata nyatairata mwihua ekyaa enta ekyaa enta qati variqita vivara.

⁸ Mpo hiahua nkyiariara nraahu rieqata Kotiva quataa qua qoririma mwateta hia mwia qua riaraitita, uaiqia hi aanranraqaa nraahu quahua varivaro mwia kyaara Kotira raraqa tairaro mwihuaqaa qua nronrama vataananro.

⁹ Ekyaa uaquia hi kyaiqara uti varihua nriqa vira inraikyavata muaanravatama varevara. Iutaavanto nraante varavata mwihua nraakiarama ekyaa mpo mwatanaavantovata varevara.

¹⁰ Ekyaa kyuqe kyaiqa vare varihua varivaro Kotiva mwihua nronraqama kyero mwihua nyutu tuaahera kyero mwihua mwutukya qihaiqyama nyatairata varivara. Kotiva Iuta nraante mwitaama kyero kyuqema nyatero nraakiara ekyaa mpo mwatanaavata kyuqema nyataananro.

¹¹ Kotiva ko tiqaro ekyaa nraakye qora qua kuaa qarama kyeroma tukya hiananro.

¹² Mpo mwatanaahua Kotiva Mosesirara timwa to quara hia riehua, mwihua vata nkyiari uaquia hi kyaiqara utira kyaara raupiri hivarovata hiama mwi quava mwihua tukya hiananro. Iutaavanto Kotiva Mosesirara timwa to quara rieta mwi quara nteqa kyera kyaara mwi quava mwihuaqaa qua vataananro.

13 Kotiva Mosesirara timwa to quava vahiaro vaisivanto mwi quara qumina riero kyairaro Kotiva mwi vaisirara hia avuqavu nrohi vari vaisivave qiananro. Vaisi mpovanto mwi quara rieqaro hia mwi quara nteqa kyaraitiro nrohi vari vaisirara, Kotiva avuqavu nrohi vaisivave qiananro.

14 Kotiva Mosesira timwa mwu quara hia mpo mwatanaahua timwa nyiavata mwihua variara. Mwitaa hiavata mpo mwatanaahua mwiaqataita nkyiari riemwa kyeta tiqata, Nrivaqenramwu kyuqe aanraqaa nraahu quare, tivera, mwihua Kotira qua rieqata nrohiantema kyetama nrohi varivara.

15 Mwihua mwitaamaqi vi varivaro Kotira quavanto mwihua mwutukyaqvata vu nraatoqvata qara ntumwa taantema kyero vahiananro. Mpo mwatanaahua mpo enta kyuqe kyaiqa vare variavaro mwihua mwutukya su nyaatovanto tiqaro kyuqe kyaiqa nraahuma vare varuro tihata variara. Mwihua uaqia hi kyaiqara uti variavaro mwihua mwutukya su nyaatovanto uaqia hi kyaiqarama uti varuro tihata variara.

16 Nraakiara ekyaara entaqa Kotiva Iesusi Karaisirara ko qiante tiraro mwiva ekyaas nraakye qora vu nraatoqi vahiani quara avuqavuma kyero ko nyiananro. Nte nraakye qora Karaisiva tiri kyaahaqa hiani quara timwa nyiqanama mwi quaravata timwa nyunra.

Poruva Iutaara tura

17 E tiqara, Nte Iutaavantove, qiana vaisira nte iara tirera. E tiqara, Nte Mosesirara timwa to quara riemwaqi vi varuvvara tina, nte qioma varianinrave, tiqarama ena mwahuta timwa kyera, Kotiva ni qamwata mate variho, qiananra.

18 Kotira kyakya hira e ntapihi kyaananrave. Kotiva Mosesirara timwa to quava kyuqe aanra i nraamwutaiharara tira, e kyuqe aanra nrohina quarave, uaqia hi aanranraqaa nrohina quarave, mwi quara mwi quara riaananrave.

19 Mwitaama kyera riaananranra tira, hia kyuqe aanra tagai vaisirara e tiqara, Nte qioma mwia kyaahaqa hianinrave, qiananrave. Kyokiraqi vari vaisirara e tiqara, Nte omwavanto itamwaqi vintema kyena mwia kyuqe aanra nraamwutaaaninrave, qiananrave.

20 Qumimaqamaqiro vi vaisirara e tiqara, Nte qua okyara qioma timwa mwianinrave, qiananrave. Nte qioma qaraakyahua qua mwaanra timwa nyianinrave, qiananrave. E tiqara, Kotiva Mosesirara timwa to quava ekyaas mwi okyarara mwi okyarara ni naamutaihananra tina, nte qioma mwitaama kye mpo ihua kyaahaqamaqi quaninrave, qiananra.

21 E mpohua mpohua qua okyara timwa nyiqanrama ena mpo? Enavata mwi quara ntapihi riaataarave. E timwa nyinra tiqara, Hia mpuara varaate, tiqarama ena mpo? Evata mpuara vare variaravave.

22 E tiqara, Hia mpore nraatara mpore vaatiara nrohiante, tiqara ena mpo? Ena hia mpore nraatara mpore vaatiara nrohi variananrave? E unra mwanriqana uaqia hi inraikyarave tiqarama e qutaave unra mwanriqa nraamwutitaira mpuara vare variananrave?

23 E qutaa ena mwahuta tiqara, Kotiva Mosesirara timwa to quara tiri Iutaavanto utuara kyaara mpo mwatanaa mpo mwatanaahua Kotira nrutu vara mwataniqama kyeqata uaqiamma mwate variarave?

24 Kotira mpukuqi qara ntumwa tova mwitaama tiro:
Iutaavanto utuara kyaara mpo mwatanaa
mpo mwatanaahua Kotira nrutu vara
uaqiamma mwate variarave, tiro tura.

²⁵ I mwamwanta toqa kyaava e Iutaa mwatanaaya variaro. Qio e Kotiva Mosesirara timwa to quara riemwaqira virera, i mwamwanta toqa kyaariva qioma i kyaahaqa hiananrove. È Kotiva Mosesirara timwa to quara nteqaqira virera, i mwamwanta toqa kyeva hiama qio i kyaahaqa hirara e mpo mwatanaahua votima kyera varinanrave.

²⁶ Mpo mwatanaa vaisivanto hia mwamwanta toqa kyaa vaisiva variqaro Kotiva Mosesirara timwa to quara kyuqema kyero riemwaqiro virera, Kotiva mwi vaisirara Iutaa voti hivavema qiananrove. Qutaama Kotiva mwi vaisirara mwitaa qiananrove.

²⁷ I mwamwanta toqa kyaava, e Iutaavanto variqarama Kotiva Mosesirara timwa to quara rieqarama, mwi quara kyuqema kyera riaataara vaiharama mwi quara nteqakyeye varira. Mwia kyaarama nraakiara hia nai mwamwanta toqaariva, mpo mwatanaava Kotira qua riemwaqi quariva, iqaama qua vataaananro. Nte mwitaama kyena Iutaa vaisiara qianinra.

²⁸⁻²⁹ Tavave qutaa mwamwanta toqakyaa vaisiva Iutaa tarava variananro? Mwamwanta toqakyaa vaisiva hia mwivavauma mwi mwatanaava variananro. Mwia nraato mwutukyaitairo qora kyaiqa toqa mwataiva, mwi vaisivama Iutaa taravave, Kotira nraaqiara tarava variananro. Hia Kotiva Mosesirara timwato quava mwivavauma mwia vu nraato mwutukya hiqama mwataaananro. Kotira mwanraqura, mwivama mwia nraato mwutukya hiqama mwataaananro. Hia qati nraakyeye qoravantovauma mwia nrutu tuaaherevara. Kotiva mwiva nraahuma mwia nrutu tuaaheraaananro.

3

Uaqia hi kyaiqava hiama qio Kotira kyaiqa kyaahaqa hiananrove tura

¹ Nkye ni kypara hita tiqata, Hiave Iutaavanto varianinraqaatairo kyuqe inraikya qovara hiananrove? Hiave mwia mwamwanta toqa kyeraqaatairo mpo inraikyavanto qovarama viro nai kyaahaqa hiananrove? tivera,

² Nte nkyitara tiqana, Qaqao, qioma mpo inraikyavanto qovarama quananrove, qianinra. Tauraaqama Kotiva nai qua okyara Iutaa nraahu mwia tutaaate tiro, Kotiva mwihua nraahu timwa nyunrave.

³ Qutaa Kotiva nai qua mwihua timwa nyuvata mpo uhua mwia qua hia riaraitita, hia Kotirara riemwaqita vura. Mwihua mwitaamaqita vurara tita, nkye tiqata, Kotiva nai nriqiqaa kyauqu vatero qutaa tu quara qaqira kyaananrove, tivora.

⁴ Hiama qio nkye mwitaa tivara. Ekyaa vaisi unra qua nraahu ti variavaro Kotiva nraahu qutaa qua timwaqiro vi varivama variro. Kotira mpukuqi qara ntumwa tova Kotirara mwitaama tiro:

Ekyaa i quavanto ntapihi kyero nraahuma vaiho.

Vaisivanto iqaa qua vatarerave tirera,
i kepukya quavanto nraatara kyeroma vahiananrove,
tura.

(Ihi 51:4)

⁵ Tire hia ntapihi kye nrohi varura kyaiqava Kotiva ntapihi kyero nrohi vari kyaiqara qovarama kyairara tita, qiove tire mwaa quara tiqata, Tire hia ntapihi kyeta nrohi varura kyaiqava Kotira kyaahaqa hi variharo mwia kyaara Kotiva hiama tiri inronra hiananrove qiananra? Nte mwitaa tiqanama qumina vaisivanto tintema kyena ti varina.

⁶ Qaqao, tire hiama mwitaa qiananra. (Tire uaqia hi kyaiqara uturava hiama Kotira kyaahaqa hi variro. Mwia kyaara Kotiva qioma tiri inronra hiananro.) Kotiva hia ntapihi kyero variariva varirera, mwiva nraakiara nataama kyerove ekyaa nraakyeye qora qua ntapihi nyataaananro?

7 Vaisi mponramwuvanto mwitaama tita, Nrivaqe tire unra qua qiararo Kotira qutaa quavanto ntapihi kyero qoqaa vahiraro Kotira nrutuvanto nri quarive, tita. Mwihua mwitaai timwa kyeta qaiqaavata mwitaama tita, Tiri unra quavanto mwitaama kyero Kotira nrutu vara viriniqama kyairera, nanraqamave Kotiva tita uaqia hi kyaiqara kyaara tiriqaa qua vataananrove?

8 Nrivaqe uaqia hi kyaiqara varaqita quararo Kotira kyuqe kyaiqa qovara hiarive, qia quava mwataamama vahiro. Mpo hiahua tirinramwuanra uaqia hi quara tirerata uti variqata unra tiqata, Nkyenramwuma mwi quara ti variavo, ti variara. Mwihua mwitaai qiera kyaara Kotiva mwi-huaqaa qua vataiqena nte huviqaravema qianinra.

Ekyaa mwatani varia nraakye qorahua Kotira qua nteqa kyaara

9 Qio tire Iutaavanto kyuqe nraakye qora varurata mpo mwatanaa mwihua uaqia hi kyaiqara uti variahuave varita? Qaqao, hiamma mwitaama vahiro. Nte vaakya tura, ekyaa mwatani variahuua Iutaavantovata, mpo mwatanaavantovata, variavaro uaqia hi kyaiqava ekyaa mwihuuma tutero.

10 Kotira mpukuqi mwataama tiro:
Hia vaisi mpovanto ntapihi kyero nrohi variva varirave.
Hiavatave.

11 Hia vaisi mpovanto Kotira okyara
ntapihi kyero riaiva varirave.
Hia vaisi mpovanto tiqaro, Kyaiqe
nte Kotira puaama kyena taqaankye, tiva varirave.

12 Ekyaa mwatani variahuua Kotira aanraqaa
ntapihi kye quataara vahihata mwihua mwi
aanranraqaataita mpona tuqasaqita vetantaarave.
Hia vaisi mpovanto Kotira kyaiqa kyuqema kyero
vare varirave. Hiavatave.

(Ihi 53:1-3)

13 Vaisivanto quntamwa tai mwatapira
hia ntahirama taira,
mwia votima kyero mwatani varia nraakye qorahua
nyovanto qatua viro vahirave.
Mwihua mwaaqinriqaatairo unra quavanto
qovara hi varirave.

(Ihi 5:9)

Mwihua quavanto quaiha tuhi voti hiva
mwihua mwaaqinriqaa vahirave.

(Ihi 140:3)

14 Mpohua uaqiamma nyate quava nraahu mwatani
varia nraakye qorahua nyogqi vahirave.

(Ihi 10:7)

15 Mwatani varia nraakye qorahua qamwanrama kyeta
uro vaisi ru kyarerata uti variahuua variavo.

16 Mwatani varia nraakye qorahua vi variavaro
mwihua quaraqaatairo vehi utu kye inraikyavave,
kye vu tiqata ntate varia inraikyavave,
qora inraikya mwiva nraahu qovara hi varirave.

17 Mwatani varia nraakye qorahua mwutukyavanto
qihakkyama vahiani okyarara hia ntapihiarave.

(Aisaiaa 59:7-8)

18 Mwatani varia nraakye qorahua Kotira nraatu aatu
hiqata nrohiataara vahihata mwihua hia Kotira nraatu
aatu hi variarave, tura.

(Ihi 36:1)

Kotira mpukuqi mwitaai turave.

19 Tire riauraro Kotiva nai haaru timwa to quava, mpo qua mpo qua vahata mwi quara riaa nraakye qorahua ekyaa mwi quara nraahu riemwaqiqi quataara vahata mwihua mwi quara nteqa kye variara. Hiama qio mpovanto tiqaro, Nte uaqia hi kyaiqara okyara hia riaurave, qiananro. Ekyaa mwatani variahua Kotira qua nteqakye variavaro mwia kyaara Kotiva mwihuqaqua qua vataananro.

20 Mwiaqatairo Kotiva haaru Mosesira mwu quara nraakye qoravanto riemwaqiro quariva hiama qio Kotira vuqaa ntapihi kyero nrohi variariva variananro. Kotiva haaru Mosesira mwu quava mwi quava iara tiqaro, E uaqia hi kyaiqara nraahu uti variaro, timwa kyero mwia nraahuma i nraamwutaananro.

Kotiva nraakye qora avuqavuma nyataaninranra tura

21 Qio mate mwaa entara qaraakya quama nri ntero. Kotiva nraakye qora qua taiqa kyero avuqavuma nyataani okyarava qovarama viho. Mate Kotiva hia nai haaru timwa to quara riaraitiro, mwiva mpo okyara nraakye qora avuqavuma nyataani okyarara rieqaro mwi okyarara qovarama kyero. Mwi okyarara qovarama kyaaninranra haaru Mosesivata, poropeti vaisinramwuvata, tiri timwa timwunra.

22 Ta nraakye qorahua Iesusi Karaisirara qutaa mwivave tivera, Kotiva mwihua qua taiqa kyero mwihua avuqavuma nyataananro. Hia nraakye qoraitairo mpovanto mpo qaramavata variho. Ekyaa kuaa qarama nraahu variavo.

23 Tire ekyahua Kotira qua nteqa kyeta hia qioqa hunanranra tita, tire hiama qio uro Kotiva kepukyavanto varinani variarahua varita.

24 Tire mwitaama varurarovata Kotiva tiriara po kye timwa timwateqaro Karaisiva tiri huvantu timwa taani kyaiqarara rieqaro tiri avuqavuma timwatero.

25 Tiriara mwihua uaqia hi kyaiqara uti varia quara taiqa quarive tiro, Kotiva Iesusi Karaisira tiri timwihanro Jesusira nraanre rauruvaro qutu vura. Tire tiqata, Qutaama Jesusiva tiri kyaahqa hirero mwitaa iho, qiarera, Kotiva tiri uaqia hi quara nruka timwataananro. Haaru nraakye qoravanto uaqia hi kyaiqara utuqita vuvaro Kotiva hia qamwanramra mwihua riaraitiro, qati vu nraahu taqero variqiro viro mwiaqatairo mate mwaa entara nraakye qora avuqavuma nyatai okyarara qovarama kyero.

26 Kotiva hia nraakye qora uaqia hi kyaiqara varaa quara qumina nruka nyataraitiro, mwiva avuqavuma kyero Jesusira kyaiqara rieqaro nraakye qora qua nruka kyero avuqavuma nyatero. Vaisivantove nraakyevantove Iesusi Karaisirara qutaa mwivave tiraro Kotiva mwia avuqavuma mwataananro.

27 Qio tire nanra qua rieqatave teta mwahuta qiananra? Hiama mpo qua vahiro. Nanra inraikyavantove tiri kyaahqa hiananrove? Hiama tire haaru Kotiva timwa to quara riaurava tiri kyaahqa hiananro. Tire Iesusirara qutaa mwivave turava, mwiva nraahuma tiri kyaahqa hiananro.

28 Nte mwitaama tuqo: Vaisivanto Kotiva haaru timwa to quara riemwaqiro viraro Kotiva hia mwianra rieqaro mwia uaqia hi quara nruka mwataananrove. Qaqao, vaisivanto Iesusirara qutaa mwivave timwa kyero mwianra riemwaqiro viraro Kotiva mwianra rieqaro mwia uaqia hi quara nruka mwatero mwi vaisirara, Avuqavu nrohi variara vaisivavema, qiananro.

29 Kotiva Iutaa mwanriqvanto nraahu variqaro mwiva hiave mpo mwatanaahua mwanriqvantovata variro? Qaqao, mwiva ekyaa mpo mwatanaahua mwanriqvantovatama variho.

30 Qutaa Kotiva mwanriqa kuaiqavanto nraahuma variho. Nkyiari mwamwanta toqa kyaahua Iutaavanto Iesusirara qutaa mwivave tivarо Kotiva mwihua uaqia hi kyaiqara vare quara nruka kyero mwihua avuqavuma nyataananro. Mpo mwatanaahuavata Iesusirara qutaa mwivave tivarо Kotiva mwihua uaqia hi kyaiqara vare quaravata nruka kyero mwihuavata avuqavuma nyataananro.

31 Tire Iesusirara riemwaqi viqata Kotiva haaru timwa to quara qati inraikyaqamave kyaananra? Qaqao, tire Iesusirara riemwaqi viqatama mwiaqaataita tire Kotiva haaru timwa to quaravata ntapihi kyetama riemwaqita quananra.

4

Poruva Evarahaamuva uturara riaate tura

1 Evarahaamuva mwiva tiri Iutaa haivaqava variqaro mwiva uturara nte nanreve qianinra?

2 Kotiva Evarahaamunra kyaiqara rieqaro mwianra, E avuqavu nrohi variara vaisivave, qiankye tutiro, Evarahaamuva qioma nai mwahuta tutiri.

3 Kotira mpukuqi Evarahaamunranra mwataama tiro: Evarahaamuva Kotira quara qutaave tuvarora tiro, Kotiva mwianra, E avuqavu nrohi variara vaisivave, tuqo, turama.

4 Kyaiqa vaisivanto mpora kyaiqa vara mwataiharo mwia kyaiqara rieqaro mwia kyoqaa mwinrave. Mwi vaisiva hiama tiqaro, Qati mpiho qiananro. Nina kyaiqa qiaa mpiphoma qiananro.

5 Tire hia kyaiqa vaisi mwia votima kye varuro. Hiama qio tire Kotira kyaiqa vara mwataararo Kotiva mwianra rieqaro mwia qiaa tiri uaqia hi quara nruka timwa taananro. Kotiva nraakye qora uaqia hi quara nruka nyate variva varihata tire hia mwitaa hiraitita, tire Iesusirara qutaa mwivave qiararo Kotiva mwianra rieqaroma tiri avuqavuma timwa taananro.

6 Hia vaisi kyaiqa mwianra riaraitiro, Kotiva mwia uaqia hi kyaiqara varai quara nruka kyero avuqavuma mwatairaro mwi vaisira mwutukyavanto kyuqema kyero vahianinranra, tiri haivaqava Ntevitiva mwitaama tiro:

7 Kotira qua nteqa kyaas quara Kotiva nruka kyero vara kyaarihua qamwateqata varivarave.

8 Kotira qua nteqa kyaani vaisirara Kotiva tiqaro, Nte mwi quara taunru kyena hiama mwianra riemwaqina quaninrave, qiai vaisiva qamwateqaro variarive, tura.

(Ihi 32:1-2)

9 Kotiva vaisi mwia uaqiahi quara nruka mwatairaro qamwateqaro varianinranra Ntevitiva tuva, mwi quava Iutaavanto nkyiari mwamwanta toqakyahuara nraahuve tiho? Qaqao, hia nkyiari mwamwanta toqahuaravatama mwi quava vaiho. Nte vaakya Evarahaamunranra tura riaate.

Evarahaamuva Kotira quara qutaave tuvaro Kotiva mwianra avuqavu hiara vaisivave turave.

(Okyara 15:6)

10 Kotiva taire Evarahaamunranra mwitaa turave? Evarahaamuva nai mwamwanta toqa kyo entaraqaae Kotiva mwitaa tiro? Qaqao, Evarahaamuva hia nai mwamwanta toqa kyo vakya Kotiva mwitaa tura.

11 Tauraa hia nai mwamwanta toqa kyo entaraqaa Evarahaamuva Kotirara, Qutaa qua qiaro, tuvaro Kotiva mwi vakya Evarahaamunra

avuqavuma mwatora. Mwia avuqavuma mwatero mwia nraakiara mpo enta nraakye qoravanto Evarahaamunra avuqavuma mwatorara qati riemwa taate tiro, Kotiva goraisi mwamwanta toqa kye okyarara qovarama kyovaro Evarahaamuva nai mwamwanta toqa kyora. Qio hia nai mwamwanta toqa kyo entaraqaa Kotiva Evarahaamunra avuqavuma mwatora.

Mwitaa hurara tita, hia nkyiari mwamwanta toqa kyaraitita, Kotirara quataave qiavaro Kotiva avuqavuma nyatai nraakye qorahua mwihua qioma Evarahaamunranra tiri tiqvavem tivara.

¹² Nkyiari mwamwanta toqa kyaahua mwihuavata variqata nkyiari mwamwanta toqa kyerara hia nronraqama kyeta riaratita, mwihua tiri haivaqara Evarahaamunra votima kyeta Kotirara quataave timwaqviqatara tita, mwihuavata Evarahaamunranra mwiva tiri tiqvavem tivara. Evarahaamuva hia nai mwamwanta toqa kyo entara Kotirara riemwaqiro vurama.

Kotiva nai kyauqu nriqiqa vateqaro quataave tu quara

¹³ Kotiva nai kyauqu nriqiqa vatero Evarahaamunranra tiqaro, Evata i nraaqiaravantovata varivararo ekyaa mwata mwia nkyi mwatama vahiananrove, tura. Kotiva mwi quara tiqaro hia Evarahaamunranra, Mwiva nte Mosesira mwu quara okyara qio riaiho, timwa kyero mwitaa turave. Kotiva hia mwitaa tiraitiro, Evarahaamunranra, Mwiva ni quara quataave tihanana tina, nte mwianra rieqanama mwia avuqavuma mwatarerave, timwa kyero mwitaa turama.

¹⁴ Kotiva haaru Mosesira mwu quara riarera ihua hiama qio ekyaa mwata varevara. Mwihua ekyaa mwata vararerai ihua varivarovauma Iesusirara quataa mwivave qia quava qumina qua vahiraro Kotiva nai kyauqu nriqiqa vateqaro Evarahaamunranra tu quavavata quminaqama quananro.

¹⁵ Kotiva haaru timwa to quava vaiharora tiro, vaisivanto mwi quara nteqa kyairaro mwia kyaara Kotira raraqa tairaro mwi vaisiraqaa qua vataananro. Qua mwaanra mwiva hia vahirera, mwi quara nteqa kyaariva hiama qio qua varaananro.

¹⁶ Evarahaamuva Kotira quara quataave tuvarora tiro, Kotiva nai kyauqu nriqiqa vatero Evarahaamunranrayata mwia nraaqiararavata mwihua kyuqema nyatarero mwitaamama timwa nyinro. Mwiaqaatairo ekyaa Evarahaamunra nraaqiaranima mwi quava vahiananro. Iutaavanto Kotiva haaru timwa to quara riehuavata, ekyaa mpo mwatanaahuavata, mwihua Evarahaamunra votima kyeta Kotirara riemwaqita vivaro Kotiva quataa mwitaa hiangye ti quava mwihuaqima vahiananro. Tire tahuave Kotirara riemwaqi quarera, tire qioma Evarahaamunranra mwiva tiri tiqvavem qiararo Kotiva Evarahaamunra timwa mwu quava tirinima vahiananro.

¹⁷ Kotira mpukuqi Kotiva Evarahaamunranra mwitaama tiro:

E mpo mwatanaa mpo mwatanaa

mwihua haivaqavama varinanrave, tura.

(Okyara 17:5)

Evarahaamuva Kotira vuqaa variqaro mwia quara quataa quave tiro. Evarahaamuva tiqaro, Kotiva mwanriqavanto mwiva qioma qutu vihua vara qati sivuma kyaananrove. Kotiva mwanriqavanto variqaro tiraro qioma hia vahiani inraikyava qovarama quananrove, turama.

¹⁸ Evarahaamuva hia qio nraaqiara mwataariva variqaro Kotirara kepukyaqama kyero riemwaqiro viro tiqaro, Nte qioma nraaqiara mwataaninrave, timwa kyero mwiaqaatairo Evarahaamuva mpo mwatanaa mpo mwatanaa mwihua haivaqava varura. Kotiva

Evarahaamunra timwa mwino tigaro, I nraaqiara airima varivarave, tu quava qutaa mwivau vahura.

19 Mwi entara Evarahaamuva hia nraaqiara mwataraitiro, 100 ihi vara kyero anomia kyero nyaapaiqama viro mwiva hia nai nyaapaiqama vurara riaraitiro, mwiva hia mwia nraatavanto kyontaqama vurara riaraitiro, mwiva Kotirara nraahu kepukyaqama kyero riemwaqiro vura.

20 Mwiva Kotiva nai kyauqu nriqiqaa vatero qutaa mwianinrave tu quarara unra quave qiankyo timwa kyero, mwiva Kotirara kepukyaqama kyero riemwaqiro viqaroma Kotira nrutu tuaherero tigaro,

21 Kotiva nai kyauqu nriqiqaa vatero qutaave timwa tai quava qutaa mwivauva vahiananrove. Kotiva nraaqiara ni mpiananrove, tiro.

22 Evarahaamuva mwitaa timwa kyero Kotirara riemwaqiro vuvaro Kotiva mwianra rieqaro Evarahaamunranra, I uaqia hi quara nruka mwatena iara avuqavuma kyera nrohi variara vaisivavema tuqo, tura.

23-24 Kotiva Evarahaamunranra rieqaro mwitaa tura. Kotiva tiriavarata rieqaro mwitaama qiananro. Tirevata Evarahaamunra votima kyeta Kotirara riemwaqi quararo Kotiva tirivata avuqavuma timwa taananro. Iesusiva tiri vunyaa vaisivanto qutu vuvaro Kotiva mwia qati vara sivuma kyorara tita, tire Kotirara riemwaqi vi varunana.

25 Kotiva Iesusira titovaro Iesusiva tiri uaqia hi kyaiqarara qutu vuvaro mwiaqaatairo tiri uaqia hi quara taiqa kyero avuqavuma timwa taaninranra rieqaro Kotiva Iesusira qaiqaa qati vara sivuma kyora.

5

Kotiva tiri avuqavuma timwa tairara tura

1 Kotiva Iesusira qati vara sivuma kyorara tita, tire Iesusirara qutaa mwivave turaro Kotiva tiri uaqia hi quara taiqa kyero tiri avuqavuma timwa tairara. Tiri vunyaa vaisivanto Iesus Karaisiva kyaiqa vara mwatorara rieqaro Kotira mwutukyaqitairo qihakya iharo tiriara mwaateraave tihata tire Kotiravatama kyeta kuaaqi varunana.

2 Tire Iesusirara qutaa mwivave turaro Kotiva tiri kyuqema timwate varihata varunana. Mwitaamaqi viqata nraakiara Kotira peqa okyara taqaanana vekya variqatara tita, tiri mwutukyaqitairo kyuqe hi varihata varunana.

3 Muaanra vahiani entaravata tiri mwutukyaqitairo kyuqe hi varirage-tama variananra. Tire Kotirara rieqatama muaanra nraatara kyeta tira mwiaqaataita kepukyaqama vita variqata

4 tire hia ugenranrai tita tire kepukyu nraakyte qora variqata mwi inraikyara vekya varunana.

5 Tire mwitaamaqita quararo Kotiva hia tiri qaqla kyairage tire kyau-riqata variananrave. Kotiva nai mwanraqura tiri timwihanro mwia mwanraquravanto tiri mwutukyaqitairo kepukyaqi hiro vahata tire Kotira mwutukyaqvanto tiriara vahira ntapihunanranra tita, tire hia kyauriqata variananra.

6 Tire uaqia hura nraakyte qorahua variqata hia qioqama kye tetu kyaahaqa hiarahua variavararo Kotiva nai timwa to entaraqaa Karaisira vara kyovaro tiri kyaahaqa hirero qutu vura.

7 Tire mwata mwaini varurahua ntapihi kyero nrohi variani vaisira kyaahaqa hirerata tire hiama qihakya yama kyeta mwianra qutu quananra. Kyuqe vaisiaravata mpovanto nanrianra mwianra qutu quataa hiraroma mwianra qutu quananro.

⁸ Tire mwitaa hurarovata Kotiva hia mwitaa hiraitiro, mwia mwutukavanto tiriara mpoqivata vahira tiri tinraamwuteqaro tire tetuaaqihi inraikyaraqi varuraro Karaisira timiharo tiriara qutira.

⁹ Iesusiva tiriara rieqaro nai nraanre rauru kyero qutu viro tiri vara kyero Kotira vuqaa avuqavuma timwa taihata varunanra. Iesusiva mwitaa hivara tiro, mwiva kepuqyaqama kyero mpoqivata tiri kyaahaqamaqiro viraro Kotiva hia tiriqaa nraakiaravata qua vataananro.

¹⁰ Tire Kotira nramwutaahua variavararo mwia mwaqvavanto tiriara rieqaro qutu vurara tita, tire Kotiravata kuaaqi varunanra. Tire Kotira nramwutaa variavana entara Karaisiva tiri kyaahaqama timwa tora. Mwaa entara tire Kotiravata kuaaqi varurarora tiro, mwia mwaqvavanto tiriqa variqi vi variva mpoqivata tiri kyaahaqama timwa tairaro Kotiva tiri tivitaanano.

¹¹ Hiama mwi quava nraahu vahiro. Mwaa quavavatama vahiro. Tiri vunyaa vaisivanto Iesusi Karaisiva tiri kyaahaqama timwa taihata tire Kotiravata kuaaqi variqataro tita, tire Kotirara qamwateqata varunanra.

Poruva Ataamunra okyararavata Iesusira okyararavata tura

¹² Haaru vaisi kuaikuvanto Kotira qua nteqa kyovaro mwiaqatairo uaquia hi kyaiqara vare okyarava mwatani qovarama vuvuro qutu vi okyararavata qovarama vuvata mwiaqataita ekyaa nraakye qora uaquia hi kyaiqara uti varurara tita, mwihu ekyaa qutu vi okyararavata varora.

¹³ Tauraqama Kotiva nai qua okyara hia Mosesira timwa mwu entara uaquia hu kyaiqava mwatani vahura. Mwi entara Kotiva nai qua okyara hia Mosesira timwa mwunranra tita, nraakye qora uaquia hi kyaiqara utuvi vuvuro hia Kotiva tiqaro, Nkye ni qua nteqa kyaavo, tura.

¹⁴ Kotiva hia mwitaa tuvarovata Ataamunraqatairo nraakye qora qutu okyarava qati nraahu vahiqi vi varuvaro Mosesivavata variqiro viro uro qutu vura. Mwi entara Ataamuva Kotira qua nteqa kyero variqiro viro uro qutu vuvata, nraakye qora hia Ataamuva Kotira qua nteqa kyontema kyeta varuhua, mwihuavata mwipi nraahu variqita vita qutu vura.

Ataamuva tauraanaa vaisi varuvaro mwia nraakiara qovara hiani vaisiva Iesusivavata tauraanaa vaisi votima kyero varura.

¹⁵ Mwitanahua kyaiga hia kuaa kyaiga vahura. Ataamuva Kotira qua nteqa kyero varo kyaiqava vahuvuro Kotiva nraakye qora kyuqema nyataari okyarava Ataamunra kyaiga nraatara kyero vahura. Ataamuva vaisi kuaikuvanto Kotira qua nteqa kyoraqataita airi nraakye qora qutu vi variara. Kotiva nraakye qora kyuqema nyatarero vaisi mpo titovaro mwi vaisiva Iesusi Karaisiva kuaikuvanto mwihu kyaahaqama nyatoraqataita airi nraakye qora kyuqema vita variara.

¹⁶ Qaiqaa tirera. Tauraa vaisi kuaikuvanto uaquia hi kyaiqara utu kyova mpo qarama vahilo Kotiva nraakye qora kyuqema nyataani okyarava mpo qaramama vahiro.

Tauraa vaisi kuaikuvanto Kotira qua kuaanani nteqa kyovaro Kotiva mwiaqaa qua vatero tiqaro, E qutu viinanrave, tura.

Nraakiara nraakye qoravanto airi nani Kotira qua nteqa kyaavaroo Kotiva qati mwihu kyuqema nyatarero hiro tiqaro, Hia nkyiqa qua vataaninrave, tura.

¹⁷ Haaru vaisi kuaikuvanto uaquia hu kyaiqara utuvaro mwiaqatairo qutu vi inraikyava nraakye qoraqaa ntaqikyiqiro vi varuvaro mwihu qutuqita vi varura. Mwitaamaqita vi varuvaro Iesusi Karaisiva kuaikuvanto qutu vi varia okyarara nraatara kyorara tita, nraakye qora mponramwu, Kotiva qati kyuqema nyateqaro nkyiqa hia qua vataaninrave

ti nraakye qorahua, mwihua qati variqi viqata Karaisira vatama kyeta varivara.

¹⁸ Mwi quara okyara mwitaamama vahiro: Haaru vaisi mpovanto uaqia hu kyaiqara kuaiqia utu kyovaro mwia kyaara Kotiva ekyaa nraakye qoraqaa qua vateqaro qutu vivarave tuvata nraakye qora qutuqita vi varura. Mwia votima kyero vaisi mpovanto kyaiqa kuaiqia kyuqe kyaqa vara kyovaro mwiaqatairo Kotiva nraakye qorara tiqaro, Nkyi uaqia hi quara taiqa kyena avuqavuma nyatauqo. Nkye qati variqita vivarave, tura.

¹⁹ Haaru vaisi kuaikuvanto Kotira qua nteqa kyoraqaataita airi nraakye qora hia kyuqema vita variqata uaqia hu kyaiqara varaqita vi varura. Mwia votima kyero vaisi mpo mwiva kuaiqavanto Kotira qua vataqiro vuraqaatairo Kotiva airi nraakye qorara tiqaro, Nkyi qua taiqa kyena nkyi avuqavuma nyataaninrave, ti varira.

²⁰ Nraakye qoravanto uaqia hi kyaiqara utuqita vuvaro mwiaqatairo Kotiva qao tu quara Mosesira mwuvatavata nraakye qoravanto uaqia hi kyaiqara mpoqiyavata nraahu utuqita vura. Mwitaamaqi vi varuvaro qora kyaiqavanto nronraqama kyero vahuvaro mwiaqatairo Kotiva kyuqema nyataari okyarava mwiaavata nraatara kyero mpoqiyavata vahura.

²¹ Haaru uaqia hu kyaiqava nraahu nraakye qora ntavaaqavu kyovaro qutu vi inraikyava mwihuaqaa ntaqikyiqiro vuvata mwihua qutuqita nraahu vi varura. Mwaa entara Kotiva tiri kyuqema timwa tegaro tiriqaa ntaqikyiqiro ma viro. Tiri nronravanto Iesusi Karaisiva tiri kyaahaqama timwa torara tiro, Kotiva tiri avuqavuma timwa taihata tire ekyaa enta qati variqi quarahuama varita.

6

Tire Iesusira vatama kye qutu vurahua

¹ Mwi quara rieqatama tire nanra quave qiananra? Tire mwaa quarave qiananra, Nrivaqe uaqia hi kyaiqara utuqita quararo Kotiva mpoqiyavata tiri kyuqema timwa taarive. Mwitaave tire qiananra?

² Qaqao, hia tire mwitaa ciara. Tire qutu vuraro uaqia hi kyaiqava hia qaiqaa tiriqaa ntaqikyi variho. Mwitaa hirara tita, tire qaiqaa uaqia hi kyaiqara utuqita quarora.

³ Nkye hia mwaa quara ntapihiarave? Tire Iesusira nraaqiaraqama vita nramanri vareta tire mwi entara Iesusi Karaisira vatama kyeta kuaaqi variqata tire mwiva qutu vuntema kyeta qutu vunanra.

⁴ Tire nramanri vareta Iesusi Karaisira quntamwa tontema kyeta tirivata quntamwa taavata varunanra. Mwiaqatairo Iesusira qova peqaqama kyero Iesusira qati vara sivuma kyontema kyero mwiva tirivata vara sivuma kyairaque tire qaraakyaqama kyetama variqita quananra.

⁵ Tire Iesusira vatama kyeta qutu quarahua variqata qiomata tire Iesusira vatama kyeta qati sivita variananra.

⁶ Tire ntapihi kyaunananrave. Tiri vu nraatoqi uaqia hi kyaiqara utuarava tiri hia ntavaaqavu tairaro tiriqi uaqia hi kyaiqara varaananaa mwia kepukyavantovata taiqa quarive tiro, tiri haaruua vu nraato Karaisira vatama kyero kyatariqaa rutora.

⁷ Qutu viva qutu virara tiro, uaqia hi kyaiqava hiama qio qaiqaa mwiaqaa ntaqikyianano.

⁸ Karaisiva qutu vuvata tire mwiavatama kye qutu vurahuara tita, tire qiomata Karaisira vatama kyeta qati sivi variqita quananra.

⁹ Tire ntapihi kyauraro Karaisiva qutu vuvaro Kotiva mwia qati vara sivuma kyorara tiro, mwiva hia qaiqaavata qutu quananro. Hia qutira inraikyavantmwiaqaa qaiqaa ntaqikyiananro.

¹⁰ Iesusiva qutu viraro hiqaro mwiva tiri uaquia hi kyaiqarara rieqaro kuaa nani qutu vura. Iesusivā hiama qio qaiqaavata mwianra rieqaro qutu quananro. Iesusiva mwaa entara qati variqiro viqaro Kotiravata variqiro vi variro.

¹¹ Mwia votima kyeta nkyevata vu nraatoqitaita mwitaama kye rieta qiatia. Tire qutu quarahua votima kyeta variararo uaquia hi kyaiqava hia tiriqaa qio ntaqikyiananrove. Tire Iesusi Karaisira vatama kyeta qati variqi vita Kotira vatama kyeta kuaaqi variqi virerave, qiatia.

¹² Nkye varivarō nkyl mwamwantavanto mpo enta qutu quananro. Qio nkye qutu vi mwamwantara vatama kyeta variqata nkye nkyeta mwamwantavanto api varaaata hi kyaiqara utivora. Uaquia hi kyaiqava nkyi mwamwantaaqaa ntaqikyiqiro quankyyora.

¹³ Nkye nkyeta kyauquve, kyuquve, nanra mwamwantave qati kyaivaro mwi mwamwantava uaquia hi kyaiqara utuankyyora. Nkye ekyara qutu quataara vaihata nkye qati variqita vi variara. Nkye mwianra rieqatama Kotira kyaiqa nraahu vararerata uti variqatama nkyeta kyauquve, kyuquve, mpo mwamwantave, mwiaqotaita avuqavuma kyeta kyuqe kyaiqa nraahu varaqita quata.

¹⁴ Kotiva Mosesira mwu quava mwaa entara hiama qio nkyiqa ntaqikyiananro. Kotiva nraakyē qora kyuqema nyatai okyarava tiriqaa ntaqikyi variro. Mwitaa hirara tita, uaquia hi kyaiqara qati nraahu utuqi quare. Mwitaae tire qiananra? Qaqao, tire mwitaa qiarora.

¹⁵ Mwiaqaataita tire nanra quave qiananra? Mosesira qua okyaravanto hia tiriqaa ntaqikyiananrove. Kotiva nraakyē qora kyuqema nyatai okyarava tiriqaa ntaqikyi variro. Mwitaa hirara tita, uaquia hi kyaiqara qati nraahu utuqi quare. Mwitaae tire qiananra? Qaqao, tire mwitaa qiarora.

¹⁶ Nkye hiave ntapihiavo? Nkye vaisi mporara i kyaiqa vararerave tivarō mwi vaisiva nkyiqa ntaqikyirata nkye mwia kyaiqa vaisima varivarō. Nkye uaquia hi kyaiqara utivera, uaquia hi kyaiqava nkyiqa ntaqikyiqi virata nkye mwia kyaiqa vaisima variqata mwia kyaiqa nraahu varaqita vita uro qutu vivara. Nkye Kotira qua riemwaqita vivera, Kotiva nkyiqa ntaqikyiqiro variata nkye mwia kyaiqa vaisi varivarō Kotiva nkyi avuqavuma nyataananro.

¹⁷ Nkye haaru varuvaro uaquia hu kyaiqava nkyiqa ntaqikyiqiro vi varuvata nkye varura. Nkye mwitaamaqita vi varuvata mwiaqaataita mpo uhua qutaa qua nkyi timwa nyuvata hia nkye mwia qua mpoqia qaqira kyaraítita, ekyaa mwi quara riemwaqita vi variara. Nte mwianra rieqanama Kotirara qamwateqanama varina.

¹⁸ Kotiva nkyi huvantu kyaiharo uaquia hi kyaiqava nkyi tuta kyaihata nkye variara. Mate kyuqe kyaiqvanto nkyiqa ntaqikyi varihata nkye kyuqe kyaiqa nraahu vararerata uti variara.

¹⁹ Ni qua hia rievorave tina, mwiaqaataina nte vaisivanto qua qiantema kyena nkyiara tuqo.

Haaru uaquia hu kyaiqava nkyiqa ntaqikyi varu entara nkye uaquia hu kyaiqara varaaata huvata nkye uaquia hu kyaiqara utita tiqata, Tiri mwamwantavanto qiomā mwi kyaiqara varaanarove timwa kyeqata uaquia hu kyaiqara mpo kyaiqa mpo kyaiqa uti varura.

Mwia votima kyeta mwaa entara nkye tiqata, Kyuqe kyaiqvanto tiriqaa ntaqikyi variraqe tire qutaa Kotira nraaqiara variare, timwa kyeqata nkyeta nyamwantaqotaita kyuqe kyaiqa nraahu varaqita quata.

20 Haaru uaqia hu kyaiqava nkyiqa ntaqikyi varuvata nkye mwia kyaiqa vaisi varuvaro kyuqe kyaiqvanto hia nkyiqa ntaqikyurave.

21 Nkye haaru uaqia hu kyaiqara uturara mate riaavarro nkyi kyaurihata variarave. Nkye mwi kyaiqara uturaqataita nanra kyuqe inraikya varorave? Mwi kyaiqara utuariva variqiro viro uro ekyarama qutu quananro.

22 Qio mate mwaa entara nkye huvantu quavaro uaqia hi kyaiqava hia nkyiqa ntaqikyi varihata nkye Kotira kyaiqa vaisi variarama. Mwiaqaataita nkye nanra inraikyave varevara? Nkye mwitaamaqi viqatama nkye quataama Kotira nraaqiaraqama vita nkye mwiaqaataita ekyaa enta qati variqita virama varevara.

23 Uaqia hi kyaiqava nai kyaiqa vaisi qutu quani kyoqaara mwihanro Kotiva Iesusi Karaisira tiri vunyaa vaisi kyaiqara rieqaro tiri qatiqama kyero ekyaa enta qati variqita quananra timwinrama.

7

Poruva nraakyevanto vaati varaaninraqaa ntumwa kyero tura

1 Ni kata pakyaa tuaavo, nkye qua vataira okyara ntapihi riaahuara titi, nkye ntapihi riaavarro qua okyaravanto vaisivanto qati variqiro quani entara nraahu mwiaqaa ntaqikyiro. Vaisivanto qutu quani entara mwi quava hiama qio mwiaqaa ntaqikyiananrove.

2 Qio nraakye ntumwu okyarara nraato tuata. Nraakye ntumwu mwataiharo tiri qua okyaravanto mwi nraakyerara tiqaro mwi vaisiva i vaativanto variho tiharo mwi nraakyeva nai vaatintiri variro. Mwia vaativanto qati variqiro vi entara mwiva mwia nraatavanto variro. Mwia vaativanto qutu quani entara tiri qua okyaravanto hia mwi nraakyera tutaanano.

3 Mwia vaativanto qati variani entara mwi nraakyeva mpo vaisintiri nrohi varirera, mwi nraakyerara nraata vaati ntue hi vari nraakyerave tivara. Mwia vaativanto qutu viraro tiri qua okyaravanto hia mwi nraakyera tutairaro mwi nraakyeva qati variqaro vaisi mpo vareqaro mwiva hiama nraata vaati ntue hiananrove.

4 Ni kata pakyaa tuaavo, nkyevata mwia votima kyeta variavo. Iesusi Karaisira kyatariqaa hiritovaro qutu vuvata nkyevata mwi entara qutu vurara tiro, mate Mosesira qua okyaravanto hiama qio nkyi tutaananrove. Kotiva Karaisira qati vara sivuma kyorara tiro, Karaisiva qati varihata nkye mwianivanto variavo. Nkye Karaisira nraaqiara variqtara tita, nkye Kotira kyaiqa varehuama varita.

5 Haaru uaqia hi kyaiqava triqaa ntaqikyi varu entara Mosesira mwu quava tiri sivuma kyonvata tire qao timwa tai kyaiqara nraahu varaqi virera utuvananra. Mwi kyaiqaraqatairo qutu quana inraikyava nraahu qovarama vura.

6 Haaru Mosesira mwu quava tiri rupa tovata tire qutu quavanranra tiro, mwi quava hia triqaa ntaqikyi varihata tire qati varunanra. Tire qatinani variqata hia tire haaruana qua okyara qara ntumwa tora rieqata Kotirani kyuqe kyaiqa vararaitita, tire qaraakya qua okyara rieqata varuraro Kotira mwanraquravanto tiri kyaahaqa ihata Kotira kyaiqa vare varunanra.

Kotiva Mosesira mwu quaravata qora kyaiqaravata tura

7 Kotiva haaru Mosesira mwu quava hia tiri kyaahaqa hurara tita, tire mwianra uaqia hi quaraveve qiananra? Tire mwitaave qiananra? Qaqao, hiave. Mwi quava hia vahitiri, tire hiama uaqia hi kyaiqara okyara ntapihuratiri. Mwi quava tiqaro, Hia mpova hi inraikyarara vairiqa hiante,

tirave. Mwi quava hia mwitaa titiri, nte vairiqa hia okyarara hiama ntapihutiri.

⁸ Nte mwi quara riemwaqina quataara vahuvana nte variavaro uaqia hi kyaiqara utuariva nraahu ni pu naatoqi vahuvananra tina, nte mwi quara nteqa kyaankye timwa kyena mwiaqaatai mpo inraikya mpo inraikyara ni mutukya ntuvana variavara. Kotiva qaoqa hiqaro qua vatova hia vahitiri, mpovanto qua nteqa kyairaqatairo hiama uaqia hi kyaiqara utu kyaio tivaruaqia hi kyaiqara kepukya hiama vahitiri.

⁹ Ntevata haaru variqana hia Kotira qua okyara riaava entara qati variqina quavara. Nte mwitaa variqina vi variavaro Kotiva hia mwitaa hiante tu quava nri ntovana nte mwi quara riaavarao ni pu naatoqitairo uaqia hi kyaiqara utuariva qovarama vuvana nte mwi quara nteqa kyena

¹⁰ mwia kyaara qutu quahua votima kyena variqina quavara. Kotiva hia mwitaa hiante tu quava ni kyaahaqa huvana nte qati variqina quataara vahuvana ntenavanto mwi quara nteqa kyena mwia kyaara nte qutu quahua votima kyena variqin quavara.

¹¹ Nte Kotiva hia mwitaa hiante tu quara riaavarao ni pu naatoqitairo uaqia hi inraikyava ni kumwaanri tiqaro, Qioma mwi quara nteqa kyenanrave, tuvana nte mwi quara nteqa kyaavarao uaqia hi kyaiqara utuavava ni naatara kyovana mwia kyaara nte qutu quariva variavara.

¹² Mosesira mwu quava kytata quama vahiro. Kotiva qao timwa kyero hia mwitaa hiate tu quavavata Kotira qua kytata quama vahiro. Mwi quava nai avvuqavuma kyero vahiva kyuqe quama vahiro.

¹³ Mwi quava kyuqe qua vahananra tina, nte kyuqe qua kyaarave quti inraikyara varena? Qaqao, hiama. Nte mwi quara nteqa kyena uaqia hi kyaiqara utuaninra kyaarama nte qutuani inraikyara varena. Ni pu naatoqitairo uaqia hi kyaiqara utuariva kyuqe qua nteqa kyaante tura kyaara nte qutu quani inraikyara varena mwiaqaataina nte ntapihi kyena taqauqaro uaqia hi kyaiqara okyaravanto uaqia hiva vahirama. Kotiva qao timwa tero hia mwitaa hiante tu quara naamutovana nte uaqia hi kyaiqara okyara taqauqaro nai anoma kyero uaqia hivama vahiro.

Uaqia hi kyaiqava tiri vu nraato ntumwa qu kyai okyarara tura

¹⁴ Tire ntapihi kyaunanra. Kotiva haaru vato quava aanra kyuqeragaan nrohiana okyarara ti varira. Mwi quava mwitaa ti varihana nte uaqia hi aanranraqaa nrohiarivama varina. Uaqia hi kyaiqava ni rupa taihana nte mwia kyaiqa vaisivama varina.

¹⁵ Nte ntena vare varu kyaiqara hia anomia kyena ntapihura. Mwi kyaiqara kyuqe kyaiqa ni varaataa iho timwa kyena mwiaqaataina nte hia mwi kyaiqara varena. Qaiqaa mpo kyaiqa uaqia hi kyaiqara hia ni kyakya hira hia varaaninrave timwa kyena mwiaqaataina nte mwi kyaiqara uti varura.

¹⁶ Nte uaqia hi kyaiqara hia varataa hira mwia nraahu vareqana nte taqauqaro Kotiva qao timwa to quava kyuqe qua nraahuma vahiro.

¹⁷ Nte uaqia hi kyaiqara utiqana hia ntenavauma mwi kyaiqara uti varina. Ni pu naatoqi uaqia hi kyaiqara utuariva vahiva, mwivama mwi kyaiqara uti variro.

¹⁸ Nte taqauqaro kyuqe kyaiqa varaariva hia ni utaqi vahira. Nte ntena pu naato mutukyaqia tuqo. Ni mutukyaqitairo kyuqe kyaiqa varataa ihanavata hia mwia varaura.

¹⁹ Nte tiqana, Kyai nte kyuqe kyaiqa varaankye, timwa kyenavata mwi kyaiqara hia varaura. Nte tiqana, Qaqao, hia uaqia hi kyaiqara utirerave, timwa kyenavata uaqia hi kyaiqara mwia qati nraahu uti varura.

20 Hia ni kyakya hi kyaiqara nraahu vare varura mwia hia ntenavanto-vauama varena. Uaqia hi kyaiqava ni utaqi vahiva, mwivama mwi kyaiqara vararerera uti varihana nte mwi kyaiqara varena.

21 Mwiaqataina nte taqauqaro vaisivanto kyaiqa varaari okyarava mwitaamama vahiro. Nte kyuqe kyaiqa vararerera huqaro uaqia hi kyaiqavamaaanra antue variro.

22 Ni mutukyavanto Kotira qua okyarara qamwataihana kyai mwi quara vataqina quankye tuqaro

23 ni pu naato utaqitairo mpo kyaiqa uaqia hi kyaiqara varaariva nramwutaqa hiqaro nte kyuqe kyaiqa vararerera hora nraatara kyero ni ntavaaqavu kyero rupate varihana varura.

24-25 Ni mutukyqitairo Kotira kyaiqa vaisi variataa iharo ni mamantavanto uaqia hi kyaiqara vararerera uti varira. Po, nte anomia kyena uaqia hiraqi uaqjama kyena varuqo. Ni mamantavanto uaqia hi kyaiqara varaari mwamwantava ni ntavaaqavu kyiahana nte mwia kyaara qutu quankyorave. Tavave ni huvantu kyairae nte qati varianrave? Qio Iesusi Karaisiva tiri vunyaava, mwivama tiri huvantu kyaariva variho. Nte mwianra rieqanama Kotirara kyuqeve tina mwia nrutu tuaaherauqo.

8

Kotira mwanraquravanto nraakte qora kyaahaqa hirata nrohirara tura

1 Mwi quara okyara mwitaamama vahiro: Nraakte qoravanto Iesusir-aquaqaa vita varihua hiama mwihuqaqua qua vahiananro.

2 Kotira mwanraquravanto tiriqaq ntaqiky variraqe tire Karaisiravata kuaqqi variararo hiama uaqia hi kyaiqavavata, qutuari inraikyavavata, tiri tutairae variananra. Tire huvantu vita nritareta qatinanima varita.

3 Tauraa tiri vu nraatovanto uaqjama kyero vahuvarora tiro, Kotiva qaoqa hiqaro Mosesira mwu quava hia kepukyaqama kyeqaro tiri kyaahaqa hora. Mwi quava hia tiri kyaahaqa hiariva vahuvarora tiro, Kotiva naivanto tiri kyaahaqa hora. Nraakte qorara rieqaro mwihua uaqia hi kyaiqaraqaara qutu quarive tiro, Kotiva nai mwaaku titovaro Karaisiva tiri uaqia hora nraakte qorahua votima kyero tiri kuaa mwamwanta varero varuvaro Kotiva tiri uaqia hi quara mwiaqaa vatovaro Karaisiva qutu vura.

4 Haaru Kotiva avuqavuma kyero nraakte qorara mwitaa mwitaamagi viqata nrohiate timwa to quava vahuvaro Kotiva tiriara mwi quava mwihuqaq vahirata mwihua nkijari mwamwantavanto uaqia hi kyaiqara varaataa hianinra hia vararaitifa, nina mwanraquravanto qiani quara nraahu riemwaqita quate tiro, Kotiva tiri qua Karaisiraqaa vatovaro qutu vura.

5 Mwia vu nraatoqitairo uaqia hi kyaiqara nraahu varaataa hiari vaisiva variraro uaqia hi kyaiqava mwi vaisiraqaa ntaqikyiqiro quananro. Mwia vu nraatoqitairo Kotira kyaiqara nraahu riemwaqiro quar'i vaisiva variraro Kotira mwanraquravanto mwi vaisiraqaa ntaqikyiqiro quananro.

6 Mwia vu nraatoqitairo uaqia hi kyaiqara nraahu utuataa hiari vaisiva variqiro viro uro ekyara qutu quananro. Mwia vu nraatoqitairo Kotira kyaiqara Kotira mwanraquravanto kyaahaqa hiraro mwia nraahu varaataa hiariva variqiro viraro mwutukyqitairo qihakya hiraro ekyaa enta qati variqiro quananro.

7 Uaqia hi kyaiqara nraahu varaataa hiariva vaisiqaa ntaqikyiqi vi variraro mwi vaisiva Kotira nramwutaama variananro. Mwi vaisiva hia Kotira qua riaraitiro, Kotira qua nteqakye variananro. Mwiva Kotira qua riemwaqiro quariva hiama mwiaqai vahiro.

8 Uaqia hi kyaiqara nraahu varaataa hirata vari nraakye qorahua Kotira kyakya hiani inraikyara hiama qio varevara.

9 Qio Kotira mwanraquravanto nkyiqi varirera, Kotira mwanraquravanto nkyiqi ntaqikyi variraro nkyi vu nraatovanto uaqia hi kyaiqara nraahu varaataa hiva hiama qio nkyiqa ntaqikyianro. Karaisira mwanraquravanto vaisi mpoqi hia varirera, mwi vaisiva hiama Karaisiranivanto variananro.

10 Karaisiva nkyiqi variqi virera, nkyi mwamwantavanto uaqia hi kyaiqara kyaara qutu quariva variraro Karaisiva nkyi avuqavuma nyatairara tiro, nkyi mwanraquravanto qati variqiro quarivama variananro.

11 Iesusiva qutu vuvaro Kotiva mwia vara qati sivu kyora. Qio Kotira mwanraquravanto nkyiqi varirera, Kotiva Iesusira qati vara sivuma kyon tema kyero mwiva nkyi qutu vi mwamwantara vara sivuma kyairata qati variqi vivara. Kotira mwanraquravanto nkyiqi variqiro vi varirara tiro, Kotiva mwitaa hirata nkye qati variqi vivara.

12 Ni kata pakya tuaavo, mwi quara rieqatama titi vu nraatovanto uaqia hi kyaiqara varaataa hira tire varaqita quarora.

13 Nkye nkyeta vu nraatovanto uaqia hi kyaiqara varaataa hira varaivera, nkye ekyara qutu vivara. Kotira mwanraquravanto nkyi kyaahaqa hirata nkye uaqia hi kyaiqara ekyaa ru taiqa kyaivera, nkye ekyaa enta qatima variqi vivara.

14 Kotira mwanraquravanto ti quara rieqata nrohiahua, mwihuama Kotira nraaqiarama varita.

15 Kotiva hia nkyiara qaiqaa aatu hiqata nrohivarо vaana uaqia hiva nkyi rupa kyero nkyiqa ntaqikyiarive timwa kyero mpo mwanraqura nkyi nyinrave. Kotiva nai nraaqiaraqama kyero tiri virirero nai mwanraqura tiriqi vataihata tire Kotirara aakyara nteqata, Ko, ko, ti varunanra.

16 Kotira mwanraquravanto tiri mwanraqura kyaahaqa hi variharo tiri mwanraquravanto tiqaro, Tire Kotira nraaqiarama varuro, ti varira.

17 Tire Kotira nraaqiara varurahuara titi, tire Kotiva nai nraaqiaranive timwa tai inraikyara varaarahuama varita. Tire Karaisiravatama kye varurahuara titi, tire Kotiva Karaisiranive timwa tai inraikyara varaarahuama varita. Tire mate mwaa entara Karaisira nraantanteta nriqa vi inraikyara varaqi quarahua nraakiara Karaisiva varintema kye tire nronraqama vita Karaisiravata kepuqyaqama kye qati variqi quananra.

Tire nraakiara kyuqema kyeta qati variqi quananranra tura

18 Nte mwitaamama riena. Nraakiara Kotiva tiri nronraqama kyero kyuqema timwa taani entava qovarama quaninra veky variqanama nte mate mwaa entara nriqa vi inraikyara varaqi quaninrave, muaanra varaqi quaninrave, mwi inraikyarara hia nronraqama kyena riaaninra.

19 Kotiva tiri nai nraaqiara nronraqama kyaani entava qovarama quaninranra, ekyaa Kotiva ututai inraikyava mwi entara qamwanrama qovara hiarive timwa kyero mwia veky variro.

20 Mwaa entara ekyaa Kotiva ututai inraikyava vahiqiro viro uro uaqiamma viro taiqa vi varira. Hia naiqama kyeqaro mwitaa hira, Kotiva taiqaante tiharo mwitaa hira. Qio Kotiva ututai inraikyava hiama mpo enta mpo enta mwitaamaqiro nraahu quananro.

21 Nraakiara Kotiva huvantu kyairaro mwi inraikyava hia tapitaraitiro, qatima vahiqiro quananro. Nraakiara ekyaa Kotiva ututai inraikyava tire mwia nraaqiaravanto variarantema kyeroma qati vahiqiro quananro.

22 Tire ntapihi kyaunanra. Nraakyevanto nraaqiara mwatarero atura ntintema kyero ekyaa Kotiva ututai inraikyava nai huvantu kyaani entarara rieqaro atura ntumwaqiro nrivama mate mwaa entaravata qati nraahu atura nti variro.

23 Hia mwi inraikyava nraahu atura nti variro. Kotiva nai mwanaraqura nraante tiri timwihata varurahuama, tirevata mwitaamaqita vi varunanza. Tire Kotiva tiri vara virikyero tiri kyuqema kyaani entara vekya variqatama, tirevata atura ntiqata varunanza.

24 Haaru tire uaquia hi aanranra qaqlira kyauraro Iesusiva tiri aanra kyuqeraqaa vita kyero vatairara tita, tire tiqata, Nraakiara Kotiva tiri mwamwanta qati vara sivuma kyero tiri viriananrove, timwa kyeta tire mwi entara vekyama varita. Mate hia taqaana inraikyava nraakiara nrianinra mwia vekyama varita. Tire mwi inraikyara taqetavauma hia mwi inraikyara vekya variananza.

25 Tire hia taqaraitita tiqata, Qutaama mwi entava nri ntaananrove, timwa kyeta mwiaqaa tiri mwutukya qihakya hi varihata mwi entara vekya variqata taqe varunanza.

26 Tire hia kepukya vahi nraakte qorahua variqata mwukyaari tu kyeta aanra kyuqera mwiaqaa nrohi varurarora tiro, Kotira mwanaraquravanto tiri kyaahaqa hiro. Tire Kotirara aakyara nteqata mwutukyaqitai mwi inraikyaraara riauraro nrovanto hia kyuqema kyeqaro qua ti varira. Tire mwitaa huraro Kotira mwanaraquravanto tiriara rieqaro Kotirara aakyara ntaira.

27 Mwiva mwitaa ti variharo Kotiva tiri mwutukyaqi taqaiva qiomia nai mwanaraquravanto qiani quara riemwaqiro quananro. Mwia mwanaraquravanto Kotira mwutukya vahi inraikyara ntapihi kyaivara tiro, mwiva Kotira nraaqiara tiri kyaahaqa hiarive tiro, Kotirara ntapihi kyero aakyara nte variro.

28 Tire ntapihi kyaunanra. Kotirara mwutukya vahua nai kyakya hiraqa nyaanrama kyero vataihua variyaro mpo inraikya mpo inraikyavanto mwihuqaqaa qovara hirera, mwi inraikyava hiama mwihua uaqima nyataananro. Ekyaa mpo inraikya mpo inraikyavanto mwihuqaqaa qovara hiraro Kotiva mwi inraikyaraqo mwihua kyuqemama nyataananro.

29 Haaru nraakte qora hia varu entara qumina vakya Kotiva tiqaro, Nte mwi nraakte qorahua nyaanraanrita ni nraaqiarama varivarave, timwa kyero mwihuara nai mwaquo votima kyeta variate tiro, mwihua nai kyaama tero. Kotiva mwihua nai kyaama tero tiqaro, Ni maaquvanto mwihua sakyaava varirata mwihua mwia nrunra qatama varivarave, tura.

30 Kotiva haaru mwitaa turara tiro, mwiva tiri nai kyaama tai nraakte qorahua nyaanrama taira. Mwiva tiri nyaanrama tero tiriqaa qua vahira taipa kyero avuqavuma timwa tero tiriara mwihua nivata kuaqaa variate tiro, tiri nyaanrama taira.

Kotira mwutukyavanto tiriara vahira hiama mpo inraikyavanto antua nyaanranro

31 Kotiva tiri mwitaa hirara tita, tire nanra quave qiananra? Kotiva tiri kyaahaqa hirara tiro, tavave tiri nramwutaa variqaro Kotira nraatara kyero tiri uaqima timwa taananro? Hiama qio mpovanto mwitaa hi-anano.

32 Kotiva nai mwaqua hia ntena tutarerave tiraitiro, qihakyma kyero tiri timwinra. Kotiva mwitaa hivara tiro, mwiva tiri kyaahaqa hirero hiave ekyaa hini inraikya mwivata apiara votima kyero timwiananro?

33 Tavave tiri Kotiva nai kyaama taihuaqaa qua vataananro? Hiama mpovanto qio mwitaa hiananro. Kotiva naivanto tiriqaa qua vahira nruka kyero tiri ntapihi kyero vataira.

34 Tavave ko tiqaro tiriara nkye qutu vivarave qiananro? Hiama qio mpovanto mwitaa qiananro. Iesusiva Karaisiva tiriara rieqaro qutu vura. Iesusiva hia ekyara qutu viraitiro, mwiva qutu vuraqitairo qati siviro kepukyaqama viro mate mwiva Kotira kyauqu kyaatutani variqaro tiriara aakyara nte variro.

35 Karaisiva mwitaa hirara tiro, tavave tiri Karaisiraqaatairo antua qatiraqaa kyairaro Karaisiva tiri qaqlira kyairaro mwia mwutukyavanto hia tiriara vahiananro? Hiama qio mpovanto mwitaa hiananro. Ntaqivave, inronra hivave, mwukyaari tu kyeqata nrohiara entavave, mpovanto tiri uaqiamma timwa taari entavave, kyara hia vahiraqe qati variara entavave, tuavaaqa hia vahiali entavave, tiri nraatuqataani entavave, qutuara entavave, mwi inraikyaya mwi inraikyaya qovara hiro hiama qio tiri antua qatiraqaa kyairaro Karaisira mwutukyavanto hia tiriara vahiraro tiri qaqlira kyaananro.

36 Nte tuntema kyero Kotira mpukuqvata mwitaama kyero qara ntumwa torave. Mwitaama tiro:

Tire i nraaqiara varuratarata tita,
tiri ekyaa enta ru kyevama vahirove.
Mwihua sipisipi ru kyaantema kyeta
tirivata ru kyarerata uti variarave, tura.

(Ihi 44:22)

37 Mwihua mwitaa hiqata tiri uaqiamma timwa taivaqe tire hia mwianra nronraqama kyeta riaara. Iesusira mwutukyavanto tiriara mpoqivata vahirara tita, tire qiomma mwi inraikyaya nraatara kyeta kepukyaqama kyeta variananra.

38-39 Mwaa quava qutaa qua vahana nte ntapihi kyaura. Kotira mwutukyavanto tiriara vahirora tiro, mwiva Karaisira tiri timwihanro Karaisiva tiriqaa ntaqikyi qiro vi varirara tiro, hia mpo inraikyavanto Kotiva tiriara mwutukyavanto vataira antua kyaananro. Tire qutuaravave, qati variaravave, hiama tiri antua kyaananro. Hiama qio nyaamwunyahuave, vaanavantove, tiri antua kyevvara. Mate vahiali inraikyavavata, nraakiara vahiali inraikyavavata, hiama qio tiri antua kyaananro. Nyaamwuni varihuave, mwatani varihuave, Kotiva utu tai inraikyaya mpovantove, mwihua mwihua Kotira mwutukyavanto tiriara vahianinraqaataita hiama qio antua kyevvara.

9

Poruva nai mwatanaa Iutaara tura

1 Nte Iesusira nraaqiara variqananra tina, nte qutaa qua nraahu ti varuvama. Kotira mwanraquravanto ni mutukyaci ntaqikyi varihananra tina, nte hia unra qua nkyi timwa nyinrenrave.

2-3 Nte ntenu nramwunaa Iutaa ni kuaa nraanrenna riauqaro ni mpoqama kyero ua iharo ni mutukyavanto uaqia ihana variqina vi varurama. Po, aanaa qio vahirarovama Iutaavanto Karaisira qua ntapihi kyeta riaate tiro, Kotiva ni inronra hiro Karaisiraqaatairo ni teqa kyero qatinani tuto kyaarive qianinra.

4 Kotiva Iutaa mwihua nraahu tiqaro, Nte nkyi nyaanraanrita nkye ni nraaqiarama varivarave, timwa kyero nai peqa okyara nyaamwutovata taqora. Kuaa mwihua nraahu tiqaro, Nte mwitaama kyena nkyi qia ntaqikyiqina virerave, timwa kyero Kotiva mwihua timwa to quara mwihua timwa nyunra. Kotiva kuaa mwihua nraahu mwataama kyeta

mwaanra tiqatama nkye ni nutu tuaaheraqi quate timwa kyero, qaiqaavata kuua mwihuara nraahu nai kyauqu nriqiqaa vatero tiqaro, Nte nkyi mwitaa mwitaa hirerave, tura.

⁵ Kotiva mwitaa tuvata haaru nronra vaisinramwuvata Iutaa mwihua haivaqahua nraahu varura. Karaisivavata kuua okyara Iutaa okyara mwiqitai nraahu qovarama vura.

Karaisiva vunyaava ekyaa inraikyaqaa ntaqikyi variva, mwiva ekyaa enta qati nraahu variariva variraqe tire ekyaa enta mwia nrutu tuaaheraqi quara. Nte qutaama tuqo.

Kotiva nraakyе qora nai kyaama taani okyarara tura

⁶ Qio Iutaavanto hia Kotira qua rie variavata mwia kyaara qiove tire Kotira quavanto raupirima viho qiananra? Hiama mwitaa qiananra. Is-arerivanto variavaro hia ekyaa mwihua Kotiva nai kyaama taihua variara.

⁷ Hia ekyaa Evarahaamunra nraaqiara mwihua Kotira nraaqiara variara. Kotiva Evarahaamunranra mwitaama tiro, I mwaauq Aisaakira nraaqiara mwihua nraahuma i nraisi varivarave, tura.

⁸ Mwi quara okyara mwitaamama vahiro: Hia Evarahaamuva nai kyakya hiraqa mwata taihua Kotira nraaqiara variara. Evarahaamuva tintema kyeta Kotirara qutaama qiaro tihua, mwihuama Kotira nraaqiara varivara.

⁹ Kotiva kyauqu nriqiqaa vatero Evarahaamunranra mwitaama tiro, Mwi entara nte uro ntantente tumuanrinro i nraata Seraava qoraisi nraaqiara mwata taananrove, tura.

¹⁰ Hia mwi quava nraahu vahiro. Mpo quavatama vahiro. Revekaara mwaagutana varuvaro mwitanahua sova kuaikuvanto tiri haivaqava Aisaakiva varura.

¹¹⁻¹² Revekaava nraaqiara tuaqama virovata hia nraaqiara kaapitana mwata tovata mwitanahua hia kyuqe kyaiqave uaqia hi kyaiqarave varo entara, Kotiva naivant vu nraato tu kyero qua vatero tiqaro, Vakyaava qata kyaiqa vaisi variananrove, tura. Kotiva nai kyakya hiraqa vaisi nyaanraivara tiro, Kotiva hia mwitanahua kyaiqara riaraitiro, mwia qata nraahu nai kyaama tora.

¹³ Kotira qua qara ntumwa toraqi Kotiva mwitaama tiro: Iaikopurara ni mutukya vaiharo Isorara hiama ni mutukya vaiho, tura.

¹⁴ Kotiva mwitaa tura mwianra tire nanreve qiananra? Kotiva hia ntapihi kyero qua ti varivama varihove qiananra? Qaqao, tire hiama qio mwitaa qiananra.

¹⁵ Haaru Kotiva Mosesira timwa mwinro tiqaro,
Nte vaisi mpo hia ruataa hiraqe nte mwia hiama ruaninrave.
Nte vaisi mpora po kye timwa mwataataas hiraqe
nte mwianra po kye timwa mwataaninrave, tura. *(Kyatura 33:19)*

¹⁶ Mwianra rieqaro hiama qumina vaisi mpovanto tiraro Kotiva mwianra po kye timwa mwataananro. Hiama vaisivanto Kotira kyuqe kyaiqa vara mwatairaro mwianra rieqaro po kye timwa mwataananro. Kotiva nai nraato tu kyero nai mwi vaisirara kyakya hiraro mwianra po kye timwa mwataananro.

¹⁷ Mosesiva qara ntumwa toraqi Kotiva Perorara mwitaama tiro:
E variqara ni peqa okyara taqenanrave.
E ni peqa okyara taqairata ekyaa mpo mwatananaa
mpo mwatananaa ni nutu ntapihi kyevarave.
Nte mwianra rieqanama nte i nronraqama kyauqara
e vunyaa vaisivanto variaro, tura. *(Kyatura 9:16)*

18 Kotira okyaravanto mwitaamama vahiro. Kotiva ta vaisirara po kye timwa mwataataa hiraro Kotiva mwianaa po kye timwa mwataaananro. Kotiva hia vaisi mpora po qitaa hiraro mwiva vainsi mwiva ni qua riaankyo tiro, mwiva vikyokya kepukyaqama kyeroma tita taananro.

Kotiva po qiani okyararavata Kotira raraqa taani okyararavata tura

19 Kotira okyaravanto mwitaama vahirera mpovanto nkyiqitairo qaao tiro tiqaro, Nanraqamave Kotiva tiriqaa qua vataih? Tiriqitairo tavave Kotira kyakya hira raquota kyaananrove? qiananrove.

20 Nkyiqitairo mpovanto mwitaai tirera, nte nai timwa mwinrenra. E qumina vaisivanto variqarara tira, e hia Kotirara mwitaai tinanrave. Vaisivanto aatapai vara kyero tave utu taiharo tave mwiva hiama qio tiqaro, Qaao nanraqamave e ni mwataama kyera utu taaro? qiananro.

21 Tave utuari vaisiva qiomaa nai kyakya hianinraqaa tave utuananro. Mwiva aatapai kuaa mwiaqotairo qiomaa tave mpo kyuqema kyero utu tero tave mpo qumina tave uaqiamma kyerovata utu taananrove. (Mwia votima kyero Kotiva nai varaaataa hiani kyaiqara varairage hiama tire Kotirara e hira mwitaai hiante qiananra.)

22 Kuua qarama kyero mpo hia nraakye qorahua mwihua nkyiari uaquia hi kyaiqara utuara kyaara Kotiva mwihua taiqa kyaataara vaharovata Kotiva qati kyaihata variahura hiave Kotira raraqa tairaro mwihua rirata mwihua mwia peqa okyara taqevara?

23 Nraakiara Kotiva mpo hi nraakye qorahua ru taiqa kyero mwiaqatairo mwiva qiomaa tiri mpo hiara nraakye qorahuara po tiro tiqaro, Nte mwihua kepukyaqama kyaarita mwihua nivata kuaaqi variqi vivarave, qiananro.

24 Kotira kyakya hiva mwitaama vaharora tiro, mwiva tiri Iutaa mpo hurahuavata, mpo mwatanaa mpo hiahuvata, nai kyaama taira.

25 Haaru poropeti vaisei Hosaiaava qara ntumwa tero Kotiva mwitaama tiro:
Mpo mwatanaavanto hia niniqama kye variahua, mwihua
varivaqe nte mwihuarama ni nraakye qorave qianinrave.
Ni mutukyavanto hia mwi mwatanaahuara vahuhua,
mwihuarama ni mutukyavanto vahiananrove. (Hosaiaa 2:23)

26 Nkye hia Kotiranivanto variavo tu mwatara
mwi mwataraqaaanaa nraakye qora
mwihuara mwitaama qiananro,
Kotiva mwanriqavanto qati variqiro vi variva varirata
nkye mwia nraakye qorama varivarave qiananrove,
tura. (Hosaiaa 1:10)

Mwi quara qara ntumwa tova vaharo mpo quavata vahiro.

27 Mpo poropeti Asaiaava haaru aakyara ntamwa kyero Isareriera mwitaama tiro:

Nraakiara Isarerivanto nramanri tokyasataa
nruqa airi vahintema kyeta mwihua airinti
variraqitairovata Kotiva hia airi sitaraitiro,
mwiva pataqiatana nraahuma sitaananrove.

28 Kotiva hia qakyoma kyero ko tiraitiro,
mwiva qamwanrama kyero ko timwa kyero
mwihua quaqa vataaananrove, tura.

(Aisaiaa 10:22-23)

29 Mwitaa timwa kyero Asaiaava haaru mpo quavata tiqaro:
Kotiva nyaamwuni variahuaqaa ntaqikyi variva
hia tiri nraakye qora pata mpomoramwu

vekyahu nyataarita nraaqiara mwata humwuanrama
taivata airi variate titirio,
Kotiva Sotomivata Komoravata ntuqutu taiqa
kyontema kyeroma tirivata ntuqutu taiqa kyaihata
tire taiqama vuratirio, tura.

(Aisaiaa 1:9)

Isarerivanto hia Iesusirara quutaave tu quara

³⁰ Mwi quara okyara mwitaamama vahiro: Mpo mwatanaavanto varita hia mwihua tiqata, Kyai Kotira aanra kyuqera mwiaqaa quare, qaihua variqi vita mwiaqaatai mwihua Iesusirara quataa mwivave qiaravo Kotiva mwihua avuqavuma nyataira.

³¹ Isareri nraakye qora Iutaavanto tiqata, Kyai Kotiva Mosesira mwu quara riemwaqita quare, timwa kyeta variqi viqata mwihua hia qua okyara mwia ntapihi kyeta riaraitita variavaro mwia kyaara Kotiva hia mwihua avuqavuma nyataira.

³² Nataa ihatave Iutaavanto apiqama quavo? Mwihua tiqata, Tire mwi kyaiqara mwi kyaiqara varaqi quararo qioma Kotiva qamwata timwa taananrove, timwa kyeta mwiaqaatai hia Karaisirara nronraqama kye riaara. Vaisivant origaatairo aantapo hiro ntuqutu vintema kyeta mwihua Karaisiraqaatai aantapomaqita ntuqutu vi variara. Mwihua Karaisirara api vu nraato rie variaria.

³³ Kotira mpukuqi mwitaama tiro:
Taqaate, nte Saioniqi (Ierusaremiqi) ori mpo
ntamwa taarita nraakye qoravanto mwiaqaatai
ntamwa aantapoma vareta ntuqutu vivarave.
Ori mwiaqaataita airivanto ntuqutu vivarave.
Ori mwianra quutaave qiariva hiama kyauruananrove,
tura.

(Aisaiaa 8:14)

10

¹ Po, ni nramwunaahua, Kotiva ni nramwunaa Iutaa huvantu nyataarive tina, nte Kotirara aakyara ntegana varura. Kotiva mwihua huvantu nyataaninranra nronraqama kyero ni mutukyavanto vahira.

² Nte taqauqata Iutaavanto mpogama kyeta Kotira qua rieta mwia kyaiqa varareru uti variqatavata hia Kotira okyara ntapihiara.

³ Kotiva avuqavuma nyataani okyarara qaqlira kyeta nkysiari riemwa kyeta mwataama kye avuqavuma nrohiare timwa kyeta, Kotiva nyaamwtai aanranra qaqlira kyaara.

⁴ Kotiva Mosesira mwu quava vahavar Karaisiva nri ntero mwi okyarara nraatara kyorara tiro, Karaisirara quataa mwivave qiariva variraro Kotiva mwia avuqavuma mwataaanano.

Kotiva ekyaa nraakye qora huvantu nyatarero uti variho tura

⁵ Haaru Kotiva timwa to quara rieqaro avuqavuma kyero nrohaninranra Mosesiva mwitaama tiro: Mwi quara hia mpooqavata nteqa kyaraitiro, ekyaa mwi quara vataqiro quariva qioma qati variqiro quan'anrove, tura.

⁶ Mosesira qua riaariva mwitaama vaharo Karaisira qua riaariva mpo okyarama vahiro. Vaisivant Karaisirara quataa mwivave qiariva variraro Kotiva mwia avuqavuma mwataaanano. Kotiva mwitaa hianinranra tita, nkye qumina tiqata, Tavave Karaisira vita varero tuminrenro nyaamwuni quan'anrove, tivora.

⁷ Nkye qumina tiqata, Tavave qutu vihua variraqitairo Karaisira vitarero quananrove, tivora. Nkye qumina mwitaa tivora. (Karaisiva nyaamwusairo tuminro uro qutu viro mwiqitairo siviro qati variva, mwiva nkyi nraaqanima variro.)

⁸ Karaisira quavanto nkyi nraaqani nkyi nroqaavata nkyi mwutukyaqiyatama vahiro. Tire mwi quara Karaisirara kepukyaqama kyeta rieqata nrohiate tuna quara nkyi timwa nyi varunanra. Tire mwitaama tita:

⁹ Nkye nkyeta nroqitai tiqata, Qutaama Iesusiva vunyaa vaisivanto variho, tita nkye nkyetä vu nraato mwutukyaqitai tiqata, Qutaama Iesusira qutu vuraqitairo Kotiva mwia qati vara sivuma kyaiharo qati variho, tivera, Kotiva mwianra rieqaroma nkyi huvantu kyero sitaananrove.

¹⁰ Tire vu nraato mwutukyaqitai qutaave qiararo Kotiva tiri avuqavuma timwa taananro. Tire mwi quara nroqitaita qiararo Kotiva tiri huvantu kyero tivi taananro.

¹¹ Kotira mpukuqi mwitaama tiro:
Karaisirara qutaa mwivave qiariva
hiama kyaurira inraikya varaananrove, tura.

(Aisaiaa 28:16)

¹² Ekyaa mpo mwatanaa mpo mwatanaahua mwi quara qiomaa tivara. Iutaavantove, mpo mwatanaavantove, hia mpo qarama kyeta variara. Karaisiva ekyaa mwihuaqaa ntakikyi varira. Karaisira nraanrama kyero ni kyaahaqaa hiante qiani vaisira, Karaisiva kyaahaqama kyero mwia mpoqiyata kyuqema mwataanano.

¹³ Kotira mpukuqi mwitaama tiro:
Tahuave tiri vunyaa vaisiara aakyara nteqata
mwia nrutu ntehua mwihua mwiva huvantu kyero
sitaananrove, tura.

(Ioeri 2:32)

¹⁴ Hia Karaisirara qutaa mwivave tihua nataama kyetave mwihua Karaisirara aakyara ntevara? Karaisira qua hia riaraiqata nataama kyetave mwihua Karaisirara qutaave tivara? Hia mpovanto mwi quara timwa nyinrenra, nataama kyetave mwi quara rievara?

¹⁵ Hia vansi mpo titairaro mwiva nataama kyeroove uro mwihua timwa nyiananrove?

Kotira mpukuqi mwitaama qara ntumwa tova tiqaro,
Kyuqe mwakyaakya varero uro timwa nyi vari vaisira
nte mwia qawmata mwatarerave, tura.

(Aisaiaa 52:7)

¹⁶ Tire kyuqe mwakyaakya Karaisira qua timwa nyunrata hia Iutaekya mwihua mwi quarara qutaa quave qiaro. Haaru tiri haivaqava Aisaiaava tiqaro,

Nronrao, tire i qua kyuqe qua mwihua timwa nyunrata
mwihua hia tiri quara qutaave qiaovo, tura.

(Aisaiaa 53:1)

¹⁷ Tire ntapihi kyaunanra. Mpovanto Karaisira mwakyaakya mpore timwa mwinranro mwiva mwi quara riaananro. Mwiva mwi quara rieqaroma mwihua Karaisirara qutaave qiananro.

¹⁸ Nte nkyi kyapara hirera, Iutaavanto Karaisira qua hia riaarave iho? Qaqao, nte mwihua mwi quara riaaravema, qianinra. Kotira mpukuqi mwitaama tiro:

Mwihua ekyaa mwatani nrohiqata timwa nyiavaro
mwihua quavanto viro nrinro lhata
ekyaa mwatanaa mwihua qua riaarave, tura.

(Ihi 19:4)

¹⁹ Nte qaiqaavata nkyi kyapara hirera. Haaru Karaisirara tu quara hia Iutaekya qoravanto mwi quara okyara riaarave? Qio mwihua riaarave. Mwihua haivaqava Mosesiva naivanto timwa nyinro tiqaro, Kotiva mwitaama tihoo:

Nkye mpo mwatanaahuara qumina mwatanaave qiahua,
mwihuara nte ni mwatanaahuave qiarita
nkye mwianra kyaru ntivarave.

Nte utuariva nkyl qumina hia vu nraatovata
vahi mwatanaahuara raraqa tairata
mwihua inronra hivarave, tura.

(Lo 32:21)

20 Mosesiva mwitaa tuvaro mwia nraakiara Aisaiaava hia aatu
hiraitiro, mwitaama tiro:

Kotiva mwitaama tiho:

Hia nianra puua hi varihua,
mwihuama ni puama kyevarave.

Hia nianra ntumwa hiamwa ihua varivaqe nte mwihua
suqaama qovara hianinrave tiho, tura.

(Aisaiaa 65:1)

21 Kotiva Isareriera mwitaama tiho:

Nte mpo enta mpo enta nkyi kyaahaqa hirera
ntena kyauqu tutuqatavata nkye qaqlira kyeta
ni qua nteqa kyeta ni mwoqa mpi variavo, tura.

(Aisaiaa 65:2)

11

Kotiva Isareriera po kye timwa nyataaninranra tura

1 Nte vaakya tu quarara rieqana mwataama kyena nkyi kyapara hirera. Qutaave Kotiva nai nrwmwunaa Iutaa mwihua qoririma nyatero? Qaqao, hia mwiva mwihua qoririma nyatairave. Mwaa ntena mwiva Iutaa Isareriera vaisima varuqo. Evarahaamuvu ni haivaqavama variho. Nte Iosepira mwaaqu Mpenisaminira mwia okyarama varuqo.

2 Kotiva tauraqama kyero Iutaa nai kyaama taihua hia mwihua qoririma nyataira. Kotira impukuiq Iraisaarara qara ntumwa to quara nkye hiave ntapihiavo? Mwi entara Iraisaava hia Isareriera qamwataraitiro, Kotirara mwitaama tiro:

3 Nronrao, Isarerivanto poropeti vaisi airima ru kyaavo.

Quara ru kyeta i qia quara mwate varia taintara
mwihua ekyaa ntakuraa kyaavo.

Nte i poropeti kuaiqiyavento nraahu varuqata
mwihua nivata ru kyarerata uti variavo,
tura.

(1 King 19:10)

4 Iraisaava mwitaa tuvaro Kotiva mwia nai nanra qua timwa mwunrave?

Kotiva qaqlao tiro,

Ni nraaqiara variate tina,

nte 7,000 vaisi nyaanrama kyena vatauqo.

Mwi vaisihua hia unra mwanriqa Mpaarirara
tori kyauru ravita variqata qamwata mwataahua
variarave, tura.

(1 King 19:18)

5 Haaru mwitaa huntema kyero mate mwaa entaravata Kotiva nraakyey
qrara po timwa nyataivara tiro, mwiva hia ekyaa Isareriera mwihua qoririma
nyataraitiro, mwiva pata mponramwuanra po timwa nyatero mwihua nai
kyama tero.

6 Kotiva hia nraakyey qora mwihua kyuqe kyaiqa vara mwataarara
riaraitiro, mwiva qati po kye timwa nyateqaro mwihua nai kyaama taira.
Kotiva mwihua kyaiqara rieqaro mwihua nai kyaama taitiri, mwiva po tiva
hiama qutaaqama vahitiri.

7 Mwiaqaatai tire nanra quave qiananra? Mwitaama qiananra. Kotiva
qamwata nyataani aanranra Isareriera nraakyey qora Iutaavanto puaama
kyaaare timwa kyeta toqaamwu tu kyeta puaamaqí quahuavata hia puaama

kyaara. Kotiva nai kyaama taihua, mwihua mwia puaama kye taqaara. Mwihua puaama kye taqaavata Iutaa hini mwihua su nyaato tita vihata mwihua hia Kotira qua rieta.

8 Kotira mpukuqi qara ntumwa tova tiqaro,
Kotiva Isarerri nraakye qorara tiqaro, Nte qio mwihuara
ni pupohama mataihana kyauqata
mwihua su nyaato qumimaqa ihata variarave.
Mwi mwatanaahua haaru hunte, matevata
su nyaato qumimaqa ihata variarave, tura.

(Lo 29:4)

9 Mwitaa tuvaro Ntevitivavata mwitaama tiro:
Mwihua omwata nramwaqi vivaro
mwi kyarava vaara vuvu taava nraantantamwa kyero
mwihua tu varairaqe nte huviqarave qianinrave.
Mwihua Kotira qua nteqa kyera kyaara mwihua nyutu
vara mwataniqama kyero mwihua qoraqama kyero
ntuqtirage nte huviqarave nraahu qianinrave.

10 Kotiva mwihua su qipa kyairata hia qio taqaivaqe
nte mwianravata huviqarave qianinrave.
Mpo enta mpo enta muaanra ntaani kyaiqara nyinrata
mwihua kakataama vita tantuvaantu hita
mwukyaari tiqata varaqi vivaqe nte mwianravata
huviqarave nraahu qianinrave, tura.

(Ihi 69:22-23)

Nraakiara Iutaa su nyaato qatua quaninrave tura

11 Nte qaiqaa nkyi kyapara hirera. Iutaavanto Karaisira qaqlira kyeta
huntauvaivai hiahua, mwihua ekyaarave kyaamwu ntuavo? Qaqao, hi-
ave. Mwihua Karaisira mwoqa mwianraqaataita mpo mwatanaaa mpo
mwatanaahua Kotiva nraakye qora huvantu nyataani quara rie variaria.
Mpo mwatanaahua mwi quara riemwaqi vivata lutaavanto mwihua taqeta
taara nreqata tiqata, Mwihua variantema tirevata variataarave, tivara.

12 Mate mwaa entara Iutaavanto Karaisira mwoqa mwianraqaataita
mpo mwatanaaa mpo mwatanaahua Karaisira qua rieta kyugema variara.
Iutaavanto uaqia hi aanranraqaa vi variaraqaatairo Kotiva mpo mwatanaaa
mpo mwatanaahua kyugema nyataira. Qio nraakiara Iutaavanto uaqia hi
aanranra qaqlira kyeta Karaisira qua riaivar, qikye, mwi entara Kotiva
nraakye qora kyugema nyataariva nrirarerovahiananrove.

13 Nkye hia Iutaa variavana nte nkyi mpo mwatanaaa mwaa quara timwa
nyuquo. Nte mpo mwatanaaa mpo mwatanaahua timwa nyinrenra huqaro
ni titaihana nte mwi kyaiqarara nronraqama kyena riemwaqi vura.

14 Nte nkyi mpo mwatanaahua timwa nyiqi quarita nina nramwunaa
Iutaa hininramwuvanto mwianra ua hita tiqata, Po, tirevata mwi quara
riaataarave. Kyai qio riemwaqita quare, tivaro Kotiva mwihua huvantu
nyataarive tinama, nte nkyi mpo mwatanaahua timwa nyi varina.

15 Kotiva Iutaa qoririma nyatairaqaatairo ekyaa mpo mwatanaahua
kuaaqi taaqauvi variva qovarama viro. Qio nraakiara Kotiva Iutaa qaiqaa
sitaani entaraqaatairo kyuge inraikyavanto qaiqaa qovara hiananro. Mwi-
hua qutu vihua qati sivita nrohintema kyetama varivara.

16 Kyara viti mpoqiyavanto Kotiranai vahianinra mwia hini kyara nronra
mwivavata Kotiranima vahiananro. Kyatari mpo tuqavanto Kotiranai
vahirera, kyaqu kyaara mwivavata Kotiranima vahiananro.

17 (Evarahaamunra nraisi mwihua oripi kyatari votima kye variara.
Evarahaamuna kyatari tuqa votima kyero varihata mwia nraisi mwihua
okyaravata apavata kyaaravata votima kyeta variara.) Kotiva mwi ky-
atarira kyaara hininramwu qatinani teqa kyero oripi kyatari qaakyauqama

vahiraqaatairo nkyi mpo mwatanaa vara kyero nkyiara kyuqema kyeta qupiqaate tiro, nkyi kyatari kyaara teqa kyairaqi vara tomaga taihata nkyevata kyatari tuqa mwia nronra nramwanri nreqata qio variara.

¹⁸ Nkyi mwitaama kyero tomaqa tai kyaarahua variqatama hia nkyeta mwahuta tita mpo kyaara mwihura, Nkye qumina kyaarave, qiata. Nkye nkyeta mwahuta tivera, nkye mwaa quara riaata. Nkye hia tuqa mwia kyuqema mwataavo. Tuqavanto nkyi kyauqu kyaara kyuqema nyate variho.

¹⁹ Mwitaa hirata nkye tiqata, Kotiva naitaraara kyaara mwia teqa kyero tirini mwaata utu tairave, tivera, nte nkyiara mwitaama qianinra.

²⁰ Nkye mwivata quataama qiao. Iutaavanto hia Kotirara quataave qiarovo mwia kyaara mwihua teqa kyero kyairave. Nkye Kotirara quataave qiarovo Kotiva nkyi tomaqa tairave. Mwianra rieqata hia nkyeta mwahuta tiqata variata. Nkye aatu hiqata variata.

²¹ Iutaa kyatari kyaara taruhua variqata mwihua hia quataave qiarara tiro, Kotiva mwia kyaara mwihua hia vekyahu nyataraitiro, mwihua teqa kyero kyaira. Nkye hia kyatari kyaara taruhua variqata nkyevata hia quataave tivera, Kotiva nkyivata hia vekyahu nyataraitiro, qihakyama kyeroma nronraqatairo nkyi teqa kyaananrove.

²² Nkye Kotiva po tiravata, raraqa tairavata, ntapihi kye rieta taqeqlata variata. Mpo hiahua Kotira qaqlira kyaavarot Kotivah mwihura raraqa tiharo varira. Nkye mpo hiahua mwia qua riaavarot Kotiva mwianra rieqaro nkyi kyuqema nyate varira. Nkye mwia qua qati nraahu riemwaqi vivera, Kotiva nkyi kyuqemaqiro quananro. Nkye mwia qua qaqlira kyaivera, Kotiva qihakyama kyero kyatari kyaara teqaintema kyero nkyivata teqa kyaananrove.

²³ Iutaa mwihua uaqia hi aanranra qaqlira kyeta Karaisirara quataave tivera, Kotiva mwihua qio vara kyero qaiqaa tomaqaanrivara tiro, qiomia mwihua qaiqaa tomaqa kyero naitarama taanano.

²⁴ Kotiva nkyi mpo mwatanaahua oripi kyatari qaakyauqama viro vahira votima kye variaraqaatairo nkyi teqa kyero varaqiro uro nraahumwa mpo kyatari kyuqeraqaa nkyi tomaqa taira. Kotiva Iutaa mwihua kyatari kyuqeraqaatairo teqa qatinani kyairara tiro, mwiva mpo enta qihakyama kyeroma qaiqaa mwihua vara naiqaa tomaqa taanano.

Nraakiara Iutaavanto Karaisirara quataave tivarave tura

²⁵ Ni kata pakyaas tuaavo, Kotiva mpo qua uqeta taira nkye hia ntapihivo tina, nte nkyi vutu kye timwa nyinrenra. Nkye mwi quara rieqatama nkye hia nkyeta mwahuta tivara. Mwi quara mwitaamama vahiro. Iutaa Isareri nraakye qoravanto hiama Jesusira qoririma mwateta ekyara mwia qaqlira kyevara. Nraakiara mpo mwatanaa nraakye qoravanto Kotira qua rieta nrita mwia nraaqiaraqama vita qiqqama vivaro, mwiaqatairoma Kotiva Isareri nraakye qora mwihua qaiqaa sitaanano.

²⁶ Mwataama kyero Kotiva mwihua sitaanano. Kotira mpukuqi mwitaama tiro:

Nraakye qora huvantu nyataariva
Saioniqitairo qovara hiananrove.

Mwiva Taikopura nraisimwanra kyaahaqa hirata
mwihua hia qaiqaa Kotira qua qoririma kyevarave.

²⁷ Nte mwihuaqaa qua vahira nruka taiqa kyaani entarara
haaru nte kyauqu nriqqaqaa vateeqana qiava quava
quttaa mwivauuma vahiananrove, tura.

(Aisaiaa 59:20-21)

²⁸ Iutaavanto Karaisira quara hia quttaa quave timwa kyeta Kotira nramwutaqa hi variarara fita, nkye mpo mwatanaahua Karaisira quara

qutaave qiaro. Qio haaru Kotiva Iutaa mwihua nai kyaama tora. Kotiva mwihua haivaqahuara riaiharo mwihuaravata mwia mwutukya vahira.

²⁹ Kotiva nte mwi mwatanaahua ntena kyaama tena mwihua kyugema nyatarerave tuvara tiro, mwiva hiama mwihua qaqlira kyero nraakiara mwihuara mpo vu nraato tuananro.

³⁰ Nkye mpo mwatanaahua nkye haaru Kotira qua nteqa kyohua variavarro nraakiara Iutaavanto Kotira qua nteqa kyaaraqaatairo Kotiva tuqasaa viro nkyiara po kye timwa nyate varira.

³¹ Kuua qarama kyero Kotiva nkyiara po kye timwa nyatairaqaataita Iutaavanto Kotira qua nteqaqita vi variara. Qio mwihua Kotira qua nteqaqita vivaro Kotiva nraakiara mwihuaravata po kye timwa nyataaananrove.

³² Ekyaa mwatani variahua Kotira qua nteqa kyaavarro mwia kyaara Kotiva ekyaa mwihua rupa taira. Mwihua rupa vita varivaqe nte mwihuara po kye timwa nyataankye timwa kyero mwitaa hiro.

Kotira nrutu tuaaheraare

³³ Oikye, Kotira kyuqe okyaravantove, Kotira vu nraatovantove, Kotiva ntapihi paahi hi inraikyavave, piqero veva veva mwutukyara virave. Tavave mwiva tukya hiani inraikyara ntapihiananrove? Tavave mwiva kyaipa varaani okyarara ntapihiananrove?

³⁴ Kotira mpukuqi mwitaama tiro:

Tavave Kotira vu nraatoqi vahi quara qio ntapihiananro?

Hiama qio mpovanto ntapihiananro.

Tavave Kotira qua mwaanra mwirro

aanra nraamwutaananro?

Hiama qio mpovanto mwitaa qiananro.

³⁵ Tavave Kotira mpo inraikya mwitairara rieqaro

Kotiva nai mwiananro?

Hia mpovanto mwia mpo inraikya mwirrave, tura.

(Aisaiaa 40:13)

³⁶ Kotiva nai ekyaa inraikya utu taivama variro. Kotiva variharora tiro, ekyaa inraikyavanto vahiqiro viro. Mwi inraikyava vahiqiro viqaro mwianima vahiro. Mwitaa hiraqe tire Kotira nrutu nraahu tuaaheraaqi ekyaa enta ekyaa enta quara. Qutaave.

12

Tire Kotira kyaiqa vara mwataananranra tura

¹ Ni kata pakyaa tuaavo, Kotiva tiriara nronraqama kyero po kye timwa timwatairara tina, nte kepukyaqama kyenama nkyiara mwitaama tina, Nkye Kotira kyaiqa nraahu vareqata nkye Kotira nraahu qamwata mwatarera utiqata, quara rukye mwintema kye, nkye qati variqata nkyeta vu nraato mwutukya mwamwantave Kotira mwiata. Nkye mwitaa hiqatama quitaagama nkye Kotira nrutu tuaaherevara.

² Hia mwataqaa variahua api nrohiantema kye nrohiata. Nkye api vu nraato tira qaqlira kyaivarro Kotiva nkyi su nyaato kyuqema nyataarive. Kotiva nkyi kyuqema nyatero nkyi qaraakya su nyaato kyuqera nyinrrata mwiaqaatai qiomaa Kotira kyakya hiani inraikyara varevara. Nkye mwitaama kye varaqi viqata kyuqe kyaiqa Kotiva qamwataani kyaiqara nraahu varaqi viqata nkye hia uqenraani kyaiqara vararaitita, nkye kepukyaqa hiani kyaiqara nraahu varevara.

³ Kotiva ni kyuqema mataihana nte nkyi kyaahaqa hiariva variqananra tina, nte nkyi kuaiqia kuaiqia mwitaama tina, Hia nkyetara tiqata, Nte kepukyavanto nronra vaisima varuquo qiata. Nkye mwitaama qiata, Kotiva

ni kyaahaqa hi varihananra tina, nte Kotirara riemwaqi viqana nte mpo kyaiqa mpo kyaiqa vararerave qjata.

4 Tire ntapihi kyaunananra. Vaisi mwamwanta vahirero kyaquve, kyaquve, mpo mwamwanta mpo mwamwantave, vaharo mwi mwamwantava kuaiqia kuaiqvavanto mpo kyaiqa mpo kyaiqa vare varira.

5 Mwia votima kye tire nraakye qora airi variqata kuaa mwamwanta votima kye varunana.

6 Kotiva tiri kyuqema timwa teqaro nai kepuuya mpo tiri timwhihata tire mponramwuvanto mpo kyaiqa varaarahua varurata nkye mponramwuvanto mpo kyaiqa varehuama varita.

Kotiva vaisi mpo, mpo kepuuya mwiqanro ni qua nraakye qora timwa nyiante qiariva, mwi vaisiva Kotirara kepuuyaqama kye riemwaqiro quaninra mwivauuma nraakye qora Kotira qua timwa nyianri.

7 Kotiva vaisi mpo, mpo kepuuya mwinranro mwi vaisiva nraakye qora kyaahaqa hiariva qutaaqama kyero kyaahaqa hiari. Kotiva vaisi mpo, mpo kepuuya mwinro mpo qua mpo qua okyara timwa nyiqira quante qiariva, mwi vaisiva mwi kyaiqara qutaaqama kyero varaqiro quari.

8 Kotiva vaisi mpo, mpo kepuuya mwinro nraakye qora kepuuyaqama nyatairata mwihua aanra kyuqe hiraqa quate qiariva, mwi vaisiva mwi kyaiqara qutaaqama kye varaari. Kotiva vaisi mpore ena vatena inraikyara tukyama kyera mpohuavata nyiante qiariva, mwi vaisiva qibaakyama kyero mwitaamaqiro quari. Nрутu vataa vaisivanto hia pupohairaro kyuqema kyero nai kyaiqa varaqiro quari. Mpore kyaahaqa hiari vaisiva hia ua viri ratero mpore kyaahaqa hiari. Mwiva kyuqe viri vatero qamwateqaro mpore kyaahaqa hiari.

9 Hia unraqama kye nkyeta henahuara tiri mwutukya nkyiara vaiho qjata. Nkyi nramwunaahuara nkyi mwutukya qutaaqama kye vahirata variata. Nkye uaqia hi kyaiqara mwoqa mwita kyuqe kyaiqa tuqara kye tutaata.

10 Nkye Karaisira nraaqiaraqama vita nkye qata vakyaa variqata nanrianra nanrianra mwutukya vahirata variata. Nkyeta sata sakyaa nyunra nyakyaa nyutu tuaahereqita quata.

11 Hia qoririhiro pupohairata kepuuyaqama kye kyaiqa varaata. Nkye Kotira kyaiqa vareqata tiri mwi kyaiqara qutaaqama kye varaataa iho timwa kyeta mwi kyaiqara varaata.

12 Nkye Karaisira vekya varivarano nkyi mwutukyaqitai kyuqe hi variata variata. Uaqia hiani entarave, muaanra vahiani entarave, nkye kepuuyaqama kye varivaro nkyi mwutukya qibaakyaya hirata qibaakyama kyeqata nrohita variata. Nkye ekya enta Kotirara aakyara nteqata variata.

13 Nkyi henahua hia mpo inraikya vataivata nkyeta vatera ntainra kye mwihuavata nyiata. Mponanyaahua nrivata kyuqema kye mwihuqqaa ntajikiyata.

14 Mpohua nkyi uaqiamma nyataivata hia Kotirara aakyara nteqata nkyiarivata uaqiamma nyataante qjata. Nkye Kotirara aakyara nteqata mwihua kyuqema nyataante qjata.

15 Qamwateqa vari nraakye qorahua varivata nkye mwihua kyapata qamwateqata variata. Ntateqata vari nraakye qorahua varivata nkye mwihua kyapata ntateqata variata.

16 Hia mpo qua mpo qua antua qua tiraitita, kuaa qua nraahu tiqata nanrianra nanrianra qamwateqata variata. Hia nkye tiqata, Tire nronra vaisi variqata hia qumina vaisivata variananrave tira qaqlira kyeta, nkye qamwateqata qumina nraakye qora kyapata variqi quata. Nkye nkyeta nyutu tuaahereqata ekya kyaiqa taqaurahuave tivora.

¹⁷ Mpowanto nkyi uaqiamama nyatairata nkye hia nai uaqiamama mwataata. Nraakye qoravanto mpo kyaiqa mpo kyaiqa kyuqe hirave tira, mwi kyaiqara nraahu nkyi varataata hirata varaqi quata.

¹⁸ Hia ntiquata. Mwaateraqama vari aanrava vahirera, nkye mwi aanranraqaa nraahu nrohiqata variata.

¹⁹ Ni nramwunnaa tuaavo. Nkyi uaqiamama nyataivata hia nkyiari uaqiamama nyataata. Nkye qaqa kyaivararo Kotira raraqa taariva mwihuaqi kyaiqa utuari. Kotira mpukuqi mwitaama tiro:

Ntenavanto uaqia hi kyaiqara utihua hiniqa hianinrave.

Ntenavanto mwihua nkyiari kyoqaa nyianinrave,
tura.

(Lo 32:35)

²⁰ Nkye mwi quara rieqatama taqaivararo nkyi nramwutaavanto kyara nraataa hirato varirata nkye mwia kyara mwiata. Mwia nramanri nraataa hirata mwia nramanri mwivaro nraanri.

Quttaaqama kye nkye mwitaa hivararo mwiva nai uaqia hi kyaiqara rieqaroma nkyi suqaa kyauruananro.

(Sindaun 25:21-22)

²¹ Uaqia hi kyaiqava nkyi nraatara kyaankyora. Nkye kyuqe kyaiqa varaqi viqatama uaqia hi kyaiqara nraatara kyaata.

13

Tire kamaninra qua riemwaqi quananranra tura

¹ Nkye ekyaa mwihua kamaninra qua riemwaqi viqata nrohiata. Kotiva hia qiove tiraro hiama qio kamaniva variananro. Kotiva qiove timwa kyero Kotiva kamaninra vataiharoma kamaniva variro.

² Mpowanto kamaninra qua nteqa kyaariva, mwiva Kotiva nronraqama taira quama nteqa kyaananro. Mwi quara nteqa kyairaro Kotivavata mwi vaisiraqaa qua vataananro.

³ Kyogema kyero nrohi variari vaisiva hiama kamaninra nraatu aatu hiananro. Uaqia hi kyaiqara utuani vaisivama kamaninra nraatu aatu hiananro. Nkye hia kamaninra nraatu aatu hiraitita, aanra kyuqeraqaa nrohirerave tivararo kamaniva nkyi qamwata nyataari.

⁴ Kamaniva nkyi kyaahaqa hirata nkye kyogema variate tiro, Kotiva mwia nronraqama kyaiharoma variro. Nkye uaqia hi kyaiqara utiqata mwia kyaarama nkye kamaninra nraatu aatu hivara. Mwiva kepukyavanto variqaro nkyita uaqia hi kyaiqara kyaara qiomma nkyita ntuquutananro. Uaqia hi kyaiqara uti vaisihua ntuquutarive tiro, Kotiva kamaninra nronraqama kyaira.

⁵ Mwianra rieqatama kamaninra qua riemwaqi viqatama nrohiata. Hia nkye kamaniva tiri ntuquutuankyo titi mwianra rieqata mwia qua riemwaqita quata. Nkye tiqata, Tire Kotira qua rieqata mwia aanraqaa nrohirerave, timwa kyeta kamaninra quavata riemwaqita quata.

⁶ Mwi quara rieqatama nkye ntapihi kyeta taakisiga hiata. Kotiva mwi kyaiqara varaante tiharo kamaniva taakisiga vare varira.

⁷ Kamaniva nkyiara vaisi taakisive, mwata taakisive, mpo taakisive, kyaate tirata mwi taakisira ntapihi kyeta kyaata. Kamaniva tiqaro, Nkye ni qua riemwaqita nrohiate, tirera, nkye mwi quara riemwaqita quata. Kamaninra kyaiqa vaisi mpovanto nronra vaisi varirera, nkye mwianra nronra vaisive qiatia.

Nkye mpo huara mwutukya vahirata variqi quate tura

⁸ Nkye mpo inraikya mpohuaqitai vareva qati nkyiqa vahiarivaarave. Nkyeta qata vakyaahuara mwutukya vateva, mwiva nraahu mpo inraikya mpohuaqitai varaavarro qati nkyiqa vahintema kyero vahiarive. Nai hena

vaisiara mwutukya vataiva, mwiva Kotiva vato quara qio riemwaqiro vi varivama variro.

⁹ Kotiva timwa to quava vahirero hia mpore nraata vaati ntuge hiante, hia mpore ru kyaante, hia mpura varaante, hia mpova hi inraikyaraara i mwutukya ntuarive, ekyaa mwi quavavata mpo quavantovata mwaa quara utaqima vahiro: Inanra i mwutukya vahintema kyero i nramwunaanranravata i mwutukya vahiari.

¹⁰ Nai nramwunaanranra mwutukya vahiari vaisiva hiama mwia uaqiamma mwataananro. Nai nramwunaanranra mwutukya vahiari vaisiva ntapihi kyeroma Kotiva timwa to quara ekyaa quama riemwaqiro vi variananro.

Tire ntapihi kyeqata nrohiara

¹¹ Nkye mwaa entarara rieqatama nanrianra nanrianra mwutukya vahirata nrohiata. Nkye vaiteraqitai sivi entavama nri ntero. Kotiva tiri huvantu kyero tivitaaninranra haaru tire qaraakyaqama kye Iesusirara qutaave tiqata riemwaqi quavarava mwi entava mate mwaa qio mpoqiatava vainima vahiro.

¹² Enta hiva taiqarerera iharo qio qaata virera utiho. Mwianra rieqatama tire entaqi variqata varaqi quana kyaiqara qaqira kyaara. Kyai tire ntuvahafrqaanaanra huru kyaamwu voti hira varaa kyeta tutaara.

¹³ Nrivaqe tire aannra kyuqeraga nrohiqata ntuvahairaga nrohuranntema kye kyuqema kye nrohiara.

Tire uera ntaare timwa kyeta ntuvantuama vita variqata uera nramanri nramwaqi quarora. Tire mpo nraakyeve mpo qoravata api nrohiqata mwi inraikyaraara rieqata api uaqiamma kye nte tutiqe hiarora. Tire inronra hiqata ntaquarora. Tire mpova hiani inraikyaraara vairiqa hita kyaruntuarora.

¹⁴ Nkye tiri vunyaa vaisi Iesusi Karaisirara nronraqama kye riemwaqi vivaro mwiva nkyl huru kaike votima kyero variari. Nkyi su nyaatovanto uaquia hi kyaiqara utuaninranra riaaninra qaqira kyeta hia mwianra riemwaqi nrohiata.

14

Hia ena qata vakyaa kyaiqa pupitaante

¹ Nkye taqaivaro nkyl sata sakyaa mpovanto hia kepukyaqama kyero Iesusira vataqiro vi varirera, nkye mwi vaisira hia qaqira kyaata. Nkye mwi vaisirara tirivata nrumu variante qiata. Mwitaa timwa kyeta hia qumina mwiva vu nraato tutaani quara kyaara inronra hiata.

² Iesusira nraaqiara mpovanto tiqaro, Nte qiomma ekyaa kyara nraaninrave, tiharo mpovanto Iesusirara hia kepukyaqa hiva tiqaro, Nte haquruanira nraahu nrena kepukya kyara hia nranrenrave, tiro.

³ Ekyaa kyara nraanri vaisiva hiama mpova hia ekyaa kyara nraani vaisirara uaquia hi vaisivave qiaro. Qaiqaa hia ekyaa kyara nraani vaisiva ekyaa kyara nraani vaisira mwianra hia uaquia hi vaisivave qiaro. Kotiva mwitanahuaqama huvantu kyero sitairara tita, mwitanahua hia mwitaa qiata.

⁴ E ta vaisiva variqararave e mpore kyaiqa vaisiara e uaqiamma kyera kyaiqa varaaravave qiaro? Mwia hia i kyaiqave. Mwiaqaa ntakikyi vaisira nai mwia kyaiqave. Mwivama tiqaro ni kyaiqa vaisivanto kepukyaqama kyero siviro variho hia kepukyaqama kyero siviro variho timwa kyero Iesusiva mwia kyaahaqa iharora tiro, mwiva quataa siviro variananro.

5 Iesusira nraaqiara mpovanto tiqaro, Mwi entara nronra enta mwaanra entave mwi entara qumina entave, timwaqiro viharo Iesusira nraaqiara mpovanto tiqaro, Qaqao, ekyaa enta mwiva kuaa qarama vaiho, timwaqiro viro. Qio nkye ekyaa mwi quara rieqatama nkyeta su nyaato mwutukyaqitai tukyama kye nanra quave quataa qua vahianinra mwi quara riemwaqi quata.

6 Vaisi mpovanto mwi entarara nronra entave tiva, mwiva Iesusira nrutu tuaahereqaroma mwitaa tiro. Mpovanto mpo kyara nreqanro mwiva Iesusira nrutuma tuaaherero. Mwiva kyara mwianra Iesusirara kyuqeve timwa kyero nre varira. Mpovanto mwi kyarara nraanrinro Kotiva qiankyorave timwa kyero hia nraiva, mwivavata Iesusira nrutuma tuaaherero. Mwivavata Iesusirara kyuqeve nraahu tira.

7 Hia tiriqitairo mpovanto nai qati varianinranra nina kyaqave tira. Mwiva hia nai qutuaninranra nina kyaqave tira.

8 Tire qati variqi quarera, mwia Karaisira kyaqama vahiro. Tire qutu quarera, mwivavata nai Karaisira kyaqia nraahuma vahiro. Mwianra rieqata tire qati varitave, qutitave, mwia tire Karaisiranivanto nraahuma varita.

9 Karaisiva nte nronravanto qati varihuaqaavata, qutu vihuqaavata, ntaqikyiqina quankye timwa kyero, mwianra rieqaro mwiva uro qutu viro mwiqitairo qati siviro varira.

10 Mwianra rieqarama e nanraqamave ena qata kyaqia tukya hiaro? Nanraqamave e mwia uaqima mwataaro? Nraakiara Kotiva ko qiani entara tire ekyaa mwihua mwia vuqaa sivita variararo mwiva tiri tukya hiananrove.

11 Kotira mpukuji mwitaama tiro:

Nte qati variqi uvvara tina, nte mwaa quarama tuqo.

Nraakiara ekyaa nraakye qora ni puqaa variqata

tori kyaataa ntaqantaate qivarave.

Mwihua tori kyaata ntaqantaate varita tiqata,

Qutaama e Kotiva ekyaa enta variaravave tivarave, tura. (*Aisiaaa 45:23*)

12 Tire ekyaa mwihua kuaiqia kuaiqiyavanto Kotira vuqaa variqata ekyaa tetu kyaiqa varaananranra timwa qovara hiananrave.

Hia mpo inraikya utu kyairaro i qatavanto qora kyaiqaqi tumu ntuaari

13 Mwi quara rieqatama tire mpohua kyaiqa taqeta tukyama kye uaqia hi kyaiqarave qiarora. Mwi quara qaqla kye mwataama qia. Ni katavanto nte utuaninra taqero mwivavata uaqia hi kyaiqara utuankyorave, kyai nte kyuqe kyaiqa nraahu varaankye, qia.

14 Nte Iesusiravata variqana mwaa quara quataaqama kye riaura. Ekyaa kyara vaharo hia mpo kyaravanto Kotira vuqaa uaqia hirave. (Tire ekyaa kyara nraanranro Kotiva hiama tiriara qiananro.) Mwi quava vahana nte mpo quavata tirera. Vaisi mpovanto nai riemwa kyero tiqaro, Mwi kyarara nrena Kotira qua nteqa kyaankyorave qiariva, mwi vaisiva mwitaama kyero riero mwi kyarara nrainrenra, mwiva mwi kyarara nreqaro Kotira qua nteqa kyaananrove.

15 Nkye mpo kyara nre varivaro nkyi sata mpovanto nkyiara tiqaro, Kotiva qao ti kyarara hia nraate, tirata nkye qati nraahu mwi kyarara nre varivaro mwiva nkyi sata mwia vara uaqima kyaaninra nkye hia kyuqema kyeta varivaro nkyi mwutukyavanto hiama nkyi satara vahiananro. Karaisiva nkyi sata mwianravata rieqaro qutu vurara tita, nkye apiqama kye variqata nkyeta kyara mwiaqo mwia vara uaqima kyevora.

16 Mwianra rieqatama nkye ekyaa kyara nrehua variqatavata nkyeta qataro rieqata hia ekyaa kyara nraata. Nkye mwitaa hivaro mwiva nkyiara uaqia hi kyaqiara utuavo qiankyora.

17 Kotiva tiri ntaqikyi variva, mwiva tire nramanriva kyarave nraananra, mwianra mwiva hia nronraqama kyero riero. Tire avuqavuma kye nrohi varuraro Kotira mwanraquravanto tiri kyaahaqa ihata tiri mwutukya qilhaakyama vahata qamwateqa varunana, mwianrama Kotiva nronraqama kyero riero.

18 Vaisivanto mwitaama kyero nrohiqaro Karaisira kyaiqa varaqiro viraro Kotiva mwia qamwata mwatairata nraakye qoravantovata mwianra kyuqe vaisive tivara.

19 Mwinra rieqatama mpo inraikya mpo inraikyavanto tiri mwutukya qilhaakyaa hianinra timwianinra, mwi kyaiqara nraahu varaqi viqata nai kyaahaqa hi nai kyaahaqa hiqata variara.

20 Tire kyara nraananra nraahu riemwaqita quararo Kotira kyaiqavanto uaqima quankyyora. Tire ekyaa kyara qiomaa nraananra. Tire ekyaa kyara nreqatavata tire mwitaama nraanrava tiri qata vakya mpo uaqima mwataankyo tita, tire hia mpo kyara nraanra.

21 Nkyi sata mpovanto tumu ntuankyo tita nkye quarave, uainive, mpo kyarave, hia nraata. Nkye mwitaa hiqata kyuqe aanraqaama vivara.

22 Nkye mwi kyarara qiomaa nraanranro hiama tiriqaa qua vahiananrove tivera, mwia nkye hia mpohuavata timwa nyinraitita, qati kyaivarao mwi inraikyava Kotikya nkyitani vahiaro. Vaisivanto nte mwi kyaiqara varaairo hiama ni kyauruuanrove timwa kyeqaro varaqiro quariva qamwateqaro variananrove.

23 Vaisi mpovanto mpo kyara nranrenra hiro tiqaro, Nte mwaa kyarara nraanrinro Kotiva nianra qiananrove iho, hiave qiananrove? timwa kyero nraanriva, mwiva Kotira vuqaa uaqia hiraro mwiaqaa qua vahiananrove. Tire mpo kyaiqa vararerera hitave, mpo kyara nranrenra hitave tire tiqata, Tire mwaa kyaiqara vareta mwaa kyarara nreta hiararo Kotiva tiriqaa qua vataaananrove, hiave qua vataaananrove, timwa kyeta mwitaa hiqata Kotira qua nteqa kyaararo tiriqaa quama vahiananro.

15

Mwataama kye mpohua kepuuyaqama nyataate tura

1 Tire Kotira aanraqaa kepuuyaqama kye nrohi variarahu mpolua Kotira aanraqaa hia kyuqema kye nrohi varihua kyaahaqa hiara. Tire tetu kyuqema kye variqi quananranra nraahu riemwaqi quarora.

2 Tire kuaqia kuaqiaavanto tetu qata vakyaara rieqata mwihua kyuqemajita quarata mwihua kepuuyaqama vita Kotira aanraqaa kyuqema kye nrohiata.

3 Karaisivavata hia nai kyakya hi kyaiqara varora. Karaisiva Kotira kyakya hi kyaiqara nraahu varora. Kotira mpukuqi Karaisiva Kotirara mwitaama tiro:

Mwihua iara uaqia hi quara qiava niqaa tumu ntihana
ntema mwia varauqo, tura.

(Ihi 69:9)

4 Haaru Kotira mpukuqi qara ntumwa to quava ekyaa mwi quava tiri kyaahaqa hiarive tita, qara ntumwa tora. Tire mwi quara rieqatama hia tiri pupohairaqe kepuuyaqama kye Kotira aanraqaa nrohiqatama nyaamwusairo tumu tiri tivitaaninra vekya variananra.

5 Nkye hia qoriri hiraitita kepuuyaqama kye nrohiate tiro, Kotiva nkyi kyaahaqa hi variro. Qio nte mwia nraanraanrinro mwiva nkyi kyaahaqa

hirata nkye Iesusi Karaisiva nrohintema kye nrohiqata nkyevata kuaa qua nraahu timwaqi quate.

⁶ Nkye kuaa qua tita kuaa vu nraato vateta Kotira nrutu tuaaheraqi quata. Nkye Iesusi Karaisira tiri vunyaa vaisi mwia qora Kotira nrutu tuaaheraqi quata.

Karaisira quavanto mpo mwatanaahuarayata vahirama

⁷ Karaisiva nkyiara qamwateqaro nkyi sitaintema kyeta nkyevata nkyeta henahua sita kye vateta qamwateqata kuaaqi varivaro Kotira nrutuvanto virito vahiar.

⁸ Nte nkyi timwa nyinrenra. Kotiva kyaquu nriqiqaa vatero Iutaa haivaqahuara tu quava qutaa mwivau vahiarive tiro, Karaisiva Iutaa kyaahaqa hirero mwatani tuminro.

⁹ Mpo mwatanaa mpo mwatanaahua utaqaa variqana i nrutu tuaaherarerave.

Nte ihi tiqana i nrutu tuaaherarerave, tura.

(*2 Samueri 22:50*)

¹⁰ Kotira mpukuqi qaiqaavata tiqaro,
Nkye mpo mwatanaa mpo mwatanaahua Kotiva
Iutaa nraaky e qorara nainive tihua, mwihua kyapata
kuaaqi varita qamwateqata variate, tura.

(*Lo 32:43*)

¹¹ Kotira mpukuqi qaiqaa mpoqiaavata tiqaro:
Nkye ekyaa mpo mwatanaa mpo mwatanaahua
nkyeta nronra vaisi mwia nrutu tuaaheraate.

Mwata maata vahintema varihua
mwia nrutu nraahu tuaaheraate, tura.

(*Ihi 117:1*)

¹² Aisaiaava qaiqaa mpoqiaavata nraahu tiqaro,
Ntevitura qora Iesira okyaraqitairo
vaisi mpo qovara hiananrove.

Mwi vaisiva nronraqama viro ekyaa mpo mwatanaa
mpo mwatanaahuaqaa ntaqikyi varirata
mwihua mwiaqaa vuntuvi varita tiqata,
Mwiva tiri kyaahaqa hiraqe mwivavata uro variaravama
variho, tiqatama mwia vekya varivarave, tura.

(*Aisaiaa 11:10*)

¹³ Qio Kotiva Karaisira nronraqama kyairara tita, nkye mwi vaisirara tiqata, Karaisiva tiri kyaahaqa hiraqe mwivavata uro variaravama variho, ti variara. Nkye Karaisirara riemwaqi vivaro Kotiva nkyi kyaahaqa hi variararo nkyi mwutukya qihakya hi varirata kyuqema kye variqata nrohiata. Kotira mwanraquravanto nkyi kepukya nyinrata nkye Karaisiravata kuaaqi vari entara vekya variata.

Poruva mpo mwatanaahuaqi kyaiqa varorara tura

¹⁴ Ni kata pakyaa tuaavo, nte nkye variara mwianra ntenga riemwa kyena nte nkyiara kyuqe hiahuavema tuqo. Nkye aanra kyuqe hiraqa nrohia okyarara mwia ntapihima kyaavo. Nkye qiomma nai kyaahaqa hi nai kyaahaqa hivarave tuqo.

¹⁵ Nte mwaa qara ntumwa tauraqi kepukyaqama kyenama nkyiara tuqo. Hia nte aatu hiqana mwi quara qara ntumwa tauqo. Kotiva ni kyuqema mateqaro

¹⁶ nianra e Iesusi Karaisira kyaiqa vaisi variqara mpo mwatanaahua kyaahaqa hiante tihanana tina, nte hia aatu hiraitina mwitata tina. Kotiva qamwateqaro variarive tiro, Kotira nraamwuqi kyaiqa varai vaisiva quara

ru kyero mwintema kye ntevata Kotiva nkyiara qamwateqaro variarive tina, nte nkyi Kotira qua kyuqe mwakyaaka timwa nyi varura. Nte mwi quara nkyi timwa nyuqanro Kotira mwanraquravanto nkyi kyuqema kyaiharo Kotiva nkyiara qamwateqaro variro.

17 Nte Karaisiravata taaquaivi variqana nte Kotirani vara mwatau kyaiqarara rieqanama nte ntena mwahuta tuquo.

18 Hia mwi kyaiqara ntenanraa varaurara rieqana ntena mwahuta tuquo. Karaisiva ni kyaahaqa ihana varaurara rieqanama ntena mwahuta ti varuquo. Karaisiva ni kyaahaqa hi varihana nte Karaisira qua timwaqviqana Karaisira kyaiqavata varaqi vuqata mwiaqatai mpo mwatanaa mpo mwatanaa Kotira qua vataqi vi variara.

19 Kotira mwanraquravanto ni kepukyaqama kyaihana nte nronra kyaiqa, hia taqaa kyaiqara varaqi viqanama mwi quara timwa nyiqi vi varura. Nte Ierusaremisaina toharama kye mpo mwatukya mpo mwatukya ekyaa Karaisira qua nraakye qora timwa nyiqina vuva mwatukya mpo Iririkaamini nri ntaurave.

20 Nte tiqana kyai nte Karaisira qua hia rie mwatanaahua vari mwatukyaraqi nröhiqana timwa nyiankye turave. Vaisi mpovanto nraante Karaisira qua timwa nyiani mwatukyaraqi nte qumina qaiqaa timwa nyiankyorave timwa kyena, qaraakya nraakye qora hia Karaisira qua riähua uro timwa nyinrenra uti varurave.

21 Nte Kotira mpukuqi tintema kye tirera.

Kotira mpukuqi mwitaama tiro:

Hia timwa nyihua, mwihua qioma

Kotira kyaiqa taqevarave.

Kotira qua hia riehua, mwihua mwi quara

ntapihi kye rievarave, tura.

(Aisaiaa 52:15)

Poruva Romini quaninranra vu nraato tu kye vatora

22 Nte qaraakya mwatanaahua mwi quara timwa nyiqana mpo enta mpo enta nkyi uro taqaankye tuqaro mwi kyaiqava ni ntavaaqavu taihana nte hia nkyi uro taqena.

23 Airi ihiara nte nkyi taqarerera uti varura. Mate ekyaa mwi mwatukyaraqi kyaiqa taiqa kyenanra tina, nte qioma uro nkyi taqaanira.

24 Nte mwata mpo Sipeninianra viqanama uro nkyivata vari kyenama quaninra. Nte nkyi kyapata uro variariro ni mutukyavanto kyuqe hiraqe variarita nkye ni kyaahaqa hiqata ni pitaqita Sipeninianra qua aanranra ni naamutaivaqe nte quaninra.

25 Mate nte hiama nkyi taqarerera quaninra. Mate nte Ierusaremini Kotira nraakye qora mwini variahua kyaahaqa hirera virera.

26 Jesusira nraaqiara Masentoniaani variahua vata Akaiaani variahua vata munima ntuvantuaama kye tiqata kyai tire Jesusira nraakye qora vehiqa hiahua Ierusaremini variahua kyaahaqa hiare timwa kye mwihua ntuvantuaama taa munimanra nte varaqina uro mwihua nyinrenrave.

27 Mwihua qamwateqata mwi munimanra ntuvantua hiataa ihata ntuvantuaama taarave. Iutaavanto mpo mwatanaahua nyitorara rieqata mwihua nkyiari nyita. Haaru Iutaavanto Ierusaremisaita Jesusira qua mwanraqura kyaahaqa hianinra nyunranra tita, mate qioma mpo mwatanaa mwihua mwianra rieqata nkyiarivata mwamwanta kyaahaqa hianinra kyaahaqa hianinra nyivara.

28 Qio nte mwihua ntuvantuaama taa munimanra varaqina uro nyina ekyaa mwi kyaiqara taiqa kyena nte mwiaqatai Sipenini virera. Mwini- anra viqana uro nkyivata vari kyena virera.

29 Nte ntapihi kyauqo. Nte uro nkyi kyapata variariro Karaisiva mpoqia-vata nkyi kyuqema nyatairata nkye kyuqema varivarave.

30 Ni kata pakyaa tuaavo, nte tiri vunyaa vaisi Iesusi Karaisira nrutuara rieqanama, nte Kotira mwanaraquravanto tiriara mwutukya vatairara rieqanama, nte nkyiara kepukyaqama kyena mwitaama tina, Nte Kotirara aakyara nte variarita nkyevata nianra rieqatama Kotirara aakyara nteqata variate, tuqo.

31 Nkye Kotirara aakyara nte varivaqe nte Ierusaremini quarita Iutaavanto Iesusira qua hia riaahua, mwihua hia ni uaqjama mataivaque nte Iesusira nraaqiara mwini variahua qio kyaahaqa hiarita mwihua ni kyaiqara qamwataata.

32 Nte mwitaa hiariro Kotiva nkye hinani qio quante tirera, ni mutukyaqitairo kyuqe hiraqe nte nkyi kyapata uro varianinra.

33 Kotiva mwutukya qishaakya hi varira mwia okyaravanto varivara tiro, mwiva nkyivata variqiro viraro nkyi mwutukyavanto qishaakya hi varirata variata. Qutaave.

16

Poruva Romini varuhua qua mwantora

1 Nte nraakyevaa mpo Pipira titaariro mwiva nkye hinani uro variari. Mwi nraakyeva tiri tinrakyaavama variro. Mwiva mwatukya mpo Senkiriqa variqaro Iesusira nraaqiaranramwu kyaahaqa hi vari nraakyevama variro.

2 Mwi nraakyeva nkye varinani uro ntairata nkye Iesusira nraaqiara vari-ahuara tita, kyuqema kyema mwi nraakyera qamwata mwateta kyuqema kye vita vataata. Mwi nraakyeva airi nraakte qoravata nivata kyaahaqa hi varirara tita, nkye mwia kyaahaqa viharo mwiva qio variari.

3 Nte Pirisiraaravata, mwia vaati Akuirearavata, qua mwantauqo. Nte mwitanahuavata Iesusi Karaisira kyaiqa kuaa mwia varaqita vunanrama.

4 Haaru mwitanahuua ni kyaahaqa hijata mwitanahuua hia nkyiari mwamwantara nronraqama kyeta riora. Hia nte nraahuavauma mwihuara qamwatena. Ekyaa mpo mwatanahuua Iesusira nraaqiara mpo mwatani mpo mwatani variahua, mwihuavata mwitanahuura qamwate variara.

5 Iesusira nraaqiara mponramwuvanto mwitanahuua nraamwuqi ntua-vautua hiahua, mwihuavatama nte qua nyantauqo.

Nkye ni toti kyuqera Epinitasira qua mwantaura timwa mwiata. Esiaaqi-tairo mwi vaisiva nraante vuniqama kyero Iesusira nraaqiaraqama vura.

6 Mariaara qua mwantauravata timwa mwiata. Mwi nraakyeva nkyiari-ave tiro, toqaamwu tu kyaiqa varaira.

7 Nte Antaronaikaasikya Iuniaasikya qua nyantaura timwa nyiate. Mwi-tanahuua ni votima kye Iutaatana variara. Mwitanahuua karavuqi nivatama kye variqi vurama. Iesusiva nronraqama kyai vaisihua mwitananra vaisi kyuqe hiatanahuave ti variara. Mwitanahuua nraante Iesusira nraaqiaraqama quavana nte mwihuua nyaakiara Iesusira nraaqiaraqama vura.

8 Nkye Ampirietaaasira qua mwantaura timwa mwiata. Mwi vaisiva Karaisikyantiri varirara tiro, ni mutukyavanto mwianra vaihana varura.

9 Nkye Epaaninra qua mwantaura timwa mwiata. Mwiva tiri nraant-tamwa kyero Karaisira kyaiqa vare varira. Sitekisiravata qua mwantaura timwa mwiata. Mwiva ni toti kyuqevama variro.

10 Nkye Aperisira qua mwantaura timwa mwiata. Tire taqauraro mwiva Karaisirara riemwaqiro viharo hia pupohai vaisivama variro. Nkye Arisitopuraasira nraamwuqi variahuvata qua nyantaura timwa nyiata.

11 Nkye Herotioninra qua mwantaura timwa mwiata. Mwivavata ni mwatanaama variro.

Nasisasira nraamwuqi Jesusira nraaqiara variahuavata qua nyantaura timwa nyiata.

12 Nraakyе Taraipinaanravata Taraiposaaravata qua mwantaura timwa nyiata. Mwitanahua Karaisira kyaiqa kyuqema kye vare variara. Pesisiravata qua mwantaura timwa mwiata. Mwi nraakyevavata kyuqema kyero Karaisira kyaiqa vare varira.

13 Rupaasiravata qua mwantaura timwa mwiata. Mwiva kyuqema kyero Karaisira vataqiro vi varira. Mwia nronravata qua mwantaura timwa mwiata. Mwiva ni ntova votima kyero niqaa ntaqikyiqiro vira.

14 Nkye Asinkiritasirave, Pirikonrave, Hemaasirave, Pataropaasirave, Hemisirave, mwihua qua nyantaura timwa nyiata. Mwinramwuhua kyapata variahuavata qua nyantaura timwa nyiata.

15 Nkye Pirorokaasiravata, Iuriaaravata, Neriaasiravata mwia nruravata, Orimpaasiravata, ekyaa mwihua kyapata variqata Kotira qua rie variahuavata, nte qua mwantaura timwa nyiata.

16 Nkye qua mwanteqata kyuqema kye kyauquvata nyiqi quata. Mwaisaita ekyaa Jesusira nraaqiaravanto nkyiara rieqata nkyi qua mwantaavo.

Poruva ekyara qua tura

17 Ni kata pakyaa tuaavo, nte nkyiara rauriqata variate qiani quara ntapihi kye riaate. Vaisi imponramwuvanto api qua tivata nkye ntainra vita mpo qua mpo qua rieta mpo aanraqaa quarorave titi, mwihuara rauriqata variata. Mwi vaisihua tire nkyi timwa nyuna quara qaqira kyeta mpo qua nkyi timwa nyi variarave. Nkye mwihua nyaatu nyianrato variata.

18 Mwitaama kye qua ti varia vaisihua hia tiri vunyaa vaisi Jesusira kyaiqa vare variara. Mwihuara nkyiari kyakya hi kyaiqara vare variara. Mwihuara qamwata kye vateta qiaqyaa hi quara kyuqema kye ti variavata qumina vaisivanto mwihua unra quara quutaa quave ti variara.

19 Ekyahua riavata nkye kepuqyagama kye Jesusira qua riemwaqita vi variara nte mwianra rieqana nte nkyiara qamwate varura. Nkye mpo kyaiqa mpo kyaiqa kyuqe hianinranra nraahu riemwaqi vigata hia uaquia hi kyaiqarara riaivage nte nkyiara kyuqema hita hiavo qianinra.

20 Kotiva mwutukya qihakya hi varira mwia okyaravanto varirara tiro, tiri mwutukyavanto qihakya hi varihata varita. Pataqia vari kyero Kotiva nkyi kyaahaqa hirata nkye qioma Saataaninra nraatara kyeta varivara. Tiri vunyaa vaisi Jesusiva nkyi kyuqemapiro virata nkye qio variata.

21 Timotiva nivatama kyero variqaro kyaiqa varaqiro vi variva, mwiva nkyi qua mwantero. Ni mwatanaaa Iuttaa vaisinramwu Rusiaasivavata, Iesonivavata, Sosipataavavata, nkyi qua nyanteta.

22 Nte Tetiasiva Porurani mwaa quara qara ntumwa mwataura. Nte Jesusira qua riauvama, ntevata nkyi qua mwantena.

23 Kaiasivavata nkyi qua mwantero. Nte Poruva mwia nraamwuqi varuvama. Mwia nraamwuqi Jesusira nraaqiaranramwu ntuvantua hiara. Erasitasivavata nkyi qua mwantero. Mwiva mwatukya nronra mwaaqi variqaro mwaaqinaa munimaqaa ntaqikyti vari vaisivama variro. Tiri qatavaton Kuotasivavata nkyi qua mwantero.

24 Tiri vunyaa vaisi Jesusiva nkyi ekyaa mwihua kyuqema nyataari. Quataave.

Poruva Kotira nrutu tuaahereqaro tura

25 Nrivate Kotira nrutu tuaaheraara. Nte Jesusira Karaisira qua nkyi timwa nyuqata nkye mwianra kepuqyagama kye riemwaqi vi variara

qioma Kotiva nkyi kepuqyaqama nyataananro. Mwi quava haaru mpua-haama kyero uqeta viro vahurama.

²⁶ Mwaa entara mwi quava qoqaa qovarama viro vahiro. Poropeti vaisinramwuvanto mwi quara qovarama kyaavaro Kotiva ekyaa enta variqiro vi variva tiqaro, Mwi quara ekyaa mpo mwatanaa mpo mwatanaa timwa nyivata mwihua mwi quarara qutaave timwa kye riemwaqita quate, tira.

²⁷ Iesusi Karaisiva tiri vunyaa vaisivanto varihata tire mwia nraaqiara varurahuara tita, nrivaqe Kotira nrutu tuaaheraara. Kotiva kuaikuvanto ekyaa okyara ntapihivama variro. Qutaaqama kyenama tuqo.

1 KORINTI

Poruva Korintiqinaahuani hoqarenaa qara vara kyora

Iesusira vara sivuma kyovaro nyaamwuni uro varuvaro 25 ihive 30 ihive nritarovaro Poruva mwaa quara qara ntumwa tora. Mwi entara Korinti mwatukya nronra vahuvaro Poruva nraante mwi mwatukyaraqinaahua Karaisira qua timwa nyuvata mwihuaqitai mponramwuvanto Iesusira nraaqiaraqama vita varura. Mwihua Iesusira nraaqiaraqama vita variqi viqa ínronra hita nkyiariara nkyiariara ntainra vita variqata hia kyuqema kyeta Karaisira qua riemwaqi vi varuvarora tiro, Poruva mwaa quara qara ntumwa tora.

1-2 Nte Poruva, Kotiva nai kyakya hiraqa ni naanrama kyero ni nronraqama kyaithana nte Iesusi Karaisira qua nraakyte qora timwa nyi varuvama varima. Nkye Kotira nraakyte qora Korintiqinaalua variavata tiretana tiri tiqata vakyaa Sositenisikyantirima mwaa quara qara ntumwa teta.

Nkye hia uaqia hi kyaiqara utiraitita Kotira nraakyte qora kyuqeheu variate tiro, Kotiva nkyi nyaanrama taiharo Iesusi Karaisiva nkyi kyuqema nyataihata nkye Kotiranivanto variara. Ekyaa Kotira nraakyte qora Iesusi Karaisira nrutu nte variahua mpoqi mpoqi variavaro Iesusi Karaisiva mwihuaqaavata nkyiqaavata ntaqikiyiqiro vi varira.

3 Tiri tiqova Kotivavata, tiri vunyaa vaisi Iesusi Karaisivavata, nkyi kyuqema nyatairaro nkyi mwutukyajitairo qihaakya hirata variata.

Poruva Kotirara kyuqeve tu quara

4 Kotiva Iesusi Karaisira kyaiqara rieqaro nkyiara po tiro nkyi kyuqema nyataira mwianra rieqanama nte Kotirara kyuqeve tina.

5-6 Tire Karaisira qua nkyi timwa nyunrata nkye kepuuyaqama kyeqata mwi quara riemwaqi viqata Karaisiravata variarara tiro, Kotiva nkyi kyaahqa ihata nkye kyuqe qua, mpo qua mpo qua okyara qio ntapihita nkye Karaisira qua vutukye timwa nyilhua variara.

7 Nkye mwitaa hia nraakyte qorahua variahua tita, nkye tiri vunyaa vaisi Iesusi Karaisira veqya variqata nkye qamwateqa mwiva qovara hianinranra taqeqata variara. Nkye mwia veqya variavaro Kotiva nkyiara kyuqe kyaiqa nraahu varaae tiro, Kotiva nai kepuuya mpo kepuuya mpo kepuuya hia mpoqia eqaraitiro, ekyaa kepuuya nkyi nyinra.

8 Tiri vunyaa vaisivanto Iesusi Karaisiva qovara hian entaraqaa hia nkyiqa qua vahirata nkye mwi entaraqaa kyuqema kye variate tiro, Karaisiva nkyi kyaahqa hi varirata nkyi hia pupohairata aanra kyuqeraqaa variqi vita uro taiqa kyevara.

9 Tiriara mwihua Kotira mwaqqi Iesusi Karaisira tiri vunyaa vaisivata kuaaqi taaqauvi variate tiro, Kotiva tiri tinraanrainrama. Kotiva tiri tinraanrama taihata tire qiona Kotirara mwutukya qihaakya hiraqe variqi quananra.

Nkye ntainra vita variqata mpo qua mpo qua tivorave tura

10 Ni kata pakyaa tuaavo, tiri vunyaa vaisi Iesusi Karaisiva ni nronraqama kyaivara tina, nte nkyiara poma tuqo. Nkye ntainra vivorave nkye kuaa qua nraahu timwaqi viqata kuaa qua mwianra nraahu eo qjata. Nkye kuaaqi variqata kuaa qua riemwaqi viqata Kotira kyaiqa kuaana variqata varaqi quata.

¹¹ Ni kata pakyaa tuaavo, nraakye mpovanto mwia nrutu Koroiva varihata mwia nraamwuqi variahua ni timwa mpiqata nkyiara inronra hiqata variavo qiavana riaura.

¹² Mwihua nkyiara mwitaama tita. Nkye mpo hiahua tiqata, Tire Porura vataqita vurahuave, qiavata mpo hiahua tiqata, Tire Aporosira vataqi vurahuave, qiavata mpo hiahua, Pitaara vataqi vurahuave, qiavata mpo hiahua, Karaisira vataqita vurahuave, ti variavo qiavana riaurave.

¹³ Qikye, nkye mwitaa tiqata qiove Karaisira utaqaa tukyama kye hini hini varevara? Qaqa, nkye hiama qio mwitaa hivara. Nkyiara rieqata ni Porura kyatariqaa ru kye hiritorave iho? Nkye nramanri vareqata ni Porura nrutuara rieqata nramanri varaarave iho? Qaqa, hia nkye mwitaa hiarave.

¹⁴ Nte nkyigitaina vaisi taaratana nraahu nramanri nyunrave. Nte Kirisipaasiravata Kaisiravata nraahu nramanri nyunrave. Nte hia airi vaisi nramanri nyinraitina, vaisi taaratana nraahu nramanri nyunranra rieqana Kotirara kyugeve tuquo.

¹⁵ Nte vaisi taaratana nraahu nramanri nyunranra tita, nkye hiama qio tiqata, Tire Porura nraaqiara nraahuma varuro, tivara.

¹⁶ Nte mpoqiaavata nramanri mwunranra taunru kyauqo. Mwia Sitepanaasiravata, mwia nraamwuqi variahuvata, nramanri nyunrave. Nkyi utaqitaina mpoqianivata nramanri nyianinra mwia hia ni pu naatoqi nthi.

¹⁷ Karaisiva hia nraakye qora nramanri nyianrive tiro ni titairave. Karaisiva nai mwakyaakya kyugera nraakye qora timwa nyianrive tiro ni titaira. Mwataqaanaa qua okyaravanto vahata qumina nraakye qoravanto mwi quarara kyuge quave ti variavana qio nte hia mwi quara nkyi timwa nyinraitina, nte Karaisira qua nkyi timwa nyi varura. Nte mwataqaanaa qua okyara nkyi timwa nyianrita nkye Karaisira kyatariqaa hirito quarara qumina quave tivara. Mwianra rieqanama nte Karaisira qua ntapihi kyena nkyi timwa nyunra.

Karaaisiva Kotira kepukyavantove tura

¹⁸ Mpo hia nraakye qorahua vita ekyaura raupiri ihua variqatarata tita, mwihua Karaisira kyatariqaa rutovaro qutu vu quarara qumina qua hia quaqa hirave ti variara. Tire hia mwitaa tiraitita, tiri Kotiva huvantu kyero fivitaarihua variqatarata tita, tire Karaisira kyatariqaa ru tovaro qutu vu quarara Kotira kepukyua qua vahio tunanra.

¹⁹ Kotira mpukuqi haaru Kotiva mwitaama tiro:
Nraakiara mpo okyara mpo okyara rie taqe ihua
varivage nte mwihua qua nraatara kyaariro
mwihua quavanto qumina qua nraahu vahiananrove.
Airi inraikya okyara mpoqiaavata ntapihi paahi hiahua
su nyaatoqi vahiani quara vara raupirima kyaaninrave,
tura.

(Aisaiaa 29:14)

²⁰ Airi okyara rie varia vaisihuave, mpo sikuru mpo sikuruqi vita mpo kyaiga mpo kyaiga taqaa vaisihuave, mphohua qua nraatara kyeqa ti varia vaisihuave, mwihua mpo? Mwi vaisihuave varivage nte mwihua nraanra quave qianinra? Ekyaa mwihua variqata mwatanyaa okyara qua nraahu ti variarara tiro, Kotira quavanto mwihua qua nraatara kyaiharo mwihua quavanto qumina qua hia quaqa hiva nraahuma vahiro.

²¹ Kotiva ekyaa okyara ntapihi kyaiva, mwiva qua okyara mwaa qovarama kyaiharao mwi quava mwitaamama vahiro: Vaisivanto hia mwatanyaa okyara mpo okyara mpo okyara riairaqaatairo Kotira okyara qio ntapihiananrove. Tire Karaisirara nkyi timwa nyunrata qumina quave

qiara, mwi quarara nraakyе qoravanto quataave tivera, Kotiva mwihua sitairata mwihua hia ekyara qutu vivara.

22 Iutaavanto tiqata, Vaisivanto nronra kyaiqa varairaqe tire mwia kyaiqa taqe mwi vaisirara Kotiva titai vaisirave tiqata mwia vataqi quare, ti variavata, Kirikivanttiqata, Vaisivanto mpo kyaiqa mpo kyaiqa okyara tinraamwutairaqe mwia taqeta mwiaqatai mwi vaisira vataqi quare, ti variara.

23 Tire mpo? Tire variqata Karaisira kyatariqaa rukye hiritaa quara, mwi quara nraahu timwaqvirera. Tire mwi quara Iutaavantimwa nyinrenra hurata mwihua mwi quarara tiqata, Uaqia hia vaisihua nraahu kyatariqaa ruarave. Nkyi qua mwia uaquia hi quarave, ti variara. Mwihua mwitaa qiavata tire mwi quara Kiriki timwa nyinrenra hurata mwihua mwi quarara, Qumina qua hia quaqua hirave, ti variara.

24 Mwitaa qiavatavata tiri mpo hurahua Iutaave, Kirikive, mpo mwatanaave, Kotiva nraanrama tahlata tire variqata ntapihi kyauraro Karaisiva Kotira kepukyavanto tiri kyaahaqa hiarivama variro. Karaisiva ekyaa Kotira okyara qua, kepukyaa qua tiri timwa timwianrivama variro.

25 Nraakyе qora mpo hiahua Karaisira quara qumina quave ti variavaro mwi quava Kotira quavanto vahiqaro ekyaa mwatanyaa okyara vaisivanto ti varia quara nraatara kyaira. Kotira quara uqenrai quarave qiaava, mwi quava vaisi kepukyaa qua nraatara kyaira.

26 Eo, ni kata pakyaa tuaavo, nkye haaru nataa nataa hu nraakyе qorahua varuvaro Kotiva nkyi nyaanronra mwianra nraato tuate. Mwi entara nkyi utaqi hia mpo okyara mpo okyara ntapihi riohua varurave. Mwi entara hia nkyi utaqi nrutu nronra vataahua airivanto varurave. (Mwi entara Kotiva hia nkyi nyutu nronraqama vahura mwianra rieqaro nkyi nyaanronra.)

27 Mwatanyaa qua okyarara ti varia vaisihua kyaurira inraikya varaate tiro, Kotiva qumina quave ti varia quara, Karaisira rukyaa quara vara kyero qumina nraakyе qoravanto mwi quara riaate tiro. Kepukya nraakyе qoravanto kyauriratiro, Kotiva qumina nraakyе qora nyaanrama kyero mwihua ni nraakyе qorama varivarave tiro.

28 Mwatani variahua mpo hia nraakyе qorahua, mwihuara hia tiri mwutukya vaiho qiahuave, hia kyuge nraakyе qora qumina nraakyе qorave ti variahuave, Kotiva mwi nraakyе qorahua vara kyero mwihuqotairo tire nronravantove ti varia nraakyе qorahua vara qumina inraikyaqama kyairave.

29 Kotiva nai mwitaa hirara tiro, hiama qio mpovanto nai mwahuta qiananro.

30 Nkye Karaisiravata variate tiro, Kotiva naivanto nkyi sitaqiro uro kyaihata nkye Karaisiravata variara. Kotiva Karaisira titovaro Karaisiva Kotiva tiri kyaahaqa hiani okyarara qovarama kyero. Karaisiva tiri kyaahaqa iharora tiro, Kotiva tiri uaquia hi quara nruka kyero tiri vara avuqavuma kyero. Karaisiva tiri kyaahaqa hirara tita, tire qiomaa Kotira kyaiqa vareqata aanra kyuqeragaanquanana. Karaisiva tiri kyaahaqa ihata tire huvantu vita qatinani varunamra.

31 Teta kyaahaqa hiarava hia vahuvaro Karaisiva mwitaama kyero tiri kyaahaqa hurara tita, tire Kotira mpukuqi qara ntumwa to quara ntapihunana. Mwi quava mwitaama tiro:

Vaisivanto nai kyaiqara rieqaro hia nai mwahuta qiarive.

Tiri vunyaa vaisivanto tiri kyaahaqa hirara rieqaro

mwi vaisiva mwia mwahuta qiarive, tura.

(Aisaiaa 40:13)

Karaaisira kyatariqaa ruto quara

¹ Haaru nte nkye hunani nrintena nte Kotiva uqeta tai quara nkyi qoqaa timwa nyinrenrana nte hia qiakyaa hu quara nkyi timwa nyiavarave. Hia nte mwatanyaa qua okyara rieqana nkyi timwa nyiavarave.

² Mwi entara nte nkyi utaqaa variqana kuaa qua nraahu timwaqi virerave timwa kyena hia mpo qua mpo qua nkyi timwa nyiavarama. Nte Iesusi Karaaisira qua nraahu nkyi timwa nyiavarama. Nte mwi entara Iesusi Karaaisira kyatariqaa ruto quara nraahu nkyi timwa nyiavarama.

³ Haaru nte nkyi utaqaa nrumu variavaro ni kepuuka hia vahuvaro ni kyuqu kyuauqu ntuvana nte aatu hiqana variavara.

⁴ Nte mwakyaakya nkyi timwa nyiqana hia qiakyaa hi quara nkyi timwa nyinraitina, nte qua nkyi timwa nyiavata nkye taqovaro Kotira mwanraquravanto ni kyaahaqa huvana nte kepuuyaqama kyena qiavara.

⁵ Nkye hia mwatanyaa okyara riemwaqi viraitita, Kotiva kepuuka kyaiqa varaira mwia okyarara riemwaqi viqata Karaaisirara qutaa mwivave qiate tina, nte Karaaisira kyatariqaa ruto quara nraahu nkyi timwa nyiavara.

Qua nronra kyuqevo Kotiraqaatairo qovara hi varirara tura

⁶ Kotira aanraqaa kepuuyaqama vari nraakye qorahua varivaqe tire qiomia mwihua nronraqama vahiani quara timwa nyiananra. Tire nronraqama vahi quara tiqata hia qumina mwatanyaa qua okyara tunanrave. Mwaa mwataraqaa ntaqikyi varia vaisihua mwatanyaa qua okyara ti varihua, mwihua variqi vita taiqa vivaro mwihua quavata taiqa quananrove.

⁷ Hia tire mwihua qia quara tiraitita, tire nronra qua Kotiva uqeta tai quara kyuqe qua, mwi quara nkyi timwa nyunanra. Haaru hia mwaa mwatara utu entara Kotiva mwi quara riemwa tero uqeta tero tiriaro mwihua nraakiara mwi quara qovarama kyaivarо mwi quava nraakye qora kyaahaqa hirata mwihua nivata nyaamwuni kyuqema kye varivarave tura.

⁸ Mwaa mwataraqaa ntaqikyi varia vaisihuaqitairo hia mpoqavantovata mwi quara okyara ntapihi kyero. Mwihua Kotira qua nronraqama vahi quara riaatirio, mwihua hiama Kotiva kyuqe inraikya vatairaqaa ntaqikyi vaisira kyatariqaa ru kyaatiri.

⁹ Kotira mpukuqi mwitaama tiro:
Hia vaisivanto vuqotairo taqai inraikyara,
hia vaisivanto nraatoqitairo riai inraikyara,
hia vaisivanto nai nraatoqitairo riemwa kyero tiqaro,
Mwi inraikyava qio vahiananrove, ti inraikyara
vara kyero Kotiva mwianra mwutukya vataaa nraakye
qorahuani terama kyero vatairave, tura.

(Aisaiaa 64:4)

¹⁰ Kotiva nai mwanraqura titaiharo mwia mwanraquravanto Kotiva nai uqeta tai quara hia mwaa mwataraqaa ntaqikyi variahua timwa nyinraitiro, mwiva tiri nraahu timwa timwi varira. Kotira mwanraquravanto ekyaa inraikya ntapihi kyero ekyaa okyara inraikya Kotiva uqeta tai okyararavata taqaivama variro.

¹¹ Ta vaisivave mpore vu nraatoqi vahiani inraikyara ntapihi kyaananro? Hiama vaisi mpovanto mpore vu nraatoqi vahianinra ntapihiananro. Nai mwia mwanraquravanto mwia utaqi vahiva mwivama mwia vu nraato ntapihi. Mwia votima kyero Kotira mwanraquravanto nraahu Kotira okyara ntapihi kyero riaira.

12 Tire hia mwata mwaqaatai qovara hi mwanraqurara mwia varauanrave. Kotiva tiriara mwihua nte kyugema nyatau okyarara ntapihi kyeta riaate tiro, mwiva nai mwanraqua timwihata varaunana.

13 Tire Kotira mwanraqua varaurahuara titi, tire hia vaisivanto mwatanyaa okyara timwa timwianravauma nkyi timwa nyi varita. Tire Kotira mwanraquravanto timwa timwi vari quarama nkye Kotira mwanraqua varaaqua nkyi timwa nyi varita.

14 Vaisi mpoqi hia Kotira mwanraqua variari hama qio Kotira mwanraquravanto qfani quara ntapihananro. Mwiva mwi quařara qumina qua hia quaqa hiravema qiananro. Kotira mwanraqua mwiaqi variari vaisiva, mwiva nraahuma Kotira mwanraquravanto qiani quara qio ntapihi kyero riaananro.

15 Kotira mwanraquravanto mwiaqi variari vaisiva variqaro mwiva ekyaa okyara taqero tukyama kyero kyuqe okyarave, uaqia hi okyararave, qiananro. Mwiva qio mwitaa tiraro qumina vaisi mpovanto hama qio nai mwi vaisira okyara tukyama kyero taqaanano.

16 Kuua qarama kyero Kotira mpukuqi mwitaama tiro:
Vaisivanto Kotira vu nraatoqi vahi inraikyara
hia ntapihirara tiro,
mwiva hama qio Kotirara e mwitaa mwitaa hiante
qiananrove, tura.

(Aisaiaa 40:13)

Mwitaa iharovata Kotira mwanraquravanto tiriqi variharora tiro, Karaisira vu nraatovantovata tiriqi vahira.

3

Korintivanto ntainra vita varura kyaara Poruva mwihua inronra hura

1 Ni kata pakyaa tuaavo, nte Kotira mwanraqua vataa vaisivata qua tuntema kye nkyivata qua qiankye qiyata nkye hia qioqa hura. Nte mwatanyaa inraikyara nraahu riaa vaisihua qihakya hi quara timwa nyuntema kyena nkyivata qihakya hi quara nraahu timwa nyigana taqaavata nkye mwi entara Iesusirara quitaave turaqi nraaqiara votima kyeta varurave.

2-3 Nronra tuai vaisira kepukya kyara mwintema kye nte nronra qua nkyi timwa nyiankye tina, taqaavata nkye nraaqiara votima kyeta varuvanana tina, nte nkyi nraamwa nraahu nyiavara. Qumina nraakye qora mwata mwaqaqa variahua hia kyuqema kye nrohi variantema kye nkyevata nrohi variarara titi, mate mwaa entaravata nkye nraamwa nraahuma nrevara. Nkye qumina nraakye qora votima kyeta variqata nkye mpohuara ua qua tiqata inronra hi variara. Nkye mwitaamaqi viqata nkye qumina nraakye qoravanto mwatanyaa okyara nraahu riahua votima kye nrohi variara.

4 Qikye, nkye inronra hiqata ntainra quavar nkyiqitairo mpovanto tiqaro, Nte Porura vataqina vuvave, tiharo mpovanto tiqaro, Nte Aporosira vataqi vi varuvave, ti variro. Nkye mwitaamaqi viqata nkye mwatanyaa okyara riahua votima kyeta uaqiamma kyetama nrohi variavo.

5 Aporosiva mwiva tavave variho? Nte Poruva mwiva nte tavave varuqo? Tiretana Kotira kyaiqa vare varuratanaqua nraahuma varita. Nkye tiritanaqaataita Iesusirara quitaave qiera. Aporosivavata ntevata Kotiva tiri timwi kyaiqarama vareta.

6 Nte Poruva kyara humwu vara tutauqaro Aporosiva nramanri mwihano Kotiva mwi kyarara qupiqaante tiharoma qupiqero.

7 Kyara humwu vara tivavata, nramanri nyivavata, qumina vaisitanama varita. Kotiva tiharo kyara mwiva qupiqairara tiro, Kotivama nronravanto variro.

8 Kyara humwu vara tivavata, nramanri nyivavata, kuaa kyaiqa mwianra rieqatama vareta. Nraakiara Kotiva mwihua nkyiari kyaiqa varerara rieqaro kyoqaa nyiananroma.

9 Tiretana kuaa variqata Kotira kyaiqa vare varurata nkye aakyo votima kyeta variqata, Kotira nraamwu votima kyetavatama varita.

10 Kotiva ni kyugema mataihana nte nraamwu hoquaahua qjata vaisi votima kyena variqana nte nraante nraamwu tura ratauntema kye nte nraante Karaisirara nkyi timwa nyi varura. Nkye Kotira nraakye qora kyugehua Kotira nraamwu kyugera votima kyeta variate tina, nte nraante puha ratauqata mwiaqatai mpohua mpohua mwi nraamwunra hoqe varita. Mwi nraamwunra hoqe hua taqeqlata hoqata.

11 Nte puha rataura mpovanto ntaku kyero mpo kyatari rataankyora. Nte puha rataurara tura mwia Iesusi Karaisivama.

12 Nte puha rataura mwiaqaa vaisi mpovanto Kotira nraamwu hoqarera hiro kyuge inraikyaqo mwi nraamwunra hoquaananro. Mwiva kori orive, munima orive, mpo ori kyugera, vara kyero kyugema kyero mwi nraamwunra hoqa taananrove. Mwiva mwitaama kyero hogairaro mpovanto kyatarive, nramwuhive, taquve, mwi inraikyara vara kyero hoquaananrove.

13 Vaisi mpohua mpohua mwitaamaqi vivaro nraakiara ekyara entaqaa Kotiva mwihua hoqa tera qovarama kyairaro qoqama vahiananro. Mwi entara qivarama itaintema kyero Kotiva mpohua mpohua kyaiqa varatera qovarama kyero mwataara hiqaro taqaan'anrove.

14 Qiavanto vaisi mwiva nraamwu hoqa taaninra mwataara hiqaro taqairaro hia itamwa kyairera, mwi vaisiva nai kyogaa qiomma varaanano.

15 Qiavanto vaisi mwiva nraamwu hoqa taaninra mwataara hiraro itamwa kyairera, mwi vaisira nraamwu ekyaa itamwa kyaananro. Mwiva nraamwu hoqa taaninra ekyaa itamwa kyairaro vaisi mwiva nraahu qati variraro mwiva qiaqitairo qatinani nritarero varintema kyero variqaro hia kyogaa varaanano.

16 Nkye hiave ntapihiavo? Nkye Kotira nraakye qora variqata Kotira nraamwu kyotata nraamwu votima kyeta variavaro Kotira mwanaqravantao nkyi utaqi varihata variara.

17 Nkye Kotira nraamwu kyugehua variarara tiro, mpovanto nkyiqitairo mwi nraamwunra vara uaqiamma kyairera, Kotiva nai mwi vaisiravata vara uaqiamama mwataananro. Nkye Kotira nraamwu mwihua variqtara tita, nkye ntainra vita varivorave.

18 Nkye nkyeta riemwa kyeta api qua riemwaqita vivora. Nkyiqitairo vaisi mpovanto nanrianra tiqaro, Nte mwatanyaa okyara mpo okyara mpo okyara ntapihi kyauvave, tirera, nte mwi vaisirara tiqana, E mwi quara qaqa kyera Kotira qua nraahu riemwaqira quante. E mwitaa hirata qumina nraakye qoravanto iara hia vu nraato vataavave tivar Kotiva iara qua okyara ntapihiva vu nraato vataavave qiarive, qianinra.

19 Mwi quara okyara mwataamama vahiro. Mwatanyaa okyarara Kotiva tiqaro, Mwi okyarava qumina qua hia quaqa hirave, tiro. Kotira mpukuqi mwianra mwataama tiro:

Mwatanyaa okyara ntapihiahua
ntaqaaverura kyaiqa vare variavaro
Kotiva nkyiari utua kyaiqara mwiaqotairo
tuqasaa kyeqaro nkyiari tu vare varira.

(Iopu 5:13)

20 Mwi quava vaiharo mpo quavata vahiva mwitaama tiro:
Nronravanto Kotiva mwatanyaa okyara ntapihiahua
su nyaatoqi vahi quara taqaiharo ekyaa mwi quava

qumina vehi quama vahirove, tura.

(Ihi 94:11)

21 Nkye mwi quara rieqatama hia vaisivanto varaani kyaiqarara nronraqama kye rieqata vaisi nrutu tuaaheraata. Hiavata mwitaa hiata. (Hia mwatanyaa inraikyavanto nkyiqa ntakiyi variarave. Nkye mwiaqaa ntakiyi variarave.) Ekyaa mwi inraikyava nkye hia inraikyava nraahuma vahiro.

22 Nte Poruvave, Aporosivave, Pitaavave, mwaa mwatavave, qati variqi vi okyaravave, qutuvi okyaravave, mate vahi inraikyavave, nraakiara vahiani inraikyavave, ekyaa mwi inraikyava nkyi kyaahaqa hiar inraikyava nraahuhu vahirara tiro, ekyaa mwi inraikyava nkye hia inraikyava nraahuma vahiro.

23 Mwitaa ihata nkyeta mwihua Karaisiranivanto variavaro Karaisiva mwiva Kotiranivantoma variro.

4

Poruva nte Karaisira kyaiqa vaisi varuvave tura

1 Nkye tiri kyaiqara rieqata mwataama qiata. Tiriara nkyenramwu Karaisira kyaiqa vaisinramwu Kotiva ugeta tai quara timwa qovara hi varia vaisilua variavo qiata. Kotiva mwi kyaiqaraqaa ntakiyiate tiro, tiri nronraqama kyaira.

2 Mpore kyaiqaqaa ntakiyiari vaisiva nataama kyerove kyaiqa varaanano? Mwi vaisiva hia qoriri hiraitiro, ntapihi kyero nai nronra vaisi kyaiqaqaa ntakiyiqiro quananro. Mwi quara rieqanama nte ntapihi kyena Karaisira kyaiqa vareqana nkyiqa ntakiyi varura.

3 Nte Kotira kyaiqa vaisi variqana nkyi Kotira nraakte qoraqaa ntakiyi variarita nkyeve, vaisi mpovantove, ni tukya hiqata ni kyaiqara uaqia hi kyaiqarave, kyuqe kyaiqave, tivage nte hia mwianra nronraqama kyena riaaninra. Ntevata hia ntena kyaiqara rieqana tukyama kye mwi kyaiqara kyuquerave, mwi kyaiqara uaqia hirave, qianinra.

4 Nte ntena kyaiqara rieqana ni kyaiqvanto qio vahoma tina. Nte mwitaa qariiro quataave ni kyaiqvanto qio vahianano? Niqaa ntakiyi variva, mwiva nraahuma ni kyaiqa tukyama kye taqero kyuqe hirave hia kyuqe hirave qianinra.

5 Mwianra rieqatama haunri nkye paparuqa hiqata mpore kyaiqara kyuqe kyaiqave, uaqia hi kyaiqarave, tivora. Nkye qaqa kyeta tiri vunyaa vaisivanto qaiqaa tumuan entara vekya variaria. Mwiva mwi entaraqaa vaisivanto entaqi variqaro ugeta taani kyaiqara qovarama kyaanano. Mwiva vaisivanto nai vu nraatoqi riemba taani inraikyara qovarama kyaanano. Mwiva mwitaamaqiro viraro mwiaqatairo Kotiva nraakte qoravanto kyaiqa varera taqeqaro kyuqe kyaiqave, uaqia hi kyaiqarave, qianinra.

Korintivanto nkyiari nyutu tuaaherora kyaara Poruva mwihuara tura

6 Ni kata pakyaa tuaavo, nte nkyiara rieqana nte tetu Aporosikyaaqaa ntumwa kye turave. Nkye mwi quara rieqatama Kotira mpukuqi qara ntumwa to quara mwia hia nraatara kyeta ntainra vita variqata hia vaisi mpo nrutu tuaahereta mpo nrutu vara mwataniqa hiata.

7 Ni katao, Tavave iara e vaisi nronravanto variaro tiho? Hia mpovanto iara mwitaa tiho. Qio quataave ekyaa e vataana inraikyara Kotiva i mwihio? Nanraqamave ekyaa e vataana inraikyara Kotiva i mwihiranre e ntena kyuququo vara taurave timwa kyera e ena mwahuta tira hiaro?

8 Qikye, nkye Korintiqaahua mwamwaahuave, quataave nkye Kotiva hi inraikyara ekyaa vataahua variavo? Quataave nkye airi inraikyara vataahua

variavo? Tire hia nkyi kyaahaqa hurata nkyetaraa variqata qutaave nkye nrirate vunyaa nraakye qora variavo? Nkye qutaaqama kye nronraqama vivage nte nkyiara qamwateqana tire nkyi kyapata nronraqama vita ntaqikyiqata variataarave.

9 Nte ntena riemwa kye mwitaama tina, Tire Karaisira qua nkyi timwa nyunrahua varuraro Kotiva tiri vara ekyaraa tokyaqama vatero. Nramwtuaa sitaqi ru kyarera utuavata ekyahua mwihua nraahu taqaantema kyetama mwata mwaagaanaa nraakye qoravantovata nyaamwunyaahuavata tiri taqeta.

10 Tire Karaisirara rieqata Karaisira qua nkyi timwa nyi varurata qumina nraakye qoravanto tiriara nkye hia vu nraato vahua variavo ti variara. Mwihua tiriara mwitaa ti variavata nkye ekyaa qua riaahua votima kyeta Karaisira qua rie variara. Tire Karaisirara rieqata tire uqenraunra vaisihua varurata nkye kepukya vaisi votima kyeta variara. Tire Karaisirara rieqata tire varuraro tiri nrutuvanto mpiato vaihata nkyi nyutuvanto virito vahintema kyeta nkye variara.

11 Tire Karaisirara rieqata haaruvata, mate mwaa entaravata, hia kyara vaharo tiri mpoqama kye nraataa ihata varunanra. Tiri tuavaaqa nrahitiro uaquia aaquia ihata varunanra. Tiri ntuutu kyeqqa vataavata varunanra. Tire hia kyuqema kye mwatukya kuaaqi variraitita, tire mpoqi mpoqi nrohi varunanra.

12 Tire munima kyeqqa kyara varaare tita, teta kyauquqo toqaamwu tukyeqa kyaiqa vare varunanra. Mpovalto tiriara mwaaquqa hi quara tihata tire hia nanrianra mwaaquqa hi quara tiraitita, tire Kotirara mwi vaisira kyuqema mwataante tunanra. Tiri uaqjama timwa taavata tire hia Kotira kyaiqa qaqlira kyaratita, tire kepukyaqama kye mwia kyaiqa varaqita vunanra.

13 Mpovalto tiri nrutu vara mwataniqa hiqaro unra tihata tire hia nanrianra mwitaa tiraitita, tire mwianra kyuqe qua nraahu tunanra. Tire mwitaamaqa viqata Karaisirara rieqata varurata kyara viti qaqlira kyaantema kye qumina nraakye qoravanto tiri qaqlira kyaarave. Mwaa entaravata mwihua tiriara vehi vaisi qumina inraikyavantove ti variara.

14 Hia nte nkyi kyauruariveravauma mwaa quara qara ntina. Nkye ni nraaqiara kyuqehua votima kye varivaro nkyi su nyaatovanto ntapihirata variate tinama, mwaa quara qara ntina.

15 Vaisi 10,000 vanto nkyiara tiqata, Tire nkyiqa ntaqikyi varurahuave. Nkye mwitaama kye Karaisira qua riemwaqita quate, tivera, nkye mwaa quara riaata. Mwihua mwitaama varivaqevata nte nkyi sova kuaikuvanto nraahuma varianinra. Nte nraante Karaisira qua kyuqe mwakyaakya nkyi timwa nyiavata nkye Karaisira aanraqaa vurara tina, nte nkyi sovaqama vurama.

16 Nte nkyi sova varuvara tina, nte nkyi su nyaato nyianrita nkye nte nrohuntema kye nrohiata.

17 Nkye mwitaama kye nrohiate tina, nte Timotira titaairo nkye hinani quananro. Nte Timotirara ni maaqve tuqaro ni mutukyavanto mwianra mpoqiaavata vahira. Mwiva tiri vunyaa vaisi mwianra nraahu rieqaro mwia kyaiqa vare vari vaisivama variro. Nte Timotira titaairo mwiva uro nte mpoqi mpoqi nrohiquana Karaisirara nraakye qora timwa nyuntema kyena ntenavata mwi quara riemwaqti viqana Karaisira aanraqaa nrohurara ntapihi kyero nkyi timwa nyianri.

18 Nkye mpo hiahua tiqata, Nianra mwiva hiama qio mwaini tiri taqarerero nriananrové, timwa kye qamwateqata nkyeta nrutu tuaahere variara.

19 Tiri vunyaa vaisivanto qiove tiraqe nte qioma nkyi taqarera qamwanrama uro ntaaninra. Nte quariva uro variqana nkyiari nyutu tuaahere variahua taqarera. Hia nte mwihua qua nraahu riarera. Nte mwihua kepukyavata taqarera.

20 Kotiva ntaqikyi vaisiva, mwiva hia qua nraahu timwaqiro quananro. Mwiva Kotira kepukyara variqaro Kotira aanraqaa quananro.

21 Nkye hia ntapihi kye nrohi varira kyaara nte kyapipivata vare quaniranrave nkyi mwutukya vahiro? Nkye ntapihi kye nrohiarara rieqana nte uro nkyiara po tina nkyi kyuqema nyataaninranrave nkyi mutukya vahiro? Nkyetavanto tivaqe riaari.

5

Quara vairiqa hirikye nkyiqitairo vaisi mpovanto api nrohi variho tura

1 Quavanto viro nrinro ihana nte riauqaro nkyi utaqitairo quara vairavento nrohia okyarava qovarama viho. Qikye, Kotira qua hia riaa nraakye qorahua mwitaa hiarara uaquia hi kyaiqarave timwa kye hia mwitaa hiarave. Mpovanto qua ni timwa mpihana nte riauqaro vaisi mpovanto nai qora nraata varatero nrohi variho, qiara.

2 Mwiva nkyi utaqi variqaro mwitaamaqiro nrohi varihata nkye nanra inraikyara rieqatave nkyeta mwahuta ti variavo? Nkye hia nkyeta mwahuta tiraitita, nkye ntataataarave. Nkye ntateqata mwi vaisira titavar nkyiqitairo quataarave.

3 Mate nte nyianrani variqana hiama qio mwi quara nkyi kyapata variqana avuqavu hiarava aana vahiro. Nte nyianrani varura, mwianra nte hiama nronraqama kye rena. Tiri vunyaa vaisivanto ni nronraqama kyaihanra tina, nte qioma nyianrani variqanavata mwi quara avuqavu hianinra. Nte nkyi kyapata variqana mwi quara avuqavu huntema kyena vaakyama mwi vaisira ko timwa kyena mwiaqaa qua vatauquo.

4 Mwianra rieqanama nte nkyiara mwitaama tina. Nianra mwiva tiriyata variho timwa kyetama nkye mwi vaisira qua riarerata ntuvantua hiata. Nkye ntuvantua vita varivaro tiri vunyaa vaisivanto nkyi nronraqama kyairata nkye ntuvantua vita variqatama

5 mwi vaisira nkyetaqitai titavar mdiva nanrinraa variqaroma Saataaninra kyaiqa varaqiro quananro. Nkye mwitaa hivar mwi vaisira nai mwamwantaoq Saataaninra kyaiqa varaqiro viraro vu nraato ntapihi viraro uaquia hi kyaiqara qaqlira kyairaro ekyara entaaqaa mwidia mwianraquaravanto qio variraro Kotiva mwia nyaamwuni vitaari.

6 Nkye qumina nkyeta mwahuta tivora. Nkye mwaa quara ti variara riaarave. Qamaa pataqia taupa tairaro ntenraanriva ekyaa hini qamaa mwiavata ntenra kyaananrove.

7 Vaisi mwiva taupataira votima kyero varira nkye qamwanrama kye mwia titavar mdiva uaquia hi kyaiqara varava hia nkyi utaqi varirata nkye qio variqi quata. Nkye qio varivaro mwia uaquia hi kyaiqava nkyivata uaqiamma nyataankyora. Vekyahu nyato kyarara omwata nraani entaraqaa sipisipi nraati ru kyaintema kyero tiriara rieqaro Karaisira ru kyora.

8 Karaisira tiriara ru kyorara tita, nrivae vekyahu nyato kyarara votima kye nreqata taupataira vatama kye mpereti uta taira qaqlira kye, mpo mpereti hia taupataira vata uta taira nramwaqi quara. (Mwi quara okyara tirera nrivae Kotira aanraqaa nrohiqatama uaquia hi kyaiqara qaqlira kye kyuqe kyaiqa quataa kyaiqa nraahu varaqi quara.)

⁹ Tauraa nte nkyini qara mpo vara kye nkyi timwa nyiavaraqi mwitaama tina, Nraakyе qora api qaraqita nrohihuavata hia kuaaqi variate, qiavarave.

¹⁰ Nte mwi quara tiqana hia nte quminahua hia Iesusira nraaqiaraqa hiahuara turave. Hia nte qumina nraakyе qora airi inraikyara mwutukya ntihata variahuarave, mpuara vare variahuarave, unra mwanriqa nrutu tuaahere variahuave, hia nte mwihuara turave. Nkye mwi nraakyе qorahua qaqa kye nkyetaraa varirera hivera, mwia nkye mwia mwatara qaqa kyetama nkyetaraa varivarave.

¹¹ Nte tohare hia nte qumina nraakyе qora mwihuara turave. Nte yaisi mpovanto tiqaro nte Iesusira nraaqiarama varuqo timwa kyero uaqia hi kyaiqara varaanira mwianrama tuqo. Ni qua okyaravanto mwitaamama vahiro. Vaisi mpovanto tiqaro, Nte Iesusira nraaqiara nkyi sata sakyama varuqo, timwa kyero mwiaqatairo mwiva mpo nraakyevata nrohiarivave, airi inraikyara mwutukya vahiarivave, airi inraikya vare variarivave, unra mwanriqa nrutu tuaahere variarivave, mwiva mpura nrutu vara mwataniqa hiqaro unra qua qariavave, mwiva uera nramanri nreqaro uera ntaarivave, mwiva mpuara uti variarivave, mwiva sakaave tirata nkye mwia qaqa kye mwia nraatu aafu hita hia mwiaavata variqata kyara nraatemä tuqo. Ni qua okyara vaakya tuva mwitaamama vahiro.

¹²⁻¹³ Hia Kotira nraakyе qora qumina nraakyе qora mwaaqani variahua hia nte mwihuua qua avuqavu hirerave. Mwihuua kyaiqa tukya hianinra mwia hia ni kyaiqavauma, mwia nai Kotivama mwia avuqavu hiananro. Qio nkye hia qumina nraakyе qora variavo. Nkye Iesusira nraakyе goravantom varita. Haunri nkyiqitairo mpovanto uaqia hi kyaiqara utu kyairata nkye tiqata, Kyai qaqa kye hia avuqavu hiare, tivora. Nkye qamwanrama kye mwi quara avuqavu hiata. Kotira mpukuqi qara ntumwa to quara rieqanama nte nkyiara mwitaama tina. Mwi quava mwataama tiro:

Vaisi mpovanto nkyi utaqi variqaro uaqia hi kyaiqara
varaaniira nkye titaivaro quarive, tuqo.

(Lo 13:5)

6

Qua vahirera, nkyetavanto mwi quara avuqavu hiate tura

¹ Nkyiqitairo mpovanto nai qata vakyaqa qua vatarera hiqaro haunri mwiva uro hia Kotira qua riehua mwi quara avuqavu hiate qiankyora. Mwiva nkye Kotira qua riehuara ni qua avuqavu hiate qari.

² Nkye hia ntapihiarave? Nraakiara Kotira nraakyе goravanto variqata mwihuua mwaa mwataraqaa varihua qua avuqavuma hivara. Nkye nraakiara mwaa mwataraqaa varihua qua avuqavu ihua variahuara tita, nkye nanraqamave mate mwaa entara pata qua mwiqianinra hia avuqavu hita?

³ Nkye hia ntapihiarave? Nraakiara tire nyaamwunyaahua mwihuua quavatama avuqavu hiananra. Tire nyaamwunyaahua quavata avuqavu hiarahuara tita, tire qiomaa mwata mwaaqanaa quavata avuqavu hiananra.

⁴ Nkyiqitairo ko ti quava qovara hirata nkye mwi quara avuqavu hirerata nkye qumina mwaaqanyaais vaisi, hia Iesusira nrutu tuaahere huara mwi quara avuqavu hiate tivora.

⁵ Nkye mwitaa hiqata kyauruataarave. Nkyi sata sakyaa taaratanavanto inronra hivera, hiave nkyi utaqi vaisi mpo kyuqe vu nraato vahiva, mwi quara avuqavu hiariva variro?

6 Nkyiqitairo kyuqe vu nraato vahiva mpovanto mwi quara avuqavu hiataara hia mwitaa hiavatama nkyi qata vakyaa mwihua mwi quara varaqata qumina vaisi hia Kotira qua riaahua hianani vi varita.

7 Nkye nai ko ti nai ko ti hiqatama nte taqauqata nkye Kotira qua qaqira kyeta mwia aanraqaavata hia kyuqema kye nrohi variara. Nkyi qata vakyaa mpovanto nkyi uaqjama nyatairata nkye qaqira kye qiove qiataara. Nkyi qata vakyaa mpovanto nkyini mpo inraikya mpuara varairata nkye hia mwiaqaa qua vataraitita, qiove qiataara.

8 Mwitaa hiataara nkye uro nai uaqjama mwate nai uaqjama mwate hiqata naini naini mpuara vare variavo. Qikye, mwihua nkyi sata sakyya variavata nkye mwitaa hiqata mwihua uaqjama nyate variavo.

9 Nkye hia mwaa quara riaarave iho? Qora kyaiqa vare varihua hia Kotiva ntaqikyi mwatukyaraqi qio vivarave. Vaisi mpovanto nkyiara mpo qua unra qua qiankyora. Api qaraqita nrohihuave, unra mwanriqa nrutu tuaherehuave, nraata vaati ntueqeqama kye api nrohihuave, nkyiari hena vaisive nkyiari hena nraakyevata api nrohihuave,

10 mpuara uti varihuave, airi inraikyara mwutukya ntirata vare varihuave, uera nramanri nreqata uera nte varihuave, mpora nrutu vara mwatanika hiqata unra qua ti varihuave, mpova hi inraikyara unraqanraama kyeqqa vare varihuave, ekyaa mwi kyaiqara mwi kyaiqara vare varihua hiamma qio Kotiva ntaqikyi mwatukyaraqi vivara.

11 Nkye hiri uhua haaru mwi kyaiqara mwi kyaiqara vare varura. Nkye mwitaama varuvaro nkyiara Kotira kyaiqa nraahu varaqita quate tiro, Kotiva nkyi mwutukya vu nraato hiqama nyatiero. Kotiva tiri vunyaa vaisi Iesusi Karaisira kyaiqara riero nai mwanraqurarakavata rieqaro Kotiva nkyi avuqavuma nyataira.

Karaisiva tiri huvantu kyairaqaatai tire uaqia hi kyaiqara varaqi quaro-tura

12 Mpovanto tiqaro, Karaivisa ni huvantu kyaihana nte qati varuvara tina, nte ekyaa mpo kyaiqa mpo kyaiqa qjoma vare variariro Kotiva hiamma nianra qao' qiananrove, qianinra nfe nai mwia mwataama kye timwa mwinrenra. E ekyaa kyaiqa qio varairarovata hia ekyaa mwi kyaiqava i qio kyaahaqa hiananrove, qianinra. Nte ekyaa kyaiqa qio varaariva variqanavata nte hia ekyaa kyaiqa varaqina virerave. Nte ekyaa kyaiqa vare variariro kyaiqa mpovanto niqaa ntavaaqavu kyero ni ntaqikyiqiro quankyorave.

13 Mpovanto tiqaro, Kyaravanto vaisi vikyokyayi quariva vaharo vikyokyavanto kyara nraanriva vahirave qiananro. Qio mwi inraikyaya quaahaqa vahi inraikyara tiro, nraakiara Kotiva kyaravata vikyokya mwiavata taiqama kyaananro. Mwi inraikyaya quaahaqa vaharo vaisivanto quaahaqa variara. Mwitaa hirara tiro, vaisivanto api mpo nraakyeye mpo vaisivata nrohiqaro nai mwamwanta Kotira vuqaa vara uaqjama kyaananro. Vaisivanto nai mwamwantatako Karaivisa kyaiqa varaqiro viraro Karaivisa mwia mwamwantatako ntaqikyianro.

14 Kotiva tiri vunyaa vaisi qati vara sivuma kyovara tiro, mwiva nai kepukya mwiaqo tirivata qjoma qati vara sivuma kyaananro.

15 Nkye hia ntapihiarave? Nkyi mwamwanta mpqiani mpqianivanto Karaivisa mwamwantama vahiro. Qiove Karaivisa mwamwantatako nraakyera mpo mwamwanta vara kyero api qaraqiro nrohi variani nraakyera mwamwantatako taqaqau tairaro vahiananro? Hia qio mwitaa hiananrove.

16 Nkye hia ntapihiarave? Vaisivanto api qaraqiro nrohi nraakyera vahiro variraro mwitanahua nyamwantavanto kuua mwamwantama vahiananrove. Kotira mpukuqi mwianra mwataama tiro:

Mwitanahua nyamwantavanto
kuaa mwamwantama vahiananrove, tura.

(Okyara 2:24)

¹⁷ Jesusira nraaqiaravanto hia mwitaama kyero variananro. Tiri vunyaa vaisivata taqaau viro variariva variraro mwitanahua mwanraquravanto kuaa mwanraqurama vahiananro.

¹⁸ Api qaraqi nrohiraqaatai nkye ntuvaihaaqita qatiraqaa variata. Mpo-vanto uaqia hi kyaiqara hini hira utiva hia mwia mwamwanta uaqiamma kyaира. Mwiva api qaraqiro nrohiqaroma nai mwamwantavata vara uaqiamma kyaира.

¹⁹ Nkye hia ntapihiarave? Nkyi mwamwanta mwiva Kotira mwanraquravanto variqiro vi vari nraamwuvama vahiro. Kotiva nai mwanraqura nkyi niyanro mwia mwanraquravanto nkyi mwutukyaqi variqiro vira. Nkye hia nkyetavanto nkyetaqaa ntaqikyiahavauma. Nkye Kotiranivantoma varita.

²⁰ Kotiva nai mwaaku nkyi nyinro nkyi kyogaa utu tairara tita, nkye Kotiranivantmo variqata nkyeta mwamwantaqo Kotira nrutu tuaaheraata.

7

Poruva nraata vaati vare okyarara tura

¹ Nkye ni kyapara hiqata qara ntumwa taa quara nte nkyita timwa nyin-renda. Qioma vaisivanto hia nraakyeye vararaitiro, qati variqiro quanamro.

² Nte mwi quara tiganama taqaauqata vaisivanto nraakyevanto mpo nraakyevata mpo vaisivatama kye api nrohi variava tuqara vihana nkyevata mwi kyaiqara utivo tina, mpo qua mwitaama tina: Kyaivata ekyaa nraakyeye qoravanto nraata vaati varetu variate, tuquo.

³ Vaisivanto nai nraata kuaa mwamwantavanto variqaro mwiva nraakyeye hianinranra hia qao tiraitiro, mwia kyugema mwataari. Nraata-vantovata kuaa qara hiari. Mwitanahua mpovanto mpora kyugema mwatairaro mpovanto mpora kyugema mwateqatatan variata.

⁴ Nraakyevanto hia nai mwamwantaqaa ntaqikyi variharo mwia vaativanto mwia mwamwantaqaa ntaqikyi varira. Kuaa qaramma kyero vaativanto hia nai mwamwantaqaa ntaqikyiharo mwia nraatavanto mwia mwamwantaqaa ntaqikyira.

⁵ Vaatiaravata nraataravata nte mwaa quara tirera. Nkyetana mwamwanta ntuvantua hi okyarara hia mpovanto qao qari. Nkyetana qua taaqaute tigata, Nrijetana Kotiravata mwi iherara qua qiare ti, qioma nkyetana qati variqi vivara. Nkyetana mwitaamaqi viqata Kotiravata qua tira taiqa kyeta mwiaqataita qaiqaa mwamwanta ntuvantua hiata. Haunri nkyetana nraahumwa nraahumwa varivaro Saataaniva nkyitana mwataara hirata nkye mpo nraakyeve mpo vaisivata nrohi kyevora.

⁶ Nkye mwi quara ni kyapara hiqata qara ntumwa taarara tinama, nte nkyita timwa nyina. Nte hia mwi quara kepukyaqama kye vateqana nkye mwi quara nraahu vataqita quatevauma tina. Nte qati mwi quava nkyita kyaahaqa hiarive tinama mwitaa tina.

⁷ Nte nkyiara mwataayatama tina, Ekyaa nraakyeye qora ni votima kye varivaqe nte mwianra qiove qianinra. Qio nte ntapihi kyauqaro Kotiva mpo vu nraato vaisi mpo mwihanro mwi vaisiva nraakyeye varatero variharo, Kotiva vaisi mpove nraakyeye mpove mpo vu nraato mwihanro mwiva eharaa variqi vi varira.

⁸ Mwanraataravata, qumwanraanrayata, saati qutu quavata, tetoga varia nraakyehuaravata, nte tirera. Nkye ni votima kye nkye qati varivaqe nte nkyiara qiove qianinra.

9 Vaisivantove nraakyevantove hia qio qati variaqara hirata qiomaa nraata vaati varevara. Haunri qati varivarao vaisiarave, nraakyerave, mpogama kyero mwutukya ntirata mwia rirante qati variqi vivora.

10 Nraata vaati varahua nte mwaa quara timwa nyinrenra. Mwaa mwi quara hia ntene riemwa kye tuqo. Tiri vunyaa vaisivanto timwa tairama. Mwiva nraakyera mwitaama tiro: Nraakyevanto hiama qio nai vaati ekyara kyero quananrove.

11 Mwiva nai vaati qaqlira kyairera, mwiva hiama uro mpo qoraisi vararaitiro, qatima variarive. Mwiva nai vaati qaqlira kyero uro nanrianraa vari taqero kyai nte ntene paativanto hinani nrūmu ntante quankye timwa kyero mwiva qiomaa nai vaatintiriro uro variananrove, tiro. Mwitaa timwa kyero tiri vunyaa vaisivanto mwia vaatiaravata mwitaama tiro:

Vaisivantovata hia nai nraata qaqlira kyaananrove, tiro.

12 Nte hini mwihuara mwaa quara tirera. Mwaa mwi quara hia tiri vunyaa vaisivanto timwa tairavauma. Nte ntene mwi quara tirera. Iesusira nraaqiara mpovanto variraro mwia nraatavanto hia Iesusirara qutaave qiaro nraakyeva variqaro nai vaatiara tiqaro, Hia i qaqlira kyaraiti, nte i vatama kye variqi virerave, tirera, hia mwia vaativanto mwia qaqlira kyaari.

13 Iesusira nraaqiaraqa hiariva nraakye mpovanto variraro mwia vaativanto hia Iesusirara qutaave qiariva variqaro nai nraatara tiqaro, Hia i qaqlira kyaraiti, i vatama kye variqi virerave, tirera, hia mwia nraatavanto mwia qaqlira kyaari.

14 Vaativanto hia Iesusirara qutaave qiariva nai nraatantiri variqi viraro Kotiva mwia nraatara rieqaroma mwi vaisirara qutaama mwiva mwia vaativanto variho qiananro. Nraakye mpovanto hia Iesusirara qutaave qiariva nai vaati Iesusirara qutaave qianaisirava variqi viraro Kotiva mwia vaatiara rieqaroma mwi nraakyerara qutaama mwiva mwia nraatavanto variho qiananro. Kotiva hia mwitaa qianinravauma mwitanahua nraaqiara mwata tehua qumina nraakye goravanto apiqama kye mwata taa nraaqiaraqua votima kyeta varivara. Mwitana nraaqiaraqvanto Iesusirara qutaave qia nraakye qorahua nraaqiara votima kyetama varivara.

15 Hia Iesusirara qutaave qiariva nai nraatave, nai vaative, qaqlira kyarera hirera, kyairaro mwitaa hiari. Mwiva qaqlira kyero virera hiraro qiomaa vaativantove, nraatavantove, Iesusirara qutaave qiariva mwia tutu kyairaro quananro. (Mwiva hia tutu kyairaro virera, mwitanahua inronra hiqatama varivara.) Mpore qihakayama mwatairaro mwiva ina qihakayama mwatero mwitaamaqita quate tiro, Kotiva tiri nraanrama taira.

16 Mwianra rieqanama nte mpo hiahua mwihuua nyaatavantove saativantove hia Iesusira qua riaahuara mwitaa tirera. Nkyi saativantove, nkyi nyaatavantove, nkyiara rieqata Iesusira nraaqiaraqama vivarave iho, hiave Iesusira nraaqiaraqama vivarave iho? Nkye mwihuua kyaahaqa hi okyarara hia ntapihiavo.

Iesusira nraaqiaraqama quavarao nkyi mpo kyaiqa mpo kyaiqa nyinra qaqlira kyevorave tura

17 Haaru nkye varuvaro Kotiva nkyi nyaanro entara mwi entaraqaa tiri vunyaa vaisivanto kyaiqa tukyama kyero nkyi kuaiqia kuaiqia nyunranra rieqanama nte nkyiara tiqana, Nkye variqata nkyeta nanra kyaiqave tutera mwianra nraahu riemwaqita quate, tuqo. Nte mpo mwatukya mpo mwatukya nrohigana Iesusira nraaqiara variahuua mwi quara nraahu timwa nyiqina nrohurave.

18 Iutaa vaisivanto Kotira qua riero Iesusira nraaqiaraqama viva, mwiva haaru nai mwamwanta toqakyarara hia kyauruari. Mpo mwatanaaaisivanto Kotira qua riero Iesusira nraaqiaraqama viva, mwiva hia nai mwamanta toqa kyaari.

19 Mwamwanta toqe okyaravave, hia toqe okyaravave, hiama mwi okyarava vaisi kyaahaqa hiananro. Nkye mwi okyarara hia nronraqama kye riaata. Kotira qua kyuqema kye riemwaqi vira, mwianra nronraqama kye riemwaqi quata.

20 Nkye mpo kyaiqa vare varivaro Kotiva nkyi nyaanraanrihua nkye mwi kyaiqara vareqata variata.

21 Mwi entara vaisi mpovanto nai kyaiqara rieqaro i rupa tovara e mwia kyaiqave vare varuraro ve Kotiva i nraanronra? Qio mate i rupa taira hia mwianra nronraqama kyera riaana. I huvantu kyaari aanrava qio vahirera, e qiomia qati vinanra.

22 Tiri vunyaa vaisi Karaisiva vaisi mpo rupa taaninra nraanrainranro mwi vaisiva nai rupa taaninranra hiama nronraqama kyero riaananro.

Nte mwi vaisirara mwitaa qiante tirera: E tigara, Karaisiva Saataaninraqatairo ni huvantu kyaihan'a nte qatinani varuqqo, tigara variqira quana. Mwia votima kyero hia rupa taari vaisiva qumina vaisivanto variraro Karaisiva mwia nraanrainranro mwi vaisiva Karaisiva rupa tai vaisivama variananro.

23 Kotiva nronra kyogaa Karaisiraqo nkyi huvantu kyairara tita, nkye qumina vaisivanto nkyi rupa tairata mwia kyaiqa vareqata Kotira kyaiqa hia varevora.

24 Ni kata pakyaa tuaavo, Kotiva nkyi nyaanro entara mwi entaraqaa nkye mpo kyaiqa vare varura, mwi kyaiqara nraahu matevata varaqi viqata Kotiravata variqata kyuqema kyeta nrohiate.

Poruva qaraahahua hia nraata vaati varaahuaravata tetooqaravata tura

25 Nte nkyi qaraakya nraakye qora hia nraata vaati varaahuara tirerama. Nkyiara hia ni vunyaa vaisivanto qua mpo timwa mpihana riaura. Ni vunyaa vaisivanto nianra po timwa matero ni nronraqama kyaihana nte mwia kyaiqa vaisi varuvvara tina, nte nkyiara ntena riemwa kye qua timwa nyianinranra nkyi mwutukyavanto qibaakya hirata qutaave qjata.

26 Mwaa entara uaquia hi entara muaanra vahi entarara tina, nte mwianra rieqana nkyi vaisiara mwitaama tina, Nkye mate nataama kye varira qio mwivau variqata quate, tuqqo.

27 E nraakye vaakya varaterava hia mwia qaqlira kyenanranra riaante. E ehaara variarava hia uro nraakye varenanranra riaante.

28 E uro nraakye varenanra mwia hiama e Kotira qua nteqa kyenanra. Qioma mwitaa hinanra. Mwanraatavantovata uro qoraisi varairera, mwiva mwitaa hiqaro hiama Kotira qua nteqa kyaananro. Qioma mwitaa hinanro. Mwaa entara nraata vaati varehua nronraqama kye muaanra ntaani inraikyara varaqi vivara. Nkyevata mwi muaanranra varevo tina, mwianra rieqanama nkye hia nraata vaati varaaate, tuqqo.

29 Ni kata pakyaa tuaavo, nte nkyiara qua tuva mwia okyara mwataama vahiro. Tire mwata mwaaqaa variara entava pataqiamma vahiro. Mwianra rieqatama nkyiqitai nraakye varehua hia nraakye varehua nraantantamwa kye variqi viqata Kotira kyaiqara nronraqama kye riemwaqi quata.

30 Nkye hia mwatani airi enta qati variqi virara rieqatama nkyiqitai ntatehua mwihua hia ntatehuara nraantantamwa kye variqi viqata Kotirara nronraqama kye riemwaqita quata. Kuua qarama kye nkyiqitai raihi varihua, mwihua hia raihihuara nraantantamwa kye variqi viqatama

Kotira kyaiqara nronraqama kye riemwaqi vivata nkyiqitai mpo inraikya mpo inraikya kyoqaa hi varihua hia mpo inraikya vatehua nraantantamwa kye varaqi quata.

³¹ Nkye munima kyaiqave, kyoqaa kyaiqave, varehua hia mwia kyaiqarara nronraqama kye riemwaqita quata. Mwaa mwatarara mwia kyaiqa okyayavata taiqe variharo mwiva taiqaani entava qamwata vahirara tita, nkye mwianra rieqatama Kotira kyaiqara nraahu nronraqama kye riemwaqi viqata variqi quata.

³² Ni kyakya hiva mwitaamama vahiro: Hia nkyi mwutukyavanto mwata mwaaqaanaa inraikyara mpoqama kyero vahiaro. Hia nraakyte varaari vaisiva variqaro mwiva tiri vunyaa vaisi qamwata mwatarero mwianra nronraqama kyero rieqaro mwia kyaiqa nraahu varaqiro quananro.

³³ Nraakyte varate variari vaisiva nai nraata qamwata mwatarera uti variqarora tiro, mwiva mwata mwaaqaanaa inraikyara nronraqama kyero riemwaqiro quananro.

³⁴ Mwiva mwitaa hiqaro hia Kotira kyaiqara nraahu riemwaqiro quananro. Mwiva Kotira kyaiqaravata, nai nraata kyaiqaravata, riemwaqiro quananro.

Mwanraatavantove, hia vaati varaari nraakyevave, variqaro mwiva tiri vunyaa vaisi kyaiqara nraahu riemwaqiro quananro. Mwiva nai mwanaraquraoqatirovata nai mwamwantaoqatirovata mwia kyaiqa nraahu varaqiro quananro. Vaati vataaa nraakyevanto variqaro mwivaa nai vaati qamwata mwatarera uti variqarora tiro, mwiva mwaa mwataraqaa vahi inraikyara nronraqama kyero riemwaqiro quananro.

³⁵ Nte mwaa quara tiqana nte hia nkyi antuareqanavauma tina, nte nkyi kyaahaqa hiqanama tina. Nkye aanra kyuqe hiraqaa nrohiqata Kotira kyaiqara nraahu riemwaqi viqata hia mpo kyaiqa mpo kyaiqara riemwaqita quate tinama, mwitaa tura.

³⁶ Vaisi mpovanto tiqaro, Nte hia nraata vararaitina variariva mpo nraakyevata nrohiankyorave, qiariva mwi vaisiva qiomaa nraata varaanano. Mwiva mwitaa hiqaro hiama Kotira qua nteeqa kyaananrove.

³⁷ Vaisi mpovanto tiqaro, Nte hia nraakyte vararerave. Nte qiomaa ehaara variqana qati variqina quaninrave, timwa kyero mwitaamaqiro viqaro kepukyaqama kyero variqiro quariva, qiomaa mwi vaisiva mwitaa hiqaro ehaara variqiro quananro.

³⁸ Nraakyte vararariva, mwiva qio kyuqema hiananro. Hia nraakyte vararaitiro ehaara variariva, mwiva mpoqiaqatama kyuqe hiananro.

³⁹ Vaativanto qati varirera, mwia nraatavanto mwikyantiri nraahuma variqiro quananro. Vaativantu qutu viraro mwi nraakyeva qiomaa nai kyakya hiani vaisira varaanano. Mwiva mpo qoraisi vararerera hiro Iesusirara quataave qianinra nraahuma qio varaanano.

⁴⁰ Nte ntene riemwa kye mwi nraakyerara tiqana, Mwi nraakyeva hia qaiqaa qoraisi varairera, mwiva qamwateqaroma variqiro quananrovema, tina. Nte mwitaa tiqanama Kotira mwanraquravantovata nte tu quara kuua qua mwia nraahu qiananrovema tina.

8

Unra mwanriqani vate kyarara qiove nraananrave hiave qio nraananrave? tura

¹ Nkye ni kyapara hiqata qiove tire maaketiqitai unra mwanriqani vate kyarara munima kye vara kye nraananrave qia quara nkyita timwa nyinrenra. Haunri nkye paparuqa hita tiqata, Tire mwi quara okyara ntapihi kyaurahua qiomaa mwitaa mwitaa hiananrave, tivoraa. Nkye mwi

okyarara ntapihi kyaurahuave tiqata nkyeta nrutu nraahu tuaaherevora. Hia mwitaa ti quara mwiaqo mwi quara avuqavu hiata. Nkye nanrianra nanrianra mwutukya vateqatama mwi quara avuqavu hiata.

2 Vaisivanto hini qua okyara nraahu ntapihi kyero haunri mwiva tiqaro, Nte ekyaa qua okyara ntapihi kyauqo, qiankyorave.

3 Kotirara mwutukya vahvari vaisiva variraro Kotiva mwi vaisira ntapihi kyero taqero ni nraaqiarave timwa kyeroma mwia kyaahaqa hiananro.

4 Mwi quara rieqana nte unra mwanriqani vate kyarara tirera. Tire ekyahua ntapihi kyauraro unra mwanriqvanto qumina inraikya nraahuma vahiro. Tire ntapihi kyauraro qutaa mwanriqa kuaikuvanto Kotiva nraahuma variro.

5 Mpo hiahua tiqata, Nyaamwunivata mwata mwaqaavata mwanriqa airivanto variqata tiriqa ntaqikyi variavata tiri vunyaa vaisi airivantovata variqata tiriqa ntaqikyi variarave, qiarave.

6 Mwihua mwitaa qiaavata tire tiqata, Mwanriqa kuaikuvanto Kotiva nraahuma variho, ti varunanna. Kotiva tiri tiqovama variro. Mwiva ekyaa inraikya utu taiva varihata tire mwia nraaqiaravanto qati variqi quarahuuma varita. Tiri vunyaa vaisi kuaikuvanto Iesusiva nraahuma variro. Kotiva Karaisira nronraqama kyaiharo mwiva ekyaa inraikya utu taira. Karaisiva varihatara titama, tirevata varita. Tire mwi quara rieqatama unra mwanriqanra qumina inraikyave tunanra.

7 Tire mwi quara ntapihi kyaurahua varurata hia ekyaa nraakyе qora mwi quara ntapihiara. Mpo hiahua taura unra mwanriqanra riohua, mwihua Iesusira nraaqiaraqama vita mwihua mwaa entaravata unra mwanriqani vataa kyarara nreta tiqata, Qae, mwaa unra mwanriqani vataa kyarava tiri uaqiamma timwa taarivaare, ti variarave. Mwihua mwutukya vu nraatovanto hia ntapihihata mwihua airi nraato tiqata mwi kyarara nramwa kyeta mwihua tiqata, Qae, ni kyaauriroma iho. Hia mwi kyarara nraataara vahiana nramwa kyaurave, ti variara.

8 Mwihua mwitaa ti variavata tire ntapihi kyauraro Kotiva tire kyara nraananra mwianra mwiva hia nronraqama kyero riero. Hia Kotiva tire kyara nraananra mwianra rieqaro tiri qamwata timwa taananro. Tire mpo kyara aurama te mpo kyara qati nre hiarava hiamma tiri vara mpo qarama kyairage tire kyuqema kye Kotira nraaqiara variananra.

9 Mwi quava mwitaama vahirara tita, nkye hia kyauriraitita, qiomma mpo kyara mpo kyara nrevara. Nkye mpo kyara mpo kyara nrehuavata rauriqata variata. Nkye mpo kyara mpo kyara qio nraahu nrehua variavata nkyi henahua Iesusira nraaqiara hini mwihua nronraqama kye nraato titi tiqata, Tire mpo kyara nraanranro tiri kyauruankyorave, ti variavata suqaa nkye ekyaa kyara nraivata mwihua mwia taqeta mwihua uaqia hi kyaiqaraqi tumu ntivorave.

10 Ni qua okyara mwitaamama vahiro. E mpovanto tiqara, Nte qiomma ekyaa kyara nraanrinro hia ni toqaamwu ruananrove, firava uro unra mwanriqa mwaanra nraamwuqi kyara nre variraro i qata mpovanto Iesusira nraaqiara hia kepukyaqa hiariva i taqero mwiaqatairo mwivavata hia nraani kyarara mwia nraianranro mwia kyauriraro hia nraataara nrauqoma qiananro. Nramwa kyero mwia kyaara mwi vaisiva Kotira qua nteqaa kyaananro.

11 Mwi vaisiva mwitaa ihara mwia e tiqara, Nte ekyaa kyara qiomma nraaninrave, qiananra, mwia okyaraqarama mwi vaisiva tumu ntiro. Karaisiva hia iara nraahu qutu vurave, Karaisiva i qata vakyaa mwianravata qutu vurave.

12 E mwi kyarara nrainranro i qata mpovanto hia kepukyaqa hiariva apiqama rieqaro kyara vara kyero nrainrenra, e hia mwia nraahu uaqiamwatenanra. E Karaisiravata uaqama mwatera mwia quavatama nteqa kyenanra.

13 Mwianra rieqanama nte mwi kyarara nreqana taqaariro mwi kyararaqaara ni kata pakyaa mpovanto tumu ntirera, nte mwiva tumu ntuankyo tina, nte hiama mwi kyarara qaiqaavata nramwaqina quaninra.

9

Poruva Iesusira kyaiqa vareqaro hia kyoqaa varora mwianra qamwatora

1 Qio qutaa hia mpovanto ni rupataihana nte qatima varuqo. Qutaa nianra Karaisiva qua timwa nyianrive tiro, ni nronraqama kyahana varuvama varina. Iesusiva nronraqama kyai vaisihua nraantante qutaama nte tiri vunyaa vaisi Iesusira taquavama varina. Qutaa nte tiri vunyaa vaisi mwia kyaiqa vare varuqata nkye ni kyaiqa mwiaqatai Iesusira nraaqiaraqama vita variara.

2 Mpo ihua nianra hia Iesusiva nronraqama kyai vaisiva variaro tivata nkye hia mwitaa tiraiti, nkye qutaa nianra Iesusiva i nronraqama kyai vaisiva variaro tivara. Nkye mwi quara nraahuma tivara. Nkye Kotira vataqita aandra kyuqeraqaa vivaro mpovanto mwia taqero nianra qutaama Iesusiva mwia nronraqama kyaharave qiananro.

3 Vaisi mpo ihua niqaa qua vataivera, nte nkyiari mwitaama kyena timwa nyianinra,

4 Nte Kotira kyaiqa vare variariro tavave nianra qao tiraqe nte kyaravata nramanrivata hia nraaninra? Hiama mpovanto nianra qao qiariva variro.

5 Iesusiva nronraqama kyaihua mponramwuvata, Jesusira qatanramwuvata, Pitaavavata, mwihua nraakye varate variqi vi variarara tiro, tavave nianra qao tiraqe nte hia mwihua hiante ntevata Iesusira vataqi quani nraakyera mpo varena mpo mwatukya mpo mwatukyaq nrohianinra?

6 Tire Vanavaasikya Kotira kyaiqa vareqata hiama nraakye qorara kyara timwiate tiraita, tetatana kyuauquqo kyaiqa vara kyeqa tetatana ntaqikyi varunanra. Iesusiva nronraqama kyo vaisinramwuhuaqitaita tiretana nraahu mwitaa hi varunanra.

7 Qikye, qaami vaisivanto qaami kyaiqa vareqaro nai munima kyeqarove mwi kyaiqara vare variro? Qaqao, hia mwiva nai munima kyahira. Mwiaqaa ntaqikyiva mwia munima mwinra. Vaisivanto uaini vara tutairaro tamwa riemwa tairaro mwiya hiave nai tutaaninraqatairo tamwa hiqu kyero nraananro? Qaqao, mwia qioma mwitaa hiananro. Sipisipiqa ntaqikyi variva, mwiva hiave qio nai sipisipi nraamwa nraananro? Hiama mpovanto mwianra qao qiananro. Mwiva qioma naivata nraananro.

8 Mwaa quara tiqana nte hia vaisivanto ti varia quara nraahu rieqana tirera. Kotira mpukuquivata mwi quara okyara vahiro.

9 Kotiva Mosesira mwu quava mwitaama tiro:
Uiti uru ntakakaru hiarive tiro, purimakauvanto kyuquqo
mwivau ntamwaqiro viro nrinro hianinra
hia mwia nro rupa taante. Mwia qati kyairaro
mwivavata uiti uru mpo hira nraanrive, tura. (*Lo 25:4*) Kotiva mwi quara
purimakaura nraahu rieqaro turave iho?

10 Kotiva mwi quaraqaa ntumwa kyero tirivata kyaahaqa hirero turave iho? Eo, mwiva tirivata kyaahaqa hirero mwi quara timwa torave. Mwi quara okyara mwataamama vahiro: Kyara vara tirero mwata quvuariavata, kyara vantu varero nrianrivavata, mwitanahua nraakiara mwaa

kyarara qioma tetatanavata nraananrave tivara. Qua mwia okyaravanto mwitaama vahirara tita, mwitanahua qioma nrevara.

11 Vaisivanta kyara humwu mwataaqi vara tintema kye tire nraante Kotira qua nkyi vu nraato mwutukyaqi vataunanra. Vaisivanta kyara vara tutaira vantintema kye hiave tire uro nkyiqitai kyarave tuavaaqave varaananra?

12 Vaisi mpo ihua nkyiqitai mwitaa inraikya vareva vahirera, tire nkyiqitai varaarava mpoqavatama vahianaro. Tire mwi inraikyara mwi inraikyara nkyiqitai varataama vahivevata hia uro nyaanru timwa kye varauunanra. Tire qaqira kye nkyi mpo inraikyavanto antua kyairata nkye Karaisira qua hia riemwaqi vivorave timwa kye mwiaqaatai tire hia nkyiara mwi inraikya timwiate tiraiti, tire tetavanto tetaga ntaqikyiqi viqata muanaa nto inraikyara varaqi viqa Karaisira qua nkyi timwa nyiavanana.

13 Nkye hia ntapihiarave? Ierusaremini Kotira nraamwuqi Kotira kyaiqa varevariahua, mwihua mwi nraamwunraqitai nkyiari kyara vara kyeqata nre variara. Mwini Kotirani quara vahi aasau rukyeta qia quara mwate variahua quara vahi aasau hini nkyiarivata nraanra. Mwihua mwi kyarara hini nkyiarivata nraavaro Kotiva hia mwihuara tirave.

14 Kuua qarama kyero tiri vunyaa vaisivanto qua vatero tiqaro, Ni qua timwa nyiqi vi varihua varivata mwia hiniqama mwihua qua rie nraakye qorahua, mwihuama mwihuama qyuqema kye ntaqikyiqi vivata qio variqi quate, tura.

15 Mwi quava vaihana nte hia mwitaa hurave. Nte haaru nkyivata variqana Karaisira qua nkyi timwa nyiavara mwia hiniqama hia nte nkyiara kyarave mpo inraikyave mpivage nte qio variankye qiavara. Nte nkyiqitai mwi inraikyara mwi inraikyara qio varaariva vahuvanavata qaqira kyaavara. Nte qara mwaa ntigana nte hia nkye niqaa qyuqema kye ntaqikyateravauma qara ntina. Hia nte nkyiara mwitaa tirera. Nte qutu vinā hia nkyi kyapata variani entara mwi quara qiaatarave. Nkyiqitai mpo inraikyave kyarave munimave hia nyaanruma kye varaurara riena nte qamwateqana ntena mwahuta ti varuqo. Nkyiqitairo hiama mpovanto tiqaro, Nte mwia mpo inraikya mwunraqa mwiva mwitaa tiharo mwia quavanto unra quama vahiananrove, qiananro.

16 Nte nraakye qora Karaisira qua timwa nyiqi viqana nte hia ntene mwahuta tirera. Nianra mwi quara timwa nyiante tirara tina, nte mwi quara nraakye qora timwa nyianriva nraahuma vahiro. Qikye, nte mwi quara hia qiariro Kotiva niqaa qua vatairaqe nte uaqiamma kyena varianinra. Mwianra rieqana nte hia ntene mwahuta tirera.

17 Hia nte ntene riemwa kye tiqana, Kyai nte Karaisira qua timwa nyiqi quankye, turave. Nte mwitaa timwa kye ntene kyakya hiraqa varaaninra mwia nte qiomaa mwia qiaata kyoqaaavata varaaninra. Hia nte mwitaa hirerama. Kotiva ni kyauquqi mwi kyaiqara vatero nianra mwi quara timwa nyiante tirara tina, nte mwi quara timwa nyiqi vura.

18 Nte mwitaamaaqi viqana nte mwia qiaata namra kyoqaa varaurave? Hia nte kyoqaa varaura. Ni kyoqaa nraahumwa mpo qara hi kyooqaaavata mwataama kyeroma vahiro: Nte Karaisira qua nraakye qora timwa nyiqanama hia munimave mpo inraikyave mpiate timwaqina vuva, mwivama ni kyoqaa vahiro. Nte Karaisira qua nkyi timwa nyiqana qio nkyiqitaina munimave mpo inraikya varaariva vahianavata nte qaqira kye hia nkyiqitai vare varuva, mwiva mwia ni kyoqaa vahiro.

19 Hia vaisi mpovanto ni rupa taihana nte mwia kyaiqa vaisi varurave. Nte qati varuvama varuqo. Nte qati vaisi varura mwianra nte hia nronraqama kye riaraitina, kyai ekyaa nraakye qora Jesusira aanraqaa sita

vare quankye tina, nte rupa taahua nraantantamwa kye variqana mwihua kyaiqa vaisi nraahu varirerana varura.

20 Nte Iutaa nraakye qoravata variqana mwihua Jesusira aanraqaa quate tina, Iutaa nraakye qora Mosesira qua okyarara rieqata variqi quantema kye ntevata variqi vura. Nte hia Mosesira qua mwemwaniqa huva variqanavata mwihua Karaisira qua riaate tina, nte Mosesira qua okyara mwemwaniqa hina nrohi varina.

21 Kuua qarama kye nte mpo mwatanaahuavata variqana mwihua hia Mosesira qua okyarara riemwaqi quantema kye ntevata mwihua Jesusira aanraqaa quate tina, mwihua nraantantamwa kye variqi vura. Nte mwitaama kye variqi viqana hia nte Kotiva timwa tai quara qaqira kyaraitina, nte Karaisira qua mwemwanima varina.

22 Hia kepukyaqa hia nraakye qorahua variavana nte mwihuavata variqana mwihuavata Jesusira aanraqaa quate tina, ntevata vina mwihua nraantante hia kepukya vahivara votima kyena varura. Ekyaa mpo qara mpo qarama kye vari nraakye qorahua Jesusira aanraqaa quate tina, nte ekyaa mwihua variantema kyena ntevata variqina viqana mwihuavati kyaiqa utura.

23 Nte Karaisira qua kyuqe qua rieqana nte mwitaamaqina vura. Nte mwitaamaqi vi variariro Kotiva nivata mpo ihuavata kyuqema timwa taarive tina, nte mwitaamaqi viqana Karaisira qua timwa nyiqi vi varura.

Kyoqaa vararerera tire kepukyaqama kye hiantaara

24 Nkye hia ntapihiarave? Mpo inraikya vataara vararerata nai ntutaa kye nai ntutaa kye hiante varia nraakye qorahua airivanto hiantaavarao kuaiqiyavanto mwihuaqitairo nraatara kyero kyoqaa varairave. Nkyevata Jesusira aanraqaa viqata kyoqaa varehua hianteta quata.

25 Nai ntutaa kye nai ntutaa kye hianteqata kyoqaa vararerera hiahua tau-raaqama kye kyuqu kyaauqvanto huvantu vaantu hiro mwamwantavanto qio vahiarive titi, ekyaa nkyiari mwamwanta kyakya hira qaqira kyeta uro mwataara hiara.

Mwihua mwitaa hiqata kyoqaa vararerera kyatari mwanre qiatqaa qu nyataara mwia nraahu varaara. Mwihua mwanrevanto tamusa quaninranra tera hiqata kepukyaqama kye hiantaara. Tire hia mwihua nraantante qumina kyoqaa taiqa quaninranra riaraitita, tire tetu ekyaa enta qati variqi quana kyoqaarara rieqata tire teramate kyuqema kye Kotira aanraqaa vi varunanna.

26 Mwianra rieqana nte hia tuqasaqa hina viti viri hiqana Kotira aanraqaa virera. Nte nriqi vataaninraqaa viqana avuqavuma kye virera. Hia nte vaisi mpovanto ntaqiqaro quminanraqi kyaauqu tuto kyaintema kye ntevata kyauqu tutokyagi virera.

27 Nte Karaisira qua mpohua timwa nyiqi vina mwiaqatai ntenga raupiri hiankyorave tina, nte ntenga kyuqema kye ntaqikyiqi vi varura. Nraaqiaravanto nai qora qua vataqiro quarive tiro, mwia qova mwia ntuquqira. Mwia nraantantamwa kye nte ntenga mwamwantavanto tumusa quarive tina, nte ntenga mwamwanta ntuququ vi varura.

10

Nkyevata Iutaa haivaqahua hia Kotira aanraqaa nrohuntema kye nrohivore tura

1 Ni kata pakyyaa tuaavo, tiri Iutaa haivaqahua qumina mwataqaa nrohita uro taiqa vu quarara nkyevata nraato tuata. Mwi entara Kotiva mwihua kyaahaqama nyatovaro tonamwuvanto ekyaa mwihuaqaa ntaqikyiqiro

viqaro aanra nyaamwute varuvata ekyaa mwihua nramanri nronra qio qareta vura.

² Mwihua ekyaa tonamwuqivata nramanriqivata Mosesira vataqita vurarita tita, mwihua ekyaa mwi entara Mosesirā nramanri varohua votima kye varura.

³ Mwihua ekyaa qumina mwataqaa hia kyaravata nramanrivata vahuraqa Kotiva nyu kyarara nraahumwa mpo qara hu kyarara nramwaqi vi varura.

⁴ Ekyaa mwihua Kotiva nai nyu nramanrinra nramwaqi vi varura. Mwihua mwi mwataraqaa nrohiqata Kotiva nyu nramanrinra oriqtai nre varuvaro Karaisiva mwi nramanrinra nyinro mwi orira votima kyero mwiva mwihua kyapata variqiro vura.

⁵ Kotiva tiri haivaqahuaqaa kyugema kyero ntaqikyuvata ekyaa mwihua mwia qua riaataara vahuvata airivanto qaqira kyeta mwia qua nteqa kyovaro mwia kyaara Kotiva hia mwihua qamwata nyatovata mwihua qutu vuvaro mwihua nyamwantavanto qumina mwata mwiaqaa mpona mpona vahura.

⁶ Haaru Iutaa haivaqahua hia Kotira qua rieqata variqi vura, tire mwi quara rieta tirevata mwitaama kye variqi quarora. Mwihua mwutukyavanto qora kyaiqara vahuntema kyero tiri mwutukyavantovata mwitaa hiankyora.

⁷ Mwihua hinivanto unra mwanriqa nrutu tuaaherontema kye tirevata mwitaa hiarora. Kotira mpukuqi qara ntumwa tova mwihuara mwitaama tiro:

Nraakye qoravanto mwatakya vi variqata

kyaravata nramanrivata nreta

mwiaqaataita api ntetutiqeqata varurave, tura.

(Kyatura 32:6)

⁸ Mwi entara mwihuaqitaita mponramwuvanto api qaraqita vura kyaara Kotiva mwihua saihovata kuaa enta airi 23,000 nraakye qoravanto qutu vura. Tirevata mwihua nrohuntema kyeta nrohiarora.

⁹ Tire mwihuaqitaita mpo uhua Kotira mwataara huntema kye tirevata Kotira mwataara hiarora. Mwihuaqitaita mponramwuvanto Kotirara hia tiriqa kyuqema kyero ntaqikyiho timwa kye Kotira mwataara huvaro mwia kyaara Kotiva quaiha vara kyovata mwihua airinramwu kutu taiqa kyora.

¹⁰ Mwihuaqitaita mponramwuvanto Kotirara nrutu nraunru/nrunru nraanru timwaqivi vuvaro mwia kyaara nyaamwusairo Kotiva titova vaisi ru kye varuva mpovanto tumu mwihua ru taiqa kyora. Mwianra rieqatama tire mwihua hunte hiarora.

¹¹ Mate mwaa vari nraakye qorahua Kotira okyara ntapihi kyeta taqaate tiro, tiri haivaqahua mwitaama kye api nrohi varuvaro Kotiva mwihua ntuquutuqiro vura. Tirira mwihua mwi quara taunru kyeta mwihuavata mwitaa hivorave tiro, mwi quara Kotira mpukuqi qara ntumwa tora. Ekyara enta nri ntaariva qaumato vahata tire varurahuara tita, tiri haivaqahua qua qara ntumwa tora tire taunru kye mwihua votima kye api nrohiarora.

¹² Mwi quara rieqatama tahuave tire Kotira aanraqaa kepukyaqama kye varuro tihua rauriqata variata. Nkyevata uaqia hi kyaiqaraq tumu ntita qora aanraqaa vivora.

¹³ Nkyiara uaqia hi aanranraqaa quate tiro, airi inraikyavanto nkyi mwataara hirero uti varira. Mwi inraikyava hia nkyi nraahu mwataara hirero uti varira. Mwi inraikyava ekyaa nraakye qora mwataara hirero uti varira. Mwitaa hi variharo Kotiva nkyiara nronraqama kyero riemwaqiro

vi variva uaqia hi kyaiqava nkyi nraatara kyaankyorave tiro, Kotiva nkyi kepukyaqama nyatairata nkye uaqia hi aanranraqataita ntuqema kye kyuqe aanraqaa viva qiomma vahiananro.

Kotira vataqi viqata kuua vakya uaqia hi tove vaananravata vataqi quarora

¹⁴ Ni nramwunaa tuaavo, mwi quara rieqatama unra mwanriqa nrutu tuaahere okyarara nkye mwoqqa mwiati.

¹⁵ Nkye kyuqe vu nraato vataahua variqara tita, nkye nkyetavanto ni qua tukyama kye kyuqe quave, uaqia hi quarave, qiata.

¹⁶ Tire Karaisira nraanrevanta tumunra mwianra rieqata ntuvantua ma vi variqata uaini vara kye Kotirara kyuqeve timwa kye kaapu kuaaqitai mwi nramanrinra vara kye nreqata tire hiave Karaisiva tiriria rieqaro nai nraanre rauraura mwianra rieta? Mperetivata nteqakye nreqata hiave tire Karaisiva nai mwamwanta tiri timwunranra rieta?

¹⁷ Mpereti kuaiku vahata tire airivanto mpereti kuua mwikuraqatai nteqa kyeqqa nre varunanranra tita, tire nraakyne qora airi mwihua kuua mwamwantama varuro.

¹⁸ Nkye Isareris vaisiara riaata. Mwihua Kotirani quara aasau rukyeta vateqata mwihua nkyiarivata mwi kyarara nreta mwihua Kotiravata kuaaqi varirerata mwitaa hura.

¹⁹ Ni qua okyaravantu nataamave vahiro? Mwataamave vahiro? Unra mwanriqa qutaa varirani vaisivanta kyara mwia mwinranro qiove mwia kyaahaqa hiananro? Qaqao, hia ni qua okyaravantu mwitaama vahiro.

²⁰ Hia Kotira qua riaahua unra mwanriqani quara rukye variara mwia mwihua vaananima quara rita. Mwihua hia Kotiranivauma mwi quarara rita. Nkye hia Kotira qua riaahua mwihua variqata mwihua nkyiari vaanani vate kyarara nreqata nkyevata vaana mwihua kyapata kuaaqi varirovare.

²¹ Nkye tiri vunyaa vaisi mwia kaapuqitai mwia nramanri nramwa kyeta mwiaqatai uro vaanavantu hiani kaapuraqi nrevora. Nkye hiama qio tiri vunyaa vaisi kyapata taintaraqatai kyara nramwa kye mwiaqatai uro vaanavantu hiani taintaraqatai nrevora.

²² Tiri vunyaa vaisi raraqa taankyo tita, tire hiama uro vaana kyapata kuaaqi variara. Hia tire tetu vunyaa vaisi nraatara kyaurahuave. Haunri tire tetu vunyaa vaisi nraatara kye kepukyavanto varuro qiarora.

Vaisivanta hia nai nraahu kyuqema kyero variqiro quaninranra riaari

²³ Hia tiriria qao tihata tire ekyaa inraikya qio nraahu utuarahuuma varita. Mwitaa hiararovata hiama ekyaa inraikya mwiva tiri kyuqema timwataanranro. Hia tiriria qao tihata tire ekyaa inraikya qio nraahu utuarahuuma varita. Mwitaa hiararovata hia ekyaa inraikyavanto tiri kyaahaqa hiananro.

²⁴ Vaisivanta hia nai nraahu kyuqema kyero variqiro quaninranra riaari. Mwiva variqaro nai hena vaisi kyaahaqa hianinranravata riaari.

²⁵⁻²⁶ Kotira mpukuqi mwitaama tiro:

Mwatavata, mwatanyaaya kyaravata,

Kotiva hi inraikyava nraahu vahirave, tura.

(Ihi 24:1) Ekyaa

kyara Kotiva hi inraikyava vahirara tita, nkye ekyaa kyaara nreva nraahuma vahiro. Mwianra rieqatama nkye quara kyara maaketiqi vatera qiomma kyoqama kye nrevora. Nkye mwia kyoqaa hiqata hiama kyapanaapara hita taisairo varaqiro vatairave tiraitita, qati mwia nraahu kyoqamaqita uro nraata.

²⁷ Mpovanto hia Kotira qua riaari vaisiva nrita nivata kyara nraate tirata nkye mwini uro mwiavata kyara nraivera, hia uro kyapanaapara hita taisairo mwi kyarara varaqiro vatairave tiraitita, qati nraata.

²⁸ Nkye nranrenra hivaro mpovavanto nkyiara tiqaro, Qaqao mwi kyarara unra mwanriqani vataarama iho, tirera, nkye hia mwi kyarara nraata. Toqaamwu ruankyo tita, hia mwi kyarara nraata.

²⁹ Hia nte nkyi toqaamwu ruarinra mwianravauma tuqo. Nte nkyi timwa nyi vaisira mwia toqaamwu ruankyo timama tuqo. Mwiva nkyiara mwi kyarara unra mwanriqani vataa kyaravama vaiho tirata nkye mwi kyarara nraivarso mwi vaisiva tiqaro, Mwihua mwi kyarara hia nraataara nraavarso ni toqaamwu riho, qiankyorave. Nte nkyiara mwitaa qiariro mpovanto qao tiqaro mwitaama qiananro,

³⁰ Nte ekyaa kyarara Kotirara kyuqeve timwa kye nraanrinro tavave nianra e uaqia hiaro timwa kyero niqaa qua vataananro?

Nte Kotirara kyuqeve qiani kyarara mpovanto hia qao qiarivema, qiananro.

³¹ Mpovanto mwitaa tiraqe nte nai mwitaama timwa mwianinra. E kyarave nramanrise nrenra mpo kyaiga mpo kyaiga vareqarama Kotira nrutu nraahu tuaaherarera hiqara mwitaamaqira quante, qianinrave. Nkye mwianra rieqatama nkyi hena vaisi toqaamwu ruankyo tita, rauriqata variata.

³² Iutaave, Kirikive, mpo mwatanaave, Iesusira nraaqiara hini ihuave, nkye mwihuara rieqata variqi viqa mwi mwatanaahua tire utuananraqaatai mwihuua uaqiahiraqi tumu ntivorave timwa kye rauriqata variqi quata.

³³ Nkyevata nte hunte hiata. Nte mpo kyaiga mpo kyaiga varegana nraakyeye qora qamwata nyataankye tina, vare varura. Kotiva ekyaa mwihuua sitaarive tina, nte hia ntene kyuqema mataaninranra riaraitin, nte mwihuua kyuqema varirara nronraqama kye rieqana variqi vi varura.

11

¹ Nte Karaisiva nrohuntema kye nrohurara tita, nkyevata nte hunte hiata.

Nraakyevanto nkyiari qiana nraamwu hirara tura

² Nkye nianra rieqata nte qua okyara nkyi timwa nyunranra riemwaqi vi variarara tina, nte nkyiara qamwateqana varuqo.

³ Nkye mwaa quara ntapihi kye riaate tina, nte nkyi timwa nyinrenra. Ekyaa vaisiqaa ntaqikyi variva Karaisivama variro. Nraakyevanto variharo mwia vaativanto mwiaqaa ntaqikyi varivama variro. Karaisiva variharo Kotiva mwiaqaa ntaqikyi varivama variro.

⁴ Karaisiva vaisiqaa ntaqikyi varira, mwianra rieqaroma nkye ntuvantuuma vita varivaro nkyiqitairo vaisivanto Kotirara aakyara tirera hirove, Kotira qua tirera hirove, mwiva sivirera, mwi vaisiva hia nai qiatatntumwaquari. Mwi vaisiva nkyi suqaa siviro variqaro nai qiatatntumwaquari, mwiva Karaisira kyaaru mwataananro.

⁵ Qaiqaa tirera. Vaativanto nraataqaa ntaqikyi varirara tiro, nkye ntuvantuamavi varivaro nkyiqitairo nraakyevanto Kotirara aakyara tirera hirove, Kotira qua nkyi timwa nyinrenra hirove, mwiva sivirera, mwi vaisiva hia nai qiatatntumwaquari, nkyi suqaa siviro qua tirera, mwi nraakyeva nai vaati kyaaru mwataananro. Mwitaa hiari nraakyeva qora hi nraakyeva nai qiatatntumwaquari, nkyi suqaa siviro qua tirera, mwi nraakyeva nai vaati kyaaru mwataananro. Mwitaa hiari nraakyeva qora hi nraakyeva nai qiatatntumwaquari, nkyi suqaa siviro qua tirera, mwi nraakyeva nai vaati kyaaru mwataananro.

⁶ Qikye, nraakyevanto nai qiata hia nraamwuma tairera, mwiva nai qiata toqa kyaarive. Mwiva tiqaro, Qiata toqa kyenave, ekyaa humutu kyenave, mwitaa hiariro ni kyauruvarivaare, tirera, mwiva nai qiata nraamwuma taarive.

⁷ Kotiva vaisi utirero nai nraantantamwa kyero ututovaro Kotira kepukyavanto vaisiqaatairo vara rairara tiro, vaisivanto siviro nraakyeye qora suqaa qua tirera hiro hiama nai qiata ntumwaqu taananro. Nraakyevanto qati vaisi kepukyavanto mwiaqaatairo vara rairara tiro, mwiva nai qiata ntumwaqu taananro.

⁸ Kotiva vaisi utirero hia nraakyeqaatairo vaisi utu tora. Kotiva vaisiqaatairo nraakyeye utu tora.

⁹ Kotiva hia nraakyera rieqaro vaisi utu tora. Kotiva vaisiara rieqaro nraakyeye utu tora.

¹⁰ Kotiva vaisiara rieqaro nraakyeye utu torara tiro, mwianra rieqaro nraakyevanto ni paativanto niqaa ntaqikyi varivave tiqaro nai qiataqaa ntumwaqu taananro. Mwiva nai qiataqaa ntumwaqu tairata nyaamwunyaahuavata mwia taqeta mwianra nai vaati qua riemwaqiro vi vari nraakyevave tivara.

¹¹ Nraakyevanto hia vaisi kyaahaqa hiraro hiama qio vaisivanto variqiro quananro. Vaisivanto hia nraakyeye kyaahaqa hiraro hiama qio nraakyevanto variqiro quananro. Vaisivanto nraakyeye kyaahaqa hiraro nraakyevanto vaisi kyaahaqa hiarive tiro, Kotiva vaisivata nraakyevate utu tora.

¹² Haaru Kotiva vaisiqaatairo nraakyeye utu tovaro nraakyevanto qovarama vura. Mate mwaa entara nraakyevanto qoraisi nraaqiara mwataqiro viharo mwiaqaatairo vaisivanto qovara hi varira. Mwitaa iharovata qio ekyaa inraikyavanto Kotiraqaatairo qovara hi varira.

¹³ Kyai nte mwaa quara qiarita nkyetavanto tukyama kye qiove hiave qiove qiata. Nraakyevanto hia nai qiata ntumwaqu tero qiove mwiva nraakyeye qora suqaa siviro Kotirara aakyara qiananro? Qaqao, nraakyevanto hiama qio mwitaa hiananro.

¹⁴ Nkyevata nraakyeye qora okyarara rieta tiqata, Vaisi qiata mpuahaa vahirera, mwiva kyauruananrove, ti variara.

¹⁵ Nraakyeye qiata mpuahaa vahianinra mwia qiove. Nai qiata kyaahi mpuahaa mwiva mwia qiata ntumwaqu kyaiharoma nraakyevanto qio variro.

¹⁶ Mwi quarara airi qua tiqaro ni qua nraatara kyarera utuani vaisirara nte mwitaama qianinra. Nraakyevanto nraakyeye qora suqaa Kotira qua timwa nyinrenra hiro nai qiata ntumwaqu taarive, tura. Nte mwi quara nraahu timwa nyuqata Iesusira nraaqiara mpoqi mpoqi variahua ntapihi kyaara. Hia tire mwi quara qaqlira kye mpo qua riarerera. Mwi quara nraahu riemwaqi virera.

Tiri vunyaa vaisi kyara mperetivata uainivata apiqama kye nre varurara tura

¹⁷ Nte nkyiara mwi kyaqiara mwi kyaqiara mwataama kye varaate tiqana nkye mpo inraikyaqia utuarara rieqana nte hiama nkyiara qamwatauqo. Nte riauqata nkye mwaanra tirera ntuvaantuama vita kyuqema kye variataara uaqjama kyeta variara.

¹⁸ Tohare nte mwaa quara nraante nkyi timwa nyinrenra. Mwitaa tihana riaura: Nkye mwaanra tirera ntuvaantuama vita variqata nkye inronra hiqata ntainra vita variara. Nkyiara mwi quara tihana nte mwi quara rieqanama mwi quava hini qua quttaa qua vahiananrove tura.

¹⁹ Nkye mponramwuvanto tiqata, Tiri quavanto nraahuma avuqavu iho, timwa kyeqata mwia kyaara ntainra viqata variara. Mwia qio qutaama

nkye ntainra vita varivata mwiaqaatai avuqavuma vari nraakyе qorahua qovarama vivara.

20 Nkye ntuvaantuama vi variqata tiri vunyaa vaisi kyara naitarama kye nraataara vahata nkye apiqama kye nre variara.

21 Nkye ntuvaantuama vita variqata nkyeta kyakya hiraqa kyara vara kye nramwaquavata mpo hiahu nraataa ihata variavata mpo hiahu nronraqama kye uera nramanri nreta uera ntaara.

22 Qikye, nkye hia nraamwuqi variahuate? Nkye nkyeta nraamwuqi variqata mwini kyaravata nramanrivata nramwa vareta, mwiaqaatai uro mwaanra tirerata ntuvaantua hiataara vahata nkye hia mwitaa hi variara. Nkye variavata vehi nraakyе qoravata mwipi variavata nkye nkyeta nraahu kyara nraavata mwihua kyaurihata variara. Qikye mwihuavata Kotira nraakyе qora variavata nkye mwihua kyaurihata inraikya vara nyinrenrata uti variara. Nte nkyi kyaiqa mwianra riena nte nkyiara nanreve qianinra? Nte nkyi qamwatave nyataaninra? Qaqao, nte hiama nkyi qamwata nyataaninra.

Iesusiva mperetiavarata uainianravata tu quara

(Matiu 26:26-29; Maaki 14:22-25; Ruku 22:14-20)

23 (Kyai nte qaiqaa tiri vunyaa vaisivanto tu quara nkyi timwa nyianri.) Tiri vunyaa vaisivanto mwi quara ni timwa mpuvana nte mwi quara nkyivata timwa nyiavara. Mwi quava mwataamama vahiro; Iutaasiva mwia qovarama kyarerero veva ntero vu entara enta mwipi tiri vunyaa vaisivanto Iesusi Karaisiva nai nraaqiaranramwuvata kyara nreqanro mpereti vara kyero

24 Kotirara kyuqeve timwa kyero nteqa kyero nai nraaqiaranramwu nyinro tiqaro, Mwaa ni mamantave. Nkyiara rieqanama nkyi nyuqo. Nkye nianra rieqatama mwi kyarara nramwaqita quate, tiro.

25 Mwitaa tuvata mwia nraaqiaranramwuvanto mwi kyarara nramwa kyovaro kuaa qarama kyero mwiva uaini kaapu vara kyero tiqaro, Mwaa nramanriva ni nraanreve. Kotiva nraakyе qora kyapata kuaaqi taaqau viro varirero qaraakya qua vataariva, mwi quava kyaakueqama quarive tiro, ni nraanrevanto mwi quara kyaakueqama kyaananrove. Nianra rieqama mwi nramanrinra nramwaqita quate, tura.

26 Iesusiva mwitaa turara tita, nkye ntuvaantuama vi variqata mpereti mwiaavata, nramanri mwiavata, nramwaqita viqata nkye tiri vunyaa vaisivanto tiriara rieqaro qutu vurara nkye nraakyе qora timwa nyi variara. Nkye mwitaamaqai vivaro tiri vunyaa vaisivanto uro ntantero tumuanri.

Hia paparuqama kyeqata mwaa kyarara nraata

27 Mwi quava mwitaama vahirara tiro, mpovanto uaquia hi kyaiqara utuqi viqaro tiri vunyaa vaisi mwia mperetivata mwia nramanrivata nrairennra, mwiva tiri vunyaa vaisi mwia mwamwantavata mwia nraanrevata uaqiamma mwataairaro mwia kyaara mwiaqaa quama vahianro.

28 Mwitaa hankyoraye tiro, vaisivantove nraakyevantove nai mwutukya vu nraatoqi uaquia hi kyaiqava vahiankyo tiro, nai tuykama kye taqero mwiaqaatairo mpereti mwiavata, nramanri mwiavata, qio nraananro.

29 Mpovanto paparuqama kyero nreqanro hia Karaisira mwamwantara ntapihi kyero riaraitiro, qumina mperetivata nramanrivata nraanriva, naivantomai naiqaa qua vataananro.

30 Nkye ntuvaantuama vita apiqama kyeta mwi kyarara nre variara mwiaqaa nrama nkye mponramwuvanto hia kepukya nraakyе qora variavata mponramwuvanto nriqa vi inraikyara vare variavata mponramwuvanto qutu quavo.

³¹ Tire mwi kyarara nranrenra hita vuni teta uaqia hi inraikyara utuarava qati vahiankyo tita, teta mwutukya vu nraato tukyama kye taqeta, mwiaqaatai qiomma mwi kyarara mwi nramwanrinra nraanranro hia tiriqaa qua vahiananro.

³² Tiriara mwaa mwataraqaa varihuavata variqata nronraqama kye qua varevorave tiro, tiri vunyaa vaisivanto tiri kyaiqa mwataarama kyero taqamwaqiro viqaroma tiriara avuqavuma vahi aanranraqaa quate tiro, tiri ntuqufi varira.

³³ Ni kata pakyaa tuaavo, mwi quara rieqatama tiri vunyaa vaisi kyara nranrenrata ntuvantuama vita variqa nkye qakyoma kye mpohua sekya variqata kuaa vakya kuaaqi mwi kyarara nraata.

³⁴ Mpovento kyara nraataa hiraro nai nraamwuqi nrenro ntuvantua hiraqi nrianri. Nkye mwitaama kye uro ntuvantuama vita varivaro Kotiva hia nkyiqa qua vataananro.

Qio nte nraakiara nkye hinani uro ntena mpo quavata nkyi ntapihi kye timwa nyinrenra.

12

Kotira mwanraquravanto mpo qara mpo qarama kyero nraakye qoraqi kyaiqa utuaninranra tura.

¹ Ni kata pakyaa tuaavo, Kotira mwanraquravanto mpo kepuuya mpo kepuuya nkyi tukyama nyiani okyarara nkye api riemwaqita vivora.

² Nkye nkyeta haaru nrohi varu okyarara nkye ntapihiara. Haaru nkye hia Kotirara rio entara qora kyaiqvanto nkyi vara apiqama kyovata nkye uro unra mwanriqa hia qua tu inraikyara qamwata mwate varura.

³ Nkye mwi entara hia Kotira mwanraqurara riaraitita, api nrohurara rieqana nte mwaa quara nkyi timwa nyinrenra. Kotira mwanraquravanto vaisi kyaahaqa hi varirera, mwi vaisiva hiama qio tiqaro, Kyai Iesusiva uaqama quarive, qiananro. Hiama qio mwitaa qiananro. Kotira mwanraquravanto hia vaisi mpo kyaahaqa hirera, mwi vaisiva hiama qio tiqaro, Iesusiva vunyaa vaisivanto variho, qiananro. Kotira mwanraquravanto kyaahaqa hiari vaisiva, mwiva nraahuma qio mwitaa qiananro.

⁴ Nraakye qoravanto Kotira kyaiqa mpo kyaiqa mpo kyaiqa varaate tiro, Kotira mwanraqura kuaa mwiva nraahu mwi kepuuya ntainra kyero nyi variira.

⁵ Nraakye qoravanto Kotira kyaiqa mpo kyaiqa mpo kyaiqa vare variavaro tiri vunyaa vaisi kuaa mwikuva nraahu mwihuqaa ntaqikyi varira.

⁶ Nraakye qoravanto mpo kyaiqa mpo kyaiqa mpohua vara nyate variavaro Kotiva kuaikuvanto mwihu su nyaato kyuqema nyataihata mwihu mwitaa hi variira.

⁷ Ekyaa Kotira nraakye qoravanto kyuqema kye variqi quate tiro, Kotira mwanraquravanto mpo qara mpo qara hi kyaiqara nraakye qora nyaamwute varira.

⁸ Kotira mwanraquravanto mpo kepuuya vaisi mpo mwihanro mwi vaisira kyuqe vu nraato vaiharo mwiva kyuqe qua timwa nyiqiro vi variira. Kotira mwanraqura kuaa mwiva nraahu vaisi mpo nraahumwa mpo kepuuya mwihanro mwiva Kotira qua okyara timwa nyiqiro vi variira.

⁹ Kotira mwanraqura kuaa mwiva mpo kepuuya vaisi mpo mwihanro mwiva mpooqama kyero Kotirara riemwaqiro viqaro quitaama Kotiva mwi kyaiqara mwi kyaiqara qio varaanrove ti variira. Kuaa mwanraqura mwiva mpo kepuuya mwihanro mwi vaisivave, mwi nraakyevave, nriqa qua nraakye qorahua kyuqema nyate varira.

10 Mpo kepuuya mwihanro mpovanto nronra kyaiqa nraahumwa mpo qara hi kyaiqara vare varira. Kotira mwanraquravanto mpo kepuuya mpore mwihanro mwiva Kotira qua qovarama kyeqaro vutu kyero timwa nyi varira. Mpore mpo kepuuya mwihanro mwiva variqaro mpovanto timwa tai quara riemwaqiro viqaro tukyama kyero taqero tiqaro, Mwaa quara Kotiva timwa tai quarave, mwi quara tovevaanavanto timwa tai quarave, ti varira. Kuua mwiva mporā mpo kepuuya mwihanro mwi nraakyevave mwi vaisivave nraahumwa mpo quaqitairo ti varira. Kuua mwiva mpore mpo kepuuya mwihanro mwiva nraahumwa mpo qua ti vari vaisira qua qio tuqasaa kyero riero mwiaqatairo nraakye qora ntapihi kyero timwa nyi varira.

11 Mwitaamaqiro viqaro kuua mwanraqura mwiva nraahu mpo kepuuya mpo kepuuya ntainra kyero nyi variro. Mwiva nai kyakya hiraqa kepuuya ntainra kyero nyiqiro vi varira.

Tire Karaisira mwamwanta kuua mwamwanta varurahuave tura

12 Vaisi mwamwantavanto kuaiku vaiharo mwamwanta mwiaqaa mpo mwamwanta mpo mwamwanta airiqianima vahiro. Mwitaama kyero airi mwamwanta vaiharovata mwamwanta kuaikuma vahiro. Mwia votima kyero Karaisira mwamwanta kuaiqia nraahu vahata tire mwia mwamwanta hini mpoqia airivantoma varuro.

13 Kuua qarama kye tire Iutaavantove, mpo mwatanaavantove, rupa tai nraakye qorahuave, qati nraakye qoravantove, variqata tire nramri varaintema kyeta Kotira mwanraqura varauunanrave. Kotiva nai mwanraqura titaihata tire mwia mwanraquravata variqata Karaisira kuua mwamwantavantom varita.

14 Vaisi mwamwanta vahirero hia mwamwanta kuaiqia nraahuvauma vahiro. Mwamwanta mwiaqaa nai mpo mwamwanta mpo mwamwanta airiqianivantom vahiro.

15 Vaisi kyuquvanto tiqaro, Nte hia kyuqu vahuvara tina, nte hia vaisi mwamwantave, tirera, mwia quavantovata hia quaqa hiananro. Kyuqu mwiva mwamwantaqaaanaavama vahiro.

16 Vaisi nraatovanto tiqaro, Nte hia vu vahuvara tina, nte hia vaisi mwamwantave, tirera, mwia quavantovata hia quaqa hiananrove. Nraatovantovata mwamwantaqaaanaavama vahiro.

17 Ekyaa vaisi mwamwanta mwiva vuku nraahu vahirera, nataama kyero vaise tira riaananro? Vaisi mwamwanta mwiva nraatoku nraahu vahirera, nataama kyero mwunta huaananro?

18 Tiri mwamwantavanto hia mwitaama kyero vahata varunana. Kotiva tiri vaisi mwamwanta utiqaro mwi mwamwantava mwi kyaiqara varaarive, mwi mwamwantava mwi kyaiqara varaarive, timwa kyeqaro utu tora.

19 Mwamwanta pata kuaiqiaru nraahu vahirera, ekyaa hini mwamwanta mwiva tanave vahiananro?

20 Qio vaisi mwamwantavanto vahirero mwamwanta mpoqia mpoqia vahira tomaqa kyaiharo mwamwanta kuaiku vahira.

21 Vaisi mwamwantavanto mwitaama vahirara tiro, vuvanto hiama qio kyuquvara tiqaro, E hia variraqe nte qiomma varianinrave, qiananro. Qi- atavantovata hiama qio kyuquvara, E hia variraqe nte qiomma varianinrave, qiananro. Hiama qio mwitaam qiananro.

22 Tiri vaisi mwamwantavanto hia mwitaama vahata varunana. Teta mwamwanta mpoqiaru uqenrai mwamwantarave turava, mwiqiava hia vahirera, tire hiama kyuqema variananra.

23 Tire mwamwanta mpoqiaro qumina mwamwanta hia kyuqe hirave tunanra mwiaqa kyuqema kyeta ntaqikyi varunanra. Mpo mwamwanta qoqaa vahiankyo tunanra, mwia kyuqema kye tuavaaqaqo ntumwaqu mwataunana.

24 Mpo mwamwantara tire kyuqe hi mwamwantarave timwa kye qati kyaunana. Kotiva vaisi mwamwanta kyuqema kyero taaqau tairara tiro, vaisivanto nai mwamwantaqaa ntaqikyiqaro nai mwamwanta mpoqiaro qumina mwamwanta hia kyuqe hivave tira, mwiqiaraqaa kyuqema kyero ntaqikyiqiro vira.

25 Vaisi mwamwantavanto mwitaama vahirara tiro, vaisi mwamwanta mpoqia mpoqia vahiva hia tukyama viro nanrianraa variqaro nai kyaqa vare varira. Ekyaa mwamwanta mwiva ntuvaaqua hiro nai kyaahaqa nai kyaahaqa hi varira.

26 Mwia mwamwantaqatairo mwamwanta kuaiqiyavanto nriqa viraro ekyaa mwia mwamwantavanto nriqa quananro. Mwia mwamwantaqatairo mwamwanta mpoqiyavanto kyakya hiraro ekyaa mwamwanta mwiva kyakya hiro qamwataananro.

27 Vaisi mwamwantaqaa ntumwa kyena tuva mwia okyaravanto mwitaamama vahiro. Nkye Karaisira mwamwanta kuaa mwamwantama variavo. Nkye mwia hini mwamwanta mpoqia mpoqia vahira mwihuama variavo.

28 Kotiva nai nraakyne qora nyaanrama kyero kyaiqa tukyama kyero mpo kepuuya mpo kepuuya nyinro.

Toharero mwiva vaisi mponramwu nronraqama kyero, Nkyenramwu vuni variqata Karaisira qua mwakyaakya nraakyne qora timwa nyiqi quate, tiro.

Mwia nraakiara mponramwu nronraqama kyero tiqaro, Nkye vuni varia vaisihua nraakiara variqata nte qovarama kyaani quara nraakyne qora timwa nyiqi quate, tiro.

Mwitaa timwa kyero mwiva vaisi mponramwu nronraqama kyero tiqaro, Nkye mwihuua nraakiara variqata ni nraakyne qora ni kyaiqa okyara nyaamwutaiwata mwihuua kyuqema kye ni aanraqaa quate, tiro.

Mwitaa timwa kyero mwiva mponramwu nronraqama kyero mwihuua, Nkye nriqa vi nraakyne qorahua qioqama kyeqata vara mwaamwianrama kyaate, tiro.

Mwitaa timwa kyero mwiva mponramwu nronraqama kyero, Nkye nraakyne qora kyaahaqamaqita quafe, tiro.

Mwitaa timwa kyero mwiva mponramwu nronraqama kyero, Nkye mpo kyaiqaqaa mpo kyaiqaqaa ntaqikyiqi quate, tiro. Mwitaa timwa kyero mponramwu nronraqama kyero, Nkye nraahumwa mpo quaqitaita tmwaqti quate, tiro.

29 Kotiva hia nai nraakyne qora ekyaa mwihuua kuaa qarama kyero kuaa kepuuya mwia nraahu nyinrave. Hia nkye ekyaa mwihuua Kotiva nronraqama kyaari vaisihua vuni variqata Kotira nraakyne qoraaqaa ntaqikyitave, Kotira qua qovarama kyehua varitave, ni kyaiqa okyara nyaamwutuehua varitave, nronra kyaiqa hia nraakyne qora taqe kyaiqara qovarama kyetave,

30 nriqa vihua vara mwaamwianra kyetave, nraahumwa mpo quaqitaitave, mwi quara vara ntapihi kye timwa nyitave, mwitaa hiate tirave. Qaqao, Kotiva tukyama kyero mpo qara mpo qara hi kyaiqara mpohua mpohua nyinrave.

31 Nkye Kotira kyaika vararerata nkye vuni nronraqama kyero vahiani kepukyara mwianra nraante nkyi mwutukya vahiani.

13

Mpohuara mwutukya vahiani okyarara tura Qio kyai nte mpoqiyata aanra kyuqeragaanro okyarara mpo nkyi timwa nyianri.

1 Nte mpohuara mwutukya vahiani okyarara nkyi timwa nyinrenra. Mwi okyarava vuni vahi okyaravama vahiro.

Nte mwaa mwataraqaa varihua qua mpo qua mpo qua qio tiqana nyaamwunyaahua quavata qio qiaro ni mutukyavanto hia mpohuara vahirera, nte mpo qua mpo qua qiariva, mwiva qumina vahi nyaamwa nruquave, taaqa nruqua votima kyeroma vahiananro.

2 Nte Kotiva qovarama kyaani quara mpo qua mpo qua timwa nyi variqanave, nte ekyaa qua okyara rieqana ekyaa uqeta taani quara rienave, nte tiqana, nte Kotira kepukyara kepukyaqama kyena riemwaqina quariva qiomaa taaqi mpo rataa kyaananrove, qiarivavata variariro mpohuara mwutukya vahiariva hia niqi vahirera, nte qumina inraikyavanto varianinrave.

3 Nte Kotirara rieqana ekyaa ntene vataani inraikyara vehi nraakye qora nyinave, nte kyaariro ni mamanta qiyavanto itamwa kyairarovata mpohuara mwutukya vahiariva hia niqi vahirera, mwi inraikyava hiama ni kyaahaqa hiraqe nte quminama mwitaa hianinra.

4 Mpohuara mwutukya vate okyarava mwataamama vahiro. Mwia mwutukyavanto mpohuara vahiarivaisisiva hia qamwanrama kyero nkyiari uaqiamanyaataraitiro, mwiva kyuqema kyeqaro mpohuavata kyaahaqa hiananro.

Mwia mwutukyavanto mporara vahiariva hiama vaisimpovento airi inraikya vataaninranra ua hiananro. Mwiva hiama nai mwahuta qiananro. Mwiva hiama nai nrutu tuaheraananro.

5 Mpohuara mwutukya vahiariva hiama mpohua mwutukya uaqia hiarintema kyero qua tirove, nanrianra nraahu rierove, mwia utaqitairo qamwanrama kyero raraqa taariva nriananro. Mpohuara mwutukya vahiariva mpohua mwia uaqiammwaterara hiama qati nraahu riemwatero kyaara ntumwaqiro quananro.

6 Mpohuara mwutukya vahiariva hiama uaqia hi kyaiqara varaaninranra qamwateqaro variananro. Mwiva Kotira kyaika qutaa kyaiqara qamwateqaro variananro.

7 Mpohuara mwutukya vahiariva hia qoriri hiraro mpohua kyaahaqamaqiro quananro. Mwiva Kotirara kepukyaqama kyero riemwaqiro quananro. Mwiva Kotira vekya variqaro Kotira aanraaqaa kepukyaqamaqiro viqaro muaanra vahiani entara hiama Kotira qaqlira kyaananro.

8 Mpohuara mwutukya vahiani okyarava hiama taiqa quananro. Mwi okyarava qati nraahu vahiqiro

quanano. Vaisivanto Kotira qua timwa nyiqiro quari okyarava, mwiva taiqa quanano. Vaisivanto Kotira qua nraahumwa mpo qua qari okyarava, mwivavata taiqa quanano. Vaisivanto mpo okyara mpo okyarara timwa nyiqiro quariva, mwi okyaravavata taiqa quanano.

⁹ Tire mwaa entara Kotira okyara hia ekyaa mwia ntapihiraitita, pata mpogiatana nraahuma ntapihita. Mate mwaa entara Kotiva nai qua mpogiatana nraahu timwa timwihiata tire mwogiatana nraahu nraakye qora timwa nyi varunanra.

¹⁰ Nraakiara tire

ekyaa inraikyaqi qioqa hiana entava nri ntairae tire hia hini vitiqia nraahu ntapihiarava vahiananrove. Tire ekyaa inraikya ntapihiananrave.

¹¹ Nte nraaqiara variqana nte nraaqiara taaqa qua timwaqina quavar n'i pu naatovanto nraaqiara taaqa vu nraato vahuvana variqina quvara. Nte mate nronra tuemwa vina nraaqiara taaqa okyara qaqlira kyena varura.

¹² Tire mate Kotira nraakye qoravanto nraaqiara taaqa votima kye variqata Kotira okyara hia anomia kye taqe varunanra. Vaisivanto kyinumiqi hia kyuqema kyero nai mwanraqura taqaintema kye tire Kotira okyara taqeqatavata hia ntapihi kye taqaunana. Nraakiara tire nai viri nai viri taqeqata ntapihi kye taqaanana. Nte mate mwaa entara hini qua nraahu riaariva nraakiara ekyaa qua ntapihi kyena riaaninra. Kotiva ni okyara ekyaa ntapihi kyero taqaintema kyena nte ntena okyara ntapihi kyena taqaaninra.

¹³ Taarampo okyaranramwuvantoma qati nraahu vahiqiro quanano. Kotirara riemwaqiro quari okyarava vahilo, Kotira vekya variqata qamwate okyarava vahilo, mpohuara mwutukya vahiaro okyarava vahiro. Mwinramwuhuaqitairo mpohuara mwutukya vahiani okyarava vunyaa okyarama vahiro.

14

Kotira mwanraquravanto nraakye qora kepukya nyianinranra mpogiatataura

¹ Mwianra rieqatama nkye mpohuara mwutukya vahianinra mwia nraante vara vuniqama taata. Nkye mwia vara vuni vateta Kotira mwanraquravanto mpo kepukya mpo kepukya nyianinranra nronraqama kye rieqata qati nraahu varaataa hirata variata. Kotira qua mwakyakya nraakye qora timwa nyi kepukyara, mwi kepukyara nkyi varaataa hirata variata. (Hia nraahumwa mpo qara hiani quaraqitai ti kepukyara nkyi varaataa hirata variata.)

² Kotira mwanraquravanto mpo kepukya vaisi mpo mwihanro mwiva mwiaqatairo nraahumwa mpo qua timwaqiro quariva, mwi vaisiva mwi quara tirata nraakye qoravanto mwia qua hia riaivarao Kotiva nraahuma

mwia qua riaananro. Kotira mwanraquravanto mwia kyaahaqa hiraro mwiva ugeta taani quara nraahu timwaqiro quananro.

3 Vaisi mpovanto hia mpo quaqitairo tiraitiro, vutu kyero Kotira qua mwakyaakyia timwa nyianri vaisiva, mwiva timwa nyinrata nraakte qoravanto mwia qua kyugema kyeta rierara tiro, mwi vaisiva qioma mwihua kyaahaqama nyatero, mwihua kepukyaqama nyatero, mwiva qioma mwihua mwutukya qihakayama nyataananro.

4 Nkye ntuvantuama vita varivaro vaisi mpovanto Kotira qua nraahumwa mpo quaqitairo tirera, mwi quava nai mwi vaisira nraahuma kyaahaqa hiananro. Hia mpo quaqitairo tiraitiro, vutu kyero Kotira qua timwa nyianriva ekyaa Kotira nraakte qorama kyaahaqama nyataananro.

5 Kotira mwanraquravanto mpo kepukyia nkyi nyinrata nkye nraahumwa mpo qua mpo quaqitai tivera, nte pataqjama nkyiara qamwataanira. Kotira mwanraquravanto mpo kepukyia nkyi nyinrata nkye Kotira qua qio tivera, nte mpogama kyena nkyiara qamwataanira. Nkye ntuvantuama vita varivaro Kotira qua mpo quaqitairo qiariva timwaqiro viraro hia mpovanto mwia qua qio tuqasaa kyero nraakte qora timwa nyinrenra, mwia quavanto hiama qio nkyi kyaahaqa hiananro. Mwitaa hiraro Kotira qua vutu kyero tirata ekyahua mwia qua rie vaisiva, mwiva mwia quavata nraatarama kyaananro.

6 Ni kata pakyaa tuaavo, nte nkye hinani uro ntene nte nkyivata nraahumwa mpo quaqitaina qiarita nkye hiama qio ni qua riaivarohiama qio ni quavanto nkyi kyaahaqa hiananro. Nte nkye hinani uro ntene vutu kyena Kotira qua qoqaa nkyi timwa nyinrenrave, Kotira okyara ugeta tai quara nkyi timwa nyinrenrave, nkye mwitaa mwataama kyeta Kotira aanraqaa nrohiate tina, nkyi timwa nyinrenrave, nte mwitaama kye vutu kyeqa nkyi timwa nyianrita nkye ni qua ntapihi kyeta riaivarohiama quava qioma nkyi kyaahaqa hiananro.

7 Nkye riaivaqe nte hia qakyaa hira qumina inraikya ntomavaarave, kitaarave, mwiaqaa ntumwakye tirera. Ntomavaara api vuatairaro hiama kyugema kyero nruqua qiananro. Kitaavata api ntiraro hiama kyugema kyero nruqua qiananro.

8 Ntaqi ntomanra apiqama kyero rirata hiama qio ntaqi vaisihua veva huru kyaamwu tera taara hivara.

9 Mwia votima kyeta nkye nraahumwa mpo quaqitai tiqata hia vutu kye tivera, tavave nkyi qua qio riaananro? Nkye hia qua vutu kye tivaro nkyi quavanto qumina inraikyaqama hiananro.

10 Mwaa mwataraqaa mpo mwatanaa mpo mwatanaa qua airi vahiarohiama mpo qua qumina quavata vahira. Ekyaa mwia okyara vahi quava nraahu vahira.

11 Vaisivanto nianra mpo quaqitairo tiraqe nte hia mwia qua riaankyeria, nte mwi vaisirara mpo mwatanaa vaisivema qianinra. Mwivavata nianra mpo mwatanaa vaisivema qiananro.

12 Nkyevata ntuvantuama vita variqata nraahumwa mpo quaqitai timwaqivivera, nkyi quavanto mpo mwatanahua qua votima kyero nraahuma vahiananro. Kotira mwanraquravanto nyiani kepukyara nkyi mpogama kyero mwutukya ntihata variahuara titi, nkye Kotira mwanraqurara tiqata, Mpo kepukyia timwinraqe vutu kyeqata ntapihi kye tiqata nai kyaahaqa hi nai kyaahaqa hi hiare, qiatia. Mwi kepukyara varerara nkyi mwutukya vahirata variata.

13 Kotira mwanraquravanto vaisi mpo kepukyia mwinranro nraahumwa mpo quaqitairo qiariva mwi quara okyara hia ntapihiraitiro, nkye ntuvauquama vita variraqi mwi quara qiankyora. Mwi vaisiva Kotira kyapara

hiraro Kotiva mwia kyaahaqa hiraro mwi quara okyara tuqasaa kyero ntapihi kye nraakye qora timwa nyianri.

14 Kotira mwanraquravanto ni kyaahaqa hiraqe nte nraahumwa mpo quaqitaina Kotirara aakyara ntaariro ni mutukya manraquravanto qio rie varivaro ni pu naatovantoma hia qio riaananro.

15 Mwitaai hiraqe nte nataave hianinra? Nte mwutukya mwanraquraqotai nraahumwa mpo quaqitai Kotirara aakyara nteqana nte vu nraatoqitainavata riemwa kyena Kotirara vutu kye aakyara ntarera. Nte mwutukya mwanraquraqotai Kotirara ihi tiqana nte vu nraatoqitainavata riemwa kye vutu kye ihi tirera.

16 Nkye Kotira qamwata mwatarera uti variqata mwianra nraahumwa mpo quaqitai kyuqeve ti varivaro nkyi mwutukya mwanraquravanto nraahu mwi quara qio riaananro. Nkye mwitaai timwaqita vivaro mpovanto nkyivata nrnum variariwa nkyi qua hia riaraitiro, nataama kyeroove nkyi quara quataa qiananro?

17 Nkye nraahumwa mpo quaqitai timwaqi viqata Kotirara kyuqeve tivaro nkyi quavanto kyuqequa vahiqaro nkyita nraahu kyaahaqa hiqaro hiama qio nkyi henanra mwia kyaahaqa hiananro.

18 Nte nkyi nraatara kyena nraahumwa mpo quaqitaina airiqama kyena ti varuvama. Nte mwianra rieqana Kotirara kyuqeve ti varura.

19 Kotira nraakye qora ntuaantuama vita varivaqena nte mwihua utaqaa variqana nraahumwa mpo quaqitaina qumina airi quantikara qiarita hia rievo tina, nte mwihua rie quaraqitaina pataqia toqa kyena qiaro mwihua qio kyaahaqa hiananro.

20 Ni kata pakya tuaavo, nraaqiara akirivanto hia uaqia hi kyaiqara utiraitiro kyuqema kyero varintema kye, nkyevata variate. Mwitaama variqatavata hia nraaqiaravanto vu nraato tintema kye vu nraato tuate. Nkye nronra tuaahua vu nraatoqa hirata variata.

21 Kotira mpukuqi Kotiva mwitaama tiro:

Mpo qua ti vaisihua nroqitai
nte mwaa mwatanaahua ntena qua timwa nyinrenrave.
Nte mpo mwatanaa mwihua nyogitaina qiaritavata hia
mwaa mwatanaahua ni qua rievarave, tura.

(Aisaiaa 28:11-12)

22 Hia qumina nraakye qorara riaraitiro, Kotira nraakye qoravanto Kotira kepuuya taqaate tiro, Kotira mwanraquravanto mpo hiahua kyaahaqa hiqaro mwihua kepuuya mpo nyihata mwihua nraahumwa mpo quaqitai ti variara.

(Mwi quava vaiharo mpo quavatama vahiro. Mwataamama vahiro): Hia Kotira nraakye qorara riaraitiro, qumina nraakye qoravanto Kotira kepuuya taqaate tiro, Kotira mwanraquravanto vaisi mponramwu kyaahaqa hiqaro mpo kepuuya nyihata mwihua qumina nraakye qora Kotira qua timwa nyi variara.

23 Nkye ntuaantuama vita variqata nkye ekyaa mwihua nraahumwa mpo quaqitaita timwaqi vivata mpo ihua qumina nraakye qorave, hia Kotira qua riehuave, mwihuavata nrnum variqata mwihua nkyi qua rietama nkyiara vu nraato apiqama vihata ueraqama quavoma tivara.

24 Nkye ntuaantuama vita variqata Kotira qua ntapihi kye timwa nyiqi vivaro mpovanto qumina vaisivantove, hia Kotira qua anomia kyero riaari vaisivave, nkyi qua riero tiqaro, Qutaa nte uaqia hi kyaiqara uti varuvama varuquo, qiananro. Mwiva mwitaai tiraro nkyi quavanto mwia kyaahaqa hiraro mwia vu nraato ntapihi viraro mwiva tiqaro, Qikye, nte uaqia hi aanranraqaa nrohi varuvama varuquo, qiananro.

25 Mwitaa timwa kyero mwiva nai ugeta taani quara timwa qovarama kyero mwiva tumu ntiro variqaro Kotira nrutu tuaaherero tiqaro, Qutaqaqama kyeroma Kotiva nkyi utaqaa variho, qiananro.

Poruva mwataama kye variqi viqata Kotira qua mwaanra qiate tura

26 Ni kata pakyaas tuaavo, ni qua okyaravanto mwataamama vahiro. Nkye mwaanra tirerata ntuvantua hita variqata nai kyaahaqa hi nai kyaahaqa hirara rieqata variata. Nkyiqitairo mpovanto tiqaro, Nrivaqe mwi ihira qiare, tirata nkye mwia qua rieta mwi ihira tivaro mwiaqatairo mpovanto tiqaro, Tire mwataama kye Kotira aanraqaa nrohirerave, tirata nkye mwia qua rieta varivaro mwiaqatairo mpovanto tiqaro, Kotiva mwitaatihana riaurave, tirata nkye mwia qua rie varivaro mwiaqatairo nraahumwa mpo quaqitairo nkyi timwa nyi variraro mpovanto mwi quara tuqasaa kyero nkyita quaqitairo timwa nyi varirata mwia qua riaata. Mwitaama kyeqata mwaanra timwaqai quata. Nkye nai kyaahaqa hi nai kyaahaqa hirara rieqata variata.

27 Nkyiqitai airivanto nraahumwa mpo quaqitai nkyetara nkyetara timwaqita vivora. Kuaikvantove, taarakuvantove, taaramponramwuantove, qioma nraahumwa mpo quaqitaita tivara. Mwinramwuhua nraahumwa mpo quaqitai tirerata kuaiqia kuaiqiaqvanto timwaqivi vivaro mpovanto mwihua qua tuqasaa kyero nkyi timwa nyinrata nkye ntapihi kye rievara.

28 Mwihua qua tuqasaa quariva hia varirata nraahumwa mpo qua tihua mwihua tirema variata. Mwihua variqata nkyiariaraqama kye Kotiravata qua tiqata variata.

29 Vaisi taaratanave taarampotanavantove Kotira qua tirera hivera, nkye qati kyaivata mwinramwuhua qiat. Mwinramwuhua qua nkyi timwa nyivata nkye mwihua qua tukyama kye rieqata variata.

30 Mpovanto siviro Kotira qua timwa nyi variraro mwiaqatairo mpovanto mwatakyaa quariva tiqaro, Kyai ntevata Kotiva ni mpi quara timwa nyiankye, tirera, vaakya siviro qua qiarive eo timwa kyero mwatakyaa viraro mwivavata nkyi qua timwa nyianri.

31 Nkye mwitaama kye kuaiqia kuaiqiaqvanto siviqata Kotira qua timwaqivi qiatama ekyaa nai kyaahaqa hi nai kyaahaqa hiqata ekyahua kepukyaqama nyatevara.

32 Vaisi mpo Kotira nai qua qiarive tiro nai kepukya mwianriva, mwi vaisiva nai quaqaa ntaqikyiqaro nai tukyaaqama qiananro.

33 Kotira hia kyirikyairi hi kyaiqara vararaitiro, Kotira kyuqema kyero kyaiqa vare varirara tita, nkyevata hia kyirikyairima kyeqa mwaanra tiraitia, vivinrama kyeta qiat.

Kotira nraakyehoravanto mwatukya mpoqi mpoqi ntuvantua hiantema kye

34 nkyevata mwaanra tirera ntuvantua hita variqata nraakyehoravanto mpoqi mpoqi ntuvantua hiantema kye

35 Nraakyehoravanto mpoqua okyara kyaparama kyero ntapihirero nai nraamwuqi variqaro nai vaati ntumwahiamwa hiari. Nkye ntuvantua hiraqi nraakyehoravanto mpoqi mpoqi ntuvantua hiantema kye

36 Qikye, Kotira quavanto nkyi Korintiqitairove qovara hiro? Mwi quava nkyi nraahu kyaahaqa hirero qovarama virave iho? Hiave.

37 Mpovanto nanrianra tiqaro, Nte Kotira qua ti varuvave. Kotira mwanraquravanto mpo kepukya mpihana varuvave, tirera, mwi vaisiva

ni quara quutaavema qiananro. Mwiva nte tu quara mwianra, Tiri vunyaa vaisivanto vatai quaravema, qiananro.

³⁸ Mwi vaisiva ni quara hia nronraqama kyero riairera, nkye mwi vaisira qua hia riata.

³⁹ Qio ni kata pakyaa tuaavo, Kotira qua mwakyaakya nraakye qora timwà nyi kepukyara mwi kepukyara nkyi varaataa hirata variata. Nkyiqitairo mpovanto nraahumwa mpo quaqitairo nkyi timwa nyinrenro utirata hia mwianra qao tiraitita, qioma tinanrave qjata.

⁴⁰ Nkye ntuvantuama vita variqata hia apiqama kye Kotira qua mwaanra tiraitita, ntapihi kyeqata Kotira qua mwaanra tira mwivau timwaqi quata.

15

Karaisiva qutu vuraqitairo qaiqaa qati sivurara Poruva tura

¹ Ni kata pakyaa tuaavo, nte Karaisira mwakyaakya nkyi timwa nyiava quara qaiqaa nkyi timwa nyianrita nkye mwi quara rieqata variata. Nte tauraa mwi quara nkyi timwa nyiavata nkye mwi quarara qutaa quave timwa kyeta mwiaqaatai nkye mwi quara kepukyaqama kye riemwaqita vura.

² Karaisira qua nkyi timwa nyiavara nkye hia mwi quara qaqira kyaratita, kyuqema kye tutaivera, mwi quava nkyi kyaahaqa hiraro Kotiva hia nkyi qaqira kyaratitro nkyi sitaanano. Nkye mwi quara hia kyuqema kye tutaivaro mwi quava hia nkyi kyaahaqa hiankyora.

³ Mwi quara ni timwa mpuvana nte mwi quarara vunyaa quama vaiho timwa kye mwi quara nkyi timwa nyiavara. Nte nkyiara mwitaama tina. Tire uaqia hi kyaqara uturava nruka' quarive tiro, Karaivisa tiriara rieqaro qutu vura. Kotira mpukuqi mwitaama kyero qutu quananrove turaqa mwiva qutu vura. *(Aisaia 53:5-12)*

⁴ Karaivisa qutu vuvata mwataqi quntamwa tovaro taarampo enta vaitero mwiaqaatairo qaiqaa qati sivura. Kotira mpukuqi mwitaama siquananrove turaqa mwiva sivura.

⁵ Karaivisa qutu vuraqitairo qati siviro uro Pitaara vuqaa qovarama viro mwiaqaatairo mwiva nai nronraqama kyo vaisihua 12 nramwu suqaa qovarama viro

⁶ mwiaqaatairo nai nraaqiara airi 500 nramwu suqaavata qovarama vuvata mwihua mwia taqora. Mate mwi nraakye qorahua hininramwu qutu quavata hini airivanto qati variara.

⁷ Iesusiva nai nraaqiara mwihua suqaa qovarama viro, mwiaqaatairo Iesusiva Iemisira vuqaavata qovarama viro, mwiaqaatairo ekyaa nai nronraqama kyo vaisinramwuhua suqaa qovarama vuvata mwia taqora.

⁸ Karaivisa mwitaamaqiro viro ekyara ni puqaavata qovarama vuvana taqaavara. Nraaqiara mpo mwatai iherava nritaraiharo nraakiara mwataaintema kyena nté nraakiarani Karaivisa nraaqiaraqama vura.

⁹ Nte Iesusiva nronraqama kyai vaisihuaqitaina uapaa vaisi hia kyuqe huva varuva. Tauraa Karaivisa vataqi nrohi varu nraakye qorahua nte anoma kye uaqiamaqina quavarara tiro, Karaivisa hia nianra nronra vaisive qjataara.

¹⁰ Kotiva mwiva nraahu nianra po kye tigaro kyuqema mataihananra tina, nte mwataama kye vaisi nronra varura. Kotiva ni kyuqema mataihana hia nte qaqira kyena qati varura. Nte kepukyaqama kye mpoqiyavata mwia kyaiqa varaqi viqana mwiva nronraqama kyai vaisinramwuhua kyaiqavata nraatara kyaura. Qio hia nte ntena kepukyara mwi kyaiqara

varaura. Kotiva ni kyuqema matero kepuuya mpirhana nte mwia kyaiga varaqi vi varura.

11 Nteve mwihuave Karaisira qua nkyi timwa nyunanra mwianra nte hiamma nronraqama kye riena. Tire mwintro mwaanro mwihua nkyi timwa nyunrata nkye mwi quarara quataave timwa kye variara, mwianrama nte nronraqama kye riena.

Poruva tire qutu quananraqitai qati siquananranra tura

12 Tire mwakyaakya nkyi timwa nyiqata Karaisiva qutu vuraqitairo qati sivurave tunanra. Tire mwitaa turata nanraqamave nkye mponramwuvanto qutu vihua hiama sivivarave ti varita?

13 Quttaa qutu vihua hia sivira hitiri, Kotiva hiama Karaisira sivuma kyonotiri.

14 Kotiva hia Karaisira sivuma kyonotiri, tire qua turava qumina qua vahiaro nkyi timwa nyunrata nkye quataave qiaava, mwivavata qumina inraikyaqama hitiri.

15 Qikye, tire nkyi timwa nyiqata quataaqama kyero Kotiva Karaisira qati vara sivuma kyorave tuna quava, mwi quava unra qua vahitiri, mporvanto tiriara tiqaro, Kotiva hia Karaisira qati vara sivuma kyorave. Nkye mwitaa kye Kotirara qia quava unra quama vaiho, titiri.

16 Kotiva hia qutu quahua qati vara sivuma kyaiva varitiri, mwiva hiama qio Karaisiravata qati vara sivuma kyonotiri.

17 Kotiva hia Karaisira qati vara sivuma kyaitiri, nkye quminama Karaisirara quataave qiavaro nkyiqa qua vahiva hia taiqaraitiro, qatima vahitiri.

18 Kotiva hia Karaisira qati vara sivuma kyaitiri, Karaisirara quataave timwa kye qutu quahuavata hia qaiqaa qati siviraiti, uro quminama raupirima quatiri.

19 Tire Karaisira veckya variqata mwaa mwataraqaa mwianra riemwaqi vita uro qutu vita hia qati siquarahua variaratavama mwaa mwataraqaa varihua tiriara raima timwa teta po kye tivara.

20 Mwihua hiama qio mwia kyaara tiriara raima timwa tevara. Karaisiva qutu vuvaro quataaqama kyero Kotiva mwia qati vara sivuma kyora. Kyara vara tutaiharo tohare riemwa taiva, mwiva nraante keko tintema kyero Karaisiva nraante qutu vuraqitairo qati sivurara tita, Karaisirara quataave timwa kye qutu quahua qatima sivvara.

21 Haaru vaisi mpogaatairo qutu vi okyarava qovarama vurama. Qaiqaa kuua qarama kye vaisi mpogaatairo qati sivi okyarava qovarama vira.

22 Tire Ataamunraqatai qovara hurahua ekyaa qutu vi varunana. Kuua qarama kye tire Karaisira nraaqiaraqamavi variarrahua nraakiara tire ekyaa mwihua sivita qati variqi quananra.

23 Nraakiara hia tire apiqama kyeta siquananra. Tire naitarama kyeta kuaiqia kuaiqiyavanto siquananra. Karaisiva nraante quturaqitairo qati sivurara tita, Karaisiva qaiqaa mwatani tumuani entaraqaa Karaisiva hiari nraakyae qorahua qaiqaa qati sivvara.

24 Mwihua sivivarо mwiaqatairoma taiqaani entava nriananro. Mwi entaraqaa Karaisiva kepuuyaqa hiqaro mpo mwatanaa mpo mwatanaahua kamaninra nraatara kyero, vaisi kepuuya ave ekyaa mpo inraikya mpo inraikya kepuuya avata nraatara kyero, uro nai qora Kotira kyaauquqi kyero tiqaro, Nte ekyaa inraikya nraatarama kyaauquo. E ekyaa inraikyaaqaa ntaqikyiqira quante, qiananro.

25-26 Karaisiva kepukyaqha hiqaro nai nramwutaahua nraataraqi viro uro ekyaararaqaama qutuqi vi vari okyarara nraatara kyairaro mwi okyarava ekyarama taiqaananro.

27 Kotira mpukuqi mwitaama tiro:

Kotiva Karaisira nronraqama kyaiharo

Karaisiva ekyaa inraikya nraatara kyero

mwiaqaa ntaqikyiqiro quananrove, tura. (*Ihi 8:6*) [Karaisiva ekyaa mwi inraikyaraqa ntaqikyiqaro hiama Kotiraqaavata ntaqikyiananro.]

28 Nraakiara Karaisiva ekyaa inraikya nraatara kyero mwiaqaa ntaqikyiqiro viro mwiva nai qora mwemwani variro tiqaro, E niqaa ntaqikyiqira vi variaravama e niqaa ntaqikyiqira quante, qiananro. Karaisiva mwitaa tiraro mwiaqatairo Kotiva Karaisirqaavata ekyaa inraikyaaqaa-vata ntaqikyiqiro quananro.

29 Karaisiva hia qutu viraqitairo qaiqaa qati sivira hitiri, nanraqamave mpo hiahua qutu quahuara rieqata nramanri vare varita? Qutu quahuara ekyara qutu quavo qiatiri, hiama qumina mpo hiahua mwihua kyaahaqa hiqata nramanri vare variatiri. Mwihua tiqata, Qutaama qutu quari vaisiva qaiqaa siquananrove, timwa kyetama nramanri vare varita.

30 Karaisira qua kyaara tiri ekyaa enta ru kyarera uti variara. Tire hia qutu quananraqitai qaiqaa siquarahuavauma, tiri qumina mwitaa hivara.

31 Ni kata pakyaa tuaavo, Iesusi Karaisiva nkyiqaavata niqaavata ntaqikyi varihananra tina, nte nkyiara qamwate variqana ntene kyuauq nriqiqaa vatena qutaqama kyena tirera. Ekyaa enta ni ru kyaivaqe qutu quariva nte variqina vi varurave, tuqo.

32 Nte Karaesirara rieqana Epesaasipi uro variavata mwi mwatanaahua qaakyau vairi votima kye variqata ni naatara kyarera uti varuvana variavarave. Nte qumina vaisi taiqa quariva hutiri, nte qumina mwini varutiri. Kotiva hia qutu vihua sivuma kyaari quava cutaa vahiragevauma nte mate mwaa entarara rieqana mwataa qianinra: Nrivage kyuqe aanra qaqlira kye hora qutuananranra hia nronraqama kye riaraiti, mate kyavata nramanrivata nramwaqi quare, qianinra.

33 Haunri mpo ihua unra qua tivata nkye mwihua sataqita vivora. Quavanto mwitaama tiro.

Vaisivanto uaqia hi vaisihuavata variqi viro

mwi vaisivavata uaqiamma quananrove, tura. (*Aisaiaa 22:13*)

34 Mwianra rieqatama nkyi su nyaatovanto ntapihi virata uaqia hi kyaqlara qaqlira kyaata. Qikye, nkyi utaqitai nraakye qora mpo hiahua hia Kotirara riaraitita, api qua ti variara. Mwitaa qiahuu mwihua kyauruate tinama, nte mwitaa tina.

Mwamwantavanto qati siquani okyarara tura

35 Mpowanto mwitaama qiananro. Nataama kyerove Kotiva qutu vihua qati vara sivuma kyaananrove? Nataama vahiani mwamwantara varetave sisivavarave? qiananro. Mpowanto mwitaa tirera, nte nai timwa mwinrenra:

36 I vu nraato apiqamave viho? E hiave ntapihiaro? E kyara humwu mwataqi vara tutairaro uru mwiva ntuko hiraro nruhi mwiva hia tapitairera, kyaravanto hiama qupiqaananrove.

37 E kyara humwu vara tirera hira, e humwu nraahu kyakuma humwuve, mpo humwuve, vara tuuananrave. E hia uro nronra mwia rirante ntaruqira tuuananrave, qianinra.

38 Kotiva tiharo uru mwiaqaatairo mwi kyarava qupiqaiharo mpo humwuqaatairo mpo kyaravanto qupiqaiharo hia kuaa mwamwantama vahirave. (Mwia votima kyero tire qutu quananraqitai qaiqaa siquararo tiri mwamwantama nraahumwa mpo mwamwantama vahiananro.)

39 Vaisi mwamwantavata, vahi aasau mwamwantavata, hia kuaa qarama kyero vahirave. Vaisi mwamwanta mpo mwamwanta vaiharo, vahi aasau mpo mwamwanta vaiharo, nyaamwa mpo mwamwanta vaiharo, tavukya vaanti mpo mwamwanta vahirama.

40 Nyaamwuni nraahumwa mpo inraikya vaiharo mwatani mpo inraikya vahirama. Nyaamwuni itai inraikyava mwitaama kyero iteqaro ntuvaahe variharo mwatani vahi inraikyava nraahumwa mpo qarama kyero ntuvaahe varira.

41 Huarivanto iteqaro mpo qarama kyero ntuvaaahaiharo, toravanto iteqaro mpo qarama kyero ntuvaaahaiharo, qovora kuaiqia kuaiqiavantu mpo qara mpo qarama kyero ntuvaahe varira.

42 Mwi inraikyara mwi inraikyara mwunruqa hi okyarava nraahumwa vahira. Mwia votima kyero nraakiara tiri mwamwantavanto qutu quaninraqitairo qaiqaa qati siviraro nraahumwa mpo mwamwantama vahiananro. Tiri mwamwanta mwataqi quntamwa taavarano ntenrai mwamwantavama vahiro. Nraakiara sivuma kyaani mwamwantara qaraakya mwamwanta hia ntenraani mwamwantavama vahiananro.

43 Tiri mwamwanta mwataqi quntamwa taava uqenrenro hia kyuqe mwamwanta vahira. Nraakiara tiri sivuma kyaani mwamwantava kepukeya mwamwantavanto kyuqe mwamwantama vahiananro.

44 Tiri mwamwantavanto mwaa mwataraqaa nrohiarive tiro utu tairara titi, mwaa mwataraqaa qunte variara. Nraakiara tiriara nyaamwuni nrohiate tiro, nyaamwuni nrohiana mwamwantara vara sivuma kyaananro. Mwaa mwataraqaa nrohiara mwamwantava vaiharo nyaamwuni nrohiara mwamwantavata vahira.

45 Mwi quara Kotira mpukuqi mwitaama tiro:
Kotiva utu kyovaro toharennaa vaisi Ataamuva siviro
qati variqiro vi varurave, tura. *(Okaya 2:7)* Mwi vaisiva mwitaama
varuvaro mwia nraakiara vaisi mpo Karaisiva qovarama viro ekyaa
nraakyae qora qati variqi quate tiro, qati nraahu varura.

46 Hia nraakyae qoravanto nyaamwuni nrohira nraante qovarama kyora. Nraakyae qoravanto mwatani nrohira nraante qovarama kyero mwiaqaatairo nraakiara nyaamwuni nrohira qovarama kyora.

47 Hoqarennaa vaisi Ataamunra mwataqotairo utu tovaro mwaa mwataraqaa qovarama viro varura. Nraakiara vaisi mpovanto Karaisiva nyaamwusairo mwatani tumu qovarama viro varura.

48 Mwaa mwataraqaa variahua mwihua mwataqotairo utu to vaisira votima kyeta variara. Nyaamwuni varirera hiahua mwihua nyaamwusairo tumu vaisira votima kyeta varivara.

49 Mwaa entara tire mwataqotairo utu tai vaisira Ataamunra votima kyeta nrohi varunana. Nraakiara tire nyaamwunyaa vaisi Karaisira nraantantamwa kyeta variananra.

50 Ni kata pakyaa tuaavo, nte nkyi timwa nyinrenra. Nraakyae qora mwaa mwamwantara vataahua hiama qio Kotira mwatuqyaqi vivara. Ntenra quari vaisiva hia ntenraani mwatuqyaqi hiama qio quananro.

51 Kyai nte Kotiva ugeta tai quara nkyi timwa nyianri. Hiama tire ekyaa qutu quananra. Tire Iesusira nraaqiara mpo hiarahua hia qutu viraitita, qati variqi vita qamwanrama kye kyuqu quananra.

52 Tire mponramwuvanto variararo nraakiara ekyaara entaqaa ntoma riraro Kotiva qutu vihua qaiqaa qati sivuma kyairata mwihua mwiaqaatai hia qaiqaavata tapitaraitita, qati variqi vivara. Tire ekyaara mwi entaraqaa kyuqu vita variananra.

53 Tire ntenrai mwamwantara vataahua mwi entara kyuqu vita hia ntenraani mwamwantara vareta qati variqi quananra. Tire quti mwamwantara vataahua mwi entara kyuqu vita hia qutuani mwamwantara vareta qati variqi quananra.

54 Tire ntenrai mwamwantara vataahua kyuqu vita hia ntenraani mwamwantara vareta qati variqi quananra. Tire quti mwamwantara vataahua kyuqu vita hia qutuani mwamwantara vareta qati variqi quararo mwi entara haaru qara ntumwa to quava qutaa mwiväuma vähiananro. Mwi entara mwi quara tunteema kye tire mwitaama qiananra:
Qutu vi inraikyara vara mwataniqama kyero
Kotiva mwia ekyaara nraatara kyairave.

55 Quti okyarava e riaante. E vaisi ru kyera nraatara kyera kepukyava tanave vaiho?

I aanraivanto vaisi kutu kyaariva tanave vaiho? *(Hosaiia 13:14)*

56 Qutira inraikya mwia qora kyaiqvanto ru vatero nai qora kyaiqa mwiva Kotiva timwa to quaraqaatairo kepukyva varaira.

57 Qio tiri vunyaa vaisivanto Iesusi Karaisiva quti okyarara nraatara kyero qati sivirara tiro, Kotiva tirivata kepukyva timwihata tire qiona qutuani okyarara nraatara kye qaiqaa qati sivi variananra. Mwianra rieqatama tire Kotira nrutu tuaahereta mwianra kyuqeve ti varita.

58 Ni kata pakyaas tuaavo, mwi quara rieqatama kepukyaqama kye sivita variata. Tiri vunyaa vaisi kyaiqa kepukyaqama kye varaqi quata. Nkye ntapihiarave. Nkye kyaiqa vareva hia quminavau quaninranra tita, nkye kepukyaqama kye mwia kyaiqa varaqita quata.

16

Iutiaani munima vara kyaivaro quaninranra tura

1 Kotira nraakye qora Iutiaani hia kyuqema kye variahuara rieqata nkye mwihua kyaahaqa hirerata munima ntuvantua hirara tirera. Nte Karesiaani variqana Kotira nraakye qora mwini variahuara timwa nyuntema kyena nkyivata timwa nyianrita nkyevata mwitaa hiata.

2 Mpo Saante mpo Saante nkye kuaiqia kuaiqivanto nkyeta munima vareraqitai munima mpoqiani qati vataqia vivaro qio vahiasi. Nkye mwitaa-maqi vi varivage nte nkye hinani iro ntaarita nkye hia nanra munimave mwunro tita uro munimanra puua hiata.

3 Nraakiara nte nkye hinani uro variarita nkyetavanto vaisi mponramwu mwatama kyaivage nte mwinramwuhua qara nyina sitaarita mwihua mwi munimanra varetama Ierusaremini uro nyiata.

4 Mwi entara nte Ierusaremini mpo kyaiqa varaariva vahiraqe ntevata quankiera mwihua nivata qiona vivara.

Poruva nai nrohianinranra vu nraato tutora tura

5 Nte Masentoniaani mpo mwatukya mpo mwatukya nrohiarivara tina, mwini nrohivaraama uro nkyi taqaaninra.

6 Nkyivata uro variqana nte mpuuaamave, toqa vaururu tuani entara vari kyena qaiqaa taini tainive virera hiarita nkye ni kyaahaqa hivage nte quari.

7 Hia nte aanraqaa viqana nkyivata pataqia totiqama kye varirerave. Tiri vunyaa vaisi Karaisiva qiove tirera, nte nkyivata mpuuaama varirerave.

⁸ Qio nte mwate Epesaasini variqi quariro Pentikosi omwata nre entava nrianrive.

⁹ Mwaini nte airi mwataq i nraakye qora Kotira aanra nyaamwutaariva vahananra tina, nte mwaini variqina virera. Nte mwaini mwi kyaigara vare varuqata airivanto ni nramwutaaqa hiavanavata nte Karaisira nraakye qorara rieqana mwaini varirera.

¹⁰ Timotiva nte varauntema kyero tiri vunyaa vaisi kyaiqa vare varivara tiro, mwiva nkye hinani uro ntairera, nkye mwia qamwata mwateta mwia vitaata.

¹¹ Mwianra rieqatama nkyiqitairo mpovanto Timotirara qumina vaisive timwa kyero mwoqa mwiankyora. Nkye Timotirara mwiva Karaisira kyaiga vaisi variho timwa kyetama mwia kyaahaqa hiquata huntaqita aanraqa uro kyaivar o mwiva kyuqema kyero variro qaiqaa nte hunani nrianri. Nte mwiavata tiri tiqata vakyaa mponramwuvata mwihua sekyama varuqo.

¹² Nte tiri tiqata vakyaa Aporosirara tirera. Nte mpo enta mpo enta nkyiara rieqana mwianra mwitaama tina, Qata vakyaa mponramwuvanto Korintini virera hiahuvata e quante timwa kyena vuaviraavira tuqaro hia quataa iharoma mate hia viro. Nraakiara aanra qio vahirera, mwiva nkye hinani quanano.

Poruva ekyaaa qua tura

¹³ Nkye rauriqa taqe variata. Nkye Karaisirara quataave tiraqa kepuuyaqama kye variata. Vaisima variata. Kepuuyaqamavi variata.

¹⁴ Nanrianra nanrianra mwutukya vahianinraqitai ekyaa kyaiqa varaqi quataa.

¹⁵ Nkye Sitipanasiravata mwia nraamwuqi variahuavata ntapihi kyaarave. Nte haaru Akaaani variqana Karaisira qua mwi mwatanaahua timwa nyiavata mwihua nraante quataave tura. Mwihua mwitaa timwa kyeta mwiaqataa mpoqama kye Kotira nraakye qora kyaahaqa hirera uti variara. Ni kata pakyaa tuaavo, nte nkyiara qati mwataa hiatema tuqo,

¹⁶ Nkye mwi vaisinramwuhua mwemwani variqata mwihua hiante hiate, tuqo. Mwihua kyapata kyaiqa varahua mwihua vahianinraqitai mwihua hiante hiate.

¹⁷ Nkyiqitai Sitipanasiravata, Potunataasivavata, Akaikaasivavata, nte hunani nriavana nte qamwateqanama varuqo. Nte hia nkyi taqaaninranra ni mutukyavanto uaquia ihana varuqata mwihua nte hunani nri nteta nkyiara qivana riena, nte qamwateqana varuqo.

¹⁸ Mwihua nkyi mwutukya kyuqema nyataavar o qihakyma vahintema kyeta nrumu mwaini ni mutukyavata kyuqema kye qihakyma mataavana varuqo. Nkye mwitaa hi vahihua nyutu tuaaheraata.

¹⁹ Kotira nraakye qora Esiaani mpoqi mpoqi variahua nkyiara rieqata nkyi qua mwantaavo. Akuraava mwia nraata Pirisiraavavata, mwitanhua nraamwuqi ntuvautta hiahuvata, tiri vunyaa vaisi nrutuara rieqatama nkyi qua mwantaavo.

²⁰ Tiri tiqata vakyaa mwaini variahua, mwihua vahianinraqitai nkyi qua mwantaavo. Nkye nai qua mwante nai qua kyauqu mwi nai kyauqu mwi hiqata variate.

²¹ Qio nte ntena kyauquqo mwaa quara qara ntina:
NTE PÓRUPA NKYI QUA MWANTAUQO.

²² Tiri vunyaa vaisi Karaisirara hia mwutukya vahianinraqitai kyaivar o viro ekyaaa vehiqama quarive. Marana ta. Po, nronrao, qamwanrama uro ntanteru tumuana.

²³ Tiri vunyaa vaisivanto Iesusiva nkyi kyuqema nyataari.

24 Nkyevata ntevata Iesusi Karaisiraniqamavi varunanranra tina, nte nkyiara mwutukya ntihana varura.

2 KORINTI

Poruva Korintiqinaahuani nraakiaraa qara vara kyora

Poruva kuua ihi vara kyero Masentoniani variqaro qaiqaa Korintiqinaahuani qara vara kyora. Poruva qara mwaaqi Kotiva mwia nronraqama kyovaro Iesusi Karaisira kyaiqa varo okyarara mwi mwatanaahua timwa nyunra.

¹ Nte Poruva. Kotiva tihana nte nronraqama vina Iesusi Karaisira mwakyaakya timwa nyi varuvama varina. Tiretana tiri tiqata Timotikya nkyiara Kotira nraaky qora Korintiqi variahuavata ekyaa Kotira nraaky qora Akaiaani variahuavatama qara mwaa vara kye.

² Tiri tiqova Kotivavata tiri vunyaa vaisivanto Iesusi Karaisivavata nkyi kyuqema nyatairaro nkyi mwutukyaqitairo kyuqe hiro qichaakya hirata variata.

Poruva Kotirara kyuqeve timwa kyero qamwata mwatora

³ Nrivaqe Kotirara kyuqeve timwa kye qamwata mwataara. Mwiva mwanriqavanto variqaro tiri vunyaa vaisi Iesusi Karaisira mwia qovama variro. Kotiva tiri tiqova variharo ekyaa tiriara po kye ti okyaravavata, mwutukya qichaakya hi okyararavata, mwiaqaatairo qovara hi varira.

⁴ Tire mpo muaanra mpo muaanra vare variqata atura nti varuraro Kotiva tiri mwutukya qichaakya timwa te varira. Kotiva tiri mwutukya qichaakya timwa te varirara tita, tire taqaarata nraaky qoravanto mpo muaanra mpo muaanra vare varivaqe tire Kotiva tiri mwutukya qichaakya timwa taintema kye tirevata mwi nraaky qorahua mwutukya qichaakya nyataara.

⁵ Karaisiva nriqa vi inraikyara varaqiro vihata tire mwiavata taaqau vi variqata nriqa vi inraikyara varaqi vunanra. Mwia mwutukya qichaakya timwa taintema kyero Kotiva tiri mwutukyavata qichaakya timwa taananro.

⁶ Hia tire quminavauma nriqa vi inraikyara vare varita. Kotiva nkyi mwutukya qichaakya nyatero nkyi sitaarive titama, tire nriqa vi inraikyara vare varita. Tire nriqa vi inraikyara vare varuraro Kotiva tiri mwutukya qichaakya timwa tairara tita, mwiaqaatai tire qioma nkyi mwutukyavata qichaakya nyateta tiqata, Tirevata nkyi nraantante nriqa vi inraikyara varauro. Nkye kepukyaqama kyeta variate, qiananra.

⁷ Nkye tiri nraantante nriqa vi inraikyara varaqi vivera, Kotiva tiri mwutukya qichaakya timwa taintema kyero nkyi mwutukyavata qichaakya nyataaanano. Tire mwianra rieqatama nkyiara tiqata, Nkye hia qoriri hiraita, kepukyaqama kye variqi quate, tita.

⁸ Tire tiqata vakyaa tuaavo, tire haaru Esiaani nrohqata muaanra varaavanaanra, mwi quara nkye hia ntapihi kyevoraa. Mwi muaanrava nronraqama kye tiriqa vahuvata tire tiqata, Po hia qio muaanra mwi vare qati quananrave. Tire qutu quananrave, qiananra.

⁹ Mwi entara tire tiqata, Po, tire qati variara entava taiqa viharo qutu quara entavama nri ntaiho, qiananra. Tire mwitaa timwa kye tire tetavanto teta kyaahaqa hiaranrava hia vahuvata mwiaqaatai tire Kotiva qutu qua nraaky qorahua qati vara sivuma kye variva, mwiva nraahu tiri kyaahaqa hiananrove timwa kye, mwianra nraahu nronraqama kye riemwaqi quavanra.

10 Tire mwi entara qutu virera uti variavararo Kotiva tiri vaitutuma kyovata tire qati variavanana. Kotiva mwi entara tiri vaitutu huntema kyero nraakiaravata Kotiva tiri vaitutuma timwa taananro. Tire mwiaqaa kepuqya vu nraato vateta tiqata, Kotiva tiri qaiqaavata qaiqaavata vaitutu maqiro quananrove, turo.

11 Nkyevata tiriara rieqata Kotirara aakyara tivaro tiri kyaahaqa hiari. Nraakye qora airivanto tiriara rieqata Kotirara aakyara tivera, Kotiva tiri kyuqema timwa tero kyaahaqa hirata mwiaqaatai nraakye qora airivanto Kotirara kyuqeve tivara.

Poruva hia Korintini vurara ntapihi kyero timwa nyunra

12 Tire nraakye qora utaqaa nrohi varuraro hia tiri toqaamwu rihatta tire kyuqema kye mwihua utaqaa nrohi varunranra tita, tire mwianra qamwateqa kyuqe huroma tita. Tire nraakye qora suqaa nrohirera hia tire mwatanyaa qua okyara riaraiti, tire Kotiva tiri kyuqema timwa taaninranra rieqata Kotira kyaipa nraahu varaqi viqata avuqvavuma kye nrohi varunana. Tire mpo nraakye qora suqaavata, nkyi suqaavata, nrohiqata mwitaamaqi vita mpoqavata mwitaamaqi vunana.

13-14 Tire nkyini qara ntigata hia mpo quaqaa ntumwa kye mwi quara okyara ugeta taunanra. Nkye ntapihi kye rie quara nraahu tire nkyini qara ntumwa taunanra. Nkye mwaa entara hiama tiri ntapihi kye taqe variavo. Nraakiara nkye tiri okyara ntapihi kye taqaivera, nte qiove qianinra. Nkye tiri okyara ntapihi kye taqeta variqi vita nraakiara tiri vunyaa vaisivanto Iesusiva tumuani entaraqaa nkye tiri qamwata timwa taivaqe tire nkyita qamwata nyataananra.

15-16 Tauraa nte nkyiara qiomaa ni qamwata matevarave timwa kyeqana nte nkyi taqarerera uti variqana mwataa qiavarama: Kyai nte Masentoniani viqana nkyi taqena qaiqaa mwisaina uro ntante nriqana qaiqaavata nkyi uro taqaarita nkye taara nani ni taqaivaqena nte nkyi kyuqema nyataarita nkye uro ni nikyaivaqe Iutiaani quankye, qiavara.

17 Mwitaa timwa kye nkyi uro taqaankye timwa kyenavata hia uro nkyi taqaavara. Tauraa nte nkyi taqaankye qiavara nte mwi quara unra qiavarave iho? Mwatanyaa vaisivanto mwatanyaa qua okyara rieqaro taara qua tintema kyenave nte eo mwitaa hirerave, hia mwitaa hirerave, tiqana varuvave iho? Nkye mwitaamave nianra riaavo?

18 Nte Kotiva qutaa okyarara rieqanama ntena kyaqu nriqiqaa vatena tiqana, Hia tire nkyi unra tigata taara qua tiqata, Eo mwitaa hirerave. Hia mwitaa hirerave, turahua nkyi timwa nyi varunana.

19 Sairaasivavata, Timotivavata, ntelevata, tirenramwu nkyi utaqaa variqata Iesusi Karaisira qua nkyi timwa nyiavanana. Iesusi Karaisira okyaravanto vahirero mwiva Kotira mwaaqvantoma variro. Mwiva hia unra qua taara qua tiraitiro, mwiva qutaa qua nraahu ti variva. Mwiva nte mwitaa hirerave timwa kyeqaro qutaa mwitaa hi varira.

20 Kotiva nai kyaqu nriqiqaa vatero mpo qua mpo qua tiqaro nte mwitaa hirerave tu quara, mwi quava mwivau vahiarive tiro, Karaisiva qovarama vura. Kotiva timwa to quava mwivau vahiarive tiro, Karaisiva qovarama viro Kotira kyaipa varaqiro vurara tita, tire Karaisira kyaipa rieqatama Kotirara i qua qutaa quama vaiho timwa kyeqatama mwia nrutu tuaahereqa varunana.

21 Kotiva nai nkyivata tirivata kepuqyaqama timwa taihata tire Karaisiravata kuaaqi variqi vi varunana. Tiriara mwihua nai kyaipa vara mataate tiro, Kotiva naivanto tiri nronraqama kyaipa.

22 Kotiva tiri nai kyaama tero mwiaqaatairo nai kyaama tai quava kepuqyaqama vahiarive tiro, mwiva nai mwanaraqura tiri mwutukyagi

vataira. Mwia mwanraquravanto tiri mwutukyaqi varihatara tita, tire tiqata, Qutaama Kotiva nraakiara tiri tivitaananrove, ti varunana.

²³ Nte nkyi unra qianinravauma Kotiva ni qua qovarama kyaananro. Nte quitaqua qua nraahu tireranama. Nte uro Korintini variqana mpo qua kyaara nkyiara qiaro nkyi mwutukyavanto uaquia hiankyo tina, qaqlira kyena hia quavarra.

²⁴ Hia nte nronra vaisi nraantantamwa kye varigana nkyiara kepukyaqama kye mwi quara mwi quara vataqi quate tireranavauma. Tire taqaurata nkye qioqama kye Karaisira qua riemwaqi vi variara. Nkye Karaisira qua rieqata qamwateqa variate tita, tire nkyi hena vaisi variqata nkyivata kyaiqa varaqi virera uti varunana.

2

¹ Mwi quara rieqanama mpo qua kyaara nkyi uro timwa nyataariro nkyi mwutukya uaquia hiankyorave tina, qaqlira kyena hia uro nkyi taqarera quavarra.

² Nte uro nkyi timwa nyataariro nkyi mwutukyavanto uaquia hiraro mwiaqaatairo tavave ni mutukya kyuqema matairage qamwateqa vari-aninrave? Hiama mpovanto ni mutukya kyuqema mataariva varianano. Nkye ni mutukya kyuqema mataahua varivage nte nkyi timwa nyataariro nkyi mwutukyavanto uaquia hirata variqata nkye hia ni mutukya kyuqema matevara.

³ Nte mwianra rieqana haaru nkyini qara vara kyaavaro vura. Nte tiqana, Nkyi uro timwa nyataarita nkye ni mutukya kyuqema mataahua variqata mwiaqaatai nkye ni mutukya uaqiamma matevorave, timwa kyena nte nkyini qara ntumwa taavara. Ni mutukyaqitai kyuqe ihanne varuqata nkyevata nkyi mwutukyaqitai kyuqe ihata variara. Mwi quarara quataave tura.

⁴ Mwi quara qara ntumwa ni mutukya uaquia huvana ntateqana qara ntumwa taavara. Nte qara ntumwa hia nkyi mwutukya uaquia hiarive tina, qara ntuavara. Ni mutukyavanto nkyiara mpoqavata vahira nkye anomaa kye ntapihiae tina, nte nkyini qara vara kyaavara.

Vaisi mpovanto uaquia hi kyaiqara utu kyora mwi quara taiqa kye taunru kyaate tura

⁵ Nkyi utaqitairo vaisi mpovanto uaquia hi kyaiqara utu kyovaro mwia kyaara hia ni mutukyaqitairo nraahu uaquia huvana variavarave. Ekyaa nkyi mwutukyaqitavata uaquia huvata varurave. Qio hia nte qaiqaavata mwi vaisirara kepukyua qua tirerave.

⁶ Nte taqauqata nkye mwi vaisira nai uaquia hi kyaiqara kyaara airi vaisivanta mwia nai kyoqaa mwunranra tina, nte tiqana, Qio hia qaiqaavata mwitaama mwataate. Qiovema, tuquo.

⁷ Mate mwaa nkye mwia qua taiqa kye taunru kyauro timwa kyeta mwia mwutukya qihakayama mwataata. Nkye hia mwitaa hivaroo mwia mwutukyavanto uaquia hiraro mwi vaisiva tiqaro, Hiama qio nte aanra kyuqeraqaa qaiqaavata quaninrave. Ekyarama qaqlira kyauqo, qiankyorave.

⁸ Nte nkyiara po tiqana qiarita nkye mwi vaisirara quataama tiri mwutukyavanto iara vaiho qiatia.

⁹ Nkye ekyaa ni qua kyuqema kyetave, hia kyuqema kyeta riera, nte mwia taqarera nkyini qara mwia vara kyaavara.

¹⁰ Nkye vaisi mpovanto qora kyaiqa utuaninra taiqa kye qaqlira kyauqo tivera, ntevata taiqa kyauqoma qianinra. Nkyi utaqatairo mpovanto

uaqia hi kyaiqara utirera, nte Karaisira vuqaa variqana nte nkyiara rieqana mwi vaisiva uaqia hi kyaiqara uti quara taiqa kyaquo qianinra.

11 Tire Saataaniva unra kyaiga vare vari okyarara taqaunanranra tita, mwiva tiri nraatara kyaankyo tiqata hia mpova uaqiamá kyai quara qati nraahu riemwaqi viraitita, tire qamwanrama kye mwia qua taiqa kyeta taunru kye varunanra.

Poruva hia Taitaasira puaama kyorara airi nraato tura

12 Nte Karaisira qua timwa nyinrenrana Toroasini uro ntena taqaavaro nronravanto Kotiva mwi mwatanaahua su nyaato terama kyero vatovana nte qua timwa nyianriva vahuvana nte mwini mpuahaama variankye timwa kyena

13 taqaavaro ti tiqata vakyaa Taitaasiva hia huvaro ni pu naatovanto hia kyuqema vahuvana mwi mwatanaahuara varivage nte vuqo timwa kyena Masentonianaani quvara.

Iesusiva nraatarairara tita, tirevata qioma nraataraananrave tura

14 Qikye, Kotiva mwitaa mwitaa hirara rieqana nte Kotirara kyueve timwa kyena mwiaqamwata mwatarera. Tire Karaisiravata nrohi varunananra tiro, Kotiva tiri tivita vareqaro nrohi varihata tire mpo mwata mpo mwataqi nrohiqata teta nramwutaahua nraataraqi vi varunananrave. Tire Karaisira qua timwa nyiqi vi varuraro tiripaatairo mwia quavanto kyuge mwunta vira votima kyero ekyaa viro nrinro hi variro.

15 Tire Karaisira mwakyaakya nraakyne qora timwa nyi varuraro Kotiva tirriar tigaro, Karaisiraqaa kyuge mwunta viva nkyiqaatairovata kyuge mwunta vi varihata variavo, tihata nkye Kotira mwatukyaqi virera hiahuavata, Saataaninra mwatukyaqi virera hiahuavata, mwi mwuntara hue variara.

16 Nraakyne qora mpo hiahua Karaisira mwakyaakya rieqata uaqia hi mwunntara voti hirave timwa kyeta mwi quara qoririma kye variarara tita, mwihua Saataaninra mwatukyaqi vihua variara. Nraakyne qora mpo hiahua Karaisira mwakyaakya rieta mwi quarara kyuge mwunta voti hirave timwa kyeta mwihua mwi quarara nronraqama kye riaarara tita, mwihua Kotira mwatukyaqi vihua ma varita.

Qikye, mwaa mwi kyaiqara nronraqama vahi kyaiqarave. Tavave qio varaanano? Avuqavu nrohiari vaisiva, mwiva nraahuma mwi kyaiqara qio varaanano.

17 Tirenramwu Kotira kyaiqa vareqata hia vaisi mpo hiahua nraantamwu kyetama vare varita. Mwihua mpo inraikya nyiqata munima vare variantema kyeta Kotira qua tiqata munima vare variara. Hia tire munimanra rieqata nraakyne qora Karaisira qua timwa nyi varunananra. Tire Karaisira mwakyaakya qutaa mwakyaakyave timwa kye Kotiva tiri titaihata tire Karaisira kyaiqa vaisima varuro timwa kyeqata Kotira vuqaa variqata nraakyne qora Karaisira qua timwa nyi varunananra.

3

Tire Kotiva qaraakya qua timwa taira nraakyne qora timwa nyi varuhuave tura

1 Tire qaiqaa mwi quara tiqata hia tetu nrutu tuaahere varuro. Vaisi mpo hiahua kyaiqa vararerita hita nkyiari nronra vaisiara tiqata, Qara timwivage vare quararo vaisi mpovanto tiri kyaiqa okyara taqaarive, ti variara. Tire hia mwitaa hirera. Nkye tiri okyara ntapihiarara tita, tire qumina mwitaa hiarora.

² Nkye tiri qara nraantantamwa kyetama variavo. Nraakye qoravanto nkyi taqetama tiri kyaipa okyara ntapihi kye taqevara. Nkyi qara votima kyero tiri mwutukyaaqaa qara ntumwa taihata nraakye qoravanto nkyiara rieqatama tiri okyara ntapihi kyevara.

³ Tire Karaisira mwakyaakya nkyi timwa nyiavarata nkye mwi quara riorara tita, nkye tiri qara votima kyeta variara. Karaisiva nkyi qua qara ntirera hiro hia vakoraqotairo qara ntumwa taira. Kotiva qati variva variharo Karaisiva mwia mwanraquraqotairo nkyi qua qara ntumwa taira. Mwiva hia qumina oriqa mwi quara qara ntiraitiro, mwiva nkyi nraakye qora mwutukyaaqaa mwi quara qara ntumwa taira.

⁴ Karaisiva tiri kepuuya timwihihara tita, tire Kotira vuqaa variqata mwutukya qihakyama kye mwi quara mwi quara ti varunanra.

⁵ Hiama tire tetaqama kye Kotira kyaipa qio vare varuro qiananra. Tire taqauraro teta kepukyara Kotira kyaipa varaarava hiama qioqa hiro. Kotiva tiri kyaahaqa ihatarra tita, tire qioma mwia kyaipa varaananra.

⁶ Kotiva tiri kyaahaqa hiqaro tiri nronraqama kyaihata tire Kotiva nraakye qora kyapata kuaaqi varirero qaraakya qua vataira nraakye qora timwa nyi varurahuama. Tire nraakye qora timwa nyiqata hia haaru qara ntumwa to quara riemwaqi quate tiraitita, tire Kotira mwanraqurara mwihua timwa nyi varunanra.

Kotiva Mosesirara timwa to quara nraakye qoravanto hia riemwaqi vuraqaatairo qutu vi inraikyava qovarama vura. Kotiva qaraakya qua timwa tairaqaatai nraakye qoravanto Kotira mwanraqura vareta mwihua ekyaa enta qati variqi vihuama varita.

⁷ Tauraa Kotiva qua vatero nraakye qorara mwi quara riemwaqita quate tiro, mwi quara oriqa qara ntumwa kyero Mosesira mwu quara nraakye qoravanto mwi quara vataaqi quare tura mwi quara nteqaqi viqata mwia kyaara qutu vi varura. Mwi quava nronra qua vahuvorora tiro, Kotiva Mosesira mwi quara timwa mwi varuvaro Kotira peqa okyaravanto iteqaro Mosesira viri ntuvaahama mwatora. Mwitaa huvaro Mosesiva mwi quara oriqa qara ntumwa tora varero nraakye qora kyonani vuvuro mwia virivanto nronraqama kyero ntuvaahero takyuqi varuvata nraakye qoravanto mwia viriqi taqaare tura hia kyuqema taqovaro vahiqiro viro uro taiqa vura.

⁸ Mwi entara Kotiva nai mwaanra qua qovarama kyovaro mwia peqa okyaravanto takyuqi varura. Mwaa entara Kotiva nai mwanraqura nyiani quara qovarama kye variharo mwi quava nraakiara vahi quava tauraa vahi quara nraatara kyero vahiqarora tiro, mpoqiyavata nronra inraikyama vahiro.

⁹ Kotiva Mosesirara timwa to quara, nraakye qoravanto hia ntapihi kye riemwaqi viqata quiti varu quara, Kotiva qovarama nyatovaro mwi entara Kotira peqa okyaravanto takyuqi varura. Mwaa entara Kotiva mwi quara nruka kyero qaraakya qua qovarama nyataira. Kotiva nai qaraakya quaqotairo nraakye qora avuqavuma nyate varirara tiro, qaraakya quavanto haaruua qua nraatara kyero vuni vahi quavama vahiro.

¹⁰ Tauraa Kotiva Mosesira mwu quava vahuvata tire mwi quarara kepuuya quave, Kotiva nai peqa okyara qovarama kyeqaro tu quarave, ti variavanana. Mwaa entara tire Kotiva qaraakya qua vatairara kepuuya quave tiqata haaruua quara hia kepuuya quave ti varita. Kotira haaruua quavanto tumitarero vaiharo Kotira qaraakya quavanto nritarero vahiro.

¹¹ Kotiva Mosesira mwu quara pataqia vahianinra qovarama kyorara tiro, mwi entara Kotira peqa okyaravanto pataqia takyuquqiro viro uro uro taiqa vura. Kotira qaraakya quavanto hia taiqaraitiro, qati vahiqiro

quaninranra tiro, Kotira peqa okyaravanto qati nraahu takyuquqiro vi varianano.

¹² Tire tigata, Kotira qaraakya qua rieqatama hia ekyara qutu viraitita, qati variqi virerave, ti varunanranra tita, tire hia aatu hiraitita, tire mwutukya qihaakyama kye varunana.

¹³ Hia tire Mosesira nraantantararerave. Mosesira virivanto takyuqi varuvaro mwiva nai nramwunaa Isareriera tiqaro, Mwihua taqaivarao ni virivanto takyuquqiro viro uro taiqa quaninra taqevorave, timwa kyero tavuna vara kyero nai viri ntumwaqu torave.

¹⁴ Qio Isarerivanto varuvaro hia mwihua su nyaatovanto ntapihuvata varura. Mwaa entaravata mwi mwatanaahua Kotiva haaru vato quara kyaara ntiqata hia mwi quara okyara ntapihiara. Mosesira nai viriqaan ntumwaqu to tavunana votima kyeta Kotira qua amaata nyate varihatara tita, mwihua mwi quara kyaara ntiqata hia ntapihi kye riaara. Mwihua nkyiarivanto hiama qio mwi tavunana vara qatinani kyeta ntapihi kyeta taqevvara. Karaisiva mwiva nraahuma mwi tavunana vara qatinani kyaananano.

¹⁵ Haaruvata mwaa entaravata Isarerivanto Mosesira mwu quara kyaara nti variavaro tavuna votima kyero mwihua su nyaato ntumwaqu kyahata mwihua hia Jesusira ntapihiara.

¹⁶ Qio vaisivanto nai mwaquo kyaiqaataairo tuqasaa viro tiri vunyaa vaisi Iesusi Karaisirara aakyara ntairera, mwiva mwi tavunana mwia vu nraatoqitairo qatinani vara kyaananro.

¹⁷ Nte tiri vunyaa vaisi Iesusi Karaisirara tiqana nte mwia mwanraqurara ti varura. Tiri vunyaa vaisi mwanraquravanto vaisi mwutukyaqi varirera, mwi vaisiva variraro qora inraikyavanto hiama mwia rupa tairaro mwiva qatinani huvantu viro varianano.

¹⁸ Tire Iesusi Karaisira nraaqiara varuraro hia tiri viriqaan tavunavanto ntumwaqu tihata tire kyinumi votima kye varuraro tiri vunyaa vaisivanto tiriqaatairo itero vara re varira.

Tire mwitaamaqi quaraqata quaraqata tita, tire tetu vunyaa vaisi mwia votima kyeta variananra. Qio mwi kyaiqara Kotira mwanraquravanto uro taiqa kyaananro.

4

Poruva nkyiariara tire ntapihi kye Karaisira mwakyaakya nraakye qora timwa nyi varurahuave tura

¹ Kotiva tiriara po tiro kyugema timwa teqaro tiri nronraqama kyero tiriara mwaa quara nraakye qora timwa nyiate titahata tita, tire mwihua timwa nyiqata hia qoriri hunanra.

² Tire nraakye qora timwa nyiqata vaisivanto uqeta variqaro kyauri kyaiqara utira, mwi okyarara mwoqa mwita hia kumwaanri tiraitita, hia Kotira qua api tuqasaaqasama kye tiraitita, tire Kotira vuqaa variqata vutu kye timwa nyi varurata nraakye qoravant tiru qua rie variavaro mwihua su nyaato mwutukyavanto tiru quara qutaa quave ti varihata variara.

³ Tire Karaisira qua ntapihi kye nraakye qora timwa nyiqi vi varunana. Vaisi mpo ihua hia mwi quara riaivera, mwihua vita raupirī hi vaisihuama hia rievara.

⁴ Mwihua variavaro unra mwanriqa Saataaniva mwaa mwataraqaa ntakqiyi variva mwihua su nyaato tita kyaihatara tita, mwihua Karaisira quara hia qutaa quave ti variara. Karaisira mwakyaakyaavant omwa votima kyero iteqaro mwihua su nyaato ntuvahama nyataankyo tiro, Saataaniva mwihua su nyaato vara qumimaqama kyero. Karaisira peqa

okyara vahirero mwia vu nraatovata Kotira vu nraatovata kuaa qarama koyerohi vahira.

⁵ Hia tire nkyiqa ntakikyirera teta quavauma nkyi timwa nyita. Tire nkyi timwa nyiqata Iesusi Karaisiva mwiva nraahuma tiri vunyaava variho ti varunanra. Tire Iesusirara rieqata nkyi kyaiqa vaisiqama variqata kyaiqa varaurahuama.

⁶ Haaru kyokira riro vahuvaro ntuvahama quante tuva, Kotiva, mwivama mwaa entara tiri mwutukya vu nraatoqi ntuvahama timwa taihata tire vu nraato mwutukyaqitai Kotira peqa okyaravanto Karaisira viripi ntuvahahe varihata taquaunana.

Tire tave votima kyeta varuraro tiriqaatairo Kotiva nai qua qovarama kye varira

⁷ Tire tave aataapaiquo vara kyero utu taira votima kyeta varuraro Kotira quavanto tiriqima vahiro. Tire tave votima kyeta uqenraunrahua varuratarata tita, nraakte qoravanto taqaavarro tire ti varura quava hiama tiri titaqitairo qovara hiro. Mwi quava nritarero vahihia quava kepukya qua vaihatara tita, nraakte qoravanto taqaavarro mwi quava Kotiraqqaatairo qovarama viro tiriqivi vahiro.

⁸ Hisai hisairo nramwutaavanto mwaanra tita, taintema kyero mpo muaanra mpo muaanravanto tiri titatarero utihatavata tire qatinani quara aanrava qatima vahiro. Mpo enta mpo enta tire tiqata, Po, mate nataama kyetave variqi quananrave, timwa kyeta tire qaqrira kyaarava vaini vaihatavata hia tire ekyara qaqrira kyaunananrave.

⁹ Nraakte qoravanto tiri nramwutaqaq hiqata tiri vataqi quavarro Kotiva hia tiri qaqrira kyero nkyetaraa variqi quate tiraitiro, Kotiva tiri kyaahaga hi varihata variqi tunanra. Nraakte qoravanto tiri riqatavata hia ekyara tiri taiqa kyakya hiara.

¹⁰ Tire varurata Iesusira ru kyontema kyeta ekyaa enta tiri mwamwantavata ruavata tire qiove tunanra. Tire mwitaama kye variarata Iesussiva siviro qati variqiro vi vari kepukyaravata nraakte qoravanto tiri mwamwantaaqa qio taqevara.

¹¹ Tire Iesusirara rieqata qati variqi vurata mwia kyaara mpo enta mpo enta tiri ru kyarera uti variavata varunanra. Mwitaamaqi vi varurata nkye tiri taqaavarro tire taiqa quana mwamwantaraqi Iesussiva qati variqiro quariva varihata varunanra.

¹² Tire variqata tiri ru kyehua varurata nkye variqata tiri qua riaahuara tita, qati variqi vihuama varita.

¹³ Kotira qua mpukuqqi vahiva mwataama tiro:

Nte Kotira quara quataave timwa kyenama nte mwi quara
nkyivata timwa nyi varurave, tura.

(Ihi 116:10)

Tirevata mwi vaisira nraantanteta Kotirara quataa quama tiho timwa kyeqatama mwia qua nkyi timwa nyi varunanra.

¹⁴ Tire ntapihi kyauraro tiri vunyaa vaisi Iesusi Karaisira qati vara sivuma kyaiva, mwiva nraakiara tiri qati vara sivuma kyero tirivata nkyivata tivitaqiro uro kyairaqe tire ekyaa Iesusi Karaisira vuqaama variananra.

¹⁵ Tire nkyiara rieqata nkyi kyaahaga hirera nriqa vi inraikyara varaqi vi varunanra. Tire mwitaamaqita quarata nkye Kotiva nkyi kyuqema nyatai quara riemwaqi viqata airiqama vita, nkye nraakte qora airivanto variqata Kotira qamwata mwataivarro Kotira nrutuvanto virito vahieri.

¹⁶ Mwianra rieqatama hia tire gorrima kye mwaa kyaiqara varaqi virerave. Tiri mwamwantavanto taiqavi variharo mpo enta mpo enta tiri mwutukya mwanaraquravavanto qaraakyqa ihata varunanra.

¹⁷ Mwaa entara muaanra varaananra mwianra hia tire nronraqama kyeta riaara. Tire mwi inraikyarara hia mpuahaama vahi inraikyareve tunanrama. Mwi inraikyara mwi inraikyara nraataraqi vita, nraakiara tire kyuqema kye nyaamwuni ekyaa enta ekyaa enta qati variqi quarava muaanra varaunanra mwiaavata anomia kyero nraatara kyaanano.

¹⁸ Tire vuqotai taqe varunanza mwatani vahi inraikyarara hiama nronraqama kye rieta. Ekyaa mwi inraikyava quaahaqa vahiaro inraikyavama vahiro. Tire hia vuqotai taqe varunanza nyaamwuni vahi inraikyarara nronraqama kye riemwaqi vi varunanza. Hia vuqo taqauna inraikyava, mwi inraikyava ekyaa enta ekyaa enta qati nraahu vahiqiro quananro.

5

Tiri mwamwantara tiqaro haraara nraamwu quaahaqa vahirave tura

¹ Tiri mwamwanta vahirero haraara nraamwu votima kyero vahihata tire mwi mwamwantaraqi variqata mwatani variqi vi varunanza. Tiri haraara nraamwu ntapairi kyairera, tire ntapihi kyauraro nyaamwuni tiri mwamwanta nraamwu voti hiva mpo vahiananrove. Mwi nraamwuva hia vaisivanto nai kyauquqo hoqa tai nraamwunra votima kyeroma vahiananro. Kotiva mwi mwamwantara utu timwa tairara tiro, mwi mwamwantava ekyaa enta qatima vahiqiro quananro.

² Mwaa entara tire nyaamwuni vahi mwamwantarara rieqatama mwi mwamwantaraqi uro varirerata mwaa mwamwantaraqi variqata atura ntqata varunanza.

³ Tire nrughivante variaro tita, mwi mwamwantara utute variananrave.

⁴ Tire mwaa mwamwantara haraara voti hiraqi variqi viqata atura ntqata muaanra vare varuro tunanra. Hia tire teta mwamwanta qaqira kyarera utunanrave. Vaisivanto haaruua tuavaaqaqaa qaraakya tuavaaqa ututaintema kye, tire teta haaruua mwamwantaaqaa qaraakya mwamwanta utirerave. Mwitaa hiraro tire qutu quara mwamwantava variqiro viro mwiaqataairo kyuqu viro qati variqiro quari mwamwantavama vahiananro.

⁵ Tiriara mwihua mwitaama kye qati variqi quate tiro, Kotiva tiri mwamwanta terama kyero vataira. Kotiva mwitaa timwa kyero tiri nai kyaama tero nyaamwuni vahi inraikyara timwinrenro timwa tai quava kepuqyaqama quarive tiro, mwiva nai mwanaraqura nraante vuni tiri timwhihata varaunanra.

⁶ Tire mwaa mwamwantara vataahua variqata hia aatu hiraitita, mwutukyavanto qihakya ihata varunanza. Tire mwaini mwaa mwamwantaraqi variarera, tire hiama qio nyaamwuni tiri vunyaa vaisivanto varinani quananra.

⁷ Mwaa entara tire hia mwia virivata taqaraitita, mwia quara nraahu quataa quave tiqata variqi vi varunanza.

⁸ Tire mwutukya qihakya ihata varurahuama varita. Tire teta mwamwanta mwaini kye uro nyaamwuni teta mwaata tuananrani teta vunyaa vaisivata variatama hiro.

⁹ Qio tire mwaini teta mwamwantavata variarerave, nyaamwuni uro variarerave, tire Jesusira kyakya hiani inraikyara nraahu utiqa varirera.

¹⁰ Nraakiara Karaisiva ko riaahua taintaqaa mwatakyaa viro variqaro ko tirera hiraqe tire ekyaa mwihuama mwia vuqaa sivita variananra. Mwi entara tire kuaiqia kuaiqiyavanto mwaa entara mwamwantavata variqata varaana quara avuqavu hiananro. Kyuqe kyaiqa varaani vaisira nai kyoqaa kyuqema kyero mwiananro. Uaqia hi kyaiqara utuani vaisira nai kyoqaa uaqia hianinrama mwiananro.

Nraakyе qoravanto Kotiravata kuaaqi variate tu quara

11 Tiri vunyaa vaisivanto ko qiani entarara rieqata tire aatu hiqama teta hena nraakyе qorara mwiaqua riemwaqita quate ti varunanra. Kotiva tire ntapihi kye varaana okyarara taqema variro. Nkyevata tire varaana okyarara qio ntapihivera, qiovema qianinra.

12 Tirenramwu teta okyarara rieqata hia teta nrutu tuaahererera uturuahuave. Tire mwi quara nkyi timwa nyianrata nkye tiri okyarara qamwate variqata nraakyе qora mpo ihua api qua tihua nkyiarivata qua timwa nyihua variate. Mwi vaisihua vaisi mwataara hirerata, vaisi viri mwamwantara nraahu nronraqama kye rieqata hia vaisi mwutukya vu nraatora nronraqama kye rie variara.

13 Mpo hiahua tiriara ueraqama quavo qiahua, mwihua qioma nkyiari mwitaa tivara. Tire Kotirara rieqata mwitaamaqi vi varunanra. Mpo hiahua tiriara kyuqe vu nraato vataahuave qiahua, mwihuavata qioma mwitaa tivara. Tire nkyiara rieqata mwitaamaqi vuro.

14 Karaisira mwutukyavanto tiriara vahatara tita, tire mwia kyaiqa nraahu vare varunanra. Mwaa quara okyara vahirero mwataamama vahiro. Tire ekyahua qutu quataara kuaikuvanto tiri ekyahuarra rieqaro tiri mwaata varero qutu virara tita, tire ekyahua mwiavatama kye qutu vurahuama varita.

15 Mwiva tiri ekyahuarra rieqaro qutu virara tita, tire hia teta variananranra nraahu riemwaqi viraitita, Karaisira kyaiqa varaananranra riemwaqi viqata qati variqi quaravama vahiro. Mwiva tiriara rieqaro qutu viro qaiqaa qati siviro varirara tita, tire mwitaa hiara.

16 Mwaa entara hia tire qaiqaa mwatanyaa qua okyara rieqata vaisi mpo tuykama kye mwi vaisiva kyuqe vaisive, mwi vaisiva uaqia hi vaisivave, tunanrave. Tauraa tire mwatanyaa okyara rieqata Karaisira tukya hiqata Karaisirara qumina vaisive qiavananra. Mwaa entara hia qaiqaa mwitaa ti varunanra.

17 Vaisivanto Karaisiravata varirera mwi vaisiva qaraakyaqama viro qaraakya vaisima variro. Mwi vaisiva haaru api nrohu okyarara qaqa kyer, qaraakya okyara varaivama variro.

18 Kotiva mwi vaisira qaraakyaqama kyaiharoma variro. Tire Kotira nramwutaa variavararo Kotiva tiriara nivata kuaaqi variate tiro Karaisira titorara tita, tire mwia nraaqiaraqama vitama varita. Tire mwia nraaqiaraqama vi varuraro Kotiva tiri titero nte nraakyе qoravata kuaaqi varirera tu quara uro timwa nyiate tiro.

19 Mwi quara okyara mwataamama vahiro: Kotiva mwatani variahua uaqia hi kyaiqara utuara kyaara hia mwihuaqaa qua vataraitiro, mwiva Karaisiva nraakyе qorara qutu vura mwianra rieqaro nraakyе qorara nivata kuaaqi taaqau vi variate ti varira. Mwi quara nraakyе qora timwa nyiate tiro, Kotiva tirinramwu nronraqama kyer titahata tire uro nraakyе qora timwa nyi varunanra.

20 Tire Karaisira kyaahaqa hiqata mwia qua vareta nrunranro Kotiva tiri nroqitairo nkyi timwa nyi variro. Tire Karaisira kyaahaqa hiqata nrumu nkyiara po kye tiqata Kotiravata kuaaqi variate ti varunanra.

21 Karaisiva hia uaqia hi kyaiqara utiraitiro varuvaro Kotiva tiriara rieqaro tire uaqia hi kyaiqara utuna quara Karaisiraqaa vatero. Mwiaqaa qua vato varo Karaisiva tiri uaqia hi quara varero uro qutu vurara tita, tire Karaisiravata kuaaqi varuraro Kotiva hia tiriqa qua vataraitiro, tiri avuqavuma timwa taihata varunanra.

6

Tire nkyi kyaahaqa hirera airi muaanra varaqi vi varunananrave tura

1 Tire Kotiravata kyaiqa vare varurahua variqata tire nkyiara po kye tita tiqata, Kotiva nkyi kyugema nyataira mwianra haunri nkye qumina inraikyave tivorave, turo.

2 Kotiva mwitaamaa tiro:

Nte nkyi kyugema nyataani entaraqaa nkye qua tivaqe nkyi qua riaaninrave.

Nte nkyi huvantu kye sitaani entaraqaa
nkyi kyaahaqa hianinrave, tura.

(Aisaiaa 49:8)

Riaate, mate Kotiva nkyi kyugema nyataari entavama vahirove. Mate Kotiva nkyi huvantu kyero sitaari entavama vaiho, tuquo.

3 Nkye tiri kyaiqaqua qua vatevo tiqatama tire hia apiqama kye kyaiqa vare varita.

4 Hia mwitaa hiraitita, mpo enta mpo enta tire variqata nkye tiriara mwihua Kotira kyaiqa vaisima variavo qiate tita, tire qihakayama kye variqi vi varunananra. Mwitaama variqi viqata nriqa vi inraikyara vare varuna entarave, muaanra vare varuna entarave, tiri uaqiamama timwa taa entarave, tire hia qoriri hiraitita, kepukyaqama kye variqi vi varunananra.

5 Tiri nramwutaahua tiri kyaamwuqo ntuqufu kye vateta, tiri karavuqi uro kyeta, tiri tuqara tuteqata tiri ntuqufu kye vateta, mwitaamaqvi quavata tire variqi viqata toqaamwu tiga kyaiqa varaqi vita, entaqi hia kyugema kye vateta, kyara nraataa ihata variqi vita, mwitaamaqvi viqatavata tire hia qoriri hiraitita, kepukyaqama kye variqi vi varunananra.

6 Nkye tiriara Kotira kyaiqa vaisima variavo qiate tita, tire kyuqe kyaiqa nraahu varaqi vita, kyuqe vu nraato vataqi vita, tiri mwutukyavanto qihakya hi varihata varita, mpohuara kyugemaqita vi varunananra. Kotira mwanraquravanto tiri varihata tire nraakye qorara qutaaqama kye mwutukya vateqata varunananra.

7 Qutaa qua nraahu tire ti varunananra. Kotira kepukyaqo tire mwi kyaiqara vare varunananra. Vaisivanto huru veva tutaintemba kyeta tire kyuauqu tuananranivata, kyaantaaqanivata, Kotiva avuqavuma nrohiani okyaraka tuqi vi varunananra.

8 Vaisi mpo hiahua tiri nrutu tuaahere variavata mpo hiahua tiri nrutu vara mwatanipa hi variara. Mpo hiahua tiri nrutu tuaahereqa kyuqe vaisive ti variavata mpo hiahua tiriqaa uaqia hi quara vate variara. Mwihua tiriara unra qua ti variahuave qiaavata tire qutaa qua nraahu ti varurahuama varita.

9 Mpo hiahua tiriara hia nkyi ntapihi kyaaurahuave qiaavata mpo hiahua tiri ntapihi kyaarave. Mpo hiahua tiriara qutuavo qiaavata mpo tira qati varunananrave. Mwihua tiri ntuqufuqvi viqatavata hia ekyara tiri ntuqufu kyaarave.

10 Mpo inraikya mpo inraikyavanto tiri mwutukya uaqiamama timwa te varihatavata tire qamwateqa nraahu variqi vi varunananra. Tire vehi vaisi varuratavata tiri quaqaatai airi nraakye qoravanto kyuqe inraikya vare variara. Tire hia mpo inraikya vataurahuua variqatavata tire nyaamwuni airi inraikya vataurahuama varita.

11 Po, nkye Korintiqi variahua tiri tiqata vakya tuaavo, tire hia mpo qua uqeta taraitita, ekyaa qua qoqaa nkyi timwa nyi varunananra. Tiri mwutukya ekyaa mwiva nkyarama vahiro.

12 Tiri mwutukya ekyaa mwiva nkyiara vahata hia tire nkyi uama nyatauro. Nkye nraahuma tiri qorrima timwa taavo.

13 Nte ntene nraaqiara timwa nyi varuntema kyenama nkyivata timwa nyi varina. Tiri mwutukyavanto nkyiara vahintema kyero nkyi mwutukyavantovata tiriara vahiari.

Iesusirara hia qutaave tihua varivata nkye hia mwihua kyapata kuaaqi taaqau vi variqi quate tura

14 Purimakau taaratana rupa taariro kuaaqqa viqaro kyaiqa varaarive tiro, hia vitare tumitare hitana rupa tairave. Mwia nraantantamwa kye nkye Iesusira qua riehua variqata nkye uro hia Iesusira qua riehua kyapata kuaaqi kyaiqa varevorave. Nataama kyeroove kyuje inraikyavantovata uaquia hiari inraikyavavata kuaaqi variqiro quananro? Hiama qio mwitaa hiananro. Nataama kyeroove omwantovata, enta hiarivavata, kuaaqi variqiro quananro? Hiama qio mwitaa hiananro.

15 Nataama kyeve Karaisivavata Saataanivavata kuua qua vatevara? Hiama qio mwitaa hivara. Karaisirara qutaave qiarivavata, hia Karaisirara qutaave qiarivavata, qiove ekya inraikyqa kuaaa qaramaqita vivara? Hiama qio mwitaa hivara.

16 Kotira nraamwuvanto nraahumwa vahiaro unra mwanriqa nraamwuvanto nraahumwama vahiro. Kotiva qati variqiro vi variva varihata tire mwia nraamwuma varuro. Kotiva nai mwitaama tiro:

Nte ntene nraakye qoravata varirerave.

Mwihua utaqaa nte variqina viqana

nte mwihua mwanriqvavato variarita

mwihua ni nraakye qorama varivarave, tura.

(Wok Pris 26:12)

17 Mwiva mwitaa timwa kyero qaiqaavata mwitaama tiro:

Nkye qumina nraakye qora kyeta nrumu nkyetaraa variata.

Nkye uaquia hi inraikyara hia tu vararaitita,

variqi vi varivae nte qiomma nkyi sitaaninrave.

(Aisaiaa 52:11)

18 Nte nkyi sova variarita nkye ni naamwunra maaqu varivarave. Nte nronravanto ekya kepukeya vahiva mwitaa turave, tura. *(2 Samueri 7:14)*

Kotiva mwi quara turama.

7

1 Qio ni kata pakyaa tuaavo, Kotiva nai kyauqu nriqiqaa vateqaro tiriara ekya mwi quara turara titi, nrivaje tetu mwamwanitaqaave mwutukyavite uaquia hi inraikyava vahianinra nruka kyeta Kotirara nraahu nronraqama kye rieqata Kotira kyaiqa kyuqera varaqita quara.

Nkyiara ni mutukyaqitairo kyakya ihana varurave tura

2 Hia tiri qoririma timwa taraitita, tiriara mwutukya vahirata variata. Hia tire vaisi mpo uaqjama mwataunanza. Hia tire vaisi mpo apiqama kyausraro mwiva qora aanraqaa vira. Hia tire vaisi mpovanto hi inraikyara kumwaanri timwa kye varauanra.

3 Hia nte mwitaa tiqana nkyiqa qua vatarera. Nte vaakya mwianra nkyi timwa nyunra. Tiri mwutukyavanto nkyiara nronraqama kyero vahirara titi, nkye qati vari entarave, quti entarave, tire nkyivata nraahu variananra.

4 Nkyiara tiri mwutukyavanto qihakya ihata varunanra. Nte nkyi nyutu tuaahere varura. Muaanravanto qovara ihana nte hia mwianra nronraqama kye riaraitina, nkyiara rieqanama mwutukyaqitairo kyuje ihana mpoqiaavata qamwateqana varura.

5 Tire Masentoniani uro nteta qative variananrave qivananra hisai hisairo qora inraikyavanto qovara huvata tire aatu hiqata variavananza.

6 Qio Kotiva mwutukya qora iharo vari vaisira kyuqema mwate variya, mwiva mwi entara tiri mwutukya qihakayama timwa teqaro Taitaasira titovaro tire hiavanranri uro ntora.

7 Hia tire Taitaasiva uro ntora mwianra nraahu qamwateqata variavanranra. Mwiva nkyiara kyuqe mwakyaakya timwa timwunra, mwianravata qamwateqata variavanranra. Taitaasiva nkye tiri taqaataa ihata variarara timwa timwinro. Nkye po, hia mwitaa hiataara mwitaa huro, qia quaravata Taitaasiva tiri timwa timwinro. Nkye nronraqama kye tiriara rie variararavata Taitaasiva timwa timwiha rieta. Taitaasiva mwitaa mwitaa tihana nte nronraqama kyena qamwateqana varura.

8 Nte qaraqitaina nkyi timwa nyataavata mwia kyaara nkyi mwutukya uaqia huvata varura. Mate hia nte mwianra eqaataara mwitaa qiaravare qianinra. Haaru nte taqaavata nkye nte qara kyaavarara pataqia variqata mwutukya uaqia huvata varuvana nte mwi entara tiqana mwi qarara hia nkyi nyiataara nyuqo qiarava.

9 Mate mwi qarara nkyi nyiavarara qamwateqanama varuqo. Qara mwiva nkyi mwutukya uaqiamma nyatora mwianra hia nte qamwateq varuqo. Nkye qara mwia kyaara ntuvoro nkyi mwutukyavanto uaqia huvata mwiaqataai nkye uaqia hi aanranra qaqlira kyaara, nte mwianrama qamwateqana varuqo. Nkyeta uaqia hi kyaiqara kyaara nkyi mwutukyavanto uaqia ihata variavaro Kotivavata nkyi mwutukyavanto qio mwitaa hiarive tirave. Tire nkyi timwa nyateq qiaravara hia nkyi uaqiamma nyatorave.

10 Vaisivanto mwutukya uaqia hiraro tiqaro, Po, Kotira qua hia nteqa kyaataara nteqa kyauqo, qiariva uaqia hi aanranra qaqlira kyairaro Kotiva mwi vaisira qiomma huvantu mwataananro. Vaisi mwia mwutukyavanto uaqia hiariva, mwiva mwia kyaahaqa hiananro. Vaisi mpovanto qumina mwatanyaa qua okyarara rieqaro mwia mwutukyavanto uaqia hiraro hia uaqia hi aanranra qaqlira kyaraitiro, mwitaamaqiro viro uro ekyarama qufanano.

11 Nkye nkyeta kyaiqa varorara rieqata variata. Nkyi utaqitairo vaisi mpovanto qora kyaiqa utuvata nkye mwianra qiatara vahuvata, nkye hia mwianra tiraitita variqata mwiaqataai ni qaraqinaa quara rieqata nkye tiqata, Hia tire kyuqema kye Kotira kyaiqa vare varuro, tuvaro nkyi mwutukyavanto uaqia huvata varurave. Mwi entara nkyi mwutukyavanto uaqia huvata varurara tita, nkye mwiaqataai aanra kyuqeraqaa nraahu nrohiataa huvata mwiaqaa nrohura.

Mwi entara nkyi mwutukyavanto uaqia huvata varurara tita, nkye mwi vaisira qua ntapihi kyarerera uti varura. Mwi entara nkyi mwutukyavanto uaqia huvatara tita, mwi vaisira nai uaqia hu kyaiqara kyaara mwia inronra hura. Mwi entara nkyi mwutukyavanto uaqia huvata varurara tita, nkye Kotirara aatu hiqata mwi vaisira uaqia hi kyaiqaraqaara Kotiva tiriqaa qua vataankyorave tura.

Mwi entara nkyi mwutukyavanto uaqia huvata nkye nianra tiqata mwiva mwaini tirivata variqaro mwaa quara avuqavuma timwa tairaqe qiove qiare tura. Mwi entara nkyi mwutukyavanto uaqia huvata nkye Kotira kyaiqa nraahu vararerata mwi vaisira qua kepukyaqama kye avuqavuma mwatarera uti varura. Nkye mwitaa mwitaamaqi vuvananra tina, nte taqaavata nkye mwi vaisira qua avuqavuma mwatarera uti varura.

12 Nte haaru mwi quara qara ntqana hia nte uaqia hi kyaiqara uti vaisira mwianra rieqana qara ntumwa taavara. Hia nte mwi vaisiva uaqiamma mwato vaisirara rieqana qara ntumwa taavara. Nkye Kotira vuqaa variqata su nyatovanto ntapihirata nkye tiriara nronraqama kye riava vahirara ntapihitate tita, qara mwia nkyini vara kyaavananra.

13 Nkye ni qaraqinaa qua rieta mwitaa hiarara tiro, tiri mwutukyavanto kyuqe ihata varunanra.

Tire Taitaasira titavararo nkye hunani vuvata nkye mwia mwutukya qihakyama mwatovaro mwia mwutukyaqitairo kyuqe huvaro varura mwianravata rieqata tire qamwateqata varuro.

14 Nte Taitaasira timwa mwiqana nkyiara kyuqe hia nraakye qorahuave qiavaro mwiva nkyivata variqaro ni quara qutaa quave turara tina, nte hiama kyaurina. Tire nkyiara qutaa qua nraahu timwaqi vi varunanra. Tire Taitaasira timwa mwiqata nkyiara kyuqe hia nraakye qorahuave tuna quara, mwi quaravata Taitaasiva taqaiharo qutaa quama vahiro.

15 Taitaasiva nkye hunani vuvata nkye mwia qamwata mwateqa mwia mwemwani variqata mwia qua kyuqema kye riorara tiro, Taitaasiva mwianra riaiharo mwia mwutukyavanto nkyiara mpoqiyavata vahira.

16 Mwianra rieqanama ni mutukyavanto nkyiara qihakyama vahana nkyiara qamwateqana varura.

8

Nkyeta sata sakyaa kyaahaqa hirera hivaro nkyi mwutukyaqitairo qihakyama hirata kyaahaqa hiata

1 Ni kata pakyaa tuaavo, Kotira nraakye qora Masentoniani mpo mwatukya mpo mwatukyaqi variahua variavaro Kotiva mwihua kyuqema nyataihata variara mwi mwakyaakyara nkyi timwa nyianrita riaata.

2 Mwinyaa nraakye qoravanto variqi quavaro nronra muaanravanto mwihua mwataara hirero qovarama viro vahata mwi mwatanaahua vehiqama vita hia munimave, kyau kyoqaave, vataahua variqata Kotirara qamwateqa nraahu variqi vita mwiaqataai mwihua mpohua kyaahaqa hirerata nkyiari hu inraikyara hia tuqara tutaraitita, qihakyama kye tiriqa vataavata tire varaqita uto nyunanra.

3 Nte qutamaa tuqo. Mwihua mpohua kyaahaqa hirerata nataama munimave, kyau kyoqaave, nyianre qjara mwia nyita qaiqaa mpoqiyavata tiriqa vataavata tire varaqita uto nyunanra. Hia nte kepukyaqama mwihuara tuqata mwihua mwitaa hiara. Mwihua nkyiarivanto mwitaa hiata ihata mwitaama kyeqa nyianra.

4 Mwihua nkyiarivanto tiriara po kye tita tiqata, Kyai tirevata Kotira nraakye qora mpo hiahua Iutiaani variahua kyaahaqama nyataare, qjara.

5 Tire tiqata, Mwihua munimave, kyau kyoqaave, pataqia timwivaque vaqita uto nyianranrave, turata nraakiara mwihua munimavata kyau kyoqaavata airi timwiavata vaqita uto nyunanra. Mwi mwatanaahua nraante tiqata, Tire Kotira kyaiqa nraahu vararerave, timwa kyeta nkyiari ekyaa Kotira mwita tiriara tiqata, Kotira kyaiqa tinraamwutaivaque varaqi quare, tura.

6 Masentonniaqinaahua mwitaama kyeqa nkyiari munimave, kyau kyoqaave, Iutiaani variahua nyianranra tita, tire Taitaasirara tiqata, E Korintiqi tohara kyera munimavata kyau kyoqaavata vararerera quananrave. E mwini qaiqaa nrumu ntantera vira, mwi kyaiqarara po timwa nyateqara munima varena kyaiqara taiqa kyaante, tita. Mwitaa timwa kyetama nkye hianani Taitaasira titaararo quarive tita, vuaviraavira ti varuro.

7 Nkye mpo kyaiqa mpo kyaiqa kyuqema kyeqa vare variahua. Nkye Karaisirara kepukyaqama kye rie variahua. Nkye mwia qua kyuqema kye rie variahua. Nkye mwia qua okyara ntapihi paahima kye rie variahua. Nkye mpohua kyaahaqa hirerata uti variahua. Nkye tiriara mwutukya vahata variahua. Nkye mwitaa mwitaama kye variarara tina, nte nkyiara

tiqana, Nkye Iutiaani variahua po tirerata qihakayama kyeta nkyeta munimavata kyau kyoqaavata nyiate, tuqo.

8 Mwitaa tiqana hia nte nkyiara kepukyaqama kyena munima kyaate tuqo. Masentoriaavantu kyuqema kye nkyiaru munimave, kyau kyoqaave, nyia okyararama nkyi timwa nyina. Nte mwitaa tiqana nkyi mwutukyavanto mpo inraikyara vahira mwataara hiqana taqarera.

9 Tiri vunyaa vaisi Iesusi Karaisiva tiri kyuqema timwa taira nkyevata riaara. Mwiva ekyaa inraikya vataiva egero nkyiara rieqaroma mwiva vehiqama viro. Mwiva vehiqama viraqaataitama nkye ekyaa nyaamwuni vahi inraikyara varehuama varita.

10 Hia nte nkyiara kepukyaqama kye tiraitina, nte ntene riemwa kye nkyiara mwitaama tina: Tuvana ihiqi nkye nraante munimavata kyau kyoqaavata ntuvantua hirerata tohara tora. Nkye nraante mwitaa hiataa huvata mwitaa hurara titi, nkye mwi kyaiqara varaqita uro taiqa kyaata.

11 Qio mate nte nkyiara tiqana mwi kyaiqara varaqita uro taiqa kyaate tuqo. Nkye tohara kye mwi kyaiqara vaavaa varontema kyeta matevata mwi kyaiqara vaavaa taiqa kyaate, tuqo. Munima airi vateta kyaahaqa hiataa hirata munima airi nyiata. Munima pataqia vataivera, mwia pataqia nyiata.

12 Nkye munima pataqia vatehua mwipiqa qihakayama kye nyivera, Kotiva hiama nanraqamave pataqia nyiavo tiraitiro, qiovema qiananro.

13-14 Hia tire nkyiqa nronraqamakyne muaanra vateqa nkye nronraqama munima nyivata mpo mwatanaahua pataqia nyiata turo. Nkye mate mwaa entara airi vateraqaa qioma tukyama kye mpohua hia airi inraikya vataahua kyaahaqa hivara. Nraakiara mpo enta nkye hia airi inraikya vateraqaa qioma mwihua airi vateqata tukyama kye nkyitavata nyivara. Nkye mwitaama kye nai kyaahaqa hi nai kyaahaqa hiqata nkyevata mwihuavata kuaa qaramama varivara.

15 Nkye munima tukyama kye nyi okyarara rieqata Kotira mpukuqi haaru qara ntumwa to quarara rieqata variata. Kotira mpukuqi mwitaama tiro: Manaa kyara airi ntuvantua tai vaisiva hia kyuqinra kye nraihanro qamwanrama taiqa viharo hia vahirave. Manaa pataqiatana uti vaisiva kyuqinra kye nraihanro vikyokya hirave, tura.

(*Kyatatura 16:18*)

Korintianra vaisi mponramwu sitovata vura

16 Kotiva Taitaasira kyaahaqama mwataiharo mwiva tire nkyi kyaahaqa hirera hurantema kyero nkyi kyaahaqa hirero nronraqama kye rie variro. Taitaasiva mwitaa hirara rieqata tire Kotirara kyuqeve tiqata varunanza.

17 Nte Taitaasirara nkyi uro kyaahaqa hiarive tuqaro mwiva mwi quarara qamwata kyero nai mwiva nkyi kyaahaqa hiataa iharo mwiva nkyi uro taqarerave tiro.

18 Tire vaisi mpo titaararoma Taitaasira vatama kyero quananro. Mwi vaisiva kyuqema kyero Karaisira qua timwa nyi varihata Kotira nraakyne qora mpoqi variahua mwianra kyuqe vaisive ti variara.

19 Mwihua mwi vaisirara kyuqe hi vaisirave timwa kyeta tirivata variqaro kyaiqa varaarive titi, mwianra qiove timwa taavarao mwiva tiri kyaahaqa hi varihata tire munima vara kyeqata ntainre varunanza. Kotira nrutu tuaahereqata tire mwi munimanra vara kyeqata ntainraunanza. Mwitaa maqiqi viqata tire vehi nraakyne qorara nronraqama kye riaunanza nkyivata nyaamwute varunanza.

20 Nraakiara mpovanto munima vara kyeqata apiqama kye tukya hiavo qiankyo titi, tire mwi vaisira Taitaasiravatama kye titarera.

²¹ Tire ntapihi kyeqata mwi kyaiqara mwi kyaiqara vararera. Hia tire Kotira vuqaa nraahu variqa mwitaa hirerave. Ekyaa nraakye qora suqaavata variqa mwitaa hirera.

²² Tire mwitanahua siteqata vaisi mpovata titarerera. Tire airi nani mwi vaisira mwataarama kye taqauraro mpohua kyaahaqa hiarivama variro. Mwiva mwutukyavanto nkyiara qihakayama kyero vaiharora tiro, mwiva qamwata kyero nkyi kyaahaqa hirero uti variro.

²³ Nte Taitaasirara tirera. Mwiva nivatama kyero kyaiga vare vari vaisivama variro. Mwiva nivata variqaro ni kyaahaqa hiataa iharo variqaro kyaiga vare variro. Nte vaisi mpotananra vaakya tuhuara tirera. Iesusira nraaqiara mwatukya mpoqi mpoqi variahua mwitanahua tiri kyaahaqa higata nkyi uro kyaahaqa hiate timwa taatanahua. Mwitana kyaigavanto Karaisira nrutu tuaaheraananro.

²⁴ Mwihua nkye hinani vivata nkye mwihua kyuqema nyataivaro nte nkyiara qua tuva qutaa mwivau vahiasi. Nkye mwihua kyuqema nyataivata Iesusira nraakye qora mponani mponani varihua nkyiara tiqata, Qutaama nkyi mwutukyavanto tiriara vaiho, tivara.

9

Mwutukya qihakayama kye munima nyi okyarara tura

¹ Nkye Kotira nraakye qora kyaahaqa hi okyarara vaakya ntapihi kyaarara tina, nte hia qumina qaiqaa mwi quara nkyi timwa nyiqana qara ntirera.

² Nte taquqaro nkyi mwutukyaitairo mpoqama kye mwihua kyaahaqa hiataa ihata nkye Iutiaani variahua kyaahaqa hi variara. Nte nkyiara Masentonia nraakye qora timwa nyiqana nkyi nyutu tuaaherena tiqana, Akaiaani variahua tuvana ihipi variqata munimavata mpo inraikyavata terama kyeta mpo mwatanaahua nyinrenrata uti variarave, tina. Nte mwitaama kyena nkyi nyutu tuaahereqana qiyata Masentoniaaqinaahua mwihuvata qamwateqata munimavata mpo inraikyavata terama kye vataare tita uti varura.

³ Nte mwi mwatanaahua timwa nyiqana nkyi nyutu tuaaherau quava qumina qua vahiankyo tina, nte tuntema kye terama kye vate variate tina, nte vaisi mponramwu nkye hianani sitauquo.

⁴ Nte hia mwihua nraante sitaraitina, nte Masentoniaa vaisinramwu kyapata nkye hinani uro nte taqaarita nkye hia mwi inraikyara ntuaantuama kye terama vataivera, nte nkyiara mwihua qio munima teramaky e vatevarave tu quava qumina qua vahirata nte mwia kyaara kyaurira inraikya varaarita nkyevata kyaurira inraikya varevarave.

⁵ Mwianra rieqanama nte mwaa vaisihua sitaarita mwihua nraante tiri tivuni vihua uro nkye munima mwiavata mwitaa inraikya mwiavata ntainra kye nyinrenrave qjara, mwihua mwi inraikyara uro ntuaantuama kye vataivaje tirevata mwini quananra. Nkye mwitaa hivage nte quariva uro nkyiara tiqana, Nte hia nkyiara kepukyaqama kyena tuqata nkyetavanto mwitaa hiavo, qianinra. Nte nkyiara mwihua qihakayama kyeqata munimavata kyau kyoqaavata tiriqaa vataavata varaqita uto nyunandrave qianinra.

⁶ Mwaa quara ntapihi kye riemwa taata. Mpovanto kyara pataqiatana vara tutaariva pataqiatanama vantuananro. Mpovanto kyara airi vara tutaariva kyara airintima vantuananro.

⁷ Kyara vara tira mwianra rieqatama nkye qihakayama kyeqata Kotira kyaiqara rieqata munima nyiata. Nkye kuaiqia kuaiqiyavanto kyuqema kye

vu nraato tu kyeta mwitaama qiomaa nyiananrave timwa kyeta nyiate. Nkye hia nyiataa hirata nyivora. Nkye tiriaru mwihua kepuqyaqama kye nyiate qiavatama nyunro tivora. Vaisi mpovaton qamwata kyeqaro qihaaakyama kyero nyi vari vaisirarama Kotira mwutukya vahiro.

8 Nkye qihaaakyama kyeqata Kotira mwivaro Kotiva nai mpoqiyavatama nkyi kyuqema nyatairata nkye hia aarantaraati, qioqama kye variqi vivara. Nkye mwitaama kye variqi viqata nkye ekyaa enta mpohuavata kyaahaqa hiva qiomaa vahiananro.

9 Kotira mpukuqi mwitaama tiro:

Vehi nraakye qora qihaaakyama kyeqaro mpo inraikya
mpo inraikya nyiqiro quariva variraro
mwia kyuqe kyaiqavanto ekyaa enta

qati nraahuma vahiqiro quananrove, tura.

(*Ihi 112:9*)

10 Vaisivanto kyara vara tukye nraate tiro, Kotiva kyara humwu kyanaa nyi variva, mwiva nkyi kyaahaqa hirata nkye kyuqe kyaiqa mpoqavata vararevare.

11 Nkye airi inraikya vateta mpo kyaiqa mpo kyaiqa kyuqe kyaiqa vareqata mwiaqaatai nkye qiomaa mpo enta mpo enta qihaaakyama kyeqata nraakye qora kyaahaqamaqi vivara. Nkye nraakye qora qihaaakyama kyeqata kyaahaqamaqi vivata nraakye qora airivantoma Kotirara kyuqeve tiqata qamwata mwatevara.

12 Nkye Kotira nraakye qorani kyuqe kyaiqa vara nyateqata nkye hia mwihua nraahuvauma kyuqe kyaiqa vara nyatevara. Nkyi kyaiqaqaatai airi nraakye qoravonto Kotirara kyuqeve tiva mpoqiyavatama vahiananro.

13 Nkye nraakye qorani kyuqe kyaiqa varaqi vivata mpohuuna nkyi okyara ntapihi kyetama taqevara. Mwihua nkyi okyara taqeqata Kotira nrutu tuahera kyeta mwihua nkyiara tiqata, Qikye, mwihua Karaisira quara qutaave timwa kyeta mwi quara kyuqema kye riemwaqi vi variarave, tivara. Mwihua nkyiara tiqata, Mwihua tirivata mpohuavata qihaaakyama kyeqata nkyiari hia inraikyara tukyama kyeqata timwi variarave, tivara.

14 Mwihua nkyiara Kotiva mpoqiyavata mwihua kyuqema nyate variho timwa kye nkyiara mwutukya vahirata nkyiara rieqata Kotirara aakyara ntamwaqi vivara.

15 Kotiva nai mwaaku nrirarero vari vaisira tiri timwinranra tita, nri-vagenramwu Kotirara kyuqeve tita mpoqiyavata qamwata mwataara.

10

Api qua ti varu vaisihua Poruva nkyiari timwa nyu quara

1 Nkye hini hiahua nianra tiqata, Poruva tiri tivuqaa variqaro aatu hiqaro qua qihaaakyama kyero ti varirave. Mwiva uro mponani variqaro kepuqyaqama kyero ti varirave, qiaro. Nkye mwitaa qiavana nte nkyita timwa nyinrenra. Karaisiva hia raraqa taiharo qihaaakyama kyero nrohirara tina, nte mwianra rieqana mwia nraantantamwa kye variqana nkyi timwa nyinrenrave.

2 Nte nkyi mwitaa timwa nyiqana taqauqata nkyiqitai mponramwuvanto tiriaru tiqata, Mwihua mwatanyaa qua okyara rieqatama kyaiqa vare variavo, qiarave. Qio nkye rauruate. Mwihua mwitaama kye api qua tira kyaara nte qiomaa nkye hinani urontena nkyivata kepuqyaqama kyena qua qiatama vaihanavata nte hia mwitaa hirerave.

3 Qutaa tire mwaa mwataraqaa variqi vi varunanrave. Tire hia mwaa mwataraqaa variqata veva huru kyaamwu vara kye ntaquqi vi varunanrave.

4 Tire uaquia hi inraikyaravata ntaquqi viqata nraahumwa mpo veva huru kyaamwuqo ntaquqi vi varunanra. Kotiva mwiva tiri kepuuya timwihata tire ntaquqi viqata uaquia hi kyaiqara kepuuya mpo kepuuya mpo kepuuya nraataraqi vi varunanra. Vaisi mpovanto tiriara mwihua qua nraatara kyaankye tiqaro unra qua tirera, tire qioma Kotira kepuuyaqo mwia qua nraatara kyaananra.

5 Mpovanto nraakye qoravanto Kotira qua okyara rievorave tiro mpo inraikya mpo inraikyaqo huwaitairera, tire mwi kepukyaraqo qioma mwi inraikyara qatinani vara kyaananra. Mpo qua mpo qua api quavanto tiri vu nraatoqi vahata tire mwi kepukyaraqo nraahu mwi quara raaquta kyeta Karaisira qua nraahu riemwaqi vi varunanra.

6 Tire nkyi vekya variqata taqaarata nkye tiri qua ekyaa qua qio riemwaqita virerata utivera, mwiaqaatai tire qioma hia qua rie variani vaisiraqaa qua vataanana.

7 Nkyi suqaa vahiani inraikyara ntapihi kye taqaata. Nkyiqitairo mpovanto nanrianra tiqaro, Nte Karaisira nraaqiarama varuqo, tirera, mwi vaisiva qaiqaa riemwa kyero tiriavata mwitaama qari. Mwihuavata Karaisira nraaqiarama variavo, qari. Mwi vaisiva varintema kye tirevata Karaisira nraaqiarama varita.

8 Tiri nronravanto tirinramwu nronraqama kyaihatara tita, tire nkyiqa ntaqikyi varurahuama. Nte nkyiqa ntaqikyiani quara timwa nyina qaiqaavata qaiqaavata nraahu timwa nyiqana hia kyaururave. Nte nkyiqa ntaqikyiqana nkyi kyaahaqa hirera uti varurave. Hia nkyi uaqiamma nyatareravauma varina.

9 Nte hia nkyi nraatuqa taariveravauma mpo qua mpo qua nkyini qara ntumwa tena.

10 Mpo hiahua ni vara mwatanipa hita nianra tiqata, Poruva qaraqitairo nraahu kepuuya qua ti variho. Mwiva tiri utaqaa variqaro mwiva uqenrai vaisi variqaro uqenranra qua qumina qua nraahuma qiananrove, ti variara.

11 Mwi quara ti variahua ntapihi kyeta riaata. Tire nyianrani variqata qaraqitai turantema kye uro nkyivata variqata kuaa qua mwia nraahu tirera.

12 Mwi quara ti variahua nkyiari nyutu tuaahereta tire vaisi nronrama varuro ti variavata tire aatu hita hia mwihua qiantema kyeta qio qiananra. Mwihua nkyiari qua nraahu rieqata, nkyiari nraahu taqeqlata kyueq vaisivanto varunanrave tita. Mwitaa qia vaisihua hia su nyaatovata vahata variara.

13 Hia tire mwihua vu nraato tuantema kye tirera. Kotiva hia timwiani kyaiqara mwianra hia tetu nrutu tuaahererera. Kotiva tiri timwi kyaira mwiānra nraahu timwaqi virera. Kotiva nkyivata variqata kyaiqa varaaate tihata tire nkyi utaqaa variqata kyaiqa varauanranra tirera.

14 Hia tire Kotiva mwukya rataira voti hira nraatara kye nkye hunani quavanana. Kotiva tiri titovatara tita, tire kyueq mwakyaakya Karaisira mwakyaakya uro nkyi timwa nyiavananra.

15 Kotiva tiri timwi kyaiqara hia tire mwia nraatara kye vaisi mpovanto vara tairara tire vara taunyanrave timwa kyeqata teta nrutu tuaahererave. Tire Kotiva tiri timwi kyaiqara nraahu vareqata nkyiara tiqata, Mwihua variqi viqata kyueqema kye Karaisira qua riemwaqita vi varivaqe tire mwiaqaatai mwihuaqi nronra kyaiqa mpo kyaiqa mpo kyaiqa qio varauanranrave, tita.

16 Nkye kepuuyaqama kye Karaisira qua riemwaqi vivaqe qioma tire nkyi mwini kyeta Karaisira qua timwa nyinrenra mpo mwataniquananra. Tire mwitaa hiqata mpovanto nraante Karaisira kyaiqa varauanranra hia

tire teta mwahuta tiqata mwi kyaiqara tirema varauro qiananra. Hiama mwitaa tiqata unra qiananra.

¹⁷ Kotira mpukuqi mwitaama tiro:

Vaisivato nai kyaiqara rieqaro
nai mwahuta qiankyorave.

Mwi vaisiva Kotiva mpo kyaiqa mpo kyaiqa
varaaninranra rieqaro Kotira nraahu

mwahuta timwa mwataarive, tura.

(Ieremaiaa 9:24)

¹⁸ Vaisivato nanrianra tiqaro, Ni kyaiqvanto kyuqe kyaiqave, tiraro mwia quavanto qumina quama vahiananro. Kotiva vaisi mporetiqaro, I kyaiqvanto kyuqema iho, tirera, mwia kyaiqvanto kyuqe kyaiqama vahiananro.

11

Unra qua mwaanra tihua qua riemwaqi vivorave tura

¹ Nkye ni qati kyaivaqe nte pataqia ntenga mwahuta qari. Nkye qati kyaivaqe nte mwaa quara qari.

² Kotiva vaisi mpore uaqia hi aanranraqaa quankyo tiro, mwiaqaa ntakikyintema kye ntevata nkyiqa ntakikyiqina vi varura. Mwanraata kyuqema kye varira qoraisi ntumwu mwintema kye nte nkyi qoraisi kuaiku nyitaura. Nte nkyi sitaqina uro Karaisiva hinani kyaaninra.

³ Nte nkyi Karaisiraqaa ntumwu tarera hiaro mpovanto nkyi uaqiaman yataankkyora. Haaru qaruravanto qutaa qua votima kyero unra tuvaro Ipiva mwia quara qutaa quave tuntema kyeta, nkyevata vaisi mpo quara qutaa quave timwa kyeta tuqasaa vita hia Karaisira qua riemwaqita vivora. Nte mwianrama aatu hina.

⁴ Tire nkyi timwa nyiqata Karaisira okyarara ntapihi kye timwa nyunrata nkye variavaro vaisi mpovanto nri ntero api qua tiqaro, Karaisira okyara mwitaamama vaiho, tihata nkye mwia qua rie variara. Tire Karaisira mwakyaakya nkyi timwa nyunrata nkye Kotira mwanraqura varaavaro mwiaqatairo vaisi mpovanto nri ntero api mwakyaakya tiqaro Kotira mwanraqurara api qua nkyi timwa nyihata nkye mwia qua rie variara. Nkye mwi vaisirara tiqata, Mwia qati kyaivarao qiarive, timwa kyeta mwia qua rie variara.

⁵ Nkye vaisi mwiramwuhuara tiqata, Kotiva nronraqama kyaihata vuni variahuave, ti variara. Mwi vaisihua hia nritare tiri vuni variahuama.

⁶ Qutaa ni novanto muaanra ntaihana hia kyuqema kyena qua nkyi timwa nyi varura. Mwianra nte hiama nronraqama kye riaaninra. Nte Kotira qua okyara ntapihi paahima kye riauvara tina, nte nkyi mwakyaakya timwa nyi varura. Mwiaqataina mpo enta mpo enta ntapihi kyena qutaa qua nkyi timwa nyi varura.

⁷ Nte Kotira qua kyue mwakyaakya nkyi timwa nyiqana hia nkyiara kyooqaa mpivae nkyi timwa nyiankye qavara. Mwi entara nkyi nyutuvanto virito vahiarive tina, ntenga nutu vara mwatanipa hiavara. Nte mwitaa hiavara mwianra nkye tiqata, Nivanto uaqia hi kyaiqara utihove, tivara? Hiama qio mwitaa tivara.

⁸ Mwi entara nkyi kyaiqa vareqana hia nte nkyiara munima mppiate tiraitina variavata Kotira nraakyne qora mpo mwatanipa varuhua ni kyaahaqa hiqata kyooqaa ni mpi varuvana nte mpuara vaisi nraantantamwa kye mwihua munima varena nte nkyi kyaiqa varaqina quavara.

⁹ Mwi entara nkyiyata variqi quavaro ni munima taiqa vuvana hia nte nkyiara ni kyaahaqa hiate tiraitina variavata ni nramwunaahua

Masentoniaasai nrumu mwi inraikyara mwi inraikyara hia vataava inraikyara kyaahaqama matovana variavara. Haaru mwitaa hiavantema kye nraakiaravata nkyi muaanra nyiankyo tina hia nte nkyiara ni kyaahaqa hiate qianinra.

10 Nte Karaisira quataa qua ti varuva kyauqu nriqiqaa vateqana quataa quama tina, Nte ntene mwahuta tiqana nte hia nkyiqitaina munima varauvavema, tuqo. Hiama qio mpovanto nkyi mwata Akaiaani variva ni quara unra quave qiananrove, tuqo.

11 Nte nanraqamave mwitaa tina? Nkyiara hia ni mutukya vaihanave nte mwitaa tina? Qaqao, Kotiva ntapihi kyaiharo ni mutukyavanto nkyiara vaihana varura.

12 Mpo vaisinramwuvanto unra tita tiqata, Kotiva tiri nronraqama kyaihata mwia kyaiqa vare varuro, qiahua, mwihua nraaky e qora suqaa variqata nkyiari nyutu tuaahererata mwihua tire vuna aanranra kuaa mwiaqaa quare titama puaahi varita. Mwi aanrava vahiankyo tina, nte nkyiqitaina hia munima vararaitina, qati variqi virera. Nte mwitaa hiarita mwihua hia qio tiqata, Tire Porura nraantantamwa kye nkyiqitai munima vareqata Kotira kyaiqa vare varuro, tivara.

13 Hia Karaisiva mwi vaisihua nronraqama kyero ni kyaiqa varaate tihua variqata mwihua nkyiariara unra qua tiqata, Karaisiva tiri nronraqama kyaihuave, tiqata kumwaanriqama kyeqata mwia kyaiqa varaqi vi variara.

14 Hia nte mwihua kyaiqara nrihanrama vina nronraqama kye riaan-inra. Saataanivavata mwaaquvanto variqaro kumwaanriqama kyeqaro nyaamwunyaava kyuqema kyero itero ntuvaahe varira viriniqama kyero nrohi varira.

15 Mwi vaisihua mwia kyaiqa vaisi variahuara tita, mwihua Saataaninra nraantanteta kumwaanriqama kyeqata avuqavu nrohi varia vaisihua nraantantamwa kyeta nrohi variara. Mwihua nkyiari api kyaiqaaqara nkyiari kyoqaa varavaqe huviqaravema qianinra.

Poruva nronraqama viro Kotira kyaiqa vare varuvata mwia qoraka-maqa tura

16 Nte nkyi timwa nyu quara qaiqaavata nkyi timwa nyinrenra. Hia mpovanto nianra mwanrunrunraqa hivave qari. Nianra mwanrunrunraqa hivave tivera, kyaivave nte mwitaa hiarivavata variqana ntene nrutu pataqia tuaaheraari.

17 Nte ntene nutu tuaahereqana hia Karaisiva tintema kyenavauma tina. Nte hia vu nraato vataava variqana mwitaa qianinra.

18 Airi vaisivanto mwatanyaqua okyara rieqata nkyiari kyaiqara nkyiari mwahuta ti variarara tina, ntevata mwihua nrantantarera.

19 Qio quataama nkyi su nyaato kyuqe su nyaato vahirara tita, qiomma nkye kyaivata hia kyuqe su nyaato vahirihua nkyi qua timwa nyivara.

20 Qikye, nte taqaugata vaisi imponramwuvanto qovarama vita nkyi api ntavaaqavu kyeta, nkyi munimavata kyoqaavata vara kye nramwa kyeta, nkyi vireraarorama nyateta, nkyi pupohairu utu nyateta, nkyi siri ntuteqa kyeta, mwihua qovarama vita mwitaa hi variavata nkye mwihuara tiqata, Qati kyaivata variate, qiarave. Nkye mwi vaisihua, Hia mwitaa hiate, qitaara vahihata nkye mwihuara, Qati kyaivata variate, qiera.

21 Qikye, tire ugenraunra vaisihua variqatave mwi vaisihua nkyi qoramanyaataantema kye tirevata hia nkyi qoramanyaatauro?

Vaisi imponramwuvanto nkyiari mwahuta tiqata nkyiari nyutu tuaahere variara. Kyai ntevata hia aatu hiraitina, mwihua qiantema kye qiankye. Nte mwitaa tiqana hia vu nraato vahi vaisiva tintema kye tirera.

22 Mwi vaisihua nkyiari mwahuta tiqata, Tire tetu haivaqahua qua Hivuru qua ti varurahuave, ti variarave. Qio ntevata Hivuru qua ti varuvave.

Mwihua tiqata tire Isarerivantove, ti variarave. Qio ntevata mwaa kuaa mwi okyaravama varuqo. Mwihua tiqata, Tire Evarahaamunraqaatai qovara hurahuave, ti variarave. Qio ntevata mwaa mwiaqaataina qovara huvave.

23 Mwihua tiqata, Tire Karaisira kyaiqa vaisima varuro, ti variara. Nte mwitaa tiqana ueraqa hi vaisiva qua tintema kyenama ti varina.

Mwihua tire Karaisira kyaiqa vaisima varuro, ti variara. Qio nte mwihuaavata nraatara kyenama Karaisira kyaiqa vaisi varuqo. Nte mwihua mpoqiatava nraatara kyena Karaisira kyaiqa vare varura.

Nte mwihua nraatara kye qaiqaavata qaiqaavata Karaisira kyaiqa vare varuqata mwia kyaara ni karavuqi kyaavana variqi vura.

Nte mwihua nraatara kye qaiqaavata qaiqaavata ni kyaamwuqo ntuqutu kye vataara. Airi enta nte qutu quari entava qaumato vahana varura.

24 Nte Karaisira kyaiqa vare varuqata mwia kyaara reti kyaantaqo 39 nani ni moqaqa uaqiamma kye ntuqutuara. Iutaa vaisivanto kyauquru nani ni mwitaama kyeqa ntuqutuara.

25 Nte Karaisira kyaiqa vare varuqata mwia kyaara Romenivanto ni retiyo ntuqutu kye vataara.

Mpo enta mpo mwatanaahua ni origo ntuqutu kye kyovana ntumwa quavara.

Nte taarampo nani nramanriqaa sipiqi quavaro sipivanto nramanriqi vijetora.

Mpo enta sipivanto nramanriqaa ntuvuraa vuvana nramanri mwutu sata kuaa ihera kuaa enta variavara.

26 Nte Karaisira kyaiqa vareqana nyianrani vi variavaro humwunra nramanrivant ni vara kyeqaro ntuhiqau kyakya hura. Mpuara vaisivanto ni rirerata uti varura. Nina mwatanaa lutaavanto ni rirerata uti varura.

Mpo mwatanaavanto ni rirera uti varura. Nte mwatukya nronraqi nrohi variavata ni rirera uti varura.

Nte qumina mwata sata aanraqaa vi variavaro ni taiqa kyarera uti varura.

Nte kyaareraga vi variavaro ni taiqa kyarera uti varura.
Vaisi imponramwuvanto unra tiqata, Tire i qata vakyaahuave, tuhua ni rirerata uti varura. Nte mwitaa mwitaamaqi viqana Karaisira kyaiqa vare varura.

27 Nte Karaisira kyaiqa toqaamwu tu kyena varaqi viqana entaqivata airi enta hia vaitaraitina, Karaisira kyaiqa varaqina quavara. Airi enta hia kyaravata nramanrivata nraavaro ni nraataa huvana variavara. Nte airi enta hia tuavaaqa vahuvana qati variavaro ni toqa tu kyeqaro vatora.

28 Hia mwi inraikyava mwi inraikyava nraahu ni muaanra mpi varira. Mpo enta mpo enta Karaisira nraakte qora mpoqi mpoqi variahua nte mwihuaqaa ntaqikyianinranra nronraqama kye riemwaqi vi varuqaro mwi muaanravavata niqaa vahana varura.

29 Mwihuaqitairo vaisi mpovanto tiqaro, Nte hiama kepukyaqama kyena Kotira aanraqaa quaninrave, tirera, nte mwianra po qiariro ni mutukyavanto uaqia hiraqena varianinra. Mpovanto Kotira aanraqaatairo tumu ntiro qora kyaiqa varairera, mwianravata riaariro ni mutukyavanto uaqia hiraqea varianinra.

30 Nte ntene mwahuta qiaro aanrava nraahu vahirera, nte ntene hia kepukya vahana varura mwianra nraahu rieqana nte ntene mwahuta qianinra.

³¹ Kotiva tiri vunyaa vaisi Iesusi Karaisira qova varirama. Nte Kotira nirutu nraahu ekyaa enta tuaaheraqi virerama. Kotiva rie varihana hia nte nkyi unravauma tina.

³² (Nte ugenrau vaisira ni okyara riaate tina, nte mwaa quara nkyi timwa nyinrenra.) Haaru nte Ntamasikaasini mwatukya nronraqi variavaro Aretaasiva vunyaa vaisivanto varuvaro mwia kyaiqa vaisi nronra mpovanto mwatukya mwiaqaa ntaqikyi variqaro nianra mwia ntavaaqavuqita uro karavuqi kyaate timwa kyero vaisi mponramwu sitovata uro vasaamwunra qesaqaa variqata nianra taqe varura.

³³ Taqe varuvata vaisi mponramwuvanto ni kyaahaqa hiqata tua nronra ntutantu toraqi ntumwa kye vateta vasaamwunra ntukoraatonataita kyaantaqa sutu kyeta mwaaqani mwaati kyovana mwiaqataina ntugema kyena quavara.

12

Kotiva Porura nraamwuto inraikyarara tura

¹ Nte ntenu mwahuta qiariva hiamma ni kyaahaqa hiananro. Vaisi mponramwuvanto unra qua mwaanra nkyi timwa nyiqatama nkyiari mwahuta ti variarara rieqana, nte ntenu mwahuta qari aanrava nraahuma vahiro. Qio kyai nte ntenu mwahuta timwaqi viqana nronravanto ruvaatakyaa qua mpo qovarama kyaihana taqaurara nkyi timwa nyianri.

² Haaru nte Karaisira nraaqiara variavaro Kotiva ni pitaqiro verara nyaamwuni uro kyora. Ni manraquha nraahu pitaqi uro kyorave iho, ni mamanta rirante pitaqiro uro kyorave iho, hia nte mwia ntapihuquo. Kotiva nraahuma mwia ntapihiro. Mwi entaraqaatai variqi vuqaro 14 ihmima nritarerero.

³ Kotiva ni pitaqiro uro nai mwatukya kyuqeraqi kyovana taqaavara. Mwi entara ni manraquravanto nraahuve, ni mamantavantovatave, vura nte hia mwia ntapihuquo. Kotiva nraahuma mwia ntapihiro.

⁴ Ni pitaqiro uro nai mwatukya kyuqeraqi kyovana mwipi variqana hia qio nkyi timwa nyiani quara riaavara. Hiama qio teta vaisi quaqitai mwi quara nkyi timwa nyianinra.

⁵ Nte mwini variqana mwi inraikyara mwi inraikyara taqaurara rieqana qio ntenu mwahuta qiataa ihanavata hia nte mwitaa hirera. Nte ugenrau vaisiva varura mwianra rieqana ntenu nutu tuaahererara.

⁶ Nte nyaamwuni variqana taqau inraikyara rieqana ntenu mwahuta qiankyera, hia nte vu nraato apiqa hi vaisihua qianta qianinra. Nte qutaa qianinra. Qio hia nte nyaamwuni variqana taqau inraikyara rieqana ntenu mwahuta timwaqi virera. Nte mwitaa qiariro vaisi mpovanto niānra qikye mwiva nronra vaisivanto variho qiankyora. Nkye ni kyaiqa taqeta nte qua ti varura rieta qioma ni okyara ntapihi kye taqevara.

Viaruaava rintema kyero Porura ri varurara tura

⁷ Kotiva ni pitaqiro uro nyaamwuni kyovana nte kyuqe inraikya mpo inraikya mpo inraikya taqaavarora tiro, Kotiva nianra tiqaro, Poruva nai tiqaro, Nte nronra vaisi varuquo qiankyorave, tiro. Mwitaa timwa kyero Kotiva ni mamantaqa nriqa vu inraikyara vatora. Mwi inraikyaya viaruaava rintema kyero ni mamanta ri varihana varura. Saataaniva mwi inraikyaraqo ni uaqjama mate varihana varuvara tina, nte nyaamwuni taqau inraikyara ntena mwahuta timwaqina quankyora.

⁸ Nte tiri vunyaa vaisiara taarampo nani po tiqana mwi inraikyara qatinani vara kyairaque qio variankye tuqaro

9 mwiva qaqao tiro, E mwi muaanranra varaqi vi variraqe nte qioma i kyugemaqina quaninrave. E ugenrenra vaisiva variqira viraque nte qioma i kepukya mwiqina quaninrave, tiro. Mwiva mwitaa titana nte nriqa vi inraikyara varaqi viqana ugenrau vaisiva variqi quaninra mwianra rieqana qamwateqana variqi virera. Nte mwitaamaqi vi varuqaro Karaisiva ni kepukyaqama mate varihana variqi vi varura.

10 Nte Karaisirara rieqana nte ugenrau vaisiva varianinranra hiama nronraqama kye riena. Mpohua nianra qora qua tirave, nte mwukyaari tuqina quaninrave, ni uaqama mataivaqe variqi quaninrave, muaanra varaqi quaninrave, nte Karaisirara rieqana hia mwi inraikyara mwi inraikyarara nronraqama kye riemwaqina virera. Nte ugenraanri vaisiva variariro Karaisiva ni kepukyaqamaqiro vi variraqe variqina quaninra.

Poruva Korintiqinaahuara nronraqama kyero riora

11 Nte ntene mwahuta tiqanama nte hia vu nraato vahi vaisiva tintema kyenama ti varina. Nte nkyiara rieqanama ntene mwahuta ti varina. Nkye ni kyaiqara kyuge kyaiqave qataara hia mwitaa qiao. Nkye nianra qumina vaisivantomta variho tivera, mwaa quara riaata. Nkye vaisi mponramwuanra tiqata, Karaisiva nronraqama kyai vaisihuave, qiahuu nte mwihua kyaiqa nraatara kye varuvave.

12 Karaisiva quttaaqama kyero ni nronraqama kyaihana nte quttaaqama kyena mwia kyaiqa vaisima varuqo. Nte nkyi utaqaa variqana hia qoriri hiraitina, mpo kyaiqa mpo kyaiqa nronra kyaiqave, hia taqaa kyaiqarave, vare variavata nkye ni kyaiqa taqeta mwiaqaa nianra qutaama Kotiva mwia nronraqama kyero titaiho timwa kyeta ni okyara ntapihi kye taqataara.

13 Nte Karaisira nraakyе qora mpo nani variahuaqaa kyugema kye ntaqiqiyana nkyiqa nraahuve hia kyugema kye ntaqikyi varuqо? Qaqao, nte mwihuaqaavata nkyiqaavata kuua qarama kyena ntaqikyi varuqo. Nte mwitaa hiqanavata kuua inraikyago mpohua ntaqikyuravata nraatara kye nkyiqa ntaqikyura. Nkyi muaanra nyiankyo tina, nte nkyiara hiama kyarave, mpo inraikyave, mpiate tina. Hia nte mwitaa tiraitina, nkyiqa qati ntaqiqiyina vi varura. Po, nkyivata muaanra nyiataara hia nkyi muaanra nyunrave.

14 Nte nkyi taara nani uro taqaura. Nte terataarama kye qaiqaa nkyi uro taqarerera utuqo. Hia nte nkyi muaanra nyinrenrana uro nkyi taqareravauma iho. Hia ni nkyi munimanrave, ontarave, mwutukya ntithana nte nkyi vaisiara mwutukya ntithana uro nkyi taqarerera. Hia nraaqiara patavanto nkyiari nyohua sohuaqaa ntaqikyi variara. Nyohua sohua nkyiari nraaqiaraqaa ntaqakyi variara. Nkye ni nraaqiara votima kyetama variavo.

15 Nte nkyi kyaahaqa hirerana qamwateqana ntene kepukya taiqa kye ntene mwamwantaqaa nriqa vi inraikyara varaqina virera. Ni mutukyavanto nkyiara üromwi mpoqiatama vahiro. Nkyi mwutukyavanto nianra nataamaye vahiro? Nkyi mwutukyavanto nianra mwatumwi pataqiae vahiro?

16 Nte hia nkyi muaanra nyianinranra tura mwianra nkye qutaave nraahuma tivara. Nkye mpo hiahua nianra tiqata, Poruva kumwaanri utu kyeqaro tire huna inraikyara vare variho, qiaro.

17 Nanraqamave nte mwitaa hianinrave? Nte vaisi mponramwu sitauqata nkye hianani quahua nkyiqitai mpo inraikya varetave hiavo? Qaqao, mwihua hia mwitaa hiara.

18 Nte Taitaasirara po tiqana nkyiara mwihua hianani quante timwa kyena mwiaavata Karaisira nraaqiara mponramwu sitauqata mwihua

Taitaasiravatama kyeta quarama. Taitaasiva uro nkyi unra utu kyero mpo inraikya varairave iho? Hia mwiva mwitaam hirave. Ntevata Taitaasivavata kuaa kyaiqa mwia nraahu vare varurahua. Tiretana hia unra utu kyeqata mpohuani vare varunana.

¹⁹ Hia tire mwaa quara tiqata nkyi suqaa variqata teta qua ntapihi kye taiqa kyaare titavauma tita. Ni nramwunaa tuaavo, tire Karaisira nraaqiara variqata Kotira vuqaa variqatama ti varita. Tire nkyi kyaahaqa hiare tita, mpo kyaiqa mpo kyaiqa vare varurahuama varita.

²⁰ Nte mpo inraikyara aatu hiqanama varina. Nkye mwitaama varia nraakye qorahua varivaravema ti varina. Nte nkye hinani uro ntenga taqaarita hia mwitaama vari nraakye qorahua varivora. Nkyevata nianra mwitaama vari vaisiva variananrove thhua variavana nte nkye hinani uro ntatarita nkye nianra hia mwitaama vari vaisiva variho tivorave. Mwianra aatu hiqanama varuqo.

Nte nkye hinani uro ntenga api okyara, mpo okyara mpo okyara taqaankyyora. Inronra hi okyararave, kyarunti vari'okyararave, raraqa tai okyararave, tukyama vita hia kuaaqi vari okyararave, uaqia hi quara ti vari okyararave, mpohuara mwoqanyaqua ti okyararave, nte nronravanto varuqo ti vari okyararave, nanrianra nanrianra mpo qua tiqata hia kuaa qua ti vari okyararave, nte ekyaa mwi okyara mwi okyara nkye hinani uro ntenga taqaankyyora. Mwi inraikyara taqaaninranra aatu hiqana varura.

²¹ Nte uro ntenga taqaarita nkye api qaraqita nrohi variqata uaqia hi kyaiqara mpo kyaiqa mpo kyaiqa utuqi vira hia qaqa kyaratita varivera, mwia kyaara Kotiva kyaurira inraikya ni mpiraqe nkyiara nronraqama kyena ntataaninra. Nte mwi okyara taqaankyyora.

13

Poruva qua taiqa kyarerera hiro tiqaro, Rauriqata variate, tura

¹ Nte taara nani nkyi uro taqauva qaiqaa uro nkyi taqarerera. Kotira mpukuqi mwaa quava mwitaama tiro:
Vaisi taaratanave, taarampotanavantove,
nkyiari suqo taqaivaro
vaisi mpovanto qora kyaiqa utu kyairera,
nkye mwi vaisinramwuhua quara qutaave tiqatama
mwi vaisiraqaa qua vatevarave, tura.

(Lo 19:15)

² Nte taara nani nkyi taqarerera quava entaraqaa nkyi kyapata variqana qora kyaiqa uti nraakye qorahuaravata, ekyaa hini mwihuaravata, kepukyaaqama kyena qao tiqana qua timwa nyiavara. Nte mate nyianrani variqana qaiqaa mwi quara tirera. Nte qaiqaa nkye hinani quariva haaru qora kyaiqa vare varia nraakye qorahuavata, kyaatavantovata, qora kyaiqa vare variahua hia nte mwihua ntauhaaninra.

³ Nkye nianra tiqata, Qutaave Karaisiva mwia nroqitairo ti variho, hiave mwia nroqitairo ti variho? tiqata ni mwataarama kye taqarerera uti variarara tina, nte uro ntenga qora kyaiqa uti variahua hiama ntauhaaninra. Nte uro ntenga mwitaa hiarita ni okyara ntapihi kyeta taqevara. Karaisiva hia uqenrai vaisiva variqaro nai okyara nkyi nyaamwute variho. Karaisiva kepukya vaisivanto variqaro nkyi nyaamwute variho.

⁴ Haaru mwiva uqenro vaisiva varuvata mwia kyatariqaa rukye hirito-varo Kotiva mwia kepukyaaqama kyovaro mwaa entara mwiva qaiqaa qati siviro kepukyavanto qati variqiro vi varira. Karaisiva haaru uqenro vaisiva varuntema kye mate tirevata uqenraunra vaisihua varita. Kotiva tirivata kepukya timwiqi vi variraqe tire Karaisiravata kuaaqi variqi viqata nkyini kyaiqa varaqi virera.

5 Qutaa nkye Karaisira qua riemwaqi quarave? Nkye nkyeta tukyama kye taqaate. Nkye qiove tiqata, Iesusi Karaisiva tiri utaqi variho, tivara? Nkye hia qio mwitaa tivera, nkye hia Karaisira qua riaahuaama varivara.

6 Nkye tiri tukyama kye tiriara nanra quave tivara? Nkye tiriara tiqata, Tire mwihua tukyama kye taqaurata mwihua ntapihi kye variavo, tivera, tire nkyi quara qiovema qiananra.

7 Nte Kotirara aakyara nteqana mwitaama tina, Kotio, mwihua kyaahaqa hirata mwihua hia mpo inraikya apiqa hiraitita, ntapihi kyeta variate, tuqo. Nte ntene kyaiqa qioqama kye varaaninra mwianra hia nte nronraqama kye riauqo. Nte nkye Kotira vuqaa ntapihi kye varira mwianra nte nronraqama kye riauqo.

8 Tire hiama qio gutaa qua vara mwatumwiqa hiananra. Tire mwi quara kyaahaqamaqa virera.

9 Nkye kepuuya nraakye qora variqi quate titi, tire qiomma hia kepuuyaqa hiara vaisihua variqi quananra. Tire nkyiara kepuuyaqama vita quataaqama kye Kotira nraakye qora variate titi, Kotirara aakyara nte varunanra.

10 Nte vaini quariva nkyi uro inronra hiankyo tinama, nyianrani variqana qara nraahu vara kyena. Kotiva ni nronraqama kyaihana nte nkyiqa ntaqikyi varuvama varina. Kotiva hia nianra nkyi uaqima nyataarive tiravauma. Mwiva nianra nkyi kepuuyaqama nyataarive tiro, ni nronraqama kyaihana nte nkyiqa ntaqikyiqina vi varura.

Qua mwanteqaro tura

11 Ni kata pakyaa tuaavo, ni qua qio taiqero. Nkye Kotira vuqaa ntapihi kye variqi virara kepuuyaqamaqa quata. Nte tu quara riemwaqi quata. Kuua qua nraahu timwaqi quata. Nkyi mwutukyaqitairo qihakya hi varirata variqi quata. Nkye mwitaamaqii vivaro Kotiva nkyiara mwutukya mpoqiavata vaharo nkyi mwutukya qihakya nyate variva, mwivama nkyivata variqiro quananro.

12 Nkye Kotira nraakye qora variqatara titi, nkye kyuqema kye nai qua mwante nai qua mwante hiqata variata.

13 Kotira nraakye qora mwaini variahua nkyiara rieqata nkyi qua mwantauroma titi.

14 Qio varivaro tiri vunyaa vaisivanto Iesusi Karaisiva nkyi kyuqemaqiro viraro Kotiva nkyiara mwutukya vahiariva vahiqiro viraro mwia mwanaraquravanto nkyivata variqiro quari.

KARESIA

Poruva Karesiaqinaahuani qara vara kyora

Iesusira qati vara sivuma kyovaro nyaamwuni uro varuvaro 25 ihive nritarovata Karesia mponramwuvanto Karaisira quara qutaave timwa kye varuvata vaisi mponramwuvanto uronte mwihuara tiqata, Nkye Karaisira qua nraahu riemwaqita vivorave. Nkye Karaisira qua rieqata Iutaa mwaanra qua Kotiva Mosesira mwu quara mwi quaravata riemwaqita quate, ti varura. Mwihuua api mwitaa ti varuvaro Poruva mwia kyaara mwaa quara qara ntumwa teqaro Karesiaqinaahua ntapihi kyero timwa nyinro kepukyaqama kyero tiqaro, Karaisira qua nraahu riemwaqita quate, tura.

¹ Nte Poruva qara mwaa nkyini vara kyauquo. Hia qumina vaisivanto ni nronraqama kyero ni titaihana nte variqana Karaisira qua nkyi timwa nyiqi vi varura. Qaqao, Iesusi Karaisivavata, tiri tiqova Kotiva Karaisira qutu varyqitairo qati vara sivuma kyova mwivavata, mwitanahua ni nronraqama kyeta ni titaavana nte Karaisira qua nraakye qora timwa nyiqi vi varuvama varina.

² Ntevata, Kotira nraaqjara mponramwu mwaini nivatamakyе variahuavata, tire nkyiara Kotira nraakye qora Karesiani variahua nkyi qua mwanteqa mwitaama tita,

³ Kotiva tiri tiqovavata, tiri vunyaa vaisivanto Iesusi Karaisivavata, mwitanahua nkyi kyuqema nyataivarо nkyi mwutukyaqitairo qihakya hi variata variate, turo.

⁴ Tire mwata mwaaqa variqata qora kyaiqa nraahu utuqita vi variavararo Karaisiva tiri kyaahaqa hirero tiri qora kyaiqavanto mwihuua ntumwaqu kyaankyo tiro, mwiva tiriara rieqaro tire qora kyaiqa utuna quava nruka quarive tiro qutu vura. Tiri tiqova Kotiva Karaisira titovaro Karaisiva Kotira qua riemwaqi viro qutu vura.

⁵ Qio Kotiva Karaisirara tiri kyaahaqa hiarive tiro Karaisira titairara tita, nrivaeq tire ekyaa enta Kotira nrutu tuaheraqi vi variare. Qutaave.

Hia mpo qua mwaanra riaraitita, Karaisira qua nraahu riemwaqita quate, tura

⁶ Kotiva Karaisira kyaiqara rieqaro nkyi kyuqema nyatarero nkyi nyaanrama taihata nkye Karaisira qua riemwaqi vita mwiaqatai nkye qamwanrama kye Karaisira qua qaqqira kyeta tiqata, Kyai mpo qua Kotiva varinanianra vi quara riemwaqi quare, timwa kyeqata variara. Nkye mwitaa hiavana nte mwianra nronraqama kye rieqana aatu hina tiqana, Qikye, mwihuua qutaave mwitaa ti variavo? tura.

⁷ Hia nraahumwa mpo qua kyuqe qua vahira mwi quara rieqata nkye Kotira aanraqaa vivarave. Hiave. Vaisi mpo hiahua Karaisira qua hia ntapihi kyeta tiraitita, apiqama kyeqata mpo qua nkyi timwa nyinrenra uti variavarо nkyi su nyaato apiqaa ihata taara su nyaato vahata variarara tina, nte nkyiara tiqana, Karaisira qua nraahu vaharo hia nraahumwa mpo qua vahirave. Nkye Karaisira qua mwia nraahu rieqata Kotira aanraqaa vivarave, tuqo.

⁸ Tireve iho, nyaamwunyaahuave iho, tauraa tire nkyi timwa nyuna quaraqaatai nraahumwa mpo qua nkyi timwa nyianrenra, Kotiva mwiaqaa qua vatairaro mwiva uaqiahiha nraakye qorahua uaqiahiha mwataraqi ru-pavita varinani virage nte huviqarave qianinrave.

9 Mwi quara tire haaru nkyi timwa nyiavana quara nte qaiqaavata nkyi timwa nyinrenrama. Tire Karaisira qua nkyi timwa nyunrata nkye mwi quarara quataa quave qiara. Nkye mwitaa qiarara tiro, vaisi mpovanto nkyiara mwi quara qaqa kyeta mpo qua riemwaqita quate tirera, Kotiva mwiaqaa qua vatairaro mwiva uaqiahia mwataraqi uaqiahia nraakye qorahua rupavita varianani virage nte mwianra huviqaravema qianinra.

10 Hia qumina vaisivanto ni qamwata mataate tinavauma, mwi quara tina. Qaqao, Kotiva ni qamwata mataarive tina nte variqina vura. Hia nte nraakye qoravanto ni qamwata mataate tina, Karaisira kyaiqa vare varura. Nte mwitaama rieqana kyaiqa varautiri, nte hiama Karaisira kyaiqa vaisi varutiri.

Iesusi Karaisiva Porura nraanrama kyero nronraqama kyorara tura

11-12 Ni kata pakyaa tuaavo, nte kyuqe mwakyaakya Karaisira qua nkyi timwa nyunra mwi quara hia vaisi mpovanto nai riemwa kyero timwa mpi quaravauma nkyi timwa nyina. Hia vaisi mpovanto nai riemwa kyero mwi quara okyara ni naamutaihana nte nkyi timwa nyunra. Qaqao, Iesusi Karaisiva naivanto mwi quara qovarama kyaihana nte mwia qua rieqana nkyi timwa nyunra.

13 Nte Iutaavanto variqana nte haaru Iutaa mwaanra okyara Kotiva Mosesira timwa mwu quara, mwi quara nraahu kepukyaqama kyena riemwaqi viqana nrohiavara nkye mwia ntapihi kyaara. Nte mwi entara Iesusira qua rio nraakye qorahuara api qua riaahuave timwa kyena hia mwihuara po tiraitina, mwihuua ntuqutu kyena raupirima kyarerera uti variavara.

14 Nte Iutaavanto variqana mwi entara nte Iutaa mwaanra okyara riemwaqi viqana nte ntena henahuavata nyaatara kyena vuni variavara. Nte mwihuua vuni variqana nte mpogama kye tetu haivaqahua tu quara, mwi quara nraahu pu naatoqi vatena riemwaqina vi variavara.

15 Qio haaru hia ni mwato entara Kotiva kyuqema mateqaro ni nai kyaama tero nianan Poruva ni kyaiqa vaisima variananrove timwa kyero ni naanrama kyero ni pita vatora.

16 Mwiaqatairo mpo enta nai mwatamato entaraqaa nianra Poruva ni maaqu mwakyaakya mpo mwatanaa mpo mwatanaa, hia Iutaa mwatanaahua mwi quara timwa nyianrive tiro, Kotiva nai mwaaqu qovarama kyovana nte mwia taqaavara.

Nte Kotira mwaagu taqena mwiaqataai hia mpohua mpohua Iesusira okyarara kyapara hirerana quavara.

17 Hia nte Ierusaremini nraante vaisi mponramwu nronraqama kyohua taqarerana quavara. Nte hia mwini viraitina, mwi entara toharena nyianra Arepiapni uro varina mwisai uro ntantena Ntamaasikaasini nrumu variavara.

18 Nte mwini variavaro taarampo ihi nritarovana nte Pitaara taqarerera Ierusaremini quavava uro mwivata taarampo uiiki variavara.

19 Mwi entara hia nte Iesusiva nronraqama kyo vaisihuaqitai vaisi mpovata taqaraitina, nte Iesusira qata Iemisira nraahu taqaavarave.

20 Nte Kotira vuqaa variqana kyauqu nriqiqaa vateqanama nkyiara tina, Qara mwaa ntumwa tau quava hia unra quavauma vaiho. Qutaa quama vaiho, tuquo.

21 Nte Ierusaremini vari kyena mwiaqataai nte Siriaanivata Sirisiaanivata uro variavara.

22 Mwi entara Iesusira nraaqiara Iutiaani varuhua hia ni ntapihi kyohua varura.

²³ Mwihua mpo uhua nianra tu quara mwia nraahu riora. Mpo uhua nianra tigata, Mwi vaisiva haaru Iesusirara quataave tivorave timwa kyero tiri Iesusirara nraaqiaranramwu uaqiplina timwa tarero uti varurave. Mwiva mate mwaa entara Iesusirara quataave qiate tiqaro nraakye qora timwa nyi varirave, tura.

²⁴ Mwihua mwitaa timwa kye nianra rieqata Kotiva kepukyavanto variho timwa kyeta Kotira nrutu tuaahere varura.

2

Poruva Iesusiva nronraqama kyo vaisihua uro taqora

¹ Ihi 14 nramwu nritarovana nte Vanavaasikyantiri nrumu ntante qaiqaa Ierusaremini quvara. Nte mwini virera hina Taitaasira, hia Iutaa mwatanaa mpo mwatanaa vaisivata vitena quvara.

² Kotiva qovarama kyero nianra Ierusaremini quante tu quara nte ntapihi kyena nte mwi quara vataqi vina nte mwini quvara. Nte mwini uro variqana nronra vaisinramwuve qiahuavata nraahu variqana nte Karaisira qua mwitaa mwitaa timwa kyeqana mpo mwatanaahua timwa nyu okyarara mwihuvata timwa nyiavara. Nronra vaisi mwinramwuhua nianra api qua qumina quama mpo mwatanaahua timwa nyiho timwa kyeta ni ntavaaqavivo tina, nte mwinramwuhua mwi quara ntapihi kye timwa nyiavara.

³ Mwi entara nivatama kyero nru vaisira Taitaasiva Kiriki mpo mwatanaavanto varuvata mwihua hia Iutaa mwaanra okyarara rieqata mwia mwamwanta toqa mwataate turave.

⁴ Vaisi mponramwuvanto nraahu unra qua tiqata, Tirevata Iesusira nraaqiarave, tuhua, mwihua nraahu nianra tigata, Qaqao, e Taitaasira mwamwanta toqa kyaataarave, tura. Mwi vaisihua tiri kyaiqa okyara apeqama kye taqarerata nru vaisihua varura. Iutaa mwaanra quavanto tiri rupa taihata varuraro Iesusi Karaisiva tiri huvantu kyaihata tire qatinani nritare varurata mwihua taqeta qaqao tita, Nkye Iutaa mwaanra qua nraahu riemwaqi quataarave, tiqata mwihua qaiqaa mwi quaraqotai tiri ruparera uti varura.

⁵ Mwihua mwitaa hirerata uti varuvata tire hia mwihua qua pataqiyavata riaraitita, mwihua quara qorrima kyeta Karaisira qua mwi quava nraahu quataa qua vahata nkye mwi quara nraahu riemwaqi quate tita, tire hia mwihua api qua riaavanana.

⁶ Mwi entara nte Ierusaremini uro variavata nronra vaisinramwuve tuhua nanra quave ni timwa mpita? Hia nte nronra vaisi nronraqama quaninranra riena. Kotiva hia vaisi nrutuara rieqaro mwi vaisiva kyuqe vaisive mwi vaisiva qora vaisive tira. Qio mwi entara nronra vaisi mwihua nianra nanra quave tita? Mwihua hia nianra e mpo quavata qiataarave tiraitita, mwihua ni quara qio vahio, tura.

⁷ Mwihua mwitaa timwa kyeta taqovaro Pitaava nronraqama viro Iutaa mwihua Karaisira qua timwa nyi varuntema kyero Kotiva ni nronraqama kyovana nte mpo mwatanaa Karaisira qua timwa nyi variavara.

⁸ Iutaa timwa nyianrive tiro Pitaara nronraqama kyaiva Kotiva, mwivama nivata nronraqama kyero mpo mwatanaahua timwa nyianti, tiro. Kotiva kuaa mwiva nivata Pitaaravata nronraqama kyaivama variro.

⁹ Nronra vaisinramwuve ti variahua Iemisivavata, Pitaavavata, Ioniavata, mwinramwuhua nianra tiqata, Qutaaqama kyero Kotiva i nronraqama kyaihara e mwi kyaiqara varaqira vi variaro, timwa kyeta mwihua ni kyauqu mpita Vanavaasiravata kyauqu mwunrama. Mwihua tiritana kyauqu timwiqata Vanavaasikya tiritananra tiqata, Nkyetana mpo

mwatanaahuaqi kyaiqa varaqi vivaqe tire tetu nramwunaa Iutaaqi kyaiqa varaqi quare, tura.

10 Mwihua qua kuaiqia nraahu tiritana timwa timwita tiqata, Nkyetana vehi nraaky egorara taunru kyevorave. Nkyetana mwihuama kyaahaqama nyataate, tuvana nte tiqana, Eo, nte mwihua mwutukya vahana vaakya mwitaa hi varuvara tina, nte mwitaa hianinrave, qiavara.

Poruva Pitaara inronra hiqaro mwia avuqavu hura

11 Mwitaa timwa kye nte variqi quavarso mpo enta Pitaava nte hiavara Antiokini nrintero mwini variqaro mpo inraikya apiqama kyovana mwia kyaara nte ekyahua suqaa variqana Pitaara inronra hiavara. (Mwi quara okyaraqaataina nkyl timwa nyinrenra.)

12 Mwi entara vuni Pitaava Jesusira nraaqiara mpo mwatanaavatama kyero kyara nre varuvata mwiaqatai Iemisiva Ierusaremisairo sito vaisi-hua nri ntora. Mwihua Iutaavantu nruvaro Pitaava mpo mwatanaaa mwihua kyero tiqaro, Mpo mwatanaahua hia Iutaa mwaanra qua riaraitita, hia nkylari nyamwanta toqaahuave. Mwia kyaara nte mwihua kyapata kyara nre variarita Iutaa mwaanra qua rieqata nriahua nianra tivorave, tiro. Pitaava mwitaa timwa kyero mwiva hia mpo mwatanaaa kyapata variraitiro, mwihua kyero nanrianraa variqaro kyara nre varura.

13 Pitaava mwitaa huvata Iutaa mponramwuvanto Jesusira nraaqiaraqama vita varuhua, mwihuavata Pitaava tuntema kye tirira tivorave timwa kyeta hia mpo mwatanaavata kyara nronra. Mwihua mwitaama kyeta kumwaanriqama kyeqata kyuqe kyaiqa varovaro Vanavaasivavata mwihua hunte kuaa qarama kyero hia mpo mwatanaa mwihuavata kyara nronra.

14 Mwinramwuhua mwitaa huvana nte taqaavata mwihua hia ntapihi kyeqa Karaisira qua riemwaqi viqata nrohi varuvana nte ekyaa mwihua suqaa sivina Pitaarara mwitaa tina, Qaqao, e Iutaavantu Jesusira qua riaarava variararovata Iutaa mwaanra okyaravanto hia i tutaihara variaro. E ena mwitaa variqara nanraqamave mpo mwatanaaa mwihuara nkye Iutaa mwaanra okyara riemwaqita quate ti variaro? E hia mwitaa qitaaarave, tina. (Nte Pitaarara mwitaa timwa kye mwiaqatai tetu Iutaa mwatanaavanto varuna okyarara mwihua ntapihi kye timwa nyiavara.)

Iesusirara qutaa mwivave tihua mwihua nraahuma Kotiva avuqavuma nyataananro

15 Tiri tinrohua qohua tiri mwatataavata tire Iutaavantu variqata tire tau-raagama kye mpo mwatanaahuara tiqata, Mwihua mpo mwatanaavanto variarara tiro, Kotiva tiri haivaqara Mosesira mwu quava, Iutaa mwaanra okyaravanto hiama qio mwihua kyaahqa hiraro uaqia hi kyaiqara vare quava qatima mwihuaqaa vahiananrove, ti variavanana.

16 Tire mwitaa ti variavarahua variqata mwiaqatai tiri tivu nraato ntapihi uvata riaavararo tiriqitairovata vaisivanto Kotiva Mosesira haaru mwu quara riemwaqiro viraro Kotiva hiama mwianra rieqaro mwi vaisira qua taiqa kyairaro mwi vaisiva uaqia hi kyaiqara utuani quava mwiaqaa qatima vahiananro. Vaisivanto Iesusi Karaisirara qutaave timwa kyero mwianra riemwaqiro viraro Kotiva mwi vaisira qua nraahuma taiqa kyaananro.

Tire Kotirara mwiva tiri qua taiqa kyaarive tita, tire Iesusi Karaisirara qutaave tunanra. Tire haaru Mosesiva Iutaa mwaanra qua timwa tora riemwaqi quavararo Kotiva hia mwianra rieqaro tiri qua taiqa kyora. Tire Karaisirara mwiva tiri kyaahqa hiarivama variho turaro Kotiva mwianra rieqaro tiri qua taiqa kyero tiri avuqavuma timwa taira. Vaisi mpovanto

Iutaa mwaanra okyara riemwaqiro viraro Kotiva hiama mwi vaisirara qamwateqaro e ntapihi kyera nrohi variaravave qiananro.

¹⁷ Kotiva tiri avuqavuma timwa taarive tita, tire Karaisirara quataave tunanra. Tire Karaisirara quataave turaro mwiaqatairo tiri tivu nraato ntapihi vihata tire taqauraro mpo mwatanaavanto uaquia hi kyaiqara utuqita quantema kyetama tire lutaavantovata uaquia hi kyaiqara utuqi vurahuama varita. Iesusiva tirini kyaiqa vara tairaqaatairove tiriqi uaquia hi kyaiqava qovarama viro? Qaqao, mpovanto mwitaa tirera, mwiva api quama qiananro.

¹⁸ Haaru nte Iutaa mwaanra okyara riemwaqi quangye timwa kyena, qora aanraqaa nraahu quavara. Nte Iutaa mwaanra okyara qaqira kyaura, mwi quara qaiqaa riemwaqi quangye qiankyera, nte qaiqaa nraahuma uaquia hi aanranraqaa viqana uaquia hi kyaiqara varaqi quaninra.

¹⁹ Mate Iutaa mwaanra okyaravanto hiama niqaa ntaqikyi variro. Karaisiravata ni ru kyorave. Nte qutu vi vaisira votima kye varuqarora tiro, mwi quava hia qio niqaa ntaqikyiari vaihana nte Karaisirara nraahu riemwaqi viqana variqi virera.

²⁰ Mate hia nte ntene variqi vi varuvave, Karaisiva ni utaqi variqiro vi varihana nte variqi vuqo. Mwaa entara nte Karaisirara quataa mwiva Kotira mwaaquve timwa kye mwianra riemwaqi viqananra tinama, nte variqi vina.

Karaisiva nianra mwutukya vahuvaro nianra rieqaro qutu vura.

²¹ Karaisiva mwitaama kyero kyuqema matairara tina, hia nte mwiva mwitaama mataira mwia qaqira kyarerave. Kotiva Mosesira mwu quava Iutaa mwaanra okyaravanto tiri kyaahaqama timwa taitiri, Kotiva mwianra rieqaro tiri avuqavumama timwa taitiri. Mwitaa hiankye titiri, Karaisiva hia tiri kyaahaqaa hiraitiro, quminama qutu vitiri.

3

Nkye Karaisirara quataave timwa kyeqata Kotira mwanraqura varaarave tura

¹ Qaqao, Karesia tuaavo, hia nkyi su nyaato vaihata variarave. Tava nkyi su nyaato vara apiqama kyaihatave nkye api qua rieqata nrohi variavo? Nte ntapihi kye Karaisira kyatariqaa ruto quara nkyi timwa nyuqata nkye hiave ntapihi riaavo?

² Nkye kuaa qua mwaiqiera ni timwa mpivae riaari. Nkye Iutaa mwaanra qua riemwaqi viqatave Kotira mwanraqura varaavo? Nkye Iesusi Karaisirara quataave timwa kyeqatave Kotira mwanraqura varaavo? Timwa mpivae riaari. Nte mwianrama nkyi kyapara huqo.

³ Nkyi su nyaatovanto apiqamave viro? Nkye Iesusi Karaisirara quataave timwa kyeqata Kotira mwanraqura varaarave. Tohare nkye nkyetavanto hia nkyeta kyaahaqaa hiraitita varuvaro Kotira mwanraquravanto nkyi kyaahaqaa hvutva nkye Jesusira nraaqiaraqama vita variqi vurave. Mwiaqaatai nkye nraaqamave api vu nraato rieqata Kotira mwanraqura qaqira kyeta nkyetavanto nkyeta qaiqaa kyaahaqaa hirerata uti varita?

⁴ Haaru nkye Iesusi nraaqiara variqi vuvata mwia kyaara nkyi uaquia-maqa ita vuvata nkye mwi entara hia qoriri hiraitita, kepukyaqama kye variqi vura. Haaru mwi entara nkye kepukyaqama kye variqi vurara mate mwaa entara taunru kyeta haunri api mpo qua riemwaqi vivora.

⁵ Nkye hia Iutaa mwaanra okyara riemwaqi viraitita, nkye Karaisira quara quataa quave qiavarora tiro, Kotiva nai mwianraqura nkyi nyihanro mwiva nkyi utaqi varihata nkye nronra kyaiqa nraahumwa kyaiqa vare variara.

6 Evarahaamunranra tu quara rieqata variata. Kotira mpukuqi Evarahaamunranra mwitaama tiro, Evarahaamuva Kotirara e quttaa mwitaa hinanrave tuvaro Kotiva mwianra rieqaro mwia qua taiqa kyero iara avuqavuma nrohi variara vaisivavema qianinrave, tura.

7 Evarahaamuva tuntema kye Kotirara qutaave ti varia nraakye qorahua, mwihua qutaama Evarahaamunra nraaqiara variarama. (Evarahaamuva mwatatai vaisihua mpo hiahua Kotirara hia qutaave tiraitita variahua, mwi nraakye qorahua hia Evarahaamunra nraaqiara variarama.)

8 Karaisiva nraakiara nraakye qora kyaahaqa hianinranra rieqaro Kotiva haaru Evarahaamunranra qua turama. Mwi quara Kotira mpukuqi qara ntumwa tova mwitaama tiro:

E mwatatera huaqitairo vaisi mpovanto ekyaa
mpo mwatanaa mpo mwatanaa kyaahaqa hi varirata
mwihua kyuqema kye varivarave, tura.

(Okyara 12:3)

Mpo mwatanaa mpo mwatanaa Karaisirara qutaa mwivave tivaqe nte mwihua avuqavuma nyataankye qianinranra rieqaro Kotiva Evarahaamunranra mwitaa tura.

9 Evarahaamuva Kotirara qutaave timwa kyero mwianra kepukyaqama kyero riemwaqiro vurara tiro, Kotiva mwianra rieqaro mwia kyuqema mwatora. Mwia votima kyeta ekyaa nraakye qora Kotirara kepukyaqama kye riemwaqita quahua, mwihua variavaro Kotiva Evarahaamunra kyuqema mwatainfema kyero mwihuavata kyuqema nyate varira.

10 Kotira mpukuqi mwitaama tiro:
Mosesiva ekyaa mwaanra okyara qara ntumwa to quava
vaiharo vaisivanto hia ekyaa mwi quara nraisairo
riemwaqiro viraitiro, hini qua qaqlira kyairera,
Kotiva mwia uaqlama mwataananrove, tura.

(Lo 27:26)

Kotira mpukuqi mwitaa tirara tiro, mpovanto tigaro, Kyai nte Mosesira qua riemwaqi quangkye, qiariva uro uaqlamama quananro.

11 Vaisivanto Mosesira mwaanra okyara riemwaqiro virera, Kotiva hiama mwianra rieqaro mwia qua nruka mwataananro. Kotira mpukuqi mwitaama tiro:
Kotirara kepukyaqama kyero riemwaqiro vi variari
vaisiva variraro Kotiva mwia qua taiqa kyairaro
mwi vaisiva qatima variqiro quananrove, tura.

(Habakuk 2:4)

12 Mosesira mwaanra okyara riemwaqiro quari aanrava mpo aanra vaiharo Karaisirara riemwaqiro quari aanrava mpo aanra vahirama. Hia aanra mwitanava kuaa qarama kyero vahira. Kotira mpukuqi mwitaama tiro:

Mosesira mwaanra okyara hia mpoqia qaqlira kyaraitiro,
ekyaa mwi quara vataqiro quariva,
mwi vaisivama qati variqiro quananrove, tura.

(Wok Pris 18:5)

13 Tire Mosesira mwaanra hia ekyaa mwi quara vataqi vuanra mwia kyaara uaqlama quataara vahuvaro Karaisiva qovara hiro tiri mwaata varovaro Kotiva mwia uaqlama mwatora. Kotira mpukuqi mwitaama tiro:

Kyatariqaa rutaari vaisiva variraro

Kotiva mwia uaqlama mwataananrove, tura.

(Lo 21:23)

14 Kotiva haaru nai kyauqu nriqiqaa vateqaro Evarahaamunranra kyuqema kyero tu quara ekyaa mpo mwatanaa mpo mwatanaahuaqi mwi quava vahiarive tiro, Iesusi Karaisiva mwianra rieqaro uaqlama vura. Karaisiva uaqlama vurara tita, tire Karaisirara qutaa mwiva tiri kyaahaqa hiarivama variho turaro Kotiva nai mwanraqura tiriara mwihua

nyinrenrave timwa kyero mwiva mate tiri nai mwanraqura timwihata vareta.

Kotiva nriqiqaa kyauqu vato quara tura

15 Ni kata pakyaa tuaavo, nkye nte tu quara ntapihi kye riaate tina, nte qumina quaqaa ntumwa kyena nkyi timwa nyinrenra. Vaisivanto nai qutuaninranra rieqaro qara vara kyero qara ntqaro, Nte qutu quariro ni onta mwi vaisirarama tiraro varaarive, timwa kyero nai nrutuvata qara mwipi vatero variro qutu viharo mwia quavanto qio mwitaama vahiraro hiama qio mpovanto mwi quara hini qua qaqa vara kyero kyaananro. Hiama mpovanto mpo quavata mwia quaqa mwaati tomaqa taanano.

16 Mwia votima kyero Kotiva nai kyauqu nriqiqaa vatero Evarahaamunranra tiqaro, Nte iaravata e mwataterahuaravata rieqanama mwaa quara tuqo, fura. Kotiva hia tiqaro e mwataterahuave turave. Kotiva e mwatateravave tiqaro vaisi kuaiqarama tiro. Karaisiva hia mwatani tumu entara Kotiva Evarahaamunranra e mwatateravave tiqaro Karaisirara tura.

17 Nte tu quara mwia okyaravanto mwataamama vahiro: Kotiva Evarahaamunranra qua timwa tero kyauqu nriqiqaa vateqaro nte qutaa mwitaa hirerave tura. Kotiva mwi quara tuvaro 430 ihi airi ihi nritarovaro mwiaqaatairo Kotiva nai mwaanra okyara Mosesira timwa mwunra. Nraakiara Mosesirara mwaanra okyara timwa to quava hiama qio hogarerero Evarahaamunranra tu quara nruka kyaananrove. Hoqarero Kotiva Evarahaamunranra tu quava qatima vahianano.

18 Kotiva hia nai Mosesira timwa mwiqanro mwaanra okyara timwa to quarara rieqaro nraakye qora kyugema nyatarero uti varirave. Mwiva mwitaa hiankye titiri, haaru Evarahaamunranra tu quava qumina quama vahitiri. Kotiva hoqarero Evarahaamunranra tu quara mwi quarara rieqarora tiroma, nraakye qora kyugema nyatarero uti variro.

19-20 Kotiva Mosesira timwa mwiqanro mwaanra okyara timwa to quara mpo? Nanraqama Kotiva nai mwaanra okyara Mosesira timwa mwunrave? Nraakye qoravanto nkyiari qora kyaiqa okyara ntapihi kye taqaate tiro, Kotiva nai mwaanra okyaravata tomaqa kyero vatora. Nraakye qoravanto mwi okyarara riemwaqi vi varivaro nte tu vaisiva Evarahaamuna mwataratariaqo qovarama quarive tiro, Kotiva ni mwaanra okyara nraahu riemwaqita quate tiro, tura.

Kotiva nraakye qora nai mwaanra okyara timwa nyinrenro mwataama kyero timwa nyinro. Kotiva mwi quara nyaamwunyaahua nraante timwa nyuvata mwiaqaatai mwihua Mosesira tumu timwa mwuyaro mwiaqaatairo Mosesiva mwi quara uto timwa nyunra. Kotiva Evarahaamunra qua timwa mwinrenra hiro hia vaisi mpo timwa mwinro tiqaro e uto Evarahaamunra timwa mwiantre tiraitiro, Kotiva nai Evarahaamunra timwa mwunra.

Kotiva mwitaa mwitaama rieqaro Mosesira timwa mwiqanro nai mwaanra okyara timwa tora

21 Qutaa Kotiva nai vuni Evarahaamunranra tu quara nruka kyarerero Mosesira nai mwaanra okyara timwa mwunrave? Qaqao, hia mwitaa hurave. Kotiva Mosesira mwaanra okyara timwa mwunra hiama qio vaisi mpovanto mwi quara kyugema kyero riemwaqiro quananro. Vaisi mpovanto Kotiva Mosesirara mwaanra okyara tu quara qio riemwaqiro quankye titiri, Kotiva mwi vaisirara, E avuqavu nrohi variara vaisivave. E hia ekyaara qutu viraitira, e ekya enta qatima variqira vinanravema, titiri.

22 Kotira mpukuqi hia mwitaa tiraitiro, mwataama tiro:

Qora kyaiqavanto ekyaa mpo mwatanaa
mpo mwatanaahua ntumwaqu kyaihatara tita,
mwihua ekyaa qora kyaiqa varaqi vi variarave, tura.

Nraakte qora ekyaa mwihua qora kyaiqa utuqi vi variarara tita, Iesusi Karaisirara qutaa mwivave qiariva, mwiva nraahuma qio variananro. Vaisivanto Karaisirara riemwaqiro quariva variraro Kotiva Evarahaamunranra nai nriqiqaa kyauqu kyo quava, mwi quava mwianima vahiananro. Kotiva mwi vaisirama kyugema mwataanano.

23 Vuni hia Karaisiva qovarama vu entara Mosesira mwaanra okyavanto tiri rupa tovata variavanranra. Tire mwi quara nraahu riemwaqi viqata variavararo mwiaqatairo Karaisiva qovarama vurama.

24 Tire Karaisirara qutaa mwivave tiqata mwianra riemwaqi quararo Kotiva tiriqaa qua vahira taiqa kyero avuqavuma timwa taarive tiro, Kotiva Mosesira mwu quava tiriqaa ntaqikyiqiro vi varura.

25 Karaisiva qovarama vihata tire mwianra kepukyaqama kye riemwaqi vi varunanranra tiro, mate Kotiva Mosesira mwu quava hiama tiriqaa ntaqikyiyi variro.

26 Nkye Iesusi Karaisirara qutaa mwivave timwa kyeta mwianra riemwaqi vi variarara tita, nkye Iesusi Karaisiravata kuaaqi variqata Kotira nraaqiaraqama vita variavo.

27 Nkye nramanri vareta mwiaqataai Karaisiravata kuaaqi variavo. Nkye mwitaa hi variarara tiro, nkyi su nyaatovanto Karaisira vu nraato votima kyero vahira.

28 Nkye Karaisirara quataave qiahua hiama mpo qarama mpo qarama varita. Iutaavantove mpo mwatanaavantove, kyaiga vaisivantove qumina vaisivantove, nraaktevantove vaisivantove, nkye Karaisiravata variqtatara tita, nkye kuua qarama nraahuma varita.

29 Nkye Karaisiraniqama quarara tita, nkye Evarahaamunra nraaqiara variara. Kotiva nai kyauqu nriqiqaa vateqaro Evarahaamunranra e mwataterhua kyugema nyataaninrave tu quara nkyiqi mwi quava vahirata nkye kyugema kye varivara.

4

Kotira mwaaqu varunananra tura

1 Mwi quara okyaravanto mwataamama vahiro. Nraaqiaravanto nraakiara ekyaa nai qova hiani inraikyara varaarivama variro. Qakyo mwi inraikyara vararero mwiva mate nraaqiararu variqaro nai qora kyaiqa vaisi nraantantamwa kyero qumina vaisima variro.

2 Mwiva nraaqiara varirata mpo vaisinramwuvanto mwiaqaa ntaqikyiqi viqatama mwataama kyera kyaiqa varaante timwaqi viqatama nraamwutamaqita vivaro nai qova qio mwiva varaananrove qari entava nrintairaro mwi inraikyara varaananro.

3 Mwia votima kyeta tirevata variavararo mwatanyaa qua okyaravanto tiri rupa tero tiriqaa ntaqikyiqiro vura.

4 Mwitaamaqiro vuvaro Kotiva timwa to entava nri ntovaro Kotiva nai mwaaqu titovaro nraaktevantoo mwia mwata tovaro mwivavata Mosesira mwaanra okyara riemwaqiro vura.

5 Tiriara Mosesira mwaanra okyaravanto hia mwihua tutairata mwihua Kotira nraaqiara tuananra variate tiro, Iesusiva tiriara rieqaro qutu viro tiri hvabantu kyora.

⁶ Tire quttaaqama kye Kotira nraaqiara varurarora tiro, Kotiva nai mwaaqu mwanraqura tiri timwihanro mwiva tiri mwutukyaqi varihata varunranra. Mwi mwanraqurava nai gorara, Ko, ni ko, qio ti varira.

⁷ Kotira mwanraquravanto i mwutukyaqi variharara tira, e mwaa entara hia rupa tai vaisira votima kyera variaro. E Kotira mwaaquvanto variaro. E Kotira mwaaqu variananranra tiro, Kotiva nai mwaaqu mwi inraikyara ivatama mwiananro.

Poruva Karesiani varuhuara nronraqama kyero riora

⁸ Haaru nkye Kotirara hia rio entara unra mwanriqavanto nkyi rupa tero nkyiqa ntaqikyti varuvata nkye mwia kyaiqa vare varura.

⁹ Mwaa entara nkye Kotirara ntapihi kye rieta. Qio kyai nte mwi quara ntapihikye qari: Mwaa entara Kotiva nkyiara ntapihi kyero rie variro. Mwaa entara Kotiva nkyiara kyugema kyero rie varihata nanraqamave nkye mwia qaqira kyeta haaruaa okyara ugenrenro hia nkyi kyaahaqa hian okyaraara riemwaqi viqata mwi okyarava qaiqaa tiriqaa ntaqikyiqi vi varirage mwia kyaiqa varaare ti variavo?

¹⁰ Kotiva nkyi qamwata nyataarive tita nkye tiqata, Mwi entaraqaa nronra enta vahirage mwitaa mwitaa hirerave. Mwi toraraqaa mwitaa mwitaa hirerave. Mwi ihiraqi mwitaa mwitaa hirerave, ti variavo. (Nkye mwi quara mwi quara riarera hivaro mwi quava nkyi ntavaaqavu kyero nkyi rupama taananro.)

¹¹ Nkye mwitaa mwitaa hiare tita uti variara mwianra rieqana nte aatu hugo. Nte tauaraa nkyiqa kyaiqa utu tauva quminave quananro?

¹² Ni kata pakyaa tuaavo, nte nkyiara nronraqama kye riena po tiqana nkye nte hunte liatemata tina. Nte Iutaa vaisivanto variqana Iutaa mwaanra okyara qaqira kyena nkyi mpo mwatanaa votima kyena varura. Nkyevata ni nraantantamwa kyeta Iutaa mwaanra okyara hia riaata. Nkye hia haaru ni uaqiamma matarera uti varura.

¹³ Haaru ni nronraqama kyero niqapuvana nkyivata variqananra tina, nte Karaisira qua timwa nyiavata nkye rieta variara.

¹⁴ Mwi entara ni nronraqama kyero niqavuvana variavata nkye hia mwianra nronraqama kye riaratita, niqaa kepuqyaqama kye ntaqikyiqi vi varurama. Nkye mwi entara nyaamwunyaa vaisi vitontema kyeta ni pitora. Nkye Iesusi Karaisira vitontema kyeta ni pitora.

¹⁵ Mwi entara nkye nronraqama kye qamwateqata varura. Nataama kyaihatave nkye mwaa entara hia mwitaa hi varita? Qikye, nkye mwi entara ni kyaahaqa hirerata nkyeta vu vauru kye ni mpirerata utunte hi varura. Nte quttaaqama kyena qiomia mwi quara nkyiarā qianinra.

¹⁶ Mate nte quttaa qua nkyi timwa nyuqata nkye mwia rieta nkye ni nramwutaaqamave vita?

¹⁷ Mpo hia vaisihua nruru nkyiari mwaanra quara rieqata nkyiara mwi quarara eo qiate tita, nkyiara nronraqama kye riemwaqi quahua nraantantamwa kye variqata mwihua unraqama kye mwitaa hiqata hia nkyi kyugema nyatarera uti variara. Nkye ni qua qaqira kyeta mwihua quara nraahu nronraqama kye riemwaqi quate titi, mwihua nkyi timwa nkyi variara.

¹⁸ Vaisi mpo ihua quttaaqama kye nkyi kyaahaqa hi varivera, mwihua qiomia nkyiara nronraqama kye rievara. Nte nkyivata variani entarave, hia nkyivata variani entarave, mwihua qiomia mwitaa hivarua.

¹⁹ Ni nraaqiaranramwu tuaavo, nkye nte mwatatauhua votima kyetama variavo. Nkye kepuqyaqama vita Karaisira nraaqiara variate tina, nte

qaiqaa nkyi mwata kyarera atura ntuarintema kyenama niqapihana varina.

20 Po, mate nte nkyivata variqana mwianra qiove qiataara. Nte nkyivata variqanavuma mpo qua qio qianinra. Nte mwaini variqana nkyiara nte mwihua nataamakyenave kyaahaqa hianinrave timwa kyeqana nronraqama kyena rie varura.

Poruva Evarahaamunra nraatatanaqaa ntumwa kyero tura

21 Nkye Mosesira qua okyara riemwaqita viqata mwia mwemwani varirera uti variahua nte nkyi kyapara hirera. Nkye mwi quara okyara qio ntapihi kyeta riaarave?

22 Mwitaama tiro, Evarahaamunra mwaaku taaratana varura. Mwia nraata mpovanto rupa to nraakyeva mwia mwaaku mpo mwata mwuvaro mwia nraata mpo qati varu nraakyeva mwaaku mpo mwata mwunra.

23 Rupato nraakyeva nraakyevaa qora nraaqiara mwataa okyara mwiaqaa mwata tovaro qati varu nraakyeva mpo qarama mwatora. Kotiva Evarahaamunranra kyaauqu nriqiqaa vatero tiqaro, E qoraisi nraaqiara mwata tenanrave, turqaatairo mwi nraakyeva qoraisi nraaqiara mwata tora.

24 Nte mwi nraakyerara rieqana mpo quaqaa ntumwa kyena tirerave. Haaru Kotiva qua taaratana timwa torama. Rupato nraakyera mwia nrutu Hekaarira mwiaqaa ntumwa kyena qua tirera. Mwi nraakyeva varirero Kotiva qua mpo Sainai taaqiqa variqaro Mosesira mwu quavama vahiro. Mwi nraakyeva mwi quavama variro. Hekaariva rupa to nraakyeva varurara tita, ekyaa mwia nraisi mwihuavata rupa tohua varura.

25 Nte Sainai taaqi Areipa mwatani vahiraqaa qaiqaa mpo qua ntumwa kyena tirera. Taaqi mwia Hekaarivama. Ierusaremi mwatukyaaqua qua ntumwa kyena tirera. Ierusaremi mwatukyavanto Hekaarira nraisima variro. Ierusaremi mwatukyani variahua variavaro Mosesira qua okyavavanto mwihua rupa taihata variarama. Mwihua Hekaarira nraisi votima kyeta rupa taihua variara.

26 Ierusaremi mwatukya mpovanto nyaamwunima vahiro. Mwi mwatukyaraqaa ntumwa kyena qua tirerama. Mwi mwatukyava vahirero mwiva qati vari nraakyeva Seraavama variro. Mwi mwatukyava tiri tinrovama variro.

27 Kotira mpukuqi mwianra mwitaama tiro:

Hia qioqama kyera nraaqiara mwataara nraakyeva eraataqa variara nraakyeva qamwateqara variante.

E hia atura ntigara nraaqiara mwataarava qamwateqara ihi timwaqira quante.

Vaati vataa nraakyevant hia airi mwatairara e mwia nraatara kyera i qaqira kyai nraakyeva variqara airi nraaqiara mwatenanrave, tura.

(Aisaiaa 54:1)

28 Ni kata pakyaa tuaavo, Kotiva kyaauqu nriqiqaa vatero Evarahaamunranra e nraaqiara mwatenanrave turqaatairo Aisaakira mwata tora. Nkyevata Kotiva nai kyaauqu nriqiqaa vatero turqaatai Evarahaamunra nraaqiara variara.

29 Mwi entara mwaaku mpo qati mwata tova, Isamairiva variqaro Kotira mwanraquravanto kyaahaqa huvaro mwata tora Aisaakira uaqiamma mwate varura. Mwaa entaravata tire Kotira mwanraqura varaurahu varurata Mosesira mwaanra okyara riaahua tiri uaqiamma timwa tarerata uti variara.

30 Qio Kotira mpukuqi nanra quave mwianra tiro? Mwitaama tiro: Rupatai nraakyera titairaro nai nraaqiarantir quarive. Mwia nraaqiara mwiva hia nai qova hi inraikyara

varaariva variho.

Qati vari nraakyera mwia mwaqvantoma
nai qova hi inraikyara varaananrove, tura.

(Okyara 21:10)

³¹ Ni kata pakyaa tuaavo, mwia nraantantamwa kye hia tire rupa tai nraakyera nraaqiara varunanrave. Tire qati vari nraakyera nraaqiara nraahu varurahuma varuro. (Mosesira mwaanra okyaravanto hia tiri rupa taiho. Karaisira quavanto tiriqaa ntaqikyi variho.)

5

Nkye qaiqaavata rupa vivorave tura

¹ Tiriara hia rupavita variraitita, qati variqata nrohiate tiro, Karaisiva tiri huvantu timwa taira. Nkye qatinani varia nraakte qorahua variqatama hiama kyaivaro mpovanto nkyi qaiqaa rupa taarive.

² Nte Poruva nkyi timwa nyianinra riaata. Nkye tiqata, Iutaa mwaanra okyara rie variarata tiri mwamwanta toqa kyaivaqe tire qio variare tivorave. Nkye mwitaata tivera, Karaisiva hiama qio nkyi kyaahaqa hiariva varianano.

³ Nte qaiqaa kepukyaqama kye nkyi timwa nyinrenrave. Vaisivanto tigaro, Kyai nte Iutaa mwaanra okyara hini nraahu tutena ni mamanta toqa kyaani okyarara tuqina quankye, tirera mwi vaisiva hia hini mwi quara nraahu tutairaro ekyaa Mosesira mwaanra okyaravantovata mwia ntumwaqu kyairaro mwiva ekyaa mwi quara tutaariva nraahuma vari-anano.

⁴ Nkye tiqata, Kotiva avuqavuma timwa taarive tiqata Mosesira mwaanra okyarave Iutaa mwaanra okyarave riemwaqi virerave, tivera, nkye Karaisiraqaatai ntuvaihaa vita nkyetaraama varivara. Nkye mwitaama varivaro hiama Kotiva nkyiara po timwa nyatero nkyi kyuqema nyataananro.

⁵ Kotira mwanraquravanto tiri kyaahaqa ihata tire Karaisirara riemwaqi vi varurahuama. Tire mwitaamaqi viqata Kotiva tiri avuqavuma timwa taani entara vekyama varita.

⁶ Tire Iesus Karaisiravata varunganranra ti, tiri mwamwanta toqa kyaari-vave, hia toqa kyaarivate, mwi okyarava hiama tiri mpo qarama timwa taanano. Tire Karaisirara riemwaqi viqata mpohua mpohuara mwutukya vahiraqe variarava, mwi okyaravama tiri kyaahaqa hiananro.

⁷ Tauraa nkye kyuqema kye nrohi variavaro tava nkyi antua kyaihatave nkye uaqiamma vita quataa qua qaqlira kyeta nrohi variavo?

⁸ Kotiva nkyi nyaanramataiva hia mwitaata tihata nkyetavanto api nrohi variara.

⁹ Qua mpovanto mwitaama tiro: Taupataariva uapaiqavanto qamaa vitiqaq vahirera, qamwanramama qamaa ekyaa mwiva ntenra quananrove, tura.

¹⁰ Qio nkyevata ntevata Karaisiraqi kuaa mwihua varurahuama. Mwianra rieqanama nte nkyiara mwutukya qihakayama kye mwitaama kye nkyiara riaaninra. Nkye nte qiani quarara quataa quave timwa kyeta mpo qua hiama qio riemwaqi vivaravema, qianinra. Nai ta vaisivave nkyi api qua timwa nyi vari vaisira, mwia Kotiva nai quaqaara mwiaqaa qua vataananrove.

¹¹ Ni kata pakyaa tuaavo, nte Karaisira qua mpohua mpohua timwa nyiqana nte hia vaisi mwamwanta toqa kyaatera turayauma iho. Nte mwi quara qiankye tutiri, hiama vaisi mpo hiahua ni uaqiamma mataatiri. Hia nte mwi quara tura kyaaravauma Iutaa vaisivanto ni uaqiamma mateta.

Nte mwamwanta toqe okyararavata nraakye qora timwa nyianritavauma Iutaavonto nianra qamwateqata hia ni uaqiamma matevara.

12 Qikye, nkyiara api qua tiqata nkyeta mwamwanta toqa kyaate ti variahua, mwi vaisihua nkyiari tamwa ekyaara iti kye qaqlira kyaivaqe nte huviarave qiataara.

13 Ni kata pakyaa tuaavo, nkye hia rupa viraitita, qatinani nrohiate tiro, Kotiva nkyi nyaanrama taira. Nkye hia rupa vi variraitita, qatinani nrohiqa varia nraakye qorahua nkye haunri tiqata, Kyai tire haaru qora kyaiqa varaataa hi mwutukyaraqo uaqia hi kyaiqara utuqita quare, tivora. Nkye qatinani nrohiqata varia nraakye qorahua variqata nkye nanrianra nanrianra mwutukya vahirata naini naini kyuqe kyaiqa nraahu varaqita quata.

14 Nte Kotiva Mosesira mwu quara, ekyaas mwi quara varakye kuaiqiaqa vataariro mwia okyaravanto mwitaama qiananro:

Nkye nkyetara mwutukya vahihata variantema kyeta
nkye nkyeta henahuaravata

mwutukya vahirata variatema, qiananro.

(Wok Pris 19:18)

15 Nkye hia mwitaa hiraitita, nkye quara vairi votima kyeta variqata inronra hita ntaqua ntari hiqata varivora. Nkye mwitaamaqi viqata nkye nkyeta taiqa vivora.

Aanra kyuqeraqaa nrohirara tura

16 Nte nkyiara mwitaama tina: Nkye aanra kyuqeraqaa nrohiqata nkye Kotira mwanraqurara aanra tinraamwutairage nrohiare qiate. Nkye mwitaamaqi vivera, hia nkyeta haaru qora kyaiqa varaataa hi mwutukyava qora kyaiqa vare varira varevarare, tuquo.

17 Tita haaru qora kyaiqa varaataa hi mwutukyava vare vari kyaiqava mpo kyaiqa vaharo Kotira mwanraquravanto vare vari kyaiqava nai nraahumwa mpo kyaiqama vahiro. Mwitanahua nramwutua variarara tita, tire hiama qio teta kyuqe kyaiqa varaataa hianinra varaanana.

18 Kotira mwanraquravanto nkyi sitaqiro nkyi aanra nyaamwutairera, nkye qioma Kotira kyaiqa varaqi vi varivaro hiama Mosesira qua okyaravanto nkyiqa ntaqikyiqiro quananro.

19 Nkye haaru qora kyaiqa varaataa hi mwutukyava vare vari kyaiqara mwia ntapihi kyaara. Mwataamama vahiro. Api qaraqita nrohirave, nraakye qora nanrianra nanrianra ua vu nraato tiqata api nte tutiqa hirave, nkyiari mwamwanta hia kyotataqama kye vate okyararave,

20 unra mwanriqa nrutu tuaahererave, haqaquaakyaravata tuhi quaati-vata utirave, nramwutaaqa hirave, ntaqirave, mpohua nunu naanunrama nyateta kyaruntumwa nyaterave, raraqa taaninrave, nkyiari nyutu nraahu tuaahererave, inronra hita tukyama vita nkyiariara nkyiariara varivave,

21 mpova hi inrakyarara mwutukya ntirave, uera nramanri nramwa kyeta ueraqa hirave, ntuvantua hiaraqatai ueraqama vita qua aakyara netaa api qua api qua ti variarave, ekyaas mwi kyaiqara haaru qora kyaiqa varaataa hi mwutukyava uti vari kyaiqarama vahiro. Nte tauraa nkyi timwa nyunteema kyena qaiqaavata nkyi timwa nyinrenra: Mwi kyaiqara mwi kyaiqara utihua hiama Kotira mwutukyaqi vivarave, tuquo.

22 Qio Kotira mwanraquravanto hia mwitaama kyero kyaiqa varaqiro virave. Kotira mwanraquravanto nraakye qoraqaa ntaqikyiqiro vi variraro mwaa kyaiqava mwaa kyaiqavama qovara hiananro. Mpohuara mwutukya vahiarivave, mwutukyaqitairo qamwataarivave, mwutukyaqitairo

qihaakya hiarivave, hia qamwanrama kyero raraqa tairaro qihaakya-maqiro quarivave, mpora kyaahaqa hiarivave, ntapihi kyero nrohiarivave, nai vaative nai nraatarave mwianra nraahu riemwaqiro quarivave,

²³ hia nai nrutu tuaaheraarivave, uaquia hi kyaiqara utuankyo tiro nai mwamwantaqa kyuqema kyero ntaqikyiarivave, ekyaa mwi kyaiqava Kotira mwanraquraqatairo qovara hirama. Vaisivanto mwi kyaiqara nraahu varaqiro virera, hiama mpo quavanto mwia antuataananro.

²⁴ Tire Karaisiraniqama vurahuama. Haaru tiri qora kyaiqa varaataa hi mwutukyava kepukyaqama kyero qora kyaiqa varareru uti varuvaro qora kyaiqa mwianra nraahu mwia mwutukya vhura. Tire mwi mwutukyara vara kyeta Iesusira ruto kyatariraqaa ekyara ru taiqa kyaunanrama.

²⁵ Tire ekyara qutu vurahua votima kyeta varuraro Kotira mwanraquraqa-vanto tiri qaiqaa qati vara sivima kyahata qati variqi vunananranra tiro, Kotira mwanraquraqa mwiva nraahu tiriqaa ntaqikyiqi vi variqe tire mwia kyaiqa nraahu varaqi quananra.

²⁶ Tire tetara vaisi nronra varuro qiarora. Nkyeta nanrianra nanrianra raraqa taani quara tivora. Tire mpovanto kyuqema kyero kyaiqa varaan-inrave, mpo inraikya vataaninranra rieqata hia mwia kyaruntumwa mwataara.

6

Tire nai kyaahaqa hi nai kyaahaqa hiqata muaanra varaqi quare tura

¹ Ni kata pakya tuaavo, nkyitaitaro vaisi mpovanto aanra kyuqeraaqaa quariva uaquia hi kyaiqara utu kyairata hia mwi vaisira qaqlira kyaata. Nkye kyuqema kyeta Kotira kyaiqa vare vaisihua variqata nkye qiaakyma kye mwi vaisira kyaahaqa hivaro mwiva uro ntantero Kotira aannraqaa ntapihi kyero quari. Saataaniva nkyiara qora kyaiqa utuate tiro nkyi kuaqia kuaqia sataqiro quankyyora, nkyevata rauriqata variata.

² Muaanravanto vahirera, nkye nai kyaahaqa hi nai kyaahaqa hiqata mwi muaanranra varaqi quata. Nkye mwitaamaqi vivera, nkye Karaisiva vatai quara qutaaqama kyetama riemwaqivi vivara.

³ Vaisi mpovanto nanrianra tiqaro, Nte nronra vaisima varuqo, tirera, mwi vaisiva nai unrama qiananro.

⁴ Nkye kuaqia kuaqivavanto nkyeta kyaiqa kyuqe kyaiqave qora kyaiqa vahianinra tukyama kye taqaata. Vaisivanto nai kyaiqa tukyama kye taqairaro kyuqe kyaiqa vahirera, qiomma mwiva nanrianra tiqaro, Nte kyuqe kyaiqa vare varuqo, qiananro. Mwiva haunri mpora kyaiqa tukyama kye taqero mwia kyaiqvavanto uaquia iharo ni kyaiqvavanto kyuqe iho qiankyora.

⁵ Hia mpora kyaiqara nronraqama kye riaata. Nkyeta kyaiqa vareqata mwia muaanra nkyeta varaqi quata.

⁶ Nkye Kotira qua ntapihi kyeta riaate tiro, vaisi mpovanto mwi quara nkyi timwa nyiani vaisira nkye mwia kyaahaqa hiqata nkyeta kyuqe inraikya vatera mwi vaisiravata ntainra kye mwiata.

⁷ Nkye Kotirara api qua tivora. Nkye unra qua tivera, Kotiva hiama nkyi unra quara qutaa quave qiananro. Vaisivanto nanra kyarave vara tutaaninra nraakiara nai mwi kyararama vantu kyero nraananro.

⁸ Mwia votima kyero vaisivanto nai mwutukyavavanto api varaa kiyaqara varaqiro virera, mwiva nraakiara qutuani inraikyarama varaanano. Vaisivanto Kotira mwanraquraqavavanto varaa kiyaqara nraahu varaqiro virera, nraakiara Kotira mwanraquraqavavanto mwia kyaahaqa hiraro ekyaa enta qati variqiro quananro.

⁹ Nkye mwi quara rieqatama haunri nkye kyuqe kyaiqa varaqi vivaro nkyi pupohaarivaara. Hiama vaisivanto kyara vara tutero mateqa mwia vantuqiro nraananro. Mwiva kyara vara tutero variqiro viraro kyaravanteko tiraroma varaqiro nraananro. Mwia votima kye tire mate hia qoriri hiraitita kyuqe kyaiqa varaqi vivita nraakiara mpo enta tire kyuqema kye Kotiravata variqi quananra.

¹⁰ Mwianra rieqatama tire taqaararo vaisi mpo kyaahaqa hiara aanrava vahirera, varavaqe mwi vaisira kyaahaqa hiara. Tire ekyaa nraakye qora mwihua kyaahaqa hiarahua variqatavata Jesusira nraaqiara variahua, mwihua mpoqiaavata kyaahaqa hiara.

Poruva ekyaaa qua tura

¹¹ Nkye mwaa taqaata. Nte nkyiara rieqana ntena kyauquqo nronraqama kyenama qara ntumwa tena.

¹² Nanraqamave vaisi mponramwuvanto nkyi mwamwanta toqarerata kepukyqa hi varita? Mwihua tiqata, Mpo hihua tiri qamwata timwa taate, tiqata nkyi mwamwanta toqarerata uti variara. Mwihua tiqata, Tire kyatariqaa rutovato Karaisiya, tiri kyaahaqa hiarivave qiarata Iutaavanto mwi quara kyaara tiri uaqiamma timwa tevorave, ti variara.

¹³ Mwitaa ti variqata mwihua mwamwanta toqa kye okyarara nraahu nronraqama kye riemwaqi viqata Mosesira mwaanra okyara mpo qua mpo qua qaqlira kyeta hia mwi quaravata riemwaqi vi variara. Mwihua nkyiari mwahuta tiqata nkyiara mwitaama tivara. Tiri qua rietama nkye nkyeta mwamwanta toqa kyaahuave, tivara.

¹⁴ Mwihua nkyiari nyutu tuaahererera utuavanavata nte hiama ntena nutu tuaahere varina. Nte kyatariqaa ruto vaisira Jesusi Karaisira tiriqaa ntakikyi vari vaisira nrutu nraahuma tuaahereqana varina. Karaisira kyatariqaa rutovaro qutu vurara tina, nte mwia vatama kye qutu vuvuma varina. Nte qutu vuva votima kyena varuqarora tiro, mwatani vahi inraikyava hiama qio ni tu varaanano. Hia nte mwatani vahi inraikyara ni mutukya ntihana varuuo.

¹⁵ Mwamwanta toqa kye okyaravave, hia mwamwanta toqa kye okyaravave, mwi inraikyava qumina inraikyama vahiro. Tiri vu nraato mwutukyavanto qaraakyagama quani okyarava, mwi inraikyavama qutaa inraikya vahiro.

¹⁶ Vu nraato mwutukyavanto qaraakyagama quarihua varivaro Kotiva ekyaa mwihuara po tiro kyuqema nyatairata mwihua mwutukyaitairo qihakya hi varirata varivara. Mwi nraakye qorahua qutaa Kotira nraakye qora Isareris nraakye qoravantomaa varivara.

¹⁷ Nte ntena qua taiqa kyarerera hina mwitaama tina. Nte Jesusira kyaiqa vare varuqata mwia kyaara ni ntutiqata teqataava numwaanravanto ni mamantaqa qati vahirara tita, nkye nivata inronra hivora.

¹⁸ Ni kata pakyaa tuaavo, tiri vunyaa vaisi Jesusi Karaisiva nkyi ekyaa mwihua kyuqema nyataarive. Qutaave.

EPESAASI

Poruva Epesaasiqinaahuani qara vara kyora

Iesusira ru kyovaro qaiqaa qati siviro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Poruva Epesaasiqi varuhuavata mpoqi mpoqi varuhuavata Iesusira peqa okyara ntapihi kyeta riaate tiro, Poruva mwaa quara qara ntumwa tora. Karaisiva mwihua kyuqema nyatorara tita, mwihua mwianra rieqata Karaisira qua riemwaqi viqata aanra kyuqeraqaa nraahu nrohivama vaiho timwa kyero Poruva qara ntumwa tora.

¹ Nte Poruvama. Kotiva nai kyakya hiraqa ni nronraqama kyaihana nte Iesusi Karaisira qua nraakyе qora timwa nyi varuvama varina. Nte nkye Kotira nraakyе qoravanto Epesaasini variahua Iesusi Karaisirara nraahu riemwaqi quahua nte nkyinima mwaa quara qara ntumwa tena.

² Tiri tiqova Kotivavata, tiri vunyaa vaisi Iesusi Karaisivavata, nkyi kyuqema nyatairaro nkyi mwutukyavanto qihakya hirata variata.

Kotiva tiri kyuqema timwa taaninranra tura

³ Nrivate Kotira tiri vunyaa vaisi Iesusi Karaisira qora nrutu tuaaheraqi quara. Tire Karaisiravata kuaaqi varunanranra tiro, Kotiva tiri kyuqema timwa teqaro tiriara Kotira aaraqaa viqata mwia kyaiqa varaate tiro, mwiva ekyaa nyaamwunya kepukeya tiri timwinra.

⁴ Haaru hia mwata mwaavata ututo entara Kotiva tiriara mwihua Karaisiravata variqata hia mwihuaqua qua vahirata kyotataqama kye ni puqaa variate tiro, tiri nai kyaama tora. Kotira mwutukyavanto tiriara vaiharora tiro,

⁵ mwiva haaru tiri nai kyaama tero tiriara tiqaro, Nte Karaisira kyaiqara rieqana mwihua sita kye vataarita mwihua ni nraaqiara variate, tura. Kotiva nai kyakya horaqa qio nte mwitaa hiankye timwa kyero mwitaa hura.

⁶ Kotiva hia tiri kyoqara nyaanru hiraitiro, nai mwaaqu nai mwutukyena nti nraaqiara tiri timwunranra tita, varavaqe mwia nrutu tuaahereqa Kotirara e tiri kyuqema timwa taaravave timwaqi quara.

⁷ Qikye, Kotira mwutukyavanto tiriara mpoqiyavata vaiharo tiri kyuqema timwa taiharo Karaisira nraanre rauruvaro qutu vurara tiro, Kotiva tiri uaqia hi quara nruka timwa taihata tire qatinani huvantu vita varunanra.

⁸ Kotira mwutukyavanto mwitaama kyero tiriara mpoqiyavata vaiharora tiro, mwiva tiri kyuqe vu nraato timwihiata tire mpo okyara mpo okyara qio ntapihunana.

⁹ Haaru Kotiva variqaro Karaisiva nraahuma ni mutukya vahi kyaiqara vara mataananrove timwa kyero nai vararerai hi okyarara tuqeta taira, mwia quara mwiva qovarama kyaihata tire riaunana.

¹⁰ Qua mwia qovarama kyaiva mwi quava mwitaamama vahiro: Nraakiara mpo enta Kotiva nte mwitaa hirerave qiarai entava nri ntairaro Kotiva nyaamwuni varihuavata, mwatani varihuavata, hisai hisairo ntuaantuama tero Karaisira nronraqama kyairaro Karaisiva ekyaa mwihuaqaavata, ekyaa inraikyaqaavata, ntaqikyiqaro vunima variananro.

¹¹ Nraakiara Karaisiva vuni variqaro ekyaa inraikyaqa ntaqikyi variqae tire Iutaavanto Karaisiravata variararo Karaisiva nai hiani inraikyara tirivata tukyama kyero timwiananro. Tire Iutaavanto Karaisiravata variate

tiro, Kotiva haaru tiri nraante nai kyaama tora. Kotiva kepukyavanto varivara tiro, mwiva qiaru quava mwivau ma vahiananro.

12 Kotiva tiriara mwitaama kyero timwa taihatara tita, tire Iutaavanto nraante Karaisirara tiri kyaahaqa hiarivama variho timwa kyeta Kotira nrutu tuaahere varunananra.

13 Nkye mpo mwatanaa mpo mwatanaahua nkyevata qutaa qua Karaisira qua rieta qutaa ave tiqata nkyevata Karaisivavata kuaaqi variara. Kotiva nai nriqiqaa kyauqu vato quarara rieqaro nai mwanraqura nkyi nyinra. Nkyi ntenu kyaama tauqo timwa kyero mwi quava kepukyaqama quarive tiro, nai mwanraqura nkyi nyinra.

14 Kotiva nai mwanraqura tiri timwinranra tita, tire ntapihi kyauraro mwiva nraakiara ekyarama tiri huvantu timwa tairaqe variananra. Mwianra rieqatama varaivaqe Kotira nrutu tuaaheraara.

Poruva Kotirara aakyara nteqaro tu quara

15 Nte riauqata nkye tiri vunyaa vaisi Iesusi Karaisirara kepukyaqama kye rieqata Kotira nraakye qorara mwutukya vaihata variarara tina,

16 nte nkyiara rieqana Kotirara mpo enta mpo enta kyuqeve tiqana nkyiara rieqana Kotirara aakyara ntaura.

17 Kotiva tiri vunyaa vaisi Iesusi Karaisira qova variharo mwia okyavanto kepuky okyara vahirama. Kotiva mwitaama varirara tina, nkyiara mwihua Kotira okyara anomia kye taqamwaqita quate tina, nte Kotirara aakyara nteqanama mwihua su nyaato kyuqema nyateqara ena qua okyara qovarama nyataante ti varura.

18 Nkye nraakiara kyuqema kye variqi quate tiro, Kotiva nkyi nyaanrama taira. Nkyi su nyaatovanto ntapihi virata mwi quara ntapihi kye rieqata mwi entara vekya variate tina, nte Kotirara aakyara nteqana varura. Kotiva nai nraakye qorara rieqaro mwihua kyaama tai inraikyava, mwi inraikyava nrutarero nai mpoqaraa inraikyama vahiro. Kotiva qhaakyama nyataani okyarara nkye mwianra riaate tina, nte Kotirara aakyara nteqana varura.

19-20 Kotira kepukyavanto nrutarero mpovatama vahiro. Tire Karaisirara quitaave timwa kye mwianra kepukyaqama kye riemwaqit quanaranra tiro, Kotiva nai kepuky tiri timwianrivama variro. Nkye mwi quaravata ntapihi kye riaate tina, nte Kotirara aakyara nteqana varura. Kotiva kepukyaqama kyero Karaisiva qutu vuraqitairo qati vara sivuma kyero nyaamwuni nai kyauqu kyaatutani vitaqiro uro kyora. Kotiva kepukyaqama kyero Karaisira kyaahaqa hintema kyero tirivata kyaahaqa hiarivama variro.

21 Karaisiva Kotira nraaqani mwia kyauqu kyaatutani mwatakyaaviro variqaro mwiva nrutarero ekyaa inraikyaaqaa ntaqikyiqaro, mwiva ekyaa nyaamwuni vuniqama vita variahuaqaa ntaqikyi variqaro, mwiva ekyaa nronraqama quahuaqaaave, ekyaa nronra vaisiqaave, ekyaa nrutu nronra vataahuaqaaave, ntaqikyi varivama variro. Mate mwaa entaravata nraakiaravata mpo nrutu mpo nrutu nronra nrutu vataahua varivaro Karaisira nrutuvanto mwihua nyutuvata nraatara kyero vahiananro.

22 Kotiva Karaisira nronraqama kyero ekyaa inraikya vara kyero Karaisira mwemwani vataiharo mwiva vunyavaa nronravanto variqaroma tiri Kotiva nraanrama tai nraakye qorahuqaa ntaqikyi variro.

23 Karaisiva tiri qia votima kyero varihata tire mwia mwamwanta varunananra. Tire Karaisira mwamwanta varuraro Karaisiva ekyaa tiriqi kyuqinra viro variharo ekyaa inraikya piqe variva Kotiva mwiva Karaisiraci piaq kyero variro.

2

Tire qutu vurahua Karaisiva qati vara sivuma kyaira

¹ Nkye hia Iutaa mpo mwatanaahua nkye haaru Kotira qua nteqa kyeta qora kyaiqa nraahu uti varuvaroraa tiro, nkyi su nyaato mwutukyavanto hia Kotirara riaraitiro qutu vuvata varura.

² Mwi entara nkye mwatanyaa qua okyara riemwaqi vi varuvaro vaana nyaamwu mwaa sata variahua vunyaava nkyiqa ntaqikyi varura. Mwi vaanava Kotira qua nteqa kye variahuaqaa ntaqikyi varivama variro.

³ Tire Iutaavantovata qora kyaiqa vareqata Kotira qua nteqa kye variavanana. Mwi entara nkyevata tirevata quara vairi votima kye nrohiqata teta tivu nraatoqapi inraikya varaananaa mwianra nraahu riemwaqi nrohiavanana. Mwi entara titaa mwutukyaa vahu kyaqara nraahu varaqita quavanana. Mwi entara tire ekyaa hini mpo mwatanaahua mwihua nraantanteta variavararo tiri tivu nraatovanto uaquia hi kyaqara utuaraya nraahu vahuvaro mwia kyaara Kotira raraqa tovaro tiri ruataara hia tiri rura.

⁴ Kotira mwutukyavanto tiriara mpoqiaavata vahuvaro hia tiri ntucutiraitiro, tiriara po timwa timwatora.

⁵ Tire qora kyaiqa utiqata Kotira qua, mpo qua mpo qua nteqa kyaavararo mwia kyaara tiri tivu nraato mwutukyavanto hia Kotirara riaraitiro, qutu vuvata variavararo, Kotiva Karaisira qaiqaa qati vara sivuma kyero tiriara mwihua Karaisiravata variate tiro, tirivata qati vara sivuma kyora. Riaate, Kotiva hia nkyi qaqlira kyaratiro, Kotiva nkyi kyaahaqa hiqaro nkyi kyuqema nyatairara tita, nkye Kotiva nkyi huvantu nyataarihuama varita.

⁶ Kotiva tiri Karaisiravata makye qati vara sivuma kyovara tiro, mwiva tiri nronraqama kyaihata tire nyaamwuni Iesusi Karaisiravata kuaaqi taqaauvi variqata ntaqikyiqi quarahuama varita.

⁷ Nraakiara qovara ihua, mwihuavata Kotiva qutaaqama kyero kyuqema nyataani okyarara taqaate tiro, Kotiva Karaisiraqtairo tiri mwatanai varurahua kyuqema timwa taira.

⁸ Nkye Karaisirara qutaave qiavaro Kotiva hia nkyi qaqlira kyaratiro, qatiqama kyero nkyi kyuqema nyatairara tita, nkye Kotiva nkyi huvantu kyero sita taihuama varita. Hia nkyita kyaiqaqaara mwitaama nyataraitiro, Kotiva nkyiara kyuqe hiqaro qatiqama kyero nkyi huvantu nyatairama.

⁹ Tire hia Kotirani kyaiqa varauraro Kotiva qati tiri kyuqema timwa tero huvantu timwa tairara tita, hiama tire mpo inraikyara rieqata tire teta mwahuta qiarava vahiro.

¹⁰ Tire Kotiva ututai nraakye qorahuama varita. Kotiva tiriara mwihua Iesusi Karaisiravata variqata kyuqe kyaiga nraahu varaqi quate tiro, tiri utu tairama. Haaru Kotiva variqaro tire kyaiqa varaananaa terama tairama.

Nkyevata tirevata Karaisiravata kuaaqi varunananra tura

¹¹ Nkye nkyeta okyarara taunru kyevora. Nkye hia Iutaa mwatanaa variatita, nkye mpo mwatanaa variavo. Iutaa mwihua nkyiari nyamwanta toqa kyaahua variqata nkyiara hia mwamwanta toqa kyaahuave ti variarave. Nkye haaru varurara nraato tuata.

¹² Mwi entara nkye hia Karaisirara riaraitita, nkye nyianrasata varura. Mwi entara Kotiva Iutaave Isarerive mwihuara nraahu ni nraakye qorave tiqaro nkyiara mpo mwatanaave ti varura. Kotiva nai kyaauqu nriqiaa vatero Iutaara tiqaro, Nkyi ntena kyaama tau nraakye qorhua nte nkyiara mwitaa mwitaa hirerave, timwa kyero nkyiara hia mwi quara tura. Mwi

entara nkye hia Kotirara tiqata, Mwiva mpo enta tiri kyuqema timwa taananrove, tiraitita nkye api variqi viqata hia Kotira kyuqe inraikya vekya varurave.

¹³ Mwi entara nkye Kotira nyianrani varuhua mate mwaa entara Karaisiva nkyiara rieqaro nai nraanre rauru kyero qutu vihata nkye Karaisiravata kuaaqi variavaro Karaisiva nkyi sitaqiro nrumu Kotira nraaqani kyaihata variara.

¹⁴ Haaru Iutaavanto mpo mwatanaahuavata nramwutaatana varuvaro mwihua utaqaa vasaamwunra votihuva antua kyovata nyianrasata varurave. Mwitaama varuvaro Karaisiva mwitanahua mwaateraqama variate timwa kyero, nrumu vasaamwunra ratora mwia ntukuraaq kyaihata mwitanahua kuaaqi variara. Mwi quara okyara mwitaamama vahiro: Karaisiva nkyi mpo mwatanaahuaravata tiri Iutaaravata rieqaroma qutu vura. Karaisiva qutu viro nramwutaaqa huna vasaamwunranra ntukuraa kyora.

¹⁵ Karaisiva qutu viro Mosesira mwaanra okyara hia mwitaa mwataa hitte tu quara ekyaa taiqa kyora. Karaisiva vaisi qaraakya kuaiku ututarero mwiva ekyaa mpo mwatanaavata Iutaavata kuairama kyero mwitanahua vaisi kuaiku votima kye variqata nivata mwaateraqama kye variate tiro, qutu vura.

¹⁶ Karaisiva qutu viro nraakye qoravanto nramwutaaqa hi varia okyarata taiqa kyora. Ekyaa mwi mwatanaahua kuaaqi kuairamavi varivaro Kotira hia raraqa tairaro kyuqema nyataarive tiro, Karaisiva kyatariqaa nraakye qorara rieqaro qutu viro.

¹⁷ Ekyaa nraakye qora mwutukyaqitai qihakya hi varirata mwaateraqamavi variqi quate tiro, Karaisiva nrumu mwakyaakya timwa nyiqiro viro. Nkye ekyaa Kotira nyianrani variahuvata, tire Kotira nraaqani varurahuavata, Karaisiva mwi mwakyaakya timwa timwinro.

¹⁸ Karaisiva nkyi mpo mwatanaahuaravata, tiri Iutaaravata, rieqaro qutu vurara tita, nkyevata tirevata Kotira mwanraqura kuaa mwanraqura mwia nraahu vareta qiomaa tiri tiqova Kotiva varinani quananra.

¹⁹ Mwi quava vaharora tiro, mwaa entara Kotiva hia nkyiara mpo mwatanaave tiraitiro, Kotiva nkyiara ni nraakye qorave ti varira. Nkyevata tire Iutaavata Kotira nraakye qora kuaa nraakye qoramava varita.

²⁰ Nkyevata tirevata Kotira nraamwu voti hurahuama varita. Karaisiva nronraqama kyai vaisihuavata, poropeti vaisi Kotira qua govarama kyaa vaisihuavata, mwihua nraante nraamwu tura rataara votima kyeta variarama. Mwihua mwitaama variavaro Iesusi Karaisiva puha utaqaa rataara votima kyeroma variro.

²¹ Iesusi Karaisiva puha mwiva variharora tiro, nraamwu mwiva kyuqema kyero taagau kyero hoqa taiva hia uaqiamma kyero vahiraitiro Kotira nraamwu kyotata nraamwuma vahiro.

²² Nkyevata Karaisiravata kuaaqi variarara tita, nkye nraamwu mwia hiriraarave, umove, votima kyeta variara. Kotiva nai mwanraquravatama kyero nraamwu mwiqi variqiro vi varira.

3

Poruva mpo mwatanaahuaci kyaiqa varorara tura

¹ Mwianra rieqanama nte Poruva Iesusi Karaisiva ni rupa taihana varuva, nte nkyi mpo mwatanaahuarua rieqana variqi vura.

² Kotiva ni kyuqema mateqaro nkyiara ni timwa mpiro, E mwihuaqi kyaiqa utuante, ti quara, nkye qutaa mwi quara riaaravé iho?

³ Kotiva nai uqeta tai quara qoqaa ni timwa mpihana nte haaru mwi quara pataqia timwa nyiqana nkyini qara ntumwa taavara.

⁴ Nkye mwi quara kyaara ntigata nte Karaisirara uqeta taira qua okyara ntapihi kyaura nkyevata qioma ntapihivara.

⁵ Haaru Kotiva hia mwi quara timwa nyuvatara tita, haaru varu nraakye gorahua hia mwi quara okyara riora. Mwaa entara Kotira mwantaquravanto Kotira kyaiqa nraahu vare varia vaisihua Iesusira vaisi nronranramwuve, poropeti vaisive, mwi quara qoqaa timwa nyinra.

⁶ Mwi quara uqeta taiva mwitaamama vahiro: Hia Kotiva Iutaa nraahu kyugema nyatarerove. Mpo mwatanaa mpo mwatanaahuavata Karaisira quara quataave qiate tiro, Kotiva mwihuavata kyugema nyatarerero uti variro. Ekyaa mpo mwatanaahuavata Iutaavata kuaa vaisi varita kuaara mwamwanta nraahuma varivara. Kotiva nai kyauqu nriqiqaa vatero Karaisirara Iutaa timwa nyi quava, mwi quava mpo mwatanaahuaqi-vatama vahiananrove, tiro. Mwi quara uqeta tai quava mwitaamama vahiro.

⁷ Kotiva nai kepukyia ni mpiri ni kyugema matero ni nronraqama kyaihana nte Karaisira qua nraakye qora timwa nyiqi vi varura.

⁸ Ekyaa Kotira nraakye qoravanto virito variavana nte mwihua mwemwani varura. Nte mwitaa hu vaisiva varuqaro Kotiva hia mwianra nronraqama kyero riaraitiro, Kotiva nianra qamwata kyero kyugema matero ni nronraqama kyero mpo mwatanaa mpo mwatanaahua Karaisira qua uro timwa nyiqanra Karaisiva mpo inraikya mpo inraikya kyuge inraikya vataiva nkyi kyugema nyataananrove qianta, tiro.

⁹ Kotiva ekyaa inraikya ututaiva haaru variqaro nai utuani okyarara uqeta tero variqiro viro mwiaqatairo nte mwi quara mwataama kyena qovarama kyarerave timwa kyero nianra mwi quara nraakye qora timwa nyiqira quante tiro.

¹⁰ Mwaa entara vuni variahua nyaamwunyaahua taqaavaroo Kotiva nyaanrama tai nraakye gorahua varirerata mwihua Iutaavata mpo mwatanaavata variarara tita, nyaamwunyaahua tiqata, Qikye Kotira vu nraatoqi kyuge okyara mpo okyara mpo okyara valharo rie varivave, ti variara. Mwihua mwitaa qiate tiro, Kotiva nai uqeta tai quara qovarama kyero.

¹¹ Haaru Kotiva tiqaro, Nraakiara ekyaa mpo mwatanaa mpo mwatanaa nyaanrama kyena ntuvantuama taarita ni nraakye qora varivarave, timwa kyero variqiro viro nai quavanto quataa mwivauma vahiarive tiro, Iesusi Karaisira titovaro Karaisiva tiri vunyaa vaisivanto Kotira kyaiqa varora.

¹² Mwitaa hurara tita, tire Karaisirara quataa mwivave timwa kyeta Karaisiravata variqata tire hia aatu hiraita, mwutukya qihakyama kyegata Kotiva hinani qioma quanana.

¹³ Nte mwi quara rieqanama nkyiara po kye tina nkyiara rieqana mwitaama tina, Nte nriqavi inraikyara vare varura mwianra hia nkyi mwutukyavanto uaqia hirata variate, tuqo. Nkyi nyutu tuaahereqanama nte nriqavi inraikyara varaqi vi varurave.

Poruva mwihuara rieqaro Kotirara aakyara ntora

¹⁴ Mwianra rieqana nte tori kyaata ntaqantaa kyena Kotira tiri tiqora nraanreqana varura.

¹⁵ Kotiva tiri tiqova varihatara tita, ekyaa mwia nraaqiara nyaamwuni variahuaavata, mwatani variahuaavata, mwianra tiri tiqorave qiera.

16 Kotira peqa okyaravanto mpo okyara mpo okyara vahirara tina, nte Kotirara aakyara nteqana nkyiara mwitaama tina, Kotio, ena mwanaraquraqtaira mwihua mwutukya kepuqyaqama nyataante, ti varura.

17 Nkye Karaisirara kepuqyaqama kyeta riemwaqi vivaro Karaisiva nkyi mwutukyaqi variqi quarive tina, nte Kotirara aakyara nte varura. Karaisiva nkyi mwutukyaqi varirata nkye mpohuara mwutukya vahirata variqata nkye kyatari kyuqevara nai tuqqa paama tiharo mwataqi ratero vahintema kye nkye kepuqyaqama vita variate tina, nte Kotirara aakyara nte varura.

18-19 Nkye mwitaama kye kepukyu nraakye qora variqata mwiaqatai nkye ekyaa Kotira nraakye qoravata variqata nkye qioma Karaisiva nkyiara mwutukya vataani okyarara taqevara.

Karaisiva nkyiara mwutukya vataiva mpoqiyavata vitarero, tumitarero, nronraqama kyero vahirara tiro, hiama qio qumina vaisi mpo vu nraatovanto mwi okyarara ntapihi kyaananro. Nkye mwi okyarara taqaate tinama, nte Kotirara aakyara nte varina. Nkye Karaisira mwutukyavanto nkyiara vahi okyarara ntapihi kye taqeta variqi vivaro Kotiva ekyaa kyaiga vare variva nkyi su nyaato mwutukyaqi kepukyavanto variananro.

20 Tire haunri Kotirara tqata, Mwia peqavanto mwi kyaigara mwi kyaigara nraahuma qio varaanarove. Kotiva hiama qio mpo kyaiga mpo kyaiga varaanarove, qiarora. Kotira kepukyavanto tiriqi vahirara tita, tire mpo kyaiga mpo kyaigara riemwa kyeta Kotira kypara hiararo Kotiva qioma mwi kyaigara mwi kyaigara vara timwa tero nai mpoqiyavata nrirareroma mpo kyaiga mpo kyaiga vara timwa taananro. Kotira kepukyavanto tiriqi variharo Kotiva nronraqama kyero tiri kyuqema timwa taaninranra tita, mwia nrutu mpoqiyavata tuaaheraara.

21 Kotira nraakye qora mwaa entara varihuavata, nraakiara varihuavata, mwihua Karaisiravata variqata Kotira nrutu tuaaheraqi ekyaa entara quate. Quaave.

4

Tire Karaisira mwamwanta kuua mwamwanta varurahuave tura

1 Nte teta vunyaa vaisi kyaiga vare varuqata mwia kyaara ni rupa kyaavana varura. Nte mwitaama variqana nte nkyiara vuavima kyena mwitaama tina, Qaraakya aanra kyuqeraga quate tiro, Kotiva nkyi nyaanrama tairara tita, nkye mwi aanranraqaa nraahu quate, tuquo.

2 Nkye variqata tire qumina vaisi varurahuave timwa kyeta nkyeta vara mwataniqamaqita quata. Mpohuara qihaakyamaqita quata. Hia qamwanrama kye qoriri qaariri tiraitita, mpohua kyuqema kye kyaahaqa hiqata nkyi mwutukyavanto mwihua vahianira mwihua nyaamwutaata.

3 Nkyiara kuaikuvant variate tiro, Kotira mwanraquravanto nkyi vara taaqau tairave. Mwianra rieqatama haunri ntainra vita variarorave tita kepuqyaqama kye kuaaqi kyuqema varirara riemwaqi quata.

4 Tire Iesusi Karaisira mwamwanta kuaiqia nraahu varurahuama varita. Kotira mwanraqura kuaiqiavanto nraahuma tiriqi variro. Kotiva nkyi nyaanrama taihata nkye Kotiva nkyi kyuqema nyataanira mwia vekyaa nraahu varita.

5 Karaisiva kuaiqiavantom tiri vunyaa vaisivanto variro. Tire mwianra nraahu quutaave timwa kyeta kepuqyaqama kyeta riemwaqi vunanza. Tire mwia nramanri nraahu varauanra.

6 Mwanriqa kuaiqiavantom variro mwiva Kotiva ekyaa nraakye qora sova variqaro mwiva vunyavaa variqaroma mwihuaqaa ntaqikyi variro.

Mwiva ekyaa nraakye qora mwutukyaqi kyaiqa vare variqaro mwiva ekyaa nraakye qoraqi variqi vi varira.

⁷ Tire kuaara nraaqiara variqata hia kuaa kyaiqa mwia nraahu vare varunana. Karaisiva tiri kuaiqia kuaiqiara mwi kyaiqara yaraate mwaa kyaiqara varaate timwaqiro viqaro tiri kyuqema timwa taihata tire mpo kyaiqa mpo kyaiqa vare varunana.

⁸ Haaru Kotira mpukuqi Karaisiva varaani kyaiqarara mwitaama tiro: Mwiva nyaamwuni tumu ntante viqaro rupa tehua airinti sitaqiro uro kyaananrove. Karaisiva nraakye qora kyuqe inraikya mpo inraikya mpo inraikya tukyama kye nyiananrove, tura.

(Ihi 68:18)

⁹ Karaisiva nyaamwuni tumu ntantero vurara tu quara mwia okyavanto nataamave vahiro? Mwia okyara mwataamama vahiro. Karaisiva toharero nyaamwusairo tumuva tumitarero nai mwata vevani uto varura.

¹⁰ Mwata mwaqa tumu varuva nai kuaava mwiva nraahuma uro nyaamwuni variqaro ekyaa inraikyara rieqaro ekyaa inraikyaa ntaqikyi variro.

¹¹ Hini vaisivanto nronraqama vita vunyaa vaisivanto variate tiro, Karaisiva nai kepuuya mpo mwihua nyinra. Hini vaisiara nai qua timwa qovarama kyehua variate timwa kyero, nai kepuuya mpo mwihua nyinra. Hini vaisiara ni qua qaraakya mwafatanaahua timwa nyiate tiro, nai kepuuya mpo mwihua nyinra. Hini vaisiara ni nraakye qoraaqaa ntaqikyi vigata ni qua okyara timwa nyiqi quate tiro, Karaisiva nai kepuuya mpo mwihua nyinra.

¹² Mwihua Kotira nraakye gora terama taivata mwihua kyuqema kye Kotira kyaiqa varaqi viqata Karaisira mwamwanta variqata kepuuyaqamavi variate tiro, Karaisiva mwihua nai kepuuya mpo kepuuya mpo kepuuya nyi varirave.

¹³ Tire Kotira kyaiqa varaqi viqata tire ekyaa kuaikuvanto variqata Karaisirara kepuuyaqama kye riemwaqi vivita uro tire Kotira mwaaqu okyara ntapihi kye taqaananra. Mwi entara hia tire mwanrunrunraqa hiara nraakye qorahua variraitita, mwi entara tire Karaisiva varintema kye kepuuya nraakye qorama variananra.

¹⁴ Mwi entara hia tire nraaqiara pata votima kye variananra. Nraaqiara patavanto qamwanrama kyero mpo qua riero qutaave timwa kyero mwiaqaatairo qaiqaa uro mpo qua riero mwi quarara qutaa quave tirave. Mwiva mwitaaqiro vi varihata unra ti varia vaisihua unraqama kyeqata mpo qua mpo qua ti variavaro mwiva mwi quarara qutaa quave ti varira.

¹⁵ Hia tire mwitaa hiara nraakye qorahua variraitita, tire quuttaa qua nraahu timwaqi viqata tire nanrianra nanrianra mwutukya vahiraqe fire kyuqema kye nronra tuemwa vita tire teta qia Karaisiravata taaqauvi kyuqema kye variara.

¹⁶ Karaisiva tiri qiatavanto variqaro tiri nai mwamwantaa ntaqikyi variro. Karaisiva tiriqaa ntaqikyi variraqe tire mwia mwamwanta variqata tire kyuqema kye taaqau vita variara. Vaisi mwamwanta mpoqia mpoqia vahiva qio vaiharo vaisivanto nronra tuairave. Mwia votima kye tire Karaisira kuaaranivanto variqata tire teta kyaiqa mpo kyaiqa mpo kyaiqa varaqi viqata nanrianra nanrianra mwutukya vahiraqe variqi vita qiomaa kepuuyaqama kyeta variananra.

Haarua aanra qaqlira kyeta qaraakya aanraqaa nrohiate tura

¹⁷ Mwi quara rieqanama nte Karaisira nrutu ntegana nkysiara kepuuyaqama kye mwataama tina. Kotira qua hia riaa nraakye qorahua

qumina inraikyarara nraahu nraatoqi vahata riemwaqita vi variarave. Nkye hia mwihua variantema kye variqi quate.

¹⁸ Enta hiraqi variwa mwiva nraahu mwihua su nyaatoqi vahata variara. Mwihua enta hiraqi kepukyaqama kye variqata Kotira qua hia riarera uti variarara titi, Kotiva nraakye qorara qati variqi quate ti vari okyarara mwihua hia qio riarera uti variara.

¹⁹ Mwihua uaquia hi kyaiqara utiqata kyauruataara vahata mwihua hia kyauriraitita, uaquia hi kyaiqara qati nraahu utuqi vi variara. Vaisi mpuara, nraakye mpuara, mwianra nraahu nronraqama kye rieta mwihua mpo kyaiqa mpo kyaiqa uaquia hi kyaiqara mwia nraahu utuqi vi variara.

²⁰ Mpowanto Karaisira okyara nkyi timwa nyuvata nkye taqovaro Karaisira okyaravanto vahirava hia mwitaama vahi okyarava vahirama. Karaisira okyaravanto hia uaquia hi okyarava vahirama.

²¹ Karaisira qua quataa qua nkyi timwa nyiqi quarara tina, nte nkyiara ntapihi kye Karaisira okyara riaahuavema tuqo. Qio quataave nte tuqo?

²² Nkye Karaisira nraaqiara variqata haaruua vu nraato, uaquia hi kyaiqarara nraahu riemwaqi vi vari vu nraatora qaqlira kyaata. Nkye haaru variqata nkyeta su nyaatoqi unraqama kyeqata mwaaqu kyaiqa nraahu vare varu okyarava nkyi taiqa kyarera uti varuvata varura.

²³ Nkye Karaisira nraaqiara variahuara titi, nkye haaruua vu nraato qaqira kyeta qaraakya vu nraato vareta variqi quata.

²⁴ Nkye haaruua vaisi qaqlira kyeta qaraakya vaisima varuro timwa kyeqatama variata. Kotiva nkyiara mwihua avuqavuma kye nrohiqata ni kyaiqa nraahu varaqla viqata ni votima kyeta variate tiro, nkyi qaraakyagama kyero utu taira.

²⁵ Nkye mwi quara rieqatama mpohua unra ti okyarara qaqlira kyaata. Tire Karaisira kuaa mwia nraaqiara varita mwia mwamwanta kuaa mwamwanta varurahuara titi, nkye quataa qua nraahu nai timwa mwi nai timwa mwi hiata.

²⁶ Mpo qua kyaara nkyi raraqa tairata, hia nkye tiri raraqa taiho timwa kye mwaaqu kyaiqa varaata. Nkyi raraqa tairata mpuahaama variqi vivaro huari vu vikyaarivaarave.

²⁷ Qamwanrama nkyi sikuokyavanto qihaakya hirata variata. Haunri nkyi raraqa tairata mpuahaama variqi vivaro Saataaniva nkyiqa uaquia hi kyaiqara vara vataarivaarave.

²⁸ Nkye mpuara uti variani vaisirara mwitaama qiata: E Karaisira nraaqiara varinanranra rieqara mpuara varenanra qaqlira kyaante. E qaqlira kyera ena kyauquqo kyaiqa varaqira quante. E mwitaamaqaqlira viraro qiomma ini mpo inraikya vahirara e vehi nraakye qora kyaahaqa hinanrave, qiata.

²⁹ Uaquia hi quava nkyi nyogitairo qovara hiankyora. Nkye kyuqe qua nraahu timwaqi vivaro nkyi quavanto mpohua kyaahaqa hirata mwihua kyuqemba kye variata.

³⁰ Kotira mwanraquravanto nkyi utaqi varira mwia muaanra inraikya mwivoreve. Kotiva nkyi nai kyaama teqaro nai mwanraqura nkyi nyinra. Kotiva nai mwanraqura nkyi nyinranra titi, nkye ntapihi kyaavarao Kotiva ekyara entaqaa nkyi qatinani huvantu kyaarivama variro.

³¹ Kyarunti okyaravave, raraqa te vari okyaravave, mauqa ntamwa kye inronra hita quaaru ti vari okyararave, mwi okyararavata ekyaa mpo okyara uaquia hi okyararavata nkye qaqlira taiqa kyaata.

³² Nkye mwaaqu okyara qaqlira kyeta mpohua qihaakyama nyategata variqi quata. Nanrianra nanrianra po kye tiqata variata. Kotiva Karaisira kyaiqara rieqaro nkyi uaquia hi quara nruka nyataintema kyeta nkyevata

mwi quara rieqata nkyeta nanrianra nanrianra uaqia hi quara tira taunru kyeqata qaqira kyakya hiata.

5

Tire ntuvahaaninraqaa variqi quananranra tura

¹ Kotiva nkyiara mwutukya ntiharo varihata nkye mwia nraaqiara variahura tita, nkye mwia votima kye variqita quata.

² Karaisira mwutukyavanto nkyiara vahintema kye nkye nanrianra nanrianra mwutukya vahirata variqi quata. Vaisivanto Kotira qamwata mwatarero kaahe mwunta vira qia quara mwataintema kyero Karaisiva tiria mwutukya vahuvaro qutu vuvaro Kotiva mwianra rieqaro qamwata mwatora.

³ Nkye Kotira nraakye qora variarara tiro, nraakye mpuarave vaisi mpuu nre okyarava nkyi utaqi vahiankyora. Nraakye qoravanto uaqama kye nte tutiqe hi okyaravave, nkyiari mwamwanta hia kyuqe hivata tage ua hi okyararave, mwi inraikyava nkyi utaqaa vahiankyora. Mpova hi inraikyarara mwutukya ntirata vare vari okyaravavata nkyi utaqaa vahiankyora. Nkye hia mwi inraikyarara qua pata mpoqiyavata quata.

⁴ Nkye Kotira nraakye qora variqata hia quaaruve, vehi quave, qainamaqama kye virera qua tirave, ekyaa mwi quara hia qia. Nkye mwi quara qaqira kyeta Kotirara kyuqeve tita mwia qamwata mwate quara nraahu timwaqi quata.

⁵ Mwaa quava quataa quama vahiro. Nraakye mpuarave vaisi mpuarave nre varihuave, uaqama kye ntetutiqe ihuave, mpova hi inraikyarara mwutukya ntirata vararera uti varihuave, mwihua hiama qio Karaisivavata Kotivavata ntaqikyi mwatukyaraqi vivara. Mpova hi inraikyarara mwutukya nti variva, mwiva hia Kotirara nronraqama kye riaraatiro, mwiva mwitaa inraikya varaaninranra nraahuma nronraqama kyero rieqaro mwianra nraahu qamwateqaro hia Kotira qamwata mwate varirave.

⁶ Vaisi mponramwuvanto nrinte nkyi kumwaanri tiqata, Nraakye qoravanto uaqia hi kyaiqara utivarohi hia mwi kyaara Kotiva mwihua ruananrove, mwihua mwitaa tivera, nkye hiama mwihua unra qua mwiia riaata. Nraakye qoravanto Kotira qua nteqa kyeqata uaqia hi kyaiqara uti variarara tiro, mwia kyaara Kotira raraqa tairaro mwihua ruananrove.

⁷ Nraakye qora uaqia hi kyaiqara utivata nkye mwihua kyapata variqata uaqia hi kyaiqara utuqi vivora. Nkye mwi nraakye qorahua nyaatu qatinanri ntuvaihaavita uro variata.

⁸ Haaru nkyevata enta horaqi variqi vura. Mwaa entara nkye Karaisira nraakye qora variqatara tita, nkye ntuvahaaniraqaa variqi vi variara. Mwianra rieqata nraakye qoravanto ntuvahaaniraqaa nrohiantema kye nkyevata nrohiata.

⁹ Nraakye qoravanto ntuvahaaninraqaa variqi vivera, mwihua kyuqema kye nrohivara. Mwihua avuqavuma kyetama nrohivara. Mwihua quataa qua nraahuma timwaqi vivara.

¹⁰ Nkye Kotiva nkyi qamwata nyataani kyaiqara puaama kyeta mwi kyaaiqara nraahu varaqi quata.

¹¹ Nraakye qora enta hiraqi variqata qora kyaiqa uti variraqaatai nkye mwihua nyaatu nyianrasata uro variata. Nkye mwihua mwaaqu kyaiqa mwiia okyara uro ntuvahaaninraqaa qovarama kyaivata mwihua taqaata.

¹² Qikye, ugeta kyeqata mpo kyaiqa mpo kyaiqa uaqia hi kyaiqara uti variara mwianra nte nkyi timwa nyiqana kyaurirā inraikya varaankyora.

¹³ Kyokiraqi vahiani inraikyara varaqiro uro ntuvahaaninraqaa kyairaro omwavanto mwi inraikyara okyara ntuvahama mwatairaro qoqama vahiananro.

¹⁴ Vaisivanto enta hianinraqitairo uro ntuvahaaninraqaa urontero mwivavata ntuvahaaninraqaa variqiro quananro. Mwianra haaru quavento mwataama tiro:

E vaite variarava siquante.

E qutu quarava siquante.

E mwitaa hiraro omwavanto Karaisiva i ntuvahama mwatananrove, tura.

¹⁵ Mwi quara rieqatama nkye rauriqata variqi quata. Haunri hia su nyaato vahihua nraantantamwa kye variqi vivorave. Vu nraato vataahua variantema kye variqi quata.

¹⁶ Mwaa entara uaqia hi kyaiqara varaahua airivanto variavata tire varuro. Mwianra rieqatama hia qumina variraitita, Kotira kyaiqa nraahu varaqita quata.

¹⁷ Hia nkye su nyaato hia vahihua votima kyeta variqi quata. Qaqao, nkye su nyaato ntapihirata rieqata Kotira mwutukya vahi kyaiqara varaqita quata.

¹⁸ Hia uera nramanri nreqata uera ntaata. Nkye mwitaa hivera, nkye qoranama varivara. Nkye mwia qaqlira kyeta kyaivaro Kotira mwanraqura mwiva nkyiqli variqaro nkyiqa ntaqikyiari.

¹⁹ Nkye ntuvantuamavi variqata Kotirara qua vahiani ihira timwaqi quata. Mwaanra ihi timwaqi quata. Kotira nrutu tuaahere variani ihira timwaqi quata. Nkyeta mwutukyaqitai ihi timwaqi viqata tiri vunyaa vaisi nrutu tuaaheraqi quata.

²⁰ Tiri vunyaa vaisi Iesusi Karaisira nrutu nteqata nkye ekyaa inraikyara Kotirara kyuqeve timwa kyeqata variqi quata.

Poruva nraata vaati varaahuara tura

²¹ Nkye Karaisira nrutu tuaahere variahua variqatara tita, nkyeta qua tirara nraahu kyuquerave tivora. Nkye nai qua rie na! qua rie hiqata variata.

²² Nte nraakye nkyiara tirera. Nkye tiri vunyaa vaisi qua riemwaqi vintema kyeta saatimwanra quavata riemwaqi quata.

²³ Karaisiva tiri nai nraakye qoraaqaa ntaqikyi varintema kyero nraakye vaativantemvato nai nraataqaa ntaqikyi variananro. Karaisiva tiri Kotira nraakye qorara nkye ni mamantama variavo timwa kyero tiri huvantu timwa taira.

²⁴ Tire Kotira nraakye qora variqata Karaisira qua nraahu riemwaqi vi varurantema kye nkye nraakyevanto variqata nkyeta saativanto ekyaa qua tira riemwaqi quata.

²⁵ Nte nkyi saatimwanranra tirera. Karaisiva Kotiva tiri nraanrama tai nraakye qorahuara mwutukya vahuvaro tiriara rieqaro qutu vura. Nkyevata mwitaama kyeta nkyeta nyaatamwanranra po tivarо nkyi mwutukyavantow mwihiuara vahiar.

²⁶ Karaisira nramanrivantovata quavantovata tiri Kotira nraakye qora hiqama timwa taihata Kotira kyaiqa nraahu vararerara varuraro Karaisiva Kotiva tiri nraanrama tai nraakye qorahuara rieqaro qutu vura.

²⁷ Karaisiva mwitaa hurara tiro, vaisivanto nai ntumwu mwataa nraakye era varaintema kyero Karaisiva nraakiara tiri Kotiva nraanrama tai nraakye qorahuara sitaanano. Vaisivanto hia uaqia aaqia hiro tauma vaakuhaa uti nraakyeera varaintema kyero Karaisiva nraakiara tiri Kotiva nraanrama tai nraakye qorahuara varaananro. Tiriara mwihiuara hia uaqia hi kyaiqara varaqi viraitita, kyuqe kyaiqa nraahu varaqi vi varivaro hia

mwihuaqaa qua vahiarive tiro, Karaisiva tiri hiqama taiva mwiva tiri vararero.

²⁸ Vaisivanto nai mwamwantaqaa kyugema kyero ntaqikyintema kyero mwiva nai nraataqaavata kyugema kyero ntaqikyiananro. Mwia nraatavanto mwia mwamwanta kuua mwiva varirara tiro, vaisivanto nai nraataqaqaa kyugema kyero ntaqikyiqaro mwiva nai mwamwantaqaa kyugema kyero ntaqikyi variro.

²⁹ Vaisivanto hia nai mwamwanta uaqama mwatairave. Mwiva hia mwitaa hiraitiro, nai mwamwanta kyara mwinro mwiaqaa kyugema kyero ntaqikyi varira. Kuua qarama kyero Karaisiva tiri nai nraakye qoraqaa ntaqikyi varihata

³⁰ tire Karaisira mwamwanta varunana.

³¹ Kotira mpukuqi mwitaama tiro:

Kotiva vaisiara rieqaro nraakye utu tairara tiro,
vaisivanto nai nrohua qohua kyero
nai nraatantiriro taaqauvi variho.

Mwitanahua kuua mwamwanta varivarave, tura.

(Okyara 2:24)

³² Nte ntene riemwa kyena mwi quara okyaravanto mwitaama vahoma tina. Nraakye qora nraata vaati vare quava nronra quama vahiro. Vaisivanto nraakye varaintema kyero Karaisiva tiri Kotiva nraanrama tai nraakye qorahua vararero.

³³ Qio nkye mwihua saati kuaiqia kuaiqavanto nkyeta mwamwantaqaa kyugema kye ntaqikyintema kyeta nkyeta nyaatamwanraqaa kyugema kye ntaqikyiqata mwihuara mwutukya vahirata variata. Nkye mwihua nyaatamwanravantovata nkye nkyeta saatiara vaisi kyuquerave timwa kyeqata mwihuua qua riemwaqi quata.

6

Nraaqiararavata nyohua sohuaravata tura

¹ Nte nkyi nraaqiarara tirerave. Tiri vunyaa vaisivanto nkyi nyohua sohuara nkyiqaa ntaqikyiqi quate tirara tita, nkye nkyeta nyohua sohua qua riemwaqi quata. Nkye mwitaamaqi viqatama nkye avuqavuma kye nrohivara.

² Haaru Kotiva qao timwa kyero qua vatero mwaa quaravata mwitaama tiro:

Ena nronra qora nrutu tuaaheraqira quante, tiro.

Kotiva mwi quara tiqaro nai kyauqu nriqiqaa vatero mpo quavata taaqau kyero

³ mwitaama tiro:

Kyuqema kye mwatani variqi viqana mpuahaama mwaa mwataraqaa varirerave tirava ena nrohua qohua nyutu tuaaheraqira quante, tura.

(Kyatura 20:12)

⁴ Nte nkyi nraaqiara sohuara tirera. Nkyi nraaqiara raraqa taankyorave tita hia nkye mwihuua uaqama nyataivata variata. Nkye nraaqiara hia uaqama nyataraitita, kyugema kye nkyeta nraaqiaraqaa ntaqikyiqi viqata tiri vunyaa vaisi qua mwia nraahu mwihuavata timwa nyiqi vivata mwihuua aanra kyuqeraqaa nraahu quata.

Kyaiqa vaisiaravata nkyiari mwihuaqaa ntaqikyi vaisihuaravata tura

⁵ Nte nkyi kyaiqa vaisiara tirerave. Nkye nkyeta nronra vaisi nyaatu aatu hiqata mwihuara vaisi kyuqe huave timwa kyeta mwihuani kyaiqa varaata. Nkye Karaisira kyaiqa varaantema kye mwihuua kyaiqavata varaqi quata.

6 Nkye nkyeta nronra vaisini kyaiqa vareqata mwihua tiri qamwata timwa taate titi, hia mwihua suqaa nraahu variqata kyuqema kye kyaiqa varaata. Mwihua hia nkyi taqera mwiaqaavata kyuqema kye kyaiqa varaata. Nkye mwihua kyaiqa vareqata tire Karaisira kyaiqa vaisi varurahua Kotira qua riemwaqi vurahuave timwa kyeqata kyuqema kye mwihua kyaiqa varaqi quata.

7 Nkye mpohua kyaiqa varaqi vivaro nkyi mwutukyavanto qamwate variratama mwihua kyaiqa varaqi quata. Hia qumina vaisiara rieqata mwihua kyaiqa varaata. Nkye Karaisirara rieqata mwihua kyaiqa varaata.

8 Mwaa quara riaara hia taunru kyaata: Kyaiqa vaisi rupa taahuave, qati variahuate, mwihua mpo kyaiqa mpo kyaiqa kyuqe kyaiqa varerara rieqaro nronravanto Karaisiva mwihua kyoqaa nyiananroma.

9 Nkye vaisi nronra variqata kyaiqaqaa ntaqikyi variahuate tirerave. Nkyevata kyuqema kye nkyeta kyaiqa vaisiqa ntaqikyiqi quata. Hia qumina qumina mwihua ntutquatuare titi, ntäuqi nyataivata aatu hiata. Nkye mwaa quara riaara hia taunru kyaata: Nkyiqaavata nkyi kyaiqa vaisiqaavata ntaqikyi variva kuaikuvanto nyaamwunima variro. Mwiva hiamma nraakiara nkyi nyutuarave, vaisi viriarave, rieqaro qua avuqavu hiananro.

Kotira aanraqaa viqata Saataaninravata ntaqi huru kyaamwunra tu vare quate tura

10 Qio nte ntena qua taiqa kyarera hina mwitaa tirerave: Kepukyaqama kye variqi quata. Nkyeta kepuuya mwia qaqlira kyeta tiri vunyaa vaisi mwia kepuuya nraahu vareqata kepuuyaqamavi variqi quata.

11 Saataaniva kumwaanri utu kyero nkyi nraatara kyaankyo titi, ekyaa huru kyaamwu Kotiva nyinra vara tuteta kepuuyaqama kyeta variata.

12 Hia tire qumina vaisivata ntaquqi vurahuavauma. Tire vaana nyaamwu mwaasata kyokiraqi varihua airivata ntaqiqata tire nyaamwuni uaqiamma quahua Saataaninra kyaiqa vaisivata ntaquqi vi varurahuava varita.

13 Mwianra rieqatama nkye Kotira huru kyaamwu vara kyeta terama kye tuteta varivarao qora kyaiqvavanto qovara hirata nkye Saataaninravata kepuuyaqama kye ntaquqi viqata hia aatu viraitita, mwiaqaa kaike rateta kepuuyaqama kye variata.

14 Qio huru kyaamwu vaqa ntumwa kye vateta variata. Hoqukya tavaarana rupataantema kye Kotira qutaa qua okyara tuqara tutaata. Avuqavu nrohi vari okyarara vara kyeta mwetokyaqaaanaa tuavaaqa votima kyeta utu taata.

15 Kyuqu nraamwu utu taantema kye Karaisira qua kyuqe qua mwutukya qihakya hi vari quara utu taata.

16 Kepukyaqama kye Karaisirara riemwaqi viva, mwiva nkyi kaike votima kyero vahirata nkye mpo enta mpo enta mwia hiri vare vivaro Saataaninra veva qia itaiva hia nkyi ruari.

17 Nkye qaini tovaqa qiataga qutaantema kyeta Kotiva nkyi uaquia hi kyaiqaraqitairo huvantu kyaira vara qutaata. Paipa mpuuhaha tutaantema kyeta Kotira mwanraqravanto nyi quara, Kotira qua, mwia tuqara kye tutaata.

18 Ekyaa enta Kotirara aakyara nteqata variata. Kotira mwanraqravanto mwi inraikyara mwi inraikyarara Kotira kyapara hiate tirata nkye mwia qua rieqata Kotira kyapara hiata. Nkyi hia pupohairata su ntapairi kye viti viri taqeqa variqi viqata ekyaa Kotira nraakye qorara rieqata Kotirara aakyara ntaata.

¹⁹ Nianravata rieqata Kotirara aakyara qiata. Nkye Kotirara aakyara tivarо Kotiva ni kyaahaqa hiraqe nte mwaini mwaaqi variqana hia aatu hiraitina, mwutukya qhaakya hiraqe Kotiva uqeta tai quara Karaisira qua ntapihi kye timwa nyianri.

²⁰ Kotira qua nraakye qora timwa nyiqinra quante tiro, Karaisiva ni nronraqama kyaihana varura. Kotira qua nraakye qora timwa nyunra kyaara ni rupa kyaavana nte karavu mwaaqi varura. Nkye mwianra rieqata Kotirara aakyara ntaivaro ni kyaahaqā hiraqe hia aatu hiraitina, ni mutukya qhaakya hiraqe Karaisira qua kepuqyaqama kyena timwa nyianri.

Ekyaa qua mwi mwatanaahuara tura

²¹ Tiri tiqata vakyaa Tikikaasiva Karaisirara riemwaqi viqaro mwia kyaipa vare variva, mwiva ni mwakaakya nkyi timwa nyinrata nkye nte variqi virara riaata.

²² Mwiva mwi quara nkyi timwa nyianrive tina, nte mwia titaariro mwiva uro nkyi timwa nyinrata nkye tire variananranra rieta hia aatu hiraitita, nkyi mwutukya qhaakya hirata variata.

²³ Tiri tiqova Kotivavata, tiri vunyaa vaisi Iesusi Karaisivavata, nkyi kyaahaqa hirata variata. Mwitanahua nkyi kyaahaqa hivata nkye nanrianra nanrianra mwutukya vahirata variata. Mwitanahua nkyi kyaahaqa hivata nkye mwitananra kepuqyaqama kye riemwaqi quata.

²⁴ Ekyaa nraakye qora mwihua tiri vunyaa vaisi Iesusi Karaisirara hia pupohairata, mwianra mwutukya ntirata variqi vi variahua mwihua Kotiva kyuqema nyataarivema tuqo.

PIRIPAI

Poruva Piripaiqinaahuani qara vara kyora

Iesusira qati vara sivuma kyovaro nyaamwuni uro varuvaro 30 ihive nritarovo Poruva Iesusira qua timwa nyiqiro nrhura kyaara karavuqi kyovaro variqaro qara mwaa ntumwa tora. Iesusira nraakye qora Piripaiqi varuhua Poruva kyaahaqa hirerata munima vara kyovaro Poruva mwi munimanra varero mwihuara kyuqeve tiqaro mwaa qarara ntumwa nyatora. Poruva mwihua kepukyaqama kyero timwa nyiqanro kuaaqi variqi viqata Karaisira qua nraahu riemwaqi viqata hia unra vaisi qua mwaanra riemwaqi quate tiro, mwaa qarara ntumwa nyatora.

¹ Nte Poruvama. Tiretana Timotikya Iesusi Karaisira kyaiqa vaisitanavanto variqata nkye Kotira nraakye qora Piripaiqi variahuaravata, vaisi nronranramwu nkyiqa ntaqikyi variahuaravata, mpo hiahua nkyiqa kyaiqa vare variahuaravata, tiretana nkyiara nkye Karaisiravata kuaaqi variahuanive timwa kyetama qara mwaa ntumwa teta.

² Kotiva tiri tiqovavata, tiri vunyaa vaisivanto Iesusi Karaisivavata, mwitanahua nkyi kyuqema nyataivaro nkyi mwutukyaqitairo qihaakya hi varirata variata.

Poruva Kotirara kyuqeve tu quara

³ Nkyiara ni pu naatoqi nti entara nte Kotirara aakyara nteqana kyuqeve timwaqina vorave.

⁴ Kotiva nkyi kyaahaqama nyataarive tina, nte mwianra airi nani aakyara nteqana ni mutukyaqitairo kyuqe ihana Kotirara qamwateqana aakyara nte varura.

⁵ Nkye haaru Karaisira qua rioraqaatai Karaisira kyaiqa nivatama kye kuaa kyaiqa mwia varaqi vi, mate mwaa iheraraqaa nrintaarara tina, nte nkyiara rieqana Kotirara qamwate varura.

⁶ Nte mwaa quara ntapihura. Kotiva nkyiara kyuqe nraakye qora variate tiro, mwiva nkyi mwutukyaqi kyaiqa tohara taira. Kotiva nkyi mwutukyaqi kyaiqa kyuqera tohara tivara tiro, mwiva nkyiqa variqaro mwi kyaiqara varaqiro viviro uro Iesusiva tumuani entaraqaa taiqa kyairata nkye mwi entaraqaa kyuqe nraakye qorama varivara.

⁷ Nte nkyiara riemwaqi viqananra tina, nte qiomma nkyiara mwi quara mwitaama qianinra. Nte mate karavuqi varu entarave, nte qatinani variqa Karaisira qua timwa nyiqana hia qumina quave kepukya quave timwa nyu entarave, nkye mwi entara mwi entara nivata nivata variqi vi variavaro Kotiva nkyivata nivata nronraqama kyero kyuqema timwa te varihata tire mwia kyaiqa vare varunana.

⁸ Karaisira mwutukyavanto nkyiara mpoqiavata vahintema kyero ni mutukyavanto nkyiara mpoqiavata vahintema nte nkyiara mwataama tina, Kotio, e mwihuara kyaahaqa hirata mwihuara mpoqiavata vahintema variqi vivaro mwihuara su nyaatovanto ntapihirata mpo kyaiqa mpo kyaiqa okyara ntapihita mwi kyaiqara qio mwataara ihua variqata

⁹ Nte mwitaama kye nkyiara rieqana nte Kotirara aakyara nte varurama. Nte Kotirara aakyara nteqana nte nkyiara mwataama tina, Kotio, e mwihuara kyaahaqa hirata mwihuara mpoqiavata vahintema variqi vivaro mwihuara su nyaatovanto ntapihirata mpo kyaiqa mpo kyaiqa okyara ntapihita mwi kyaiqara qio mwataara ihua variqata

¹⁰ uaqia hi kyaiqara qaqa kyeta kyuqe kyaiqa nraahu tuteqata mwi kyaiqara nraahu varaqi viqata nraakiara mwihuara Karaisiva tumuani entaraqaa kyuqema kye varivaro hia mwihuaraqua qua vahiarive, tina.

11 Kotiva mwitaama kyeqaro nkyi kyaahaqamaqiro virata nkye Iesusi Karaisiravata variqi vivaro nkyi kyaiqvanto kyuqema nraahu vahirata nraeqava qoravanto nkyi kyaiqara rieqata Kotirara kepukyavantove timwa kyeqata mwia nrutu tuaaheraqi vivara.

Poruva nai karavuqi varurara tura

12 Ni kata pakyaa tuaavo, nte mwaaqi varurara nkyi timwa nyinrenrama. Ni karavuqi kyaavana varuva, mwiva hia Karaisira quavatavauma aanra titatero. Karaisira qua qiariva aanra nronraqama kyeroma qatua viro vahiro. Haaru nte qatinani variava entara nte Karaisira qua mwaa vaisihua timwa nyianriva hia vahura. Mate karavuqi variqana qioma mwaa vaisihua Karaisira qua timwa nyianinra.

13 Ni rupa kye Sisaara karavu nraamwu mwaaqi kyaavana varuqata ntaqua vaisihua nraamwu mwaaqi ntaqikyiahuvata, ekyaa mpo vais-inramwuvata, nte Iesusi Karaisira kyaiqa vaisi varura kyaara ni rupa kyaavana varura mwia ntapihi kyaara.

14 Ni rupa kyaavana mwaaqi varuqata mwiaqaatai Karaisira nraakye qora airivanto mwianra rieqata kepukya vareta hia aatu hiraitita, mwutukya qihakyama kyeta Karaisira qua nraakye qora timwa nyiqi vi variara.

15 Qutaa vaisi mponramwuvanto nianra ua vu nraato vateta ni naatara kyaare tita, Karaisira qua nkyi timwa nyi variara. Mwihua mwitaa hiavata vaisi mponramwuvanto hia mwitaa hiraitita, mwihua kyuqema kyeta Karaisira qua nkyi timwa nyi variara.

16 Mwi vaisihua nianra mwutukya vahata variqata taqaavana nte Karaisira quaqaa ntaqikyiqana mpohua mwi quarara qumina quave tivo tina timwaqi vuqata mwia kyaara ni rupa taavana mwaaqi varura.

17 Hini hia vaisihua nte vaakya tu vaisihua, mwihua hia Karaisirara riaraitita, mwihua nkyiariara nraahu rieqata Karaisira qua nraakye qora timwa nyiqi vi variara. Mwihua tigata, Kyai mwi quara timwa nyianranro Poruragaa qua mpoqavata vahiarive, timwa kyeqata Karaisira qua timwa nyi variara.

18 Mwihua mwitaa ti variavana nte qamwateqana hiama mwianra nronraqama kye riena. Vaisivanto nai nrutuara rieqaro Karaisira qua timwa nyinratave, Karaisirara rieqaro mwia qua timwa nyinrata, nraakye qoravanto Karaisira ntapihira, nte mwianra rieqana qamwateqana varian-inra.

19 Nte qamwateqana nraahu variqina virerave. Nkye nianra rieqata Kotirara aakyara nte variavaro Iesusi Karaisira mwanraquravantovata ni kyaahaqama mate varihananra tina, nte tigana, Qutaa mwihua ni mwaaqitai huvantu kyaivaqe nte qatinani quaninrave, tura.

20 Ni mutukyavanto mpoqama kyero mwataama vahana varura. Nte hia mpo inraikya kyaara kyaauriraitina, nte matevata ekyaa entavata Karaisira kyaiqa kepukyaqama kyena varaqi viqana nte qati variqi quankyerave, nte qutu quankyerave, nraakye qora ni kyaiqara rieqata Karaisira nrutu nraahu tuaaherevara.

21 Nte ntene mwatani qati variqi quaninranra mwataama tina, Nte ekyaa inraikya qaqlira kyena Karaisirara nraahu riemwaqi viqana mwatani variqi virerave, tuqo. Nte qutu quankyerera, nte qioma Karaisiravata varianinranra mpoqama kye qamwataaninrave.

22 Qio nte nkyi kyaahaqa hiariva qio vahirera, nte mwaini mwamwan-tavatama kye qati variqina quaninra. Qikye, ni mutukyavanto nanra inraikyarevare vahiro? Nte mwatani qati variqana mwaini varianinranrave, nte qutu vina nyaamwuni quaninranrave?

23 Nte mwianra taara vu nraato tiqanama varina. Nte mwaini kyena uro Karaisiravata varianinranrama nronraqama kyero ni mutukya vahiro. Nte mwianra kyuqe hiravema tuqo.

24 Nte mwitaad tiqanavata qio nte nkyi kyaahaqa hiariva qati vaihananra tina, nte qaqira kyena nkyiara rieqana mwatani qati variqi virerave, tuqo.

25 Nte nkyi kyaahaqa hiariva qati vaihananra tina, hia nte qamwanrama quutuaninranra ntapihi kyena. Nkye kyuqema kye variqi viqata mwutukyaqitai kyuqe hi varirata qamwateqata Karaisirara riemwaqi quate tina, nte nkyi kyapata qati variqi virerave.

26 Nraakiara nte nkyivata qaiqaa uro variarita nkye nianra mpoqama kye qamwateqatama Iesusi Karaisira nrutu tuaaherevara.

27 Nkye Karaisira qua riaahuara tita, nkye Karaisira nraakye qora variqata avuqavuma kyeqata nraahu nrhoiata. Nkye mwitaamaqi vi varivaqe nte nkyi uro taqaankyer, hia uro nkyi taqaankyer, nte qiomma nkyiara tiqana, Mwihua kuaa su nyaato vateta kuaaqi variqata kuaara nraaqiara votima kye variqata Karaisira qua tuteta variqi viqata kepukyaqama kye mwi quara timwa nyiqata

28 hia mwihua nkyiari nramwunaahua nyaatu aatu hiraitita variqita vi variarave, qianinra.

Nkye mwitaama kye variqi vivatama nkyi nramwunaahua su nyaato ntapihirata rieta Kotiva mwihua nkyiari taiqa kyairata raupiri hirara ntapihvara. Nkye mwitaama kye variqi viqata taqaivarao Kotiva, mwivama nkyi kyaahaqa hiariva varirata nkye qiomma nkyeta nramwutaahua nraatara kyevara.

29 Karaisirara qutaa mwivave qiate tiro, Kotiva nkyi nyaanrama taihata nkye Karaisirara riemwaqi vi variara. Kotiva nkyi nyaanrama tero nkyiara, Mwihua Karaisirara rieqata nriqavi inraikyara varaqi quate, tihata nkye mwiaqaatai nriqavi inraikyara varaqi vi variara.

30 Nkye mwitaamaqi vi variarara tita, nkye qiomma ni votima kyeta nramwutaahua kyapata ntaquqi viqata mwihua nraatara kyevara. Nkye taqovana nte haaru variqana nramwutaahua ni naatara kyevorave timwa kyeqana, mwukyaari mwataqina vi variavara. Nkye ntapihi kyaavana nte mwaa entaravata mwukyaari mwataqina viqana variqina vi varura.

2

Kuaana variqata mwaateraqama kye qua timwaqita quate tura

1 Nte mwaa quara nkyi kyapara hirera. Nkye Karaisiravata variqi viqata nkye qutaaqama kye kepukyaqama kyetave variqi vita? Karaisiva nkyiara mwutukya vaharo qutaave Karaisiva nkyi mwutukya qihakyama nyate varihata varita? Qutaave Kotira mwanaraquravanto nkyi mwutukyaqi variqaro nkyi kyaahaqa hiro? Qutaave nkye nanrianra nanrianra po kye tiqata kyuqema nyateqata varita?

2 Nte mwi quara mwii quara nkyi kyaparama nyataurara nkye qio eo timwa kyeta mwaa mpo qua qianinravata riemwaqita vivera, ni mutukyaqitai mpoqama kye kyuqe hi variraqe qamwateqana varianinrave. Mwaa quara riaata: Nte nkyi timwa nyianrita nkyi quavanto kuaana vahirata mwaateraqama kye qua timwaqita quata. Kuaaqi variqata nanrianra nanrianra mwutukya vahirata variata. Nkyi su nyaato mwutukya kuaa vahirata aanra kuaaqaa nröhihuva variata. Nkye mwitaamaqi vivaqe nte nronraqama kyena qamwateqanama varianinra.

3 Nkye mpo kyaiqa mpo kyaiqa vararerita hita hia nkye nkyeta nyutuara nronraqama kye riaraitita, hia nkyeta mwahuta tirara rieqata mwi

kyaiqara varaqi quata. Nkye mwitaamaqi vigata nkyeta nyutu vara mwatanica hita mpohua nyutu vara viriniqamaqita quata.

⁴ Hia nkyeta kyaiqa vareqata nkyeta hi inraikyaraqa ntaqikyirara nraahu riemwaqita quata. Mpohua kyaiqa vareqata mwihua kyaahaqa hiraravata riaata.

⁵ Iesusi Karaisiva vu nraato tintema kye nkyevata vu nraato tuqita quata.

⁶ Iesusi Karaisira vu nraatovantovata

Kotira vu nraatovantovata kuaa qarama vahuvare
mwiaqaatairo mwiva Kotikyantiri kuaaqa
varianinranra hia nronraqama kye riaraitiro,

⁷ nai nrutu nronra mwia qati vatero

kyaiqa vaisi nraantero

Kotira kyaiqa vararerо vaisi tuerо vaisi varura.

⁸ Mwiva vaisi tuerо variqaro nai nrutu vara

mwataniqama kyero Kotira qua nraahu

riemwaqiro viro uro qutu vura.

Mwihua uaqja hu vaisihua ru kyontema kyeta

mwia kyatariqaa ru tovaro qutu vura.

⁹ Mwiva nai nrutu qati vatero

Kotira qua nraahu riemwaqiro viro

uro qutu vurara tiro,

Kotiva mwia qaiqaa qati vara sivuma kyero

mwia tuaahera kyero vara virito vatero

ekyaa mpohua nyutu vara mwataniqama kyero

mwia nrutu nronra mwihanro Iesusira nrutuvanto

nraahu nronraqama viro virito vahira.

¹⁰ Mwia nrutu nronra vahirara tiro, nraakiara Iesusira

nrutu ntamwa tairata ekyaa nyaamwuni varihuave,

mwatani varihuave, mwata mwemwani varihuave,

mwihua mwia nrutu rieqata tori kyaata

ntaqantaaqita

¹¹ Iesusi Karaisirara mwivama

tiriqaa ntaqikyi varirave tivara.

Mwihua mwitaa tiqata

Kotira tiri tiqora nrutu tuaaherevara.

Omwa votima kye variqata kyuqema kye Kotira kyaiqa varaate, tura

¹² Ni nramwunaa tuaavo, mwi quara rieqatama Karaisirara timwa nyu quara riemwaqita quata. Nte nkyivata varu entara nkye mwi quara riemwaqita quarama. Nte mwaa entara mwaini nyianrani varuqata nkye nkyetaraa variqata nkye mpoqivata mwi quara riemwaqita quata. Nkye Kotiva nkyi nyaamwuni sita varero quaninranra rieta aatu hita kyuqu kyuqu ntirata Kotira kyaiqa nraahu varaqi vivaro nkyi sitaari.

¹³ Kotiva nkyiara mwihua ntene varaari kyaiqara varaate tiro, mwiva nkyi mwutukyaqi variqaro nkyi kyaahaqa hi varihata nkye mwia kyaiqa vare variarama.

¹⁴ Nkye mpo kyaiqa mpo kyaiqa varaqi viqata hia *nrutu nraunru/nrunru nraanru* tiraqitaive, inronra hiraqitaive, mwi kyaiqara varaqi quata.

¹⁵ Nkye mwitaama kye variqi vi varivaro hia quavanto nkyiqa vahirata nkye kyuqe nraakye qora varivara. Nkye kyuqe nraakye qora varivaro nkyi mwutukyaqi hia mpo nramwanaamwavata vahirata nkye Kotira nraakye qora mwaa mwataraqaa variqi viqata api nraakye qora hia avuqavuma kyeqa nrohi vari nraakye qorahua utaqi variqi vivara. Enta hiraqi

qovoravanto itaintema kye nkye mwi nraaky e qorahua utaqi variqata itamwaqai viqata

16 qati variqi vi quara mwihua timwa nyiqi vivara. Nkye mwitaamaqai viveera, ekyaura enta Karaisiva qovara hianinraqa nte nkyi qamwata nyateqana nte nkyi nyaamwuteqana timwa nyu kyaiqava hiama qumina viho qianinra.

17 Nkye kyuqema kye Karaisirara riemwaqita quate tina, nkyi kyaahaqa hianinranra ni nraanre raurirage qutu quankyera, nte nkyiara rieqana qamwateqanama qutu quaninra.

18 Nte nkyi kyaahaqa hiqana qutu quankyera, nkye nte qutu quaninranra hia mwutukya uaquia hirata variraitita, nkye nte hiarintema kye qamwata-qata variata.

Poruva Timotira titaani quara tura

19 Tiri vunyaa vaisivanto Jesusiva qiove tirera, nte Timotira titaariro nkye hinani quananrove. Mwiva mwini uro variqaro nkyi mwakyaa kya riero mwaini' nrumu ni timwa mpiraro ni mutukyaqitairo kyuqe hiraqe varianinra.

20 Hia Timotira nraantantaiva mpovanto nivata variho. Mwiva nivata kuaana variqaro nkyiara nronraqama kyero rie vari vaisivave.

21 Ekyaa hini vaisi mwihua nkyiari kyaiqara nraahu rieqata hia Iesusi Karaisira kyaiqaravata riaara.

22 Nkyevata taqaavararo Timotira kyaiqvanto kyuqema kyeroma vahiro. Vaisivanto nai qokyantiri kyuqema kyero kyaiqa varaintema kyero mwiva nivatama kyero kyaiqa vareqaro Karaisira qua timwa nyiqiro vi varirave.

23 Nte mwaini variqi quani okyarara ntapihi kyena mwiaqatai aanra qio vahiraqe nte Timotira titaariro nkye hinani quananro.

24 Qutaa tiri vunyaa vaisi Iesusi Karaisiva nini aanra ututairage nte uro nkyivata varianinra mwianra ni mutukyaqitairo qihakya ihanama varina.

Poruva Epaporotaitaasira titaani quara tura

25 Nte tiri tiqata vakyaa Epaporotaitaasirara mwitaama tina. Mwiva nkye hinani nrumu ntante quarive turave. Nkye haaru mwiva ni airuqa hiarive tita, titovaro nruva mwaini variqaro ni airuqa hiro ni vatama kyero kuaa kyaiqama varaqiro viro.

26 Mwiva mwaini variqaro nkyiara po nkyi qaiqaa taqaataaravema ti variro. Mwiva nriqa viharo varirara nkyevata riaarara mwia mwutukyavanto uaquia iharo variro.

27 Qutaa haaru mwiva nriqa vuvaro qutiro ntuhiqauruvaro Kotiva mwianra po tiro mwia qati vara sivuma kyora. Mwiva qutu vutiri, nte nronra muaanrama varautiri. Kotiva nianra po tihana nte hia mwi muaanranra varaurarave.

28 Mwiva quari aanravavata qio vahiraqe nte qamwanrama mwia titaariro mwiva nkye hinani virata nkye mwia taqeta qamwata mwataate. Mwiva viraro ni muaanrantovata qihakya hiraro nina mamanta vahiaro.

29-30 Nkye hia mwaini nriaqanra huvaro mwiva nkyi kyaahaqa hirero mwaini nruva nrumu Karaisira kyaiqara rieqaro qutu viro ntuhiqaururara tita, nkye mwianra rieqata mwitaa hi vaisihua mwihua kyuqe vaisive timwa kyeta qamwata nyataata.

1 Ni kata pakyaa tuaavo, mwaa quara taiqa kyarera hina nkyiara mwataama tina. Nkye Karaisiravata variqatara tita, nkyi mwutukyaqitai kyuqe hi varirata qamwateqata variqi quata. Hia nte qoriri hiraitinama qaiqaa mwaa quara nkyini qara ntina. Mwi quava nkyi kyaahaqama nyatairata nkye qio variata.

2 Uaqia hi kyaiqara uti variahua, mwihua qaakyau vairi votima kye variqata vaisi mwamwanta toqa nrupepaama kyarera uti variahua variavata nkye mwi vaisihuara rauriqata variata.

3 Mwihua nkyiari mwamwanta toqa kyaahua variavata tire hia mwihua votima kyeta varunanza. Kotiva tiri mwutukyaqitairo uaqia hi kyaiqara toqa kyaihata tire mwiva qutaa toqa kyaihuama varuro. Kotira mwanaraquravanto tiri kyaahuaq hi varihata tire Kotira nrutu tuaahere varuro. Tire Iesusi Karaisiravata varianranra nronraqama kye rieta hia qumina vaisivanto nkyiari mwamwanta toqe okyarara nronraqama kye rieta.

4 Vaisi mwamwanta toqe okyarava qio ni kyaahuaq hiraqeavauma, nte mwi inraikyava kyuqema ni kyaahuaq iho qianinra. Mwi vaisihuaraqitairo mpovanto tiqaro, Mwi okyarava ni kyaahuaqama mataihana varuqo, tirera, nte haaru ekyaa mwi okyarara riemwaqina vi varurara tina, nte mwi vaisira nraatarama kyaaninra.

5 Ni mwata kyoraqataina nte Isarerivantoma varuqo. Nte ntenga okyarara tirera nte Mpenisamininra okyarama varuqo. Ni nthoua kohua Hivuruve lutaave variavana ntevata Hivuruvantoma varuqo. Ni mwata tovaro 8 enta nritarovaro ni mamanta toqa kyora. Nte Mosesira qua mwaanra riemwaqi vina Parisi vaisi variqana kepuqyaqama kyena mwi quara riemwaqina vi variavara.

6 Nte mwi quarara nronraqama kye riemwaqi viqananra tina, nte Iesusira nraakye qora ruqina viqana uaqiamaqina quavara. Nte Mosesira qua mwaanra avuqavuma kyena riemwaqi vi variavaro hia mpovanto e nianra mwi quara mpo nteqa kyaaro qiariva varuvana nte ekyaa mwi quara riemwaqina vi variavara.

7 Mwi entara nte tiqana, Mwi inraikyava mwi inraikyava ni kyaahuaq hi varihana nte nronra vaisima varuqo, qiavara. Mwaa entara Karaisirara rieqana nte mwi inraikyara qumina inraikya hia ni kyaahuaq hian inraikyarave ti varura.

8-9 Hia nte Jutaa mwaanra okyara mwianra nraahu ti varuqo. Nte Karaisirara rieqana ekyaa mpo inraikya mpo inraikya mwianra qumina inraikyavema tuqo. Nte ntapihi kyauqaro Iesusi Karaisiva ni nronravanto variqaro niqaa ntaqikyi varivama variro. Mwiva mwitaa hirara tina, nte mwianra nraahu nronraqama kye riemwaqi viqana ekyaa mpo inraikya mpo inraikya qaqira kyena qumina inraikyave ti varura. Nfe Karaisira nraahu varena mwikyantiri kuaaqi varirerave timwa kyena, ekyaa mwi inraikyara qumina inraikya kukomwave ti varurave.

Tauraa nte tiqana, Kyai nte Jutaa mwaanra okyara riemwaqina quariro Kotira ni avuqavuma mataarive, timwa kyena taqauqaro Kotiva mwianra rieqaro ni avuqavuma mataarive hia vahuvana mwiaqatai nte qaqira kyena Karaisirara qutaa mwivave tuqaro Kotiva nte Karaisirara tu quara riero ni qora inraikya nruka matero ni avuqavuma mataihana varura.

10 Nte Karaisirara nraahu riemwaqina virera. Karaisiva qutu vuqaqitairo kepuqyaqama kyero qati siviro variqi vintema kyena, ntevata kepuqyaqama kyena variqi virera. Karaisiva nriqavi inraikyara varaqiro vintema kyena, ntevata mwikyantiri kuaaqi variqana nriqayi inraikyara varaqi virera. Mwiva qutu vintema kyena, ntevata variqi vina uro qutu virerave.

11 Kotiva Karaisira qati vara sivuma kyaintema kyero nivata qati vara sivuma kyaarive tina, nte mwitaamaqina virererave.

Poruva mwatama tairaqaara hiantero quaninranra tura

12 Mwaa entara hiama nte ntenanra ekyara kepuuya vaisima varuquo qianinra. Karaisiva nianra e mwitaama varira vaisivama varinanrave timwa kyero ni pitairara tina, nte mwitaa hu vaisiva varirerave timwa kyena kyuqema kye variqina virera.

13 Ni kata pakyaa tuaavo, Mwaa entara hia nte mwi vaisira votima kyena varuquo. Nte mwi vaisira votima kye variantye tina, kyuqema kyena variqi virera. Nte haaru nrohurara hia riaraitina, qaqa kye qaraakya inraikya nraakiara qovara hiani inraikyarara rieqana varaariva variqi virera.

14 Vaisivanto nai nraatara kye nai nraatara kye hiante quantema kye, nte hiante avuqavu hi aanranraaqaa viqana Kotiva ni mpirera hi inraikyara varareru utiqana variqi virererave. Kotiva Iesuji Karaisira kyaqara rieqaro nianra nyaamwuni variqiro quarive tiro, ni naanrama taira.

15 Tire Kotira kyaqara okyara riaurahua tire ekyaa mwihua mwi quara nraahu riemwaqi quara. Nkye mpo ihua mpo qua riemwaqita virera hivera, Kotiva nkyi qua avuqavuma nyatairata nkyi su nyaato ntapihirata riemwaqi vivara.

16 Varaivaqe tire kyuqema kye nrohuna aanranra mwiaqaa nraahu tuqarakye nrohiara.

17 Ni kata pakyaa tuaavo, nte nrohiarintema kyeta nkyevata mwi aanranraaqaa nraahu nrohiata. Tire nyaamwutaurata nrohiahua, nkye mwihua nraahu sataqita quata.

18 Airi enta nkyi timwa nyi varu quara nte qaiqaavata ntateqana nkyi timwa nyinrenra. Nraakye qora airivanto tiqata, Kotira vataqi viqata mwia aanraaqaa qioma vuro, timwa kyeqata qora aanraaqaa nraahu vi variavo. Mwihua api aanra nrohi varita unra tiqata, Kotira aanraqaama vi varuro, qiarara tita, mwihua Kotira nramwutaahuama variavo. Mwihua mwitaamaqi viqata Karaisira ruto kyatarira nramwutaqa hi variavo.

19 Mwihua mwitaamaqi vi variarara tita, mwihua uro raupirimama vivara. Mwihua Kotirara nraahu riemwaqi quataara vahata mwihua nkyiari mwamwanta kyakya hirara nraahu riemwaqi vi variara. Mwihua nkyiari kyaqara rieqata kyauruataara vahata mwihua nkyiari mwahuta ti variara. Mwihua mwata mwaaqa vahi inraikyarara nraahu nronraqama kyeta rie variara. Mwihua mwitaamaqi vi variarara tita, uro raupirima vivara.

20 Tire hiama mwihua nraantantamwa kye varita. Tire nyaamwunianra tiri mwaakyota mwata vaiho timwa kyeqata variqi vunanra. Mwata mwaaqaatairo tumu tiri tivitaariva nyaamwusairo tumuananro. Tire mwia vekya variqata mwianra nronraqama kye rie varunana.

21 Mwi entara mwiva ekyaa inraikyaqaa ntaqikyirero kepuuyaqama kyero variqaro tiri mwamwanta uqenrenro qutuanri mwamwantara kyuqu kyairaro nai mwamwanta takyuquani mwamwantara votima kyeroma vahiananro.

4

1 Ni kata pakyaa tuaavo, mwianra rieqatama nkye tiri vunyaa vaisi Karaisiravata kuaaqi variqata kepuuyaqama kye variqi quata. Nte nkyiari ua ihana varuquo. Ni mutukyavanto nkyiyata variataa ihana varura. Nkye variavaro ni mutukyavanto kyuqe ihana varuquo. Ni kyaqavanto nkyiipi kepuuyaqa ihata nkye ni nronra nrutu kyuqera votima kyefama variavo.

Ekyara qua tura

² Nte nraakyetana Iuotiaravata Sintikiravata qua timwa nyinrenrave. Nte nkyitananra po tiqana nkyetana Karaisiravata kuaaqi variqata hia haaru tunte mpo qua mpo qua tiraitita, kuaa qua nraahu timwaqi quate, tuqo.

³ Qio Kyaahaqao, ena nrutuara rieqarama e nraakye mwitanahua kyaahaqa hiante. Haaru nte Karaisira qua timwa nyi variavata nraakye mwitanahua ni kyaahaga hiqata kuaa kyaiqa mwia vare varura. Mwi entara Keremenivavata, ni kuaa kyaiqa vare varuhuavata, mwi nraakyetanahua kyapata kyaiqa vare varura. Kotiva mwinramwuhua nai kyaama tero mwihua nyutu nai mpukuqi qara ntumwa taihatara tita, mwihua ekyaa enta qati variqi vihuama varita.

⁴ Nkye tiri vunyaa vaisi Karaisiravata variqatara tita, qamwateqata variate. Nte qaiqaa nkyiara tirera: Qamwateqata variate, tuqo.

⁵ Nkye ekyaa nraakye qorara qibaakyamaqita vivata nkyi kyuqe okyara taqaata. Tiri vunyaa vaisivanto tumuanriva qaumaqama hiro.

⁶ Hia mpo inraikya mpo inraikyara nronraqama kye riaata. Nkye hia mpo inraikya vataivera, Kotira kyapara hiata. Nkye Kotirara kyuqeve tiraqitai mwia kyaparamaqita quata.

⁷ Nkye mwitaamaqti vivaro Kotiva mwutukya qibaakyaya hiani inraikyara nkyi nyiananro. Tire qati qumina vaisi varurahuara tita, hiama qio Kotiva mwutukya qibaakyama nyate vari okyarara ntapihi kye taqaananra. Nkye Iesusi Karaisiravata variqi vivaro Kotiva nkyi mwutukya qibaakyama nyate vari okyarava mwiva nkyi su nyaato mwutukyaqi ntaqiqiyiqiro quananro.

⁸ Nte mwaa quara taiqa kyarera hina nkyiara mwitaama tina. Mpo okyara mpo okyara kyuqema kyero vahianinra, mwianra nraahu riemwaqita quata. Qutaaqama kye vahiani okyararave, kyuqema kyero vahiani okyararave, ntapihi kyero vahiani okyararave, hia mpo nramwanaamwata mwiaqaa vahiani okyararave, kyotataqama kye vahiani okyararave, nrutu kyuqema kyero vahiani okyararave, ekyaa mwi okyarara nraahu riemwaqita quata.

⁹ Nte nkyi timwa nyu quara nkye riaarave, nte kyaiqa vare varuqata nkye ni taqaarave, mwianra rieqatama nkye sivita mwi kyaiqara mwi kyaiqara varaqi quata. Nkye mwitaamaqti vivaro Kotiva nkyi mwutukya qibaakyama nyate variva nkyivata variratama nkye variqi vivara.

Piripaiqinaahua Porura kyaahaqa hurara qamwateqaro tura

¹⁰ Airi enta vivihata nkye qaiqaa ni kyaahaqa hiarara tina, nte Karaisiravata variqana nronraqama kyena qamwateqana varuqo. Qutaaqama nkye haaruvata ni kyaahaqa hirera uti varuvaro hia ni kyaahaqa hi aanrava vahuvata hia qio ni kyaahaqa hurave.

¹¹ Hia nte munimave mpo inraikya hia vahuvana variavara mwianra tuqo. Qaqao, mpo inraikya mpo inraikyara vahirove hia vahirove hira, nte hia mwianra nronraqama kyena riemwaqina vurave.

¹² Nte mwitaa mwitaama variani okyarara ntapihi kyaura. Nte vehiqama vina vehi vaisi variqi quani okyarara ntapihi kyaurave. Nte airi inraikya vataani okyarara ntapihi kyaurave. Ni pu naatovanto ntapihi vihana nte ugeta tai quara mpo ntapihi kyaura. Nte mwi quara rieqanama kyara vahi entarave hia vahi entarave, tuavaaqa vahi entarave hia vahi entarave, nte hia mwianra nronraqama kye riemwaqi viraitina, nte qioma varuqo ti varvara.

¹³ Mwinra rieqana nte taqaariro Karaisiva ni kepukyaqama kyairaqena nte ekyaa inraikya qioma varaqina quaninra.

¹⁴ Nte mwitaa tiganavata nkye ni kyaahaqama matorara qamwate-
ganama varuqo. Ni uaqima matovana variavata nkye ni kyuqema kye
kyahaqama matora.

¹⁵ Nkye Piripaiqinaahua nkye ntapihiarave. Nkye Karaisira qua vuni
rieta varu entara nte Masentoniaa kyaavata mwi entara hia Iesusira
nraakye qora hinivanto ni kyaahaqa ihuavata varuvata nkye nraahu
munima ni mpuvana variavarave.

¹⁶ Nte mpo mwatukya Tesaronaikaqvata uro variavata nkye airi nani
ni kyaahaqama matorave.

¹⁷ Nkye ni mpia inraikyara mwianra hiama nte nronraqama kyena
riauqo. Nte nkyitarama nronraqama kyena riauqo. Nkye ni kyaahaqa
hiqata mwi inraikyara ni mpiarar tiro, Kotiva mwianra rieqaro mwia
hiniqama nkyita nyianinra, mwianra nte nronraqama kyena riauqo.

¹⁸ Mate nte ekyaa mwi inraikyara airiqama kyena vatauqo. Epa-
porotaitaasira titovaro mwiva nkye nini vato inraikyara varaqiro nrumu
mipihana ekyaa inraikya qio vatauqo. Nkye ni mpia inraikyava kyuqe
mwuntavi vari inraikyara, Kotira mwia inraikyara votima kyeroma vahiro.
Nkye ni mwi inraikyara mpiavaro Kotiva nkyi qamwata nyate varira.

¹⁹ Tire Karaisiravata varunanranra tiro, Kotiva ni mwaniqavanto
variqaro mwiva ekyaa kyuqe inraikya vataiva ekyaa inraikya nkyi nyinrata
nkye kyuqema kye mwia kyaiqa varaqi quata.

²⁰ Nrivaqe Kotira tiri tiqora mwia nrutu ekyaa enta tuaaheraqi quararo
mwia peqa okyaravanto takyuquqiro quarive. Nte quutaama tuqo.

Qua mwanteqaro tura

²¹ Ekyaa Kotira nraakye qora Karaisiravata variahua nte nkyi qua mwantauqo.
Tiri tiqata vakyaa mponramwuvanto nivata variahua, mwihuavata
nkyiara rieqata nkyi qua mwantaavo.

²² Ekyaa Kotira nraakye qora mwaini variahuvata nkyi qua mwanteta.
Mwaini Kotira nraakye qora vunyaa vaisi Sisaara nraamwuqi kyaiqa vare
variahua, mwihua nkyiara nronraqama kye rieqata mpoqiatama nkyi
qua mwanteta.

²³ Tiri vunyaa vaisi Iesusi Karaisiva nkyi kyuqema nyatairaro nkyi
mwutukyaqitairo kyuqe hi varirata variate, tuqo.

KOROSI

Poruva Korosiqinaahuani qara vara kyora

Iesusira sivuma kyovaro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Korosiqinaahua mponramwuvanto Karaisira quara qutaave timwa kyeta varuvata vaisi mponramwuvanto uronte mwihua unra qua mwaanra timwa nyi varuvaro mwia kyaara Poruva qara mwaqaq Karaisira peqa okyara mwihua ntapihi kyero timwa nyunra.

1-2 Nte Poruvama. Kotiva nai kyakya hiraqa ni nronraqama kyaihana nte nronraqamavi variqana Iesusi Karaisira qua nraakyе qora timwa nyiqi vi varuvama varina.

Tire Timotikya nkye Kotira nraakyе qora Korosiqi variahuanima mwaa quara qara ntumwa teta. Nkye Karaisiravata variqata mwianra nraahu riemwaqi vi variahuanra tita, nkye tiri tiqata vakyaama varita.

Kotiva tiri tiqova nkyi kyuqema nyatairaro nkyi mwutukya qihakya hi varirata variate.

Poruva mwihuara rieqaro Kotirara kyuqeve tura

3-4 Nkye Iesusi Karaisirara kepuqyaqama kye riemwaqi quavaro nkyi mwutukyavantovata ekyaa Kotirа nraakyе qorara vahira mwia tire riemwa ntapihi kyaunanrave. Nkye mwitaa hiara mwianra rieqatama tire teta nronra vaisi Iesusi Karaisira qora Kotirara aakyara nteqata kyuqeve timwaqi vunranra.

5 Haaru quttaa mwakyaakya Karaisira qua nkyi timwa nyuvata nkye mwi quara riovoro mwutukyaqitai kyuqe huvata tiqata, Mwi quara rieta hia raupiri hiraitita, nraakiara qioma nyaamwuni qati variqi quanannerave, tura. Nkye mwitaa timwa kye nraakiara nkye nyaamwuni uro kyuqema kye varira, mwi entara veqya variqatara tiita, nkye Karaisirara kepuqyaqama kye riemwaqi viqata nanrianra nanrianra mwutukya vai-hata variara.

6 Haaru nkye Karaisira qua kyuqe qua riovoro nkyi su nyaatovanto ntapihuvata nkye Kotiva nkyi kyuqema nyataaninranra anomia kye rieta, mwiaqaatai nkye kyatarivanto tamwa kyuqe hira riaintema kyeta nkye kyuqe kyaiqa varaqi vi variara. Mpo mwatanaa mpo mwatanaahua variavar Karaisira quavanto viro nrinro ihata mwihuavata mwi quara rieta mwiaqaatai mwihua nkyi nraantanteta kyuqe kyaiqa nraahu varaqi vi variara.

7 Vaisi mpo Epaparaasiva Karaisira qua okyara nkyi timwa nyuvata nkye kyuqema kye mwi quara riora. Mwi vaisiva tiritana henava kuaa kyaiqa mwi varava variqaro mwiva tiri kyaahaqa hiqaro nraakyе qora timwa nyi varira.

8 Kotira mwanraquravanto nkyi kyaahaqa huvata nkye nanrianra nanrianra mwutukya vahuvata variqi vi varu quara Epaparaasiva nrumu tiri timwa timwuvata riaavanana.

9 Nkyiara tiri timwa timwuvata mwi entaraqaatai hia mpo enta nkyiara taunru kyaraitita, mpo enta mpo enta nkyiara rieqar Kotirara aakyara ntamwaqi vi varunana. Kotiva nkyi su nyaato kyuqema kyairata nkye Kotira kyaiqa okyara qio riemwaqi viqata Kotira nai mwia kyakya hira nkye ntapihi kye taqeqla qio vari nraakyе qorahua variate tita, tire Kotirara aakyara nte varunana.

10 Kotiva mwitaama kyero nkyi kyaahaqa hirata nkye mwiaqaatai qioma mwia kyaiqa nraahu kyuqema kye varaqi vivara. Mwitaamaqi viqata nkye mpo kyaiqa mpo kyaiqa kyuqe kyaiqa vare varivaro Kotiva nkyiara qamwateqaro variananro. Mwitaamaqi viqata nkye kyatarivanto tamwa kyuqera riemwa taintema kyeta kyuqe kyaiqa, mpo kyaiqa mpo kyaiqa vareqata Kotira okyarara riemwaqiqi viqata uro kyaata nraahu mpoqiaqata rievara.

11 Kotiva anomia kepukyavanto varirara tita, tire mwianra aakyara nteqata nkyiara mwihua kepukyaqama nyataante tita. Kotiva nkyi kepukyaqama nyatairaro nkyi hia qamwanrama kyero pupohairata kepukyaqama kye variqi vivaro nkyi mwutukyqaqitai kyuqe hi varirata variqi vivara.

12 Kotiva ntuvahaaninraqaa variqaro ntaqikyi variani mwatukyara Kotiva nai nraakye qorara rieqaro mwi mwatukyara mwihua kyaama tero. Mwiva nkyivata qioqama kyairara tita, nkyevata nraakiara qioma Kotira nraakye qora mpo ihua kyapata mwi mwatukyaraqi variqi vivara. Nkye mwianra rieqata tiri tiqora Kotirara kyuqeve timwaqita quata.

13 Haaru tire variavararo enta hu inraikyava tiri ntumwaqu kyovata tire enta huraqi variavararo Kotiva mwicqitairo tiri huvantu kyero tivitaqiro uro nai mwaaku mwianra mwutukyara nti vaisiva ntaqikyi varinani kyaira.

14 Mwia mwaqvavanto Kotirani kyaiqa utu toraqatai tire qatinani huvantu vita varuraro Kotiva tire uaqia hi kyaiqara varauna quara taiqa kyero nruka timwa taira.

Karaaisiravata mwia peqa okyararavata tura

15 Tire hia qio taqaarava mwanriqa Kotivavata, tire qio taqaarava Karaaisivavata, mwitanahua kuaa qarama kyeta variara. Karaaisiva Kotira mwaaku vunyaava variharо ekyaa utu tai inraikyava mwia mwemwanima vahiro.

16 Kotiva Karaaisira nronraqama kyovaro mwiva nyaamwuvata mwatavata ekyaa inraikya utu kyero vatora. Vaisivanto hia qio taqaani inraikyavare, qio taqaani inraikyavare, mwutani qoqaa variqatave uqeta kye variqata ntaqikyiahuve, nyaamwuni ntaqikyiahuve, mwiva mwihua mwihua utu kyero vatero. Ekyaa inraikyavanto Karaaisirani nraahu vahiarive tiro, Kotiva Karaaisira nronraqama kyovaro mwiva ekyaa inraikya utu kyero vatora.

17 Vuni ekyaa inraikyavanto hia vahu entara Karaaisiva qati variqiro vura. Mwaa entara Karaaisiva variharora tiro, ekyaa inraikyavanto naitarama kyero qio vahiqiro vi varira.

18 Karaaisiva vuni variqaro qiatu votima kyero varihata tire mwia nraakye qoravanto mwia nraakiarani mwia mwamwanta votima kyeta varunanra. Mwiva vuni qati variqiro vihatara tita, tire mwia nraakye qoravanto qio qati variqi vi varunanra. Karaaisiva nraahu ekyaa inraikya nraatara kyero uro vuni variarive tiro,

Kotiva mwia nraante qutu vuraqitairo
qati vara sivuma kyora.

¹⁹ Kotiva naivanto tiqaro,
Kyai nte Karaisiraqi variqi viqana
ekyaa ntena kepukyavatama kye mwiaqi variqi
virerave, tuvaro Kotira kepukyo okyaravanto
ekyaa Karaisiraqi vahura.

²⁰ Kotiva nyaamwunive mwatanive vahi inraikyara
nte mwi inraikyara kyapata mwaateraqama variqana
kuaaqi varirerave timwa kyero nai mwaquo titovaro
mwiva kyatariqaa nraanre rauru kyero qutu vuvaro
mwia nraanrevanto ekyaa mwatanaa
vara mwaateraqama kyaihata
mwihua Kotiravata kuaaqi variqi vi variara.

²¹ Nkye haaru Kotiraqaatai nyianrasata variqata nkye uaquia hi kyaiqara
utiva nraahu nkyi su nyaatoqi vahuvata nkye uaquia hi kyaiqara mwia
nraahu utuqi viqata nkye mwia kyaara Kotira nramwutaahua varura.

²² Nkye Kotira nramwutaahua varuvaro Karaisiva vaisi mwamwanta
varero nkyiara rieqaro qutu vura. Mwitaa horaqaatairo Kotiva nkyivata
mwaateraqama varirara tita, nkye qiomma uro Kotira vuqaa varivaro mwiva
nkyiara ni nraakye qora kyuqe hiahuate, uaquia hi kyaiqava hia nkyiqi
vaihata variahuave, hia nkyiqaa qua vaihata variahuave, qiananro.

²³ Haaru Karaisira qua nkyi timwa nyuvata nkye mwi quara rieta tiqata,
Tire Karaisira nraaqiaraqama vita variqi vita nraakiara kyuqemba kye
nyaamwuni uro variananrave, tura. Nkye hia mwi quara qaqqira kyeta
mpo qua riaraitita, Karaisira qua nraahu kepukyaqama kye riemwaqi
viqata hia pupohairata variqi vivera, nkye qiomma tiqata, Kotiva tirivata
taaqau viro kuaaqi variho, tivara. Nte Poruva Karaisira qua kyuqe qua
nraakye qora timwa nyinrenra nronraqama vuvama varina. Tire ekyaa
mwaa mwataraqaa varia nraakye qorahua mwi quara timwa nyiqita vi
varunanra.

Poruva Kotira nraakye qoraiqa kyaiqa varorara tura

²⁴ Nte nkyiara rieqana nriqa vi inraikyara varaqi vura nte mwianra
qamwateqana varuqo. Karaisiva Kotira nraakye qorara mwihua ni ma-
manta votima kyetama variavo timwa kyero mwihua rieqaro nriqa vu in-
raikyara varaqiro vura. Mwihua rieqaro nriqa quani inraikyara varaqiro
quariva hini qati vaihananra tina, nte Karaisira nraakye qorara rieqana nte
Karaisira kyaahaqama kye nriqa vi inraikyara ntena mwamwantaaqaaavata
varaqi quariro qioqama viro taiqa quari.

²⁵ Nkyi Kotira nraakye qoraiqa kyaiqa varaarive tiro, Kotiva ni nron-
raqama kyaihana nte Karaisira qua okyaravata, tavaaravata, mwutuvata,
ekyaa mwi quara nkyi timwa nyi varura.

²⁶ Haaru mpo vakya mpo vakya varu nraakye qorahua hia mwi quara
riovaro mwi quava ugeta viro vahura. Mwaa entara Kotira nraakye
qoravanto nraahu mwi quara riaate tiro, mwi quara qovarama kyaira.

²⁷ Mpo mwatanaa mpo mwatanaa mwia peqa okyara kyuqe okyara
taqaate tiro, Kotiva nai ugeta tai quara nai nraakye qorara rieqaro
qovarama nyataira. Kotiva ugeta tai quara mwia okyara mwataamama
vahiro: Karaisiva nkyi mwutukyagi variqiro vi varivama variro. Mwiva
nkyi mwutukyagi variqiro vi varirara tita, nkye nraakiara Kotiravata
variqata mwia votima kye kepukyo nraakye qorama variqi vivara.

²⁸ Kotiva ugeta tai quava mwitaama vahirara tita, tire Karaisira qua mpo
mwatanaa mpo mwatanahua timwa nyiqi vi varunanza. Mwihua mwaa

quarara nronraqama kye riaate tita, tire mwihua Kotira okyara qua, mpo qua mpo qua timwa nyiqi vi varunana. Mwihua Karaisiravata kuaaqi variqata hia nraaqiara taaqa votima kye varairaita, mwihua kuaaqia kuaiqiavant kepukya nraaky e qora variqata Kotira vuqaa qio uro variate tita, tire Karaisira qua mwihua timwa nyiqi vunana.

29 Nraaky e qoravanto mwitaama variate tina, Karaisiva kepukya ni mpire mwiaqtai nte kepukyaqama kye mwi kyaiqara vare varura.

2

Karaaisira qua nraahu riemwaqi viqata unra qua hia riaate tura

1 Nte nkyi timwa nyinrenra. Nkyivata, Reotisiaaqi variahuavata, mpo hiahua hia ni piri taqaahuavata, nte toqaamwu tu kyena kyaahaqamaqina vi varura.

2 Nkyi mwutukyaqitairo qihaakya hirata nanrianra nanrianra mwutukya vahirata kuaaqi variqi quate tina, nte nkyi kyaahaqamaqina vura. Nte nkyi kyaahaqamaqina quarita nkye Kotira qua ntapihi kye rieqata mwi quara qutaa quama vaiho tiqata Kotiva uqeta tai quara, Karaaisirara timwa tai quara, anomia kye riemwaqi quata.

3 Kotiva nai kyuqe okyara, mpo okyara mpo okyara Karaaisiraqi uqeta taiharo ekyaa mwi inraikyara Karaaisiva qovarama kyaihata tire Karaaisirajitaima Kotira okyara, mpo okyara mpo okyara qio taqe varita.

4 Vaisi mpovanto unra qua nkyi timwa nyinrenro kyuqe kyuqe timwaqiro nrianinra mwia qua hia riaate tinama, nte mwi quara nkyi timwa nyina.

5 Mate nte nyianrani variqanava hiama nte nkyivata varina. Qio nte nyianrani variqanavata nte nkyivata varuva votima kyena variqana nte nkyi kyaiqara rieqana qamwateqanama varina. Nkye kuaa qua nraahu timwaqi viqata Karaaisirara kepukyaqama kye riemwaqi vi variarara tina, nte mwianra rieqanama mwutukyaqitai kyuqe ihana nkyiara qamwateqanama varina.

Karaaisira qua rieqata mwiaqvata kuaaqi taaqauvi variqi quata

6 Nkye Iesusi Karaaisirara mwiva tiri vunyaa vaisivantove qia quarara rieqata nkye Karaaisiravata kuaaqi taaqauvi variqi quata.

7 Kyatarivanto mwata kyuqeraqi tuqa tuta kyero kyugema kyero qupiqaintema kyeta nkyevata nronra tuemwaqi viqata Karaaisiravata kuaaqi variqi quata. Karaaisirara timwa nyu quara, mwi quara nkye riemwaqi viqata kepukyaqamaqita quata. Mwitaamaqi viqata Kotirara kyuqeve timwaqi quata.

8 Mpovanto mwatanyaa qua okyara timwa nyiqanro mwi quaraqo nkyi ntumwaqu kyaankyo tita, nkye rauriqata variata. Mwi quava qumina unra quama vahiro. Qumina vaisivanto mwatanyaa okyarara nraahu rieqaro nai timwa mwi nai timwa mwi hia quava nraahuma mwi quava vahiro. Hia mwi quava Karaaisiraqatairo qovara hira.

9 Karaaisiva vaisi mwamwanta vataava variharo mwanriqvavento Kotiva qati variqi vi okyarava, ekyaa mwi okyarava Karaaisiraqi vahirara tita,

10 nkye Karaaisiravata kuaaqi variqi viqata nkye qio varia nraaky e qorahuama variqi vita. Nyaamwunivata mwatanivata variqata mpo inraikya mpo inraikyaqaa ntaqikyi variahuva variavaro Karaaisiva mwihua nraatara kyero vuni varivama variro.

11 Nkye taaqau vita Karaaisiravata kuaaqi variavaro mwiva nkyiqitairo qora kyaiqa teqa kyero kyaira. Mwiva hia Iutaa vaisivanto nai mwaanra qua rieqaro qoraisi nraaqiara mwamwanta toqa kyaintema kyero nkyi

mwamwanta toqa kyaira. Mwiva nkyiara hia api vu nraato tiqata uaquia hi kyaicara utuate tiro, nkyi mwutukyaitairo uaquia hi kyaicara toqa kyaira.

12 Nkye haaru nramanri vareqa Karaisiravata varuvaro mwi entara nkyi Karaisiravatama kyeta quntamwa tora. Nkyi quntamwa tovata nkye Kotiva Karaisira qutu vuraqitairo qati vara sivuma kyorara kepukyaqama kye riemwaqi quavarora tiro, mwiva Karaisira vatama kyero nkyivata quntamwa toraqitai qati vara sivuma kyora.

13 Haaru nkye qora kyaiqa nraahu utuqi vurara titi, nkye qutu yuhua votima kyeta varura. Mwi entara nkyi mwutukyaitairo hia nkyi qora kyaiqa toqa nyatovatara titi, nkye hia qioqama kye varura. Qio mwaa entara Karaisira vatama kyero Kotiva tiri qati vara sivuma kyero ekyaa tiri qora kyaiqa mwi quara nruka timwa taira.

14 Tire Kotira qua, mpo qua mpo qua nteqa kye variavararo mwia kyaara tiriqaa qua nronra vahuvare Kotiva mwi quara vara kyero Karaisira ruto kyatariraqaa mwi quaravata rutovaro Karaisiva tiriara rieqaro qutu viro tiriqaa qua vahura taiqa kyora.

15 Karaisira kyatariqaa hiritovaro mwiva mwiaqaa variqaro tiriqaa qua vahura taiqa timwa torara tiro, Saataanivavata, mwia henahua vaana vunyaaahuavata, tiriqaa qua vateva hia vahura. Hia vahuvare Karaisira kyatariqaa hiritovaro variqaro nraakyae qora suqaa mwihua kepukya nteqa kyero mwihua nraatara kyora.

16 Karaisiva mwitaa hurara tiro, haunri mpovanto nkyi ntavaaqaviqaro nkyiara haaruua mwaanra qua rieqata nkye mwi kyararave mwi nramanrinrave nrevorave, mwi entara mwi entara nronra entaqaa mwitaa mwitaa hiate, qaraakya tora nri ntaaninraqaa mwitaa mwitaa hiate, Iutaa mwaanra entaqaa nkye mwitaa mwitaa hiate, qiankyorave. Mpovanto qovarama viro mwitaa mwitaa hiate tiqaro nkyi ntavaaqavu kyaarivaarave.

17 Ekyaa mwi okyarava quaahaqa vahi okyaravama vahiro. Karaisiva qovarama viro ekyaa mwi okyarara taiqa kyairama. Ekyaa mwi okyarava mamanaanru votima kyero vaiharo Karaisiva qutaa inraikya mwivama variro.

18 Mpo ihua nkyiara tiqata, Nrivaqe tetu nrutu vara mwataniqamaqi viqata nyaamwunyaahua nyutu tuaaheraqi quare, ti variara. Nkye mwi vaisihuua qua riemwaqi viqata apiqama vivora. Mwi vaisihuua tire ruvata taqaurahuave tiqata qumina mwatanyaa okyara riemwaqita mwihua nkyiari nyutu nraahu tuaaheraqi vi variara.

19 Mwi vaisihuua Karaisira qaqlira kyeta hia mwiaqata kuaaqi variara. Karaisiva tiri qjata votima kyero varihata tire mwia mwamwanta votima kyeta varunanrave. Mwamwantave, kyuqu kyaauquve, nrunrunruve, ekyaa mwi inraikyava qiatavata taaqau viro vahiraro qjoma vaisivanto kepukyaqa hiro nronra tuemwa quananro. Mwia votima kyeta tire Karaisiravata taqaauvi kuaaqi variarera, tire mwia mwamwanta variqata qjoma nronra tuaananra. Tiriara mwihua mwitaamaqi viqata nronra tuemwa quate tiro, Kotira mwutukyara vahira.

20 Nkye Karaisivavata qutu vurara tiro, mwatanyaa okyara mpo okyara mpo okyaravanto hia nkyiqa ntaqikyihata nkye qatinani huvantu vita variara. Nkye qatinani huvantu vi variahuara titi, nkye nanraqamave mwatanyaa okyarara nronraqama kye riemwaqi vi varita?

21 Mpo hiahua nkyiari riemwa kye tiqata, Hia mwi inraikyara tu varante. Hia mwi kyarara nraante. Hia mwi inraikyara tu vareqara taqaante, ti variara. Mwihua mwitaa qjavata nkye nanraqamave mwihua qua riaavo?

²² Mwihua mwitaa ti varia inraikyava, mwi inraikyava pataqia vahi inraikyava vahiro vaisivanto mwi inraikyara vara kyaiharo taiqa vi inraikyava nraahuma vahiro. Qumina vaisivanto nkyiari riemwa kyeta mpohua timwa nyiqata tiri qua vataqi quate ti varia quava nraahuma vahiro.

²³ Airi nraakye qoravanto qao timwa tai quara rieqata kyuqe quave qiavarovata mwi quava hia kyuqe quama vahiro. Vaisivanto mwi quara riemwaqiro viqaro nai nrutu vara mwataniqamaqiro viro kyara aurero nai mwamwanta ntuqutuqiro viro mwitaamaqiro quaru okyarava hiama qio mwia kyaahaqa hiananro. Mwi quara riemwaqiro quariva qati nraahuma uaqia hi kyaiqara utuqiro quananro.

3

Kotiva Karaisiravatama kyero tiri qati vara sivuma kyaira

¹ Kotiva Karaisiravatama kyero nkyi qati vara sivuma kyiahata variarara titi, nkye nyaamwuni vahi inraikyara nronraqama kye riemwaqita quata. Nyaamwuni Karaisiva kepukyavanto Kotira kyauqu kyaatutani mwatakyaa viro varira.

² Nkye nyaamwuni vahi inraikyara nronraqama kye riemwaqti viqata hia mwatanu vahi inraikyara riemwaqti quata.

³ Nkye Karaisiravata qutu quarara titi, nkye Karaisiraqi variqatama nkye Kotiravata kuaaqi varira.

⁴ Karaisiva qati variqiro vi varirara titi, nkyevata qati variqi vivara. Mwiva nraakiara qovara hirata nkye mwi entara mwivavata qoqaa variqata mwiva kepukyaqama kyero kyuqema kyero variqi vintema kyeta nkyevata kyuqema kye variqi vivara.

⁵ Mwi quara rieqatama nkyi su nyaato mwutukyaqitairo mwata mwaqaanaa kyaiqa api kyaiqa varera ru taiqa kyaivarо ekyara taiqa quari. Nraakye qora api qaraqita nrohi okyararave, nraakye qoravanto nkyiari mwamwantaqaa hia kyuqema ntumwaqi okyararave, mpohua nraata vaatiqama kye uaqjama kye vu taqe okyararave, qora kyaiqa varara uti varirave, mpo inraikya mpo inraikya vara ntuvaantua hirarave, mpo inraikya mpo inraikya vara ntuvaantua ihua, mwihua unra mwanriqa nrutu tuaahere variahua votima kye variqata Kotira qaqlira kye variara.

⁶ Nraakye qoravanto ekyaa mwi kyaiqara uti varivaro Kotira mpoqama kyero raraqa tairaro mwihuaqaa nronraqama kyeroma qua vataanano.

⁷ Nkyevata haaru variqata mwi aanranraqaa nraahu variqi vi varurave.

⁸ Mate mwaa entara nkye ekyaa api okyara mwitaa hiani okyarara qaqlira kyeta nrohiata. Raraqa taani okyararave, inronra hiqata ntaqirera uti okyararave, mpohua nramwutaaqa hi okyararave, ekyaa mwi okyarara qaqlira kyeta nrohiata. Uaqia hi quavave, quaaru tivave, nkyi nyogitairo nriankiyora.

⁹ Haaru nkyi su nyaato mwutukyaavanto uaqjama kyero vahuvata nkye api aanraqaa nraahu nrohura. Mwiaqataai nkye api nrohu aanranra qaqlira kyeta variarara titi, hia nanrianra nanrianra unra qua qiata.

¹⁰ Mwaa entara Kotiva nkyi su nyaato mwutukya vara kyero qaraakya utu tairara titi, nkye kyuqema kye variqi vivaro Kotiva nkyi vara kye qaraakya utuqiro virata nkye Kotira nraantantamwa kye variqata Kotira okyara kyuqema kye taqaata.

¹¹ Kotiva nkyi qaraakya utu kyero vataivara tiro, mwiva hiama nkyiara tiqaro, E mpo mwatanaave, e Iutaave; e mwamwanta toqa kyai vaisivave, e hia mwamwanta toqa kyai vaisivave; e nronra mwatanaave, e pata

mwatanaave; e rupa taihara variara vaisivave, qati variara vaisivave; qiananro. Kotiva hia nkyi tukyama kyero mwitaa tiraitiro, nkyiara nkye Karaisiravata kuaaqi variahuavema qiananro. Karaisiva ekyaa Kotira nraakye qoravata kuaaqi variqiro vi varira.

¹² Kotira mwutukyavanto nkyiara vailharo nkyiara mwihua ni nraakye qora variqata mwihua ni kyaica nraahu varaqi quate tiro, Kotiva nkyi nai kyaama taihata nkye variara. Nkye mwitaa hi variarara tita, nkye nanrianra nanrianra po kye tiqata kyuqemaaqita quata. Hia nkyeta nyutu tuaaheraqi viraitita, mpohuara qihaakyamaqi vivaro hia pupohairata variata.

¹³ Nkye hia inronra hiraitita, nai kyaahaqa hi nai kyaahaqa hiqata variqi quata. Nkyiqitairo mpovanto nai qata vakyaara mpo qua timwa kyairera, mwi vaisirara qamwanrama kyera ena qata vakyaara qiove i qua qaqira kyaupo hia qua vaiho qianta qiat. Nkye mwitaa timwaqita quata. Tiri nronravanto Karaisiva nkyi qua qaqira kyero nruka nyataintema kyeta nkyevata mpohua qua qaqira kyeta taunru kyaata.

¹⁴ Nkye ekyaa kyuge kyaiqa mwia varaqi viqata nanrianra nanrianra mwutukya vahirata variata. Nkye mwitaama variqi vivera, nkye kuaara nraatima variqi vivara.

¹⁵ Karaisiva nkyi mwutukya qihaakyama nyataihata nkye variarara tita, nkyi mwutukyaqitai qihaaky hi varirata variata. Mwitaama variqata kuaara nraati Karaisira mwamwanta votima kyeta variqita quate tiro, Kotiva nkyi nyaanrama taira. Mwianra rieqata Kotirara kyuqeve timwaqi quata.

¹⁶ Kyaivar Karaisira quavanto anomia kyero nkyi kyaahaqa hiari quava nkyi su nyaato mwutukyaci vahirata nkye mwi quarara nraahu riemwaqi viqata nrohiata. Kyuqe vu nraato tu kyeta Kotira qua okyara nai timwa mwi nai timwa mwi hiqata kyuqe aanra nai nraamwute nai nraamwute hiqata variata. Kotirara qamwateqata ihi qiat. Kotira qua ihiqama kye timwaqi quata. Kotira nrutu tuaahereqa mpoqivata ihi timwaqi quata.

¹⁷ Nkye mpo kyaiqa mpo kyaiqa varaqi viqatave, nkye mpo qua mpo qua timwaqi viqatave, Karaisira nrutuara riemwaqi viqatama mwitaa hiata. Karaisira nrutu nteqatama Kotirara kyuqeve qiat.

Nkye Kotirara rieqata mwataama kye qua riemwaqi viqata variqi quata

¹⁸ Nte nkyi nraakye vaati vataahuara qiarita riaata. Nkye nkyeta saatimwanra qua riemwaqita quata. Nkye Karaisira nraaqiara variahuara tita, nkye mwitaamaqita quata.

¹⁹ Nte nkyi mwihua saatiara qiarita riaata. Hia nkyeta nyaatamwanra uaqjama nyataraitita, mwihuara mwutukya vahirata variqita quata.

²⁰ Nte nkyi nraaqiara qiarita riaata. Nkye mpo enta mpo enta nkyeta nyohua sohua qua rieqata variqi quata. Nkye mwitaamaqi vivaro Kotiva nkyiara qamwateqaro variananro.

²¹ Nte nkyi nraaqiara sohuara qiarita riaata. Nkyi nraaqiaravanto hia qaiqaavata kyuqe kyaiqa varaananrave tivo tita, hia mwihua inronramaqita quate.

²² Nte nkyi kyaiqa vaisiara qiarita riaata. Nkye nkyitaqaa ntaqikyi vaisihua qua rieqata kyaiqa varaata. Hia vaisivanto qamwata nyataate tita, mwihua suqaa nraahu variqata kyaiqa varaata. Nkye tiri vunyaa vaisi Karaisirara nronraqama kye riemwaqi viqata mwihua kyaiqa ntapihi kye varaataa hirata varaata.

²³ Nkye vaisi mponi mpo kyaiqa vareqata nkye Karaisira kyaiqama varauro timwa kyeqata kyuqemaa kyeta varaata.

24 Mwaa quara riaata. Nkye vaisi mponi kyugema kye kyaiqa vare varivaro nraakiara tiri vunyaa vaisivanto nkyi kyaiqara rieqaro mwia qita nkyita kyoqaa nyinrata nkye mwiva nai nraakye qorara rieqaro nkyiari kyaama taani inraikyara varevara. Nkye Karaisira kyaiqa vaisi variarara tiro, Karaisiva nkyi kyaiqara rieqaro mwia qita kyoqaa nkyita nyiananro.

25 Mwaa entara vaisivanto uaqia hi kyaiqara utuqiro quaninra nraakiara Kotiva mwianra rieqaro nai kyoqaa ntapihi kyeroma nai mwiananro. Kotiva hia mwi vaisira nrutuara rieqaro qamwata mwataraitiro, ntapihi kyeroma mwia qua tukya hiananro.

4

1 Nte nkyi kyaiqa vaisiqaa ntaqikyi variahuara qiarita riaata. Nkye ntapihi kyeqata nkyeta kyaiqa vaisiqaa ntaqikyiqi quata. Nkyitaqaavata nyaamwuni variva ntaqikyi varirara tita, nkyeta kyaiqa vaisiqaa kyugema kye ntaqikyiqi quata.

Mwaa quaravata riemwaqita quate tura

2 Hia qoriri hiraitita, mpo enta mpo enta Kotirara aakyara ntamwaqita quata. Hia vaite variqata Kotirara aakyara tiraitita, su nyaato tu kyeta aakyara nteqata Kotirara kyuqeve timwaqita quata.

3 Nkye Kotirara aakyara nteqata tiriara mwihua kyaahaqa hirata Karaisira qua timwa nyiqi viva aanra vahiarive qita. Nte Karaisirara uqeta tai quara nraakye qora timwa nyiqina vuvama varina. Mwi quara nraakye qora timwa nyunra kyaara ni rupa kyaavanama mwaaqi varina.

4 Qio nianra rieqata Kotirara aakyara ntaivaqena nte ntapihi kye Karaisira qua nraakye qora timwa nyianrita ntapihi kye riaata. Haunri nte api qua timwa nyiankyora.

5 Karaisira qua hia rie nraakye qorahua varivata nkye mwihua suqaa ntapihi kye nrohiata. Hia nkye mwihuavata qumina variraitita, nkye taqaivaro Karaisira qua timwa nyi aanrava vahirata nkye Karaisira qua mwihua timwa nyiata.

6 Nkye mwihuavata qua tiqata hia mwihua qoriri hiani quara tiraitita, mwihua kyakya hiani quara tivata mwiaqatai mwihua mpo quara nkyi kyapara hivata nkye qio nkyiari timwa nyintema kyeta variata.

Qua mwanteqaro ekyara qua tura

7 Tikikaasiva ni mwakyaakya nkyi timwama nyiananro. Tikikaasiva tiri tiqata vakyyaa kyugeva variqaro ntapihi kyeqaro tirivata kuaa kyaiqa Karaisira kyaiqa vare varira.

8 Nte mwia titaairo mwiva nkye varinani uro tiri mwakyaakya nkyi timwa nyinrata nkyi mwutukyavanto kyuge hirata qamwateqata variata.

9 Nte mwiaavata Onisimaasiravata titaaarti vivara. Onisimaasiva tiri tiqata vakyyaa kyugevama. Mwiva quttaaqama kyero ekyaa kyaiqa vare varivama variro. Mwiva nkyiqinaavama variro. Mwitanahua vihua uro mwaini vahi mwakyaakya nkyi timwa nyivara.

10 Arisitakaasiva mwiva nivatama kyero rupa taava, mwiva nkyi qua mwantero. Vanavaasira qata Maakivavata nkyi qua mwantero. Nte vaakya nkyiari tiqana, Maakiva nkye hinani virera nkye mwia qamwata mwateta mwia vitaate, tura.

11 Iosuaava mwia mpo nrutu Iasitaasivave qia vaisiva, mwivavata nkyi qua mwantero. Kotira nraaqiara Iutaaqitai qio taarampo mwinramwuhua nraahua nivata variqata Kotiva ntaqikyiani quarara nronraqama kye rieqata ni kyugema kye kyaahaqa hi variara.

¹² Epaparaasivavata nkyi qua mwantero. Mwivavata nkyiqinaava Iesusi Karaisira kyaiqa vaisima variro. Mwiva nkyiara rieqaro kepukyaqama kyero Kotirara aakyara nte varira. Mwiva nkyiara Kotirara aakyara ntero tiqaro, Kotio, e mwihua kyaahaqa hirata mwihua hia pupohairata kepukyaqama kye variqata hia nraaqiara taaqa variraitifa, kepukya nraakye qora variqata i qua kyuqema kye riemwaqita quate, tira.

¹³ Nte taqauqaro mwi vaisiva kepukyaqama kyero kyaiqa vareqaro nkyivata Reotisiaani variahuavata, Hiraporisini variahuavata, kyaahaqa hi variro.

¹⁴ Rukuva tiri totaa kyuqevavata, Ntimaasivavata, nkyi qua mwanteta.

¹⁵ Tiri tiqata vakya Reotisianni variahuavata mwihuara rieqana mwihuqua qua mwantaura timwa nyiata. Nraakye mpo Nimpaaravata mwia nraamwuqi ntuaautta hiahua, mwihuavaravata nte rieqana qua mwantaura timwa nyiata.

¹⁶ Nkye qara mwaa kyaara ntumwa kyeta Kotira nraakye qora Reotisi-aqinaahuavata nyivata mwihuavata kyaara ntua. Mwiaqaataita nte qara mpo, Reotisiaqinaahuani vara kyaura, mwia nkyevata vara kyeta kyaara ntuaata.

¹⁷ Nkye Akipaasira mwitaama kye timwa mwiata. Tiri nronra Karaisiva i kyaiqa mwinra quetaaqama kyera varaqira vira uro taiqa kyaante, qiata.

¹⁸ NTE PORUVAMA, ntena kyaauquqo qara ntiganama nkyi qua mwante varuqo. Ni rupa taavana mwaaqi varuraravata hia taunru kyaata.

Kotiva nkyi kyuqema nyataarive tuquo.

1 TESARONAIKA

Poruva Tesaronaikaaqinaahuani vunyaa qara vara kyora

Iesusira qati vara sivuma kyovaro nyaamwuni uro varuvaro 20 ihive nritarovaro Poruva mwaa quara qara ntumwa tora. Poruva Tesaronaikaaqi varuhua Karaisira qua timwa nyuvata mwihua mponramwuvanto Karaisira quara quataave timwa kyeta varura. Mwihua Iesusira nraakye qora variqi vuvata mwia kyaara mpo uhua mwihua uaqiamaqita vuvaro Poruva mwihua hia pupohairata kepukyaqama kye variqi quate tiro, mwaa quara qara ntumwa nyatora. Poruva Karaisiva tumuaní quaravata mwihua ntapihi kye timwa nyunra.

¹ Nte Poruvama. Ntevata Sairaasivavata Timotivavata tirenramwu nkye Kotira nraakye qora Tesaronaikaaqi variahua nkyinima qara ntumwa teta. Nkye tiri tiqora Kotiranivantovata Iesusi Karaisiranivantovatama varita. Kotiva nkyi kyuqema nyatairaro nkyi mwutukyaqitaira qibaakya hirata variata.

Tesaronaikaaqinaahua Iesusirara riemwaqita vurara tura

² Tire mpo enta mpo enta Kotirara aakyara nteqata nkyiara kyugeve timwa kyeta nkyi nyutu nteqata Kotirara aakyara nte varunanra.

³ Tire Kotira vuqaa variqata nkye vare varia kyaiqara hia taunru kyaraitita, tire ntapihi kyaurata nkye Karaisirara quataa mwivave timwa kyeta mwiaqaatai nkye mwia kyaiqa varaqi quara. Nkyi mwutukyaavanto Karaisirara vahata nkye kyuqema kye mwia kyaiqa vare variara. Iesusi Karaisiva tiri vunyaa vaisivanto tumuaninra, nkye mwia vekya hia pupohailata variqi vi variara.

⁴ Tiri tiqata vakyaa tuaavo, tire ntapihi kyauraro Kotira mwutukyaavanto nkyiara vaharo nkyiara ni nraakye qora variate tiro, mwiva nkyi nai kyaama taira.

⁵ Haaru tire Karaisira qua nkyi timwa nyiavarata nkye hia mwi quarara qumina quave tiraitita, mwi quarara kepukyu quave tuvaro Kotira mwanaraquravanto nkyi kyaahaqama kyovata nkye mwi quarara quataave timwa kyeta kepukyaqama kye mwi quara riemwaqita vura. Mwi entara tire nkyiara rieqata nkyi utaqaa nrohi variqata kyuqema kye ntapihi kye nrohiavanana mwia nkyi ntapihi kyaarama.

⁶ Mpo uhua nkyi uaqiamma nyateqa nkyiara hia mwi quara riaate tutata nkye hia mwihua qua riaraitita, Karaisira quara quataave tuvaro mwiaqaatairo Kotira mwanaraquravanto nkyi mwutukya kyuqema nyatovata nkye qamwateqa variqata tire hurantema kyeta Karaisira tiri vunyaa vaisi vataqita vi varura.

⁷ Nkye mwitaamaqí vuvata Karaisirara quataave tuhua Masentoniaanivata Akaianivata varuhua nkyi taqeta, Kyai tirevata mwitaa hiare, timwa kyeta mwitaamaqí vurama.

⁸ Nkye Karaisira qua rieta mwiaqaatai mpohua mpohua timwa nyiqi quavaró mwi quava nkyiqitairo viro nrinro Masentoniaani viharo Ákaianviharo mwiaqaatairo ekyaa mwatani viro nrinroma virara tita, ekyaa mwi mwatanaahua nkyiara tiqata, Mwihua kyuqema kye Kotira qua riemwaqí vi variarave, ti variara. Nkyiqitairo mwi quava viro nrinroma virara tita, tire qumina mwi quara nkyita timwa nyianronra.

⁹ Haaru nkyivata variqata mwitaa mwitaa hiavana quara, mwi quara Akiaaqinaahuavata, Masentoniaqinaahuavata timwa nyianre tita taqaurata mwi mwatanaahua nkyiari vaakya mwi quara ntapihi kyeta nkyiavanto tiri timwa timwunra. Mwi entara tire nkyivata uto variavarata nkye unra mwanriqanra rieqata utu kye vato inraikyara qaqa kyeta tuqasaa vita qutaa mwanriqavanto qati variqi vi varira, Kotira mwia kyaiqa nraahu vararerera uti varura.

¹⁰ Mwitaa hiqata nkye mwia mwaaquvanto nyaamwusairo qaiqaa tumaninra vekya variara mwi quara mwi quara mwihua nkyiarivanto tiri timwa timwiavata riaunanra.

Mwia mwaaquvanto qutu vuvaro Kotiva mwia qaiqaa qati vara sivuma kyova, Iesusiva, mwiyama tiri vaitutuma kyaarivama variro. Nraakiara Kotira raraqa tairaro ko qiani entaraqaa Kotiva tiriqaavata qua vataankyo tiro, Iesusiva tiri vaitutuma timwa taananro.

2

Poruva nai toharero Tesaronaikaaqi kyaiqa varorara tura

¹ Ni kata pakya tuaavo, haaru tire nkyivata uro variqata nkyi kyaahaqa hura kyaiqava hia qumina vivira. Nkye mwia ntapihiara.

² Haaru hia nkye hunani quavana entara tire Piripaini variavarata mwi mwatanaahua tiri uaqlama timwa teta kyaurira inraikya vara timwuvata tire nriqa vu inraikyara varavaananra nkye mwi quara ntapihi kyaara. Tire Piripai kyeta nkye hunani utontaavarata vaisi airavento tiri qoraqama timwa tetu hia mwi quara qiate ti varuvaro Kotiva tiri kepukya timwuvata tire hia aatu hiraitita, Kotira qua Iesusira mwakyaakya nkyi timwa nyiavanana.

³ Tire nraakyе qora qua timwa nyinrenra hia api qua rieqata mwi quara timwa nyiavanana. Hia tire mpoohuavata api nrhoiqata uaqia hi inraikyara utuuna quara timwa nyiavanana. Hia tire nraakyе qora unra utu nyataraqua timwa nyiavanana.

⁴ Qaqao, Kotiva tiri mwataarama kyero taqero qiomma nkye ni qua kyuqe nraakyе qora timwa nyivarave tihata tire mwi quara nraakyе qora timwa nyi varunanra. Tire hia nraakyе qoravanto qamwata timwa taate tita, qua timwa nyunanra. Kotiva tiri qamwata timwa taarive tita, tire mwia qua nraakyе qora timwa nyi varunanra. Tire vu nraato tunanravata Kotiva tukyama kyero taqaivama variro.

⁵ Nkye tiri okyara taqamwa kyaara. Tire haaru nkyivata nkyi mwaatani uro variqata hia tire kyuqe kyuqe timwaqti viqata qiaavanana. Kotivavata taqe varuvata hia tire tiqata, Kyai tire kyuqe kyuqe timwaqita quarata mpo inraikya timwiate, timwa kyeta qua nkyi timwa nyiavanana.

⁶ Hia tire nkyiarave, mpoohuave, tiri nrutu tuaaheraate qiaavanana.

⁷ Tire Karaisiva nronraqama kyaihua variqata nkyiara kepukyaqama kye tiqata, Nkye tiri mwitaa mwitaa timwa taate, qiera aanrava vahuvatavata, tire hia mwitaa hiraitita, tire qiaakyama kye nkyiqi kyaiqa varavaananra. Mwia nrova nai nraaqiaraqaa kyuqema kyero ntaqikyintema kye tire nkyiqa qiaakyama kye ntaqikyivana.

⁸ Mwi entara nkyiara tiri mwutukya vahuvata tire Kotira qua Karaisira mwakyaakya nkyi timwa nyita nai mpoqiaavata nkyiara tiri mwutukya vahuvata tire nkyivata variqata nkyi nraahu kyaahaqa hiarahua variavanana.

⁹ Tire mwi entara toqaamwu tu kyeta kyaiqa varavaananra mwia nkye ntapihi kyaara. Tire Kotira qua Karaisira mwakyaakya nkyi timwa nyiqi

viqata haunri nkyi muaanra nyianro tita, entaqivata iheravata toqaamwu tu kyeta qati nraahu kyaiqa varaqi vi variavanana.

10 Nkye Karaisira quara qutaave tuvata tire nkyivata quavarata nkyevata Kotivavata taqovata tire kyuqema kye hia apiqama kyeqata nkyivata variavanana.

11 Mwia qova nai nraaqiaraqaa kyuqema kyero ntaqikyintema kye tire nkyi kuaiqiqa kuaiqiqa ntaqikyiqi quavanana.

12 Nkyi pupohaankyo tita, tire kepukya quaquo nkyi su nyato nyita, nkyi mwutukya qihaakyama nyateta, nkyiara po tiqata aanra kyugeraqaa nraahu vivaro Kotiva nkyiara qamwateqaro variarive qiavananra. Nkye Kotiva nai ntaqikyi mwatukyaraqi uro variqata mwia peqa okyara taqaate tiro, Kotiva nkyi nyaanrama tairara titama, tire mwi quara mwi quara nkyi timwa nyita.

13 Tire Kotira qua nkyi timwa nyiavarata nkye mwi quarara hia qumina vaisivanto timwa tai quarave tiraitita, mwi quara Kotiva timwa tairave tura. Nkye mwitaa hiavata tire Kotirara kyuqeve timwaqi yunanza. Qio qutaagama kye mwi quava Kotira quama vahiro. Nkye qua mwianra qutaave qiavaro mwi quava nkyiqi vahiqaro nkyi kyaahaqama nyate varira.

14 Ni kata pakyaa tuaavo, Iutiani Kotiva nyaanrama tai nraakye qorahua, mwihua Iesusi Karaisirara qutaave tuvata mwia kyaara nkyiari nramwunaahua mwihua uaqiamaqita uvvata mwihua nriqa vu inraikyara varaqi vi varuru. Mwihua nraantantamwa kye nkyevata Karaisirara qutaave qiavata mwia kyaara nkyita nramwunaahua nkyi uaqiamaqita quavata nkye nriqa vi inraikyara varaqi vi variara.

15 Iutaavanto Iesusira ru kyora. Haaruvata kuaa mwihua nraahu poropeti vaisi mponramwu ru kyora. Mwaa entaravata mwi mwatanaahua nraahu Karaisira qua kyaara tirivata uaqiamma timwate variara. Iutaavanto mwitaamagi viqata mwihua Kotiva hia qamwataani kyaigara nraahu varaqi viqata ekyaa mpo mwatanaahua nramwutaaqa hi variara.

16 Tire Kotiva nraakye qora huvantu nyataani quara mpo mwatanaa mpo mwatanaa timwa nyianre turata Iutaavanto tiriara hia mwi quara qiate tita, tiri aanra huvaitarerera uti variara. Mwihua mwitaamagi quavaro mwihua qora kyaiqvavanto nritarero vaharo Kotira raraqa taiharo qiove timwa kyero mwiaqatairoma mate mwihua ntuquuti variro.

Poruva qaiqaa mwihua uro taqaaninranra tura

17 Ni kata pakyaa tuaavo, Iutaa vaisivanto tiri uaqiamma timwa teta nkyiqitai tiri titovata mwia kyaara tire mpo entanramwu variqata tiri mwutukyavanto uaquia huvata nraanranra nraaqiara votima kye variqata hia nkyi siri taqaraitit, nkyiara nronraqama kyé nraato tiqata varunanza. Tiri mwutukyavanto anomia kyero uaquia huvata tire mwi entara, Kyai nrumu ntanteta uro nkyi siri taqaare, timwa kyeta

18 nkye hunani quananra aanra puua hiavararo hia vahuvata variavanana. Nte Poruva qaiqaavata qaiqaavata nrumu ntantena uro nkyi taqarerera hiavaro nte quari aanrava hia qioqa hura. Saataaniva tire quana aanranra tita tovata hia nkyi uro taqaavanana.

19 Qio nraakiara tiri vunyaa vaisivanto Iesusi Karaisiva qaiqaa tuminraqe tire mwi entara mwia vuqaa sivita variqata tire tahua taqaanana vekyave mate tire varita? Mwia nkyeve. Mwi entara tire tahua taqeve mpoqama kye qamwataanana? Mwiavata nkye nraahuma. Tire tahua taqetave tiri kyaiqvavanto hia qumina viviho qiananra? Tire mwi entara nkyi Tesaronaikaa nraakye qora taqeqatama mwi quara mwi quara mwitaa qiananra.

20 Nkye Kotira nraaqiara kyuqema kye variarara rieqatama tire Kotira nrutu tuaahereqa qamwateqata varita.

3

Poruva Tesaronaikaani Timotira titorara tura

1 Tire nrumu ntanteta uro nkyi Tesaronaikaaqinaahua taqaare tita, aanranra puaamaqi viqa taqaavararo hia vahuvata haunri tire mpuahaama varita hia nkyi mwakyaakya riaarorave timwa kyeta kyai tire tetaraa mwaini Atenini variqata

2 Timotira titaararo mwiva uro nkyi taqaarive qiavananra. Timotiva tirivatama kyero Kotira kyaiqa vareqaro Karaisira qua kyuqe mwakyaakya nraakye qora timwa nyi variva. Timotiva mwiva uro nkyi su nyaato nyinrata nkye kepukyaqama kye variqata Kotira qua kyuqema kyeta riemwaqi quate tifa, mwia titavararo mwiva nkye hunani vurama.

3 Vaisi mponramwuwanto nkyi uaqjama nyataivata nkyiqitai mpo ihua pupohairata Kotira qaqlira kye vivo tita, Timotira titaavararo mwiva nkye hunani vurama. Nkyevata tirevata Iesusira nraaqiara varunanranra tita, tiri uaqjama timwa teva vahiananro. Mwia nkye ntapihi kyaara.

4 Haaru tire nkyivata variqata nraakiara mwinro mwaanro tiri uaqjama timwate quara nkyi timwa nyiavarata nkye mwi quara riora. Qio mate nkye taqaavaro qutaama mwi inraikyava qovara hiro.

5 Nkyi uaqjama nyataivaqe nte mwaini mpuahaama qumina variankyo tina, kyai nte Timotira titaariro mwini quarive qiavara. Nkye Kotira qua rieve variavo, hiave rie variavo, tina, Timotira titaavaro nkye hunani vura. Nte nkyiara tiqana, Saataaniva mwihuaara uaqia hi kyaiqara utuate tirata mwihua mwia qua rieta tiri quavata tire mwihuaqi kyaiqa vara taunanaravata qaqlira kyevorave tina, Timotira titaavara.

Timotiva nkyi mwakyaakya kyuqe mwakyaakyama nrumu timwa mpiho, tura

6 Mate Timotiva nkye hianasairo uro ntantero nrumu nkyi mwakyaakya kyuqe mwakyaakya timwa mphihamama riaura. Mwiva nkyiara tiqaro, Mwihua Kotira qua riemwaqita vima variavo. Nanrianra nanrianra mwutukya vahitama variavo. Mwihua tiriara riemwaqi viqata tiriara qamwateqatama variavo, tiro. Tire nkyi siri taqaataa ihata varurantema kye nkyevata tiri tiviri taqaataa ihata variavoma, tiro. Timotiva nkyiara mwitaa mwitaa tihatama riaunranra.

7 Ni kata pakyaa tuaavo, tire mwaini variqata ekyaa mwi muaanranra varaqi vi varuraro Timotiva nkye Iesusirara kepukyaqama kye riemwaqi quara, nkyi mwakyaakya kyuqe mwakyaakya tihata tire mwi quara riauraro tiri kepukya timwiho.

8 Nkyi hia pupohaihata kepukyaqama kye nronravanto ti quara riemwaqi quaraqaatai tire qiomma kyuqema kye qati variqi quananra.

9 Timotiva nkyi mwakyaakya tiri timwa timwihanro tiri mwutukyaqitairo anoma kyero kyuqe ihata tire Kotira vuqaa variqata nronraqama kyema qamwateqata varita. Qikye, nkyiara qamwateqata nai Kotirara nataamave qamwataaanranra?

10 Qio tire qaiqaa nkyi uro taqeta nkyi kyaahaqa hiqata nkye Kotira qua hini qua hia riaara, mwi quaravata nkyi timwa nyianrata nkye Kotira qua ekyaa qua riemwaqita quate, titama tire entaqi ihera nkye hinani quana aanranra tinraamwutaante timwa kyeqata Kotirara aakyara nte varunranra.

¹¹ Kotiva tiri tiqova naivata Iesusi Karaisiva tiri vunyaa vaisivantovata anraa tinraamwutairaque qiove qiananra.

¹² Kyaivarо tiri vunyaa vaisivanto nkyi kyaahaqa hirata nkye nanrianra nanrianra mwutukya vahirata variqi viqata uro ekyaa nraakye qoraravata mwutukya vahirata variata. Nkye mwitaamaqi vivera, tiri mwutukyavanto nkyiara mpoqiavata vahintema kyeroma nkyi mwutukyavanto mpohuara vahianano.

¹³ Mwiva nkyi kyaahaqa hiraro nkyi mwutukyavanto kepukyaga hirata varivarо nraakiara Iesusiva tiri vunyaa vaisivanto nai nraakye qora kyuqehua kyaapata tuminrata nkyevata mwi entara hia apiqa hi nraakye qorahua variraitita, kyuqe nraakye qoravanto nraahu variqatara tita, hia kyauriraitita, qioma tiri tiqora Kotira vuqaa sivita varivara.

4

Mwataa hi aanranraqaa nrohi vaisirara Kotiva qamwateqaro varirave, tura

¹ Qio ni kata pakyaa tuaavo, haaru tire nkyivata variqata nkyi timwa nyita mwataama kye aanra kyuqeraqaa nrohivaro Kotiva nkyiara qamwateqaro variarive qiavarata nkye mwi quara riora. Nkye matevata mwi quara rieqata nrohi variara. Tire tetä vunyaa vaisi Iesusi Karaisirara rieqatama nkyiara po kye tita kepukyaqama kye tiqata, Kotira aanraqaa mwitaa mwitaama kye nrohiate tunanra mwi quara nraahu riemwaqi viqatama anomakye mpoqiavata mwi quara riemwaqi viqatama mwi aanranraqaa quaterama, turo.

² Tiri vunyaa vaisi Iesusi Karaisiva tiri nronraqama kyovala tire mwaanra qua, mpo qua mpo qua nkyi timwa nyiavana quara, nkye ntapihi kyaara.

³ Qio Kotira mwutukyavanto mwataamama vahiro, Kotiva nkyiara hia uaqia hi kyaiqara utiraitita, aanra kyuqeraqaa nraahu nrohiqata api qaraqita nrohi okyarara qaqlira kyaatema tiro.

⁴ Mwianra rieqatama nkyeta mwamwantara kyuqe mwamwantave timwa kyeta mwiaqotai uaqia hi kyaiqara utuarorave tiqata kyuqema kye nkyeta mwamwantaqaa ntaqikyiqi quata.

⁵ Nkye variqata mpo mwatanaahua, hia Kotira qua riaahua api nrohiantema kyeta nrohivora. Mwihua qora kyaiqara mwutukya ntihata mwi kyaiqara uti variara.

⁶ Iesusira nraaqiara mpovanto mwi kyaiqara utirera, mwiva nai henanra uaqama mwataananro. Mwiva hiavata mwitaa hiari. Mpovanto mwitaa hirera, Kotiva naivantomа mwi vaisira ruananro. Tire haaru kepukyaqama kye nkye mwitaa hivorave tita, nkyi mwi quara timwa nyiavanana.

⁷ Kotiva hia tiri nraakye qorara nanrianra nanrianra api nrohiate tiro, tiri nraanrama tairavauma. Tiriara mwihua kyuqe kyaiqa nraahu varaqi quate tiro, Kotiva tiri tinraanrama taira.

⁸ Tire mwaa mwi quara nkyi timwa nyuna quara mpovanto mwoqa mwianriva hia vaisivauma mwoqa mwiananro. Mwi vaisiva Kotiva nai mwanaraqura nkyi nyi varira, mwiamma mwoqa mwiananro.

⁹ Nkye nanrianra nanrianra mwutukya vahata variara Kotiva vaakya nkyi nyaamwutairara tita, tire hia qaiqaa mwi quara nkyi timwa nyita mwitaa hiate qiananra.

¹⁰ Nkye nanrianra nanrianra mwutukya vahata variqata mwiaqatai ekyaa Iesusira nraakye qora Masentoniaani variahuaravata mwutukya vahata variara. Nkye mwitaamaqi vi variavata tire nkyiara mpoqiavata mwitaamaqi quatemra turo.

¹¹ Nkye qihakyama kye varirara kepukyaqama kye riemwaqita quata. Hia qumina aanraqaa nrohiqata mpora kyaiqa uro mwaati taqe nrumeru mwaati tage hiata. Nkye nkyeta kyaiqa nraahu varaqita quata. Nkyeta kyaunuqo kyaiqa vara kye kyara nreqata variata. Mwi quara haaru nkyi timwa nyiavananra mwivauma quata.

¹² Nkye mwitaamaqita viqata nkye qioma nkyetavanto nkyetaqa ntaqikyiqata hia qumina uro mpohuara kyararave, mpo inrakyarave, nyaanru tiraitita, variqi vivata mpo nraakye qoravanto hia Iesusira qua riehua, mwihua nkyi kyaiqa taqeta nkyiara kyuqe nraakye qoravema tivara.

Tiri vunyaa vaisivanto qaiqaa tumuaninranra tura

¹³ Ni kata pakyaa tuaavo, hia Kotira qua riaa nraakye qorahua ekyaara qutu vita hia qaiqaa siquananrave ti variavaro mwihua mwutukyavanto uaqia ihata variara. Nkyevata mwihua nraantantevo tita, tire ntapihi kyeta qutu vihua okyarara nkyi timwa nyinrenra.

¹⁴ Iesusiva qutu viro mwiqitairo qaiqaa sivura mwi quarara tire quataave tunanra. Tire mwi quarara quataave tiqatara tita, tire tiqata, Nraakye qora Iesusirara quataa mwivave tihua, mwihua qutu vivaro Kotivama mwihuavata qati vara sivuma kyairata mwihua Iesusiravatama kye uro ntante tumivaravema, turo.

¹⁵ Tiri vunyaa vaisivanto tirivata timwa timwi quarama nkyivata timwa nyita. Tiri vunyaa vaisivanto tumuani entaraqaa Iesusirara quataave tiqata qati varihua, hiama mwihua nraante vivata qutu vihua nraakiara vivara.

¹⁶ Qaqa, mwi entara Kotiva qua tiraro mwiaqaatairo nyaamwunyaava nronravanto aakyara tiraro Kotira ntomaqotairo vuatairaro tiri vunyaa vaisi nai mwivama nyaamwusairo tumuananro. Mwitaa hiraro Karaisirara quataa mwivave timwa kye qutu vihua, Kotiva mwihua nraante qati vara sivuma kyairata

¹⁷ mwiaqaatai tiriqitai qati vari nraakye qorahua, mwihua vita qutu vihua kyapata ntuvaantua hita tiri vunyaa vaisivanto tonamwuqi tumuaninra mwia huntu kyarerera virini vivara. Tire uro teta vunyaa vaisi huntu kyeta mwiaqaatai ekyaa enta mwia vatama kyeta qati variqi quananra.

¹⁸ Nkyi mwutukyaitai kyuqe hi varirata variate tita, nkye mwi quara nai timwa mwi nai timwa mwi hiqata variata.

5

Iesusiva tumuani entarara terama teta variate, tura

¹ Ni kata pakyaa tuaavo, ekyaa mwi inraikyava qovara hianinra okyara nkyeta ntapihi kyaarara tita, tire qumina nkyi qara ntumwa kye timwa nyiqata mwi entara mwaa entarave qiarora.

² Nkye ntapihi kyaarama. Mpuara vaisivanto entaqi tirema kye nri-antema kyero Iesusivavata nkye hia mwianra rie entara tumuananro.

³ Nraakiara nraakye qoravanto tiqata, Mate kyuqe entave. Kyuqema kye variqi virerata, timwa kye varivaro nrihanrama nyatero mwihua ntuqutu raupirima kyaari entava nrintairata mwihua anomu kyeta uaqiamu kyeta varivara. Nraakyevanto kyuqe variqi viharo qamwanrama kyero nraaqiara mwataari entava qovara iharo atura ntintema kyero qamwanrama kyero mwi entava qovara hiananro. Mwi entaraqaa hiama mpovanto ntuquema kyero aatu quari aanrava vahiananro.

⁴ Ni kata pakyaa tuaavo, nkye hia enta hiraqi variqata uaqia hi kyaiqara uti variahuara tita, nkye mwi entava mpuara vaisivanto tirema nrintema kyero nriankyo tita, teramateta variate.

⁵ Nkye omwavanto itainani varia nraakye qorahua nraahu variara. Nkye huari iteqaro ntuvahainani nraahu variara. Nkyevata tirevata hia enta hiro kyokira riraqi varurahuavauma.

⁶ Tire mwianra rieqatama haunri mpo nraakye qora nraantante vaite variarora. Nrivaqe sivi variqata vu ntapairi kye vifi viri taqeqlata variqi quara.

⁷ Vaitaahua entaqi vaite variavata uera nramanri nraahuavata entaqi nraahu nreqata apiqama kyeqa uera nte variara.

⁸ Tire hia mwihua nraantantamwa kyeta varurahua. Tire ntuvaa-hairaqaa nrohura nraakye qorahuarra tita, varavaqe vu ntapairi kye viti viri taqeqlata variqi quara.

Ntaqì vaisiva vevavanto ni mutukya ruankyo tiro, nai mwetokyaqa qainiqotairo nraamwuma taira. Mwia nraantantamwa kyeta varavaqe Iesusirara kepukyaqama kye riemwaqi viqata nanrianra nanrianra mwutukya vataana okyarara riemwaqi quararo mwi okyarava tiri mwetokya ntumwaqu tairaqe variara.

Ntaqì vaisiva qiataqi ruankyo tiro, qaini tovaqa nai qiataqaa cutaira. Mwia votima kyero Kotiva tiri huvantu kyero tivita vatairaqe tire mwiaavata qio variana quara riemwaqi quararo mwi quava tiri qiataqaa tovaqa votima kyero vahiarì.

⁹ Hia Kotira raraqa tairaro tiri ntuqtirero nai kyaama tairavauma. Tire Iesusi Karaisira tiri vunyaa vaisiara rieqata hia ekyara qutu viraitita, Kotiravata qati variqi quananranra rieqaro Kotiva tiri nai kyaama tairama.

¹⁰ Karaisiva tiriara rieqaro qutu vurara tita, qutu quararove, qati variarrove, mwiva tuminraqe tire mwi entaraqaatai mwiaavata ekyaa enta qati variqi quananra.

¹¹ Nkye mwianra rieqatama nkye mate hiantema kyeta nkye nai kyaahaqa hi nai kyaahaqa hiqata nai kepukyaqama mwate nai kepukyaqama mwate hiqata variata.

Vitini ekyara qua tura

¹² Tire nkyiara mwataas hiatemata tita, Vaisi mponramwuvanto nkyivata variqata Kotira kyaiqa nkyiqi vare varihua nkye mwihuara nronraqama rieqata mwihua kyuqema nyataata. Tiri vunyaa vaisivanto mwihuara nkyi anra kyuqera nyaamwutamaqi quate tiro, mwihua nronraqama kyaira.

¹³ Mwihua nkyiqi kyaiqa varerara tita, nkye mwianra rieqata mwihuara kyuqe vaisive tiqata nkye mwihuara mwutukya vahirata variata. Nkye kuaara nraati variqi viqata nanrianra nanrianra qibaakyamaqita quata.

¹⁴ Tiri qata vakya tuaavo, tire nkyiara mwataas hiatemata tita, Hia kyaiqa vararaitta qumina nrohi varihua su nyaato nraivata mwihua kepukyaqama kyeta kyaiqa varaata. Aatu hi varihua kyaahaqa hivata kepukyaqama kyeta Kotira kyaiqa varaata. Hia Iesusira qua kepukyaqama kyeta riemwaqi vihua, kyaahaqa hivata kepukyaqama kye Iesusira qua riemwaqi quata. Hia paparuqa hita vuavi raavira tiraqitai mpohua kyaahaqamaqita quata.

¹⁵ Nkyi uaqiamma nyataivata nkyiari uaqiamma nyataaro tita, rauriqata variata. Nkye nanrianra nanrianra kyuqe hita kyaahaqa hiqata ekyahua kyaahaqa hiata.

¹⁶ Nkye ekyaa enta qamwateqata variata.

¹⁷ Nkye ekyaa enta Kotirara aakyara nteqata variata.

¹⁸ Hia kyuqe enta nraahu Kotirara qamwateqata variata. Uaqia hi entaravata Kotirara qamwateqata nraahu variqi quata. Kotira kyakya hiva nkyiara mwitaamaqita quatemata tiro.

¹⁹ Kotira mwanraquravanto nkyiqi variva nkyiqi kyaiqa utirera hirata nkye mwia kyaiqa antua kyeta mwia qua hia rievora.

²⁰ Kotira mwanraquravanto vaisi mpo kyaahaqa hiraro mwi vaisiva Kotira qua tirata nkyē mwia quara qumina quave tivora.

²¹ Nkye ekyaa kyaiqave, ekyaa inraikyave, tukyama kye taqaivaro kyuqema vahianinra mwia nraahu tuqara tutaata.

²² Ekyaa uaqia hi kyaiqavave, uaqia hi inraikyavave, vahianinra mwia qaqira kyaata.

²³ Nraakye qorara hia aatu hiraitita, mwutukyaqitai qihakya hi variata variate ti variva, Kotiva nkyivata kyaahaqa hirata nkye hia uaqia hi kyaiqara utiraitita, kyuqe kyaiqa nraahu varaqi quata. Kotiva nkyiqa ntaqikyi variraro nkyi mwutukyavantovata, su nyaatovantovata, mwamwantavantovata, qio vahiar. Mwitaa hiraro Jesusi Karaisiva tiri vunyaa vaisivanto tumuan entaraqaa nkye kyuqema kyeta varivaro hiama nkyiqa qua vahiananro.

²⁴ Kotiva nkyi nyaanrama taiva quttaaqama kyeroma nkyi kyaahaqa-maqiro quananro.

²⁵ Ni kata pakyaa tuaavo, nkye tiriaravata rieqata Kotirara aakyara ntaata.

²⁶ Nkye Jesusira nraaqiara varihuara tita, Jesusira nraaqiara mpo ihua kyuqema kye qua mwanteqata nai kyauqu mwi nai kyauqu mwi hiqata variata.

²⁷ Nronravanto ni nronraqama kyaiva nte nkyiara kepukyaqama kyena tiqana, Qara mwaa kyaara ntumwa kyeta ekyaa tiri tiqata vakyaavata mwaa quara timwa nyiata.

²⁸ Tiri vunyaa vaisivanto Jesusi Karaisiva nkyivata variqaro nkyi kyuqema nyatairata nkye kyuqema kye variqi quatema tuqo.

2 TESARONAIKA

Poruva Tesaronaikaaqinaahuani nraakiaraa qara vara kyora

Iesusira gati vara sivuma kyovalo nyaamwuni uro varuvaro 21 ihive nri-tarovaro Poruva mwaa quara qara ntumwa tora. Tesaronaikaaqi varuhua mpo uhua Karaisiva qaiqaa tumuani entara vekya variqata kyaqa qaqla kyeta qumina varuvaro mwia kyaara Poruva mwihuara kepukyaqama kyero tiqaro, Kyaiqa varaqi viqata Iesusira vekya variate, tura. Mwihuara kyaiqa varaate timwa kyero mwaa quara qara ntumwa tora.

1 Nte Poruvama. Ntevata, Sairaasivavata, Timotivavata, tire nramwu nkye Kotiranivata, Iesusi Karaisiranivata, Tesaronaikaaqi varia nraakye qorahua nkyinima qara mwaa vara kyeta.

2 Tiri tiqova Kotivavata, tiri vunyaa vaisi Karaisivavata, nkyi kyuqema nyataivaró nkyi mwutukyaqitairo qihaakya hi varirata variata.

Karaisiva uro ntantero tumu variqaro ko qianinranra tura

3 Ni kata pakyaan tuaavo, tire nkyiara rieqata mpo enta mpo enta Kotirara kyuqeve qiarava nraahu vahihata varunanza. Nkye Karaisirara qutaave timwa kyéta mwiaqatai mwianra riemwaqi viqata kepukyaqamaqvi variarara tita, tire qioma Kotirara kyuqeve qiananra. Nanrianra nanrianra mwutukya vahiva nkyiqi mpoqavata vahirara tita, tire qioma Kotirara kyuqeve qiananra.

4 Nkye mwitaamaqita vi variarara tita, tire Kotira nraakye qora mpo hiahua utaqaa variqata nkyi nyutu tuaahere varunanza. Nkye Iesusira nraakye qora variavata mwia kyaara mpohua nkyi qorajama nyate variavata nkye nronra muaanra vareqata hia qoriri hiraitita, kepukyaqama kye Karaisirara riemwaqi vi variarara tita, tire nkyi nyutu tuaahere varuro.

5 Nkye Karaisira kyaara muaanra varaqi quara Kotiva hia taunru kyaananro. Kotiva nraakye qora qua avuqavuhi variva varihatara tita, nkye Karaisirara riemwaqi viqata nronraqama kye muaanra varaqi vivaro Kotiva nkyiara, Nkye ni nraakye qorave. Nkye ni mwatukyaqvi qioma nrivarave, qiananro. Nkye Kotira mwatukyaqvi vihuara titama, nkye mwaa entara muaanrave, nriqa vi inraikyarave, vareta.

6 Kotiva avuqavuma kyero qua rie variva. Nkyi uaqjama nyateta muaanra nkyiqa vatehua varivaro Kotiva mwihuua nkyiarivata uaqjama nyatero muaanra mwihuuaqaa vataaananro.

7-8 Nkye muaanra varaqi vi varivaro ekyara entaqaa nkyiqaataivata, tiriqaataivata, muaanra vara kyairaro vuvuatama virage variananza. Ekyara entaqaa tiri vunyaa vaisi Iesusiva nyaamwusairo nai nyaamwuyaahua kepukyanramwuvata sita varero mwihuua kyapata qovarama viro qia nronraqama kyero itaaninravata tumuananro. Mwi entara mwiva Kotirara hia rie nraakye qorahuave, Iesusi Karaisira quara qumina quave ti nraakye qorahuave, mwihuua rirero qovara hiananro.

9 Mwiva qovarama viro mwi nraakye qorahua ri ntutuhi qoqaravantio titairata nyianranri nkyiariaraa uro variqata ekyaa enta uaqjama vita variqata hiama tiri vunyaa vaisi Iesusira kepukyaqi okyara taqevara.

10 Mwi entara Iesusiva tuminranro mwia peqa okyaravanto qoqaa vahirata Iesusirara qutaave ti nraakye qorahua mwia nrutu tuaahera kyeta mwia mwahuta timwa mwatevara. Tire Iesusirara nkyi timwa nyunrata

nkye quataave qiarara tita, nkyevata mwi entara mwi nraakye qorahua kyapata varivara.

¹¹ Tire mwianra rieqatama Kotirara nkyi kyaahaqama nyataarive titama, mpo enta mpo enta mwianra aakyara nte varunaihra. Aanra kyuqeraaqaa quate tiro, Kotiva nkyi nyaanrama taira. Aanra mwiaqaa kyuqemaa kye quate tita, tire Kotirara aakyara nte varunanra. Nkye Karaisirara kepukyaqama kye riemwaqi viqata kyuqe kyaiqa nraahu vararerera uti vari-varo Kotiva nkyi kepukya nyinrata nkye qio mwi kyaiqara mwi kyaiqara vareqa variate.

¹² Nkye mwitaamaqi vivaro tiri vunyaa vaisi Iesusi Karaisira nrutuvanto viriraqaa nri viraro mwiva nkyita nrutuvata tuaaheraari. Kotivavata, tiri vunyaa vaisi Iesusi Karaisivavata, nkyi kyuqema nyatairata nkye qioma mwitaamaqi vivara.

2

Anoma kyero Kotira qua nteqa kyero qora kyaiqa uti varianikurara tura

¹ Iesusi Karaisiva tiri vunyaa vaisivanto tiri ntuvantua hirero tumuani entarara nkyi timwa nyinrenra. Nte nkyiara po,

² qati hia mpohua api qua tira riaate tuqo. Vaisi mponramwuvanto unra tiqata, Tiri vunyaa vaisivanto uro ntante tumuanri entava vaakya qovaramama viho, ti variara. Nkye aatu hiqata mwihua quara nronraqama kyeta rievora. Hia mwi entava nrintaiho. Taisairo mwi quava qovarama vihatave mwihua api qua ti variavo? Mpowanto unra tiqaro, Kotiva tihana riaurave, ti hatave mwitaa ti variavo? Mpowanto tiriara, Mwihua mwi quara mwitaa qiarave. Mwihua mwi quara qara ntumwa taarave, ti hatave mwitaa ti variavo?

³ Hiama kyaivaro vaisi mpovanto mpo qua mpo quaqtairo ekyara entara nkyi kumwaanri qari. Nraakiara mpo enta nraakye qora airivanto Kotira qoririma mwate varivaro mpovanto Kotira qua nteqa kyaari vaisikuva qovarama viro variqiro viraro mwiaqatairo Karaisiva tumuani entava qio nriananro. Ekyaa mwi inraikyava nraante qovarama viro variqiro viraro mwi entava nriananro. Mwi entava hia nri ntaaninraqaa Kotira qua nteqa kyaari vaisiva nraante qovarama viro qora inraikyavanto variqiro viro Saataaninra mwatukyqa viro raupiri hiarivama variananro.

⁴ Kyai nte mwi vaisira qora kyaiqara nkyi timwa nyianri. Mwi vaisiva nraakiara qovarama viro nraakye qoravanto mwaniqave ti inraikyara qumina inraikyave tiro nraakye qoravanto mpo inraikya nrutuuaahere inraikyara qumina inraikyave timwa kyero mwiva tiqaro, Nte mwi inraikyara mwi inraikyara nraatara kyauvave, timwa kyero uro Kotira nraamwuqi mwatakya viro variqaro nanrianra nte Kotivave qiananro.

⁵ Nkye hiaye mwi quara nraatoqi vateta? Nte haaru nkyi kyapata variqana mwi quara mwi quara nkyi timwa nyiavarama.

⁶ Qora vaisi Kotira qua nteqa kyaari vaisiva qamwanrama qovara hianky-orave tiro, mpo inraikyavanto mwia antua taira. Nte mwi inraikyara nkyi timwa nyuqata nkye mwi quara ntapihi kyaara. Kotiva mwi vaisirara qovara hiante qiani entarama Kotira qua nteqa kyaari vaisiva qovara hiananro.

⁷ Mwaa entara Kotira qua nteqa kye variahua hia qoqaa variqata uaquia hi kyaiqara uti variavo. Mwihua ugeta vi variqata uaquia hi kyaiqara uti variavaro nraakiara mwihua kyaiqa antua taariva ekyara viro mwia mwaanrainranro

⁸ mwiaqatairo qamwanrama kyero Kotira qua nteqaari vaisiva qovara hiananro. Mwi vaisiva qovarama viro qoqaa variqaro mwaauqu

kyaiqa utuqiro quananro. Mwiva mwaaqu vehi kyaiqa mwia utuqiro viraro mwiaqaatairo tiri vunyaaava, Iesusiva qovarama viro mwia peqa okyaravanto takyuqi vairaro mwiva tumu nai nroqitairo vuata kyairaro mwi vaisiva taiqa quananro.

⁹ Kyai nte mwi vaisira qora kyaiqara mpoqiatava nkyi timwa nyianri. Kotira qua nteqa kyaari vaisiva nri ntero qovarama viro variraro Saataaniva mwia kepuuya mwinranro mwiva nraakye qora unra qua timwa nyiqiro viqaro mwihuara api aanraqaa viqata nai mwianra qutaa vaisive qiate tiro, mwiva mpo kyaiqa mpo kyaiqa nronra kyaiqa hia taqe kyaiqara varaqiro quananro.

¹⁰ Mwiva mwitaamaqiro virata Saataaninra mwatuukyaqi virera hi nraakye qorahua varivaro mwiva mpo qua mpo qua unra qua mwihua timwa nyiqiro virata mwihua mwia quara qutaaevema tivara. Mwi nraakye qorahua Karaisira qutaa quara hia mwutukya vaihata variarara tita, mwia kyaara mwihua Saataaninra mwatuukyaqi vihua varivaro Kotiva hiama qio mwihua huvantu nyataanano.

¹¹ Mwia kyaara Kotiva mwihua su nyaato vara qumimaqama kyairata mwihua mwitaama variqata unra quara qutaa quave tivara.

¹² Ekyaa nraakye qoravanto Kotira qutaa quara unra quave timwa kyeta uaqia hi kyaiqarara qamwate varihuu varivaro Kotiva mwihua ko timwa nyatairata mwihua Saataaninra mwatuukyaqi vivara.

Kotiva nkyi nai kyaama torara tura

¹³ Ni kata pakyaa tuaavo, tire mpo enta mpo enta nkyiara rieqata Kotirara kyuqeve timwaqiqi virera. Tiri vunyaa vaisi Karaisira mwutukyavanto nkyiara vaihata nkye variavo. Haaru nkye hia varu entara Kotiva nkyiara nte mwihua huvantu nyatarerave timwa kyero nkyi nai kyaama torara tiro, Kotira mwanraquravanto nkyi kepuuya nyihata nkye Kotira nraakye qora variara. Karaisira qutaa quara nkye qutaaevema tivara variarara tita, nkye Kotira nraakye qora variarama.

¹⁴ Tiri vunyaa vaisivanto Iesusi Karaisiva nyaamwuni uro kepuuyaavanto variharo Kotiva nkyiaravata nronraqama vita Karaisiravata variqi quate tiro, nkyi nyaanrama taira. Nkye Kotiva nkyi nyaanrama tai quara riaate tita, tire Karaisira mwakyaayka nkyi timwa nyunanra.

¹⁵ Ni kata pakyaa tuaavo, mwi quara rieqatama nkyevata kepuuyaqama kyeta variata. Tire nkyi timwa nyuna quara mwia nraahu tuqara kyeta tutuata. Nroqitaive, qaraqitaive, nkyi timwa nyuna quara tuqara kyeta tutuata.

¹⁶⁻¹⁷ Tiri vunyaa vaisivanto Iesusi Karaisivavata, Kotiva tiri tiqovavata, tiriara mwutukya vaihata varunanra. Tiriara mpo enta mpo enta kepuuyaqama kye variqata mwiaavata uro vari entara vekya variate tiro, Kotiva tiri kyuqemba timwa taira. Kyaivaro mwiva nkyi mwutukya kepuuyaqama nyatairata nkye kepuuyaqama vi variqata kyuqe kyaiqa nraahu varaqi viqata kyuqe qua nraahu timwaqiqi viqata variata.

3

Poruva nkye tiriaravata rieqata Kotirara aakyara ntaate tura

¹ Ni kata pakyaa tuaavo, nte ekyara mpo qua nkyi timwa nyinrenra. Nkye Kotirara aakyara nte varivaro tiri vunyaa vaisi quavanto qamwanrama kyero viro nrinro hirata mpo mwatanaavanto mpo mwatanaavanto nkye qiantema kyeta mwihuavata mwi quarara qutaa qua nrirare vahi quarave qiate.

² Hia ekyaan nraakye qoravanto Karaisirara quataave ti variarara tita, nkye qaiqaavata Kotirara aakyara nte varivaro mwaaqu kyaiqave, uaquia hi kyaiqarave, vare varihuaqitairo tiri vaitutuma kyaari.

³ Tiri vunyaa vaisivanto nkyiara ekyaan enta rie varivama variro. Saataaniva nkyi tu varaankyo tiro, mwiva nkyi kepuuyaqama nyatero nkyi vaitutuma kyaananro.

⁴ Tire tetu vunyaa vaisiara rieqatama nkyiara mwutukya qihakya ihata mwitaama tita, Qioma nkye tire nkyi timwa nyuna quaravata, qaiqa timwa nyiana quaravata, riemwaqita vivarave, turo.

⁵ Tiri vunyaa vaisivanto Karaisiva nkyi kyaahaqa hirata nkye Kotiva nkyiara mwutukya vataani okyarara ntapihiata. Karaisiva nkyi kyaahaqa hirata nkyevata mwiva nai kepuuyaqama kyero variqi vintema kyeta kepuuyaqama kye variqi quata.

Haunri nkyiqitai mpo ihua qumina variqata hia kyaiqa varevorave, tura

⁶ Ni kata pakyaan tuaavo, tiri vunyaa vaisi Iesusi Karaisira nrutu nteqatama tire mwaa quara kepuuyaqama kye nkyiara mwitaama tita, Nkye taqaivarao nkyi sata sakyyaa mpovanto hia kyaiqa vararaitiro, mwiva tire nkyiara mwataama kye kyaiqa varaaate tiqata nkyi timwa nyuna quara hia riaraitiro, qumina variqiro virera, nkye mwi vaisira vitiqama taqaata.

⁷ Nkye ntapihi kyaara. Tire hurante hiataara vahata nkye hininramwvanto uaquia hi variavo. Tire nkyivata variqata hia qumina variavanana.

⁸ Tire nkyivata variqata hia nkyi kyara qumina vararaitita, munima kyeqata varavanana. Tire nkyi muaanra nyianro tita, entaqivata iheravata toqaamwu tu kyeta kyaiqa varaqi viqata munima vara kyeta mwiaqo kyara nramwaqita quavanana.

⁹ Mwi entara tire nkyiqitai kyara nyaanruma kye nraanrava qio vahuvatavata tire hia mwitaa hiavanana. Nkye tiri kyaiqa taqeqlata tiri vataaqi viqata tire hurante hiate tita, hia nkyiara kyararave, mwitaa inraikyarave, nyaanru qiaavanana.

¹⁰ Tire nkyivata variqata nkyi qua mwaanra timwa nyiqata mwitaa qiaavanana. Hia kyaiqa varataa hiarai vaisiva hia kyara nraanrive, qiaavanana.

¹¹ Tire riaurata nkyiqitai vaisi mpo hiahua hia kyaiqa vararaitita, mwihua qumina variqata mpohua kyaiqara nraahu airi qua tiqata qumina variara.

¹² Tiri vunyaa vaisi Iesusi Karaisira nrutuqaa tire qua vateqama mwi vaisihuara kepuuyaqama kye tiqata, Hia qumina aanra nrohiraitita, mwata sata tirema kye variqata kyaiqa vara kyeqata kyara nramwaqi quate, turo.

¹³ Qio ni kata pakyaan tuaavo, hia qoririma kyeqa kyuqe kyaiqa varaqi quata.

¹⁴ Tire mwaaqi qara ntumwa tauna quarara mpovanto qumina quave qiankyora. Mpovanto mwaa quara hia riarerave tirata nkye mwi vaisira ntapihi kye taqeta mwia vitiqama taqeta nraahumwa sata varivaro mwi vaisiva kyauruari.

¹⁵ Hia mwi vaisira nramwutaaqa hiraitita, nkye mwianra qata vakyaave tiqatama mwaateraqama kye mwianra ena quana aanranra mwia qaqira kyaante qiata.

Ekyara qua tura

¹⁶ Tiri vunyaa vaisivanto mwutukya qihakya nyate varivama variro. Mwiva nkyi kyaahaqa hirata nkye mpo kyaiqa mpo kyaiqa varaqi vivaro nkyi mwutukyavanto qihakya hi varirata variqi quata. Tiri vunyaa vaisivanto nkyivata variqiro virata nkye variqi quata.

¹⁷ Qio nkyi qua mwantarera nte ntena kyauquqo ntena nutu qara ntumwa tauquo: NTE PORUVAVE. Nte ntena nutu qara ntumwa taura taqequatama nkye qutaama Poruva tirini qara ntumwa tairave tivara.

¹⁸ Tiri vunyaa vaisivanto Iesusi Karaisiva nkyi kyuqemaqiro virata variqi quatema, tuquo.

1 TIMOTI

Poruva Timotirani toharenaa qara vara kyora

Iesusira qati vara sivuma kyovaro nyaamwuni uro varuvaro 35 ihive nritarovaro Poruva qaiqaa karavuqi variqaro mwaa quara qara ntumwa tora. Timotira qova Kirikinyaava varuvaro mwia nrova Jutaa nraakyevanto varuvaro Timotiva Porura mwakyaakya riero Karaisira quara quataave timwa kyero Porura vataqiro viqaro mwia kyaahaqamaqiro vi varura. Timotirara mwiva kyuqema kyero Karaisira qua nraakyte qora timwa nyiqiro viqaro unra qua mwaanra hia riaraitiro variqiro quarive tiro, Poruva Timotirani mwaa quara qara ntumwa tora.

¹ Nte Poruvama. Kotiva nyaamwuni tiri huvantu timwa taarivavata, Iesusi Karaisiva tire mwia vekya varuravavata, mwitanahua qiavana nte nronraqama vina Karaisira qua nraakyte qora timwa nyi varuvama varina.

² Nte i Timotiranima mwaa quara qara ntumwa tena. E Iesusi Karaisirara quataave qiananranra tina, nte iara ni maaque titi hurama. Tiri tiqova Kotivavata, tiri vunyaa vaisi Iesusi Karaisivavata, i kyuqema mwateta iara po timwa mwate varivaro i mwutukyavanto qilhaakya hi varirara variante.

Unra qua mwaanra timwa nyi varu vaisihuara tura

³ Timotio, nte Masentoniaani virera hiqanama nte kepukyaqama kyena iara tiqana, Epesaasini variante, tura. Qaiqaavata qio iara mwini nraahu variantema, tuqo. Vaisi mponramwuvanto mwini variahua unra qua mwaanra nraahu nraakyte qora timwa nyi variahua e mwihuara qao tira hia mwitaa qiate qianta.

⁴ Mwihua uri qua nraahu timwaqi viqata nkyiari haivaqahua nyaaquhua okyarara nraahu riemwaqi viqata mwiaqatai inronra qua nraahu qovara hi variara. E uro mwihuara hia mwitaa qiate qianta. Mwi quava hiama qio vaisi mpo kyaahaqa hiraro mwiva Kotira kyaiqa taqaananro. Vaisivanto Iesusi Karaisirara kepukyaqama kyero riemwaqiro viqaroma Karaisira kyaiqa qio taqaananro.

⁵ Nraakyte qora su nyaato mwutukyavanto kyuqema viro vahirata variqata hia taara nraato tiraitita, Karaisirara quataaqama kye riemwaqi viqata nanrianra nanrianra mwutukya vahirata variate tita, tire Karaisira qua nraahu timwa nyi varunana.

⁶ Mpo hia vaisihua mwi aanranraqaa nraahu quataara vaihata mwihuua apiqama kye nrohi variqata api qua nraahu ti variara.

⁷ Mwihua tiqata, Kyai tire Mosesira mwaanra qua nraakyte qora timwa nyianre, timwa kyeta mwihuua mwaanra qua okyara ntapihiahua votima kye variqata mwi quara okyararavata, mwihuua nkyiari qiararavata, hia ntapihi kyaahua variara.

⁸ Tire ntapihi kyauraro Kotiva Mosesira mwu quava vahiraro vaisivanto mwi quara ntapihi kyero riero vataqiro quariva hiama Kotira qua nteqa kyaananro.

⁹ Tire ntapihi kyauraro Kotiva hia mwia qua rie varia nraakyte qorahuara rieqaro mwi quara vatairavauma. Mwia qua nteqa kyeqata uaqia hi kyaiqara uti varia vaisihuani mwi quara Mosesira mwunrama.

Nraakyte qoravanto hia Kotirara rie variahuave, mwaaku kyaiqa vare variahuave, Kotira qua qaqira kyeta mwatanyaa okyarara rie variahuave, nkyiari nyohua sohua ru kye variahuave, mpohua ru kye variahuave,

10 nraakye qora api qareqata uaqia hi kyaiqara uti variahuate, hena vaisive hena nraakyevata qora kyaiqa utuahuave, vaisive nraaqiarave mpuara uthuave, unra qua ti varihuave, unra quaravata nkyiari kyauqu nriqiqaa vate varihuave, qutaa qua mwoqa mwita mpo kyaiqa mpo kyaiqa api kyaiqa varaqi vi variahuate, mwihuara rieqaro Kotiva nai qua mwaanra qovarama kyero Mosesira mwunra.

11 Qutaa qua vahirero Karaisira quama vahiro. Kotiva nraakye qora kyuqema nyate variva, mwiva ni nrönraqama kyero mwi quara kyuqe hi quara nraakye qora timwa nyante tihana ti varurama.

Kotiva Porurara po tiro kyuqema mwatorara tura

12 Iesusi Karaisiva tiri vunyaa vaisivanto ni kepukyu mpiro nianra mwiva qioma ni qua timwa nyiqiro quananrove timwa kyero ni nronraqama kyaihana nte mwia kyaiqa varaurara tina, nte mwianra kyuqemave ti varuquo.

13 Qutaa nte haaru Karaisirara uaqia hi quara timwa kyeqana mwia nraaqiara mwihua uaqiamaqi viqana mwihua ntuqutuavara. Nte mwitaamaiqa viqana mwi entara Karaisira okyara hia ntapihiraitina mwitaa hiavararā tiro, Kotiva nianra po tiro kyuqema mataihana nte Karaisirara qutaa mwivave tura.

14 Tiri vunyaa vaisi Iesusi Karaisiva qutaaqama kyero kyuqema mataihana mwiaqataai nte mwiaavata kuaaqi variqana mwianra kepukyaqama kye riemwaqi viqana nte mwianra mwutukya vailhana varura.

15 Mwaa quarara nraakye qoravanto qutaa quave timwa kyeqata qioma riemwaqi vivara. Mwaa quava mwitaamama vahiro:
Mwiva uaqia hi kyaiqara uti varia nraakye qorahua
kyahaqa hiraro Kotiva mwihua sitaarieve tiro,
Iesusi Karaisiva mwatanu tumunra. Qikye, uaqia hia nraakye qorahua
variavana mwihua utaqitaina nte anomia kye uaqia hiava vaisiva
variavara.

16 Nte uaqia hia nraakye qorahua mwihua suni uaqia hu vaisiva varugaro Iesusi Karaisiva nraakye qorara nte mwihua qihakayama nyataani' okyarara ntapihi kye taqaate tiro, mwiva nianra nraante po timwa mataira. Iesusi Karaisiva nte qora hu vaisira nianra nraante po timwa matairara riaivar nraakye qora su nyaatovanto ntapihirata tiqata, Qikye, Karaisiva Porurara po timwa mwataintema kyero mwiva tiriavarata po timwa timwa tairaqe ekyaa enta qati variqi quare. Kyai Karaisirara qutaave qiare, tivara.

17 Kotiva ekyaa enta qati variqiro vi variva, mwiva hia qutuariva variva, mwia hia vuqo taqaava variva, mwiva kuaava nraahu mwanriqavanto varira. Mwiva mwitaama varirara tita, nrivaqe ekyaa enta variqata mwia qamwata mwateqata mwia nrutu nraahu tuaaheraqi quara. Qutaaave.

18 Ni maaqu Timotio, haaru vaisi mponramwuvanto i timwa mwiqata Kotiva iara mwitaama tiho tu quarara rieqanama nte mwaa quaravata i timwa mwina. E Kotira aanraaqaa viqarama uaqia hi kyaiqara uti varihua i nraatara kyevorave tiqara kyuqema kyero ntaqi vari vaisira nraantantamwa kyera variqira viqara uaqia hi kyaiqara nraataraqira quantema tina.

19 Aanra mwiaqaa viqara Karaisirara kepukyaqama kyera riemwaqira viqara kyuqe kyaiqa nraahu vare variraro hia i toqaamwu ruari. Mpo hia vaisihua kyuqe aanra qaqlira kyeta uaqia hi kyaiqara utiqata kyaurirara hia nronraqama kyeta rieta, mwia kyaara mwihua Karaisirara riemwaqi quava uaqiamma viro.

20 Haimeniaasivavata Arekisantaavavata mwitanahua mwitaama kye kyuqe aanra qaqlira kyeta qora aanraaqaa quara. Nte mwitanahuara

gao timwa tena hia Kotirara qora qua qiate timwa kyena mwitanahuara Saataaniva nkyitanaqaa ntaqikyiqiro quananrove tura.

2

Poruva Timotirara nkye ntuvantuama vita variqata mwataama kye Kotira nrutu tuaaheraate tura

¹ Nte iara kepukyaqama kye tiqana vuni i mwitaama kye timwa mwintrenra. Nkye ntuvantuama vita variqata mwataama kye Kotirara aakyara qjata: Mwiva nkyi kyaahaqa hiarive titama mwianra aakyara qjata. Mwiva mpohuavata kyaahaqa hiarive tita aakyara qjata. Mwianra aakyara tiqata kyuqeve timwaqj quata. Nkye Kotirara aakyara nteqata ekyaa nraakye qorara rieqata Kotirara aakyara qjata.

² Vunyaa vaisive, kamaninranrave, ekyaa nronraqama vita vari vaisihuave, mwihuaravata rieqata nkye Kotirara aakyara tivaro Kotiva mwihua kyaahaqa hiari. Nkye mwitaamaqi vigata Kotirara aakyara nte varivaro Kotiva mwihua kyaahaqa hirata mwihua tiriqaa kyuqema kye ntaqikyi varivaqe mwiaqaatai tire qio variararo tiri mwutukyavanto qihakya hirage tire tirema variqi viqata Kotira kyaiqa vareqata aanra kyuqeraqaa quananra.

³ Nkye mwitaama kyeta Kotirara aakyara nteqata kyuqe kyaiqa vare varivaro Kotiva tiri huvantu timwa taariva nkyi qamwata nyataananro.

⁴ Kotiva ekyaa nraakye qorara uaquia hi aanranra qaqlira kyeta qutaa qua okyara ntapihi kye riemwaqi quate tiro, mwiva mwihua huvantu nyataarivama variro.

⁵ Kotiva mwanriqa kuaiqavanto nraahuma variro. Kotiva variharo vaisi kuaiqavanto tavaaraqaanaa vaisivanto variqaro Kotiravata mwatani variahuvata vara kuaaqi vataarivama variro. Mwiva Iesusi Karaisiva vaisivantoma variro.

⁶ Mwiva ekyaa nraakye qora mwihua huvantu vita qatinani variate tiro, qutu vurama. Mwiva Kotiva timwa to entaraqaa qutu viro Kotiva nraakye qora huvantu nyataani okyarara qovarama kyora.

⁷ Mwi mwakyaakyara nraakye qora timwa nyianti tiro, ni nronraqama kyero titaihana nte ekyaa mpo mwatanaahua hia Iutaa mwatanaahua mwi mwakyaakyarara qutaae timwa kyeta riemwaqi quate tina, mwihua timwa nyiqina vi varura. Hia nte unra quavauma ti varuqo. Nte qutaa quama ti varuqo.

⁸ Mwianra rieqanama ni kyakya hiva mwitaamama vahiro: Mpo mwatukya mpo mwatukyiqi vari nraakye qorahua Kotirara aakyara nteqata variate tura. Mwihua hia raraqa tairata variqata hia inronra hiraitita, Kotira kyaiqa nraahu vararerata nkyiari kyauqu tuaahereqa Kotirara aakyara ntamwaqi vivaravema tina.

Poruva nraakye mwunruqa qutaa mwunruqanra tura

⁹ Nte nraakyera tirerama. Nraakyevanto nai mwamwantaga kyuqema kyero ntumwaqu tero naitarama kyero tuavaaqa utuari. Hia mpo qara mpo qarama kyero qjata mwunruqa hiari. Hia ori inraikyago inranra kyaatamwa ututaara nronra munima vahira vara kyero ututaari. Hia nronra munima vahiani tuavaaqa utuari.

¹⁰ Nraakyevanto nte Kotira aanraqaa vi varuvave tirera, mwiva hia nai kyuqe kyaagema kyero mwunruqa hianinranra nronraqama kyero riari. Mwiva Kotira aanraqaa viqaro kyuqe kyaiqa varaqiro quariva, mwi inraikyava mwia mwunruqa qutaa mwunruqa vahiali.

11 Nkye ntuvantuama vita varivaro vaisivanto Kotira qua mwaanra tiraro nraakyevant hia qua tiraitiro, qati variqaro vaisi qua nraahuma riemwaqiro quari.

12 Nraakye qoravanto varivaro hiama nraakyevanto vintantero Kotira qua mwaanra timwa nyiari. Hia nraakyevanto nronraqama viro vaisiqa ntaqikyiar. Nte mwianra qaoma tina. Nraakyevanto tirema variari.

13 Kotiva Ataamunra nraante ututero mwia nraakiara Ipira utu tora.

14 Hia Ataamuva Saataaninra quara qutaa quave tuvaro nraakye mwiva Saataaninra qua riero qutaave timwa kyero Kotira qua nteqa kyora. Mwitaa hurarā tinama, nte nraakyera mwitaa tina.

15 Qio nraakyevanto Jesusirara riemwaqiro viqaro mpohuara mwutukya vahiraro Kotira kyaiqa varaqiro viro hia nai nrutu tuaheraraitiro, variro nraaqiara mwataqiro vi variraro Kotiva mwia huvantu mwataananro.

3

Kotira nraakye qoraqaa ntaqikyi vaisihuara tura

1 Mwaa quarara nraakye qora qutaa quave tiqata qioma riemwaqi vivara. Mwitaamama mwaa quava vahiro:
Jesusira nraakye qoraqaa ntaqikyirera hiari vaisiva
kyuqe kyaiqa vararerai hiarivama varianano.

2 E mwi quara rieqara mwaa quara vataqi viqara vaisi mpo nronraqama kyaanta. Jesusira nraakye qoraqaa ntaqikyi variari vaisiva avuqavuma kyero nrohiari vaisiva variari. Nraakye kuaiqia varataariva variari. Hia nramanri nrenro uera ntaari vaisiva variari. Mwiva naiqaa kyugema kyero ntaqikyiariva variari. Nraakye qoravanto mwi vaisirara kyuqe vaisive tiva variari. Mwiva kyugema kyero nyianranyaahua sita kyero nraamwuqi vateqaro kyara nyi variariya variari. Mwi vaisiva Kotira kyaiqa okyara nraakye qora qioqama kye nyaamwute variari vaisiva variari.

3 Mwi vaisiva hiama uaini nrenro uera ntaari vaisiva variari. Mwiva hia qamwanrama kyero raraqa tairaro nraakye qora ntutuariva variari. Mwi vaisira vikyokyavanto qihakya hiraro nraakye qora qihakyma kyero kyaahaqa hiari vaisiva variari. Mwi vaisiva hia munimanra nronraqama kyero mwutukya ntuari vaisiva variari.

4 Mwiva nai nrakesi nraaqiaraqavata kyugema kyero ntaqikyiariva variari. Mwia nraamwunra mwaaquvanto mwi vaisira qua kyugema kye rie vari vaisiva variari.

5 Vaisivanto nai nrakesi nraaqiaraqaa hia kyugema kyero ntaqikyiariva nataama kyeroje Jesusira nraakye qoraqavata ntaqikyianano?

6 Hia mateqa nrumu Jesusira nraaqiaraqama quariva Jesusira nraakye qoraqaa ntaqikyiqiro quari. Haunri mwiva nronraqama viro nte nronravanto varuqo qiankyora. Mwiva mwitaamaqiro viraro Kotiva Saataaninraqaa qua vatontema kyero mwiaqavata qua vataankyora.

7 Mwi vaisiva kyuqe vaisi varirata ekyaa qumina nraakye qoravata mwianra kyuqe vaisive tivara. Mwiva hia mwitaama variari vaisiva variata, qumina nraakye qoravanto mwianra uaqia hi vaisirave tivaro mwia kyaara Saataaniva mwi vaisira raaquta kyairaro uaqia hi aanranraqaa quanano.

Jesusira nraakye qoraqai kyaiqa vare vaisihuara tura

8 Jesusira nraakye qoraqaa ntaqikyiariva kyuqe vaisivanto varirata mwia votima kyeta mwia nraakiara nronraqama vita mwia kyaahaqa hi varihua kyuqe vaisi nraahu varivara. E mwi vaisihua nronraqama kyarerai hiqara

mwaa quara vataqira quante: Mwihua avuqavu nrohiqata nkyiari qua vataqi viqata qutaa qua nraahu tihua variata. Mwihua hia uaini airi nre visihua variata. Hia munimanra mpoqama kyero mwutukya ntuarihu variata.

⁹ Mwihua Karaisira qua tirera hivar hia mpo qua apiqama kye quava mwihua nyu muaanra ntairata mwihua vutu kye Kotiva qovara hiani quara timwa nyiqita quata.

¹⁰ E qakyo mwihua nronraqama kyarera hira mwihua nraante mwataarama kyera taqaante. E mwihua kyaiqa mwataara hiqara taqairata mwihua mwi kyaiqara kyuqema kye varaver, e mwihua nronraqama kyarata mwihua Jesusira nraaky qoraqi kyaiqa varaqi quata.

¹¹ Mwihua nyaatamwanravata kyuqe nraakte nraahuma varivara. Mwihua nyaatamwanravanto hia mpohua mwaanra tiraitita, mwihua su nyaato kyuqema vahirata variqi viqata ekyaa kyaiqa quataaqama kye varaqita quata.

¹² Vunyaa vaisi mwia mwemwani nronraqama viro variariva, mwivavata nraakte kuaiqia vataavama variari. Mwi vaisiva kyuqema kyero nai nraaqiaraqaavata mwia nraamwuqi varihuaqaavata ntaqikyiariavama variari.

¹³ Nronraqama vita Jesusira nraakte qoraqi kyuqema kye kyaiqa varaqi vivera, mwihuara kyuqe vaisive tivata mwihua qua rientemwa kye variqata qiomia nkyiari Karaisira aanraqaa virara timwa nyiqi vivara.

Kotira qua nronraqama kyero vahi quarama

¹⁴⁻¹⁵ Nte pataqia vari kyena uro i taqaaminranra rieqanama varuqo. Mpo inraikyavanto antua kyairage hia vaakya uro i taqaaninrave tinama qara mwaa ini vara kyena. Nataama kyetave Kotira nraakte qora variqita vivarave? E mwi quara okyara ntapihiante tinama, nte ini qara mwaa ntumwa tena.

Kotira nraakte qora varirerata mwihua mwia nraamwuqi variahua votima kyetama varita. Kotiva qati variqiro vi variva varihata mwihua Kotiva nyaanrama tahuama varita. Mwihua Kotiva nyaanrama tahuua variqata kyatari kepukyaqama kye rataara votima kye kepukyaqama kyeqata Kotira quataa quaqaa ntaqikyiqi vi variara.

¹⁶ Qikye, Kotiva nai qua qovarama kyai quava nronraqama kyero vahi quavama vahiro. Mwafaamama vahiro:

Karaisiva vaisi mwamwanta varero

mwatani qovarama vuvaro

Kotira mwanraquravanto mwia quataa okyara

govarama kyovata nyaamwunyaahua mwia taqora.

Karaisira qua mpo mwatanaa mpo mwatanaa

timwa nyiqi vuvata mwihua mwianra quataave tura.

Mwihua quataave tuvaro

nraakiara Kotiva mwia vitovaro nyaamwuni vura.

Kotiva nronra qua qovarama kyaiva mwitaamama vahiro.

4

Poruva unra qua mwaanra tu vaisihuara tura

¹ Kotira mwanraquravanto mwaa quara ntapihi kyero mwitaama tiro, Nraakiara mpo hi vaisihua Karaisirara ti quara qaqlira kyeta tovevaanavanto unra qiani quara nraahu riemwaqi viqata Saataaniva timwa taani quara nraahu riemwaqita vivarave, tira.

² Mwi vaisihua mwaa entara qovarama vita mwihua qutaa qua ti varihua nraantantamwa kyeta unra qua timwaqi vi variqata kyauruataara vahata hia kyauriraitita, Saataaniva uti vari kyaiqara nraahu uti variara.

³ Mwihua mwaanra qua timwaqi viqata nraakye qorara hia nraata vaati varaaete tita, mwi kyarara mwi kyarara hia nranraitita qati variqi quate, ti variarave. Mwihua mwitaa qiavarao Kotira quavanto hia mwitaa tira.

Tiriara mwihua ekyaa mwi kyarara mwi kyarara nraate tiro, Kotiva mpo kyara mpo kyara utu taira. Mwianra rieqatama tire Karaisirara qutaave timwa kye Kotira qutaa qua riemwaqi viqata tire qioma mpo kyara mpo kyarara Kotirara kyuqeve timwa kyeta nramwaqi quananra.

⁴ Ekyaa Kotiva ututai inraikyava kyuqe inraikyama vahiro. Tire hia mpo kyarara qao tiraitita, ekyaa kyarara kyuqeve timwa kyeqata qioma nramwaqi quananra.

⁵ Kotiva tiharo kyaravanto qovarama virara tita, tire Kotirara kyuqeve timwa kyeta tire ekyaa kyarara kyuquerave nraahu timwa kyeqata nraanana.

Timotirara e kyuqema kyera Iesusi Karaisira kyaiqa varaqira quante tura

⁶ E mwi quara mwi quara Iesusira nraakye qora timwa nyiqira viqarama e kyuqema kyera Iesusi Karaisira kyaiqa varaqira vinanra. E mwitaa-maqira viqara e qutaa mwaanra qua riemwaqira vi variravara tiro, mwi quava i kyara votima kyero vahirara e kyuqema kyera Kotira aanraqaa vinanra.

⁷ Mpo qua uri qua apiqama kyeqaa mwaniqanra ti varia quara kyon-tavanto mwi quara ti variara. E ekyaa mwi quara mwoqa mwiante. E variqara Kotira aanra kyuqeraqaa nraahu qutaa hirara variqira quante.

⁸ Vaisivanto nai mwamwanta huvantu vaantu hiarive tiro, kyuqu kyaqu ntatuteqaro mpo qara mpo qara hiariva, mwiva mwaa entara nraahuma mwia kyaahaqa hiananro. Vaisi mwaniqaravanto huvantu vaantu hiro kepukyaqama quarive tira, e Kotira aanraqaa mpo enta mpo enta kepukyaqama kyera viraro i vu nraato mwutukyajitairo qio vahirara e mwaa entaravata nraakiara nyaamwuni varina entaravata qioma variqira vinanra.

⁹ Mwi quarara nraakye qoravanto qutaa quave quave timwa kyeta qioma riemwaqita vivara.

¹⁰ Tire tiqata, Mwanriqvavanto qati variqiro viva, Kotiva, mwiva tiri kyaahaqa hiariva variho, ti varunananranra tita, tire kyuqema kye Kotira aanraqaa virera uti variqata tire toqaamwu tiqata Kotira kyaiqa varaqi vi varunananra. Kotiva ekyaa nraakye qora huvantu nyataariva variva, mwiva Iesusirara qutaa mwivave ti nraakye qorahua huvantu nyate variro.

¹¹ Mwaa quara timwa mwunra e nraakye qora timwa nyiqanra mwi quara riemwaqita quate quante.

¹² Mpo ihua iara tiqata, Taqaate, mwiva qaraakya vaisima variho. Hia mwia qua riarerave, tihua, haunri mwihua iara mwitaa tivora. Iesusira nraakye qoravanto iara kyuqe vaiseve qiate tira, e kyuqe qua nraahu timwaqira viqara kyuqema kyera nrohiante. Mpoohuara mwutukyajitairo vahirara variqira quante. Kotirara kepukyaqama kyera riemwaqira quante. Api nrohinha okyarara mwoqa tu kyera variqira quante. E mwitaamaqira virata nraakye qora e nrohinanra taqeqata mwihuavata qioma mwitaama kye nrohivar.

¹³ E ni pekya variqarama mwaa kyaiqara varaqira quante. Nraakye qora ntuvaaantuama kyera mwihua suqaa sivira Kotira mpukuqitaira qua kyaara ntumwa kyera timwa nyiqinra quante. Mwitaamaqira viqara mwihuara

mwi quara riemwaqita quate tira, mwi quara okyara ntapihi kyera mwihuua timwa nyiqanra variante.

¹⁴ Haaru Kotira vaisi nronranramwuvanto nkyiari kyauqu iqaa vateqata Kotira qua mpo i qovarama kye mwuvara e mwiaqataira Kotira kepukya mpo kepukya varonanra. Kotiva mwi kepukyara mwinra e hia mwianra taunru kyaraitira, mwianra riemwaqira quante.

¹⁵ Ekyaa mwi inraikyarara tura mwi kyaiqaraqaa variqara qutaaqama kyera varaqira virata ekyaa nraakye qora i kyaiqa taqegetama kyuqe kyaiqave qiata.

¹⁶ E aanra kyuqeraqaa viqarama kyuqe qua nraahu timwa nyiqi virerave timwa kyera kyuqema kyera enaqa ntaqikyiqira quante. E mwitaamaqira viraro Kotiva inavata, i qua riehuavata, huvantu nyataaananro.

5

Mwataama kyera Jesusira nraakye qoraaqaa ntaqikyiqira quante tura

¹ E taqairaro Jesusira nraaqiara nronra tuaari vaisiva mpovanto hia aanra kyūqeraqaa virera, hia mwia mpoqama kyera inronra hiante. Ena qorara qihakyama kyera qiarantema kyera tiraro aanra kyuqeraqaa quari. Qaraakya vaisiara ena qata vakyaara tinantema kyera mwihuuaravata qianta.

² Kyontara ena nronranra tinantema kyera mwihuuaravata qianta. Qaraakya nraakyera ena nrnra nrakyara tinantema kyerama mwihuuaravata tiqarama kyotataqama kyeqara variqira quante.

³ Taqairaro tetoka nraakyevanto nanrianraa varirata qio qutaa hia mpohua mwiaqaa ntaqikyivera, mwiaqaa kyuqema kyera ntaqikyiyante.

⁴ Tetoqa nraakyevanto varirata mwia nraaqiaravantove, mwia nraisivantove varivera, mwihua qiomaa mwiaqaa ntaqikyivara. Mwihua nyohua sohua, nyaaquhua saatohua, haaru mwihuuaqaa ntaqikyurara rieqata mwihuuaqaa ntaqikyiqita quata. Mwihua mwitaa hiqatama Kotira kyaiqa vare varivara Kotiva mwihuara qamwataaanro.

⁵ Tetoqa nraakyevanto nanrianraa variqaro Kotirara nronraqama kyero riemwaqiro viqaro mpo enta mpo enta Kotirara aakyara nteqaro mwianra ni kyaahaqa hiarive qiani nraakyera, mwiaqaa kyuqema kye ntaqikyiqi quate qianta.

⁶ Tetoqa nraakye mpovanto nanrianra nraahu qamwataani nraakyera hia kyaahaqa hiate qianta. Mwi nraakyeva qutu quahua nraantantamwa kyeroma variro.

⁷ E mwaa quara Kotira nraakye qora timwa nyinrata mwihuuaqaa hia qua vahirata kyuqema kye variqi quata.

⁸ Vaisi mpovanto hia nai nrähesi nraaqiaraqaaave mwiavata varihuaqaa kyuqema kye ntaqikyirera, mwi vaisiva Karaisira quara qumina quave timwa kyero nteqama kyero. Mwi vaisiva hia Kotira qua riaa vaisihuavata nraatara kyero qora vaisivantomaa variananro.

⁹ E tetoka nraakye kyaahaqa hiqara mwia nrutu vatarera hira taqairaro nraakye mpovanto qoraisi kuaicqia nraahu varataariva variqaro kyontaqama viro 60 ihi varaariva varirera, mwia nrutu nraahu vataate qianta.

¹⁰ Mwi nraakyerara kyuqe kyaiqa vare vari nraakyerave ti vari nraakyeva nraahuma variari. Mwi nraakyeva kyuqema kyero nai nraaqiaraqaa ntaqikyiqi vihata mwihua nronra tueta varia nraakyevama variari. Mwi nraakyeva kyuqema kyero nyianranyaahua sitaqiro nai nraamwuqi kyero kyara nyi variari nraakyevama variari. Mwi nraakyeva Kotira nraakye qoranii hia mpohua varaataa hi kyaiqara vara nyataarivama

variari. Mwiva uaqiamma vita vari nraakye qorahua kyaahaqa hiari nraakyevama variari. Mwiva kyuqe kyaiqa, mpo kyaiqa mpo kyaiqa vare variari nraakyeva nraahuma variari. Mwitaa hiani nraakyera nrutu nraahu vataate qianta.

11 Tetoqa nraakyevanto kyontaqama viro 60 ihi vara kyaaninra mwia nrutu nraahu vateta tetoqa nraakye qaraakyara nrutu hia vataate qianta. Mwi nraakyeva Karaisira kyaiqa vareqa taqero vaati varaataa hiraro qaqlira kyaaninranravata hia mwia nrutu vataate qianta.

12 Mwi nraakyeva tauraa nai kyauqu nriqiqaa vateqaro qiani quara qaqlira kyero Karaisira kyaiqavata qaqlira kyero mwia kyaara qua varaaankyora.

13 Tetoqa nraakye qaraakyavanto hia qumina variqaro mpo nraamwu mpo nraamwuqi vera nteqaro airi qua timwaqiro nrohiari. Mwitaa hia nraakyehua nrohiqata mpohua mwaanra titi, hia qiataa qua viti timwa nyi viri timwa nyita, qua raapu vareqata mpo nraamwu mpo nraamwu nrohi variara.

14 Tetoqa nraakye qaraakyava mwitaa hiankyorave tina, nte mwianra tiqana, E qaiqaa vaati varera nraaqiara mwata kyera mwiaqaa ntaqikyiqira quantema, tina. Mwi nraakyeva mwitaa hirera, tiri nramwutaaqa hi varihua hiama qio mwi nraakyerara rieqata tiriqaa qua vatevara.

15 Nte taqauqata tetoqa nraakye mpo hiahua kyuqe aanra qaqlira kyeta Saataaninra kyaiqa nraahu vare variara.

16 Nraakye mpovanto Jesusira nraaqiaravanto variqaro taqairaro mwia kuua nraanre mpovanto tetoqa nraakye varirera, mwivama mwiaqaa ntaqikyiqiro quari. Mwiva mwiaqaa ntaqikyiqiro virata Jesusira nraaqiara hini mwihua tetoqa nraakye mpooqiani nkyiariaraa varihuaqaa ntaqikyi-ata.

Nronra vaisinramwu Kotira kyaiqa varaahuaqa kyuqema kye ntaqikyiate tura

17 Nronra vaisinramwu kyuqema kye Jesusira nraakye qoraqaa ntaqikyihuara tirera. Mwihua kyaiqavanto kyuqema kyero vahirara tira, e Jesusira nraakye qora timwa nyinrata mwihua kyuqema nyateqata uqinra kye kyoqaa nyiate. Vaisinramwu kyuqema kyeqa nraakye qora timwa nyiqi viqata mwaanra qua okyara timwa nyiqi vi varia vaisihua, nte mwi vaisihuarama tuqo. E mwihua uqinra kye kyoqaa nyiate qiantema tina.

18 Kotira mpukuqi mwitaama tiro:

Uti uru ntatatumwu hiarive tira, purimakau vita
vatairaro uti mwivau ntamwaqiro nrohianinra nrona
hia rupaante.

Mwia nrona hia rupairaro purimakauvanto
mwi kyaiqara vareqaro qiomaa mwi kyarara
mpooqiani nraananrove, turama. (Lo 25:4)

Kotira mpukuqi mpo quavata vahiva mwitaama tiro:

Mporani kyaiqa varaariva hia eqaan'anrove,
mwiva nai kyoqaa varaan'anrove, tura. (Matiu 10:10) Mwi quara rieqarama
e Jesusira nraakye qora timwa nyinrata mwihua nkyiari nronra vaisi
uqinra kyeqa kyoqaa nyiate.

19 Nronra vaisivanto Jesusira nraakye qoraqaa ntaqikyiVariariva vari-
raro vaisi kuaiqiyavanto mwiaqaa qua vatarera uti varirara hia mwi vaisira
qua riaante. Vaisi taaratanave, taarampotanavantove, mwiaqaa qua
vataivera, mwi quara rieqara avuqavu hiante.

20 E taqairata nronra vaisinramwu qutaaqama kye qora kyaiqa utu
kyaivera, e mwihua sita varera uro nraakye qora suqaa variqara mwihua

tiqara avuqavu hiante. E mwitaa hirata hini nraakye qora mwihua taqeta trevata mwitaa hiarorave tiqatama aatu hiate.

²¹ Timotio, nte Kotira vuqaavata, Iesusira vuqaavata nyaamwunyaahua suqaavata, variqanama nte iara kepukyaqama kyena tiqanama: Nte i timwa mwu quāra mwaa nraakye qora timwa nyiqi víqara hia vaisi mpora ntēna nramwunaave timwa kyera mwiavata qihakyama kye qua tira, mpo mwatanaahuavata kepukyaqama kyera qua qianta. E ena nramwunaahuaravata mpo nramwunaahuaravata kuaa qarama kyera qua qianta.

²² Hia paparuqama kyera ena kyauqu vaisiqaa vateqara mwia nron-raqama kyairaro Kotira kyaiqa varaari. E mwitaa hiraro mwi vaisiva hia kyuqema kyero Kotira kyaiqa varairaro igaavata qua vahiankyora. Mpohua qora kyaiqvanto ivata tu varaankyo tira, e kyuqe kyaiqa nraahu varaqira quante.

²³ Hia qumina nramanri nraahu nramwaqira quante. Airi enta i nriqa virara tira, e uaini pataqiani nranra hiraro i víkyokyavanto qio vahiasi.

²⁴ Mpo hia vaisihua qoqaa variqata qora kyaiqa uti variavaro qamwan-rama kyero mwihuaqaa ko vahira. Mpo hia vaisihua uqeta variqata qora kyaiqa uti variavaro mwihua qora kyaiqa mwiva nraakiarama qovara hiananro.

²⁵ Mwia votima kyero nraakye qoravanto kyuqe kyaiqa vare variava qoqama vahiro. Uqeta variqaro kyuqe kyaiqa vare variariva variraro mwia kyuqe kyaiqvanto nraakiara qoqama vahiananro.

6

Rupatovata variqata mpohuaqaa qumina kyaiqa varo nraakye qorahuarta

¹ Nte nkyi rupa taavata mpohuani kyaiqa vareqata hia kyoqaa varaa nraakye qorahuara tirera. Nkye variqata nkyitaqaa ntaqikyiani vaisirara kyuqe quā nraahu timwaqí viqata mwia qua nraahu riemwaqí quata. Nkye mwitaamagi vivaro mpovanto hiama qio Kotirara uaqia hi quara qiananro. Mpovanto hiama qio tiri mwaanra quara uaqia hi quarave qiananro.

² Nkyi rupa taari nraakye qorahuara varivaro nkyiqa ntaqikyiarai vaisiva, mwivavata Iesusira nraaqiara varirera, nkye mwi vaisirara tiri tiqata vakyaama variho qia. Nkye mwia qua raaqutevora. Mwi vaisiva nkyi sata sakyaa varirata nkye kyuqema kye mwia qua rieqata mwia kyaiqa vara mwataata. Mwi vaisivavata Iesusirara quutaave timwa kyero Kotirara mwutukya vahirara tita, nkye kyuqema kye mwia kyaiqa vareqata mwia kyaahaqamaqita quata. Timotio, e mwi quara nraakye qora timwa nyiqira quante.

Unra qua mwaanra ti vaisihuara tura

³ Vaisi mpovanto nri ntero tiri vunyaa vaisi Iesusi Karaisiva cutaa qua tura qaqira kyero, mwiva tire riemwaqí vi varuna quara qaqira kyero mpo qua mwaanra tirera,

⁴ mwi vaisiva nai nrutuara nraahu rie vari vaisiva variqarora tiro, mwiva hia mwaanra okyara ntapihiari vaisivama variananro. Mwitaa hi vaisihua varivaro inronra quave antua quave tiva nraahuma mwihua su nyaatoqi vahiananro. Mwihua mwi quara ti variavata mwia kyaara nraakye qoravanto mpohuara víkyokya uaqia hirata variqata inronra hiqata varivara. Mwi quara kyaara mwihua nanrianra nanrianra qora qua tivara. Nraakye qora nanrianra nanrianra qora su nyaato rieqata varivara.

5 Nraakye qoravanto uaqia hi qua mwaanranra nraahu rieqata hia su nyaatoqi ntapihirata mwihua Kotira quataa qua qaqla kyeta munimave, mpo inraikya vararerera nraahuma uti varivara. Mwihua tiqata, Kyai Kotira vatacq quana aanranraqatai munimave mpo inraikya mpo inraikya varaare, ti varivara.

6 Vaisivanto Kotiva mwiani inraikyarara qiove timwa kyero qamwatairera, quataama mwiva airi inraikya mwia vatero kyuqema kyero variariva varianano.

7 Tiri mwatani mwafatai entaraqaa tire qovarama vita hia mpo inraikyavata vare nrunanra. Tire qutu vita nanra inraikyavatave vare quananra? Hiama qio tire mpo inraikyavata vare quananra.

8 Mwianra rieqama tire taqaararo kyarave tuavaaqave qio vahiraqe tire kyuqemave timwa kye tire qio varuro qiaro.

9 Munimave, airi inraikyave, vararerera uti variahua variavaro mwi inraikyava mwihua vara qora kyaiqaqi kyaihata nkyiari kyakya hira mpo kyaiqa mpo kyaiqa varaqi vita uro uaqiamma kye variqi vita raupirima quara.

10 Nraakye qora munimanra nraahu mwutukya ntihata mwianra nraahu riemwaqi vi variara mwia kyaarama ekyaa mpo kyaiqa mpo kyaiqa uaqia hi kyaiqava qovara hi variro. Nte taqauqata vaisi mponramwuvanto munimanra mpoqama kye mwutukya ntihata mwihua Iesusira qua qaqla kyeta variqi vita mwiaqatai mwihua mwutukyavanto uaqia ihata variara.

Poruva Timotirara mwitaa mwitaama kyera variqira quante tura

11 Qio Timotio, e Kotiranivanto variananranra tira, ekyaa qora kyaiqa mwia nraatu ntuvaihaa vira uro nyianrato variante. E avuqavu vahiani okyarara riemwaqira quante. Kotira aanraqaa nraahu nrohianta. Iesusirara kepukyaqama kyera riemwaqira quante. Mpohara mwutukya vahirara variqira quante. Hia qamwanrama kyero pupohairara kepukyaqama kyera variqira quante. Nraakye qorara qihakyamaqira quante.

12 Vaisivanto mpo inraikya vararerata nai ntutaa kye nai ntutaa kyemaqiqi viqata hiantaantema kyera evata hianteqara uaqia hi kyaiqara qaqla kyera nte ekyaa enta qati variqi virerave timwa kyeqara Iesusirara rieqarama variqira quante. E mwitaama kyera variqira quante tiro, Kotiva i nraanrama taira. Kotiva i nraanrama tihara e airi nraakye qora suqaa variqara nte Kotira aanraqaa nraahu virerave qiananra.

13 Kotiva variharora tiroma, ekyaa inraikyavanto qati vahiqiro viro. Qio nte Kotira mwia vuqaa variqanama iara mwaa quara riemwaqira quantema tuqo. Iesusi Karaisiva Pontiaasi Paireatativa huraga variqaro kyuqema kyero mwia timwa mwunra. Qio nte Iesusi Karaisira nai mwia vuqaaavata variqanama mwaa quara riemwaqira quantema tuqo:

14 Nte Kotira qua i mwu quaraqaa kyuqema kyera ntaqikyiqira viraro hia api qua inaqavata mwiaqavata vataivarao kyuqema kyero vahirara ntaqikyiqira viraro ekyaa entaqaa tiri vunyaa vaisi Iesusi Karaisiva qovara hiari.

15 Nraakiara Kotiva timwa taani entaraqaa Iesusi Karaisiva qovara hirata ekyama mwia taqevvara. Kuyqema varia okyarava Kotirajima vahiro. Mwiva nraahu ekyaa inraikya ntaqikyi varivama variro. Mpohua mpohua vunyahuave, nronravantove, variavaro Kotiva ekyaa mwihua nraatara kyero mwihua vuni varivama variro.

16 Mwiva nraahu ekyaa enta qati variqiro vi variva. Mwiva omwa nronravantove ite variraqi variharo hiama vaisi mpovanto Kotiva hinani quariva vahiro. Hiama vaisi mpokuvanto Kotira taqaiva variro. Hiama

mpovanto mwia taqaarivavata variananro. Mwiva ekya enta kepukyavanto variqiro quaninranra tita, varaivaqe mwia nrutu nraahu tuaaheraqi quara. Qutaama tuqo.

Airi inraikya vataahua tukyama kyeta mpohuavata nyiate tura

¹⁷ Mwaa mwataraqaa airi inraikya vataahua e timwa nyinrata mwihua hia nkyiari nyutu tuaahereqata tire nronra nraaky qorave qiate. Mwihuara hia nkyetani quaahaga vahiani inraikyarara nronraqama kye riaraitita, Kotirara nraahu nronraqama kye riemwaqita quate qianta. Tiriaru kyugema kye variqi quate tiro, Kotiva qihakayama kyeqaro ekya inraikya naini vahi inraikyara tiri timwi varira.

¹⁸ E airi inraikya vataahuara kyuge kyaiqa, mpo kyaiqa mpo kyaiqa varaqi quate qianta. E mwihuara nkyeta hi inraikyara qihakayama kye tukyama kyeqā mpohuavata nyiate qianta.

¹⁹ Mwihua mwitaamaqi vivaro nraakiara nyaamwuni mwihua kyoqaa kyugema kyero kepukyaqama kyero vahiananro. Mwihua mwiaqatai quataaqama kye qati variqi vi okyarara vareta qati variqi vivara.

Kotiva i mwiani kyaiqaraqaa kyugema kyera ntaqikyante tura

²⁰ Timotio, Kotiva i mwiani kyaiqaraqaa kyugema kyera ntaqikyiqi viqara mwi kyaiqara varaqira quante.

Mpohia vaisihua hia Kotira qua ntapihi kye riaraitita, mwihua nkyiari riemwa kyeta tire mwaanra qua okyara ntapihura huave timwa kyeta api qua ti variara. E mwi quara ti varihua mwoqa nyiante.

²¹ Mpo hia nraaky qorhua, mwihua quara quataa qua okyarave timwa kyeta mwihua Kotira aanra qaqa kyeta apiqama kye uaqia hi aanranraqaa nrohi variara.

Kotiva nkyi kyugema nyatairata variatema, tuqo.

2 TIMOTI

Poruva Timotirani nraakiaraa qara vara kyora

Iesusira qati vara sivuma kyovaro nyaamwuni uro varuvaro 36 ihive nritarovaro Poruva karavuqi variqaro qaiqaa qara mwaa ntumwa tora. Mwi entara Porura ru kyeva qaumaga huvaro Poruva mwianra rieqaro Timotira qua mwaanra mwiniro tiqaro, Kyuqema kyera Karaisira qua riemwaqira quante, tiqaro qara mwaa ntumwa tora.

1 Nte Poruvama. Kotiva nai kyakya hiraqa tihana nte nronraqama vina Iesusi Karaisira qua timwa nyi varuvama varina. Tire Iesusi Karaisiravata variqi quananranra Kotiva kyauqu nrinqiqa vateqaro timwa tai quara, nte mwi quara nraakyе qora timwa nyi varuva.

2 Nte i Timotirara ni maaqu kyugevavema tuqo. Kotiva tiri tiqovavata, Iesusi Karaisiva tiri vunyaa vaisivantovata, i kyuqema mwateta iara po kye timwa mwataivaro i mwutukyaqitairo qihakya hi varirara variante.

Tire hia Karaisira quara kyauruare tura

3 Nte Kotirara kyugeve timwaqи viqana ntena haivaqahua huntema kyena Kotira kyaiqa varaqи vi varura. Nte Kotira kyaiqa vareqana ntapihi kyena varaurara tina, nte qua tuqaro hia ni no muaanra ntaihana vutu kyena tura. Nte mwitaamaqи viqana nte entaqivata iheravata Kotiva i kyaahaqa hiarive tina, mwianra aakyara ntamwaqina vura.

4 I vuqitairo nruqunru tumunranra nte qati nraahu rie varuqo. Ni mutukyavanto kyuqe hiarive tina, i taqaataa lhana varuqo.

5 E hia unraqama kyera Kotirara rieqara mwia aanraqaa quananra nte mwia ntapihima kyena. I taatova Roisivavata, i nrova Iunisivavata, Kotira aanraqaa vuntema kyera evata vi variananra nte ntapihi kyauqo.

6 Mwianra rieqanama haaru nte iqaa kyauqu vataavarо Kotiva mwi entara nai kepuqya mpo i mwunra, e mwia taunru kyrorave tuqo. Vaisivanto qia vuata kyaiharo auru vintema kyera e Kotiva nai kepuqya mpo i mwinira hia qumina tutaraitira, tuqara kyera mwia kepuqyaqama kye tutera Kotira kyaiqa varaqira quante.

7 Hia tiriara mwihua aatu hiate tiro, Kotiva nai mwanraqura timwinra. Qaqao, Kotiva nai mwanraqura tiri timwihano mwia mwanraquravanto tiri kyaahaqa hi varihata mwiaqatai tire kepuqyaqama kye variqi viqata tire nanrianra nanrianra mwutukya vahata tire kyuqema kye tetu mwamwantaqaa ntaqiqiyi vunanra.

8 Mwianra rieqarama hia kyaauriqara tiri vunyaa vaisiara nraakyе qora timwa nyiqira quante. Nte Karaisira qua timwa nyunra mwia kyaara ni rupa kyaavana karavuqi varura, hia mwianravata riairaro i kyaaurirara variante. E hia kyaauraitira, ni nraantatera tiri vunyaa vaisi quarave tira i uaqiamma mwate varivara e muaanra varenanranra hia nronraqama kyera riemwaqira quante. E mwitaamaqira viraro Kotiva i kyaahaqa hiqaro i kepuqyaqama mwatairara e qiomma variqira vinanra.

9 Kotiva tiri huvantu timwa tero tiriara ni nraakyе qora variate tiro, tiri tinraanrama taira. Hia tire kyuqe kyaiqa vara mwataunranra riero tiri tinraanrama taira. Mwiva nai nte mwitaa hirerave timwa kyero qati tiri kyuqema timwa taira. Hia mwaa mwataro ututo entara Kotiva tiqaro, Nraakiara nte Iesusi Karaisira kyaiqara rieqana nraakyе qora kyuqema nyatarerave, timwa kyero terama tero varura.

10 Kotiva mwitaa timwa kyero variharo mwaa entara Iesusi Karaisiva tiri huvantu timwa taariva mwatani qovarama virara tita, tire Kotiva tiri kyuqema timwa taaninranra ntapihi kye riaunanra. Karaisiva qovarama viro ekyaaaa qutu vi okyarara mwia kepuuya nteqa kyaairara tita, tire Karaisira mwakyaakyaa kyuqera riemwaqi viqata tirevata qiomaa ekyaa enta qati variqi quananra.

11 Kyuqe mwakyaakyaa mwia timwa nyianrive tiro, Kotiva ni nronraqama kyaihana nte mwi quara nraakte qora timwa nyiqi viqana qua okyaravata mwihua timwa nyi'varura.

12 Nte mwi quara timwa nyiqi vi varuqata mwia kyaara mpo hiahua ni uaqiamma mate variavana nte muaanra vare variqana nte hia nronraqama kye mwianra riena kyauriraitina, nte mwiaqaa vuntu vina varu vaisira Iesusira okyara ntapihi kyaavara tina, nte mwutukya qihaaakyama kyena tigana, Mwiva qiomaa ni kyaiqa mpitairaqa ntaqikyiqiro viraro ekyaaaa enta qovara hiananrove, ti varura.

13 Nte quataa qua i timwa mwunra rieqarama mwi quara nraahu tuqara tutera nraakte qora timwa nyiqinra quante. Mwi quara rieqarama Karaisirara kepuuyaqama kyera riemwaqi viqarama mpohuara mwutukya vahirara variqira quante.

14 Vaisivanto kyuqe inraikyaqaa ntaqikyintema kyera e Karaisira qua nte i timwa mwunraqaa kyuqema kyera ntaqikyiqira quante. Kotira mwaniraquravanto tiriqi variva i kyaahaqa hi varirara e mwi quaraqaa ntaqikyiqira quante.

15 Nte Esiaani nrohi varuqata ekyaa vaisivata, Pikeraasivavata, Hemokenaasivavata, ni qaqlira kyeta quara e mwia ntapihi kyaananra.

16 Ni karavuqi kyeta seniqo rupa taavana varuqaro Onesiporaasiva hia mwianra kyauriraitiro, mpo hira mwipi nrumu ni kyuqema matairara tina, nte Kotirara aakyara nteqana mwi vaisiravata, mwia nraamwuqi variahuvata, kyuqema kyera po kye timwa nyataantema tuqo.

17 Mwi vaisiva hia ni rupa taarara nronraqama kyero riaraitiro, Romiqi uro ntero ni piriara puaamaqiro viro uro ni puaama kyaira.

18 Qio tiri vunyaa vaisivanto ekyaaaa entaqaa mwianra po kye timwa mwataaananro. Nte Epesaasiqi variavaroo mwi vaisiva kyuqema kyero ni kyaahaqa hora, mwiavata e ntapihiananra.

2

Ntaqi vari vaisira kyuqera votima kyera variqira quante tura

1 Timotio, ni maaquo, Iesusi Karaisiva tiri kyuqema timwa te varirara tira, e kepuuyaqamaqira quante.

2 Nte nraakte qora airi suqaa variqana timwa nyu quara e riaananra, mwi quara Kotira aanraqaa kyuqema kyeta nrohi vaisihua timwa nyinrata mwihua mwi quaraqaa kyuqema kye ntaqikyiqi viqata mpohuavata timwa nyiqi quata.

3 E Iesusi Karaisira nraaqiara variqara ntaqi vaisira kyuqera votima kyera variqarama hia tiri uaqiamma timwa terara nronraqama kyera ri-araitira, tiri nraantantamwa kyera muaanra vareqarama kepuuyaqama kyera variqira quante.

4 Ntaqi vaisiva variqaro naiqaa ntaqikyi vaisira qamwata mwatarero uti variqaro mwiva hia mpo kyaiqa mpo kyaiqa varaqiro viraitiro, mwiva ntaqi kyaiqara nraahu varaqiro vi varira.

5 Mpo inraikya vararerata hiante huaqitairo mpovanto hiante okyarara timwa taani quara hia riaraitiro, nai riemwa kyero mpo aanraqaa quariva hiama qio kyoqaa varaananro.

6 Vaisivanto toqaamwu tu kyero kyaiqa varaqi viro kyara vara tutaariva, mwiva nraantema kyara nraananro.

7 Tiri vunyaa vaisivanto i kyaahaqa hirara e ekyaa qua okyara qio ntapihi kyera rienanranra tira, e nte tu quarara nraato tuqira quante.

8 Nte Karaisira mwakyaakya kyuqe mwakyaakya nraakte qora timwa nyiqina vu quara nraahu riemwaqira quante. Iesusi Karaisiva Ntevitira okyara kuua okyara varuva qutu vuraqitairo qaiqaa qati sivurama. Nte mwi vaisira qua timwa nyiqi vi varurama.

9 Nte timwa nyiqi vuqata mwi quara kyaara ni uaqjama mateta antua utuhua rupa taantema kyeta ni seniqo rupa taara. Mwihua ni nraahu qio rupa tetu Kotira qua hia qio rupa tevara.

10 Mpo hiahua ni uaqjama mate variavana nte hia mwianra nronraqama kyena riauqo. Nte Kotiva nai kyaama tai nraakte qorahuara rieqana qjoma nte muaanra mwia varaaninra. Mwihuvata Karaisira qua riaivaro Kotiva mwihua sitairata ekyaa enta Kotiravata qati variqi quate tinama, nte ekyaa muaanra mwianra hia nronraqama kye riaraitina, variqi vura.

11 Mwaa quarara qutaa quave qiarara tira, evata riemwaqira quante: Tire Karaisiravata qutu quarahua variarera, tire qjoma nraakiara mwiaavata qati variqi quananrave.

12 Tire hia qoriri hiraitita, kepukyaqama kye variqi
quarera, tire Karaisira vatama kye
variqata ntaqikyiqita quananrave.
Tire Karaisira mwoqa mwianrenra,
mwivavata tiri mwoqa timwiananrove.

13 Tire mwia qua riemwaqita virerave timwa kyeta
qaqira kyaarerera, mwiva nai timwa taani quara
hia qaqira kyaraitiro, qati nraahuma
mwi quara riemwaqiro quananrove.
Mwiva hia nai timwa taani quara qaqira kyero
mpo qua mwia mwoqaqaa qiananrove.

Kotira kyaiqa kepukyaqama kyera varaqira quante tura

14 Ekyaa mwi quara tura qaiqaavata qaiqaavata nraakte qora timwa nyiqira quante. E Kotira vuqaa variqara nraakte qora timwa nyiqanrama hia qumina mpo qua mpo qua kyaara inronra hiqata variate qjante. Inronra hi quava hia nraakte qora kyaahaqa hiananro. Mwi quava mwihua vara raupirimama kyaananro.

15 Kotiva iara kyaiqa vaisi kyuqevave qiarive tira, mwia kyaiqa nraahu kyujema kyera varaqira quante. E tiqara, Mwiva ni kyaiqa tuyukama kye taqairaqe hia kyaurirerave, timwa kyeqarama mwia kyaiqa varaqira quante. Kotira qua qutaa qua ntapihi kyera nraakte qora timwa nyiqira quante.

16 Vaisivanto hia Kotirara riaraitiro, qumina qua nraahu riemwaqti viqaro inronra qua qiani vaisira mwoqa mwianta. Mwi quava vaisi vara kyairaro Kotira aanra qaqira kyero mpo aanra uaqia hianinraqama quananro.

17 Mwi quava tauma rumpuara uaqia hiva vaisi mwamwanta nre varira voti hira. Haimeniaasivavata Pairitaasivavata mwi quara timwa nyiahua variara.

18 Mwitanahua qutaa aanra qaqira kyeta tuqasaavi api qua tiqata, Ekyaa nraakte qora qutu viraqitai qaiqaa qati sivi entarara vaakya qovarama

viro taiqama viho, ti variavata Iesusira nraaqiara mpo hiahua mwitanahua quara qutaave timwaqi vita mwia kyaara mwihua uaqama quara.

¹⁹ Qio paatiharo mwataqi kyatari rataintema kyero Kotiva nai qua paatiharo rataira. Mwiaqaa qara ntumwa taiva mwitaama tiro:
Nronravanto nainive ti nraakye qorahua ntapihi kyairavema, tiro.

Qara mpovanto tiqaro:
Nronravanto niqaa ntaqikyi varivave qiariva,
mwi vaisiva uaquia hi kyaiqara qaqlira kyero
kyuqema kyero variqi quarive, tira.

²⁰ Nraamwu nronraqi taanu mpo qara mpo qara hiva vahira. Mpo hiva nronra munima kyeqata utu taava korive, munimave, mwi inraikyaraqo utu taava vaharo mpo hiva kyatarive, aatapaive, mwiaqo utu taava vahira. Mpo hi taanunraqaa nronra entaqaa nraavata mpo hiraqaa qumina entaqaa nraanra.

²¹ Vaisivanto uaquia hi kyaiqara qaqlira kyero variva, mwi vaisiva taanu kyuqeraqaa nronra ihera nraahu vara kyeqaro nrai taanunra votima kyero variananro. Tiri nronravanto mwi vaisira vita kyero qioma mwiva ni kyaqiqa nronra kyaiqa varaanarove qiananro. Tiri nronravanto mwi vaisirahia qumina kyaiqa vararaitiro, ni kyaiqa nraahu varaqiro quanrovema qiananro.

²² Qumwanraa vaisive, qaraakya vaisive, variqata api nkyiari mwamwanta kyakya hira qora kyaiqa varaataa hira qaqlira mwwoqa tukyera ntapihi kyera variqira quante. E Karaisirara kepukyaqama kyera riemwaqira quante. Mpohuara mwutukya vahirara variqira quante. Mwaateraqama kyera variqira quante. Mwitaamaqira viqarama mpo ihua quitaaqama kyero Karaisiva tiriqaa ntaqikyi varivave tihuavata variqira quante.

²³ Qua uaquia hianinra tiqata inronra hivara e hia mwihua kyapata variqira quante. Mwihua mwitaa timwaqi viraqatairo ntaqira inraikyavanto nraahuma govvara hiananro.

²⁴ Karaisira kyaiqa vaisivanto hiama mpohuavata ntaqiro inronramaqiro quananro. Mwiva mwihua mwutukya vara qihakyama kyero kyuer-aqama vataqiro quananro. Mwiva kyuqema kyero raraqa taaninra vara mwataniqama kyero ntapihi kyero qua okyara timwa nyiqiro quananro.

²⁵ Mwia quara qumina quave timwa kye hia riehua qihakyama kye timwa nyiqi viro avuqavu hiari. Mwiva mwitaamaqiro viraro Kotiva mwiia qua hia riehua kyaahaqa hirera, mwihua mwi vaisira quara qutaave timwa kyeta unra qua qaqlira kyeta Karaisira quara qutaavema tivara.

²⁶ Vaaravanto aasau tutaintema kyero Saataaniva mwi vaishiuha tutaihata mwihua mwiia qua nraahu riemwaqi vi variara. Mwihua su nyato ntapihi virata ntapihi riaivera, mwihua Kotira qua riemwaqi vivara.

3

Poruva ekyara entanramwuanra tura

¹ E mwaa quara riaante. Ekyara enta qumaqa hianinraqa nraakye qora uaqama kye variqata nronraqama kye muaanra vahianinraqi varivara.

² Mwi entara vaisivanto nkyiariara nraahu riemwaqita vivara. Mwihua munimanra nraahu nronraqama kye rieqata mwiia varehua nraahu kyaiqa utuqita vivara. Mwihua nkyiari mwahuta titi nkyiari nyutu nraahu tuaaheraqi vivara. Mwihua mpohuara uaquia hi quara nraahu timwaqi vivara. Mwihua nkyiari nyohua sohua qua raaku tevara. Mpohua mpo inraikya nyivatave, kyaahaqa hivatave, hiama kyuqehevata tivara.

Mwihua hia Kotira kyaiqarave Kotiva hi inraikyarara riaraitita, apiqama kye variqi vivara.

3 Mwihua hia mpohuara mwutukya vahirata variqi vivara. Mwihua hia mpohuara po tita mpohuara kyuqe hivara. Mpohua nyutu vara mwataniqa hiqata unra qua tiqata varivara. Mwihua hiama qio nkyiari nyamwantaqaa kyuqema kye ntaqikyivara. Mwihua qamwanrama kyeta hena vaisi rukye toqa ntupepaa hirera nraahu utivara. Mwihua kyuqe okyarara hia mwutukya vahirata varivara.

4 Utaruara rieqata nramwutaa kyaunuqi mwihua nkyiari nramwunahua sitaqita uro kyevara. Mwihua paparuqama kyeqa api kyaiqa varevara. Mwihua nkyiari mwahuta tiqata tire nronra vaisi varuroma tivara. Mwihua nkyiari qamwaterara nraahu rieqata hiama Kotirara nronraqama kye rievara.

5 Mwihua nraakye qora suqaa nrohiqata nkyiari nroqitai tiqata, Tire Kotira vataqi vi varuro, timwa kyeta mwihua nkyiari su nyaatoqitai tiqata, Hiama Kotiva tiri qio kyaahaqa hiananrove, tivara. Nraakiara mwitaa hi vaisihua qovarama vivara e mwihua nyaatu aatu hiqara hia mwihua nraaqani quante.

6 Mwitaa hia vaisihua hia kyuqe vu nraato vahi nraakyehuara tiri qua riemwaqi quate titi, mwihua mpo nraamwu mpo nraamwuqi vi variara. Mwi nraakyehua nkyiari qora kyaiqaaara nronra muaanra varetia nkyiari mwamwanta kyakya hira vataqi viqata mwi aanranraqaave mpo aanraqaave quananrave ti varia nraakyehuara variara.

7 Mwihua mpo qua mpo qua ntapihiare tiqatavata hia Kotira qua quataa qua okyara ntapihi kye riaara.

8 Haaru Mosesiva varu entara vaisitana Ianisikya Iampirisikya Mosesira nramwutaaqa huntema kyeta mwaa entara mwi vaisihua Kotira qua quataa qua okyarara nramwutaaqa hiqata varivara. Mwi vaisihua variavaro mwihua su nyaatovanto apiqama vihata mwihua unra tiqata, Tire qiona Kotira aanraqaa vi varuro, ti variara.

9 Qio mwihua mwitaamaqi viqata hia qioqama kye variqi vivara. Haaru nraakye qoravanto Ianisikya Iampirisikya api okyara qovarama kye taqon-tema kyetama nraakye qoravanto mwi vaisihua okyara qumina unra okyara qovarama kye taqevara.

Poruva Timotirara Kotira qua kepukyaqama kye tutaante tura

10 E nivatama kyera variqara nte nraakye qora timwa nyu quara ntapihi kyera riaananra. Nte nrohina varura ekyaa ni okyara ntapihi kyaananra. Nte Karaisirara kepukyaqama kye riemwaqi vurarave, ni pikyokyaqitairo hia raraqa taihana nte tirema variqana kyuqema kye vaisi kyaahaqa hi varurare, nte mpohuara mwutukya vaihana varurare, e ekyaa mwi inraikyara ntapihi kyaananra. Hia nte qoriri hiraitina kepukyaqama kye variqi vurarave,

11 mpo hiahua ni uaqiamma mataavana toqaamwu tu kyeqana variqi vurarave, nte atura ntiqana variqina vurarave, mwiavata ntapihi kyaananra. Nte Antiokinive, Aikoniaaminive, Risitaraanive, mwi mwatukyara mwinramwunraqi variqi vi variavata mwi mwatanaahua anomia kye ni uaqiamma mate varuvana nte nriqa vu inraikyara varaavara e mwiavata ntapihi kyaananra. Mwi mwatanaahua anomia kye ni uaqiamma mate varuvano tiri vunyaa vaisivanto mwihuaqitairo ni vaitutuma kyero ni vara qatinani kyora.

¹² Ekyaa nraakye qora Iesusi Karaisiravata variqata Kotira aanraqaa virera ihua varivata mwata mwaqaanaa nraakye qoravanto hiama mwihua eqevara. Mwihua ri ntutuhi hivata nriqa vira inraikya vareqatama varivara.

¹³ Uaqia hi kyaiqara uti varihuave, Kotira kyaiqa unraqama kyeqa vare varihuave, mwihua uaqia hi kyaiqara utiva mpoqiavata nrirarero nronraqama kyero vahiananro. Mwihua mpohua unra utu nyataivata mwihua nkyiari unra utu nyatevara.

¹⁴ Qio e hia mwitaa tiraitira, mwaanra qua rieqara mwi quarara qutaave qiananra mwianra nraahu riemwaqira quante. Tire mwi quara i timwa mwunananra tira, e tiri okyaravata ntapihi kyaanana.

¹⁵ E pataru variqara Kotira mpukuqi qara ntumwa tai quara riemwaqira qiananra. Mwi quava i kyaahaqa iharo i vu nraatovantó ntapihi paahima vihara e Iesusi Karaisirava qutaave qiananranra tiro, Kotiva i huvantu kyero qioma i vitaananro.

¹⁶ Ekyaa Kotira mpukuqi vahi quara Kotira mwanraquravanto vaisi kyaahaqa hi varihata qara ntumwa taara. Mwi quava nraakye qora kyaahaqa hiari quavama vahiro. Mwi quaraqaatairoma vaisivanto qutaa qua okyara qio ntapihiananro. Mwi quaraqaatairoma vaisivanto nai uaqia hi kyaiqara utuaninra vu nraato ntapihiraro ntapihi kyero riaananro. Mwi quaraqaatairoma kyuqe aanraqaa nrohiani okyarara qio ntapihiananro. Mwi quava nraakye qora kyaahaqa hi variratama mwihua ntapihi kye variqi vivara.

¹⁷ Mwi quava mwitaama vahirara tiro, Kotira kyaiqa vaisivanto Kotira mpukuqi vahi quara riemwaqiro viro mwiaqaatairo tera taarama kye variqaro qioma kyuqe kyaiqa varaqiro quananro.

4

Kepukyaqama kyera Karaisira qua timwaqira quante tura

¹ Nte Kotira vuqaavata, Karaisira vuqaavata, variqana qua i timwa mwintrenra. Iesusi Karaisiva nraakiara qutu vihuavata, qati varihuavata, tulka hiananro. Mwiva nraakiara vunyaa vaisivanto variqaro ekyaa nraakye qoraqaa ntaqiyiariva tumuananro. Mwianra rieqanama nte i qua mwiqana mwitaama tina:

² Karaisira mwakyaaqya nraakye qora timwa nyiqira quante. Nraakye qoravanto tera hita qamwate entarave, hia qamwate entarave, qati nraahu mwi quara timwa nyiqira quante. Kepukyaqama kyera qua timwa nyiqira virata mwihua mwi quarara qutaave qia. Mwihua qora aanra nrohira mwi inraikyara qoqaa timwa nyiqira virata mwihua mwi aanranra qaqa kyeta Kotira aanraqaa quate. Mwi quara hia paparuqama kyera timwa nyinraitira, qakyoma kyera ntapihi paahima kyera timwa nyiqira quante.

³ Mpo enta nri ntairata mwi entaraqaa nraakye qoravanto hia quataa qua riarerera utivara. Mwihua nkyiari riaataa hiani quara, mwia nraahu riarerera uti variqata api okyarara nraahu ti vaisihua sita kye vateta tiqata, Tiri rie nraahu variataa hiraqe rieqata qamwate variana quara nraahu timwa timwiqi quatema, tivara.

⁴ Mwihua quataa qua mwoqa mwita uri quave, haaru varuhua qua nraahu riaataa hiratama rieqata varivara.

⁵ Mwihua mwitaamaqi vi varivara e hia mwitaa hiraitira, i vu nraatovantó kyuqema vahirara variqira quante. I uaqiamma mwataivara e nriqa vi inraikyara vareqara kepukyaqama kyera variqira quante. Karaisira qua timwaqira quante. Kotiva i mwifai kyaiqara varaqira quante.

Nte qutuani entava qaumatoma vaiho tura

6 Kotira kyaiqa vareqaro uaini ekyaa rauru kyaintema kyero qau-mama ni nraanrevata raurirage taiqaaninra. Pataqia vari kyena mwaa mwataraqaatai taiqena quarinra.

7 Nte mwatani variqana mpo inraikya vararerera hiantaantema kye hiantamwaqi vina uro aanra mwia taiqa kyauqo. Nte Karaisira qua kepukyaqama kye tuqina vi varur.

8 Nte kyuqema kye hianteqana aanra mwia taiqa kyaurara tina, nte mwia qiaata kyoqaa varaaninra mwia vekya nraahuma varuqo. Nronravanto ekyaa nraakye qora ntapihi kyeqaro tukya hi variva, mwiva ekyaa entaqaqaa variqaro ni kyoqaa mpiqaroma nianra e ntapihi kyera nrohi variaravavema qiananro. Mwiva hia nianra nraahu mwi quara qiananro. Ekyaa nraakye qoravanto mwiva qaiqaa qovara hiani entara mwia vekya varihuavata varivaro mwiva mwihuaravatama mwi quara qiananro.

Poruva ekyaaqua qua tura

9 E ni taqera aanrava vahirara qamwanrama nrumu ni taqaante.

10 Ntimaasiva mwaa mwataraqaatai vahi inraikyarara mpoqama kyero mwutukya nti variharo ni qaqira kyero Tesaronakaani vura. Kereseniva Karesiaani viharo Taitaasiva Ntarimesiaani viharo

11 Rukuva kuaikuvantoma nivata variro. Emwaini nrinrenra hira Maaki-ravata vitera nriante. Mwiva kyuqema kyero ni kyaahaqa hi varihana kyaiqa varaura.

12 Nte Tikikaasira titauqaro Epesaasini virama.

13 Emwaini nrinrenra hira ni vaaqatua Toroasasin Kapaasira nraamwuqi kyaura mwiaavata varaqira nrumu mpiante. Mpukuvata varaqira nrumu mpiante. Mpuku mponramwu aasau pahiqo utu taira mwianra nron-raqama kye riemwaqi virama varaqira nrumu mpiante.

14 Arekisantaava qainiqotairo mpo inraikya mpo inraikya uti variva nronraqama kyero ni uaqiamataira. Mwianra rieqaro tiri vunyaa vaisivanto nai kyoqaa mwiananro.

15 Evata mwi vaisirara rauriqara variante. Tire nraakye qora timwa nyuna quara mwiva qutaqaqama kyero mwi quara nramwutaaqa hi varira.

16 Vuni niqaa qua vatovana ko ti variavarohia impovanto nivata variro ni kyaahaqa hura. Ekyaa ni qaqira kyeta vuvana nte ntenanraa variqana ntena vaitutuhiavara. Qio nte Kotirara aakyara nteqanama mwitaa hia vaisihua hia mpo qara hiante tura.

17 Nte ntenanraa ko ti variavarohi vunyaa vaisi mwiva nraahu nivatama kye variqaro ni kepukyaqama matovana nte Karaisira qua ekyaa mpo mwatanaa mwihua timwa nyiavata mwihua ni qua riora. Tiri vunyaa vaisivanto qaakyau vairi raioni nroqitairo ni vaitutuma kyora.

18 Uaqia hi kyaiqava ni nraatara kyaankyo tiro, tiri vunyaa vaisivanto ni vaitutumaqiro viviro ni pitaqiro uro nyaamwuni nai mwatukyaqi naivatama kye variarive tiro, ni uro kyaananro. Mwiva kepukyavanto varirara tita, mwia nrutu nraahu ekyaa enta tuaaheraqi quata. Qutaave.

Qua mwanteqaro ekyaaqua qua tura

19 Nte Pirisiraaravata Akuiaraaravata qua mwantauqo. Onesiporaasiravata mwia nraamwuqi variahuaavata nte qua mwantauqo.

20 Irasitasiva Korintiqi nraahu variharo Toropimasira nriqa vihananra tina, nte Mairitaasini mwia kyaura.

21 Ni taqarerera toqa vaururu tuani entara nrinronra. E nrinra aanrava qio vahirara, vuhaaninraqaa qamwanrama kyera nrumu ni taqaante.

Iuyuraasivavata, Piutenisivavata, Rainasivavata, Kirotiavavata, ekyaa tiri tiqata vakyaa hini mwihuavata, nkyi qua mwantaavo.

²² Tiri vunyaa vaisivanto Karaisiva i mwutukyaqi variari. Kotiva nkyi ekyaa kyuqema nyatairata variatema, tuqo.

TAITAASI

Poruva Taitaasirani qara vara kyora

Iesusira qati vara siyuma kyovaro nyaamwuni uro varuvaro 36 ihive nritarovaro Poruva qaiqaa karavuqi variqaro mwaa quara qara ntumwa tora.

Taitaasiva hia Iutaa vaisi nai mpo mwatanaavanto Iesusira nraaqiaraqama viro varuvaro Poruva mwianra mwataama kyera nraakye qora Kotira aanra nyaamwutaante tiqaro Taitaasirani qara ntumwa tora.

¹ Nte Poruva Kotira kyaiqa vaisi varuvama. Kotiva ni nronraqama kyaihana nte Iesusi Karaisira qua timwa nyiqi vi varuvama varina.

Kotiva nai kyaama tai nraakye qorahua Karaisirara kepukyaqama kye variqi viqata quataa qua oykara riemwaqi quate tiro, Kotiva ni titairave.

² Kotiva hia unra qua ti variva haaru hia mwaa mwatata ututo entaraqaa nai kyauqu nriqigaa vatero tiqaro, Ntena kyaama taani nraakye qorahua ekyaa enta qati variqi vivarave, tura. Mwianra rieqanama nte nraakye qora timwa nyiqanama, Nkye Kotirara kepukyaqama kye riemwaqi viqatama mwi entara vekya variqi quate, ti varurave.

³ Kotiva nai kyaama tai nraakye qorahua ekyaa enta qati variqi vivarave timwa kyero variqi vuvaro nai timwa to entaraqaa Iesusi Karaisiva tumu ntero Kotira qua qaraakya qua qovarama kyora. Mwi quara nraakye qora timwa nyiqira quante tiro, Kotiva tiri huvantu timwa faariva, mwiva ni nronraqama kyaihana nte mwi quara nraakye qora timwa nyiqi vi varuvama varina.

⁴ Taitaasio, nte mwaa quara inima qara ntumwa tena. Tiretana Karaisira qua kuaa qua nraahu riemwaqi vi varunanranra tina, nte iara ni mwaaque turave. Kotiva tiri tiqovavata Iesusi Karaisiva tiri kyaahaqa hiarivavata i kyuqema mwataivarо i mwutukyaqitairo qihakya hi varirara variana.

Mwaa quara rieqara vaisi nronraqama kyairata Iesusira nraakye qoraqaa ntaqikyiate tura

⁵ Iara nte hia taiqa kyaani kyaiqara ntapihi kyera taiqa kyera mpo mwatukya mpo mwatukyaqitaira vaisi nronraqama kyairata Iesusira nraakye qoraqaa ntaqikyiqi quate tina, nte Kiritini i kyena nrnunrave. Qio nte mwini variqana i timwa mwiava quara riemwa taante.

⁶ E vaisi nronraqama kyarera hira mwataama variani vaisira nronraqama kyaante:

Mwi vaisiva varirata nraakye qoravanto hia mwianra uaqia hi kyaiqara utiho timwa kye mwiaqaa qua vatevama variari.

Mwi vaisiva nraakye kuaa varataarivama variari.

Mwi vaisiva nraaqiaraqvantovata Karaisira qua riemwaqi viqata mwihiuavata hia api aanra nrohiraitita, nkyiari nyohua sohua qua nraahuma riemwaqi quata.

⁷ Mwi vaisiva Kotira kyaiqaqaa ntaqikyiqiro quaninranra tiro, qora kyaiqa varaani quava hia mwiaqaa vahiali.

Mwi vaisiva hia nai quara nraahu kyuggerave timwaqiro quar.

Mwi vaisiva hia qamwanrama kyeqaro raraqa taariva variari.

Mwi vaisiva hia nramanri nrenro uera ntaari vaisiva variari.

Hia mwi vaisira raraqa tairaro qamwanrama kyeqaro mpohua ntuquutariva variari.

Hia munimranra mpoqiyavata mwutukya ntuari vaisiva variari.

8 Mwi vaisiva nyianrasai nrihua kyarave qiatomwave nyianrivama variari. Mwiva kyuqe okyarara mwutukya vahiarivama variari.

Mwi vaisiva naiqa kyuqema kye ntaqikyiarivama variari.

Mwiva avuqavuma kyero nrohiari vaisivama variari.

Mwiva kytotataqama kye variari.

Mwiva nai kyaiqa vutu nteqaro varaari vaisivama variari.

9 Qutaa qua mwia timwa mwia quara mwi vaisiva tuqara kyero tutaari vaisivama variari.

Mwiva mwitaa hiari vaisiva variqaro qioma mpohuavata kyaahaqama nyataari.

Mwiva mwitaamaqiro viqaro api qua ti vaisihua quavata nraatara kyairata mwihua nkyiari api qua ntapihi kyaata.

Mwaanra apiqama kye ti vaisihuara rauriqara variante tura

10 Vaisi airvanto mwihua kepukyaqama kye Iutaa mwaanra okyarara rie variahua, mwihua tiri quara qoririma kyeqata mwihua qumina qua unra qua nraahu timwa nyiqi vi variarave.

11 Mwihua munimanra nraahu rieqata api qua ti variavata mwihua quaqaara mpo nraamwu mpo nraamwuuqi variahua apiqama vivi hiarave. Mwihua uaqia hi quara ti variarara tira, e mwihua qaqira kyeta tirema variante qianta.

12 Kiriti vaisi mpovanto nraakiara qovara hianinranra timwa nyi varu vaisiva haaru variqaro nai nramwunaahuara mwitaama tiro:

Kiritiqinaahuunra qua nraahu ti variahuvae.

Mwihua qaakyau quara vairi nraantantamwa kye variarave. Mwihua hia kyaiqa vararaitita, qumina aanra nrohiqata kyara nraahu kyovi kyaavirama kye nre variarave, tura.

13 Haaru mwi vaisiva tuva qutaama vahiro. Mwianra rieqarama mwi mwatanaahuara kepukyaqama kyera tiqara, Qora qua qaqira kyeta kyuqe qua nraahu riemwaqi quate, qianta.

14 Iutaavanto uri qua tira hia riaate, qianta. Vaisi mponramwuvanto nkyiari riemwa kyeta hia mwitaa mwataa hiate ti quaravata hia riaate, qianta.

15 Kyuqe vu nraato vahiali vaisiva variqaro mwiva ekyaan inraikyara kyuqe inraikyavema qiananro. Vaisi mpovanto hia Jesusirara qutaave qiariva ua vu nraato vahiariva hiama qio mpo inraikyaravata kyuqe inraikyave qiananro. Mwia vu nraato mwutukyaqitairo apiqama quaniranra tiro, mwiva ekyaan inraikyara qora inraikyavema qiananro.

16 Mwitaa hia vaisihua nkyiari nyoqitai tiqata, Tire Kotirara rieqata nrohi varurahuave, timwa kyeqata variavaro mwihua kyaiqavanto mpovau vahata Kotira qoriri hi kyaiqara varaqi vi variarave. Mwihua mwitaama kye nrohi variavaro Kotiva mwihuaqua raaqute varia vaisihuave tirave. Mwihua Kotira qua raaqute variarara tiro, kyuqe kyaiqvavento hiama qio mwihuaqi vahiananrove.

2

Qua mwaanra kyuquerara tura

1 Mwihua api qua timwa nyivara e kyuqe qua nraahu timwa nyiqinra quante. E nraakyae qora mwaanra qua kyuqera timwa nyiqanra mwataama kyeta nkye mwi quara rieqata nrohiate qianta.

² Nyaapai mwihua mwataama kyera timwa nyiana: Nkye hia nramanri nretta uera ntaraitita, nkye kyuqe vu nraato vahirata nkyeta mwamwanta mwutukyaa kyuqema kye ntaqikyiqi nrohiate. Karaisira qua anoma kye rieqata variqi quate. Mpohuara mwutukya vahirata variqi viqata hia pupohairata kepuuyaqama kye Kotira aanraqaa variqi quate, qianta.

³ Kyontavata mwataama kyera timwa nyianta: Nkye Kotiranivanto variarara tita, kytotataqama kye variqi quate. Hia mpora nrutu vara mwataniqa hiqata qora qua qjata. Uainivanto nkyi kyonta ntavaaqavu kyaankyorave, qianta. Kyonta nronra tuaari nraakyeva qaraakya nraakyevaaanra kyuqera nraamwutairaro

⁴ mwiva kyuqema kyero nai vaatiaravata, nai nraaqiararavata, mwutukya vahiraro variari.

⁵ Nronra tuaari nraakyeva qaraakya nraakyevaaanra kyuqema kyero nrohiqaro hia mpo vaisiara riaraitiro, nraamwu maataqaa kyuqema kyero ntaqikyiqaro nai vaati qua nraahu riemwaqiro viraro mpovanto mwia kyaipa taqero hiama Kotira quara uaqia hi quarave qianano.

⁶ Qaraakya vaisiaravata mwataaa qianta: Uaqia hi kyaigara utuaro tita kyuqema kye nkyeta mwamwantaqaa ntaqikyiqi quate, qianta.

⁷ Taitaasio, e ena mwiva mpo kyaiqa mpo kyaiqa vareqara kyuqe kyaiqa nraahu varaqira virata qaraakya vaisivanto i kyaipa taqeta mwihuavata kyuqe kyaipa varaqita quate. E nraakyeva qora Kotira aanra nyaamwuteqara hia nroqitaira nraahu qianta. Qua timwa nyiqanra qua mwia vataqi vira mwitaa mwitaa hiante. Hia ugenraagenrama kye tiraitira, mwi quarara nronra qua qutaa vahirave qiate tira, kepuuyaqama kyera qianta.

⁸ E ntapihi vahiani quara nraahu timwa nyiqira virata hia iara api qua tihi qjata. Mwitaa timwaqira virata tiri nramwutaahua tiriqaa qora qua vatevaa hia vahirama mwihua nkyiari kyauruuta.

⁹ Rupataavata quminaqama kye kyaipa vare varia vaisihuara mwataaa qianta: Nkyiqa ntaqikyiani vaisira qamwata mwateqata mwia qua riemwaqi quate. Hia mwianra qora qua qiate.

¹⁰ Mwiva vataani inraikyara hia mpuura varaate. Nkye mwia kyaiqa kyuqema kye varaqi vivaro mwi vaisiva nkyiara kyuqe vaisi nraahuve timwa kyero Kotiva tiri huvantu kyaiva timwa tai quarara kyuqe quave qjare, qianta.

¹¹ Tire ntapihi kyaunaanrave. Ekyaa nraakyeva qora huvantu vita qio variate tiro, Kotiva nai kyuqema nyataani okyarara qovarama kyairave.

¹² Tire mwi okyarara rieqatama hia Kotira qoririma mwataraitita, mwatanyaa inraikyara hia mwutukya ntiraqeta tetqa kyuqema kye ntaqikyiqata ntapihi kye nrohiqata mwaa entara Kotira kyaipa nraahu varaqi quaravama vahiro.

¹³ Tire mwitaamaqi viqata tiri kyuqema timwa taani entara vekya varunana. Mwi entara tiri mwanriqa nronravanto tiri huvantu timwa taariva Iesusi Karaisiva, mwia peqa okyaravanto omwa votima kyero itero takyuiq variraro qoqaa tumu ntaananrove.

¹⁴ Uaqia hi kyaiqava tiri rupa taankyo tiro, mwiva tiriara rieqaro tiri huvantu timwa tarero qutu vurave. Mwiva tiriara kyai mwihua hiqama nyataarita mwihua ni nraakyeva qora variqata kyuqe kyaiqa nraahu varaqi quate tiro, mwianra rieqaro qutu vurave.

¹⁵ Qio e mwi quara nraakyeva qora timwa nyiqira quante. E nronra vaisivanto variqarara tira, kepuuyaqama kyera nraakyeva qora mwi kyaiqara mwitaa mwataama kye vareqata mwi kyaiqara hia varaate qianta. Haunri vaisi mpovanto iara qumina vaisive qiankyorave.

3

Mwataama kyeqata Kotira aanraqaa nrohiate qianta tura

¹ Nraakye qora timwa nyiganrama kamaninra nronra vaisive, kamaniva nronraqama kyai vaisihuave, mwihua qua hia raaqutaraitita, mwihua qua riemwaqi quate quante. Mpo kyaiqa mpo kyaiqa kyuqe kyaiqa vahianinra qamwanrama varehua terama viqata variate qianta.

² Mpohua nyutu mwataniqa hiarive tita mwihuaqaa unra qua vatevorave qianta. Tirema variqata nanrianra nanrianra qamwateqata variate qianta. Henahuara qibaakyamaqi viqata variqi quate qianta.

³ E ntapihiananrave. Haaru tire qumimaqa hiqata qua nteqa kyeta apiqqa hiqata nrohi variavanranrave. Mwi entara apí nrohiaravave, apiqqa qamwataaravave, mwi inraikyava nraahu tiri rupa tovata variavanranrave. Tire mwi entara mpohua uaqama nyateqata kyaru kyaaruma nyate variavanranrave. Tire mpohua nrámwutaaqama nyate variavarata mwihua tita mwitaama timwa te varurave.

⁴ Tire mwitaamaqi vi variavararo Kotiva tiri huvantu timwa taariva, mwiva nai kyuqema timwa taaninra mwia mwutukyavanto tiriara vahianinra qovarama kyero

⁵ tiriara apiqama kye variqi vivorave timwa kyero mwiva tiri huvantu timwa torave. Mwiva hia tire kyuqe kyaiqa mpo kyaiqa mpo kyaiqa varaavanranranra rieqaro tiri huvantu timwa toravauma. Mwiva nai tiriara po kye timwa timwa taaninranra rieqaro tiri huvantu timwa torave. Mwiva tiri hiqama timwa taihata tire qaraakya vaisi utuvita varuraro mwia mwanraquravanto tiri qaraakyama kyahata variqi vi varunanrave.

⁶ Iesusi Karaisiva tiri huvantu timwa taariva tiriara rieqaro kyaiqa varorara tiro, Kotiva qibaakyama kyero nai mwanraqura tiri timwi varirave.

⁷ Kotiva kyuqema timwa tairaqaatairo tiriqaqua qua vahiva taiqa vihata tire mwia nraaqiaraqama vita variqata mwivavata ekyaa enta qati variqi quananra mwia vekyama varuro.

⁸ Mwi quava quataa quama vahiro. E mwi quara kepukyaqama kyeqara timwa nyigira virata Kotirara quataave ti nraakye qorahua mpooqama kye kyuqe kyaiqa varerara nraato tuqita quata. Mwihua mwitaamaqi viqata qiomaa mpohuavata kyaahaqa hivara.

⁹ Qumina inronra hi quarave, nkyiari haivaqahua okyarara nraahu nronraqama kye rie vari quarave, antua quave, Mosesira mwaanra qua kyaara inronra hi quarave, ekyaa mwi quara mwi quara thiuha nraaqani hia uro variante. Mwi quava hiama qio vaisi kyaahaqa hiananro. Hiama mwi quaraqaatairo kyuqe inraikyavanto qovara hiananro.

¹⁰ Vaisi mpovanto inronra hicaro Iesusira nraakye qora ntainra kyarerera uti varirera, e mwi vaisirara hia mwitaa hiante tiraro hia riairara qaiqaa mponanivata qianta. Mwitaa tiraro qio hia riairara mwi vaisira qoririma kyera mwoqa mwiane.

¹¹ E ntapihi kyaananrave. Mwitaa hia vaisihua apiqama quavaro nkyiari qora kyaiqvanto vara uaqama kyaihata nronra qua varaavo.

Ekyara qua tura

¹² Nte Atemaasikya Tikikaasikya titaarita mwini uro ntaivara e Nikoporisini nte uro varianinrani quante. Huari hia kyuqema kyero itaani entara nte uro mwinima varianinra.

¹³ Sinasiva ko okyara ntapihi paahima kyero rie vari vaisivavata, Aporisavata, mwitanahua nyianra aanraqaa virera hiatanahua kyuqema kyera kyaahaqama nyatairata aanraqaa viqata hia mpo inraikyara aaranteta puua hiata.

¹⁴ Tiri nraakye qoravanto hia kyaiqa vararaitita, qumina varivaro kyarave mpo inraikya hia vahirata aara ntevorave tira, mwihuara kyugema kye kyaiqa varaqi vi varivaro ekyaa mwi inraikyava nkyini qio vahiarive qiante.

¹⁵ Nivatama kye variahua i qua mwantaavo. Karaisira qua riaahua tirira mwutukya vahata variahua, qua mwantaunanra timwa nyiante.

Kotiva nkyi kyugema nyatairata variate, tuqo.

PIRIMONI

Poruva Pirimoninrani qara vara kyora

Iesusira qati vara sivuma kyovaro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Pirimoniva nronra vaisivanto Iesusira nraaqiaravanto varuvaro mwia kyaiqa vaisi rupatova Onisimaasiva nai kyaiqa qaqlira kyero ntugema kyero uro Romini variqaro Porura nroqitairo Karaisira qua riero mwi quarara quitaave timwa kyero Poruravata varuvaro Poruva Onisimaasira Pirimoniva hunani titarera hiro Pirimoninrani qara mwaavatama kyero titovaro vura.

¹ Nte Poruva. Iesusi Karaisiva ni rupa taihana varuva. Nte tiri tiqata vakyaa Timotikyama mwaa quara i Pirimoninrani qara ntumwa teta. E tiritana vaisivanto variqara tiri nraantantera Kotira kyaiqa vaisima variaro.

² Iesusira nraakye qora i nraamwuqi variahuanivatama mwaa quara qara ntumwa tena. Tiri nrurra nrakyaapiaaranivata, Akipaasirani-vatama, nte qara ntumwa tena. Akipaasiva tiri nraantantamwa kyero ntaquqi viqaro Kotira aanraqaa kepukyaqama kyero vi varirama.

³ Kotiva tiri tiqovavata, tiri vunyaa vaisi Iesusi Karaisivavata, nkyi kyugema nyatairata nkyi mwutukyaqtai qihakya hi varirata variata.

Poruva Pirimoniva Karaisira qua riorara tura

⁴ Pirimonio, nte Kotirara aakyara nteqana mpo enta mpo enta iara rieqana Kotirara kyuqeve tura.

⁵ Nte riauqara e Kotira nraakye qora ekyaa mwihuara i mwutukya vai-hara e kepukyaqama kyera tiri vunyaa vaisi Iesusi Karaisirara riemwaqira vi variananrave.

⁶ E Karaisira qua mpohua mpohua timwa nyiqira quante tina, nte Kotirara aakyara nte varura. E mwitaamaqira viqarama Karaisiva tiri kyugema timwa taani okyarara mpo okyara mpo okyara ntapihi kyera taqenanra.

⁷ E mpohuara mwutukya vaihara variarava mwiva nivatama kyugema mataiharo ni mutukyavanto kyuqe ihana varura. E mwitaa hiarava mwi okyarava ekyaa Kotira nraakye qora mwutukya kyugema nyataihata variara.

Nte iara Onisimaasirara po kye timwa mwataantema tuqo tura

⁸ Pirimonio, e mwitaama variarana nte Karaisiravatama kye variqana nte i vakyavaa variqananra tina, nte qiomia kepukyaqama kyena iara ni qua nraahu riaante qianinra. Nte qio mwitaa qiariva vaihanavata hia nte mwitaa tirera.

⁹ Ni mutukyavanto iara vaihananra tina, nte ivata qua qihakyma kyena tirera. Nte Poruva nte nyaapaiqama vina variqana nte Iesusi Karaisiva rupa taihana varuva,

¹⁰ nte iara qihakyma kyena mwitaama tina, Onisimaasira ni maaquara po kye timwa mwataante, tuqo. Ni seniqo rupa taavana mwaini varuqaro mwiva i qaqlira kyero ntugema kyero mwaini nrumu variro mwiva Karaisirara quitaave timwa kyero mwiaqatairo mwiva ni nraaqiaraqama vira.

¹¹ Mwi vaisiva haaru hia kyuqema kyero i kyaahaqa hu vaisiva varura. Mwaa entara mwiva Karaisirara qutaa mwivave tivara tiro, mwiva nivata ivata kyuqema kyero kyaahaqa hiari vaisivama variro.

¹² Nte mate e hiananrani Onisimaasira titaarido mwiva nrumu ntantero quananro. Mwiva ni mutukya nti vaisiva varihana nte mwia titeqana ntena mwamwanta votima kyena titaarido quananro.

¹³ Nte Karaisira qua timwa nyiqi vi varuqata mwia kyaara seniqotai ni rupa taavana varuva. Nte mwaini mwaaqi variqana iara tigana, E hia qio-qama kyera nrumu ni kyaahaqa hinanrave timwa kyena Onisimaasirara mwiva i mwaata varero mwaini variqaro ni kyaahaqa hiananrove, timwa kyena mwianra mwaini variarive qiataa ihanavatama

¹⁴ Onisimaasiva hia i kyapara hirara rieqanama qaqlira kyena mwianra hia mwaini variante tuqo. Hia nte mwia mwaini tutaaninra mwianra iara kepukyaqama kye eo qiantre tirera. Ina kyakya hiro eo qiataa hirara eo tinanra.

¹⁵ Qutaa Onisimaasiva i qaqlira kyero ntuqe hiro hia mwaini nrumu mpuuaama varirave. Qio mwiva i kyero ntuqema kyero viraqitairo Iesusira nraaqiaraqama virora tiro, mwiva ekyaa enta ivata qiomaa qati variqiro quananro.

¹⁶ E mate mwaa entaraqaataira hiama mwi vaisirara nte rupa tau vaisiva mwitaama nraahu variarive tiraitira, e mwitaama qiantre: Onisimaasiva qutaaqama kyero Kotira nraaqiaraqama virara tina, nte mwianra ni kata pakyaave qianinrave, qiantre. Nte mwi vaisirara ni mutukya vahiana nte mwianra ni katave tura. E qiomaa mwi vaisirara tiqara, Mwiva ni kyaiqa vaisi kyuqeva variqaro mwiva Karaisira nraaqiara varivara tiro, mwiva ni kata pakyaama variho, tinanra.

¹⁷ E nianra qutaqaqama kyera ni hena vaisive tirera, e ni qamwata materantema kyera Onisimaasiravata qamwata mwataante.

¹⁸ Onisimaasiva haaru i apiqama mwatovavata ini mpo inraikya varero hia mwianriva qati vahirera, e mwia nrutu nruka kyera ni nutu vatairaqe nte mwianra rieqana i kyoqaa mwiankye.

¹⁹ Qio taqaante, nte ntene kyaauquqotaina mwaa quara qara ntireranama, NTE PORUVA MWI MUNIMANRA INA MWINRENRAVE, tuqo.

E ni qua riera Kotira nraaqiaraqama vira variananra mwia hiniqama hia nina mpiante turave. Nte mwianra qiataa ihanavata hia mwianra tirera.

²⁰ Po, Pirimoni, ni katao, tiri vunyaa vaisiara rieqara nte qiani quara riera mwitaa hiante. E Karaisiravata variqara e ni katavanto variananranra tira, ni mutukya kyuqema matairaqe qamwateqana variari.

²¹ Nte mwaa quara qara ntiganama iara ni qua riero mwitaa hiananrovema tina. Nte iara tiqana, Mwiva nianra qamwateqaro ni quaravata, mpo qua hia nte timwa mwianinravata, nai riemwa kyero mwitaa hiananrovema, tina.

²² Nte pata qua mpoqia tirera. Nte mwini quaninranra rieqara e nini nraamwu mpoqiaqi terama taante. Kotiva ni kyaahaqa hiarie tita, nkye mwianra aakyara nte variara. Nte Kotiva nkyl qua qiomaa riaananrove timwa kyena nkyl uro taqaaninranra nronraqama kyena rieqana varura.

Ekyara qua tura

²³ Epaparaasiva nivatama kyero variva i qua mwantaiho. Mwiavata Iesusi Karaisira kyaara rupa taavarao nivatama kyermota variro.

²⁴ Maakivavata, Arisitakaasivavata, Timaasivavata, Rukuuvatama kyeta i qua mwantaavo. Mwinramwuhua nte varau kyaiqara kuaa kyaiqa mwia vare variahuvave.

25 Tiri vunyaa vaisivanto Iesusi Karaisiva nkyi kyuqema nyatairata variate, tuqo.

HIVURU

Hivuruqinaahuani qara vara kyora

Iesusira qati vara sivuma kyovaro nyaamwuni uro varuvaro 40 ihive nritarovo vaisi mpovanto mwaa quara qara ntumwa tora. Mwaa quara qara ntumwa to vaisira nrutu tire hia ntapihi kyaunanza. Mwi vaisiva Poruvave, Rukuvave, Aporosivave, Sairaasivave, nraahumwa mpovantove, mwaa quara qara ntumwa teta? Hia ntapihuro. Iutaavanto Iesusira nraaqiaraqama vuhua Iesusi Karaisiva nritarero uro virini kepukyavanto vari okyarara ntapihi kye rieta taqaate tiro, mwi vaisiva mwaa quara Iutaani qara ntumwa tora. Iutaave Hivuruve mwia kuua mwatanaa mwihua nyutuma.

Karaisiva nronravanto vitarero vuni vari okyarara tura

¹ Haaru Kotiva tiri haivaqahua Hivuru nraakye qora qua timwa nyin-renro mwiva vaisi mponramwu poropetive tuhua ekyaa mpo qua mpo qua timwa nyuvata mwihua mwi quara qovarama kyeqata tiri haivaqahua timwa nyiqi vi varurave. Mpo enta Kotiva ruvaatakyaa poropeti vaisi mpo timwa mwirno mpo enta nraahumwa mpo qarama kyero poropeti mpo timwa mwirno mwitaamaqi vivihura.

² Kotiva mwitaa timwa nyiqiro viro mwaa entara ekyara enta vahiraqaa mwiva nai mwaaqu titaiharo mwia mwaaquvanto mwia qua qovarama kyaihata tire riaunanra. Kotiva nai mwaaqu nronraqama kyovaro mwia mwaaquvanto mwatavata nyaamwuvata utu tora. Kotiva ekyaa inraikya mwia nai mwaaqu kyaama taiva nraahuma vahiro.

³ Kotira peqa okyaravanto nai mwia mwaaquqvata ntuvaahе varirama. Mwia mwaaqu okyaravantovata, mwia qora okyaravantovata, kuua okyara nraahuma vahiro. Mwia mwaaquvanto timwa tai quaragaatairo ekyaa nyaamwunivata, mwatanivata, vahi inraikyaya qati nraahu yahiqiro vi varira. Mwaa entara mwia mwaaquvanto nraakye qora uaqia hi kyaiqara utua quara nruka nyatero uro nyaamwuni Kotira kepukyavanto vahinani mwia kyauqu kyaatutani mwatakyaa viro variro.

⁴ Kotiva mwianra ni maaquve tirara tiro, mwia mwaaquvanto ekyaa nyaamwunyaahuavata nraatara kyero nritarero variharo mwia nrutuvantovata mwihua nyutu nraatara kyero nritarero virinima vahiro.

⁵ Kotiva nai mwaaqu mwianra nraahu tiqaro,
E ni maaquvanto variaro.
E ni maaquvanto variarana
nte mate i nronraqama kyauqo.

(Ihi 2:7)

Kotiva hia nyaamwunyaahuara mwi quara tiraitiro, nai mwaaquara mwi quara turave. Kotiva qaiqaa nai mwaaquara tiqaro,
Nte mwia qova variariro mwiva ni maaquvanto variarive,
turave.

(2 Samueri 7:14)

Mwitaa tiqaro Kotiva hia nyaamwunyaahuara mwi quara tiraitiro, nai mwaaquara nraahu mwi quara turave.

⁶ Kotiva nai nraaqiara tauraanaanra mwata mwaini titarera hiro tiqaro, Ekyaa nyaamwunyaahua mwia nrutu nraahu tuaaheraqi quate, turave.

(Lo 32:42)

⁷ Kotiva nyaamwunyaahua okyarara mwitaama tiro:
Nte tuqata nyaamwunyaahua toqavanto tintema kyeta
hianteqa nrohi variarave.

Nte qua ti varuqata mwihua qia auruvanto itaintema
kyeta ni kyaiqa vare variarave, turave.

(Ihi 104:4)

⁸ Nyaamwunyaahuara mwitaa timwa kyero Kotiva nai mwaqaquara
mwaa quara tiqaro,

Kotio, e kepukyavanto varira ntaqikyiqi viqara
ekyaa enta qati nraahu variqira vinanrave.

E ntapihi kyera nraahu ntaqikyiqira vinanrave.

⁹ Ntapihi kyera nrohina okyararama

i mwutukyavanto vahiaro

gora okyarara hia i mwutukyavanto vahirave.

E mwitaa hi variarana nte Kotiva iqaa ntaqikyi varuva

i hena vaisi qaqira mwini kyena,

i nraahu vita kye vate i mwutukyaqitai

kyuge hi varirara variante tina,

nte i nronraqama kyaaurave, tura.

(Ihi 45:6-7)

¹⁰ Kotiva mwitaa timwa kyero qaiqaa nraahu nai mwaqaquara tiqaro,
Nronrao, e haaru toharera mwaa mwatara utu tonanrave.

E ena kyauquqotaira nyaamwuvata utu tonanrave.

¹¹ Nyaamwuvantovata mwatavantovata

hia ekyaa enta vahirara

e nraahuma ekyaa enta variqira vinanrave.

Tuavaaqavanto nrihiqama vintema kyero

nyaamwuvantovata mwatavantovata

nrihiqama quanrove.

¹² Tuavaaqa qaraakya utirera hiro

haaruara ntahuku kyero kyaintema kyera

e nyaamwuvata mwatavata taiqa kyenarave.

Mwia taiqa virara e nraahu hia nyaapaiqama viraitira,

ekyaa enta qati nraahu variqira vinanrave,

turave.

(Ihi 102:25-27)

¹³ Kotiva hia nyaamwunyaahuara tiraitiro, nai mwaqaquara

nraahu mwaa quara tiqaro,

E nrirerera nina kyauqu kyaatutani variraqe

nte i nramwutaahua ru taiqa kyaarira

mwihuaqaa kyuqu ntamwa tera variante, turave.

(Ihi 110:1)

¹⁴ Nyaamwunyaahuara mwihua okyara vahirero mwitaamama vahiro.

Mwihua Kotira kyaiqa vaisivanto hia mwamwantavata vahihata mwana-
raqura nraahu vahiuama varita. Kotiva mwihua airi enta sitaihata uro
Kotiva huvantu nyataani vaisihuua kyaahaqa hi variara.

2

Kotira quara qumina quave tivorave tura

¹ Mwia mwaaqvanto Iesusiva nyaamwunyaahuua nraatara kyero yuni
varirara tita, tire mwia qua riaunanza mwi quara hia qoriri hiraitita,
kepukyaqama kye riemwaqi quara aanrava nraahuma vahiro.

² Haaru Kotiva nyaamwunyaahuua sitovata mwihua Kotira qua Mosesira
timwa mwitovaro mwi quava qutaa qua vahurara tiro, mpovanto mwi
quara nteqa kyovaro Kotiva mwia hiniqama nai kyoqaa mwünrama.

³ Kotiva mwi quara qovarama kyero variqiro viro nraakiara qua mpo
nai nraakyne qorara po timwa nyatero huvantu nyataani quara qovarama
kyero. Tire mwi quarara qumina quave timwa kyeta mwi quara qaqa
kyaarera, Kotiva tiri ruari entava nrinraqe po tire nataama kyetave

ntuqema kye aatu hianteta quananrave? Mwi quara qovarama kyarero nai mwaaqu tiri nronra vaisi titovaro mwiva nraante mwi quara timwa nyuvata mwia qua riohua tirivata timwa timwiavata riaunañrave. Mwi quava haaru Kotiva Mosesira timwa mwu quaravata nraatara kyero nronraqama kyero vahirarama tina.

4 Nraakye qoravanto Kotira quara qutaa quave qiate tiro, Kotiva nai qua timwa nyiahua kepukyaqama nyataihata mwihua nronra kyaiqa, hia taqaa kyaiqara varaqi vi variarà. Kotiva nai mwanraquravata nai kyakya hiraqaa nraakye qora nyi varihata mwihua mpo kepukyu mpo kepukyu vareqata variara.

Iesusiva nraahu tiri huvantu timwa taariva variho tura

5 Tire qaraakya mwata nraakiara qovara hianinranrama ti varita. Kotiva hiama nyaamwunyaahua mwi mwataraqaa ntaqikyiqita quate qiananro.

6 Kotira qua mpovanto mwitaama tiro:

Kotio, e nronravanto variqarara tira,
nanraqamave e qumina nraakye qora mwatan
varurahuara nronraqama kyera riemwaqira vi variaro?

Mwihua nraaqiaraqaaavata nanraqamave
e ntaqikyiqira vi variaro?

7 E nraakye qora utu kyera mwihuara pataqiaqaa
tumitare nkye nyaamwunyaahua mwemwani
kumwaanri pataqiara variqi quate qiananrave.

Nraakiara e mwihua vara vuniqama kyera
mwihua nyutuvata vara viriniqama kyera

8 mwihua nronraqama kyera mwihuara tiqara,
Ekyaa inraikyaqaa ntaqikyiqita quate tinanrave,
tura.

(Ihi 8:4-6)

Mwi quara okyaravanto mwitaamama vahiro. Kotiva nraakye qora nronraqama kyairata mwihua ekyaa inraikyaqaa ntaqikyiqi vivara. Mwihua hiama mpo inraikyaqaa hia ntaqikyivara. Mwihua ekyaa inraikyaqama ntaqikyiqi vivara. Nraakiara mwi quava qutaaqama kyero mwivauma vahiananro. Mate mwaa entara nraakye qoravanto hiama ekyaa inraikyaqaa ntaqikyiqi varita.

9 Mwihua hia mwitaa hiavarovata mwaa entara tire Iesusira ok-yara ntapihi kyaunañra. Kotiva nraakye qora kyuqema nyatarera hiro Iesusirara pataqia tumitarera nyaamwuni variahua mwihua kyuqutarani variqara nraakye qorara rieqara qutu quante tuvaro mwiva nriqa vu inraikyara varero qutu vura. Mwiva ekyaa nraakye qorara rieqaro qutu vurara tiro, Kotiva mwia vuni vita kyero vatero mwia kepukyaqama kyero mwia nrutu vara viriniqama kyaiharo variqiro vi varira.

10 Kotiva variharo Kotiragaatairo ekyaa inraikya qovarama viro ekyaa enta qati nraahu vahiqiro vi variro. Kotiva airi nraakye qorara mwihua ni nraaqiara varivage nte mwihua sitaqina ntena varianinrani ntuaahainani uro kyaankye timwa kyero, Iesusira qati kyovaro nriqa vu inraikyara varaqiro viro uro qutu vurama. Kotiva ntapihi kyero Iesusira qati kyovaro qutu vurama. Iesusiva nriqa vu inraikyara varaqiro viro qutu vurara tiro, mwiva viriniqama viro kepukyavanto variqaro qiomma tiri huvantu kyero Kotiva varinani tivitaqiro uro kyaarivama variro.

11 Iesusiva tiri uaqia hi kyaiqara qua vahira nruka timwa taiva varihata tire mwiva tiri uaqia hi kyaiqara qua nruka timwa taihua varunanranra tiro, Kotiva mwia qovavata tiri tiqovavatama variro. Mwitaama varunranra tiro, Iesusiva tiriara nkye ni nunra katave qianinranra hia kyaurira.

12 Iesusiva mwitaama tiro:

Kotio, ntena nunra kata i okyara timwa nyiqi virerave.

Mwihua ntuvantuama vita varivae nte i nrutu

tuaahereqa ihi timwaqi virerave, turama.

(Ihi 22:22)

¹³ Qaiqaa mwiva tiqaro,

Nte Kotirara qutaave timwa kyena

mwiaqaa vuntuvina varirerave, turama.

(Aisaiaa 8:17)

Qaiqaavata mwiva tiqaro,

Kotiva nraaqiara ni mpihata

mwihua nivata variavana varuvave, turama.

(Aisaiaa 8:18)

¹⁴ Tire Kotira nraaqiara variqata mwamwanta vataahua varunananrama.

Tire mwamwanta vataahua varurarora tiro, Iesusivavata vaisi tuero

tiri nraakye qora nraantantero mwamwanta vataava variqiro vurave.

Saataaninra kepukyavanto ekyaa nraakye qora rupa tovata mwihua

ekyaara qutu vita varuvarora tiro, Iesusiva vaisi tuero Saataaninra

kepukyavanto qumina inraikyaqama quarive tiro, qutu vurave.

¹⁵ Nraakye qoravanto mwatani qati variqi viqata mwihua nkyiari qutira aatu huva mwi inraikyaya mwihua rupa tovata varuvaro Iesusiva mwi

nraakye qorahua mwiqitairo huvantu kyarero vaisi tuero qutu vurave.

¹⁶ Iesusiva hia nyaamwunyaahuara rieqaro mwatani qovarama vuravauma. Mwiva mwatanyaa nraakye qora Evarahaamunra okyarara

rieqaro vaisi tuorama.

¹⁷ Mwiva tiri nai nrunra qata votima kyero vaisi tuero, mwamwanta vataava variqiro vurara tiro, mwiva tiri kyaahaqa hiarivama variro. Mwiva hia mwitaa hiankye titiri, hiama tiri kyaahaqa hiariva mpovanto varitiri. Tire mwatani variavarahua tetavanto tetä uaquia hi kyaiqara qua nruka kyaara aanrava hia vahuvaro Iesusiva mwi quara Kotiva nruka timwa taarive tiro, mwatani tuminro nraaqiara tuemwa vura. Iesusiva tiri nraakye qorara po kye timwaqiro viqaro mwiva Kotira kyaiqa vara mwataariva nnorgravanto variqaro Kotirara kepukyaqama kyero riemwaqiro viqaro Kotiva tiriara mwihua uaquia hi quara nruka nyataarive tiro, tiriara rieqaro qutu vurave.

¹⁸ Iesusiva vaisi tuero variqi vi varuvaro uaquia hi kyaiqava mwia mwataaramaqi viqaro taqovaro mwiva hia uaquia hi kyaiqara utiraitiro, kepukyaqama kyero variqiro vi varurara tiro, uaquia hi kyaiqava tirivata mwataara hiraro Iesusiva tiri qiomma kyaahaqa hiraqe hia uaquia hi kyaiqara utuananra.

3

Mosesiva nronravanto variharo Iesusiva mwiaavata nraatara kyero anoma nronravantoma variro

¹ Ni kata pakya, nkye rauriqata variata. Kotiva nkyi uaquia hi kyaiqara qua nruka nyataihata variara. Kotiva nkyivata nyaanrama taihata variara. Nte vaakya tu quarara rieqanama nkyiara nkye Iesusirara nronraqama kyeta riemwaqitama quatemba tuqo. Iesusiva Kotiva nronraqama kyero titai vaisivama variro. Kotiva tiriqa qua vahira nruka timwa taarive tiro, Iesusiva tiriara rieqaro Kotirani kyaiqa vara mwato vaisiva varihata tire mwia qua riemwaqiqi vi varunanrave.

² Kotiva Iesusira nai kyaiqaa vita vatovaro Iesusiva kepukyaqama kyero mwi kyaiqara varaqiro viqaro Kotira qua nraahu riemwaqiro vurama. Haaru Mosesiva ekyaa Kotira nraakye qoraqaa ntaqikyiqiro viqaro mwia qua nraahu riemwaqiro viqaro kyaiqa varontema kyero, Iesusivavata Kotira kyaiqa varaqiro vurama.

³ Kotiva Iesusira nrutu vuni vara vatero Mosesira nrutu nraakiaranima vatero. Nraamwu hoqa tai vaisiva vuni variharo nraamwu mwiva mwatumwi vahintema kyero, Iesusiva vuni variharo Mosesiva nraakiaranima variro.

⁴ Ekyaa nraamwu hia naiqama kye qovarama viro vahira. Vaisivanto hoqa taiva nraahu vahira. Qio kuaa qarama kyero Kotiva nyaamwuvata mwatavata utu taivama variro.

⁵ Mosesiva Kotira kyaiqa vaisivanto variqaro Kotira qua nraahu riemwaqiro viqaro ekyaa Kotira nraakye qoraqaa ntaqikyiqiro surama. Mwiva mwi kyaiqara vareqaro nraakiara qovara hiani vaisirara timwa nyiqi surama.

⁶ Mosesiva qati kyaiqa vaisivanto varuvaro Karaisiva Kotira mwaaku taruvama variro. Karaisiva Kotira mwaaku taruva variqaro Kotira qua nraahu riemwaqiro viqaro mwia nraakye qoraqaa ntaqikyiqiro vi vari-rama. Tire kepukyaqama kyeqata Karaisirara riemwaqi viqata, Kotiva tiri kyuqema timwa taani entara mwia vekya variqi quarera, tire qiona tiqata, Tire Kotira nraakye qorama varuro, qiananra.

Nkye Kotira quara pupohairata qaqlira kyevorave tura

⁷ Kotira mpukuqi Kotira mwanraquravanto timwa tai quara riaata. Mwi quava mwitaama tiro:

Mate Kotira qua riarera hita

⁸⁻⁹ nkye nkyi haivaqahua Kotira qua rieta qaqlira kyeta nkyiari vu aanranraqaa qua raaquta kyeqata vuntema kyeta nkyevata vivorave.

Kotiva nkyi haivaqahua mwitaama tiro,
Nte nkyi haivaqahuaqi 40 ihiara kyaiqa varaqina
quavata nkyi haivaqahua qumina mwatanu variqi
viqata nte mwihuani kyaiqa varataavarara
hia nronraqama kye riaraitita, mwihua qua
raaquta kyeqata nianra mwia mwoqaga
mpo kyaiqa nraahu varaarive tiqata nina nraahu
mwataarama kye taqarerera uti varuhua varurave.

¹⁰ Mwihua mwitaamaqi vuvaro
ni raraqa tovana mwihuara tiqana,
Mwihua ekyaa enta api aanra mwiaqaa nraahu
virera uti variahuate.

Mwihua qua raaquta kyeqata
hia ni aanraqaa virera uti variahuate, qiavarave.

¹¹ Mwihuara ni raraqa tovana
nte ntene kyauqu nriqiqaa vatena tiqana,
Mwia kyaara mwihua hia uro nivatama kye tekya
hivarave, turama.

(Ihi 95:7-11)

¹² Ni kata pakyaa tuaavo, nkye rauriqata variata. Nkyi su nyaato mwutukyavanto uaqiamma virata nkye Kotira quara hia qutaa quave timwa kyeta tuqasaa vita qati variqi vi vari mwanriqara, Kotira mwoqa mwivorave.

¹³ Mate mwaa entara nkye Kotiva hinani nrita mwia aanraqaa nrohi entavama vahiro. Uaqia hi kyaiqava nkyi vara apiqama kyairata nkye hia Kotira aanraqaa vivorave titi, mwaa entara nkye nai kepukyaqama mwate nai kepukyaqama mwatemaqi viqata Kotira aanraqaa quata.

¹⁴ Haaru enta tire Karaisirara qutaae timwa kyeta mwianra kepukyaqama kye variqi quavanarave. Mwi entaraqatai tire kepukyaqama kye Karaisirara riemwaqi viqata matevata variqi vita

uro qutu quarera, tire qiomia tiqata, Tire Karaisiravata variqi vurahuave, qiananra.

¹⁵ Nte qaiqaa Kotira mpukuqi tu quara tirerama. Mwitaama tiro:
 Mate Kotira qua riarerā hita,
 nkye nkyi haivaqahua Kotira qua rieta qaqira kyeta
 mwihua nkyiari vu aanranraqaa nraahu
 qua raaquta kyeqata virerata uti varuntema kyeta
 vivorave, tura.

(Ihi 95:7-8)

¹⁶ Ta vaishua Kotira qua rieta qaqira kyeta nkyiari vu aanranraqaa nraahu nrohirera uti varurave? Mwihua tiri haivaqahua. Mosesiva mwihua sita varero Isipisairo uro kyohua, mwihua Kotira qua rieta raaqutorama.

¹⁷ Kotiva tahuara raraqa tovara 40 ihiara variqi vurave? Mwiva tiri haivaqahua raraqa tovaro varurave. Tiri haivaqahua qumina mwatani variqata uaqia hu kyaiqara utura kyaara mwini qutu taiqa vurama.

¹⁸ Kotiva nai kyauqu nriqiqaa vatero tiqaro, Mwihua hia ni mwata tekya hi mwataraqi uro tekya hivarave, tu quara, tahuara turave? Mwiva tiri haivaqahua turave. Mwihua Kotira qua rieta qaqira kyeta nkyiari nrohu aanranraqaa nraahu virera uti varurara tiro, Kotiva mwitaa turama.

¹⁹ Tire ntapihi kyaurata mwihua hia Kotira quara qutaa quave turara tita, mwihua hia qioqama kye Kotira mwata tekya hi mwataraqi tekya hirera vura.

4

Kotira nraakye qoravanto tekya hirara tura

¹ Haaru Kotiva nai kyauqu nriqiqaa vatero tiqaro, Ni nraakye qoravanto nivatama kyeta uro tekya hiqata varivarave, turama. Mwianra rieqata nrivave tire aatu hiqata variara. Haunri nkyiqitairo mpovanto mpo aanraqaa ntuqia viro hia tekya hi mwataraqi quankyora.

² Tire mate riaurantema kyeta tiri haivaqahuvata Kotira qua riora. Mwihua Kotira qua rioraro mwi quava hia mwihua kyaahāqa hura. mwihua mwi quara rieta mwianra hia qutaa quave timwa kyeta qaqira kyorara tiro, mwi quava hia mwihua kyaahāqa hura.

³ Tire Kotira qua rieta qutaaave qiarahua nraahuma uro Kotiravata tekya hiananra. Kotira mpukuqi nraakye qora Kotira qua nteqa kyaahuara Kotiva mwitaama tiro:

Ni ntaraqa taihana nte ntena kyauqu nriqiqaa vatena
 tiqana, Mwihua hia uro ni vatama kye tekya hivarave,
 turama.

Kotiva nai kyaiqa haaru taiqa kyero tekya huva viviro taiqa vuvarovata mwi quara turama.

⁴ Kotira mpukuqi Kotiva tekya hu entarara mwitaama tiro:
 Kotiva 6 entara kyaiqa varaqi viro uro taiqa kyero
 7 entaqaa mwiva tekya hurave, turama.

(Okyara 2:2)

⁵ Kotiva mwi entaraqaa tekya hurara tita, Kotira nraakye qoravata tekya hita qati variqi vivara. Kotira qua rieta qorrima kyeqa nrohia nraakye qorahuara Kotiva mwitaama tiro:
 Mwihua hia qio nte tekya hianinrani vivarave, tura.

⁶ Haaru tiri haivaqahua Kotira qua kyuqe qua rieta qaqira kyeta hia qutaa quave turara tita, mwihua hia Kotiravata tekya hirerata vura. Kotira quara qutaa quave ti nraakye qorahuua mwihuama Kotiva qati kyairata Kotiravatama kye tekya hivara.

7 Haaru tiri haivaqahua Kotira qua qaqira kyeta mwia kyaara hia Kotiravata tekya hireru vuvaro airi ihi nritarovaro Kotiva qaiqaa mpo entara mwatama tero tiqaro, Mate mwaa entaraqaa ni qua riaate, tiro. Mwiva tiri haivaqara Ntevitira nroqitairo tiri haivaqahua mponramwuanra vaakya timwa nyu quarara tiqaro mwitaama tiro:
Mate Kotira qua rieta hia qoririma kye
mwia qua qaqira kyaate, tura.

(Ihi 95:7-8)

8 Haaru tiri haivaqahua gmina mwatani variqi vita qutu vuvaro Iosuaava mwihua nraaqiara sita varero uro Isareri mwatani kyorave. Kotiva ni mwatani tekya hiate tiqaro hia Isareri mwata mwianra turavauma. Mwiva Isareri mwatanianra tutiri, mwiva hiama nraakiara Ntevitira nroqitairo tiqaro, Mwaa entara ni qua riehua ni mwatani tekya hivarave, tutiri. Kotira ni mwaatave tiqaro mwiva nai varinanianra ti varira.

9 Kotiva 6 entara kyaiqa utuqi viro uro mwaa mwatara taiqa kyero 7 entaraqaa tekya hurave. Kuua qarama kye tire Kotira nraakye qoravanto kyaiqa taiqa kyeta mwiaqatai tekya hiananrave.

10 Kotiva nai kyaiqa taiqa kyero tekya huntema kye Kotira nraakye qoravanto nkyiari kyaiqa taiqa kyeta uro Kotiravata tekya hiqata variqi vivarave.

11 Mwianra rieqatama nrivaqe Kotiravata varianranra hia qoriri hiraqe kepukyaqamaqi vita mwini quara. Tiri haivaqahua Kotira qua nteqa kyeta mwia kyaara mwihua hia Kotira mwaatani tekya hirera vurave. Tiriqitairo mpovanto mwihua nraantantaankyorave.

12 Kotira quavanto qati nraahu vahiqi viqaro kepukya quama vahiro. Paipa hini hini vai vahira votima kyero mwia quavanto mpoqama kyero vahihira. Paipavanto mwamwanta toqaqiro viro uro mwukyaarivata mwativata teqä kyero ntainra kyaintema kyero Kotira quavanto vaisi vu nraato mwutukyaqi vahira qovarama kyero mwi vaisira mwataarama kye taqero tiqaro, I vu nraato mwutukyaqi vahi quara qora quave, kyuqe quave, ti varira.

13 Kotiva ututai inraikyaraqitairo hia mpo inraikyavanto Kotira vuqaa ueqeta viro vaiho. Mpo inraikya mpo inraikya nyaamwuni vahi inraikyavave, mwatani vahi inraikyavave, ekyaa inraikyavanto qo tuananraaqaa vailharo Kotiva mwi inraikyara taqe variho. Nraakiara tire ekyaa mwitaama varira mwia vuqaa variqatama teta utuana inraikyara ekyaa timwa qovarama kyeqata timwa mwiananra.

Iesusiva tavaaraqaanaa vaisi vunyaava tiriara rieqaro Kotirani kyaiqa varaivama variro

14 Iesusiva Kotira mwaaquvanto variqaro tiri kyaahqamaqiro viro Kotiva tiri qua nruka timwa taarive tiro, tiriara rieqaro Kotirani kyaiqa vara mwatero uro nyaamwuni Kotiva varinania variro. Mwiva tavaaraqaanaa vaisi vunyaava mwitaama varirara tita, nrivaqe mwia qua kepukyaqama kye riemwaqita quara.

15 Tire ugenraunra nraakye qorahua variqata hia qio qora kyaiqa nraatara kyaarahuama varita. Tire mwitaa hura nraakye qorahua variqata haunri tiri tavaaraqaanaa vaisi vunyaaranra mwiva hia tiriara po kye ti variho qiaravaara. Ekyaa qora kyaiqvavanto tiri mwataara hirero uti vari kyaiqava, kuua mwi kyaiqava Iesusiravata mwataara hiqaro taqovarovata Iesusiva hia qora kyaiqa mpoqiaavata varora.

16 Iesusiva tiri kyaahqama timwa taiva nronrvavanto variqaro nyaamwuni uro varirara tita, nrivaqe hia aatu hiraitita, Kotiva varira mwia nraaqani uro variara. Kotiva tiri kyugema timwa te varivama variro. Tire mwianra aakyara qiararo mwiva po timwa timwa taananro. Muaanra

vahiani entara tire mwianra aakyara qiararo mwiva tiri kyaahaqa hiqaro tiri kyuqema timwa taanano.

5

Qumina nraakye qorara rieqaro tavaaraqaanaa vaisivanto Kotirani kyaiqa varaaninranra tura

¹ Mwi vaisiva qati vaisivanto nraahu varuvata mwia hena vaisivanto mwia nronraqama kyeta tavaaraqaanaa vaisi variqara Kotirani mwi kyaiqara varaante tura. Mwi vaisiva nraakye qora uaqia hi kyaiqarara rieqaro quara vahi aasau ru kyeqaro qia quara mwateqaro mwi kyaiqara vare varura.

² Mwi vaisiva qati vaisi hia kepuuya vahiva variqarora tiro, mwiva taqairaro mwia hena vaisi mpovanto hia kyuqe vu nraato vahiariva qora kyaqa utu kyairera, mwiva nte mwi vaisira votima kyena hia kepuuyaqa huvama varuqo timwa kyero mwia qihakyma mwafaananro.

³ Kotira nraamwuqi vuniqama viro Kotira kyaiqa vara mwate vari vaisiva mwivavata vaisivanto variqarora tiro, mwiva hia hini nraakye qora uaqia hi kyaiqarara nraahu riaraitiro, mwiva nai uaqia hi kyaiqararavata rieqaro quara ru kyero Kotira qia quara mwate varira.

⁴ Mwi vaisiva hia nai nronraqama viro mwi kyaiqara vare varira. Kotiva mwia haivaqara Eroninra nraanrama kyero nronraqama kyontema kyero, Kotiva mwi vaisira nraanrama kyero nronraqama kye varira.

⁵ Mwia votima kyero Karaisiva hia nai nronraqama viro tiqaro, Kyai nte nraakye qorara rieqana Kotira kyaiqa vara mwataankye, tura. Kotiva mwia nronraqama kyero mwianra mwitaama tiro:

E ni maaquvanto variaro.

Mate nte i qovama varuqo.

(Nte mate i nronraqama kyauqo.)

⁶ Qaiqaa Kotira mpukuqi Kotiva Karaisirara mwitaama tiro:

Vaisi mpo Merikisetekiva nraakye qora uaqia

hi kyaiqarara rieqaro ni kyaiqa vara mate varurave.

Evata mwia nraantantamwa kyera vareqarama ekyaa

enta mwi kyaiqara varaqira vinanrave, tura. *(Ihi 110:4)*

⁷ Iesusiva mwatani varu entaraqaa mwiva ti atura ntiro vera kyero ntataqi viqaro Kotirara aakyara ntoro. Mwiva Kotirara nte qutu quarira e qiomia ni kyaahaqa hinanrave timwa kyero hia nai kyakya hurara riaraitiro, Kotira qua nraahu riemwaqiro vurara tiro, Kotiva mwia qua riorevare.

⁸ Iesusiva Kotira mwaaquvanto variqaro mwiva hia nte mwia mwaaquve tiraitiro, tirema variqaro nriqa vu inraikyara varaqiro viqarora tiro, mwiva kyuqema kyero Kotira qua riemwaqiro vura.

⁹ Mwiva Kotira qua nraahu riemwaqiro viqaro nriqa vu inraikyara varaqiro viro uro qio varu vaisiva varura. Iesusiva qio vari vaisiva varirara tiro, nraakye qoravanto mwia qua riemwaqi vihua varivaro Kotiva mwihua huvantu nyatairata mwihua ekyaa entama qati variqi vivara.

¹⁰ Kotiva Iesusira nronraqama kyero tiqaro, Merikisetekiva nraakye qora uaqia hu kyaiqarara rieqaro nini kyaiqa vara matontema kyero Iesusivavata nraakye qora uaqia hi kyaiqarara rieqaro nini kyaiqa vara mwataananrove, tura.

Tire nronra tuaurahua nraaqiara taaqa nraantantamwa kye variarorave tura

¹¹ Tire mwaa quara airi qua nkyi timwa nyianre tita, taqauraro nkyi su nyaatovanto hia qioqama kye vahiro qua okyara hia ntapihaqara ihata tire mwukyaari tu kyeta mwaa quara nkyi timwa nyi varunanza.

¹² Nkye airi enta mwaa quara riemwaqiqi viqata ntapihi kye rieta mpohuvata timwa nyiataara vahata nkye hia Kotira qua ntapihi kye rie variavo. Mwia kyaara tire mwi quara okyaraqaatai nkyi timwa nyianrava qati vahio. Nkye mwaa entara kepukya kyara nraataarama nraamwa nraahu nre variavo.

¹³ Nraamwa nraahu nre variva, mwiva nraaqiara taaqa nraahuma variro. Mwiva nraaqiara taaqa variqaro hiama qio kyuqe hi aanranrave, uaquia hi aanranrave, anoma kyero ntapihianano.

¹⁴ Kepukya kyara nronra tuaahua nranra hiarave. Nronra tuaahua kepukya kyara nre variantema kye Kotira nraakye qoravanto kepukya qua qio rie varivaro mwihua su nyaatovanto qio ntapihi vihatara tita, mwihua qiomma kyuqe hi aanranrave, uaquia hi aanranrave, anoma kye ntapihivara.

6

¹ Mwi quara rieqatama nrivaqe Karaisira qua rieqata okyaraqinaa qua mwiaqaa vateta, tavaaranavata mwutunivata vahi quara riarerata quara. Vuni nkye uaquia hu kyaiqara uti varuvaro nkye ekyara qutu viva vahuvata nkye mwi aanranraqaatai tuqasaavi Kotirara riemwaqit vura.

² Nkye nramanri varovaro vaisi mpovanto nkyiqa nai kyauqu vatovata nkye Kotira mwanraqura vare, nkye Kotiva nraakye qora vara sivuma kyaani quara rieta, ekyara entaqaa Kotiva ko qianinravata nkye riaarave. Hia tire okyarani toharai quara mwia nraahu riemwaqita quare.

³ Kotiva qati kyairera, tire uromwi mpooqiyavata viqata tavaaranavata mwutunivata vahi quara riemwaqita quara.

⁴ Kotira aanraqaa vita mwiaqaaatai qaqlira kye quahua, nataama kyeve mwihua qaqlira Kotira aanraqaa vivara? Mwihua kyokiraq variavaro su nyaatovanto qatua vihata mwihua Kotiva kyuqema nyataaninra nyaamwunyaa inraikya vareta, mwihua Kotira mwanraqura vareta,

⁵ mwihua mwataarama kye taqaavarao Kotira qua kyuqe qua nraahu vahata mwihua Kotiva nraakiara qovarama kyaani inraikya hini okyara taqaara.

⁶ Ekyaa mwi inraikya taqaahua, mwihua Kotira aanra qaqlira kyaivera, mwihua uaquia hi aanranraqaatai qaqlira kye nrumu ntante viva hiama qio vahiananrove. Mwitaa hiahua mwihua Kotira mwaaku qaqlira kyaatariqaa ru teqata ekyahua suqaa mwia kyaurira inraikya vara mwita. Mwitaa hi variarara tiro, mwihua qaqlira nrumu ntante Kotira aanraqaa viva hiama qio vahiananro.

⁷ Kotira qua riemwaqiqi vi varia nraakye qorahua mwata kyuqera votima kyeta variara. Vativanto ntiro mwi mwataraqi viharo kyara tutaiharo mwata mwigitaro quipiqe variharo Kotiva mwata mwianra kyuqe mwatavema tiro.

⁸ Mwata mpooqatairo kyaantamwanra ubi auquqa hiva uakukya kypata nraahu quipiqe variharo Kotiva mwi mwatarara uaquia hi mwataravema tiro. Mwi mwataraqi quipiqaaninra qia tutu kyairaro itamwama kyaananano.

⁹ Ni nramwunaa tuaavo, nte uaquia hi mwatararavata kyuqe mwataravata tqiana hia nkyiara uaquia hia mwatahuave tqianavauma tina. Tire nkyiara tqata, Mwihua kepukyaqama kyeta aanra kyuqeraqaa vi varivaro Kotiva mwihua sitaarihuama variavo, tunanra.

10 Kotiva hia nkyi apiqama nyataananrove. Mwiva nkyi ntapihi nyataananrove. Nkye mwiani kyaiqa varaarara hia taunru kyaananrove. Nkye Kotirara mwutukya vahata nkyeta hena nraakye qora Kotira nraakye qora kyaahaqama nyataaarare, mate mwaa entaravata kyaahaqama nyaterarave, Kotiva hiama taunru kyaananro.

11 Nkye mwia vekya variva quataa mwivau vahiarive tita, nkye mwatani variqata Kotira aanraaqaa kepukyaqama kye variqi vita uro taiqa kyaata. Nkye mwitaama varira mwianra tiri mwutukya vahata varunana.

12 Tire nkyiara Kotira aanraqaa viqata pupohevovare turo. Kotiva nai kyaauqu nriqiqaa vatero kyuqema nyatarerave tuvata mpo uhua mwi quarara quataa quave, timwa kyeta hia pupohovata variqi vuvarora tiro, Kotira quavanto mwihuaqi quataa mwivau vahura. Nkyevata mwihua votima kye varivaqe tire qiovema qiananra.

Kotiva nai kyauqu nriqiqaa vateqaro tu quarara tire qio quitaavema qiananrave tura

13 Kotiva tiri haivaqara Evarahaamunranra nte mwitaa mwitaa hirerave tigaroma Kotira nraatara kye variva hia mpovanto varuvarora tiro, mwiva nai nrutu nteqaro nai kyauqu nriqiqaa vafero mwitaa turama.

14 Mwiva tiqaro, Nte ntene kyauqu nriqiqaa vateqanama nte i kyuqemaqina vireravema, tuqo. E mwatara terahua airinti varivarave, tura.

15 Kotiva mwitaa tuvaro Evarahaamuva hia qoriri hiraitiro, qakyoma kyero Kotira vekya variqiro vuvaro Kotiva kyauqu nriqiqaa vateqaro tu quava quataa mwivau vahuvaro mwiva qoraisi nraaqiara mwata tora.

16 Vaisivanto nte mwitaa hirerave tirera hiro, nai kyauqu nriqiqaa vateqaro mpovanto mwivavata nraatara kyero nronraqama varira nrutu timwa kyero nai kyauqu nriqiqaa vatairave. Mpovanto mwiva quara unra quave timwa kye airi qua qiankyo tiro, mwiva nronra vaisi nrutu nteqaro nai qua kepuqyaqama kye varirave. Iutaa mwatanaa okyara mwitaamama vahiro.

17 Kotiva Evarahaamunranravata mwiva mwatara tohuaravata rieqaro mwivavata nai kyauqu nriqiqaa vateqaro timwa to quara kepuqyaqama quarive tiro, nai nrutuvata nteqaro timwa torave. Kotiva mwitaa turara tiro, mwiva timwa to quava hia tumitare vahiraro mpo quavanto nritarero vahiananro. Mwiva timwa to quava nraahuma vahiananro.

18 Kotiva nai kyauqu nriqiqaa kyoraravata, nai nrutu ntoraravata, mwitaa hurara tiro, mwia quavanto hiama qio unra qua vahiananro. Kotiva timwa to quava quataa qua vahirara tita, tire Kotirara tiriqa ntaqikyante turahua hia aatu hiraitita, Kotira qua rieqatama kepuqyaqama kye mwia quavanto quataa qovara hiani entara vekya varita.

19 Kotiva timwa to quava quataa qovara hiani entarara rieqatama tire hia ntuqutu vaisivi hiraitita, kepuqyaqama kyeta variara. Kotira quavanto quataa qovara hiani entarara rieqatama tire qiomma tauha voti hira pati kyeta Kotiva varira turuarani uro variananra. Tire qiomma mate mwaa entara Kotira nraaqani uro variananra.

20 Jesusiva tiri kyaahaqama timwa teqaro mwiva nraante Kotiva varira turuarani vurama. Haaru Merikisetekiva nraakye qora uaquia hu kyaiqarara rieqaro Kotirani kyaiqa vara mwatontema kyero Jesusivavata Kotiva nraakye qora qua nruka nyataarive tiro, Kotirani kyaiqa vara mwatero ekyaa enta qati variqiro vivama variro.

Merikisetekira okyarara tura

1 Merikisetekiva vunyaa vaisivanto mwatukya mpo Saremiqaa ntaqikyiqiro viqaro mwiva nraakye qorara rieqaro mwiva virini varira mwanriqa, Kotira kyaiqa vare varu vaisiva varurama.

Mpo enta mwiva varuvaro Evarahaamuva ntaquqi viro nronra vaisi vunyaa vaisinramwu nraatara kyero nrumu ntantero aanrani vi varuvaro Merikisetekiva Evarahaamunra uro huntu kyero nai kyauqu mwiaqaa vatero mwianra tiqaro, Kotiva i kyuqema kyero ntaqikyi mwataarive, tiro.

2 Timwa kyovaro Evarahaamuva ntaqiqaro varato inraikyara ntainra kyero kyauqurutana vato inraikyaraqitairo kuaa inraikya Merikisetekira mwunrama. Merikisetekira nrutu okyara mwaa quaraqitai tirera, *Vunyaa Vaisivanto Ntapihi Kyero Nrohi Varivavema qiananra*. Mwiva Saremiqaa ntaqikyi varurara tiro, mwia nrutu mpo mwaa quaraqitai tirera, *Mwaater-aqama Kyero Ntaqikyi Varivavema qiananra*.

3 Merikisetekira nrohua qohuave, mwia okyarave, hia mpukuqi vahurara tita, hia tire mwia ntaphunana. Mwia mwatato entarave, mwiva qutu vu entarave, hia mpukuqi qara ntumwa torara tita, hia tire mwia ntaphunana. (Kotiva mwi vaisira nronraqama kyorara tiro, mwiva ekyaa entama Kotirani kyaiqa varaqiro quananro.) Mwi vaisira nraantantamwa kyero Kotira mwaaquvanto nraakye qorara rieqaro ekyaa enta Kotirani kyaiqa varaqiro quananro.

4 Merikisetekiva nronra vaisivanto varurara rieqata variata. Evarahaamuva tiri haivaqahua vunyaa vaisivanto ntaquqiro viro nramwutaa nraatara kyero, mwihua hu inraikyara varatora kyauqurutana vatoraqitairo Merikisetekira kuaiqia mwunrave. Merikisetekiva nronra vaisi varurara tiro, Evarahaamuva mwitaama kyero mwunra.

5 Rivaira okyaraqitaita Mosesira qua okyara vataqi viqatama nraakye qorara rieqata Kotira kyaiqa varaqi vihua, mwihua qumina nraakye qorara nkyeta kyauqurutana vate inraikyaraqitai kuaiqia tiri timwiate timwa kyeqata mpo inraikya mpo inraikya vare variarave. Mwihua nkyiari nramwunaa Evarahaamuva mwataratai huaqitai vare variarave.

6 Merikisetekiva hia Rivaira kuaa okyaravanto variqaro Evarahaamuva nai hu inraikyara tukyama kyero vatoraqitairo kuaa inraikya varero Evarahaamunranra tiqaro, Kotiva iqaa kyuqema ntaqikyi mwataarive, tura. Kotiva nai kyauqu nriqiqaa vateqaro timwa to vaisiva, Evarahaamuva varuvaro Merikisetekiva nai kyauqu mwiaqaa qutero mwi vaisirara tiqaro, Kotiva iqaa kyuqema ntaqikyi mwataarive, turave.

7 Hiama vaisi mwatumwi variariva nronra vaisiqaa kyauqu vatero mwianra tiqaro, Kotiva iqaa kyuqema ntaqikyi mwataarive, qiananrove. Nronra vaisivanto nai kyauqu mwatumwi variani vaisiraga vateroma mwianra tiqaro, Kotiva iqaa kyuqema ntaqikyi mwataarive, qiananro. Merikisetekiva nronra vaisivanto variqarora tiro, mwiva nai kyauqu Evarahaamunraaga vatero tiqaro, Kotiva i kyuqema mwataarive, turave.

8 Rivaira okyaravanto nronraqama vita Kotira nraamwuqi Kotira kyaiqa varaqita vi variahua, mwihua nraakye gora vataa inraikyara kyauqurutanaqa tukyama kyeqa vataaraqitai kuaiqia vare variara. Rivaira okyara mwihua variqi vita ekyaa qutu vi variahua variara. Merikisetekiva Evarahaamuva ntainra kyero vatoraqatairo kuaiqia varora. Kotira mpukuqi Merikisetekira okyarara mwiva qati variqiro quari vaisivave turara tiro, Merikisetekira okyaravanto Rivaira okyara mwihua nraatara kyora.

9-10 Nte Merikisetekira okyarara rieqana mpo quavata tirera. Rivaiva Kotira kyaiqa vare varuva varuvatara tita, nraakye qoravanto nkyiari

vato inraikyara kyauqurutanaqitai kuaigia vara kyeqata Rivaira mwi varura. Evarahaamuva mpo inraikya ntainra kyero kyauqurutanaqitairo Merikisetekira mwu entara Rivaira hia mwatavaro Evarahaamunra nai haivaqara mwamwantaqi varura. Mwi entara Rivaiva nai haivaqara Evarahaamunra mwamwantaqi variqarora tiro, mwivavata Evarahaamunravatama kyero variqaror Merikisetekira mwi inraikyara mwuntema kyero mwunra. Rivaiva Merikisetekira mwi inraikyara mwunranra tiro, Merikisetekira okyaravanto Rivaira okyara nraatara kyora.

¹¹ Kotiva nai qua okyara Mosesira timwa mwu entara mwiva Rivaira okyara vara nrönraqama kyero mwihuara tiqaro, Mwi okyararaqinaa vaisivanto nraahuma qio nini kyaiqa varaanarove, timwa kyero Rivaira kuaa okyara varu vaisira Eroninra nrönraqama kyovaro Eroniva vuni variqaror mwi kyaiqara varorave. Rivaira okyara mwihua variqata nraakte qorara rieqatama Kotira kyaiqa varaqi viqata quara vahi aasau ru kyeta Kotirani qia quaraqita vuvarc mwihua kyaiqvavanto hia anomia kyero kyuqe kyaiqa vahura. Mwihua kyaiqvavanto qio vahutiri, vaisi mpovanto Kotirani kyaiqa varaariva Jesusiva hiama qovara hutiri. Jesusiva qovara hiro Merikisetekiva Kotira kyaiqa vara mwatontema kyero Kotira kyaiqa vara mwatora. Mwiva hia Eroniva Kotira kyaiqa varontema kyero Kotira kyaiqa vara mwatora.

¹² Haaru Kotiva Rivaira okyarara mwihua nraahuma ni kyaiqa varaqi quate tura. Nraakiara Kotiva mwi quara qatinani vara kyero Jesusira titovaro mwiva Kotira kyaiqa vararerero tumunranra tiro, Mosesira qua okyaravantovata qatinaniqama hiananro.

¹³ Tiri vunyaa vaisivanto Jesusiva hia Rivaira okyara kuaa okyaravanto varura. Hia Jesusira okyaraqitairo mpovanto Kotira nraamwuqi Kotira kyaiqa vara mwataariva varura.

¹⁴ Tire ntapihi kyauraro Jesusira okyaravanto Iutaa okyarama vahiro. Hia Mosesiva Iutaa okyaraqinaanra vaisi mpora Kotira nraamwuqi Kotira kyaiqa varaqiro quarive tura.

¹⁵ Jesusiva hia Rivaira okyaravanto kyaiqa varontema kyero Kotira kyaiqa vararaitiro, mwiva Merikisetekiva Kotira kyaiqa varontema kyero Kotira kyaiqa vararerero tumunranra tita, tire ntapihi kye taqauraro Kotiva Rivaira okyara mwihua nraahu ni kyaiqa varaqi quate tu quara qaqira kyora.

¹⁶ Vaisi mpovanto Rivaira okyaravanto varuvvara tiro, mwiva Kotira nraamwuqi Kotira kyaiqa vara mwate varura. Jesusiva hia mwihua nraantamwa kyero nai okyarara riemwaqiro viraitiro, mwiva kepukyavanto ekyaa enta qati nraahu variqiro vi varivara tiro, mwiva Kotira kyaiqa varaqiro vura.

¹⁷ Kotira mpukuqi Jesusira okyaraara mwitaama tiro:
Merikisetekiva Kotira kyaiqa vara mwantontema kyera
evata Kotira kyaiqa varaqi viqara
ekyaa enta qati variqi vinanrave, turama.

(Ihi 110:4)

¹⁸⁻¹⁹ Rivaira okyaraqinaa vaisinramwuvanto Kotira kyaiqa varaqi viqata hia qio nraakte qora uaqia hu kyaiqara qua nruka nyatovaro mwihua kyaiqvavanto hia kepukya vahuvaro Kotiva nai Mosesira mwu quara vara kyero qatinani nruka kyero qaraakya qua qovarama kyora. Haaruua qua Mosesira qua okyara rieqaro nrolu vaisiva, hia kyuqema varu vaisiva varura. Qaraakya quavanto nritarero vahirara tita, tire qaraakya qua rieqatama tire qiomaa entara Kotira nraaqani uro variananra.

20 Kotiva Iesusira vara sivuma kyarera hiro nai kyauqu nriqiqa vateqaro qua tura. Rivaira okyaravanto Kotira kyaiqa varareru utuvaro Kotiva hia kyauqu nriqiqa vateqaro qua tura.

21 Kotiva nai kyauqu nriqiqa vatovaro Iesusiva nraakye qorara rieqaro Kotira kyaiqa varaqiro vura. Kotiva Iesusirara mwitaama tiro:

Nte i nronravanto variqana

ntena kyauqu nriqiqa vatena tiqana,

E ekyaa enta qati variqira viqara

ni kyaiqa varaqira vinanrave.

Hia nte mate timwa taani quara vara kyena

qaqira kyaaninrave, tura.

(Ihi 110:4)

22 Kotiva nai kyauqu nriqiqa vateqaro Jesusirara mwitaam turara tita, tire ntapihi kyauraro qaraakya quavanto haaruaa qua nraatara kyero nritareroma vahiro.

23 Rivaira okyaravanto haarua qua rieqatama Kotira kyaiqa varaqi viqata quutuqi vura. Mwi kyaiqara airi vaisivanto varaqi vura.

24 Qaraakya quavanto qovarama viharo Iesusiva ekyaa enta qati variqi vi varivara tiro, mwiva Kotira kyaiqa varaqiro viqaro ekyaa entama variqiro quananrove.

25 Iesusiva ekyaa enta qati variqiro vi varirara tita, nraakye qoravanto tiri kyaahaqama timwa taante ti variavaro mwiva ekyaa enta mwihuara rieqaro Kotirara aakyara ntamwaqiro quananro. Iesusiva mwitaama varivara tiro, mwiva nraakye qora kyaahaqama nyataariva qio variharo Kotiva mwihuara qiomha huvantu nyataananro.

26 Iesusiva vuni variqaro tiriara rieqaro Kotira kyaiqa vara mwate varivama variro. Mwiva Kotira kyaiqa nraahu vare varivama. Mwiva hia uaqia hi kyaiqaravata utiraitiro, kyuqe kyaiqa nraahu vare varivama variro. Uaqia hi kyaiqara uti variahua variavaro mwiva nanrianraama kyotatavanto variro. Kotiva mwia tuaahera kyaiharo mwiva nyaamwuni viro nraatara kyero veratom variro. Iesusiva mwitaama vari vaisiva varivara tiro, mwiva qioqama kyero tiri kyaahaqha hiarivama variro.

27 Rivaira okyaravanto mpo enta mpo enta Kotira kyaiqa varaqi viqata mwihu nkyiari uaqia hu kyaiqarara nraante rieqata quara Kotirani qiaqaa kyovaro itamwa kyovata mwia nraakiara nraakye qora uaqia hu kyaiqarara rieqata mwitaam hura.

Iesusiva hia mwihu huntu hura. Hia Iesusiraa uaqia hi kyaiqava vahuvara tiro, hia nai vara ntapihiani kyaiqara nraante mwiva varora. Hia mwiva mpo enta mpo enta quara qiaqaa kyovaro itamwa kyovaro Kotirani mwi kyaiqara varaqiro vura. Mwiva hia airi nani mwitaam hiraitiro, mwiva kuua nani nraakye qora uaqia hi kyaiqarara rieqaro nai mwamwanta Kotira mwinro qutu viqaro Kotira kyaiqa vara mwatora.

28 Mosesira qua okyarara rieqatama nraakye qoravanto Rivaira okyaraqi vaisi nronraqama kyeta tiqata, Nkyenramwuma tiri uaqia hi kyaiqarara rieqata tiri kyaahaqha hiqata Kotira kyaiqa varaqi quate, tura. Mwitaam tuvata mwi vaisinramwuhua nronraqama vita hia kepukya vahuhuavata variqata mwi kyaiqara vare vararua.

Kotiva Mosesirara qua timwa to entara mwia nraakiara Kotiva nai kyauqu nriqiqa vatero nai nrutu ntero tiqaro, Ni maaqvanto ni kyaiqa varaqiro quananrove, timwa kyero mwia nronraqama kyora. Mwia mwaqvanto nronraqama viro Kotira kyaiqa varaqiro viqaro qioqama kyero vari vaisiva variqarara tiro, mwiva nronraqama viro ekyaa entama mwia kyaiqa varaqiro quananro.

8

Iesusiva tavaaraqaanaa vaisi nronravanto nyaamwuni variqaro tiri kyaahaqa hiqaro Kotira kyaiqa vara mwate varivama variro

¹ Nte qua ti varura mwia okyara vahirero mwataamama vahiro. Iesusiva tavaaraqaanaa vaisi nronravanto nyaamwuni variqaro tiri kyaahaqa hiqaro Kotira kyaiqa vara mwate varivama variro. Nyaamwuni nronravanto Kotiva variharo mwi vaisiva mwia kyauqu kyaatutanimu mwatakyaa viro variro.

² Rivaira okyaravanto Kotira kyaiqa varaqi viqata vaisivanto kyauqugo hoqa to nraamwunraqi kyaiqa vare variqata mwi nraamwunranra Kotira nraamwuve ti varura. Iesusiva nyaamwuni variqaro Kotiva hoqa taira nraamwu tuananraqi variqaro Kotira kyaiqa varaqiro vi varira. (Mwi quara ntapihi kye tirera Iesusiva nyaamwuni quttaa Kotiva varinani uro variqaro Kotira kyaiqa varaqiro vi varirave.)

³ Nraakye qoravanto Rivaira okyaraqinaanra vaisi mpo nronraqama kyarera hita mwianra tiqata, E tiri kyaahaqamaqi viqara vunyaa vaisivanto variqara quara rukyeqara Kotirani kyairaro qiaqaa itaarive, qjara. Mwihua mwitaa qiavaro mwi vaisiva quara rukyeqaro Kotirani kyaiharo qiavantato itamwa kyaiharo mwi kyaiqara varaqiro vira. Qio tiri kyaahaqama timwa tegaro Kotira kyaiqa varaqiro vi vari vaisiva, Iesusiva, mwivavata Kotira kyaiqa vareqaro mpo inraikya Kotira mwinrama. (Mwiva nai nraanre Kotira mwinrama.)

⁴ Iutaa qua mwaanra rieqata Rivaira okyaravanto Kotira kyaiqa varaqita quara tiro, Iesusiva mwatani varitiri, mwiva hiama mwi kyaiqara varaitiri.

⁵ Rivaira okyaravanto Kotirani varaa kyaiqava hia quttaa kyaiqa vaharo qati mamanaanruqama kyero vaharo nyaamwunima kyaiqa tuananravanto vahiro. Iesusiva nyaamwuni variqaro Kotirani quttaaqama kyero vahi kyaiqarama vare variro. Kuua garama kyero haaru Mosesiva Kotira nraamwu hoqarera uti varuvaro Kotiva tiqaro, E taaqiqaa nivatama kyera variarana nte i nraamwuteqana e mwitaama kyera nraamwu hoqaante tura mwianra rieqarama mwitaama kyera hoqaante, tura.

⁶ Kotiva Iesusira nronraqama kyaiharo mwiva Kotira kyaiqa varaqiro viqaro Rivaira okyara mwihua kyaiqa nraatara kyaiharo mwi kyaiqavento vunima vahiro. Rivaira okyaravanto Kotiva Mosesira timwa mwu quara nraahu rieqata Kotira kyaiqa varaqi vi variavaro Iesusiva Kotiva nai kyauqu nriqiqaa vateqaro timwa to quara rieqaro Kotira kyaiqa varaqiro vi varira. Kotiva nai kyauqu nriqiqaa vateqaro tu quava, mwi quava vuni vaharo Iesusiva mwi quara riemwaqiro vi variharora tiro, mwia kyaiqvantovata nritareroma vahiro.

⁷ Kotiva Mosesira mwu quava qio vahitiri, Kotiva hiama mwi quara nruka kyero qaraakya qua mpo nraakiara vataitiri.

⁸ Kotiva taqovata nraakye qoravanto nai Mosesirara timwa to quara hia kyuqema kye riovorora tiro, mwiva mwataama tiro:
Nraakiara mpo enta nrianinra mwi entaraqaa
nte Isareru nraaqiara Iutaa okyaravata variqana
qaraakya qua vataaninrave.

⁹ Ni qua qaraakya mwiva vahirero
hia mwihua haivaqahuara qiaava quara
nraantantamwa kyero vahiananrove.
Haaru nte mwi entara mwihua haivaqahuua kyauquqaa
tu vare Isipiqitai sitaqina nrumu kyena
nte mwihuavata variqana qua timwa taavata

mwihua ni qua riemwaqi quataara vahuvata
mwihua qaqira kyeta hia ni qua riemwaqi vi varurara
tina, mwia kyaara nte mwihua qaqira kyaavarave.

10 Nte nraakiara mpo enta nrianinraqaa
Isareri nraaqiaravata variqana
qaraakya qua timwa kyena vataaninrave.
Hia nte mwi entara oriqa mwi quara qara ntuaninrave.
Nte mwi entara mwihua su nyaatoqi
mwi quara qara ntumwa taaninrave.
Nte ntena qua mwihua mwutukyaqi
qara ntumwa taaninrave.
Nte mwihua mwanriqavanto variqana
mwihuaqaa ntaqikyiqi vi variarita
mwihua ni nraakyе qora varivarave.

11 Nraakiara mwi entara nronra vaisivata
qumina vaisivantovata mwihua ekyaa ni okyarara
ntapihita hia qumina ni okyarara
uro hena nraakyе qora timwa nyivarave.
Mwi entara ekyahua ni okyara ntapihi kyetara tita,
hia mpovanto uro nai nrnra nrakyaa qata vakyaa
timwa nyianriva vahiananrove.

12 Mwi entara mwihua uaqia hi kyaiqara uti varirara
rieqana nte mwihuara po timwa nyataaninrave.
Nte mwihua uaqia hi kyaiqara uti quara nruka nyatena
hia mwianra riemwaqina quaninrave, tura.

(Ieremaiaa 31:31-34)

13 Kotiva mwi quara mwitaa tiqaro qaraakya qua vataaninranra tura.
Mwiva mwitaa tiqaro haaru qua vatova mwiva hia vahiananrove tiqaro turama.
Haaruaa inraikyavanto nraahaqamaqiro viro uro qamwanramama
taiqa quananro.

9

Haaruaa qua rieqata Kotira nraamwuqi kyaiqa varaqi vurara tura

1 Nte Kotiva vuni timwa to quara haaruaa qua okyarara tirerama.
Kotiva Mosesira qua timwa mwuvaro Mosesiva nraakyе qorara mwitaa
mwitaama kye Kotira nrutu tuaaheraqi quate tuvata mwi quara rieqata
nraamwu mpo Kotirani hoqa mwatorama. Mwi nraamwuva nai mwata
mwaqa vahu nraamwuva vahura.

2 Mwi nraamwunra vahirero tavunaqo hoqato nraamwuva vahura.
Nraamwu mwia hoqa kye utaqaa vaata/antuataara tavunaqo utu teta vuni
vahura mwisatara kyuqe inraikya nraahu vahiarive tura. Mwiqi omwa
qupi kyeqata vato taquva vahuvare tainta mpo vahuvare Kotirani utato
mperetivavata vahura.

3 Tavunaqtairo tavaaranata titi tora mwia mwaatira uta mwipiara Kotira
turuaranive turama. Kotira turuarani vahurara tiro, vaisivanto mwipi qati
viqetaariva hia vahuvare qao timwa tora.

4 Kotira turuara mwipi tainta mpo koriqotairo ututo taintara mwiaqaa
kyuqema kyero mwinta vu inraikyara qia quarate varu taintava vahuvare
vokuhe mpo koriqotai taqaau kye ntumwaqu tova vahuvare mwipi
Kotiva Mosesira mwia quara qara ntumwa to ori fanava vahuvare, manaa
kyara huto taquvavata mwipi vahuvare, Eroninra kyaamwu, mwia haaru
aharaqa mwanre qupiqavu kyaamwuvavata vahura.

5 Mwi inraikyava mwia inraikyava mwipi vahuvare vokuhe viti hiniquaa
hiniquaa nyaamwunyahua ututova taaratana vahura. Mwitanahua nkyiari

nraaokya iri kye aaraa vatetatana Kotiva mwaini mwaaqima variho tiqata varura. Mwitanahua hini vitiqaa hini vitiqaa varuvaro vokuhe uta mwiaqaanahua Kotiva nraakye qorara po kye timwa nyateqaro mwihua qora kyaiqa nruka nyate vari satave tura. Kotiva nraakye qoravanto uaquia hi kyaiqara uti quara nruka nyataarive tiro, mpo ihi mpo ihiqi kuaa nani nraahu Kotira nraamwuqi kyaiqa varo vaisiva vunyaaava nraanre kyaga kye varero vera ntero vokuhe mwia utaqaa uro ntukikiata kyora. Híama qio tire mwaa qararaqi ekyaa mwi quara mpoqiatava qiarava vahiro.

⁶ Kotira kyaiqa vara mwate varu vaisihua mwaanra qua rieqatama mpo enta mpo enta nraamwu mwipi tavunaqo vaata utu tova vuruto vahuvata vera ntora, mwisata vera nteta kyaiqa vareqata hia turuara Kotirani vahunani vura.

⁷ Mwihua vunyaa vaisivanto qio nai mwiva nraahuma mpo ihi mpo ihiqi kuaa nani nraahu vera ntanta hura. Mwi entaraqaa mwi vaisiva hia qati mwipi vera ntaraitiro, mwiva nraanre kyaqaqiro mwipi uro ntukikiatora. Mwiva nai uaquia hi kyaiqararavata qumina nraakye qora uaquia hi kyaiqararavata rieqaro Kotiva tiriqaa qua vahira nruka timwa taarive tiro, mwiva turuara Kotiva huraqi vera ntero nraanre ntukikiata teri vura.

⁸ Mwi vaisi mwitaama kyeqaro Kotira kyaiqa varaqiro vura mwianra Kotira mwanaraquravanto tiri tinraamwutaihata tire ntapihi kyauraro qumina nraakye qoravanto Kotiva hinani vi aanrava hia vahurama. Kotira nraamwuvanto mwatani vahuvaro haaruua okyaravanto qati vahuvavarao tiro, qumina nraakye qoravanto Kotiva hinani vi aanrava hia vahura.

⁹ Mwaa entaravata haaruua qua rieqaro quara Kotirani rukyero qiaqua kyaiharo itaiva mwi kyaiqava hia nraakye qora kyaahaqa ihata mwihua mwutukya su nyaatovanto qati nraahu uaqama kyero valhata variara.

¹⁰ Nraakye qoravanto haaruua qua rieqatama kyarave nramanrive nrenranra rieqata mpo qara mpo qarama kye nkyiari mwamwanta hiqama kye kyotataqama kye variare ti variavaro mwi inraikyava hia mwutukya vu nraato kyaahaqa hira. Kotiva nai haaruua qua Mosesirara timwa torara tiqaro, Mwi quava quaahaqa pataqama vahiananrove. Mwi quava vahiraro ni qua qaraakya quavanto qovara hiarive, tura.

Qaraakya quara tura

¹¹ Kotira qaraakya quavanto nritarero vahi quara Karaisiva hia mwi quara nteqaraitiro riemwaqi virero qovarama vura. Mwiva Kotira kyaiqa vare variva vunyaa vaisivantoma variro. Mwiva hia vaisivanto mwata mwaini hoqa tai nraamwunraqi Kotira kyaiqa vare varivavauma. Mwiva nai nritarero vahinani Kotiva varinani nyaamwuni variqaro Kotira kyaiqa vare variro.

¹² Karaisiva nyaamwuni vuva uro turuara, Kotiva hinani hia quaahaqa variariva variraitiro, mwiva ekyara variarivama variro. Kotiva nraakye qora uaquia hi kyaiqara qua nruka nyataarive tiro, Karaisiva kuaa nani hia memenra nraanreve, hia purimakau nraanreve, kyaqa varero mwipi viraitiro, mwiva nai nraanre varaqiro uro vataiharora tiro, Kotiva tiri uaquia hi kyaiqara qua nruka timwa taariva qio vahiaro tiri huvantu timwa taariva ekyaa enta qio vahiananro.

¹³ Haaruua qua okyara rieqaro Kotira nraamwuqi kyaiqa vare varu vaisiva memenra nraanrevata purimakau nraanrevata nraakye qoraqaa ntukikiata kyero purimakau nraati qia quara tova iteri qaupaqama vura, mwiva qaupa mwia vajita kyero nraakye qoraqaa qu nyatero mwihuardi tiqaro, Kotiva mwianra rieqaroma nkyi hiqama nyataiho, tiro. Mwiva

mwitaa tiqaro mwihua pahi nraahu hiqama nyatero, hia mwihua mwutukya su nyaaa hiqama nyatora.

¹⁴ Haaruua qua okyara rieqaro mwitaama kyovaro Karaisiva mwi okyarara nraatara kyero nai nraanreqotairo tiri hiqama timwa tero. Kotira mwanraquravanto ekyaa enta qati variqi vi variva Karaisiraqi varuvaro Karaisiva hia uaqia hi kyaiqara utuva Kotira kyaiqa vareqaro qutu vurara tiro, mwia nraanrevanto qioma tiri tivu nraato mwutukya hiqama timwa tairaro tire uaqia hi kyaiqara utuqi viqata uro ekyara qutu quarava hia vahirae tire Kotiva mwiva qati variqi vi vari mwanriqara mwia kyaiqa nraahu varaqi quananra.

¹⁵ Karaisiva Kotira qaraakya qua qovarama kyai vaisivama variro. Kotiva nai kyauqu nriqiqaa vatero tiqaro, Nte nyaanrama taari nraakyee qorahua kyuqema nyatarita ekyaa enta kyuqema kye qati variqi vivarave, turara tiro, Karaisiva mwi quava qutaa mwivau vahiarive tiro, qovarama vura. Nraakyee qoravanto haaruua qua Mosesira mwu quara rieta hia mwi quara ntapihi kye riaratita, uaqia hu kyaiqara utuqi vi varuvaro Kotiva mwiaqaatairo mwihua uaqia hi quara nraka nyatarero qaraakya qua timwa tovaro Karaisiva nraakyee qorara rieqaro qutu vura.

¹⁶⁻¹⁷ Vaisi mpovanto qati variro tiqaro, Nte qutu quariro mwi vaisiva mwaa vaisivama nte hu inraikyara varaananrove, timwa kyero mwi quara qara ntumwa taananro. Qara ntumwa tero mwiva qati variani entaraqaa hiama vaisi mpovanto mwiva hi inraikyara varaananro. Mwiva qutu viraroma qio mwia quavanto qutaa mwivau vahiananro.

¹⁸ Mwia votima kyero Kotiva haaruua qua timwa tova, mwi quava kepukyaqama quarive titi, mwihua quara ru kyovaro mwia nraanrevanto raurura.

¹⁹ Mwi entara vuni Kotiva timwa to quara ekyaa mwi quara Mosesiva nraakyee qora timwa nyi taiqa kyero mwiaqaatairo purimakau nraati rutoravata, memenra nraati rutoravata, mwia nraanre kyaqa kye varero mwia qati nramanrivatama kyero tuqasasa kyero sipisipi kyaahi ventakya voti huraqi ntamwa to kyaantara vara kyero qaukyuvera mwanre voti hora vitiqaa rupa tero nraanreqi ntamwa kyero varero uro Kotira qua qara ntumwa to mpukuraqaavata nraakyee qoraqaavata nraanre ntukikiatero.

²⁰ Mwiva nraanre Kotira mpukuqaavata, nraakyee qoraqaavata, ntukikiata kyero tiqaro, Kotiva qua timwa kyero vatero nkyiara, Mwi quara riemwaqi quate, tihata nkye tiqata, Tire mwi quara riemwaqi virerave, qiera. Kotiva timwa tai quavavata nkye qia quavavata kepukyaqama quarive tinama, nte nraanre mwaa ntukikiata kye nkyi qu nyatauqo, tura.

²¹ Mosesiva mwitaa timwa kyero mwitaamaqiro viqaro nraanre kyaaqaqiro uro Kotira nraamwuqaa ntukikiata kyero nraamwu mwipi vahu inraikyaraqaavata ntukikiatora.

²² Haarua qua okyarara rieqaro mpo inraikyavanto uaqia huvaro nraanrevanto hiqama nyate varura. Hia mpo inraikya ru kyairaro nraanre rauru viraro qutu virera, Kotiva nraakyee qora uaqia hi kyaiqara qua nraka nyataari aanrava hia vahura.

*Kotiva nraakyee qora uaqia hi kyaiqara qua nraka nyataarive tiro,
Karaisira nraanre rauruvaro qutu vura*

²³ Kotira nraamwu mwatani hoqato nraamwunravata, nraamwu mwipi vahu inraikyaravata, qumina vaisivanto hoqa kyero ututo inraikyava nraahu vahurama. Mwitaa hi inraikyava Kotirani qutaaqama kyero vahi inraikyava nyaamwunima vahiro. Vaisivanto Kotira nraamwu mwatani vahuravata, mwipi vahu inraikyaravata, hiqama mwatarero mwiva quara nraanreqo nraahu ntukikiata kyeqaro hiqama mwate varurama. Kotiva

hi inraikyara nyaamwuni vahi inraikyara hiama qio quara vahi aasau nraanreqo hiqaananro. Nritarero variari vaisira nraanrevanto nraahu mwi inraikyara hiqaarivama vahiro.

²⁴ Karaisiva hia vaisivanto nyaamwuni vahi nraamwunranra rieqaro hoqa to nraamwuva mwata mwaaqa vhura turuaraqi viqe toravauma. Karaisiva Kotira nraamwu tuanaanra nyaamwuni vahira mwiqima viqetero. Mwi quara vutu kye tirera, Karaisiva Kotiva varinani nyaamwuni viva uro variqaro tiri kyaahaqa hiarivama variro.

²⁵ Kotira nraamwuqi kyaiqa varai vaisiva vunyava mpo ihi mpo ihiqi kuaa nani nraahu quara vahi aasau nraanre kyqa kye varero Kotira nraamwu turuarani vi varira. Karaisiva hia mwitaa hira. Kotiva nraakye qora uaqia hi kyaiqara qua nruka nyataarive tiro, mwiva hia qaiqaa qutiro qaiqaa qutiro hiariva varira.

²⁶ Mwiva mwitaa hiankye titiri, mwiva mwata mwaa ututo entaraqaatairo airi nani nriqavi inraikyara varaqiro vitiri. Karaisiva hia mwitaa hirero qovara hiravauma. Mwaa entara taiqaari entava qaumaga huvaro Karaisiva Kotiva nraakye qora uaqia hi kyaiqara qua nruka nyataarive tiro, kuaa nani nraahu mwihuara rieqaro qutu virero qovara hura.

²⁷ Mwata mwaaqa vari nraakye qorahua variqi vita kuaa nani nraahu qutu vita mwiaqaatai mwihua varivaro Kotiva mwihua quaqaa vateroma ko qiananro.

²⁸ Karaisiva Kotiva nraakye qora uaqia hi kyaiqara qua nruka nyataarive tiro, mwivavata kuaa nani nraahu qutu vura. Karaisiva mwitaama kyero qutu vurara tiro, Kotiva mwia kyaiqara rieqaro qioqama kyero nraakye qora uaqia hi kyaiqara qua nruka nyataarivama vahiro. Nraakiara Karaisiva qaiqaa mwatani tumuani entara mwi entara mwiva hia nraakye qora uaqia hi kyaiqarara rieqarovauma tumuananro. Mwiva mwi entaraqaa mwia vekya vari nraakye qorahua sitareroma tumuananro.

10

Rivaira okyaravanto Kotira kyaiqa varaqatairo Kotiva nraakye qora uaqia hi kyaiqara qua nruka nyataariva hia qioqa hura

¹ Kotiva Mosesira mwu quava mwi quava vahirero hia qutaa inraikya vhura. Qati mamanaanruqama kyero vhura. Mwitama vahirara tita, nraakye qoravanto mwi quara riemwaqi viqata hia ntapihi kye Kotiva kyuqema nyatarera hu okyarara taqora. Nraakye qoravanto Mosesira mwu quara rieqata mpo ihi mpo ihiqi quara vahi aasau nraahu Kotirani qia quaraqita vuvaro quara vahi aasau qia quara mwato inraikyaya su nyaato mwutukya hia qioqama kye hiqama nyataariva vahuvaro nraakye qora uaqia hu kyaiqava qati vahuvata mwihua hia qioqama kye varu nraakye qorahua varura.

² Kotirani qia quara mwatova quara vahi aasau mwiva nraakye qora su nyaato mwutukya qioqama kye hiqama nyataankye titiri, nraakye qoravanto tiqata, Tiri uaqia hi kyaiqara qua nruka timwa taiho, timwa kyeta hiama qaiqaavata mpo ihi mpo ihiqi quara vahi aasau Kotirani qia quara mwataatiri.

³⁻⁴ Purimakau qora ru kyaira mwia nraanrevantovata, memenra nraanrevantovata, rauriraro hiama Kotiva mwianra rieqaro nraakye qoravanto uaqia hi kyaiqara uti quara nruka nyataanano. Mwitaa hurara tita, nraakye qoravanto mpo ihi mpo ihiqi quara vahi aasau ru kyeta Kotirani qia quaraqita vuvaro su nyaato ntapihi vuvata tiqata, Qikye, tire uaqia hi kyaiqara nraahu uti varurahuave, tura.

5 Kotirani quara vahi aasau qia quara mwate varuva hia nraakye qora kyaahaqama nyatorara tiro, Karaisiva mwaa mwataraqaa tuminrenra hiro Kotirara mwitaama tiro:

Quara vahi aasau ini qia quarataavave,
ini vataa kyaravave, ekyaa mwi inraikyava
hia i mwutukya ntihara variaro.

Mwitaa ihara e nianra mwiva ni mutukya vhira
varaqiro quananrove timwa kyera ni mamanta
mwatanianra rieqara terama mataaro.

6 Quara vahi aasau ru kyeqata kyaitu qia quara
mwataara mwianra hia e qamwateqara variaro.
Nraakye qoravanto tiri uaqia hi kyaiqara qua
nruka timwa taarive timwa kyeta quara vahi aasau
varaqi ini ru kye vataararavata
hia qamwateqara variaro.

7 Mwitaa hi variarana nte iara tiqana,
Kotio, nte mwaa varuqo.

Nte i kyakya hi inraikyara vararerana varuvave.
Haaru nianra qara ntumwa to quava tunteema kyena
nte mwitaa hiqana i kyakya hira vataqina virerave,
tura.

(Ihi 40:6-8)

8 Kyai nte hini qua tura qaiqaa qiari. Haaru Kotiva Mosesira qua timwa mwinro tiqaro, Nkye quara vahi aasau nini qia quaraqita quate, timwa kyero varuvaro Iesusiva Kotirara mwitaama tiro: Ini quara vahi aasau qia quara mwataava ekyaa mwi inraikyava hia i mwutukya ntihara variaro. E hia ekyaa mwi inraikyara qamwateqara variaro, tura.

9 Iesusiva mwitaa timwa kyero mwiva nte vaakya turara tiqaro, Kotio, nte mwaa varuqo. Nte i mwutukya vhira vararerana varuvave, tura. Iesusiva mwitaa tuvaro Kotiva nai Mosesira mwu quara haaruua qua qaqira kyero mwia mwaatana mpo qua nai mwutukya vahu quara qovarama kyora.

10 (Mwi quara okyara mwitaamama vahiro): Karaisiva Kotira mwutukya vahi inraikyara varaqiro viqaro uro kuaa nani nai mwamwanta mwinro qutu vurara tiro, Kotiva tiri uaqia hi kyaiqara qua nruka timwa taariva qiomaa vahiro.

11 Mwaa entara Rivaira okyaraqitaita mpo hia vaisihua ekyaa enta haaruua okyarara rieqata sivi variqata Kotirani kyaiqa varaqi viqata airi nani Kotirani quara vahi aasau qia quara mwate variara. Mwihua mwitaama kye Kotirani varaa kyaiqava hiama qio uaqia hi kyaiqara qua nruka timwa taananro.

12 Kotiva tiriara mwihua uaqia hi kyaiqara qua nruka timwa taarive tiro, Karaisiva tiriara rieqaro kuaa nani qutu vura. Mwiva mwitaa hurara tiro, mwiva tiri kyaahaqama timwa taariva ekyaa enta qati nraahuma variqiro quananro. Karaisiva tiriara rieqaro qutu viro mwiaqatairo mwiva nritarero uro Kotira kyaquu kyaatutani mwatakyaa viro varira.

13 Mwiva mwaa entara mwini variqiro viraro Kotiva mwia nramwuttahua nraatara mwatairaro nai kyuqu mwihuaqaa vataaninra.

14 Iesusiva Kotirani kyaiqa vareqaro nraakye qorara rieqaro kuaa nani qutu vurara tiro, mwiva Kotira nraakye qora su nyaato mwutukya hiqama nyataihata mwihua ekyaa enta qio vari nraakye qorahua variqi vivara.

15 Kotira mwanraquravantovata Kotira okyara ntapihi kyeroma tiri timwa timwinro. Mwiva haaru poropeti kyaahqa huvaro mwi vaisiva tiqaro,

16 Kotiva mwitaama tiho,

Nte nraakye qora kyapata variqana qaraakya qua vatarera.

Nraakiara nriani entaraqaa
hia nte oriqaan ntena qua qara ntumwa tarerave.
Mwi entaraqaa nte nraakye qora su nyaatoqi
ntena qua vatarerave.

Nte ntena qua mwihua mwutukyaqi qara ntumwa
tarerave, tiho, tura.

(Ieremaiaa 31:33)

¹⁷ Qaiqaavata mwitaamaa tiro:

Kotiva mwitaamaa tiho,
Nraakye qoravanto uaqia hi kyaiqara uti varirave,
ni qua raaquute varirave, nte ekyaa mwi quara
taunu kyena hia mwi quarara riemwaqina virerave,
tiho, tura.

(Ieremaiaa 31:34)

¹⁸ Kotiva nraakye qorara nkye uaqia hi kyaiqara utuara ekyaa mwi quara
nruka nyataurave tirara tita, nraakye qoravanto qumina qaigaa tiqata,
Tiriqaa qua vahira nruka timwa taarive tiqata Kotirani kyaiqa varaqi
virerave, tivora.

Kyai Kotira nraaqani quare, tura

¹⁹ Iesusiva tiriara rieqaro mwia nraanre rauruvaro qutu vurara tiro,
Kotiva tiriqaa qua vahira nruka timwa taihata tire mwia qua rie varurahua
qioma Kotira nraamwu turuarani qati quananra. Tire qioma Kotiva hinani
qati quananra.

²⁰ Haaru Kotiva hinani vi vari aanranra tauhaqo antua tovata tire Kotiva
hinani quara aanrava hia vahuvaro Iesusiva mwamwanta vataava variqiro
viro tiriara rieqaro qutu viro mwiva mwi tauhara qatinani vara kyero
mwiva Kotiva hinanianra tiriini qaraakya aanra utu timwa tora.

²¹ Mate Iesusiva tiriara rieqaro vuniqama viro variqaro Kotira kyaiqa
vareqaro Kotira nraamwuqaa ntaqikyi varira.

²² Iesusiva mwitaamaqiro vi varihatara tita, nrivaqe Kotiva varira mwia
qaumato quara. Kyai mwiva hinani tiri mwutukyaqitairo quataa hiraqe
quara. Iesusiva quataa mwii aanranra utu timwa taihō timwa kyeta quara.
Tire ntapihi kyauraro tiri tivu nraato mwutukyavanto uaqiamma kyero
vahuvaro Iesusiva nai nraanre rauru kyero tiriara rieqaro qutu vurara tiro,
tiri tivu nraato mwutukya hiqama timwa taihata varunanza.

²³ Kotiva quataa qua nraahu ti variva hiama mpo qua nruka kyero mpo
qua qiananro. Mwianra rieqatama nrivaqe hia ntuqutu vaisivi hiraitita,
kepukyaqama kye Kotiva kyuqema timwa taani entara vekya variqi quara.

²⁴ Varaivaqe teta hena nraakye qorara nronraqama kye riemwaqi viqata
nanrianra nanrianra mwutukya vahiraqeta kyuqe kyaiqa nraahu varaqita
quara.

²⁵ Nrivaqe ntuvantua hiqata Kotira qua riaananra hia qaqla kyaratita,
tuqara kyeta tutaa. Mpo hiahua hia ntuvantua hirara nronraqama kye
riaara. Haunri tirevata mwitaa hiarora. Karaisiva tumuanri entava qauma
qauma hi varira mwianra rieqata nrivaqe tire teta henahua kepukyaqama
nyateqata Kotira aanraqaa vi variara.

²⁶ Tire Kotira qua quataa qua rieta mwiaqatai Kotira mwoqa mwita
teta uaqia hi aanranraqaa nraahu virerave qiarera, qaiqaa tiriara rieqaro
Kotirani tiri kyaahaqa hiani kyaiqara varaariva hiama vahiananro. Kotiva
qaiqaa tiri uaqia hi kyaiqara qua nruka timwa taariva hiama vahiananro.

²⁷ Tire mwitaa hiarera, tire mpogama kye aatu hiqata Kotiva ko qiani
entara vekya variarava nraahuma vahiananro. Qiavanto mpogama kyero

iteqaro Kotira nramwutaahua itamwa tatoqa kyaani qiaari tire mwia vekya nraahu variaravama vahiananro.

²⁸ Haaruaa qua Kotiva Mosesira mwu quara nteqa kyo okyarava mwitaama vahura. Vaisi mpovanto mwi quara nteqa kyovata vaisi taaratanave, taarampotanavantove, tiqata, Qutaa tire taqe varuraro mwi vaisiva mwi quara nteqa kyairave, tuvaro mwiaqaatairo hia mwi vaisirara po timwa mwataraitiro, qamwanrama kyero mwia ru kyora. Haaruaa qua nteqa kyo okyarava mwitaama vahura.

²⁹ Haaruaa qua nteqa kyo vaisira rukyo okyarava mwitaama vahirara tiro, qikye, qaraakya qua rierovata mwoqa mwiani vaisira ru kyaari okyarava nataamave vahiananro? Mwi quara mwoqa mwiani vaisiva mwitaa hiqaroma Kotira mwaaquara qumina inraikyavema tiro. Karaisira nraanrevanto Kotiva qaraakya qua timwa tora kepuuyaqama kyero mwi vaisira uaquia hi quara nraka mwataariva vaharo mwi vaisiva tiqaro, Hiama qio nraka mataananrove. Qumina nraanreve, tiro. Kotiva mwanaqravanto nraakye qora kyucema nyataaninranra mwi vaisiva qaquirave tiro, qoririma mwate variro. Qikye, mwi vaisira rukyaani okyarava nataamave vahiananro?

³⁰ Tire ntapihi kyauraro mwaa quara nte qiani quara Kotivama timwa tero. Mwiva mwitaama tiro:

Ntenavanto mwihua ru vuntuaninrave. Ntevanto

mwihua nkyiari kyoqaa nyianinrave, tura. *(Lo 32:35)* Kotiva mwitaa tuvaro mpo quavata vahiva mwitaama tiro:

Kotiva naivanto nai nraakye qoraqaa qua vatero

mwihua ko qiananrove tura. *(Lo 32:36)*

³¹ Qikye, Kotiva qati variqiro vi varira kyauquqi mwia qua nteqa kyaani vaisiva ntumwa quaninranra nronraqama kyena po kye tuqo. Kotiva mwi vaisira nataamave mwataananro?

Mwianra rieqatama nkye Karaisirara kepuuyaqama kyeta riemwaqita quate tura

³² Haaru Kotira quavanto nkyi mwutukya su nyaatoqi viro ntuaahama nyatovata varu entarara nraato tuata. Mwi entara nkye Kotira qua riemwaqi vi varuvata nkyi muaanra nyita nkyi uaqiamaqita vuvata nkye nriqa vu inraikyara varaqi viqata nkye kepuuyaqama kyeta nraahu variqi vura.

³³ Mwi entara mpo hora nkye varuvata mpo uhua nraakye qora suqaa nkyi uaquia hu quara timwa nyateta nkyi uaqiamma nyatora. Mpo hora mwihua nkyi hena nraakye qora uaquia hu quara timwa nyateta uaqiamma nyate varuvata nkye nkyeta hena nraakye qora kyaahaqamaqi vura.

³⁴ Mwi entara Karaisira vataqi vura kyaara nkyi henahua karavuqi kyovata nkye hia aatu hiraita, uro mwihua kyapata variqata mwihuarra po kye timwa nyatora. Mwi entara nkyi mwatave, nkye hū inraikyarave, varovata nkye hia mwianra nronraqama kyeta riora. Nkye tiqata, Tire hora inraikyava nyaamwuni nritarerо vahi inraikyava ekyaa enta qati nraahu variqiro quananrove, timwa kyeta qamwateqata nraahu varura.

³⁵ Mwi entara nkye kepuuyaqama kyeqa variqi vurara rieqatama nkye mwaa entaravata kepuuyaqama kyeqata nraahu variqi vivaro Kotiva mwianra rieqaro nkyi kyoqaa nyianri.

³⁶ Nkye hia pupohairata kepuuyaqama kyeta variqi vivera, nkye qiomaa Kotira mwutukya vahianinra varaqi vivaro Kotiva nai kyauqu nriqiaa vateqaro timwa to quava qutaa nkyi kyoqaa nyianro.

³⁷ Kotira mpukuqi qara ntumwa to quava mwitaama tiro:
Pataqia vari kyero

nraakiara tuminrenra hiari vaisiva tumuananro.
Mwiva hia vari kyero qakyoma kyero tumuananro.

³⁸ Ntapihi kyero nrohiani vaisirara Kotiva mwitaama tiro:
Mwi vaisiva ni quara quutaave timwa kyero
ni qua rieqaro qati variqiro quananrove.
Mwi vaisiva ni aanraqatairo tuqasaaviro
qaqira kyero virera, hia nte mwianra
qamwata mwataaninrave, tura.

(Habakuk 2:3-4)

³⁹ Tire Kotira aanraqaa viqata hia mwiaqaatai tuqasaaqita raupirima
quarahuama varita. Tire Kotira quara quutaave timwa kyeta mwi quara
nraahu riemwaqi quararo Kotiva tiri tivitaarihuama varita.

11

Tire Kotira quara quutaave timwa riemwaqi quana okyarara tura

¹ Tire Kotira quara quutaave timwa kyeta riemwaqi quara okyarava
mwataamama vahiro, Tire Kotira quara quutaave tiqata hia taara vu nraato
tiraita, Kotiva kyuqema timwa tarera hiari inraikyava quutaama qovarama
quananrove timwa kyeta mwia vekyama variananra. Mwaa entara mpo
inraikya mpo inraikya hia vuqotai taqaura inraikyaya vahihata tire Kotira
quara quutaave tiqatama quataaqama kyero ekyaa mwi inraikyaya vahihata
ti varunanra.

² Haaru vetato varu entara Kotira nraakyeh qoravanto Kotira quara
quutaave tiqata kepukyaqama kye variqi vurara tiro, Kotiva mwihuara
qamwateqaro varura.

³ Haaru Kotiva tuvaro mwia quavanto nyaamwuvata mwatavata utu
kyero vatora mwi quarara tire tiqata, Qutaa Kotiva mwitaa hurave,
timwa kyeqata varunana. Mwiva mwi entara hia qio vaisivanto taqaani
inraikyara vara kyero mwiaqotairo qio vaisivanto taqaani inraikyara utu
kyero vatora.

Everira, Inokura, Noaanra, mwinramwuhuara tura

⁴ Haaru Everiva Kotira quara quutaave timwa kyero sipisipi nraati ru
kyero Kotirani qia quara mwatovaro mwiva Kotira mwu inraikyaya Keniva
Kotira mwu inraikyaratava nraatara kyora. Everiva Kotira quara quutaave
tuvaro Kotiva mwianra, E ntapihi kyera variara vaisiva variaro, timwa
kyero Everiva mwu inraikyara qamwata mwatora. Everiva haaru
qutu vuvaro mwiva Kotirara quutaave tu quara nraakyeh qoravanto nai
timwa mwi nai timwa mwimajita vi variavarora tiro, mwia' quavanto hia
taiqaraitiro, qati nraahu vahiqiro vi variro.

⁵ Haaru Inokuva Kotira quara quutaave timwa kyero Kotirara
kepukyaqama kyero riemwaqi vuvara tiro, mwiva hia qutu vura. Mwiva
hia qutu vura qati varura Kotiva nyaamwuni vita varovata hia vaisivanto
mwia puaama kye vitora. Kotira mpukuqi qara ntumwa to vaisiva
Inokurara mwitaama tiro: Inokuva mwatani kyuqema kyero variqiro
vuvarora tiro, Kotiva mwia qamwata mwateqaro mwia qati nyaamwuni
vitero vurave, tura.

⁶ Vaisivanto hia Kotira quara quutaave tiraitiro variraro Kotiva hiama mwi
vaisira qamwata mwataanano. Vaisivanto tiqaro, Qutaama Kotiva variho.
Qutaama nte mwianra puaamaqina quariro mwiva ni kyuqema mataanano-
rove, qiariva mwi vaisiva nraahuma Kotira nraaqani qio quananro.

⁷ Kotiva Noaanranra tiqaro, Mpo inraikya mpo inraikya nraakiara qora
inraikyavanto mpo enta qovara hiananrove, tuvaro Noaava hia mwi inraik-
yara taqaraitiro, Kotira quara quutaave timwa kyero nramanriqaa quani
nyaamwunra hoqa kyero hia nraakyeh nraaqiararavata mwi nyaamwunraqi

kyuqema varurave. Noaava Kotira quara quataave tuvata mwia hena nraakye qora mwatani varuhua hia Kotira quara quataave tuvaro mwia kyara Kotira mwihua ntutqu tuaiqa kyero Noaanranra ntapihi kyero nrohi vari vaisivave tura.

Evarahaamunranra tura

8 Haaru Kotiva Evarahaamunra nraanrama kyero tiqaro, Sivira ena mwaata mwaini kyera mpo nani uro varirage nraakiara mwi mwatara i mwianrinro ini vahiarive, tuvaro Evarahaamuva mwi mwatara hia taqaraitiro, Kotira quara quataa quave timwa kyero nai mwaata qaqira kyero vurama.

9 Evarahaamuva Kotira quara quataave timwa kyero Kotiva nai mwia kyaama to mwataraqaa uro variqi viro mwiva mpo mwatanaava votima kyero variqaro mwiva hia mwaakyota variani nraamwunra hoqa taraitiro, seri nraamwu nraahu hoqa kyero mwipi mpoqi mpoqi variqiro vura. Mwitaa huvata mwia mwaaqu Aisaakkivavata mwia nraisi laikopuvavata tiqata, Kotiva mwata mwaanra tu quava tiritanani vaharo mwaa mwatara tiri kyaama taivama vaiho, timwa kyeqata mwi mwataraqaa seri nraamwuqi nraahu variqi vurama.

10 Mwi entara Evarahaamuva seri nraamwuqi variqiro viqaro mwiva nyaamwuni vahiani mwatukyara Kotiva riemwa kyero mwaakyota variani nraamwunra hoqa tora mwia vekya varurama.

11 Evarahaamunra nraatavanto Seraava kyontaqama viro nraaqiara mwataariva hia qioqa huvaro Seraava hia mwianra nronraqama kye riaraitiro, mwiva tiqaro, Kotiva nianra nraaqiara mwataananrove tiva mwiva quataa qua rraahu ti varivave, timwa kyero variro nraakiara Seraava quataa nraaqiara tuaqama viro nraaqiara mwata tora.

12 Mwitaa huvaro Evarahaamuva nyaapaiqama viro qutuariva qaumaqa hu vaisira kuaiqiaqatairo mwia nraaqiara airintivantov qovarama vura. Mwiaqatai qovara hia nraaqiarahua qovora aahoqura votima kyeta airinti variara. Mwihua nramanri tokyasataa nruqa vahira votima kyeta airinti variara.

13 Nte vaakya tu nraakye qorahua Kotira quara quataave timwa kyeta Kotiva nkyiari kyaama to inraikyara mpo inraikya mpo inraikya hia vararaitita, qutu vura. Mwihua quataa mwi inraikyaya nraakiara qovara hiananrove timwa kyeta qamwateqata varura. Mwihua mwata mwaanra vutu kye tiqata, Qutaqama kye tire mpo mwatanaavanto mwata mwaaqaquaahaqama varuro, tura.

14 Mwihua nkyiari mwaata tuananra puaama kye mwini viqatara tita, mwitaa tura.

15 Mwihua haaru Evarahaamuva qaqlira kyero nru mwatara hia mwini nrumu ntanteta virara nraato turave. Mwihua mwini nrumu ntanteta virara nraato tutiri, qiomaa mwihua mwini vutiri.

16 Mwihua nritarero vahi mwatara mwianra mwutukya vahuvata mwia vekya varura. Mwihua Kotirira kepukyaqama kyeta riemwaqi viqata nyaamwuni vahu mwatara mwia vekya varurara tiro, Kotiva mwihua mwata terama nyatero tiqaro, Nte hia kyauriraitina, nte mwihua mwaniqavanto variqana mwihuaqaa ntaqikyiqina virerave, tura.

17-18 Evarahaamuva Kotiva timwa to quarara quataa quave timwa kyero nai mwaaqu ru kyero Kotira mwinrenra uti varura. Kotiva nai kyauqu nriqiqaa vatero Evarahaamunranra tiqaro, I mwaaqu Aisaakkiraqaatairo i nrutuvanto qati nraahu vahiqiro quananrove, timwa kyero variro mpo enta Evarahaamunra mwataana hirero mwianra tiqaro, Ena mwaaqu ni ntutqu mpiante, tuvaro Evarahaamuva Kotira qua riero nai mwaaqu ru

kyarerera hiro tiqaro, Kotiva nianra nai kyauqu nriqiqaa vateqaro timwa to quava quataa qua nraahuma vahiananrove.

¹⁹ Nte ntena maaqu ru kyaariro Kotiva qiomia mwia qati vara sivuma kyaananrove, timwa kyero mwia Kotira ru kyero mwinrenra uti varuvuaro Kotiva hia mwia ru kyaante tuvaro Evarahaamuva nai mwaaqi qutu vuraqitairo qati sivuvuaro vitontemta kyero vitora.

Asaakira mpo, Iaikopura mpo, Iosepira mpo, mwinramwuhuara tura

²⁰ Aisaakiva Kotiva timwa to quarara quataave tiqaro nyaapaiqama viro qutuari entava qaumaqa huvaro mwiva nai kyauqu Iaikopuraqaavata Isoraqaavata vatero kyugema nyateqaro mwitanahuara tiqaro, Qutaama Kotiva nraakiara nkyitana mwitaama mwitaama kyero kyugema nyataariva variho, tura.

²¹ Iaikopuvavata Kotiva timwa to quarara quataa quave tiqaro nyaapaiqama viro qutuari entava qaumaqa huvaro nai kyauqu Iosepira mwaaqutanaqaa vatero kyugema nyatero mwitanahuara tiqaro, Qutaama Kotiva mwitaamia mwitaama kyero nkyitana kyugema nyataariva variho, timwa kyero nai kyauruqaa vuntuvi variqaro Kotira nrutu tuaherora.

²² Iosepivavata Kotiva timwa to quarara quataa quave tiqaro nyaapaiqama viro nai qutuari entava qaumaqa huvaro Kotira qua mpo qovarama kyero tiqaro, Qutaama nraakiara Isarerri nraakye qora Isipiqi varita nraakiara nkyiari mwaaatani nrumbi ntanteta vivarave. Mwi entara virera hita ni mwukyaari mwaa mwataraqitai pati kye varaqi uro tita mwatanani quntaate, tura.

Mosesirara tura

²³ Mosesira nrohua qohua Kotira qua riemwaqita vi varura. Mosesira nrohua qohua mwia mwata kyeta taqovaro nraaqiara kyugeva varuvata mwitanahua Perova qoraisi nraaqiara mwata tera rukyaate tu quara nteqa kyeta hia mwianra aatu hiraitita, Kotirara quataama mwiva tiri kyaahaqa hiariva variho timwa kyeta Mosesira taarampo torara uqetaqita vura.

²⁴ Mosesivavata Kotira qua riemwaqiro vi varura. Mwiva nronra tuemwa viro Kotira quara quataa quave timwa kyero mwiva qaqao tiro, Hia nianra Perora nraamwunravanto viritai vaisirave qilaterave.

²⁵ Nte Isipiqinaahuavata pataqia variqana qora kyaiqa utuqi vina qamwateqana variankyorave. Nte qaqira kyena ntena nramwunaahua Kotira nraakye qora kyapata kuaaqi variarita Isipiqinaahua qiomia ni uaqiamaqita vivaqe varianinrave, timwa kyero Kotiva nraakiara nyaamwuni mwia kyogaa mwianinra mwianra riemwaqiro vura.

²⁶ Isipini mpo inraikya mpo inraikya kyuqe hu inraikyava nraahu vahuvuaro Mosesiva hia mwianra nronraqama kyero riaraitiro, Kotiva mwia nronraqama kyero titora mwianra nronraqama kyero riemwaqiro viro tiqaro, Ntena nraakye qora kyapata kuaaqi variarita Isipiqinaahua qiomia ni uaqiamaqita vivaqe varianinrave, timwa kyero Kotiva nraakiara nyaamwuni mwia kyogaa mwianinra mwianra riemwaqiro vura.

²⁷ Mosesiva kepukyaqama kyero Kotirara riemwaqiro viqarora tiro, mwiva nai nraakye qora sita varero Perora raraqa taaninranra hia nronraqama kyero riaraitiro, Isipi kyero vura. Vaisivanto quataa nai vuqo Kotira taqontema kyero Mosesiva quataave tura mwiaqo Kotira taqamwaqi viqaro Isipi kyero vurama.

²⁸ Mosesiva kepukyaqama kyero Kotirara riemwaqiro viqarora tiro, mwiva Kotiva tu quara riero nyaamwunyaava Isarerivanto vunyaa nraaqiara mwata tohua ekyaa mwihua hia ru taiqa kyaraitiro, vekyahu nyataarive tiro, sipisipi nraati ru kyero nrenro mwia nraanre qesa mpoqa mpoqa qutora.

Isareri nraakye qora airivanto Kotira quara kepukyaqama kye riemwaqi vurara tura

²⁹ Isarerivanto kepukyaqama kyeta Kotirara riemwaqi viqatara tita, mwihua aahara mwataqaa ntamwaqi vuntema kyeta nramanri *Nraanre Nramanrive* tura mwia qareta vurama. Mwihua qio qareta vuvata Isipivanto mwihua rirera mwihua sataqi vuhua mwihuavata nramanri nronra mwiaqaa Isarerivanto vuntema kyeta qare quare tuvaro nramanrivanto mwihua ntumwaqu kyora.

³⁰ Isarerivanto Kotirara kepukyaqama kye riemwaqi vurara tiro, Kotiva mwihua tigaro, Nkye Ieriko mwia uro 7 entara vara ututu nrohi varivaro mwi mwatukyara ori vasaamwunra ututaava ntavesau quarive, tuvata mwihua Kotira quara qutaa quave timwa kyeta mwitaamaqi vuvaro ori vasaamwunravanto ntavesau vura.

³¹ Nraakye mpovanto api nrohi varu nraakyeva Rehepiva Kotirara kepukyaqama kyero riemwaqiro viqarora tiro, mwiva nai nramwutaa Isareri vaisitana kyaahaqama nyatora. (Isareri vaisi mwitanahua uqeta kyeta uro Ieriko mwia apeqa hirerata nruvaro Rehepiva ni nramwunaahua mwi vaisitana puaama kye rukyevorave timwa kyero uqeta tovata mwia nraakiara Isarerivanto mwi mwatukyara nraatara kyeta mwipi varuhua hia Kotira quara qutaae tuhua ruqi viqata mwi nraakyeva Isareri vaisitana kyaahaqama kyorara rieqata mwi nraakyera qati kyora.) Mwi nraakyeva Kotirara qutaae turara tiro, Kotiva mwia kyaahaqama mwatovata Isarerivanto hia mwihua qiariva qioqa hiro.

³² Kotirara kepukyaqama kye riemwaqi vu nraakye qorahua variavana nte mpoqiyavatave mwihua timwaqina quaninra? Kitioninrave, Paraakirave, Samusoninrave, Iepitaarave, Ntevitirave, Samuerirave, nte hiama qio qara mwaaqi ekyaa mwihua qiariva qioqa hiro.

³³ Mwihua Kotira quara qutaa quave tiqata mwianra kepukyaqama kyeta riemwaqi viqatara tita, ntaiqiqata nronraqama varu mwatanaahua nraatara kyorave. Mwihua avuqavuma kye nrohi varuvarora tiro, Kotiva nai kyaquq nriqiqaa vateqaro timwa to quara riero mwihua nkyiari kyoqaa nyunra. Mwihua Kotirara kepukyaqama kye riemwaqi viqatara tita, mwihua mpo uhua variqata qaakyau vairi mwia nrutu raioni nro tita tovaro hia kutura.

³⁴ Mpo uhua Kotirara kepukyaqama kyeta riemwaqi vuvaro qiaavanto nronraqama kyero iteqaro mwihua tatoga kyarera huvata mwihua qia mwia qipa kyora. Mpo uhua Kotirara kepukyaqama kyeta riemwaqi vuvatara tita, mwihua nramwunaavanto mwihua rirera utuvata mwihua qio ntuqema kyeqa aatu vivi hurave. Mwihua uqenro nraakye qorahua varigata mwiaqaatai Kotirara kepukyaqama kyeta riemwaqi viqatara tita, mwihua kepukya nraakye qoraqama vita varurave. Mwihua Kotirara kepukyaqama kye riemwaqi vita ntaquqi viqata mpo mwatanaa mpo mwatanaahua ntaqu vaisilhua nraatara kyora.

³⁵ Haaru Kotira nraakyenramwuvanto kepukyaqama kyeta Kotirara riemwaqita vuvarora tiro, Kotiva mwihua nraaqiaranramwu qutu vuhua sivuma kyero nyunra.

Haaru Kotira nraakye qoravanto Kotirara kepukyaqama kye riemwaqi vuvata mwihua nramwutaahua mwihua ntavaaqavu kyeta tiqata, Kotira mwoqa mwita mwia qaqira kyaivaqe tire nkyi qati kyaarata variate. Nkye hia mwitaa hivaqe tire nkyi ntuqutuqi vita nkyi taiqa kyaananrave, tuvata mwihua hia nramwutaavanto tu quara riaraitita, mwihua nraakiara qutu vita mwiaqaatai Kotiravata kyuqema kye variqi virara nraahu rieqata hia Kotira mwoqa mwita hia mwia qaqira kyovata mwia kyaara nramwataahua mwihua ntuqutuqi vita uro ru kyora.

³⁶ Kotira nraakye qora Kotirara kepukyaqama kye riemwaqi vuvata mwia kyaara mwihua mpo uhua raima nyateta mpo uhua kyaamwuqo ntuqutu nyatora. Mpo uhua rupa kyeta karavuqi uro kyora.

³⁷ Mpo uhua ori tuto kyeqa mwihua ntuqutuqi vita uro ntuqutu kyora. Mpo uhua so vara kyeta mwiaqo mwihua mwāmwanta tavaaraqa teqa kyeqa kyora. Mpo uhua paipa viti mpuahaa vahuntaininraqo rakuraa kyeqata ru kyeqata kyora. Mpo uhua sataqi viqata uaqiamma nyatovata hia kyuqe tuavaaqa utiraitita, sipisipi pahiqvata memenra pahiqvata tuavaaqā utu vareta uaqiamma kye nrōhiqata varura.

³⁸ Mwihua hia vaisivata varura qumina mwatasata nkyiariaraa variqita vurave. Mpo uhua qumina taaciqaa varivaraa nrōhurave. Mwihua ori ontamwuqive, ori mwata hakaraukaqive, vaitaqita nrōhura. Qikye, mwi nraakye qorahua Kotirara kepukyaqama kyeta riemwaqi vi variqata kyuqe nraakye qora nraahu varuvata mwatani varuhua uaqia hu kyaiqara nraahu varaqi vi varuhua mwihua uaqiamaqita vurama.

³⁹ Mwi nraakye qorahua haaru Kotira quara quataave tiqata Kotirara kepukyaqama kyeta riemwaqi vi varurara tiro, Kotiva mwihua kyuqema nyateqaro mwihua kyuqe nraakye qorave tura. Kotiva mwitaa tiqaro mwihua qamwata nyatovatavata nai kyuauqu nriqiqaa vateqaro nyinrereave tu inraikyara hia varora.

⁴⁰ Haaru Kotiva tiriaravata rieqaro qua mpo vatero tiqaro, Hia haaru varu nraakye qorahua nraante kyuqema nyatarerave. Haaru varu nraakye qorahuavata nraakiara vari nraakye qorahuavata kuaaqi varivaeq nte mwinro mwaanro mwihua kyuqema nyataarita qio vari nraakye qorahua varivarave, tura.

12

Karaaisiva qioqama kyero vari vaisivama variro

¹ Qio haaru nraakye qora airivanto Kotira quara quataave tiqata kepukyaqama kye mwianra variqi vi varurave. Mwaa entara mwi nraakye qorahua airivanto tiri vara utufu variqata tiri taqe variahua nraantamwa kye variarara tita, nrivaqe mwihua suqaa variqata hia qoriri hiraitita, kyuqema kye Kotira aanraqaa viqata mpo inraikya vararerahaantame kye hiantaara.

Mwihua suqaa variqata mpo inraikya mpo inraikyavanto tiri ntavaaqavu kyarerera uti variani inraikyara qaqlira kye uaqia hi kyaiqava tiri tuqara kyero tutaaninra ntavaqaa kye qaqlira kyeta hia qoriri hiraitita, kepukyaqama kye hiantaamwaqi quara.

² Nrivaqe hiante viqata Jesusira nraahu taqamwaqita quara. Mwiva nraante vuni viqaro Kotirara kepukyaqama kyero riemwaqiro vivara tiro, mwiva qiomma tirivata kyaahaqama timwa tairaqe tire mwia votima kyeta Kotirara kepukyaqama kyeta riemwaqi viqata uro taiqa kyaananra. Iesusiva kyatariqaa qutu virera hiro, Nianra raima matetā kyaurira inraikya mpira nte hia mwianra nronraqama kyena riarerave, timwa kyero mwiva nraakiara qamwateqaro variani entarara riero tiriaravata rieqaro qutu vura. Mate mwaa entara mwiva nritarero Kotira kyuauqu kyaatutanimava variro.

³ Karaaisiva mwatani varuvata uaqia hi kyaiqara uti varu vaisihua anomia kyeta mwianra ua vu nraato vateta qoririma mwatovaro varurave. Karaaisirara ua nraato vateta qoririma mwatora nkye mwianra rieqata varivata nkyiyata uaqiamma nyatarera utivata hia pupohairata qoriri hirata variqi viraitita, kepukyaqama kyetama variqi quata.

⁴ Nkye variavata uaqia hi kyaiqara utuahua nkyivata ntaquqi vi hiama nkyi ru kyaavata nkye qutu quavo.

⁵ Mpo qua qara ntumwa tora nkye taunru kyevora. Mwi quaraqi Kotiva nkyiara ni naamwunra maaque tura. Mwitaama tiro:
Ni maaquo, ina kyaiqa kyaara Kotiva i avuqavu hiqaro
i mpo qarama mwatairara
e mwianra nronraqama kyera riaante.
I inronra hirera hia e kyaru ntuanre.

⁶ Kotiva nai mwutukya nti vaisiva qaiqaa
uaqia hi aanranraqaa quankyo tiro,
mwiva nai nraaqiara ntuququiro viro
mwia ntaphiqiro virave.

Mwiva ni maaque qiani vaisira
kyaamwu mwiqiro quananrove, tura.

(*Sindaun 3:11-12*)

⁷ Kotiva nkyi qati ntuququiro virera, nkye kepukyaqama kye variqata Kotiva ni nai mwaaquma ntuquthi qjata. Ta nraaqiarara mwia qova mwia avuqavu hiqaro hia ntuququiro? Mwia qova nai mwaaquara avuqavuma kyero nrohiarive tiro, mwia qati nraahu ntuququiro virave.

⁸ Kotivavata nai nraaqiara mwihua ntuququiro vi varirave. Mwiva hia nkyivata ntuququiro, nkye hia mwia nraaqiara tuananravanto variraitita, nkye kyapa nraatima varita.

⁹ Mwata mwaini tiri tiqohuamwanra tiriara avuqavuma kye nrohiate tiqata tiri ntuququiro quavata tire hia mwihua kyaru ntumwa nyataraitita, tire mwihua vaisi kyuehuave nraahu tunanra. Mwia votima kyeta tire tiri tiqova Kotiva nyaamwuni varira mwia qua mpoqivata riemwaqi viqata ekyaya enta qati variqi quara.

¹⁰ Tiri tiqohua mwatani variahua quaahaqa variqata mwihua nkyiari riemwa kyeqata mwi aanranra nrohiate timwa kyeqata tiri ntuququiro variara. Kotiva tiriara mwihua nivata variqata hia uaqia hi kyaiqara utiraitita, kyue kyaiqa nraahu varagi quate tiro, tiri kyueqema timwa teqaro tiri ntuququiro vi varira.

¹¹ Mwia qova nai nraaqiarara avuqavuma kyero nrohiarive tiro, mwia ntuququiro vi variharo mwi nraaqiarava tiqaro, Qikye ni mamanta mpoqama kyero niqa viho, timwaqiro viro nraakiara mwiva nronra tuero vaisi kyuevama varianro.

¹² Kotiva nkyiara avuqavuma kye variqi quate tiro, nkyi ntuququiro varihatara tita, nkye hia qoriri hiraitita, nkyi kyauquve, nkyi kyuquve, ugen-raagenra hianinra tuaahera kye kepukyaqama kye kyue hi aanranraqaa variqi quata.

¹³ Nkye ntapihi kye Kotira aanranraqaa quata. Nkye mwitaa hivar hia kyue hiari kyuequva kyueqema virata kepukyaqama kye vivara.

Uaqia hi kyaiqara utuaro titi rauriqata variate tura

¹⁴ Nkye variqi viqata hia antua qua tiraitita, ekyaa nraakyae qora mwutukya qihakyama nyate kyaiqara varaqita quata. Nkye hia uaqia hi kyaiqara utiraitita, Kotira kyaiqa nraahu varaqita viqata variata. Hia Kotira kyaiqa vararaitiro variqiro quariva, mwi vaisiva hiama qio Kotira taqaananro.

¹⁵ Kotiva nkyi kyueqema nyataihata nkye variarara tiro, haunri mpovanto nkyiqitairo Kotira qaqa kyero mwia nununrama mwataankyora. Mwitaa hirara rauriqata variata. Kyanaa mwanre uka viravata uta taira nraavar uka vintema kyero mpora unra quavanto nkyi vara uaqiamma kyaankyo tita, nkye rauriqata variata.

16 Api qaraqi nrohi okyarava nkyiqi vahiankyo tita rauriqata variata. Nkyiqtairo mpovanto mwata mwaqaanaa inraikyara nronraqama kyero riero Kotirara hia riaankyo tita, rauriqata variata. Tiri haivaqava Isova mwitaa hi varu vaisiva varurama. Mwia nraante vuni mwatata nraaqiarava variro mpo enta qoraqama kye kyara nraataa huvaro nai qatara tigaro, Kyara mpiraqe nte iara vuni mwatatai nraaqiarava variho, iara ni kova nianra qamwatero kyugema mataani quara ema varenanrave qiankye, timwa kyero nai qata kyara nronra.

17 Nramwa kyero variro mpo enta mwiva qaqao tiro, Nte hia mwitaa qiaataarave, timwa kyero nai qorara tigaro, Ni nraante vuni mwatataaravave. E qutu virera hira kyaauq niqaa vateqara ni kyugema matena quara tiraqena ntevata ni nraaqiaravantovatama kye kyugema variqita quare, tuvaro mwia qova hia kyaauq mwiaqaa vateqaro mwia kyugema mwatorave. Mwita huvaro Isova ntateqaro, Kyai haaru nai qatara tu quara nruka kyena vara kyaankye timwa kyerovata taqovaro hia qioqa hurave. (*Okyara 27:30-40*)

Haaruua quaravata qaraakya quaravata tura

18 Nkye Kotiva qaraakya qua vataira riaahua variarave. Hia nkye Kotiva haaruua qua vataira riaahuavauma. Haaru Kotiva qua timwa kyero qovarama kyero nyinrenro utuvata nkyi haivaqahua Sainai taaqi mwemwa tunrenrasata uro ntuvantuuma vita variqata taqovaro qia-vanto nronraqama kyero itamwaqiro vuvaro kyokira ru tovaro nrotaara aaquakyavanto mpo uti varura.

19-20 Mwitaa hi varuvata nraakye qoravanto kuaiqiaqa vita variqata riorovo ntomavanto nronraqama kyero nrugua tuvaro mwiaqatairo quavanto nyaamwuqitairo mwitaa tiro: Vaisivantove quaravantove hiavata taaqi mwaqaanriate. Mpovanto mwaqaanriate mwia origo ntutu qyaate, tiro. Quavanto mwitaa tuvata nraakye qoravanto nraatuqa tovata hia qaiqaavata qua qianta tura.

21 Mosesivavata ekyaa mwi inraikyara taqero tigaro, Qikye, nivata mpoqama kyero kyugem kyaauq ntihana aatu hiqana varuqo, tura.

22 Nkyi haivaqahua ekyaa mwi inraikyara taqeqlata haaruua qua riorave. Nkye Kotira qaraakya qua riaahuara titi, nkye hiama mwi inraikyara mwi inraikyara taqevara. Nkye Kotira qaraakya qua riaahuara titi, nkye hia vuqotal taqe varia taaqira voti hiraqaa uro nteeta. Taaqi mwia nrutu Saionive. (Mwi taaqira vutu kye tirera nyaamwuni Kotiva varinanive tina.)

Nkye Kotira mwatukya Ierusaremi nyaamwunianra uro nteqa vi variara. Mwi mwatukyaraqima Kotiva qati variqi vi variva variro. Nyaamwunyahua airivanto variavata qaiqaa kyaatavantovata airivanto ntuvantuuma vita variqata Kotira qamwata mwate variara, nkye mwinianra uro nte vi variara.

23 Kotiva vuni nraakye qora mpo hiahua nai nraaqiaraqama taihua nyaamwuni varianianra nkye vi variara. Mwi nraakye qorahua nyutu nyaamwuni qara ntumwa taiharoma vahiro. Kotiva ekyaa nraakye qora qua avuqavu hiariva varira nkye mwiva hinani uro nteqa vi variara. Mwatani ntapihi kye nrohi varia nraakye qorahua mwihua mwanraquravanto varianani nkye mwinianra vi variara. Kotiva mwihua kyaahaqama nyataihata mwihua qio varia nraakye qorahua variara.

24 Iesusiva Kotiva qaraakya qua timwa taira qovarama kyai vaisiva varira nkye mwiva varianianra vi variara. Iesusira nraanre rauruvaro tiriria rieqaro qutu vurara tiro, Kotira qaraakya quavanto kepukyaqama viro vahiro. Keniva Everira ru kyovaro Everira nraanrevanto rauriqaro naivata ru kyera vuntu taante tura. Iesusira nraanre rauriqaro hia mwia qiataqaa

nkyiarivata rukyera vuntu taante tiraitiro, nraakye qora uaqia hi kyaiqara qua nruka nyataante tirara tiro, Iesusira nraanrevanto Everira nraanre nraatara kyora.

25 Mwi quara rieta rauriqata variata. Mwaa entara Kotira qaraakya qua nkyi timwa nyi vari vaisira qoririma mwatevora. Haaru Mosesiva qumina vaisivanto variqaro Kotira haaruua qua nraakye qora timwa nyuvata mwihua hia mwi quara riovoro mwia kyaara Kotiva mwihua ruvata mwihua ntuqema kye aatu vi aanrava hia vahurama. Mwaa entara Iesusiva nyaamwunyaa vaisivanto Kotira qua tiri timwa timwi varihata tire mwia qua hia riaarerera, Kotiva qoraqama kyero tiri ntuqutu timwa tairaqe tire aatu quara aanrava hiama vahiananro.

26 Kotiva nai haaruua qua qovarama kyero timwa nyu entara qua tuvaro mwatavanto qakyaa hurama. Mwaa entara Kotiva nai kyaauq nriqiqaa vatero tiqaro, Nraakiara nte qaiqaa qiariro hiama mwatavanto nraahu qakyaa hiananrove. Mwi entara nyaamwuvantovatama qakyaa hiananrove, tura.

27 Kotiva qaiqaave tu quara okyaravanto mwataamama vahiro: Kotiva haaru tuvaro nyaamwuvantovata mwatavantovata qovarama vura. Nraakiara mwiva qaiqaa tiraro mwatavata nyaamwuvata faiqa quananro. Taiqa viraro Kotira mwatukya hia qio qakyaa hiarivama qati vahiananro.

28-29 Tire hia qakyaa hiani mwatukyaraqi quarahuara tita, nrivae Kotirara kyuqeve tiqata variara. Kotiva tiri mwanriqvavto qiaavanto tatoqa kyaintema kyero vaisi rirara tita, nrivae mwia nraatu aatu hiqata kyuqema kyeqa mwia nrutu tuaahereqa variara. Mwiva nronravanto varirara tita, nrivae mwianra nronraqama kye riemwaqi quara.

13

Mwataama kye nrohivarо Kotira kyakya hiarive tura

1 Nkye Iesusira nraaqiaraqama vi variqata nkye qata vakyaa nrunra nrakyaa variqata nanrianra nanrianra mwutukya vahirata variqi quata.

2 Mponasairo nriani vaisira kyuqema kyeta vitaqi nraamwuqi kye kyara mwivarо nrenro quari. Mwi okyarara hia qaqla kyaratita, kyuqema kye rieqata variata. Haaru nyaamwunyaa hia mponramwu mwatanii qovarama vita varuvata mpo uhua mwinramwuhuara qumina vaisima variavo tiqata mwihua sitaqita vateta kyaara nyunra. Mwi quara rieqatama kyuqema kye mponasai nrihua kyaahaqa hiata.

3 Nkye nkyeta hena nraakye qora karavuqama taahua taunru kyevora. Nkyevata karavuqi variqataro votima kyeta mwihuara po tiqata kyaahaqama nyataata. Nkyi uaqiamma nyataavata variarara votima kyeta nkyi hena nraakye qora uaqiamma nyataavata variahua po timwa nyataata.

4 Nraata vaati varaa okyarava kyuqe okyara vahoma qia. Vaativanto nraatara rieqaro variraro nraatavanto vaatiara rieqaro variari. Api qaraqita nrohihuave, mpohua nraata vaativata api nrohihuave, variraro Kotiva mwihuuaqua qua vataanano.

5 Nkye variqata hia munima vararera nraahu nronraqama kye riemwaqita quata. Nataama inraikya vatera mwianra qiaoma vatauro qia. Kotiva tiriara mwitaama tiro, Nte nkyivata variqina quaninrave. Nte hia nkyi qaqla kyaaninrave, tura.

6 Kotiva mwitaa turara tita, nrivae hia aatu hiraitita, mwutukya qiaakyama kye vahiraqe Kotirara mwataama qia:
Kotiva ni kyaahaqama mate varihananra tina,
nte hia vaisivanto uaqiamma materara
aatu hirerave.

⁷ Haaru nkyi vunyaa vaisi mponramwuvanto Kotira qua nkyi timwa nyunra nkye mwi quara taunru kyevora. Mwihua Kotira quara qutaa quave timwa kyeta kepukyaqama kye Kotirara riemwaqi vita qutu vurara rieqatama nkyevata mwihua hunte hiata.

⁸ Iesusiva haaru kuua qarama kyero varuva, matevata kuua qarama kyero variva, qakyovata kuua qarama kyero nraahuma variananro.

⁹ Nkye ntapihi kye vahi aanranraqaa viqata hia nraahumwa mpo qua mpo qua riarerata mpo aanraqaa quata. Nkye variqata kyai tire mwi kyarara nreta mwi kyarara aurama teqata kyuqema kye variqi quare tivora. Kotivama nkyi mwanraqura kyuqema nyatairata variqi vivara. Kyai mwi kyarara nre mwi kyarara hia nraanre ti vari okyarava hiama qio vaisi kyaahaqa hiraro aanra kyuqeraqaa quananro.

¹⁰ Kotira nraamwuqi kyaiqa vare variahua mwihua mpo taintaqa variqata Kotira kyaiqa vare variara. Tire mpo taintaqa variqata Kotira kyaiqa vare varunananra. Tiri tainta vahirero Karaisira ruto kyatarivama vahiro. Mwitaa hirara tita, mwihuavata tirevata hiama qio kuaaqi vari-ananra.

¹¹ Rivaira okyaraqinaava vunyaa vaisivanto Kotiva nraakye qora uaqia hi kyaiqara qua nruka nyataarive tiro, quara rukyero mwia nraanre Kotira nraamwuqi turuarani uro ntukikiata kyahata quara nronra mwia varaqita uro mwatukya mwaqqani kyeta qia quara te variarave.

¹² Iesusiva Kotiva nraakye qora uaqia hi kyaiqara utira nruka nyataarive tiro, mwivavata uro mwatukya mwaqqani qutu viro nai nraanreqotairo nraakye qora mwatukya su nyato hiqama nyatora.

¹³ Mwiva mwatukya mwaqqani uro qutu vurara tita, nrivaqe tirevata Kotira haaruua qua okyara qaqla kyeta uro mwatukya mwaqqani quarata mwia kyaurira inraikya mwuntema kyeta tirivata kyaurira inraikya vara timwivae mwi inraikyara varaqita quara.

¹⁴ Hiama mwata mwaqqata tire mwaakyota variara mwatukyava vahiro. Tire mwatukya mpo nraakiara qovara hiani mwatukyara mwia vekya variqatama taqamwaqita vi varunananra.

¹⁵ Karaisiva tiriara rieqaro qutu vurara tita, nrivaqe hia quara vahi asasau Kotira rukye mwinraitita, Karaisira kyaiqara rieqata Kotira nrutu tuaheraqi quara. Nrivaqe tire Karaisira nraaqarama varuro timwaqi quara.

¹⁶ Mwitaa maqqata nkyi kyuqe kyaiqa varaqi viqata nai kyaahaqa hi nai kyaahaqa hiqata variata. Mwitaa hi kyaiqara mwianra Kotira kyakya hiram.

¹⁷ Nkyiqa ntaqikyi vari vaisihua qua kyuqema kye riemwaqita quata. Nkye mwitaa hivata mwihua hiama qoririma kyeqata nkyiqa ntaqikyiqita vivara. Nraakiara mwihua Kotira vuqaa uro variqata nkyiqa ntaqikyirara timwa mwivara. Nkye mwihua qua riemwaqi vivera, mwihua qamwateqata nkyiqa ntaqikyi kyaiqara varaqi vivara. Nkye mwihua qua hia riemwaqi vivera, mwihua mwutukya uaqia hianinraqitai nkyiqa ntaqikyiva hiama nkyi kyaahaqa hiananro.

¹⁸ Tiriara rieqata Kotirara aakyara ntaata. Tire tetu tivu nraato vikyokyagi vahi inraikyara ntapihi kyeta tiqata, Tiri kyaiqavanto kyuqe kyaiqama vaiho, tunanra. Tire ekyaan inraikyagi ntapihi kyeta kyaiqa varaqita virera.

¹⁹ Mwi quara rieqanama nte nkyiara tiqana, Nkye Kotirara aakyara tivaro mwiva qamwanrama ni titairaqe nte nkye hinani quankye, tuqq.

²⁰⁻²¹ Kotira qaraakya quavanto ekyaan enta qati nraahu vahiqiro quarive tiro, Iesusiva tiri nai sipisipiqa ntaqikyiva vunyavaava qutu vuvaro mwia

nraanrevanto mwi quara kepukyaqama kyovaro Kotiva mwia qati vara sivuma kyorara tiro, Iesusiva nronraqama viro nkye Kotira kyakya hira vataqi quate tiro, mpo inraikya mpo inraikya kyuqe inraikya nkyi nyinra. Karaisiva nkyi kepukyaqama nyatairata nkye Kotira mwutukya yahiari nraakye qorahua variata. Nrivaqe Karaisira nrutu ekyaa enta tuaaheraqi quara. Qutaave.

Ekyara qua tura

²² Nte nkyi mwutukya qihaakyama nyatarera mwaa quara turama. Nte nkyiara po tiqana mwaa quara riemwaqita quate tuqo. Nte mwaa quara qara ntiqana hia mpuahaa qua qara ntumwa taurave.

²³ Nte mwakyaakya mpo nkyi timwa nyianrita riaata. Tiri tiqata vakyaa Timotiva karavuqitai taiqeroma. Mwiva qamwanrama mwaini nrinrenra, nte mwikyantirima uro nkyi taqaaninra.

²⁴ Nte nkyiqa ntaqikyi varia vaisihua qua mwantaura timwa nyiata. Ekyaa Kotira nraakye qoravata qua mwantaura timwa nyiata. Nkyi qata vakyaa Itarinyaahuá nkyi qua mwantaavo.

²⁵ Kotiva nkyi ekyaa mwihua kyuqemaqi virata variqi quate, tuqo.

IEMISI Iemisiva qara vara kyora

Iesusira ru kyovaro qati siviro nyaamwuni uro varuvaro 10 ihive 15 ihive nritarovaro Iemisiva mwaa quara qara ntumwa tora. Iemisiva Iesusira qatavato variqaro Iesusira qua rie varu nraakye qorahua Ierusaremini varuhuaqaa ntaqikyi varura. (Kyaiqa Varora 12:17, 15:13)

Ierusaremisaita mpo nani mpo nani kyatita uro varu nraakye qorahua aastra kyuqeraaqaa kepukyaqama kye variqita quate tiro, Iemisiva mwaa quara qara ntumwa tora.

Iesusiva sita vato vaisihua 12 nramwuqitairo mpo vaisivanto mwia nrutu Iemisiva mwia qamwava varura. Nkye mwi vaisirara kuaa vaisi mwivave tivora.

¹ Nte Iemisiva. Kotivavata, tiri vunyaa vaisi Iesusi Karaisivavata, varavana nte mwitanahua kyaiqa vaisima varina. Isarerivanto 12 okyara kuaa naaquntaqaanaahuagitaita Kotira nraaqiaraqama vita nkye mpo nani mpo nani uro variahua nté nkyi qua mwantauquo.

²⁻³ Ni kata pakyaa tuaavo, nkyiara uaquia hi aanranraqa quate tiro, mpo kyaiqa mpo kyaiqavanto nkyi mwataara hirera, hia nkyi mwutukyavanto uaquia hirata variate. Nkye mwi entara tire qamwateqata nraahu varirerave qiata. Nkye Iesusira qua riemwaqita viqatama uaquia hi kyaiqara nraatara kyeta tire kepukya vaisive, kepukya nrahesive, qiata.

⁴ Nkye mwitaamaqi viqata mpo enta mpo enta nkyi mwataara hiani inraikyara nraataraqi viqata mwiaqataita nkye kepukyaqama vita hia Kotira okyara, mpo okyara mpo okyarara aara ntaraitita, nkye qioqama vita varivara.

⁵ Kotiva hia kepukyaqama kyeqaro tute variva, mwiva nraakye qorara po kye timwa nyateqaro mwiva qilhaakyama kyeqaro nyi varirara tiro, nkyiqitairo vaisi mpovanto kyuqe vu nraato hia vahiraro mwiva kyuqe vu nraatora aara ntairera, mwi vaisiva Kotirara aakyara ntairaro Kotiva qiomia mwia kyuqe vu nraato mwiananro.

⁶ Haunri nkye Kotirara aakyara nteqata mwiva tiri kyaahaqa hiananrove, hiave tiri kyaahaqa hiananrove, tívora. Kotiva quataaqama kyero tiri kyaahaqa hiananrove tiqatama Kotirara aakyara ntaata. Kotirara taara vu nraato ti variva, mwi vaisiva nanra inraikya votima kyero variro? Mwi vaisiva nramanriqaa kurupupora/nramanri taara toqavanto tiqaro ventaqiro viro nrinro hintema kyero varira.

⁷ Haunri mwitaa hiari vaisiva tiqaro, Kotirara mwiva ni kyaahaqa hiananrove, qiankyora.

⁸ Mwi vaisiva mwi aanranraqaa quataara vaharo mwiva mpo aanraqaa viqa taqero qaqira kyero qaiqaa mpo aanraqaa viqa taqero mwivavata qaqira kye vari vaisivama variro.

Vehi vaisiaravata airi inraikya vatai vaisiraravata tura

⁹ Tiri tiqata vakyaa mpovanto vehi vaisi variraro Kotiva mwia nronraqama kyairera, mwiva qamwataari.

¹⁰ Tiri tiqata vakyaa mpovanto airi inraikya vataariva mwia vu nraato ntapihiraro mwiva tiqaro, Nte vatau inraikyava qumina inraikyave. Nte vehi vaisi nraahuma varuquo, tirera, qamwataari.

Airi inraikya vatehua maunra pairavanto tapupu hiro taiqa vintema kye taiqa vivarave.

11 Maunra paira kyuqema kyero riemwa taiharo huari nronra iteqaro aaharama kyaiharo tapupu hiro tumu ntiharo mwiaqaatairo haa hiro mpoqaraa hiva mwivavata taiga vira. Mwia votima kyero airi inraikya vataari vaisiva nai kyaiqara nraahu riemwaqiro quaninra mwicqitairo qamwanramama qutu quananro.

Uaqia hi kyaiqava vaisi mwataara hianinranra tura

12 Vaisivanto Kotira aanraqaa viqaro taqairaro mwataara hiarinraikyaya nrinranro hia pupohairaro kepuqyaqama kyero nraatara kyero variqi virera, Kotiva mwia kyuqema mwataananro. Kotiva mwianra tiqaro, E mwia kyoqaa vararera ekyaa enta qati variqira vinanrave, qiananro. Kotiva nai kyauqu nriqiqaa vatero tiqaro, Nianra mwutukya vahiari nraakye qorahua ekyaa enta qati variqita vivarave, tiro, tura.

13 Uaqia hi kyaiqava vaisi mpo mwataara hirera, haunri mwi vaisiva tiqaro, Kotiva ni mwataara iho, qiariva. Uaqia hi kyaiqava hiama qio Kotira mwataara hiraro Kotivavata hiama qio vaisi mpore uaqia hi kyaiqara utuarive tiro, mwia mwataara hiananro.

14 Mwataama kyero vaisivanto apiqama kyeqaro uaqia hi kyaiqara uti varira. Vaisivanto nai vu nraato tiraqifairo uaqia hi kyaiqara utuaninranra riemwa kyero mwi kyaiqarara nraahu riemwaqiro viharo mwi quava mwia tuqara kye tutero

15 mwi kyaiqara utuante tiharo vaisivanto uaqia hi kyaiqara uti varira. Mwiva uaqia hi kyaiqara utuqiro viro mwia kyaara uro qutu quani inraikyara varero qutu vira.

16-17 Ni kata pakya tuaavo, Kotiva hiama vaisiara uaqia hi kyaiqara utuarive tiro, mwia mwataara hiananro. Mpovanto Kotiva mwitaama kyero mwataara hiananrove tirata nkye mwia unra quara qutaa quave tivora. Qati nyi varia inraikyavave, ekyaa kyuqe inraikyavantove, Kotiva hinasairo nraahu tumi varira. Kotiva ekyaa nyaamwuni itero ntuvaahе vari inraikyara utu taiva, mwiva kyuqe inraiky tiri timwi varivama variro. Mwiva kuua kyaiqa nraahu varaqiro vi varivama variro. Nyaamwuni itamwaqiro vi vari inraikyava itero qiperomaqiro vi variharo Kotiva nraahuma qati itamwaqiro vi varivama variro.

18 Kotiva nai kyakya hiraqa nai qutaa quaquo tiri utu kyero vataihata varunanra. Mwitaa ihata ekyaa mwiva utu kye vatai inraikyaraqitai tire vuniqama kye varurahuama varita.

Nkye Kotira qua qumina riemwaqita viqata mwia kyaiqavata hia varevare tura

19 Po, ni kata pakya tuaavo, nkye mwaa quara riaata. Nkye qamwanrama kyeta mpore qua rieta qakyoma kyeta mwia qua hiniqa hiata. Mporequa riaivar hia qamwanrama kyero raraqa tairata inronra hiata.

20 Vaisivanto raraqa taaninraqaatairo hiama Kotira kyaiqa kyuqe okyaravanto qovara hiananro.

21 Mwi quara rieqatama nkye api nrohi okyararave, ekyaa qora kyaiqave, qaqira kyaata. Nkye Kotira qua riarerata uti variqata nkyeta nyutu vara mwatumwi mwataniqama kyeta Kotiva nkyi su nyaatoqi vataani quara riemwaqita vivaro Kotiva nkyi huvantu nyataari.

22 Nkye hia Kotira qua quminaqama kye riemwaqita quata. Nkye mwitaahiqata nkyeta unramia utita. Nkye mwi quara rieqata mwi quava tintema kye nrohi variqata kyaiqa varaata.

23 Vaisivanto Kotira qua riero hia mwia kyaiqa vararaitiro qumina variva, mwi vaisiva vaisi mpovanto nai viri kyinumiqi taqai vaisira votima kyeroma variro.

24 Mwi vaisiva kyinumiqi nai viri taqero nte mwataama varuvave timwa kyero vututo viro uro nai viri taqairara taunru kyairave.

25 Kotiva kepuuya qua vataiva, mwi quava tiri huvantu kye varira. Vaisivanto mwi quara ntapihi kyero riemwaqiro viqaro hia qaqira kyaratiro, mwi quarara nraahu riemwaqiro quariva, mwi vaisiva mwitaamaqiro viraro Kotiva mwia qamwata mwataananro.

26 Vaisi mpovanto nte Kotira qua riemwaqina vi varu vaisivama varuqo timwa kyeqarovata hia nai nroqa kyuqema ntaqikyi variva, mwiva nte Kotira qua rie varuva varuqo ti quava, qumina qua nraahu vailharo mwi vaisiva naima unra utu mwate variro.

27 Mwataama kyero vaisivanto Kotira tiri tiqora mwia aanraqaa nrohiqaro ntapihi kyero mwia nrutu tuaheraanro. Mwi vaisiva uro nrainranra nraaqiaravata, tetoga nraakye muaanra vare varihuavata, uro kyaahaqa hiari vaisivama variananro. Mwiva mwitaamaqiro viqaro nte Kotira qua nteqa kyena qora kyaiqa varaankyorave tiqaro ntapihi kyero nrohi variari vaisivama variananro. Mwitaa hiani vaisirara Kotiva tiqaro, Qutaaqama kyero mwi vaisiva ni aanraqaa nrohi vari vaisivama variho, qiananro.

2

Ekyahua kuua qarama nyataate tura

1 Ni kata pakyaa tuaavo, Iesusi Karaisira mpo mwatanaa mpo mwatanaahua vara kyeta puhaqama taa vaisiva varihata nkye mwia qua riemwaqita viqata nkye mpo vaisi nrutuara rieqata mwi vaisira nraahu qamwata mwateta mpo vaisi hia qamwata mwatevorave.

2 Nkye taqaivararo nkye ntuvaantua hiraqi mpovanto nai kyauquqi vataani inraikyara nronra munima kyero vara taaninra utu tero kyuqe tuavaaqa utu taariva nrinranro mpovanto vehi vaisivanto mwia tuavaaqa uaquia hiro nrahitu quaninravata nrinrata

3 nkye kyuqe tuavaaqa ututaaninranra nraahu tiqata, Tainta kyuqera mwaqaqaa mwatakyaa quante, mwianra mwitaa timwa kyeta vehi vaisiara, Mwini qati sivira variante. Mwini qati mwatasata mwatakyaa vira variante, tivora.

4 Nkye mwitaa hivera, nkye apiqama kyeta nai tukya hi nai tukya hi varivara. Nkye ko rie vari vaisira votima kyeta mwi vaisirara uaquia hi vaisivave, mwi vaisirara kyuqe hi vaisivave, tita. Mwitaa hiqata nkye uaquia hi okyarara nraahu rieqatama mwitaa hivara.

5 Ni kata pakyaa tuaavo, nte qianinra riaata. Hia mpo inraikyavata vataa nraakye qorahua variavata mwatani variahua mwihuara nkye vehi nraakye qorave ti varia nraakye qorahua, mwihuara Kotiva qamwateqaro nyaanrama kyero site varira. Mwihua Iesusirara kepuuyaqama kyeta riemwaqita vivaro Kotiva mwihua nronraqama kyairata mwihua Kotira mwatukya taqevara. Kotiva nai kyauqu nriqiqaa vatero tiqaro, Nianra mwutukya vahiaru nraakye qorahua ni mwatukya varevarave, tura.

6 Vehi nraakye qora mwitaa hiahua variavata nkye mwihua nyutu vara mwataniqa hi variavo. Tahuave nkyi airi muaanra nyita nkyi ntanrau vareqata ko riahua suqaa vi variavo? Mwia airi inraikya vataahua, mwihuave.

7 Nkye Iesusira nraaqiara variavata airi inraikya vataahua variqata mwihuama Iesusira nrutuara uaquia hi nruturave ti varita.

8 Kotiva vunyaava mwaa quara vataiva mwitaama tiro: Inanra i mwutukya vahintema kyero mporaravata i mwutukya vahiarive, tura. (Wkp 2:8)

Nkye mwitaamaqita vivera, nkye ntapihi kye vahi kyaiqarama varevara.

⁹ Nkye hini vaisiara nraahu kyuqe vaisive titi, hini vaisiara uaqia hia vaisihuave tivera, nkye qua raaquta kyeta uaqia hivaro Kotiva nkyiara nkye ni qua nteqa kyaavoma qiananro.

¹⁰ Vaisivante Kotira qua ekyaa hini qua riemwaqiro viqarovata kuaiqia nteqa kyairera, Kotiva mwi vaisirara tiqaro, E ni qua ekyaa mwi quarama nteqa kyaaroma, qiananro.

¹¹ Kotiva tiqaro, Hia mpore nraata vaatiara nrohianti, tira. Mwi quara tiva, kuaa mwiva nraahu mpo quavata tiqaro, Hia mpore ru kyaante, tira. Nkye hia mpore nraatave, mpore vaativata nrohiraitita uro vaisi ru kyaivera, nkye Kotira qua nteqamā kyevara.

¹² Iesusiva nkyi huvantu kyaihata nkye Iesusira qua riaahua variara. Nkye mwia qua nraahu rieqatama kyuqe kyaiqa nraahu vare varivaro Kotiva hia nkyiqaa qua vataari.

¹³ Nkye mwaa entara hia mporara po titi kyuqema mwataivera, nnraakiara Kotiva ko tiqaruma hiama nkyitaravata po timwa nyataananro. Nkye mpohuara po titi kyuqema nyataivera, nkye qioma ko nraatara kyevara.

Iesusira qua riauvave timwa kyera haunri hia mwi quara vataqira viravaarave tura

¹⁴ Ni kata pakayaa tuaavo, nkye taqaivaro vaisi mpovanto tiqaro, Nte Iesusirara kepukyaqama kyena riemwaqina vuvave, tiqarovata hia kyuqe kyaiqa varaqiro virera, mwia quavanto qumina qua nraahuma vahiraro Kotiva hiama mwi vaisira huvantu kyaananro.

¹⁵ Nkye taqaivaro nkyiqitairo nkyi qata vakyaave, nrunra nrakyyaa mpovanto hia tuavaaqa vaterove nraataa hirarove varirera,

¹⁶ nkye mwia hia kyaahaqaraitita, nkye mwianra qumina tiqata, Uro kyara nrenra tuavaaqa utu tera kyuqema variante, tiva, mwi quava nataama kyerove mwia kyaahaqa hiananro? Hiama mwi quava mwia kyaahaqa hiananro.

¹⁷ Mwia votima kyeta nkye hia mpohua kyaahaqa hivera, nkyi kyaiqvanto hia kyuqe kyaiqa vahirata nkye Iesusirara qutaa mwivave ti quava qumina unra qua nraahuma vahiananro.

¹⁸ Mpovanto ni qua nraatara kyarero uti variqaro mwitaama qiananro. Qioma vaisi mpovanto Iesusirara kepukyaqama kyero riemwaqiro viraro qioma vaisi mpovanto kyuqe kyaiqa nraahu varaqiro quananrove, tirera, nte nai mwi vaisira mwataama kyenama timwa mwianinra. E nataama kyerave hia mpore kyaahaqaraitira, Iesusirara nraahu kepukyaqama kyera riemwaqira vinanrave? Nte mpohua kyaahaqamaqima viqana Iesusirara kepukyaqama kyena riemwaqina quariro ni quavanto qutaa qua vahirara evata qioma taqenanrave, qianinra.

¹⁹ E tiqara, Qutaama mwaniqa Kotiva kuaikuvanto variho, qiananra. Mwia kyuqemama mwitaa tira. Tove vaanavantovata qutaa mwaniqa Kotiva kuaikuvanto nraahu variho ti variara. Mwihua mwitaa timwa kyeqata variavaro mpoqama kyero kyuqu kyauqu ntihata aatu hi variara.

²⁰ I vu nraato apiqama vihara variarao. I vu nraatovanto qatua viro ntapihirara e riaante. E hia mpohua kyaahaqa hiraitira variraro e Iesusirara qutaa mwivave tirava qumina unra qua nraahuma vahiananro.

²¹ Tiri haivaqava Evarahaamuva Kotiva tu quara riero nai mwaqqi Aisaakira vita kyero Kotirani qia quara mwatarero uti varuvaro Kotiva mwia kyaiqa taqero tiqaro, Nte iara avuqavuma kyera nrohi variara vaisivave tuquo, tura. Kotiva Evarahaamuva kyaiqara rieqaro mwitaa tura.

²² E hiave taqera? Evarahaamuva Kotira quara quataa quave timwa kyero mwiaqaatairo mwiva tuntema kyero Kotira kyaiqa varaqiro vura. Evarahaamuva Kotira quara quataave tu quavavata, mwiva Kotira kyaiqa varovavata, mwitanahua nai kyaahaqa hi nai kyaahaqa hi varuvaro qio varura. Mwiva Kotira kyaiqa varova kyaahaqa hi varuvaro mwiva Kotirara quataave tu quava qio vhaura.

²³ Evarahaamuva mwitaamaqiro vurara tiro, Kotira mpukuqi qara ntumwa to quava mwivau vhaura. Mwitaama tiro:
Evarahaamuva Kotira quara quataave tuvaro
Kotiva mwianra tiqaro,
E ni quara quataa quave qiaranama nte e qiana quara
rieqanama iara ntapihi kyera nrohi variara vaisivave
tuqo, tura. (Okyara 15:6)

Mwianra rieqaro Kotiva Evarahaamunranra e ni vaisima variaro tura.

²⁴ Nkye mwi quara rieqatama mwaa quara okyara anomia kyeta ntapihiata. Vaisivanto hia Kotira kyaiqa vararaitiro tiqaro, Nte mwia qua nraahu riaugq qiani vaisirara, Kotiva mwi vaisirara hia ntapihi kyera nrohi variara vaisivavema, qiananro. Vaisivanto Kotira qua riero mwiaqaatairo mwia kyaiqvata varaani vaisirara, Kotiva mwi vaisirara ntapihi kyero nrohi vari vaisiravema qiananro.

²⁵ Haaru nraakyev mpo Rehepiva mwiva api qaraqiro nrohi varu nraakyeva mwivavata Evarahaamuva hunte hura. Iosuaava nai ntaku vaisitanahua nramwutaahua varunani uqeta kyero titovata mwitanahua uro ntovaro Rehepiva mwitanahua nai nraamwuqi uqeta tero ni nramwuaahua mwitana ntavaaqavu kyevorave tiro, mwitanahua kyaahaqa hura. Kyaahaqa huvata qio mwitanahua uqeta kyeta mpo aanraqamateta vurarra tiro, Kotiva Rehepira kyaiqara rieqaro mwi nraakyerara tiqaro, E ntapihi kyera nrohi variara nraakyevave, tura. (Jos 2)

²⁶ Vaisivanto hia nai mwanraqura vatama kyero varirera, mwi vaisiva quutu vari qari vaisiva variananro. Mwia votima kyero vaisivanto Jesusirara quataa mwivave qari quava nraahu vahiraro mwi vaisiva Jesusira kyaiqa varaqiro quariva hia vahirera, mwiva Jesusirara quataave tivavata qumina inraikyaqama hiananro.

3

Nkyeta mwaaqinriqaa kyuqema kyeta ntaqikyiqita quate tura

¹ Ni kata pakyaa tuaavo, nkyiqitaita airi vaisivanto tiqata, Tire mwaanra okyara nraakyev qora timwa nyinrenrave, tivora. Tirenramwu mwaanra okyara timwa nyi variara vaisihua variararo Kotiva tiri kyaiqa mpoqiyavata tukya hiro mpoqhu kyaiqa viraqamama tukya hiananro.

² Airi enta ekyaa tire variqata ntapihi kyeqata kyaiqa varaare tunanra tire apiqama kyeqata vare varunanra. Vaisivanto hia api qua tiraitiro, ntapihi kyero nraahu ti variari vaisiva varirera, mwi vaisiva hia uqen-rraanri vaisiva variraitiro, mwiva kepukya vaisima variananro. Mwiva ekyaa nai mwamwantaqaa kyuqemā kyero ntaqikyi variari vaisivama variananro.

³ Tire qosiqaa nrohiqata teta virera hiananrani qosivanto quarive tita, tire qaini pataqia mwia nroqi vateta kyaantaqa tu varauraro qosi nronra mwiva tire virera tuna aanranra mwiaqaa nraahu vi varira.

⁴ Nkye sipiaravata riaata. Sipi nronravanto vaiharo toqavanto nron-rraanri kyero ti variharo vaisivanto mwia aanranraqaa quankye timwa kyero mwia nriqi ti varira pataqiaqotairo sipi mwia tuqasaa kyaiharo sipivanto mwiva virera ti aanranraqaa vi varira.

5 Mwia votima kyero vaisi mwaaqinrivanto pataru vahigarovata mwiva nronra kyaika vare varira. Qio taqaata. Qia pataqiaavanto itamwaqiro viro uro antave, mwukyauve, qiomia itamwa kyaananro.

6 Vaisi mwaaqinrivanto qora qua tiqaro qia auru votima kyero iteqaro mpo inraikya mpo inraikya qoraqama kye varira. Mpo qua mpo qua uaqia hi quavave, uaqia hi kyaiqvavave, mwaaqinriqaatairo qovara hiro. Vaisi mwaaqinrivanto ekyaa vaisi mwamwanta uaqiamma kye varira. Saataan-inra mwatukyaqitairo qiaavanto nri ntero vaisi mwaaqinriqaatairo iteqaro qora kyaiqa mpo kyaiqa vare varira.

7 Vaisivanto ekyaa vahi aasauve, qarurave, tavukyave, ekyaa qaakyau vahi aasau vara tumusa kyeqaro vataariva qiomia vahiro.

8 Mwi inraikyara mwi inraikyara qio tumusa kyaariva vaharo vaisivanto nai mwaaqinri nraahu tumusa kyaariva hiama qio vahiro. Mwaaqinrivanto qoraqa hi inraikyaya nai kyakya hira nraahu vataqiro vivariyama vahiro. Vaisi ru kye varia tuhira, haqaquaakyaya voti hi inraikyaya mwaaqinriqa piqaroma vahiro.

9 Tire mwaaqinriqotaita Kotiva tiriqaa ntaqikyi varira tetu tigorara qamwateqata variania quara timwa kyeta qoqaraara mwiaqotaita tire vaisi mpo Kotiva nai votima kyero utu tai vaisirara uaqia hi quaarura ti varunana.

10 Qikye, kuua nro mwiqitairo qamwate varina quava nri ntaiharo qora quavantu mpore timwa mwate varina quavavata nrinte varira. Ni kata pakyyaa tuaavo, tiri nroqitairo hia mwitaa qiarive.

11 Rumwu kuua mwiqitairo hiama kyuqe hiani nramanrivavata uka quani nramanrivavata nrianano.

12 Kyaimwuvanto hia vatekyu tamwa riairave. Tauveravanto hia kyaimwu riairave. Puaataqitaira hiama kyuqe hiani nramanrinra kyaqenanrave.

Kyuqe quaravata kyuqe vu nraatoravata tura

13 Nkyigitairo kyuqe qua rie vari vaisiva, kyuqe vu nraato vataava varirove? Mwi vaisiva hia nai nrutuara riaraitiro, kyuqe qua nraahu riemwa kyeqaro kyuqe kyaiqa nraahu vare varirata nraakye qora mwia kyaiqa taqeqata mwianra kyuqe vaisive qiata.

14 Vaisi mpo kyuqema mwataaninra kyaara nkye mwia kyaru ntumwa mwate variqata nkyetara nraahu rieqatama tire nronra vaisi varirerave tiqata nkye nai nraatara kye nai nraatara kyemaqita vivera, nkye mwianra rieqata hia nkyeta mwahuta tiqata, Tire kyuqe nraakye qora varuro, tivara. Nkye nkyeta uaqia hi kyaiqara utirara unra qua tivora.

15 Hia nyaamwusairo Kotiva kyaahaqa iharo mwi vaisiva mwitaama kyero uaqia hi kyaiqara utirave. Mwi kyaiqara utuari okyarava mwatasairo qovarama vi variho. Saataaniva kyaahaqa hi variharo vaisivanto mwi kyaiqara uti varira.

16 Nraakye qoravanto vaisi mpo kyuqema mwataaninra kyaara mwia kyaru ntumwa mwate variqata mwihua nkyiariara nraahu rieqatama tire nronra vaisi varirerave tiqatama nai nraatara kye nai nraatara kye hi variaqi inronra hi quavave, uaqia hi kyaiqvavave, mwiva nraahuma vahianano.

17 Mwatasairo qua okyaravanto mwitaama vaharo nyaamwusairo Kotira vu nraatovanto vahirero mpo qaramama vahiro. Vaisivanto Kotira vu nraato vahirara rieqaro mwiva vunyaa inraikya mwia, mwiva kyuqema kyero nraahu variqiro quananro. Kotira vu nraato vahirara riaari vaisiva hia antua qua tiraitiro, qihakayamaqiro quananro. Mwi vaisiva hia nai qua nraahu riaraitiro, mpore quavatama riemwaqiro quananro. Mwiva

mpohuara po timwaqiro viqaro mwiva mwihuara kyuqemaqiro quananro. Mwiva mwianravata mporaravata kuaa qua nraahuma timwaqiro quananro. Mwiva hia unraqama kyeqaro Kotira kyaiqa varaanano.

¹⁸ Tire mpohuara qihakyamaqita viqata kuaara nraati varianan-raqaatairo qiomaa ntapihi kye nrohi variana okyarava qovara hiananro.

4

Mwata mwaaqaanaa inraikyara nraahu mwutukya ntiraro variari vaisiva Kotira nramwutaama variananrove tura

¹ Nkye variavaro taisairove inronra hia quavave, ntaqua quava nrinro? Kyai nte nkyi timwa nyianri. Nkyi su nyaatoqitairovata nkyi mwutukyayiqitairovata qora kyaiga, mpo kyaiga mpo kyaiga vareva nri ntero nkyiqa ntaqiyirero uti variqaroma nkyivata ntaqi variro.

² Nkye mpo inraikyara mpo inraikyara varaataa ihata hia mwi inraikyara vararaitita, mwiaqaataita nkye tiqata, Kyai tire vaisi ru kyeta mwi inraikyara varaare, ti variara. Nkyi mwutukyavanto mpo inraikyara vahihata nkye mwi inraikyara varaare qiar hia vararaitita, mwiaqaataita nkye inronra qua tiqatama ntaqi variara.

Nkyi mwutukyavanto vahi inraikyara nkye hia vare variara. Nkye mwi inraikyaraara Kotirara aakyara tiqata kyapara hiataara vahihata nkye hia mwitaa hiara.

³ Nkye Kotirara aakyara qia entara nkye apiqama kyeqata nkyeta kyakya hiraqa vara kye api tuto kyarera aakyara nte variavarora tiro, Kotiva hia mwi inraikyara nkyi nyi varira.

⁴ Nai vaati qaqlira kyero mpo vaisintiri api nrohi vari nraakyera votima kyeta nkye variara. Nkye hiave ntapihita? Nkye mwatanai vahi inraikyara totiqa hiqata mwia nkye Kotira nramwutaaqama hita. Tavave mwata mwaaqaanaa inraikyara nraahu riemwaqi viro mwi inraikyara totiqa hiariva, mwiva Kotira nramwutaama variro.

⁵ Mwi quara Kotira mpukuqi qara ntumwa torara nkye qumina quavetivora. Mwitaama tiro:

Tiriara nkyi mwutukyavanto nianra nraahu vahiarive tiro,
Kotiva nai mwanraqura tiri timwinrave, tura.

⁶ Kotiva po timwa timwateqaro tiriara uaqia hi kyaiqara
nraatara kyaate tiro, Kotiva tiri kyahaqa hi varira.

Kotira mpukuqi mwitaama tiro:

Nai nrutu nraahu tuaaheraani vaisira
Kotiva raaquta kyaananrove.

Hia nai nrutu tuaaheraani vaisira Kotiva po timwa
mwatero mwia kyuqema mwataananrove, tura. (Snd 3:34)

⁷ Kotiva nkyiqa ntaqiyikiarive titi, nkyeta nyutu vara mwataniqama kyeta mwia mwemwani variate. Nkye Saataaninravatama kyeta kepukyayiqama kyeta ntaquqita vita mwia nraatara kyaivarao mwiva aatu quarive.

⁸ Nkye Kotira nraaqani uro varivarao Kotiva nkyi nraaqani variari. Vaisivant qainaama kyauquqaa vahiankyorave tiro nai kyauqu hiqama kyaintema kyeta, nkye uaqia hi kyaiqara uti varihua nkyeta mwutukya hiqama kyaivarao uaqia hi kyaiqava hia vahiar. Nkye Kotira vataqi vuro timwa kyeqata kumwaanri hi variahua nkyeta mwutukya hiqama kyaata.

⁹ Nkye nkyeta uaqia hi kyaiqara uti varirara hia raihita qamwateqata variate. Mwi inraikyaraara riaivarao nkyi mwutukyavanto uaqia hirata variqata ntataata.

¹⁰ Nkye Kotira vuqaa nkyeta vara mwataniqaa hivarao Kotiva nkyi tuaahera kyaari.

Hia mpohua mwaanra qiate tura

¹¹ Ni kata pakyaa tuaavo, nkye hia mpohua nyaanra tiqata uaquia hi quara qiata. Nai qatave nai vakyaarave pupitaapitama kyero e mwitaa mwataama variaravave qiariva, mwiva ko riaa vaisilhua votima kyero variqaro Kotiva vatai quara hini hi quara mwinanra kyuqe quave tiro mpo hi quara uaqiahi quarave ti varira.

(Nkyiqitairo mpovanto mwitaa tirera, nte mwianra mwitaa qianinra.) E mwitaamagira viqarama Kotira qua hia tutera hiama vataqira vira hiaro. E ko iaa vaisilhua votima kyera variqarama Kotira qua mwataara hiqarama ntainra kyera hiaro.

¹² Kotiva mwiva nai nraahu nai qua vata tairave. Mwiva nraahuma nraakye qorara kyuqe vaisive qora vaisive qiananrove. Mwiva nraahuma ko tiqaro vaisi ru kyerove vaisi sitaananrove. E ta vaisiva variqarave e ena hena nraakye qora tukya hiaro? qianinra.

Haunri nkye qakyo vare inraikyara nronraqama kye riemwaqita vivore tura

¹³ Nkye mpo hiahua tiqata, Kyai tire mateve hurave mwi mwatuukyara nronra mwatuukyqaqi uro variqata munima airi ntanrau kyeta varaana kyaiqara kuua ihiara varaqi viqata munima airi varaare, qiahua, nkye rie variqaqena nte nkyi qua timwa nyianri.

¹⁴ Nkye hora qovara hiani inraikyara mate hiama ntapihita. Nkye variqata viva naanra inraikya votima kyerove vahiro? Kyai nte nkyi timwa nyianri. Toqaqinaka tonamwuvant rupa qutero pataqia vahiro ntupepaama viro hia qaiqaavata vahintema kyeroma, nkye variqi viva vahiro.

¹⁵ Mwianra rieqatama nkye hia nte mwitaa mwitaa hirerave qiata. Nkye mwataama qiata, Nai Kotira kyakya hirave. Mwiva nianra qiove tirera, nte mwitaa mwitaa hianinrave, qiata.

¹⁶ Mate nkye nkyeta nyutu nraahu tuaaheraqi viqata nkye nkyeta mwahuta nraahu ti variavo. Mwitaa ti varia quava uaquia hi quava nraahuma vahiro.

¹⁷ Vaisivanto tiqaro, Mwi kyaiqara kyuqe kyaiqa varaataara vailhanavata nte qaqla mwia kyena hia vararerave, qiariva, mwi vaisiva Kotira qua nteqa kye variananro.

5

Airi inraikya vataahuara tura

¹ Nkye airi inraikya vatehua ni qua riaata. Qikye, nkye nraakiara anom kyero uaquia hiani entarara rieqatama mwaa entara ntataqi viqatama po kye timwaqita quata.

² Nkyi kyau kyoqaavanto ntenra quarivama vahiro. Tovesivanto nkyi tuavaaqa nramwa kyaarivama vahiro.

³ Nkyi kori munimavantovata, ori munimavantovata, puaataqa taarivama vahiro. Nraakiara puaataqa taaninra taqegaroma nkye qora kyaiqa varera ntapihi kyero taqaanano. Qia auruvanto itaintema kyero puaataqa taariva, nkyi mwamwanta itamwaqiro viro uro taiqa kyaanano. Nkye mwaa ekyaaara enta variqata nkye mwaa mwatara taiqa kyaani entarara hia riaraitita, nkye mwitaa inraikya ntuvantua hirara nraahu riemwaqita vi variara.

⁴ Taqataa. Nkyi kyaiqa vaisivanto nkyi aakyooqi kyaiqa varaahua kyoqaa nyiqata nkye ntape rape hi variarave. Nkye mwitaa hiavata nkyi kyaiqa

vaisivanto mwia kyaara inronra hi variavaro Kotiva nyaamwuni ntaqi varia vaisihuqaqa ntaqikyi variva, mwiva mwihua qua mwia rie varira.

⁵ Nkye mwatani variqata nkye kyuqe inraikya, mpo inraikya mpo inraikya vateqata nkye nkyetara nraahu rieqata nkyeta qamwaterara nraahu rieqata variavaro. Nkye airi kyara nramwaqita quavararo nkyi mwamwantavanto nrakyote varihata nkyetavanto nkyita ru kyaani iherara tera hi variavaro.

⁶ Hia uaquia hi kyaiqara uti varia vaisihuua variavata nkye mwihuaqua qua vateta mwihua ru kyaara. Mwihua hia nkyi hiniqama kyeta uaqiaman yataavata nkye mwihua ru kyaara.

Mwutukya qihakya hirata Kotirara aakyara nteqata Iesusira vekya variate tura

⁷ Ni kata pakyaa tuaavo, nkye tiri vunyaa vaisivanto qaiqaa tumuaninranra rieqatama mwia vekya variqata mwutukya qihakynam kyeta variavaro tumuanri. Nkye kyara vara ti vari vaisirara nraato tiqata variata. Mwi vaisiva kyara vara tutero hia vaakya vara kyero nranraitiro, mwiva qakyoma kyero variqaro huarivata vativata vekya variharo mwitanava kyaiqa utiharо kyaravanto qupiqero peqaqama viharo mwiva uro van-tuqiro nrumu nrainrave.

⁸ Nkyevata mwiva hintema kyeta Iesusira vekya variqatama mwutukya qihakynam kyeqata variata. Tiri vunyaa vaisivanto tumuanriva qaumato vahihafara tita, nkye kepuqyaqama kyе variqita quata.

⁹ Ni kata pakyaa tuaavo, Kotiva nkyiqa qua vataankyo tita, nkye hia nanrianra nanrianra uaqua tiqata e hia ni mwitaa mwataa hiaro tiqata airi quanti qia. Ko rie variva nronravanto Kotiva nrumu quesana variqaro vera ntareroma uti variro.

¹⁰ Ni kata pakyaa tuaavo, haaru poropeti vaisivanto Kotira nrutuara rieqata hia aatu hiraitita, Kotira qua timwa nyiqi vuhua, nkye mwi vaisihuara riemwaqita viqata variata. Mwihua nriqa vu inraikya varaqita viqata mwutukya qihakynam kyeqata nraahu varurara rieqata nkyevata mwitaa hiata.

¹¹ Haaru uaqiaman nyatovata poropeti vaisivanto hia Kotira kyaiqa qaqira kyaraitita, Kotira kyaiqa kepuqyaqama kyeta vare varura. Mwihua mwitaa hurara tita, tire mwihuara tiqata, Mwihua qamwateqata varu vaisihuave, tunanra.

Iopuva tiri haivaqava mwivavata mwutukya qihakynam kyero vahu vaisiva varura. Nkye mwi vaisira ntapihi kyaara. Iopuva haaru nronra vaisivanto varuva, mwiva anomia kyero uaqiaman variqiro viro mwiva mwi entara hia Kotira qaqira kyaraitiro, Kotirara rieqaro mwutukya qihakynam kyero varuvaro mwiaqaatairo nronravanto Kotiva mwia kyugema mwatero mwia qaiqaa nronraqama kyora. Nronravanto Kotiva, mwiva tiriara po kye tiro kyuqema timwa te varivama variro.

Kyauqu nriqiqaa vaterara tura

¹² Ni kata pakyaa tuaavo, kyai nte Kotiva nronraqama kyero qao timwa tai quara nkyi timwa nyianri. Nkye kyauqu hia nriqiqaa vateqata nyaamwunyaa nrutuve, mwatanyaa nrutuve, mpo inraikya nrutuve, nteqata qutaama turo qia. Nkye qua tiqatama qati eo nraahu tita hiave nraahu qia. Nkye mwitaa tivarо Kotiva hiama nkyiqa qua vataananro.

Ntapihi kyeqaro nrohi vari vaisiva Kotirara aakyara ntai quava kepuqya vaiho tura

¹³ Nkyiqitairo vaisi mpovanto variraro mwi inraikyara mwi inraikyara kyaara mwia mwamwantavanto muaanra ntairaro varirera, mwi vaisiva

Kotirara aakyara ntaari. Mpovanto mwutukyaqitairo qamwateqaro varirera, mwi vaisiva Kotirara ihi tiqaro Kotira nrutu tuaaheraari.

¹⁴ Nkyiqitairo vaisivantove nraakyevantove nriqa virera, mwiva Iesusira nraaqiara nronranramwu nyaanrainrata mwihua nrumu tiri vunyaa vaisi nrutu nteqatama vahamwenra mwia qiataga qu mwateta Kotirara aakyara nteqatama mwia kyuqema kyaante qiat.

¹⁵ Nkye mwitaama kyeta Kotirara aakyara nteqatama Kotiva qutaama mwia kyuqema kyaananrove tivar Kotiva mwia kyuqema kyaari. Nronravanto mwia nriqa quaninra vara kyero mwiva uaqia hi kyaiqara utuani quaravata nruka mwataaanano.

¹⁶ Nkye mwi quara rieqatama hia nkyeta uaqia hi kyaiqara utira ujeta taraitita, mwi quara qovarama kyeta nai timwa mwi nai timwa mwi hiata. Nkye mwitaamaqita viqata nanrianra nanrianra rieqatama Kotirara aakyara ntaiyaroma mwiva nriqa quaninra taiqa kyaari. Avuqavuma kyeqaro nrohi vari vaisiva Kotirara aakyara nteqaro ti vari quava, kepukya qua vaiharo Kotiva mwi quara rie varira.

¹⁷ Tiri haivaqava Iraisaava mwivavata tiri nraantantova vaisivanto varura. Mwiva hia vati ntuarive tiro, Kotirara kepukyaqama kyero aakyara ntvoraro Kotiva mwia qua rioraro vativanto taarampo ihi vara kyero mpo ihi mwia hinivata vara kyero hia vati ntura.

¹⁸ Hia vati ntuvoro Iraisaava variqiro viro mwiaqatairo vati ntuarive tiro, Kotirara aakyara ntvoraro nyaamwusairo nrónraqama kyero vati ntuvoro mwiaqatairo kyaravanto kyuqema kyero qupiqora.

Vaisivanto kyuqe aanra qaqlira kyero quaninra uro qaiqaa viteta nrinranra tura

¹⁹ Ni kata pakyaa tuaavo, nkyiqitairo mpovanto qutaa qua qaqlira kyero uaqia hi aanranraqaa viraro mwiaqatairo mpovanto mwia vitero kyuqe aanraqaa nrumu kyaani vaisirara tirera.

²⁰ Mwia kyaahaqa hiraro uaqia hi aanranra qaqlira kyero uro ntantero nriani vaisiva hiama ekyara qutu quananro. Kotiva mwi vaisiva uaqia hi kyaiqara utuani quara, mpo quia mpo qua nrukama mwataaanano.

1 PITAA

Pitaava tauraanaa qara vara kyora

Iesusira ru kyovaro qutu viro qati siviro nyaamwuni uro varuvaro 30 ihive 35 ihive nritarovaro Pitaava mwaa quara qara ntumwa tora. Mwi entara Iutaavanto Iutaa mwaanra qua riohua Iesusira nraakye qora qoraqama nyate varuvata Iesusira nraakye qora airivanto tiqata, Iesusira vataqi vunanra kyaara tirivata rivorave, timwa kyeta Ierusaremisaitavata, Iutaa mwatasaitavata, kyatu kyaatu hita uro mpo nani mpo nani varirerata surama.

Mwihua mwini uto varuvata Iutaa vaisivanto mwini varuhuavata, mpo vaisinramwuvantovata, Iesusira vataqi vura kyaara mwihua qoraqama nyate varura. Mwihua qoraqama nyate varuvata Iesusira nraakye qoravanto Iesusira vataqi vura kyaara muaanra vareqata pupohevovare tiro, Pitaava mwihua kepuqyaqama nyatarero mwaa quara qara ntumwa tora.

Iesusiva sita vato nraaqiarahua 12 nramwuqitairo Pitaavavata varura.

¹ Nte Pitaava. Iesusi Karaisiva ni nronraqama kyaihana nte mwia kyaqiqa vare varuvama varina. Nkye nraakye qora nkyeta mwaata qaqa kye kyatu kyaatu hita uto Pontiaasinive, Karesiaanive, Kapatosiaanive, Esiaanive, Pitiniaanive, variahuara rieqanama nte nkyini qara ntumwa tena.

² Haaru Kotiva tiri tiqova nkye hia varu entara nkyiara ni nraaqiara variate tiro, nkyi nai kyaama tora. Nkyiara kyuqema kyotata nraakye qora nraahu variate tiro, nai mwanraqura nkyi nyinro. Nkyiara Karaisira qua riemwaqita quate tiro, Karaisira nraanrevanto nkyi hiqama nyataira. Kotiva nkyi kyuqema nyatairaro nkyi mwutukyavanto qibaakyama vahirata variata.

Kyuqema kye variva nyaamwuni nkyi sekä vaiho tura

³ Nrivaqe Kotira nrutu tuaaheraare. Kotiva mwanriqavanto variqaro mwiva tiri vunyaa vaisi Iesusi Karaisira qova varirama. Kotiva tiriara po kye timwa teqaro tiriara qaraakya nraakye qora variqata ekyaa enta qati variqita quate tiro, mwiva Iesusi Karaisiva qutu vuraqitairo qati vara sivuma kyora. Kotiva Iesusi Karaisira qati vara sivuma kyorara tita, tire nraakiara Kotiva tiri tivitairaqe mwiaavata uro nyaamwuni variananra vekeyama varuro.

⁴ Kotiva mpo inraikya mpo inraikya kyuqe inraikya nraahu tiri kyaama tai inraikyavama nyaamwuni vahiro. Mwini vahirara tiro, mwi inraikyava hiama qio ntenra viro taiqa quananro.

⁵ Nkye Kotirara kepuqyaqama kyeta riemwaqita vi variavaro Kotira peqvanto nkyiqa vaimwanraanra ntaqiqyi varihata variara. Kotiva nkyiqa ntaqiqiyiqiro viviro ekyaa entaqaa nraakye qora huvantu nyatero sitaanri okyarara terama taariva qovara hiananro.

⁶ Nkye mwi quara rieqatama mpoqama kyeta qamwateqata variata. Nkye mwi quara riemwaqita vivaro mwaa entara nanra nanra inraikyavantove qovarama viro nkyi qoraqama nyatairera, nkye hia mwi inraikyava nkyi antua kyairata mpo qua taunru kyaraitita, qati riemwa teta qamwateqata variqita quata.

⁷ Mwi inraikyava mwi inraikyava nkyi qoraqamaqiro viraro nkye Kotirara kepuqyaqama kye riemwaqita vi okyarara Kotiva qio mwia mwataara hiqaro taqaanano. Korivanto hia ekyaa enta vahiani inraikyava vahiro vaisivanto mwi orira mwataara hirero qiaqotairo mwia mwataara

hiqaro taqe varira. Korivanto qumina orivanto nraahu vahiaro nkye Kotirara kepukyaqama kye riemwaqita viva mwiva nritarero vahiaro Kotiva mwianramá nronraqama kyero riero. Vaisivanto kori mwataara hintema kyero Kotiva nkye mwianra kepukyaqama kyeta riemwaqita vira mwataara hi variro. Mpo inraikya mpo inraikyavanto nkyi qoraqamaqiro virata nkye Kotirara nraahu kepukyaqama kyeta riemwaqita vivera, nraakiara Iesusi Karaisira qovarama kyaani entaraqaa Kotiva nkyi nyutu tuaahera kyero nkyi nronraqama kyero nkyi qamwata nyataananro.

8 Nkye Iesusi Karaisira hia taqaahua variavaro nkyi mwutukyavanto mwianra vhira. Nkye matevata hia mwia taqaahua variqata nkye mwianra kepukyaqama kye riemwaqita vi variara. Nkye Iesusirara mpoqiyavata qamwateqata variarara tiro, nkye nkyeta nroqitaita mwianra mpo qua vutu kye tiva hiama qio vahiananro.

9 Nkye Iesusirara kepukyaqama kye riemwaqita viraqaatairo nkyi mwanraqura huvantu kyaari inraikyava qovara hiananro.

10 Haaru poropetinramwuvanto variqata Kotiva nraakye qora huvantu kyero sitaani okyarara ntapihi kyeta riarerata uti variqata Kotira qua, mpo qua mpo quara nraato tara hiqata varura. Kotiva mwihua kyaahaqa huvata mwihua Kotiva nkyi kyuqema nyatarera hianinranra qoqama kyeqata tura.

11 Karaisira mwianraquravanto mwihuaqi variqaro timwa nyinro tiqaro, Karaisiva nriqa vi inraikyara varaqiro viro mwiaqatairo mwiva nronraqama viraro mwia nrutuvanto virito vahiananrove, tuvata mwihua mwi quara qara ntqata nraato tara hita tiqata, Taireve mwitaa hiananrove? Ta vaisivave mwitaa mwitaa hiananrove? tura.

12 Mwihua ntapihi kyovaro mwihua qati varu entaraqaa mwi inraikyava qovara hiariva hia vahura. Mate nkye varia entaraqaaama mwi inraikyava qovarama viro. Kotiva nai mwianraqura nyaamwusairo titovaro mwiva vaisi mponramwu kyaahaqa huvata mwinramwuhua mwi quara kyuqe mwakyaakya nkyi timwa nyuyata nkye riora. Qikye, nyaamwunyaaahuvata mwi quara okyara ntapihi kyeta riataa ihata variara.

Kyotataqama kye variqata kyuqe kyaiqa nraahu varaqita quate tura

13 Mwi quara rieqatama vutunte vurunte qakyaa hirara terama teta variata. Nkye vu nraato kyuqema vahirata variata. Iesusi Karaisiva nai qovarama viro nkyi kyuqema nyataani entara mwi entara vekya variqata mwianra nraahu riemwaqita quata.

14 Nkye Kotira nraaqiara variqata nkye mwia qua riemwaqita quata. Haaru nkye Kotira qua hia riaraifta varu entara, nkye nkyita mwutukyavanto vahu inraikyara qora inraikya nraahu vararerata uti varura. Nkye mwaa entara mwitaamaqita vivora.

15 Kotiva nkyi nyaanrama kyero sita varaiva, mwiva kyotataqama kyero variqaro kyuqe kyaiqa nraahu vare varirara tita, nkyevata kyotataqama kye variqata Kotira nraantantamwa kyeta kyuqe kyaiqa nraahu varaqita quata.

16 Kotira mpukuqi Kotiva mwitaama tiro:

Nte kyotataqama kye variqana
kyuqe kyaiqa nraahu vare varurara tita,
nkyevata kyotataqama kye variqata
kyuqe kyaiqa nraahu varaqita quate, tura. (Wkp 11:44-45)

¹⁷ Kotiva hia vaisi nrutuara rieqaro mwi vaisiva nronra vaisive mwi vaisiva pata vaisive tiraitiro, mwiva vaisi kyuqe kyaiqarave qora kyaiqarave rieqaro qua avuqavuqama kye varira. Nkye mwianra rieqatama Kotirara aakyara nteta tiri tiqovave tiqatama mwatani variqi viqata Kotirara aatuma kyeqata variqi quata.

¹⁸ Haaru nkyi haivaqahua timwa nyu quara nraahu rieqatama nkye qumina aanra nrohi varuvaro Kotiva nkyiara nte mwihua huvantu kyaarita qatinani nritareta quate tiro, mwiva nkyi kyoqaa hirero hia qumina taiqaani inraikyara ori munimaqove, kori munimaqove, kyoqaa hiraitiro,

¹⁹ Kotiva nkyi Karaisira nraanreqotairo kyoqaa utu taira. Karaisira nraanrevanto ekyaa kyoqaa nraatara kyaira. Sipisipi hia mwia mwamwantaqaa mpo nramwanaamwavata vahura kyuqe mwamwanta vataara ru kyontema kyeta Karaisira ru kyora.

²⁰ Haaru hia mwaa mwatara ututo entara Kotiva tiqaro, Karaisiva mwi kyaiqara varaananrove, timwa kyero mwia mwatama tero variqiro viro mwaa entara nkyiara rieqaro Kotiva Karaisira qovarama kyaira.

²¹ Karaisiva nkyi kyaahaqa hianinranra tita, nkye Kotirara kepukyaqama kyeta riemwaqita vi variara. Kotiva Karaisiva qutu vuraqitairo qati vara sivuma kyero mwia nrutu tuaaheraate tiro, mwia nronraqama kyora. Kotiva Karaisira mwitaa hurara tita, nkye tiqata, Qutaama Kotiva tirivata mwitaa hiqaro tivitaananrove, ti variara.

Nkyeta qata vakyahuara mwutukya vahirata variate tura

²² Nkye Kotira qua qutaa qua riemwaqita quavarro Kotira quavanto nkyi mwutukya hiqama nyataiharo nkyi mwutukyavanto nkyita sata sakyahuara vahata variara. Mwiaqataita nkye nkyita sata sakyahuara quataaqama kye mwutukya vahirata variata.

²³ Nkye varirerata qaiqaa qaraakyaqama kyero mwatatai nraaqiarahua variara. Hiama qutu quari inraikyava nkyi qaiqaa mwata tairata nkye qaiqaa qutu vivarave. Kotira quavanto qati vahiqiro vi vari quava, mwiva nkyi qaiqaa mwata tairama. Mwi quava ekyaa enta qati vahiqiro quananro.

²⁴ Kotira mpukuqi mwitaama tiro:

Mwukyauvanto vahiqiro viro uro aaaharama vintema

kyero vaisivantovata variqiro viro

uro ekyama taiqa quananrove.

Ntontora riemwa tero iteqaro

kyuqema kyero ntuvahero uro tapupu hintema kyero

vaisi peqvantovata taiqa quananrove.

²⁵ Kotiva qiani quava nraahuma ekyaa enta

qati vahiqiro quananrove, tura. (Ais 40:6-8)

Qio Kotira qua kyuqe mwakyaakya nkyi timwa nyiavata nkye mwi quara riaara.

2

Kotira quavanto nkyi kyarama vaiho tura

¹ Nkye Kotira qua rie variahua variqatara tita, nkye uaqia hi kyaiqara ekyaa qaqla kyaata. Hia unra qiata. Hia unraqama kyeqata kyuqe kyaiqa varaata. Vaisi mpovanto kyuqema quaninranra hia mwia nronri nriqi kyamwu ntumwa mwataata. Hia mpora nrutu vara mwataniqa hiqata uaqia hi quara qiata.

² Nraaqiara akirivanto nraamwanra mpo utintema kyeta nkyevata Kotira nraaqiara qaraakya variahuara tita, Kotira quara nraataa hirata variata. Kotira quavanto nkyini kyuqe nraamwa voti hivama vahiro. Mwi nraamwanra kyuqe hi nraamwanra nreqatama nkye kyuqema kyeta nronra tuemwa vivaro Kotiva nkyi huvantu kyero sitaari.

³ Kotira mpukuqi mwitaama tiro:

Nkye Kotira kyaiqa vareqata taqaavaro

Kotiva nkyi kyuqema nyate varivama variho, tura. (Sng 34:8)

⁴ Nkye nronravanto Karaisiva varinani nriata. Karaisiva qati variqiro quari pu havama variro. Qumina vaisinramwuvanto mwianra hia kyuqe pu have tiqata mwia qoririma kyaavaro Kotiva mwia nai kyaama tero ni pu kyuqera vahiananrove tiro.

⁵ Nraamwu kyaara qati vahiqi vira votima kyeta nkyevata variavaro Kotiva nkyiqotairoma nai nraamwu hoqarero uti variro. Nkye mwia nraamwunraqi variqata Kotira kyaiqa vara mwate vari vaisihua variqata Kotirani kyuqe kyaiqa varaqita quata. Nkye mwitaa hivaro Kotiva Karaisirara rieqaro nkyi kyaiqara qamwataananro.

⁶ Kotira mpukuqi Kotiva mwitaama tiro:

Taqaate, nte puha kyuqera ntene mwatama taura
Saioni mwatukya utaqaa rataurave.

Mwiaqaa vuntu viro variariva hiama kyauruuanrove,
tura. (Ais 28:16)

⁷ Nkye Karaisirara qutaa mwivave timwa kyeta mwiaqaa vuntuvi variahua, nkye tiqata, Karaisiva tiri puha kyuquerave, ti variara. Mpo hiahua hia Karaisirara qutaa mwivave qiahua, mwihua mwiaqaaatai huntavaivaimaqita kyaamwu ntuara. Kotira mpukuqitairo mwitaama tiro:
Mwihua nraamwu hoqeqa tiqata,
Mwaa ori uaqia hirave, timwa kyeta qoririma mwataava,
mwi orivama puhaqama viho, tura. (Sng 118:22)

⁸ Kotira mpukuqitairo mpo quavata tiqaro mwitaama tiro:

Ori mwaaqaataita vaisivanto

huntavaivaimaqita ntuqutu vivarave.

Qoqaraa ori mwiaqaaataita nraahu vaisivanto tantu
vaantumaqita kyaamwu ntivarave, tura. (Ais 8:14)

Mwihua hia Kotira quara qutaa quave tiqataro tita, mwihua huntavaivaimaqita ntuqutu quara mwianra haaru Kotiva qio mwihua mwitaa hivarave tura.

Nkye Kotiva nai kyaama tai nraaky e qorahuama variavo tura

⁹ Nkye hia mwihua hiante hiavo. Kotiva nkyiara ni nraaky e gora variate tiro, nkyi nai kyaama taihata variavo. Nronravanto Kotiva varihata nkye mwia kyaiqa vara mwate vaisihuama variavo. Nkye kyotataqama kye varia nraaky e qorahuama variavo. Nkye Kotiva nramwunaahuaama variavo. Mwiva nkyiara nte nkyi kyuqema nyataaniranra mpo nraaky e qora timwa nyiate tiro, Kotiva nkyi kyokiraqitairo nyaanrama varero uro omwavamoto itaira kyuqe hinani kyaihatama variavo.

¹⁰ Nkye vuni qumina nraaky e qora varura. Mate mwaa entara nkye Kotira nraaky e qorama varita. Haaru Kotiva hia nkyiara po kye timwa nyatovata nkye varura. Mate mwaa entara Kotiva nkyiara po kye timwa nyataihata variara.

Tire Kotira kyaiqa vaisima varuro tura

¹¹ Po, ni nramwuna tuaavo, nkyi mwaata tananra hia mwaa mwataraqaa vahira. Nkye mwaini variqata nkye mpo mwatanaahua

votima kyeta variara. Nkye mwianra rieqatama nkyi mwamwantavanto uaquia hi kyaiqara varataa hira hia varata. Nkyi mwamwantavanto nkyi mwanaraqura nraatara kyero mwiaqaa ntaqikyirero uti varihata variara.

¹² Hia Kotira qua riehua varivata nkye mwihua suqaa ntapihi kyeta nrohiata. Nkye mwitaamaqi vivata mwihua nkyiqa qua vatarerata mpo inraikyaqaa ntumwa kyeta tuqasaaqasama kyeta unra qua tivera, mwihua quavanto hia qio vahianinra. Mwihua quavanto hia qio vahirata mwihua nkyi kyuqe kyaiqa taqeta nronravanto tumuani entaraqaa mwihua Kotira nrutu tuaaherevara.

¹³ Nkye tiri vunyaa vaisi Karaisirara rieqata ekyaa kamaninra kyaiqa vaisi qua riaata. Kamaninra kyaiqa vaisi vunyaa vaisi mwia qua riemwaqita quata.

¹⁴ Kamaniva nronraqama kyaihua nkye mwihua quavata riemwaqita quata. Mwia qua nteqa kyehua ntutuquita, mwia qua riehua qamwata nyataate tiro, kamaniva vunyava nai nraakiaraanaa vaisi mpovata nronraqama kyaira.

¹⁵ Kotira kyakyahiva nkyiara mwitaamama vahiro: Nkye kyuqe kyaiqa nraahu vare varivaro hia vu nraato vahiarhua nkyiara api qua tiva hia qio vahirata mwihua tirema varivara.

¹⁶ Uaqia hi kyaiqava nkyi ntavaaqqavu kyaankyo tiro, nkyi huvantu kyaihata nkye qatinani nritareta variara. Nkye qatinani nritare varita tiqata, Tire qatinani varurahuave, tiqata nkye uaquia hi kyaiqara utivora. Nkye Kotiva rupa tai vaisihua votima kyeta variqita nrohiata.

¹⁷ Nkye variqata ekyaa nraakye qorara kyuqe hiahuave nraahu qiata. Nkye Iesusira nraaqiara variqata nanrianra nanrianra mwutukya vahirata variata. Nkye Kotirara aatuma kyeqata variqi quata. Kamaninra vunyaa vaisiara nronra vaisive qiata.

Karaisiva nriqa vi inraikyara varaintema kyeta nkyevata varaqita quate tura

¹⁸ Nte nkyi kyaiqa vaisiara tirera. Nkye kyuqema kyeta kyaiqa vareqata nkyeta nronra vaisi qua riemwaqita quata. Nkyi nronravanto nkyi kyuqema nyateqaro nkyiara mwi kyaiqara varaaate tirera, mwia qua riemwaqita quata. Nkyi nronravanto hia nkyi kyuqema nyateqaro nkyiara mwi kyaiqara varaaate tirera, mwia quavata qati nraahuma riemwaqita quata.

¹⁹ Nkye mwitaama variqita vivaro Kotivama nkyi kyuqema nyataananro. Nkye Kotira qua riemwaqita vi varivaro vaisi mpovanto qumina inraikya kyaara nkyi qoraqama nyatairera, nkye nriqa quani inraikyara vareqata kepukyaqamaqita vi varivaro Kotiva mwianra rieqaroma nkyi kyuqema nyataananro.

²⁰ Nkye uaquia hi kyaiqara utivata mwia kyaara nkyi rivata nkye kyaakueqama varivera, Kotiva hiama mwianra rieqaro nkyi kyuqema nyataananro. Nkye kyuqe kyaiqa nraahu vare varivata mwia kyaara nkyi rivata nkye kyaakueqama varivera, Kotiva mwianra rieqaro nkyi kyuqema nyataananro.

²¹ Nkye mwitaamaqita quate tiro, Kotiva nkyi nyaanrama taira. Karaisiva nkyiarave tiro, nriqa vu inraikyara vareqaro Karaisiva nkyiara nte hiarintema kyeta nkyevata mwitaa hiate tiro, mwiva nriqa vu inraikyara varaqiro vura.

²² Karaisiva hia qora kyaiqvata varovaro mwia nroqitairo hia unra quavantovata qovara hora.

²³ Mwihua Karaisirara uaquia hu quara tuvaro Karaisiva hia nkyiaravata uaquia hu quara turā. Karaisiva nriqa vu inraikyara vareqaro

hia mporara tiqaro, Nraakiara ina qoraqama mwataaninrave, tiraitiro, Karaisiva Kotirara nraahu nronraqama kyero riero tiqaro, Kotiva ni qua avuqavu hiqaro qua avuqavu ti varivave. Mwiva nraahuma ni kyaahaqa hiananrove, tiro tura.

24 Tiriara mwihua hia qora kyaiqa utiraitita, kyuqe aanraqaa nraahu quate tiro, Karaisiva tiriara rieqaro tiri uaqia hu inraikyara varero uro kyatariqaa qutu vura. Karaisira mwamwanta toqa ntupepaama kyaaraqaataita nkye kyuqema vita variavo.

25 Sipisipivanto api nrighthintema kyeta nkyevata kyuqe aanraqaaataita apiqama kyeta nrighi varura. Mate mwaa entara nkyi sita yaraihata nkye nrnum ntanteta nkyi mwanraquraqaa ntaqikyi nyate vari vaisira mwia vataqita vi variara.

3

Nraata vaati varaa nraakye qorahuara tura

1-2 Nte nkye vaati varahuara tirera. Nkye nkyeta saatimwanra qua nraahu riemwaqita quata. Nkye mwitaamaqi vi varivata nkyi saatimwanra hia Kotira qua riehua nkyi kyuqe kyaiqa taqeta tiqata, Kyai tirevata mwihua nraantante Kotira qua riemwaqita quare, tivara. Nkye nkyeta saatimwanranra hia mpo qua tiraitita, kyuqe kyaiqa nraahu vareqata nkyeta qoraisiara nraahu riemwaqita vivata mwihua nkyiara mwitaama quata.

3 Nkye kyuqe nraakye varirera hiqata nkyeta nyamwanta mwunruqa hi inraikyarara hia qamwataata. Hia qiata mwunruqa hirara nronraqama kyeta riaata. Hia nkyeta nyamwantaqaa ntumwaqute inraikyarara nronraqama kyeta riaata.

4 Nkye kyuqe nraakye varirerata nkyeta utaqive mwutukyaqive mwunruqa hirara nronraqama kyeta riaata. Nkyi mwutukyaqitairo kyuqema kye mwunruqa hi inraikyava qovara hianthro. Mwia mwutukyaqitairo qilhaakya hi variani nraakyera, mwi nraakyerara Kotiva qamwata mwatero kyuqe nraakyeve qiananro.

5 Haaru Kotira nrutu tuaahereqa varu nraakyehua variqata Kotiva nriqiqaa kyauqu vatero tu quarara riemwa teta nkyiari saatimwanra qua riemwaqita vuva, mwi quava mwinramwuhua mwunruqama to inraikyava vahura.

6 Tiri haivaqava Seraava mwitaa hi varu nraakyeva varura. Mwiva nai vaati Evarahaamunra qua riemwaqiro vi variqaro mwianra tiqaro, E niqaa ntaqikyi variaravave, turama. Nkye nraakye kyuqe kyaiqa nraahu vareqata hia mpo inraikya nraatu aatu hivera, nkye Seraara nraamwunramwanrama varivara.

7 Mwia votima kyeta nkye nraakye mwihua saatimwanravantovata kyuqema kyeqata nkyeta nyaatamwanraqaa ntaqikyiqi quata. Nraakye nyamwantavanto hia kepukya nyamwanta vahirara tita, nkye nkyeta nyaatamwanraqaa kyuqema kyeta ntaqikyiqi quata. Kotiva nkyi kyuqema nyataintema kyero Kotiva nkyi nyaatamwanravata kyuqema nyataintemata mwihuaavata ekya enta qati variqi virara tita, nkye mwianra rieqatama kyuqema kyeta mwihuaqaa ntaqikyiqi quata. Nkye mwitaa hivera, hia mpo inraikyavanto nkyi antua kyairata nkye qiomaa Kotirara aakyara ntamwaqita vivara.

Nkye kuaara nraati nraahu variate tura

8 Nte mwaa quara taiqa kyarerera hiqana mwitaama tina, Nkye variqata kuaara nraati nraahu variata. Nkye nanrianra nanrianra po kye tiqata

variata. Nkye Kotira nraaqiara variqtara tita, nanrianra nanrianra mwutukya vahirata variata. Hia nkyeta nrutu tuaaheraraitta, nanrianra nanrianra kyuqe hiqata variata.

9 Mpowanto nkyi qoraqama nyatairera, hiama nkye naivata qoraqama mwataata. Mpowanto nkyiara mwaaquqama quate tirera, hia nkye nanrianra, Enavata mwaaquqama vinanrave, qiata. Nkye mwi vaisirara tiqata, Kyairaro Kotiva i kyugema mwataarive, qiata. Kotivavata nkyiara kyugema vita variate tiro, nkyi nyaanrama tairara tita, nkye mwitaama qiata.

10 Kotira mpukuqi mwitaama tiro:

Kyuqema kyero variqaro
airi enta gati variqiro quari vaisiva,
mwi vaisiva qora kyaiqa qaqlira kyero hia unra tirera,
mwiva qiomma kyugema kyero variqaro
qati variqiro quananrove.

11 Mwi vaisiva qora kyaiqa mwoqa mwinro
kyuqe kyaiqa nraahu varaqiro quarive.

Mwi vaisiva antua qua qaqlira kyero
mwia mwutukyavanto qihakyama viraro
kyuqe qua nraahu timwaqiro quarive.

12 Nronravanto nai vuqotairo kyugema kyero
nrohi vari vaisira taqamwaqiro viro nai nraatoqotairo
mwianra aakyara nte variahua qua rie varirave.
Qora kyaiqa vare nraakte qorahua variavaro
ronravanto mwihua mwoqa nyinrave, tura. (Sng 34:12-16)

13 Nkye kepukyaqama kyeta kyuqe kyaiqa nraahu varaqi vivera, tavave
qio nkyi qoraqama nyataaanro?

14 Nkye kyuqe kyaiqa vare varivaro mpovanto mwia kyaara nkyi qoraqama nyatairata nkye nriqa vi inraikyara varaivera, qamwateqa variata. Nkyi qoraqama nyate vari vaisihua nyaatu hia aatu hita hia ua hiata.

15 Nkye Karaisirara kyuqevave tiqatama mwianra nraahu tiriqaan
ntaqikyiqira quante qiata. Nkye terama te varivaro mpovanto nkyiara
nkye nanra quave riemwaqi quavo tirera, nkye Karaisirara riemwaqi vi
quara mwia timwa mwi.

16 Nkye mwi quara mwia timwa mwinrenra hiqata mwi vaisira kyuqema
mwateqatama qihakyama kyeta timwa mwi. Nkyi toqaamwu ruankyorave
tiqata vivinrama kyeqata variqi quata. Nkye mwitaama vivinrama
kyeta variqi vivata mpo vaisinramwuvanto nkyi kyaiqara qora kyaiqave
tivera, mwiaqataita mwihua nkye Karaisira qua rieqata nrohira taqeta
kyaurira inraikya varevara.

17 Kotira kyakya hiariva nkyiara mwihua kyuqe kyaiqa vareqatama
nriqa vira inraikya varevarave tirera, nkye mwianra kyuquerave tivara.
Nkye qora kyaiqa vare varira kyaara nriqa vira inraikya varaivera, nkye
mwianra hia kyuquerave tivara.

Karaaisiva tiriara rieqaro nriqa vu inraikyara varaqiro vura

18 Karaaisiva tire qora kyaiqa uti varuna quara ekyara taiqa kyarero
mwivavata nriqa vu inraikyara varero uro kuaa nani qutu vura. Tire qora
kyaiqa uti varurahua mwia kyaara teta qutu quataara vaiharo Karaaisiva
ntapihi kyero variva tiriara rieqaro uro qutu vura. Tiri tivita varero Kotiva
hinani uro kyaankye tiro, Karaaisiva tirara rieqaro qutu vura. Karaaisira ru
kyovaro mwiva qutu vuvaro Kotiva mwia qati vara sivuma kyovaro mwiva
mwanaquravatama kyero qati siviro varura.

19 Karaisira mwanraquravanto qati siviro uro rupa to mwanraqurahua mwakyaakyu timwa nyunra.

20 Haaru Noaava varu entara mwihua Kotira qua nteqa kye varuvaro Kotiva hia mwihua qamwanrama ntutu kyaraitiro, variqiro vuvaro Noaava nramanriqaa quani nraamwunra hoqa taiqa kyovaro humwunravanto utuvaro Kotiva nraakye qora 8 nramwu nraahu kyaahaqama nyatovata mwinramwuhua qio varura.

21 Mwinramwuhua qora kyaiqa vare varu nraakye qorahua qaqa mwini kyeta mwinramwuhua nráahu nraamwuqi nramañriqaa variqata qio varura. Mwia votima kyeta tire qora aanra qaqa kyeta nramanri vare kyuge aanraqaa vi varunanra. Tire nramanri vare varuraro hia nramanriñv tiri mwamwanta hiqama timwate varirave. Tire nramanri vare tiqata, Kyai qora aanra qaqa kyeta Kotira aanraqaa nraahu quare, tiqata nramanri varaananra. Tiriara Kotira aanraqaa quate tiro, Iesusiva qutu vuraqitairo qaiqaa qati sivura.

22 Iesusiva qutu vuraqitairo qaiqaa qati siviro mwiaqaatairo nyaamwuni viro mwaa entara mwiva Kotira kyauqu kyaatutani uro variqiro viqaro ekyaa nyaamwuni vahi inraikyaraqaave, ekyaa nyaamwuni nronraqama quaninraqaave, ntaqikyiqiro vi varira.

4

Nkyevata nriqa vi inraikyara vare aanrava vahiananrove tura

1 Karaisiva vaisiqama viro variqaro nriqa vu inraikyara varaqiro vurara titi, nkyevata tiqata, Tirevata qioma nriqa quani inraikyara varaqi quanarave, qiata. Nkye qora kyaiqa varaorarave titi, nriqa vi inraikyara varaqi viqata qioma qora kyaiqa nraatara kyevvara.

2 Nkye mwianra rieqata mwatani qati variqi viqata nkyeta qora kyaiqa utuataa hianinra qaqa kyeta Kotira kyakya hiani kyaiqara nraahu varaqi quata.

3 Kotira qua hia ria nraakye qorahua votima kyeta nkyevata haaru api nrohiqata nkyeta varataa hi kyaiqara varaqita vura. Qio mwiaqaa taiqairaqe hia qaiqaavata mwi kyaiqara utirerave qiata. Mwi entara nkye api qaraqita nrohi varurave, api inraikyara mwutukya vahuvata varurave, nkye nramanri nreqata uera ntorave, nkye omwata nronraqama kye nronranrave, kyarave nramanriñe airiqama kye nronrave, nkye mwitaa hiqata nkye qumina vaisivanto ututo inraikyaraara mwanriqave tiqatama mwia nrutu nraahu tuaahere varura. Nkye haaru mwitaa mwitaamaqi viqata qoraqama vita varura.

4 Mwaa entara nkye mwi kyaiqara qaqa kyeta variavata hia Kotira qua riaa nraakye qorahua nkyiara nkyevata tire hiarante hiate qiaavata nkye mwihua qua hia riaratita variavata mwihua nrihanrama vita mwia kyaara nkyiara qora qua ti variara.

5 Qio riaata. Mwihua nraakiara ekyaa qua avuqavu hianinra vuqaa variqatama mwihua nkyiari uaqia hiani kyaiqara utira timwa qovarama kyevvara. Ekyaa qua avuqavu hiariva Kotiva variqaro ekyaa qati varihuave, qutu vihuave, mwiva mwihua qua tukyama kyero riemwaqiro quananro.

6 Mwianra rieqaroma Karaisiva haaru qutu vuhuvata kyuge qua timwa nyunra. Haaru (Noaava varu entara) nraakye qora mwihua Kotira qua nteqa kyovaro Kotiva mwihua ru kyovata qutu vura. Mwihua mwanraquravanto Kotiva qati varintema kyero qati variqita quate tiro, (Karaisiva) mwihuavata kyuge qua timwa nyunra.

Ekyaa enta qaumaqa hirara rieqata kyuqema kye nrohiqata variata

⁷ Mwaa mwatara taiqaari entava qaumatomava vahiro. Nkye mwianra riavarano nkyi mwutukyaqitairo hia raraqa tairata kyugema kyeta nkyetaaqaa ntakikyiqata nkyi mwutukyavanto qihaka hi varirata variata. Vu nrato ntapihirata rieqata variata. Nkye mwitaamaaqi viqata qiomaa Kotirara aakyara ntamwaqita vivara.

⁸ Vuni mwaa quara nraante riaata. Nkye nanrianra nanrianra mpoqama kyeta mwutukya vahirata variata. Nkye mwitaamaqita vivaro Kotiva nkye airi uaqia hi kyaiqara utira taunru kyaanano.

⁹ Kyugema kyeta nkyeta nraamwuqi nkyeta qata vakyaahua Iesusira nraaqiara sita vateta kyara nyiata. Nyiqatama hia nrutu nraunru tiraitita, qati kyara nraahu nyiata.

¹⁰ Kotiva nkyi kyugema nyategaro nkyi kuua kuua mwihua mpo kyaiqa mpo kyaiqa nyaamwutero mwi kyaiqara varera kepukyavata nyinranra tita, nkye mwi kyaiqara varaqi viqata nai kyaahaqa hi nai kyaahaqa hitamaqita quata.

¹¹ Vaisivanto mwaanra tirera hiqaro Kotira qua nraahuma qiananro. Vaisivanto mpore kyaiqa vara mwatarera hiro tiqaro, Kotiva ni kyaahaqa hi varihana nte qiomaa i kyaiqa vara mwataaninrave, qiananro. Nkye mwitaamaqita vivaro Iesusi Karaisiraqaatairo Kotira nrutuvanto nronraqa hia. Kotira nrutuvantovata Kotira kepukyavantovata ekyaa enta qati vahiqiro nraahu quananrove. Nte quutaama tuqo.

Muaanra varaqi viqata kyuqe aanraqaa nraahu quate tura

¹² Ni mwatanaa tuaavo, qiaqotairo mwataara hintema kyero mpo inraikya mpo inraikyavanto nkyi mwataara hi varihata nkye variara. Qio hia nkye nrihanrama vi tiqata, Nanraqamave mwi inraikyava qoraqama timwa te variho? qiatu.

¹³ Nkye mwitaama qiatu: Karaisiva nriqa vi inraikyara varairara rieqama tirevata mwia kyaahaqa hiqata nriqa vi inraikyara varaqita vi varuro, qiatu. Nkye mwitaamia timwa kyeta variqi vivaro Karaisira peja okyaravanto qovarama quani entaraqaa nkyi mwutukyaqitairo kyuqe hirata varivara.

¹⁴ Nkye Karaisira vataqi vihua varivata mwia kyaara nkyiara uaqia hi quara tivera, nkye qamwateqata nraahuma variata. Mwihua nkyiara uaqia hi quara tivata nkye qiomaa tiqata, Kotira mwanraqura mpoqaraava tirivata varihata varurahuave, tivara. Mwianra rieqatama qamwateqata variata.

¹⁵ Nkye vaisi ru kyera kyaarave, nkye mpuara utira kyaarave, nkye kamaniinra qua nteqa kyera kyaarave, nkye mpo vaisi kyaiqara qumina antua qua tira kyaarave, nkyi qoraqama nyataivata nriqa vira inraikya varevora.

¹⁶ Nkye Karaisira nraaqiara variqata kyuqe aanraqaa nrohira kyaara nkye nriqa vira inraikya varaveria, nkye hia kyaurira inraikya varauro qiatu. Mwataama qiatu, Tire Karaisira nraaqiara varurahuara tita, mwianra rieqatama tire Kotira nrutu tuaaheraqi virerave, qiatu.

¹⁷ Kotiva ko qiani entava nri ntairaro Kotiva tiri nai qua riaarahua nraante qua avuqavu hiananro. Mwiva vuni tiri qua nraante avuqavuma kyero, qikye, mwia nraakiara hia mwia nai qua riehua ko tiqaro nataama quave mwihuaqaa vataananrove.

¹⁸ Kotira mpukuqui mwitaama tiro:
Avuqavu nrohiari vaisiva mwukyaari tu kyero
kyuqe aanraqaa nrohiraro
Kotiva mwia huvantu kyero vitaananrove.
Avuqavu nrohiani vaisira okyaravanto mwitaama
vahirara tita, hia Kotira qua riehua
uaqia hi kyaiqara nraahu vare varihua

qora aanraqaa nrohita variqi vita qikye, mwihua
nraakiara tainive uro taiqa vivarave? tura. (Snd 11:31)

¹⁹ Kotira kyakya hiariva nkyiara qioma nriqa vi inraikyara varaqi
vivarave tirera, nkye Kotirara mwutukya qihakyama kyeta vateta kyuqe
kyaiqa mwia qati nraahu varaqi quata. Kotiva tiri utu taiva hiama nai
kyauqu nriqiqaa vateqaro putaa qua tiriara ti quara taunru kyaananro.

5

Nronra vaisinramwuanra mwitaa hiate tura

¹ Nte nkyiqa ntaqikyi variahua nronra vaisinramwuanra tirera. Ntevata
nkyi votima kyena Iesusira nraakyе qoraqaa ntaqikyi varuvama varina.
Karaaisiva nriqa vu inraikyara vare varuvana nte variqana ntene puqotaina
taqaavara. Nraakiara mwia peqa okyaravanto qovara hiani entaraqaa
ntevata variqana ntene puqotaina taqaaninra. Nte nkyi nronra vaisiara
mwitaa mwitaa hiate qianinra riaata.

² Kotiva sipisipi votima kyero nkyinramwu nyinra nkyenramwu mwi
nraakyе qorahuqaa kyuqema kyeta ntaqikyiqi quata. Kotira kyakya
hiva nkyiara mwi kyaqara varaate tirara tita, nkye hia qoriri hiraita,
nkye mwihuaqaa kyuqema kye ntaqikyitaa hirata mwihuaqaa ntaqikyiqi
quata. Hia kyoqaraa rieqata mwi kyaqara vararaitita, nraakyе qorara
nronraqama kye riaivaro nkyi mwutukyaqitai varataa hirata qamwate-
qata varaata.

³ Kotiva nkyinramwuanra ni nraakyе qoraqaa ntaqikyi mataate tirara
tita, hia nkyenramwu tire nronra vaisi varuro tiqata mwihuara mwitaa
mwataa hiate timwaqi viraitita, nkyenramwu mwihua suni variqata kyuqe
kyaiqa vare varivata nraakyе qoravanto nkyinramwu kyaqa taqamwaqi
viqata mwihuaavata kyuqe kyaqa varaqita quata.

⁴ Nkye mwitaamaqi vi varivaro nraakiara sipisipi qova vunyaava tu-
muaninraqaa mwiva nkyi nronraqama kyairata nkye nronraqama vita
vari okyarava ekyaa enta qati nraahu vahiqiro quananro.

Qaraakya vaisinramwuanra tura

⁵ Nkye qaraakya vaisivantovata nkye kyuqema kyeta nkyeta nronra
vaisi mwemwanii variqata mwihua qua riemwaqita quata. Nkye ekyaa
hini nraakyе qora mwihuaavata hia nkyeta nyutuara nronraqama kyeta
riaraitita, nkye nai kyaahaqa hi nai kyaahaqamaqita quata. Kotira
mpukuqi mwitaama tiro:

Nai nrutu nraahu tuaaheraani vaisira
Kotiva raaquta kyaananrove.

Nai vara mwataniqa hiani vaisira Kotiva mwianra
po kye timwa mwatero mwia kyuqema mwataananrove,
tura. (Snd 3:34)

⁶ Nkye mwi quara rieqatama nkyeta vara mwataniqama kyaivaro Kotiva
kepukyavanto nkyiqa ntaqikyiqiro viqaro nraakiara mwivama kyuqe ihera
nai mwatama taani iherara nkyi nyutu tuaahera kyaari.

⁷ Hia qumina mpo inraikyara mpo inraikyara nronraqama kye
riemwaqita vivaro nkyi mwutukyavanto uaquia hiari. Kotiva nkyiara
nronraqama kyero rie varirara tita, nkye ekyaa mwi quara Kotira timwa
mwivaro Kotiva nkyi kyaahaqa hiari.

⁸ Nkye vu ntapairi kyeta viti viri taqeta rauriqata variata. Vaisi rukye
vari vairiva, raionivanto nruqua timwaqiro viqaro vaisi ru kyarera uti
varintema kyero nkyi nramwutaa Saataaniva vaisi taiqa kyarero uti
variqaro viro nrinro hi varira.

⁹ Nkye riavata ekyaa nkyi qata vakyaan mpoqi variahua nkyi nraantantamwa kyeta Jesusira kyaara nriqa vi inraikyara vare variarara tita, nkyevata Kotira qua nraahu riemwaqi vita kyaakueqama variqata hia Saataaninra qua riaata.

¹⁰ Nkye ugenraa nraakye qorahua variqata nriqa vi inraikyara quaahaqa varaqita vivaro Kotiva naima nkyi kepukyaqama kyaananro. Kotiva nkyi kepukyaqama kyairata nkye kepukya nraakye qora nraahu variqatama ntapihi kye variqi vivara. Kotivā tiri kyaahaqa h̄irero kyuqema timwa te variva, mwivama nkyiara mwihua Karaisira vatama kyeta kuaaqi variqata kepukyaqama kyeta ekyaa enta variqita quate tiro, nkyi nyaanrama taira.

¹¹ Kotiva ekyaa enta variqiro viraro mwia peqvavanto ekyaa enta vahiqiro quananrove. Qutaave.

Qua mwanteqaro ekyara qua tura

¹² Nte pata mwaa quaqiara nkyi timwā nyinrenra huqaro Sairaasiva qara ntumwa taihana nkyini vatena. Nte Sairaasirara mwiva ni katavanto hia ni qaqlira kyaraitiro, ni kyuqema kyero kyaahaqamaqiro vi vari vaisivama variho tura. Nkyi mwutukyavanto kyuqe hirata variate tina, nte qara mwaaqi Kotiva nkyi kyuqema nyataani okyarara nkyi timwa nyunra. Kotiva nkyi kyuqema nyatairata nkye avuqavuma kyeta nraahu nrohiata.

¹³ Kotira nraakye qora Papironini variahua nkyi voti hiahua Kotiva nai kyaama tai nraakye qorahua variqataro tita, mwihua nkyi nramwunaahua variqatama mwihua nkyi qua mwante varita. Nte ni maaquve tu vaisiva Maakiva mwivavatama nkyi qua mwante variro.

¹⁴ Nkye Jesusira nraaqiara variqata nanrianra nanrianra mwutukya vahirata kyuqema kyeta nai quamwante nai quamwante hiata. Nkye Karaisira vatama kyeta kuaaqi varihua varivaro nkyi mwutukyavanto qihakya hirata variata.

2 PITAA

Pitaava nraakiaraa qara vara kyora

Iesusira qati vara sivuma kyovaro nyaamwuni uro varuvaro airi ihi nritarovaro Pitaava mwaa quara qara ntumwa tora.

Iesusira nraakyе qoravanto kyuqema kye Iesusi Karaisira qua riemwaqi viqata hia unra qua mwaanra ti varia vaisihua qua riaate tiro, Pitaava mwaa quara qara ntumwa tora.

1 Nte Saimoni Pitaavama. Iesusi Karaisiva ni nronraqama kyero ni titaihana nte mwia mwakyaakya timwaqi viqana mwia kyaiqa vaisima varina. Nte nkyiara rieqanama mwaa quara qara ntumwa tena.

Tiri mwanriqvavanto tiri tivitaari vaisiva Iesusi Karaisiva, mwiva tiri avugavuma timwa taihatara tita, nkye tiri nraantanteta kyuqe mwakyaakya nritarero vahira riemwaqi vi variarave.

2 Nkye Kotira okyaravata, tiri vunyaa vaisi Iesusira okyaravata, ntapihi kyaahuara tita, nkye kyuqema kye variqi vivaro nkyi mwutukyaqitairo qhaakya hi varirata variqi quata.

Kotiva tiri nai kyaama tairara tura

3 Karaisiva variharo Kotira mwanriqa okyara kepukya okyaravanto Karaisiraqi variharo Karaisiva tiriara mwihua hia uaqia hi kyaiqara utiraita, kyuqema kye variqi quate tiro, tiri kepukyaqama kyaihata tire Kotira okyara ntapihi kye riemwaqi vunanra. Kotiva tiri nai kyaama torara tita, nraakiara tire mwia vatama kye variqata mwia peqa okyara taqeta mwiva kyuqema kyero variqiro quani okyarara taqeqata variqi quananra.

4 Kotiva nai kyauqu nriqiqaa vateqaro tiriara mpoqaraa qua turara tita, tire mwi quara rieqatama mwatanai variqata hia api inraikyara mwutukya ntiraqe vita uaqiamma viraitita, tire Kotiva kyuqema kyero variqiro vintema kyeta tirevata variqi quara.

5 Nkye Kotiva mpoqaraa qua turara riemwaqi viqata nkye kepukyaqama kyeta variqi viqata kyuqe kyaiqa nraahu varaataa hirata varaqi viqata variata. Nkye Kotirara kepukyaqama kye riemwaqi viqata kyuqe kyaiqa nraahu vareqata kyuqe okyara, mpo okyara mpo okyara ntapihi kye taqamwaqita quata.

6 Nkye kyuqe okyara taqamwaqita viqata nkyeta nyamwantaqo uaqia hi kyaiqara utuaro timwa kyeqata, nkyeta nyamwantaqaa kyuqema kye ntaqikyiqi viqata variqi quata. Mwitaamaqi viqata hia qoriri hiraitita, kepukyaqama kyeta variqi quata. Nkye kepukyaqama kyeta variqi viqata Kotirara nraahu riemwaqita quata.

7 Nkye Kotirara nraahu riemwaqi viqata nkyeta hena nraakyе qorara kyuqemaqita quata. Mwitaamaqi viqata nanrianra nanrianra mwutukya vahirata variata.

8 Nkye mpoqiarata mwitaamaqi vivera, nkyi kyaiqvavanto hia qumina kyaiqa vahiraitiro, nkyi kyaiqvavanto kyuqe kyaiqa nraahu vahirata nkye tiri vunyaa vaisi Iesusi Karaisira okyara ntapihi kyeta taqamwaqita vivara.

9 Vaisi mpovanto hia mwitaamaqiro vi variva, mwiva vu qipa vi vaisira votima kyero variqaro hiama qio Kotira qua okyara taqero. Mwi vaisiva Karaisiva mwiva haaru uaqia hi kyaiqara utu quara nruka mwatairara qumimaqama kyeqaro apima variro.

10 Ni kata pakyaa tuaavo, Kotiva nkyi nyaanrama kyero nkyi nai kyaama tairara tita, cutaa mwi quava nkyiqi mwivau vahiarive tita, nkye Kotira

kyaiqa mpoqiaavata varaqita quata. Nkye mwitaamaqi viqata hia api aanra vivera,

¹¹ nkye tiri vunyaa vaisivanto Iesusi Karaisiva ntaqikyinani vihuama varivara. Tiri huvantu timwa taariva ntaqikyiari mwatava, mwi mwatava ekyaa enta qatima vahiqiro quananro.

¹² Mwi quara qutaa qua nkye riemwaqi viqata kepukyaqama kye vi variara nte ntapihi kyaurave. Nte mwianra rieqanama nte qati nraahu qaiqaavata qaiqaavata mwi quara nkyi timwa nyiqana mwi quara vu nraatoqi vateta riemwaqi viqata variate timwaqi virera.

¹³ Ni mamanta mwaava hia qutu viraqe nte qati variqi quani entara nte qiomia qaiqaavata qaiqaavata nkyi timwa nyianriva vahiananro.

¹⁴ Ni mamantavanto haraara nraamwu votima kyeroma vahiro. Pataqia nraahu vari kyena nte ntena mamanta mwaini kyena nyaamwuni virerave. Tiri vunyaa vaisivanto Iesusi Karaisiva mwatan'i variqaro nte qutu quaninanra ntapihi kyero tihana riaurave.

¹⁵ Nte ntena qutuariva qauma vahirara rienama nte tiqana, Nte qutu quarita nkye mwi quara riemwaqita quate tinama nte qaiqaavata qaiqaavata kyuqe aanra nrohi okyarara nkyi timwa nyinrenrave, ti varura.

Tire teta tivuqotai Karaisira peqa okyara ntuaahhe vari okyarara taquananrave tura

¹⁶ Tire tiri vunyaa vaisi Iesusi Karaisira okyara nkyi timwa nyiqata hia teta riemwa kye uri qua mwaanra nraantantamwa kyeta nkyi timwa nyunanravauma. Tire variqata teta tivuqo Karaisira peqa okyara taquananrave.

¹⁷ Karaisira qova nritarero nyaamwuni kepukyavanto variva, Kotiva nai mwaqua Iesusira ntuaahama mwatero tiqaro, Mwaa ni maaqvantomia variho. Ni mutukyavanto mwianra mpoqiaavata vahana nte mwianra qamwateqana varuqo, tura.

¹⁸ Haaru Kotiva mwitaa tuvata tire tetavanto mwi entara taaqi kyotata mwiaqaa Iesusira vatama kye variqata Kotiva nyaamwusairo tu quara riaavanranrave.

¹⁹ Tire mwi inraikyara mwi inraikyara taqaunranra tita, tire poropeti vaisinramwuvanto haaru qovarama kyo quava, mwi quava qutaa qua vaiho tunanra. Nkyevata mwi quara anomia kye riemwaqi vivera, nkye qiomia varivara. Poropeti vaisinramwuvanto tu quava, mwi quava omwavanto kyokiraqi itaintema kyeroma itamwaqiro vi variro. Mwi quava omwa votima kyero itamwaqiro viharo qaataarerara iharo mwiaqaatairo itataraaravanto nrumbu ntuaahaintema hianaro. Iesusira quavanto qaataarenani itataraaravanto ntuaahhe varintema kyeroma nkyi mwutukyaqi ntuaahama nyate variananro.

²⁰ Nkye poropetivanto tu quarara rieqatama mwaa quara nraante ntapihi kye rieqata variata. Poropetivanto qara ntumwa to quara mpukuqi vahira, haunri vaisi mpovanto nai riemwa kyero tiqaro, Mwi quara okyaravanto mwitaa mwitaamama vaiho, qiankyora.

²¹ Hia poropeti mwihua nkyiari riemwa kyeta ekyaa mwi quara tutravauma. Kotira mwanraquravanto poropeti mwihua kyaahaqa hi varuvata mwihua Kotira qua qovarama kye varurama.

nkyi timwa nyi varuro, tura. Mwihua mwitaa timwa kyeqata unra qua nraahu ti varurave. Mwihua ti varuntema kyeta nraakiara vaisi mponramwuvanto qovarama vita nkyi utaqaa variqata unra qua nraahu nkyi timwa nyiqi vivarave. Mwihua qua mwakyaakyavanto unra qua vahiraro mwi quara riaariva viro uaquamama quananro. Tiri vunyaa vaisivanto Iesusiva mwihua huvantu kyaihata mwihua mwiaqaatai qaqlira kyeta Iesusira qoririma mwate variarara tiro, mwia kyaara mwihua taiqa kyaariva qaumatomu vahiro.

² Mwihua kyaurira kyaiqa varaqi vivata nraakye qora airivanto mwihua qua rieqata mwihua sataqita vivara. Mwihua kyaurira kyaiqa varaqi vivata nraakye qora mpo ihua mwihua kyaiqa taqetama tiqata, Qikye, Karaisira qua cutaa qua rieqata mwia vataqvi vi varia aanrava uaqia hi aanranravemba tivara.

³ Unraqama kyeqata Kotira qua ti varihua qovarama vita mwihua kepukyaqama kyeqata nkyi munima ntavihi kye vararerera utiqata mwihua nkyiari riemwate quara nkyi timwa nyivara. Mwi vaisihua mwitaamaqi vi varirara tiro, Kotiva haaru mwihua kyaiqa kyaara mwihuaqaa qua vataira. Mwihua taiqa kyaariva hiama vaite variro.

⁴ Haaru nyaamwunyaahua mponramwuvanto Kotira qua nteqa kyovaro Kotiva hia mwihua taqe kyaraitiro, Kotiva mwihua nkyiari uaqia hu kyaiqara utura qaara cutu quahua varianani vara kyero tuto kyorave. Mwihua mwini rupa taihata variqata Kotiva ko qiani entara vekya variarama.

⁵ Haaru varu entara nraakye goravanto hia Kotirara riaraitita, variqi vi varuvaro Kotiva mwia kyara hia mwihua taqe kyaraitiro, Kotiva tuvaro humwunravanto mwihua taiqa tuto kyorave. Mwi entara Noaava nraahu Kotira okyara avuqavu hu okyarara nraakye qora timwa nyi varurara tiro, Kotiva mwivata mwia vataahua 7 nramwuvata vekyahu nyatovata qio varura.

⁶ Haaru Sotomiqi varuhuavata Komoraaqi varuhuavata uaqia hi kyaiqara uti varuvaro mwia kyaara Kotiva mwatukya mwitana qiaqotairo taiqa kyovaro qarapaa nraahu vahura. Nraakiara hia Kotirara riehua variqata Kotiva tiriyata mwitaama kye taiqa kyaankyo tiqata variate tiro, Kotiva mwihua mwitaama kyora.

⁷ Kotiva mwi mwatukyatana taiqa kyarera hiro mwiva Rotira nraahu vaitutuma kyero kyaahaqama kyovaro qati vura. Rotiva vaisi kyuqeva Sotomiqi variqaro taqovata mwi mwatanaahua vaisivanto mpo qua mpo qua nteqa kyeqata nanrianra nanrianra nrohiqata qora kyaiqa uti varuvaro Rotira mwutukyavanto uaqia huvaro varura.

⁸ Rotiva vaisi kyuqeva variqaro mpo enta mpo enta mwi mwatanaahua kyapata variqiro vigaro mwihua uaqia hu kyaiqara uti varuvaro vuqo taqoraravata, nraatoqo rioraravata, mwia mwutukyavanto uaqia huvaro varura.

⁹ Haaru Kotiva mwitaamaqiro vurara tita, tire ntapihi kyauraro Kotiva kyuqe hia vaisihua qati vaitutuma kyeqaro kyaihata quavar qora hia vaisihua rukye varivama variro. Kotiva uaqia hi kyaiqara uti variahua tutero variqiro viro nraakiara ko qiani entaraqaama mwihua ko qiananro.

¹⁰ Vaisivanto hia Kotira quavata mpohua quavata riaraitita, mwihua nkyiari mwamwanta kyakya hi kyaiqara nraahu vare variavaro mwia kyaara Kotiva mwihuaqaa qua nronrama vataananro.

Unraqama kyeqata Kotira mwakyaakyti varia vaisihua okyarara tirerave. Mwihua nkyiari qua timwa kyeqata nyaamwunyaahua nronrama vaisiara qumina vaisive tiqata mwihuaravata uaqia hi quara nraahu timwaqvi vi variarave.

¹¹ Mwi vaisihua uapaa vaisivanto variqata nyaamwunyaahua nyutu vara mwataniqa hiqata ti variavata nyaamwunyaahua nronravato variqata-vata hia mwihua nraantantamwa kyeta qua qiara. Nyaamwunyaahua Kotira yuqaa varita tiqata, Tire mpohua nyutu vara mwataniqa hiqata uaqia hi quara qiarorave, tiqata hia mpohuara uaqia hi quara qiara.

¹² Nyaamwunyaahua mwitaa ti variavata unraqama kyeqata Kotira mwakyaakya ti varia vaisihua hia ntapihia inraikyara mwi inraikyarara uaqia hi quara nraahu ti variara. Mwihua qaakyau quara vairi hia vu nraatovata vailua votima kyeta variara. Qaakyau quara vairi mwihua hia taqeqa qati kyakya hiarave. Mwihua ru nraahu kyakya hiarave. Mwia nraantantamwa kye nraakiara mwi vaisihuavata ru kyairata vita raupirima vivarave.

¹³ Mwi vaisihua henahua uaqjama nyate variarara tiro, nraakiara nkyiarivata Kotiva uaqjama nyatairata raupirima vivarave. Nraakye qoravanto huarigaa ntuvantuuma vita omwata nre variavata mwi vaisihua airi kyaravata kepukya nramanrivata mwia nraahu nreta tiqata, Tire mwi inraikyara nraahu nramwaqi viqata qamwateqata varirerave, ti variarave. Mwihua mwitaamaqi viqata nkyiyata kyara nreqata nkyiari unra kyaiqara qamwataaqi viqata nkyi kyaurira inraikya vara nyi variarave.

¹⁴ Mwi vaisihua suvanto mpo enta mpo enta mpohua nyaatamwanraqaa nraahu vahata mwihuavata nrohirera uti variqata qio uaqia hi kyaiqara nraahu utuvi vi variarave. Mwi vaisihua hia kepukyaqa hia nraakye qorahua unra qua qihakyma kyeqata timwa nyiqi quavata mwi nraakye qorahua uaqjama vi variara. Mpova hi inraikyara mwutukya ntii varia okyarava mwihuaqi nronraqama kyero vahirave. Mwihua mwitaamaqi vi variarara tiro, Kotiva mwia kyaara mwihuara uaqjama vita variate tihata uaqjama vita variarave.

¹⁵ Mwi vaisihua kyuqe aanra avuqavuma kye nrohi varia aanranra qaqla kyeta api aanraqaa nraahu nrohi variarave. Haaru vetato varu entara vaisi mpovanto mwia nrutu Mperaamuva Mpeora mwaquivanto uaqia hu aanranraqaa vuntema kyeta, mwi vaisihuavata kuad aanra mwiaqaa nraahu virera uti variarave. Haaru mwi entara Mperaamuva munimanra nraahu rieqaro uaqia hu kyaiqara vararerera uti varuvaro

¹⁶ mwiaqatairo mwia ntonkivant hia qua ti inraikyava, mwi entara vaisivanto qua tuntema kyero qua tiqaro mwia inronra huvuro Mperaamuva qaqirà kyero uaqia hu kyaiqara vararerera uti varuvaro.

¹⁷ Mwi vaisihua rumwu nramanrivanto ekyaa tati vira votima kyeta variara. Toqa nronraqama kyero tiqaro tonamwu raapu varero vi varintema kyeta mwi vaisihua variara. Qikye, Kotiva mwihuani veva vevani viro upi kyokikina ri mwatukyara terama tairave.

¹⁸ Mwi vaisihua quaqama vahira turo tiqata qumina qua nraahu ti variarave. Mwi vaisihua tiqata, Qioma nkye nraakye qora api qaraqita nrohivarave, qia quaraqo nraakye qora mpo hiahua qora kyaiqaa qaqira kye kyuqe aanra virera uti variahua vara apiqama taavata mwi vaisihua qua rieti, mwihua qaiqaa uaqjama vita variarave.

¹⁹ Mwi vaisihua tiqata, Tiri quavanto nkyi huvantu kyairata nkye qiomia variqi vivarave, tiqata mwitaa ti variavaro mwihua uaqia hi kyaiqava mwihua nkyiari rupa taihata variara. Uaqia hiari kyaiqava mpoqara mpoqara hiariva vaisi mpo nraatara kyero mwia rupa tairaro mwi vaisiva uaqia hi kyaiqara mwia kyaiqa vaisima variananro.

²⁰ Uaqia hi kyaiqava tiri rupa taihata varuraro Iesusi Karaisiva tiri vunyaa vaisivanto tiri huvantu kyaihata tire qati varunanra. Mpovato Iesusira qua riero huvantu viro variqiro viro mwiaqatairo qaqirà kyero

qaiqaa uaqia hi kyaiqara utuqi virera, uaqia hi kyaiqava mwia tuqara kye rupa tairaro mwiva qaqira kyero nrumu ntantero kyuqe aanraqaa quariva hiama vahiananrove.

21 Vaisivanto Karaisira qua avuqavu nrohi variani okyarara riemwaqi viro mwiaqaatairo mwi vaisiva hiavata mwi quara qoririma mwataarive. Nte Kotira qua qoririma mwataani vaisirara mwitaama tina: Po, e Karaisira qua hia riaraitira, qati varirage nte iara qiove qiataara vahara e Karaisira qua riera mwiaqaataira qaqira kyera uaqia hi kyaiqara utuqira quarana nte iara po tugo tirerave. (Haaru Karaisirara hia riaana entara iqaa qua pataqia vahara mwiaqaataira e Karaisira qua riera mwianra nraahu riemwaqi quataara vahara e mwia qua qoririma kyaararoma mwia kyaara iqaa nronraqama kyeroma qua vahiananrove qianinra.)

22 Vaisivanto uaqia hi kyaiqara qaqira kyero variro qaiqaa uro uaqia hi kyaiqara varareru uti vari vaisirara haaruua quavanto mwitaama tiro: Mwi vaisiva vairivanto mwunru vihi taira uro

qaiqaa nai nraintema kyeroma variho, tura.

Qaiqaavata quavanto mwitaama tiro:

Quara hiqama taiva nrumu ntantero

uro qaiqaa horaqi henoma ntintema kyero

mwi vaisiva variho, tura. (Snd 26:11)

Vaisivanto uaqia hi aanranra qaqira kyaariva qaiqaa uro uaqia hi aanranra mwiaqaa quaninranra quavanto mwitaamama vahiro.

3

Karaisia uro ntante tumuaninranra tura

1 Ni nramwunaa tuaavo, nte qara mpo nkyini kyenama qaiqaa-vata mwaa qarara nkyini kyauqo. Nkyiara mwihua ni qara kyaara ntigata mwi quara mwi quara riemwa teqata kyuqe qua nraahu su nyaatoqi vahirata variqi quate tina, qara ntumwa taura.

2 Nkye poropetivanto qara ntumwa to quara riaate tina, nte qara ntumwa taurave. Tiri vunyaa vaisivanto tiri huvantu kyaiva mwitaamaqi quate tiqaro tiri nai nronraqama kyai vaisihu timwa timwuvata tire mwi quara nkyi timwa nyiavananra. Nkye mwi quaravata hia taunru kyaraitita, qati nraahu riemwaqi quate timana, nte mwaa quara qara ntumwa tena.

3 Nkye mwaa quara nraante ntapihiata. Nraakiara ekyaara enta qaumato vahirata vaisi airivanto qovarama vita variqata mwihua nkyiari kyakya hi kyaiqara varaqi viqata nkyiara raima nyatevarave.

4 Mwihua raima nyateqata mwitaama tivara, Nraakiara nte uro ntante tuminrenrave tu vaisiva tanave variho? Tiri haivaqahua variqi vita qutu vuntema kyetama mwaa entaravata qati nraahu mwitaamaqi vi variavata varuro. Haaru mwata mwaa utu toraqaatai ekyaas inraikyavanto kuaa qarama kye mwitaama nraahuma vahiqiro vi variho, timwa kyeqatama nkyiara raima nyatevarave.

5 Mwi vaisihu mwitaa tigatama Kotiva haaru tuvaro nyaamwuvantovata mwatavantovata qovarama vura mwi quara hia riarerave timwa kyeta hia mwianra nraato tuaavo. Mwi entara nramanrivanto nraahu vahuvaro Kotiva tuvaro nramanriqitairo aahara mwata qovarama viro vahura.

6 Mwia nraakiara Kotiva mwatani varuhua nramanriqotairo vehi utu nyatero ru taiqa kyora.

7 Nraakiaravata Kotiva qaiqaa tiraro qiyavanto nyaamwuvata mwaa mwataravata itamwa kyairaro taiqa quananrove. Mate Kotiva nai ko tirera hiani okyarara rieqaroma nyaamwuqaavata mwataqaavata ntaqikyiqiro

viraro mwi entava nri ntairaro Kotiva uaqia hia nraakye qorahuaqaa qua vatero mwiaqaatairo mwiva mwihua vehi utu nyateqaro nyaamwuvata mwatavata qiaqotairo taiqama kyaananro.

⁸ Ni nramwunaa tuaavo, nkye mwaa quara taunru kyevorave. Nronravanto Kotiva 1,000 ihi mwianra ni puqaa kuaa ihera votima kyero vahirave timwa kyero kuaa ihera mwianra 1,000 ihi votima kyero vahirave tirama.

⁹ Haaru nronravanto Kotiva nai kyauqu nriqiqaa vateqaro nte mwitaa hirerave tuvaro mwi entaraqaatairo airi ihi nriraraihata haunri nkye tigata, Qikye Kotiva qakyoma kyero mwitaa hiananrove, tivora. Kotiva hia mpoqivanto viro raupiri hirata ekyaa mwihua nkye uaqia hi aanranra qaqaira kyaate tiro, mwiva qakyoma kyero nkyi sekyama variro.

Nyaamwuvata mwatavata taiqaaninranra tura

¹⁰ Mpuara vaisivanto nrihanrama mwatero nri ntema kyeroma nronravanto qovara hiani entava nriananro. Mwi entaraqaa nyaamwuvanto nronraqama kyero takuma viro hia vahiananro. Takuma viraro nyaamwuqi vahi inraikyara mpo inraikya mpo inraikya qiavanto itamwa kyaikyara taiqa quananro. Mwata mwaavata mwiaqaa vahiani inraikyara mwiva rirantem qavanto itamwa taiqa kyaikyara taiqama quananro.

¹¹⁻¹² Mwi inraikyava mwi inraikyava mwitaamaqiro viro taiqa quaninanra tita, nkye mate mwaa entara nataama kyetave variqi vivara? Nkye Kotiva qovara hiani entara vekya variqata nkye hia uaqia hi kyaiqara utiraitita, kyugema kye variqi viqata Kotirara nronraqama kyeta riemwaqi viqata varivama vahiro. Nkye mwitaamaqi vivaro mwi entava qamwanramama nri ntaananro. Mwi entava nri ntairaro qiavanto nyaamwu itamwa kyaikyara mwatani vahiali inraikyava kepukya inraikyavanto itero ravita viro taiqama quananro.

¹³ Mwitaamaqiro vi variraqe tire Kotiva nai kyauqu nriqiqaa vateqaro tu quava mwivau vahianinra vekyama variananra. Mwi entara nyaamwu qaraakyavantovata, mwata qaraakyavantovata, qovara hianinranra taqe-qata qamwateqata variananra. Mwi mwatukyarara avuqavu nrohi vari nraakye qorahua tiqata, Tiri mwaata tuananravema, tivara.

¹⁴ Ni nramwunaa tuaavo, mwi entara vekya variqatama Kotiva nkyiara hia uaqia hi kyaiqara uti variahua kyuqe nraakye qora nraahu variavo timwa kyero nkyi qihaaqyama nyataarive tita, nkye mwaa entara ntuvai-haa vita ekyaa tonani uro kyugema kye variqi quata.

¹⁵ Tiri vunyaa vaisivanto hia vaakya tuminra mwianra nkye mwataama kye rieqata variata. Mwiva hia vaakya tuminra mwia airi nraakye qoravanto uaqia hi kyaiqara qaqaira kyaivage mwihua sitaankye tiroma hia vaakya tumihi, qiatia. Tiri tiqata vakyaa Poruva varuvaro Kotiva mwia kyaahaqa huvaro mwivavata kuaa qua mwia nraahu kyugema kyero qara ntumwa teqaro nkyi timwa nyunrave.

¹⁶ Poruva mwi quara okyarara tiqaroma mwiva mpo qara mpo qaraqi mwitaa timwa kyeqaro ti varura. Mwiva qara ntumwa tai quava mpoli quava nronra qua vahatara titi, mpohia vaisihua, hia kyuqe su nyaato vataahua, mwi quara hia ntapihi kye riaraitita, apiqama Kyeqata mwi quara okyara ti variarave. Mwi vaisihua hia kuaa qua rie varia vaisihua, mwihua mpo qua mpo qua rie variahua tita, mwihua Porura quavata, Kotira mpukuqi mpo qua qara ntumwa toraravata, hia ntapihi kye ri-araitita, mwi quara okyara apiqama kyeqata ti variarave. Mwihua mwitaa ti variarara tita, mwihua nkyiari apiqama vita raupirima vivarave.

¹⁷ Qio ni nramwunaa tuaavo, nkye mwi vaisihua okyara ntapihi kyaarave. Nkye mwaa entara Karaisira qua ntapihi kye rieqata qiomaa kepukyaqama kyeta variavo. Nraakiara hia Kotira qua rie vari vaisihua

qovarama vita api qua tiqatama api aanraqaa nkyi sita vatevorave tita, rauriqata variata.

¹⁸ Jesusi Karaisiva tiri vunyaa vaisivanto tiri huvantu kyaivama variro. Karaisiva nkyi kyuqemaqiro virata nkye mwia nraaqiara variqata mwia okyara mpoqiyavata ntapihiqata kyuqema kye nronra tuemwaqi quata.

Nrivaqe mwia nrutu tuaaheraarava matevata, qakyovata vahiqiro nraahu quari. Qutaave.

1 IONI

Ioniva vunyaa qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora. Iesusi Karaisiva quataa vasisqama viro mwatani variqiro vu okyararara ntapihi kyeta riaate tiro, Ioniva mwi quaravata, Kotirara mwutukya vate okyararavata, timwa nyiqanro qara ntumwa tora.

Ioniva Iesusi Karaisirara tu quara

¹ Toharoragaatairo qati variqiro vi varu vaisira, mwi vaisirara nkyi timwa nyinrenra. Tire mwi vaisira teta tivuqotaita taqaavanranrave. Mwiva qua tuvata tire mwia qua riaavanranrave. Tire mwia taqeta teta kyauqugo mwia tu varavaavanranrave. Tire taqauraro mwiva timwa tai quaraqaatairo ekyaa inraikyavanto vahiqiro viqaro hia taiqaraitiro, qati nraahu vahiqiro vi varira.

² Mwiva qati variqiro vi variva variqaro mwiva tiri tivuqaa qovarama viro varihata taqaunananra. Tire mwia taqaunananranra tita, tire nkyiara mwitaama tita, Ekyaa enta qati variqiro vi variva mwiva nai qokyantiri variva, mwiva mwaa mwataraqaa qovarama vihata tire mwia taqaunananranram turo.

³ Tire mwia qoravata mwia mwaaku Iesusi Karaisiravata kyuqema kye kuaaqi variqata variqi vi varunanra. Kuua qarama kye nkyevata tirivata kyuqema kye kuaaqi variqata variqi quate tita, tire mwia taqeta mwia qua riauanranra nkyiyata timwa nyi varita.

⁴ Nkyevata tirevata qamwataarava mpoqiatavata vahiarive titama, tire mwaa quara qara nti varuro.

Omwaqaa nrohiqata variate tura

⁵ Tire mwaa quara Karaisiva tiri timwi quara nkyiyata timwa nyinrenra. Kotiva varirero omwavantomava variro. Hia kyokira rivavata mwiaqi vahira.

⁶ Tire uaquia hi aanranra enta hiani aanranraqaa nrohiqata tire tiqata, Kotiravata kuqema kye kuaaqi variqi vi varurahuave, qiarera, tiri quavanta unra qua vahiraro tiri kyaiqvantovata unra kyaiqama vahiananro.

⁷ Kotiva omwaqaa varintema kyeta tirevata omwaqaa variqita quare, quataama tire nanrianra nanrianra qamwateqatama kuaaqi variqita quananra. Tire mwitaama variqita quarera, Kotira mwaaku Iesusira nraanrevanto tire uaquia hi kyaiqara utuana quara nruka kyero hiqama timwa taqiro quananro.

⁸ Tire tiqata, Hia tire uaquia hi kyaiqara uti varurahuave, qiarera, tire teta unra qiararo quataa quavantovata hiama tiriqi vahiananro.

⁹ Tire teta uaquia hi kyaiqara uti variananra qoqaa timwa qovarama kyaarerera, Kotiva avuqavuma timwa te variva, mwiva quataama tiri uaquia hi kyaiqara uti varuna quara nruka timwa tero kyuqema kyero tiri tivu nraato hiqama timwa taananro.

¹⁰ Kotiva ekyaa nraakyte qorara uaquia hi kyaiqara uti variahuave tirara tita, tire tiqata, Tire hia uaquia hi kyaiqara uti varurahuave, qiarera, tire mwitaa tiqatama Kotirara mwiva unra qua tivavema qiananra. Tire mwitaa qiarera, Kotira quavanto hiama tiriqi vahiananro.

2*Iesusiva tiri kyaahaqama timwa taarivama variho tura*

1 Ni nraaqiaranramwu tuaavo, nkye hia uaqia hi kyaiqara utuate tinama, nte mwaa quara qara nti varina. Tiriqitairo vaisi mpovanto uaqia hi kyaiqara utu kyairera, Iesusi Karaisiva avuqavu nrohi variva, mwiva Kotira nai qora nraaqani variqaro mwi vaisirara rieqaro nai qorara po kye tiqaro mwi vaisira kyaahaqamama mwataananro.

2 Kotiva tire uaqia hi kyaiqara uti varuna quara nruka timwa taarive tiro, Iesusiva tiriara rieqaro qutu vura. Iesusiva hia tire uaqia hi kyaiqara uti varunananranra nraahu rieqaro qutu viraitiro, mwiva ekyaa mwaa mwataraqa variahua uaqia hi kyaiqararavata rieqaro qutu vura.

3 Tire Kotiva mwitaa mwitaa hiate qiani quara riemwaqita quarera, tire qioma tiqata, Tire Kotira okyara ntapihi kye taqaurahuave, qiananra.

4 Mpovanto Kotiva mwitaa mwitaa hiate qiani quara hia riemwaqiro viraitiro, mwiva tiqaro, Tire Kotira okyara ntapihi kye taqaurahuave, tirera, mwi vaisiva unra ti variari vaisiva variraro qutaa quavantovata hia mwi vaisiraqi vahiananro.

5-6 Vaisi mpovanto Kotira qua nraahu riemwaqiro vi vari vaisiva varirero mwi vaisiva qutaaqama kyero Kotirara mwutukya vahi vaisivama variro. Karaisiva nrohintema kyero nrohi variva, mwi vaisiva ntapihi kyero tiqaro, Nte Kotikyantiri kuaaqi variqina vi varuvave, ti variro. Tire Karaisiva nrohintema kyeta nrohiarera, tire qioma tiqata, Tire Kotiravata kuaaqi variqita vi varurahuave, qiananra.

Qaraakya qua vatairara tura

7 Ni nramwunaa tuaavo, nte mwaa quara qara ntiqana Kotiva vatai quara hia qaraakya quavauma nkyi timwa nyi varuqo. Kotiva haaru mwi quara vataihata nkye haaru vuni Iesusirara qutaave timwa kyeta variqata mwi quara riaara. (Kotiva haaru tiqaro, Nanrianra nanrianra mwutukya vahirata nrohiate tu quara nkye mwi quara riaarave.)

8 Mate nte mwi quara qaraakya qua votima kyena nkyi timwa nyin-renrave. Karaisiva mwi quara riovoro nkyiara nronraqama kyero mwia mwutukya vahura. Nkyevata mwi quara riaavarano nanrianra nanrianra nkyi mwutukya vahihata variarama. Nkye mwitaa hiarara tita, nkye enta hiraqi nrohi varia entava taiqero vi variharo omwavantomma qovara hi variro.

9 Vaisi mpovanto hia nai hena vaisiara mwutukya vahiraro mwianra ua vu nraato ti variva tiqaro, Nte omwaqaa nrohi varuvave, ti variva, mwi vaisiva kyokiraqi nraahuma nrohi variro. Mwi vaisiva nai haaru kyokiraqi nrohi varunteema kyeroma mwaa entaravata kyokiraqi nraahu nrohi variro.

10 Nai hena vaisiara mwutukya vahiraro nrohiariva, mwi vaisiva omwaqama nrohi variananro. Mwi vaisira kyaiqqaatairovata hiama mpovanto uaqia hi kyaiqara utuananro.

11 Vaisi mpovanto nai hena vaisiara qora vu nraato vate variva, mwi vaisiva kyokiraqi hia nai vi aanranra ntapihiraitiro, apiqama kyero vi variro. Enta hi inraikyava mwia vu entama kyaiharo mwia vuvanto qipa viharora tiro, mwi vaisiva nai quani aanranra hia taqaraitiro, api vi variro.

12 Ni nraaqiaranramwu tuaavo, Kotiva Karaisira kyaiqarave tiro, mwiva nkye uaqia hi kyaiqara uti varia quara nruka nyatayirara tina, nte nkyini qara ntumwa nyatauqo.

13 Nkye nraaqiara sohuamwanra tuaavo, tauraqaqama kyero toharo-raqaatairo qati variqiro vi varu vaisira nkye mwi vaisirara ntapihi kyeta

riaarara tina, nte nkyinivata qara ntumwa nyatauqo. Nkye qumwanraa tuaavo, nkye Saataaninra nraatara kye variarara tina, nte mwaa quara nkyinivata qara ntumwa nyatauqo.

14 Ni nraaqiaranramwu tuaavo, nkye tiri tiqora ntapihi kyaarara tina, nte nkyinivata qara ntumwa nyatauqo. Nkye nraaqiara sohuamwanra tuaavo, tauraaqama kyero toharoraqaatairo qati variqiro vi varu vaisira, nkye mwi vaisirara ntapihi kyeta riaarara tina, nte nkyinivata qara ntumwa nyatauqo. Nkye qumwanraa tuaavo, nkye kepukyaqama kyeqata variqita vi variavaro Kotira quavanto nkyi su nyaato mwutukyaqi vahata nkye Saataaninra nraatara kye variarara tina, nte nkyini mwaa qarara ntumwa nyatauqo.

15 Hia mwata mwaqaanaa okyararave, mwata mwaqaanaa inraik-yarave, nkyi mwutukya ntirata variata. Vaisivanto variraro mwia mwutukyavanto mwatanyaa inraikyara nraahu vahirera, hia mwi vaisira mwutukyavanto tiri tiqora Kotirara vahianano.

16 Nraakye qoravanto nkyiari qamwaterarave, nkyiari varaataa hi-an inraikyararave, vairiqahi okyararave, airi inraikya vateqata nkyiari mwahuta ti vari okyararave, ekyaa mwi okyarava mwi okyarava hia tiri tiqova hinasairo tuminraitiro, nai mwata mwaqaanaa okyarama vahiro.

17 Mwaa mwatavavata, mwaa mwatarqaanaa inraikyara mwutukya nti varihata varia inraikyavavata, ekyaa mwi inraikyava mwi inraikyava taiqama quananro. Kotira qua riemwaqiro vi variari vaisiva, mwiva nraahuma ekyaa enta ekyaa enta qati variqiro quananro.

Karaisira nramwutaara tura

18 Ni nraaqiaranramwu tuaavo, ekyara entavanto qaumatoma vahiro. Iesusi Karaisira nramwutaavanto qovara hiananrove tu quara nkye riaarave. Mwaa entara Karaisira nramwutaa airivanto qovarama vita variavata tire qio ntapihi kyauraro ekyara entavanto qaumatoma vahiro.

19 Karaisira nramwutaahua hia tiriqinaahuara titama, mwihua tiri kyeta vita. Mwihua tiriqinaahuha hiatiri, tirivata variatiri. Mwihua tiri kyeta quavata mwiaqaama tire ntaphikye tiqata, Qutaama mwihuaqitairo hia mpokuvanto tiriqinaavave, tita.

20 Qio nkye Kotira mwanraqura nkyiqi rauru kyaihata varaahua variqataro tita, nkye ekyaa Kotira qua qutaa qua ntapihi kyeta riaara.

21 Nte hia nkyiara tiqana, Nkye hia qutaa qua riaarave, turave. Nkye Kotira qua qutaa qua riaarara tina, nte mwaa quara nkyini qara ntumwa tauqo. Hia Kotira qua qutaa quaqaatairo unra quavanto qio qovara hiananrove. Nkye mwia ntapihiarave.

22 Unra qua ti vari vaisiva varirero mwiva tavave? Jesusiva hia Kotiva hinasairo tiri kyaahqa hirero tumivave qiariva, mwivama mwi vaisiva. Mwi vaisiva mwitaa tiqaroma Jesusira nramwutaa variqaro mwiva mwia qoravata mwia mwaqaqvata qoririma mwate variro.

23 Vaisivanto Kotira mwaaqu Iesusira qoririma mwateqaroma mwia qora Kotiravata qoririma mwatero. Vaisi mpovanto Iesusirara qutaa mwiva Kotira mwaaquve qiariva, mwi vaisiva mwia mwaaqu vatama kyero kuaaqi variqaroma mwia qora Kotira vatama kyero kuaaqi variananro.

24 Taura vuni riemwataa quara, mwi quara nraahu tugara kyeta tuteta riemwaqita quata. Mwi quava nkyiqi kepukyaqama kyero vahiqiro virera, nkye mwi mwaaquvata mwia qoravata mwitanahua kyapata kuaaqi variqita vivara.

25 Mwia mwaaquvanto tiriara mwihua mwitaamaqita viqata ekyaa enta ekyaa enta qati variqita quate tiro, nai kyaau nriqiqaa vafeqaro tura.

26 Vaisi mponramwuvanto nkyi sitaqita uro uaqia hi aanranraqaa kyarerata uti variahura rieqanama nte mwaa quara nkyini qara ntumwa tena.

27 Qio Kotiva nai mwanraqura nkyi nyihata varaara. Kotira mwanraqura-vanto nkyiqi variqaro nkyi Kotira okyarara ntapihi kyero timwa nyinranra tiro, hia qumina mpovanto nkyi timwa nyianinra. Kotira mwanraqura-vanto mpo okyara mpo okyara ekyaa okyara nkyi nyaamwuteqaro hia unra qua nkyi timwa nyinraitiro, qutaa qua nraahuma nkyi timwa nyi varira. Kotira mwanraquravanto nkyi timwa nyiqiro vi variratara tita, nkye mwia qua riemwaqa iti qvata Karaisira vatama kyeta kuaaqi variqi vivara.

28 Ni nraaqiaranramw tuaavo. Karaisira vatama kyeta kuaaqi variqi viqata variata. Tire mwitaamaqita quararo nraakiara Karaisiva qovarama viro tumu ntairaqla tire hia aatu hiqata kyaauritaita, mwia vuqaa variqata mwutukya qibaakyama kyeta variananra.

29 Karaisira hia uaqia hi kyaiqara utiraitiro, ntapihi kyero nraahu nrohi vari okyarara, nkye ntapihi kyaahuara tita, nkye taqaivaro vaisi mpovanto Karaisira votima kyero ntapihi kyero nrohi varirera, nkye qioma mwi vaisirara Kotira nraaqiarave tivara.

3

Tire Kotira nraaqiarama varuro tura

1 Qikye, nataamave Kotiva tiriara mwutukya vahiva vahiro? Kotiva tiri tiqova mpoqama kyero tiriara mwutukya vaiharora tiro, mwiva tiriara nkye ni nraaqiarave ti varira. Qutaaqama kyeta tire mwia nraaqiaramwuma varita. Mwatani hini hia nraakye qorahua Kotira okyara hia ntapihi kyaahuara tita, mwihua tiri okyararavata hia ntapihi kyaara.

2 Ni nramwunaa tuaavo, mate mwaa tire Kotira nraaqiarama varita. Nraakiara tire nataamave variananra? Hiamma tire mwi okyarara ntapihi kyeta. Tire mwaa quara nraahu riaunana: Nraakiara Karaisiva qovarama viraqla tire mwia votima kyetama variananra. Mwi entara tire mwia vitama kyeta taqeta mwiaqataita tire mwia votima kyeta variananra.

3 Mwi entara vekeya variahua uaqia hi kyaiqara utuaro tita, Karaisiva kyotataqama kyero nrohintema kyeta mwihuavata kyotataqama kyeta nrohiqata mwia vekeya varivara.

4 Vaisivantove nraakyevantove uaqia hi kyaiqara utiqaroma Kotira qua nteqa kye variro. Kotira qua nteqa kye variva, mwiva uaqia hi kyaiqara uti varirama.

5 Nkye ntapihi kyaavaro Karaisiva nraakye qoravanto uaqia hi kyaiqara uti variara nruka nyatarero qovarama vira. Karaisiva hia uaqia hi kyaiqara uti varivama variro.

6 Mwickyantiri variqiro quariva hia uaqia hi kyaiqara utuqiro quananro. Uaqa hi kyaiqara utuqiro vi vari vaisiva hia Karaisira taqero, mwiva Karaisira okyara hia ntapihiva varira.

7 Po, ni nraaqiaranramwu tuaavo, haunri mpovanto unra qua nkyi timwa nyiankyora. Vaisi mpovanto ntapihi kyero nrohi vaisiva, mwi vaisiva ntapihi kyero nrohi vari vaisivama variro. Mwi vaisiva Karaisiva nrohintema kyero ntapihi kyero nraahu nrohi varira.

8 Saataaniva haaru toharama kyero uaqia hu kyaiqara nraahu varaqiro vurara tiro, uaqia hi kyaiqara nraahu vare vari vaisiva, mwi vaisiva Saataaninra nraaqiarama variro. Kotira mwaauqvanto Saataaninra kyaiqa taiqa kyarerero mwaa mwataraqaa qovarama vira.

9 Vaisivanto Kotira nraaqiara variharo Kotira vu nraatovanto mwi vaisiraci vaiharora tiro, mwi vaisiva hia qio uaqia hi kyaiqara utuqiro quananro.

Kotiva mwia qova variharora tiro, mwi vaisiva hiama qio uaqia hi kyaiqara utuqiro quananro.

10 Tire nataama kyetave mwi vaisirara Kotira nraaqiarave variho, Saataaninra nraaqiarave variho, qiananra? Mwataama kyeta tire mwia ntapihi kyeta taqaananra. Vaisi mpovanto hia avuqavu hiani kyaiqara varaarivave, hia nai hena vaisiara mwutukya vahiarivave, mwi vaisivama hia Kotira nraaqiara variro.

Nanrianra nanrianra mwutukya vahirata variate tura

11 Nkye tauraagama kyeta riemwataa quava, mwi quava tiriara mwataama tiro: Nkye nanrianra nanrianra mwutukya vahirata variate, tura.

12 Tire haaru varu vaisira Keninra nraantantaarora. Mwi vaisiva Saataaninra nraaqiara variqaro nai qata ntuqutu kyora. Nanra kyaarave Keniva nai qata ntuqutu kyero? Keninra kyaiqvavanto uaqia hu kyaiqava nraahu vahuvaro mwia qata kyaiqvavanto kyuqe kyaiqa nraahu vahuvaro mwia kyaara Keniva nai qata ntuqutu kyora.

13 Ni kata pakyaa tuaavo, Keninra nraantanteta mwata mwaagaanaahua nkyi uaqiamma nyataivera, hia mwi inraikyaraara nrighanrama quata.

14 Tire teta qata vakyaahuara mwutukya vahihata variqatara tita, tire hia ekyaaqua qutu quarhua variraita, tire ekyaa enta qati variqita quarahuama varita. Nai qata vakyaahuara hia mwutukya vahihato variari vaisiva, mwiva ekyaaqua qutu quarivama variro.

15 Vaisi mpovanto nai hena vaisi uaqiamma mwataaninranra rie variva, mwi vaisiva mpohua rukye vari vaisira nraantatamwa kyeroma variro. Nkye mwia ntapihi kyaarave. Vaisivanto hena vaisi rukye variva, mwi vaisiva hia ekyaa enta qati variqiro quarivama variro.

16 Iesusiva tiriara rieqaro qutu virara tiro, Iesusira mwutukyavanto tiriara vahi okyarara tiri tinraamwutaihata taqaananra. Iesusiva mwitaa hirara tita, tirevata Iesusira votima kyeta teta qata vakyaahuara kyaahaqa hirerata qiomaa qutu quataa hiraqeta qutu quananra.

17 Vaisi mpovanto airi inraikya vataariva taqairaro mwia qata vakyaqa mpovanto kyarave mpo inraikyave hia vatairaro mwianra hia po tiro kyuqema mwatairera, nataama kyeroove mwi vaisiva Kotirara ni mutukyavanto iara vaho qiananro?

18 Ni nraaqiaranramwu tuaavo, tire hia teta qata vakyaahuara kyaahaqa hiraitita, tire qumina nroqitaita nraahu tigata, Ni mutukyavanto ni kata pakyaa mwianra vahiana varuqo, qiarora. Tire teta qata vakyaahuani mpo kyaiqa varaqi viqata mwiaqaataitama teta qata vakyaahuara mwutukya vahihata varuro qiaravama qio vahiananro.

Kotira vuqaa tire hia aatu hiraitita variananranra tura

19 Tire teta qata vakyaahuara kyaahaqamaqita quarera, tire qutaa okyara nraahuma riemwaqita vuro qiananra. Tire mwitaamaqita viqata Kotira vuqaa variqata hia aatu hiraitita, mwutukya qihakayama kyeta variananra.

20 Tire mwitaamaqi quararo tiri vu nraato mwutukyavanto tiriqaqua vatero tiqaro, Nkye hiama Kotira nraaqiara variavo, tirarovata Kotiva tiri vu nraato mwutukya nraatara kyero ekyaa inraikya taqe variva, (mwiva tiriara nkye ni nraaqiarama variavo qiananro).

21 Po, ni nramwunaa tuaavo, tire teta vu nraatoqitaita kyuqe kyaiqa nraahu vare varuro qiarava qio vahirera, tire hia aatu hiraitita, Kotira vuqaa variqata mwutukya qihakayama kyeta variananra.

²² Tire Kotira qua riemwaqi vita Kotira kyakya hi kyaiqara varaqi quarera, tire mpo inraikya mpo inraikyara Kotira nyaanru hiararo Kotiva mwi inraikyara tiri timwiananro.

²³ Kotiva mwaa quara vatero tiqaro, Nkye Iesusi Karaisirara qutaama mwiva Kotira mwaaquve tiqatama mwianra kepukyaqama kyetama riemwaqita quate. Iesusi Karaisiva nkyiara nkye nanrianra nanrianra mwutukya vahirata variate ti quara, mwi quara riemwaqita quate, tiro tura.

²⁴ Vaisi mpovanto Kotira qua riemwaqiro nrohi vari vaisiva, mwi vaisiva Kotira vatama kyero kuaaqi variqiro vi variharo Kotiva mwi vaisira vatama kyero kuaaqi variqi vi varira. Kotiva nai mwanraqura tiri timwinranra tita, tire tiqata, Kotiva tirivata kuaaqi variqiro vi varihata varunananrave, qiananra.

4

Nkye vaanavanto qiani quararavata Kotira quave tivorave tura

¹ Po, ni nramwunaa tuaavo, unra vaisi airivanta mpo mwatani mpo mwatani nrohita tiqata, Nte Kotiva qua mpo qovarama kyaihana nte timwa nyi varuvave, ti variara. Vaisi mpovanto nri ntero nkyiara mwitaa tirera, mwiia quara qamwanrama kyeta qutaave tivora. Nkye mwia kyaiqavata mpora kyaiqavata tukyama kyeta taqaata. Kotira mwanraquravanto mwia kyaahaqa hi variharove mwiva tiho, vaanavanto kyaahaqa hi variharove mwiva tiho, timwa kyetama mwia kyaiqavata mpora kyaiqavata tukyama kyeta taqaata.

² Mwataama kyeta nkye Kotira mwanraquravanto qiani quara ntapihi kyeta rievara. Nkye vaisi mpo tukyama kyeta taqaivaro mwiva tiqaro, Qutaama Iesusi Karaisiva Kotiva hinasairo tuminro vaisi tuemwa virave, tirera, nkye mwi vaisirara, Qutaama Kotira mwanraquravanto mwia kyaahaqa hi variharo tih, variho, qia.

³ Nkye vaisi mpo tukyama kyeta taqaivaro mwiva Iesusira okyarara unra quave tirera, nkye mwi vaisirara mwitaama qia: Hia Kotira mwanraquravanto mwia kyaahaqa hi variharo unra qua ti variho. Vaanavanto Saataaniva varinasairo mwi vaisira quavanto qovara hi variho, qia. Karaisira nramwutaaqa hi variani okyarava nrianinra nkye mwianra ntapihi kyaara. Mate mwaa iherara unra vaisinramwu Karaisira nramwutaaqua qovarama vita Saataaninra qua ti variara.

⁴ Po, ni nraaqiaranramwu tuaavo, nkye Kotiranivantoma varita. Kotira mwanraquravanto nkyi mwutukyaq variva mwiva kepukyavanto variqaro mwatani vari vaananra nraatara kyaihatara tita, vaanavanto kyaahaqa hi varihata unra qua ti varia vaisihua nkye nraatara kyaara.

⁵ Mpo hiahua hia Kotira nraaqiara variahua, mwihua mwata mwaqaanaa qua okyara nraahu rie variara. Mwitaama kyeta variarara tita, mwihua mwatanya okyarara nraahu timwa nyiavata hia Kotira qua riaa nraaky e qorahua mwihua nraato nyitama mwihua qua rie variara.

⁶ Tire hia mwihua votima kyeta variraitita, tire Kotiranivantoma varita. Kotirara rie variariva, mwiva tiri qua qiomia riaananro. Hia Kotirara rie variariva tiri quavata hiam qio riaananro. Tire mwi inraikyaraqaa vitama kye taqeqlata mwaa vaisiva Kotira nraaqiarave, mwaa vaisiva hia Kotira nraaqiarave, qiananra.

Kotira mwutukyavanto mphuara vahi okyarara tura

⁷ Po, ni nramwunaa tuaavo, nrivaqenramwu nanrianra nanrianra mwutukya vahiraqeta variara. Mwi okyarava Kotiva hinasairo tuminra. Mpohuara mwutukya vahiaro nrohi vari vaisiva, mwiva Kotira nraaqiarama variro. Mwi vaisiva qiona Kotira okyara ntapihi kyena taquauqo qiananro.

⁸ Kotira okyaravanto vahirero mpohuara mwutukya vahivama variro. Mwia okyaravanto mwitaama vahirara tiro, vaisivanto mpohuara hia mwutukya vahiariva, mwi vaisiva hia qio Kotira okyara ntapihi kyena taquauqo qiananro.

⁹ Tiriara ni maaquaataita qati variqita quate tiro, Kotiva nai mwaauku kuaiqia vataira mwatani titovaro tiriara rieqaro tuminro qutu vura. Kotiva mwitaama kyero nai mwaaku titorara tita, tire taqauraro Kotira mwutukyavanto nronraqama kyero tiriara vahira.

¹⁰ Kotira mwutukya vahi okyarava mwataamama vahiro: Tire hia Kotirara mwutukya vahuvata variavararo Kotiva mwiva nraahu tiriara mwutukya vahuvavora tiro, mwiva nai mwaaku titovaro mwiva tire uaqia hi kyaiqara utuna quara nruka timwa taarive tiro, mwiva tiriara rieqaro qutu vura.

¹¹ Po, ni nramwunaa tuaavo, Kotira mwutukyavanto tiriara mwitaama kyero vahirara tita, tirevata nanrianra nanrianra mwutukya vahiraqeta variaravama vahiro.

¹² Haaruvata matevata hia vaisi mpovanto Kotira taqaivama variro. Tire nanrianra nanrianra mwutukya vahiraqeta variqita quarera, Kotiva tiriata variqiro viraro tiri mwutukyavanto qutaama Kotirara vahiananro.

¹³ Kotiva nai mwanraqura tiri timwinranra tita, tire qiona tiqata, Tire Kotiravatama kyeta kuaaqi variqi vi varuraro Kotiva tirivata kuaaqi variqiro vi varirave, qiananra.

¹⁴ Tire mwia mwaaku tetuviqotaita taqaurahuara tita, tire nkyivata timwa nyita tiqata, Tire mwatani variarahua hia raupirima viraitita, ekyaa enta qati variqita quananranra rieqaro, mwia qova nai mwaaku titovaro tiri huvantu timwa tarero tumunrave, tita.

¹⁵ Ta vaisivave lesusirara qutaama mwiva Kotira mwaaku vanto variho tiriara, Kotiva mwi vaisiravatama kyero vahiaro mwiva Kotiravatama kyero variqiro quananro.

¹⁶ Tire taqauraro qutaama Kotira mwutukyavanto tiriara vahiro. Kotira okyaravanto vahirero Kotiva mpohuara mwutukya vahiaro varivama variro. Vaisivanto mpohuara mwutukya vahiraro variariva, mwi vaisiva Kotiravatama kyero variqiro vi variraro Kotiva mwiavatama kyero variqiro quananro.

¹⁷ Tire mwitaama kyeta variqi quararo mwiaqatairo tiri mwutukyavanto qutaaqama Kotirara vahiraqe tire mwatani variqata Karaisira votima kyeta nrohiananra. Tire Karaisiva nrohintema kyeta variqi vita, nraakiara ekyaa enta Kotiva ko qiani entaraqaa tire variqata hia aatu hiraitita, mwutukya qihakayama kyeta variananra.

¹⁸ Kotirara mwutukya vahiariva hiamma Kotira nraatu aatu hiqaro variananro. Mwiva qutaaqama kyero Kotirara mwutukya vahiarora tiro, mwiva hia Kotira nraatu aatu hiqaro variananro. Nai uaqia hi kyaiqara kyaara Kotiva ni ntuquuankyo tiro Kotira nraatu aatu hiqaro variariva, mwi vaisiva hia qio qutaaqama kyero Kotirara mwutukya vahiarivama variananro.

¹⁹ Kotiva nraante tiriara mwutukya vahiaro varirara tita, tirevata nanrianra nanrianra mwutukya vahihata varunana.

²⁰ Vaisi mpovanto tiqaro, Ni mutukyavanto Kotirara vaiho, timwa kyero nai qata vakyaa mporara hia kyuqe vu nraato riemwa mwatairera, mwi

vaisiva Kotirara qiani quavavata unra qua nraahuma vahiananro. Mwiva nai vuqo taqaani vaisirara hia mwia mwutukya vahirera, nataama kyerove mwi vaisiva Kotira hia taqaaninranravata mwia mwutukya vahiananro?

21 Karaisiva mwaa quara vataihata tire ntapihi kyaunananra. Mwitaama tiro: Kotirara mwutukya vahiariva nai hena vaisiaravata mwutukya vahiraro variarive, tura.

5

Tire mwata mwaqaanaa okyara nraatara kyaunananra tura

1 Ta nraakye qorahuave Jesusirara tiqata, Mwiva quataama mesaiaavanto variho. Quataama Kotiva mwia titaiharo tiri kyaahaqama timwa tarero mwatani tuminrave, tihua, mwi nraakye qorahuva Kotira nraaqiarama varivaro Kotiva mwihua sovama variananro. Vaisivanto mwia qora Kotirara mwutukya vahiariva, mwi vaisiva Kotira nraaqiararavatama mwia mwutukya vahiananro.

2 Tiri mwutukyavanto Kotirara vahiraqeta Kotiva vatai quara riemwaqita quarera, tire qioma tiqata, Tiri mwutukyavanto Kotira nraaqiararavata vaiho, qiananra.

3 Tire Kotira qua riemwaqita quarera, tire qioma tiqata, Tiri mwutukyavanto Kotirara vaiho, timwa kyeta mwia quavata riemwaqita quarava hiama muaanraqama kyero vahiananro.

4 Tire Kotira nraaqiara variqataro tita, qioma mwatanyaa okyara nraatara kyaananra. Tire Jesusirara kepukyaqama kyeta riemwaqi viqata qioma mwatanyaa inraikya nraatara kyaananra.

5 Ta vaisivave mwatanyaa okyara qio nraatara kyaananro? Vaisivanto Jesusirara mwiva quataama Kotira mwaquivanto variho qiariva, mwi vaisiva nraahuma mwatanyaa okyara nraatara kyaananro.

Kotiva Iesusi Karaisira okyarara ntapihi kyero tura

6 Iesusi Karaisiva mwatani tumu ntero nramanri varovaro mwia nraanre rauruvaro qutu viro. Iesusiva hia nramanri nraahu vararaitiro, mwiva nramanri varovaro mwiaqatairo mwia nraanrevata rauruvaro qutu vura. Kotira mwanaqravanto quttaa qua nraahu ti variva variqarora tiro, mwivavata Iesusira okyarara ti varira.

7 Taarampo nramwuvanto Iesusira okyarara ti variara.

8 Mwinramwuhua qua tiqata kuaa qua nraahu ti variara. Kotira mwanaqravantove. Iesusiva nramanri varaivave. Iesusira nraanrevanto kyatariqaa raurivave, mwinramwuhua taarampo nramwuvanto Iesusira okyarara tiri timwa timwi variara.

9 Qati qumina vaisivanto mwitaama taqaunanrave ti varia quara, tire mwi quarara qutaave ti varunanra. Tire qumina vaisivanto ti vari quarara qutaave qiarera, Kotiva qiani quara nrörona quaravata tire mpoqiyavata qutaave qiaro. Kotiva Jesusirara mwiva ni maaquivanto variho firara tita, tire qioma qutaave qiananra.

10 Vaisivanto Kotira mwaqaqua quttaa mwivave tiharora tiro, mwia mwutukyaqitairovata mwi quarara quttaa quama vaiho tiro. Kotira quara hia quttaa quave ti vari vaisiva, mwi vaisiva Kotirara unra qua ti varivave tiro. Kotiva Jesusirara ni maaquve ti quara, mwi vaisiva hia quttaa quave tiharora tiro, mwiva Kotirara unra ti varivave tiro.

11 Kotiva timwa tai quava mwataamama vahiro: Tiriara mwihua ekyaa enta kyugema kyeta qati variqita quate tiro, Kotiva nai mwaqqi tiri timwinra. Qati variqita vi okyarava nai mwaqqi vahirara tiro,

¹² Kotira mwaaquntiri variqiro quariva qati variqiro quananro. Hia Kotira mwaaquntiri variqiro quariva hiama qati variqiro quananro.

Tire ekyaa enta qati variqita quananranra tura

¹³ Nte nkye Kotira mwaqaquara qutaa mwivave qia nraakye qorahuani qara ntumwa nyatauquo. Nkye nkyeta ekyaa enta qati variqita vi okyarara ntapihiate tina, nte mwaal quara nkyini qara ntumwa nyatauquo.

¹⁴ Tire Kotira kyakya hianinranra rieqata mpo inraikya mpo inraikyara mwia ntumwahiamwa hiararo mwiva tiri qua qioma riaanano. Mwiva tiri qua qio riaariva varirara tita, tire hia aatu hiraitita, Kotirara aakyara nteqata varunana.

¹⁵ Kotiva tiri qua qioqama kyero riaariva varihatara tita, tire ntapihi kyauraro mwiva tire ntumwahiamwa hiana inraikyara tiri qio timwian-rivama variro.

¹⁶⁻¹⁷ Nkye taqaivaro Kotira nraaqiara nkyi sata sakyaa mpovanto hia mwia kyaara ekyaaqua qutu quani kyaiqara qora kyaiqa utu kyairera, nkye mwi vaisirara Kotirara aakyara ntaivaro Kotiva mwia kyaahaqama mwatairaro mwi vaisiva qora kyaiqa qaqira kyero qati variqiro quari.

Hia nte anoma kyero uaquia hi aanranraqaa nrohi varirara tuquo. Ekyaa uaquia hi kyaiqara utuava Kotira qua nteqa kyaavama vahiro. Uaquia hi kyaiqava mpo vahira, vaisivanto mwia utu kyaariva, mwiva qioma Kotirara aakyara ntaanano. Uaquia hi kyaiqava mpo vahira, vaisivanto mwia utu kyairera, mwi kyaiqara utuaninra kyaara mwiva ekyarama qutu quananro. Nkye mwi kyaiqara utu kyaani vaisirara rieqata hia Kotirara aakyara qjata.

¹⁸ Tire ntapihi kyaunanrave. Kotira nraaqiaravanto hia qaiqaavata qaiqaavata uaquia hi kyaiqara utuqiro quananrove. Kotira mwaqqavanto mwiaqaa ntaqikyi varirara tiro, mwiva qio variraro Saataaniva hiama mwia qoraqama mwataanano.

¹⁹ Tire ntapihi kyaunanrave. Tire Kotira nraaqiara varurata qati mwatani varia nraakye qorhua hia Kotira qua riaahua variavaro Saataaniva mwihuaqaa ntaqikyi varira.

²⁰ Tire ntapihi kyaunanrave. Kotira mwaqqavanto mwatani tuminro tiri tivu nraato kyaahaqama kyaiharo tiri tivu nraatovanto ntapihi vihata tire qutaa mwanriqa Kotiva varirara ntapihi kyaunanra. Tire mwia mwaqqau Iesusi Karaisira vatama kyeta variqi viqata tire qutaa Kotira vatama kyeta variqita vi varunana. Kotiva qutaa mwanriqvantoma variro. Mwiva qutaaqama kyero ekyaa enta qati variqita vi varia okyarava, mwivama variro.

²¹ Po, ni nraaqiaranramwu tuaavo, nkye unra mwanriqa mwoqa nyita qatiraqaa variatema, tuquo.

2 IONI

Ioniva tavaaraqinaa qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora. Nraakyem povanto nai nraaqiaranramwuanravata hia unra qua mwaanra riaraaita, kyugema kyeta Karaisira qua riemwaqita quate tiro, Ioniva mwaa quara mwinramwuhuani qara ntumwa nyatora.

1 Nte Kotira nraaqiaraqaa ntaqikyi varuva i Kotiva nai kyaama tai nraakyeraravata, i nraaqiara mwihuaravatama, qara mwaa ntumwa nyatena. Ntevata ekyaa Kotira qua qutaa qua riaahuavata nkyiara mwutukya vahata varuro.

2 Kotira qua qutaa quavanto tirinramwuqi vahirara tita, tire nkyiara mwutukya vahata varuro. Mwia quavanto tirinramwuqi ekyaraaqama kyero qati nraahu vahiqiro quananro.

3 Tire qutaa qua riemwaqita viqata nanrianra nanrianra mwutukya vahiraqeta variararo Kotiva tiri tiqovavata mwia mwaاقu Iesusi Karaisivavata tiri kyugema timwa teta tiriara po tita tiri mwutukya qibaakyama timwa taivaqeta variara. Qutaaqama kye nanrianra nanrianra mwutukya vahirata variate tura

4 Tiri tiqova tiqaro, Qutaa qua nraahu riemwaqita quate, tuvata i nraaqiara hininramwuvanto mwiva tuntema kyeta nrohi variarara tina, nte mwihuara qamwateqanama varina.

5 Nini nraakyem kyugeva, e riaante. Nte qua mpo i timwa mwinrenrave. Hia Kotiva qaraakya qua vataira nte i timwa mwinrenranavauma. Tire haaru variqata mwaa quara riaunanra. Mwianra rieqatama po, nrivagenramwu nanrianra nanrianra mwutukya vahiraqeta variara.

6 Tire Kotiva vatai quara riemwaqita quarera, tire qioma tiqata, Kotirara mwutukya vahata varuro, qiananra. Kotiva vatai quava mwataamama vahiro: Nanrianra nanrianra mwutukya vahirata nrohiate. Nkye haaru tauraqaqama kyeta mwi quara riaarave.

Unra qua ti varia vaisihuara tura

7 Unra qia vaisihua airivanto nraakyem gora unra qua timwa nyinrenrata mpo mwatani mpo mwatani nrohi variara. Mwihuara Iesusi Karaisirara mwiva hia nyaamwusairo qutaa tuminro vaisi tuemwa vivave, ti variara. Mwi quara ti vari vaisiva unra qua nraahu ti vari vaisivama variro. Mwiva Karaisira nramwutaavantoma variro.

8 Nkye mwi quara ti vari vaisihuara rauriqata variate. Nkye mwihuara quara qutaa quave tivarо nkye tauraa Iesusirani kyaiqa varataava quminavau quankyyora. Nkye Karaisira kyaiqa nraahu varaqita vivita uro nkyeta kyooqaa varaaata.

9 Vaisi mpovanto hia Karaisira qua kyugema kyero tutaraitiro, qaqira kyero mpo qua riemwaqiro virera, Kotiva hiama qio mwikyantiri vari-ananro. Vaisi mpovanto Karaisira qua kyugema kyero tutoero variqo virera, Kotiva nai mwaاقu ntiri mwiavatama kyero variqiro quananro.

10 Hia Karaisira qua ntapihi kyero timwa nyinraitiro, mpo qua ti variari vaisiva nkyivata varirero nrinrenra, hia mwia qamwata mwateta nkyeta nraamwuqi vita vataata. Hia mwi vaisira qua mwantaata.

11 Mwi vaisirara kyakya hiqaro mwia qua mwantaariva, mwivavata mwi vaisira kyaiqa voti hianinra uaqia hi kyaiqara nraahuma varaananro.

Ekyara quara tura

¹² Nte airi qua nkyi timwa nyianriva vaihanavata nte hia qaraqitaina nraahu nkyi timwa nyinrenra. Nte ntenavanto uro nkyivata variqana timwa nyiankye timwa kyenama varina. Nkyivata uro variqana qua tiṁwa nyiqanama nkyevata ntevata qamwataananra.

¹³ I nrunra Kotiva nai kyaama tai nraakyera nraaqiaranramwu mwaini variahua i qua mwantaavo.

3 IONI

Ioniva ekyaaqa qara vara kyora

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora. Vaisi mpovonto Kaiasiva varuvaro Ioniva mwianra kyuqema kyera Iesusira nraaqiaravanto nyianrasaita nrumu varihuaqa ntaqikyiqira quante timwa kyero vaisi mpo Ntiotarepirara uaqia hi kyaiqara uti variho timwa kyero Ntemitiriaasirara kyuqe kyaiqa vare variho timwa kyero qara ntumwa tora.

¹ Kaiasio, nte Ioniva Kotira nraaqiaraqaa ntaqikyi varuvama mwaa quara ini qara ntumwa tena. Po, Kaiasio, qutaaqama kyeroma ni mutukyavanto iara vahiro.

² Ni katao, e hia nriqa quani inraikyara varairaro i mwamwantavanto kyuqema kyero vahiarive tina, nte iara rieqanama Kotirara aakyara nte varura. Nte ntapihi kyauqaro i vu nraato mwutukyavanto Kotirara kyuqema kyero vaihara variananra.

³ Tiri tiqata vakya mponramwuvanto e hiananrasaita mwaini nri nteta iara mwiva kyuqema kyero qutaa qua tutero variqiro vi variho qiavana nte mwi quara rienna qamwateqana varuqo. Qio nte i ntapihi kyauqara e Kotira qua qutaa qua nraahu riemwaqira vi variaravama variaro.

⁴ Qikye, nte qaiqaa nanra qua mpo rienave nte qamwataaninra. Ni nraaqiarara mwihua qutaa qua nraahu riemwaqita vi variavo ti vari quara, mwi quara rieqanama nte nronraqama kyena qamwataaninra.

Ioniva Kaiasirara kyuqe kyaiqa vare variaro tura

⁵ Ni vaisio, e tiri tiqata vakya kyaahaqama nyateqarama hia viri taqaarahuavata kyaahaqama nyateqarama kyuqema kyera kyaiqa vare variira.

⁶ I mwutukyavanto mwihuara vahira mwihua tiri timwa timwiavata tire Iesusira nraakye qora mwaini varurahua riaunanra. Mwi vaisihua Kotira kyaiqa vare varirara tira, e mwihua kyuqema kyera kyaraqtairave, mpo inraikyaqotairave, kyaahaqama nyatairata aanraqaa quata.

⁷ Hia Iesusira qua riaa nraakye qorahua variavata mwihuara hia mwihuara munima timwivaqeta aanraqaa tuvare quare tiraitita, mwihua Iesusi Karaisira nrutuara rieqata mpo mwatukya mpo mwatukya nrohiqata Karaisira qua timwa nyi variara.

⁸ Mwihua mwitaamaqita vi variarara tita, tire mwihuara qamwateqata sita kyeta vateta kyaahaqama nyataaravama vahiro. Tire mwihua kyaahaqamaqita viqata mwihuavata tiretava kuaa kyaiqa mwia vare variararo qutaa quavanto qiomava viro nrinro hiananro.

Ioniva Ntiotarepisiva uaqia hi kyaiqara utiho tura

⁹ Nkye Iesusira nraakye qora mwini variahua, nte nkyini qara vara kyauqaro Ntiotarepisiva kyaakueqama kyero hia tiri qua riärero uti variro. Mwi vaisiva nronra vaisiqama viro mpohuaqaa ntaqikyianinranra nraahuma mwia mwutukya vaihara variro.

¹⁰ Nraakiara nkye hinani uro ntena nte mwia uaqia hi kyaiqara qo-varama kyarerera. Mwiva tiri nrutuvanto mwatani tumi quarive tiro, unra qua tiriara ti variho. Hia mwi qiara nraahuve. Mwiva varihata tiri qata vakyaahua mpo mwatukya mpo mwatukyanri nrohi variahua nriavarovo mwiva kepukyaqama kyero hia nte mwihua qamwata nyatarerave

timwa kyero taqaiharo mpovanto mwihuara qamwatero sita kyero nai nraamwuqi vatarero utiharo mwiva mwivavata vu nraato nrenro tiqaro, E mwihua sita vatairera, mwia kyaara i raaquta kyaarara hia tirivata variqara Kotira qua rienanrave, tiro. Mwiva mwitaa tiqaro mpohuavata antuare varira.

Ntemitiriaasira kyuqe kyaiqara tura

¹¹ Ni vaisio, hia uaquia hi kyaiqara utihua vi aanranraqaa quante. Kyuqe kyaiqa nraahu vare aanranra mwiaqaa nraahu quante. Kyuqe kyaiqa nraahu vare variva, mwiva Kotira nraaqiarama variho. Uaqia hi kyaiqara uti vari vaisiva hia Kotira taqaivama.

¹² Vaisi mpovanto Ntemitiriaasiva varihata ekyaa nraakye qora mwi vaisirara kyuqe vaisive ti variara. Mwihua taqaavararo mwi vaisiva qutaaqama kyero Kotira kyaiqa vare varira. Tirevata mwi vaisirara kyuqe vaisive turo. Tire mwitaa tunanra evata riaararo qutaa qua nraahuma vahiro.

Ekyara qua mwanteqaro tura

¹³ Nte airi qua i timwa mwianriva vaihanavata nte hia qaraqitaina i timwa mwinrenra.

¹⁴ Nte pataqia vari kyena nte uro i viri taqeqlana ivata qua tirera.

¹⁵ Kotiva i kyaahaqama mwatairaro i mwutukyavanto qihakyama vahirara variante.

I qata vakya mwaini variahua i qua mwantaavo. Ni kata pakya mwini variahua nianra mwiva nkyi qua mwantaiho tira timwa nyiante.

IUTI

Iutiva qara vara kyora

Iesusira qati vara sivuma kyovalo nyaamwuni uro varuvaro 40 ihive 50 ihive nritarovaro Iutiva mwaa quara qara ntumwa tora. Iutiva Iesusira qatavanto variqaro nraakye qora hia unra qua mwaanra riemwaqi viraitita, kyuqema kye Iesusi Karaisira qua riemwaqi quate tiro, Iutiva mwaa quara qara ntumwa tora.

1 Nte Iutiva Iesusi Karaisira kyaiqa vaisima varuquo. Nte Iemisira qatavantomava varuquo.

Nte Kotiva nyaanrama tai nraakye qorahuanima mwaa quara qara ntumwa tauquo. Kotira tiri tiqora mwutukyavanto nkyiara vahata nkye variara. Iesusi Karaisiva nkyiara aanra kyuqeraqaa quate tiro, nkyiqa ntaqikyi varira.

2 Kotiva nkyiara po tiraro nkyi mwutukyaqitairo qihakya hi varirata variqata nanrianra nanrianra mwutukya vahirata variata. Nkye mpoqipavata mwitaamaqita quata.

Unra mwaanra okyara tu vaisihuara tura

3 Ni nramwunaa tuaavo, nte Kotiva nkyiyata tirivata huvantu kyaani okyarara qara ntigana nkyi timwa nyiankye tura qaqira kyena mpo qua nkyi timwa nyinrenra. Vaisi imponramwuvanto tire Karaisira qua riauna quara qaqira kyaa vaisihua nkyi qua nraatara kyevorave tina, nte nkyi timwa nyianrita nkye Karaisira qua kepukyaqama kye tuteqata variqi quata. Kotiva Karaisiva tiri kyaahaqa hiani okyarara tire quitaave tunanra kuua nani timwinranra titi, tire mwia nraakye qoravanto variqata mpo qua hia tiraitita, avuqavuma kye mwia qua timwaqi virera.

4 Nkye hia taqaavata mpohia vaisihua tirema kye uro nkyi utaqi variara. Haaru Kotira mpukuqi qara ntumwa tova tiqaro, Mwitaa hi vaisihuaraqaa Kotiva nronraqama kyero qua vataananrove, tura. Mwi vaisihua hia Kotirara nronraqama kye riaraitita, Kotiva tiri kyuqema timwa taani quara, mwi quara api tuqasaa kye unrasi tiqata, Tire qiomaa naitarama kye nraata vaati varaana okyarara qaqira kyeta api nrohianra okyarara nraahu riemwaqita quare, ti variara. Mwihua mwitaa tiqata Iesusi Karaisira qoririmaa mwate variara. Iesusi Karaisiva tiriqaa ntaqikyi vari vaisisa tiri vunyaa vaisivanto varihata mwihua mwia qorrima mwate variara.

5 Nkye mwaa quara vaakya riaaravata nte qaqaa nkyi timwa nyinrenrave. Haaru Kotiva nai Isareru nraakye qora Isipiqtairo kyaahaqama kye sitaqiro uro kyero variqiro vuvata mpo enta nai nraakye qoraqitai mpo uhua Kotira quara hia qutaa quave tuvaro mwia kyaara Kotiva hia mwihua vekeyahu nyataraitiro, mwihua taiqa kyorave.

6 Mwi quara rieta nkye nyaamwunyaahuaravata rieqata variata. Haaru nyaamwunyaahua mpo uhua Kotiva mwihua nronraqama kyero nkyiari mwatuukya nyunra mwiaqaa varuvaro pupohovata qaqira kyeta mpo kyaiqa varara tuvaro mwia kyaara Kotiva mwihua nronraqama kyero enta huraqi kyero seniqo rupa tora. Mwihua mwini variqi vita ekyara entaaga nronraqama kyetama qua varevara.

7 Nkye Sotomianravata, Komoraaravata, mwitana tataaqa vahu mwatuukyahuaravata, riaata. Mwi mwatuukyaraqi varuhua nyaamwunyaahua ua kyaiqa varontema kyeta avuqavuma kye nai vare nai vare hi okyarara qaqira kyeta quara vairi nraantantamwa kyeta vaisivanto nraakyevanto nanrianra nanrianra api nrohi varuvaro mwia

kyaara Kotiva qiaqotairo mwihua tatoqa tuto kyorave. Ekyaa nraakye qoravant Kotira qia hia qipaani qiarara taunru kyevorave tiro, Kotiva qiaqotairo mwihua tatoqa kyora.

⁸ Mwi quarara nraata tuataara vahata mate unra mwaanra okyara ti varia vaisihua hia mwi quarara riaraitita, mwihua api kyaiqa nraahu vare variarave. Mwi vaisihua nkyiari su nyaatoqi api nrohi okyarara nraahu rieqata uaqia hi kyaiqara utiqata mwihua nkyiari mwamwanta uaqama kyeqata nronra vaisinramwuvanto qia quara hia riaraitita, nyaamwunyaahua kepuuya inraikyaravata uaqia hi quara tiqata mwoqanyaa qua ti variarave.

⁹ Haaru nyaamwunyaava Maikeriva nyaamwunyaahua vunyaa vaisivanto variqaro mwiva Saataaninravata Mosesira mwamwanta varaaninranra inronra hi variqaro mwiva tiqaro, Ntena Saataaninranra uaqia hi quara tiqana mwoqanyaa qua qiankyorave, timwa kyero Saataaninranra tiqaro, Kyairaro niqaa ntaqikyi variva, Kotiva iara qiarive, tura. Maikeriva nronravanto mwitaa tu quava vahata mate mwi vaisihua hia mwi quarara nronraqama kye riaraiftita, nyaamwunyaahua uaqia hi quara tiqata mwoqanyaa qua ti variarave.

¹⁰ Mwi vaisihua unra mwaanra okyarara ti varia vaisihua mwi okyara mwi okyarara hia ntapihiraitita, ekyaa mwi okyarara uaqia hi okyararave tiqata uaqia hi quara mwianra tiqata mwoqanyaa qua ti variara. Mwihua quara vairi su nyaatoqa ihata quara vairivanto rieta taqe hia okyarara nraahu mwihua rie taqe hiarave. Mwi vaisihua mwi okyarara utuqi vi varivaro mwi okyarava mwihua vara raupirima kyaananro.

¹¹ Nte mwihuara poma tuqo. Mwihua Keniva nrohuntema kyeta api aanraaqaa nrohi variarave. Haaru Mperamuva munimanra nraahu rieqaro nraakye qorara unra mwanriqa nrutu tuahereqa variate tuntema kyeta mwaa entara mwi vaisihuavata munimanra nraahu uti variara. Haaru Koraava Mosesira nramwutaqa hiqaro mwia nraatara kyarera utuvaro ru kyontema kyeta mwi vaisihuavata taiqa vivara.

¹² Nkye nanrianra nanrianra mwutukya vahata ntuvaantuama viqata kyara nre variaraqi mwi vaisihua uaqia hia vaisihua nkyi utaqaa variqata mwihua tauma rumpuara uaqia hira votima kyeta nkyi utaqaa variqata mwihua nkyiariara nraahu rieqata kyara nre variarave. Mwi vaisihua qumina tonamwu nraantantamwa kyeta variarama. Toqavanto tonamwu mwia ntupupuata kyaiharo hia vativata vaharo aahara tonamwu vahira votima kyeta variarama. Kyatari mwanrevanto ekyaa quvaruma viharo hia tamwa riaira votima kyeta variarama. Kyatari tuqavata ntaru kyaiharo aaharama vira votima kyeta variarama.

¹³ Nramanri aisaakya votima kyero mwihua uaqia hi kyaiqava qoqaa vahirama. Mwihua qovoravanto qakyaa hiro nrohiro qipa vintema kyeta variara. Mwi vaisihua anomia kyero enta hiro upi kyokikina ri mwatukyaraqai ekyaa enta variqi quate timwa kyero, Kotiva mwi mwatukyara mwihuani terama kyero vataira.

¹⁴ Ataamuva tohare varu vaisiva variro vaisi mpo mwata tovaro mwi vaisiva vara mwata tovaro mwitaamaqiro viro Inokura 6 vanto mwata tovaro mwiva 7 okyara mwiva varurama. Inokuva mwi entara variqaro Kotira qua qovarama kyero tiqaro, Taqaate, nraakiara nronravanto nyaamwunyaahua airi sita varero

¹⁵ ekyaa nraakye qora qua avuqavu hirero tumuananrove. Nraakye qora Kotira qoririma mwateteta mwianra qora qua ti varihua rirero tumuananrove tura. Inokuva haaru mwi quara turama.

¹⁶ Unra qua mwaanra ti varia vaisihua *nrutu nraunru/nrunru nraanru* tiqata mpohuaqaa qua vateta tiqata, Nkyiqaama qua okyaravanto vaiho, ti

variarave. Mwihua nkyiari api varaataa hi kyaiqara nraahu vare variqata nkyiari nyutu nraahu tuaahereqa variarama. Mwihua nkyiari kyuqema kye varirara nraahu riemwaqi viqata mpohua vara mwataniqa hi quara nraahu ti variarave.

Kepukyaqama kyeqata Karaisira qua tutaate tura

¹⁷ Ni nramwunaa tuaavo, mwihua mwitaa timwaqi vi varivata nkye hia mwihua hiante hiate. Tiri vunyaa vaisivanto vaisi mponramwu nronraqama kyovata mwihua qia quara nkye qati nraahu riemwa taata.

¹⁸ Mwihua mwitaama titi:
 Ekyara enta qaumato vahiani entaraqaa
 nraakye qora qovarama vita
 mwihua Kotira aanragaa nrohi varihuara raima
 nyateta mwihua hia Kotirara riaraitita,
 mwihua nkyiari api nrohiataa hirata nrohivarave, tura.

¹⁹ Mwi vaisihua nkyi Iesusira nraakye qora ntainra kyarerera uti variarave. Hia Kotira mwanraquravanto mwihua kyaahaqa ihata mwihua mwi kyaiqara utuqi vi variara. Mwihua quara vairivanto nrohiantema kye mwihua nkyiari mwutukyavanto varaataa hi kyaiqara nraahu varaqi viqata nrohi variarave.

²⁰ Ni nramwunaa tuaavo, hia nkye mwihua nrohiantema kye nrohiata. Nkye Karaisira qua riaahuama. Karaisira quavanto mpo qua mpo qua nraatara kyero kyuqe quama vahiro. Nkye kepukya nraakye qoravanto varirerata mwi quara nraahu mpoqiyata riemwaqita quata. Kotira mwanraquravanto nkyi kyaahaqa hirata Kotirara aakyara nteqata variata.

²¹ Nkye Kotira qua riemwaqita vivaro Kotira mwutukyavanto nkyiara vahirata variata. Nkye mwitaamaqi viqata tiri vunyaa vaisi Iesusi Karaisira vekya varivaro nkyi kyuqema nyatairata nkye ekya enta qati variqi quata.

²² Karaisira quara hia kepukyaqama kye riaraitita, taara vu nraato tihua, mwihua nkye mpo titi, mwihua kyaahaqamaqita quata.

²³ Vaisivanto qiaqi variharo mwiqitairo pati qatinani kyaintema kyeta nkye mwi nraakye qorahua kyaahaqamaqi vivata mwihua uaquia hi aanranraqaa hia quata. Nkye po tiqata mpohua kyaahaqa hirera hita mwihua qora kyaiqavanto nkyiyata apiqama taankyo titi, nkye qakyoma kye taqamwaqi viqata mwihua kyaahaqa hiata. Mwihua qora kyaiqavanto ntenra vi fuavaaqara voti hiva vahiria nkye tu varevora.

Kotirara kyuqeve tura

²⁴ Kotiva gioma nkyiqa ntaqikyiqiro virata nkye Kotira aanraqaa nrohiqatama hia qora kyaiqa varaqi vivaro hia nkyiqa qua vahirata nkye mwutukyagitat qamwate variqata vivita mwiva kepukyavanto varinani uro ntevara.

²⁵ Kotiva mwanriqa kuaiqavanto variqaro mwiva tiri nronra vaisi Iesusi Karaisira kyaiqara rieqaro tiri huvantu timwa te varira. Mwivama vunyavaava variro. Mwiva ekya entaravata mwiva mwitaamaqiro vi varira. Nraakiaravata mwiva mwitaamaqiro nraahu vi variananrove. Nte quutaama tuquo.

QOVARAMA KYORA

Uqetato quara Karaisiva qovarama kyero Ioninra timwa mwunra

Iesusira qati vara sivuma kyovaro nyaamwuni uro varuvaro airi ihi 60 ihive nritarovaro Ioniva mwaa quara qara ntumwa tora.

Mwi entara mpo uhua Iesusira nraakye qora uaqjamaqita vi varuvaro Ioniva Iesusira nraakye qorara hia pupohairata kyuqema kye Iesusi Karaisira qua riemwaqita quate tiro, mwaa quara qara ntumwa tora.

Ioniva hia vaitaraitiro, qati variqaro ruvaata voti hura taqamwaqiro viqaro mpo inraikya mpo inraikyavanto nraakiara qovara hianinra taqero mwi quara qara ntumwa nyatora.

¹ Kotira kyaiqa vaisinramwuvanto varivaro nraakiara hia mpuahaama viraro mpo inraikya mpo inraikyavanto qovara hianinranra ntapihiate tiro, Kotiva mwaa quara Iesusi Karaisira timwa mwuvaro mwiva mwi quara qovarama kyora. Iesusi Karaisiva nyaamwunyaa vaisi mpo titovaro mwiva tumu ni timwa mpuvana nte Ioniva Iesusi Karaisira kyaiqa vaisivanto variqana

² ruvaata votima kyena taqeqlana mwi inraikyara mwi inraikyara taqaavarara rieqana qara ntumwa taura. Nte mwaa quarara qutaa Kotira mwakyaakya vaiharo qutaa Iesusi Karaisiva mwi inraikyara mwi inraikyarara timwa mpuvana riaavararama tuqo.

³ Mwaa quara kyaara nti variani vaisira Kotiva kyuqemama mwataananro. Mwiva kyaara nti varirata mwaa quara rie vari nraakye gorahua, mwihuavata mwaa quarara nronraqama kye riemwaqi vivera, Kotiva mwihuavata kyuqemama nyataananro. Mwaa quava qutaaqama kyero qovara hiani entava qaumatoma vahiro.

Kotira nraakye qora mwatukya 7 nramwuqi varuhuara qua mwanteqarotura

⁴ Kotira nraakye qora Esiaani mwatukya 7 nramwuqi variahua nte Ionivama nkyi qua mwantente. Kotiva mate qati variqiro vi varivama. Haaruvata mwiva qati variqiro vi varuvama. Nraakiaravata mwiva qati variqiro viqaro tumuanrivama variro. Kotiva nkyi kyuqemaqiro viraro nkyi mwutukyaqitairo qihakya hi varirata variata. Kotiva nai taintaqaa mwatakyaa viro variharo mwia vuqaa mwanraqura 7 nramwu variahua, mwihuavata nkyi kyuqemita vivaro nkyi mwutukyavanto qihakya hi varirata variata.

⁵ Iesusi Karaisivavata nkyi kyuqemaqiro viraro nkyi mwutukyaqitairo qihakya hi varirata variata. Iesusi Karaisiva hia qoriri hiraitiro, kyuqema kyero Kotira okyara tiri timwa timwi variva, mwiva nraante vuniqama kyero qutu quaraqitairo siviro qati variqvi vi variro. Mwatani vunyaa vaisi airivanto variavaro mwiva ekyaa mwihuahua vunyaa vaisivantoma variro. Mwia mwutukyavanto tiriara vaharoma variro.

Mwiva tiriara rieqaro qutu vurara tiro, Kotiva tiri uaqia hi quara nruka timwa taihata tire huvantu vita variqata

⁶ tiri vunyaa vaisivata variqata qioqama kye mwia qora Kotira kyaiqa varaqi quarahuama varita. Nrivaqe mwia nrutu tuaaheraqi quara. Mwiva kepukyavanto variqaro ekyaa enta qati variqiro quananrove. Qutaave.

⁷ Qio taqaate. Mwiva tonamwuqi variqaroma qaiqaa tumuananrove. Mwiva tumi varirata ekyahua mwia taqe varivaroma tumuananrove.

Mwia mwamwantaqi hiqaariqo ruto vaisihua, mwihuavata mwia taqe varivararo tumuananrove.

Mwi entara mwatani varihua mpo mwatanaa mpo mwatanaavanto mwia taqeta ntate varivarave.

Mwi inraikyava qio mwitaama hiananrove. Quataave.

⁸ Kotiva nronravanto ekyaa inraikya nraatara kyaiva tiqaro, Nte toharena vuni variavantema kyena ekyaararaqaavata variarivama varuqo, tiro. Kotiva mate qati variqiro vi varivama. Haaruvata mwiva qati variqiro vi varuvama. Nraakiaravata mwiva qati variqiro viqaro tumuanrivama variro.

Ioniva nai ruvaata taqorara tura

⁹ Nte Ioniva nkyi sata sakyavantoma varina. Nkyevata ntevata Jesusir-ayata kuaaqi variqi vi varunana. Nte nkyi kyapata variqi viqana nriqa vi inraikyareave, muaanrave, varaqina vi varura. Mwitaamaqi vi varuraro Kotiva tiriqaa ntaqikyi varihata tire mwia nraaqiara varunanranra tita, nkyevata trevata kepuqyaqama kyeta variqi vi varunana. Nte mwitaamaqi viqana Kotira qua nraakye qora timwa nyiqi vina, Jesusiva qovarama kyai quara nraakye qora timwa nyiqi vi variavata mwia kyaara ni rupaqita uro kyaarerera utaaqaa vahi mwatara Patimosiqa kyorama.

¹⁰ Nte mwini variqana tiri vunyaa vaisi nrutu tuaaheraani entaraqaa variavaro Kotira mwanraquravanto nivata varuvana nte nronraqama kyena Kotirara riemwaqi viqana variavaro ni moqasairo quavanto nronraqama kyero ntoma nruqua taara tiqaro

¹¹ mwitaama tiro: E taqe varina inraikyara qara ntumwa kyera mwi qarara vara kyairaro Kotira nraakye qora mwatukya 7 nramwuqi varinani quarive. Mwi mwatukyara nrutu vahirero Epesaasi, Simenaa, Pekamaami, Taiataira, Saatisi, Pirateripiaa, Reotisiaa, mwi mwatukyara nrutu mwitaama mama vaiho, tiro.

¹² Mwitaa ti varuvana nte mwi quara ti varu vaisira taqaankye tina, tutqasaavi taqaavaroo omwa ite varu inraikyava 7 nramwu koriqo ututo inraikyaya vahuvaro

¹³ mwia utana vaisi mwiva varura. Mwia viri vahirero nte mwatani mwatatai nraaqiara varuqo tu vaisira viri votima kyero vahura. Mwiva tuavaaqa mpuahaa utu tovaro kyuqu taaqi tumitarovaro varuvaro mwe-tokyaqaa mwiva koriqotairo ututo hoqukyara hutero varura.

¹⁴ Mwia qiata kyaahi vahirero turomunrave, vahi vosouve, mwia voti huva vahuvaro mwia vuvanto qia votima kyero ite varura.

¹⁵ Mwia kyuqu qaini voti hira mwia nrutu mparaasi ravita kyero kyuqema kye utu kyero vahamwenra qutaiharo takyuqira votima kyero takyuqi varuvaro mwia quavanto vahirero aisaaqya nruqua taara ti varura.

¹⁶ Mwitaa vahuvaro mwiva nai kyuauqu tuananrani qovora 7 nramwu tutovaro paipa hini hini mpoqama kyero vahova mwia nroqitairo qovarama vuvaro aaqu tero varura. Mwitaa vahuvaro mwia virivanto huarivanto ihera itaintema kyero iteqaro takyuqi varura.

¹⁷ Mwi vaisiva mwitaama varu vaisiva varuvana nte mwia taqena tumu ntina qutu vu vaisira votima kyena mwia kyuqutarani variavara. Nte mwitaama variavaro mwiva nai kyuauqu tuananraqotairo ni mamantaqaa vatero tiqaro, Hia aatu hiante. Nte tohare vuni variavantema kyena nte ekyaararanivata variarivama varuqo.

¹⁸ Nte qati variqi vi varuvama varuqo. Qio taqaante. Nte qutu quavavavata mate qati variqi viqana ekyaa enta qati variqi virerave. Nte

ntaqikyiqana nte qariroma vaisivanto qutuananrove. Nte qariroma vaisivanto uaqia hi mwatara nronraqama kyero qia itaaninraqi quananrove.

¹⁹ E taqe varina inraikyara qara ntumwa taante. Mate mwaa entara qovara hianinravata, nraakiara qovara hian inraikyararavata, qara ntumwa taante.

²⁰ E ni kyauqu tuananrani qovora 7 nramwu taqe variananravata, omwa qupi kye vataa inraikyara koriqotairo utu kye 7 nramwu vataaravata, nte mwi quara okyara uqeta taira vutu kyena i timwa mwinrenrave.

Qovora 7 nramwu mwia okyara vahirero mwihua nyaamwunyaa vaisi 7 nramwu variarave. Nyaamwunyaa vaisi 7 nramwu vaakya tura Kotira nraakyae qoravanto varia mwatukyara 7 nramwuua ntaqikyi variarave. Omwa qupi kye vataa inraikyara 7 nramwu taqe variananra okyara mwitaamama vahiro. Mwi inraikyava Kotira nraakyae qoravanto varia mwatukyara 7 nramwuma vaiho, tiro.

2

Epesaasiqi varu nraakte qorahua qua nyunra

¹ Mwitaa timwa kyero mwiva tiqaro, Epesaasiqaa ntaqikyi varira nyaamwunyaanrani mwataama kyera qara ntumwa taante. Nte ntena kyauqu tuananrani qovora 7 nramwu tutena omwa qupi kye vataa inraikyara koriqotairo utu taara 7 nramwu vataara utaqaa nrohi varuva, ntema nkyi qua timwa nyuquo:

² Nte nkye kyaiqa vare variara taqaurave. Nte taqauqata nkye toqaamwu tu kyeta kyaiqa varaqi viqata hia pupohaihata kepukyaqama kyeta variqi quarave. Nte taqauqata nkye uaqia hia vaisihua hia qamwata nyataraitita, mwihuara quate qiarave. Uaqia hu vaisihua mponramwu qovarama vita tiqata, Tire Iesusiva nronraqama kyaihata varurahuave, tuvata nkye mwihuara hiqata taqovata mwihuara unra tu vaisihua varurave.

³ Nte taqauqata nkye nianra rieqata muaanra varaqi viqata hia qoriri hiraitita, kepukyaqama kye variarave.

⁴ Nkye mwitaamaqi viqata qio variavananvata nte mpo qua kyaara nkyiara tirerave. Nkye tohareta varu entara nkyi mwutukyavanto nianra mpoqavata vahurave. Mwaa entara nkyi mwutukyavanto hia nronraqama kyero nianra vaiho.

⁵ Mate nkyi kyaiqvanto tumu ntira mwianrama riaate. Nkyeta qora kyaiqa qaqlira kyeta haaru kyuqe kyaiqa varontema kyeta varaate. Nkye hia nkyeta qora kyaiqa qaqlira kyaivera, nte nkye hinani uro ntena nkye omwa qupiqeqata vataa inraikyara mwia vara qatinani kyaaninrave.

⁶ Mwitaa tiqanavata nte nkyi qua mpo rieqana nkyi qamwata nyatauquo. Nte ti varunteema kyeta nkye tiqata, Nikoraasinqinaahua utua kyaiqarara tiri tiqo itaiho, ti variave. Nkye mwitaa qiarara tina, nte nkyi qamwata nyatauquo.

⁷ Nkyi su nyaato kyuqe su nyaato vahirera, Kotira mwanraquravanto Kotira nraakte qora timwa nyi vari quara rieqata variate. Vaisi impovanto qora kyaiqa hia utiraitiro, qora kyaiqa nraatara kyeqaro variqiro virage nte mwi vaisirara qio Kotira aakyogi uro variqarama kyatari mpo mwia tamwa nreta qati nraahu variqi vira hiqo kyera nrenanrave qianinrave, tiro.

Simenaaqi varu nraakte qorahua qua nyunra

⁸ Mwitaa timwa kyero mwiva tiqaro, Simenaaqaa ntaqikyi varira nyaamwunyaanrani mwataama kyera qara ntumwa taante. Nte toharena

vuni variavantema kyena nte ekyaararanivata variarivama varuqo. Nte qutu quavava mwaa entara qati variqi vi varuvama varuqo.

⁹ Nte qianinra riaate. Nte taqauqata nkye muaanra nronraqama kye vare variarave. Hia nkyini mpo inraikyavata vahata nkye vehiqama kye variarare. Qio nkyini airi inraikya nyaamwunima vaiho. Nte riauqata Iutaa vaisinramwuvanto tiqata, Tire Iutaavanto nraahu Kotira nraaqiara varuro, tiqata nkyiara uaqia hi quara qiavata variarave. Mwihua hia Kotira nraaqiara variraitita, mwihua Saataaninra nraaqiarama variavo.

¹⁰ Nronraqama kyero muaanravanto qovara hirata hiama aatu hiqata variate. Riaate. Saataaniva nkyi mwataara hirero nkyi mponramwu sitaqiro uro karavuqi kyaananrove. Nkyi karavuqi uro kyairata nkye kyaquruturana ihererwa mwipi variqi vivata nkyi qoraqama nyatevarare. Nkyi qoraqamaqita vivata nkye hia ni qoririma mataraifita, nianra nraahu nraato tuqita quate. Nkyi nronraqama kye ntuqutuqi vita uro nkyi ntuqutu kyaivera, nianra nraahu vu nraato tiqata varivaqena nte ntenavanto mwia qia nkyi kyoqaa nyiqana qati variqi vira nkyi nyianrita kyuqema kye qati variqi quate.

¹¹ Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi quara riaata. Vaisivanto nraatara kyeqaro kyuqe aanraqaa variqiro viro uro qutu quari vaisiva qio variraro nraakiara qutu quariva hiama mwia tu varaananrove, tiro.

Pekamaamiqi varu nraakye qorahua qua nyunra

¹² Mwitaa timwa kyero mwiva tiqaro, Pekamaamiqaa ntaqikyi varira nyaamwunyaanrani mwataama kyera qara ntumwa taante. Nte paipa hini hini mpoqama kyero vahihira vatauvama varuqo. Nte qianinra riaate.

¹³ Nkyi mwatukyqa airi nraakye qora Saataaninra qua rieqata mwia kyaiqa vare variavata nkye mwini variqata nianra nraahu riemwaqi vi variarave. Saataaninra kyaiqa vare variahua airavanto variavaro nkyiqitairo mpovanto Antipaasiva kyuqema kyero ni qua ti varihata mwia kyaara mwia ru kyaavata nkye mwiaqatai hia aatu hiraitita, nkye kepukyaqama kyeta nianra nraahu riemwaqi vi variarave.

¹⁴ Nkye mwitaamaqi viqata qio variavanavata nte mpo qua kyaara nkyiara tirerave. Nkyi utani vaisi mponramwuvantovata variqata mwihua Mperaamuva api qua timwa to quara votima kyeta nkyi timwa nyi variavata rie variarave. Haaru Mperaamuva variqaro vaisi mpo mwia nrutu Mperekira timwa mwino tiqaro, Kumwaanri mwataama kyera timwa nyiqanrama mwihua rapatama kyairata i mwatanaa Isarerivanto i unra qua rieqatama unra mwanriqani vate kyarara nreqatama api qaraqita viqatama uaqiana quate, turave.

¹⁵ Nkyi utaqitai vaisi mponramwuvantovata api qua ti variavata nkye mwihua qua rie variarave. Mwi vaisihua Nikoraasiqinaahua api timwa taa quara nkyi timwa nyi variavata nkye mwihua qua rie variarave.

¹⁶ Nkye mwi quara mwi quara api qua qaqira kyeta tuqasaaqita kyuqe qua nraahu riemwaqita quata. Nkye hia mwitaa hivera, nte nkye hinani uro ntena nkyi utaqaa api qua ti varihuavata ntena noqinaa paipaquo ntaquaninrave.

¹⁷ Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi quara rieqata variata. Qio kepukyaqamaqiro viqaro qora kyaiqa uro nraatara kyaani vaisira, nte mpo kyara manaa uqeta taura hini mwina mwiaqataina ori egarorivata mwianrinro mwiaqaa vahi nrutura mwia varaari vaisiva, mwiva nraahuma ntapihi-ananrove, tiro.

Taiatairaqi varu nraakye qorahua qua nyunra

¹⁸ Mwitaa timwa kyero mwiva tiqaro, Taiatairaqaan ntaqikyi varira nyaamwunyaanrani mwataama kyera qara ntumwa taante. Nte qua qianinrana riaate. Nte Kotira mwaqaqvanto ni puvanto qia votima kyero ite varihana varuvave. Ni kyuqu qaini voti hira mwia nrutu mparaasiqaa vahaamwenra qutaiharo takyuqira votima kyero takyuqira varihana varurave.

¹⁹ Nte variqana nkyi kyaiqa taqe varurave. Nte taqauqata nkye nanrianra nanrianra mwutukya vahata variarave. Nkye Kotirara kepuqaqama kye rieqata variarave. Nte taqauqata nkye mpohua kyaahaqa hiqata variarave. Nkye muaanra nrihata hia qoriri hiraitita, kepuqaqama kyeta variqata varaqi vi variarave. Vuni nkye Kotira kyaiqa pataqia varaqi vita mate nkye mwi kyaiqara nronraqama kye vare variarave.

²⁰ Nkye mwitaamaqi viqata qio variavanavata nte mpo qua kyaara nkyiara tirerave. Nraakye mpovanto mwia nrutu Ieseveriva nai tiqaro, Nte Kotira qua qovarama kye varuvave, timwa kyero nkyi utaqi varihata nkye mwia qati taqe kyaavaro nkyivata varirave. Mwi nraakyeva api qua timwa nyi varihata ni kyaiqa vaisinramwu mwia qua rieqata api qareqata unra mwanriqani vataa kyarara nre variarave.

²¹ Mwi nraakyeva nai qora kyaiqa qaqlira kyaarive tina, nte mwia vekya mpuahaama variqi vi varuqaro mwiva hia qaqlira kyaraitiro, mwi kyaiqara qati nraahu utuqiro vi variarave.

²² Mwia kyaara nte mwi nraakyera ntuqutuariro mwiva nronraqama kyero nriqa quani inraikyara varaqiro quananrove. Mwiavata api nrohi vari vaisihua, mwihuavata hia nkye po kye titi tiqata, Hia mwi nraakyeravata nrohiatararave, tivera, nte qamwanrama kyenama mwihuavata ruarita mwihua nronraqama kyetama nriqa vi inraikyara varaqita vi variararave.

²³ Nte mwitaama kyena mwi nraakyera vataqi vihua, mwihuavata ekyaa ntuqutu kyaarita qutu vivarave. Nte mwitaamaqi quarita Kotira nraakyeye qora mpoqi mpoqi varihua ni okyara ntapihi kyeta taqevarave. Nraakye qoravanto su nyaatoqi vahi quarave, mwihua vare varia kyaiqarave, nte mwi quara mwi quara tukyama kyena ekyaa ntapihi kyaurave. Nraakye qora kuaiqia kuaiqivanto nkyiari qora kyaiqa varera mwiaqama nkyiari koqaa tukyama kyena nyianinrave. Ni okyarà mwitaama vahirave.

²⁴ Nkye mponramwuvanto Taiatairaqi variahua hia mwi nraakyera qua rie variarave. Mpo qua mwi quarara Saataaniva ugeta tai quarave ti varia quara, nkye mwi quaravata hia riaraitita, variqi vi variarave. Nkye mwitaa hiarara tina, nte hia mpo muaanra nkyiqli vataaninrave, tuqqo.

²⁵ Nkye kyuqe inraikyara tutara mwi inraikyara tuqara kyeta tute variqi vivaqe nte tumuankye.

²⁶ Kepukyaqamaqi viqaro qora kyaiqa nraatara kyero ni mutukya vahianinra nraahu varaqiro vi variani vaisira, nte nronraqama kyaariro mwiva mpo mwatanaa mpo mwatanaahuaqaa ntaqikyiqi quananrove.

²⁷ Ni kova mwitaama kyero ni nronraqama kyaihana nte ntaqikyiqi vi varuntema kyeta mwihuavata mpo mwatanaa mpo mwatanaahuaqaa ntaqikyiqi vivarave.

Mwihua ntaqikyiqi viqata qaini kyauru tuqi viqata

mwiaqotai tave ntukuraa kyaintema kyeta

mwihua mpo mwatanaa mpo mwatanaahua

ntuqutuqi viqata mwihuahuaqaa ntaqikyiqi vivarave. (Sng 2:9)

²⁸ Nte mwi vaisihua nronraqama kyena qovora nrumu qaataate varira itataraaravata nyianinrave.

²⁹ Nkyi su nyaato kyuqe su nyaato vahirera, Kotira mwanraquravanto Kotira nraakyе qora timwa nyi vari quara rieqata variate, tiro.

3

Saatisiqi varu nraakyе qorahua qua nyunra

¹ Mwitaa timwa kyero mwiva tiqaro, Saatisiqaa ntaqikyi varira nyaamwunyaanrani mwataama kyera qara ntumwa taante. Nte qiani quara riaate. Nte Kotira mwanraqura 7 nramwu tutena varuvama varuqo. Nte qovora 7 nramwu tutena varuvama varuqo. Nte nkyi kyaiqa taqamwa ntapihi kyaurave. Mpo hiahua nkyiara kyuqema kyeta mwihua qati variqi quahuave ti variavanavata nte nkyiarama nkye qutu quahuave fuqo.

² Vu ntapairi kyegata sivi variate. Nkyeta hini vataa inraikyava hia qutu vira, mwi inraikyara kepukyaqama kyaivaro hia qutu quarive. Nte taqauqaro nkyi kyaiqvavento Kotira vuqaa hiama qioqama kyero vahiro.

³ Nkyi kyaiqvavento mwitaama vahirara tita, nkyi timwa nyuvata rio quara, mwi quara riemwa teta mwi quara nraahu riemwaqi viqata qora kyaiqa qaqlira kyaata. Nkye hia su ntapairi kye sivita varivera, nte mpuara vaisivanto nrihanrama nyatero nri ntema kyena nkyi rirera nrianinrave. Nte nrintaani entara nkye hia qio ntapihi kyevarave.

⁴ Nkye mpo hiahua Saatisiqi variahua, nkyeta tuavaaqa hia qainaamaqama kyaavo. Nkyi kyaiqvavento qio yaihatara tita, nkye qiomma egarori tuavaaqa utu teta nivatama kye variqi vivarave.

⁵ Qio kepukyaqamaqi viqaro qora kyaiqa nraatara kyaani vaisira, mwi vaisira nrutu nraakyе qora qati variqi vi nrutura qara ntumwa tai mpukuragjtai nte hia nruka kyaraitina, qati kyena, egarori tuavaaqa utu mwataaninrave. Nte ni kora vuqaavata, nyaamwunyaahua suqaavata, variqana qoqaa vutu kyena tiqana, Mwi nraakyе qorava ninivantoma variho, qianinrave.

⁶ Nkyi su nyaato kyuqe su nyaato vahirera, Kotira mwanraquravanto Kotira nraakyе qora timwa nyi vari quara rieqata variate, tiro.

Pirateripiaaqi varu nraakyе qorahua qua nyunra

⁷ Mwitaa timwa kyero mwiva tiqaro, Pirateripiaaqaa ntaqikyi varira nyaamwunyaanrani mwataama kyera qara ntumwa taante.

Nte qianinra riaate. Api okyarave, qora okyarave, hia niqi vahiana nte kyotataqama kyena nraahu varuvave. Qutaai okyaravanto nraahu niqi vahiana varuvave. Ntevitiva haaru tuto kigara ntema mwi kigara tutauquo. Nte mwi kigaraqotai qesa qatua kyaariro hiama qio mpovanto titaa taananrove. Nte mwi kigaraqotaina qesa ru taariro hiama qio mpovanto qatua kyaananrove.

⁸ Nte nkye vare varia kyaiqara ntapihi kyaurave. Nte nkyi suni qesa mpo qatua nyatauqaro vahira, hiama qio mpovanto titaaanrove. Nte taqauqaro nkyi kepukyaqama pataqja vaiho. Mwitaa vahihatavata nkye hia ni qoririma mataraaita, ni qua qati riemwaqi vi variarave.

⁹ Iutaa imponramwuvanto tiqata, Tire Iutaaavanto nraahu Kotira nraaqiara varuro, ti variahua, mwi vaisihua Saataaninra nraaqiara, unra ti varia vaisihua variarave. Nte mwi vaisihua ntavaaqavuqina uro nkyi kyuqutarani kyaarita mwihua tumu ntita variqata nianra qutaama mwia mwutukyavanto nkyiara vaharo variho tivarave.

¹⁰ Nte nkyiara hia qoriri hiraitita, kepukyaqamaqi quate qiaavata nkye ni qua kyuqema kye riemwaqi quarara tina, nte nkyiqa ntaqikyiariro nronraqama kyero muaanra vahiarci entava qovara hiariva hia nkyiqa qovara hiarive. Mwi entara nronraqama kyero muaanravanto qovarama

viro ekyaa mwatanaa mwataaramaqi virata mwihua anom a kye uaqiam a variqita vivarave.

¹¹ Nte qamwanrama tumuntaaninrave. Nkyeta vataa inraikyara tuqara kyeta tutaate. Nkyeta kyaiqa ututaa kyoqaara nkyi nyianinra haunri mpovanto ntavihi kye varaankyorave.

¹² Kepukyaqamaaqi viro uro qora kyaiqa nraatara kyaani vaisira nte mwi vaisira vara kyena ni mwanriqa Kotira nraamwuqi rataariro nraamwu kyaara kepukyavanto variananrove. Mwi vaisiva hia mwi nraamwunra kyaraitiro, mwiqi mwanriqanraqama kyero variqiro quananrove. Nte mwi vaisiraqaa ni mwanriqa Kotira nrutu qara ntumwa mwatena, Kotira mwatukya nrutuvata mwi vaisiraqaa qara ntumwa mwataaninrave.

Mwi mwatukyava Ierusaremi qaraakya mwatukyama vahiananro. Mwi mwatukyava nyaamwuni Kotiva varinasairo tumu vahiananrove. Ntena nutu qaraakya nrutuvata mwi vaisiraqaa qara ntumwa mwataaninrave. Kepukyaqamaaqi viqata qora kyaiqa nraatara kye nraakye qorahuqaas nte mwitaama kyeqana qara ntumwaqina virerave.

¹³ Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate, tiro.

Reotisiaaqi varia nraakye qorahu qua nyunra

¹⁴ Mwitaa timwa kyero mwiva tiqaro, Reotisiaaqaa ntaqikyi varira nyaamwunyaanrani mwataama kyera qara ntumwa taante.

Nte qua qiarita riaate. Ekyaa Kotira quara nte qio qutaave ti varuvama. Nte ekyaa Kotira kyaiqa taqaurara hia ugetaraitina, vutu kyeqana ntapihikye timwa nyi varuvama. Nte ekyaa Kotiva ututai inraikyara mwia okyaravantom varuqo.

¹⁵ Nte nkye vare varia kyaiqara taqaurave. Nte taqauqata nkye hia anom a kyero anterove, anom a kyero qia itai nramanrinra votima kye variavo. Nkye pataqia tutoqa hi nramanrinra votima kye variavo. Nkye anom a kye antai nramanrinrave, anom a kyero qia itai namanrinra votima kye varivaque nte qiove qiataarave.

¹⁶ Nkye hia anom a kye anteta, hia anom a kye qia itaihata, pataqia tutoqa hi nramanrinra votima kye variavanana tina, nte nkyi ntena nroqitaina mwunru vilhi kyarerave.

¹⁷ Nkye tiqata, Tire airi inraikya vataurahua qiom a varuro. Tire hia qumina mpo inraikyara aara ntaananrave, ti variarave. Nte nkyiara po tuqo, nkye mwitaa tiqatama nkye nkyeta vehiqama kye variara hia ntapihi kye taqaavo. Po, mpohua nkyiara po kye tiva nraahu vaiho. Nkye vehi nraakye qora nraahu variavo. Nkye tuavaaqa hia vaihata tokyavanto variavo. Nkye vu qipa vihata vuara kyaara hiahua variavo.

¹⁸ Nte nkyiara mwataa hiatema tina, Nkye niqaatai kyoqaa hiata. Kori qiaqotairo hiqama kyaira kyuqera mwia niqaatai koqaama kye varaivaro nkyini kyoqaa airi vahiarive. Nkye tokya variqata kyauriqata variarara tita, niqaatai ebarori tuavaaqa vara kyeta nkyeta mwamwantaq a ntumwaqu taate. Niqaatai manrasini vara kyeta nkyeta suqaa qu taivaro nkyi suvanto ntapairi virata kyuqema kye taqaate.

¹⁹ Ni mutukya vahi nraakye qorahu kyuqema variate tina, mwihua timwa nyateqana mwihua ntututuqina vurave. Mwianra rieqatama nkye qora kyaiqa qaqla kyeta, ni kyaiqa kyuqe kyaiqa nraahu varaqi quate.

²⁰ Qio riaate. Nte mwaatani qesaqaa variqana qesa ntukuakua hiqana varuqo. Vaisi mpovanto ni qua riero qesa qatua matairera, nte mwi vaisira nraamwuqi verante mwi vaisiravata kyara nre variariro mwi vaisiva nivata variqaro kyara nre variananrove.

21 Kepukyaqamaqiro viqaro uro qora kyaiqa nraatara kyaani vaisira nte mwii vaisira nronraqama kyaariro mwiva nivatama kyero mwatakyaa viro variqaro ntaqikyiqiro quananrove. Nte qora kyaiqa nraatara kyena kepukyavanto variqananra tina, nte ntena kora mwia taintaqa mwatakyaa vina variqana mwilkyantiri ntaqikyiqi vivarurama. Kepukyaqamaqi viqata uro qora kyaiqa nraatara kyehua ni votima kyeta variqata ni kyauqu tuananrani mwatakyaa vita varivarave.

22 Nkyi su nyaato kyuqe su nyaato vahirera, Kotira mwanraquravanto Kotira nraakye qora timwa nyi vari quara rieqata variate, tiro. (Mwiva mwitaa tuvana nte Ioniva ruvaata taqontema kyena mwia qua riaavarave.)

4

Nyaamwuni Kotira tainta nronra taqorara tura

1 Nte Ioniva variqana nte ruvaata votima kyena qaiqaa mpo taqaavarave. Nte nyaamwuni taqaavarao quesavanto qatua viro vahurave. Nte mwini taqe variavaro quavanto ntoma nruqua votima kyero tauraa ni timwa mpu quava qaiqaa nianra tiqaro, Mwaini nrumu variraqe nraakiara mpo inraikya mpo inraikya qovara hianinra nte i nraamwutaankye, tiro.

2 Quavanto mwitaa tuvaro qamwanrama kyero Kotira mwanraquravanto kepukyaqama kyero nivata varuvana nte variqana taqaavarao ni puni nyaamwuni tainta nronra, vunyaa vaisi tainta vahuvoro mwiaqaa mpovanto mwatakyaa viro varura.

3 Mwiva taintaqa mwatakyaa viro varuvoro mwia virivanto takyuqiqaro nronra munima kyai orira mwia nrutu *iasipaave*, mpo ori nraanre ori mwia nrutu *konirianive*, ori mwitana takyuqi varintema kyero mwia virivanto takyuqi varura. Mwi vaisiva taintaqa mwatakyaa viro varuvoro haunrikyavanto mwia tainta vara ututuma kyero vahuvoro haunrikyaa mwiva vuhanaa ori *emaraari* votima kyero vahura.

4 Tainta nronra vahura mwia vara ututu tainta 24 nramwu vahuvoro tainta mwinramwunraqaa 24 vaisi nronra vaisinramwu mwatakyaa vita varuvoro mwihua tuavaaqa egarori tuavaaqa vahuvoro mwihua qiatqaqa koriqotairo ututo tovaqara quteta varura.

5 Mwitaama vahuvoro tainta utaqaa vahuraqitairo aaquakyaavanto mpo uti varuvoro nyaanruva nruqua tintema kyero qua rara ti varuvoro tainta mwia vuni omwa 7 nramwu qupi tova ite varura. Omwa mwinramwuva vahirero Kotira mwanraqura 7 nramwu vahura.

6 Mwitaama vahuvoro tainta vuni kyaarerera, karaasi voti huva vahuvoro mwiqi vevavatova qio taqaariva vahura.

Mwitaama vahuvoro tainta nronra tataaqani qati variqi vi varu inraikyava taaratana taaratana tainta utaqaa vahuvoro mwi inraikyaraqaa vu airivanto vuni mwoqani vahura.

7 Mwi inraikyava vahirero mpovanto vairi raioni mwia viri voti huva vahuvoro, mpovanto purimakau nraati votihuva vahuvoro, mpovanto vaisi viri voti huva vahuvoro, mpovanto memonra hitero nrohi varintema kyero vahura.

8 Mwi inraikyava taaratana taaratana qati variqi vi varu inraikya vahuvoro mwihua kuaiqia kuaiqiaqaa nraaokya **6** nramwu vahuvata ekyaa nraaokya mwia mwoqaaavata mwemwanivata vu airinti vahuhua variqata ihi timwaqi viqata hia tekya hiraitita, iheravata entaqivata ihi timwaqi viqata mwitaama titaa:

Nronravanto Kotiva kepukyavanto
ekyaa inraikya nraatara kyero nritarero varivave.
Mwiva kyotatavantove, mwiva kyotatavantove,

mwiva kyotatavantove.

Mwiva haaru qati variqiro vuvave.

Mwiva mate qati variqiro vi varivave.

Mwiva nraakiara qati variqiro quariva tumuananrove,
ti varura.

⁹ Qati variqi vi varu inraikyava taaratana taaratanavanto mwitaa timwaqi viqaro tainta nronraqa mwatakyaa vi varu vaisira mwia peqa okyara viriniqama kyero mwia nrutu tuaaherero mwia qamwata mwataaqi viqaro mwiva ekyaa enta qati variqiro vi variananrove timwaqi vi varura.

¹⁰ Qati variqi vi varu inraikyava mwitaa timwaqi vi varuvata 24 vaisi nronra, mwinramwuhuavata mwatasata tumu ntia variqata tainta nronraqa mwatakyaa viro varu vaisira qamwata mwateta tiqata, Mwiva ekyaa enta qati variqiro vi variananrove, tiqata nkyiari tovaqa qutora qatinani vara kyeta tainta nronra vahura mwia kyuqu vahunani tuto kye varura. Mwitaamaqi vita mwihua tiqata,

¹¹ E mwanriqavanto Kotiva tiriqaa
ntaqikyi variaravave.

E ekyaa inraikya utu kyera qovarama kyaaravave.

Mwitaa hi variananranra tita,
tire i qamwata mwateqata tiqata,
I okyara kepukya okyara nraahuma vaiho.

I nrutuvanto viriniqama viho.

I kepukyavanto nritaraiho,

E qua qiananraqaatairo ekyaa inraikyavanto
qovarama viro qati variqiro vi varirave, tura.

5

Nyaamwuni vahu mpukurara tura

¹ Mwihua mwitaa timwaqi vuvana nte Ioniva variqana taqaavaro tainta nronraqa mwatakyaa viro varuva variqaro nai kyuauqu kyaatutani ququrama to mpukura tutero varuvaro mpuku mwia utanivata mwaqaqvata qara ntumwa tova vahuvare mpuku mwia iriqiro viqaro mwi quara taqevo tiro, qume voti horaqo taaqau tovaro qume voti huva mwiva 7 nramwu vahura.

² Mpukuvanto mwitaama kyero tita viro vahuvana nte variqana taqaavaro nyaamwunuyaava nronra mpovanto aakyara ntero tiqaro, Ta vaisivave vaisi kyuqeva variariva mwaas mpukura vara kyero qume ntamwa kyero taaqau taira ntavahi kyero qua taqaananrove? tiro.

³ Mwiva mwitaa tuyaro qume ntamwa kyero taaqau tora ntavahi kyaani vaisirara nyaamwunivata, mwatanivata, mwata mwemwanivata, puua huvaro hia mpovanto varura.

⁴ Qumina puua hi taqovaro vaisi mpovanto qume ntamwa tora ntavahi kyero utaqi taqaariva hia varuvana nte nronraqama kye ntataqi vi variavara.

⁵ Nte qati nraahu ntate variavaro vaisi nronra 24 nramwuqitairo mpovanto nfanra tiqaro, Hia ntataante. Mwaini taqaante. Vaisi mpovanto, mwiva vairi raioni voti hiva lutaara okyaraqinaava, mwi vaisiva Ntevitira kuua okyaravanto nronraqama viro uaqia hi kyaicara nraatara kyero kepukyavanto variho. Mwi vaisiva qioma 7 nramwu qumeqo ntamwa kyero taaqau taira ntavahi kyero mwi mpukura iri kyero taqaananrove, tiro.

⁶ Mwitaa tuvana nte variqana taqaavaro tainta nronra utaqaa sipisipi nraativanto siviro varuvaro qati variqi vi varu inraikyava taaratana

taaratana vanto mwia vara ututu varuvata nronra vaisi 24 nramwuvantovata mwia ututuma teta varura. Mwitaama varuvana nte mwini variqana taqaavaro sipisipi mwia ru kyovaro qutu vu sipisipira votima kyero siviro varuvaro nriqiqakyau mwia qiatagaqa 7 nramwu vahuvaro mwia vuyata 7 nramwu vahurama. Ekyaa 7 inraikya mwi nramunra okyara vahirero Kotira mwanraqura 7 nramwu vahura. Mwi mwanraqurahua okyara vahirero Kotiva nai mwanraqura 7 nramwu titovata mwatani nrohita tumu ntanteta uro varu mwanraqurahua varura.

⁷ Mwitaama vahuvaro sipisipi nraati mwiva uro mwi taintaraqaa mwatakyaa viro varura kyauqu tuananraqitairo mpuku mwia varora.

⁸ Sipisipi nraati mwiva mpuku qatinani tu varovata taaratana taaratana qati variqi vi varu inraikyavavata, vaisi 24 nronra vaisinramwuvantovata, sipisipi nraati mwia vuni tumu ntita varura. Mwihua tumu ntita variqata kyaanta rupa tero ntuqtutira kitaa voti hora tuteta koriqtairo ututo taanunravata tuteta varura. Taanu mwipi qia quarovaro kyuqe mwunta vu inraikyava vahura. Mwi inraikyara okyara vahirero Kotira nraakye qoravanto Kotirara aakyara nte variavaro vi vari quara votima kyero vahura.

⁹ Mwitaama kyero vahuvata 24 vaisi nronra vaisinramwuvantovata qaraakya ihi tirereru sipisipi nraatiara mwataama tita:

Iru kyaavaroi i nraanre tumihanra e qutu vira
nraakye qora huvantu kyaarata
mwihua Kotira nraakye qoraqamavi variarara tira,
e mwi mpukura qume voti hiraqo taaqau taira
qioqama kyera ntavahi kyera taqeravama variaro.
Mwi nraakye qorahua ekyaa mpo okyara
mpo okyaraqitaitave,
ekyaa mpo qua mpo quaqitaive,
ekyaa mpo mwatanana mpo mwatanahaquaqitaive,
ekyaa mpo mwamwanta mpo mwamwanta
vahiraqitaive, ekyaa qovara hivarave.

¹⁰ E mwi nraakye qorahuqaqaa ntaqikyiqira virata,
mwihua Kotirani kyaiqa varaqi viqata mwihua
mwatani mwi mwataraqaa ntaqikyiqi vivarave, tita.

¹¹ Mwi vaisinramwuhua mwitaa tuvana nte variqana taqaavata nyaamwunyaahua airivanto ntuvantua huvana taqaavata nai qaiqaa nraahu kyaatavanto nrita ntuvantua hita nai nronraqama kyeta tainta nronra mwia ututumavi varuvata taaratana taaratana qati variqi vi varu inraikyavavata, 24 vaisi nronranramwuvantovata, ututumavi variqata

¹² paa tita ihi timwaqi vita mwitaama tita:
Sipisipi ru kyovara qutu vurava i kyaiqvavanto
kyuqe kyaiqa nritarero vahi kyaiqava vahirara tiro,
Kotiva i nronraqama kyairave.
Mwitaama kyaihara
e ntaqikyiara vaisiva nronravanto variqara
airi inraikya vateqara variararo
i vu nraatovanto kyuqe vu nraato vahara
kepukyavanto variqi quararo
i nrutuvanto nronraqama kyero vaharo
i okyaravanto kepukyä okyara kyuqe okyara
vahara variaro.
I kyaiqvavanto nritarero vahi kyaiqava vaharo
Kotiva mwitaama kyero i nronraqama kyairara tita,
tire i nrutu tuaaheraqi virerave, tura.

¹³ Nyaamwunyaahua mwitaa tuvana nte variqana riaavata Kotiva ututo inraikyava ekyaa inraikyavanto, nyaamwuni vahu inraikyavave, mwata mwaaqa vahu inraikyavave, mwata mwemwaqi vahu inraikyavave, nramanri nronraqi vahu inraikyavave, ekyaa mwi inraikyava mwi inraikyava ihi timwaqiro viqaro mwataama tiro:

Nronravanto taintaqa mwatakyaa viro varira mwiavata, sipisipi nraativata, tire mwitanahua nrutu tuaaheraqi virerave.

Mwitanahua nyutu kyuqe nyutuma vaiho. Mwitanahua kepuuyaqa hiqata ekyaa enta qati variqi vivarave, tura.

¹⁴ Ekyaa inraikyavanto mwitaa tuvaro qati variqi vi varu inraikyava taaratana taaratana vanto tiqata, Qutaa qiaovo, tuvata vaisi nronra 24 nramwuvanto tumu ntita mwatasata variqata mwitanahuara qamwataqi viqata mwitanahua nyutu tuaahere varura.

6

Sipisipi nraati mwiva qume voti huraqo taaqau tora ntavahi kyorara tura

¹ Mwitaamaqi vi varuvana nte variqana taqaavaro sipisipi nraati mwiva qume voti huraqo taaqau toraqitairo kuaiqia ntavahi kyovaro mwiaqaatairo qati variqiro vi varu inraikyara taaratana taaratanaqitairo kuaiqiavanto qua tirerò nyaanruva nruqua tintema kyero qua tiqaro, Nriante, tura.

² Mwitaa tuvana nte variqana taqaavaro qosi eqara kyaahi vahuva ni puqaa varuvaro mwia mwoqqaq mpovalto huru tute varuvaro vunyaa vaisi tovaqa mwuvaro mwiva kepukyavanto ntaquqi viqaro nramwutahua nraatara kya nraatara kya hiariva viro.

³ Mwiva vuvaro sipisipi nraati mwiva qume mpo taaqau tora nampa 2 mwia ntavahi kyovana nte riaavar qati variqi vi varu inraikyara taaratana taaratanaqitairo nampa 2 vanto, Nriante, tuvaro

⁴ mwiaqaatairo qosi mpo, nraanre qosivanto qovarama viro varuvaro mwia mwoqqaq varu vaisira kepukyu mwunra. Mwatani varihua ntaquqi viqata nai ru kye nai ru kye hiate tiro, kepukyu mwinro paipavata mwunra.

⁵ Mwuvaro sipisipi nraati mwiva qumeqo taaqau tora nampa 3 ntavahi kyovana nte riaavar qati variqi vi varu inraikyaraqitairo mpovanto nampa 3 vanto nriante tuvaro qosi mpo kyokiraqa huva qovarama viro varuvaro mwia mwoqqaq varuva nai kyauquqi muaanra tukya hi varu inraikyara tutero varura.

⁶ Tuteru varuvana nte riaavar qati variqi vu inraikyara taaratana taaratanaqitairo quavanto vaisivanto tuntema kyero tiqaro, Nkye uiti uru vararerata nkye kuua enta kyaiqa utu kye munima varera ekyaa mwi munimanraqo uiti kuua kaapu nraahuma kyoqaa hivarave. Nkye mpaari uru vararerata kuua ihera kyaiqa utu kye vare munimanra mwiaqo taarampo kaapu nraahuma kyoqaa hivarave. Nkye vahamwenra kyatarori tamwa riaani kyatarira tutara ntaru kyevorave. Nkye uaini tutara ntaru kyevorave, tiro.

⁷ Mwitaa tuvaro sipisipi nraati mwiva qumeqo taaqau tora nampa 4 ntavahi kyovana nte variqana riaavar qati variqiro vi varu inraikyara taaratana taaratanaqitairo nampa 4 vanto nriante tura.

⁸ Mwitaa tuvana nte taqaavaro qosi mpo qaamiantaqatova varuvaro mwia mwoqqaq mpovanto mwia nrutu *Qutu Quani Okyarava* varura. Mwiva varuvaro mwia nraakiara mpovanto mwia nrutu *Qutu Vu Mwatukyava* mwia nraaqani mwia vataqiro nri varura.

Mwitanahua varuvaro mwitanahuara mwitaama tiro: Nkyetana ekyaa nraakye qora mwatani varihua taaratana taaratanaaqaa tukyama kye vateta taaramponramwuqaa tukyama tehua qati varivata mpo mwikuraqa tukyama tehua ekyaa ru taiqa kyaate. Nkyetana ntaci okyarara qovarama kyaivata mwihua ntaquqi viqata nai ru kye nai ru kye hiate. Nronraqama kye aara nte iherara qovarama kyairata airivanto qutuate. Nriqa quani inraikyara qovarama kyairata mwihua nriqa virata variqi vita uro qutu quate. Qaakyau quara vairi qovarama kyairata nraakye qora kutita uro ru taiqa kyaate. Mwitaa timwa kyero mwitanahua nronraqama kyora.

⁹ Mwitaa timwa kyero sipisipi nraati mwiva qumeqo taaqau to mpukura nampa 5 ntavahi kyovana nte variqana taqaavararo quara vahi aasau ru kyeqaro vato taintava vahuvaro mwi taintara mwemwaqi nraakye qora mwānraqura airintivanto varura. Mwi nraakye gorahua qati varu entara Kotira qua nraakye qora timwa nyiqi vuvata mwia kyaara ru kyovata qutu vuvaro mwihua mwānraquravanto tainta mwia mwemwaqi varura.

¹⁰ Mwihua mwānraquravanto mwiqitairo aakyara ntero tiqaro, Nronrao, kepukyavant variaro. Uaqia hi inraikyaya hiama qio iqí vahiananrove. E avuqavuma kyera variqira vi variaravave. Mwatani varia nraakye gorahua tiri ru kyaavata tire mwaaqi varuro. Nataama enta nritarairarave e ko tiqara mwihua nkyiarivata rinanrave? tita.

¹¹ Mwitaa tuvaro egarori tuavaaqa ekyaa mwi mwānraqurahua nyinro tiqaro, Pataqia varivata haaru nkyi ru kyontema kyeta nkyi henahua ni qua riaahua mponramwuvata ru kyaate. Nte mwitaama mwitaama nraakye qora ru kyaate timwa tauhua qati variavo. Mwitaama kyaivaro Kotiva nkyi nramwutaahua nkyiarivata ru vuntuananrove, tiro.

¹² Mwitaa tuvana nte variqana taqaavararo sipisipi nraati mwiva qumeqo taaqau tora nampa 6 ntavahi kyovaro mwiaqatairo mwaturavanto nronraqama kyero tuvaro huari vuvanto aamanaqama viro vakora tavuna votima kyero entama viro vahuvaro toravanto vaisi nraanre votima kyero nraanrenrusi utu vura.

¹³ Mwitaa huvaro qovora aahoquravanto nyaamwusairo mwatani tumu nti tumu nti hi varuvaro togavanto kyatari qakyaama kyaisharo kyatari tamwa ahoravanto tumu nti tumu nti hintema kyero qovora aahoquravanto nyaamwusairo mwatani tumu nti varura.

¹⁴ Mwitaama vahuvana nte variqana taqaavararo pepaa ququra hintema kyero nyaamwuvanto ququramaqiro viro uro taiqa vura. Taiqovaro mwatani taqvianto nai vahura mwia kyero uro mpoqi mpoqi apiqama kyero vahuvaro kyaarerera utaqa vahuvva mwata mwiqianiva nai vahuarqatairo siviro uro mpoqi mpoqi vahura.

¹⁵ Mwitaa huvata mwatani varu nraakye gorahua vunyaa vaisinramwuantove, mphuaqaa ntaqikyi varuhuave, ntaqu vaisihuqaa ntaqikyi varuhuave, airi inraikya vatoihuave, nronra vaisive, mpo qara mpo qara hu nraakye gorahua karavu vaisive, qati varu vaisihuave, ekyaa mwihua nronraqama kye aatu hita ori ontamwuqive, mupiqive, ori hakaraukaqi vita nrifa uqetaaqetama vurave.

¹⁶ Mwi nraakye gorahua ora tatari taaqiara aakyara nteta tiqata, Ntuvuraavura hira tiriqaa ntumwaqu viraqe ugeta quare. Tainta nronraqa mwatakyaa viro variva tiri taqaakyorave. Sipisipi nraati mwivavata raraqa tairaro tiri taqaakyorave.

¹⁷ Qikye, Kotira raraqa tairaro ko qiari entava mate qovarama viho. Tavave mwate qio variananrove? tura.

Isareri nraakye qora 144,000 nramwuanra tura

¹ Nte Ioniva variqana taqaavata nyaamwunyaahua taaratana taaratana-vanto varura. Mpowanto mwata mwaa hini tokyasataa varuvaro mpovanto hini tokyasataa varuvaro mpovanto hini tokyasataa varuvaro mpovanto hini tokyasataa varura. Ekyaa mwihua varuntema mwisairo hia toqavanto mwatave, nramanri nronrave, kyatarive, tiraro qakyaa hiarive tita, mwini variqata toqa antua tetu varura.

² Mwinramwuhua mwini varuvana nte variqana taqaavaro nyaamwunyaava mpovanto huari vu nrinasairo nri ntero nai kyauquqi Kotiva qati variqiro vi variva nai nraakye qoraaqaa aaraa vataani inraikyara tu varero nrinro. Mwiva nriqanro nyaamwunyaahua taaratana taaratana Kotiva nyaamwuvata mwatavata uaqima kyaate tuhuara mwitaama tiro,

³ Nkyenramwu mwatavata, nramanri nronravata, kyatarivata, uaqima kyarera qiahua qati varivaqena nte nraante Kotira kyaiqa vaisi tiriqa aaraa vataqina vina uro taiqa kyaarita nkyeta vararerera ti kyaiqara mwia varaae tiro.

⁴ Mwitaa tuvana nte variqana riaavar Isareri nraakye qora 144,000 nramwu tiriqa aaraa vateqaro Kotira kyaama tovata varura. Isareri okyara 12 nramwu vahura. Nyaamwunyaava Isareriqaa aaraa vatarerera hiro:

⁵ Iutaara okyaraqitairo 12,000 nraakye qora mwatama tero
Ruveninra okyaraqitairo 12,000 nraakye qora
mwatama tero

Katira okyaraqitairo 12,000 nraakye qora mwatama tero

⁶ Asaara okyaraqitairo 12,000 nraakye qora mwatama tero
Napataraira okyaraqitairo 12,000 nraakye qora
mwatama tero

Manasaara okyaraqitairo 12,000 nraakye qora
mwatama tero

⁷ Simioninra okyaraqitairo 12,000 nraakye qora
mwatama tero

Rivaira okyaraqitairo 12,000 nraakye qora mwatama tero
Isakaara okyaraqitairo 12,000 nraakye qora
mwatama tero

⁸ Sepiuraaninra okyaraqitairo 12,000 nraakye qora
mwatama tero

Iosepira okyaraqitairo 12,000 nraakye qora
mwatama tero

Mpenisamininra okyaraqitairo 12,000 nraakye qora
mwatama tero mwitaamaqiro viro nyaamwunyaava
Kotiva nai kyaama teqaro aaraa vato inraikyara 144,000 mwihua tiriqa
vatovata varura.

Nronraqama kyeta nraakye qora ntuvantuuma tohuara tura

⁹ Mwitaa tuvana nte variqana taqaavata nraakye qora airivanto varura. Mwihua airintivanto varuvärora tiro, mpovanto mwihua kyaara ntumwa kyero mwitaa mwitaamavant variavo qiariva hia qioqa hora. wi nraakye qorahua ekyaa mpo mwatanaa mpo mwatanaave, kyokirave, eqarave, mpo mwata mpo mwataqinaa nraakye qorave, mpo qua mpo qua tu nraakye qorahuave, ekyaa mwihua tainta nronra mwia vuqaavata, sipisipi nraati mwia vuqaavata, sivita variqata eqarori tuavaaqa utute variqata ekyaa mwihua qatokya mwanre voti hora tuteta

¹⁰ paa tita tiqata,
Tiri mwanriqavanto Kotiva nai taintaqaa mwatakyaa

viro varivavata sipisipi nraati mwivavata
mwitanahua tiri huvantu timwa taavata
tire kyuqema kyeta qiomia varuro, tura.

11 Mwitaa tuvata ekyaa nyaamwunyaahua tainta nronra mwivavata,
24 vaisi nronranramwuvata, mwanraqura vahu inraikyara taaratana
taaratana varuhuavata, ekyaa mwihua vara ututuma kye sivita varita
mwiaqaatai mwihua mwataqi tumu ntita nkyiari siri mwataqi vatateta
nronra tainta vuqaa variqata Kotira qamwata mwateqata mwitaamaa tita:

12 Qutaave, nrivaqe

tiri mwanriqa Kotira nrutu tuaaheraare.

Mwia okyaravanto kepukeya okyarama vaiho.

Mwia vu nraatovanto kyuqe vu nraatoma vaiho.

Nrivaqe mwia nrutu nraahu tuaaheraqi viqata

mwiianra nraahu qamwataqita quare.

Mwia kepukeyavanto nritaraiharo

mwia kepukeyavanto ekyaa enta qati nraahu

vahiqiro quananrove, qutaave, tura.

13 Nyaamwunyaahua mwitaa tuvaro 24 vaisi nronra vaisinramwuqitairo
mpovanto ni kyaparama matero tiqaro, Nraakye qora mwaahua eqarori
tuavaaqa ututaahua tahuah tahuah, taisai taisaive nrumu variavo? tuvana

14 nte tiqana, Nronra vasio, e mwia ntapihiananrave, qiararo mwiva
tiqaro, Mwaa nraakye qorahua varuvaro nronraqama kyero muaanra-
vanto qovara huvata mwihua variqi vuvata mpo uhua mwihua anomia
kye uaqiamma nyatovata variqi vita mwaini nriahuave. Mwihua nkyiari
tuavaaqa sipisipi nraati nraanreqi hiqama kyorara tiro, mwihua tuavaaqa-
vanto takyuqu vihata variarave.

15 Mwitaa hi varia nraakye qorahua variarara titi, mwihua Kotira tainta
vuqaa variqata iheravata, entaqivata, Kotira kyaiqa varaqi viqata Kotira
nraamwuqi variqi vi variavaro tainta nronraqa mwatakyaa viro variva
mwihuaqaa ntaqikyiqiro vihata kyuqema kye variqi vi variarave.

16 Mwihua mwitaamaqi vi varivaro hia mwihua qaiqaavata nraman-
rive kyarave nraataa hiananrove. Mwihua varivaro huarivantove mpo
inraikyavanto mwihua mwamwanta itaari inraikyava hia vahiananrove.

17 Sipisipi nraati mwiva tainta utaqaa variva, mwiva mwihuaqaa
ntaqikyiqaro sipisipi qova kyuqeva nraantantamwa kyero variqaro mw-
ihua sitaqiro uro qati variqi quani nramanriva vahianinrani kyairata
nrevarave. Mwitaa hiraro Kotiva mwihua suqitairo nruqunru nruka
nyatairata mwi nraakye qorahua hia qaiqaavata ntatevarave, tura.

8

Qume voti hurago taaqau tora nampa 7 ntava hi kyorara tura

1 Mwitaa huvana nte variqana taqaavaro sipisipi nraati mwiva qume
voti hurago taaqau tora nampa 7 mwia ntavahi kyovaro mwiaqaatairo
nyaamwuni hia mpovanto qua tuvaro ekyaa inraikyavanto tirema kyero
vahiqiro vura. Pataqiara mwitaama vahuvana

2 nte taqaavata nyaamwunyaahua 7 nramwuvantoo Kotira vuqaa sivita
varuhua varuvaro ntoma 7 nramwu mwihua nyuvata varora.

3 Nyuvata varovaro nyaamwunyaava mpovanto nai kyauquqi kori taanu
tuvarero nrumu tainta mpo, kori tainta tataaga siviro varura. Mwi
taintaraqaa Kotira kyaiqa vara mwate varu taintava nronra tainta vuni
vahuvaro nyaamwunyaava mwiva kori taanu varero tainta mwia nraaqani
siviro varuvaro qia quara tairaro kyuqema kyero mwunta quani inraikyara
mpoqiaavata mwino tiqaro, Kotira nraakye qoravanto Kotirara aakyara nte

variavaro vi vari quaravatama kyera e mwaa inraikyara qia quaraante, tuvoro

⁴ nyaamwunyaava taanu tutoraqitairo qia munra kyuqe mwunta vuva viqaro Kotira nraakyе qoravanto Kotirara aakyara nteqa tu quavavata viqaro Kotira vuqaa vi varura.

⁵ Mwitaamaqiro viro uro munra taiqa kyero mwiaqaatairo nyaamwunyaava kori taintagaatairo qia ite varura, mwia vara kyero nai taanu piqa kyero mwi taanunra mwatani mwaamwi tuto kyora. Tuto kyovaro nyaanruva nruqua ti varuvaro nrotaara aaquakyaa ti varuvaro mwatura ti varurave.

Ntomanramwuanra tura

⁶ Mwitaamaqi vuvata mwiaqaatai nyaamwunyaahua 7 nramwuvanto ntoma 7 nramwu tuteta vuatarera tera hura.

⁷ Mwinramwuhuaqitairo mpovanto nraante ntoma vuata kyovaro kaapura vativantovata qjavitovata nraanre vatama kyero mwatani vati ntintema kyero tumu nti tumu nti hi varura. Tumu ntiro mwata mwaa taarampotanaqaa tukyama kyero mpo mwia mwatavata kyatarivata itamwa kyero omwa ahikyave mwukyau mwia ekyaa itamwa taiqa kyora.

⁸ Mwitaa huvaro mwiaqaatairo nyaamwunyaahua 7 nramwuqitairo nampa 2 vanto ntoma vuata kyovaro taaqi nronra qia ite varura voti hura nramanri nronraqi tuto kyora. Nramanri nronra mwipi tuto kyovaro ekyaa nramanri mwia tukyama kye taarampotana vahura taaratanavanto qati vahuvardo kuua mwiva vaisi nraanre nraantantamwa kyero nraanrenrusi utu vura.

⁹ Nramanri tukyama kye taaratana qati vahuvardo mpo mwipi vahu inraikyava ekyaa qutu taiqa vura. Nramanri mwipi nröhuhua sipivata kuua qarama tukyama kye taaratanaqii vahuvardo qati vahuvardo kuuaqii vahu sipiva taiqa vura.

¹⁰ Mwitaa huvaro nyaamwunyaahua 7 nramwuqitairo nampa 3 vanto nai ntoma vuata kyovaro mwiaqaatairo qovora nronravanto omwa cupi kyaiharo itaintema kyero iteqaro nyaamwusairo tumu ntiro tumu ora tatari taaqiqitairove rumwuqitairo vihata nrauna nramanrinra mpoqi mpoqi tumu ntiro. Qovora mwiva ekyaa nramanri tukyama kye taarampotana vatoraqitairo taaratana qati vahuvardo kuua mwipi tumu ntura.

¹¹ Qovora mwia nrutu *Ukaviva*. Mwiva nramanri tumu ntuvardo hini nramanri mwiva ekyaa uka vuvardo hini mwiva qati vahura. Nraakyе qoravanto ukavu nramanrinra nröhua mwihua ekyaa qutu nraahu vurama.

¹² Mwitaa huvaro mwiaqaatairo nyaamwunyaahua 7 nramwuqitairo nampa 4 vanto nai ntoma vuata kyovaro huarivantove, toravantove, qovora aahoquravantove, iteqaro taaratanaqaa tukyama tora mwisataa qati ite varuvaro kuua mwisataa ekyaa qipa viro hia itora. Qaatatoraqaa huarivanto hiniqi nraahu itamwaqiro viro hiniqi hia itovaro entaqivata tora qovora aahoquravanto hiniqi nraahu itovaro hiniqi hia itora.

¹³ Mwitaa huvana nte tuaahera kyena virini taqaavaroo memonra mpovanto virisata hitero nröhi variqaro aakyara ntero tiqaro, Po, po, po, nyaamwunyaahua taaramponramwuvanto hiama nkyiari ntoma vuataava. Po, mwinramwuhuaavata nkyiari ntoma vuata kyaivata mwatani nai uaqama kyeta varivarave, tiro.

1 Memonravanto mwitaa tuvaro mwiaqaatairo nyaamwunyaahua 7 nramwuqitairo nampa 5 vanto nai ntoma vuata kyovana nte variqana taqaavararo qovoravanto nyaamwusairo tumu ntiro mwatani vahuvaro mpovanto kiqa mwia mwunra. Mwi kiqava mupi, nai veva veva mwutukyani vu mupira qatuaraani kiqava vhura.

2 Kiqa mwuvardo qovora mwiva kiqa mwiaqotairo mupi veva mwutukyia kyokikina rura qatua kyovaro mwiqitairo qia munravanto nronraqama kyero nrivi varura. Nronraqama kyero qia itaiharo qia munravanto nrivi varintema kyero munravanto mwiqitairo nriviqaro huarivata nyaamwuvata ntumwaq kyovaro

3 qia munraqitairo kainyaqaqvanto qovarama viro mwatani vhura.

Kainyaqaq airivanto qovarama vita vahuvaro voravanto kutintema kyero kainyaqaqvanto kuturive tiro, kepukya nyinro tiqaro,

4 Nkye vihua hiama uro mwukyau omwa ahikyave kyanta kyatari qupiqaaniru toqeta uaqia hiraitita, nkye taqaivaror nraakye qora tiriqa Kotiva hia nai kyaama teqaro aaraa vataarihua mwihua nraahu kutuate.

5 Nkye mwi nraakye qorahua kyauquru torara kutuqita quate. Mwihua kutiqata hia mwihua ekyara ru kyairaitita, qati kutuqi quate, tuvata kainyaqaqvanto uro voravanto kutintema kyeta nraakye qora kutuvata nraakye qora nyamwantavanto mpinqama kyero nriqa vuvata variqi vrara.

6 Mwi entara nraakye qoravanto nronraqama kyero nriqa virata atura ntumwaqi virara rieqata mwihua qutuataa hirata qutirera hivarovata hia qioqa hiananrove. Qutira okyaravanto nyianratom uro vahiananrove.

7 Nte ruvaatakyaa taqaavata vaisivanto ntaqirero nai qosi nraamwuma kyero ekyaa inraikya terama kyero vataintema kyeta kainyaqaq mwihua varurama. Nkyiari qiaqaa tovaqa kori tovaqa voti hura quteta mwihua siri vahirero vaisi siri votima kye vahuvaro

8 mwihua qia kyaahivanto nraakye qia votima kyero mpuahaa vahuvaro mwihua aanraivanto raioni vairi aanrai votima kye vahuvaro

9 mwetokyani qaini voti horaqo nraamwuma tetu mwihua nraakye vanto nronraqama kyero nruqua tiqaro qosi airivanto vaisivanto ntaqirerata variavata ntanrau vare qua inraikyava nruqua tintema kyeta harahara ti varura.

10 Mwihua vora nraantantamwa kye varuvarovata mwihua raqani aanrai vhura mwiaqo nraakye qora kyauquru torara kutuqiro quariva vhura.

11 Kainyaqaqvanto mwitaama vahuvaro nyaamwunyaava mpovanto mwihuaqaa ntaqikyiqiro vi varura. Nyaamwunyaava mwiva nai mupi ve vaveva mwutukyara vuraqiqi ntaqikyi varuva mwia nrutu Hivuru quaqitairo tirero Apantonivave tura. Mwaa quaraqitai tirera Vaisi Taiqakye Varivave tita.

12 Qio riaate, kainyaqaqvanto mwatani varihua uaqiamaqiro quari entava taiqa viraro qaiqaa nraakye qora qoraqama nyataariva taara inraikya qatima vahiananro. Mwianra tirerave.

Nampa 6 vanto nai ntoma vuata kyorara tura

13 Nte variqana taqaavararo nyaamwunyaahua 7 nramwuqitairo nampa 6 vanto nai ntoma vuato kyovana nte mwiaqaatai riaa varo kori tainta Kotira vuqaa vahu taintara hini hini vitiqitairo qua tura.

14 Mwiqitairo quavanto nyaamwunyaava nampa 6 mwianra mwitaama tiro: Nyaamwunyaahua taaratana taaratana rupa taihata nramanri nronra Iuparetisipi varihua huvantu kyairata qati quate, tuvaro huvantu kyora.

15 Mwinramwuhua variqata mwi ihirave mwi torarave mwi entararave tire vekyaqa hiararo tiri huvantu kyairaqe qio mwi kyaiqara nraahu varaqi quare timwa kyeta, terama teta varuvaro mwinramwuhua huvantu kyovata mwihua mwatanu varu nraakyey qorahua tukyama kyeta taarampotanaqaa vateta taaratana qati kyeta kuaa mwiaqaa varu nraakyey qorahua ntuqutu taiqa kyarerera vura.

16 Mwihua ntaqu vaisihua varirerata airivanto ntaqu vaisihua qosi mwoqaaqaa varura. Airivanto 200,000,000 vanto variavo tuvana riavarara.

17 Nte ruvata taqamwaqi viqana vaisi mwihuavata mwihua qosivata taqaavarama. Mwi vaisihua mwetokyaaqaa ntumwaquto inraikyava qia auru votima kyero nraanreqahuva vahuvuvaro vakora vahuvuvaro qaamiantaqatova vahura. Mwitaama vahuvuvaro mwihua qosi qiatu vahirero raiion vairi qiatu voti huva vahuvuvaro qosi mwihua nyogitairo qiyantovata qia munravantovata oriqaatairo qia itovavata mwihua nyogitairo nritareqaro vi varura.

18-19 Qiavantovata qia munravantovata ori qia itovavata qosi nroqitairo nritara nritara hiqaro nraakyey qora ri varura. Mwihua qosivanto nai nroqitairo nraakyey qora ruqiro viqaro mwihua ru kyero nkyiari riqanaqovata nraakyey qora ri varura. Qosi riqana mwiva vahirero quiha qiatu voti huva vahuvuvaro mwiaqotairo nraakyey qora kuti varura.

20 Hini qati varu nraakyey qorahua, mwihua hia nkyiari qora inraikya qaqira kyaraita, nkyiari qora kyaiqa utura mwianra nraahu qamwataqita viqata varura. Mwihua mpo inraikya koriqotai utu teta, mpo inraikya munimqataoti utu teta, mpo ori mpo oriqotai utu teta, kyatariqo utu to inraikyava, ekyaa mwi inraikyava hia taqero riero nrohiro qakyaa hu inraikyava vahuvata nraakyey qoravanto mwi inraikyarara tiri mwanriqa utu taunanrave timwa kyeta, mwi inraikyara qamwata mwateqata vaananravata qamwataqita vura.

21 Nraakyey qoravanto mwitaamaqi viqata mwihua nkyiari vaisi ru kyora hia mwianra nronraqama kye riaraitita, nkyiari vaana kyaiqa vare varura hia qaqira kyaraitita, api qaraqita nrohura hia qaqira kyaraitita, mpuara varo kyaiqara hia qaqira kyaraitita, uaqia hi kyaiqara mwia qati nraahu utuvi varura.

10

Quqrama to mpukura pata mpukuara tura

1 Mwihua mwitaa hi varuvana nte variqana taqaavaro nyaamwunyaava mpo, kepukyavanto nyaamwusairo tumi varura. Mwia tuavaaqa vahirero tonamwu vahuvuvaro qiatani haunrikyavanto ututuma tero vahura. Mwia virivanto vahirero huarivanto itaintema kyero ite varuvaro mwia kyuqutanavanto qia auru nraantantamwa kyero ite varura.

2 Nyaamwunyaanra mwamwantavanto mwitaama vahuvuvaro nai kyaququqi pata mpuku iri kyero tu varero tuminro nai kyuqu tuananra kyaarerera nronraqa vatero nai kyaantaaqa kyuqu mwia mwataqaa vatero.

3 Mwiaqatairo mwiva aakyara ntamwa kyero vairi raioni qua taanaanra tuvaro nyaanruva 7 nani nronraqama kyero qua tura.

4 Nyaaanruva mwitaa tuvana nte variqana nyaanruva qua tura mpukuqi qara ntirera hiavarro nyaamwusairo qua mpovanto tiqaro, Nyaaanruva 7 nani ti quara mwini uqeta kyaante. Hia mwi quara qara ntumwa taante, tiro.

5 Mwitaa tuvana nte variqana taqaavaroo nyaamwunyaava nai kyuqu hini nramanriqaa vatero hini mwataqaa vatova, mwiva nai kyauqu nyaamwuni tuaahera kyero

6 Kotira nrutu ntero tiqaro, Kotiva ekyaa enta qati variqi vi varivave. Mwiva nyaamwuvata ekyaa nyaamwuni vahi inraikyaratava utu kyero vatero, mwatavata ekyaa mwataqaa vahi inraikyaratava utu kyero, nramanri nronravata ekyaa inraikya nramanri mwipi vahiravata utu taivave. Nte Kotira nrutu nteqana mwaa quara qutaa qua nraahu tirerave. Kotiva nai utirera qiani kyaiqara hia vari kyero utuananrove.

7 Nyaamwunyaahua 7 nramwuqitairo nampa 7 vanto ekyaara variva, mwiva nai ntoma vuata kyairaro Kotiva nai uqeta tai quara taiqa kyaananrove. Mwiva mwi quara nai kyaiqa vaisi poropeti vaisi haaru timwa unyurave, tiro.

8 Mwiva mwitaa tuvaro nyaamwusairo quavanto, vaakya riaava quava qaiqaa nianra tiqaro, Nyaamwunyaava siviro nai kyuqu mpo nramanri nronraqa ntamwa tero mpo mwataqaa ntamwa taira kyauquqitaira pata mpuku ququrama taira iri kyaira varaante, tuvana

9 nte nyaamwunyaanra mwia uro mpuku mwianra mpiante qiavaro mwiva nianra tiqaro, Mwaa mpukura vara kyera nraante. Mwi mpukura i vikyokyaqi viqaro qoraqamama uka quananrove. E mwi mpukura nroqi nrainranro kyaaqavanto viti hintema kyeroma viti hiananrove, tiro.

10 Mwitaa tuvana nte mwia kyauquqitaina mpuku mwia vara kyena nraavarave. Nte nroqi nreqana taqaavaroo mwi mpukura kyaqa votima kyero viti huvana nte nrapitama kye taqaavaroo ni pikyokyaqitairo mpogama kyero uka vurave.

11 Nte mwi mpukura nramwa taiqa kyaavaroo ni timwa mpiro tiqaro, E qaiqaavata Kotira mwakyaakya qianta. E ekyaa mwatananave, eqara vaisi upi vaisi mpo mwatanaa mpo mwatanaave, mpo qua mpo qua ti vari nraakye qorahuave, mwatanan vunyaa vaisi variahuave, ekyaa mwihua mwihua Kotira qua qovarama kye timwa nyiante, tiro.

11

Kotira qua timwa nyiqi vi vari vaisitanahuara tura

1 Mwiva mwitaa timwa kyero kyairiqa mpinqia ni mpiro tiqaro, Sivira kyairiqaqtaira uro Kotira nraamwu mwatamā kyera, quara vahi aasau ru kyeqata qia quara mwate varia taintara, mwivata mwatama kyera, nraakye qora Kotira nraamwuqi variqata mwia nrutu tuaahere variahu, mwihua kyaara ntumwa kyaante.

2 Kotira nraamwu mwateqarama hiama nraamwu vara ututu vahiarai mwatukyara mwataante. Mwi mwatukyara qati kyairata nraakiara mpo mwatanaa qumina mwatanaa, hia Kotira qua rie mwatanaahua mwi mwatukyara ntevarave. Mwihua taarampo ihi 6 tora variqi viqata Kotira mwatukya kyuqera ntamwaqi vi varivaro

3 Kotiva nai qua timwa nyi vari vaisitanahuua sitairata mwitanahuua ua tuavaaqa ututefa Kotira mwakyaakya mwi entara 1,260 enta variqi viqata timwaqi vivarave.

4 Kotira qua timwa nyiqi vi vari vaisitanahuua oripi kyatari votima kyeta varivarave. Mwatani omwa taaratana Kotira vuqaa cupi kyero vataira, vaisi mwitanahuua omwa mwitana votima kyetama varivarave.

5 Nraakiara mwi entaraqaa mwitanahuua varivaro mpovanto mwitanuaqiamma nyatarera uti varirera, mwitanahuua nyocqitairo qiaavanto qovara

hiro mwihua itamwa tatoqa kyaananrove. Mwitanahua mwitaama kyeqatama nkyiari nramwutaahua rivarave. Tahuu tahuuve mwitanahua qoraqama nyatarera utivera, mwitanahua mwitaama kyeqata mwihua taiaqita vivarave.

⁶ Mwitanahua mwi entaraqaa Kotira qua timwa nyiqi vi varivaro mpo kepukya mwitanahua nyinrata mwitanahua qioma nyaamwu tita taivaro hia vati ntuananrove. Mwitanahua varivaro mpo kepukya nyinrata mwitanahua qioma nrumbu nramanri mpohira tuqasaa kyaivaro nraanre nramanri utuquananrove. Mwitanahua varivaro mpo kepukya nyinrata mwitanahua qiove tivera, nkyiari kyakya hianinraqaa mwatani varihua ntututivata mpo qara mpo qarama kyero nriqa quani inraikyara varevarave.

⁷ Mwitanahua Kotira qua timwa nyiqi vivaro mwiaqatairo mupi veva veva mwutukya viraqitairo qaakyau vairi voti hiariva mwiqitairo qovarama viro uro mwi vaisitanavata ntaquqiro viro mwitanahua ru kyaananrove.

⁸ Qaakyau vairi voti hiva mwitanahua ru kyairaro mwitana mwamwantavanto mwatukya nronra mwipi aaraqaama vahiananrove. Mwi mwatukyaraqi haaru mwitanahua vunyaa vaisi kyatariqa ru kyorave. Mwi mwatukyara mpo nrutu mwiqata Sotomive, Isipive, tivarave.

⁹ Mwiva mwitana ru kyairaro mwitana mwamwantavanto aaraqaa qati vahirata ekyaa mpo mwatanaa mpo mwatanaahua eqarave upivantove, mpo qua mpo qua tihua mwitanahua mwamwanta nrumu taqeta tigata, Mwitanahua mwamwanta qati kyaivaro vahiarive. Hiama mwitana mwamwanta quntaate, tivaro mwihua mwamwantavanto taarampo iheravata mpo ihera hinivata qati aaraqaa vahiananrove.

¹⁰ Mwi entara mwitanahua mwamwanta aaraqaa qati vahirata mwatani varihua mwitaama tivara, Mwiva mwia ru kyaihata mwianra tirevata qamwateqatama varuro. Mwitanahua qati variqata tiri nronra muaanra timwiavata uaqima kye variqi vi varunranrave, tivarave. Mwatani varihua mwitaa timwa kyeta qamwateqatama ihi timwaqi viqata kyarave, mpo inraikyave, nai mwi nai mwimaqi vivarave, tiro.

¹¹ (Nyaamwusairo quavanto nianra mwitaama kyero nraakiara qovara hianinranra ni timwa impuvana nte Ioniva ruvaata votima kyena variqana taqaavaro) mwi vaisitana mwamwanta taarampo entavata mpo ihera hini entavata aaraqaa qati vahuvaro mwiaqatairo Kotiraqatairo nraihovanto mwi vaisitanahuaqi uvata mwitanahua sivita varuvata nraakye qoravanto mwitanahua taqovaro nyaatu qatovata aatu hiqata varura.

¹² Mwihua aatu hi variqata mwihua ri ovaro nyaamwusairo quavanto paa tiro mwitanahuara tigaro, Mwaini nriate, tuvata mwitanahua tonamwuqi nyaamwuni vi varuvata mwitana nramwutaahua mwihua taqe varuvata nyaamwuni vura.

¹³ Mwitanahua nyaamwuni vuvaro qamwanrama kyero mwaturavanto nronraqama kyero tura. Mwatura nronraqama kyero tigaro mwi mwatukyara kyauqurutanaqa tukyama kyero 9 qati kyero kuaa mwia taiqa tuto kyero. Mwi mwatukyara taiqa tuto kyero nraakye qora airinti 7,000 nraakye qora ru taiqa kyora. Nraakye qora airinti ru taiqa kyovata qati varu nraakye gorahua mpoqama kyero nyaatu qatovata aatu hi varita tigata, Qikye, Kotiva nyaamwuni varira okyaravanto kepukya okyarave, tura. (Mwitaal tuvana nte ruvaata taqeqlana mwi inraikyara mwi inraikyara taqaavarave. Ekyaa mwi inraikyava nraakiara qutaa qovara hiananrove.)

¹⁴ Nraakiara mwatani varihua anomia kyeta uaqima vita vari entara taara entara qara ntumwa taurave. Rie varivaqena nronra enta nampa 3 entara timwa nyianri.

Nyaamwunyaava nampa 7 vanto ntoma vuata kyorara tura

15 Nte ruvaata taqaavaro nyaamwunyaava 7 nramwuqitairo nampa 7 vanto ekyaa varuva ntoma vuata kyovaro nyaamwusaairo quavanto nronraqama kyero tiqaro, Mwaa entaraqaatairo Saataaniva tumifarairaro tiri nronravantovata mwiva titai vaisivavata nritareta mwaa mwataraqaa ntaqikyiqita vivarave, tiro.

16 Quavanto mwitaa tuvata nronra vaisi 24 vaisinramwu Kotira vuqaa nkyiari taintaqaas nkyiari taintaqaas mwatakyaa vita varuhua, mwihua mwi quara rieta mwiaqaatai mwihua mwatasata tumu ntita nkyiari siri mwatani vateta Kotira qamwata mwate varita tiqata,

17 Nronravanto, e kepukyavanto variqara
ekyaa inraikya nraatara kyera variaravave.

E qati variqira vi variaravave.

Haaruvata e qati variqira vi varuravave.

E kepukyaqqa hiqara nraakye qoraqaa ntaqikyirera
uti variarata tire iara qamwateqa varuro.

18 Mpo mwatanaa mpo mwatanaahua raraqa tovata
variqi vu entava taiqama viho.

Mwaa entara i raraqa tairara

variqira vira entavama nri ntaiho.

Mwaa entara e qutu vihua ko tira entavama nri ntaiho.

I kyaiqa vaisi poropeti vaisivata,

ekyaa i nraakye qoravata, nronra vaisive pata vaisive,
iara nronraqama kyeta

rie vari nraakye qorahua varivara

mwaa entara e mwihua qamwata nyateqara

e mwihua nkyiari kyoqaa nyina entava nrintaiho.

Mwaa mwatara uaqima kyaahua varivara e mwihua
nkyiarivata uaqima kyera entavama nri ntaiho, tura.

19 Mwihua mwitaa tuvaro Kotira nraamwu nyaamwuni vahu
nraamwunra gesavanto qatua viro vahuvana nte taqaavaro Kotiva
nraakye qora kyapata kuaaqi variate timwa to quara vokuheqi nraamwu
mwiqi vahura. Mwiqi vahuvaro mwiaqaatairo aaquakyaavanto mpo uti
varuvaro nyaanruva nruqua ti varuvaro mwatura ti varuvaro kaapura
vati nti varurave.

12

Nraakyeravata, evari voti huru nronra qumina inraikya qaakyau inraik-yaravata, tura

1 Mwitaamaqiro vi varuvana nte Ioniva variqana taqaavaro nyaamwuni
nai nraahumwa mpo qara hu inraikyava qovarama viro vahura. Nraakye
mpovanto mwini varuvaro mwia tuavaaqavanto vahirero huari vu nraahu
vahuvaro mwia kyuqu mwemwani toravanto vahuvaro mwiva qiataqaa
qvora 12 nramwu tovaqa quitaantema kyero qutero varura.

2 Mwi nraakyeva nraaqiara tuaqa huva nraaqiara mwatarera hiro atura
ntiqraro kye kye timwaqiro vura.

3 Mwi nraakyeva nyaamwuni varuvaro nai nraahumwa mpo qara huva
mpo inraikyavantovata nyaamwuni varura. Mwini qaakyau inraikya evari
voti huva qaqira quitaava mwia qiata 7 nramwu vahuvaro kyaava 10
nramwu vahuvaro ekyaa nai qiata kuaiqia kuaiqiaqaa nronra vaisi tovaqa
qutero varura.

4 Mwi inraikyava nyaamwuni variqaro nai riganaqotairo qovora aa-
hoqura kuaasataa vahura ntupi kyero mwatani kyero qovora aahoqura

taarasataa vahura qati kyora. Qaakyau inraikya, evari voti huva nronra qaqaqutaava, mwiva uro nraakye vuni siviro variqaro mwiva nraaqiara mwata kyairage nraankye timwa kyero varura.

5 Varuvaro nraakye mwiva qoraisi nraaqiara mwata tovaro nraaqiara mwiva nronra tuemwa viro qaini kyaamwu tuteru variqi viqaro ekyaa mwatanaaqaqa ntaqikyiariva varuvaro qaakyau inraikya mwiva nraaqiara mwia ru kyero nranrenra huvata nraaqiara mwia ntavihi kyeta uro Kotiva nai taintaqaqa varunani kyora.

6 Mwia nraaqiara ntavihi kyeta varaqita uro kyovaro mwi nraakyeva hiantero qumina mwatanani Kotiva mwi nraakyerara rieqaro terama kyero vatonani vuva uro mwini variqaro 1,260 enta variqi uvata mwiaqaa kyuqema kyeta ntaqikyiqi vuvaro varura.

7 Mwi nraakyeva mwini varuvaro nyaamwuni ntaquva nronraqama kyero qovara hura. Qovarama uvuvaro nyaamwunyaava nronravanto, Maikerivavata nyaamwunyaahua mponramwuvantovatama kyeta qaakyau inraikya evari voti hora mwiaqatama kye mwia kyuquqaa vitinto vaanahua mponramwuvatama kye ntaqura.

8 Ntaquvaro Maikerivavata nyaamwunyaahua mwia kyuquqaa vitintohua kepuqyaqama kye ntaquqi vita qaakyau inraikya evari voti hora mwiavata, mwia kyuquqaa vitintohua mwihuvata, nraatara kyora. Mwihua nraatara kyero qaakyau inraikya mwianra tiqaro, E hiama qio mwaini nyaamwuni varinanrave, Nyamwunyaahua i kyuquqaa vitintaahua, mwihuvata hiama qio mwaini varivarave, tiro.

9 Timwa kyero qaakyau inraikya evari voti hora mwia nyaamwusairo mwata mwaini mwaamwi tuto kyorave. Qaakyau inraikya evari voti huva mwiva haaruaa qarura mwia nrutu Nramwutaavave Saataanivama variro. Saataaniva ekyaa mwata mwaqaq variahua unra qua timwa nyi varivama variro. Mwiavata, nyaamwunyaahua mponramwuvantovatama mwia kyuquqaa vitintohuvata, nyaamwusairo mwatanani vara mwaamwi tuto kyorave.

10 Tuto kyovana nte variqana riaavaro nyaamwusairo quavanto mwitaama tiro:

Mate Kotiva nraakye qora huvantu nyataani entava
nri ntaiho.

Kotiva kepuqyaqama kyero nraakye qoraaqa
ntaqikyiqiro virerove.

Kotiva titai vaisiva, mwivavata mate nronraqama viho.
Mwitanahua Saataaninra nyaamwusaita
vara mwaamwi tuto kyaarave.

Saataaniva mpo enta mpo enta Kotira vuqaa variqaro
tiri qata vakyaahuqaa qua vatarera uti varira
mwitanahua mwia vara mwaamwi tuto kyaarave.

11 Tiri qata vakyaahuqaa Saataaninravata ntaquqi viqata
sipisipi nraati mwia nraanreqo

Saataaninra nraatara kyaarave.

Mwihua Kotira qua timwaqpi viqata
Saataaninra nraatara kyaarave.

Mwihua Karaisirara rieqata hia nkysiari mwataqaa kyuqema
varirara nronraqama kye riemwaqi viraitita,
hia aatu hiraitita, qiomma qutu quananrave timwa kyeta,
mwihua Saataaninra nraatara kyaarave.

12 Mwihua mwitaamaqi viqata

Saataaninra nraatara kyaarara tita,
nyaamwuvantovata, nyaamwuni variahuvata,
nkye mwihuara qamwateqata variate.

Nte mwataravata nramanri nronranravata po tuqo.
 Saataaniva mwini variqaro mwiva ntapihi kyaiharo
 mwiva taiqaari entava qaumaqa iharora tiro,
 nai mwia mpoqama kyero raraqa te variharo variho, tiro.

13 Nyaamwusairo quavanto mwitaa tuvana nte taqaavaro qaakyau
 inraikya evari mwia vu nraato ntapihi vuvaro mwiva tiqaro, Qikye ni
 varwa mwaamwi kyaavanama mwatani varuqo, timwa kyero mwiva siviro
 nraaqiara mwatato nraakyera, mwia vataqiro rirero uti varura.

14 Evari nronra uaquia huva mwia vataqiro rirera uti varuvata nraakyae
 mwia kyaahaqa hiqata mwianra rieqata mwata terama tonani hia vaisivata
 varunani quminasata hitero uro taarampo ihivata hini ihivata variraro
 evarivantove qaruravantove mwia hia ruarive tita, memonra nraaokya
 taaratana mwunra.

15 Mwuvaro nraakyevanto hiante vi varuvaro qaruravanto nai nroqitairo
 nramanri vihi kyovaro mwii nramanri humwunru votima kyero nteqaro
 mwii nraakyera vataqiro viqaro mwia raaqu kyarerera huvaro

16 mwatavanto nraakyae mwia kyaahaqa hiqaro nai nro qaqaama kyero
 nramanri mwia nramwa taiqa kyero.

17 Nramanri nramwa taiqa kyovaro evarivantove nraakyae mwianra raraqa
 tovaro mwiva mwia nraaqiara hini uhuavata ntaquariva viro. Mwiva uro
 Kotira qua riohuavata, Karaisiva timwa nyu quara riohuavata, ntaqirero
 vura.

18 Ntaqirero vuva uro evari voti hiro qarura voti huva kyaarerera nronra
 tokyanii siviro varura.

13

Qaakyau vairi voti huva kyaarerera nronraqitairo qovarama vurara tura

1 Nte variqana ruvaata taqe variavaro kyaarerera nronraqitairo qaakyau
 inraikyavanto qovarama viro. Mwi inraikyaya vahirero kyaava 10
 nramwu mwia mwamwantaqaa vahuvaro mwia qiatu 7 nramwu vahuvaro
 mwia kyaava mpoqaa mpoqaa nronra vaisi tovaqa vahuvaro mwia qiatu
 mpoqaa mpoqaa Kotirara uaquia hi quara tu nrutuva vahura.

2 Nte taqaavaro mwi inraikyaya qaakyau vairi, *repaati* vairi voti huva
 vahuvaro mwia kyuquvanto aasau *mpea* kyuqu voti huva vahuvaro mwia
 nrovanto vairi *raioni* nro votima kyero vahura. Mwi inraikyaya qaakyau
 vairi votima kyero varuvaro evari nronra mwiva nai mwia votima kye
 variarive tiro, mwia vara nronraqama kyero nai kepukya okyara mwia
 mwirno nai ntaqikyu kyaiqara mwia mwunra.

3 Qaakyau inraikya evari mwiva nai kepukya qaakyau vairi mwia mwu-
 vanra nte taqaavaro mwi inraikyara qiatu mpo teqa kyovaro qauma qutu
 quariva vahuvarovata qaiqaa tavanta viro qio vahura. Mwia qiatu mpo-
 vanto qutu quataara vahuvaro tavanta vuvvaro qati variqiro vi varuvatara
 tita, mwatani varuhua nrihanrama vita mwi inraikyarara kepukyavantove
 timwa kyeta, mwia vataqi vi varura.

4 Evari qora inraikya mwiva nai kepukya qaakyau vairi voti hora mwia
 mwunranra tita, mwatani varu nraakyae qorahua qaakyau vairi mwia
 nrutu tuaahera kyeta tiqata, Qaakyau vairivantove nraataraarivama variho.
 Hia mpopvanto mwia nraatara kyaananrove, tura.

5 Mwi entara Kotiva qaakyau vairi mwia qati kyovaro mwiva nron-
 raqama viro variqaro 42 tora variqiro viqaro Kotirara mwaqqau uaquia hi
 quara timwaqiro vi varura.

6 Mwiva nai nro qaqamaa kyero Kotirara uaquia hi quara tiro, mwia mwatukyaravata uaquia hi quara tiro, ekyaa nyaamwuni varuhuaravata uaquia hu quara timwaqiro vi varura.

7 Mwitaa timwaqiro vi varuvaro Kotiva mwia qati kyovaro mwiva Kotira nraakye qoravata ntaquqi viro mwihua nraatara kyora. Mwiva mwihua nraatara kyero qaakyau vairi voti huva, mwiva nronraqama viro ekyaa mpo mwatanaa mpo mwatanaahua egarave, upive, ekyaa mwatanaa mpo qua mpo qua ti varuhuave, mwiva ekyaa mwihuaqaa ntaqikyiqiro vi varura.

8 Nte ruvaatakyaa mwi inraikyava nraakiara qovara hianinra taqaavarave. Nraakiara ekyaa mwatani varihua mpo mwatanaa mpo mwatanaavanto qaakyau vairi mwianra qamwataqiqi viqata mwia nrutu tuaaherevarave. Haaru mwata mwaa hia ututo entara Kotiva nraakye qora nrutu mpukuqi qara ntumwa tohua, mwihua nraahuma vairi nrutu mwia hia tuaaherevara. Mpuku mwia qati variqi vihua nyutu vatai mpukuva vaharo haaru sipisipi nraati ru kyova, mwivama mwi mpukuraqaa ntaqikyiqiro variro.

9 Nkyi su nyaato vahirera, nkye mwaa quara okyarara vu nraato tita ntapihiata.

10 Mwia ntavaaqavu kye rupate vaisiva varirata mwihua mwia ntavaaqavu kye rupa kyevarave.

Paipaqtaita mwia rukye vaisiva varirata mwihua mwia paipaqtaita ru kyevarave.

Mwihua mwitaamaqi vivata nkye Kotira nraakye qoravanto Kotirara riemwaqita vira kepuuyaqama kyeta tutaata.

Qaakyau vairi voti huva mpovanto mwataqitairo qovarama vurara tura

11 Nte variqana ruvaata taqaavarao qaakyau vairi voti huva mpovanto mwataqitairo qovarama vura. Vairi mwia kyaava taaratana sipisipi nraati kyaavatana voti huva mwia mwamwantaqaa vahuvaro evari qora inraikya mwia qua votima kyero tura.

12 Mwia quavanto mwitaama vahuvaro qaakyau vairi mwiva nronraqama viro vuni varura qaakyau vairi mwia kyaiqa nraahu vararero variqaro mwia kepuuya kyaiqa okyara vareqaro ekyaa mwatani varuhuaqaa ntaqikyiqiro viqaro vuni varu vairira mwia qia teqa kyovaro tavanta vuvuro qati varura, mwianra kepuuyaqama kyero tiqaro, Nkye mwia nrutu nraahu tuaaheraqita quate, tiro.

13 Mwitaa timwa kyero nraakiara qovara huva qaakyau vairi mwiva variqi viqaro nronra kyaiqa nraahu vare variqaro nraakye qora suqaa variqaro mwiva tuvaro nyaamwusairo qiatavanto mwatani tumuvata nraakye qora taqora.

14 Mwiva vuni varu vairira kyaahaqa hiqaro nronra kyaiqa varaqiro viqaro nraakye qora unra utu kyovatara tita, nraakye qora mwatani varuhua mwianra qamwataqiqi viqata vuni varu vairira, mwia qia teqa kyovaro tavanta vura, mwia nrutuvanto viriniqa hiarive tita, mwanraquhave mwanrahavet utu mwatora.

15 Nraakye qoravanto vuni varu vairira mwia mwanraqura utu tovaro nraakiara qovarama vuva qaakyau vairi mwia Kotiva qati kyovaro mwiva nai nraaiho vuata kyovaro mwanrahavanto qakyaa hiro qua tiqaro varuvata nraakye qora mpo uhua mwia nrutu hia tuaaherohua varuvaro mwanraqura ututo inraikyava mwiva mwihua qio ru kyaariva varura.

16 Mwanraquravanto mwitaama vahuvaro nraakiara qaakyau vairi qovarama viro varuva variqaro ekyaa nraakye qora nronra vaisive, pata vaisive, airi inraikya vatohuave, hia airi inraikya vatohuave, karavu vaisive, qati varu vaisihuave, mwiva mwihua kepuuyaqama kyero

tiqaro, Mwaa nampaara nkyeta kyauqu tuananranivata, nkyeta tiriqvavata, vataate, tuvata nkyiari kyauqu tuananranivata tiriqvavata nampaa vatora.

17 Qaakyau vairi mwia nampaave, mwia nrutuve, hia varo vaisira mwianra qaoqama tovaro mwi vaisiva hia qio kyoqaama kyero mpo inraikya varero hia nai vato inraikyara nyiqanro munima varorave.

18 Tiri tivu tinraato kyuqema kye vahirera, tire qioma qaakyau vairi mwia nampaa okyara ntapihiananrave. Mwi nampaara okyara vahirero vaisi nrutuma vahiro.

Nampa mwia vahirero 666.

14

Taaqi Saioniqaa ntuvantuama vita varura taqorara tura

1 Nte variqana ruvaata taqaavarso sipisipi nraati mwiva taaqi Saioniqaa siviro varuvata mwia kyapata 144,000 nraakye qora varuvaro mwihua tiriqaa sipisipi nraati nrutuvata mwia qora nrutuvata qara ntumwa tovata varura.

2 Mwihua mwini varuvana nte variqana riaavarso nyaamwusairo quavanto nramanri nruqua taarave, nyaanruva nruqua tintema kyero, ti varura. Nte riaavarso vaisi airivanto kitaa ntuvavarso nruqua tintema kyero qua ti varuvata

3 nraakye qora 144,000 airivanto sivita variqata Kotira tainta nronra vuqaa variqata, mwihua qati variqi vi varu inraikyara taaratana taaratana suqaa variqata, mwihua 24 vaisi nronranramwu suqaavata variqata, qaraakya ihi timwaqita vi varura. Sipisipi nraati mwiva mwihua mwatasairo huvantu nyatorara tita, 144,000 nraakye qora mwihua nraahu mwi ihira timwaqi vi varura. Mwihua nraahu mwi ihira riovata mpohua hia mwi ihira riöra.

4 Vaisivanto hia nraakyevata nrohintema kyero mwi nraakye qorahua Kotirara nraahu riemwaqi viqata sipisipi nraati mwiva taini virera hunani mwi nraakye qorahua mwia nraahu vataqita vi varura. Mwatani varu nraakye qorahuaqitairo mwihua nraante huvantu kyero sitaqiro uro Kotiravata sipisipi nraativata mwitanhua nyunra.

5 Uro nyuvata mwi nraakye qorahua hia unra qua timwaqi vuvaro hia mpo quavata mwihuqaa vahuvata kyuqe kyaiqa nraahu vare varuhua varura.

Nyaamwunyaahua taaramponramwu taqorara tura

6 Nte Ioniva qati nraahu ruvaata taqe variqana taqaavarso nyaamwunyaava mpovanto nyaamwu virisata hitero vi varuvaro Kotiva mwia titero uro mwatani varihua mpo mwatanaa mpo mwatanaahua egarave, upive, ekyaa mpo qua mpo qua ti variahuate, mwihua kyuqe mwakyaakya ekyaa enta qati variqi vi quara timwa nyiante timwa kyero mwia titovaro mwiva nyaamwu virisata nrohiqaro

7 paa tiro aakyara ntero tiqaro, Kotiva nraakye qora ko qiai entava nri ntalhatara tita, nkye Kotirara aatu hiqata mwia nrutu tuaaheraate. Mwiva nyaamwuvata, mwatavata, nramanri nronravata, rumwu nramanrivata, utu tairave. Mwia nraahu qamwata mwateqata tiri mwanriqavanto variho, qiate, tiro.

8 Mwitaa tuvaro mwia nraakiara nyaamwunyaava mpovanto mwia nraakiara viqaro mwitaama tiro, Papiróni mwatukyavanto taiqama viho. Mwi mwatukyaya uaquia hi kyaigara nraahu utuqi viqaro ekyaa mpo mwatanaa mpo mwatanaahua ni uaini nraate tuvata mwihua nreqata mwihuavata api qaraqita vi varurave, tiro.

9 Mwitaa tuvaro mwitanahua nyaakiara nyaamwunyaava mpovanto mwitanahua sataqiro viro paa tiro aakyara ntero tiqaro, Vaisi mpovanto qaakyau vairi qamwata mwateqaro ni mwanriqave timwa kyero, mwia nampaapaa nai tiriqaave, nai kyauqu tuananranive, vatairera,

10 Kotiva mwi vaisirara mpogama kyero raraqa tairaro mwianra ni uaini nreqanro ni raraqa taani okyarara taqaananrovema qiananro. Kotiva hia qihaakyama kyero mwi vaisira ru mwataananrove. Kotira mpogama kyero raraqa tairaro uaqama kyero mwi vaisira ntuqutu mwataananrove. Kotiva mwi vaisira ntuqutu kyairaro mwiva nyaamwunyaahua kyuqeheua suqaavata sipisipi nraati mwia vuqaavata variqaro nronraqama kyero qia itaaninraqi nriqintuna uka quani qjawa itaaninraqi variqiro viqaro nronraqama kyero atura ntqaro variananrove.

11 Mwiqi variqiro viraro mwi qjawa hia qiparaitiro, qati nraahu ekyaa enta itamwaqiro quananrove. Mwiqi varihua ekyaa enta itamwaqiro quananrove. Nraakte qora qaakyau vairivata mwia mwanraquhavata qamwata mwateqata tiri mwanriqave tiqata mwia nampaavata varehua, mwihua entaqi ihera nronraqama kye qia itaaninraqi hia tekyavata ihua ekyaa enta atura ntqata variqi vivarave, tura.

12 Mwi quara rieqanama nte Ioniva nkijira tiqana, Nkye Kotira nraakye qora variqata kepuqyaqama kyeqa Kotira qua riemwaqita quatema, tuqo. Nkye Iesusirara nraahu nraato tuqi quaterama, tuqo.

13 Qio nyaamwunyaava mwitaa tuvana nte variqana riaavarao nyaamwsairo quavanto nianra mwitaama tiro, Mwaa quara qara ntumwa taante. Mate mwaa entaraqaatai nraakye qoravanto Kotira kyaiqa varaqi vita qutu vihua varivaro Kotiva mwihua kyuqema nyataananrove, tiro.

Nyaamwunyaava mwitaa tuvaro Kotira mwanraquravanto tiqaro, Qutaama qiaro. Mwi nraakye qorahua muaanra varaqi vira qaqira kyeta uro tekyu hivarave. Mwihua vare kyaiqava kyuqe kyaiqa vahianinranra titi, mwi kyaiqaravata vare vihua uro nyaamwuni tekyu hivarave, tiro.

Mwataqaatairo kyara vanturara tura

14 Mwitaa tuvana nte variqana taqaavarao tonamwu turomunra vahuvaro mwiaqaa mpovanto mwatakyaa viro varura. Mwia viri vahirero nte mwatani mwataatai nraaqiarava varuqo tu vaisira viri voti huva vahuvaro qiatagaai korai tovaqa qutero kyauquqi paipa mpogama kyero vahora tutero varura.

15 Varuvaro mwiaqaatairo Kotira nraamwuqitairo nyaamwunyaava mpovanto veva ntero iro tonamwuqaa mwatakyaa viro varu vaisirara aakyara ntero tiqaro, E kyara vantira entava nri ntaiho. Ena paipaqtaira kyara vantu varera nriante. Mwatani kyaravanto naitarama viho, tiro.

16 Mwitaa tuvaro tonamwuqaa mwatakyaa viro varu vaisiva nai paipa tuto kyero mwatani vahu kyarara teqa kyero vantura.

17 Mwiva mwitaa hvuna nte variqana taqaavarao Kotira nraamwuqitairo nyaamwunyaava mpovanto veva ntero mwivavata nai kyauquqi paipa mpogama kyero vahora tutero varura.

18 Mwiva veva ntero varuvaro nyaamwunyaava mpovantovata qiaqaa ntaqikyi varuva, mwiva Kotira qamwata mwateqaro qia quara to tain-taraqaatairo nri ntero nyaamwunyaava paipa vahora tutorara aakyara ntero tiqaro, Ena paipaqtaira mwatani ito uaini tutera mwia tamwa ekyaa teqa vare nriante. Mwi tamwava keko timwa viho, tiro.

19 Mwitaa tuvaro nyaamwunyaava mpovanto mwatani nai paipaqtairo uaini tamwa teqa kyero varero Kotiva uaini tati kyegaro vataani tanunraqi tuto kyero. Tuto kyovaro mwi tanuva vahirero Kotira mpogama kyero raraqa to tanuva vahuvaro

²⁰ mwipi tuto kyovaro uaini tamwa mwia tati varuvaro mwi tanuva nronra mwatukya mwaqaani vahuvaro mwipitairo tatito nramanriva nraanrevanto viqaro humwunra nramanri votima kyero nai nyianra 300 kiromitaa uto taiqora. Vaisi mwamwanta ekyaa nrpitama kyero qiaa nraahu qoqaa vahi nramanrinra votima kyero nraanre mwiva nteqaro humwunra nramanri votima kyero nai nyianrani uto taiqora.

15

Nyaamwunyaahua 7 nramwuvanto variqata nraakye qora uaqama ny- ate inraikyara tute varurara tura

¹ Nte Ioniva variqana ruvaata taqeqlana nyaamwuni taqaavaro nronra inraikya nraahumwa inraikyavanto qovarama viro vahura. Mwini nyaamwunyaahua 7 nramwuvanto variqata nraakye qora qoraqama ny-atarera hu inraikyara 7 nramwu qora inraikya tute varura. Mwi inraikyara nraakye qora ekyara nyivaro Kotiva nraakye qorara raraqa taariva taiqa quananro.

² Mwihua mwia tute varuvana nte taqaavaro kyaarerera nronravanto karaasi voti huva mwipi mpoqi qia ite varuva vahura. Mwitaama vahuvana nte taqaavata nraakye qora airivanto qaakyau vairi nraatara kyohua varura. Mwihua qaakyau vairivata mwia mwanraqura mwi inraikyara nampaa qara ntumwa tora nraatara kyeta uro kyaarerera karaasi voti hora tokyani sivita variqata nkyiari kyauquqi kitaa voti hora Kotiva nyu kitaara tuteta varura.

³ Mwihua mwini variqata Mosesira Kotira kyaiqa vaisi ihivata, sipisipi nraati ihivata, timwaqi viqata mwitaama titi:
Nronrao, Kotio, i kepukyavanto nraatara kyero vaiho.
I kyaiqvavanto nronra kyaiqa vailhatara titi, tire
mwia taqeqlata kyauqu ntukikinraaqateqa varuro.
E ekyaa mpo mwatanaa
mpo mwatanaahua vunyaava variaravave.
I kyaiqa okyaravanto avuqavu okyara
qutaa okyara nraahuma vaiho.

⁴ Nronrao, tavave i nraatu hia aatu hiananrove?
Ekyaama i nraatu aatu hiqata varivarave.
Tavave hia i nrutu tuaaheraaanrove?
Ekyaama i nrutu tuaaherevarave.
Iqi nraahuma hia qora okyaravanto vaharo
kyuqe okyaravanto nraahuma vaiho.
E avuqavuma kyera varaara kyaiqava
qoqaa vahara varianranra titi,
ekya mpo mwatanaa mpo mwatanaahua
i kyaiqa taqeta uro i vuqaa variqata,
i qamwata mwateqata i nrutu tuaaherevarave, tura.

⁵ Mwihua mwitaai timwa kyeta ihi timwa taiqa kyovana nte taqaavaro nyaamwuni Kotira nraamwu qesavanto qatua viro vahuvaro Kotiva nainive tu mwatukyava qoqaa vahura.

⁶ Mwitaama vahuvata nyaamwunyaahua 7 nramwuvanto nraakye qora uaqama nyatarera hu inraikyara 7 nramwu qora inraikya tutohua, mwihua Kotira nraamwuqtai veva ntora. Mwinramwuhua veva nteta kyuqe tuavaaqa takyuqi tuavaaqa utu teta mwetokyaqaa kori naaqunta voti hora rupa teta varura.

⁷ Varuvaro qati variqi vu inraikyara taaratana taaratanaqitairo mpov-
anto tanu 7 nramwu nyaamwunyaahua 7 nramwu nyunra. Mwi tanunra 7

nramwu kori tanu vahuvaro mwiqima Kotiva ekyaa enta qati variqiro vira mwia raraqa tova piqaro vahura.

⁸ Mwi tanunra nyaamwunyaahua nyuvaro Kotira peqa okyaravanto takyuqi varuvaro mwiaqatairo qia munravanto viqaro Kotira nraamwuqi uro piqa vuvata mwia kyaara mpovanto hia qio mwia nraamwuqi vera ntaariva vahura. Nyaamwunyaahua 7 nramwuvanto nraakye qora uaqiamma nyatarera hu inraikyara hia taiqa kyovaro qati vahurara tita, mwihua mwipi viqeteva hia vahura.

16

Kotira raraqa tova piqa vu tanunra 7 nramwuanra tura

¹ Mwitaama vahuvana nte variqana ruvaata taqeqlana riaavarro Kotira nraamwuqitairo quavanto nyaamwunyaahua 7 nramwuanra paa tiro aakyara ntero tiqaro, Kotira raraqa taiva piqai tanunra 7 nramwu vareta uto mwatani rauru kyaate, tura.

² Mwitaa tuvaro nyaamwunyaahua 7 nramwuqitairo mpovanto nai tanu varero uto mwatani rauru kyora. Rauru kyovata qaakyau vairi nampaa vareta mwi mwanraqurara qamwateta tiru mwanriqave tuhua, mwihua varuvaro mwihua mwamwantaqa tauma rumpuvara uaqia huva qovarama viro mwihua mwamwanta nre varuvata varura.

³ Rumpuaravanto mwihua nre varuvata varuvaro nyaamwunyaahua 7 nramwuqitairo nampa 2 vanto tumu nai tanu kyaarerera nronraqa rauru kyovaro ekyaa kyaarerera mwiva tuqasaa viro qutu vu vaisira nraanre votima vuvaro mwipi ekyaa qati variqi vi varu inraikyava vahuba ekyaa qutu taiqa vura.

⁴ Ekyaa qutu taiqa vuvaro nyaamwunyaahua 7 nramwuqitairo nampa 3 vanto nramanri nronraqaavata nrumwuqitai tumu nramanrinraqaavata tumu nai tanu rauru kyovaro mwi nramanrivavata vaisi nraanre tuemwa vura.

⁵ Mwitaa huvaro nte riaavarro nyaamwunyaava nramanriqaa ntaqikyi varuva Kotirara tiqaro,

I kuaaraqi nraahuma uaqia hi okyarava hia vahara
kyotatavanto variaro.

E qati variqira vi variaravave.

Haaruvata e qati variqira vi varuravave.

E mwataama kyera nraakye qora ntuqutiqara
avuqavuma kyera mwitaa hiqara kyuqema hira hiaro.

⁶ Mwihua i nraakye qoravata,
i qua qovarama kyaa vaisihuavata,

ru kyaavarro mwihua nraanrevanto raurirave.

Mwia kyaara e nkyiari ntuqutiqara

nraanre mwihua nyianrata nramwa kyaara
nte mwianra huviqaravema tuqo, tiro.

⁷ Nyaamwunyaava Kotirara mwitaa tuvana nte riaavarro Kotirani mpo inraikya mpo inraikya qia quara mwate varu taintaraqatairo quavanto tiqaro,

Nronrao, Kotio, i peqavanto mpoqiaavata vaiho.

E mwitaa hiqara nraakye qora ntuqutiqara
avuqavuma kyera ntuqutuaro.

Nte mwianra qiovema tuqo, tiro.

⁸ Mwitaa tuvaro nyaamwunyaahua 7 nramwuqitairo nampa 4 vanto uro nai tanu huari vuqaa rauru kyovaro Kotiva huari mwia qati kyovaro huarivanto mpoqama kyero iteqaro mwatani varu nraakye qorahua itamwa tatoqa kye varura.

⁹ Huarivant nraakye qora nronraqama kyero ite varuvata mwihua Kotirara qora qua titi tiqata, Mwivama nyaamwunyaahua sitaihata mwihua nkyiari tanu rauri variavaro qora inraikyavanto qovarama vi variho, titi. Mwitaa timwa kyeta mwihua nkyiari qora kyaiqa qaqira kyeta Kotira nrutuuaheraataara vahuvata mwihua hia mwitaa hora.

¹⁰ Mwihua hia mwitaa huvaro nyaamwunyaahua nramwuqitairo nampa 5 vanto nai tanu uto qaakyau vairivanto mwatakyaa vi varu taintaraqaa rauru tovaro qaakyau vairivanto ntaqikyu mwataraqaa enta hu inraikyava qovarama viro entamaqiro vi varura. Entamaqiro vi varuvata nraakye qoravanto mpoqama kye nriqa vu inraikyara vareqata nkyiari mwaaqinri toqe varura.

¹¹ Mwitaaamaqi viqata mwihua nkyiari nriqa vura kyaaravata, nkyiari tauma rumpuara itora kyaaravata, Kotirara qora qua tiqata hia nkyiari qora kyaiqa qaqira kyaraitita, qati nraahu mwi kyaiqara utuqi vi varura.

¹² Mwihua nkyiari qora kyaiqa qati nraahu utuqi vi varuvaro nyaamwunyaahuaqitairo nampa 6 vanto nai tanu uto nramanri nronra, Iuperetisi nramanri mwiaqa rauru kyovaro mwi nramanriva tati viro huari vu nrinanyaahua nronra vunyaahua aanra vihi nyatora.

¹³ Mwitaa huvana nte taqaavaro qaakyau inraikya evari nronra voti hura nroqitairovata, qaakyau vairi nroqitairovata, Kotira qua unra qua tu vaisira nroqitairovata, vaana taaramponramwu vihaunta voti uhua qovarama vita varura.

¹⁴ Vaana mwinramwuhua Saataaninra vaanavanto nronra kyaiqa vare varuhua varura. Mwinramwuhua qovarama vita uro ekyaa mwatani varuhua vunyaahua rapateqata nrivage ntuvantua hita Kotiravata ntaquare tura. (Nte Ioniva ruvaata taqeqlana nraakiara qovara hianinra taqaavara.) Kotiva kepukyavanto ekyaa inraikya nraatara kyaiva variararo nraakiara mwiva ko qiani entava qaumato vahirata ekyaa mwatani varihua vunyaa vaisivanto ntuvantuama vita Kotiravata ntaqirera utivarave.

¹⁵ (Karaisiva nai uro ntantero tumuani entarara mwataama tiro): Riaate, Nte mpuara vaisi nraantantamwa kye tumuaninrave. Vaisivanto hia vaitaraitiro, vu ntapairi kyero nai tuavaaqaqa kyugema kyero ntaqikyi variariva, mwi vaisiva qamwateqaro variananrove. Mwi vaisiva mwi entaraqaa nraakye qora suqaa nrohiqaro hia tokya variariva hiama kyaurira inraikya varaanarrove, tura.

¹⁶ Nte ruvaata taqe variavaro vaana taaramponramwuvanto uro tunrenrasata, Hivuru quaqitai mwata mwia nrutu *Amaketoni* mwatave tura, mwin uro mwatani varu vaisihua vunyaahua ntuvantuama kyovata ntaqirerata uti varura.

¹⁷ Ntaqirerata Amaketoni tunrenrasata ntuvantuama vita varuvaro nyaamwunyaahua 7 nramwuqitairo nampa 7 vanto ekyaa tokyaqaa varuva nai tanu virira nyaamwuni rauru kyovaro Kotira nraamwuqi vahu taintaraqaatairo quavanto paa tiro tiqaro, Taiqama viho,

¹⁸ tuvaro mwiaqaatairo aaquakyaa ti varuvaro nyaanruva nruqua ti varuvaro mwaturavanto nronraqama kyero ti varura. Mwaa mwatara ututo entaraqaatairo hia mwitaa hi mwaturava utuvata nraakye qoravanto taqorave. Mwi entara mwatura tiqaro nai nraahumwa mpo qarama kyero turave.

¹⁹ Mwaturavanto tiqaro mwatukya nronra mwia vara mwata mwatama kyero taarampotanaqaa tuqamu viro vahuvaro ekyaa mwatani nronra mwatukya, mpo mwatukya mpo mwatukyaqi vahu inraikyava tumantiro ntuvuraavura hiro uaqima vura.

Mwitaamaqi vuvaro Kotiva hia Papironivata taunru kyaraitiro, mwiva mpoqama kyero raraqa tovaro mwi mwatukyarara tiqaro, Evata ni uaini ni raraqa tai nramanrinra nraante, timwa kyero mwi mwatukyaravata ntaqu mwatovaro

²⁰ kyaarerera nronra utaqaa pata mwata airi vahuvavata raupirima viro hia vahuvaro mwataqaa ora tatari taaqi vahuvavata viviro hia vahura.

²¹ Mwitaamaqi vuvaro nyaamwusairo vati kaapura ori nronra voti huva mwia muaanra 50 kirovanto vaisiqaa ntigaro vaisi ri varura. Vaisi ri varuvata mwihua Kotirara uaqia hi quara tita tiqata, Kotiva nronraqama kyero tiriqaa qua vatero tiri ntuqufi variho, tita. Timwa kyeta mwia qorama timwa mwatora.

17

Api qaraqiro nrohi varu nraakyerara tura

¹ Mwitaah huvaro nyaamwunyaahua 7 nramwu tanu 7 nramwu tutohuaqitairo mpovanto nte variavanani rrintero nianra tiqaro, Nrinraqe nte api qaraqiro nrohi vari nraakyera ruani okyarara i nraamwutaankye. Mwi nraakyeva mwatakyaa viro variqaro ntaqikyiari taintava nronra nramanri, mpo nramanri mpo nramanriqaa vahirave.

² Ekyaa mwatani variahua vunyaa vaisivanto mwi nraakyeravata mpuaraqama kye api nrohi variarave. Mwi nraakyeva vaisi kyapata api qaraqiro nrohiqaro nai uaini, api nrohi vari nramanrinra, ekyaa mwatani varia nraakte qorahua nyihata mwihua nramanri mwia nretra ueraqama quavo, tiro.

³ Mwitaah tuvaro Kotira mwanraquravanto kepukyaqama kyero nivata varuvaro nyaamwunyaava ni pitaqiro uro quminasata kyovana nte mwini variqana taqaavararo nraakte mpovanto qaakyau vairi mwia mwogaga mwatakyaa viro varuvaro vairi mwia nraanre vairi varuvaro mwiaqaa mpo nrutu mpo nrutu mwaaqua hi nrutura nraahu qara ntumwa tovaro vahura. Qaakyau vairi mwia qidata 7 nramwu vahuvaro kyaava kyauqurutana vahura.

⁴ Qaakyau vairi mwiva mwitaama varuvaro nraakte mwiva nraanre tavunavata titiqa tavunavata nronra munima kyo tavunanza rupatero variqaro nronra munima kyo orira korive, mpo ori mpo orive, mwiaqo nai mwamwanta mwunruqama tero variqaro nai kyauquqi kaapu tutero varura. Mwi kaapuraqi nai api qaraqiro nrohi varuraqatairo uaqia hu inraikyava, mpo inraikya mpo inraikyavanto nraahu piqa viro vahura.

⁵ Kaapu mwia tutero nai tiriqa ugetato quara mpo qara ntumwa tovaro vahura. Mwi nrutuva mwataama tiro:
MWAA PAPIRONIVE.

EKYAA API QARAQITA NROHI VARIAHUAVE,
EKYAA QORA INRAIKYA UTI VARIAHUAVE,
MWIHUA VARIAVARO MWAA NRAHESIVA
MWIHUA NYOVAMA VARIHO, tiro.

⁶ Mwi quara mwitaama kye qara ntumwa tovaro vahuvana nte taqaavararo mwia nraakyeva airi nraakte qora nraanre nramwa varovaro mwia vu nraato apiqa huvaro varura. Kotira nraakte qora nraanreve, Iesusira qua nraahu riemwaqqi vura kyaara ru kyo nraakte qorahua nraanreve, ekyaa mwia nraanrenra mwia nraakyeva nramwa kyero ueraqama viro

varura. Mwi nraakyeva varuvana nte mwia taqena mpoqama kye kyauqu ntukikinraaqate variavaro

7 nyaamwunyaava nianra tiqaro, Nanraqamave e mwi nraakyera taqera kyauqu ntukikinraaqate variaro? E rie varifraqe nte mwi nraakyera okyara túqetatairavata, mwia mwoqaqa mwatakyaa viro vairira mwia qiata 7 nramwuvata kyaava 10 nramwuvata vahi vairira okyaravata, i timwa mwiankye.

8 Mwi vairira e taqaarava mwiva haaru qati variqiro vi varurave. Mate mwiva hia qati variqiro vi variho. Nraakiara mwiva mupi nronraqitairo uaqjama virero mwataqa mwaanri ntero quananrove. Mwi vairiva qaakyau vairivanto mwataqaa nrohi varirata mwatani varihua mpo ihua mwia taqeta nkyiari kyauqu kyauqu ntukikinraaqate varivarave.

Haaru hia mwaa mwatara ututo entara Kotiva hini hia nraakyе qorahuara ni nraakyе qora variqata ekya enta qati variq vivarave timwa kyero, mwihua nyutu mpukuqi qara ntumwa tora. Vairi mwianra kyauqu ntukikinraaqate vari nraakyе qorahua nyutu hiama mwi mpukuraqi vaiho. Mwihua nyutu mpukuqi hia vahiarhua qaakyau vairi mwia taqeta, nkyiari kyauqu ntukikinraaqafe varivarave. Mwi vairiva haaru varuvave. Mwaa entara mwiva hia variho. Nraakiara mwiva qaiqaa qovarama quaninranra titi, mwi nraakyе qorahua mwianra nkyiari kyauqu ntukikinraaqate varivarave.

9 Kyuqe vu nraato vahiariva nraahu mwaa quara okyarara riemwaqiro quananrove. Qaakyau vairi mwia qiata 7 nramwuvanto mwia okyara vahirero taaqi 7 nramwu vahira mwiaqaa mwatakyaa viro variho. Vairi mwia qiata 7 nramwuvanto qaiqaa mwia okyara vahirero nronra vaisi 7 nramwu variarave.

10 Vaisi 7 nramwuqitairo hini kyauquruvanto mwatani variqi vita qutu quavaru kuaiqiyanto qati ntaqikyi variharo mpovanto nronra vaisi vunyaaava variariva qatima variho. Nraakiara mwiva qovarama viro mwiva pata qiquqijarama variananro.

11 Qaakyau vairi mwiva haaru qati variqiro vuvave, mate hia qati variqi viva, mwivama nraakiara vunyaa vaisi mwihua nampa 8 qama kyaananro. Mwiva 7 nramwu vunyaa vaisi mwihua kuua okyarama variananro. Mwiva qaiqaa qovarama viro uro taiqa virero quananrove.

12 Kyaava kyauqurufana taqaananra mwia okyara vahirero mwi in-raikyava vunyaa vaisi kyauqurutana variarave. Mwaa entara mwi vaisi-hua hia nronraqama vita kepukya vareta mpo mwataqaa mpo mwataqaa ntaqikyiraitita, qati variarave. Nraakiara mwinramwuhua nronraqama vita qaakyau vairi kyapata ntaqikyiqi viqata huari vu kuaiqiaqaa nai qiquqiaqa ntaqikyiqi vivarave.

13 Mwi vaisinramwuhua vunyaa vaisi kyauqurutanavanto variqi viqata kuua vu nraato nraahu vateta mwihua qaakyau vairi kyaahaqa hirerata nkyiari kepukya mwia nraahu mwivare.

14 Mwihua sipisipi nraativata ntaquqi vivaro sipisipi nraati mwiva nronravanto variqaro ekyaa inraikyaa ntaqikyiro ekyaa vunyaa vaisiqaa ntaqikyivara tiro, mwiva mwihua kepukya nteqa kyero nraatara kyaanan-rove. Mwi entara sipisipi nraati mwiva ntaquqi virata mwia kyuuqua nai nyaanrama kyero nai kyaama tai nraakyе qorahua, nai mwianra nraahu riemwaqi vihua, mwihuama mwia vataqi viqata nraatara kyevarave, tiro.

15 Nyaamwunyaava mwitaa timwa kyero mwiva nianra qaiqaa tiqaro, Api qaraqiro nrohi vari nraakyeva mwatakyaa viro vari nramanrinra mwatavau nronra nramanri mpo nramanri mpo nramanri vira mwia ok-yarara tirerave. Ekyaa mwi nramanrinra okyaravanto vahirero ekyaa mpo

mwatanaa mpo mwatanaahuama variavo. Upi mwamwanta vahiuave, eqara mwamwanta vahiuave, mpo qua mpo qua qiahua, variarave.

¹⁶ Qaakyau vairivata kyaava kyauqurutanavata taqaananra, mwihua variqata api qaraqiro nrohi vari nraakyera mpoqama kyeta uaqiamma mwatevarave. Mwihua mwia nramwutaaqa hiqata mwia vehiqama mwateta mwia kyaivarou tokyama variananrove. Mwihua mwia vehiqama mwateta mwia mwamwanta mwati toqa nrupepaama kye nramwa kyeta qiaqotai mwia mwamwanta itamwa tafoga kyevarave.

¹⁷ Kotiva mwihuara ni mutukya vahiani kyaiqara varaqi quate qianinranra tita, mwihua kuaa vu nraato nraahu tu kyeta nkyiarí kepukya mwia qaakyau vairi mwia nraahu mwivarave. Mwihua mwitaamaqi vivaro Kotira quavanto qutaa mwivauma vahiananrove.

¹⁸ Mwi nraakyera taqaarava mwia okyaravanto vahirero mwiva nronra mwatukyavanto mwatani variahua vunyaaahuaqaa ntaqikyi varivama variro.

18

Papironi mwatukyavanto taiqa vurara tura

¹ Nte mwi inraikyara mwi inraikyara ruvaatakyaa taqena qaiqaa taqaavaro nyaamwunyaa vaisi mpovanto nyaamwusairo tumu varuvaro mwia nronraqama kyero nronra kepukya mwuvaro mwia mwunruqamato inraikyava mpoqama kyero takyūqiqaro ekyaa mwata maata ntuvaa-hamaqiro vi varura.

² Mwiva paa tiro aakyara ntero tiqaro, Mwi mwatukyava taiqa viho. Papironi mwatukya nronra mwatukyavanto uaqiamma viho. Mate mwi mwatukyaraqi hia kyuqe inraikya vaanavanto nraahu variqi vi variavo. Nyaaamwa uaqia hiahua mwi mwatukyaraqi variqi vi variavo.

³ Haaru mwi mwatukyava nai uaini uaqia hora mpo mwatanaa mpo mwatanaahua nyunranra tiro, mate mwiva taiqa viho. Ekyaa mwata maata vahintema vunyaa vaisi variahua ekyaa mwihua mwiavata api qaraqita nrohi varurave. Mwi mwatukyava api qaraqita nrohu kyaiqara uti varuvatara tita, munima kyaiqa vare varuhua, mwihua kyaiqvavanto nronraqa huvata munima vare varurave, tiro.

⁴ Nyaaamwunyaaava mwitaa tuvana nte variqana riaavarao nyaamwusairo quavanto mwitaama tiro:

Ni nraakye qora tuaavo,
mwi mwatukyara qaqira kyeta nritaraate.
Nkye mwiavata variqata qora kyaiqa varevorave.
Nkye mwatukya mwiqi varivaqena
haunri nte mwia riqana nkyivata ruankyorave.

⁵ Mwi mwatukyara uaqia hi kyaiqava nritarero
nyaamwu mwutukyani viro piqa viho.

Kotiva mwia qora kyaiqa mwianra
qati nraahu riemwaterno hia taunru kyaiho.

⁶ Mwi mwatukyava nkyi uaqiamma nyataintema kyeta
nkye naivata uaqiamma mwataate.

Mwiva nkyi kuaiqia nyinranra rieqata
nkye mwia taaraqia mwiate.
Mwiva uaqia hi nramanrinra nkyi nyinra
nkye mwi tukyara nraatara kye
mpoqivata mwia mwiate.

⁷ Nkye mwiva nai nrutu tuaahera kyairara rieqata
mwiva nanrianra qamwateqaro kyuqe inraikya

mwunruqa hiani inraikyara vatairara rieqatama,
 nkye mwia nrutu vara mwatanigama kyeta
 nriqavira inraikya mpoqiyavata mwia mwiate.
 Mwiva nanrianra timwaqiro viro tiqaro,
 Nte vunyaa nraakyevantoma varuqo.
 Nte hia tetooq a nraakyevantoma varuqo.

Hia muaanravanto niqaa vahiraqe ntataaninrave, tiho.

⁸ Mwi nraakyeva mwitaa tirara tiro, mwiva variqaro
 qiomaa varuqo tiraro kuaa enta mwiaqaa nraahu
 uaqia hiari inraikyava, mpo inraikya
 mpo inraikya mwia ruuananrove.

Nriqa vi inraikyarave, mwutukya uaqiahiani inraikyarave,
 kyara nraataahiar inraikyavave, ekyaa mwi inraikyava
 mwi inraikyava mwi nraakyera ru kyairaro
 qiaavanto mwia tatoqa kyaananrove.

Nronravanto Kotiva mwiaqaa qua vataariva
 kepukyavanto varirave.

⁹ Ekyaa mwatanaa vunyaa vaisivanto mwi nraakyeravata api qaraqita
 nrohiqata qora kyaiqavata vare varihua, mwihua variqata taqaivarao
 mwi mwatukyava qia iteqaro munra vi varirata mwihua munra mwia
 taqeqlatama ntatevarave.

¹⁰ Mwihua nyianrasata variqata mwi nraakyera nronraqama kyero nriqa
 quaninra tageta aatu hiqata varivarave. Mwihua tiqata:
 Qikye, uvo, Papironi mwatukya mwaavao,
 e nronra mwatukya kepukyu mwatukyavanto
 variarava variararo mate pataqiaqa
 i taiqa kyaihara raupirma quaro, tivarave.

¹¹ Mwi mwatukyava uaqiamma virata munima kyaiqa vare varihua vari-
 varo mpovanto mwihua hi inraikyara kyoqaa hiva hia varirata mwihua
 ntatevarave.

¹² Mwihua hi inraikyava vahirero korive, munima orive, mpo ori mpo
 ori kyuqe orive, kyuqe mwukyaarive, kyuqe tavuna mpo tavuna mpo
 tavunave, nraanre tavunave, vakora tavunave, kyuqe mwunta vi vari
 kyatarirave, vahi aasau aanraigoo utute inraikyarave, kyatari kyuqeraqo
 utute inraikyarave, kapaave, qainive, eqarorive, mwi orira mwi oriraqtai
 utute inraikyarave,

¹³ kyaravata nraivarao qiaakyaahiani inraikyarave, kyuqe mwunta quarive
 tiro qia quare vari inraikyarave, mwuntav'i inraikyara mpo inraikya mpo
 inraikyave, uainive, oripi kyatari tamwa mwia vahamwenrave, uitivata
 uti qaupavatave, purimakauve, sipisipive, qosivata nai mwia raqa kaari
 votihiiravatave, qati inraikyara munima kyontema kyeta munima kyeqata
 kyoqaa ututo vaisihuave, ekyaa mwi inraikyara hia mpovanto kyoqaa
 hariva variananrove.

¹⁴ Munima kyaiqa varehua mwi mwatukyara mwataama tivara: Qikye,
 ekyaa e hiarava mpo inraikya mpo inraikyavanto taiqama viho. E mwun-
 ruqama taara inraikyava taiqama viho. Ekyaa mwi inraikyara vataarava
 hiama qaiqaavata qovara hiananrove, tivarave.

¹⁵ Mwi entara mwi mwatukyaraqi variqata mpo inraikya mpo inraikya
 nyiqata nronra munima vare vari vaisihuua, mwihua nyianrasata variqata
 mwi mwatukyara taiqa kyaaninra tageta mpoqama kyé aatu hita ntateqata
 varivarave. Mwi entara mwihua qütü vi vaisirara kyora mwata hiante
 hivarave.

¹⁶ Mwihua tiqata:

Qikye, po, nronra mwatukyave, kyuqe tuavaaqa

nraanreve, vakora tuavaaqave, utute variqara
e mwunruqama taara inraikyava korive, mpo orive,
kyau mwukyaarive, takyuqi varihara variararo
¹⁷ i pataqiaqa taiqa kyaiharavira raupirima quaro,
tivarave.

Sipiqaas ntaqiqyi varihuavata, ekyaa sipiqaas nrohi varihuavata, ekyaa
sipiqaas kyaiqa vare varihuavata, mwihua nyianrasata variqata

¹⁸ taqaivaro mwi mwatukyava qia iteqaro munra vi varirata qia munra
mwia faqeta tiqata, Mwaa mwatukyava nai nronra mwatukya vahirave.
Hia mpo mwatukyavanto mwaa mwatukyara nraatara kyaiharo vahivama
taiqa viho, tivarave.

¹⁹ Mwitaa timwa kyeta mwihua nkyiari qiataqa qaupa quvareta ntate-
gata tiqata:
Tire mwi mwatukyarara po kye turo.

Mwi mwatukyava airi inraikya varaqiro vi varihata
sipi qohua airivanto mwia nrumu mwitaa inraikya
mwiqata nronra munima varaarave.

Mwi mwatukyava mwatukya nronra vaiharo pataqiaqa
mwia ntuqutu raupirima kyaiho, tivarave, tiro.

²⁰ (Nyaamwusairo quavanto nraakira qovara hiani inraikyarara
timwa mpi taiqa kyero mpo qua mwataama tiro):

Mwi mwatukyava taiqa virara rieqata
nkye nyaamwuni varihua qamwateqata variate.
Kotira nraakye qoravata, Iesusiva nronraqama kyai
vaisihuavata, Kotira qua qovarama kye vaisihuavata,
nkye ekyaa qamwateqata variate.

Mwi mwatukyava nkyi uaqiamma nyatairara rieqaro
mwia kyaara Kotiva nai kyoqaa mwirnave, tiro.

²¹ Quavanto nyaamwusairo mwitaa tuvana nte ruvaata taqaavaro
nyaamwunyaava nronravanto ori nronra qumina inraikya
kyavuhu kyero kyaarerera nronraqi tuto kyero tiqaro:

Ori mwia tuto kyaugaro vivintema kyero
Kotiva Papironi mwatukya taiqa kyairaro
raupirima viraro mpovanto hia qaiqaavata
mwia taqaananrove.

²² Papironi mwatukyave, e ihi tiqara e kitaa ntuananrave,
ntoma ntuananrave, mpo inraikya mpo inraikya ntuararo
nruqua tira hia qaiqaavata iqital rievarave.

Mpo kyaiga mpo kyaiga okyara taqebehua
hiama qaiqaa iq'i kyaiqa varevarave.
Uiti uru oriqo ntuqutu qaupaqama kye varianinra,
mwia nruquavata hia iqital qaiqaa rievarave.

²³ Hiama qaiqaavata omwa qupi kyeta vataivaro
iqitairo itaananrove.

Nraakye qoravanto nai vare nai vare hivavata
hiama iq'i qaiqaavata vahiananrove.

Haaru ini munima kyaiga varo vaisihuara mwatani
variahua, mwihua nronra vaisive ti varurave.
E ena quahave, qasokyave, vuhaa pahaa inraikyaqo
mwatani varia nraakye qorahua unra utu nyateqara
gora aanra sitera vi variananrave.

²⁴ Kotiva taqaiharo Kotira nraakye qora ru kyaahua
nraanrevanto iqima vaiho.

Kotiva taqaiharo Kotira qua qovarama kye varu

vaisihua nraanrevanto iqima vaiho.
 Mwitaa hiananranra tiroma,
 Kotiva i Papironi mwatuka taiqa kyaiho, tiro.

19

Papironivanto taiqa vurara nyaamwuni varuhua nronraqama kye qamwatora

¹ Nyaamwunyaava nronravanto mwitaa tuvana nte riaavata nyaamwuni varu nraakye qorahua airavanto nronraqama kye tiqata:
 Nrivaqe Kotira nrutu tuaaheraare.

Tire raupirima virera huraro

Kotiva tiri huvantu timwa taihata qio varuro.

Kotira okyaravanto kepuuya okyara nraahuma vaiho.

Mwiva kepuuyaavanto variqaro

kepuuyaqa hiqaro variqiro quananrove.

² Mwiva ko tiqaro avuqavuma kyeqaro qutta ko ti varivave.

Papironi mwatukya nronravanto api qaraqiro nrohi vari
 nraakyera votima kyero api qaraqiro nrohi varihata
 ekyaa mwatanaavanto mwiaavata api nrohiqata
 uaqiamma quarara tiro, mwia kyaara mwi mwatukyaraqaa
 Kotiva qua vatero mwia ntutu raupirima kyaiho.

Mwi mwatukyaya Kotira kyaiqa vaisi airi ru kyaiharo
 mwia kyara Kotiva mwia nai kyoqaa mwiqanro
 mwia ntutuqitirave, tita.

³ Mwihua mwitaa timwa kyeta qaiqaa nronrama kyeta tiqata,
 Nrivaqe tire Kotira nrutu tuaaheraare.

Mwi mwatukyaya qia ite variharo mwiqitairo
 qia munravanto ekyaa enta nrivi variananrove, tura.

⁴ Mwihua mwi quara mwitaa tuvata nronra vaisi nramwuvata, qati
 variqi vi varu inraikyava taaratana taaratanaavata, mwihua mwatasata
 tumu ntita varuvaro Kotiva nai taintaqqa mwatakyaa viro varuvata mwihua
 mwia qamwata mwateta tiqata,
 Qutaave. Nrivaqe tirevata Kotira nrutu tuaaheraare, tita.

⁵ Mwihua mwitaa tuvaro Kotira tainta nronra taintaqitairo qua
 mpovanto mwitaama tiro:

Nkye Kotira kyaiqa vara mwate varia nraakye
 qorahuave, nkye Kotira nraatu aatu hiqata
 nrohi varia nraakye qorahuave,
 nkye nronra vaisivantove, pata vaisivantove,
 nkye ekyaa Kotira nrutu tuaaheraate, tiro.

Nyaamwuni sipisipi nraativanto nraata varovata nronraqama kye kyara nronra

⁶ Quavanto mwitaa tuvana nte variqana rie variavaro airi nraakye
 qoravanto qua tuntema kyero quavanto ti varura. Mwi quava aisakya
 nronraqitairo hara hara tuntema kyero tiro. Mwi quava nyaanruva nruqua
 tintema kyero tiqaro mwitaama tiro:

Nrivaqe tire Kotira nrutu tuaaheraare.

Tiri nronravanto Kotiva ekyaa inraikya nraatara kyairave.

Mwiva ekyaa inraikyaqa ntaqikyi varivave.

⁷ Nrivaqe tire Kotira okyarara kepuuya okyararave
 timwaqiqi viqata mwianra qamwataqiqi viqata variare.
 Sipisipi nraati mwiva nraakye varaari entava qaumato
 vaiho. Mwia mwitai nraakyeva teroma teroma variho.

8 Mwi nraakyerara kyuqe tuavaaqa, egarori tuavaaqa takyuqi varira, utute variarive tiro mwia mwirave, tiro.
Mwia nraata mwiva varirero ekyaa Kotira nraakye gorama varira. Tuavaaqa kyuqe egarori mwia okyara vahirero Kotira nraakye qoravanto kyuqe kyaiqa varaavama vahiro.

9 Mwi quava mwitaa tuvaro nyaamwunyaava nianra tiqaro,
Mwaa quara mwitaama kyera qara ntumwa taante. Sipisipi nraati mwiva nraakye varaaani omwatara nranrenra hiro nai nraakye qora nyaanrama taarilua, mwi nraakye qorahua qamwateqatama varivarave, tiro. Mwitaa timwa kyero mwiva qua mpo tiqaro, Mwi quara Kotira qua, qutaa quama vaiho, tiro.

10 Nyaamwunyaava mwitaa tuvana nte mwia kyuqutarani tumu ntina mwia qamwata mwateqana mwia nrutu tuaahererara utuavaro mwiva tiqaro, Qaqao, hia mwitaa hiante. Nte i nraantantena Kotira kyaiqa vaisima varugo. Nte ivata i qata vakyaahuavata nraantantena Jesusira qua timwa nyiqi vi varurahuama varuqo. E Kotirara nraahu ni mwanriqave tiqarama mwia qamwata mwataante. Kotira mwanraquravanto haaru poropeti vaisi kyaahaqama nyate varuvata mwihua Kotira qua qovarama kye varurave. Mwia votima kyero Kotira mwanraquravanto tirivata kyaahaqama timwa te varihata tire Jesusira qua timwa nyiqi vi varunanrave, tiro.

Qosi egarori mwoqaga mwatakyaa viro varurara tura

11 Nyaamwunyaava mwitaa tuvana nte variqana taqaavaroo nyaamwanto qatua vuvaro qosi egarorivanto qovarama viro. Qovarama viro varuvaro mwia mwoqaga vaisi mpovanto varuvaro mwi vaisirara Kotirara nraahu rie vari vaisivave timwa kyero, qutaa vaisive tura. Mwi vaisirara mwitaa tuvaro mwi vaisiva mpohuaqua quia vatarero hirove, mpohua rirero hirove, mwiva avuqayuma kyeqaro mwitaa hura.

12 Mwi vaisiva varirero mwia vuvanto qia votima kyero ite varuvaro mwia qiatqaqa nronra vaisi tovaqa airi vahuvaro mwi vaisiraqaa nrutu mpo qara ntumwa tova vahuvaro hia mpovanto mwi nrutura ntapihi kyovaro nai mwi vaisiva nraahu mwi nrutura ntapihi kyora.

13 Mwi vaisiva nai nraahu naiqaa qara ntumwa to nrutura ntapihi variqaro vaaqa ututovaro vaaqa mwiva nraanreqi ntamwa kyova vahura. Mwi vaisira nrutu *Kotira Quavantove*, tura.

14 Mwi vaisira nrutu mwitaama vahuvaro mwiva vi varuvata nyaamwaisi ntaquhua mwia kyuquqa vitinteta mwia vataqi viqata mwihuavata qosi egaroriqaa viqata kyuqe tuavaaqa egarori tuavaaqa takyuqi varura ututeta vi varura.

15 Vi varuvaro mwi vaisira nroqitairo paipa vahova nrintero vahuvaro mwi paiparaqotairo ekyaa mwatanaa nraatara kyaariva varura. Mwi vaisiva ekyaa mwatanaa nraatara kyero mwiva qaini kyauru tu varero viqaro mwihuqaa ntaqikyiqiro quananro. Mwiva mwihuqaa ntaqikyiqiro viqaro uaini tamwa tanu nronraqi kyero tatintema kyero mwi vaisiva Kotiva ekyaa inraikya nraatara kye variva, raraqa taani nraakye qorahua ntututuqiro quariva varura.

16 Mwi vaisiva varuvaro mwia tuavaaqa ututoraqaaavata mwia tukyaqaaavata qua mpo qara ntumwa tova mwitaama tiro:
Ekyaa vunyaa vaisi variavaro
mwaa vaisiva mwihua vunyava varirave.
Ekyaa nronra vaisi variavaro
mwiva mwihua nronra vaisi varirave, tiro.

17 Mwitaa hi varuvana nte taqaavaroo nyaamwunyaava vaisi mpovanto huari vuqi siviro variqaro nronraqama kyero qua tiqaro ekyaa hiteta nrohi

varu nyaamwahua nyaanrenro tiqaro, Nkye ekyaa nriate. Kotiva omwata nronra nrainani nrumu nraate.

¹⁸ Nkye nrumu vunyaa vaisi mwamwanta mwati nreta ntaqua vaisihua mwihuaqaa nronraqahi vaisira mwamwanta mwati nreta, nronra vaisi mwihua mwamwanta mwati nreta, qosivata mwihuaqa mwatakyaaavi varia vaisihuavata, ekyaa mwatanaavata, rupa taa vaisihuavata, qati varia nraakye qorahuavata, nrutu vataa nraakye qoravata, hia nrutu vataa nraakye qoravata, nkye ekyaa mwihua mwihua mwamwanta mwati nrumu nraate, tiro.

¹⁹ Nyaamwunyaa vaisivanto mwitaa tuvana nte taqaavata qaakyau vairivantovata, mwatani vunyaa vaisinramwuvantovata, mwihua ntaqu vaisihuavata, mwihua kuaaqa ntuvantuuma vita qosiqaa mwatakyaa viro varu vaisira mwiavata, mwia kyuquqa nruhua ntaqu vaisihua mwihua-vata, ntaqirerata uti varura.

²⁰ (Ntaquqi vi varuvaro qosiqaa varu vaisiva mwihua nraatara kyero) qaakyau vairi mwia rupa tero vaisi mpovanto unra tiqaro, Kotira qua qovarama kye varuqo, tu vaisiravata rupa tora. Unra vaisi mwiva vuni qaakyau vairi kyaahaqa hiqaro nraahumwa mpo kyaiqa nronra kyaiqa vare varuvata nraakye qoravanto qaakyau vairi nampaa varohua qaakyau vairi mwanraquhara tiri mwanriqave tiqata qamwata mwatohua, mwihua unra vaisi mwia kyaiqa taqeta quataama mwiva Kotira qua ti varuvave tura. Unra vaisi mwiavata qaakyau vairi mwiavata hia ru kyaraitiro, mwitanahua qia nronraqama kyero itoraqi tuto kyovatatana mwiqi varura. Mwi qiaava ite varuvaro mpinqama kyero nriqiqi viqaro munravanto ukavi varu qiaava vahura.

²¹ Mwitanahua qiaqi tuto kyero qosiqaa varu vaisiva uro ntaquqi viro mwitanahua kyuquqaa vitinto vaisihua rugiro viro nai paipa, nroqitairo nru paiparaqotairo, mwihua ru taiqa kyovaro nyaamwa ekyaa mwihua nrumu mwihua mwamwanta mwati toqa ntupepaama kyeta nkyiari nraataa huntema nramwa vura.

20

Saataaninra 1,000 ihiara rupa tairaro varianinranra tura

¹ Mwitaa hvufana nte variqano taqaavararo nyaamwunyaa vaisi mpovanto nyaamwusairo kiqa mpo, mupi nronra qesa qatuaa kiqara nai kyaūquqi tu varero seni muaanrantora, mwivata tu varero tuminro.

² Mwiva tumu evari nronra votihura qora inraikya mwia ntavaaqavu kyora. Evari qarura uaqiahuva mwiva haaru varuvave. Mwiva Saataaniva Kotira nramwutaavanto varuvaro mwia ntavaaqavu kyero mwia rupa taariro 1,000 ihiara karavuqi variarive timwa kyero, seniqotairo mwia rupa kyora.

³ Rupa kyero mupi nronraqi mwia mwaamwi tuto kyero mwianra 1,000 ihiara mwipi variqaro hia qaiqaa mwaanri ntero nraakye qora unra qiarive tiro, qesa mwia titi tero roki rutero qumeqo taaqau tora. Nte ruvaatakyaa nraakiara qovara hianinra taqaavarave. Nraakiara Saataaninra rupa tairaro mwiva 1,000 ihiara karavuqi variqiro uro taiqa kyairaro mwi entaraqaatairo Saataaninranra mwiva mpo enta pata entanramwu qatinani mwaanri ntero nrohiarive tiro, mwia huvantu kyaananrove.

⁴ Nte ruvaatakyaa taqaavararo tainta nronra mpo tainta mpo taintavanto vahuvata mwiaqaa nronraqama vu vaisihua mwatakyaa vita varura. Mwi vaisinramwuhua ko qiate tiro, nronraqama kyovata varuvana nte mwihua taqeqana nraakye qora mwanraqa airivata taqaavara. Mwi nraakye qorahua mwatani varu entara Iesusirara nraakye qora timwa

nyiqata Kotira qua ti varuvata mwia kyaara mwihua nyunta teqa kyora. Mwi nraakye qorahua mwatani variqatama hia qaakyau vairivata mwia mwanraquharavata qamwateta tiri mwanriqave tiraitita, nkyiari kyaauquqaavata tiriqavata hia mwia nampaa varora. Nte taqaavata mwi nraakye qorahua qaiqaa qati sivita variqata Karaisiravatamakyé mwaa mwataraqaa ntaqikyiqi viqata 1,000 ihiara variqi vura.

⁵ Mwi nraakye qorahua qaiqaa qati sivi variqata mwitaamaqi uvata hini nraakye qora qutu vuhua hia siviraitita, qati nraahu variqi vuvaro 1,000 ihi nritarovata mwihuavata qaiqaa qati sivita nrohi varura. Vaakya tu nraakye qorahua nraakiara mwihua nraante qaiqaa qati sivi variqi vi vari nraakye qorahuama varivara.

⁶ Tahuave varivaro Kotiva mwihua nraante sivuma kyaarihua mwihua qamwateqata varivaro Kotiva mwihua kyuqema nyatairata varivarave. Mwihua kepukyavanto qio vahiraro qaiqaa mwihua qutu viva hiama qio vahanianro. Mwihua qaiqaa qutu viva hia qioqahirata mwihua Karaisiravata 1,000 ihiara ntaqikyiqi viqata Kotiravata Karaisiravata kyaiqa varaqi vivara.

Saataaninra ekyaaaa nraatara kyaaninranra tura

⁷ Nraakiara Saataaniva 1,000 ihiara karavuqi variqi viro uro taiqa kyairaro mwia huvantu kyairaro

⁸ mwiva veva ntero pataqiaro qatinani variqaro uro ekyaas mwatanaaa unra qua tirata mwihua mwia quara qutaave tivara. Nraakiara mwi entara mwatani varihua mpo mwatanaaa Nkoku mwatanaahua varivata mpo mwatanaahua Menkoku mwatanaahua varivara. Mwi mwatanaahua variqata mwihua Saataaninra quara qutaa quave tivaro Saataaniva ntaqirero mwi mwatanaahuatana ntuaantuuma tairata mwihua nramanri nronra tokyasataa nruqa vahira mwia votima kyeta vaisi airintivanto ntuaantuua hivarave.

⁹ Nte ruvaatayaa taqaavata mwi mwatanaahua Kotira nraakye qoravata ntaqirerata uti variqata ekyaas mwata maata variqi viqata uro Kotira nraakye qora ututuma kyeta Kotira mwutukya vahi mwatukyara mwiaavata ututuma kye varura.

Nkoku mwatanaaa mwihuavata Menkoku mwatanaaa mwihuavata Kotira nraakye qora ututuma kye mwihua rirera huvaro nyaamwusairo qavantumtu mwihua itamwa taiqa tuto kyora.

¹⁰ Mwihua taiqa kyovaro Saataaniva mwihua unra utu nyatova varuvaro mwiaavata vara kyero qia ori eqaroriqaatairo ite varuraqi tuto kyora. Vuni qaakyau vairivata unra qua tigaro, Kotira qua qovarama kye varuvave, tu vaisiravata tuto kyoraq Saataaninravata tuto kyora. Nraakiara mwinramwuhua mwi qiaava itaaninraqi variqi viqata iheravata entaqivata ekyaas enta atura ntumwaqi vivara.

Kotiva ekyaaaa variqaro ko qianinranra tura

¹¹ Nte ruvaatayaa taqaavaro tainta nronra eqarori tainta vahuvaro mwiaqaa impovanto mwatakyaa viro varura. Mwiva tainta mwiaqaa mwatakyaa viro varuvoro nyaamwuvantovata mwatavantovata tigaro, Hiama qio mwia vuqaa varianinrave, timwa kyero aatu ntuqema kyero vivuvaro hia mpoqivantovata mwia qaiqaa taqora.

¹² Mwitaa huvana nte taqaavata nraakye qora qutu vuhua nrutu nronra vataahuave, pata nrutu vataahuave, mwi taintara vuqaa sivita varura. Qutu vuhua tainta mwia vuqaa sivita varuvoro taintaqa mwatakyaa viro varuvoro mpuku vara kyero mpo mpuku mpo mpuku iritero variqaro mpuku mpo, mwiqi ekyaas enta qati variqi vi nraakye qorahua nyutu vahu mpuukura, iri kyero ko timwaqiro vura. Qutu vuhua mwatani qati

varu entara mpo kyaiqa mpo kyaiqa vare varu quara mwi mpukuraqi mwi mpukuraqi qara ntumwa tovaro vahuvoro taintaaqaa mwatakyaa viro varuva mpukuqi qara ntumwa to quara rieqaro ko timwaqiro vura.

¹³ Mwiva ko timwaqiro vuvata kyaarerera nronraqi ntaqutu vu nraakye qorahua mwiqitai qovarama vita uro tainta mwia vuqaa varuvata qutu quahua uro varia mwatukyaraqitaivata nraakye qora qovarama vita uro mwi taintara vuqaa varuvaro taintaaqaa mwatakyaa viro varuva mwihua qati varu entara kyaiqa vare varurara rieqaro ko timwaqiro vura.

¹⁴ Mwiva ko timwaqiro viro uro taiqa kyero mwiaqatairo qutu vuhuvata, qutua okyararavata, qia nronra itoraqi vara mwaamwi tuto kyora. Nraakiara Kotiva qia nronra itaaninraqi tuto kyairata mwihua mwi entara tiqata, Po, mate ekyarama qutu vuro, tivara.

¹⁵ Tainta nronraqa mwatakyaa viro varuva variqaro taqovaro ta nraakye qorahuave nyutu hia mpukuqi ekyaa enta qati variqi vi nraakye qorahua nyutu qara ntumwa to mpukuraqi vahuvoro mwia qia nronra itoraqi vara mwaamwi tuto kyora.

21

Nyaamwu qaraakyavata mwata qaraakyavata qovarama quaninranra tura

¹ Mwitaa huvana nte taqaavararo nyaamwu qaraakyavantovata mwata qaraakyavantovata vahura. Nyaamwu haaruaavavata mwata haaruaavavata ekyara vivuvaro kyaarerera nronravantovata hia vahura.

² Mwitaa huvana nte taqaavararo Kotiva hunasairo nyaamwusairo mwatukyaya kyuqevo, hia mwipi uaqia hi inraikyavavavata vahu mwatukyaya, qaraakyaya Ierusaremivanto tumi varurara. Nraakyevanto nai vaati vararerera hiro nai mwamwanta mwunruqama taintema kyero mwi mwatukyaya tumi varuvana

³ nte riaavararo tainta nronraqaatairo quavanto mwitaama tiro: Mwaa entaraqaatairo Kotiva nai nraakye qora kyapata variqiro quananrove. Mwiva mwihua kyapata variqiro virata mwihua mwia nraakye qorama varivarave. Kotiva naivanto mwihua kyapata variqiro virata mwihua mwianra tiri mwanriqave tivarave.

⁴ Mwihua varivararo mwiva mwihua nruqunru nruka nyatairata mwihua qio variqata hia qaiqaa qutiraitita, hia ntataraitita, hia mwutukya uaqahirata variraitita, hia nriqavira inraikya vararaitita, kyuqema kye variqi vivarave. Haaruaa okyara taiqa virara tita, mwihua mwitaamaqita vivarave, tiro.

⁵ Quavanto mwitaa tuvaro tainta nronraqa mwatakyaa viro varuva tiqaro, Nte mate ekyaa inraikya qaraakyaqama kyarererave, tiro. Timwa kyero nianra tiqaro, Mwaa quava quataa qua vaiharo mpovanto qio mwi quara riemwaqiro quaninranra tira, e mwaa quara qara ntumwa taante, tiro.

⁶ Mwitaa timwa kyero mwiva qaiqaa tiqaro, Qio nte mwi kyaiqara taiqama kyaquo. Nte haaru vuni variavavama varuquo. Nte nraakiara ekyarara vitinivata variarivama varuquo. Vaisi mpovanto nramanri nraataa hirera, nte nrumwuqitairo qati variqiro quani nramanrinra, mwia mwiqanama hia kyoqaara nyaanru hiraitina, qati mwianrinro nrenro mwiva qati variqiro quananrove.

⁷ Vaisivanto uaqia hi kyaiqaravata ntaquqiro viro qio nraatara kyaariva, mwivavama nte hiani inraikyara qio varaanrove. Nte mwihua mwanriqvavanto variarita mwihua ni maauq naamwunra varivarave.

8 Mpo hia nraakye qorahua ni kyaiqa nraatu aatu hiqata ni pataqi nria aanranra qaqlira kyaahuave, hia nianra riemwaqita vihuave, mwaaqu kyaiqa uti varihuave, hena vaisi ru kyehuave, api qaraqita nrohi varihuave, qumina unra inraikyara tiri mwariqave tiqata qamwata mwate varihuave, ekyaa unra qua ti varihuave, ekyaa mwi kyaiqara mwi kyaiqara uti varihuua qia nronravanto ori eqaroriqaatairo itaaninraqi vivarave. Mwihua mwini uro variqata, Qikye, ekyaarama cutu vuro tivarave, tiro.

Qaraakya Ierusaremiyanra tura

9 Mwitaa huvaro nyaamwunyaahua 7 nramwu mwihua nraakye qora ekyara uaqlama nyatarera hu inraikyara tanu 7 nramwu piqa kyeta tutoraqitairo mpovanto nte hiavanani nri ntero nianra tiqaro, Nrinraqe nte sipisipi nraati mwiva varaani nraakyera i nraamwu taarira taqaante, tiro.

10 Mwita tuvaro Kotira mwanraquravanto kepukyaqama kyero nivata varuvana nte variavaro nyaamwunyaava mwiva ni pita varero taaqi nronra mpo nriraroraqaa uro kyero ni naamutovana nte taqaavaro Ierusaremi kyuqera hia mwipi qora inraikyavanto vahu mwatukyava tumiqanro Kotiva varura nyaamwusairo tumi varura.

11 Mwi mwatukyava tumi varuvaro Kotira peqa okyaravanto mwi mwatukyaraqitairo takyuqi varuvaro tuminro. Mwi mwatukyava takyuqiqaro nronra munima kyaani orira voti hira mwia nrutu *iasipaa* ori votima kyero takyuqiqaro karaasi votima kyero iteru ante anta hi varura.

12 Mwi mwatukyara vasaamwunra vahirero nronra nrirarero vahuvaro mwia qesa 12 nramwu vahuvaro nyaamwunyaahua 12 nramwuvanto mwi gesara kuaa kuaqa ntaqikyi varuvaro qesa mwiaqaa Isareri okyara 12 nramwu nyutu qara ntumwa tovaro vahura.

13 Mwi mwatukyara vasaamwunra riqanani taarampo qesa vahuvaro kyaavani taarampo qesa vahuvaro vetara hini taarampo qesa vahuvaro mwaa hini taarampo qesa vahura.

14 Vasaamwunra mwia vara ututu qesa 12 nramwu mwitaama vahuvaro ori 12 nramwuqa vasaamwunra mwia ratova ori mwiramwunraqa sipisipi nraati mwiva nronraqama kyo vaisihua 12 nramwu nyutu qara ntumwa tovaro vahura.

15 Mwitaama vahuvaro nianra qua ti varu vaisiva nyaamwunyaais vainsvanto variqaro mwataani kyaamwunra koriqotairo ututora nai kyauquqi tutoero mwi mwatukyarakata, mwi mwatukyara qesavata, mwi mwatukyara vasaamwunravata, mwatarero uti varura.

16 Mwi mwatukyava vahirero kyaava riqana nraanteria hini hini mwiramwunra kuaaqarama vahura. Mwitaama vahuvaro nyaamwunyaais vainsvanto mwi mwatukyara mwatama kyero taqovaro vasaamwunra hisatata 2,200 kiromitaa vahuvaro mwatukyava mwia virinivata mpianivata mwatama kye taqovaro 2,200 kiromitaa kuaa qarama kyero vahura.

17 Mwitaama vahuvaro nyaamwunyaais vainsvanto vasaamwunra mwia mwatama kye taqovaro mwia mpuahaa mwiva 144 mitaa vahura. Vainsvanto kyairiqa vara kyero mwataara hi varintema kyero nyaamwunyaais vainsvanto mwi mwatukyara mwatama kye taqero mwi quara timwa mpuvana nte riaavarave.

18 Vasaamwunra mwia *iasipaa* oriqotairo ututova vahuvaro mwatukyava utaqi vahu nraamwunra *kori* oriqotairo ututovaro karaasivanto iteru ante anta hintema kyero iteru ante anta hiqaro vahura.

19 Mwitaama vahuvaro vasaamwunra mwemwani vahu orira munima nronraqama kyaani orira mpo ori mpo ori mwunruqama tova *iasipaa* ori vahuvaro

mwiaqaa nampa 2 ori kukyanumwu votihuva *sapai* ori
 vahuvaro
 mwiaqaa nampa 3 ori egarori votihura aketi ori vahuvaro
 mwiaqaa nampa 4 ori vuhanaa votihuva emaraari ori
 vahuvaro
 20 mwiaqaa nampa 5 ori nraanrevata egarorivata vahu orira
sontonisiki ori vahuvaro
 mwiaqaa nampa 6 ori nraanre ori *koniriani* ori vahuvaro
 mwiaqaa nampa 7 ori qaamiantaqatova *karisoriti* ori
 vahuvaro
 mwiaqaa nampa 8 ori kyatari mwanre votihura *mperiri* ori
 vahuvaro
 mwiaqaa nampa 9 ori *topaasi* ori vahuvaro
 mwiaqaa nampa 10 ori korisopareri ori vahuvaro
 mwiaqaa nampa 11 ori qia votihura *haiasini* ori vahuvaro
 mwiaqaa nampa 12 ori nraanre votihura *ametisi* ori vahura.

21 Ori 12 nramwu vahuvaro qesa 12 nramwu kyau mwukyaari voti
 huvave, kinaa voti huvave, vahura. Hia kinaa pataqiani vara kyero tomaqa
 kyeqaro qesa mwia utiraitiro, kinaa nronra kuaikuqo qesa mwia utuqiro
 viro ekyaa qesa 12 mwinramwunra taiqa kyora. Qesavanta mwitaama
 vahuvaro mwi mwatukyaraqi vahu aanrava koriqo ututovaro karaasi
 nraantantorqitai vutura hinivata qio taqe inraikyava vahura.

22 Mwi mwatukyaraqi vahu aanrava mwitama vahuvana nte taqaavararo
 Kotira qamwata mwate nraamwuya hia vahura. Kotira ekyaa inraikya
 nraatara kye variva mwivavata, sipisipi nraati mwivavata, mwitanahua
 mwi nraamwuya varura.

23 Mwi mwatukyaya vahuvaro Kotira peqa okyaravanto itero
 takyuqiqaro ntuvaahe varuvaro sipisipi nraati mwiva omwa votima
 kyero ite varuvarora tiro, huarivantovata toravantovata hia mwia kyaiqa
 vahura.

24 Nraakira mwi mwatukyaya qovarama virata ekyaa mwatanaa
 nrohivarо mwi mwatukyaya ntuvahairata nrohi varirave. Mwihua
 mwitaama kye nrohi varivata mwatani vunyaa vaisinramwuvanto nkyiari
 kyuqe inraikya vatera varaqita uro mwi mwatukyaraqi kyevarave.

25 Mwihua nkyiari vate inraikyara varaqita uro kyeta varivaro qaataaan-
 inraqa mwi mwatukyara qesavanto qati nraahu qatua viro vahiraro mwini
 hia enta hianinranra tiro, hia mwi quesara tita taananrove.

26 Mwi mwatukyara qesa qati qatuaviro vahirata ekyaa mwatanaavanto
 nkyiari vatera kyuqe inraikya varaqita mwipi qio uro kyevarave.

27 Mwi inraikyara mwi inraikyara uro kyegatama kyuqe inraikya
 nraahuma uro kyevara. Mpo inraikya qora inraikyavanto hiama mwi
 mwatukyaraqi viqetaananro. Vaisivanto kyaurira kyaiqa vararivave,
 unra qua qiarivave, ekyaa mwitaa hi vaisihua hiama mwi mwatukyaraqi
 viqetevara. Sipisipi nraati mwia mpukuqi ekyaa enta qati variqi vi nraakye
 qorahua mwihua nyutu qara ntumwa tai nraakye qorahua, mwihua
 nraahuma mwi mwatukyaraqi qio viqetevarave.

22

Qati variqi vi nramanrinranaravata qati variqi vi kyatariraravata tura

1 Nyaamwunyaa vaisivanto mwi mwatukyara ninaamutero mwiva nra-
 manri mpo ni naamutovana taqaavara. Mwi nramanriva, qati variqiro
 vi vari nramanriva, kyuqema kyero takyuqiro itero ante anta hiqaro
 Kotiravata sipisipi nraati mwitana taintaqitairo tumi varura.

² Mwi nramanriva mwiaqitairo viqaro mwi mwatukyara aanra utaqaa vi varuvaro nramanri tokya hini hini kyatari, qati variqi vi variva vhura. Mwi kyatarira kuaa ihi mwipi kuaa tora kuaa tora tamwa rieqaro 12 nani tamwa riemwaqiro vivi hura. Mwi kyatarira mwanrevanto ekyaa mwatanaahua hemwaa votima kyero mwihua kyuqema nyataariva vhura.

³ Kotiva uaqiamma quarive qiari inraikyava hiama mwi mwatukyaraqi vahiananro.

Mwi mwatukyaraqi Kotiravata sipisipi nraativata mwitanahua taintama vahiananro. Mwi taintava mwi mwatukyaraqi vahirata Kotira kyaiqa vaisi mwia nraakye qora, mwihua Kotirara tiri mwanriqave tiqatama qamwata mwatevara.

⁴ Mwihua mwianra qamwataqi viqata mwia viri taqamwaqi vi varivaro Kotira nrutu mwihua tiriqa qara ntumwa tairaro vahiananro.

⁵ Mwihua mwitaama kyeta Kotirara qamwataqita vivaro hiama mwini enta hiananro. Nronravanto Kotiva mwihua ntuvahama nyate varian-inranra tiro, huarivantovata omwavantovata hiama mwia kyaiqa vahiananro. Kotiva mwihua ntuvahama nyatairata mwihua vunyaa nraakye qora variqata ekyaa enta ntaqikiyiqita vivara.

Iesusiva uro ntantero tumuaninranra tura

⁶ Nyaamwunyaa vaisivanto qaiqaa nianra tiqaro, Mwaa quava qutaa quama vaiho. Qioma vaisi mpovanto mwi quara riemwaqiro quananrove. Nronravanto Kotiva nai mwanraqura poropeti vaisi nyuvaro mwiva mwihua kyaahaqa hi varuvata mwihua Kotira qua qovarama kye varurave. Kuua qarama kyero Kotiva matevata nai kyaiqa vaisira mwihua nraakiara pataqia vari kyero qovara hianinra ntapihi kyeta riaate tiro, nyaamwunyaa vaisi impo titairave, tura.

Mwiva mwita tuvana nte Ioniva ruvaatakya nraakiara ekyaa mwi inraikyava qovara hianinra taqaavara.

⁷ Iesusiva mwitaama tiro: Nte nkye hinani qamwanrama uro ntantena tumuaninrave. Mwaa mpukuraqi nraakiara qovara hianinra qara ntumwa taurave. Mwi quara riemwaqiro quariva variraro Kotiva mwia kyuqema mwatananrove, tura.

⁸ Nte Ioniva ruvaatakya mwi inraikyara riena mwi inraikyara taqaavara. Nte mwi inraikyara rie taqe hina mwiaqatai nyaamwunyaa vaisivanto ni naamutora mwia kyuqutarani tumu ntina mwia nrutu tuaa-herarerera uti variavaro

⁹ mwiva qaqao tiro, Hia ni nutu tuaaheraante. Nte i voti huva Kotira kyaiqa vaisima varuqo. I qata vakyaahuave, poropeti vaisive, mwaa mpukuraqi qara ntumwa tai quara riaa nraakye qorahuave, nte mwihua votima kyena Kotira kyaiqa vaisima varuqo. E Kotirara nraahu ni mwanriqave timwa kyera mwia nraahu qamwata mwataante, tiro.

¹⁰ Mwitaa timwa kyero qaiqaa tiqaro, Mwaa quara nraakiara qovara hianinra qovarama kyauqara qara ntumwa taanancha hia ugeta taante. Ekyaa mwi quava qutaa qovara hiari entava qaumato vahirara tira, e hia uggetataante.

¹¹ Qora kyaiqa utuani vaisira qati kyairaro mpoqiatavata qora kyaiqa utuqiro quarive. Api nrohiani vaisira qati kyairaro api nrohiani kyaiqara mpoqiatavata utuqiro quarive. Kyuqe kyaiqa varaani vaisira qati kyairaro kyuqe kyaiqa nraahu mpoqiatavata varaqiro quarive. Kotira kyaiqa nraahu varaani vaisira qati kyairaro Kotira kyaiqa nraahu varaqiro quarive, tura.

¹² Iesusiva mwitaama tiro: Riaate, nte qamwanrama uro ntantena tuminrenrave. Nte mwi entara nraakye qora nyianri inraikyara varena

nraakye qora mwihua nkyiari kyaiqa kuaiqia kuaiqiaqa taqeqlana kyoqaa nyianinrave.

¹³ Nte haaru vuni variavavama varuqo. Nte nraakiara ekyaarara vitinivata variarivama varuqo. (Nte nraahuma okyaranivata mwutunivata varuvama varuqo.)

¹⁴ Nraakye qora nkyiari tuavaaqa kyuqema kye hiqama tehua, mwihua qamwateqata varivarave. Ekyaa enta qati variqi vi kyatari tamwanra mwi nraakye qorahua qio hiqo kye varevama vahiananrove. Mwi nraakye qorahua qioma Kotira mwatukya qesa qatua kye vera ntevama vahiananrove.

¹⁵ Mwihua mwi mwatukyaraqi varihua varivaro mpohua mwi mwatukyaraqi viva hiama qio vahiananrove. Mwihua mwaqaqani vairi votima kyeta varivarave. Tuhive haaqa quaakyara kyaiqa vare varihuave, nraakye qora api qaraqita nrohi varihuave, vaisi ru kyehuave, unra inraikyara tiri mwanriqave tiqata qamwata mwate varihuave, unra quavata unra kyaiqvata vare varihuave, mwihua hia Kotira mwatukyaqi viraitita, mwaqaqani varivarave.

¹⁶ Nte Iesusiva Kotira nraakye qora mpoqi mpoqi variahua, mwihua mwi quara riaate tinama, nte nyaamwunyaa vaisi mpo titauqaroma mwi quara mwihua timwa nyiho. Nte Ntevitira okyara kuaa okyaravantoma varuqo. Itataraaravanto qaatastarera hinani itaira nte mwia votima kyena iteqana ntuaahe varuvama varuqo, tiro.

¹⁷ Kotira mwanraquhavantovata sipisipi nraativanto varaari nraakyevata mwianra tumuantema, tita. Mwitanahua mwitaa ti variarara tita, nkye mwaa quara riehuavata Iesusirara tumuanre qiatu. Tavave nramanri nraataa iharo variho? Nrinra hia kyoqaa hiraitira, qati vara kyera nraante.

Ekyara qua tura

¹⁸ Nte Ionivama tina. Nraakiara qovara hiani quara qara ntumwa taura nkye mwi quara riehuara tirera. Nte nkyiari kepuqyaqama kyena mwitaama tina, Vaisi mpovanto nte tu quaraqa mpo qua tomaqa taakyorave. Mwiva mwitaa hirera, qora inraikya qovara hininranra mwaqaqituria, Kotiva ekyaa mwi inraikyara mwi vaisiraqaa vataananrove.

¹⁹ Nraakiara qovara hiani quara nte qara ntumwa tauraqatairo mpovanto mpo qua vara qatinani kyaankyorave. Mwiva mwi quara vara qatinani kyairera, Kotiva mwi vaisirara hiama mwiva ekyaa enta qati variqi vina kyatari tamwanra nrenanrave qiananrove. Mwiva hiama ni mwatukya kyuqeraqi quananrove, qiananrove. Nte kyatari mwianravata, mwatukya mwianravata, mwaa mpukuraqi qara ntumwa taurave.

²⁰ Ekyaa mwi quara mwi quara qovarama kyai vaisiva, Iesusiva, nai kyauqu nriqiqaa vateqaro mwataama tiro, Nte quitaama tuqo. Nte qamwanrama kye uro ntantena tumuaninrave, turave.

Iesusiva mwitaa tihana nte tiqana, Qutaama tira iharo. Nronrao, Iesusio, e tumuanre, tuqo.

²¹ Nkye varivaro tiri vunyaa vaisi Iesusiva nkyivata variqaro nkyi kyuqemaqiro quarive. Qutaave.

Read the New Testament daily

January

date	Scripture
1	Matiu 1:1-2:12
2	Matiu 2:13-3:6
3	Matiu 3:7-4:11
4	Matiu 4:12-25
5	Matiu 5:1-26
6	Matiu 5:27-48
7	Matiu 6:1-24
8	Matiu 6:25-7:14
9	Matiu 7:15-29
10	Matiu 8:1-17
11	Matiu 8:18-34
12	Matiu 9:1-17
13	Matiu 9:18-38
14	Matiu 10:1-23
15	Matiu 10:24-11:6
16	Matiu 11:7-30
17	Matiu 12:1-21
18	Matiu 12:22-45
19	Matiu 12:46-13:23
20	Matiu 13:24-46
21	Matiu 13:47-14:12
22	Matiu 14:13-36
23	Matiu 15:1-28
24	Matiu 15:29-16:12
25	Matiu 16:13-17:9
26	Matiu 17:10-27
27	Matiu 18:1-22
28	Matiu 18:23-19:12
29	Matiu 19:13-30
30	Matiu 20:1-28
31	Matiu 20:29-21:22

February

date	Scripture
1	Matiu 21:23-46
2	Matiu 22:1-33
3	Matiu 22:34-23:12
4	Matiu 23:13-39
5	Matiu 24:1-28
6	Matiu 24:29-51
7	Matiu 25:1-30
8	Matiu 25:31-26:13
9	Matiu 26:14-46
10	Matiu 26:47-68
11	Matiu 26:69-27:14
12	Matiu 27:15-31
13	Matiu 27:32-66
14	Matiu 28:1-20
15	Maaki 1:1-28
16	Maaki 1:29-2:12
17	Maaki 2:13-3:6
18	Maaki 3:7-30
19	Maaki 3:31-4:25
20	Maaki 4:26-5:20
21	Maaki 5:21-43
22	Maaki 6:1-29
23	Maaki 6:30-56
24	Maaki 7:1-23
25	Maaki 7:24-8:10
26	Maaki 8:11-9:1
27	Maaki 9:2-29
28	Maaki 9:30-10:12

date	Scripture
1	Maaki 10:13-31
2	Maaki 10:32-52
3	Maaki 11:1-26
4	Maaki 11:27-12:17
5	Maaki 12:18-37
6	Maaki 12:38-13:13
7	Maaki 13:14-37
8	Maaki 14:1-21
9	Maaki 14:22-52
10	Maaki 14:53-72
11	Maaki 15:1-47
12	Maaki 16:1-20
13	Ruku 1:1-25
14	Ruku 1:26-56
15	Ruku 1:57-80
16	Ruku 2:1-35
17	Ruku 2:36-52
18	Ruku 3:1-22
19	Ruku 3:23-38
20	Ruku 4:1-30
21	Ruku 4:31-5:11
22	Ruku 5:12-28
23	Ruku 5:29-6:11
24	Ruku 6:12-38
25	Ruku 6:39-7:10
26	Ruku 7:11-35
27	Ruku 7:36-8:3
28	Ruku 8:4-21
29	Ruku 8:22-39
30	Ruku 8:40-9:6
31	Ruku 9:7-27

date	Scripture
1	Ruku 9:28-50
2	Ruku 9:51-10:12
3	Ruku 10:13-37
4	Ruku 10:38-11:13
5	Ruku 11:14-36
6	Ruku 11:37-12:7
7	Ruku 12:8-34
8	Ruku 12:35-59
9	Ruku 13:1-21
10	Ruku 13:22-14:6
11	Ruku 14:7-35
12	Ruku 15:1-32
13	Ruku 16:1-18
14	Ruku 16:19-17:10
15	Ruku 17:11-37
16	Ruku 18:1-17
17	Ruku 18:18-43
18	Ruku 19:1-27
19	Ruku 19:28-48
20	Ruku 20:1-26
21	Ruku 20:27-47
22	Ruku 21:1-28
23	Ruku 21:29-22:13
24	Ruku 22:14-34
25	Ruku 22:35-53
26	Ruku 22:54-23:12
27	Ruku 23:13-43
28	Ruku 23:44-24:12
29	Ruku 24:13-53
30	Ioni 1:1-28

date	Scripture
1	Ioni 1:29-51
2	Ioni 2:1-25
3	Ioni 3:1-21
4	Ioni 3:22-4:3
5	Ioni 4:4-42
6	Ioni 4:43-54
7	Ioni 5:1-23
8	Ioni 5:24-47
9	Ioni 6:1-21
10	Ioni 6:22-40
11	Ioni 6:41-71
12	Ioni 7:1-29
13	Ioni 7:30-52
14	Ioni 7:53-8:20
15	Ioni 8:21-30
16	Ioni 8:31-59
17	Ioni 9:1-41
18	Ioni 10:1-21
19	Ioni 10:22-42
20	Ioni 11:1-53
21	Ioni 11:54-12:19
22	Ioni 12:20-50
23	Ioni 13:1-30
24	Ioni 13:31-14:14
25	Ioni 14:15-31
26	Ioni 15:1-27
27	Ioni 16:1-33
28	Ioni 17:1-26
29	Ioni 18:1-24
30	Ioni 18:25-19:22
31	Ioni 19:23-42

date	Scripture
1	Ioni 20:1-31
2	Ioni 21:1-25
3	Kyaiqa Varora 1:1-26
4	Kyaiqa Varora 2:1-47
5	Kyaiqa Varora 3:1-26
6	Kyaiqa Varora 4:1-37
7	Kyaiqa Varora 5:1-42
8	Kyaiqa Varora 6:1-15
9	Kyaiqa Varora 7:1-29
10	Kyaiqa Varora 7:30-50
11	Kyaiqa Varora 7:51-8:13
12	Kyaiqa Varora 8:14-40
13	Kyaiqa Varora 9:1-25
14	Kyaiqa Varora 9:26-43
15	Kyaiqa Varora 10:1-33
16	Kyaiqa Varora 10:34-48
17	Kyaiqa Varora 11:1-30
18	Kyaiqa Varora 12:1-23
19	Kyaiqa Varora 12:24-13:12
20	Kyaiqa Varora 13:13-41
21	Kyaiqa Varora 13:42-14:7
22	Kyaiqa Varora 14:8-28
23	Kyaiqa Varora 15:1-35
24	Kyaiqa Varora 15:36-16:15
25	Kyaiqa Varora 16:16-40
26	Kyaiqa Varora 17:1-34
27	Kyaiqa Varora 18:1-21
28	Kyaiqa Varora 18:22-19:12
29	Kyaiqa Varora 19:13-41
30	Kyaiqa Varora 20:1-38

date	Scripture
1	Kyaiqa Varora 21:1-16
2	Kyaiqa Varora 21:17-36
3	Kyaiqa Varora 21:37-22:16
4	Kyaiqa Varora 22:17-23:10
5	Kyaiqa Varora 23:11-35
6	Kyaiqa Varora 24:1-27
7	Kyaiqa Varora 25:1-27
8	Kyaiqa Varora 26:1-32
9	Kyaiqa Varora 27:1-20
10	Kyaiqa Varora 27:21-44
11	Kyaiqa Varora 28:1-31
12	Romeni 1:1-17
13	Romeni 1:18-32
14	Romeni 2:1-24
15	Romeni 2:25-3:8
16	Romeni 3:9-31
17	Romeni 4:1-12
18	Romeni 4:13-5:5
19	Romeni 5:6-21
20	Romeni 6:1-23
21	Romeni 7:1-14
22	Romeni 7:15-8:6
23	Romeni 8:7-21
24	Romeni 8:22-39
25	Romeni 9:1-21
26	Romeni 9:22-10:13
27	Romeni 10:14-11:12
28	Romeni 11:13-36
29	Romeni 12:1-21
30	Romeni 13:1-14
31	Romeni 14:1-23

date	Scripture
1	Romeni 15:1-21
2	Romeni 15:22-16:7
3	Romeni 16:8-27
4	1 Korinti 1:1-17
5	1 Korinti 1:18-2:5
6	1 Korinti 2:6-3:4
7	1 Korinti 3:5-23
8	1 Korinti 4:1-21
9	1 Korinti 5:1-13
10	1 Korinti 6:1-20
11	1 Korinti 7:1-24
12	1 Korinti 7:25-40
13	1 Korinti 8:1-13
14	1 Korinti 9:1-18
15	1 Korinti 9:19-10:13
16	1 Korinti 10:14-11:1
17	1 Korinti 11:2-16
18	1 Korinti 11:17-34
19	1 Korinti 12:1-26
20	1 Korinti 12:27-13:13
21	1 Korinti 14:1-17
22	1 Korinti 14:18-40
23	1 Korinti 15:1-28
24	1 Korinti 15:29-58
25	1 Korinti 16:1-24
26	2 Korinti 1:1-11
27	2 Korinti 1:12-2:11
28	2 Korinti 2:12-17
29	2 Korinti 3:1-18
30	2 Korinti 4:1-12
31	2 Korinti 4:13-5:10

date	Scripture
1	2 Korinti 5:11-21
2	2 Korinti 6:1-13
3	2 Korinti 6:14-7:7
4	2 Korinti 7:8-16
5	2 Korinti 8:1-15
6	2 Korinti 8:16-24
7	2 Korinti 9:1-15
8	2 Korinti 10:1-18
9	2 Korinti 11:1-15
10	2 Korinti 11:16-33
11	2 Korinti 12:1-10
12	2 Korinti 12:11-21
13	2 Korinti 13:1-14
14	Karesia 1:1-24
15	Karesia 2:1-16
16	Karesia 2:17-3:9
17	Karesia 3:10-22
18	Karesia 3:23-4:20
19	Karesia 4:21-5:12
20	Karesia 5:13-26
21	Karesia 6:1-18
22	Epesaasi 1:1-23
23	Epesaasi 2:1-22
24	Epesaasi 3:1-21
25	Epesaasi 4:1-16
26	Epesaasi 4:17-5:2
27	Epesaasi 5:3-33
28	Epesaasi 6:1-24
29	Piripai 1:1-26
30	Piripai 1:27-2:18

date	Scripture
1	Piripai 2:19-3:6
2	Piripai 3:7-4:1
3	Piripai 4:2-23
4	Korosi 1:1-20
5	Korosi 1:21-2:7
6	Korosi 2:8-23
7	Korosi 3:1-17
8	Korosi 3:18-4:18
9	1 Tesaronaika 1:1-2:9
10	1 Tesaronaika 2:10-3:13
11	1 Tesaronaika 4:1-5:3
12	1 Tesaronaika 5:4-28
13	2 Tesaronaika 1:1-12
14	2 Tesaronaika 2:1-17
15	2 Tesaronaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitaasi 1:1-16
27	Taitaasi 2:1-14
28	Taitaasi 2:15-3:15
29	Pirimoni 1:1-25
30	Hivuru 1:1-14
31	Hivuru 2:1-18

date	Scripture
1	Hivuru 3:1-19
2	Hivuru 4:1-13
3	Hivuru 4:14-5:14
4	Hivuru 6:1-20
5	Hivuru 7:1-19
6	Hivuru 7:20-28
7	Hivuru 8:1-13
8	Hivuru 9:1-10
9	Hivuru 9:11-28
10	Hivuru 10:1-18
11	Hivuru 10:19-39
12	Hivuru 11:1-16
13	Hivuru 11:17-31
14	Hivuru 11:32-12:13
15	Hivuru 12:14-29
16	Hivuru 13:1-25
17	Iemisi 1:1-18
18	Iemisi 1:19-2:17
19	Iemisi 2:18-3:18
20	Iemisi 4:1-17
21	Iemisi 5:1-20
22	1 Pitaa 1:1-12
23	1 Pitaa 1:13-2:10
24	1 Pitaa 2:11-3:7
25	1 Pitaa 3:8-4:6
26	1 Pitaa 4:7-5:14
27	2 Pitaa 1:1-21
28	2 Pitaa 2:1-22
29	2 Pitaa 3:1-18
30	1 Ioni 1:1-10

date	Scripture
1	1 Ioni 2:1-17
2	1 Ioni 2:18-3:2
3	1 Ioni 3:3-24
4	1 Ioni 4:1-21
5	1 Ioni 5:1-21
6	2 Ioni 1:1-13
7	3 Ioni 1:1-14
8	Iuti 1:1-25
9	Qovarama Kyora 1:1-20
10	Qovarama Kyora 2:1-17
11	Qovarama Kyora 2:18-3:6
12	Qovarama Kyora 3:7-22
13	Qovarama Kyora 4:1-11
14	Qovarama Kyora 5:1-14
15	Qovarama Kyora 6:1-17
16	Qovarama Kyora 7:1-17
17	Qovarama Kyora 8:1-13
18	Qovarama Kyora 9:1-21
19	Qovarama Kyora 10:1-11
20	Qovarama Kyora 11:1-19
21	Qovarama Kyora 12:1-18
22	Qovarama Kyora 13:1-18
23	Qovarama Kyora 14:1-20
24	Qovarama Kyora 15:1-8
25	Qovarama Kyora 16:1-21
26	Qovarama Kyora 17:1-18
27	Qovarama Kyora 18:1-24
28	Qovarama Kyora 19:1-21
29	Qovarama Kyora 20:1-15
30	Qovarama Kyora 21:1-27
31	Qovarama Kyora 22:1-21